


Iroaquerari Itioncacaantaqueca Aapani Irioshi:

Tsavetacoquerica Amajirote Jesoquirishito



New Testament in Caquinte (PE:cot:Caquinte)

**Iroaquerari Itioncacaantaqueca Aapani Irioshi: Tsavetacoquerica Amajirote
Jesoquirishito
New Testament in Caquinte (PE:cot:Caquinte)**

copyright © 2008 Wycliffe Bible Translators, Inc.

Language: (Caquinte)

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-12-21

PDF generated using Haiola and XeLaTeX on 18 Apr 2025 from source files dated 29 Jan 2022

a31aed44-e5b1-5420-8e3c-ccef224c4988

Contents

MATEO	1
MARICOSHI	85
IROCASHI	137
JOANCA	228
YANTAJIGUICA	285
IROMAQUITICA	357
1 CORINTOQUITICA	395
2 CORINTOQUITICA	431
GARASHIAQUITICA	454
EPESOQUITICA	466
PIRIPOQUITICA	479
COROSAQUITICA	488
1 TESARONICAQUITICA	496
2 TESARONICAQUITICA	503
1 TIMOTEO	508
2 TIMOTEO	518
TITO	525
PIREMONI	529
EVEREOJIA	532
SANTIAGO	559
1 PEERERO	568
2 PEERERO	578
1 JOANCA	584
2 JOANCA	592
3 JOANCA	594
JORASHI	596
YONIGAAJIGUEQUERICA JOANCA	599

QUENQUETSATSARENTSI OGANEJENCATATSICA ITIONCAQUECA MATEO

Antsatantaquemparoca

Ocatica iroguenti antsatantaquemparoca itioncaqueca Mateo itioncacotaquerigueti Jesoquirishito. Mateo iriguenti jorio guintenitanquitsica quepatsiqui icantajitica Garirea. Iriguenti itigarancane Jesoshi. Mateo ipajita aisa Irevi. Tequeratagueti incajemeriji Jesoshi iroguijatanaqueri, iriguenti amanaguequerica igonorolja imentaquit-sitepae cameetsaniji incapiocaqueneri majirontatsica Iromaquitica omperajiacarica joriojia. Irirajia tsatatsica iquenquejajiaque itioncaquero Mateo ocatica tsavetacoquerica Jesoquirishito ichoocatigueti quepatsiqui iguintenijiacagueti ichoviquijiani Ishiraeri. Tecatsi tsamajaterone ajagantsini itioncaqueroqueti, cotanquitsi chooca quenquejanquitsica arica itioncaquero ajagantsiniqui 70. (Oratica ajagantsi ivoaquegueti Jesoshi iro icantajitica ajagantsini 1.)

Mateo yonigaantaqueri Jesoshi iriotaque majirontatsica. Itioncaciaqueneri irapijoriojiateni intsajiaqueniji iriraquea Jesoshi irio itigarancaqueca Aapani Irioshi, irira icantajitica Meshiashi, iriotaque itsavetacotsitacaca tsavetantajiatsica coramani itioncaqueroqueti paperiqui icantajitica *Iroquetinica Itioncacaantaqueca Aapani Irioshi (el Antiguo Testamento)*. Oraquea ocanqueca otsapaqui 1.1 onetsanataquero icanquerica Aapani Irioshi irira Taavini aisa Averaameni choviquijianaquerica Jesoshi (Jen. 15.18; 2 Sam. 7.8-16). Mateo yonigaacajiri aisa Jesoshi irio tsatacaantantatsica.

Chooa 5 itsatacaacajica Mateo itsavetacotaquerigueti Jesoshi: (1) imajirontagueti Aapani Irioshi (capituroqui 5-7); (2) icamantajiaquerica Jesoshi itigarancanejia taa opajita intsavetantajiaque intigarancajiaquerigueti (cap. 10); (3) iquejetacaacaca Jesoshi itsatacaanquegueti (cap. 13); (4) itsavetacotaquero quero incojiaquempani quemisantajiaquerica Jesoshi (cap. 18); (5) itsavetacotaquero quero oncoguetanaquempani onteroncanajempagueti quepatsi aisa quero ocoani oparianacagueti imajirontacagueti Aapani Irioshi (cap. 13-25).

Choviquijianaquerica Jesoquirishito (Irc. 3.23-38)

¹ Imaicaquea nontioncacoguequeroqueate ipajiguetaqueti paesatinipaequitica choviquijianaquerica Jesoquirishito, ichoviquini Taavini aisa ichoviquini Averaameni.

² Iriraquea Averaameni irijanincari Ishaaco.

Irira Ishaaconi irijanincari Jacovo.

Irira Jacovoni irijanincari Joraa aisa iriguentijeguijiate.

³ Irira Joraani yoacaaquero Tamare, irijanintacari Parese aisa Tsara.

Irira Pareseni irijanincari Eserome.

Irira Eseromeni irijanincari Arame.

⁴ Irira Arameni irijanincari Aminaravo.

Irira Aminaravoni irijanincari Naasone.

Irira Naasoneni irijanincari Saramoni.

⁵ Irira Saramonini irijanincari Voose. Oratica iriniro opajita Iraava.

Irira Vooseni irijanincari Overi. Oratica iriniro opajita Iroti.

Irira Overini irijanincari Isai.

⁶ Irira Isaini irijanincari majirontatsica Taavi.

Irira majirontatsica Taavini irijanincari Saromoni. Oratica iriniro Saromonini iroguenti imanquigavetanica Oriashi.

⁷ Iira Saromonini irijanincari Irovoame.

Iira Irovoameni irijanincari Aviashi.

Iira Aviashini irijanincari Asa.

⁸ Iira Asani irijanincari Josapate.

Iira Josapateni irijanincari Jorame.

Iira Jorameni ichoviquivaetanaqueri Oshiashi.*

⁹ Iira Oshiashini irijanincari Jotame.

Iira Jotameni irijanincari Acashi.

Iira Acashini irijanincari Esequia.

¹⁰ Iira Esequiani irijanincari Manaseshi.

Iira Manaseshini irijanincari Amoni.

Iira Amonini irijanincari Joshiashi.

¹¹ Iira Joshiashini ichoviquivaetanaqueri Jeconiashi† aisa iriguentijeguijiate coramaniqui icoraquecoraqueitashiquerigueti coaretajia Vavironiaquitica yashintajiacarigueti maasano ishiraerijia yaajitanaqueri Vavironiaqui oshequi.‡

¹² Iroompa iriraquea Jeconiashini irijanincari Saratieri.

Iira Saratierini ichoviquivaetanaqueri Sorovaveri.§

¹³ Iira Sorovaverini irijanincari Aviote.

Iira Avioteni irijanincari Eriaquime.

Iira Eriaquimeni irijanincari Asoro.

¹⁴ Iira Asoroni irijanincari Saroco.

Iira Saroconi irijanincari Aquimo.

Iira Aquimoni irijanincari Eriote.

¹⁵ Iira Eriotenini irijanincari Eriasare.

Iira Eriasareni irijanincari Matani.

Iira Matanini irijanincari Jacovo.

¹⁶ Iira Jacovoni irijanincari Jose manquigataroca Maria. Iroatimpa iroguenti iriniro Jesoshi icantajiqueca aisa Quirishito.*

¹⁷ Maasano tioncacojianquitsica ipajiguetaqueti ocaniqui icaravaeque 14 ipariapanajanta ichooaquegueti Averaameni yarejevaecaroquea ichooaquegueti Taavini. Ariquea iquempejiaca aisa icarajiaque 14 maasano tioncacojianquitsica ipajiguetaqueti ipariapanajantaroquea ichooaquegueti Taavini icaravaeque yaajitanaquerigueti Vavironiaqui. Iroompaquea ari iquempejiaca aisa icarajiaque 14 maasano tioncacojianquitsica ipajiguetaqueti ipariapanajantaroquea yaajitanaquerigueti Vavironiaqui icaravaeque ichooaquegueti Quirishito.

Ivoaquegueti Jesoquirishito (Irc. 2.1-7)

* **1:8** Iira joriojia incanquegueti “iririni” iragavejaque incantacoqueri ivaesatinite. Acaniqui Mateo tee intsavetacoteriji maasano ivaesatinite Jesoshi, mana itioncogogarantaqueri. Pamenero 2 Coronica 21.4–26.23 itsavetacojitaquerigueti irijanite **Jorameni** pajitatsica Ocoshiashi (22.1), irijanite Ocoshiashi pajitatsica Joashi (22.11; 24.1), irijanite Joashi pajitatsica Amashiashi (24.27). Iira Amashiashini iriotaque iriri **Oshiashi** (26.1). † **1:11 Ichoviquivaetanaqueri Jeconiashi**. Pamenero 2 Coronica 36.1–9 itioncacojitaquerigueti irijanijiate Joshiashi. Iira Joshiashi irijanincari Joacashi aisa Eriaquime. Iiratica Eriaquime ipajijitajiri Joashime. Iira Joashime irijanincari Joaquinu icantajitica aisa Jeconiashi. ‡ **1:11 Yaajitanaqueri Vavironiaqui oshequi**, cotanquitsiquea aparopae choocaguetajatsi. § **1:12** Iira **Saratierini** irijanincari Peraiashi iriri **Sorovaveri** (pamenero 1 Coronica 3.17–19). * **1:16 Quirishito**. Iguenquetsatsarequi guiriegojia incanquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Iira Quirishito iriotaquequea itsavetacotsitacaca tsavetantajitsica coramanitica intigarancaque Aapani Irioshi impeaquempaniji Imajirojiate maasano.

¹⁸ Imaicaquea nontsavetacotantaqueriqueate Jesoquirishito queroca ocotacani iroaqueragueti ivoaquegueti. Coramaniquea ochooacque manquigarentsi pajitatsica Maria. Iriguentiquea cashiacaro shirampari pajitatsica Jose. Iroompaquea tequeratatirajitari quisho irogueroji ichoocatashica irijanite, iriguentiquea choocatacaqueri Ishire Aapani Irioshi.

¹⁹ Iriraquea Jose inintaveca irovashiantajerome, iriguentiquea comajamajatanquitsica, cotanquitsiquea ipintsatacocaroquea jero teeca irinintantempaji inquenquetsatacoqueroquea iroguipashiventajaquero, manaqueate iquenquejavetanacaquea irovashiantashitajemparo intati, aatoqueate icanti taa opajita irovashiantantanajemparoca.

²⁰ Cotanquitsiquea irooquea iquenquejavetanacaquea imaica, yonigaapojacariquea irashivantite Amajirote iguimaanequi, icanqueri: “Jose, ichoviquitanaqueca Taavini, aato pitsaroacagaro pimanquigatemparo Maria. Aritarite iriraquea irijanite choocatanquitsica intsompogui iriguentiquea choocatacaqueriquea Ishire Aapani Irioshi, irootaquequeate ichoocatantacaca.

²¹ Oncoajicatapojaquegueti irivoaquegueti pimpajitsitempari Jesoshi,[†] irioriji irio-taquequea meshiajaquerineca igonorojia aatonijite icatsimatimentiritsiquea Aapani Irioshi icovaeguishecagueti.”

²² Ariquea oquejetaca imaica cameetsanijite onetsanamajaquempanijite icanqueca Amajirote paesatoniqui icantashirentaquerigueti tsavetantatsicani, icanque:

²³ “Ora majinaro ontsaraquitashitanaquempa, ariquea inchoocataquequea irijanite. Iriatimpa impajijiteri Emanoere” (ocanquequea: “Iconoajiacaji Aapani Irioshi”).

²⁴ Iroompaquea ipityaquirejanaji Jose iquemisanqueriqueate irashivantite Amajirote, iroompa ariquea yoanaque yaaquitiroquea Maria itsipatanacaro itsovironaqueiqui.

²⁵ Cotanquitsiquea teequea quisho irogueroji arejevaetaca ivoaquegueti irijanite opariacaca. Ariquea ipajiqueri Jesoshi.

2

Savicaventajiguirica impoquirojite

¹ Oraquea ivoaquegueti Jesoshi Verenequi Joreaque chooca imajirojiate Joreajiaquitica pajitatsica Erorishi. Iroompaquea icoraquecoraqueitaquequea Jerosarequi shirampari-pae icantajitica maagopae savicaventajiguirica impoquirojite intsatantajiaquem-paca taaca opajitapae. Iriatimpajia iquenaquenaipojaque isotoguigueti catsirincaiteri. Oraquea yarejerejeipojacagueti

² icoacojiapojiriquea choocajiatsica ocaniqui icanqueri:

—¿Querocaquea ichoocaqueni oraniqui imajirote joriojia voanquitsica? Namenajia-queriqueate irimpoquirote isotoashitapojacaquea ontaniqui isotoguigueti catsirincaiteri notsatantajiacaca voaque, nocoraquecoraqueitantajiacaca nogueroventajiaquem-pariquea noshineventajiaquitempariqueate.

³ Iroompaqueate iquemavaquegueti majirontatsica Erorishi, ariquea ishoshoguitevaetanacaquea, ariqueate iquempejianaca maasanojia choocajiatsica Jerosarequi.

⁴ Incajaranquiguitetanaquegueti, iriatimpa icajemacaantajiaqueriquea maasano saserorotejia anaantajanquitsica aisa tsatacaajiguirica joriojia itioncacotanaqueca

[†] **1:21 Jesoshi.** Iroguenti iguenquetsatsare guiriego (*Jesous*), ari oquenapojaque iguenquetsatsarequi evereo, icanquequea *Yeshua*, ocanque: “Yamitacotantaque Yave”, “Yaantavaji Yave”, aisa “Imeshiantaque Yave”.

Moishishini coramani, icoacojiaqueriquea queroca oraniqui irivoaque Quirishitotantquitsica.*

⁵ Iriatimpajia icanquequea:

—Iroguenti irivoaque ontaniqui Verenequi Joreaqui, ariquea icanque tsavetantatsica itioncacotaquerogueti coramani icanquerica Aapani Irioshi, icanque:

⁶ ‘Aviatimpa Verene† choocatatsica iguepatsitequi Joraani,

aatoquea anajaigumpi otsipapae guinteninintsi iguintenijiagueti oshequi Joreaquitica,

irisotoampojectarite majirontanquitsineca

peanquitsineca Imajirote maasanojia ishiraerijia nashintajiacaca.’

⁷ Ariqueate Erorishi santicoji yoaquero icajemacaantsitari maagopae, teequeate quericaca incamanque. Yarejerejeipojacagueti icoacojiavaqueriquea icantajiavaqueri:

—¿Querocaquea savincaguiteri pamentajiacari isotoampojacaca impoquiro?

⁸ Iroompaquea iquemavaquegueti icamantaquerigueti itigarancajiaqueriquea Verenequi icantajiavaqueri:

—Intsijate poajianaque pamenamajaguequiterijate, iroompa pamenajiaquerigueti pincoraquetajeja pincamantajiapojajenaja cameetsanijite noanaquenijite naatimpa nogueroventempariqueate noshineventempari.

⁹ Irooquea iquemajiaquerigueti yoayoaitanaquequea Verenequi. Iiraquea impoquiro yamenajiaqueca iroaqueragueti ontaniqui iguinteniqui ijivaqueriquea iroompaquea iquishojencatapojiquea otampaticataquegueti tsovironaqui qui ichoocatacotantacaca Jesoshi.

¹⁰ Oraquea yamenajiajirigueti impoquiro, ariquea icohicoitanaca ishinejianaca icanca.

¹¹ Iroompaquea yarejerejeipojacarogueti tsovironaqui iquijaquijaitanaquequea intsompogui inejajiapojiriquea Jesoshi, otsipatacari Maria, iriniro. Igueroventajiapojacari quea ishineventajiapojacari. Iroompaquea itanarejacoguetapojiro yamajiaquenerica yojocajiaqueneri ooro, casancavaneri, aisa otsipa casancari icantajitica mira.

¹² Iroompaquea imaajiaquegueti icamantajiqueri iguimaanequi aatonijite yoayoaitanajitsiquea Erorishiqui, irootaquequea iquenapitsatantajianajarica otsipaqui quenavoquirontsi, yoayoaitanaji iguinteniqui.

Jose ishiacaanacari Jesoshi ontaniqui Ejepitoqui

¹³ Iroompaquea yoayoaitanajigueti iriatimpajia, iriraquea irashivantite Amajirote yonigaapojacari Jose iguimaanequi, icantiriquea:

—Intsija imaica pincatianaqueja paanaqueriquea chaajaniquitirajaca aisa iriniro poanaqueshiatsi pishianaqueshiatsi ontaniqui osamani Ejepitoniqui. Pinchoocateja ontaniqui aapojajempagueticquea noncantantajempica pincoraquetantajempaca, iramenacaantaguequeritari majirontatsica Erorishi irimetojacaanqueriniji.

¹⁴ Ariqueate icatiapanajanta, yaanaqueriquea chaajaniquitirajaca aisa iriniro, yoanincanaquequea pitsecariqui yoayoaitanaque Ejepitoqui.

¹⁵ Ichocaguitiniquea ontaniqui aapojagueticquea imetojanajigueti Erorishi. Ariquea iquempejiaca imaica cameetsanijite onetsanamajaquempanijite icanqueca Aapani

* **2:4 Quirishitotantquitsica.** Iguenquetsatsarequi guiriegojia icanquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempaniji Imajirojiate maasano. † **2:6** Iguenquetsatacaquero guinteninintsi **Verene** quejetaca iroguenti caquinte.

Irioshi coramaniqui itioncacaquerica tsavetantatsica icanque: “Ichoocavetaca Irijani Ejepitoqui, nocajemajiri.”‡

Erorishi imetojacaantajiaqueriquea chaajaniquirija

¹⁶ Iroompaquea iriraquea Erorishi yamenaquegueti teequea incoraquejiaje maagopae icatsimatsitanacaquea, ariquea itigarancajiaqueri coaretajia irimetojajiaqueriquea maasano chaajaniquirija guinteninijianquitsica Verenequi irioca aisa guinteninijianquitsica irooshiguetanquitsica, interoncajiaqueriquea maasano iriaqueraca voaguetanquitsica irarejevaequempariquea incaravaequeriquea ajagantsitacopiananquitsica mavite. Iroguentiquea ipampiatsitaqueri icantajiaqueca maagopae ivoantacaca.

¹⁷ Ariquea iquempejiaca imaica inetsanajitaquero itioncacotanaqueca coramani tsavetantatsica Jeremiashini, icanque:

¹⁸ “Iquemajiquero ontaniqui Iramaqui

ocajemavaequequea, ocantacoguitani iraaguitani, iroguenti ochoviquijiani Iraquereni, iraacoguitiriniquea irijanijiate. Tee oninteji iroguishinejajitajero, teetari inchoocajiajeji irijanijiate.”

¹⁹ Ocoramanitapojaquegueti imetojanajigueti Erorishi, iriraquea irashivantite Amajirote yonigaapojajari Jose iguimaanequi ontaniqui Ejepitoqui,

²⁰ icanti: “Iintsijate imaica pincatianaje paanaquerija chaajaniquitirajaca aisa iriniro, poanajequea ontaniqui Ishiraeriqui, metojanajitari nintajavetanquitsica irimetojajiaquerimequea.”

²¹ Ariquea icatianaja, yaanajiri chaajaniquitirajaca aisa iriniro, yoanaji Ishiraeriqui.

²² Cotanquitsiquea iquemacoqueriquea Arequerao irijanite Erorishini ipejaaquea majirontatsica Joreaquei iquempetajari iririni, ariqueate icotanaca itsaroanaquequea teequea irininteji iroanajequea ontaniqui. Iroompaquea icamantajitiri iguimaanequi aatoniji yoanaji ontaniqui, irootaquequea yoantanajaca Garireaquei.

²³ Yarejetapojaroquea ontaniqui ichoocatantapojaro guinteninintsi icantajitica Nasare. Ariquea iquejetaquerogueti imaica onetsanatanaca icantaguetaqueca tsavetantajatsica, icanquequea: “Incantajiteri Nasarequitica.”

3

Joanca Viñacajatantatsica itsavetantavaequequea oquitamampororoitapojaquegueti (Mr. 1.1-8; Irc. 3.1-9, 15-17; Jn. 1.19-28)

¹ Aapojacagueti savincaguiteri yoanaquequea Joanca Viñacajatantatsica itsavetantavaequequea ontaniqui oquitamampororoitapojaquegueti Joreaquei,

² icanque: “Pincantashitatijaianaquempaja povashiantajianaquerojate pipeacaaguishetaca, irooshipojitarite aapojaquempaquea irimajirontaquempa acaniqui Inquitequitica.”

³ Iriraquea Joanca iriotaque itsavetacotaqueca tsavetantatsica Isaiashini coramani, icanquequea:

“Inquenquetsataquequea oquitamampororoitapojigueti iririjencani, incanquequea: ‘Pinetsanatahijavaquempari Amajirote inquenantapojempaca, pintanarejagueteneri iguenavoquiropae ontampaticapoquitantanaquempaca.’ ”☆

⁴ Iroguenti iquitsaataca Joanca quitsaarentsi ipecaajitacaca imae cameyo, aisa ichompimashitacotariquea imeshinatsa. Iroguentiquea ishecataca quejevatarica shapipiiquiti aisa earotoja.

‡ 2:15 Icantsitacaroquea Aapani Irioshi coramaniqui tequeratagueti aguempaji, cotanquitsiquea icanquero quejeticata avisanaque. Os. 11.1. ☆ 3:3 Is. 40.3.

⁵ Iroompaquea yoayoaitashitanaqueri icaramirincavaetanaquequea caquinteja guinteninitantaroca Jerosarequi, iriguentijiaca itsipajia Joreaquitica, iriguentijiaca aisa irooshitacojiacaroca ojaaquiniqui pajitatsica Jororane.

⁶ Irooqueate iquemajipojaquerigueti, ariqueate icohicoitanaca itsaveacojianaqueroquea maasanopae igovaeguishereja, ariquea iviñacajajiaqueriquea Joanca Jororanequi.

⁷ Ariquea icoraquejiavetaca oshequini pariseojia, aisa saroseojia iviñacajatanaquegueti. Cotanquitsiquea yamenajivaquerigueti, icantajivaqueri: “¡Quejejaquempiquea irijanijiate sanatari! ¿Taate cantajiaquempi picoraquecoraqueitan-tacaca ocaniqui noviñacajajiaquempiquea aatonijite icatsimajiguimpiquea Aapani Irioshi oncoramanitapojajegueti incatsimatimentajiaquerigueti maasano igovaeguishereja?”

⁸ Iintsijate pinquempetajemparo inchato oitsoquitananquitsica cameetsa, pinet-sanamajajianaquempaja iramenajiaquempinijite maasano arimajaca picantashitajianaja povashiantajianajiro pantaguishejiavetacaca.

⁹ Aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamenajigueroja oratica mapiporoqui. Irininquegueti Aapani Irioshi iragavejaquequeate impeacaajajemparoquea ichoviquivaejianaqueca Averaameni.

¹⁰ Jac, yaajitiro poshontyo, itsitijitanaquero inchaquijitaquero ovari maasano inchato teeca oncameetsateji oitsoqui, ariquea intajaiquero paamariqui.

¹¹ “Naatimpa iroguenti nantaque noviñacajatantajiaquempiro oja iramenantajiquem-paroca arimajaca picantashitajiananaca povashiantajianajiroquea pipeacaaguishetacaca, cotanquitsiquea incoraquepoje impoitapojenaneca caaviji yanaaquenaquea ya-gavejamajati. Ooshiatsi, aatotarite noquempejitaritsiquea iriatimpa nompeaquem-pame amiquerineca aitanaquerineca igaviguitire. Iriatimpa inquempetacaantaquem-paro iroviñacajatantajiaquempiri Ishire Aapani Irioshi aisa paamari.*

¹² Incoraquepojaquegueti iroashiguetajempariquea queri tsaromentamajacarica. Inquempetanaquemparoquea aguerogueti oitsoqui, asagorejitemparo, ampishoncava-queeroquea oncoraquejencaquegueti chovigajenca, aanaqueroquea osagoma, oveg-uisseanaquempa oitsoqui. Aguijaavaqueroquea shimatoqui anquempoguijitemparo-quea. Oraquea osagoma antaitemparoquea. Ariquea inquempetaquempaquea Ama-jirote incapioajipojaqueriquea tsaromentamajacarica intsipatsipaitanajempari jeno-qui ichoocatigueti Aapani Irioshi. Iriraquea teeca intsaromentajiguempariji intigaran-caqueriquea camorecariqui teeca ontsivacavaete, incoquempaniquea irantsipevaeji-aquempaquea.”

Iviñacajajiqueri Jesoshi
(Mr. 1.9-11; Irc. 3.21-22)

¹³ Iroompaquea iquenapojaque Jesoshi Garireaquei yoanaque Jororanequi ichoocaquegueti Joanca cameetsaniji iriviñacajatavaqueri.

¹⁴ Cotanquitsiquea teequea irinintavetempaji Joanca iriviñacajateri, icantavaqueri:
—Cameetsa aviguenti viñacajapojenane naatimpa. ¿Arimajampa picoraquetashiquena naatimpa noviñacajatempi?

¹⁵ Icanque Jesoshi:

—Aritaquequeate onquejetaquempaja imaica cameetsanijite anetsanajiaqueronijite maasano ininqueca Aapani Irioshi.

Ariquea icanquequea Joanca:

* **3:11 Paamari** oquenquetsatacotaquero mavitepae. (1) Pamenero otsapa 12 acaniqui ocantacoquerogueti camorecari intaantajitaquempaca caarica netsanatiro ininqueca Aapani Irioshi. (2) Pamenero aisa Ya. 2.3 ocantacoquerogueti icoraquepojaquegueti Ishire yamenajiquero quejevetaca paamari. (3) Pamenero aisa 1 Co. 3.13 ocantacoquerogueti iramenantajitaquemparogueti yantaguetaqueca maasano caquinte.

—Iintsijate.

¹⁶ Ariquea iviñacajataqueri. Iroompaquea yarejepojajatigaro Jesoshi otsapijaqui, ariqueate ocotanaca otanarejanacaqueate inquite, yameniriqueate yampiguiricas-hipojacariquea Ishire Aapani Irioshi iquejetapojacariquea emoreni. Yagatapojaqueri.

¹⁷ Iroompaquea iquenquetsajencajitanaque jenoqui inquitequi, icanque:

—Iricatica irio Irijani nopintsamajatacaca, noshineventamajatacari.

4

Inintavecaquea ampatsini irantacaaquerime Jesoshi teeca irininteji Aapani Irioshi (Mr. 1.12-13; Irc. 4.1-13)

¹ Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti cameetsanijite iramenamajaquerinijite imajirote ampatsini arica iragavejaque irantacaaqueri teeca irininteji Aapani Irioshi.

² Ariquea ichooaque oraniqui 40 savincaguiteri, teequea irishecatempaji. Arimpa itaseamajatacaca.

³ Ariquea iquempajipojacari irira nintatsica incovaeguishedacaante, icantiriquea:

—Iintsija arimajaguete aviguentica Irijanite Irioshi iintsijate pincanteroja ocatica mapi ompeanaquempata pan pishecataquempaca.

⁴ Cotanquitsiquea Jesoshi icantiriquea:

—Choocatarite otioncacoguete ocanque: ‘Teequea aparo ontampishitacaanteji ishica caquite, jero aisa maasano icanqueca Aapani Irioshi.’

⁵ Iroompaquea ariquea yaanaqueriquea Jerosarequi, oratica guinteninintsi yashincaca Aapani Irioshi, icatiacaapojacariqueate teemporoqui* itsaromentantajitarica Aapani Irioshi ochoviinatapojaquete ocaravaequequea jenoqui ocanca, icanqueriquea:

⁶ —Iintsija arimajaguete aviguentica Irijanite Irioshi, iintsijate pisapocanaquejate isaviji, ocanquetari itioncacojiqueroguete ocanque:

‘Intigarancajiaquempiri Irioshi irashivantijitete, quisho iroaroaitanaquempi.’

‘Irajiricanaquempiquea irantsomajanaquempi aatonijite pitsitincapojaro mapi.’

⁷ Icantsitanaca Jesoshi icanqueriquea:

—Cotanquitsiquea choocatarite itioncacojiqueroguete aisa ocanquequea: ‘Aatoquea pamenantaritsi Majirontamajatatsica Pirioshite.’

⁸ Iroompaquea yaanaqueriquea otsempiqui jmm agasataanquitsica yonigaaguetaqueri maasanopae quepatsi yashincaca majirontaguetsica aisa maasanopae yashintajiacaca.

⁹ Icanqueriquea:

—Arigueteja poguerovenquena pintsarovenquena, nojocaguetaquempiroquea maasanopae pamenaguetaqueca imaica.

¹⁰ Icantsitanajaquea Jesoshi aisa icanqueri:

—Pijatequetiroshine, Satanashi, choocatarite otioncacoguete ocanquequea: ‘Pintsaromentaquemparija Majirontamajatatsica Pirioshite, aparoqueate iriguente pimajirontamajaquempa.’

¹¹ Ariquea yoanaji imajirote ampatsini. Irioquea coraquecoraqueitajatsi irashivantijitete Aapani Irioshi yamitacojiapojajiri.

Iparianacaro Jesoshi itsavetantavaetaque Garireaque (Mr. 1.14-15; Irc. 4.14-15)

* **4:5 teemporo.** Oratica teemporo iroguente inirojegui tsovironaqui choocatatsica Jerosarequi. Irira joriojia iroguente itaantapinitantarica viratsipae intsaromentantajiaquemparica Aapani Irioshi. Pamenero ovaantorite otsapaqui Mt. 21.23.

¹² Iroompaquea iriraquea Jesoshi iquemacoquerigueti Joanca isantanatacojitaqueri, yoanajiquea Garireaquei.

¹³ Cotanquitsiquea teequea inchoocatantajemparoji Nasare, iroguentiquea yoantanaja Caperenao iriguintenitapojajemparo. Oraquea Caperenao iroguenti ochoocaque otsapijaqui iniromotijaqui. Iroatimpa iroguenti ochoocaque iguintenijiacagueti ichoviquijianaqueca Savoroone aisa Nepetari.

¹⁴ Ariquea iquejetaca imaica cameetsanijite irinetsanajiquerijite itionca-cotanaqueca tsavetantatsica Isaiashini coramani, icanque:

¹⁵ “Oraquea iguepatsite Savoroone aisa iguepatsite Nepetari,

choocatanquitsica intatiqueroqui Jororane,

iquenaquenaitantajiacaroquea yoayoaitantapinicarogueti inirojani quantijani:

Garirea ichoocatantajiacaca oshequini teeca irijorijoigueji.

¹⁶ Irirajia pitsecacojiavetanquitsica

inejajiaquero tsirencari tsirencavaetanquitsica;

irirajia guinteninijianquitsica otsimancacojiavetacarigueti metojagantsi

otsirencaguitetacojiaqueri tsirencari.”

¹⁷ Ariquea iparianacaro Jesoshi itsavetantavaetaque, icanque:

—Pincantashitajiaianajempaja povashiantajianajerojate pipeacaaguishetacaca, irooshipojitarite aapojaquempaqueea irimajirontaquempa acaniqui Inquitequitica.

Jesoshi icajemajiaqueri 4 tarajajiatsica impeacaajiaquempari itsatacaaneja

(Mr. 1.16-20; Irc. 5.1-11)

¹⁸ Iroompaquea yoanaquequea Jesoshi oraniqui ishitaravijatanacaro otaravijaqui iniromotija Garirea. Inejajiapojiriquea Shimo (icantajitica aisa Peerero) itsipatacari iriguentijeguite pajitatsica Antirishi, tarajajiaquequea, irootaquequeate isavicaventa-jiguiquea iriatimpajia. Ariquea icantiri:

¹⁹ —Jame poguijaguijaitanaquenajate, imaicaquea irioquea pimpitsocashijianaque-mpa caquinteja, nagavejacaajiaquempiquea pinquejetacaajiajempari shima pan-quitacojiguirigueti.

²⁰ Iroompaquea iriatimpajia yojocapanajantiroquea imantsatsitepae yoguijaguijaitanaqueri.

²¹ Yoayoavetanaca tiijacoñaji ontaniqui irioquea yamenapojiquea Santiago† aisa iriguentijeguite pajitatsica Joanca savisaviitaque quenajarontsiqui inetsanajiaquero-queate imantsatsitepae. Itsipatsipaicari iriri pajitatsica Severo. Iroompaquea iriraquea Jesoshi icanqueriquea Santiago aisa Joanca:

—Jame poguijaguijaitanaquenaja.

²² Taampina yojocajianaqueroquea quenajarontsi aisa iriri, yoguijaguijaitanaque-riquea Jesoshi.

Jesoshi itsatacajiaqueriquea icaramirincavaequequea caquinteja

(Irc. 6.17-19)

²³ Iroompaquea yoanaquequea Jesoshi itsitacaguitejanaquero Garirea itsatacaan-tavaetanaque shinagogapaequi icapiocantajiacaca jorioja, itsavetantaquero Quen-quetsatsarentsi Oganejencatatsica icantajiaqueri quero icotani imajirontaguetei Aa-pani Irioshi. Aisa yogueshiguequeriqueate oshequini joquijiguetanquitsica aague-queriguetei cantashitajiajencaguetanquitsica ashinoncajagantsipae, aisa catsijianquit-sica, jac peamajajianaqueate.

²⁴ Iroompaquea irirajia guinteninijianquitsica osamanipaequitica Shiriaqui iquemacojianaqueriguetei yogueshitantaguetanaque jero yamajiapojaqueneriquea

† **4:21 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaque-roguetei ivajiro ipajitaqueri **Santiago,** itsipa ipajitaqueri **Jacobo.** Mavite oponeaca iguenquetsatsarequi evereo, ipajitaqueri **Yaakob.**

maasano ashinoncajajianquitsica. Iriatimpajia iroguenti icantashitatiaguecaquea icanca iconoaca yatsipevaetani oshequi. Itsipa iroguenti imetojapinitaquito icantapinitaquito tinquininini, itsipapae teeca ironquempaji, cotanquitsiquea iriatimpa yogueshiguetajiriquea maasanopae. Aisa yoguisotoacoventajiajiri ishaquiajiacarigueti ampatsinipae.

²⁵ Iroompaquea yoguijaguijaitanaqueriquea icaramirincavaequequea caquinteja quenaquenaitapojanquitsica Garireaquei, Tecaporishiqui, Jerosarequi, Joreaquei irooca aisa quenaquenaitapojanquitsica intatiquero Jororane, icaramirincajiaque.

5

Itsavetantaquequea Jesoshi niganquitantanaqui

¹ Iroompaquea yamenajiaquerigueti Jesoshi maasano capiocaventajiacarica icaramirincavaequequea oraniqui, itoncoanaque isavicaquequea niganquitantanaqui, ariquea iquempejijapojacari itsatacaanejia iquemisantajiaqueriquea.

² Ariquea itsatacajiaqueri icantajiaqueri:

Queri shinetavajatsineca

(Irc. 6.20-23)

³ “Caavijiquea irishinevaequempa maasano tsatanquitsica ishirequi tee iragavejama-jatempaji,
iriguentitari intsipajiaquempa Inquitequitica imajirontagueti.

⁴ Caavijiquea irishinevaequempa maasano shimampojancajianquitsica,
iroguishinejiaqueriquea Aapani Irioshi.

⁵ Caavijiquea irishinevaequempa maasano teeca iraventacojiguempaji,
irojocajitaqueneritari maasano quepatsi.

⁶ Caavijiquea irishinevaequempa maasano nintamajajiatsica incomajamajajiaquempa
inquejetemparigueti taseatsica aisa miretatsica,
iragavejacajiaqueritari irinetsanajiguero ininqueca quejetaca inquemempagueti.

⁷ Caavijiquea irishinevaequempa maasano pintsatacotantajiatsica,
impintsatacojitaquemparitari.

⁸ Caavijiquea irishinevaequempa maasano comajashirentajiatsica,
iriojiatari amenerineca Aapani Irioshi.

⁹ Caavijiquea irishinevaequempa maasano gameetsantajiajerineca igonorojia,
incantacojiqueritari: ‘Iriojia irijanijiate Aapani Irioshi.’

¹⁰ Caavijiquea irishinevaequempa maasano irantsipetacaajiquemparigueti incatsima-
timentajiaquerigueti incomajamajaquempagueti,
iriguentitari intsipajiaquempa Inquitequitica imajirontagueti.

¹¹ “Caavijiquea pishinevaejiaquempa pamenajiaquegueti incantaguishejiaquempi,
incatsimacatsimajiaquempigueti, aisa intsojeventajiaquempigueti iramenajiaquem-
pigueti pitsariventajiaquenaquea naatimpa.

¹² Pamenajiaquegueti inquejejiaquempigueti imaica pishinevaetanaquempaja, pit-
sajiaque incavintsajamajataquempiquea Aapani Irioshi oncoramanitapojajegueti on-
taniqui inquitequi. Ariquate iquempejitaqueri tsavetantajiatsica choocajiaatsica cora-
manipaequitica yatsipetacaajiacari catsimajiaquerica.

Tsaroventajiatsica iquempejiacaró incachoane

(Mr. 9.50; Irc. 14.34-35)

13 “Aviatimpajia conoajigarica quepatsiquitica piquempejiacaro incachoane. Cotanquitsiquea arigueta omasancategueti, ¿querocampate incojitajeroni incachoanetantajitajemparo? Aatoquea inintajitajiro, manaquea impishoncajiqueroquea intati, iragatigatijitaquero intati.*

14 Aisa aviatimpajia quempejiaquempi tsivotacojiguirica maasano caquinteja. Pamenajiguirotarite oratica tsovironaquipae impeacajaitemparogueti otsempiqui incapiocajiterogueti oshequiavaetanaque oncanquempa, ¿arimpate aatoquea yamenajitirotsi? Iramenajiqueroquea, onconijavaeque.

15 Ariquea iquejetaca aisa tsivorentsi itsivojitirigueta teetarite ariquea iroguivotacojiteriji chomoqui, iroguenti yoguisavicacojitiri jenoquijaniqui cameetsanijite intsvotanaquenerinijite maasano choocajianquitsica tsovironaqui.

16 Ariqueate pinquempejiaquempa aviatimpajia pincomajamajajiaquempaja pimpeacaajiaquemparo cameetsaguetatsica cameetsanijite iramenajiaquempigueta maasano, ariquea irishineventamajajianaquemparinijite Piri choocatatsica inquitequi.

Jesoshi icanque onetsanamajaquempa itioncacaanqueca coramani Aapani Irioshi

17 “Aato pijijiguiti iroguenti nocoraquetashitaque novashiantacaajempiro piquemisantirogueta itioncacotanaqueca Moishishini irooca aisa itioncacotanaqueca tsavetantajatsica coramani, teetarite irooquea noncoraquetashiteji, iroguentiquea nocoraquetashitaque onetsanamajaquempajia maasanopae icantajiaqueca.

18 Arimajaca noncamantaquempi: aatogueti opeitsita inquite aisa quepatsi, aatoquea opegatsi apaitsoquijaniqui Itioncacaantaqueca Aapani Irioshi, onetsanamajatanauquempa maasanopae icanqueca.

19 Quericaca teeca irinetsanamajateroji maasanopae icanqueca Aapani Irioshi, aisa intsatacaajiaqueriquea itsipapae inquejianaquempa iriatimpajia, oncoramanitapojajegueta irisavijisavijitapojajequa inquitequi imajirontacagueta Aapani Irioshi, itsipajia iranaantapojequa. Cotanquitsiquea iriraquea netsanamajaqueronca, aisa intsatacaajiaqueriquea itsipapae inquempejianaquempa iriatimpa irinetsanamajajianaqueroquea, caaviji iranaavaepojaje ontaniqui inquitequi.

20 Nocantantajiaquempica imaica aatogueti picomajamajajiga, aatogueti panaacojigui tsatacaantajiguiroca itioncacotanaqueca Moishishini aisa pariseojia, icomajamampeajiacagueta, aatotarite pagavejitsi pinquijanaque imajirontagueta Inquitequitica.

*Jesoshi itsatacaantaqueroquea aatonijite icatsimatantajititsi
(Irc. 12.57-59)*

21 “Pitsajiaqueroquea icantajitiri pivaesatinite: ‘Aatoja pimetojanti, maasano metojantajianquitsineca irantsipetacamentajiquempari yantaqueca.’

22 Cotanquitsiquea naatimpa noncantajiaquempi quericaca catsimataquerineca igonoro inquejetacaajitaquempajiaquea iriatimpa oncoramanitapojajegueta irantsipetacamentajiquempari yantaqueca. Aisa quericaca cantaquerineca igonoro: ‘Aviatimpa tee pintsatimateji’, irajaitanaqueriquea majirontatsicaqui incatsimajitaqueriquea. Cotanquitsiquea iriraquea cantaquerineca itsipa: ‘¡Aviguenti covaequisheri!’, shoshoh itsigatsi camorecariqui.

* 5:13 Ari aquejejiaca aatimpajia tsariventajigarica Aapani Irioshi, anconoaquemparigueta antaguetiroca covaequisherentsi antsatacaajiaqueriquea aatosaconaniji covaequishejiga. Cotanquitsiquea arigueta avashiantanajero atsarventarigueta ¿querocampate ancojiaquempajia antsatacaajiajirigueta? Manaquea anquejetanaquemparo incachoane omasancategueti, aatoquea inintajitajiro.

²³ “Irootaquequea nocantantajiaquempica poapoaitanaquegueti teemporoqui it-saromentantajitarica Aapani Irioshi paanaquegueti pivira pijitorejacaantaquener-iguete aretarequi, ariquea taampinaguete pinquenquejapojaquerogueti pincanque: ‘Choocatari icatsimatimenquenaca nogonoro’, aatotajate pijitorejacaantiritsijate.

²⁴ Manaquea pojoquijipanajanteritaja oneguitapojacaguete aretare, poapanajante-taja pogameetsatapanajanteritaquea pigonoro. Iroompa ariquea poashitanajeriqueate pivira pijitorejacaantaqueneriquea Aapani Irioshi.

²⁵ “Incatsimaquempiguete pigonoro irinintavequempaguete iraanaquempiquea jivatatsicaqui irisantanatacotacaanquempi, pinquenquetsatacaanajerija que-navoquirontsiqui pogameetsatanajeri taampina aatonijite yaguimpi. Ariguete iraanaquempi jivatatsicaqui joesequi iriotaque cajemaquerineca coareta, iriraquea coareta manaquea iraapanajantempiquea irisantanatacotsitempi.

²⁶ Arimajaquea aatoguete povegaramajatajiri catsimataquempica maasanopae paa-cotaquerica, aatoquea yoguipaquijajimpitsi santanatacoquempica.

Jesoshi itsatacaantaqueroquea aatonijite yoashijitirotsi manquigarentsi

²⁷ “Aviatimpajia pitsajiaquerotarite icantajitaquero paesatoniqui: ‘Aatoja poashitirotsi manquigarentsi.’

²⁸ Cotanquitsiquea naatimpa noncantajiaquempi quericaca nevequemparoneca manquigarentsi, quejecaquea yoashitaquero, iquenquejaquerotarite yamenaque-roguete.

²⁹ Nonquejetacaajiaquempiroquea imaica: ariguete oncovaequishetacaquempi poquijamajaca pinquitsorejaaquempa pimpishoncaquero. Cameetsavaequequeate pimpishoncaquerogueti covaequishetacaquempica pinetsanatimentanajempanijite. Aatoguettarite pipishonquiro jatanatsitarite oncovaequishetacaajempi, iroompa pimetojanajeguete impishoncajitaquempiqueate camorecariqui.

³⁰ Aisa irooguete covaequishetacaquempine pacomajaca ariqueate pincarataquero pimpishonquitsitemparo. Cameetsavaequequeate pimpishoncaquerogueti covaequishetacaquempica pinetsanatimentanajempanijite. Aatoguettarite pipishonquiro jatanatsitarite oncovaequishetacaajempi, iroompa pimetojanajeguete impishoncajitaquempiqueate camorecariqui.

Icanque Jesoshi aatoja quericaca ovashiantirotsi imanquigare (Mt. 19.9; Mr. 10.11-12; Irc. 16.18)

³¹ “Aisa icantajitironi paesatoniqui: ‘Quericaca nintanquitsineca irovashiantanajero imanquigare, irojocaqueneroja paperi oncanque: “Imaica novashiantajiro noman-quigavetacaca.” ’

³² Cotanquitsiquea naatimpa noncantajiaquempi quericaca ovashiantaqueroneca imanquigare apaniro oaquerica, ariguete omanquigatajempaguete itsipa jac icovaequishetacaacaro, omanquigatajatarite itsipa teeca irio omanquigaremajaca. Ariquea iquejetaca quericaca manquigataquemparoneca yovashiantajitica jac icovaequishetaca.

Jesoshi icanque: Aato picantashita

³³ “Aisa pitsajiaquerotarite icantajitaqueri paesatoniqui: ‘Aatoja pitsojega. Aato picantashita intati: “Incatsimatimentenarota Aapani Irioshi aatoguete nonetsanatiro nocanqueca.” Ariguete pincantero, pinetsanamajateroja maasano picanqueca.’

³⁴ Cotanquitsiquea naatimpa noncantajiaquempi aatoja pitsojeimatatsi aatonijite oavaetanaque pinintajiguetsi pincantajigue: ‘Incatsimatimentenarota Aapani Irioshi aatoguete nonetsanatiro nocanqueca.’ Aisa aatoja piquenquetsatacojiguirotsija inquite, aato picantajiguetsi: ‘Nontsojeaquempaguete ompeguempata inquite’, iroguentitarite imajirontamento isavicantacaca Aapani Irioshi.

³⁵ Ari oquejetaca quepatsi, aatoja piquenquetsatacojiguirotsi, aato picantajiguitsi: ‘Nontsojeaquempaguete ompeguempata quepatsi’, iroguentitari ivanqueguititacaca. Aisa aatoja piquenquetsatacojiguirotsija Jerosare, aato picantajiguitsi: ‘Nontsojeaquempaguete ompeguempata Jerosare’, iriguentitari ashincaro Majirontamajatatsica.

³⁶ Aisa aatoja picantajigui: ‘Nontsojeaquempaguete nonquitamaromaetanajeta’, teetarite pagavejajigueji aviatimpajia pinquitamaromaejigueroji irooca pinquisaamaeta-caajero apamaerotica pima.

³⁷ Aatoja piquejetacaajigarotsi, manaquea pincantajigue: ‘Jeeje’, irooca manaquea pincantajigue: ‘Tee’. Oraquea iroguentica pinquenquetsatacojiaque quejegueta caroca imaica cameetsanijite inquemisantajiaquempinijite itsipapae, manaquea oquenantapojacari ampatsini icantajitica covaeguisheru.

Jesoshi icanque aatoja pipigatari catsimataquempineca

(Irc. 6.29-30)

³⁸ “Aviatimpajia pitsajiaquerotarite icantajitiro paesatoniqui: ‘Quericaca tyaquisaatantankuitsineca ariqueate inquejetacaajitaquempariquea iriatimpa intyaquisajaitaqueri. Aisa quericaca jararejitsiquerineca iraji, ariqueate inquejetacaajitaquempariquea iriatimpa irijararejitajiqueriquea iraji.’

³⁹ Cotankuitsiquea naatimpa noncantajiaquempi aatoja pipigajigaritsija catsimataquempineca. Quericaca capojaquempineca pivoroqui pimpitsocanaquempaja inquejetacaquemparo otsipavoroqui.

⁴⁰ Choocaguete nintankuitsineca iraanquempi jivatatsicaqui iraitsiquempironiji pitsaare intsonpoguitica, pishinetsitempariqueate aisa piitsaare jenoquitankuitsica.

⁴¹ Choocaguete aanaquempineca iromperaquempiguete incanquempi: ‘Pinquijanaquenaroja ontaniqui’, poavaetanaquequea panaavaetanaqueroquea icanquempica poavaequiteneriquea osamani.

⁴² Quericaguete amanaquempineca taaca opajita, pojocaqueneriquea. Aisa quericaca cantaquempica: ‘Pojoquenaja ocatica, noguipiajatempiroitari coajica’, aato pipitso-capitsatari.

Ampintsataquemparija catsimatacajica

(Irc. 6.27-28, 32-36)

⁴³ “Piquemajiaquero icantajiqueca: ‘Pimpintsataquemparija pigonoro pincavintsajaquerijate, pisemaquempari catsimataquempica.’

⁴⁴ Cotankuitsiquea naatimpa noncantajiaquempi pimpintsataquemparija catsimajiaquempica.† Aisa pamanacoventajiaquerija maasano atsipetacaajiaquempica.

⁴⁵ Pinqejejaquempaquea imaica pinquempetimentajiaquempariniji Piri choocatatsica inquitequi. Quempeca iriatimpa ivoreguiriguete catsirincaiteri cameetsanijite irivoreacojiaquerinijite maasano caquintejiatsica, irioca cameetsajiatsica aisa teeca incameetsajigueji. Ariqueate oquejetaca incani iroatimpa itejiniri maasano, comajamajajiatsica aisa covaeguishejiatsica.

⁴⁶ Noncantajiaquempi aparoguete iriatimpa pincavintsajajiaque cavintsajimpica, ¿arimpate irishineventsiquempiro Aapani Irioshi? Ariquea iquempejiga imaica amatavijantajiatsica capiocapinijiguinirica majirontatsica imentaquipae.

⁴⁷ Ari oquejetaca aparoguete iriatimpa pinquenquetsatacaajiaque pigonorolja, ¿arimpate panajiaqueri itsipapae? Ariquea iquempejiga imaica irirajia teeca intsariventajiguempariji Aapani Irioshi.

† 5:44 Iconoagarantaca itioncajitauroguete oca guiriegotsaqui yogavijitaquero capichaji, ocanti acaniqui: “Irirajia cantavetaquempica: ‘¡Shoo poanaque camorecariqui!’, manaquea pinquenquetsatacaqueriquea cameetsa, pincanqueri: ‘Noninque pinchoocajiaque cameetsa.’ Pincavintsajaqueri semajiaquempica.”

⁴⁸ Pincomajamajajianaquempaja pinquempejianaquemparija Piri choocatatsica inquitequi icomajamajatacagueti.

6

Jesoshi itsatacaantaque queroca incojiqueroni incavintsajantajitegueti

¹ “Aatotarite mana picavintsajantantajigui iramenajiaquempiniji caquinteja. Pinquempejiaquempagueti imaica aatotarite ishineventajiguimpitsi Piri choocatatsica inquitequi.

² Pimpintsatacojiaquemparigueti teeca irashintempaji pojocajiaquenerigueti icoguitejacojiacaca, aatoja picamantiritsija pigonorolja aatonijite piquejigaritsi tsaromentamampeajiatsica intati. Iriatimpajia iroguenti isemetacaantajiaque shinagogapaequi acapiocantapinicaca irooca aisa oraniqui quenavoquirontsipaequi cameetsanijite irishineventajiaquemparinijite igonorolja, cotanquitsiquea imaica noncantajiaquempi aatotarite ishineventajigaritsi Aapani Irioshi quempejiguiroca imaica, iriguenti shineventajiacari igonorolja amenajiaquerica.

³ Pojocajiaquenerigueti quericaca coguitejacojianquitsica aatotarite quericaca picamantitsi.

⁴ Santicoguitenija pojocaqueneri. Iroompaquea iramenajiaquempigueti Aapani Irioshi picavintsajamajatantaque, irioquea shineventajiaquempineca, ariquea pame-nacojiaquempaja oncoramanitapojajegueti ontaniqui inquitequi.

Jesoshi itsatacaantaquero quero incojitaquerini iramanajiterigueti Aapani Irioshi (Irc. 11.2-4)

⁵ “Pamanajiaquerigueti Aapani Irioshi aatoja piquempejigari tsaromentamampejianquitsica intati yamanamampejiacari. Iriatimpajia iroguentiquea inintavintsajiaque incatintiijiaque shinagogapaequi irooca aisa oquenavoquigiecagueti yamanamampejiacari cameetsanijite iramenajiaquerinijite igonorolja. Irirajia quejejianquitsica imaica aatotarite ishineventaritsi Aapani Irioshi. Aparoquea shineventajiaquemparine amenajiaquerica.

⁶ Cotanquitsiquea pamanerigueti Aapani Irioshi poanaqueja pinquijanaquequea pitsovironaquitequi pashitacotanaquempa aparo, ariquea pamaqueriqueate. Iriatimpa yamenaquempiquea aparo pichoocaque pamaquerigueti, inquemaquempiquea irishineventaquempi, ari incavintsajaquempi.

⁷ “Pamanerigueti Aapani Irioshi, aatoja pamanavijitiri intati vero vero vero, aatonijite piquejigaritsi teeca intsajigueriji Aapani Irioshi. Ijiqueji inquemisantavaqueri arigueti incantacoguitempani vero vero vero.

⁸ Aatojate piquempejigaritsi iriatimpajia, itsatsitacarotari Aapani Irioshi maasano picoguitejacocaca tequeratatirajagueti pamaneriji.

⁹ Pamanajiguerigueti mana pinquempejiaquempaja imaica, pincantajiaque: ‘Aapani choocatatsica inquitequi, noninque intsaromentamajiaquempiquea maasano caquinte.

¹⁰ Caacateja pimajirontamajapojaquempa.

Noninquequea irinetsanamajajiqueroja ocaniqui quepatsiqui maasanopae pininqueca aviatimpa,

onquejetantaquempaca inetsanamajajiquerigueti ontaniqui inquitequi.

¹¹ Pojocaquenaja imaica noshecatapinijiaquempaca.

¹² Pimpeacotsitajenaroja nogovaeguishere,

quejetaca naatimpajia nopeacotsijijari antaguetaqueeroca teeca oncameetsateji.

¹³ Aato pishinejiganarotsi oncoraquetashijiaquena aatoca notampishitashiti nocoguishetatsi.

Manaquea noninque pintampishitacaamajajiaquenaja aatonijite yagavejajana ampatsini incovaeguishedetacajaena.*

¹⁴ “Ariguete pimpeacotsijajempari yantaqueca caquinte, ariquea inquempetaquem-paquea Piri choocatatsica inquitequi impeacotsitajempiroquea maasanopae pantagui-shevetacaca aviatimpajia.

¹⁵ Cotanquitsiquea aatoguete pipeacotsijigaritsi yantaguishejiaqueca caquinte, aato-tarite ipeacotsijajimpirotsi Piri pantaguishejiaqueca aviatimpajia.

Jesoshi itsatacaanque quero incojitaquempa irisanticotaquiterogueti isheca

¹⁶ “Ariguetejate pisanticotaquitero pisheca cameetsanijite pisavicavenquerinijite Aapani Irioshi, aatoja pishimampojanacamampeajiaja intati, aatonijite piquempeji-gariquea tsaromentamampeacarica. Iriatimpajia iroguenti ishimampojanacamampea-jiaca intati iramenajiquerinijite isanticoquitiro isheca. Cotanquitsiquea irirajia quem-pejianquitsica imaica aatotarite ishineventaritsi Aapani Irioshi, aparoquea shineven-tajiaquemparine amenajiaquerica.

¹⁷ Cotanquitsiquea aviatimpajia pisanticotaquiterogueti pisheca cameetsanijite pa-maneri Aapani Irioshi, pinquishijiaquempaquea, aisa pinquivavorojiaquempaja,

¹⁸ aatonijite itsajiguimpitsi pigonoroja pisanticotaquitiro pisheca. Irioquea amena-jiaquempine Piri teeca iramenajiteriji. Iriatimpa yamenajiaquempi pichoocatiguetei apaniro, ariquea irishineventajiaquempiquea iroguishinejajiaquempi ariquea pame-nacojiaquempa oncoramanitapojajeguetei ontaniqui inquitequi.

Irishineventamajajiquemparoja maasanopae inintaguetica Aapani Irioshi

(Irc. 12.33-34)

¹⁹ “Aatojate iroguenti pishineventajiatssi pashintajiaquempa ocانىقوئى quepatsiqui, onconoagaranquempaqueate irishecaguetaquemparoj shecaguetaroca, otsipapae oyo-gueguetanaque ompomatsatanaquempa, otsipapae inquijaguetanaque aitsitantatsica iraitsiguetaquempiro.

²⁰ Iroguenti pishineventamajajiaquempaja maasanopae inintaguetica Aapani Irioshi cameetsanijite incavintsajamajajiaquempinijite iroguishinejajiaquempiniji oncora-manitapojajeguetei ontaniqui inquitequi. Ontaniquiquea ontaniqui aato ichoocati shecaguetaroca pashintaguecaca, aatoquea oyoguetei, aato yaitsijitajimpiro.

²¹ Aritarite taaca opajita pishineventamajataca manaquea pisavicaventaguitironi piquenquejaguitironi.

Iquempetacaacaros tsivorentsi

(Irc. 11.34-36)

²² “Poquija oquempavecaro otsivore pitsino. Ariguete oncameetsate poquija, pame-namajate, onquempetaquemparoj otsivoguitemajatiguetei.

²³ Aatoguetei ocameetsati poquija, aato pamenantamajataro, onquempetaquem-paroj pipitsecacotiguetei maasanotsino. Ari oquempetaca, ariguetei ompitsecanaque tsivoshirentaquempimeca, pimpitsecacomajatatiguenimaja.†

Nintanquitsineca irajaarantavaequempa

(Irc. 16.13)

* **6:13** Iconoagarantaca itioncajitajiroguetei oca guiriegotsaqui yogavijitaquero capichaji, ocanti acaniqui: “Aviguentitari majirontamajataatsica, aviguenti ashintaro tampishirentsi aisa oganejencarentsi. Pincoguitempaniquea pin-quejetaquempa. Ari oncoquempani.” † **6:23** Ariguetei anintamajataque anetsanatero inintaguetica Aapani Irioshi, anquempetaquemparoj cameetsatanquitsica iroquija amenamajataquerotari ocanqueca Iguenquetsatsare Aapani Irioshi, anquemaquero. Aatoguetei anintamajati anetsanatiro inintaguetica Aapani Irioshi, manaquea anquempetaquemparoj teeca oncameetsateji iroquija, amenavequemparogueti ocanqueca Iguenquetsatsare Aapani Irioshi, aato aquemirotsi.

24 “Tee inchoocateji agavejanquitsineca irantavaetaqueneri mavite ashintaquemparica. Manaquea irisemaneguintaquempari aparo, iriraquea itsipa impintsataquempari, irooca inquemisantamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintaguetica, irooguete pisavicaventaque pajaarantavaequempa quejetaca irooquea ashintaquempi ajaararonsi.

Aapani Irioshi yojocapinijuginiri irijanijiate maasanopae icoguitejacojiacaca (Irc. 12.22-31)

25 “Imaicaquea noncanquempi: aatoja pishoshomentajigaro pisheca irooca pimirajiquempaca choocatacaajempineca, aisa aatoja pishoshomentajigaroquea pinquitsaajiquempaca. Oraquea pishire anijacajaiguimpica ¿teempa anagueroji pisheca? Aisa pitsino ¿teempa anagueroji quitsaarentsipae?

26 Pamenajiguiriquea araguetatsica, teequea irivintyacavetempaji, aisa teequea onchoocavetempajiquea incapiocantaquemparoca isheca iroaroaitapinijigue iraapinijiquequea irishecajiquempaca, cotanquitsiquea Piri inquitequitica yojocapinijiqueeneriquea ishecajiacaca. Aviatimpajia ¿teempa panaamajajigueriji iriatimpajia?

27 Ariguete pishoshoguiteventavequemparo pigatsantsare ¿arimpa pagavejaque pincatsatsatanaje niganqui meetero?‡

28 “Troosacánica ¿queroca oocani pishoshoguiteventajiacaroquea pinquitsaajiquempaca? Pamenajiguirotarite ocativa ovempenaquipae inchiqiojiquea otsoroashiguecaquea iroatimpa, teequea oncatsiquejiavetempaji aantaquemparomeca oitsaare, aisa teequea onquiricajiavetempaji,

29 ariqueate ocameetsamajavioti anaavaequequea ocanca ocameetsavaeque, anaaguequeroquea quitsaarentsi cameetsamorenaguetatsica coramanitica iquitsaajiacaca majirontatsica Saromonini caavijica anaque ocameetsamorenamajataquequea.

30 Quempeca ocativa ovempenaquipae oporencanaque poren icameetsatacague-taqueroquea Aapani Irioshi, cotanquitsiquea osaitequera taampina oshimpeguiricanaque shimpeguiririri, irajaiqueroquea intajaiquero. ¡Aviatimpajiaquea caaviji irojocajiquempiquea pinquitsaajiquempaca, caavijitari panajaiqueroquea ovempenaquipae! Cotanquitsiquea aviatimpajia teequea paventamajatempariji, manaquea pishoshomentajiacaca taaca opajitapae.

31 Noncantantajiquempica aatoja pishoshoguiteventajigarotsija pincantajiaque: ‘¿Querocashiatsi noshecataquempaca? ¿Taate nomirajeca? ¿Querocaquea naajeroquea nonquitsaatajempaca?’

32 Iriguentiquea quempejiguiroquea imaica irirajia teeca intsaromentajiguempariji, ishoshomentajiacaroquea taaca opajitapae, irootaquequeate isavicaventajiaquequea iriatimpajia. Cotanquitsiquea aviatimpajia aatojate piquejejiguirotsija imaica, choocatarite Piri inquitequitica. Iriatimpa itsataque maasanopae picoguitejacojiacaca.

33 Aviatimpajiampani pinintamajajigue pimajirontamajatanaquempari Aapani Irioshi pishineventajiaquemparoja pisavicaventajiaquerojate maasanopae inintaguequeca iriatimpa, ariquea iriatimpa irojocajiquempiquea maasanopae picoguitejacojiacaca.

34 Aatojate pishoshomentajigarotsijate pincantajiaque: ‘¿Querocate noncotaquempani osaitequera?’ Oocaniquea savincaguiteriqui chooca taaca opajita manapitsajiaquempineca pinquenquejacoqueca. Osavincaguitevetanajempagueti otsipapae choocatatsineca pinquenquejacojiajeca.

‡ 6:27 Oguipitsocaquerogeti tioncanquitsica guiriegoqui, agavejaque aisa oncanque: “Ariguete pishoshoguiteventavequemparo oshequianajeme pisavincaguiteritepae ¿arimpa pagavejaque poshequiaquero capichaji?”

7

Aatoja piquenquejacoguishetsitiritsi peacaajigaroca covaeguisherentsi
(Irc. 6.37-38, 41-42)

¹ “Pamenitaquerigueti yantaguishetaqueca itsipa aato piquenquejitsi: ‘Teequea in-cameetsateji, icovaeguishetaca’, aatonijite iquejetacaajitimpi aviatimpa.

² Irooriji querocaca pinquenquejacotsiterica itsipa, ariquea inquempetacaajitaque-mpi aviatimpajia. Querocagueti pincotsiterini itsipa ariquea inquejetacaajitaquempi aviatimpajia.

³ “¿Querocaquea picocani pamenantacarica itijaarojaniqui pigonoro cotanquitsi tee pinquenquejacoteroji inchapoa poquijaqui pashi aviatimpa?

⁴ ¿Arimpate pagavejaquempa pincanqueri pigonoro: ‘Iintsija nonquitsoajempiro piti-jaaro’, choocatirajagueti inchapoa poquijaqui pashi aviatimpa?

⁵ Cameetsatamampeatsica, iroquetitarite pijivatavaque pinquitsoavajerota inchapoa jocaaquempica aviatimpa, ariquea pamenamajatanaje pinquitsoimentajenerinijite ti-jaataquerica pigonoro.*

⁶ “Aatoja pojoquiniri shiishi querocaca yashincaca Aapani Irioshi. Oquempetaca aisa aatoja pipishonquiniri chanchopae piveererate vegaramajatanquitsica. Pinquem-petaquempagueti mana iragatigatiivaequero, ariquea impitsocashiitsitempi aviatimpa inteshireteshirejaquempi.†

Quero incojitaquerini iramanajiterigueti Aapani Irioshi
(Irc. 11.9-13; 6.31)

⁷ “Pamanajigueri Aapani Irioshi taaca opajita picoguitejacojiacaca, ariquea iriatimpa irojocajiaquempiro. Pamenagueteroja taaca opajita, ari pamenapojero. Aisa pintin-quiapojerogueti sotomorontsi, ari irashirejacojiquempi.

⁸ Aritarite iriraquea amanantatsica irojocajiqueneri. Iriraquea amenaguetatsica iramenapoje. Aisa iriraquea tinguiguiroca sotomorontsi irashirejacojiqueri.

⁹ “¿Arimpate pinquempejaquempa aviatimpajia iramanempigueti pirijanite pan arimpate paitsitenempari mapi pojoquitenempari?

¹⁰ Iriogueta iramanempi shima, ¿arimpate paitsitenempari pojoquitenempari ca-maarini?

¹¹ Avirovetaca covaeguishejiatsica pitsajiaque pojocajiguiniri pirijanijiate taaca opa-jitapae cameetsaripae, iriompate Piri choocatatsica inquitequi caaviji irojocajiaquem-piquea cameetsaguetatsica pamanajiaqueriguetai.

¹² “Taaca opajitapae pantajigue pincavintsajajigueri itsipajia, pinquejetacaguemparo pininqueguetai incavintsajaquempi aviatimpa. Irootarite ocanque itioncacotanaqueca Moishishini aisa itsipajia tsavetantajiguiroca icanquerica Aapani Irioshi.

Sotomorontsi chaamorojaniquitica
(Irc. 13.24)

¹³ “Pinquijantajianaquemparoja sotomorontsi chaamorojaniquitica. Choocatarite ot-sipa sotomorontsi inromorojeguini ocanca aisa quenavoquirontsi inropoquivaetaque ocanca oavoquivaetanquitsica isaviqui camorecariqui. Iroguentiquea iquijaquijai-tantacaca icaramirincavaeque caquinteja.

* **7:5 itijaarojaniqui pigonoro.** Oquejetacaro ariguetai pininque pincanqueri pigonoro irovashiantajero cov-aeguisherentsipae yantaguetica, aviquetita jivaquerone povashiantajero pantaguisheguetica aviatimpa. ¿Quero-caquea picocani pamenantacarica ipeacaaguishetaqueca pigonoro cotanquitsi teequea pameneroji pashi aviatimpa caaviji pogaaca? † **7:6** Itsatacaqueriguetai iquejetacaacaro, quejetaca incanteri: Aatoja piquenquetsatimoguitirini Iguenquetsatsare Aapani Irioshi manintiroca aatonijite icatsimajiguimpi. **Piveererate.** Chooqa quentijaqui quejevetarica chopiro. Onquijaqueriguetai capichaji impanequi, aseraqueri, ari intiritapiniquero cameetsaniji oncarenitanaque. Oncoramaniapojajeguetai ompeanaquempa icanantajitica **peerera** (icanquero quimajareri **perla**), quitasaancorerencavaeque, impeacaquemparo nenquetsiqui. Ovegaravaetaca.

14 Cotanquitsiquea oraquea sotomorontsi chaamorojaniquitica aisa quenavoquirontsi orijanipoquijanicuitica mana oquenavoquitana anijagantsiqui. Teemajaca incaramirincateji nejaqueroneca.

Jesoshi itsavetacojiaqueri caquinte iquejetacaacanari inchato sovenatatsica
(Irc. 6.43-44)

15 “Inchiquiojitaja yamatavijajiguimpitsi tsavetacotamampeajiacarica Aapani Irioshi, inquitsaatsijiavequempari imae oveja, cotanquitsiquea intsompogui iriguentijia lobo‡ catsimari.

16 Aviatimpajia pamenamajajivaquero yantajiaqueca pintsatantajivaquemparica quero icocani iriatimpa. ¿Arimpate iraantajitemparo ovaitsoqui samerento? Aato yaantajitaro. ¿Arimpate iraantajitemparo igo§ poronqueto? Aatoquea.

17 Ariqueate oquejetaca, maasanopae inchato cameetsaguetatsica oncameetsasovenatanaque. Oraquea inchato teeca oncameetsateji, irootaque ochoocatantaca osovena teeca oncameetsateji.

18 Oraqueate inchato cameetsatatsica aato agaveji ochoocatantaro osovena teeca oncameetsateji. Aisa oratica inchato teeca oncameetsateji, aatoquea agaveji ochoocatantaro osovena cameetsatatsica.

19 Maasanopae panquirentsi teeca oncameetsateji osovenapae inchaquitsitemparo-quea iranaquero intaitemparoquea.

20 Ariquea iquempejiaca caquinteji, pamenitsijiaqueri yantajiaqueca pintsatantajiaquemparica.

Aatotarite yoayoaititsi maasano ichoocatiguetei Aapani Irioshi
(Irc. 13.25-27)

21 “Aatotarite maasano iquijaquijaiti imajirontaguetei Inquitequitica cantajiaquenanea: ‘Nomajirote, Nomajirote.’ Iriguentiquea quijaquijaitananquitsine irirajia maasano netsanamajajiaquero inintaguetica Aapani choocatatsica inquitequi.

22 Oraqueate aapojempaguetei oratica savincagueteri, incaramirincavaetanaque-quea cantajavetanaquenanea: ‘Nomajirote, Nomajirote, notsavetantajiaquempi, aisa naventashijiacari pivajiro noguisotoaguetajiniri ishaquiajivecaca ampatsini, aisa nonigaantajiaqueroquea oacaantantatsica intati nocantajiaque aviguenti agaveja-caaquena.’

23 Cotanquitsiquea naatimpa noncantajiaqueri: ‘Teequeate nontsajiguempiji, poapoitanaquequea osamani maasano aviatimpajia antajiguiroca covaeguisherentsi.’

Jesoshi itsavetacojiaqueri caquinte iquempetacaajiacari peacagaroca tsovironaqui
(Irc. 6.47-49)

24 “Imaicaquea noncantajiaquempi quericaguetei quemisantaquenanea netsanama-jataqueroneca nocanqueca ari inquempetaquempari quenquejamajatatsica vinchajiroca itsovironaquite shiratantapiqui.

25 Iroompaquea otejavetanaca incani amaravetanaca ojaaquiniqui, ochovigaguite-vaetanaquequea jeoc jeoc jeoc, cotanquitsiquea teequea agavejeroji osoveanaqueroji, oquishomajataquetari shiratantapi ochoocatantacaca.

26 Iriaquea quemavetavaquenanea cotanquitsiquea teequea irinetsanateroji nocanqueca, manaquea iquempetacari teeca inquenquejamajateji peacaavetacaroca itso-vironaquite impanequiqui.

27 Iroompaquea otejavetanaca incani, amaranaque ojaaquiniqui, ochovigaguitevae-tanaquequea jeoc jeoc jeoc, ariqueate ocotanaca osoveanacaquea itsovironaquite, ocantavaeti soven.”

‡ 7:15 lobo iriguenti tomirishiquitica catsimari quejevetarica iririjegui shiishi.

§ 7:16 igo (higo). Iroguenti osovena inchato icantajitica iguera (higuera).

²⁸ Iroompaquea iteroncanajirogueti Jesoshi itsavetantaquerogueti, yamenamenaitanaquequea intati maasano quemisantajiaquerica,

²⁹ yamenajiaqueritari itsatacajiaquerigueti choocaquea iragavejane, teequea inquempejiguempariji tsatacaantajiguiroca itioncacotanaqueca Moishishini.

8

Jesoshi yovejairi avejancari

(Mr. 1.40-45; Irc. 5.12-16)

¹ Iroompaquea yoguirincanaja Jesoshi otapiqui, ariquea isaquiritsaeventajianacari icaramirincavaeque caquinteja.

² Icoraquepojaquequea aparo avejancari iguerovempojacari icanqueri:

—Nomajirote, arigueti pininque, pagavejaque piveajena.

³ Iriraqequea Jesoshi icantajempequitana ipamitsitari, icanqueri:

—Jeeje, noninque. ¡Pimpeanajempaja!

Iroompaqueate icanquitiguiji jac ipeanaja yavejancavejancaacagueti.

⁴ Iroompaquea icantavajiri Jesoshi:

—Aatojate picamantitsija. Iriguenti poimotanaque saserorote ponigaapojemparija, paanajenerija viratsipae pinetsanaqueroja icanqueca Moishishini cameetsanjite iramenamajaquempinijite, ariquea incanquempi peanajimpi intsajiaquempinijite maasano peamajatanajimpi.

Jesoshi yogueshitajiri yashincaca imajirote coaretajia

(Irc. 7.1-10)

⁵ Iroompaquea yoanaque Jesoshi Caperenaogui. Ariquea yarejetapojacaroquea yameniriquea icoraquepojaque aparo Iromaquitica. Iriatimpa iriguenti imajironcaca 100 igoaretajiate. Iroompaquea icampoji:

⁶—Nomajirote, inorijaguitani nashincaca notsovironaquitequi, teetari ironquempaji, yatsipevaetaca.

⁷ Icanqueri Jesoshi:

—Iroosacana noanaque nogueshitajateri.

⁸ Icanquequea imajirote coaretajia:

—Nomajirote, aatotarite piquijitsitanarotsi notsovironaquite, notsaquetarite panamajataquenaquea. Pincantajaniquiqueja impeapanajantempaquea nashincaca.

⁹ Quejetaca naatimpa ichoocaveca tigarancanaca, ariqueate ichoocaque nashi no-goaretajiate notigarancajiguica. Noncanterigueti: ‘Pijate’, ari iroanaque. Itsipaquea noncanterigueti: ‘Caacate’, incoraqueaque. Aisa ichoocaque nashincaca taaca opaji nomperacarica iquemisanquenaquea.

¹⁰ Irooquea iquemavaquerigueti Jesoshi icanqueca yamenanaque intati, icantajiguiji oguijaguijaiquerica:

—Arimaja noncanquempi, teequea namenimaguetaji aparo acaniqui Ishiraeriqui inquejetempariji irica itsamajatigueti nagavejamajati, iquemisantamajataque.

¹¹ Noncanquempiquea irimajirontaquempagueti Inquitequitica, ariquea incoraquecoraqueipoje caquinteja irisaquiritsaevaepojaque inquenaquenaipoje jmm osamani-paequitica isotoguigueti catsirincaiteri, itsipajia inquenajipoje iquijigueti catsirincaiteri, intsipajipojempariquea Averaameni, Ishaaconi aisa Jacovoni irishecajiaquem-paquea.

¹² Cotanquitsiquea irirajia joriojia inintajivecaca Aapani Irioshi iroaroaitanaqueme aatotarite yoajiguiquea, manaquea intigarancajiqueriquea osamani ocanquegueti manquimanquimanqui. Ontaniquiquea ontaniqui incoquempanija iriraaguitempani irantsicayajijianaquempa.

¹³ Iroompaquea ipitsocashitanacari imajirote coaretajia icanqueri:

—Poanajeja, pitsaquetarite nagavejamajati nogueshitajeri pashincaca, imaica im-peanajempa.

Irooquea icanquitigui Jesoshi jac peanaja.

Jesoshi yogueshitajiro orijanintaroca imanquigare Peerero

(Mr. 1.29-31; Irc. 4.38-39)

¹⁴ Iroompaquea yoanaque Jesoshi itsovironaquitequi Peerero, yamenapojiroquea ivaguirote Peerero, ashinoncajaca onorijaca ocatsirincavaeque.

¹⁵ Yaavacopojaquero ariqueate ocotanaca opeanaja ogatsirincare, ariquea ocatianaja ojocacojiajiniri irishecajiaquempaca.

Jesoshi yogueshiguetajiri ashinoncajajatsica

(Mr. 1.32-34; Irc. 4.40-41)

¹⁶ Iroompaquea opitsecanaquegueti yamajiapojiniri Jesoshi icarajiaavaetaque ishaquiajacaca ampatsini. Irooquea icantaquitigui Jesoshi ariquea icohicoitanaca ampatsinipae yovashiantajanajiri ishaquiajavecaca. Aisa yogueshiguetajiri maasano ashinoncajaguetanquitsica.

¹⁷ Ari icanque paesatoniqui tsavetantatsica Isaiashini itsavetacotantaquerigueti icanque:

“Yaitanacajiro agavejavetacajica,
aisa yogueshiguetajaji ojoquijijiacagueti.”

Nintajatsica iroguijaguijaitanaqueri Jesoshi

(Irc. 9.57-62)

¹⁸ Iroompaquea yameniriquea Jesoshi icaramirincavaeque capiocaventajiapojacar-ica, icantajigui itsatacaanejia:

—Jaame amontemonteitanaquempaja intatiqueroqui.

¹⁹ Ariquea icoraquepoji tsatacaantiroca itioncacotanaqueca Moishishini, icanqueri Jesoshi:

—Tsatacaantantatsica, noninque noncoguitempani noguijaguitempini querocagueti poanaque.

²⁰ Icanque Jesoshi:

—Irraquea zorro* chooca imoro iquijantacaca. Ariquea iquempejiaca tsimeripae chooca imencoshi, cotanquitsiquea iriraquea Irijanite Caquinte† teequeate on-choocateji itsovironaquite irimaantaquempaca.

²¹ Iroompaquea icanque aparo itsatacaane:

—Nomajirote, nonintaveca noguijaguitempini, cotanquitsiquea iroquetita nonquitanajeritaja aapani.

²² Icanque Jesoshi:

—Poguijatanaquenaja. Pishineteri metojari ashincarica inquitatajaterita metojari.

Jesoshi ipejairoquea choviga aisa imagojatacajairo iniromotija

(Mr. 4.35-41; Irc. 8.22-25)

²³ Ariqueate itetanajaroquea Jesoshi quenajarontsi itsipatsipaitanacari itsatacaanejia.

²⁴ Incajaranquiguitetanaquegueti ochovigaguitetapojiquea inirojencatapojaque choviga jeoc jeoc jeoc, otamacojatanaque iniromotija oshaguishaguivaetanaqueroquea quenajarontsi. Irraquea Jesoshi yojocanacani tin.

²⁵ Itsaroajianaque itsatacaanejia itinajitsitari icanqueri:

* **8:20** Ichocati **zorro** tomirishiqui, iquejevecari shiishi. Iriquenti shecatarica chaapa, quepigari, maasano.

† **8:20** Icanquegueti Jesoshi **Irijanite Caquinte** mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojanquitsica jenoqui inquitequi, icaquintetapojaquetari ivoapojaque.

—¡Nomajirote, paavaquenashiatsi ojocajatempanishiatsi!

²⁶ Iriatimpa icantajigui:

—¿Quero ocotacani pitsaroantajianacaca? ¡Tequerata pintsamajajiguenaji nagavejama-jati!

Icatiitsitanaca iquenquetsatacaitaro choviga icanquero:

—Pimpejaencatanajempaja.

Icantsitaro aisa iniromotija:

—Pinchopecajatanajempaja.

Ari ocotanaja osanticojencatanaji choviga, ari oquempetanaja iniromotija ochopeca-jatanaja.

²⁷ Iriatimpajia yamenamenaitanaque intati icantajianaque:

—¿Taashia ipaji irica? Jerompate oquemisantamajataqueriquea choviga aisa iniro-motija.

Jesoshi yoguisotoacoventajajiri ishaquiajivetacaca ampatsinipae

(Mr. 5.1-20; Irc. 8.26-39)

²⁸ Oraquea yarejetapojacaguetei Jesoshi intati queroqui, iguepatsitequi Gararaquitica‡ icoraquejiapoji mavite caquinte ishaquiajiacaca ampatsini. Iriatimpajia iroguenti iquenaquenaipoji imperitamoroqui yojoquijitantapinijitarica metojatsica. Icatis-mamajiaque itsaroacaamajitacari, caarica ipampoquivoquitantajitaro quenavo-quirontsi oatsica ichoocajiaquegueti.

²⁹ Iroompaquea icajemitsijianaca icantajigui:

—Jesoshi Irijanite Irioshi, ¿queroquea pincojiguenani? ¿Iroocajate picoraquetashitaque pantsipetacaajiaquena imaica tequeratanicate arejetempaji nantsipetantajiaquem-paca?

³⁰ Ariqueate ichoocajiaque oraniqui oshequi chanco,§ ishecajiaca, icarajiavaeque-quea icanca.

³¹ Irirajia ampatsini shaquiajiacarica icantajiaqueri Jesoshi:

—Poguisotoajiaquenaguetei, iintsija noashijianaquerita irinta chancojia, noshaquia-jiapojemparita.

³² Icanque Jesoshi:

—Intsiquetirote poapoaitanaque.

Icampanajanta isotosotoitapanajanti yovashiantajianaqueri ishaquiajiavecaca, iri-oquea yoashijiavetanaca chanco. Iroomba ishaquiajivetapojacari ari queate ico-hicoitanaca ishiajianaca ojeguirocapojacaguetei itanquiretanquireitanaque yojocaja-jiapojaca, icampojaca teron maasanojia.

³³ Ari queate yamenajivaqueriguetei quempoguijajiguirica itsaroajianaque, ishi-ashiaitanaca yoayoaitanaque iguintenijiacaguetei icamantajiapojiri igonorojia yojoca-jajiacaguetei chanco. Aisa itsavetantajiapojiaqueriquea queroquea icohicoitanacani ishaquiajivetapojacari guetei ampatsinipae.

³⁴ Iquemitsitaquea iriatimpajia yoayoaitanaque quea ontaniqui ichoocaqueguetei Je-soshi, icantajajiri iroanaje irovashiantsitanajeri iguepatsite.

9

Jesoshi yogatiajiriguetei teeca ironquempaji

(Mr. 2.1-12; Irc. 5.17-26)

¹ Iroompaquea itetanajaquea Jesoshi quenajarontsi qui imontejacotanaja yoanaji iguintenicaguetei.

‡ 8:28 *iguepatsitequi Gararaquitica*. Chooca otsipa paperi otioncacotacaguetei acaniqui Jerejesaquitica (*gerge-senos*), otsipa paperi ocanti Jeresaquitica (*gerasenos*). § 8:30 Irira *chancho* iriguentei viratsi quejevetarica santaviri.

² Ariquea icoraquejiapojiquea itsipapae caquinteja yamacojiapojaqueri teeca ironquempaji, yaajianaqueneriquea Jesoshi irogueshitajeri. Iriaquea Jesoshi itsajiavaqueri yaventajiapojacari irogueshitajeriniji, icantantarica teeca ironquempaji:

—Irijani, pishinevaetempaja. Jac shetacotajimpi maasanopae pipeacaaguishevecaca.

³ Ariquea ichoocajiaque oraniqui tsatacaantajiguiroca itioncacotanaqueca Moishishini. Iquemajiavaquerigueti icanqueca imaica, iquenquejajianaque intati: “Manatari iquejemanatanacari Aapani Irioshi.”

⁴ Cotanquitsiquea Jesoshi itsajiavaqueriquea iquenquejajiaqueca icantsijigari:

—¿Queroquea picopicoitanacani piquenquejajianaquequea teeca oncameetsateji?

⁵ ¿Querocampate caavijica anaaque mananquitsica? ¿Iroocaja nocantaquerigueti: ‘Jac shetacotajimpi maasanopae picovaeguishevetacaca, aatoquea iquenquejacaajimpiro Aapani Irioshi’, iroocaja noncanqueri: ‘Pincatianaje panijitanaje’?

⁶ Imaicaquea namenacaajiaquempiroquea yagavejaque ocaniqui quepatsiqui irira Irijanite Caquinte irishetacoitajeri ipeacaaguishevecaca caquinte.

Iroompaquea ipitsocashitanacari teeca ironquempaji icanqueri:

—Pincatianaje, paanajero pinorijancaca, poanaje pitsovironaquitequi.

⁷ Ariqueate icotanaja icatiapanajanta yoanajiquea itsovironaquitequi.

⁸ Oraquea yamenajiavaquerigueti maasano omporoguijajianquitsica itsarojianaque, ariquea ishineventajianacari Aapani Irioshi, yamenajiaquetari mana yagavejacaajiaqueri caquintepae ironigaantajiaquero oacaantantatsica intati.

Jesoshi icanqueri Mateo iroguijatanaquerija

(Mr. 2.13-17; Irc. 5.27-32)

⁹ Iroompaquea yoanaque Jesoshi icantanaca oraniqui yamenapojiri aparó capiocapinitinirica majirontatsica imentaquipae. Ipajita Mateo. Iriatimpa iroguenti isavicaque ontaniqui ipashicatsarajitirogueti yoguijajiavaqueri avisavisaitatsica ivegaratacaajiavaqueri imentaquitsite maasano aajiananquitsica irajaararopae irooca taaca opajitapae. Iroompaquea iriraquea Jesoshi icampoijiri:

—Jameja, poguijatanaquena.

Iriatimpa icatiapanajanta yoanaque yoguijatanaqueri.

¹⁰ Ariquea Jesoshi yoanaque itsovironaquitequi ishecajiaca itsipatsipaitanacari itsatacaanejia, jerijia itsipajia capiocapinijiguirica majirontatsica imentaquipae, jeri aisa itsipajia covaeguishejiatsica.

¹¹ Iriaquea pariseojia yamenajiaquerigueti Jesoshi itsipatsipaitacarigueti ishecaji-acagueti, icanqueriquea itsatacaanejia:

—¿Quero icocani irira tsatacaajiguiimpica ishecatacojiacari capiocapinijiguirica majirontatsica imentaquipae, jeri aisa itsipapae covaeguishejiatsica?

¹² Oraquea iquemavaquegueti Jesoshi icantajigui:

—Iriaquea teeca irashinoncajempaji teetarite incoguitejacotempariji aavintantatsica. Iroguenti coguitejacojigari ashinoncajajatsica.

¹³ Poapoitanaaje pinquenquejajiaqueroja pintsajiaqueronijite icanqueca Aapani Irioshi icanquegueti: ‘Caaviji anaaque nonintamajaque pimpintsatacotantajiguempaja, anaqueroquea pijitorejajiguenarigueti viratsipae pintaashiquenarigueti.’ Teetarite irioquea noncoraquetashiteji teeca incovaeguishejiguempaji noncajemajiaqueri, iriguenti nocoraquetashijiaque covaeguishejiatsica noncajemajiaqueriquea cameetsanijite incantashitajiaianajempanijite irovashiantanajeronijite ipeacaaguishevecaca.

Icoacojitaqueriquea Jesoshi irisanticotantajitemparoca isheca

(Mr. 2.18-22; Irc. 5.33-39)

¹⁴ Iroompaquea icoraquecoraqueipojaque itsatacaanejia Joanca Viñacajatantatsica icantajiapojaqueri Jesoshi:

—¿Quero ocoani naatimpajia aisa pariseojia nosanticotapiniijiguiquea teequea noshecajiguempaji, cotanquitsiquea iriraquea pitsatacaanejia teetarite ariquea inquempajiguiquea imaica?

¹⁵ Iroompaquea iquejetacaaca Jesoshi icanque:

—Pinquenquejeroja inchoocategueti iriaqueraca manquigatanquitsineca incajema-
jiaqueriquea itsipavijijiaca irishecatacaajiaquempari, ¿arimpate aatompate isheca-
jiga? Irishecashecaitanacuempaquea, itsipatsipaitacaritarite cajemajiaquerica shine-
jiacaquea. Cotanquitsiquea oraqueate aapojempaguete incatsimatantajitaquempari-
ca irajaitanaqueriquea osamani, ariquea iroguenti irisanticotantajitemparoca isheca,
irishimampojanacajianaquempari.

¹⁶ “Aatoquea ocameetsati oncotatemparoguete quitsaarentsi qui iroquetishitequitica
incotatantajivetaquemparo iroaqueramorenatca quitsaarentsi. Irajiquitsijivetem-
paroquea ariqueate oncotanaquempari ontsiñotsiñomorenatanaquequea arimpaquea
omperejanaqueroquea.

¹⁷ Aisa ari onquempetaquemparoquea iroguijaatantajitaquemparoguete vinoja*
iroaquerajatica oncachotapoje iroguijaatantajivetaquemparoguete imeshinanaquiqui
iriquetinica oroameshinatananquitsica. Oncachojamajavetanaquempaguete
oshimoajavetanaquempa, ariquea oncotanaquempa aravoavetaquitempa imeshina,
intyaquisanaque oshacojaatanaquempaquea vinoja, aisa impomatsataquempaquea
imeshina imperejanaque. Jero caaviji ocameetsavaeque impijaatantajitaquemparo-
quea iriaquerameshinari cameetsanijite aatonijite opomatsajata vinoja, aisa aatonijite
ipomatsatatsi imeshina.”†

Jesoshi ivochatajiro irorijanite Jairo

(Mr. 5.21-43; Irc. 8.40-56)

¹⁸ Choocatiraja quenquetsatanatsitiraja Jesoshi, icoraquepojaque aparo jivatatsica,
iguerovempojacari icanqueri:

—Iroaquerasano metojananquitsi norijanite. Jaame pimpamitaquitenaro ontancore-
janajenijite.

¹⁹ Iroompaquea icatiapanajanta Jesoshi yoguijatanaqueri itsovironaquitequi itsipat-
sipaitanacari itsatacaanejia.

²⁰ Ariquea ochooacque aisa oraniqui manquigarentsi ashinoncaavaetanquitsica
ososoajavaetini coramani, ariquea ocaratacovaetanaqueni 12 ajagantsiteni. Iroat-
impa ojocavaetapoja quempeji coraquetashipojiri itaqui qui ochagatsaequitsitava-
queri ocaramagotapojaqueguete irogataamagoro.

²¹ Oquenquejitsitanacaquea incajaranqui ocanque: “Iroguenti nonchagatsivetaque-
mpari irogataamagoro nompeanajempaquea.”

²² Iroompaquea ipitsocanaca Jesoshi yameniroquea icanquero:

—Orijani, pishinevaetempaja. Irooriji pavenquenatarite naatimpa, irootari pivean-
tanajaca.

Icanquitiguiro jac peamajatanaja.

²³ Iroomba yarejetapojaca Jesoshi iquijapoji itsovironaquitequi jivatatsica, yamena-
jiapojiri covijiatsica covijiaque. Irirajia iracojiaqueroca metojatsica irajajaca incajema-
jiaque. Icantajiapojajeri:

²⁴ —Pijajavajeta. Teetarite ometojeji, mana omaaque intati.

Ariqueate icojianaca ishirontimentajianacari.

²⁵ Irooquea yoguisotojiaiaqueriguete iquijitsitanaca intsompogui yaavacopojaquero-
quea. Ariqueate ocotanaca otancorejanaja ocatianaja.

* **9:17** Ocachotanaqueguete ovaja opeanacaquea **vinoja**. † **9:17** Itsatacaantica Jesoshi iroguenti quejetacaroca quitsaarentsi iroaqueraro, oquejetacaroca aisa vinoja iroaquerajatica. Aato agaveji otsipataro itsatacaantica pariseo-
jia aisa tsatacaantajiguiroca itioncacotanaqueca Moishishini.

²⁶ Iroompaquea ari maasano choocajatsica oraniqui osamanipaequitica iquemacojiaqueri itancorejajiroquea irorijanite jivatatsica.

Jesoshi yamenacajairi mavite shamponcajavetanquitsica

²⁷ Iroompaquea yoanajigueti Jesoshi yoguijaguijaitanajiri mavite shamponcajari icajemacovaetavaqueri icanqueri:

—¡Ichoviquini Taavini,[‡] pimpintsatacogajoitenashiatsi!

²⁸ Ariqueate yarejetapojaca Jesoshi tsovironaqui iquijitsitanaca intsompogui. Iri-
rajia shamponcajari guijaguijaitanaquerica iquempejiquempejiipojiri. Icantavaqueri
Jesoshi:

—¿Pitsaquenampa nagavejaque nantero oca?

Icantajianaque:

—Jeeje, Nomajirote, pagavejaque.

²⁹ Ariquea ipamitsitari iroquiyaqui icantajiguiri:

—Pitsaquenatari nagavejaque, ari nonetsanatanaquempiro.

³⁰ Ariqueate icojianaja yamenajianaji. Iroompaquea Jesoshi icantimentajivajiri
icantiriquea:

—Shoshoh inchiquiojitajate pitsavetampojirotsija.

³¹ Cotanquitsiquea yoayoaitanajigueti jatanatsi itsavetantaguetanaqueriquea que-
rocagueti ontaniqui.

Icanquerigueti Jesoshi iquenquetsatanaji macanari

³² Incajanganquiguitetanaquitiguiquea icoraquecoraqueipojaque itsipapae yamaji-
apojaqueeriquea macanari ishaquiacaca ampatsini.

³³ Irooquea yoguisotoaquerigueti Jesoshi ampatsini, ariqueate icotanaja iquenquet-
satanaji macanari. Yamenamenaitanaquequea intati maasano icantajianaque:

—Teetarite irinejajigueteroji quejegueta caroca ocatica ocaniqui Ishiraeriqui.

³⁴ Cotanquitsiquea irirajia pariseojia icantajiaque:

—Iriguentiquea agavejacaqueriquea imajirote ampatsinijia yagavejantacaca yogu-
isotoajiaqueri ampatsinipae shaquiajavecarica caquinte.

Jesoshi ipintsatacojiacari maasanojia

³⁵ Iroompaquea yoanaque Jesoshi yoantanacaroquea oraniqui itsitacaguetanaque-
roquea ocapiocaguetaguete tsovironaquipae. Itsatacaantaguetanaquequea shinagoga-
paequi icapiocantapinitacaca joriojia itsavetantaquero Quenquetsatsarentsi Oganejen-
catatsica icantajiaqueri quero icotani imajirontaguete Aapani Irioshi. Aisa yogueshijia-
jiri maasano ashinoncajajatsica.

³⁶ Oraquea yamenajiaqueriguete maasano caquintejia ipintsatacojianacari oshequi,
yamenajiaqueriquea yatsipevaejiaca taaca opajitapae, ishimampojanacajia, mana
iquempejiacari oveja teeca inchoocateji quempoguijirica.

³⁷ Iroompaquea icantajiguiri itsatacaanejia:

—Arimajaquea chooca icaramirincavaeque nintajianquitsica irimeshiajiaqueriquea,
cotanquitsiquea teemajaca iroshequiamajateji tsatacaajiaquerineca cameetsanijite ir-
imeshiimentajiquerinijite. Iroguenti iquempejiacaroquea osampatiguete tirigoitsoqui
inroteji teemajaca iroshequiamajateji aviguitaqueroneca.

³⁸ Irootaquequeate imaica noncantantajiaquempica pamanajiaquerija Aapani
Irioshi pincantajiaqueri intigarancajiaqueri tsatacaajiaquerineca.

[‡] 9:27 *Ichoviquini Taavini*, irootaque icantajitiri Meshiantanquitsineca coraquetanquitsineca.

10

Jesoshi yaajiaqueriquea 12 impeacajiaquempaca itigarancanejia (Mr. 3.13-19; Irc. 6.12-16)

¹ Iroompaquea icajemajiaqueriquea Jesoshi itsatacaanejia carajianquitsica 12, yagavejacaajiaqueriquea ironigaitsijiaquempariquea ishaquiajiacaca ampatsinipae, aisa irogueshijiaqueriquea aajiaquerica cantashitatiaguetanquitsica ashinoncajagantsipae aisa joquijirentsipae.

² Iriatimpajia carajianquitsica 12 ipeacajaiacari itigarancanejia. Iroguenti ipajijiga: Shimo (icantajitica aisa Peerero) aisa Antirishi (iriguentijeguite Peerero);

Santiago* irijanite Severo, aisa Joanca iriguentijeguite Santiago;

³ Jeripe aisa Varitorome;

Tomashi aisa Mateo (capiocapinitinirica majirontatsica imentaquipae);

Santiago† (irijanite Arejeo) aisa Tareo;‡

⁴ Shimo (icantajitica “Serote”)§ aisa Jorashi Ishicariote, aacaanquerineca Jesoshi.

Jesoshi itigarancajiaqueri 12 itsatacaane iroaroaitanaque intsavetantajianaque (Mr. 6.7-13; Irc. 9.1-6)

⁵ Ariquea itigarancajiaqueri Jesoshi irirajia carajianquitsica 12, itsatacajaiavaqueri icanque: “Aatoja poapoaitashijigui teeca irijorijoigueji pintsatacaajiaqueri. Irirajia Samariaquitica aatoja piquijajiguitsi ontaniqui iguintenijiaqueti.

⁶ Iriguenti poimोजनाque maasano ishiraerijia, iroguentiquea iquempejiacari oveja peajianquitsica.

⁷ Imaica poajianaqueja pintsavetantimोजनाquerija pincantajiaquerija: ‘Irooshipojaque aapojaquempaquea irimajirontaquempa acaniqui Inquitequitica.’

⁸ Pogueshiguetaquerija avejancaguetatsica iriguentijia aisa itsipapae ashinoncajajiatsica. Pintancorejaguetajerija metojaguetanquitsica, aisa poguisotojaijaenerija ishaquiajiacaca ampatsinipae, cotanquitsiquea aatoja pivegaratacaajigaritsija, queje- caquea naatimpa teequea novegaratacajaguempiji nagavejacaajiaquempigueti.

⁹ Aatoja paajiguitsija pimentaquitsite;

¹⁰ aatoja paajiguiquea pitsaratote, iroguenti paajianaque apamorenaro piitsaare piq- uitsaatacaca, aisa pigaviguitire picavijiacaca; aatoja paajiguitsi pigotiro; icantajitrotari cameetsavaeque irojocajiqueneriquea catsiquetatsica irishecaquempaca.

¹¹ “Querocagueti oraniqui parejerejeipojaquempagueti pincoaguetapojaqueri cav- intsajantatsica aavaquempineca cameetsa, irioquea pimaimojiaque irosati arejetapo- jajempagueti poantajanajempaca.

¹² Poajianaquegueti itsovironaquitequi pinquijajiapojegueti pincantajiaqueriquea: ‘Noninque incavintsajajiaquempiquea Aapani Irioshi.’

¹³ Irishineventajiaquempigueti, irioquea shineventajiaquemparine Aapani Irioshi incavintsajajiaqueriquea. Oraquea aatogueti ishineventajiguimpitsi, aatoquea ishine- ventajigaritsi Aapani Irioshi aato icavintsajajigui, aparoquea incavintsajajiaquem- piquea aviatimpajia.

* **10:2** Irira **Santiago** ipajita aisa Jacovo. † **10:3 Santiago**. Chooca mavite Santiago, pajitatsica Jacovo. ‡ **10:3 Tareo**. Irioca icantajitica aisa Jorashi irijanite Santiago. Pamenero Irc. 6.16 aisa Ya. 1.13. § **10:4 Serote** oncanque “nintamajatatsica”. Irooquea icantajitiri irirajia joriojia nintamajatanquitsica iroguisotoajigueri Iromaquitica om- peraperaacarica onchoocatashitajempanijite iguepatsite ishiraerijia. Acaniqui Mateo icantiri “kananitas”, irooquea oponeaca iguenquetsatsarequi arameo, oncanque “nintamajatatsica”, tee oncanteji iponeaca Canaaneequi. Irocashi (6.15) icantiri iguenquetsatsarequi guiriego “zelotes”, irootaquequea ationcantacaroca “Serote”.

¹⁴ Oraqueate querocagueti poapoaitanaqueni oraniqui, aatogueti ishineventajiavajimpi, poapoaitanajeja, cotanquitsiquea iroquetitaja pantecamajatanaqueroja quepat-sivane pagatiquitsitapojaquerigueti iroonijite iramenantajiaquempaca manaquea yantaque teeca oncameetsateji.

¹⁵ Arimajaquea oncoramanitapojajegueti arejetapojajempagueti incatsimatantaque-mparica Aapani Irioshi, caaviji incatsimamajajiaqueriquea irirajia teeca irishineventa-jiavajempiji, anaamajataqueroquea incatsimamajajiaquerigueti guintenijavetanquit-sica coramaniquitica Soromaqui aisa Gomoraqui.*

Irantsipetacajaitaquempari itsatacaanejia Jesoshi
(Mr. 13.9-13; Irc. 21.12-19)

¹⁶ “Imaicaquea nontigarancajiaquempiquea, onquejevetaquempa intigarancaji-terigueti ovejapae inconoitempari lobopae† catsimari. Iroguenti pinquempejiaque-mpari casantonqueni itsatigueti, cotanquitsiquea aatoja paashitantajiatssi, aisa aatoja pipigatsatantajiatssija, iroguenti pinquempejiaquemparija emoreni.

¹⁷ Pagamajajiaquemparija caquinteja; irajaianaquempi icapioacajiacagueti jivaji-atsica incatsimatataantajiaquempiquea, impasatacaantajiaquempi agompiaquitempi shinagogapaequi icapiocantapinijiacaca pigonorolja.

¹⁸ Aatoquea aparo ocatca. Irajaianaquempiquea aisa iramajirorequi, jeri aisa majirontajiatssicaqui, incatsimatataantajiaquempiquea irooriji poguijatacotaquena naatimpa. Ariquea pintsavetantimojianaqueriquea iriatimpajia, iriguentijia aisa maasano teeca irijorijoigueji, pintsavetacojiaquenaja naatimpa.

¹⁹ Oraquea irajaianaquempigueti majirontajiatssicaqui aatoja pishoshoguitetatsi, aa-toja piquenquejajigui: ‘¿Querocaca noncanqueni?’ Inquenquejacaajiaquempiroitari Aa-pani Irioshi cameetsanijite pintsajiaquenijite querocaca pincanque.

²⁰ Aatoquea inchiquiojitaja piquenquetsajigui aviatimpajia, irioquea quenquejacaajiaquempironeca Ishire Aapani Irioshi choocashirentajiaquempica.

²¹ “Inconoagaranquempaqueea iracaantajiaqueri iriguentijeguijiate irashimajaca igonoromajaca irimetojacaantajiaqueri, itsipaquea iracaantajiaqueriquea irijaniji-ate. Ariqueate inquejiaquempaqueea itsipa iracaantajiaqueri iriri irimetojacaanta-jiaqueriquea.

²² Maasanopae irisemaneguintimentajiaquempiroquea novajiro pitsaromentajiaque-nagueti, cotanquitsiquea quericaca atsipetacovaetanquitsineca aatogueti yovashi-antirotsi itsarovenquenagueti arejevaequempa irimetojanaje, irioquea iriguenti irajai-tanaje inquitequi.

²³ Querocagueti irantsipetacaajiaquempigueti oshequi, poapoaitanaquequeea pishi-ashiaitanaquequeea. Arimajaca noncantajiaquempi tequeratagueti pintsitacagueteja-jigueroji maasanopae iguintenipaequi ishiraerijia pintsavetantimojianaqueri, incor-aquetajate Irijanite Caquinte.

²⁴ “Irraquea itsatacajaitica teetarite iranagueriji tsatacaguirica. Ariquea iquejetaca yashintajitaca teetarite iranagueriji ashincarica.

²⁵ Aisa iriraquea itsatacajaitica ariquea inquejetaquemparija tsatacaguirica. Ariquea iquempetaca yashintajitaca, ariquea inquempetaquemparija ashincarica. Quempeca naatimpa Pimajirote ariqueate icantajiquenaquea Veerevevo,‡ ogashia aviatimpajia caaviji irogaajitaquempi.

Apatiromajaca intsaroacaamajajitaquempari Aapani Irioshi
(Irc. 12.2-7)

* **10:15 Soroma aisa Gomora.** Pamenero Jen. 18.20-21; 19.23-29. † **10:16 Irita lobo** iriguenti tomirishiquitica catsimari quejevcarica iririjegui shiishi. ‡ **10:25 Veerevevo.** Iroguenti otsipa ivajiro Satanashi, imajirote ampatsinijia. Pamenero Mt. 12.24.

²⁶ “Irootaquequea noncantantajiaquempica aatoja pitsaroacaajigaritsi caquinte, irooriji maasanopae isenacajivetacaca imaica oncoramanitapojajegueteintsajitaqueroquea. Ariquea oquejetaca maasanopae itsitijiguetacaca imaica, oncoramanitapojajegueteironigaantajitaqueroquea.

²⁷ Taaca opajitapae nocanquempica pitsecariqui, pintsavetanteroquea savincagui-teriqui. Taaca opajita nocantajiaquempica inchiqiuoji piguempitaqui, iririjencaniquea pintsavetantero sotsiqui omencotapojacaguete pitsovironaquitequi ovancaitoqui.

²⁸ Aatoja pitsaroacaajigaritsi nintajianquitsineca irimetojajiaquempiquea. Iriatimpajia irimetojajiaquempiguete, iroguentiquea metojananquitsine pitsino, cotanquitsiquea aatotarite yagavejajiguirotsi irimetojajiaqueroquea pishire. Iriguentiquea pintsaroacaamajaquempaja Aapani Irioshi, apatirotarite icocani iriatimpa yagavejiquea incanque querica metojanquitsineca, iroompaquea iragavejaque intigarancaqueroquea ishire camorecariqui.

²⁹ ¿Arimpate teequea pamenajigueriji tsimeripae ari ivegarataca mavite tsimeri apamentaquitiro imentaqui? Cotanquitsiquea aatoquea yomposa aparoquepatsiqui aatoguete irio nintatsine Piri.

³⁰ Quejetacaquea pimaejia, ariqueeate itsatiroquea apamaeropae.

³¹ Irootaquequea noncantantajiaquempica aatoja pitsaroajiguetsijate, caavijitarite panajiaqueriquea tsimeripae.

Teeca impashiventacajaiguempariji Jesoquirishito
(Irc. 12.8-9)

³² “Querica cantamajaqueroneca itsaromentamajataquena incamantajiaqueriguete caquinteja, ariqueeate nonquejetaquempaquea naatimpa oncoramanitapojajeguete, noncanque: ‘Naroguenti ashincari’, inquemavaquenaquea Aapani choocatatsica inquitequi.

³³ Cotanquitsiquea querica cantiquerineca caquinte: ‘Teetarite nontsaromentapariji Jesoshi’, ariqueeate nonquejetaquempaquea naatimpa oncoramanitapojajeguete, noncanquequea: ‘Teequea naroguenti ashintemparine’, inquemavaquenaquea Aapani choocatatsica inquitequi.

*Teequea irooquee incoraquetashiteji Jesoshi incantajiaqueri maasanojia inquemava-
caajiaquempa*
(Irc. 12.51-53; 14.26-27)

³⁴ “Aato pijijiguitsi irooquee nocoraquetashique noncantajiaqueri maasano quepat-siquitica inquemavacaajiaquempa iravacaajiaquempa. Teetarite irooquee nonco-raqetashiteji, iroguentiquea nocoraquetashique ompampiatantanaquemparoquea intsinampirejavacaajianaquempa, incatsimajitanaqueriquea tsaromentaquenaneca.

³⁵ Iriaquea irijanite incatsimatanaqueriquea iriri. Oratica orijanite oncatsimatanaqueroquea iniro. Aisa oratica imanquigatacaca irijanite oncatsimatanaqueroquea ovaguirote.

³⁶ Ariqueeate onquejetanaquempaquea, inchoocajiaque quemisantajiaquenaneca incatsimajiaqueriquea ijijiguica.

³⁷ “Aatotarite nompeguiritsi notsatacaane querica caavijica ipintsamajatari iriri, iriniro, aatomajaca naatimpa ipintsamajatana. Aisa aatotarite nopeguiritsi not-satacaane querica caavijica ipintsamajatariquea irijanite, irorijanite, aatomajaca naatimpa ipintsamajatana.

³⁸ Ariquea nonquejetaquempa aisa aatotarite nopeguiritsi notsatacaane querica teeca irininteji iraanontanaquempa ivoatsite irompajacotantajitaquemparica irantsipeventavaetena iroguijatacotantanaquena.

³⁹ Querica teeca irininteji irantsipeventenaji irooca irimetojavenquena, manaquea impeaquempa; cotanquitsiquea iriraquea teeca irinintimateji irantaguetaquequea taaca opajita inintaguequeca iriatimpa iroguenti irininqe irantsipevenquena irooca irimetojavenquena, irioquea iriguenti incoguitempani inchoocaguiteni.

Querica incavintsajaqueca Aapani Irioshi oncoramanitapojajeguetei
(Mr. 9.41)

⁴⁰ “Taacaguetei aajiavaquempineca shineventajiavaquempineca naroguenti ishin-evenca, ariquea iquejetaca quericaca shineventaquenanea naatimpa, iriguenti ishin-evenca aisa tigarancaquenaca.

⁴¹ Querica aavaquerineca tsavetacotirica Aapani Irioshi inquemisantaqueriguetei yamenaqueguetei iriguenti tigarancaqueriquea Aapani Irioshi, iriatimpa irishineventaquempariquea incavintsajaqueriquea inquempetacaquempari icavintsajaqueriguetei irira tsavetacotaquerica. Ariquea inquempetacaajitaquempari quericaca aavaquerineca comajamajatatsica iramenaqueriguetei icomajamajataca, irishineventamajaquempariquea Aapani Irioshi incavintsajaqueriquea inquempetacaquempariquea icavintsajaqueriguetei comajamajatatsica.

⁴² Ariquea iquejetaca quericaca cavintsajaquerineca chaajaniquiri teeca iranaan-tavaeteji iramenaqueriguetei yoguujatacotanaquena, iroguentiguetei irojocavetaquen-empari catsincajari irimiraqueca, arimaja aato opeapitsatari iramenacotajempaca.”

11

Joanca itigarancajiaqueriquea itsatacaanepae incoacojiaquiteri Jesoshi
(Irc. 7.18-35)

¹ Iroompaquea iteroncaquerogueti Jesoshi itsatacajiaqueriguetei itsatacaanejia carajianquitsica 12, yoanaque osamanipaequi ocapiocaguetacaguetei tsovironaquipae itsavetantavaeque, itsatacaantavaetaque.

² Iriraquea Joanca choocatiraja isantanatacojitaqueri. Iroompaquea icamantajitaqueriguetei itsavetantavaetaque Quirishito, aisa yogueshiguetaqueri icaramirincavaetaque ashinoncajianquitsica, itigarancajiaqueriquea Joanca mavite itsatacaanejia incoacojiaquiteriquea.

³ Icantajapojiri:

—¿Aviguentica noguujajivecaca? ¿Irooca noncantacoguitempani noguujajiaquiterini itsipa incoraquetaque?

⁴ Iriraquea Jesoshi icantajiguiri:

—Imaicaquea poapoaitanaje pincamantajiapojajerija Joanca maasanopae pame-naguequitica aisa piquemajiaquitica.

⁵ Iriraquea shamponcajiajivetatsica yamenamenaitanaji. Iriraquea teeca iranijijivetempaji yanijijianaji. Ariquea iquejejiaca avejancaripae ipejaianaja. Iriraquea teeca inquemajiajivetempaji iquemajianaji. Aisa iriraquea metojaguetatsica itancorejajianaji. Iriraquea coguitejacojianquitsica* imaica itsavetantimojiqueriquea itsatacajaiqueri Quenquetsatsarentsi Oganejencatatsica.

⁶ Caavijiquea irishinevaequempa quericaca incantacoguitempani intsaroventamajataquena, quericaca caarica ovashiantajana.

⁷ Ariquea yoayoaitanajiguetei itigarancajiaqueca Joanca iquenquetsavaetanaquequea Jesoshi iquenquetsatacoqueri Joanca, icantajiguiri maasano: “¿Taacaquea poapoaitashitaquiti ontaniqui oquitamampororoitapojaqueguetei? ¿Arimpate irooquea

* **11:5** Icanqueguetei **coguitejacojianquitsica** iquejetacaacari aisa irirajia tsajianquitsica teequea iragavejeji inchiqiojita irimeshiguempaji. Pamenero Mt. 5.3.

poapoaitashitaquti pamenajiaquitiro savorovana ojeonquirogueti choviga, ariquea oaquti oaquti?†

⁸ ¿Ariquea taaquea poashijiaquti? ¿Iriocaja poashijiaquti pamenajiaquitiri caquinte quitsaataroca shipetamorenaro quitsaarentsi? Pitsajiaquequea maasano quitsaataroca shipetamorenaro quitsaarentsi manaquea isavisaviiti itsovironaquitequi majirontatsica.

⁹ Iroosacanica ¿taaqueuea poapoaitashitaquti? ¿Iriocaja poapoaitashitaquti pamenajiaquitiri tsavetantaquerica Aapani Irioshi? Jeejeguitatsi, iriotaque, cotanquitsiquea iriatimpa caaviji yanaaguequeri itsipajia tsavetantajiatsica.

¹⁰ Iriotaque itioncacojiqueca coramani iquenquetsatacaquerigueti Aapani Irioshi Irijanite, icanqueri:

‘Ari nontigarancaqueri iriquetica oananquitsineca, intsavetacotempi.

Irio camantajiaquerineca igonorojia queroca pinquenanaqueni irinetsanatashitantajiavaquempica.’☆

¹¹ Arimajaca noncantajiaquempica: maasanopae caquinteja teetarite inchoocati-mateji aparo anaquerineca Joanca Viñacajatantatsica, cotanquitsiquea maasano majirontajiacarica Inquitequitica, irirajia teeca iranaajencavaevetempaji, caavijiquea icavintsajamajiaqueri, oquejevetaca yanaajiaqueri Joanca.

¹² “Coramaniquea iroaqueragueti iparianacarogueti Joanca Viñacajatantatsica itsavetantavaequerogueti arejevae-caroquea imaica, iriraquea catsimatantajiatsica icatsimatimentajiaqueriquea maasano tsavetacojiguirica Inquitequitica quero icotani imajirontagueti, teetarite irinintajigueji inquemisantajiteriji aatonijite quericaca peguiritsi Aapani Irioshi Imajirote.

¹³ Maasano tsavetantajiatsica itsavetacojiaqueri Aapani Irioshi coramani arejevae-caroquea ichooaquegueti Joanca Viñacajatantatsica. Ariquea iquempetaca Moishishini iriatimpa itioncacotaqueri.

¹⁴ Iriraquea Joanca iriotaquequea tsavetantatsica Iriashini piquemacojiaqueca incoraqueaque. Arigueti pinintajiaque pinquemisantajiavaquero nocanquempica, pinquemajiavaqueroquea.

¹⁵ Choocagueti piguempita pinquemantavaquempaca, pinquemeja.

¹⁶ “¿Quero icojigani caquinteja choocajianquitsica imaica? ¿Taa ipaji iquempejiaca? Iriguenti iquempejiaca chaajaniquitirajaca irisavisaviitaquegueti tsovijaguiteriqui irantanavijitempagueta, iroompa ari incatsimatavacaajianaquempa incanquequea:

¹⁷ ‘Nocovitimojiavequempiquea teequea pintsamarojigueji.

Ariquea namashaitimojiavetaquempi amashairentsi yamashaijistica ishimampojanca-jitaguetai

teequea pirajaiguempaji.’

¹⁸ Ariqueate piquempejiaca aviatimpajia. Icoraquevetaca Joanca teequea irishecatempaji ishecapinitaca igonorojia, aisa teequea irimirimatemparoji cachojaro, manaquea picantacojiaqueriquea: ‘Ishaquiacarri ampatsini.’

¹⁹ Ariquea imaica icoraquevetaca irira Irijanite Caquinte, ishecataca iriatimpa, imiraca, ariqueate picantajiaque: ‘Iriguenti shecanti, iriguenti shinquitatsica, aisa iriguenti itsipavijijiapojaca covaeguishejiatsica aisa capiocapinijiguinirica majirontatsica imentaquipae.’ Cotanquitsi onconijavaetanaque itsatica tsamajatatsica amenajiaqueroguetai quero oocani yantaguetaqueca.”

† 11:7 Icanqueguetai **savorovana** iquejetacaacari aisa caquinte teeca intampishitashigueteroji maasano amataagantsi, aca icanti aca icanti. ☆ 11:10 Mara. 3.1.

Jesoshi icantomajajiaqueriquea guintenijiatsica Corashiniqui, Vetsairaqui aisa Caperenaqui

(Irc. 10.13-15)

²⁰ Iroompaquea Jesoshi icantomajitsijigari ipeacaimojiavecaca oshequini oacaantantatsica intati, yamenajiaqueritarite teequea incantashitatijaiguempaji intsaroventajiguempariji Aapani Irioshi, icanqueriquea:

²¹ “¡Imaicashtiatsi pantsipevaetempanishiatsi aviatimpajia guintenijiatsica Corashiniqui! ¡Imaicashtiatsi pantsipevaetempanishiatsi aviatimpajia guintenijiatsica Vetsairaqui! Pamenajiavecaroquea nonigaimojiavequempica oacaantantatsica intati, cotanquitsiquea teequea pinintajigueji pincantashitatijaianajempa povashiantajianajeroji picovaeguishejiacaguete. Iriiraquea guintenijavetatsica coramani Tiroqui aisa Shironequi iriome amenajiguerome, incantashitatijaianaquempamequea inquitsajiaquemparome jiriqiuqijiporoquiro, aisa irigachoncaguinajiaquempamequea cachopoquiri ironigaantaquempañijite ishimampoanajiaica yamenajiaque icovaeguishejiaca, incantashitatijaianajempamequea.

²² Cotanquitsiquea noncanquempiquea aviatimpajia arejetapojajempaguete incatsimatantajiaquemparica Aapani Irioshi maasano teeca intsaroventajiguempariji, caaviji irogaamajajiaquempi anaamajaqueroquea incatsimajiaqueriguete Tirojiaquitica aisa Shironejiaquitica.

²³ Aviatimpajia guintenijiatsica Caperenaqui paventacojiaca. ¿Pamenajia ariji poapoaitanaque jenoqui inquitequi? ¡Aatotarite! Manaquea poapoivaetanaque isaviji Areshiqui.‡ Arimequeate impeacaajiaquemparome oacaantantatsica intati coramani ontaniqui Soromaniqui onquempetaquempamequea nopeacaimojiaguempica aviatimpajia imaica, aatomequeate iteroncajiguirimequeate maasano, choocatatsimequea iguinteni iriguinteniitemparomequea imaica.

²⁴ Irootaquequea noncantantajiaquempica oncoramanitapojajeguete aapojajempaguete incatsimatantajiaquemparica Aapani Irioshi maasano teeca intsaroventajiguempariji, caaviji incatsimamajajiaquempiquea aviatimpajia, anaavaequeroquea incatsimajiaqueriguete Soromajiaquitica.”

Jesoshi icanque irimagorejacaajiaqueri aventajiaquemparinca

(Irc. 10.21-22)

²⁵ Iroompaquea icanque Jesoshi: “Aapani Majirontamajatatsica, aviguenti majirontacojiacarica maasano inquitequitica aisa quepatsiquitica. Noshinevenquempiquea nocanca, pitsititapitsajiaqueritari tsajiatsica teequea ponigaajigueriji quero-caca picotani aviatimpa. Iriguentiquea ponigaajiaque teeca intsajigueji.

²⁶ Oquempetantacaca imaica, irootari pinyinque aviatimpa.”

²⁷ Iroompaquea icantajigui maasano: “Yojocaguetaquenaroquea Aapani maasanopae, aisa yagavejacaamaquena maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia inintacajiaqueca Irijanite intsatacaajiaqueri.

²⁸ “Caacate naatimpaqui maasano aviatimpajia magoshirentajiatatsica atsipejianquitsica cameetsanijite nomagorejacaajiaquempinijite.

²⁹ Pinatavaquero novoatsite, pintsatavaquero nontsatacaquempica, naroguentitari atsipetacotatsica teetarite naventacotimatempaji. Ariquea pamenapojero pimagore-jashirentajiaque.

³⁰ Teequea omanempaji novoatsite nojocaquempica, pijoncavaetaque nonatacaquempica.”

‡ 11:23 Oraquea **Areshi** iroguenti ichoocajiaqueguete metojatsica.

12

Itsatacaanejia Jesoshi yaajiaqueroquea tirigoitsoqui savincaguiteri qui imagorejantajitaca

(Mr. 2.23-28; Irc. 6.1-5)

¹ Ariquea arejetapojacaguetei savincaguiteri imagorejantajitaca* yoanaquequea Jesoshi icantanaca tirigomashiqui, itsipatsipaitanacari itsatacaanejia. Iriatimpajia itaseajianaque ishireguipanajanti tirigoitsoqui ishecajiacaroquea.

² Ariquea yamenajiaqueriguetei pariseojia icantsijigariquea Jesoshi:

—¡Pamenajiguerija! Yaajianaquequea pitsatacaanejia tirigoitsoqui imaica savincaguiteri imagorejantajitaca, icantimentantajitirotarite irantantajitemparo.

Cotanquitsiquea iriatimpa icanqueriquea:

³ —¿Arimpate teequea pampatsajavantacojigueroji aviatimpajia itioncacojitaqueriguetei Taavini coramani ocanqueguetei itaseanaque iriatimpa aisa itsipajianacaca, teequeate onchoocatimajaniquiteji taampaquea irishecajiaquempaca?

⁴ Iquijitsitanacaquea itsovironaquitequi Aapani Irioshi† ishecatsitaroquea pan ican-timentantajitica irishecajitemparoguetei, manaquea yojoquijitaquero oraniqui shi-taponcarontsi qui cameetsanijite iramenaqueronijite Aapani Irioshi. Iriguenti she-cataroquea saserorotejia, irioqueate cantanquitsica Aapani Irioshi. Cotanquitsiquea iriraquea Taavini ishecatacaroquea, aisa yojocajiaqueneriquea itsipatsipaitacaca.

⁵ ¿Arimpate teequeate pampatsajavanteroji aisa itioncacotanaqueca Moishishini ocanqueguetei iriraquea saserorotejia antajiguinirica teemporoqui itsaromentantajitarica Aapani Irioshi yantantajigaroquea savincaguiteri imagorejantajitaca, cotanquitsiquea teequea irooquea impeacajiaiguempaji covaeguisherentsi?

⁶ Imaicaquea noncamantajiaquempiquea chooca acaniqui caavijica anaqueroquea teemporo itsaromentantajitarica Aapani Irioshi.

⁷ Aviatimpajia teetarite pinquemajiguerojiquea itioncacojitaqueroguetei cantatsica: ‘Caaviji anaque nonintaquequea pimpintsatacotantajiaquempa, anaqueroquea pijitorejajiaquenariguetei viratsipae pintajiaiaquenariguetei.’ Pinquemajiaquaquero meguetei ocatica, aatomequea pijijiguime ipeacaaguishejiaquero covaeguisherentsi.

⁸ Iriraquea Irijanite Caquinte iriguentiquea cantatsica queroca icantimentantajitica irantantajitemparoguetei savincaguiteri qui imagorejantajitaca, aisa querocaquea tecca incantimentantajiteroji.

Jesoshi yogueshitajiri chompevacovetatsica

(Mr. 3.1-6; Irc. 6.6-11)

⁹ Incajarianquivaetanaqueguetei yoanaque Jesoshi shinagogaqui icapiocantapinijiacaca joriojia iquijanaquequea intsompoguiqui.

¹⁰ Ariquea ichooaque oraniqui aparo chompevacovetatsica. Irirajia catsimajiaque-rica Jesoshi yamenajiaquequea querocaca incanque cameetsanijite intsaveacojiaque-rinijite incatsimatacaantajiaqueri, icoacotantajiacarica icanqueriquea:

—¿Cameetsavaequempa irogueshitantajitaquempariquea caquinte savincaguiteri imagorejantajitaca?

¹¹ Icanqueriquea:

—Choocaguetei ashintanquitsica irovejate ariguetei intanquirejantanaquemparo aparo omoroqui savincaguiteri imagorejantajitaca, ¿arimpate aato yoashitiri irajaateri?

* **12:1 imagorejantajitaca.** Irirajia joriojia imagorejantaro savincaguiteri saavaro. † **12:4** Ocanqueguetei **itsovironaquite Aapani Irioshi** iroguenti ocanacotaque quitaarentsivanco itsaromentantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica **teemporo** intsaromentantajitaquemparica. Ipajiqueroquea iroatimpa aisa **itsovironaquite Aapani Irioshi**.

¹² Iriompaqueate caquinte caaviji ipintsatacojitari, caavijitarite yanaaqueri oveja. Irootaquequea imaica cameetsavaeque incavintsajantantajiquemparoja savincaguiteri imagorejantajitaca.

¹³ Jero ipitsocashitanacariquea chompevacovetatsica icanqueri:

—Pincantavacotempaja.

Iroompate icantavacovetanaquitiga ariquea icotanaja iraco jac peamajatanaja quempemajatanaja otsipapaco.

¹⁴ Ariquea yamenajivaquerigueti pariseojia yogueshitajirigueti, isotosotoitapanajanti ariquea isariimanatanacari Jesoshi irimetojacaantajiaqueriquea.

Isaiashini itsavetantaqueriquea Jesoshi coramani

¹⁵ Irooquea itsatavaquegueti Jesoshi isariimanajanacari irimetojacaantajiaqueri, yoanaquequea, ariquea yoguijaguijaitanaqueri icaramirincavaeque caquinteja. Iriatimpa yogueshiguetajiri maasano ashinoncajajatsica,

¹⁶ cotanquitsiquea icantimentajiaqueriquea aatonijite itsavetacojiguiritsi.

¹⁷ Oraquea iquejetacagueti imaica onetsanatacaquea icanqueca Isaiashini coramani itioncacoquerogueti icanqueca Aapani Irioshi, icanque:

¹⁸ “Jeeri irira notigaranquica nonintacaqueca.

Nopintsamajacari, aisa noshinevencari.

Nontigaranquimoqueriquea Noshire inchoocashirentapojeri.

Iriatimpa incamantajiaqueriquea maasano caquinteguetaatsica querocaca cameetsari-pae, aisa querocaca teeca oncameetsateji.

¹⁹ Aatotarite icatsimatanti, aisa aatotarite itampishijencatanti, aato iquemajitiri quenavoquirontsipaequi.

²⁰ Aato ijararejiro ovi chacopi otaporejavetanacagueti, aato itsivaquiro otsa tsivorentsi chaavogajaniquitanquitsica,‡

arejevaetemporoquea irinetsanamajatantanaquemparoca maasano, irooquea anaantanquitsine tampaticatanquitsica.

²¹ Iriotaque iroguijajivaqueca caquinteguetaatsica, iraventajiaquemparoo ivajiro.”

Icantashijitacariqueti Jesoshi iriguenti shaquiacari ampatsini

(Mr. 3.20-27; Irc. 11.14-23)

²² Iroompaquea yaajitanaqueneriquea Jesoshi aparo caquinte ishaquiacaca ampatsini, ishampontajataque aisa imacanataque, teequea inquenquetsateji. Iriatimpa ariquea yamenacajairi, aisa injacajairi macanari.

²³ Yamenamenaitanaquequea intati maasano, icantajigui: “Iriocajate Ichoviquini Taavini.”

²⁴ Irooquea iquemajiaquerigueti pariseojia icantajiaqueca, iriatimpajia icanquequea: “Iriguentisa shaquiacari Veerevevo§ imajirote ampatsinijia. Iriotaquequea agavejacaquerica yoguisotoantaguetacanicarica ishaquiajiaqueca ampatsinipae.”

²⁵ Cotanquitsiquea itsatavaqueroquea Jesoshi iquenquejajiaqueca, icanqueriquea: “Inchoocategueta caquinte incapiocajiaqueriquea igonorojia impeaquempaqueea imajirote, iroompaquea arigueta impariajanacuemparo incatsimatavacaajiaquempa, ariquea intsinampirejavacaajianaquempaqueea irishiapitsajianaqueri imajirote, aparo inchoocataje, aato ichoocataji quericampa iromperatajempaca. Ariquea iquempejiaca tsipatsipaitacarica ijijiguica, arigueta incatsimatavacaajiaquempaqueea, ariquea inchoincoitanacuempa intsinampirejavacaajianaquempaqueea, aatotarite iconoavacajajaa.

‡ **12:20** Icanquegueti **ovi chacopi** aisa **otsa tsivorentsi** iriguenti iquejetacaaca caarica tampishitatsi, caarica agavejatsi irompetanaquempa, mana incavintsajajiaqueriquea. § **12:24 Veerevevo.** Iguenquetsatsarequi guiriego icanqueri **Beezeboul** aisa **Beelzeboul.** Icanqueri quimajareri **Beelzebú.** Iriotaque pajitatsica aisa Satanashi.

²⁶ Ariquea iquejetaca Satanashi, ¿arimpate intigarancajempa iriatimpa iroguiso-toaquempa? Inquempetaquempagueti imaica irisatica guisotoajatsine, ¿arimpate iragavejaque incoguitempani impeaquempaquee imajirote maasano ampatsinija?

²⁷ Aviatimpajia iroguenti picantajiaquena: 'Iriguentisa shaquiacari Veerevevo', nagavejantacarica noguisotoantsijiajarica ishaquiajavecaca ampatsinipae. Iriomegueti agavejacaquename Veerevevo, ¿ariquea quericampate agavejacaajiaqueriquea pigonorojia yoguisotoantsijiajarica ishaquiajiacaca ampatsini? Irootaquequea itsatantajitacaroca manatarite picomica aviatimpajia.

²⁸ Cotanquitsiquea iriguenti agavejacaquenaqueate Ishire Aapani Irioshi noguisotoantsijiajarica ishaquiajiacaca ampatsinipae, irooquee pintsatantajiavaquempaca jac imajirontapojaca Irioshimajaca acaniqui aviatimpajiaqui.

²⁹ "Imaica noninque noncoacojiguempija: ¿Queroquee incojitaquerini incatsimajitaquerigueti caavijica itampishiti iraitsijiguetanaqueriquea aatogueti iroquetita iroishojitaqueri? Oraqueate iroquetigueti iroishotsijitaquemparigueti, ariquea iroguenti iraitsijiqueriquea.

³⁰ "Irraquea teeca irishineventavaquenaji, manaquea icatsimataquena; aisa iriraquea teeca intsipatenaji nocapiocantaquegueti, iroguenti yoguivorocantaque.

³¹ Ariquea noncantajiguempi imaica, taaca impeacaajiaquempaca caquinte covaequisherentsi irooca incantaguishevaeque taaca opajitapae, iriraquea Aapani Irioshi iragavejaquequea irishetacotajeri aatoquee iquenquejacaajiri, cotanquitsiquea iriraquea cantaguishtacoquerineca Ishire Aapani Irioshi aatoquee ishetacojitiritsi.

³² Ariquea oquempaca quericaca cantaguishtacoquerineca Irijanite Caquinte iragavejaquequea Aapani Irioshi irishetacotajeri, cotanquitsiquea iriraquea cantaguishtacoquerineca Ishire Aapani Irioshi, irioquee iriguenti aatoquee ishetacojitiri, aato imaica ocaniqui quepatsiqui aisa aatoquee oncoramanitapojajegueti.

Quero incojiquerini caquinte iramenantajiquemparicate arimajaca iriguenti comajamajatsica

(Irc. 6.43-45)

³³ "Pamenaquerogueti inchato cameetsatatsica, pintsaque cameetsataquequea osovenapae. Aisa pamenaquerogueti inchato teeca oncameetsateji, pintsaque tee oncameetsateji osovena. Iroguentitarite itsatantajitaroca inchato, yamenajitiro osovena.*

³⁴ Quejejiaquempiquea irijanijiate sanatari, ¿queroquee pincojiaquempapani pincantajigueronijite cameetsaripae?, aviguentijiatarite covaeguishejiatsica. Maasanotari iquenquejacojiguetica irootaquequea iquenquetsatacojiguetica.

³⁵ Ariquea iquempetaca caquinte comajamajatsica iroguenti iquenquetsatacogue-taque cameetsaripae, irootari iquenquejacogue-taque. Irraquea teeca incomajamajatempaji iroguenti iquenquetsaguishetaque taaca opajitapae, irootarite iquenquejacogue-taque iriatimpa.

³⁶ Noncantajiaquempiquea, oraquea aapojajempagueti incatsimatantajitaquemparica covaeguishejiatsica, inquenquejacaajitaqueri maasanopae iquenquetsaguishetaqueca intati.

³⁷ Aritarite cameetsarica picantaguetica, irishinevenquempiquea. Cotanquitsiquea teegueti oncameetsateji picantaguetica, incantajitaquempi: 'Imaica pantsipeventaquemparo.' "

Irraquea covaeguishejiatsica icantajiavecariquea Jesoshi iramenacaajiaquerime oacaantantatsica intati

(Mr. 8.12; Irc. 11.29-32)

* **12:33** Ari iquejetaca caquinte: iroguenti yamenantajitari ipeacaaguetacaca, ari intsajitaqueri arisa icoca. Irraquea teeca incameetsateji iroguenti ipeacajaiaca covaeguisherentsi. Irraquea cameetsari oavaetanaque iroguenti ipeacaaguetaca cameetsaripae.

³⁸ Ariquea icoraquetashijiapojaqueri Jesoshi pariseojia aisa tsatacaantajiguiroca itioncacotanaqueca Moishishini, icanqueriquea:

—Tsatacaantantatsica, nonintajiaque ponigaajiguenaro oacaantantatsica intati.

³⁹ Icanqueriquea Jesoshi:

—Aviatimpajia otiavaejiaquempiquea covaeguisherentsi, teequea quisho poajigueriji Irioshimajaca, pinintantajiavetacaca nonigaajiaquempirome oacaantantatsica intati, cotanquitsiquea aatoquea nonigaajiguimpirotsi. Iroguentiquea nonigaajiaquempi otsipa, onquempetaquemparoquea iquejetacaajitacarigueti tsavetantatsicani Jonashini coramani.

⁴⁰ Piquemacojiaqueriquea Jonashini iniaquerigueti quejevetarica iririjegui qui-terinqueni ariquea icaratacovaetanaquequea 3 savincaguiteri ontaniqui imotijaqui. Ariquea inquejetaquempaquea oncoramanitapojajeguete irira Irijanite Caquinte incaratacovaetanaque 3 savincaguiteri intsonpogui quepatsiqui.

⁴¹ Oncoramanitapojajeguete aapojajempaguete incatsimatantajiaquemparica Aapani Irioshi maasano teeca intsarotentajiguempariji, iriraquea Ninivejiaquitica incatinti-itsitanaquempaquea intsavetacotsijiaquempiroquea pantaguishejiaqueca. Maasantotari Ninivejiaquitica iquemisantajiaqueriquea Jonashini itsavetantimojiaqueriguete, ishimampojancajianaca yamenajiacaguete ipeacaaguishejiacaguete covaeguisherentsi, ariquea icantashitajianaca. Cotanquitsiquea imaica icoraquevetapojaca caavijica anaavaequerica Jonashini, teequea pinquemisantajiavaqueriji.

⁴² Ariqueate onquejetaquempaquea aisa oncoramanitapojajeguete oraquea imajirojiate Savajiaquitica oncatiitsitanaquempaquea ontsavetacotsijiaquempiro pantaguishequeca aviatimpajia choocajianquitsica imaica. Coramanitari ocoraquetashivaequeri Saromonini oquemisanqueriquea itsatacaqueroguete, oquenaetaapojaque jmm osamani oquemacoqueriguete itsamajati. Cotanquitsiquea imaica icoraquevetapojaca caavijica anaavaequerica Saromonini, teequea pinquemisantajiavaqueriji.

Ampatsini icoraquitashitajiri aisa ishaquiavetacaca

(Irc. 11.24-26)

⁴³ “Oraquea irovashiantanajeriguete ampatsini iriraquea ishaquiavetacaca, iroanaque ontaniqui oquitamampororoitapojiguete irinintavequempa irimagorejavaequeme. Cotanquitsiquea iroompa iramenavetapojaquemparo querocampa inchoocateni oraniqui.

⁴⁴ Inquunquejitsitanaquemparoquea incanque: ‘Noantanajemparota notsovironaquite nosotoantavetanacaca.’ Ari incoraquevetajempa iramenapojajeri ishaquiavetacaca quempeca tsovironaqui ipishijitiroguete inetsanajitiroguete, cajaraguitejisano oncanquempa tecatsi choocatantemparone.

⁴⁵ Ariquea iroanaque iraaquiteri itsipajia 7 ampatsini caavijica igajaiaca. Iroompaquea irishaquiajiapojempari irira ishaquiavetacaca iroaqueraguete, ariquea iriatimpa ari incotanajempa arimpa irogaamajatanajempa. Ari onquejetimojiaquempariquea covaeguishejiatsica choocajianquitsica imaica.”

Iriiro Jesoshi aisa iriguentijeguijiate

(Mr. 3.31-35; Irc. 8.19-21)

⁴⁶ Choocatiraja iquenuetsatacaajiaqueriguete Jesoshi omporoguijajianquitsica, ocoraquepoji iriuro aisa iriguentijeguijiate icatintiitapojaca sotsiqui, inintajiavetaca inquenuetsatacaajiaquerime.

⁴⁷ Iroompaquea icamantajiaqueriquea Jesoshi icantajitiri:

—Coraquetaque piniro aisa piguentijeguijiate, ichoocapoji sotsiqui, inintajiaque inquenuetsatacaajiaquempi.

⁴⁸ Cotanquitsiquea iriatimpa icanqueri camanquerica:

—¿Taa opaji iinani? ¿Taa ipaji iguentijeguijia?

⁴⁹ Iroompaquea ipitsocashijianacari itsatacaanejia, ijicojiaqueriquea icanque:

—Jeeri iricajia nopeajiaqueca iinani aisa iguentijeguiuae.

⁵⁰ Quericaca netsanamajatiroca inintaguetica Aapani choocatatsica inquitequi, irio-
taque nopejiaique iguentijeguiuae, tsiojipae, iinanipae.

13

Jesoshi iquejetacaacari pishoncaguitiroca oitsoqui

(Mr. 4.1-9; Irc. 8.4-8)

¹ Iroompaquea oritacaquea savincaguiteri isotoanaji Jesoshi tsovironaquiui, yoanaque otsapijaqui iniromotija, isavicaipoji.

² Yomporoguijaventajipojacariquea icaramirincavaetanaque caquinteja, ariquea itetanajaquea quenajarontsiqui isavicaque. Maasano omporoguijajianquitsica isav-
isaviiquequea ocaratsapijaquiui.

³ Iroompaquea itsatacaajiaqueri iquempetacaaguetaaroquea taaca opajitapae, ican-
queriquea: “Yoanaque aparo caquinte impishoncaguitero oitsoqui.

⁴ Ipishoncavoncaquitanaqueroquea tacororo tacororo, itsitacaguetaquero. Oconoagarancaqueate asacaraaguetaanaca quenavoquirontsiqui, iroompaquea isavisaviitashipojiroquea tsimeripae ishecajipojacaro.

⁵ Otsipa oconoagaranca asacaraanaca mapiporoquiui, taampina otsoroavetanaca, teemajaca onchoocamajatenica quepatsi.

⁶ Iroompaquea icatsirincaguitevetanaca catsirincaiteri, itsianaqueroquea oshim-
peguiricanaque ometojanaque, teetarite oamajateji ovarishitsa isaviqui, ojocaavaque-
rotarite mapi.

⁷ Oconoacaquea otsipapae asacaraanaca ochoocaquegueti ovarishitsa samerento. Iroompaquea otsoroitsivetanaca, arimpaquea otsoroitsitanacaquea samerento iroat-
impa otsincoanaqueroquea ometojanaquero.

⁸ Otsipa oconoacaquea asacaraaguetaanaca ocameetsaguitetaquegueti quepatsiqui, otsoroanaquequea otagananaanaca ochoocatanaque opitsaraquiacotanacaqueate oitso-
qui, oconoacaquea ochoocaque 100, otsipa 60, otsipa ochoocaque 30.

⁹ Choocaguete piguempita pinquemantavaquempaca, pinquemeja.”

Jesoshi itsatacajiaqueriquea quero ocoani iquempetacaantaguecaroca

(Mr. 4.10-12; Irc. 8.9-10)

¹⁰ Iroompaquea iquempejiquempejiipojacari itsatacaanejia icantiriquea: “¿Quero-
quea ocoani pitsatacajiaqueriguete caquinteja piquejetacaacanari intati?”

¹¹ Iriatimpa icanqueriquea: “Imaica ininque Inquitequitica pintsajiaqueroquea avi-
atimpajia queroquea icotani imajirontaguete iriatimpa, cotanquitsiquea iriatimpa-
jiaquea aatoquea itsajiguirotsi. Teetarite intsajiteroji paesatoniqui, aviguentiquea
tsajiaquerone imaica.

¹² Quericaca choocatanquitsica itsataqueca, inquimoguenquejanetacaamajaqueri,
oavaetanaque intsamajatanaque. Cotanquitsiquea quericaca teeca onchoocateji itsa-
taqueca, capichaguenquejanequitanquitsica choocavecarica iraapitsatsijiqueri.*

¹³ Irootaquequea noquejetantajiacarica imaica notsatacajiaqueriguete iriatimpajia
manaquea noquejetacaaroquea maasanopae. Iriatimpajiaquea yamenamenaive-
tanacatari, cotanquitsiquea tee irinejeji; iquemajavetacaquea, cotanquitsiquea tee
inquemajivaqueroji, tee intsajivaqueroji.

* **13:12** Quericaca nintanquitsineca inquemaqueroquea Iguenquetsatsare Aapani Irioshi, arimpaquea intsamajatanaquero. Cotanquitsiquea iriraquea teeca irininteji inquemisanteroji, inquemavetaquempaguete capichaji, manaquea omanapitsatanaquempari, aatoquea itsatimatirotsi.

¹⁴ Iquejejiacaguetei imaica, onetsanatanacaquea icantaqueca Isaiashini coramani, icanque:

‘Pinquemajivequempaquea, cotanquitsiquea aato piquemajivajirotsi.
Pamenajivequempaquea, cotanquitsiquea aato pitsatimajivajirotsi.

¹⁵ Iquishoshirentanaquetarite iricajia.

Oraquea iguempita tee inquemamajatantajemparo,
aisa imatsivocajataque,
aatonijite inejantajajarotsi iroquija,
aatoniji iquemantajajarotsi iguempita,
aatoniji itsajigui ishirequi
aatoniji ipitsocashijigana nogueshishirentantajajemparica.’

¹⁶ “Cotanquitsiquea aviatimpajia caaviji icavintsajamajiaquempi Aapani Irioshi pamenantajiacaroca maasanopae pamenajiaqueca imaica, aisa piquemajiaqueca not-satacajiaquempica.

¹⁷ Arimajaca noncantajiaquempica, ichoocajivetaca oshequini tsavetantajatsica aisa comajamajianquitsica inintajivetaca iramenajiaqueromequea pamenajiaqueca aviatimpajia imaica, cotanquitsiquea teequea iramenajigueroji. Aisa inintajivetaca inquemajiaqueromequea piquemajiaqueca aviatimpajia, cotanquitsiquea teequea inquemajigueroji.

*Jesoshi itsatacaajiaqueri itsatacaanejia taaca opajita iquejetacaaca incajaranqui
(Mr. 4.13-20; Irc. 8.11-15)*

¹⁸ “Imaica iintsija pinquemisantajivaquenaja noncamantaquempiguetei taaca opajita noquempetacaaca incajaranqui.

¹⁹ Oraquea oitsoqui asacaraaguitananquitsica quenavoquirontsi qui iriguenti noquejetacaajiaqueca caquinte quemisantajivetaroca Iguenquetsatsare Aapani Irioshi itsavetacojitiroguetei, cotanquitsi tee intsajivaqueroji. Itsatacajaivecariquea queroquea incojiaquempani impejiaqueriguetei Aapani Irioshi Imajirote, cotanquitsiquea iroompaqueate icoraquetashiqueriquea ampatsini ipeacotacaacariquea maasanopae.

²⁰ Oraquea asacaraaguigugetananquitsica mapiporoquiqui iriguenti ogomarojiaquequea quemisantajivetaroca Iguenquetsatsare Aapani Irioshi ishineventajivetaroca,

²¹ cotanquitsiquea teemajaca inquemisantamajateroji, jero ipeacotantajianajarooca taampina. Iroompaquea ocoraquetashiqueriquea atsipetagantsi, irooca icatsimati-mentajiqueriquea Iguenquetsatsare Aapani Irioshi, ariqueate icohicoitanaca yovashiantajianajiroquea, iquejejianaja iroaqueraguetei tequerataguetei intsaroventimatempariji.

²² Oraquea asacaraaguigugetananquitsica samerentoqui iriguenti noquempetacaajiaquea quemajivetaroca Iguenquetsatsare Aapani Irioshi iquemajivetarocaqueate, cotanquitsiquea iroompa irooqueate aisa iquenquejajivajiroquea maasanopae choocaguetatsica quepatsiquitica. Ariquea iriatimpajiaquea teequea inquenquejajijeroji Iguenquetsatsare Aapani Irioshi, iroguentiquea iquenquejajianaji incarajivaequeroquea yashintagueca. Querocampate incojiaquempani intsaroventamajiaquempariguetei.

²³ Cotanquitsiquea oraquea asacaraaguigugetananquitsica ocameetsaguitetaqueguetei quepatsi iriguenti ogomarojiaque quemisantajivaquerooca Iguenquetsatsare Aapani Irioshi, ariquea intsaroventamajatacariquea iriatimpa. Ariquea ichoocajiaque cameetsa, iquempejiacaroquea oitsoqui choocatananquitsica oitsoqui 100, itsipa iquempejiacaroquea oitsoqui choocatananquitsica 60, itsipa iquempejiacaroquea choocatananquitsica 30.”

Jesoshi iquempetacaacaro tojari conoacaroca tirigoitsoqui

²⁴ Ariquea iquejetacaajiacanari Jesoshi otsipa, icanqueri: “Imaica irooquee nonquempetacaquemparo quero icotani imajirontaguete Inquitequitica. Yoanaque caquinte ipishoncavoncaquitanaqueroquee tirigo cameetsaitsoquiri iniganquitejirequi.

²⁵ Iroompa imaajianajiguete maasano, yananincaquitiquea itsipa catsimataquerica ipishoncavoncaquitapanajantiro tojari quempevetaroca tirigo itsitacavaetanaqueroquee oraniqui.

²⁶ Iroompaquee otsoroavetanaca tirigo, arimpaqueate otsoroitsitanaca tojari iroatimpa omoncarajanacaroquee. Oraquee ochoocatanaqueguete oitsoqui tirigo, yamenajiqueroquee manasacana oconoacaroquee tojari.

²⁷ Irirajia amijiguirica yamenitsijigaroquee icoraquejiapojaque icantajiapojiri ashintaroca: ‘Nomajirote, arimpate namenajiaque iroguenti pipishoncavoncaquitaque tirigomajaca. ¿Imaicaquee querocaquea oquenapojini tojari?’

²⁸ Icantiriquea iriatimpa: ‘Ooshiatsi, iriocajate quempequeroquee catsimataquenaca.’ Icantajianaque amijiguirica: ‘¿Ari pinique noanoaitanaque nontsopajajiajatero?’

²⁹ Icanquequee iriatimpa: ‘Aatota, pitsipatacaantajigarotsishiatsi tirigomajaca.

³⁰ Ariquee oocaniquea osampatanaqueguete, ariquee nontigaranquitsijiguempariquea aviguijiaqueroneca ariquee intsopajitsitemparoquea tojari iroishovativaequeroquee intaitsijiguemparoquea. Iroompa irooquee irajaiaquequee tirigomajaca intariajiaqueroquee tsovironaqui qui itariantajitaroca tirigoitsoqui.’ ”

Jesoshi iquempetacaacaroquee oitsoqui moshitaasa

(Mr. 4.30-32; Irc. 13.18-19)

³¹ Iroompaquee iquejetacaajiacanari otsipa, icanque: “Imaica nontsavetacotaqueroquee queroquee icotani imajirontaguete Inquitequitica, ariquee nonquempetacaquempiro oitsoqui moshitaasa ivintyacajitiroguete iniganquitejirequi.

³² Iroatimpa caaviji anaquee ochaamirijaquijaniquivaeeque, cotanquitsiquea ontsoroanaqueguete inirojempetanaquequee anaaguequeroquee otsipapae panquirentsipae chaamirijaquitatsica oitsoqui. Ontsegotsegoatanaquempaquea onquempetanajemparoquea inchato, inchoocatantajianaquemparoquea tsimeripae.”

Jesoshi iquempetacaacaroquee anempoacaguiroca pan

(Irc. 13.20-21)

³³ Iroompaquee iquejetacaajiacanari otsipa, icanquequee: “Imaicaquee nontsave-tacotanaqueroquee queroquee icoqueroni Inquitequitica imajirontaguete, ariqueeate nonquempetacaquemparo anempoacaguiroca pan. Pamenirotarite manquigar-entsi ompeacaguemparoguete pan, aaquequee apamontiinaro tirigovane, ariquee onconoanquemparo anempoacaguiroca, ariquee oncotanaquempa anempoacanaquero maasanose.”

Queroquee oocani iquempetacaantaguecaroca Jesoshi

(Mr. 4.33-34)

³⁴ Ariquee iquejejaqueri Jesoshi imaica maasano itsatacaajiaquerica caquinteja, mana iquempetacaajiacanari. Teetarite intsatacaajigueriji intati, taaca opajitapae ininqueca intsatacaajiaqueriquea, iroguenti iquejetacaaguetaacaroquee.

³⁵ Oraquee iquempetaqueroguete imaica iroguenti onetsanatanaca itioncaco-tanaquea tsavetantatsicani coramani, icanquequee:

“Nonquenquetsatacaajiaqueriguete, iroguenti nonquejetacaaguetaquemparoquea taaca opajita.

Nontsavetantaguequero taaca opajita iroquetinica itsitijiguevecaca paesatoniqui iroa-queraguetequee ipeacajaicaroguete quepatsi arejevaetapojaroquee imaica.”

Jesoshi icamanqueriquea itsatacaanejia taaca opajita itsavetacotaqueca iquenquetsatacotaquerogueti tojari conoacaroca tirigo

³⁶ Ariquea iquenquetsatacaajivajiri Jesoshi capiocaventajiacarica, yoanaji tsovironaquiqui iquijapojaque. Iriraquea itsatacaanejia iquempejiquempejiipojiri icanqueriquea:

—Nonintajiaque poguisotoguenaroja incajaranquitica piquempetacaajiacanarogueti tojari conoacaroca tirigo.

³⁷ Icanque Jesoshi:

—Iriraquea pishoncavoncaquitaqueroca tirigo cameetsaitsoquiri iriguenti Irijanite Caquinte.

³⁸ Oraquea niganquiteji, iroguenti maasanopae quepatsi iguintenitantajiacaca caquinteguetananquitsica. Oraquea cameetsaitsoquitatsica, iroguenti quejecari caquinteja peajiaquerica Aapani Irioshi Imajirote. Oraquea tojari, iroguenti quejecari caquinteja irashijia ampatsini.

³⁹ Iriraquea catsimatantatsica pishoncavoncaquiqueroca tojari, iriguenti imajirote ampatsinijia. Oraquea nocanquegueti irajiaquerogueti tirigoitsoqui, iroguenti notsave-tacotantaque onteroncanajempagueti quepatsi. Irirajia aajiaqueroneca iriguentijia irashivantijitete Aapani Irioshi.

⁴⁰ Imaicaquea pamenajiaquerogueti itsopajajiquerogueti tojari itajiaquerogueti, ariquee onquempetaquempa oncoramanitapojajegueti onteroncanaquempagueti quepatsi.

⁴¹ Iriraquea Irijanite Caquinte intigarancajiaqueri irashivantijitete, incapiocajiaqueriquea covaeguishetacaajiacarica itsipajia, irirajia aisa maasano peacaaguishejiacaroa covaeguisherentsi, aatoniji iconoajiajari majirontajiacarica,

⁴² impishoncajiaqueriquea camorecariqui. Oraniquiquea oraniqui incoquempaniquea iriraaguitempani irantsicayajijiaquempa.

⁴³ Ariquee irirajia comajamajatanquitsica iroaroaitanaque ichoocatigueti Aapani Irioshi imajirontagueti, inquempelijanaquempariquea catsirincaiteri itsirencashimpoquirerejigueti. Choocagueti piguempita pinquemantavaquempaca, pinquemeja.

Jesoshi iquempetacaacaro itsitijitirigueti ooro

⁴⁴ “Imaica nontsavetanqueroquea queroquea icotani imajirontagueti Inquitequitica, ariqueeate nonquempetacaquempariquea ooro itsitijitirigueti iquitajitirigueti quepatsiqui. Ariquee yamenapojiaquerigueti itsipa caquinte, iquitatsitanajariquea. Ishinevaetanaca yojocantaguetaqueeroquea maasanopae yashintaguecaca yaancaroquea imentaquipae. Iroompaquea yoanaque ivegarataqueroquea quepatsi ichoocatantacaca ooro.

Jesoshi iquempetacaacaro peerera vegaramajatatsica

⁴⁵ “Oraquea imajirontagueti Inquitequitica iroguenti oquempetacari jocantague-tiroca taaca opajita. Iriatimpa yoanaque yamenaguetaquequea peerera[†] vegarama-jatatsica.

⁴⁶ Ariqueeate yamenapojiaqueroquea apaitsoquitiro caavijica anaaguequeroquea oquitasaancorerencavaeque, ovegaramajavaeca oshequi. Yojocantaguetaqueeroquea maasanopae yashintaguecaca yaantaguecaroquea imentaquipae ivegaratantaguetacaroa oratica peerera.

Jesoshi iquempetacaacaroquea inirromantsa

[†] 13:45 *peerera*. Chooca quantijaqui quejevetarica chopiro. Onquijaquerigueti capichaji impanequi, aserea-queri, ari intiritapiniquero cameetsaniji oncarenitanaque. Oncoramanitapojajegueti ompeanaquempa icanta-jitica *peerera* (icanquero quimajareri *perla*), quitasaancorerencavaeque, impeacaquemparo nenquetsiqui. Ovegaravaetaca.

⁴⁷ “Imaicaquea nontsavetacotantaqueroquea queroquea icotani imajirontagueti Inquitequitica, iroguenti nonquempetacaquemparoquea yanquitacotantajitarigueti shimagnetatsica iniromotijaqui, inoshicacotaqueriquea icantashitatiaguecaquea oshequini.

⁴⁸ Itseraiquitatigaroquea yaitsitajaroquea yaajitanaqueroquea imparaguequi. Ariquea isavisaviitanaque ashincaroa imantsatsite icoguiaguetaqueriquea cameetsagnetatsica itejiavaqueriquea cantiripaequi. Iriraquea teeca incameetsateji manaquea ipishoncagnetavaqueri.

⁴⁹ Ariquea onquempetanaquempaquea oncoramanitapojajegueti onteroncaguetanaquempagueti quepatsi, incoraquecoraqueipoje irashivantijitete Aapani Irioshi incapiocajiaqueriquea comajamajianquitsica iroashijiaquempariquea maasano covaeguishejiatsica,

⁵⁰ impishoncajiaqueriquea camorecariqui. Ontaniquiquea ontaniqui incoquempaniquea iriraaguitempani irantsicayajijiaquempa.”

⁵¹ Icanque Jesoshi:

—¿Ari piquemajiaquero maasano nocantajiaquempica?

Iriatimpajia icanqueriquea:

—Jeeje, Nomajirote.

⁵² Icantiriquea:

—Maasano tsatacaantajiguiroca itioncacotanaqueca Moishishini itsatacaamajitaquerigueti queroquea icotani imajirontagueti Inquitequitica, inquempajiaquempariquea ashintaroa tsovironaqui icapiocantaguetaquerogueti yashintagnetacaca. Iragavejaque iraguetaquero cameetsagnetatsica choocatatsica intsompogui, iroquetinicapae aisa iroaqueragnetatsica.‡

Itsatacaantavetacagueti Jesoshi Nasarequi

(Mr. 6.1-6; Irc. 4.16-30)

⁵³ Ariquea iteroncanaquerogueti Jesoshi iquempetacaagnetacarogueti, yoanajiquea.

⁵⁴ Yarejetapojacagueti iguinteniqui itsatacaantapojaji ontaniqui shinagogaqui icapiocantapinijiacaca joriojia. Yamenamenaitanaquequea intati maasano quemisantajiaquerica, icanajiaque:

—¿Queroquea oquenapojini maasanopae ocatita itsatica iricatica? ¿Taaquea agaveja-caaqueri yagavejantacaca yonigaantaguequeroquea ocaantantatsica intati?

⁵⁵ ¿Teecajate irioquea irijanite caripintero§ choocatatsica aguintenijiaqueti? Oraquea iriniro iroguenti Maria. Iriraquea iriguentijeguijiate iriguenti Santiago, Jose, Shimo aisa Jorashi.

⁵⁶ Ariquea oquempejiaca itsijoitepae iroatimpajia iroguenti oguintenijiaaca ocانiqui. ¿Queroquea oquenapojini itsatica aisa iragavejane?

⁵⁷ Ariquea teequea irinintajigueji inquemisantajigueriji, iroguenti icatsimajiaqueri, cotanquitsiquea Jesoshi icanqueriquea:

—Iriraquea tsavetantiroca icanquerica Aapani Irioshi ishineventajitavajari que-rocagueti yoanaqueni osamani, cotanquitsiquea ichoocavecagueti iguinteniqui aisa itsovironaquitequi, teequea irishineventajitempariji, teequea inquemisantajigueriji.

⁵⁸ Ariquea teemajaca ironigaantaguetajeroji oraniqui ocaantantatsica intati, teetarite inquemisantajigueriji, manaquea iquenquejajiaque: “Caaricaja.”

‡ 13:52 *Iroquetinicapae* ocantacoquero itioncacotanaqueca Moishishini aisa itsipajia tsavetantaqueroaca icanquerica Aapani Irioshi coramani. *Iroaqueragnetatsica* ocantacoquero imaicatica itsavetanqueca Jesoshi. § 13:55 Iriraquea *caripintero* iriguenti tsamajaguetiroca inchacota, ipeacaantaguecaro shitaponcarontsipae, taaca opajita.

14

*Erorishi iquenquejajiro imetojacaanquerigueti Joanca Viñacajatantatsica
(Mr. 6.14-29; Irc. 9.7-9)*

¹ Iroompaquea iriraquea Erorishi* imajirojiate Garireaquitica iquemacoqueriquea Jesoshi.

² Ariquea icantajiaqueri amijiguirica:

—Iriguentiquea Joancani Viñacajatantatsica nometojacaantaqueca. Tancorejanajishi-atsi, jero iquejetampojaroca imaica yagavejamajatantacaca yonigaantaguequeroquea oacaantantatsica intati.

³ Oraquea chapinqui iriraquea Erorishi yaacaantaqueri Joanca yoishotacaanqueriquea cavorejatsariqui, isantanatacotacaantaqueri, irooriji yamenaquequea icantomajimentavecari Eroriashi yaapitsaquerigueti iriguentijeguite pajitatsica Jeripe.

⁴ Iriraquea Joanca icanqueriquea Erorishi: “Teetarite oncameetsateji paapitsaquerigueti imanquigare piguentijeguite.”

⁵ Irootaquequea inintantavetacaca Erorishi irimetojacaantaquerimequea, cotanquitsiquea itsaroacaajiacariquea maasano choocajianquitsica oraniqui, yamenajiaqueriquea iriguenti tsavetantatsica.

⁶ Iroompaquea aapojacagueti isavincaguiterte Erorishi icajemajiaqueriquea itsipavijiacaca irishecatimojiaquempariquea. Ariqueate ishecashecaica, oquijitsipojacaquea orijanite Eroriashi otsamaropojaquequea opitsopitsovaetanacaquea ocanca. Ishineventsitanacaro Erorishi,

⁷ icanqueroquea:

—Imaica noncanquempi arimajaca nojocaquempiroquea taaca opajita pamanaque-naca, aatotarite namatavijimpitsi. Incatsimatimentenarota Aapani Irioshi aatogueti nonetsanatiro nocanqueca.

⁸ Otsatacaitsitaroquea iniro, ariquea ocampoajajiri Erorishi:

—Pojocacotsitenaro acaniqui iguito Joanca Viñacajatantatsica shimencoqui.

⁹ Ariquea icotanaca iriatimpa ishimampojanacana, cotanquitsiquea iroorijite icanqueroquea, aisa iquemajiaqueriquea maasano icajemajiaqueca, irootarite icantantacaca:

—Iroosacanicate intsiquetirote.

¹⁰ Itigaranquitsitariquea coareta ichoocaquegueti Joanca isantanatacotacagueti irijitorejaquiteri iraacotanaqueneroqueuea iguito.

¹¹ Ariquea yaacotanaqueneroqueueate yojocacopojaquenero, irooqueate jococotavaqueneroqueuea iniro.

¹² Iroompaquea iquemacojiaqueriquea itsatacaanejia Joanca, icoraquetashijajiri yaajianajiro itsino iquitajajiro. Ariqueate yoayoaitanaji icamantajiaquitiri Jesoshi.

Ishecatacaajiacari Jesoshi 5,000 shirampari

(Mr. 6.30-44; Irc. 9.10-17; Jn. 6.1-14)

¹³ Iroompaquea iriraquea Jesoshi iquemacoquerigueti Joanca imetojacaantajiaquerigueti, yoanaque osamani teeguete inchoocateji caquinte, iriguenti itsipatsipaitanaca itsatacaanejia, iquenajatantajianacaroqueuea quenajarontsi. Cotanquitsiquea iquemacojiaqueriquea choocajiatatsica oraniqui guinteninintsipaequi, yoguijaguijaitanaqueriquea yanijinijiitanaque.

¹⁴ Iroompaquea yarejerejeipojaca yoncotsinampijaatacojiapojaca. Irooquea iterejavetanaca Jesoshi yamenajiapojiriquea icaramirincavaequequea caquinteja, ipintsatacojianacari maasano. Yogueshiguetajiri maasano ashinoncajajianquitsica.

¹⁵ Imaicaquea ijaguitevaetanaji catsirincaiteri, iriraquea itsatacaanejia icantajiguiri:

* **14:1** Iriratica **Erorishi** irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

—Jac ijaguitevaetanaji catsirincaiteri. Ocaniquiquea ocaniqui teequea quericaca choocatatsineca, iroosacanica pintigarancajiajerija maasano irirajia iroaroaitanajetaja ontaniqui guinteninintsipaequi cameetsanijite irivegarajiaquenijite isheca irishecaciaquempaca.

¹⁶ Cotanquitsiquea Jesoshi icantajiguiri:

—¿Taaquea opaji iroashitantemparoca? Pojocajigueneri aviatimpajia irishecaciaquempaca.

¹⁷ Iriatimpajia icantajiguiri:

—Teequea anjeroji taampate nojocajiaquenerica. Ariguenti ocarataque 5 pan, iriraquea shima mavipaquite icarataque.

¹⁸ Icanque Jesoshi:

—Intsijate pojocajiguenarojate.

¹⁹ Ariquea icanqueriquea maasano irisavisaviitaquequea cataromashiqui. Iriatimpajia isavisaviitaquequea, ariquea yaaqueroquea Jesoshi maasano 5 pan aisa mavipaquite shima, ipaguitetanaquero inquite yamanaqueriquea Aapani Irioshi, ican-
taqueri: “Arioteesaa.”

Ariquea icotarejaqueroquea pan, yojocajiaqueneriquea itsatacaanejia, iriatimpajia yojocajiaqueneriquea maasano. Ariquea iquempetacaacari shima iriatimpa.

²⁰ Ariquea ishecacia maasano, iquemajianaca. Iroompa iriraquea itsatacaanejia icapioacajiajiro choocatajatsica, itejiajiro cantiriqui tseraiquipae, ocaratacovaetaji 12.

²¹ Maasano shecajianquitsica icaramirincavaeque arica 5,000. Cotanquitsiquea iriguenti itsajitaquequea shiramparijia quenquevarijia, teetarite intsajiteroji man-
quigarentsijia aisa chaajaniquirijia.

Yanijjatanaquero Jesoshi ojenoquiijaare iniromotija
(Mr. 6.45-52; Jn. 6.16-21)

²² Iroompaquea icantajiguiri Jesoshi itsatacaanejia:

—Pintepinteitanajempajate quenajarontsi qui pijivajivaitanajejate pimontejacojiana-
jempaquea intatiqueroqui. Naatimpa aatotaquea nocoraquetsitaja, nonquenquetsata-
caajavajerita irirajia iroaroaitanajeguete.

²³ Iroompaquea yoayoaitanajiguete maasano, iriatimpa itoncoanaque otsempiqui
iramaneri Iriri, apatiroquea yoanaquequea. Ariquea opitsecanaqueguete apaniro
ichoocaque.

²⁴ Iriraquea itsatacaanejia javaetanajiquea niganquijaqui ontaniqui. Oraquea iniro-
motija otamacojatanaquequeate oshequi, oshaguishaguivaetanaqueroqueate quena-
jarontsi joac joac, ochovigajencapojiqueate choviga jeoc jeoc, oguipiguiapiacojiaque-
riqueate.

²⁵ Ariquea irooshipojajiguete osavincaguitetanaje, icoraquepojaji Jesoshi, yanijjat-
apojiro jenoquiija iniromotija.

²⁶ Iriraquea itsatacaanejia yamenitsijigariquea yanijjatapojiro jenoquiija itsaroa-
jianaque, icajemajianaquequea:

—Jeerishiatsi sashinti!

²⁷ Icantsitanaca Jesoshi:

—Pintampishishirentajianaque. Naroguente, aatoquea pitsaroajiguitsi.

²⁸ Icantiriquea Peerero:

—Nomajirote, aviguentica, pincajemenashiatsi nagaticajatashitanajempita ojenoqui-
jaarequi.

²⁹ Icantiriquea Jesoshi:

—Caacatequetirote.

Yanijirejanaque Peerero yagaticajatsivetanacaroquea iroanaqueme ichoocaque-
guete Jesoshi.

³⁰ Cotanquitsiquea yamenavaqueroquea ochovigajencapojiquea itsaroitsitanaca, ariqueate icotanaca itsitijaatanaque, icajemitsitanaca:

—¡Nomajirote, paavajenashiatsi!

³¹ Itaampinatsitanacaquea icantajempequitanaca Jesoshi, yaitsitavajariquea iracqui, icanqueriquea:

—¡Teemajaca pintsateji arimajaca nagavejavaeti! ¿Querocaquea ocoani pitsaroancaca?

³² Irooquea itehiteitanajatiga quenajarontsiqui jac opeanaja choviga.

³³ Maasano choocajianquitsica quenajarontsiqui igueroventajianacari Jesoshi, icanqueriquea:

—Arimajaca aviguenti Irijanite Aapani Irioshi.

Jesoshi yogueshiguetajiriquea ashinoncajajianquitsica Jenesarequitica

(Mr. 6.53-56)

³⁴ Imontejacojianajaquea yarejejiapojajaro Jenesarequi.

³⁵ Iirajia choocajiatsica oraniqui yamenajivaquerigueti iriguenti Jesoshi, ishiashiaitanacaquea icamantajiavacaanaca itsitacaguitejajianaqueroquea iguinentijiagueti. Yaajianaqueneri maasano ashinoncajajianquitsica irogueshiguetajeri.

³⁶ Iroompaquea iriatimpajia icantapojiri:

—Intsishiatsi, Nomajirote, noninque inchagatsijivetavaquempiro oshipaquijaniqui piitsaare.

Maasanopactari chagatsijiaquerica ipeaguetanaja.

15

Jesoshi itsatacajiaaqueriquea itsatacaanejia taaca opajitapae covaeguishedantatsica

(Mr. 7.1-23)

¹ Iroompaquea icoraquecoraqueipoji pariseojia aisa tsatacaantajiguiroca itioncotaqueca Moishishini, iquenaquenaipoji Jerosarequi, icantajiguiri:

² —¿Queroquea icohicoitacani pitsatacaanejia teeca irinetsanatantajiguemparoji maasanopae icantajianaqueca avaesatiniteni? Mana ishecajiacaquea intati teequea inquivacomajatempaji.

³ Iiraquea Jesoshi icanqueriquea:

—¿Queroquea picojiacani aviatimpajia teeca irooquea pinetsanatantajiguempaji icanqueca Aapani Irioshi, iroguenti pinintajiaque pinetsanajiaquequea icantajianaqueca pivaesatiniteni?

⁴ Icantavetacaquea Aapani Irioshi: ‘Pinquemisantamajajiaquerijate piri aisa piniro, aatoquea pipigatsajigaritsija.’ Icanque aisa: ‘Iiraquea tsavejencatirica iriri irooca iriniro irimetojitajitempari.’

⁵ Cotanquitsiquea aviatimpajia manaquea picantashitatijaiacaroquea. Pinquenejeate imaica, choocajia irijanintajiatsica coguitejacojianquitsica icantajiavecariquea irijanite incavintsajajiaquerime irojocajiaquenerime icoguitejacojiacaca, cotanquitsiquea aviatimpajia manaquea picantajiaquequea cameetsavaeque incanqueriquea: ‘Aatoquea nagaveji nojocajiguimpirotsi pamanajiaquenaca, irooriji maasanopae nashintaguecaca nashintacaajari Aapani Irioshi’,

⁶ ariquea aatoquea yojoquiniri. Oraquea piquempejiacagueti imaica iroguentiquea povashiantajianaquero icanqueca Aapani Irioshi, irooquea poguijaguijaitanaque icantajianaqueca pivaesatiniteni.

⁷ ¡Cameetsatamampeajiatsica! Itampaticamajataqueroquea tsavetantatsica Isaiashini itioncacojianaquempigueti coramani icanque:

⁸ ‘Iricatica caquinteja ishinetsraventamampeaquena,

cotanquitsiquea manaquea ichoocashirentavaetaque osamani.

⁹ Itsaromentamampeajivetaquenaquea,

cotanquitsiquea itsatacaantajiguica iroguenti icantajiguica caquinteja irinetsana-
jiqueca.’

¹⁰ Iroompaquea icajemajiaqueriquea maasano, icapiocajiaqueriquea, icantajiguri:

—Pinquemisantamajiavaquenaja, pintsajiavaquero noncamanquempica.

¹¹ Oraquea quijanquitsica ivagantequi caquinte teequea irooquee cov-
aeguisheshirenterineca. Oraquea sotoanquitsineca ivagantequi, irootaquequea
covaeguisheterineca.

¹² Ariquee iquempejiquempejiitapojiriquea itsatacaaneja, icanqueriquea:

—¿Pamenajiavaquerimpa pariseojia itijerequivororianaca iquemajiaquempigueti pican-
querigueti imaica?

¹³ Icanque Jesoshi:

—Maasanopae panquirentsi teeca irioquee vintyaquerone Aapani Irioshi inquite-
quitica intopajajiqueroquee oncoramanitapojajegueti.

¹⁴ Imaica ariquee iquejejiaca irirajia pariseojia, iquempejiacari shamponcajatatsica
irancatsavacojiaquerigueti irapishamponcajariteni. Oraquea inquempetaque-
mpagueti imaica mavite shamponcajari irancatsatavacaajiaquempagueti
iroaroaitegueti, mavitequea intanquiretanquireitanaque ocogarajacagueti.

¹⁵ Icantsitanaca Peerero:

—Intsijate poguisotoguenaroja pitsavetacotaqueca incajaranqui.

¹⁶ Icanque Jesoshi:

—¡Arisacánica piquempejiacaquea aviatimpajia tequerata pinquemajiguenaji!

¹⁷ ¿Arimpate teequea pinquemajiguenaji nocantajiaquempica? Nocanque
maasanopae ishecajiguetaacaca manaquea oanaque itsicotoqui, ariquee irishitacoji-
tajero.

¹⁸ Cotanquitsiquea maasanopae iquenquetsaguishejitaqueca oquenantapojacaro
shirentsi, irootaquetari iquenquejaguishejitica. Irootaquequea covaeguishetantantquit-
sica.

¹⁹ Ariquee oquenapoji ishirequi taaca opajitapae covaeguisherentsipae, iquenque-
jaguishejiaquero taaca opajitapae coguisherentsipae, imetojantajigui, yoashijiguiro
manquigarentsi manquigajiatatsica aisa tequeratatirajaca irimanquigajitemparoji, yait-
sitantajigui, itsojeventantajiga, iquenquetsatacoguishetantajigui.

²⁰ Maasanopae oatica ipeacaaguishejiguetaacaca irooquee iroguenti oco-
vaguishetanti, cotanquitsiquea pishecajiaquempagueti aatogueti piquivacoveta
teequea oncovaeguishetanteji.

Aventanajari Jesoshi manquigarentsi ichoviquijianaqueca Canaanequitica

(Mr. 7.24-30)

²¹ Iroompaquea yoanaque Jesoshi irooshitacoquero Tiro aisa Shirone.

²² Ariquee ocoraquepojiiquea aparo manquigarentsi ichoviquijianaqueca choocaji-
avetatsica Canaanequi, ocanquequea:

—¡Nomajirote, Ichoviquitanaqueca Taavini, pincavintsajenashiatsi! Chooca norijanite
ishaquiacaca ampatsini atsipevaecaquea oshequi.

²³ Cotanquitsiquea iriraquea Jesoshi teequea incanteji, manaquea isanticotanaque.
Ariquee iquempejiquempejiipojiri itsatacaaneja, icantajiaqueri:

—Intsijate pinquemisanteroja cameetsanijite oanajenijite, manaqueate oguijagui-
jaipojacaji ocajemavaepoji.

²⁴ Icanque Jesoshi:

—Iroguenti itigaranquimentaquinaquea Aapani Irioshi noncoraquetashijiaqueri
ishiraerijia, noncavintsajajiaqueri quejejiacarica oveja peajianquitsica.

²⁵ Cotanquitsiquea iroatimpa arimpaquea oquempejitapojari ogueroventanacari,
ocanque:

—¡Nomajirote, iintsishiatsi pincavintsajacotenashiatsi!

²⁶ Cotanquitsiquea Jesoshi icanqueroquea:

—Teequea oncameetsateji aapitsateri chaajaniquirijia isheca, ojoquitenempari ishi-
ishitepae.*

²⁷ Iroatimpa ocanque:

—Arimajaca, Nomajirote, cotanquitsiquea shiishi iramenacojiaqueriguete irishecacaj-
aquempaguete virajiacarica iroguijavaqueroquea isaviji shitaponcarontsiqui irishecac-
sopequiguetaquemparoquea otsopequi ontanquirejaguetanaquaguete.

²⁸ Icantsitaroqueea Jesoshi:

—Iroosacanica, manquigarentsi, pitsamajataque nagavejaque nogueshitajero pori-
janite, imaica nonetsanataquempiro pamanaquenaca.

Iroompa icanquitiguiro opeapanajanta.

Jesoshi yogueshiguetajiri oshequini ashinoncajajatsica

²⁹ Iroompaqueea yoanaji Jesoshi icantanacaquea otaravijatapojacaguete iniromotija
Garirea. Coajicaqueea itoncoanaque niganquitantanaqui ariquea isavicaque oraniqui.

³⁰ Ariquea yoayoaitashitanaqueri icaramirincavaetanaque caquinteja yaajianaque-
neriquea teeca iranijimajateji, shamponcajaripae, macanaripae, teeca ironcavacotem-
paji, aisa oshequini ashinoncajajatsica ocantashitatiejencaguecaquee ashinonca-
jarentsi. Yojoquijijiapojiniri iguitiqui Jesoshi. Iriatimpa yogueshiguetajavajiriquea
maasano.

³¹ Iriaquea capiocajianquitsica yamenamenaitanaquequeea intati, yamenajiaque-
tarite iquenquetsajianajiquea macanaripae teeca inquenquetsajavetempaji, yon-
cavacojianajaquea teeca ironcavacovetempaji, yanijimajatanajiquea teeca iranijima-
javetempaji, aisa yamenajianaji shamponcajavetanquitsica. Ariqueate icohicoitanaca
ishineventamajatanacari Aapani Irioshi cavintsajajiaquerica ishiraerijia.

Jesoshi yoshequiavaequeroqueea pan, ishecatacaajiacari 4,000 shirampari
(Mr. 8.1-10)

³² Iroompaqueea icajemajiaqueriquea Jesoshi itsatacaaneja icantajiguiri:

—Nopintsatacojianacariquea irirajia, namenajiaqueriquea isavicaventaji-
aquenaqueea ocaniqui 3 savincaguiteri, niganquiquea iteroncacojianacaquea
ishecajia. Imaicaqueea imaica teequea onchoocateji taaqueea irishecajiaquempaca.
Teetarite noninteji nontigarancajiaqueriquea iroaroaitanaje itsovironaquitequi
itaseajiaquetari, aajivaqueritsi itase quenavoquirontsiqui.

³³ Iroompaqueea icantajiguiri itsatacaaneja:

—¡Ooo icaramirincavaequeriquea! ¿Querocampate naajiaqueroni pan nojocajiaque-
nerica irishecajiaquempaca maasano inquemantajianaquempacate? Ocaniquiquea
teequeea quericaca guintenitantedparone.

³⁴ Icanqueri Jesoshi:

—¿Querocaquea ocarashequiaqueni pan choocatanquitsica?

Icantajiguiri:

—Ocarati 7. Chocca aisa ishantyoriqui shima tee iroshequiamajateji.

³⁵ Ariquea Jesoshi icantajiaqueriquea maasanojia irisavisaviitaquequeea quepatsiqui.

³⁶ Yajiricajiaquero pan caratanquitsica 7 aisa shima, yamanaqueriquea Aapani
Irioshi, icantaqueri: “Arioteesaa.” Ariquea icotarejaqueroqueea pan aisa shima yojoca-
jiaqueneri itsatacaaneja, irioqueate jocajivaqueneriquea maasano.

³⁷ Ishecajiacaquea maasano, iquemajianaca. Oraqueea choocatapojajatsica itegueta-
jiroqueea itsatacaaneja cantiriqui, ocaratacovaetaji 7.

* **15:26** Aapani Irioshi itigaranquimentaqueri Jesoshi incoraquetashijiaqueri ishiraerijia. Iriquetimeguete incav-
intsajajiaqueme teeca irijorijoiagueji, onquempevetaquempame yaapitsajitiriguete isheca chaajaniquirijia irojo-
quitenempariguete shiishipae.

³⁸ Maasanojia shecajianquitsica icaramirincavaeque 4,000. Iriguentitarite itsajique shiramparijia, teequea intsajiteroji manquigarentsijia aisa chaajaniquirijia.

³⁹ Iroompaquea Jesoshi itigarancajiajiri iroaroaitanajeta. Iriatimpa itetanaja que-najarontsiqui, itsipatsipaitanajari itsatacaanejia yoajianaquequea irooshitacoquero Magarara.†

16

Iriraquea pariseojia aisa saroseojia icantajavecari Jesoshi ironigaajiaquerime oacaantantatsica intati

(Mr. 8.11-13; Irc. 12.54-56)

¹ Ariquea icoraquecoraqueitashipojiriquea Jesoshi pariseojia aisa saroseojia iramenantajiguempari, icantantajapojacarica ironigaajiaqueri oacaantantatsica intati onquenantapojemparoja ontaniqui jenoqui inquitequi.

² Cotanquitsiquea iriatimpa icanqueriquea:

—Aviatimpajia pamenajiguirogueti ocamachoncaguitetigueti itsaparoncaguite-tigueti catsirincaiteri manaqueate picantajigui: ‘Osaitequeraquea oncameetsaguitetamanaquequea, camachoncaguitevaequetarite.’

³ Oraquea arigueti oncamachoncaguitetamanaquequea picantajigui: ‘Imaicaquea aatotarite ocameetsaguiteti, mampiroguitewaetaquequea, aisa seevaequetarite.’ Pitsajiavetacararo arigueti oncameetsaguitetaque aricampate aatocaja ocameetsaguiteti, cotanquitsiquea teequea pintsajigueji queroquea ocotacani oquempetantacaca imaica pinejajiavetacarogueti taaca opajitapae oacaantantatsica intati teeca iramenajiteji coramani.

⁴ Aviatimpajia otiavaetaquempiquea covaeguisherentsi, pinintantajiacaca namenacajiaquempiro oacaantantatsica intati, cotanquitsiquea aatoquea namenacajiaiguimpirotsi. Iroguentiquea namenacajiaquempi otsipa onquempetaquemparoquea iquejetacaajitacarigueti Jonashi coramani.✧

Ariqueea itsinampirejajianajiri, yoanaji.

Jesoshi itsavetacotsitaqueri itsatacaantaqueca pariseojia iquempetacaacararo anempoacaguiroca pan

(Mr. 8.14-21)

⁵ Iroompaquea yoayoaitanaquequea itsatacaanejia Jesoshi imontemonteitanajaquea intatiqueroqui, ipeacojianajaroquea pan irajaianaqueme irishecajiaquempameca.

⁶ Iroompaquea iriraquea Jesoshi icanqueriquea:

—Aviatimpajia, inchiquiojitaja pishecatacojigarotsi anempoacaguiroca pan irashijia pariseojia aisa saroseojia.

⁷ Irooquea iquemajiavaquegueti iquenquetsatavacaajianaca, icanquequea:

—Manatarite yamenajiacajiquea teetarite amejji pan, jero icantantajiacaca imaica.

⁸ Iriraquea Jesoshi yamenajiavaquerigueti iquenquetsatavacaajianaca, icantsitariquea:

—¡Teemajaca pintsamajajigueji arimaja nagavejamajati! ¿Queroquea ococani piquenquetsatacotantajiacaroca pan, picanquequea manatarite namenaquempi teequea pameji pan?

⁹ ¿Arimpate tequerata pintsajigueji? ¿Arimpate teequea pinquenquejajigueroji pan ocaravecaquea 5, nocotarejaguequero noshecatacaajiacari 5,000 shiramparijia? Ariqueea picapiocajiajiro choocatapojajatsica oshequiacovaetaji cantiripaequi. ¿Arimpate pipeacojiajaroquea?

† 15:39 Oratica guinteninintsi **Magarara (Magdala)** opajita aisa Magarani (**Magadán**). ✧ 16:4 Mt. 12.39-40.

¹⁰ Aisa ¿arimpate teequea pinquenquejajigueroji ocaravecaquea pan 7, nocotarejague-
queroquea noshecatacaajiacari 4,000 shiramparijia? Ariquea picapiocajiajiroquea
choocatapoajatsica oshequiacovaetaji cantiripaequi. ¿Arimpate pipeacojianajaro?

¹¹ Oraquea nocantajiaquempigueti: ‘Inchiquiojitaja pishecatacojigarotsija anem-
poacaguiroca pan irashijia pariseojia aisa saroseojia’, ¿queroquea ocoani teeca pintsaji-
avaqueroji teequea irooquea noncantacoteji pan?

¹² Ariquea itsajiaque itsatacaanejia teequea irooquea incantacoteji anem-
poacaguiroca pan, iroguentiquea iquempetacaacaro itsatacaantajiguica pariseojia
aisa saroseojia aatonijite iquemisantajiguiritsi itsatacaantajiguigueti.

Peerero icanque Jesoshi iriguenti Quirishitotatsica

(Mr. 8.27-30; Irc. 9.18-21)

¹³ Iroompaquea yoanaquequea Jesoshi icantanacaroquea oraniqui irooshitaco-
carogueti guinteninintsi pajitatsica Sesarea Piripo. Ariquea icanqueriquea itsatacaane-
jia:

—¿Queroquea icanqueni caquinteja? ¿Taa ipaji iricatica Irijanite Caquinte?

¹⁴ Iriatimpajia icantajiguiri:

—Iconoagarantajiacica icantacojiaquempi: ‘Iriguenti Joancani Viñacajatantatsica.’ Itsipa
cantajiananquitsica: ‘Iriguenti Iriashini.’ Itsipaquea cantajiananquitsica: ‘Iriguenti
Jeremiashini, teegueti irio, iriguenticaja itsipa tsavetantatsicani paesatinica, itancore-
janajishiatsi.’

¹⁵ Ariquea icantajiguiri:

—Aviatimpajia, ¿quero picantajiguini? ¿Taa nonaque naatimpa?

¹⁶ Icantsitanaca Shimo Peerero:

—Aviguenti Quirishitotatsica,* Irijanite Aapani Irioshi anijatsica.

¹⁷ Icanqueriquea Jesoshi:

—Pishinetaca, Shimo, irijanite Jonashi, teetarite irioquea caquinteja tsatacaajiguem-
pirene ocativa picantaquenaca imaica. Iriguenti tsatacaaquempiro Aapani inquitequit-
ica, icavintsajaquempitari.

¹⁸ Ariquea noncanquempi naatimpa: aviguenti Peerero, Mapi,† ariquea ocativa shi-
ratantapiqui novinchajacotantemparo notsovironaquite cantacotaquerica maasano
quemisantajiaquenanea. Aatoquea agavejajiguiri osotomoro Areshi ichoocaquegueti
metojatsica.‡

¹⁹ Onquempvetaquempaqueea nojocaquempi yavi iyavirejantajitaroca sotomorontsi
inquijsantajitempaca imajirontagueti Inquitequitica; taaca opajita picantimentaque-
rica choocatanquitsica acaniqui quepatsiqui, inquejetaquempa Aapani inquitequit-
ica incantimentantaqueroquea; aisa taaca opajita pishineteneri choocatanquitsica
acaniqui quepatsiqui, inquejetaquempaqueea Aapani inquitequitica irishineteneri.

²⁰ Ariquea Jesoshi icantajiaqueriquea itsatacaanejia aatonijite itsavetantajiguiritsi
incanquequea iriguenti Quirishito.

* **16:16 Quirishitotatsica.** Iguenquetsatsarequi guiriegojia icanquegueti **Christos** (Quirishito) manaquea
ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca im-
peaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajiatatsica
coramanitica intigarancaque Aapani Irioshi impeaquempaniji Imajirojiate maasano. † **16:18 Peerero** ocanque
“mapi”. Jesoshi ipajitajiri “Peerero” irooriji itsatsitacari oncoramanitapojajegueti iroanajegueti Jesoshi jenoqui
inquitequi, intampishishirentanaque Peerero, aisa intampishitacajiaqueri itsipajia. Quericaca cantamajatan-
quitsineca: “Irira Jesoshi irio Quirishito, Irijanite Aapani Irioshi”, intsipatacaantajiguempari maasano itsipajia
tsaromentajigarica. ‡ **16:18 Oraquea Areshi** iroguenti ichoocajiaquegueti metojatsica. Icanquegueti **Aatoquea**
agavejajiguiri osotomoro Areshi, ocanque “Aatoquea agavejajiguiri metojagantsi”, ipochatanajitari Quirishito,
ariquea inquejejaquempa aisa maasano aventajiaquempatica.

Jesoshi icamantsicaro irimetojaque
(Mr. 8.31-9.1; Irc. 9.22-27)

²¹ Iroompaquea Jesoshi iparianacaroquea itsatacajiaqueriquea itsatacaanejia iroanaque Jerosarequi irantsipetacajiaaquempariquea jivajiatsica, irirajia sasero-rotejia anaantajianquitsica, irirajia aisa tsatacaantajiguiroca itioncacotanaqueca Moishishini, iroompaquea ari irimetojajiqueri, cotanquitsiquea aapojajempaguete 3 savincaguiteri impochatanaje.

²² Iiriraquea Peerero itsipatanacari tiijacoñaji icantomajitavetari, icantiriquea:

—¡Aato, Nomajirote! ¡Aatotari avishimatimpi!

²³ Cotanquitsiquea ipitsocanaca Jesoshi icantsitari Peerero:

—¡Poanaqueshinete, Satanashi! Piticaavetaquena, teetarite irooquea pinquenquejama-jate inintaguetica Aapani Irioshi, iroguenti piquenquejaguetaquequea iquenquejaguet-ica caquintejia.

²⁴ Ariquea Jesoshi icanqueriquea itsatacaanejia:

—Quericaca nintanquitsineca iroguijatacoquena irovashiantanaqueroja inintashiguevetacaca iriatimpa, irinatashitapiniquempa inchapoa irompajacotan-tajiquemparica, mananiji iroguijatacoquena.

²⁵ Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenanecca irooca irimetojaven-quena, incoquempaniquea inchoocaguiteni.

²⁶ Ariguete inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapojajeguete irimetojaqueguete ariguete impeaquempa camorecariqui, ¿arimpate agavejaque irajaararo aavajeri? Aatoquea agavejitsi. Irashintaguevequemparoqueate maasanopae, cotanquitsiquea aatotarite yagaveji irivegaraventavaquempa aatonijite yoguitsi camorecariqui.

²⁷ Oraquea incoraquetajateguete Irijanite Caquinte iroganejencapojajempaquee, iroguentiquea iroganejencare Iriri. Oraquea incoraquetajateguete intsipatsipaiquem-pariquea irashivantijitete, iroguishinejajipojajeri maasano netsanajiguiroca inin-taguetica, irioquea teeca inquemisantajigueri manaquea incatsimatimentajipojajeri irantsipetacaajiaquempari.

²⁸ Noncanquempija arimajaguitatsi iconoagarantaca catintiitimojiaquenaca imaica, aato imetoji tequerataguete irameneri irira Irijanite Caquinte irimajirontapojaquem-paguete.

17

Jesoshi icantashitatiimojiacariquea itsatacaanepae
(Mr. 9.2-13; Irc. 9.28-36)

¹ Iroompaquea anaavaetanacaguetequea 6 savincaguiteri iriraquea Jesoshi yoanaquequea ontaniqui otsempiqui yagatsonquivaetanaquequea osamani. Iriguentequea itsipatsipaitanaca Peerero, Santiago aisa iriguentejeguete Santiago pajitatsica Joanca. Tee inchoocateji itsipajia.

² Iroompaquea taampina iriatimpajia yamenitsijigari Jesoshi icantashitatiimo-jianacariquea. Ariquea icotanaca itsirencashimpoquirerejanaquequea ivoroqui quempetanacaquea itsirencashimpoquirerejiguete catsirincaiteri, aisa iitsaarequi oquitamaromajatanaquequea ocanca.

³ Yamenitsijigariquea Moishishini aisa Iriashini iquenquetsatacaajiaqueri Jesoshi.

⁴ Irira Peerero icanqueriquea Jesoshi:

—Nomajirote, cameetsavaeque achoocajiaque ocaniqui. Pinlineguete nompeacaguempaja 3 catisetarentsi, aparo pashinquempa aviatimpa, aparo irashinquempa Moishishi, otsipaquee irashintaquempa Iriashi.

⁵ Quenquetsavetanatsi omanacojiapojajiri mararo quitamaromajatanquitsica, ariquea iquenquetsajencajitanaque omararosecanquegueti icanque:

—Iricatica irio Irijani, nopintsatacaca, noshineventamajatacari. Pinquemisantamajajiguerija.

⁶ Iquemitsijigariquea ariqueate icohicoitanaca itsarotsaroitanaque ipatapataitanaca.

⁷ Cotanquitsiquea Jesoshi iquempejiquempejiipojiri ichagajiaqueriquea icanque:

—Pincatintiijanaje, aatoquea pitsaroajigui.

⁸ Yamenitsijavetanaja aisa teequea anejeriji incatintiitaje, aparoquea icatiaja Jesoshi.

⁹ Ariquea icoraquecoraqueitaji yoguirincajiaja, iriraquea Jesoshi icanqueriquea:

—Aatotaja quericaca picamantitsi oratica pamenajiaqueca imaica. Intancorejana-jeguete Irijanite Caquinte irimetojavetaquempaguete, ariquea pintsavetacotsijiguemparoquea.

¹⁰ Iiraquea itsatacaanejia icoacotaqueri, icanantajiguri:

—¿Quero ocotacani icanantacaca tsatacaantajiguiroca itioncacotanaqueca Moishishini icanajiaqueguete iriquetitaquea coraquetajatsine Iriashini?

¹¹ Icanqueri Jesoshi:

—Arimaja iriquetitaquea coraquetajatsine Iriashini, irinetsanaguequeroquea maasano.

¹² Imaica noncantajiaquempiquea jac icoraquequiti Iriashini, cotanquitsiquea teequea intsajiteriji, manaqueate yantaguishejitaqueri maasano inintajitaqueca. Ariquea inquempetacajitaquempariquea Irijanite Caquinte irantsipetacajaiquempari.

¹³ Ariquea itsajiaipojaque itsatacaanejia iriosacanica itsavetacotaque Joanca Viñacajatantatsica.

Jesoshi yogueshitajiri chaajaniquitirajaca, yoguisotoajiniri ampatsini

(Mr. 9.14-29; Irc. 9.37-43)

¹⁴ Iroompaquea yarejerejeipojacaquea ichoocajiaqueguete caquintejia icapioacajiacaguete. Icoraquetashipojiri Jesoshi aparo shirampari, igueroventempojacari icanqueriquea:

¹⁵ —Nomajirote, pimpintsatacotenarishiatsi nirijanite imetojapinitaquiti icanapinitaquiti tinquininini, yatsipevaetaca. Itsiatsiavaetanacaqueate paamariqui, aisa iticajaticajavaetaca ojaaquiniqui.

¹⁶ Namajiavetacanariquea pitsatacaanejia irogueshitajerimequea, cotanquitsiquea teequeate iragavejajigueriji.

¹⁷ Icanque Jesoshi:

—¡Arisa picomirincajiga teequea paventemparoji iragavejane Aapani Irioshi, iroguentiquea picovaeguishejiga! ¿Querocaquea oncarashequiavaeteni nosavicaventajiaquempi? ¿Queroca oncarashequiavaeteni nantsipetacajiaquempi? Irosacanica iintsijate pamajiaquerijate ocaniqui.

¹⁸ Iroompaquea icanantomajitari Jesoshi ampatsini, ariquea icotanaca isotoapanajanti, ari ipeanaja chaajaniquiri ishaquiavecaca.

¹⁹ Coajica iriraquea itsatacaanejia icoraquetashijiaipojiriquea Jesoshi apaniro, icanqueriquea:

—¿Queroquea ococani naatimpajia teeca nagavejajigueji noguisotoitajigueriji?

²⁰ Icanque Jesoshi:

—Iroorijite tee paventajiguemparoji nagavejane. Arimaja noncanquempi, ariguete paventajiguemparo capichaji, ariquea pagavejajiaqueroquea pincantajiaquero oratica otsempi: ‘Pogaanaquempajate poanaquequea osamani’, ogaanaquempaquea. Aatotarite taaca opaji manapitsajiguimpitsi arimajacaguete paventamajatanaquemparoguete nagavejane.

²¹ Cotanquitsiquea ampatsinipae quejecarica irintatica, aato isotogui aatoguetei pamanamajatiri Aapani Irioshi, aisa aatoguetei pisanticotiro pisheca.

Jesoshi icamantsitajariquea irimetojaque

(Mr. 9.30-32; Irc. 9.43-45)

²² Iroompaquea Jesoshi itsipatsipaitanacari itsatacaanejia yoayoaitanaquequea oraniqui Garireaquei, itsatacajiaaqueriquea icanque:

—Iriraquea Irijanite Caquinte iraacaantajiqueru iraajiavaqueru caquintejia.

²³ Ariquea irimetojajiaqueru, cotanquitsiquea aapojajempaguetei 3 savincaguiteru irovochantajitajeri.

Ariquea iquemajiavaqueriguetei ishimampojancajianaca oshequi.

Imentaquipae ashiquea teemporo itsaromentajitarica Aapani Irioshi

²⁴ Ariquea yarejerejeipojacaguetei Jesoshi aisa itsatacaanejia Capereñaquei, icoraquejiapojaquequea capioquirica imentaquipae ashiquea teemporo, icoacojiapojaqueru Peerero, icanqueriquea:

—Iriraquea tsatacaajiguimpica ¿teempa irivegaratapiniteri capioquirica imentaquipae ashiquea teemporo?

²⁵ Icanque Peerero:

—Jeejeguitatsi ivegaratapinitiri.

Iquijavetanaquitiga intsompogui tsovironaquiqui ichoocaqueguetei Jesoshi, irique-tiquea quenquetsatacaavaqueru, icanqueriquea:

—Shimo, ¿queroquea piquenquejaque aviatimpa? Iriraquea majirontajiatitsica chooca-jiatitsica acaniqui quepatsiqui ¿queru irivegaratacaaquempaca imentaquitsite? ¿Irioca irijanijiate, irioca itsipajia?

²⁶ Icanque Peerero:

—Iriguentiquea irivegaratacajiaaquempaca itsipajia.

Icanque Jesoshi:

—Iroosacánica teesacánica irioqueate irivegaratacaajiguempaji irijanijiate.

²⁷ Cotanquitsiquea aatimpajia aatonijite icatsimatashitaji, poanaque iniromotijaquipojocatsajataquiteja, iroompaquea iriraquea iriquetica paaque pintisavancaqueritaquea paitsitavaqueriquea imentaqui cavorejatatsica choocatanquitsica ivagantequi, pamajiaqueneriquea capioquirica imentaquipae ashiquea teemporo, pojocajia-pojaqueneru. Irarejequemparo irivegaratacaaquenaca naatimpa aisa aviatimpa avegarati-mentajiaquempaniji.

18

Quericaca anaantamajatanquitsineca

(Mr. 9.33-37; Irc. 9.46-48)

¹ Iroompaquea iquempejiquempejiipojiri itsatacaanejia Jesoshi icantajiaqueriquea:

—¿Quericaca anaantamajatanquitsineca irimajirontaquempaguetei Inquitequitica?

² Iriatimpa icajemitsitaquea aparo chaajaniquiri yogatiitsitariquea niganquiqui ichoocajiaqueguetei,

³ icantajiaqueriquea:

—Arimajaca noncantajiaquempica: aatoguetei picantashitatijaijaa pishirequi pinquempejiajempariquea chaajaniquirijia, aatotarite pagavejitsi pinquijanaque imajirontaguetei Inquitequitica.

⁴ Taacaguetei quempetajemparineca iricatica chaajaniquiri teeca inquenquejeroji iranaimanatantaque, irioquea iriguenti caaviji iranaaque irimajirontaquempaguetei Inquitequitica.

⁵ Aisa quericaca shineventavaquemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineventavaca.

Caaviji incatsimamajajiqueriquea covaeguishetacaantanquitsineca
(Mr. 9.42-48; Irc. 17.1-2)

⁶ “Taacaguetei covaeguishetacaquemparineca aparo chaajaniquiri quejejiacarica iricajia tsarovoltaquenanece, incatsimamajajitaqueriquea oshequi. Iroquetitamequea intsatotacojiqenerime itsanoqui iniroshimentapiri itononcantajitaca ariquea irajaitanaquerimequea impishoncajajiquerime osaanajavaetaquegueti inirojani quentijani.

⁷ ¡Imacashiatsi irantsipevaejiguempanishiatsi maasano choocajiatsica acaniqui quepatsiqui, inchoocajiaquetarite nintajianquitsineca incovaeguishetacaantajiaquempaquea! Ariquea onquejetanaquempaquea imaica, cotanquitsiquea caavijiquea irantsipemajajiaquempaquea quempejiaqueroneca imaica, incatsimamajajiqueriquea.

⁸ “Nonquejetacaajiaquempiroquea imaica: ariguetei oncovaeguishetacaquempi paco irooca piguiti, ariquea pincarataqueroquea pimpishonquitemparo. Cameetsavaequequeate pimpishoncaquerogueti covaeguishetacaquempi pinetsanatimentana-jempanijite. Aatoguetitarite pipishonquiro jatanatsitarite oncovaeguishetacaajempi, iroompa pimetojanajeguetei impishoncajitaquempiqueate camorecariqui aatoca otsivaquitsi.

⁹ Aisa irooguetei covaeguishetacaquempine poquija pinquitsorejaaquempa pimpishoncaquero. Cameetsavaequequeate pimpishoncaquerogueti covaeguishetacaquempi pinetsanatimentana-jempanijite. Aatoguetitarite pipishonquiro jatanatsitarite oncovaeguishetacaajempi, iroompa pimetojanajeguetei impishoncajitaquempiqueate camorecariqui aatoca otsivaquitsi.

Oveja peavetanquitsica
(Irc. 15.3-7)

¹⁰ “Aatoja pitsojenquiritsija irirajia chaajaniquiri, choocajiarite irashivantijitete Aapani Irioshi quempoguijajiaquerica. Iriatimpajia icocaniquea ichoocajiaque on-taniqui quempeji Aapani Irioshi choocatatsica jenoqui inquitequi.

¹¹ Irootaquequea icoraquetantacaca Irijanite Caquinte, irajiajateri peajiavetanquitsica.

¹² “¿Queroquea piquenquejajiaque aviatimpajia? Inchoocategueti aparo caquinte iriviraquempaquea 100 irovejajiate iroompaquea impeaquempaquea aparo, ¿arimpate aatompate yojocajianajiri maasano irovejate iroanaquequea iramenaguetajateri peanquitsica?

¹³ Ariquea irajeriguetei caaviji irishinevenquempariquea, anaavaequeroquea ishineventajiacariguetei maasano 99 teeca impeavetempaji.

¹⁴ Ariquea iquempetacaquea Piri inquitequitica, teetarite irininteji impeaquem-paquea aparo quejejiacarica irirajia chaajaniquiri.

Queroquea ancojiaquempani avetsinantajajeriguetei apitsaroveritarijateni
(Irc. 17.3)

¹⁵ “Querocaguetei incoquempani papitsaroveritarite poanaquequea pinquenquetsata-caapojeri apaniroja, pincamanqueriquea querocaguetei icoquempani. Iriatimpa inque-maquempiguetei jac pivetsinantajiri.

¹⁶ Oraquea aatoguetei iquemimpitsi, pintsipatanaquempariquea aparo arica mavite papitsaroveritarite cameetsanijite inquemajiaquempanijite iriatimpa, aisa intsajia-quenijite arimajaca pininquequea pivetsinantajeri.

¹⁷ Cotanquitsiquea aatoguetei iquemimpitsi, poanaquequea icapiocajiacaguetei tsaroverentajiatatsica pincamantajiqueriquea, incantomajajiaqueriquea. Aatoguetei

iquemiritsi iriatimpajia, manaquea pinquempetacaajiaquempari teeca intsaroven-tempariji Aapani Irioshi irioca capioquinirica majirontatsica imentaquipae.

¹⁸ “Arimaja noncantajiaquempi: taaca opajita picantimentaquerica choocatanquitsica acaniqui quepatsiqui, inquejetaquempa Aapani inquitequitica incantimentanta-queroguea; aisa taaca opajita pishineteneri choocatanquitsica acaniqui quepatsiqui, inquejetaquempa Aapani inquitequitica irishineteneri.

¹⁹ “Noncantajiaquempi aisa: arigueti pinarate mavite acaniqui quepatsiqui, arigueti onquempetavacaguempa pinquenquejaqueca, iroompa pincoacotaqueri Aapani inquitequitica, ari irimataquempiro.

²⁰ Querocagueti incapiocaventajiaquenagueta, mavitegueti inchoocajivetaquempa irooca mavitepae, ari queate nonchoocatimojiaqueriquea naatimpa.”

Iramajirore majirontatsica teeca impintsatacotantempaji

²¹ Iroompaquea iquempajipojari Peerero, icanqueri:

—Nomajirote, ¿querocaquea oncarashequigueni nompeacotajemparo querocagueta incoquenani napitsaroverarite? ¿Ari oncaravaete 7?

²² Icanqueriquea Jesoshi:

—Aatoqueate ocaratapojitsi 7, manaquea oncaravaetequea 70 x 7 pimpeacotajemparo.*

²³ “Imaicaquea noninque nontsatacaajiaquempiro quero icotani imajirontagueta Inquitequitica, manaquea nonquempetacaquempari majirontatsica cajemacaantajiaquerineca itigarancajiguica caarica jocavetajanari, incantajiaqueri irivegarajiajeri.

²⁴ Irooquea iparianacaroquea icajemacaantajiaqueri, yamajitaqueneri aparo joca-jenerinemeca oshequini imentaquitsite caravaetatsica 10,000 tarentopae.†

²⁵ Cotanquitsiquea iriatimpa teequea inchoocateji taampaquea irivegaratantajemparica, irootaquetari icantacaantantacarica majirontatsica irojocantajiaqueri intsipatacaantsitempariquea imanquigare aisa irijanijiate, maasanopae yashintaguecaca, iraantajiajemploquea imentaquipae cameetsanijite irivegaratimentajerinijite.

²⁶ Cotanquitsiquea iriatimpa igueroventsitanacari, icanqueriquea: ‘Pimpintsatacogajoitenashiatsi, poguijacoquempatajate oncoramanitapojajegueta novegaratajempiroquea maasano imentaqui nojocajempimeca.’

²⁷ Iiraquea majirontatsica ipintsatacotanacariquea icanqueriquea: ‘Iroosacanica aritaquequea ococa, aatoquea pivegaratajanatsi.’ Yoguipaquijitajari.

²⁸ Cotanquitsiquea yoanajigueta itonquivojajariquea igonoro aacovecarica, icarave-taca 100 tenario‡ irojocajenerimeca. Yaitsitanacariquea icatiquitsitari itsanoqui, icanqueriquea: ‘¡Pivegaratenashinete paacovequenaca!’

²⁹ Iriatimpa igueroventsivetanacari icanqueri: ‘Pimpintsatacogajoitenashiatsi, oncoramanitapojajegueta novegaratajempitarite.’

³⁰ Cotanquitsiquea iriatimpa teequea impintsatacotempariji, manaquea yaacaanqueriquea isantanatacotacaantsitari inchoocaguiteni arejevaetapojempari irivegaratajeri yaacovecarica.

³¹ Ariquea yamenajiaqueriquea igonorojia, ishimampojancajianaca yoayoitanaque icamantajiaquitiri majirontatsica.

³² Iquemitsitaquea icajemacaantsitari aacovecarica icanqueriquea: ‘Isaashimpi. Naatimpa manaquea nopeacotajimpairo maasanopae pojocaquenameca, irooriji picantanaquena: Pimpintsatacogajoitenashiatsi.

* **18:22** Icanquegueta Jesoshi **oncaravaetequea 70 x 7** ocanque aato ocaratapojitsi, ancoguitempani ampeacotajemparoja intati querocagueta incovetacajini itsipapae. † **18:24** Iiraquea icantajitica **tarento**, irioquea apamontiinaro imentaquipae cavorejatatsica tenatatsica 91 quiro. Iramiterigueta itsipa irajagantsitacovaetanaque irivegarataqueri aparo tarento. ‡ **18:28** Iiraquea **tenario** irio imentaquitsite Iromaquitica. Iramiterigueta itsipa apajencaro savincagueteri irivegarataqueri aparo tenario.

³³ Arimequeate pinquempetacaaquemparimequea aacovequempica aviatimpa, pimpintsatacojiaquemparimequeate iriatimpa, pinquempetaquename naatimpa nopintsatacotimpigueti.’

³⁴ Icatsimatsitanacaquea icantacaantaqueri irantsipetacajaiaquempari arejevaepojajempa irovegaratajeriquea maasanopae yaacovecarica.”

³⁵ Iteroncanaquerogueti Jesoshi itsavetanquerogueti icanque:

—Ariqueate inquejetacaajiaquempiquea Aapani inquitequitica aatogueti pipintsatacojigariquea pigonorojia pimpeacomajaquemparogueti querocagueti icojiaquempini.

19

Icanque Jesoshi aatoja quericaca ovashiantirotsi imanquigare

(Mr. 10.1-12; Irc. 16.18)

¹ Iroompaquea iteroncanajirogueti Jesoshi itsavetantaquerogueti, isotoantanacaro Garirea, yoanaquequea Joreaqi intatiqueroqui Jororanegui.

² Yoguijaguijaitanaqueriquea oshequini caquinteja. Ontaniquiquea yogueshita-jiriquea maasano ashinoncajajatsica.

³ Ariquea iconoagarantajiaca pariseojia choocajatsica oraniqui icoraquecoraqueipojiquea icoacojiapojiri iramenajiaqueri querocaca incanqueni iriatimpa, icantajapoja-queri:

—¿Cameetsavaequempa irovashiantajero shirampari imanquigare onchoocaquegueti taaca opajita teeca irinintamajateroji?

⁴ Iriatimpa icanqueriquea:

—¿Arimpate teequea pampatsajavanteroji itioncacojiquerogueti paesatoniqui ocanque iroaqueragueti ipeacaacarigueti Aapani Irioshi caquinte ipeacaitsitariquea shirampari aisa manquigarentsi?

⁵ Iroompaquea icanquequea: ‘Irootaquequea imaica shirampari intsinampirejana-queriqueate iriri aisa iriniro, quisho iroamajataquero imanquigare, apatsinoroquea incantanajempa. Ariquea iroaqueragueti tequeratagueti irimanquigatemparoji, mavite icarajavetaca, ariquea imanquigacarogueti ariqueate icojianaca tee irimavitetajempaji, quempetanajaqueate apatsinoronica icantaja.’

⁶ Irootaquequea noncantantajiaquempica iriraquea shirampari manquigataquemparoneca manquigarentsi aatoquea yovashiantiroquea, teatarite irimavitetajeji, quempeca apatirotiquea icantaja, yamenaqueriquea Aapani Irioshi imanquigacarogueti teatarite oncameetsateji irovashiantaqueroquea, incoquempanija irimanquigamajataquemparoquea.

⁷ Iriatimpajia icantajiaqueri:

—Iroosacanica, ¿queroquea ococaniqueate icanquegueti Moishishini arigueti irovashiantanajero shirampari imanquigare, irojoquitenemparojate paperi otioncacagueti yovashianquero,* ariquea intigaranquitsitemparo oanaje?

⁸ Icanque Jesoshi:

—Iriraquea Moishishini manatarite yamenajiaquempiquea piquishoshirentanaque jero iquejetacaantajiaquempirocaquea imaica itioncajiaquempiroquea. Cotanquitsiquea iroaqueragueti ipeacaacarigueti Aapani Irioshi caquinte, teequea inquem-peteroji imaica.

⁹ Noncanquempiquea naatimpa, aparogueti oaquempi pimanquigare aatoquea povashiantirotsijate. Povashiantanaquerogueti iroompaquea pimanquigatajempagueti otsipa manquigarentsi, manaquea picovaeguisheca.

* **19:7** Oratica paperi icanquero quimajareri **certificado de divorcio** (irooca aisa **carta de divorcio**). Iroguenti paperi itioncajiquerogueti quejecaroca: “Imaicaquea novashiantajiro nomanquigavetacaca, aato nomanquigatajaro.” (Pamenero Os. 2.2 aisa Ireo. 24.1-4.)

¹⁰ Iriraquea itsatacaanejia icanqueriquea:

—Iroosacanica omanavaetacaquea oshequi amanquigatemparogueti manquigar-entsi. Aatosacanica amanquigatarotsi.

¹¹ Iriraquea Jesoshi icanqueriquea:

—Teetarite iragavejajigueji maasanojia inquemisanteroji nocantajiaquempica, imaicaquea iriguentiquea quemisantajiaqueroneca yagavejacaajiaqueca Aapani Irioshi.

¹² Choocajatarite iconoagarantajiacaa teequea iragavejajigueji irijanintajiguempaji, ari icoca ivoaquegueti. Aisa chooca itsipa iroguenti ipeacaajicari eonoco† aatoniji irijaninta. Aisa choocaquea itsipapae iroguenti itampishitashijiaqueroquea ipeaca majinari cameetsanijite irisavicaventamajajiaqueronijite irashipae Majirontamajatatsica Inquitequitica. Quericaca agavejanquitsineca intsamajaqueroquea nocantajiaquem-pica imaica iintsijate intsaterojate.

Jesoshi yamanacoventajiaqueriquea chaajaniquirijia
(Mr. 10.13-16; Irc. 18.15-17)

¹³ Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji iramanacoventajiaqueriquea. Iriraquea itsatacaanejia yamenajiavaquerigueti yamajiapojirigueti icantomajavaqueriquea.

¹⁴ Icantsitariquea Jesoshi:

—Ariotaquetsija incoraqueetetate chaajaniquirijia naatimpaqui, aatoquea pojocaavaca, ishineventajiacaritarite Inquitequitica irimajirontacotaquempari quenquejajiatsica quempecarica iriatimpajia.‡

¹⁵ Iroompaquea ipamijiaqueriquea yamanacoventajiaqueri. Ariquea iriatimpa yoanaque.

Ajaarantavaetatsica
(Mr. 10.17-31; Irc. 18.18-30)

¹⁶ Oraquea yoanaquegueti Jesoshi icoraquetashipojiriquea aparo caquinte, icantapojaqueri:

—Tsatacaantantatsica [cameetsari], ¿queroquea noncoquempani cameetsanijite noncoguitempaninijite nonchoocaguiteni? ¿Taa opajita cameetsatanquitsineca nompeacaguempaca?

¹⁷ Icanqueri Jesoshi:

—¿Queroquea ocoani picantantaquenaca ‘cameetsari’? Aparotari ichoocati cameetsatatsica. Cotanquitsiquea pininqueguetiquea poanaque ichoocatigueti Aapani Irioshi pincoguitempaniniji pinchoocaguiteni, pinetsanamajateroja maasanopae itioncacotanaqueca Moishishini coramanitica.

¹⁸ Icanque iriatimpa:

—¿Querocate?

Icanque Jesoshi:

—Irootaquequea cantanquitsica: ‘Aatoja pimetojanti, aatoja poashitiro manquigar-entsi, aatoja paitsitanti, aatoja pitsojeventantatsi.

¹⁹ Pinunquejacameetsatacoquerija piri aisa piniro, aisa pimpintsataquemparija pigonoro pinquejetacaajempa pipintsatagueti aviatimpa.’

²⁰ Icantsitari iriatimpa:

—Arimajaca noquempetacaquea imaica nonetsanamajaqueroquea maasano. ¿Imaicaquea choocampate otsipa nonetsanateca?

²¹ Icanqueriquea Jesoshi:

† 19:12 *Eonoco* irio isoitsorejitajiqueca iguemaaku. ‡ 19:14 Irirajia chaajaniquitanquitsica tee iraventacojiguempaji, mana ishineventajiapojacari Jesoshi, iquemisantajiaqueri. Ari anquempejiaquempaquea aatimpa.

—Pinquegueti pinetsanamajaqueroquea inintaguetica Aapani Irioshi, poanaquequea pojocantaguetanaquero pashintaguetica paantaquemparoquea imentaquipae pojocajiaqueneri coguitejacojianquitsica, pinquejetaqueroqueti onchoocataje oganejencaro shinetacajaempineca ontaniqui inquitequi. Ariquea pincoraquetajeja poguijatanaquea.

²² Iquemitsitaquea icanquerica ishimampoancavaetanaca, ariqueate yoanaji, iriguentitari ajaarantavaetatsica.

²³ Iroompaquea ipitsocashitariquea Jesoshi itsatacaanejia icanqueriquea:

—Iroomajaca noncantajiaquempara, omanapitsamajataquempara ajaarantavaetatsica inquijanaque imajirontagueti Inquitequitica.

²⁴ Noncantsijajempi aisa. ¿Arimpate iragavejaque cameyo inquijanaquequea itepoquiqui quisaatonquiri irisotoanaqueriquea antaqueronta? Aatotarite yagavejitsi. Iriompaqueate ajaarantavaetatsica caaviji anaquero omanapitsataquempara inquijanaque imajirontagueti Aapani Irioshi.

²⁵ Iquemitsijigari itsatacaanejia arimpaqueate yamenamenaitanaque intati, icantajigui:

—Iroosacana, ¿quericampate agavejanquitsineca iravajempa?

²⁶ Yamenajianaqueriquea Jesoshi, icanqueriquea:

—Iriaquea caquinte teequea iragavejeroji, cotanquitsiquea Aapani Irioshi yagavejaquero maasanopae.

²⁷ Icantsitanaca Peerero:

—Nomajirote, naatimpajia novashiantajianaqueroquea maasanopae nashintavecaca, noguijaguijaitanaquempara. Imaicaquea ¿taaca irojocajiaquenaca Aapani Irioshi?

²⁸ Icantajiguii Jesoshi:

—Iroomajaca noncantajiaquempara, oraquea iriaqueratacaajitajerogueti maasanopae, irira Irijanite Caquinte irisavicapojero imajirontamento oganejencatatsica irimajirontamajapojempa. Aviatimpajia guijaguijaitanaquenaca imaica pintsipajianaquea pisavisaviiqueroquea majirontamentontsipaequi oncarataque 12. Iroompaquea pincantajiaque querocaca incojitaquerini ichoviquijianaquea irijanijiate Ishiraeri, icarajiaque iriatimpajia aisa 12.

²⁹ Aisa iriaquea maasano ovashiantajianaquero itsovironaquitepae, irioca iriguentijeguitepae, itsijoitepae, iriniro, iriri, irijanijiate, irooca iniganquitejire, iroguijaguijaitanaquenani, irojocajiqueneriquea otsipa caavijica anaqueroneca yashintavecaca oshequijamatanaquequea; taaca opajita yovashiantanaquea apatiroca irojocajitajeneriquea otsipapae 100. Aisa incoguitempaniquea inchoocaguiteni.

³⁰ Icaramirincavaequequea yamenajivetacaca imaica yanaantavaeque, cotanquitsiquea oncoramanitapojajegueti aatoquea yanaantajitsi. Aisa icaramirincavaeque teeca iranaanteji imaica, oncoramanitapojajegueti iranaantavaetanaque.

20

Jesoshi iquempetacaacari ashintatsica iniganquitejire

¹ “Imaica nontsavetacotaqueroquea quero icotani Inquitequitica imajirontagueti, iroguenti nonquempetacaquempara ashintatsica iniganquitejire. Iriatimpa iroguenti yoguinuea pitsecatirajagueti iraquiteriquea shiacojiatsica irishiacojiaqueneri irovaitsoquimashite.

² Ariquea yamenajipojiriquea icantajiguii: ‘Poapoitanaquequea pishiacojiaquite-narocate ovaitsoqui, iroompaquea inquijanaquequea catsirincaiteri novegarajiaquem-piquea aparo tenario.’ Iriatimpajia icanquequea cameetsavaequequea. Jero itigarancajiaqueriquea iroaroaitanaque irovaitsoquimashitequi.

³ Iroompa ijenoquivaepojigueti catsirincaiteri icoraquetajiquea yojocantajigueti tirogueti taaca opajitapae irajaatequea itsipajia shiacotanquitsineca. Yamenajiapojiri itsipajia, savisaviitaquequea intati, teequea irantajigueji.

⁴ Icantajiguiri: 'Poapoaitanaquequea aviatimpajia aisa, pishiacojiaquiteja noniganquitejirequi, novegarajiaquempiquea cameetsa.' Ariquea yoayoaitanaquequea.

⁵ Iroompaquea itampaticatanaquegueti catsirincaiteri yoitsitanajaquea aisa irame-naguetaquitequeate itsipajia shiacotanquitsineca. Ariquea iquempetacaajaroquea ijaguitetanajigueti, yaitajata itsipajia.

⁶ Iroompaquea irooshipojigueti inuijanaje catsirincaiteri, yoitsitanajaquea aisa yamenajiapojiriquea itsipajia, teequea irantajigueji, icantajiguiri: '¿Queroquea ocoani pisavisaviitashicaquea intati, teequea pantajigueji?'

⁷ Icantajiguiri: 'Tee inchoocatenica shiacotacaajiguenaneca.' Iriatimpaquea icantajiguiri: 'Iroosacanica poapoaitanaquequea aviatimpajia pishiacojiaquequea noniganquitejirequi.'

⁸ "Iroompaquea itsaparoncaguitetanaquegueti icanqueriquea shiacotacaajiaquerica: 'Imaica pincajemajiguerija shiacojianquitsica pivegarajiaqueriquea pintsitacajiaqueri, pimpariajanaquempari impoipoiitanquitsica parejetacaapanajantempari iriquetica coraquecoraqueitanquitsica.'

⁹ Iroompaquea icoraquecoraqueipoji coraquejianquitsica irooshipojigueti inuijanaje catsirincaiteri. Iquejetavacaajiaca maasano ivegarajiaquerigueti, yojocajiaqueneri aparo tenario.

¹⁰ Iroompaquea icoraquecoraqueipojiquea iriquetica shiacomajatanquitsica, iriatimpajia yamenajiguiriquea ijiqueji iranaacaajiaqueriji irivegaramajajiaqueri. Cotanquitsiquea manaquea iquejetacaajiacari ivegarajiaquerigueti, yojocajiaqueneri aparo tenario.

¹¹ Irooquea yamenajiaquerigueti teequea iranaacaajigueriji irivegaramajajigueriji, ariqueate icohicoitanaca icantimanajianaqueri ashincaroa iniganquitejire.

¹² Icantajiguiri: 'Irirajia impoipoiitanquitsica capichajaniquiquea ishiacotaque, cotanquitsiquea pivegarajiaqueri quempeca pivegarajiaquenagueti naatimpajia at-sipejianquitsica noshiacoguitini catsirincaiteriqui narejevaeca imaica.'

¹³ Cotanquitsiquea irira ashincaroa icanqueri aparo shiacotanquitsica: 'Nogonoro, teequea namatavijempiji. ¿Arimpate teequea pincanteji cameetsavaeque incajaranqui nocanquempigueti novegarataquempi aparo tenario?'

¹⁴ Poanajequea paanajeri yojocaquempica. Naroguentiquea cantaqueerica irivegarajiaqueriquea impoipoiivetanquitsica ishiacoquegueti iquempetacaajiaquempiriquea aviatimpa ivegarajitaquempigueti.

¹⁵ Naroguentitari ashincari nomentaquitsite. ¿Arimpa aato nagaveji nojoquiniritsi quericaca noninquca? ¿Aricaja picatsimatacotsitaquenaro pamenaquegueti iriguenti nocavintsajaque itsipa?'

¹⁶ "Irootaquetarite noncantantajiaquempica imaica choocajia iramenajivequem-paca imaica yanaavaequequea, cotanquitsiquea oncoramanitapojajegueti aatoquea yanaantajajitsi. Iriraquea teeca iranaantajigueji imaica, irioquea anaamajatantanquitsineca oncoramanitapojajegueti."

Jesoshi icamantajajiri aisa irimetojaque

(Mr. 10.32-34; Irc. 18.31-34)

¹⁷ Iroompaquea yoanaquequea Jesoshi Jerosarequi itoncotoncoitanaque, icajemitsitari iriatimpagui itsatacaanejia carajianquitsica 12, icantajiguiri:

¹⁸ —Imaicaquea atoncotoncoitanaque oahoaitanaque Jerosarequi. Ontaniquiquea ontaniqui arejerejeipojaquempagueti manaquea iracaantajiaqueri irira Irijanite Caquinte, irajaitanaqueri ichoocajiaquegueti saserorotejia anaantajanquitsica aisa

tsatacaantajiguiroca itioncacotanaqueca Moishishini. Iriatimpajia incanquequea: 'Iintsishiatsi irimetojajiterini.'

¹⁹ Ariquea irajaitanaqueriquea ichoocajiguigueti teeca irijorijoigueji cameetsanijite irantanaguishevaequerinijite, aisa impasapasajiaqueri agompiaquitempari, ariquea irompajacojiaqueri coroshiqui, cotanquitsiquea aapojajempaguete 3 savincaguiteri impochatanaje.

Onintavecaca iriniro Santiago aisa Joanca

(Mr. 10.35-45)

²⁰ Iroompaquea ocoraquepojqieca imanquigare Severeo otsipatsipaitapojacari iri-janijiate, oguerovempojacariquea Jesoshi oncamanqueriniji oninqueca.

²¹ Icanqueroquea:

—¿Taa opaji pininque?

Iroatimpa ocanque:

—Aapojajempaguete pimpeaquempaguete Imajirojiate maasano, noninque poguisav-isaviitaquenari irirajia irijani irisenampijajiaquempi, aparo savicanquitsinequea pit-incamijempequiqui, iriraquea itsipa irisavicaque pishinampijempequiqui.*

²² Cotanquitsiquea Jesoshi icanque:

—Teequea pintsajigueroji ocativa pinintavecaca. ¿Arimpate pagavejajiaquequea avi-atimpajia pimiraquero nomiraqueca naatimpa?†

Iriatimpajia icanajiguiri:

—Jeejeguitatsi nagavejaquempa.

²³ Icantajiguiri Jesoshi:

—Pitampaticamajataquero pimiraqueroquea nomiraquempaca naatimpa,‡ cotan-quitsiquea teequea naatimpa cantanquitsineca quericaca senampijaquenaneca sav-icanquitsineca notincamijempequiqui aisa noshinampijempequiqui. Iriguentiquea cantanquitsi Aapani Irioshi paesatoniqui iroaqueraguete.

²⁴ Ariquea iquemajiavaqueguete itsipajia 10 itsatacaanejia itijerequijianaqueri Santi-ago aisa Joanca.

²⁵ Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejajiaqueca imajirojiate teeca irijorijoigueji manaquea yatsanavaecari igonorojia, ariquea iquempejiaca iramajirorejia yomperaperaicari irashijia.

²⁶ Cotanquitsiquea aviatimpajia aatoquea piquejijiga. Ariguenti quericaca nintan-quitsine iranaantimojiaquempi, impeitsitempaja amijiaquempineca.

²⁷ Quericaca nintanquitsine irijivatante, impeitsitempaja iromperare maasano.

²⁸ Quempeca Irijanite Caquinte teequea irooquea incoraquetashiteji iramijitava-queri, iroguenti icoraquetashitaque incavintsajantapoje, aisa irimetojajentsitempar-iquea maasanojia, onquejevequempaquea irivegaraventajiajeneri irisotoimentajiana-jeniji santanatacojiavetanquitsica.

Jesoshi ipityaquirejajiriquea mavite shamponcajari

(Mr. 10.46-52; Irc. 18.35-43)

²⁹ Ariquea Jesoshi itsipatanacariquea itsatacaanejia iquenaquenaipoji Jericoqui iroaroaitanaque Jerosarequi, itirorencaventajianacari caquintejia.

* **20:21** Iriira savicatsica itincamijempequiqui majirontatsica yanaajiaqueri itsipajia, iquejemajirovecari ma-jirontatsica, aisa iquejetaca savicatsica ishinampijempequiqui, quejemajirovecari. † **20:22** Ocativaquea ican-queca Jesoshi manaquea iquejetacaacaro irantsipequempaguete, oquejetaca incanqueguete: “¿Arimpate pagavejaji-aquequea aviatimpajia pantsipevaequempaquea pinquempejiaquenaquea naatimpa nantsipevaetaquempaguete?” ‡ **20:23** Iquempetacaacaro Jesoshi, quejetacaquea incanqueguete: “Pitampaticamajataquero pantsipevaequem-paquea pinquempejiaquenaquea naatimpa nantsipevaetaquempaguete.”

³⁰ Ariquea oraniqui isavicajiaquequea mavite shamponcajari ocaravoquitapojigueti quenavoquirontsi. Irooquea iquemacojiavaquerigueti Jesoshi coraquetapoji icajemitsijianacaquea icanqueri:

—¡Nomajirote, Ichoviquitanaqueca Taavini, pimpintsatacotenashiatsi!

³¹ Irira choocajianquitsica icantomajajiaqueriquea icantsijiavetari irisanticotanaquenijite, cotanquitsiquea iriatimpajia arimpate icajemamajatsijianaca:

—¡Nomajirote, Ichoviquitanaqueca Taavini, pimpintsatacotenashiatsi!

³² Icatiapojaquea Jesoshi icajemajiaqueri icanqueri:

—¿Taaquea pinintajiaque?

³³ Iriatimpajia icantajiguiri:

—Nomajirote, nonintajiaque nompityaquirejajianaje.

³⁴ Ipintsatacojianacariquea Jesoshi ipamijiaqueriquea iroquiiaqui. Ariquea icojianaja inejajianaji, yoguijaguijaitanaqueri.

21

Yarejetapojacaroquea Jesoshi Jerosarequi
(Mr. 11.1-11; Irc. 19.28-40; Jn. 12.12-19)

¹ Iroompaquea irooshipojigueti irarejerejeipojemparo Jerosare, yarejerejeipojajaroquea Vetepaje Orivotsempiqui. Iroompaquea iriraquea Jesoshi itigarancajiaqueriquea mavite itsatacaane icantajiavaqueriquea:

² —Poanaquequea ontaniqui quempeji guinteninintsiqui, pamenajipojeroquea oraniqui aparo aashino shiticacoca itsipatacaantajicaro irijanigantirenajaniqui. Pishiticarejacojiaqueri pamajiaquenari.

³ Choocagueti cantaquempineca, aviatimpajia pincantajigue: ‘Iriguenti coacotacari Amajirote, taampinatari iroguipiajiajempiri.’

⁴ Ariquea oquejetantacaca imaica onetsanatanaquempaniji icanqueca tsavetantatsica coramani itioncacaajiquerigueti, icanque:

⁵ “Pincantajiguerija guintenijiatsica Shionequi:*

‘Pamenajigueja, coraquetapoji Pimajirote aviatimpaqui, iriatimpa iriguenti caavijica imativicamajataca, manaquea iquenantapojacari aashino, irijanigantirenajaniqui aashino, irijanite quijaviriniquitatsica ajaararontsi.’ ”

⁶ Iroompaquea yoayoaitanaquequea itsatacaanejia inetsanatsitaroquea icanquerica Jesoshi.

⁷ Yaajianaqueroquea aashino aisa irijanigantirenajaniqui, ipashicamititsajiaqueneri iitsaarepaequi, isaviquitsitanacariquea Jesoshi.

⁸ Yoayoitanaquequea icaramirincavaetanaque caquinteja, iconoagarantajiacamaroncaashijiavaqueri iitsaare quenavoquirontsiqui, itsipapaequea aavashijiavanquitsica ovashi imaroncaavoquitashijiavaqueriquea Jesoshi.†

⁹ Iriraquea iriquetica oahoaitananquitsica aisa irirajia guijaguijaitaquerica icajemajianaque, icanque:

—¡Caaviji yoganejencamajataca irira Ichoviquitanaqueca majirontatsica Taavini!

—¡Intsishiatsi irishineventajiquempari iriratica coraquetapojatsica itigarancaqueca Majirontamajatatsica!

—¡Caaviji yoganejencamajataca Aapani Irioshi choocatatsica jenoqui!

¹⁰ Ariquea iquijanaquegueti Jerosarequi, ishamirincajiapojaca choocajianquitsica. Iconoagarantajiacacoacajiapojiri itsipajiacaca icanqueriquea:

—¿Taa ipajita iricatica?

* **21:5 Shione** iroguenti Jerosare. † **21:8** Imaroncaashijiavaquerigueti iitsaare quenavoquirontsiqui aisa imaroncaavoquitashijiavaquerigueti ovashi, manaquea iquejetacaavacari majirontatsica ishineventajigarigueti.

¹¹ Iriatimpajia icanquequea:

—Iriguenti Jesoshi tsavetantatsica quenapojatsica Nasarequi Garireaqi.

Jesoshi yoguivorocajiaqueri jocantantajiacaroca teemporo
(Mr. 11.15-19; Irc. 19.45-48; Jn. 2.13-22)

¹² Ariquea Jesoshi iquijanaque oniganquirequi oticaacoroqui teemporo itsaroven-tantajitarica Aapani Irioshi yamenajiapojiri jocantantaguetirica viratsipae aisa veg-aratantajiguirica. Yoguivorocajiapojaquea maasanojia, aisa yapitaquiaguequero-quea ishitaponcaropae yojoquijitantacarica imentaquitsite guipiantajiguirica imen-taquipae.‡ Iquejetsiguetaoquee aisa isavisaviitantacaca jocantajiguirica emorenipae.

¹³ Icantajiguiri:

—¿Arimpate tee ontionquempaji: ‘Oratica notsovironaquite incantacojitero iroguenti ashi incoraquequetantapinijitempaca iramanajiaquenani?’* Cotanquitsiquea aviatimpajia manaquee pipeacajiaacaró imoro itsititantaca aitsitantajiatatsica.*

¹⁴ Iroompaquee ocaniqui oniganquirequi oticaacoroqui teemporo icoraquetashiji-apojiri shamponcajarijia aisa teeca iranijimajateji. Iriatimpa ipityaquirejaguetajiri teeca iramenajiavetempaji, aisa yanijitacaamajatajiri teeca iranijimajajiavetempaji.

¹⁵ Iriaquea saserorotejia anaantajanquitsica aisa tsatacaantajiguiroca itionca-cotanaqueca Moishishini icatsimamajajianaque yamenajiavaquerigueti yonigaan-taguequeroquee oacaantantatsica intati, aisa iquemajiaquerigueti chaajaniquiripae icajemitsijianaca oniganquirequi teemporo, icantajiaque:

—¡Caaviji yoganejencamajataca irira Ichoviquitanaqueca majirontatsica Taavini!

¹⁶ Ariquea iriatimpajia icantajiguiri:

—¿Arimpate teequee pinquemajigueriji irirajia chaajaniquiripae icajemajiaquegueti? Iriaquea Jesoshi icantajiguiri:

—Jeejeguitatsi, noquemaque, cotanquitsiquea ¿arimpate teequee pampatsajavanta-cojigueroji ocanquegueti: ‘Pinintacaajiaqueri chaajaniquiripae aisa igantagatirajaca yatsoti intsaromentajiaquempi?’§

¹⁷ Ariquea yojocajianajiri isotosotoitanajiro Jerosare, yoayoaitanaque Vetaniaqui, ariquee imaapojaji oraniqui.

Jesoshi icanqueroquee iguera aatonijite ochoocatimatajitsi osovena
(Mr. 11.12-14, 20-26)

¹⁸ Iroompaquee osavincaguitetamanaquegueti icoraquecoraqueitaji Jerosarequi. Iri-
raquee Jesoshi ariquee itaseapoji.

¹⁹ Ariquea yamenacovetapojacaro iguera ocaravoquitapojigueti quenavoquirontsi, ariquee yoapanajanti iramenamajapananeroquee choocaca osovena, cotanquit-siquea yarejevipojacaroguea quempeji tee onchoocateji, iroguentini ovana. Icantsi-taroquee:

—Imaicaquee imaica aatotarite ochoocatimataji pisovena.

Ariquee ocotanaca osampirocanaquequee ometojanaque.

²⁰ Irooquee yamenajiavaquerigueti itsatacaanejia yamenamenaitanaquequee in-tati, icanqueriquea:

—¿Queroquee ococani picanquitiguero ometojanaque?

²¹ Iriaquea Jesoshi icanqueriquea:

‡ 21:12 *guipiantajiguirica imentaquipae.* Incoraquequegueti joriojia quenajiapojatsica otsipapaequi guin-teninintsipaequi iramajiaquegueti cantashitatiaguetanquitsica imentaquipae, irojocajiapojaqueneri guipiantajirica imentaquipae irojocajiajeneriniji itsipapae cameetsaniji irojocagarantajiajeneriniji Aapani Irioshi teemporoqui, irioca irivegarajiaque viratsi irojocajiaquenerica. * 21:13 Is. 56.7. * 21:13 Jer. 7.11. § 21:16 Irootaquequee itioncaneni Taavini yamashaiventaquerigueti Aapani Irioshi. Sar. 8.2.

—Iroomajaca noncanquempica, arigueti paventamajataquemparigueti Aapani Irioshi pintsamajajiaquegueti arimajaca yagavejamajati, aatogueti pinquenquejimatirotsijate: ‘Aatoca yagaveji Aapani Irioshi’, ariquea pagavejajiaquequea pinquempejiaquena naatimpa nosampirocaquerogueti iguera. Cotanquitsiquea teequea aparoquea ocatica. Aisa pagavejajiaque pincantajiguero ocatica otsempi: ‘Poanaquetsija pojocajatempa inirojaniqui quentijani’, oapanajantequea ojocajapojempa.

²² Maasano taaca opajita pamanajiaquerica Aapani Irioshi, arigueti paventamajajiaquempari, onetsanaquempaquea.

Icoacojitaqueriquea Jesoshi taaquea tigarancaqueri
(Mr. 11.27-33; Irc. 20.1-8)

²³ Iroompaquea yarejetapojaca Jesoshi teemproqui iquijapojaquero oniganquirequi oticaacoroqui itsatacaantapojaque. Incajanganquiguitetanaquegueti icoraquecoraqueitashipojaqueriquea saserorotejia anaantajianquitsica aisa jivajiguirica joriojia, icanqueriquea:

—¿Taaquea cantaquempi piquempetancaroca imaica poguivorocantajiacarica jocantantajiatsica? ¿Taampate tigarancaquempiquea?

²⁴ Iriiraquea Jesoshi icanqueri:

—Intsija naatimpa noncoacotempi. Poguisotoaquenarogueti, ariquea nonquempetsitempa naatimpa noncamanquempiquea queri tigarancaquenaca.

²⁵ Iviñacajatantigueti Joancani, ¿queroquea oquenapojini? ¿Irooca oquenantapojaca inquire? ¿Irioca oquenantapojaca caquintejia?

Irooquea iquemajivaquerigueti iquenquetsatavacaajianaca icantajigui:

—¿Querocate ancoterini? Ancantsivetemparigueti oquenantapojaca inquire, iriatimpa incantanaque: ‘Iroosacanica ¿queroquea ococani teeca pinquemisantantajiguempariji?’

²⁶ Cotanquitsiquea ariguetiija ancantsivetempari oquenantapojaca caquintejia, at-sarocaajiacariquea caquintejia, maasanopaetari icanque irira Joancani iriguenti tsavetantatsica itigarancaqueca Aapani Irioshi.

²⁷ Jero icantantajiacarica:

—Teetari nontsajiguenica.

Ariquea iriatimpa icanqueriquea:

—Iroosacanica, ariquea nonquejetaquempaquea naatimpa, aatoquea noca-mantimpitsi quericaca tigarancaquenaca naatimpa.

Jesoshi iquejetacaacari mavite irijanite caquinte

²⁸ Iroompaquea Jesoshi icanqueriquea:

—¿Queroquea pincanqueni pinquenquejerogueti noncantajiaquempica imaica? Ichocati caquinte choocatatsica mavite irijanite. Iroompaquea icanqueri parianquitsica: ‘Irijani, poanaque pishiacoquiteta ovaitsoquimashiqui.’

²⁹ Iriatimpa icanque: ‘Aatoquea noguitsi’, cotanquitsiquea iroompaquea iquenquejanaquero yoanaque ishiacoquiti.

³⁰ Iroompaquea yoashitanaqueri itsipa irijanite, ariquea iquejetacaacari iriatimpa, itigarancavetacari irishiacote. Iriatimpa manaquea icantaveca: ‘Intsija nonquejetaquempa’, cotanquitsiquea teequea iroqueji.

³¹ Imaicaquea pincantajiguena, ¿querica quemisantavaquerica iriri?

Iriatimpajia icanquequea:

—Iriguenti parianquitsica.

Ariquea Jesoshi icantajigui:

—Iroomajaca noncanquempica, iriraquea capiocajiguirica majirontatsica imentaquitsite aisa manquigarentsijia cantatsatantaguetatsica yanaajiaquempiquea

iquemisantajiaque, iriquetiquea quijaquijaitananquitsine imajirontagueti Aapani Irioshi.

³² Pinquenquejeja, icoraquetashijiavequempiquea Joancani Viñacajatantatsica itsatacaajivetaquempiquea queroquea pincojiaquempani pincomajamajiaquempagueti, cotanquitsiquea aviatimpajia teequea pinquemisantajigueriji. Irraquea capiocapini-jguinirica majirontatsica imentaquipae, iriguentiquea quemisantajiaquerica. Ariquea oquejetaca cantatsatantaguetatsica. Aviatimpajia pamenajiavecariquea cotanquitsiquea teequea pinintajigueriji pincantashitajiaianaquempa povashiantajianaquero pigovaeguishere pinquemisantajianaqueri.

Jesoshi iquempetacaajiacariquea quempoguijavetaroca ovaitsoquimashi
(Mr. 12.1-12; Irc. 20.9-19)

³³ “Iintsija pinquemisantajivaqueroja nonquejetacaajiaquemparogueti otsipa. Ichocataque aparo caquinte yashinca iguepatsite. Ariquea imiataqueroquea ovaitsoqui itantotacotaqueroquea. Aisa ipeacaashicaroquea yagaticantajitaroca ovaitsoqui osotoajatantanaquempaca ovaja, aisa ipeacaacaroquea irisavicantequempaca jenoqui amenaqueroneca cameetsanijite iramenamajaqueronijite aatonijite yaajitirotsi. Iroompaquea icajemajiaqueri itsipapae irishiacojiaqueneriquea. Oraquea onchoocatanaquegueti irojocagarantajiaqueneriquea iriatimpa. Iroompaquea yoavaetanaquequea jmm osamani.

³⁴ Ocoramanivaetapojiquea aapojajagueti osampatantanajempaca ovaitsoqui itigarancajiavecari irashijia iramanajiajaterime irojocagarantajiajenerime.

³⁵ Cotanquitsiquea iriraquea shiacojiaquero ca manaquea icatsimajiaqueri aparo itavatavaavaequeri, iriraquea itsipa imetojajiaqueri. Irraquea itsipatapojsica manaquea itsinatsinavaequeri mapiqui.

³⁶ Iroompaquea iriraquea ashincaro ca ovaitsoquimashi itigarancajiavecari itsipajia irashijia, yanaajiaquericquea iriquetica itigarancajiavecaca. Cotanquitsiquea iriraquea shiacojiatsica ariquea iquempetacaajiacari iriatimpajia.

³⁷ “Iroompaquea icanquequea: ‘Iriocajate nontigarancaquequea nirijanite, irioca intsaroacaajivaquempa.’ Ariquea itigarancquitsitari.

³⁸ Cotanquitsiquea iriatimpajia yamenajivaquericquea icoraquetapojaquegueti, iquenquetsatavacaajianaca icanque: ‘Jeeri irintatica ashinquemparoneca maasanopae irimetojanajeguete iriri. Jaamequetiroshiatsi ametojajiaqueri cameetsanijite aatimpajia ashintamajatajemparonijite.’

³⁹ Iroompaquea yarejevopajaca yaitsijianacari yaajianaqueri acaquero ca otantotacotacaguete ovaitsoquimashi, imetojitsitari.

⁴⁰ “Oraquea incoraquetajeguete ashintamajataroca ovaitsoquimashi, ¿querocaca incojiajojaquerini irirajia shiacojiatsica?”

⁴¹ Iriatimpajia icanqueriquea:

—Irimetojajiaqueri interoncajiaguete maasanojia, aatotarite ipintsatacojigaritsi. Iroompaquea incajemajiaquequea itsipajia quempoguijajenerineca iniganquitejire. Ariquea onchoocatanajeguete ovaitsoqui iriatimpajia irojocagarantajiajeneri.

⁴² Icanqueriquea Jesoshi:

—¿Arimpate teequea pampatsajavantacojigueroji Itioncacaantaqueca Aapani Irioshi coramani? Ariquea ocanque:

‘Oraquea ogota mapi te ca irishineventajiavetempaji peacaajiacaro ca mapipanco, opeanacaquea anaantamajatanquitsica quishotacaaquero ca.

Irraquea Aapani Irioshi ipeacajaroquea.

Amenajiaqueroquea aatimpajia oganejencani.’

⁴³ Irootaquequea nocantantajiaquempica aatotari piconoajajari Aapani Irioshi imajirontaguete, itsipapae caquinte incajemajiaje quemisantamajajiaquerineca, iriatimpajia iriguentiquea peajiaquenerica Imajirojiate.

⁴⁴ Querica omposaquemparoneca ocatica mapi incampojemparo jarare jarare, cotanquitsiquea querica ontsinacaqueca ompitsarepitsarejatanaqueri.*

⁴⁵ Irooquee iquemajiavaqueriguete saserrotejia anaantajanquitsica aisa pariseojia iquejetacaajiacanarica Jesoshi, itsajiaquequea iriguenti itsavetacojiaqueca.

⁴⁶ Ariquee icatsimajianaque inintajiaveca iracaantajiaqueri, cotanquitsiquea itsaroacaajiacari igonorojia. Iriatimpajia yamenajiaqueriquea Jesoshi iriguenti tsave-tantatsica.

22

Jesoshi iquempetacaacaro ishineventajitaroguete imanquigajitaguete

(Irc. 14.15-24)

¹ Iroompaquea Jesoshi iquempetacaacaroquea imajirontaguete Aapani Irioshi, icanque:

² “Imaicaquea imaica nontsatacaajiaquempiro quero icotani Inquitequitica imajirontaguete. Iroguenti iquempetacariquee majirontatsica itiacantaquequea taaca opajitapae isheca icajemitsijigari igonorojia irishecatacaajiaquempari irishineventajiaquempariquee irijanite irimanquigaquempaguete.

³ Iroompaquea itigarancajiaqueriquea irashijia incantajiaquiteri coraquecoraqueitanquitsineca, cotanquitsiquea iriatimpajia teequea irinintajigueji incoraquecoraqueite.

⁴ Ariquee itigaranquitsitaja itsipapae icantajiavaqueriquea: ‘Imaica pincantajiavaqueri: “Icagemajiaquempi inetsanamajaqueroquea taaca opajitapae shecatsipae.” Nojitorejacaantajiaqueriquea nogaapironcaarinitepae aisa irijanigantirenajaniquipae quejimajatanquitsica, imaica netsanagueca maasanopae. Pincamanteri incoraquecoraqueique taampina irishecatacojiaquitena.’

⁵ Cotanquitsiquea irirajia icajemavecaca teequea inquemisantajiavaqueriji, manaquea yoayoaitanaque querocaguete. Aparo oanankuitsi iniganquitejirequi, itsipa oanankuitsica irojocantagueteroquea irajaararo.

⁶ Iroompaquea itsipapae yaajiavaqueri itigarancajiaqueca majirontatsica itavatavaavaetavaqueri imetojajiavaqueri.

⁷ Ariquee icatsimamajianaque majirontatsica itigaranquitsijigariquee igoaretajiate irimetojajiaquiteri metojantajiatatsica, intaitemparo itsovironaquitepae.

⁸ Iroompaquea icanqueriquea irashijia: ‘Jac netsanavetacaquea maasanopae cameetsanijite irimanquigaquempanijite irijani, cotanquitsiquea iriatimpajia nocajemajiavetacaca teequea incameetsajigueji, manaquea iquemavetaca, imaicaquea aatoquea icoraquetitsi.

⁹ Imaicaquea manaquea poajianaque quenavoquirontsipaequi pincajemajiaquiteriquea maasano querica pintonquivotonquivoiquempaca.’

¹⁰ Ariquee yoayoaitanaquequea icapiocajiaqueriquea cameetsajianquitsica aisa teeca incameetsajigueji. Iriatimpajia icoraquecoraqueipojiquea iquijaquijaitapojaque yomporoguijavaetapojacaro itsovironaquite.

¹¹ Ariquee iquijitapojaquea majirontatsica iramenajiaquiteriquea icajemajiaqueca. Ipitsoquitsivetanaca yamenitsitari aparato teeca inquitsaatemparoji quitsaarentsi quempetaroca iquitsaajiacaca igonorojia yojocajiquenerica cameetsanijite intsipatsipaiquemparinijite iriaqueraca manquigatanquitsineca.

* **21:44** Oraquee *mapi* irioquee quejecaro Jesoshi. Oraquee otsinacaqueca opitsarepitsarejatanaqueca iriojia quempecaro caarica shineventavacari Jesoshi. Ari inquempetacaajitaquempari incatsimamajajitaqueri.

¹² Icanqueriquea: ‘Notsipavijitaca, ¿queroquea picocani piquijapoji intati teequea pinquitsaatemparoji quitsaarentsi quempetaroca iquitsaajiacaca pigeonorjia?’ Cotanquitsiquea iriatimpa imativicanaquequea.

¹³ Iroompaquea ipitsocashijigari irashijia icanqueriquea: ‘Poishojigueri iguitiqui aisa iracoqui, paajianaqueriquea pimpishoncaciaquiteri sotsiqui opitsecaquegueti pintsipatsipaitacaantaquitempari iraaianquitsica atsicayajijianquitsica.’

¹⁴ “Icaramirincavaequequea icajemajivecaca, cotanquitsiquea irirajia icoguiague-taquea teequea iroshequiamajateji.”

Icoacojiqueri Jesoshi cameetsavaequempa irojocajiqueneri Sesa imentaquipae
(Mr. 12.13-17; Irc. 20.20-26)

¹⁵ Iroompaquea iriraquea pariseojia yoayoaitanaji iquemavacaajiaca incoraque-tashijiaqueriquea Jesoshi incomitacaajiaquempari cameetsanijite onchoocaquenijite incanqueca ompampiatantapojempaca incatsimatacaantajiaqueri.

¹⁶ Iroompaquea iriatimpajia itigarancagarantajiaque itsatacaane aisa shinevencar-ica Erorishi* iroaroaitanaquequea incoacojiaquiteri. Iroompaquea yarejerejeipojaca icanqueriquea:

—Tsatacaantantatsica, notsajiaquequea aviatimpa teequea pamatavijanteji. Oraquea pitsatacantigueti tampatica poaquero picamanqueriquea maasanopae queroquea incojiaquempani irinetsanajigueroniji inintaguetica Aapani Irioshi. Tee inchoocateji quericaca pagamajaquempaca, aisa teequea pintsaroacaguempariji caquinte, irioca anaantavetanquitsica, irioca teeca iranaanteji.

¹⁷ Pitsatirotarite icanqueca majirontatsica Sesa icanquegueti maasanojia jorio irojocagarantapinijiaqueneri imentaquipae. Imaicaquea ¿queroquea pincanteni? ¿Cameet-sampa nojocajiaqueneri, arica tee oncameetsateji?

¹⁸ Cotanquitsiquea Jesoshi itsatavaqueroquea manasacanica iquenquejaguisheji-aque intati, irootari icantantacarica:

—Cameetsatamampeajiatsica, ¿queroquea ocotacani pincomitacaquenname?

¹⁹ Iintsijate pamaquenarija apamentaqui imentaqui icanqueca Sesa ajocap-initenerica, nameneritate.

Iriatimpajia yojoquitajianariquea tenariomentaqui,†

²⁰ icantsitariquea:

—¿Taa ipajita iricatica ivaantorijiqueca? ¿Taaquea ashintaro ivajiro tioncanquitsica?

²¹ Icanqueri:

—Iriguenti majirontatsica Sesa.

Icantsitariquea:

—Iroosacanica, pojocajiajenerijate Sesa yashincaca iriatimpa pinetsanati-menqueroniji icanqueca, aisa pinquejetacaajiaquempariquea Aapani Irioshi pinetsanamajajiaqueroja maasanopae icantaguequeca.

²² Iquemajiavaquerogueti icantajiaquerica, ariquea icohicoitanaca yamenamenai-tanaque intati, ariquea yoayoaitanaji.

Icoacojitaqueriquea Jesoshi quero oncoquempa intancoretancoreitanajeguetei oncora-manitapojajeguetei
(Mr. 12.18-27; Irc. 20.27-40)

* **22:16** Irira **pariseojia** irio joriojia, teetari irinintajigueti irimajirontaquempari Sesa, iriguentitari Iromaquitica. Ari iquejetaca **Erorishi**, teequea irio jorio. Cotanquitsiquea iriraquea Iromaquitica iquijaguetanaque iguinentiqui joriojia yomperaperavaejiacari. Irioquea cantanquitsi irimajirontaquempa Erorishi joriojiaqui, iriotarite inquemisantamajataque Sesa. Icanquequea Sesa maasanojia joriojia irojocagarantapinijiaqueneri imentaquipae. Tee iroshequiamajateji joriojia **shineventacarica Erorishi**. † **22:19** Iriraquea **tenario** irio imentaquitsite Iromaquitica. Iramiteriguetei itsipa apajencaro savincagueti irivegarataqueri aparo tenario.

²³ Iroompaquea incajaraanquiguitetanaquegueti irioqueate oahoaitanajatsi saroseojia iramenajiaquiteriquea Jesoshi. Iriatimpajia iriguentiquea cantajianquitsica aatoquea itancoretancoreitajitsi metojatsica. Icantajiapojaqueri:

²⁴ —Tsatacaantantatsica, iriraquea Moishishini itioncanaque coramaniqui paperiqui icanque inchoocaquegueti caquinte teeca irijanintempaji, aapojempagueti irimetojanajegueti irojocapanajantero imanquigare, choocagueticquea iriguentijeguite irioquea manquigatajemparone irijanintacajaemparoquea quejetaja irioca irijanintajari metojanquitsica.

²⁵ Coramaniquea ichoocataquequea aparó nogonoro irijanintacaquea 7. Iriiraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji. Iroompaquea irioquea manquigavetajaro itsipa oguijatirica.

²⁶ Ariquee iquejetaquea iriatimpa imetojanaji, teequea irijanintacaguemparoji. Ariquee iquejetacaquea itsipa niganquitanquitsica, arimpate iteroncanacaquea maasano imanquigajavetacarogueti, teequea irijanintacajaiguemparoji.

²⁷ Ariquee ometojitsitanaca iroatimpa.

²⁸ Imaica, iintsija pincantajiguenaja, oraquee oncoramanitapojajegueti intancoretancoretanajegueti maasano metojajavetanquitsica, ¿quericaca manquigamajatajemparoneca? Maasanotari imanquigajavecaroquea.

²⁹ Icanqueriquea Jesoshi:

—Aviatimpajia manaquea picomijiaca, teetarite pintsajigueroji queroca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa.

³⁰ Oncoramanitapojajegueti intancoretancoretanajegueti maasano metojajavetanquitsica, aatoquea quericaca manquigatajatsineca, aisa manquigarentsi aatotarite yojocantajitajirotsi irimanquigajitajemparo, manatarite inquempedianajempariquea irashivantijitete Aapani Irioshi choocajatsica inquitequi.

³¹ Imaicaquea aviatimpajia manaquea picanque aatosa itancoretancoretitsi metojaguevetatsica. ¿Arimpate teequea pampatsajavantacojigueroji icantsitaquempica Aapani Irioshi paesatoniqui, icanquegueti:

³² ‘Naroguenti Irioshimajate Averaame, Ishaaco aisa Jacovo?’ Teequea irio Irioshite metojatsica, iriguentiquea Irioshite anijatsica.

³³ Irooquea iquemajavaquerigueti maasano itsatacaajiaquerigueti imaica, mana yamenamenaitanaque intati.

Queroca caavijica anaaque irinetsanamajajiqueca

(Mr. 12.28-34; Irc. 10.25-28)

³⁴ Iroompaquea iriraquea pariseojia iquemacojiaquerigueti Jesoshi imajeretacaajiaquerigueti saroseojia, yoayoaitashitanaqueriquea iriatimpajia aisa.

³⁵ Aparó pariseo tsamajavetaroca itioncacotanaqueca Moishishini, icoacopojiri iramenantaquempariniji, icanqueriquea:

³⁶ —Tsatacaantantatsica, oraticapae icantacaanqueca Aapani Irioshi irinetsanajite ¿querocate anaantamajatatsica?

³⁷ Iriraquea Jesoshi icanque:

—‘Pimpintsamajataquemparija Majirontamajatatsica Pirioshite, pampaniromajatanakeri, pimpintsashirentamajaquempari, pimpintsaguenquejanemajataquempari.’

³⁸ Caavijiquea anaaque ocameetsamajataque irinetsanamajajiqueroquea ocatica, anaaguequero maasanopae icantacaantaqueca Aapani Irioshi irinetsanajique.

³⁹ Oraquee mavitetapojatsica oquejevecaro, ocanque: ‘Pimpintsataquemparija pigonoro pinquejetacaajempa pipintsatagueti aviatimpa.’

⁴⁰ Ocaticaquea mavite icantacaantacajica anetsanajigue irootaquetari oquenantapojaca maasano otsipapae itioncacoguetaqueca Moishishini aisa itsipajia tsavetantajia-queroca icanquerica Aapani Irioshi.‡

¿Taaquea choviquitanaqueri Quirishitotatsica?

(Mr. 12.35-37; Irc. 20.41-44)

⁴¹ Choocatirajagueti pariseojia, iriraquea Jesoshi icanqueri:

⁴² —¿Queroquea pincanqueni aviatimpajia? ¿Quericaca choviquiquerica Quirishitotatsica?§

Iriatimpajia icanqueriquea:

—Iriguentiquea choviquiquerica Taavini.

⁴³ Iriraquea Jesoshi icanqueri:

—Iroosacanica, paesatoniqui iquenquejacaquerigueti Ishire Aapani Irioshi Taavini, ¿queroquea ocotacani iriraquea Taavini ipeantacarica Quirishitotatsica Imajirote? Icanquetari:

⁴⁴ ‘Iriraquea Majirontatsica Aapani Irioshi icanqueri Nomajirote:

Pisaviquetaja pisenampijaquenaja notincamijempequiqui

pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-gontatsitempari.’

⁴⁵ Iriraquea Taavini icanqueri: ‘Nomajirote’, ¿querocaca incoquempani inchoviquitanaqueri?

⁴⁶ Teequeate inchoocatimateji aparó agavejanquitsineca iroguisotoajivaqueneri, ariquea oparianaca teequea quericaca coacotajerineca, manaquea imajerejianaque.

23

Icanque Jesoshi aatoja yoguijatacojitajiri pariseojia aisa tsatacaantajiguiroca itionc-
cotanaqueca Moishishini

(Mr. 12.38-40; Irc. 11.37-54; 20.45-47)

¹ Iroompaquea Jesoshi iquenquetsatacaajiaqueriquea capiocajianquitsica aisa itsatacaanejia icanqueriquea:

² “Iriraquea pariseojia aisa tsatacaantajiguiroca itioncacotanaqueca Moishishini, iriojiaquea oguisotojaiguiroca itioncacotanaqueca Moishishini.

³ Nocantantajiaquempica intsishiatsi pinquemisantamajajigueri pinetsanamajajigueroquea maasanopae itsatacaajiaquempica, cotanquitsiquea aatoja piquempejigaritsi iriatimpajia. Manaquea itsatacaantajiaquequea intati, cotanquitsiquea teequea irinetsanamajajigueroji.

⁴ Oquejetaca yoishotacojitinirigueti itsipajia inirochonquiina tenamajatatsica iquija-chonquiinatacaajitaqueri, iriatimpa ejempaco, teequea irininteji inquije.

⁵ Maasano yantajiaqueca yantajiaqueroquea cameetsaniji iramenimentajiqueriniji. Ariquea yamatsaetacojiacaroquea onaquí ivancaqui yoguijaancaroca itionc-cotanaqueca Moishishini, ipeacaitaroquea catsantsanaqui. Ariquea iquempejiaqueroquea aisa imaatacojiacaroquea inaraquí. Oraquea yamanajiaquerigueti Aapani Irioshi iroguenti iquitsaajia catsantsajepaquipae.

‡ 22:40 Ampintsamajatemparigueti Aapani Irioshi aisa ampintsatemparigueti agonorojia, anetsanajigueroquea otsipapae igantacaantane Aapani Irioshi, ovonchaquijacarotari. § 22:42 *Quirishitotatsica*. Iguenquetsatsarequi guiriegogia icanquegueti *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano.

⁶ Oraquea icajemajitirigueti ishecajiacagueti iroguenti inintajiguiquea iroguisavisaviiqueriquea intsipatsipaitacaanquempariquea anaantajiatsica, aisa yoayoaitapini-jiguigueti tsovironaqui qui icapio cantapinijigaca inintajiaquequea iroguisavisaviita-queri intsipatsipaitacaanquempariquea caavijica yanaajiaque.

⁷ Aisa yoayoaitanaquegueti oraniqui yojocantantajitirogueti taaca opajitapae inintajiaquequea inquenquetsatacajaitavaqueri incantavaqueri: 'Tsatacaantantatsica.'

⁸ "Cotanquitsiquea aviatimpajia aatoquea pinintajiguitsi incantajiquempi: 'Tsatacaantantatsica', choocatarite aparoquea Tsatacaantantatsica tsatacaajiaquempica. Maasano aviatimpajia mana piquejetavacaajiac, quejejaquempi iguentijeguijia.

⁹ Ocaniquiquea ocaniqui quepatsiqui aatoquea ichoocatomatitsi pijitashitempaca: 'Aapani', choocatarite aparó Piri, ichoocati inquitequi.

¹⁰ Aisa aatoquea pinintimatitsi incantajiquempi: 'Nomajironcaca', choocatarite aparó Pimajirote, irira Quirishito.

¹¹ Iriraquea nintanquitsineca iranaaque manaquea iramitacotanquequea.

¹² Aritarite irira quenquejacotajatsineca: 'Nanaajiaqueri itsipajia', manaquea iroguipashiventajaqueriquea Aapani Irioshi oncoramanitapojajegueti, iriraquea teeca iranaanteji iroguenti irishinevenquempariquea iranaacaavaequeri.

¹³ "¡Imaicashiatsi pantsipevaetempanshiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajatsica! Quejevecaquea, pashiterogueti sotomorontsi inquijantajitaquempameca nintajianquitsica irimajirontaquempari Inquitequitica. Aviatimpajiaquea teequeate pinquijeji, manaquea piticaantavaque aatoniji iquijaquijaiti nintajavetanquitsica.*

¹⁴ ¡Imaicashiatsi pantsipevaetempanshiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajatsica! Manatarite pamatavijajiaqueroquea metojacoguetatsica piteroncapitsajiaqueroquea ashincaca. Aisa pamanajiaquerigueti Aapani Irioshi picaratsantsatacaavaevetacaro iramenajitaquempiniji. Nocantantajiaquempica aviatimpajia caaviji panaamajajiaque incatsimamajajiaquempiquea oncoramanitapojajegueti.

¹⁵ "¡Imaicashiatsi pantsipevaetempanshiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsatamampeajatsica! Aviatimpajia pitsitacaguitejavaetanaqueroquea quepatsi aisa inirojani quentijani pinquemisantacaajiaqueriniji aparó caquinte inquempejanaquempiquea aviatimpajia. Oraquea iquemisantajiaquempigueti caavijiquea igaanacaqueate icovaeguishetanacaquea yanaajiaquempiquea aviatimpajia. Irootaquequea iroantajianaquempaca camorecariqui quejejaquempi aviatimpajia.

¹⁶ "¡Imaicashiatsi pantsipevaetempanshiatsi aviatimpajia, pitsatacaantajiavecaquea cotanquitsiquea teequea pintsatimajigueji! Mana piquejejiacari shamponcajari nigavetaquemparica itsipa queroquea inquenanaque. Iroguenti picantajiaquequea: "Taaca opaji ancantajiaque iroocajate anquenquetsatacojiaque teemporo ancunque: "Nontsojaquempagueti ompeguempata teemporo", iroompa aatogueti anetsanatiroquea acanqueca cameetsataquequea. Cotanquitsiquea iriogueti anquenquetsatacotaquequea ooro choocatatsica teemporoqui, arí anetsanamajaqueroja, aatoquea acantashitatiimatarotsi.'

¹⁷ ¡Quishoguinari pinajiaque! Shamponcajataquempi pishirequi. ¿Querocampate anaatsica: iriocajate ooro choocatancaroca teemporo, iroocajate teemporo yashintantavarica Aapani Irioshi? Irooriji anaavaeque teemporo.

* **23:13** Irirajia tsatacaantajiguiroca itioncacotanaqueca Moishishini iriovetaca tsatacaantamajatanterome Iguenquetsatsare Aapani Irioshi irimeshiantaquemparime igonorojia, cotanquitsiquea iriatimpajia tee irinintenica irinet-sanatero, manaquea itsatacaamampeajiacaro intati.

¹⁸ Ariquea picanquequea aisa: ‘Taaca opaji ancantajiaque iroocajate anquenquet-satacojiaquequea aretare itaantajitarica viratsipae yaajiguiniriguetei Aapani Irioshi ancantajiaquegueti: “Nontsojeaquempaguetei ompeguempata aretare”, iroompa aatoguetei anetsanatiro acanqueca cameetsataquequea. Cotanquitsiquea irioguetei anquenquetsatacojiaque viratsi ogataanquitsica aretarequi, ari anetsanamajaqueroja, aatoquea acantashitatiimatarotsi.’

¹⁹ ¡Shamponcajari pinajiaque! ¿Querocampate anaatsica: iriocajate viratsi, iroocajate aretare yashintantavajarica Aapani Irioshi? Irooriji anaavaeque aretare.

²⁰ Iriaquea quenquetsatacotiroca aretare, teequea aparó inquenquetsatacoteróji iroatimpa, iquenquetsatacoqueriquea aisa viratsi ogataancaroca.

²¹ Ariquea iquejetacaquea iriaquea quenquetsatacotirocaquea teemporo, teequea aparó inquenquetsatacoteróji teemporo, iquenquetsatacotsitariquea iriatimpa aisa Aapani Irioshi choocatancaroca.

²² Aisa quericaca quenquetsatacotiroca inquite ichoocatiguetei Aapani Irioshi irooquea iquenquetsatacotsitaqueri ishitaponcaroquea Aapani Irioshi Imajirojiate maasano, aisa iriguentei iquenquetsatacoquequea Aapani Irioshi savicantaroca.

²³ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiat-sica! Pojocagarantapinijiguiniri Aapani Irioshi pashintaguecaca: pashintajigaguetei 10 ovanajaniqui icantajitica menta, irooca oitsoquijaniqui anishi, irooca comino, pinetsanaqueroquea pojocapinijiguiniri aparó. Cameetsavetaca, cotanquitsiquea povashiantanajiro caavijica anaaquequea itsatacajiaquempica tioncarentsiqui, jero in-intamajataqueca: tampatica poaqueneri maasano caquinteguetatsica, pimpintsatacotantempajia, aisa paventamajaguitemparini Aapani Irioshi. Cameetsavaeque pojocagarantajiaqueneriquea Aapani Irioshi pashincaca, cotanquitsiquea aatomesano pipeacojigarome otsipapae icantajiaquempica.

²⁴ Quempevaequempiquea shamponcajari tsatacaavetanacarica itsipa queroquea inquenacaanaquerime. Quempecaquea pitsicajatacovetacari tsiitojaniqui, iriaquea cameyo, pinijacoqueri.

²⁵ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiat-sica! Piquejejiacari quiviroca otaqui chotaronsi irooca perato, cotanquitsiquea intsom-poguirequi jac cantaitevaequequea, oshatecaquempitari covaeguisherentsi, manaquea paitsitantaguetaque, mana picoaguetaquero pinintaguetica aviatimpa.

²⁶ ¡Aviatimpajia pariseojia quejequempiquea shamponcajari! Iroquetita pinquiva-
quero intsom-poguirequi chotaronsi irooca perato ariquea aato ocantaitetajitsi aisa otaquiqui.†

²⁷ “¡Imaicashiatsi pantsipevaetempanishiatsi aviatimpajia tsatacaantajiguiroca ition-cacotanaqueca Moishishini, aisa aviatimpajia pariseojia, cameetsatamampeajiat-sica! Manatarite piquempejiacaroquea yoguijaantajitarica metojatsica, manaquea ipantan-tajitacaro quitamarori cameetsanijite iramenajiquerónijite ocameetsavaeque. Cotan-quitsiquea intsom-poguirequi chomisaaniquea iriguenteiquea tseraiquicaroquea iton-
qui metojatsica icojotonquiptotanaquequea.

²⁸ Ariqueate piquempejiacaquea aviatimpajia iroguentei picameetsatamampeajiaca intati cameetsanijite iramenajiaquempinijite caquinteja, cotanquitsiquea intsom-pogui pishirejiaqui mana pishatecanajiro amatavijagantsi aisa covaeguisherentsi.

† 23:26 Iquejetacaacarí intati Jesoshi itsatacaaqueriguetei pariseojia, quejetaca incanteri: “¡Aviatimpajia pariseojia teequea pintsatimajigueji! Iroquetita pinetsanamajajiguerója pishirequi cameetsanijite iramenajiquempiniji net-sanamajajiaquempi.”

²⁹ “¡Imaicashtiatsi pantsipevaetempanshiatsi aviatimpajia tsatacaantajiguiroca itioncacotanaqueca Moishishini aisa aviatimpajia pariseojia, cameetsatamampeajiatsica! Iroguentiquea pipeacaashijiacanariquea inquenquejacotantajitajemparica tsavetantajiatsica metojajianquitsica coramanipaequitica, aisa pinetsanajiaqueneriquea yoguijaantajitarica comajamajajiatsica metojajianquitsica cameetsanijite inquenquejacojijajerinijite.

³⁰ Ariquea picanquequea: ‘Arimequea nonchoocateme coramani ichoocatigueti choviquivaejianaquenaca aatomequea namijiguirime imetojajiaquerigueti tsavetantajiatsica.’

³¹ Oraqueate piquempejiaquerogueti imaica aviguenti quempetacaantanquitsi, picantajiaquetarite aviguentijia ichoviquivaejianaqueca metojajiaquerica, ari piquejejiacari.

³² ¡Iroosacanica pinteroncamajateroja ipariaguishecaca choviquivaejianaquempica!

³³ “¡Quempevaequempi camaarini! ¡Quejejiaquempiquea irijanijiate sanatari! ¿Quero pincojiaquempani aatonijite pitsijaigatsi camorecariqui?

³⁴ Irootaquequea nontigaranquimotantajiaquempirica tsavetantajiguiroca icanquerica Aapani Irioshi, itsipajia caavijica itsajigui, itsipajia tsatacaantajiatsica. Cotanquitsiquea ari pimetojagarantajigueri pompajacogarantajigueri, itsipapae pinta-vatavajaigueri shinagogapaequi picapiocantapinijiacaca, pincatsimatashijianaquempari pimpatimajianaqueriquea iguintenipaequi.

³⁵ Pinintacaajiaqueri irimetojajiaque comajamajajiatsica irootaquequea incatsimatimentantaquempiroca Aapani Irioshi quejetacaquea aviatimpajia quejetacaantajiaqueriquea imetojantajicarica tsaromentamajajigarica Aapani Irioshi coramanitica, iriquetinicaquea ipariajitacaca comajatatsica Averini icaratacaajivaequeriquea Sacarianiqui irijanite Verequiashini. Iriaquea Sacariani manaquea imetojajitaqueriquea ontaniqui oniganquirequi oticaacoroqui teemporo ichoocavetacaguete acaqueroa aretare itaantajitarica viratsipae.

³⁶ Arimajacaquea noncantajiaquempica, imaicashtiatsi incatsimatimentajiaquem-pironishiatsi Aapani Irioshi aviatimpajia choocajianquitsica imaica.

Jesoshi iraacojiaqueriquea Jerosarequitica

(Irc. 13.34-35)

³⁷ “¡Jerosarequitica, Jerosarequitica, pimetojajiguiriquea tsavetantajiatsica, aisa pitsinatsinavaetaqueriquea itigaranquimojivetaquempica Aapani Irioshi intsavetantimojiaquempiro Iguenquetsatsare! Pamenajiguiroquea chaapa osaavantajiguiguete orijanijiate, nonintaguevetacaquea naatimpa nonquempetacaajiaquempimequea maasano aviatimpajia noncapiocajiaquempimequeate pintsaromentajiaquena, cotanquitsiquea aviatimpajia teequea pinintajigueji.

³⁸ Imaicaquea imaica aatoquea ichoocatimojiajimpi Aapani Irioshi, aparoquea pinchoocajiaje.

³⁹ Nocantajiaquempiquea imaica aatoquea pamenajiajana arejevaetapojajempaquea aapojajempaguete pincantajianaquetaquea: ‘¡Intsishiatsi irishineventajiquempari iriratica coraquetapojatsica itigarancaqueca Majirontamajatsica!’ ”

24

Jesoshi icanque irisovejaiquero teemporo

(Mr. 13.1-2; Irc. 21.5-6)

¹ Ariquea isotoanajiroguete Jesoshi oticaacoroqui teemporo iroavaetanaje, iquempejiquempejiipojiriquea itsatacaanejia yamenacaaguequeri teemporo aisa tsipagueta-aroca.

² Cotanquitsiquea iriraquea Jesoshi icantajiguiri:

—¿Arite pamenajiaquero maasanopae ocatica? Iroomajatari noncanquempica, aatoquea ochoocatajitsi aparo mapi ogataajatsineca, maasanopae irisoveacomajajitaquero.

Queroquea oncotanaquempani irooshipojegueti onteroncaguetanajempa quepatsi (Mr. 13.3-23; Irc. 21.7-24)

³ Iroompaquea isavicaquegueti Jesoshi Orivotsempiqui, ariquea iquempejiquempejiipojari itsatacaanejia, icantajiapojiri:

—Nonintajiaque pintsatacaguena quero oncarateni onetsanatantaquempaca incajaranquitica picanquegueti irasacaraajitaquero. ¿Taa opaji nontsatantajiajavemparoca pincoraquetantapojajempaca aisa onteroncantaguetanaquempaca quepatsi?

⁴ Iiraquea Jesoshi icantajiguiri:

—Shoshoh yamatavijajitimpitsi.

⁵ Incoraquecoraqueitaquetari oshequini pinajajiaquenanea cantajianquitsineca: ‘Naroguenti Quirishito’,* ariquea iramatavijajiaqueri incaramirincatashivaetanaqueri.

⁶ Aisa pinquemacojiaqueriquea itsipajia irashimirintavacaajianaquempa quempeji, aisa itsipajia otsipapaequi guinteninintsipaequi, cotanquitsiquea aviatimpajia aatoquea pitsaroajiguitsi. Aritarite onquempetanaquempaquea imaica, cotanquitsiquea aatotaquea arejetsitatsi onteroncantaguetanaquempaca quepatsi.

⁷ Iiraquea guintenijianquitsica otsipapaequi quepatsi iroaroaitashijianaqueriquea osamanipaequitica, ariquea irashimirintavacaajiaquempa. Ariquea inquempejiaquempa majirontajiaatsica inchoocagarantajiaque intigarancajiaqueri igoaretajiate iroaroaitashijianaqueriquea itsipa majirontatsica irashimirintavacaajiaquempa. Irantsipevaejitaquemparoquea tasetzijencapae, aisa omoguecaguetanaquempaquea.

⁸ Onquempeguetanaquempagueti imaica mana oparianaca intati irantsipevaetantajitaquempaca.

⁹ “Ariquea irajaiquempeiquea iraanaquempi incatsimatacaantajiaquempeiquea irime-tojacaantajiaquempi. Maasanopae caquinteguetatsica irisemimentajiaquempiroquea novajiro pitsaromentajiaquenagueti.

¹⁰ Inconoagarantajiaquempaquea tsaromentajiavequenanea irovashiantajianajero aato itsaromentajiajana, iroguenti iracaantajianaqueriquea itsipavijivetacaca, irise-mavacaajianaquempa.

¹¹ Irisotoaguetanaquequea amatavijantanquitsineca incantamampeajiaquempaquea: ‘Notsavetantiro Iguenquetsatsare Aapani Irioshi’, cotanquitsiquea iriatimpajia manaquea iramatavijajianaqueri oshequini.

¹² Oncantatiaguishevaetanaquempaquea oratica covaeguisherentsi, aato ipintsatan-tamajatanaja oshequini caquinteja.

¹³ Cotanquitsiquea quericaca atsipetacovaetanquitsineca aatogueti yovashiantirotsi itsarovenquenagueti arejevaequempa irimetojanaje, irioquea iriguenti irajaitanaje inquitequi.

¹⁴ Intsitacaguitejavaetanaquero quepatsi intsavetantajitanaqueroquea quero icotani Aapani Irioshi imajirontagueti. Ariquea inquempejiaquempaquea imaica cameetsanijite inquemacojiaquero maasano caquinteguetatsica, ariquea onteroncapojempa.

¹⁵ “Iiraquea tsavetantatsica Iranerini coramani itioncacotaqueriquea covaeguishetaqueroneca teemporo oncoramanitapojajegueti. (Quericaca apatsajavanqueroneca ocatica pinquenquejamajateroja pintsatimenqueroniji.) Imaica aviatimpajia pamenajiavaquerigueti inchoocatantapojaquemparogueti iteemporote Aapani Irioshi,

* **24:5 Quirishito** ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraque-taque impeaquempa imajirote ompejiaquemparineca.

¹⁶ pincampojeja jaran maasano Joreajiaquitica pishiashiaitapanajantejate otsempiguedagueti.

¹⁷ Quericaa choocatanquitsineca sotsiqui omencotapojacagueti itsovironaquitequi ovancaitoqui, aatoquea yaguijitapanajanti iraaguepanajantero taaca opajitapae choocatanquitsica intsompogui.

¹⁸ Quericaa choocatanquitsineca iniganquitejirequi, aatoquea yoapanajanti itsovironaquitequi irapanajantero otsipa iitsaare.

¹⁹ ¡Ooshiatsi manquigarentsijia tsaraquijianquitsineca, aisa atsojianquitsineca, caaviji antsipemajajiaquempaquea!

²⁰ Aviatimpajia pamanacoventajiaquempaquea aatonijite pishiamirincatantajigarotsi sharacaguiteriqui irooca aisa savincaguiteriqui imagorejantajitaca.

²¹ Caavijitari irantsipevaejitaquempa anaavaequero maasanopae yatsipejitacaca iroaqueragueti ipeacaaguecaroguete Aapani Irioshi quepatsi arejevaeca imaica. Aisa aatoquea yamenimajitajirotsi oncoramanitapojajeguete.

²² Aatomegueti icaratacaapojirome Amajirote oratica savincaguiteripae irantsipetantajavetaquempaca interoncamaajiaquempamequea caquinteja. Cotanquitsiquea ipintsatacotacari icoguiajiaqueca,† incaratacaantapojaquenemparica.

²³ “Quericaa cantajiaquempineca: ‘Jeeri iricatica Quirishitotatsica’, irooca incanquempi: ‘Ichoocaque ontaniqui’, aatoquea piquemisantajiguiritsija.

²⁴ Incoraquecoraqueitaquequea tsavetantamampejaigatsica amatavijantajanquitsineca incanquequea: ‘Naroguentiquea Quirishitotatsica.’ Itsipaquea cantajanquitsineca: ‘Naroguentiquea tsavetantiroca icanquenaca Aapani Irioshi.’ Aisa ironigaanqueroquea oacaantantatsica intati cameetsanijite iramatavijajianaquerinijite oshequini. Inquejetacaajitsivetempariquea icoguiajiaqueca Aapani Irioshi, cotanquitsiquea aatoquea yagavejiritsi.

²⁵ Jero, nocamantsivaequempiro maasano ocatica imaica tequerataguete arejepojempa.

²⁶ Incanquempiguete: ‘Jeeri irintatica oquitamampororoitapojiguete’, aatoquea poapaititsi pamenamenaiquiteri. Aisa incanquempiguete: ‘Chooca oraniqui intsompoguiqui’, aatoquea piquemisantajiguiritsi.

²⁷ Onquempetaquempaquea pamenajiguiroguete careti queroca ococani ocantiguete timemec, teequea capichajaniqui ontimemequeje, maasanoquea ontimemecaguetevaequero. Ariquee inquempetapojajempa irira Irijanite Caquinte incoraquepojjajeguete, maasanojia iramenamajajivajeri.

²⁸ Quempecaquea metojatsica querocaguete oraniqui yojoquijicaguete yamenajiqueriquea sheetyaoni irarampejashijapojeri.‡

Querocaca oncoguetanaquempani incoraquetajateguete Irijanite Caquinte

(Mr. 13.24-37; Irc. 17.26-30, 34-36; 21.25-33)

²⁹ “Irooquea oncaraguijanaqueguete atsipevaerentsi impitsecajencatanaque catsirincateri, taai aato iquitasetaji. Iriaquea impoquiropae irasacaraaguetaquempaquea. Irimoguecanaquempaquea choocaguetanquitsica jenoqui inquitequi.

³⁰ Ariquee iramenajitavaquero ontaniqui inquitequi intsatantajitavaquemparoca irooshimajapoji incoraquepojaque irira Irijanite Caquinte. Ariquee irishimampojancajianaquempa maasano caquinteguetatsica quepatsipaequitica irirajianaquempa. Ariquee iramenajivajeri Irijanite Caquinte incoraquetantapojajemparo mararo, iragavejavaetapojempa iranaajiaqueriquea maasano, iroganejencavaetapojempa.

† 24:22 Irirajia icoguiajiaqueca iriojiatari aventaventajiaquemparineca. ‡ 24:28 Quejetaca **yamenajiquerisheetyaoni irarampejashijapojeri** metojatsica, ariquee onquempetaquempa incoraquepojjajeguete Quirishito, aato isenacapoja, maasanoquea iramenajivajeri. Pamenero aisa Irc. 17.37.

³¹ Iroompaquea intivojiqueroquea tivorentsi intigarancajiaqueriquea irashivanti-jitete iroaroaitanaquequea intsitacaguitejajiaquitero maasanopae quepatsi incapioca-jiaqueriquea icoguiajiaqueca Aapani Irioshi.

³² “Imaica pintsajiavaqueroja nontsatacaajiaquempica, nonquempetacaquem-piroja iguera. Iroaquerasano etsocorevanatanaque pitsajiaquequea irooshipojaji ajagantsipojaje.

³³ Ariquea onquempetanaquempaquea oncoramanitapojajeguetei pamenaguetava-jerogueti onquempetanajempagueti maasanopae notsatacajaianaquempica imaica, irooquea pintsatantajavajempa irooshipojishiatsi incoraquepojjaje Irijanite Caquinte, quejetaca catiapojaca sotorontsiqui.

³⁴ Arimajaca noncantajiaquempica, maasanopae ocativa nocantajiaquempica imaica onetsanamajatanaquempaquea tequerataguetei interoncajiguempaji maasano chooca-jianquitsineca omparianaquempagueti notsavetantsitacaca imaica. §

³⁵ Oraquea inquite aisa quepatsi ompeaquempa, cotanquitsiquea oraquea nocan-taguequeca aato opegatsi.

³⁶ “Teequea inchoocateji tsatatsineca querocaca savincaguiteri onetsanatantaquem-paca, tee intsajiteji quero incarateni catsirincaiteri. Irirajia ashivantijite inquitequitica tee intsajigueti, ariquee iquempetaca Irijanite Aapani Irioshi teequea intsateji. Aparoquea icocani Aapani Irioshi iriatimpa itsaqueroquea.

³⁷ “Oraquea incoraquequetajeguetei Irijanite Caquinte onquempetajemparoquea ichoocavecaguetei Noeni coramani. ☆

³⁸ Tequerataguetei onanquempaji anaantaguetaquemparoca maasanopae quepatsi, ishecajiaca caquinteja, imirajiaca, imanquigajiaca, yojocantajiaqueroquea irorijaniji-ate omanquigajiaquempaquea, arejevaeca savincaguiteri iquijaquijaitantacaca Noeni iguenajaroqui icantajitica aareca.

³⁹ Iroompaquea ocomitajajipojiri anancari ocataroajianaqueri. Ariquee onquem-petaquempa oncoramanitapojajeguetei incoraquequetapojajeguetei irira Irijanite Caquinte, manatarite incomirejajipojeri.

⁴⁰ Inchoocajiaque mavite caquinte iniganquitejirequi, aparo irajaitanaque, iriraquea itsipa irojocajitanaqueri.

⁴¹ Ariquee onquempejiaquempaquea mavite manquigarentsi osavicajiaque ontanca-jiaque, aparo irajaitanaquero, oraquea otsipa irojocajitanaquero.

⁴² “Irootaquequea noncantantajiaquempica pincoquempanija poguijajavajerija Pi-majirote, teetarite pintsajigueti querocaca incoraquequetantajempaca.

⁴³ Iintsijate pinquenquejajiguerojate, inchoocateguetei itsipa ashintanquitsineca itso-vironaquite intsatemeguetei querocaca incoraquequetantaquempaca aitsitantatsica, ¿arim-pate irimaaque? ¡Aatotarite imaguitsi! Manaquee intinajaventaguiteroni irajaararo aatonijite yaitsijitiritsi.

⁴⁴ Irootaquequea noncantantajiaquempica pincoquempanija pincomajamajajiaque-mpa poguijaguiterini incoraquequetajeguetei irira Irijanite Caquinte, iroorijite incoraque-quantajemparo pijijiaqueca aatoca icoraquetantaro.

Yashintajitaca cameetsari aisa teeca incameetsateji
(Irc. 12.41-48)

⁴⁵ “¿Querija quempequemparineca imaica yashintacaca irira tsatatsica quemisanta-majatirica ashincarica? Pameneja inchoocateguetei ashincarica caquinte iroompaquea

§ 24:34 Otioncaca acaniqui, iguenquetsatsarequi guiriegojia ocanque *genea*. Chooca mavitepae agavejaque oncantacotaque. *Genea* agavejaque oncantacoqueri (1) irioca maasano choocajianquitsica icantaquerogueti (*esta generación la gente de este tiempo*); (2) irioca oncantacoque maasano joriojia (*esta raza*); (3) irioca oncantacoque maasano choocajianquitsineca omparianaquempagueti itsavetantsitacaca (*esta generación, es decir, la generación que ve el comienzo de estas cosas*). ☆ 24:37 Jen. 6.5-12; 7.6-24.

iroanaquegueti osamani, incantanaqueri aparo yashincaca: ‘Pinquempoguijajajeri maasano nashintajiacaca, pojocapinijiaquenerija ishecajia.’

⁴⁶⁻⁴⁷ Oraquea incoraquepojajegueti iramenapojajerigueti inetsanamajatajiro ican-tanaquerica, arimpaquea irishineventamajatanaquempariquea. Arimajaca noncan-quempi, incampoajajeri: ‘Imaica noninquequea pamenaguetaqueroquea maasanopae nashincaca.’ Ariquea iriatimpa irishinevaetanaquempaqueea oshequi.

⁴⁸ Cotanquitsiquea iriogueti teeca inquemisanteji, aatoquea yoguijiritsi ashincarica manatarite incanque: ‘Aatotajate icoraquetsitaja’,

⁴⁹ ariquee imparianaquemparo incatsimajianaqueriquea quejejiacarica yashinta-jitacaca, inconoajiaquempariquea shinquitatsica manaqueea irisavicaventaguiteroni irishecaguitempani, aisa irishinquiguitempani.

⁵⁰ Cotanquitsiquea taampina incoraquetimopojajeri ashincarica incomirejapojem-
pari,

⁵¹ incatsimamajapojajeri oshequi, intsipatacaantajiaquempariquea quemisanta-
mampeajiatsica intati, ontaniquiquea iriraaguitempani irantsicayajijiaquempa.

25

*Jesoshi iquempetacaacaro 10 manquigarentsijia iroaqueraca quenquevaroguetanan-
quitsi*

¹ “Imaica nonquejetacaquemparoquea quero oncoquempani irimajirontaquem-
pagueti Inquitequitica aapojempagueti notsavetantsitacaca. Manaqueea onquempe-
jiaquemparo 10 manquigarentsijia iroaqueraca quenquevaroguetananquitsi. Iroat-
impajia amajiaque otsivorepae oahoaitanaque ontonquivotonquivoiquempari man-
quigatanquitsineca.

² Ocarajiaque 5 teeca onquenquejamajajigueji, otsipa 5 quenquejamajianquitsica.

³ Iroatimpajia teeca onquenquejamajajigueji amajiaveca otsivorepae, cotanquit-
siquea teetarite aajianaqueji ashitite oganencajatantanaquemparica coajica interon-
canaquempagueti.

⁴ Oraquee quenquejamajianquitsica iroguenti amajiaque itsipataco.

⁵ Iroompaquee oguijaveguitarini teetatarite incoraquetsitempaji manquigatan-
quitsineca, ocantanaca pochoquini ojocajianacani tin.

⁶ Iroompaquee onianquitevaetapojaquegueti oquemitsitariquee icajemajencaji-
taque: ‘¡Coraquetapojaque manquigatanquitsineca, poapoaiteshiatsi pintonquivojaji-
avaquempariquea!’

⁷ Ariquee ocojianaca ocatiajianaca maasano aitsijavetanaca otsivorepae.

⁸ Oraquee teeca onquenquejitsitempariji ashiti ocantsivetaroquee quenquejajian-
quitsica: ‘Pojocagajoitenashiatsi capichajaji pashitite irootapojishiatsi nontsivaca-
cotenishiatsi.’

⁹ Cotanquitsiquea iroatimpajia ocanqueroquee: ‘Aatoshinete nojoquimpitsi. Arigueti
nojocajiavequempigueti manaqueea anteroncajatacotsijianaquempaja taampina
maasano. Poapoaitanaquequeea pivegarajiapanajante pashi aviatimpa itsipajato.’

¹⁰ Cotanquitsiquea irooquee oahoavetanaca ovegarajiapanajante jac arejetapojaca
manquigatanquitsineca. Oraquee quenquejamajianquitsica amajianquitsica ashitite
oquijaquijaitanaque intsompoguiqui otsipatsipaitanacari irishineventajiaquempar-
igueti, ariquee ocotanaca yashimajajitajiro ashitacorontsi.

¹¹ Ariquee ocoraquecoraqueitsivepojaca otsipavecaca, ocanquequee: ‘¡Nomajirote,
nomajirote, intsija pintanarejacotenashiatsi!’

¹² Cotanquitsiquea iriatimpa icantajiguiro: ‘Teetarite nontsamajajiguempiji cameet-
sanijite nontanarejacojiaquempinijite.’

¹³ Irootaquequea imaica noncantantajiaquempica pincoquempaniquea pincomajamajiaquempaja, teetarite pintsajigueji querocaca incoraquetantapojajempaca Irijante Caquinte.

Jesoshi iquempetacaacari caquinte ashintajiacarica caraquisequitirica imentaqui
(Irc. 19.12-27)

¹⁴ “Imaica nonquempetacaquemparoquea imajirontaguetei Inquitequitica, manaquea nonquempetacaquempari caquinte ashintajiacarica caraquisequitirica imentaqui. Irooshipoji iroanaquequea otsipauqui quepatsi icajemajiaqueri irashijia irojocajanaqueneri imentaquipae iroganencajeri.

¹⁵ Iriiraquea aparo yojoquitanariquea 5 imontiina imentaqui.* Iriiraquea itsipa yojocaqueneri mavimontiinate. Iriiraquea mavitevaetapojatsica yojocaqueneri apamontiinaro. Itsaqueritari maasano yashintajiacaca queri agavejamajatanquitsineca aisa teeca iragavejamajateji. Ariquea yoavaetanaque jmm osamani.

¹⁶ Iriiraquea yojocanaquenerica 5 imontiina yoganencajiriquea itsipa 5 imontiina.

¹⁷ Ariquea iquempetacari itsipa yojocanaquenerica mavimontiinate, yoganencajiri itsipa mavimontiinate.

¹⁸ Cotanquitsiquea iriraqueate yojocanaquenerica apamontiinaro, manaquea yoanaque iquisocashitaqueri quepatsiqui yoguijaitari.

¹⁹ “Ocoramanivaetapojaji anaanaaguetanaca oshequini taai icoraquepojaji ashintajiacarica icantajiapojiri: ‘Jameja amenajiajeri imentaqui querocaca icaramontinatanaqueni.’

²⁰ Iriiraquea yojocanaquenerica 5 imontiina yojoquitsitajanariquea, itsipatacantacari itsipa 5 imontiina imentaquipae yaancarica, icanqueriquea: ‘Nomajirote, ari pojocavetanaquena 5 imontiina, jeri iricatica itsipa 5 imontiina naantajarica pimentaquitsite.’

²¹ Iriiraquea ashincarica icanqueri: ‘Cameetsavaeque, pinetsanamajaqueroquea noncanquempica, piquemisantamajataquena. Pinetsanatavaquerotari nocantavequem-pica capichajaniqui, imaicaquea aviguenti quempoguijenarone oavaetanaque. Pinco-raquetequetiro ashinevaejiaquempa.’

²² Iriiraquea itsipa yojocanaquenerica mavimontiinate yojoquitsitajanariquea, itsipatacantacari itsipa mavimontiinate imentaquipae yaancarica, icanqueriquea: ‘Nomajirote, ari pojocavetanaquena mavimontiinate, jeri iricatica itsipa mavimontiinate naantajarica pimentaquitsite.’

²³ Iriiraquea ashincarica icanqueri: ‘Cameetsavaeque, pinetsanamajaqueroquea noncanquempica, piquemisantamajataquena. Pinetsanatavaquerotari nocantavequem-pica capichajaniqui, imaicaquea aviguenti quempoguijenarone oavaetanaque. Pinco-raquetequetiro ashinevaejiaquempa.’

²⁴ “Iriiraquea mavitevaepojatsica yojocanaquenerica apamontiinaro icanqueri ashincarica: ‘Nomajirote, namenimpiquea aviguenti teequea pimpintsatacotantempaji, aisa aviguenti caavijica patsipetacaantavaetaca pishiacotacaantiguetei paanquempaca caraquisequi imentaqui. Aisa manaquea poganencaqueri imentaqui intati teequea pishiacotimenteriji.

²⁵ Irootaquequea notsarocaanquempica noantanacaca noquitatantacarica pimentaquitsitepae quepatsiqui. Imaica jeri iricatica pimentaquitsitepae.’

²⁶ Iriiraquea ashincarica imentaquitsite icanqueri: ‘Teequea pincantempaji, aviguenti peratatsica. Iroosacanica pitsaquena natsipetacaantavaetaca

* **25:15** Apamontiinaro imentaquipae cavorejatatsica tenatatsica 91 quiro, icantajitiro coramani **tarento (talento)**. Iramiteriguetei itsipa irajagantsitacovaetanaque irivegarataqueri aparo tarento.

noshiacotacaantigueti naanquempaca caraquisequi imentaqui, aisa manaquea noganencaqueri imentaqui intati teequea noshiacotimenteriji.

²⁷ ¿Querocaquea ocotacani teequea pojoqueneriji nomentaquiijatsite quempoqui-jantaguetirica paantajemparimequeate itsipajia, iroompaquea nocoraquevetajagueti imaica pojocavajenarimequea?’

²⁸ Ipitsocashijigariquea choocajianquitsica oraniqui icanqueri: ‘Paapitsaterishiatsi iricatica apamontiinaro imentaqui nojocavecanarica pojocajigueneri oganencaquerica 5 imontiina.

²⁹ Caavijitari irojocamajajiqueneri quericaca ganencamajataquerica, cotanquitsiquea iriraquea teeca irashintamajatempaji, capichajitica yashintaveca iracaitsijitaquempariquea.

³⁰ Imaica iricatica nashincaca teeca inquemisantenaji paajianaqueriquea pimpishoncajiaquiteri sotsiqui opitsecaquegueti intsipatsipaitaquempariquea iraaajianquitsica atsicayajijianquitsica.’

Queroquea incojitaquerini caquinteja oncoramanitapojajegueti impeaquempagueti Jesoshi Imajirojiate maasanojia

³¹ “Oncoramanitapojajegueti incoraquetajegueti Irijanite Caquinte iroganejencavaetapojempa intsipatsipaitaquempari irashivantijitete Aapani Irioshi, irisavicapojero imajirontamento oganejencari irimajirontamajapojempa.

³² Intiorencaventajianaquempari maasano caquinteguetsica. Iriatimpa iromporoguijashiguetempari inquempetacaajiaquempari quempoguijirica oveja yomporoguijashiguetarigueti irovejate aisa igaaverage.

³³ Iromporoguijashitaquempari ovejajia itincamijempequiqui, aisa caaverajia iromporoguijashitaquempari ishinampijempequiqui.

³⁴ Iriraquea Majirontatsica incantajiaqueri choocajianquitsica itincamijempequiqui: ‘Caacate, aviatimpajia icavintsajamajiaqueca Aapani. Pashintajiaquemparoquea maasanopae ipeacaajiaquempica paesatoniqui iroaqueraguete ipeacaacaroguete quepatsi, aviatimpajia inintacaajiaquempiro incavintsajajiaquempiquea.

³⁵ Iroorijite natsipevaetacaroguete notase aviatimpajia pojocajiaquenaquea noshecatacaca. Nomirevaetiguete pojocajiaquenaquea nomiracaca. Noquenaguetanaquete teequea pintsajiavetenaji, picajemajiaquenaquea pitsovironaquitequi no-maimojiaquempi.

³⁶ Teequea onchoocavetempaji nonquitsaaquempaca, aviatimpajia pojoquitanaroquea noquitsaacaca. Nojoquijicaguete aviatimpajia pipintsatacojiaquenaquea pamenajiaquitana. Aisa isantanatacojitanaguete picoraquejiajati.’

³⁷ Iroompaquea iriraquea comajamajianquitsica icanqueriquea: ‘Nomajirote, ¿querocate namenajiaquempini pitaseaqueni nojocajiaquempi pisheca? ¿Querocate namenajiaquempini pimirequeni nojocajiaquempi pimiracaca?’

³⁸ ¿Querocate namenajiaquempini piquenaguetanaqueni nocajemajiaquempini pimaimojiaquena? ¿Querocate namenajiaquempini picajaratsinotiguete nojocajiaquempi piquitsaacaca?’

³⁹ ¿Querocate namenajiaquempini pojoquijicaguete, aisa isantanatacojitaquempiguete noanoaitaquiti namenajiajatimpi?’

⁴⁰ Cotanquitsiquea icanquequea Majirontatsica: ‘Arimajaca noncanquempi, pipintsatacojiacariguete aparo iricatica niguentijeguite† teeca iranaanteji, quempeca naroguentica pipintsatacotaca.’

† 25:40 Icanqueguete Jesoshi *niguentijeguite* iriguenti icantacoque tsarotentacarica Aapani Irioshi.

⁴¹ “Aisa icanqueriquea yomporoguijajiaqueca ishinampijempequiqui: ‘Imaica aviatimpajia icatsimajiaqueca Aapani, poapoaitanaque ontaniqui camorecariqui aatoca otsivaquitsi ipeacaashijicarica Satanashi‡ aisa ashivantinirojite quemisantaquerica.

⁴² Natsipevaecaroguetti notase teequea pojocajiguenaji noshecajiaquempaca. Nomiretiguetti teequea pojocajiguenaji nomiraqueca.

⁴³ Noquenaguetanaqueguetti teequea pincajemajiguenaji pitsovironaquitequi no-maimojiguempiji. Teeguetti onchoocateji noitsaare teequea pojocajiguenaji nonquit-saaquempaca. Nojoquijicaguetti, aisa isantanatacojitanaguetti, teequea pimpintsataco-jiguenaji pincoraquetashijiguenaji.’

⁴⁴ Iriatimpajia incanqueriquea: ‘Nomajirote, ¿querocate namenajiaquempini pitaseaqueguetti, irooca pimirequeni, aisa piquenaguetanaqueguetti, irooca picajaratsinoqueguetti, irooca pojoquijicaguetti, aisa isantanatacojiquempiguetti, teequea nompintsatacojiguempiji?’

⁴⁵ Iriatimpa incantajigueriquea: ‘Arimajaca noncantajiaquempi, teetari pimpintsat-acojiguempariji iricaticajia teeca iranaanteji, quempeca naroguentica teeca pimpintsat-acojiguempaji.’

⁴⁶ Maasano irirajia iroaroaitanaquequea camorecariqui irantsipeventaguitempa-roni igovaeguisher. Cotanquitsiquea iriraquea netsanajiguiroca inintica Aapani man-aquea iroaroaitanaque inquitequi, incoguitempani iranijaguiteni.”

26

Iquemavacaimentajiacari Jesoshi iracaantajiaqueri

(Mr. 14.1-2; Irc. 22.1-2; Jn. 11.45-53)

¹ Iteroncaqueroguetti Jesoshi itsatacajiaqueriguetti itsatacaanejia, icanqueri:

² —Aviatimpajia pitsajiaque mavitetapojaque savincaguiteri aapojempaca Paashicoa.* Irooquea iracaantantajitaquemparica Irijanite Caquinte irompajaco-jiqueri.

³ Ariquea icapiocajiaca itsoviaguiteritequi Caipashi maasano saserorotejia anaan-tajianquitsica, tsatacaantajiguiroca itioncacotanaqueca Moishishini aisa jivajiguirica joriojia. Iriraquea Caipashi iriguenti saserorote anaantamajatanquitsica.

⁴ Ariquea oraniqui iquemavacaajiaca iramatavijajiaqueriquea Jesoshi iracaantajia-queri irimetojacaantajiaqueri.

⁵ Cotanquitsiquea icantajiaque:

—Oraquea anaanajempaguetti Paashicoa ariquea aacaantajiaqueri. Imaicaquea imaica aatotaja aacaantajiguiritsi aatonijite icatsimatacojianaqueritsi maasano capio-caventajiacarica.

Ishaguitantajicari Jesoshi poncajajatsica

(Mr. 14.3-9; Jn. 12.1-8)

⁶ Iroompaquea yoanaque Jesoshi Vetaniaqui itsovironaquitequi Shimo icantajitica Avejancavetatsica.

⁷ Ichooaqueguetti ontaniqui ocoraquetashipojiri manquigarentsi amacoqueri pon-cajajatsica vegaramajatsica. Iroguenti yoguijaantajicaro chovintyoriqúi ipeacaa-jitaca mapi icantajitica aravasetero. Isavicaqueguetti Jesoshi ishecajiaca, iroatimpa oquempetitapojacari oshaguitsitantapojacari ishinquireguishiqui.

⁸ Iriraquea itsatacaanejia irooquea yamenajivaqueroguetti ariquea icohicoitanaca icatsimajianaque, icantavacaajianaca:

—¿Querocaquea? Opomatsajatacashiatsti.

‡ 25:41 Iriraquea **Satanashi** iriotaquequea imajironcaca ampatsinijia, iriojiaquea irashivantinirojitetete. * 26:2 Pamenero **Glosario** itsavetantajitiroguetti **Paashicoa**.

⁹ Arimesanoja irojocantajiquerome iraantajiquemparo imentaqui incaraquisequivaeque irojocajiquenerimequea coguitejacojianquitsica.

¹⁰ Cotanquitsiquea Jesoshi irooqueea iquemajivaquerigueti icantsitariquea:

—Ariotaqueshiatsi ococani pasereaajiguirotsi. Cameetsavaeque oshaguitanquenaro.

¹¹ Iriraquea coguitejacojianquitsica icancaniquea pintsipatsipaitajempari, cotanquitsiquea naatimpa aatotarite picocani pitsipatsipaitajanatsi.

¹² Oraquea oshaguitsinotsiquenagueti manquigarentsi, manaquea onetsanatsitacaro irojoquijitajatenagueti nometojaquegueti.

¹³ Imaica noncamanquempiquea arimaja querocagueti intsavetantajiqueroni Quenquetsatsarentsi Oganejencatatsica maasanopae quepatsipaequi, ariquea intsavetantajiqueroqueea ocatita manquigarentsi oshaguiquenagueti cameetsanijite inquenqueja-cotimentajitajeronijite iroatimpa.

Jorashi inique iraacaanqueriquea Jesoshi

(Mr. 14.10-11; Irc. 22.3-6)

¹⁴ Iroompa iriraquea itsatacaane Jesoshi pajitatsica Jorashi Ishicariote yoanaque iramenajiaquiteri saserorotejia anaantajianquitsica.

¹⁵ Icantajiapojiri:

—¿Queroca incaravaequeni imentaqui povegarajiaquenaquea naacaantantajiaquem-pirica Jesoshi?

Iriatimpajia yojocajiaqueneriquea 30 peratamentaqui.†

¹⁶ Iroompaquea yoanajiquea ariquea ipariapojaro iquenquejanaquero querocaca incoquerini iraacaanquerigueti.

Jesoshi ishecatacaajianajari itsatacaanejia

(Mr. 14.12-25; Irc. 22.7-23; Jn. 13.21-30; 1 Co. 11.23-26)

¹⁷ Iroompaquea aapojacagueti savincaguiteri pariantajaroca savincaguiteripae ishecatantajitaroca pan teeca onconoguemparoji anempoacaanaqueroneca, iriraquea itsatacaanejia icoraquetashijiapojiri Jesoshi icanqueri:

—¿Querocaquea pininqueni nonetsanajiaquempironi maasanopae cameetsanijite ashecajiaquempanijite coajica ashineventajiaquemparo Paashicoa?

¹⁸ Iriatimpa icanqueri:

—Pijateja, poapoaitanaque shirampariqui Jerosarequi pincantajiapojerija: ‘Iriraquea Tsatacaantantatsica icanque: Irootapoji arejetapojempa nocoraquetashitaqueca, irootaquequea nonintantacaca noshecatacaajiaquempariquea notsatacaanejia pitsovironaquitequi noshineventajiajemparo Paashicoa.’

¹⁹ Ariquea yoayoaitanaque itsatacaanejia itampaticamajajiaqueroqueea icantajia-querica Jesoshi, inetsanajiaqueroqueea maasanopae irishecajiaquempara irishineven-tajiaquemparoniji Paashicoa.

²⁰ Iroompaquea opitsecaguitetanajigueti iriraquea Jesoshi itsipatsipaitanacari itsat-acaanejia carajianquitsica 12, ipimerequijajiapojaca shitaponcarontsiqui.

²¹ Ariquea ishecajiacagueti icanqueriquea Jesoshi:

—Imaica noncamantaquempi, iconoaquempiquea aviatimpajia aparo aacaante-naneca.

²² Ariquea icohicoitanaca itsatacaanejia ishimampojancajianaca, yacayacaitanaque:

—Nomajirote, ¿naroguentimpa aacaanquempineca?

²³ Icanque Jesoshi:

—Iriguenti aacaanquenanea tsipavacoquenaca notsiantancarogueti pan shovaouqui.

† 26:15 Iriraquea **peratamentaqui** ipeacaantajitari cavorejatatsica icantajitica **perata (plata)**. Yanaaqueri itsipa imentaqui icantajitica **tenario**. Apamentaqui peratamentaqui icarataque 4 tenario. Iriraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

²⁴ Aritarite ontampaticamajatanaque ocanqueca tioncanquitsica coramani itsave-tacotsijicarigueti Irijanite Caquinte, cotanquitsiquea jirantsipevaetempanishiatsi irira aacaanquerineca! Aatomesano ivoguime iriatimpa.

²⁵ Icantsitanacaquea Jorashi aacaanquerineca:

—Tsatacaantantatsica, ¿naroguentimpa aacaanquempineca?

Icanqueri Jesoshi:

—Aviguentitari cantanquitsi.

²⁶ Iroompaquea ishecajiagueta, yaaqueroquea Jesoshi pan, yamanaqueriquea Aapani Irioshi, icantaqueri: “Arioteesaa.” Ariquea icotarejitsitaroquee yojocajiaqueneri itsatacaanejia, icantiriquea:

—Paajivaqueja pishecajiavaquemparo. Iroguenti notsino.

²⁷ Iroompa yaacoqueroquea chovintyoriqui,‡ yamanajiri aisa Aapani Irioshi, icantaqueri: “Arioteesaa.” Ariquea yojocacojiaqueneriquea itsatacaanejia, icantiri:

—Jero pimirajiavaquemparoja, maasano.

²⁸ Iroguentiquea noriraja§ sotojaatananquitsineca nometojaventajiaquerigueta caramirincavaetanankuitsineca impeacotajemparonijite Aapani Irioshi igovaeguishererejia. Ocantacoqueroquea iroaqueraro paaquito.*

²⁹ Imaica noncanquempiquea, aatoquee nomirajaro vinoja arejevaetapojempa amiramiraitajemparo iroaquerajaro oncoramanitapojajegueta impeaquempagueta Aapani Imajirojiate maasano.

Jesoshi icamanqueri Peerero iromanacoqueriquea

(Mr. 14.27-31; Irc. 22.31-34; Jn. 13.36-38)

³⁰ Iroompaquea iteroncajianaquerogeti yamashaiventajiaquerigueta Aapani Irioshi, isotosotoitanaji yoayoaitanaque Orivotsempiqui.

³¹ Ariquea icanqueri Jesoshi:

—Ocatica pitsecanquitsica maasano aviatimpajia pimpashiventacaajiaquenaquea pojocajiapanajantena. Aritarite ocanque Itioncacaantaqueca Aapani Irioshi coramani, ocanque: ‘Aapojempagueta nometojaqueri quempoguijirica oveja. Irieraquea ovejajia imporocajencatesano maasano.’✧

³² Cotanquitsiquea iroompaquea nontancorejanajegueta narquetiquea jivatanaquempine noanaquequea Garireaqi.

³³ Icanquequea Peerero:

—Impashiventacaajiavetanaquempiquea maasanopae irojocajocaivetanaquempi, cotanquitsi naatimpa aatotarite nojoquimatimpitsi.

³⁴ Cotanquitsiquea Jesoshi icanqueri:

—Noncamanquempiquea, coajica tequeratagueta irinijeji chaapa, pomanacoque-naquea 3.

³⁵ Icantsitanaca Peerero:

—Arigueta intsipatacantajitenajate irimetojajiquena irimetojajiquenaquea, cotanquitsiquea aatotarite nomanacotimpitsi.

Ariquea iquempejiaquero maasano itsatacaanejia icantajiaqueca.

Jesoshi yamanaqueriquea Aapani Irioshi Jetsemaniqui

(Mr. 14.32-42; Irc. 22.39-46)

‡ 26:27 Iroguenti yaacotaque vinoja. § 26:28 Icanquerogeti **noriraja** mana iquejetacaacaro intati, cameetsaniji amirapinjiaquerogeti anquenquejapinjiaquero imetojaventajiacajigueta. * 26:28 Oraquea **paaquito** iroguenti icantamajajitirica itsipa irinetsanamajitenerica. Ocatiquea **iroaqueraro paaquito** icantajiacajiquea Aapani Irioshi irishetacotajeri igovaeguisherere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichooaquegueta Moishishini, otsipa icanquerica Taavini. ✧ 26:31 Sac. 13.7.

³⁶ Iroompaquea yoayoaitanaquequea Jetsemaniqui. Irooquee yarejerejeipojacagueti iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa noanaquetajate ontaniqui namanaquiterita Aapani.

³⁷ Iriguenti itsipatsipaitanaca Peerero aisa mavite irijanite Severeo. Ariqueea ishi-mampojancavaetanacaquea Jesoshi, yatsipeshirentavaeca.

³⁸ Icanqueriquea:

—Noshimampojancavaetatiganimaja irooshipojishiatsi ometojavaetenanishiatsi, picancanija ocaniqui pintinajaventajiaquea.

³⁹ Iriatimpa yoanaque tiijacoñajisano ontaniqui igueroncasetapojaca yamananaque-riquea Iriri icanque:

—Aapani, nonintavecaquea paapitsatenarotate nantsipequempaca,[†] cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

⁴⁰ Ariqueea yoanaji ichoocajiaquegueti itsatacaanejia, yamenajiapojiri yojocanacani tin. Icantapojiri Peerero:

—¿Arimpate teequea pagavejajigueji osamanicoñaji pintinajajigueji pintsipajiaque-name?

⁴¹ Pintinaje, aatoquee pimaajiguetsi. Pamanacoventajiaquempaja aatonijite ocoveaeguishedacaajianaquempitsi covaeguisherentsi. Aviatimpajia pinintajiaveca pishirequi pinetsanamajiaquero inintaguetica Aapani Irioshi, cotanquitsiquea teetarite pintampishijigueji pitsinoqui.

⁴² Ariqueea yoitsitanaja aisa yamanajiri Iriri, icanqueri: “Aapani, aatoguete agaveji opega aatoniji natsipetaro, iintsija onetsanaquempa pininqueca.”

⁴³ Ariqueea icoraquevetapojaja aisa yamenajiapojiri yojocajianacani aisa tin, otiavaetanacaritari pochoquirentsi.

⁴⁴ Yojoquitsijianajariquea aisa, yoitsitanaja aisa yamanajiri Iriri, irootaque icanquitirica incajaranquitica.

⁴⁵ Iroompaquea iteroncanaquerogueti yamanaqueriguete, icoraquetapojaji ichoocajiaqueguete itsatacaanejia, icantajiapojajiri:

—Arisacanica picantacoguitani maaguitatsimpi magorejajianaquempi. Arejetapojaca iraacaantantajitaquemparica Irijanite Caquinte irimetojajiaqueri covaeguishejiat-sica.

⁴⁶ Pincatintiitanaque, jamequetiro, jac coraquetapojishiatsi aacaanquenanea.

Yaajitaqueriguete Jesoshi

(Mr. 14.43-50; Irc. 22.47-53; Jn. 18.2-11)

⁴⁷ Quenquetsatanatsitiraja Jesoshi, yarejetapojaca Jorashi, irioveca itsatacaane cara-jiavetanquitsica 12. Yamamirincatapojajiaqueri caquinteja itigarancajiaqueca sasero-roteja anaantajanquitsica aisa jivajiguirica joriojia, yamashijiapojiri itsaampit-santsameniritepae aisa inchaquiji.

⁴⁸ Iriraquea Jorashi, aacaanquerineca Jesoshi, itsatacaitanacari iroaqueraguete, icanqueri:

—Quericaca nonintavorotapojaqueca,[‡] iriotaquequea pinintajiaqueca, paajianaque-riqueate.

⁴⁹ Iroompaquea yarejetapojatiga iquempejitapojacari Jesoshi, icantapojiri:

—Tsatacaantantatsica, arisa pichoocataji.

[†] 26:39 Icanqueguete Jesoshi **paapitsatenarotate nantsipequempaca** iroguenti ishimampojancacomajatac-aro incatarojitanaqueri igovaeguisherere maasanojia caquinteguetananquitsica quericaca aventajiaquemparineca. Pamenero 1 Pe. 2.24. [‡] 26:48 **Quericaca nonintavorotapojaqueca**. Yamejiaca joriojia coramani inintavoro-tavacaajiaavaca yamenavacaajiacaguete.

Ariquea inintavorotsitari.

⁵⁰ Icantsitariquea Jesoshi:

—Notsipavijitaca, iintsijate pinetsanaterote picoraquetashiqueca. §

Iroompaquea iriraquea tsipatsipaitanacarica Jorashi iquempejiquempejiipojiri Jesoshi, yaitsitapojacari yajiriquitsitari.

⁵¹ Cotanquitsiquea chooca aparo itsipatacaca Jesoshi yaitsitanacaroquea itsaampitsantsamenirite, itsopajitaro, iguempitarejitsitari yashintacaca saserorote anaantamajatanquitsica.

⁵² Cotanquitsiquea Jesoshi icanqueriquea:

—Poguijaajerojate pitsaampitsantsamenirite. Quericaca avencaroca itsaampitsantsamenirite manaquea irimetojantsijitempariquea tsaampitsantsameniri.

⁵³ ¿Arimpate tee pintsateji naromegueti nintanquitsineme noncantanaquerime Aapani intigaranquimojiaquenarimequea irashivantijitete incaramirincavaeque incanquempa irompejianaquenamequeate?

⁵⁴ Cotanquitsiquea arimegueti nonquempetacaaquemparomequea imaica, ¿queroqueira oncoquempani onetsanatanacuempaca Itioncacaantaqueca Aapani Irioshi coramani otsavetacotsiquenaguete onquempetaquempa imaica?

⁵⁵ Iroompaquea Jesoshi ipitsocashijigari capiocajianquitsica, icanqueriquea:

—¿Arimpate naroguenti catsimari aapitsatantatsica pamashitantajiaquenaca tsaampitsantsameniripae aisa inchaquiji pamentajianaquenaniijite? Nocantacoguitanitari savincaguiteri qui notsipaguitimpini aviatimpajia ontaniqui oniganquirequi oticaacoroqui teemporo notsatacaantaguitini, teequea paajiguenaji.

⁵⁶ Cotanquitsiquea oquejetantanacaca imaica cameetsaniji onetsanamajatanacuempapaniji itioncacojiaqueca tsavetantatsicani coramaniqui itsavetacotsijiaquenaguete.

Iroompaquea maasano itsatacaanejia, itsinampirejajianaqueri Jesoshi.

Yaajitanaqueriquea Jesoshi icapiocajiacaguete maasano imajirotepae joriojia

(Mr. 14.53-65; Irc. 22.54-55, 63-71; Jn. 18.12-14, 19-24)

⁵⁷ Iirajia aajiaquerica Jesoshi yaajianaqueriquea Caipashiniqui. Iriatimpa iriguenti saserorote anaantamajatanquitsica. Ariquea ichoocajiaque oraniqui tsatacaantajiguiroca itioncacotanaqueca Moishishini aisa jivajiguirica joriojia, icapiocajia.

⁵⁸ Iiriraquea Peerero yoguijatacovetanacari cotanquitsiquea impoivaetapojaque. Oraquea yarejetapojacarogueti pampatejijaniquiqui itsovironaquitequi saserorote anaantamajatanquitsica, iquijapojaque otantoqui, yamenajiaipojiri coaretajia quem-poguijajiguiroca teemporo, savisaviitaque oraniqui. Ariquea isavicapoji iriatimpa iramenacotimentavaqueriniji Jesoshi querocaca incojitaquerini.

⁵⁹ Iiriraquea saserorotejia anaantajianquitsica itsipajiacari maasano majirontajiat-sica icajemacaantajiaqueri itsipapae tsojeventajiaquemparineca Jesoshi cameetsanijite onchoocaquenijite ompampiatantapojempaca irimetojantajitaquemparica.

⁶⁰ Icoraquecoraqueivetapojaca yoshequiavetaca tsojeventajiaquemparineca, cotanquitsiquea irooquea icanque irooquea icanque, querocampate incojiaquerini, teenicate onchoocatenica. Iroompaquea icoraquecoraqueipoji mavite,

⁶¹ icanquequea:

—Naatimpajia noquemajiaqueri icanque: ‘Naatimpa nagavejaque nosoveaquero itemporote Aapani Irioshi, ariquea nompeacaitajemparo, ontrespajajegueti savincaguiteri nontsitacantajemparo.’

⁶² Ariquea icatiitsitanaca saserorote anaantamajatanquitsica, icanqueriquea Jesoshi:

—¿Aatempa paquiri? ¿Taaquea opajita ocativa icantacojiaquemparica iricajia?

⁶³ Cotanquitsiquea Jesoshi teequea incanteji. Icantsitajari aisa:

§ 26:50 Irooca ocanque guiriegoqui: *Notsipavijitaca*, ¿*taaquea picoraquetashique*?

—Aatotarite pamatagatsi, inquemavaquempitari Aapani Irioshi anijatsica. Iintsijate pincamantenajate arimajagueti aviguentica Quirishitotatsica, Irijanite Aapani Irioshi.

⁶⁴ Icantsitanacaqueate Jesoshi:

—Pitampaticataquero. Jero aisa noncamantajiaquempi: oncoramanitapojajegueti pamenajiaqueriquea Irijanite Caquinte irisavicaque itincamijempequiqui* Agavejama-jatatsica. Aisa pamenajivajeri inquenapojaje mararoqui.

⁶⁵ Ariqueate icotanaca icatsimatanaque saserorote anaantamajatanquitsica, iperejitsitanacaroquea iitsaare sarararara,† icanque:

—Iricatica manaquea iquejemanatanacariquea Aapani Irioshi. ¿Arimpate ancogui-menquempari itsipapae cantacoquerineca? Jac piquemajiaquerishinete iquejemanatanacarigueti Aapani Irioshi imaica.

⁶⁶ Iintsija ¿querocaca pincantajigueni aviatimpajia?

Iriatimpajia icanquequea:

—Iquempetacaantaca, irimetojetashinete.

⁶⁷ Iroompaquea iquishoquishoavaetaqueriquea ivoroqui, icapocapovaetaqueri, aisa yapatompatovaequeri,

⁶⁸ icantajaqueriquea:

—¡Iintsijate, Quirishitotatsica, pintsatavaqueja taaquea capojaquempi!

Peerero yomanacoqueriquea Jesoshi

(Mr. 14.66-72; Irc. 22.55-62; Jn. 18.15-18, 25-27)

⁶⁹ Iiraquea Peerero choocatiraja ichooaque ontaniqui pampatejijaniquiqui. Iroompaquea ocoraquepojaque aparo yomperajitaca ocanque:

—Aviatimpa aisa itsipapinitimpi Jesoshi Garireaquitica.

⁷⁰ Yomanacotanacaquea, icanquero:

—Tee notsatsitavaquempiroji.

Iquemitsijigariquea maasano choocajianquitsica oraniqui.

⁷¹ Ariquea yogaitsivetanaja ontaniqui sotorontsiqui amenitsitajariquea aisa ot-sipa manquigarentsi, ocantsijigariquea choocajianquitsica oraniqui:

—Iricatica irio itsipavijire Jesoshi Nasarequitica.

⁷² Yomanacotsitajaroquea, icanque:

—¡Teequea nontsateriji irintatica! Namataacagueti incatsimatimentenarotashia Aapani Irioshi.

⁷³ Incajaraquiguitetanajatigui iquempejiquempejiipojiri choocajianquitsica oraniqui, icanapojiaqueriquea Peerero:

—Arimajaca piquejgonoroncari noquemitajivaquempiroitari piquenquetsaquegueti.

⁷⁴ Iiraquea Peerero icantsitanaja aisa:

—¡Nocanqueshinete tee nontsatimateriji! Namataacagueti incatsimatimentenarotashia Aapani Irioshi.

Icanquitigui, injanaquequea chaapa.

⁷⁵ Iquenquejitsitanacaroquea Peerero icanquerica Jesoshi incajaraquitica: “Tequeratagueti irinijeji chaapa, pomanacoquenaquea 3.” Icatiitsitapanajantaquea isotoapanajanti, iraitsitanacaquea ishimampojancamajatanaca.

* **26:64 itincamijempequiqui.** Yamejiaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajironquempari iranaajiaqueri maasano itsipajia.
† **26:65** Ari icojiaca joriojia, inquemaquerigueti itsipa inquejemanataquemparigueti Aapani Irioshi irooca incantaguisetaquerigueti, imperejitsitemparo iitsaare intsatantajitaquemparo icovaeguishemajataca. Otioncaca iriraquejemanatanacuemparineca Aapani Irioshi irioca cantaguishequerineca intsinaquitajitempari irimetojajiqueri.

27

Yaajitanaqueriquea Jesoshi Piratoqui (Mr. 15.1; Irc. 23.1-2; Jn. 18.28-32)

¹ Iroompaquea osavincaguitetanajigueti maasano saserorotejia anaantajianquitsica aisa jivajiguirica joriojia iquemavacaajiaca querocaca incojiaquerini Jesoshi irimetoja-caantajiaquerigueti.

² Iroompaquea yoishojianaqueri, yaajianaqueneriquea Pontsio Pirato yojocajiapo-jaqueneri. Iriatimpa iriguenti itigarancane Sesa, quejemajirovetacarica.

Imetojaquegueti Jorashi

³ Ariquea iriraquea Jorashi, aacaanquerica Jesoshi, itsaquegueti arimajaca irimetoja-caanqueri, ishimampoancaca iquenquejitsitanacaro: “Aatomesanoja naacaantirime”, yoanaquequea ichoocajiaquegueti saserorotejia anaantajianquitsica aisa jivajiguirica joriojia, irojocajiajenerimequea iriratica 30 peratamentaqui,

⁴ icantajiavepojari:

—Nocovaeguishemajataca, naacaantaqueritari teeca incovaeguishetimatempaji, imaicanishiatsi irimetojajiterinishiatsi.

Cotanquitsiquea iriatimpajia icantajiavaqueri:

—Jmm. Avirosate quempetanquitsica.

⁵ Ipishoncamirijaquipanajantiri intati imentaquitsite oraniqui intsompoguiqui teem-poroqui, isotoapanajanti. Yoanaque itsatotsita.

⁶ Iriraquea saserorotejia anaantajianquitsica icapioeamirijaquitajiri, icanquequea:

—Icantimentantajitrotari anconoavoncaquitavajerigueti yamajiaqueca itsipapae yojocajitirica Aapani Irioshi, iriotaquetari ivegaratsitantacarica irimetojaquenijite.

⁷ Iroompaquea iquemavacaajiaca irivegaratantajiajemparoquea quepatsi pajitatsica Iguepatsite Peacaaguetaroca Chomopae cameetsanijite onchoocaquenijite inquitatan-tajitapinitemparica quenaquenaitapojanquitsineca osamanipaequi.

⁸ Irootaquequea opariantanacaca oratica quepatsi opajitanacaca Irajantsiguite areje-vaecaquea imaica.

⁹ Oquejetacagueti imaica, onetsanamajatanaca icanqueca coramani tsavetantatsica Jeremiashini, icanque: “Iriraquea ishiraerijia iquemavacaajiaca irojocajiaqueneri aa-caanquerineca 30 peratamentaqui, ariquea yaajiaqueri iriratica imentaquipae

¹⁰ ivegaratantajiacaroca quepatsi pajitatsica Iguepatsite Peacaaguetaroca Chomopae, irootaquequetari icanquenaca Nomajirote.”

Pirato icoacoqueriquea Jesoshi (Mr. 15.2-5; Irc. 23.3-5; Jn. 18.33-38)

¹¹ Iriraquea Jesoshi icatiimotapojacari quejemajirovetatsica, icoacotavaqueri:

—¿Arimajaca aviguenti Imajirote jorio?

Icanque Jesoshi:

—Tampatica poaquero.

¹² Oraquea itsojeventajiacarigueti saserorotejia anaantajianquitsica aisa jivajiguir-ica joriojia, teequea incanteji Jesoshi.

¹³ Icanqueriquea Pirato:

—¿Arimpate teequea pinquemavaqueroji icantacojiaquempica?

¹⁴ Cotanquitsiquea Jesoshi tee incantimateji, jero yamenantanacaca quejemajirove-tatsica intati.

Icanque irimetojajiqueri Jesoshi (Mr. 15.6-20; Irc. 23.13-25; Jn. 18.38-19.16)

¹⁵ Icantacoguitani aapojajagueti Paashicoa, iriraquea quejemajirovetatsica yoguipaquijajiri aparo isantanatacotimentajiquerica ipeacaaguishetacaca, quericaca inintajiaqueca igonorojia iroguipaquijaje.

¹⁶ Ariquea ichooaque oraniqui aparo santanatacotanquitsica pajitatsica Varavashi, itsitacaguitejacovaetanaca oraniqui iquemacojitiri.

¹⁷ Iroompaquea yamenajiaquerigueti Pirato yomporoguijaventavaetapojacari, icanqueriquea:

—¿Querica pinintajiaqueca noguipaquijajempiri? ¿Irioca Varavashi, irioca Jesoshi icantajitica Quirishito?

¹⁸ Itsaquerotari iriatimpa iroguenti icatsimatacojiqueriquea yamenajiaquerigueti iriguenti yomporoguijaventajica, irootaquequea yamantajiacarica iriatimpaqui.

¹⁹ Choocatiraja isaviquiquea Pirato ontaniqui icantomajantapiniquegueti, otigaranquitsitari imanquigare camanquiterineca:

—Aatoja querocaca picotirini iriratica teeca impeacaimatempaji. Natsipevaeca noguimaacotacarigueti incajaranqui.

²⁰ Cotanquitsiquea iriraquea saserorotejia anaantajianquitsica aisa jivajiguirica joriolja itsatacajiaqueriquea maasano, incanqueri:

—Irioquea poguipaquijaje Varavashi, iriraquea Jesoshi pimetojacaanterioritsijate.

²¹ Icanquequea quejemajirovetatsica:

—¿Quericate pinintamajiaqueca noguipaquijajeca? ¿Irioca Varavashi, iriojaja Jesoshi?

Icajemitsijianacaquea:

—¡Varavashi!

²² Icanqueriquea Pirato:

—Iroosacanica, ¿querocampate noncoquerini iricatica Jesoshi icantajitica Quirishito?

Icajemitsijianacaquea aisa maasano:

—¡Pompajacoteri!

²³ Icanqueriquea Pirato:

—¿Taampate ipeacaaca?

Icajemamajianaji:

—¡Pompajacoterishine!

²⁴ Iroompaquea yamenavaquerogueti Pirato icantacoguitani icajemaguitini, quero-campate incojiavajerini, ariquea icajemacaanque oja iquivavacotimojiacari maasano, icanquequea:

—Irimetojajiaquerigueti imaica, teequea naatimpa quejetatsineca. Aviguentijia quejejianquitsi.

²⁵ Maasanopae icajemajianaquequea:

—Aritaque nonquejetempata, naatimpajia quejejianquitsineca aisa nirijanijiate, naatimpajiaquea metojacaantajiaquerineca.

²⁶ Ariquea iquemajiaquerigueti Pirato yoguipaquijajajiniri Varavashi. Ariquea ican-tacaantsitariquea Jesoshi impasajitaqueri, irajaitanaqueri irompajacojiqueri.

²⁷ Iriraquea igoaretajiate quejemajirovetatsica yaajianaqueri Jesoshi intsompoguiqui imapipancotequi, icantajitiro “Peretorio”, ariquea icajemacaantajiaqueriquea maasano irapicoaretajiate, yomporoguijaventajiacariquea.

²⁸ Iroompaquea isapoquitsijigari iitsaare, iquitsaatantajiacari otsipa quitsaarentsi quityoncamorenari.

29 Yaajiaquequea tseitseiario, ipeacajaiacanari iramatsaero, yamatsaetsitari. Aisa yajiricacaajiaqueri savoroquiji itincamijempequiqui,* iroompaquea igueroventajianacari ishiroshirontimentajianacariquea, icanqueri:

—¡Iricashia Imajirote jorio!

30 Iquishoquishoavaequeri, yaapitsatsijajari savoroquiji itavatavaatsitantari iguitoqui.

31 Iroompaquea iteroncajajianaquerogueti ishiroshirontimentavaecarigueti, isapocarejajiri quityoncamorenari, irooquee iquitsaatantajari iitsaare, yaajianaqueri irompajacojiaqueri.

Yompajacojiaquerigueti Jesoshi

(Mr. 15.21-32; Irc. 23.26-43; Jn. 19.17-27)

32 Oraquea yoayoaitanaquegueti irompajacojiaqueri, itonquivojajivacari aparo Shirenequitica pajitatsica Shimo. Iriiraquea coaretajia icantajiavaqueri irinatashitanaqueriquea Jesoshi igoroshite.

33 Ariquee yarejerejeitacaquea Gorogotaniqui, (ocanquequea, “Ochoocatigueti Shocoitontsi”).

34 Yojocajavetacanari vinoja iconoajatantajicaro ishincanajato, yatsirecajavequitario intati, teequea irimiremparaji.

35 Iroompaquea iteroncajiaquerogueaquea yompajacojiaquerigueti, iriraquea coaretajia ipegavijijiaca intsajiaquenijite quericaca ashinquemparoneca iquitsaaguevecaca.†

36 Ariquee isavisaviiique oraniqui yamenajiaqueriquea.

37 Ojenoquipojaquegueti ishinquireguishipojacagueti ipatacajitaqueroquea ogota itioncajiquero ocanque: “Iriguenti Jesoshi, Imajirote jorio.”

38 Aisa itsipatacaantajicariquea mavite aitsitantatsica yompajacojitaqueri, aparo yogatiacojiqueri itincamijempequiqui, iriraquea itsipa iroguenti yogatiacojiqueri ishinampijempequiqui.

39 Iriiraquea avisavisaitanquitsica oraniqui injashinatacari icantajianaque chaguito chaguito,

40 icantajiaqueriquea:

—Arimpate picanque: ‘Nosoveaqueroquea iteemporote Aapani Irioshi, ariquee nompeacaitajemparo, nontsitacajero 3 savincaguiteri.’ Imaicaquea iintsija pompetanaquemparate. Arimajaguete aviguenti Irijanite Aapani Irioshi, pintsopajacotanajempaja paguijitapojaje.

41 Ariquee iquempejiaca saserorotejia anaantajianquitsica itsipatsipaicari tsatacaantajiguiroca itioncacotanaqueca Moishishini aisa jivajiguirica joriojia, ishiroshirontimentavaetacari icantavacaajiaca:

42 —Arimpate yompeguetacari itsipapae, cotanquitsi teequea iragavejempaji irompetacotanaquempara iriatimpa. Iriovetaca Amajirojiate ishiraerijia, iintsija intsopajacotanajempaja coroshiqui iraguijipojaje, antsatantaquemparica ariquee antsaromentajianaquempari.

43 Yaventaquitarinitarite Aapani Irioshi, iintsijate irompetemparija imaica arimajaguete ipintsacari, icanquetarite: ‘Naroguenti Irijanite Aapani Irioshi.’

* 27:29 Yajiricacaajiaqueriguete *savoroquiji itincamijempequiqui*, manaquea iquejetacaavetari majirontatsica yajiriquireguete imajirontamento. Icanquero quimajareri *cetre*. † 27:35 *iquitsaaguevecaca*. Irooca ican-tacotaque isavoguinaro, igaviguitire, ichompimashite, aisa yogataacaca, ocarataque 4. Chooa aparopae paperi iguenquetsatsarequi guiriegopae, yogavijiquero ocaniqui, ocanque: *onetsanamentanaquempaniji icanqueca tsavetantatsica icanqueguete: Yaagarantajiaquero noitsaare, ipegavijijiaca intsajiaquenijite quericaca ashinquemparoneca* (Sar. 22.18).

⁴⁴ Iquejequejeitanaca aisa itsipatacaantajicarica yompajacojitaquerigueti, icantacantaguishevaetaqueri.

Imetojanaquegueti Jesoshi

(Mr. 15.33-41; Irc. 23.44-49; Jn. 19.28-30)

⁴⁵ Iroompaquea itampaticavepojaca catsirincaiteri, ocantanaque pitsec maasano quepatsi, arejetacovaeca ijaguitetanajigueti.

⁴⁶ Ariqueate icotanaca iririjencavaetanaque Jesoshi, icanque: “Elí, Elí, ¿lama sabactani?” (Oncanquequea: “Aapani Irioshi, Aapani Irioshi, ¿queroquea ocoani pojocantanaquenaca?”)‡

⁴⁷ Iconoajiaca choocajianquitsica oraniqui irooquea iquemajiavaquerigueti icantajianaque:

—Icajemaqueri tsavetantatsica Iriashini.

⁴⁸ Ishiitsitanaca aparo, yaanaquequea atsimijicajatiroca oja, iticajatsitaro vinoja cacheronertoquijajaro, yoguitinajacotsivetanari savoroquijiqui irantsimijicajatavaquerome.

⁴⁹ Cotanquitsiquea itsipajia icanqueriquea:

—Iintsijate amenajivaqueritaja incoraquetashipojeri Iriashini iroguisoancajeri.

⁵⁰ Ariquea icajemanaji aisa Jesoshi iririjencavaetanaque, ariquea yoguipaquijapanajantiro ishire metoc.

⁵¹ Irooquea imetojanaquitigui, ariqueate ocotanaca operejanaque omorena ticaamorenatanquitsica teemoroqui jocagatsica aatonijite iquijajitirotsi intsompoguiremajacaqui. Opecotarejanaque tampaticaquea niganquisano ocantanaque sarararararara, oquenapojiquea jenoqui arejevaetacaquea isavi. Omoguequitanaquea quepatsi moguec moguec moguec, otsecaguetanaquequea mapitsentseina.

⁵² Ariquea ocoguetanaquea omoroguetanaca iquitajigueterigueti metojaripae, itancoretancoreitanaque icaramirincavaeque igomajamajarejia Aapani Irioshi metojajivetanquitsica.

⁵³ Ariquea isotosotoitanajaro omoropae, iroompaquea ipochatanajigueti Jesoshi, yoayoaitanaque iriatimpajia Jerosarequi, oratica guinteninintsi yashincaca Aapani Irioshi, yamenajivajiri icaramirincavaeque choocajianquitsica oraniqui.

⁵⁴ Iriaquea imajirojiate coaretajia aisa itsipatsipaitashijiacaca yamenajivajirigueti Jesoshi, yamenajivaquerogueti omoguecaguetanaquegueti, aisa otsipapae cantashitagiuetanquitsica, itsarotsaroitsitanacaquea, icantajiaque:

—Arimajaca iriguenti Irijanite Aapani Irioshi.

⁵⁵ Ariquea ochoocajiaque oraniqui omporoguijaca manquigarentsijia oguijaguijaiquerica Jesoshi iquenapojigueti Garireaquei amitacojiaqueriniji. Iroatimpajia manaquea ochoocajiaque tijaicoñajisano ontaniqui amenamenaiqueri.

⁵⁶ Ariquea ochoocajiaque aisa oraniqui Maria Magararaquitica, oraquea otsipa Maria iriniro Santiago aisa Jose, oraquea aisa iriniro irijanijiate Severeo.

Yojoquijitantajitari Jesoshi imperitamoroqui

(Mr. 15.42-47; Irc. 23.50-56; Jn. 19.38-42)

⁵⁷ Iroompaquea ijaguitemajatanajigueti, icoraquepoji aparo ajaarantatsica pajitatsica Jose quenampojaroca Arimatea. Ari iquejeca iriatimpa ipeanaca itsatacaane Jesoshi.

⁵⁸ Iriatimpa yoashitanaqueriquea Pirato, icanqueriquea ininque irajaitanajero itsino Jesoshi. Iriaquea Pirato icantacaantsitari irojocajitajeneri.

‡ 27:46 *Elí*. Iroguenti iguenquetsatsare evereo. Iquemaquero oquejevetacaró ivajiro Iriashi iguenquetsatsarequi, icanqueritari *Elías*. Icanquegueti *¿lama sabactani?*, iroguenti iguenquetsatsare arameo.

⁵⁹ Ariquea yaanajiro Jose itsino Jesoshi, yampiguiricacotantanacari iniromorena shipetari teeca oncantaiteteji ipeacaajitaca irino.

⁶⁰ Iroompaquea yaanajiri yojoquijitajiri imperitamoroqui iroaqueramorotica iqueecacaanontacaca mapichonquiinaqui irojoquijitantajitajemparica iriatimpa irimetojaquegueti. Ariquea itigaritashitantacari inirotsentseina mapi, iticaacotan-tapanajantari, yoanaji.

⁶¹ Ariquea ochoocajiaque oraniqui Maria Magararaquitica aisa otsipa Maria osav-isaviique oraniqui itampaticatacotaquegueti yojoquijitajirigueti.

Coaretajia quempoguijajivetacaroca yojoquijitantajivecarica Jesoshi

⁶² Iroompaquea osavincaguitetanaquegueti imagorejantajitaca, § iriraquea sasero-rotejia anaantajanquitsica aisa pariseojia yoayoaitanaquequea iramenajiajateri Pirato.

⁶³ Icantajiapojiri:

—Nomajirote, noquenquejajiajiroquea icanqueca irintatica amatavijantatsica anijatirajagueti, icanquequea: ‘Apojajempagueti 3 savincaguiteri nompochatanajequea.’

⁶⁴ Irootaquequea noncantantaquempica, iintsija pintigaranquequea coaretajia inquempoguijamajiaqueri yojoquijitantajicarica avisanaquegueti 3 savincaguiteri, aatonijite icoraquetashijiguiritsi itsatacaanejia iraaiajateri, iroompa incantajiguero maasano jac pochatanaji. Ariguetequea inquempojiaquempagueti imaica ocatita tsojetsi caaviji anaavaequero otsipa yamatavijantaquegueti.

⁶⁵ Iriraquea Pirato icanqueri:

—Iroosacanica iintsijate, jeri irirajia coaretajia, poapoaitanaquequea pinquempoguijamajiaquerija aviatimpajia querocaca pincojiaqueroni yojoquijitantajicarica.

⁶⁶ Iriatimpajia yoayoaitanaque yojoquijitajitajigueteri Jesoshi, iseyotsitaro mapi yashatirijacotantajicarica, ariquea icantajiaqueri coaretajia inquempoguijamajaque-roja aatonijite quericaca coraquetashitimatiritsi.

28

Ipochatanajigueteri Jesoshi

(Mr. 16.1-8; Irc. 24.1-12; Jn. 20.1-10)

¹ Ariquea anaanacagueteri imagorejantajitaca,* osavincaguitetamanaji pariajojajarooca semana, oraquea Maria Magararaquitica aisa otsipa Maria oahoaitanaquequea amenajiajatero yojoquijitantajitacarica.

² Oraquea tequeratagueteri arejerejeitempaji, omoguecanaquequea quepatsi moguec moguec moguec, icoraquepoji irashivantite Amajirote iquenapojiquea inquitequi. Itigaritapojiro mapi iticaacotantajivetacarica Jesoshi, isavicapojiro.

³ Itsirencavaequequea icanca quempevaecaquea careti. Oratica iitsaare quitamaro-majatatiguinimaja quempetacaqueate oquitamarotigueteri sharaca.

⁴ Irirajia coaretajia irooquea yamenajiavaquerigueteri ariquea icohicoitanaca itsaroomajajianaque yompioncajianaca pion, pion, pion, itejatejaitanaquequea ijatacojiaquiti.

⁵ Iroompaquea arejerejeivetapojaca manquigarentsi, icantajiguero irashivantite Aapani Irioshi:

—Aatotarite pitsaroajiguetsi. Notsaquequea irigueteri pamenaguetaje Jesoshi yompajacojivecaca.

§ 27:62 *imagorejantajitaca*. Irirajia joriojia imagorejantaro savincaguiteri saavaro. * 28:1 *imagorejantajitaca*. Irirajia joriojia imagorejantaro savincaguiteri saavaro, irootaque oteroncampaajia semana. Otsipa semana oparianaja tomincoqui.

⁶ Cotanquitsiquea teequa inchoocatajeji acaniqui, pochatanaji, aritarite icanque iriatimpa tequeratagueti irimetojeji. Intsijate caacatejate pameneroja yojoquijivecarigueti.

⁷ Pishintsijianajeja pincamantapojerija itsatacaanejia pincantajigue: ‘Jac pochatanajishiatsi. Imaica iroanaquequea Garireaqi, iriquetiquea oananquitsine. Pamenajiapojajeri ontaniqui.’ Irootaque nocamantaquempica.

⁸ Irooquea oquemajivaquerigueti otsarojianaquequea, cotanquitsiquea oshinejianaca aisa. Ocampanajantatigui tapoc oshintsijianaji oncamantapojajeri itsatacaanejia.

⁹ Iroompaquea itonquivojajivacarero Jesoshi quenavoquirontsiqui icantajivaquero: —¿Choocampi?

Oquempejiquempejiitanacari ajiricaguititsitari otsaromentanacari.

¹⁰ Icantajiaqueroquea Jesoshi:

—Aatoquea pitsaroguitsi. Poapoitanaquequea pincamanqueri iguentijegui[†] iroaroaitanaque Garireaqi. Ontaniquiquea ari iramenajiapojajena.

Itsavetantavecaca coaretajia

¹¹ Irooquea oahoaitanaquegueti manquigarentsijia, iconoagarantajia coaretajia quempoguijajivetacarica Jesoshi manaquea yoayoaitanaquequea Jerosarequi, icamantajiapojiri saserrotejia anaantajianquitsica maasanopae.

¹² Iriatimpajia icapioacajia itsipatsipaitacari jivajiguirica joriojia, iquemavacaajia, yojocajiaqueneri coaretajia caraquisequi imentaqui,

¹³ icantajivaquero:

—Aviatimpajia iroguenti pincanque: ‘Oraquea opitsecanaquegueti naatimpajia no-maajianaque, iroompaquea icoraquetashijiaquero itsatacaanejia yaajipapanajantiri.’

¹⁴ Arigueti inquemegueti quejemajirovetatsica noshinetacaajiaquempari aatonijite querocaca icotimajiguimpitsi.

¹⁵ Iiraquea coaretajia yaajianaqueriquea imentaqui, yoayoaitanaque inetsanajiaquero icanquerica. Ariquea iquemacojiaquero maasano joriojia itsavetantavecaca, otsitacaguitejacovaetanacari, ocantacoguitani arejevaetaca imaica.

Jesoshi icanqueri itsatacaanejia intsavetacojiaquero (Mr. 16.14-18; Irc. 24.36-49; Jn. 20.19-23)

¹⁶ Ariquea yoayoaitanaquequea Garireaqi itsatacaanejia carajianquitsica 11, yoayoaitanaque otsempiqui icanquerica Jesoshi.

¹⁷ Ariquea yamenajiapojirigueti, itsaromentajianacari, cotanquitsiquea iconoagaran-taquea iquenquejashirentajianaque: “Iriocaja.”

¹⁸ Cotanquitsiquea Jesoshi iquempejiquempejiipojiri, icanqueriquea:

—Icanquenaquea Aapani Irioshi paesatoniqui: ‘Imaicaquea aviatimpa aviguenti agavejaguetaqueroneca maasanopae inquitepaequitica aisa quepatsipaequitica.’

¹⁹ Irootaquequea imaica nocantantajiaquempica poapoitanaque pintsavetanti-mojianaquerija maasano caquinteguetatsica, pintsaromentacaajianaquemparijate cameetsanijite impejianaquempanijite notsatacaanejia. Ariquate piviñacajiaquero ivajiroqui Aapani aisa Irijanite aisa Ishire.

²⁰ Pintsatacaajiaquero inquemisantamajiaquero maasanopae nocanquempica irinetsanamajiaqueronijite. Noncoquempaniquea nontsipamajataquempi oavaetanaque savincaguiteriqui arejevaequemparoquea onteroncanajempagueti quepatsi.

[†] 28:10 Icanquegueti Jesoshi *iguentijegui^{pae}* iriguenti icantacoque itsatacaanejia. Pamenero otsapa 7, jero aisa Mt. 12.48-50.

QUENQUETSATSARENTSI OGANEJENCATATSICA ITIONCAQUECA MARICOSHI

Antsatantaquemparoca

Ocativa iroguenti antsatantaquemparoca itioncaqueca Maricoshi itioncacotaque-
rigueti Jesoquirishito. Maricoshi iriguenti jorio, irio ijitane Verenave (Cor. 4.10).
Iriniro opajita Maria. Iconoagarantajiaca tsaromentajiacarica Jesoshi icapiocapini-
jiaca otsovironaquitequi (Ya. 12.12). Maricoshi aisa ipajita Joanca. Itsipajiacari
Paavoro aisa Verenave iquenaguetanaquegueti quepatsipaequi (Ya. 12.25; 15.37-
39). Iquenquejajitaque itioncaquero ocativa ichoocaquegueti guinteninintsiqui paji-
tatsica Iroma. Maricoshi tee intsipatempariji Jesoshi. Iquenquejajitaque arica Shimo
Peerero itigarancane Jesoshi itsatacaqueri yantaguetaqueca Jesoshi. Tee intsajiteroji
ajagantsini itioncaquerogueti, cotanquitsi chooca quenquejanquitsica itioncaquero
tequeratagueti intioncajiteroji Mateo, Irocashi aisa Joanca, arica ajagantsini 57 irooca
otsipa ajagantsini arejevaetacaró 63.

Maricoshi iroguenti itioncaque antsatantamajaquemparica irira Jesoshi
iriguenti quejearica aajanirentsi amitacotantatsica yantaguetaquero inintaguetica
Irii tigarancaquerica. Iriovetaca jorio cotanquitsi itioncajiaqueneri tecca
irio joriojia intsatantajaquempaca irira Jesoshi irio agavejamajatatsica
yanaajiaqueri maasano agavejavetatsica, yantaguetaquetari ocaantantatsica intati,
yoguisotoaguequeri ampatsinipae, aisa ipeacotsijajari caquinte igovaeguisherejia.
Iparianacarogueti Maricoshi itioncacotaqueri Jesoshi iquenquevaritapojigueti Jesoshi,
yoviñacajataquerigueti Joanca Viñacajatantatsica.

Joanca Viñacajatantatsica itsavetantavaequequea oquitamampororoitapojaquegueti (Mt. 3.1-12; Irc. 3.1-9, 15-17; Jn. 1.19-28)

¹ Jero oparianaca Quenquetsatsarentsi Oganejencamajatatsica tsavetacotaquerica
Jesoquirishito Irijanite Aapani Irioshi.

² Iiraquea tsavetantatsica Isaiashini itioncacotaqueroquea paesatoniqui icanqueca
Aapani Irioshi iquenquetsatacaquerigueti Irijanite, icanqueriquea:

“Ari nontigarancaqueri iriquetica oananquitsineca, intsavetacotempi.

Irio camantajiaquerineca igonorojia querocagueti pinquenanaqueni irinet-
sanatashitantajiaquempaca.”[☆]

³ “Inquenquetsataquequea oquitamampororoitapojaquegueti iririjencani, incanque-
quea:

‘Pinetsanatashijiavaquempari Amajirote inquenantapojempaca,

pintanarejagueteneri iguenaquoquiropae ontampaticapoquitantanaquempaca.’”[☆]

⁴ Iroompaquea iriraquea Joanca Viñacajatantatsica yoanaquequea ontaniqui oquita-
mampororoitapojaquegueti iviñacajatantavaequequea, aisa itsavetantavaequequea
icanque: “Pincantashitajianajempa povashiantajianajero pipeacaaguishejiavecaca,
piviñacajajianaquempaquea aatonijite icatsimatimentajiguimproquea Aapani Irioshi
maasanopae pigovaeguisherejia, manaqueate irishetajempiroquea.”

⁵ Icaramirincatashivaetanaqueriquea Joreajiaquitica aisa Jerosarejiaquitica.
Irooquea iquemajiapojirigueti ariquea icohicoitanaca itsaveacojianaqueroquea
maasanopae igovaeguisherejia, ariquea iviñacajiaqueriquea Jororanequi.

☆ 1:2 Mara. 3.1. ☆ 1:3 Is. 40.3.

⁶ Iroguenti iquitsaatata Joanca quitsaarentsi ipeacaajitacaca imae cameyo, aisa ichompimashitacariquea imeshinatsa. Iriguentiquea ishecataca quejevetarica shapipiiquiti aisa earotoja.

⁷ Ariquea itsavetantajianaqueri icanqueriquea:

—Irooshipojiquea incoraquepojaque impoitapojenaneca. Iriatimpa caaviji yanaaqueaquea yagavejamajati. Aatotarite noquempetimataritsi iriatimpa nompeaquempame amiquerineca nosavincanaqueme noishorejacoquerime igaviguitire, caavijitari yanaamajaquena.

⁸ Naatimpa iroguenti nantaque noviñacajatantajiaquempiro oja, cotanquitsiquea iriatimpa inquempetacaantaquemparo iroviñacajatantajiaquempiri Ishire Aapani Irioshi.

Iviñacajajiqueriquea Jesoshi

(Mt. 3.13-17; Irc. 3.21-22)

⁹ Ariquea isotoantanacaroquea Jesoshi Nasare choocatatsica Garireaquei, icampojava ichoocaquegueti Joanca, ariquea iviñacajatavaqueri Jororanequi.

¹⁰ Ariquea yarejevetapojajaro Jesoshi otsapijapojacagueti, yameniroquea otanarejanacaquea inquire yampiguiricashipojacariquea Ishire Aapani Irioshi iquejetapojacari emoreni.

¹¹ Iroompaquea iquenquetsajencajitanaque jenoqui inquirequi, icanque:

—Aviguentiquea Irijani nopintsamajatacaca, noshineventamajataquempiquea aviatimpa.

Inintavecaquea ampatsini irantacaaquerime Jesoshi teeca irininteji Aapani Irioshi

(Mt. 4.1-11; Irc. 4.1-13)

¹² Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti.

¹³ Ariquea ichoocacaitiquea oraniqui 40 savincaguiteri iconoicari shecatantaguetatsica. Iriraquea Satanashi icoraquetashiqueriquea yasereseretaqueriquea yamenantavetacari inintavecaquea irantacaaquerime teeca irininteji Aapani Irioshi, cotanquitsiquea teetarite iragavejeriji. Iroompaquea irioquea coraquecoraqueitashipojajiri irashivantijitete Aapani Irioshi yamijiapojajiri.

Itsavetantavaetaquequea Jesoshi Garireaquei

(Mt. 4.12-17; Irc. 4.14-15)

¹⁴ Ariquea isantanatacojitaquerigueti Joanca, yoanaque Jesoshi Garireaquei itsavetantavaetaqueroquea Quenquetsatsarentsi Oganejencamajatatsica tsatacaacajica quero icocani Aapani Irioshi imajirontagueti.

¹⁵ Icanque:

—Imaicaquea aapojaca irinetsanatantaquemparoca Aapani Irioshi icantaqueca coramani, irooshipoji irimajirontapojempa. Povashiantajianajeroja covaeguisherentsi pincantashitajianajempa, aisa pinquemisantajigueroja Quenquetsatsarentsi Oganejencamajatatsica.

Jesoshi icajemajiaqueri 4 tarajatapiniatsica impeacaajiaquempari itsatacaanejia

(Mt. 4.18-22; Irc. 5.1-11)

¹⁶ Ariquea icantanacaquea Jesoshi oraniqui ishitaravijatanacaro otsapijaquei iniromotija Garirea jmm. Inejajiapojiriquea Shimo aisa iriguentijeguite pajitatsica Antirishi tarajajianatsiquea, irootaquequea isavicaventajiaquequea iriatimpajia.

¹⁷ Icantajiapojaquei Jesoshi:

—Jame poguijaguijaitanaquenajate, imaicaquea irioquea pimpitsocashijianaquempa caquinteja, nagavejacaajiaquempiquea pinquejetacaajiajempari shima panquitacojiguirigueti.

¹⁸ Ariquea iriatimpajia yojocapanajantiroquea imantsatsitepae yoguijaguijaitanaqueriquea.

¹⁹ Yoayoavetanacaquea tiijacoñaji ontaniqui irioqueate yamenapoji Santiago* aisa iriguentijeguite pajitatsica Joanca savisaviitaque quenajarontsiqui inetsanajiaqueroqueate imantsatsitepae. Itsipatsipaitacari iriri pajitatsica Severeo.

²⁰ Ariquea iriraquea Jesoshi icampojuiriquea Santiago aisa Joanca:

—Jaame poguijaguijaitanaquenaja.

Iriatimpajia yoguijaguijaitanaqueriquea Jesoshi, yojocanaqueriquea iriri quenajarontsiqui, itsipajajari amijiaquerica.

Caquinte ishaquiacaca ampatsini

(Irc. 4.31-37)

²¹ Ariquea yoayoaitanaque Caperenaوقي. Oraquea aapojacaguetei savincaguiteri imagorejantajitaca yoanaque Jesoshi shinagogaqui icapiocantajiacaca joriojia iparianacaroquea itsatacaantanaquequea.

²² Iquemajivaquerigueteiquea maasanopae yamenamenaitanaquequea intati, yamenajiaqueritari itsatacaajiaqueriguetei choocaquea iragavejane, teequea inquempejiguempariji tsatacaantajiguiroca itioncacotanaqueca Moishishini.

²³ Ariquea ichooaque oraniqui ishinagogatequi aparo shirampari ishaquiacaca ampatsini, ariquea iriatimpa icajemaque icanque:

²⁴ —¡Ariotaqueshiatsi, Jesoshi Nasarequitica! ¿Querocaquea pincojiaquenani? ¿Irooquea picoraquetashique pinteroncajiaquena? Notsaquempiquea aviguenti Iriomajaca irashi Irioshi.

²⁵ Icantanaquequea Jesoshi:

—¡Pisanticote! ¡Pisotoanajeri!

²⁶ Irooquea iquemaqueriguetei ampatsini ariquea icotanaqueri ishaquiacaca icantavaetanaquequea tinquinini, tinquinini tinquinini. Iroompaquea icajemapanajanti ampatsini ¡jeeeee! isotoanajiri.

²⁷ Maasanojia yamenamenaitanaquequea intati icoacotavacaajianaca:

—¿Taashia opaji ocatica? Ocantashitaticatarite itsatacaantapojica, choocaquea iragavejane. Icantiqueriguetei ampatsinipae, ari iquemisantajiaqueri.

²⁸ Iroompaquea maasanojia guinteniguinteniiitanquitsica Garireaquei iquemacojiaqueri Jesoshi.

Jesoshi yogueshitajiroquea ivaguirotemajaca Shimo Peerero

(Mt. 8.14-15; Irc. 4.38-39)

²⁹ Ariquea isotosotoitanajiguetei shinagogaqui, yoanaque Jesoshi itsovironaquitequi Shimo aisa Antirishi, itsipatsipaitanacari Santiago aisa Joanca.

³⁰ Oraquea ivaguirotemajaca Shimo ocatsirincavaetaquequea ojoquijica intsompoguiqui. Irooqueate yarejetapojacaguetei Jesoshi icamantajitavaqueriquea.

³¹ Iriatimpa iquempejipojaro yacatsavacopojiroquea yogatiitaro. Ariquea ocopanajantaquea opeanaja taampina. Ariquea ojococojiajiniriquea irishecajiaquempaca.

Jesoshi yogueshiguetajiri icarajiavaeque joquijianquitsica

(Mt. 8.16-17; Irc. 4.40-41)

³² Ariquea itsoguenancanajiguetei catsirincaiteri yamajiapojiniriquea Jesoshi maasano joquijianquitsica iriguentica aisa ishaquijiacaca ampatsini.

³³ Maasano guitenijianquitsica oraniqui icaramirincavaequequea sotomorontsiqui.

* **1:19 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaqueroguetei ivajiro ipajitiri **Santiago,** itsipa ipajitiri **Jacobo.** Mavite oponeaca iguenquetsatsarequi evereo, ipajitiri **Yaakob.**

³⁴ Iriraquea Jesoshi yogueshiguetajiriquea cantashitatiejencatashiguecarica joquijirentsipae, aisa yoguisotojaijainiri ishaquiajiacaca ampatsinipae. Iriraquea ampatsinijia itsajiavaqueriquea, jero Jesoshi icantantajiavacarica:

—Aatoja pitsavetacotantajiapojanatsijate.

Itsavetantavaetaquequea Jesoshi shinagogapaequi icapiocantajiacaca joriojia
(Irc. 4.42-44)

³⁵ Osavincaguitetanajiguetei ogantagatiraja opitsepitseiti, icatianaquea Jesoshi, yoanaque ontaniqui osamani, yamanaqueriqueate Iriri.

³⁶ Incajaranquitanaquitiguiquea yoanaque Shimo incoaguetajeriquea itsipatsipaitanacari itsipavijitaca.

³⁷ Ariquea yamenajiapojajiri icantajiapojiri:

—Maasanojia icoaguetajimpi.

³⁸ Cotanquitsiquea iriatimpa icanqueriquea:

—Jaame ontaniqui irooshiguetapojiguetei iguintenipaequi nontsatacajiaaqueri, irootaquequea nocoraquetashique.

³⁹ Yoanaquequea Jesoshi itsitacanaqueroquea maasanopae Garireaquei itsavetanaguetanaqueroquea shinagogapaequi icapiocantajiacaca joriojia, aisa yoguisotojaijainiri ishaquiajiacaca ampatsinipae.

Jesoshi yovejairi avejancari
(Mt. 8.1-4; Irc. 5.12-16)

⁴⁰ Ariquea icoraquepojiqquea aparó avejancari. Iguerovempojari icanqueriquea:

—Nomajirote, ariguetei pininque, pagavejaque piveajena navejancavejancaacaguetei.

⁴¹ Ipintsatacotanacariquea Jesoshi, icantajempequitana ipamitsitari, icanqueri:

—Jeeje, noninque. ¡Pimpeanajempaja!

⁴² Irooqueate icanquitiguiri jac peanaja yavejancavejancaavecaguetei, caramajatanaji.

⁴³ Ariquea itigarancajiriquea Jesoshi, cotanquitsiquea icantavajiri:

⁴⁴ —Aatoja picamantitsi. Iriguentiquea poimotanaque saserorote ponigaapojempariquea, paanajenerija viratsipae, pinetsanaqueroja icantaqueca Moishishini cameetsanijite iramenamajaquempinijite, ariquea incanquempi peanajimpi, intsajiaquempinijite maasano peamajatajimpi.

⁴⁵ Cotanquitsiquea iriatimpa yoanaquequea icamantajiaqueriquea maasano yogueshitajiriguetei Jesoshi. Irootari caarica yoantanta Jesoshi ontaniqui iguintenijiacaguetei caquinteja. Manaquea iquenaguetanaque osamanipaequi teeca iriguintenijiguempaji, cotanquitsiquea yoayoitashivaetanaqueri osamanipaequitica iramenajiaqueri.

2

Jesoshi yogatijiriguetei teeca ironquempaji
(Mt. 9.1-8; Irc. 5.17-26)

¹ Iroompaquea ocaraguitejavaetanaqueguetei yoanajiquea Jesoshi Caperenaoui. Maasanojia iquemacojiaqueriquea ariquea ichoocaque oraniqui tsovironaqui qui imaantapinitacaca.

² Irooquea iquemacojiaqueriguetei yoayoitanaque yomporoguijaventanacariqueate oraniqui intsimpoguiqui aisa sotsiqui. Querocampate incojiaquempani inqijiaquijaiqueguetei itsipapae, jocajajiavaecaquea icaramirincavaequequea igonorojia. Iriatimpa itsavetantajiaqueneri Quenquetsatsarentsimajaca.

³ Ariquea icoraquecoraqueiquequea 4 shiramparijia yamacojiapojiaqueri teeca ironquempaji.

⁴ Yarejejiavetapojaca iriguenti poncaquini icanca, querocampate incotacajaianaquemparini inquijacaantajianaquemparicate intsompoguiqui ichoocaquegueti Jesoshi. Yataitaitanaquequea jenoqui sotsiqui ocantamencotacagueti, imorotsitaroquea itampaticatacotaquegueti Jesoshi ivaritsantsajacojiaqueriquea.

⁵ Iriraqea Jesoshi yamenajivaquerigueti yaventajiapojacari irogueshitajeriniji, icanqueriquea teeca ironquempaji:

—Irijani, jac shetacotajimpi maasano pipeacaaguishevecaca.

⁶ Ariquea ichoocajiaque oraniqui tsatacaantajiguiroca itioncacotanaqueca Moishishini. Iriatimpajia iquenquejajianaque intati:

⁷ “¿Querocaquea icocani icanquegueti imaica? Manatari iquejemanatanacari Aapani Irioshi. ¿Arimpate choocampate itsipa agavejanquitsineca irishetsitantaqueroquea covaeguisherentsi? Aparotarite agavejatsi Aapani Irioshi.”

⁸ Cotanquitsiquea Jesoshi itsajivaqueriquea iquenquejajiaqueca, icantsijigari:

—¿Querocaquea picojianacani piquenquejajianaquequea piquejejaqueroquea imaica?

⁹ ¿Querocampate caavijica anaque mananquitsica? ¿Iroocajate noncantaquerigueti teeca ironquempaji: ‘Jac shetacotajimpi maasano pipeacaaguishevecaca’, iroocajate noncantaquitigueri: ‘Pincatianaje, paanajeroquea pinorijancaca, panijitanaje?’

¹⁰ Imaica namenacaajiaquempiroquea yagavejaque ocantiqui quepatsiqui irira Irijanite Caquinte* irishetacoitajeri ipeacaaguishevecaca caquinte.

Iroompaquea ipitsocashitanacari teeca ironquempaji icanqueri:

¹¹ —Iintsija noncanquempiquea pincatianaje, paanajero pinorijancaca, poanaje pitsovironaquitequi.

¹² Ariqueate icotanaca icatiapanajanta, yaanajiroquea inorijancaca isotoanaji yoanaji. Yamenajivajiriquea maasano, yamenamenaitanaquequea intati ishineventajiacariquea Aapani Irioshi, icantajigui:

—Teequea namenimajigueroji onquempequemparoquea ocativa.

Jesoshi icanqueri Irevi iroguijatanaquerija

(Mt. 9.9-13; Irc. 5.27-32)

¹³ Ariquea yoanaji aisa Jesoshi otsapijapojagueti iniromotija. Irooquea yomporoguijaventajianacariquea icaramirincavaetanaquequea caquinteja, itsatacaajiaqueriquea.

¹⁴ Iroompaquea yoanaji yamenapojiri irijanite Arejeo pajitatsica Irevi† savicaquequea ontaniqui ipashicatsarajitirogueti, yoguijajivaqueri avisavisaitatsica ivegaratacaajivaqueri imentaquitsite maasanopae aajiananquitsica irajaararopae irooca taaca opajitapae, iriguentitarite capiocapinitinirica majirontatsica imentaquipae. Iroompaquea iriraquea Jesoshi icampojiri:

—Jameja, poguijatanaquena.

Iriatimpa icatiitsitapanajanta yoanaque yoguijatanaqueri.

¹⁵ Ariquea Jesoshi yoanaque itsovironaquitequi ishecatacaqueate, itsipatsipaitacariquea itsatacaaneja, jerijia itsipapae oshequini capiocapinijiguirica majirontatsica imentaquipae, jeri aisa itsipapae covaeguishesatsica. Icaramirincavaequetari icanca oguijaguijaitanaquerica.

¹⁶ Iriraqea pariseojia aisa tsatacaantajiguiroca itioncacotanaqueca Moishishini yamenajivaquerigueti Jesoshi ishecajiacagueti itsipajiacari covaeguishesjatsica aisa capiocapinijiguirica majirontatsica imentaquipae, icanqueriquea itsatacaaneja:

* **2:10** Icanquegueti Jesoshi *Irijanite Caquinte* mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojatsica jenoqui inquitequi, icaquintetapojaquetari ivoapojaque.

† **2:14** Iriatica Irevi ipajita aisa Mateo (pamenero Mt. 9.9; Irc. 5.27).

—¿Quero icocani irira tsatacaajiguimpica ishecatacojiacari capiocapinijiguinirica majirontatsica imentaquipae, jeri aisa itsipapae covaeguishejiatsica?

¹⁷ Oraquea iquemaquegueti Jesoshi icantajiguri:

—Irraquea teeca irashinoncajempaji teetarite incoguitejacotempariji aavintantatsica. Iriguenti coguitejacojigari ashinoncajajiatsica. Ariqueate noquejetaca naatimpa teequea irioquea noncoraquetashiteji teeca incovaeguishejiguempaji noncajemajiaqueri, iriguenti nocoraquetashijiaque covaeguishejiatsica.

Icoacojitaqueriquea Jesoshi irisanticotantajitemparoca isheca
(Mt. 9.14-17; Irc. 5.33-39)

¹⁸ Ariquea iriraquea itsatacaanejia Joanca aisa irashijia pariseojia yoguipaquijajiaqueroquea isheca teetaquea irishecatsitajempaquee. Iroompaquee iconoagarantaca yoayoaitanaque icantajapojaqueri Jesoshi:

—Irraquea itsatacaanejia Joanca aisa irashijia pariseojia yoguipaquijapinijiaque-roquea isheca, cotanquitsiquea pashijia pitsatacaguica teequea inquejijiguempariji iriatimpajia. ¿Querocaquea icojiacani?

¹⁹ Iroompaquee iquejetacaanca Jesoshi icanque:

—Pinquenquejeroja inchoocategueti iriaqueraca manquigatanquitsineca incajemajiaqueriquea itsipavijijiaca irishecatacaajiaquempariquea, ¿arimpate aatompate ishecajiatsti? Irishecajiaquempaquee, itsipatsipaitacaritarite cajemajiaquerica shinejiacaquee.

²⁰ Cotanquitsiquea oraquea aapojajempagueti incatsimatantajitaquemparica irajaitanaqueri osamani, ariquea iroguenti irisanticotantajitemparoca isheca, irishimampojancacojianaquempari.

²¹ “Aatoquea ocameetsati oncotatemparogueti quitsaarentsiqui iroquetishitequitica incotatantajivetaquemparo iroaqueramorenatica quitsaarentsi. Irajaquitsijivetemparoquee ariqueate oncotanaquempani ontsiñotsiñomorenatanaquequee arimpaquee omperejanaqueroquee.

²² Aisa ari onquempetaquemparoquea iroguijaatantajitaquemparogueti vinoja iroaquerajatica oncachotapoje iroguijaatantajivetaquemparogueti imeshinanaquiqui iriquetinica oroameshinatananquitsica. Oncachojamajavetanaquempagueti oshimoajavetanaquempa, ariquea oncotanaquempa aravoavetaquitempa imeshina, intyaquisanaque oshacojaatanaquempaquee vinoja, aisa impomatsataquempaquee imeshina imperejanaque. Jero caaviji ocameetsavaeque impijaatantajitaquemparoquea iriaquerameshinari cameetsanijite aatonijite opomatsajata vinoja, aisa aatonijite ipomatsatatsi imeshina.”‡

Itsatacaanejia Jesoshi ishireguipanajanti tirigoitsoqui savincaguiteri qui imagorejantajitaca

(Mt. 12.1-8; Irc. 6.1-5)

²³ Iroompaquee aapojajagueti savincaguiteri imagorejantajitaca yoanaque Jesoshi icantanaca tirigomashiqui itsipatsipaitanacari itsatacaanejia. Iriatimpajia ishireguipanajanti tirigoitsoqui.

²⁴ Icanqueriquea pariseojia:

—Pamenajiguerija. ¿Quero ocotacani yaajianaquequee tirigoitsoqui imaica savincaguiteri imagorejantajitaca? Icantimentantajititrotarite irantantajitemparo.

²⁵ Yacanaqueriquea:

—¿Arimpate teequea pampatsajavantacojigueroji aviatimpajia itioncacojitaquerigueti Taavini coramani ocanquegueti itaseanaque iriatimpa aisa itsipajianacaca, teequea onchoocatimajaniquejiteji taampaquee irishecajiaquempacaca?

‡ 2:22 Itsatacaantica Jesoshi iroguenti quejetacaroca quitsaarentsi iroaqueraro, oquejetacaroc aisa vinoja iroaquerajatica. Aato agaveji otsipataro itsatacaantica pariseojia aisa tsatacaantajiguiroca itioncacotanaqueca Moishishini.

²⁶ Iquijitsitanaca itsovironaquitequi Aapani Irioshi § ichoocatigueti saserorote anaan-tamajatanquitsica Aviatate ishecatacaroquee pan icantimentantajitica irishecajitem-parogueti, manaquee yojoquijitaquero oraniqui shitaponcarontsiqui cameetsanijite iramenaqueronijite Aapani Irioshi. Iriguentiquea shecaciaquemparoneca saserorote-jia, iriotaquequee cantanquitsica Aapani Irioshi. Cotanquitsiquea iriraquee Taavini ishecatsitaroquee, aisa yojocajiaqueneriquea itsipatsipaitacaca.

²⁷ Aisa icanque Jesoshi:

—Oraquee savincaguiteri imagorejantajitaca manaquee ipeacamentajicanari caquinte, iriraquee caquinte teequee impeacamentajitenemparo iroatimpa.

²⁸ Iriraquee Irijanite Caquinte iriguentiquea cantanquitsica queroca icantimentan-tajitica irantantajitemparogueti savincaguiteri imagorejantajitaca, aisa querocaquee teeca incantimentantajiteroji.

3

Jesoshi yogueshitajiri chompevacovetatsica (Mt. 12.9-14; Irc. 6.6-11)

¹ Ariquee yoanaji aisa Jesoshi shinagogaqui icapiocantajiacaca joriojia, iquijapoji intsompoguiqui. Ariquee ichoocaque oraniqui chompevacotanquitsica.

² Ariquee irirajia omporoguijajianquitsica yamenamajajiaqueriquea Jesoshi irame-najiaquequee arica irogueshitajeri savincaguiteriqui imagorejantajitaca cameetsani-jite intsaveacotantajiaquerinijite incatsimatacaantajiaquerinijite.

³ Cotanquitsiquea Jesoshi yamenapojaqueriquea chompevacotanquitsica icanqueri:
—Intsija pincatigueja iramenajiaquempinijite maasanopae.

⁴ Ariquee icanqueriquea maasanopae:

—Imaica iintsija pincantajiguenajate querocaquee icanque Moishishini coramaniqui. ¿Taaquee irantantajitemparoca savincaguiteriqui imagorejantajitaca? ¿Ariquee icanque impeacaantajitemparo cameetsa, irooca irantantajitemparo covaeguiserentsi? ¿Ariquee icanque aavajeri agonoro aatoniji imetoji, irooca icanque ametojaqueri?

Cotanquitsiquea iriatimpajia teequee querocaca incanteji, iquemisantajianaque-quee maasanojia.

⁵ Iriraquee Jesoshi yamenamenaiquerigueti maasano icatsimatsitanacaquee, aisa ishimampojanacocojianacariquee, yamenajiaquerigueti mana iquishoshirentanaque-quee. Iroompaquee ipitsocashitariquee chompevacotanquitsica icanqueri:

—Pincantavacotempaja.

Irooquea icantavacovetanaquitiga ariquee ocotanaca iraco jac peamajatanaja.

⁶ Iroompaquee isotosotoitanaji pariseojia yoayoaitanaji iramenajiaquiteri shin-eventajigacarica Erorishi.* Irooquea yamenajiaquerigueti icapiocajiaca isari-imanatanacari Jesoshi irimetojacaantajiaqueriquea.

Yomporoguijaventajiacariquee Jesoshi otsapijapojacagueti iniromotija

§ 2:26 Acaniqui ocanquegueti **itsovironaquite Aapani Irioshi** iroguenti ocantacoque quitsaarentsivanco it-saroyentantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco ican-tajitica **teempero** intsaroyentantajiaquemparica. Iroatimpa aisa icanajitiro **itsovironaquite Aapani Irioshi**.

* 3:6 Irija pariseojia irio joriojia, teetari irinintajigueti irimajironquempari Sesa, iriguentitari Iromaquitica. Ari iquejetaca **Erorishi**, teequee irio jorio. Cotanquitsiquea iriraquee Iromaquitica iquijaguetanaque iguin-teniqui joriojia yomperaperavaejiacari. Irioquea cantanquitsi irimajironquempari Erorishi joriojiaqui, iriotarite inquemisantamajataque Sesa. Icanquequee Sesa maasanojia joriojia irojocagarantapinijiaqueneri imentaquipae. Tee iroshequiamajateji joriojia shinevencarica Erorishi.

⁷ Irireaquea Jesoshi yoanaque otsapijapojacagueti iniromotijaqui itsipatsipaitanacari itsatacaanejia. Itiorencaventajianacari aisa icaramirincavaequequea Garireaqueutica aisa Joreaqueutica.

⁸ Iquemacojiaqueriquea yonigaantaguequeroqueate oacaantantatsica intati icoraquecoraqueiquequea iramenajiaquiteri, iquenaquenagarantajiaipoji Jerosarequi aisa Iromeaqui. Itsipapae iquenajiapojiquea intatiqueroqui Jororanequi. Itsipapae quenaquenaitapojatsica Tiroqui aisa Shironequi.

⁹ Irireaquea Jesoshi irooquee yamenavaquegueti yomporoguijaventajiaipojacari icantajiaqueri itsatacaanejia irajaiajateneriquea quenajarontsi iroajiaqueneriquea quempeji otsapijapojacagueti intehinteitantajianaquempaca aatonijite itsinacajiguiritsi omporoguijaventajiacarica.

¹⁰ Yomporoguijaventajiaipojacari icaramirincavaeque joquijianquitsica itaviava-caajianacaquea icanca inintajiaque inquempejiquempejiiquempariquea impamijiapojiaquerinijite, yamenajiaquequea yogueshiguetajiriquea icaramirincavaeque itsipapae.

¹¹ Iroompaquea irirajiaquea ampatsinipae yamenajiaquerigueti Jesoshi yogueroventsitanacariquea icajemajianaque icanque:

—¡Aviatimpa aviguenti Irijanite Irioshi!

¹² Cotanquitsiquea Jesoshi icantimentajiaqueriquea aatonijite itsavetacojiguiritsi.

Jesoshi yaajiaqueriquea 12 impeacaajiaquempaca itigarancanejia

(Mt. 10.1-4; Irc. 6.12-16)

¹³ Iroompaquea Jesoshi yoanaquequea otsempiqui icajemajiaqueriquea inintacajiaqueca. Oraquea yoayoaitanaquegueti iriatimpaqui

¹⁴ yaaquequea 12 intsipatsipaiquempaca, aisa intigarancajiaqueca intsavetantavaetaquequea irootaquequea ipajitantajiacarica itigarancanejia.

¹⁵ Ariquee yagavejacaajiaqueriquea iroguisotojajiaeneri ishaquiajiacaca ampatsinipae.

¹⁶ Maasanoquee yaajiaqueca manaquea ipajijiaca: Shimo (ipajitajica Peerero);

¹⁷ Santiago† irijanite Severo, aisa Joanca iriguentijeguite Santiago (ipajijiajiri mavite Voaneregueshi, oncanquequea “quempejiaca careti”);

¹⁸ Antirishi, Jeripe, Varitorome, Mateo, Tomashi, Santiago‡ (irijanite Arejeo); Tareo,§ Shimo (icantajitica “Serote”),* aisa

¹⁹ Jorashi Ishicariote, aacaanquerineca Jesoshi.

Icantajiaqueriquea Jesoshi iriguenti shaquiacari ampatsini

(Mt. 12.22-32; Irc. 11.14-23; 12.10)

²⁰ Ariquee yoanajigueti Jesoshi tsovironaqui, yomporoguijaventajianacari icaramirincavaequequea caquinteja, querochampate incojiaquempani irishecajiaquempa iriatimpa aisa itsatacaanejia.

²¹ Chooa cantajianquitsica: “Jac itsavigavaetanaque.” Iquemacojiaquerigueti ijitanejia icoraquejiaquequea irajaiajaterime.

²² Icoraquejiaquequea aisa tsatacaantajiguiroca itioncacotanaqueca Moishishini, iquenajiaipojaque Jerosarequi iramenajiaqueriquea Jesoshi. Iriatimpajia icanquequea:

† **3:17** Irirea **Santiago** ipajita aisa Jacovo. ‡ **3:18 Santiago**. Chooa mavite Santiago, pajitatsica Jacovo. § **3:18 Tareo**. Irirea icantajitica aisa Jorashi irijanite Santiago. Pamenero Irc. 6.16 aisa Ya. 1.13. * **3:18 Serote** ocanque “nintamajatsica”. Irooquee icantajitiri irirajia joriojia nintamajatanquitsica iroguisotoajigueri Iromaquitica omperaperaacarica onchoocatashitajempanijite iguepatsite ishiraerijia. Acaniqui Maricoshi icantiri “kananitas”, irooquee oponeaca iguenquetsatsarequi arameo, ocanque “nintamajatsica”, tee oncanteji iponeaca Canaanequi. Irocashi (6.15) icantiri iguenquetsatsarequi guiriego “zelotes”, irootaquequea ationcantacaroca “Serote”.

“Iriguentisa shaquiacari Veerevevo† imajirote ampatsinijia. Iriotaquequea agavejacaquerica yoguisotoantaguetacanicarica ishaquiajiaacaca ampatsinipae.”

²³ Iriaquea Jesoshi icapioacajiaqueriquea maasano itsatacaajiaqueriquea iquejeta-caacanari, icanqueri: “¿Arimpate intigarancajempa Satanashi iriatimpa iroguisotoaquempaquea?”

²⁴ Ariqueate inquempetaquempari inchoocateguete caquinte incapioacajiaqueriquea igonorojia impeaquempaquea imajirote. Iroompaquea irira igapiothane imparia-jianaquemparoguete incatsimatavacaajianaquempa, aatoquea ichoocagantsijiajitsi.

²⁵ Ariquea iquempejiaca tsipatsipaitacarica ijitanedia, iriatimpajiaqueti apigarancashitavacaajianajatsineca incatsimatavacaajiaquempaquea, ariquea incohincoitanaquempa intsinampirejavacaajianaquempa aatoquea iconoavacajiajatsi.

²⁶ Ariquea iquempetaca Satanashi iriatimpa. ¿Arimpaquea querocaquea incoquempani iriatimpaguete apigarancavacaajiajatsineca incatsimatavacaajiajempaguete igonorojia ampatsinipae? Interoncajiaqueriguete igonoro apatiroquea inchoocataje. ¿Ariqueea quericampate iromperatajempaca?

²⁷ Inquempetempaquea inchoocateguete itsipa caquinte irininqueguete inquijashitanaqueriquea itsovironaquitequi catsimarimajaca iraagarantsiqueriquea, iroquetitaqueate iroshotapojeri cameetsanijite iraagarantsiquerinijite. Oraquea aatotaguete yoishotiritsi aatoquea yagavejitsi iraagarantsiqueriquea.

²⁸ Nonsatacaamajaquempiroquea imaica taacaguete impeacaaguishejiaquempa caquinte covaeguisherentsi irooca inquenquetsaguishevaeque taaca opajita, iriraquea Aapani Irioshi iragavejaquequea irishetacotajeri aatoquea iquenquejacaajiri.

²⁹ Cotanquitsiquea iriraquea cantaguishehacoquerineca Ishire Aapani Irioshi, aatoja ishetacojitiritsi, incogitempani irantsipevenquemparo.”

³⁰ Icantantajiacarica imaica, yamenaquequea icantajiaqueri: “Iriguentiquea shaquiacari ampatsini.”

Iriniro Jesoshi aisa iriguentijeguitepae

(Mt. 12.46-50; Irc. 8.19-21)

³¹ Ariquea ocoraquetaque iriniro Jesoshi aisa iriguentijeguitepae, icatintiitapojaca sotsiqui, ariqueea icajemacaantajiaqueriquea.

³² Iriaquea savisaviitanquitsica anquitsaecarica Jesoshi icanqueriquea:

—Coraquetaque piniro aisa piguentijeguitepae, ichoocapoji sotsiqui, inintajiaque iramenajiaquempi.

³³ Iriatimpa icanqueri:

—¿Querocate iinani, aisa quericate niguentijeguitepae?

³⁴ Ariqueea yamenitajianacariqueea maasanojia savisaviitanquitsica anquitsaecarica icanque:

—Jeeri irirajia nopeajiaqueca iinani aisa niguentijeguitepae.

³⁵ Quericaca netsanamajatiroca inintaguetica Aapani Irioshi, iriotaque nopejiaque iguentijeguitepae, tsiojipae, iinanipae.

4

Jesoshi iquejetacaacari pishoncaguitiroca oitsoqui

(Mt. 13.1-9; Irc. 8.4-8)

¹ Ariqueea Jesoshi yoanaji aisa otsapijapojacaguete iniromotijaqui itsatacaantavae-tajiquea. Icapioacajiapojaquea icaramirincavaeque caquinteja yomporoguijaventaji-apojacariqueea, itirorencajianacaquea icanca, itetantanacaroca Jesoshi quenajarontsi isavicaque. Maasanojia omporoguijajianquitsica ichoocajiaque otsapijapojacaguete.

† **3:22 Veerevevo.** Iguenquetsatsarequi guiriego icanqueri **Beezeboul** aisa **Beelzeboul**. Icanqueri quimajareri **Beelzebú**. Iriotaque pajitatsica aisa Satanashi.

² Ariquea itsatacaajiaqueri iquempetacaaguetacarouea taaca opajitapae, icanqueriquea:

³ “Iintsijate piquemisantajiavaquenajate. Yoanaque aparo caquinte impishoncagui-tero oitsoqui.

⁴ Ipishoncavoncaquitanaqueroquea tacororo tacororo itsitacaguetanaquero. Oconoagarancaquea asacaraaguetanaca quenavoquirontsiqi, iroompaquea isavisaviitashipojiroquea tsimeripae ishecajiapojacaro.

⁵ Otsipa oconoagaranca asacaraanaca mapiporoquiqui, taampina otsoroitsive-tanaca, teemajaca onchoocamajatenica quepatsi.

⁶ Iroompaquea icatsirincaguitevetanaca catsirincaiteri itsianaqueroquea oshim-peguiricanaquequea ometojanaque, teetarite oamajateji ovarishitsa isaviqui, ojo-caavaquerotarite mapi.

⁷ Oconoacaquea otsipapae asacaraaguetanaca ochoocaquegueti ovarishitsa samer-ento. Ariquea otsoroavetanaca ariquatee otsoroitsitanacaquea samerento iroatimpa otsincoanajiroquea ometojanaji, teequea onchoocateji oitsoqui.

⁸ Oconoacaquea otsipapae asacaraanaca ocameetsaguitetaquegueti quepatsi, ot-soroanaquequea otagananaanaca ochoocatanaque opitsaraquiacotanacaqueate oitsoqui, oconoaca ochoocaque 30, otsipa 60, otsipa ochoocaquequea 100.”

⁹ Iroompaquea icanqueriquea: “Choocaguete piguempita pinquemantavaquempaca, pinquemeja.”

*Jesoshi itsatacaajiaqueriquea quero ocoani iquempetacaantaguecaroca
(Mt. 13.10-17; Irc. 8.9-10)*

¹⁰ Ariquea yoayoitanaajiquea maasanopae, aparoquea icantaja Jesoshi itsipatsipaita-jariquea itsatacaanejia, aisa itsipa oguijaguijaiquerica. Iriatimpajia icanqueriquea:

—¿Taaquea opajita piquempetacaaguetacaca incajaranqui?

¹¹ Iriatimpa icanqueriquea:

—Aviguentijia tsajiaquerone imaica queroquea icotani Aapani Irioshi imajirontaguete, teetari ironigaantajivetemparoji paesatoniqui. Iriiraquea itsipajia manaquea nonquejetacaaguetaquenempari maasanopae,

¹² cameetsanijite

iramenamenaivetanaquempaquea, cotanquitsiquea aato oconijatimotiri; Inquemaquemaivetanaquempaquea aisa, cotanquitsiquea aato itsajiavaquerotsi, aatoquea ipitsocashijigana noshetacotsitajerime igovaeguishere.*

*Jesoshi itsatacaajiaqueri itsatacaanejia taaca opajita iquejetacaacaca incajaranqui
(Mt. 13.18-23; Irc. 8.11-15)*

¹³ Icanqueriquea aisa:

—¿Teempate pinquemajiaqueroquea ocativa noquejetacaacaca incajaranqui? Iroosacanica, ¿querocampate pincojiaquempani pinquemajiaquerogueti ogonoropae nonquejetacaaguetaquemparogueti?

¹⁴ Iriiraquea oanankuetsica impishoncaguite iriguenti quempecaroca tsavetantiroca Iguenquetsatsare Aapani Irioshi.

¹⁵ Iconoajiacca caquinteja iroguenti iquempejiacarouea oitsoqui asacaraaguiguetanankuetsica quenavoquirontsiqi. Iquemisantajiaqueroquea Iguenquetsatsare Aapani Irioshi, cotanquitsiquea icoraquetashiqueriquea Satanashi ipeacotacajaijaari maasanopae.

¹⁶ Iconoajiacca itsipa iroguenti iquempejiacarouea oitsoqui asacaraaguetananquitsica mapiporoquiqui teemajaca onchoocamajateji ogamiguitere quepatsi. Iquemajiaqueroquea Iguenquetsatsare Aapani Irioshi ishineventamajiavetavacarouea.

* 4:12 Is. 6.9-10.

¹⁷ Cotanquitsiquea teequea inquemisantamajateroji, mana iquejetacaro panquirentsi teeca onquijamajateji ovarishitsa, jero ipeacojianajaroquea taampina. Iroompaquea otiavaetanacari atsipetagantsi, irooca icatsimatimentajiqueriquea Iguenquetsatsare Aapani Irioshi ariquea icohicoitanaja yovashiantajianajiroquea itsarorentavecaca.

¹⁸ Itsipa iroguenti iquempejiacaroquea oitsoqui asacaraaguetananquitsica samerentouqui. Iquemisantajavecaroquea Iguenquetsatsare Aapani Irioshi,

¹⁹ cotanquitsiquea irooqueate itsipatavajiroquea iquenquejajivajiroquea maasanopae choocaguetatsica quepatsipaequitica, aisa ishineventajivajari imentaquitsite irooca aisa taaca opajitapae ajaararontsipae. Teequeate inquenquejacojiajeroji Iguenquetsatsare Aapani Irioshi, iroguentiquea iquenquejajiaquequea irajaarantajiaquempaquea. Querocampate incojiaquempani intsarorentamajiaquemparigueti.

²⁰ Cotanquitsiquea chooca itsipa iconoagarantajiacar iroguenti iquempejiacaro asacaraaguetananquitsica ocamiguitetapojigueti quepatsi. Iquemisantajivaqueeroquea Iguenquetsatsare Aapani Irioshi, yaajivaqueeroquea, iroompaquea arimpaqueate iquemisantamajaguitironi. Iconoagarantajiacaquea ichoocajiaque cameetsa iquempejiacaroquea tsoroananquitsica choocatananquitsica oitsoqui 30. Itsipa iquempejiacaroquea choocatananquitsica 60. Itsipa caavijica yanaaque ichoocamajiaque cameetsa iquempejiacaroquea choocatananquitsica oitsoqui 100.

*Iquempetacaacaroquea Jesoshi maasanopae senacacovetanquitsica
(Irc. 8.16-18)*

²¹ Icanqueriquea aisa:

—Oraquea itsivojitirigueti tsivorentsi ¿arimpate isasaviacojitiriquea chomoqui? ¿Arimpate yoguisavicacojitiriquea osevatatacagueti shitamencontsi imaantajitaca? Teequeate. Iroguentiquea yoguisavicacojitiriquea jenoquijaniqui cameetsanijite intsivotacojiaquerinijite maasanopae.

²² Ariquea oquempetaca taaca opajitapae senacaguetanquitsica imaica oncoramanitapojajegueti ironigaantajiqueroquea. Aisa taaca opajitapae teeca intsajiteroji imaica oncoramanitapojajegueti intsajiqueroquea.

²³ Choocagueti piguempita pinquemantavaquempaca, pinquemeja.

²⁴ Icanqueriquea aisa:

—Pinquenquejamajajigueroja piquemajivaqueca. Querocagueti pincotsiterini itsipa ariquea inquejetacaajitaquempi aviatimpajia, ariquea iranaacaavaequempiro.

²⁵ Quericaca tsatavaqueroneca icantajiquerica intsatacaajitaqueriquea otsipapae. Quericaca teeca irininteji intsatavaquero, irapitsatsijitavaqueriquea itsavecaca.

Jesoshi iquempetacaacaro imajirontagueti Aapani Irioshi, iquejetacaacaro tirigoitsoqui

²⁶ Icanqueriquea aisa:

—Imaica nontsatacaamajataquempiroquea aisa queroquea icota imajirontagueti Aapani Irioshi, iroguenti oquejetacaroquea tirigoitsoqui. Yoanaquequea aparo caquinte ipishoncavoncaquitanaqueroquea tacorororo tacorororo itsitacaguetanaqueroquea.

²⁷ Oraquea iteroncanaqueroqueti yoanaji itsovironaquitequi, iroompaquea opitsecanaji imaanaji, osavincaguitetanajigueti ipityaquirejanaji. Ocaraguitejavaetanaquagueti savincaguiteri otseequitanaquequea otsoroanaque, cotanquitsiquea iriatimpa teequea intsatavaqueroji querocaca ocotanacani otsoroanaquagueti.

²⁸ Inchiquiojiquea otsoroanaquequea quepatsiqui, ochoocatanaquequea oguiji, ariquea agataganajanaca ochoocatanaque oitsoqui.

²⁹ Oraqueate osamparijencatanaquegueti yoanaquequea pishoncavoncaquitana-
queroa ipesacoqueroquea yaanaquero sampamiriaquitananquitsica.

*Jesoshi iquempetacaacaró imajirontagueti Aapani Irioshi, iquejetacaacaró quea oitso-
qui moshitaasa*

(Mt. 13.31-32; Irc. 13.18-19)

³⁰ Icanqueriquea aisa:

—¿Imaicaquea taaca oquejetacaró quea imajirontagueti Aapani Irioshi? ¿Taaca non-
quempetacaajemparo?

³¹ Ariquea nonquempetacaajemparoquea oitsoqui moshitaasa. Oraquea oitsoqui
moshitaasa caaviji anaaque chaamirijaquijaniquivaeequequea anaaguequeroquea ot-
sipapae oitsoqui ivintyacajitica quepatsiqui.

³² Cotanquitsiquea ivintyacajitirogueti otsoroanaque agajempejanaca ocanca
anaaguequeroquea otsipapae panquirentsipae chaamirijaquijaniquitatsica oitsoqui.
Otsegotsegoatanaca oquempetanajaroquea inchato, itsimampeantajajaro tsimeripae.

Jesoshi iquempetacaantaguecaró itsatacaanquegueti

(Mt. 13.34-35)

³³ Ariquea iquejejaqueriquea imaica Jesoshi itsatacajiaquerigueti Iguenquetsat-
sare Aapani Irioshi iquempetacaaguecaró quea taaca opajitapae, maasanopae yagave-
jajivaqueca.

³⁴ Teequea intsatacaajigueriji intati, taaca ininqueca intsatacaajiaqueri iquempeta-
caaguecaró quea. Cotanquitsiquea irioca choocatajatsi itsatacaanejia yoguisotoama-
jataqueneri maasanopae.

Oquemisantamajataqueriquea Jesoshi choviga, aisa iniromotija

(Mt. 8.23-27; Irc. 8.22-25)

³⁵ Iroompaquea itsaparoncaguitetanajigueti icanqueriquea itsatacaanejia:

—Intsija jaame intatiqueroqui.

³⁶ Iquenquetsatacaajianajiriquea omporoguijajianquitsica, itaquiajatacojianajiri it-
satacaanejia icocaniquea itetaca. Itsipajia oguijaguijaitacotanaquerica.

³⁷ Incajanganquiguitetanaquegueti ochovigaguitetapojaquequea choviga jeoc
jeoc jeoc, ari quea ocotanaca ovorevoreanaca otserajatanaqueroquea oja
quenajarontsiqui irooshivetapojaca ontamorencaanquepamequea.

³⁸ Iriaquea Jesoshi yojocanacaniquea tin ovataquipojacagueti itinatocaró quea ti-
inarentsi. Itinaitariquea icanqueri:

—Tsatacaantantsica, ¿arimpate teequea pintsateji irooshipojishiatsi ojocajajiguem-
panishiatsi?

³⁹ Icatiitsitanacaquea icanquero choviga:

—Pimpejaencatanajempaja.

Icantsitaró quea aisa iniromotija vorevoreanquitsica icanquero:

—Pinchopejatanajempaja.

Ari ocotanaja opeanaja choviga, ari oquempetaca iniromotija ochopejatanaja.

⁴⁰ Ari quea icanqueriquea itsatacaanejia:

—¿Quero ocotacani pitsaroantanacaca? ¿Arimpate tequeratampate pintsamajajiguen-
nagavejamajati?

⁴¹ Arimpaquea itsaromajajianaquequea icantavacaajianaca:

—¿Taa ipaji iricatica? Jero oquemisantamajatanancarica choviga aisa iniromotija.

5

Gararaqitica ishaquiacaca ampatsini

(Mt. 8.28-34; Irc. 8.26-39)

¹ Ariquea yarejerejeipojacaquea intatiqueroqui itsinampijaatacojiapojaquea iguepatsitequi Gararaquitica.*

² Irooquea yanijirejavetanaca Jesoshi yameniri icoraquepoji aparo caquinte ishaquiacariquea ampatsini, iquenapojiroquea imperitamoroqui yojoquijitantap-inijitarica metojatsica.

³ Ariqueate iguinteniguitanica oraniqui. Teequea quericaca agavejimatajerineca iroishoteri, teetari agavejeriji cavorejatsari.

⁴ Yoishotantajivecari cavorejatsariqui iguitiqui aisa iracoqui itsatitsativaetaqueroquea itsinatsinavaequeroquea pioquire, pioquire, pioquire, otsatitsatiavaetanacaquea cacaaporoquijaniqui. Teequeate quericaca agavejimaterineca.

⁵ Icocaniquea yanijivijiti savincaguitariqui aisa pitsecariqui. Yoavaeguetanaquequea otsempipaequi aisa imperitamoroqui yojoquijitantapinijitarica metojatsica, icajemamajatatiguinimaja jeeee. Yaitsitaroquea mapi tsaampiri itotsitaquea quitente quitente.

⁶ Irooqueate yamenacotsitavacariguetei Jesoshi ishiashitanacariquea quempeji iguerovempojacari.

⁷ Iririjencavaeque icanqueri:

—¿Querocaquea pincoquenani, Jesoshi Irijanite Irioshimajaca Anaantamajatatsica? Iintsijate aatoja patsipetacaanatsijate. ¡Pimpintsatacogajoitenashiatsi!

⁸ Icantantacaroca ocativa irooriji icanqueri Jesoshi ampatsini:

—¡Pisotogue, ampatsini, povashianteriqueate iricatica!

⁹ Ariquea icanqueri Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica, nocaramirincavaequetari.

¹⁰ Yapijipijitaqueri icantiri:

—Iintsija aatojate pitigarancajianatsijate osamani.

¹¹ Ariquea ichoocajiaque chanco† oraniqui otapiqui ishecajiaca, icaramirincavaeque icanca.

¹² Iquenquetsatsitanacaquea ampatsini icanqueri:

—Iintsija ariguentiquea pintigarancajiaquea noshaquiajaquempariquea chancojia.

¹³ Iriraqequea Jesoshi icanqueriquea:

—Intsiquetirote poapoaitanaque.

Yovashiampanajantiri ishaquiavecaca irioqueate yoashiyoashiivetanacari chancojia. Irooquea ishaquishaquiivetapojacari, ariquea icohicoitanaca isaquiritsaevae-tanaque ojeguironcapojacaguetei yanoyanoitanaca itanquiretanquireitanaque yojocajiapojaca, iteroncajiaca maasano. Maasanojia icarajiaque 2,000.

¹⁴ Irooquea yamenajavaquerigueteiquea quempoguijirica itsaroajianaque ishiashiaitanaca yoayoaitanaji icamantajiapojiri ontaniqui iguintenijiacaguetei itsitacagueta-pojiroqueate, iquemacotantajiacarica choocajiatatsica acaniqui aisa choocajiatatsica quempejipaequi. Isotosoitanaque iramenajiaque taa opajita.

¹⁵ Yoayoaitanaquequea ichoocaqueguetei Jesoshi, iroompaquea yarejerejeipojaca yamenajiapojiriquea ishaquiavecaca ampatsini savicaji quitaataja quenquejanaji quempejatanaja iroaqueraguetei, ariquea icohicoitanaca itsaroajianaque.

* **5:1 Gararaquitica.** Chooca otsipa paperi otioncacotacaguetei acaniqui Jersaqueitica (**gerasenos**). † **5:11 Irira chanco** iriguenti viratsi quejevatarica santaviri.

¹⁶ Iriraqeua amenajiaqueroca maasanopae icamantajiaqueriquea querocaca icoqueriniquea iroaqueraguetei yoguisotojainiriguetei shaquiavecarica caquinte, aisa querocaca icoquerini itigarancajiaqueriguetei ishaquiajiavetacariguetei chanchojia yojocajiacaguetei.

¹⁷ Iroompaqueate iquemajiaquitiguieua itsavetantajiaqueriguetei, iriatimpajia yamanamanaiqueriquea Jesoshi iroanajeniji irovashiansitanajeriniji iguepatsite.

¹⁸ Irooqueua itetanajaquea Jesoshi quenajarontsiqui iroanaje, iriraquea ishaquiavecaca ampatsini icanqueri ininque intsipatanaquempari.

¹⁹ Cotanquitsiquea Jesoshi tee irishineteriji, mana icanqueri intati:

—Poanaje pitsovironaqueitequi, pigonoroqui, pincamantapojajerija pintsavetampoja- jeroqueua maasano queroqueua icoquempini Aapani Irioshi ipintsatacotajimpiguetei.

²⁰ Iriatimpa yoanajiquea iparianacaro itsavetantaqueroqueua oraniqui guintenin- intsipaequi Tecaporishiqui, yoguisotojaiapojaqueneri ipintsatacotacariguetei Jesoshi. Maasanoqueua mana yamenamenaitanaque intati.

Jesoshi ivochatajiro irorijanite Jairo

(Mt. 9.18-26; Irc. 8.40-56)

²¹ Ariqueua imontejacotanaja Jesoshi intatiqueroqui yomporoguijaventapojacari icaramirincavaeque caquinteja, ariqueua ichoocapoji oraniqui otsapijapojacaguetei iniromotijaqui.

²² Iroompaqueua icoraquepojaque shirampari pajitatsica Jairo. Iriatimpa iriguentei jivatanquitsica shinagogaqui icapiocantajiacaca joriojia. Ariqueua yamenapojiriguetei Jesoshi igueroventapojacari,

²³ icampoijiri:

—Irooshipoji ometoje norijanite. Jaameshiatsi pimpamitaquitenaroshiatsi ompeana- jempanijite onchoocatajeniji.

²⁴ Iriraqeua Jesoshi yoanaque yoguijatanaqueriquea, ariqueua yoguijaguijaitanaque- riqueua icaramirincavaeque caquinteja itirorencaventajianacariqueua oraniqui itsi- nacajianaqueri.

²⁵ Ariqueua ochoocaque aisa oraniqui aparo manquigarentsi ashinoncaavaetanquit- sica ososoajavaetini coramani, ariqueua ocaratacovaetanaqueni 12 ajagantsiteni.

²⁶ Atsipevaecaqueate yaavintanavecaroqueate aavintantatsica teequeua ompeajem- paji arimpaqueua ogatsitanaca, niganquiqueua oteroncamajatanaqueriqueua omen- taquitsite, ejempacotia oanaca.

²⁷ Oquemacoqueriquea Jesoshi oanaquequeate ontaniqui ichoocaqueguetei iriatimpa oconoajianacari, oquempejitanacariqueua ocoraquetashipojiri itaqui qui ochagatsae- quitsitavaqueri ivanquemaero.

²⁸ Oquenquejitsitanacaqueua incajaranqui ocanque: “Iroguentei nonchagatsivetaque- mpari ivanquemaero nompeanajempauea.”

²⁹ Irooqueua ochagataquitiguiroqueua ariqueua ocotanaja osanticojatapojaji ososoajare, oquematsinotavaca jac peamajatanaja.

³⁰ Iriraqeua Jesoshi itsatavaqueroqueua ipeantajaro iragavejane ipitsocanacaqueua yamenamenaiqueri omporoguijaventajiacarica icanqueriqueua:

—¿Taaqueua chagatsitaquenaro novanquemaero?

³¹ Icantajianaque itsatacaanejia:

—Pamenavecaqueate itsinacajianaquempi, pogaavacaqueua picanque: ‘¿Taaqueua cha- gatacoquena?’

³² Iriatimpa yamenamenaitanaque taaca chagatacoquerica.

³³ Iroatimpa otsaroamajatanaquequeua ompioncavaetanaca, otsatavajitari peamajataja. Ojocavaetapojaca iriatimpaqui ogueroventapojacari ocamanqueriqueua maasanopae.

³⁴ Iriatimpa icanqueroquea:

—Orijani, irooriji pavenquenatarite naatimpa, irootari piveantanajaca. Imaicaquea poanaje, pishinevaetajempa aatotarite apijitajimpi aisa.

³⁵ Iroompaquea quenquetsatatsitiraja Jesoshi icoraquecoraqueipoji itsipapae, iquenajipoji itsovironaquitequi jivatanquitsica shinagogaqui, icampoijiri:

—Jac metojaque porijanite, ariotapojaque pasereaajiritsi Tsatacaantantsica.

³⁶ Cotanquitsiquea Jesoshi iquemaquerigueti,‡ ipitsocashitari jivatanquitsica shinagogaqui icanqueri:

—Aato pitsaroguitsi. Mana paventanaquena naatimpa.

³⁷ Tee iroguishinejeri itsipajia iroguijaguijaitanaqueri, iriguentiquea itsipatsipaitanaca Peerero, Santiago§ aisa iriguentijeguite Santiago pajitatsica Joanca.

³⁸ Oraquea yarejerejitaipojajagueti itsovironaquitequi jivatanquitsica shinagogaqui yamenapojiri ampenejencavaejiaca irajiacaca cajemajiaque oraniqui.

³⁹ Iquijanaquequea intsompoguiqui icantajipojiri:

—¿Taampa opajita piraantajiacaca picajemantacaca? Teetarite ometojenica, mana omaaque intati.

⁴⁰ Ariquea icohicoitanaca ishironimentajianacari. Ariquea yoguisotosotoitajiri maasano sotsiqui, iriguentiquea itsipataja jivatatsica aisa imanquigare, iriguentijia aisa itsatacanepae itsipatsipaitacaca incajaranqui, iquijaquijaitanaquequea ojoquijicagueti irorijanite.

⁴¹ Yacatsavacoquero icanqueroquea:

—*Talitha, cumi* * —ocanquequea: “Chaajaniquitirajaca, noncanquempi, pinca-tianaje”.

⁴² Irooquea icantaquitigui ariquea ocotanaja otancorejanaji ocatianaja anijivijitaji. Iroatimpa arejetacaró 12 ajagantsite. Iriatimpajia yamenamenaitanaquequea intati.

⁴³ Cotanquitsiquea Jesoshi icantajiguiri aatoquea icamantitsi. Icantsitari aisa irojocajiaquenero oshecatajempata.

6

Itsatacaantavetacagueti Jesoshi Nasarequi
(Mt. 13.53-58; Irc. 4.16-30)

¹ Ariquea yoanaji Jesoshi iguinteniqui, itsipatsipaitanajari itsatacaanejia.

² Aapojajagueti savincaguiteri imagorejantajitaca* yoanaque shinagogaqui icapio-cantajiacaca iparianacaroquea itsatacaantanaque. Iriaquea quemajiavaquerica yamenajianaquequea intati icantajianaque:

—¿Queroquea oquenapojini maasanopae ocatica iquejetantacaca iricatica? ¿Taa opajita ocatica itsatica ganejencaro yojocajiquenerica? ¿Quero ococani yagavejancaca yonigaantaguequeroquea oacaantantatsica intati?

³ ¿Teecajate irioquea iricatica caripintero,† irijanincaca Maria? Iriaquea iriguentijeguitepae iriguenti Santiago, Jose, Jorashi aisa Shimo. Ariquea oquempejiaca itsijoitepae iroatimpajia aisa oguintenijiaca acaniqui, amenamajajiguiroquea aatimpajia.

Ariquea teequea irinintajigueji inquemisantajiaqueriji, iroguenti icatsimajiaqueri.

⁴ Cotanquitsiquea Jesoshi icantajiaqueri:

‡ 5:36 Chooa otsipapae paperi otioncacagueti: “Cotanquitsiquea Jesoshi teequea inquemisantajiajeri.” § 5:37 **Santiago** ipajita aisa Jacovo. * 5:41 **Talitha, cumi**. Icanqueroquea iguenquetsatsarequi arameojia, irootarite iguenquetsatsare Jesoshi ichoocatigueti quepatsiqui. * 6:2 **imagorejantajitaca**. Iriira joriojia imagorejap-inijiaque saavaroqui. † 6:3 Iriaquea **caripintero** iriguenti tsamajaguetroca inchacota, ipeacaantaguecaro shitaponcarontsipae, taaca opajitapae.

—Irraquea tsavetantiroca icanquerica Aapani Irioshi ishineventajitavajari que-rocagueti yoanaqueni osamani, cotanquitsiquea ichoocavecagueti iguinteniqui, tee-quea irishineventajitempariji, aisa teequea inquemisantajigueriji ijitanejia aisa guin-teninitimotacarica itsovironaquitequi.

⁵ Ariquea teemajaca ironigaantajeroji oacaantantatsica intati oraniqui iguintenive-tacagueti. Manaquea ipamijiaqueriquea aparopae ashinoncajajianquitsica, yogueshi-jiajiri.

⁶ Ariquea yamenanaque intati, yamenaque teequea inquemisantajiajeriji, manaquea icantajiaque: “Caaricaja.”

Ariquee Jesoshi yoayoaguetaquequea irooshipojigueti oraniqui iguintenijiacagueti itsatacaantavaetaquequea.

Jesoshi itigarancajiaqueri 12 itsatacaane iroaroaitanaque intsavetantajianaque
(Mt. 10.1, 5-15; Irc. 9.1-6)

⁷ Ariquee icajemaqueriquea itsatacaane carajianquitsica 12, itigarancajiaqueriquea iroaroaitanaque intsipatavacaanaquempa mavite mavite, yagavejacaajiaqueriquea iragavejajiaqueri ampatsinipae.

⁸ Icantajiaqueriquea: “Aato pimatitsi. Aatoja paajiguitsi pitsaratote, pisheca aisa pimentaquitsite. Iroguentiquea pigotiro.

⁹ Pincaviguitijianaquempaja, cotanquitsiquea aatoquea paajiguitsija mavite piit-saare, iroguentiqueate piquitsaajiacaca.

¹⁰ Querocagueti oraniqui poapoaitanaqueni incajemajiaquempigueti pimaanaque itsovironaquitequi, poapoaitanaquequea pincoquempaniquea pimaimojiaqueri areje-vaetapojajempa savincaguiteri poapoaitantanajempaca.

¹¹ Oraquee querocagueti poapoaitanaqueni oraniqui aatoguetiquea ishineventajigu-impitsi, taampina poapoaitanaque, cotanquitsiquea iroquetitaja pantecamajatanaque-roja quepatsivane pagatiquitsitapojaquerigueti, iroonijite iramenantajiaquempani-jite iroguenti yantaguishejiaqueroquea covaeguisherentsi, teetarite irajaiavaquempiji irishineventajiaquempiji. [Arimajaquee oncoramanitapojajegueti arejetapojajem-pagueti incatsimatantaquemparica Aapani Irioshi, caaviji incatsimamajajiaqueriquea irirajia teeca irishineventajiaavajempiji, anaamajataqueroquea incatsimamajajiaque-riqueti guintenijiavetanquitsica coramaniquitica Soromaqui aisa Gomoraqui.]”

¹² Iriatimpajia yoayoaitanaquequea itsavetantajianaque, icantajiaqueri maasano irovashiantajianaqueroja maasanopae covaeguisherentsi ipeacaaguishevaetacaca in-cantashitajiaianajempa.

¹³ Yoguisotoajiaqueriquea oshequi ampatsinipae, aisa ipantantajiacari orejiqui oshe-qui joquijiripae, ipeajianaja.

Erorishi iquenquejajiro imetojacaanquerigueti Joanca Viñacajatantatsica
(Mt. 14.1-12; Irc. 9.7-9)

¹⁴ Maasano iquemacojiaqueriquea Jesoshi, jero iquemacotantacarica majirontat-sica Erorishi[‡] iriatimpa. Chooca cantajianquitsica: “Tancorejanajishiatsi Joancani Viñacajatantatsica, jero yagavejamajatantacaca yonigaantaguequeroquea oacaantantat-sica intati.”

¹⁵ Itsipaquea cantanquitsica: “Iriguentiquea coramaniquitica tsavetantatsicani paji-tatsica Iriashini.” Itsipapae cantanquitsica: “Iriguentiquea tsavetantatsica, quejecarica irirajia tsavetantajiaatsicani coramanipaequitica.”

¹⁶ Oraquee iquemajiaquerigueti Erorishi icantajiaquegueti imaica, icanque iri-atimpa:

—Iriguentiquea Joancani nojitorejacaanqueca, tancorejanajishiatsi.

[‡] 6:14 Iriratica **Erorishi** irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

¹⁷ Oraquea chapinqui iriraquea Erorishi yaacaantaqueri Joancani, yoishotacaanqueriquea cavorejatsariqui, isantanatacotacaanqueri, irooriji yamenaquequea ican-tomajimentavecari Eroriashi yaapitsaquerigueti iriguentijeguite pajitatsica Jeripe.

¹⁸ Iiraquea Joanca icanqueriquea Erorishi: “Tee ari incojitempaji paapitsaquerigueti imanquigare piguentijeguite.”

¹⁹ Oraquea Eroriashi ariquea ocatsimatanaqueriquea Joanca onintaveca irimetojait-sijiquemparimequea, cotanquitsiquea querocampate oncoquerini.

²⁰ Itsaroacaacaritarite Erorishi itsaquequea iriguentiquea cameetsari, iriguenti igomajamajare Aapani Irioshi, jero yamenamajatantacarica aatonijite queroca icojitirini. Oraquea itsavetantavaetigueti Joanca inintanirovecaro, cotanquitsiquea tee intsateji querocampate incoquempani.

²¹ Iroompaquea aapojatiga savincaguiteri ometojacaantantaquemparica. Iroguentiquea apoja isavincaguiterrite Erorishi. Iriatimpa itiacaaantaguetaquequea taaca opajitapae shecatsipae, ariquea icajemajiaqueriquea imajirojiate joriojia, aisa imajirojiate coaretajia, aisa anaantajiatsica guintenijiatsica oraniqui Garireaqui.

²² Ariquea ishecajiaca, oquijapojiquea orijanite Eroriashi otsamaropoji opitsopitsovaetanacaqueate. Irooquea yamenaquerogueti Erorishi aisa maasanopae itsipatsipaitacaca ishecajiagueti, ishineventajiacaroquea. Iroompaquea icanquero:

—Imaicaja pamanenajate taaca piningueca, naatimpa nojoquitsitempiroquea.

²³ Icantsitajaro aisa:

—Imaica noncanquempi arimajaca nojocaquempiroquea taaca pamaquenaca, aatotarite namatavijimpitsi. Quempetaca pamanenagueti nojocagaranquempiro nashintaguecaca, nontincavirejitempiroquea niganqui. Incatsimatimentenarota Aapani Irioshi aatogueti nonetsanatiro nocanqueca.

²⁴ Osotoapanajanti oanaquequea ocantapojaquero iniro:

—Inani, ¿taaquea opaji namanaqueri?

Iroatimpa ocanqueroquea:

—Iroguentiquea pamaqueri iguito Joanca Viñacajatantatsica.

²⁵ Iroatimpa oitsitanacaquea oquijitsitanaja ichooaquegueti majirontatsica Erorishi, ocanqueriquea:

—Iroguenti noninque pojocacotsitenaro imaica iguito Joanca Viñacajatantatsica shimencoqui.

²⁶ Ariquea icotanaca iriatimpa ishimampananaca, cotanquitsiquea iroorijite icanqueroquea, aisa iquemajiaqueri maasanopae icajemajiaqueca, tee irinintenica incantero: “Aato.”

²⁷ Irootarite itigarancantacarica coareta iroanaque ontaniqui isantanatacojitaquerigueti Joanca iramacoqueroquea iguito.

²⁸ Yoanaquequea ijitorejaquitiri santanaqui iroompaquea yamacoquenero yojocapojaquenero, irooqueate oguipitsocacoquenero iniro.

²⁹ Oraquea iquemacojiaquerigueti itsatacanejia Joanca, icoraquetashijajiri yaajianajiro itsino iquitajajiro.

*Ishecatacaajiacari Jesoshi 5,000 shirampari
(Mt. 14.13-21; Irc. 9.10-17; Jn. 6.1-14)*

³⁰ Iroompaquea icoraquecoraqueitaji itigarancanejia Jesoshi itsipatsipaipojajiri icamampojiri maasanopae yantaguetaquitica ontaniqui aisa maasanopae itsatacaantaguetaquitica.

³¹ Cotanquitsiquea coraquecoraqueitanatsiquea icaramirincavaeque caquinteja, itsipapae yoayoaitanaji, teequeate iragavejajiguempaji Jesoshi irishecajiguempaji. Irootaquequea icantantacarica Jesoshi itigarancanejia:

—Jame ontaniqui osamani teeguete inchoocateji caquinte, pimagoremagoreipojaque-
quea. Aviguentijia nontsipatsipaitanaquempaca, aatojate yoayoaititsija itsipapae.

³² Ariquea Jesoshi itsipatsipaitanacari itehiteitanacaquea quenajarontsiqiu yoayoaitanaquequea.

³³ Cotanquitsiquea irooquea yoayoavetanacaquea yamenajivaqueriquea itsipa
caquinteja itsajivaqueri. Yoayoaitanaquequea iriatimpajia, aisa yanijijianaque iri-
quetica arejerejeitanquitsi.

³⁴ Iroompaquea itsinampijaatacojiapojaca. Irooquea yanijirejavetanaca Jesoshi ya-
menajiapojiriquea icaramirincajiaque caquinteja, ipintsatacojianacariquea maasano,
yamenajivaqueriquea aparo yapintajia yatsipevaejiacaqueate quempejiaca oveja
teeca inchoocateji quempoguijajiguerineca, ariquea iparianacaroquea itsatacaague-
tapojiri.

³⁵ Imaicaquea ijaguitevaetanaji catsirincaiteri, iquempejiquempejiitanacariquea it-
satacaanejia icanqueri:

—Jac jaguitevaetanaji catsirincaiteri. Ocaniquiquea ocaniqui teequea quericaca
choocatatsineca,

³⁶ iroosacanica pintigarancajiajeri maasano irirajia iroaroaitanajetajate ontaniqui
guinteninintsipaequi irooshitacoguetanquitsica cameetsanijite irivegarajiaquenijite
ishecajia irishecajiaquempanijite. Ocaniquiquea ocaniqui teetarite onchoocateji
taaquate irishecajiaquempaca.

³⁷ Cotanquitsiquea Jesoshi icanqueriquea:

—Pojocajigueneritsija aviatimpajia irishecajiaquempaca.

Iriatimpajia icanqueriquea:

—¿Arimpate pininque noanoaitanaque novegarajiaquiteneri irashijia maasano irishe-
cajiaquempaca? Ovegaravaecatari 200 tenario. §

³⁸ Ariquea icanqueriquea Jesoshi:

—¿Quero ocarashequiaque pan pashijia? Iintsija poapoaitanaque pamenajiaquitero-
jate querocaca ocarashequiavaeque.

Ariquea yoayoaitanaquequea yamenajiaquitiro, iroompaquea icoraquecoraqueitaji
icantajiapojiri:

—Chooa 5, aisa shima mavipaquite.

³⁹ Icanqueriquea Jesoshi:

—Iintsija pincantajigueriquea maasano irisavisaviitaquequea janamaroncaroqui
cataro, ariquea pomporoguijaguequeriquea.

⁴⁰ Iriatimpajia isavisaviiquequea iconoajiaca yomporoguijajiaca 100, itsipapae icara-
jiaque 50.

⁴¹ Iroompaquea iriraquea Jesoshi yajiricajiaquero pan caratanquitsica 5 aisa
mavipaquite shima, ipaguitetanaqueroquea inquite yamanaqueriquea Aapani Irioshi,
icantaqueri: “Arioteesaa.”

Ariquea icotarejaquero pan, yojocajiaqueneri itsatacaanejia, irioquea gaavaqueneri
yojocajivaqueneri maasano. Ariquea iquempetacaacariquea shima iriatimpa.

⁴² Ariquea ishecajia maasano iquemajianaca.

⁴³ Iroompaquea iriraquea itsatacaanejia icapiocajiajiro choocatajatsica pan aisa
shima, itetajiro cantiriqui tseraiquipae ocaratacovaetaji 12.

⁴⁴ Icaramirincajiaque 5,000 shiramparijia quenquevarijia shecajianquitsica.

Yanijijatanaquero Jesoshi ojenoquiijaare iniromotijaqui
(Mt. 14.22-27; Jn. 6.16-21)

§ 6:37 Iriraquea **tenario** irio imentaquitsite Iromaquitica. Iramiteriguete itsipa apajencaro savincaguiteri iriveg-
arataqueri aparo tenario. Iramiteriguete 8 taai irivegarataqueri 200 tenario.

⁴⁵ Ariquea itigarancajiaqueriquea Jesoshi itsatacaanejia icantajianajiri intejianajempa-
paquea quenajarontsiqúi irijivajianaje irimontejacodianajempauea intatiqueroqui
Vetsairaqúi. Icantanajiri capiocajianquitsica iroaroaitanaje.

⁴⁶ Ariquea yoayoaitanajiquea maasano, iriatimpa yoanaqueuea otsempiqui ira-
maneri Iriri.

⁴⁷ Oraquea opitsecanajigueti iriraquea itsatacaanejia niganquijatacovaetanajiquea.
Ichoocaue Jesoshi apaniro quepatsiqui.

⁴⁸ Iriatimpa yamenacotsijiavacariquea ipanquenanaajiacaro ivetincajajiavaquero
imagojianaqueuea, ochovigaguitevaetanaquetari choviga jeoc jeoc, oguipiguiyacov-
aetanaqueriquea. Iroompauea omancharejaguitetanajatiga savincaguiteri icoraque-
poji yanijijatapojiro jenoqui ja iniromotijaqui iravisajianaquerime.

⁴⁹ Iriirauea itsatacaanejia yamenitsijiavacariquea yanijijatapojiro ojenoqui jaare,
ijiqueriji sashinti, icajemajianaqueuea.

⁵⁰ Maasanoquea yamenajiaqueri itsaroajianaue, cotanquitsiquea iriatimpa ican-
queriquea:

—Pintampishishirentajianaue. Naroguenti, aatoquea pitsaroajiguisti.

⁵¹ Ariquea itetanaja iconoapojajari, ariuea ocotanaja choviga jac santiconi. Iriatim-
pajia yamenamenaitanaqueuea intati.

⁵² Yamenajavecaroqueate incajaranquiqui yoshequiaquerogueti pan, cotanquit-
siquea teequea intsajigueji queroquea icocaniquea iriatimpa yagavejavaequegue-
tiquea maasanopae, manauea iquishoshirentanaqueuea.

Jesoshi yogueshiguetajiriquea ashinoncajijanquitsica Jenesarequitica
(Mt. 14.34-36)

⁵³ Iroompauea imontejacodianajaquea intatiqueroqui yarejejiapojajaro Jenesare-
qui, yagatacojiapojaji.

⁵⁴ Yanijirejajianaqueuea, maasanojia itsajiavaqueriquea iriguenti Jesoshi.

⁵⁵ Jero yoayoaitantajanacaca ishiashiaitanacaquea itsitacaguitejavaetanaquero yaa-
cojiaquitiri ashinoncajijanquitsica, yaajianaqueneriquea irogueshiguetajeri.

⁵⁶ Querocaguete oraniqui iquenaguetanaue Jesoshi guinteninintsipaequi chaa-
janiquiguetanquitsica, iniroguetanquitsica, jero aisa iniganquitejirepaequi, yaacot-
sijitanacariquea ashinoncajaguetanquitsica yoguisavicajiqueru oraniqui quenavo-
quirontsiqúi. Icantajiavaqueri:

—Intsishiatsi, Nomajirote, noninque inchagatsijivetavaquempiro oshipaqui-
janiquiqui piitsaare.

Maasanopaetari chagatsijiaquerica ipeaguetanaja.

7

Jesoshi itsatacajiaqueriquea itsatacaanejia taaca opajitapae coguishetantatsica
(Mt. 15.1-20)

¹ Iroompauea icoraquecoraqueiqueuea pariseojia aisa tsatacaantajiguiroca ition-
cacotanaueca Moishishini, iquenaquenaipojiquea Jerosarequi, icapiocaventajipo-
jacari Jesoshi.

² Yamenajiapojiriquea itsatacaanejia iconoagarantajiacaquea teequea irinetsana-
jigueroji yamejiacaca, mana ishecashecaica intati teequea inquivacomajajiguempaji,
yamenajavecaroquea ocoguishequeru yajiricajiaqueca.

³ (Irirajia pariseojia aisa maasanopae itsipajia joriojia yoguijatacojiaqueriquea
choviquijianaquerica, aatoguete iquivacomajatauea aatojate ishecajatsi.

⁴ Aisa yoayoaitiguete yojocantagueti roguete taaca opajitapae ishecajigueta-
caca icoraquecoraqueitaji iquivaquivaipajia. Aatoguete iquivaquivaipajia, aatoquea
ishecashecaipajia. Aisa taaca opajitapae yoguijatacojiaqueru choviquijianaquerica

coramani, iquivajiguiroquea ichovintyoriquitepae, igatsantsanaquiritepae, cavorejanaquiripae, aisa inorijantacaca.)

⁵ Iroompaquea iriraquea pariseojia aisa tsatacaantajiguiroca itioncacotanaqueca Moishishini icanqueriquea Jesoshi:

—¿Querocaquea icojiacani pitsatacaanejia teequea iroguijatacojigueriji choviquijianacajica inquivacomajajiaquempa? Mana ishecatacojiacaroquea iraco ocoguishejiaquerigueti yajiricajiaqueca.

⁶ Iriatimpa icanqueriquea:

—Itampaticamajataqueroquea tsavetantatsica Isaiashini itioncacojianaquempigueti coramani aviatimpajia cameetsatamampeajiatsica, icanquequea:

‘Iricatica caquinteja ishinetsraventavequena,
cotanquitsiquea manaquea ichoocashirentavaetaque osamani.

⁷ Itsariventamampeajivetaquenaquea,
cotanquitsiquea itsatacaantajiguica iroguenti icantajiguica caquinteja irinetsanajiquea.’

⁸ Aviatimpajia pojocajianajiroquea icanqueca Aapani Irioshi, iroguentiquea quisho poamajajiaque itsatacaantajiguica choviquijianaquempica.

⁹ Icanqueriquea aisa:

—Caavijiquea piticaarejajiaquero icanqueca Aapani Irioshi cameetsanijite poguijatacojiajeronijite pamejigaca aviatimpajia.

¹⁰ Pamenamajajiavecaroquea icanqueca Moishishini: ‘Pinquemisantamajajiaquerijate piri aisa piniro, aatoquea pipigatsajigaritsija.’ Icanque aisa: ‘Iriraquea tsavejencatirica iriri irooca iriniro irimetojitsijitempari.’

¹¹ Cotanquitsiquea aviatimpajia manaquea picantashitajiaaqueroquea, picantapinijiaque cameetsavaeque shirampari incanqueri iriri irooca iriniro: ‘Aatoquea nagavejitsi nojocaquempi picoguitejacoqueca, irooriji maasanopae nojocaquempimeca iroguentiquea corova.’ (Oraquea corova ocanque: ‘Nojocashiquenemparica Aapani Irioshi’).

¹² Incanquerigueti iroguenti corova, aviatimpajia picanquequea aatoja yojoquinirit-sija iriri irooca iriniro, aatoja icavintsajajigui.

¹³ Piquempējaqueroqueti imaica iroguentiquea povashiantajianaquero icanqueca Aapani Irioshi, irooquea poguijatacojianaque itsatacaantajiaqueca pivaesatiniteni. Cotanquitsiquea teetarite aparoquea onchoocateji ocatica, pantajiaquequea otsipapae quejearoca.

¹⁴ Ariquea icajemajiaqueri aisa maasanopae, icapiocajiaqueriquea icanqueri:

—Pinquemisantamajajiavaquenaja maasano aviatimpajia, pintsajiavaquero noncamanquempica.

¹⁵ Taaca opajitapae sotsiquitica quijanquitsineca ivagantequi caquinte aatoquea ocovaeguisheshirentiri. Oraquea sotoanquitsineca iriatimpaqui, irootaquequea covaveguisheterineca.

¹⁶ Choocagueti piguempita pinquemantavaquempaca, pinquemeja.

¹⁷ Ariquea yojocapanajantiri maasano iquijanaquequea tsovironaqui. Iriraquea itsatacaanejia icanqueriquea:

—¿Taaquea piquempetacaaca incajaranqui?

¹⁸ Iriatimpa icanqueriquea:

—¿Teetarite pinquemajiguenaji aviatimpajia aisa? ¿Arimpate teesacánica pinquemajiguenaji nocanquegueti taaca opajitapae sotsiquitica quijanquitsineca ivagantequi caquinte aatotarite ocovaeguishetiritsi?

¹⁹ Teetarite ariquea ogueji shecatsi shiretsiqui, manaquea otehoteitapojaca tsicotontsiqui mana irishitacojitajero.

Iroguentiquea icantajiaqueri imaica cameetsanijite intsajiaquenijite maasanopae ishecajiguetaacaca teetarite oncovaeguishetacaanteji.

²⁰ Icanqueriquea aisa:

—Oraquea sotoapojirica caquinte, irootaquequea covaeguishetaquerica.

²¹ Oraquea intsompoguiqui shiretsiqui ariqueate oquenapoji taaca opajitapae covaequisherentsipae: iquenquejaguishejigui, yoashijiguiro manquigarentsi tequeratatarajaca irimanquigajitemparo, yaitsitantajigui, imetojantajigui, yoashijiguiro manquigarentsijia imanquigajitacaca,

²² inintsiguতিরiquea yashintaguecaca itsipapae, isavicaventajiguiro covaequisherentsi, yamatavijantajigui, teequea irinejashitemparoji manquigarentsi, icatsimatimentiriquea igonoropae yamenaqueguetiquea caaviji yagavejavaequequea, iquenquet-saguishetantajigui, yaventacojiacaquea, teequea intsajiguijeji incomajamajiguempaji.

²³ Maasanopae ocativa ipeacaaguishejiguetaacaca manaquea oquenapojiquea shiretsiqui, irootaquequea covaeguishetantantquitsica.

Aventanajari Jesoshi manquigarentsi Shiropenishiaquitica

(Mt. 15.21-28)

²⁴ Ariquea yoanajiquea Jesoshi irooshitacoquero Tiro aisa Shirone ariquea iquijapoji tsovironaquiqui, teequea irinintavetempaji inquemacojiterime, cotanquitsiquea teequea iragavejeji iromanacotempaji.

²⁵ Ariquea ochoocaque aparo manquigarentsi choocatanquitsica orijanite tequeratataraja onquenquevaroteji, ishaquiacaroquea ampatsini. Iroompaqueate oquema-coquerigueti Jesoshi oanaquequea amenavaqueri. Ocoraquepojiquea ogueroventapojacari.

²⁶ Oraquea manquigarentsi iroguentiquea guiriego, ovoguiquea Shiropenishiaqui. Ocantapojaqueari iroguisotoacoventajero orijanite ishaquiacaca ampatsini.

²⁷ Cotanquitsiquea Jesoshi icanqueroquea:

—Iriquetitaquea shecamajatanquitsine chaajaniquipaetirajaca. Teequea oncameetsateji aapitsateri chaajaniquirijia isheca, ojoquitenempari ishiishitepae.*

²⁸ Iroatimpa ocanqueriquea:

—Arimajaca, Nomajirote, cotanquitsiquea shiishi iramenajiguerigueti irishecajiguempagueti chaajaniquiripae iroguijavaqueroquea isaviji shitaponcarontsiqui irishecatsopequiguetaquemparoquea otsopequi.

²⁹ Iriatimpa icanqueroquea:

—Pitampaticamajataqueroquea. Imaica iintsijate poanaje, jac sotoanajiquea ampatsini shaquiavecaroca porijanite.

³⁰ Oanajiquea, arejevipojaja otsovironaquitequi amenapojajiroquea orijanite norijaca omencorequi omaantacaca, teequea irishaquiajemparojiquea ampatsini, jac sotoanajiquea.

Jesoshi iquemacajairiquea teeca inquemavetempaji

³¹ Yoanajiquea Jesoshi isotoantanajaroquea ichoocaquegueti irooshitacoquero Tiro, icantanajaquea Shironequi aisa Tecaporishiqui, yarejevaetajaquea iniromotijaqui Garirea.

³² Iroompaquea yaajianaqueneriquea shirampari carenisamaitori, aisa teeca inquenquetsamajavetempaji, icantajiaqueri impamijiaqueriquea.

³³ Iriaquea Jesoshi itsipatanacariquea tijai teegueti inchoocajiguijeji tirorencashijiacarica, ariquea yoguijaachapaquitsitaro iguempitaqui, aisa ijavachapaquitsita ichagatsiqueri inenequi.

* **7:27** Aapani Irioshi itigaranquimentaqueari Jesoshi incoraqueetashijiaqueri ishiraerijia. Iriquetimegueti incavintsajiaqueme teeca irijorijoiagueji, onquempevetaquempame yaapitsajitirigueti isheca chaajaniquirijia irojoquitenemparigueti shiishipae.

³⁴ Ariquea ipaguitetanaquero inquitequi yaajencataquiti icanqueri: “¡Efata!” (oncanquequea: “¡Pishepirejanajempa!”)

³⁵ Irooqueea icanquerigueti ariqueea icotanaja ishepirejacotanaja, aisa itsirecarejanenetanaja iquenquetsamajatanaji.

³⁶ Iroompaqueea icantajiavecari Jesoshi maasano: “Aatoja picamantitsi.” Cotanquitsiquea arimpate itsavetantajianaqueroqueea.

³⁷ Yamenamenaitanaquequeea intati maasano icantajianaque: “Maasanoqueea yantaqueca cameetsavaeque, iquemacajiaqueriquea teeca inquemavetempaji aisa inijacajairiquea macanavetatsica.”

8

Jesoshi yoshequiavaequeroqueea pan, ishecatacaajiacari 4,000 shirampari (Mt. 15.32-39)

¹ Iroompaqueea yomporoguijaventajipojacariqueea Jesoshi icaramirincavaeque caquinteja, icocaniquea isavicaventajiaqueri, niganquiquea iteroncacojianaca ishecacia, taampate irishecaciaquempaca. Ariqueea icajemajiaqueriquea itsatacaanejia icanqueri:

²—Nopintsatacojianacariqueea irirajia, namenaquequeate isavicaventajiaquenaqueea ocaniqui 3 savincaguiteri, niganquiquea iteroncacojianaca ishecacia. Imaicaqueea imaica teequeea onchoocateji taampaqueate irishecaciaquempaca.

³ Ariguetei nontigarancajiavetajempari iroaroaitanaje itsovironaquitequi aajiavaquerinishiatsi itaseane quenavoquirontsiqui, iconoagarantajiacaquea iquenaquenaivaepoji jmm osamani.

⁴ Iroompaqueea icanqueriquea itsatacaanejia:

—Ocaniquiquea teequeea quericaca guintenitantedparone. ¿Ariqueea querocampate irajiqueroqueea ocaniqui pan irojocajiaquenerica irishecaciaquempaca maasano inquemantajianaquempacate?

⁵ Icanqueriquea iriatimpa:

—¿Querocaquea ocarashequiaqueni pan choocatanquitsica?

Icanqueriquea:

—Ocarati 7.

⁶ Iroompaqueea Jesoshi icantajiaqueri maasano irisavisaviitaquequeea quepatsiqui. Yajiricajiaquero pan caratanquitsica 7, icantacovenquero: “Arioteesa.” Ariqueea icotarejaqueroqueea yojocajiaqueneri itsatacaanejia, iroqueate jocajiaqueneriquea maasano.

⁷ Ariqueea chooca aisa mavipaquijaniquipaete shima. Iriraqueea Jesoshi icantacovenqueri: “Arioteesa”, iroompaqueea icantajiaqueri itsatacaanejia irojocajiaqueneriquea maasano.

⁸ Ishecajiacaquea maasanojia, iquemajianaca. Oraqueea choocatapojajatsica iteguetajiroqueea itsatacaanejia cantiriqui, ocaratacovaetaji 7.

⁹ Maasano shiramparijia shecajianquitsica icaramirincavaeque 4,000. Iroompaqueea Jesoshi itigarancajiajiri iroaroaitanajeta.

¹⁰ Iriatimpa itetanajaro quenajarontsi, itsipatsipaitanajari itsatacaanejia, yoajianaquequeea irooshitacoquero Tarimanota.*

Iriraqueea pariseojia icantajiavecari Jesoshi ironigaajiaquerime oacaantantatsica intati

(Mt. 16.1-4; Irc. 12.54-56)

* **8:10** Oraqueea **Tarimanota** irooshitacoquero Magarara.

¹¹ Ariquea icoraquecoraqueitashipojiriquea pariseojia iramenantajiguempari, ican-tantajiapojacarica ironigaajiaqueri oacaantantatsica intati onquenantapojemparoja ontaniqui jenoqui inquitequi.

¹² Iriraquea Jesoshi yaajencataquitiquea icanque:

—¿Querocaquea icojiacani choocajatsica imaica inintantajiacaca ironigaajiqueri oa-caantantatsica intati? Arimaja noncantajiaquempi aatotari nonigaajiguiniritsi.

¹³ Ariquea itsinampirejajianajiri, itetanajaroquea quenajarontsiqui, imontemonteitanajaquea intatiqueroqui.

Jesoshi itsavetacotsitaqueri itsatacaantane pariseojia iquempetacaacaro anempoacaguiroca pan

(Mt. 16.5-12)

¹⁴ Irirajia itsatacaanejia ipeacojianacaroquea pan irajaianaqueme irishecajiaquem-pameca, aparoca ochoocaque quenajarontsiqui.

¹⁵ Iriraquea Jesoshi icanquequea:

—Aviatimpajia inchiquiojitaja pishecatacojigarotsi anempoacaguiroca pan irashijia pariseojia aisa Erorishi.

¹⁶ Irooquea iquemajivaqueroguetti iquenquetsatavacaajianaca, icanque:

—Manatarite yamenajiacajiquea teetarite amejii pan, jero ican-tantajiacaca imaica.

¹⁷ Iriraquea Jesoshi yamenajivaqueriguetti iquenquetsatavacaajianaca, icantsi-tariquea:

—¿Querocaquea ococani piquenquetsatacotantajiacaroca pan, picanquequea man-atarite namenaquempi teequea pameji pan? ¿Arimpate tequerata pinquemajigueji? ¿Tequerata pintsajigueji? ¿Ari quishoshirentajiaquempi?

¹⁸ Ochoocavecaquea poquijajia, ¿teequea pamenantajiguemparoji? Aisa piguempita, ochoocajiavecaquea ¿teequea pinquemantajiguemparoji? ¿Teequea pinquenquejajia-jeji?

¹⁹ Nocotarejaguequeroguetti 5 pan, noshecatacaajiacari 5,000 shiramparijia, ari-quea picapiocajiajiroquea choocatajatsica, ¿querocaquea ocarashequiavaetajini cantiripae pitseraiquijiajiro?

Iriatimpajia icanquequea:

—Ocaratacovaetaji 12.

²⁰ —Quejetacaquea aisa ocaratacovecaguetti pan 7, nocotarejaguequeneri 4,000 shirampari, iroompaquea pavijiguetajiroguetti choocatajatsica, ¿querocaca ocarashe-quiavaetajini cantiripae pitseraiquijiajiro?

Icanqueriquea:

—Ocaratacotaji 7.

²¹ Ariquea Jesoshi icanqueriquea:

—¿Tequeratampate pinquemajigueji?

Jesoshi yamenacajairi shamponcajari Vetsairaqui

²² Ariquea yarejerejeitapojaca Vetsairaqui. Yamajitapojiniri shamponcajari, icanta-jitapojiri impamiteri.

²³ Iriraquea Jesoshi yacatsavacotapanajantiri shamponcajari itsipatanacari ocaraguepojiguetti tsovironaquipae. Iquishoajatsitari iroquijiaqui, imavitepacotashitanacari ipamitaqueri icanqueriquea:

—¿Ari pamenaji?

²⁴ Yamenaveca icanque:

—Namenaguevecari caquinteja, iquempejiavecaro inchato, cotanquitsi yanijiniji-itanaque.

²⁵ Iquejetsitajariquea aisa imavitepacotashitanajari ipamijaquitsitajari iroquijaqui, iroompa icampanajanta jac amenamajatanaji, peamajatanaja, conijamajatanaji maasanopae.

²⁶ Ariquea Jesoshi itigarancajiri itsovironaquitequi icantavaqueri:
—Aatoja poapanajantitsi guinteninintsiqui, picamantacotanatsi.

Peerero icanque Jesoshi iriguenti Quirishitotatsica
(Mt. 16.13-20; Irc. 9.18-21)

²⁷ Ariquea yoanaquequea Jesoshi guinteninintsipaequi irooshitacoguetaquero ca guinteninintsi pajitatsica Sesarea Piripo, itsipatsipaitanacari itsatacaanejia. Oraquea quenavoquirontsiqui icoacojiaqueri:

—¿Taa ipaji ijijiaquena caquinteja? ¿Quero icantajiguini?

²⁸ Iriatimpajia icanqueri:

—Iconoagarantajia ca icantacojiaquempi: ‘Iriguenti Joancani Viñacajatantatsica.’ Itsipa cantajiananquitsica: ‘Iriguenti Iriashini.’ Itsipaquea cantajiananquitsica: ‘Iriguenti itsipa tsavetantatsicani.’

²⁹ Ariquea icanqueriquea:

—Aviatimpajia, ¿quero picantajiguini? ¿Taa nonaque naatimpa?

Icantsitanaca Peerero:

—Aviguenti Quirishitotatsica.†

³⁰ Icanqueriquea:

—Aatojate picamantacotanatsi.

Jesoshi icamantsicaro irimetojaque
(Mt. 16.21-28; Irc. 9.22-27)

³¹ Ariquea Jesoshi iparianacaroquea itsatacajiaqueriquea itsatacaanejia irantsipevaequempaquea irira Irijanite Caquinte. Irimanintajiaqueriquea jivajiatsica, saseroroteja anaantajianquitsica aisa tsatacaantajiguiroca itioncacotanaqueca Moishishini. Ariquea irimetojajiqueri, cotanquitsiquea aapojajempaguete 3 savincaguiteri impochatanaje.

³² Yoguiconejamajataqueneri. Irooquea iquemaquaguete Peerero itsipatanacari tiijai icantomajitsivetari.

³³ Cotanquitsiquea Jesoshi ipitsocanaca yamenanaqueri itsatacaanejia, ariquea icantomajitsitari Peerero, icantsitari:

—¡Poanaqueshinete, Satanashi! Teetarite pinquenquejacomajateroji inintaguequeca Aapani Irioshi, iroguentiquea piquenquejacoguequequea iquenquejaguete caquinte.

³⁴ Ariquea icajemajajiri omporoguijajianquitsica oraniqui aisa itsatacaanejia icanqueriquea:

—Quericaca nintanquitsineca iroguijatacoquena irovashiantanaqueroja inintashiguevetacaca iriatimpa, irinatashitapiniquempa inchapoa irompajacotan-tajiquemparica, mananiji iroguijatacoquena.

³⁵ Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenanea aisa irantsipeven-quemparoguete Quenquetsatsarentsi Oganejencatatsica tsavetantaquenaca irooca irimetojavenquenaquea, incoquempaniquea inchoocaguiteni.

³⁶ Ariguete inchoocavetaquempa agavejanquitsineca irashinquempari maasanopae quepatsipaequitica, cotanquitsiquea oncoramanitapojajeguete irimetojanajeguete

† **8:29 Quirishitotatsica.** Iguenquetsatsarequi guiriegojia icanqueguete **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijitaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano.

arigueti impeaquempa camorecariqui, ¿arimpate agavejaque irajaararo aavajeri? Aatoquea agavejitsi.

³⁷ Irashintamajavequemparoquea maasanopae, cotanquitsiquea aatoquea yagavejitsi irivegaraventavaquempa aatonijite yoguitsi camorecariqui.

³⁸ Quericaca pashiventacaaquenanea naatimpa aisa nocantaguequea inchoocaimojiaquerigueti caquinteja caarica quisho oamajatiri Irioshimajaca, irirajia covaequisherijia, ari inquejetaquempa quea irira Irijanite Caquinte impashiventacaapojaquempari quea iriatimpa oncoramanitapojajeguete incoraquetajeguete. Iroganejen-capojajempa quea, inquempetapojajempari Iriri, intsipatsipaitapojajempari ashivantijite comajashirentanquitsica.

9

¹ Aisa icanqueriquea:

—Noncanquempija arimajaguitatsi iconoagarantaca catintiitimojiaquenaca imaica, aato imetoji tequerataguete iramene quero icotani Aapani Irioshi imajirontaguete, ironigaimojiaqueriquea iragavejane.

Jesoshi icantashitatiimojiacari quea itsatacaanepae
(Mt. 17.1-13; Irc. 9.28-36)

² Ari quea anaanajaguete 6 savincaguiteri irira quea Jesoshi yoana que ontaniqui otsempiqui yagatsonquivaetana que quea osamani. Iriguentiquea itsipatsipaitanaca Peerero, Santiago aisa Joanca. Tee inchoocateji itsipajia. Iroompa quea taampina iriatimpajia yamenitsijigari quea Jesoshi icantashitatiimojianacari quea.

³ Ari quea ocotanaca iitsaare ocavorejatana que quea ocantashitatanaca tsiren oquitamaromajatanaque quea ocanca quempetaca queate oquitamarotiguete sharaca, tee quea iramenimajiteroji quitsaarentsi oguitamaroca yajacajitiroguete acaniqui quepatsiqui onquempetaquemparo iroatimpa.

⁴ Yamenitsijigari Iriashini aisa Moishishini itsipatsipaitacari Jesoshi iquenquetsatavacaajiaca.

⁵ Irira Peerero icanqueriquea Jesoshi:

—Tsatacaantantatsica, cameetsavae que achoocajia que ocaniqui. Intsishiatsi nompeacaguempaja 3 catisetarentsi, aparo pashinquempa aviatimpa, aparo irashinquempa Moishishi, otsipaquea irashinquempa Iriashi.

⁶ Teetarite intsateji querocaca incanquemeca, mana itsaroajianaquetari.

⁷ Iroompa quea omararotacojiapojajiri, ari quea iquenquetsajencajitana que omararosecanqueguete icanque:

—Iricatica irio Irijani, nopintsamajatacaca. Pinquemisantamajajiguerija.

⁸ Ari quea yamenitsijiavetaja aisa cajaraguiteni, aparo icatiaja Jesoshi.

⁹ Ari quea icoraquecoraqueitaji yoguirincajiaja, irira quea Jesoshi icanqueriquea:

—Aatotaja quericaca picamantitsi oratica pamenajia quea imaica. Intancorejanajeguete Irijanite Caquinte irimetojavetaquempaguete, ari quea pintsavetacotsijiguemparo quea.

¹⁰ Iriatimpajia tee quea quericaca incamanteji, mana quea icantavacaajiaca:

—¿Ora quea icanqueguete: ‘intancorejanajeguete Irijanite Caquinte irimetojavetaquempaguete’, taa quea icantacota que?

¹¹ Ari quea icoacotsijijaari Jesoshi:

—¿Quero ocotacani icanantacaca tsatacaantajiguiroca itioncacotanaquea Moishishini icantajia queguete iriquetita quea coraquetajatsine Iriashini?

¹² Iriatimpa icanque quea:

—Arimajaca ocanque Itioncacaantaqueca Aapani Irioshi iriquetitaquea coraqueta-jatsine Iriashini, irinetsanaguequeroquea maasano. Cotanquitsiquea oraquea itionca-cojiquerigueta Irijanite Caquinte, ¿queroquea ocoani ocanquegueti irantsipevaequem-paquea, aisa incatsimajiqueriquea?

¹³ Imaica noncamanquempi jac icoraquetaquiti Iriashini, cotanquitsiquea mana yantaguishejitaqueri maasano inintajitaqueca. Ariquea ocanque Itioncacaantaqueca Aapani Irioshi coramani itsavetsijitaroni.

Jesoshi yogueshitajiri chaajaniquitirajaca, yoguisotoajiniri ampatsini
(Mt. 17.14-21; Irc. 9.37-43)

¹⁴ Ariquea yarejerejeipojaja ichoocajiaquegueti itsipajia itsatacaanejia, yamena-jiapojajiri yomporoguijaventajari, aisa ichoocajiaque oraniqui tsatacaantajiguiroca itioncacotanaqueca Moishishini itsipatsipaicariquea iquenquetsatavacaajia, irooqueuea icanque irooqueuea icanque.

¹⁵ Yamenitsijiavajariquea icoraquepojaji Jesoshi ariquea icojianaca yamenamenai-tanaquequea intati. Maasanojia itacorojaianaca iquenquetsatacaajivajiri.

¹⁶ Iriatimpa icanqueriquea:

—¿Taaqueuea piquenquetsaventajiaqueca?

¹⁷ Iquenquetsatanaquequea aparo, icanqueri:

—Tsatacaantantatsica, namavequempiri irijani ishaquiacaca ampatsini, imacanata-caaqueri.

¹⁸ Querocagueta ichoocaqueni yaacotapojaquerigueta ariquea ipijempejacaacari ishi-motyonajavaetanaque, yatsicayajitanaca, iroompaquea aratsiquijini. Nocantajive-cari pitsatacaanejia iroguisotojiaquerime, cotanquitsiquea teequeuea iragavejajigueriji.

¹⁹ Icantanaquequea Jesoshi:

—¡Arisa picomirincajiga teequeuea paventemparoji iragavejane Aapani Irioshi! ¿Querocaquea oncarashequiavaeteni nosavicaventajiaquempi? ¿Queroca oncarashe-quiavaeteni nantsipetacojiaquempiquea? Iroosacanica iintsija pamajiaquenarijate ocانىqui.

²⁰ Yaajianaqueneriquea. Iriraqueuea ampatsini yamenavaquerigueta Jesoshi, ariquea icotanaca icantacaanaqueri tinquininini, ariquea itejanaquequea isavi quepatsiqui, itigaritigarivaetanaca tigaririri tigariri, ishimotyonajavaetanaque.

²¹ Iriraqueuea Jesoshi icanqueriquea iriri:

—¿Querocaquea ocaratanaqueni yajagantsitacotaca ishaquiacarigueta ampatsini?

Iriatimpa icanque:

—Jac yoshequiacovaetanaquequea, ishaquiitsitacaritarite coramani chaajaniquitira-jagueta.

²² Oconoaca manaqueuea yomposacaacariquea paamaripoquiqui, oconoaca yomposacaacari ojaaquiniqui irimetojaquerime. Imaicaqueuea arigueta pagavejaque aviatimpa, iintsija pimpintsatacojiguenashiatsi pamitacotenarishiatsi.

²³ Icanqueriquea Jesoshi:

—¿Queroquea ocoani picanquenaquea: ‘Arigueta pagavejaque’? Quericaca aventama-jaquemparineca Aapani Irioshi iragavejaqueroquea maasano.

²⁴ Iririjencavaetanaque iriri chaajaniquiri, icanque:

—Naventavecariqueate. Pagavejacaguenaja naventamajataquemparinijite.

²⁵ Ariquea Jesoshi yamenajivaquerigueta ishiashiaitashipojacari icaramirin-cavaeque caquinteja, icantomajitsitari ampatsini, icanqueri:

—Aviguenti cotacaacari, teeca inquemantempaji aisa teeca inquenquetsatantempaji. Imaicaqueuea noncanquempi pisotoanajerijate, povashiantanajerija iricatica, aatoqueuea picoraquetimatajitsi pishaquiajempari.

²⁶ Iriaquea ampatsini ariquea icotanaca icajemanaquequea jeeee, icantacaanaqueri tinquininini, isotoapanajantiri yovashiantanajiri joquijitsantsatata quempeniquea imetojaque, iconoajiacaquea icantantajiacaca:

—Metojaque.

²⁷ Cotanquitsiquea Jesoshi yacatsavacoqueriquea yoguitinajaqueri, ariquea icotanaja icatianaja.

²⁸ Ariquea yoanaji Jesoshi tsovironaqui, itsipatsipaitanajari itsatacaaneja, iriguenti choocajiajatsi, icoacotsijiapojajari:

—¿Querote ococani naatimpajia caarica nagavejantajigari noguisotoitajigueriji?

²⁹ Iriatimpa icanqueriquea:

—Iriaquea ampatsini quempecarica imaica aatoguete iroquetitaquea pamanajiguir-itsi Aapani Irioshi aisa aatoguete pisanticotiro pisheca,* aatoquea pagavejimajiguitsi poguisotojiaqueri.

Jesoshi icamantsitajariquea irimetojaque

(Mt. 17.22-23; Irc. 9.43-45)

³⁰ Ariquea yoanaji Jesoshi icantanaca Garireaquei. Teequea irininteji iramenajitavaqueri,

³¹ ininquetarite intsatacaajiaqueriquea itsatacaaneja. Ariquea itsatacajiaque-riquea, icanqueriquea:

—Iriaquea Irijanite Caquinte iracaantajiqueri, irajaiavaqueri caquinteja, ariquea irimetojiaqueri, cotanquitsiquea aapojajempaguete 3 savincaguiteri intancorejanaje.

³² Iriatimpajia teequea intsajiavaqueroji icanqueca, cotanquitsiquea omintsaroanaqueri incoacojiaquerime taa opaji icanque.

Quericaca anaamajatantanquitsineca

(Mt. 18.1-5; Irc. 9.46-48)

³³ Oraquea yarejerejeipojacaguete Caperenaqui yoayoaitanaquequea tsovironaqui, iroompaquea irira Jesoshi icanqueri itsatacaaneja:

—¿Taa opajita picantavaque picantavaque incajaranquítica quenavoquirontsiqui?

³⁴ Cotanquitsiquea iriatimpajia imativicajianaque, yamenajiaquequea iroguenti icantavaque icantavaque quericaca caavijica yanaantaque.

³⁵ Iriaquea Jesoshi isavicanaquequea, icajemajiaqueri itsatacaaneja carajianquitsica 12, icanqueriquea:

—Quericaguete nintanquitsineca iranaantaque aato yaventacotatsi, inchiquioji iriatimpa iramijiaqueriquea maasano.

³⁶ Ariquea yaitsitaquea aparo chaajaniquitanquitsica yogatiimojiaqueriquea itsatacaaneja, ariquea yatsomaititari icanqueri:

³⁷ —Quericaca shineventavaquemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineventavaca. Quericaca shineventavaquenane naatimpa, aatoquea aparo naatimpa ishineventavaca, irioquea aisa irishineventavaquempa tigarancaquenaca.

Quericaca teeca incatsimajiaji iroguenti itsipatacaji

(Mt. 10.42; Irc. 9.49-50)

³⁸ Ariquea icanqueri Joanca:

—Tsatacaantantsica, chapiniqui namenajiaqueriquea aparo yoguisotoaque-riquea ampatsini, iroguentiquea yaventashicari pivajiro. Cotanquitsiquea naatimpajia nocantimentajiaqueriquea, namenajiaqueriqueate teetarite intsipatsipaitajinica.

³⁹ Icanquequea Jesoshi:

* **9:29** Oconoaca paperi iroquetinica tee oncanteji ocantiqui: **aisa aatoguete pisanticotiro pisheca.**

—Imaica aatotarite picantimentajiguiritsi. Quericagoeti pamenajiaqueca avenquem-paroneca novajiro ironigaantaquerogueti oacaantantatsica intati, iriatimpa aatoquea taampina itsipatavajirotsi incantimanatavajenaquea.

⁴⁰ Quericagoetari teeca incatsimataji iroguenti itsipatacaji.

⁴¹ Quericago cavintsajaquempine jocacotaquempine oja pimiraqueca iroorijite non-intacaantaquero naatimpa, inquenquejaquegueti: ‘Irioriji irashi Quirishito’, arimaja aato opeapitsatari irinejacotajempa.

Caaviji incatsimatimentamajajiqueri covaeguishetacaantanquitsineca
(Mt. 18.6-9; Irc. 17.1-2)

⁴² “Taacagueti covaeguishetacaquempine aparo chaajaniquiri quejejiacarca iricajia tsarovoltaquenanece, incatsimatimentamajajitaqueriquea. Irootaquequea nontsatacaantajiaquempiroca aatonijite iquejejitiritsi imaica, iroquetitamequea intsatotacojiqunenerime itsanoqui iniroshimentapiri itononcantajitaca, irajaitanaqueriquea impishoncajatsijitempariquea inirojaniqui quentijani.

⁴³ Nonquejetacaajiaquempiroquea imaica: arigueti oncovaeguishetacaquempipaco, pincaratsitemparoquea. Cameetsavetaca pimpeaquempa tsatiavacori pichoocatigueti acaniqui quepatsiqui, aatoniji mavitepacotirajampigueti ipishoncajitimpi camorecariqui aatoca otsivaquitsi.

⁴⁴ Ontaniquiquea aato imetojitsi igueni aisa aato otsivaquitsi paamari.

⁴⁵ Aisa irogueti covaeguishetacaquempine piguiti, pincaratsitemparoquea. Cameetsavetaca pimpeaquempa tsatiaguitiri pichoocatigueti acaniqui quepatsiqui, aatoniji maviteguititirajampigueti ipishoncajitimpi camorecariqui.

⁴⁶ Ontaniquiquea aato imetojitsi igueni aisa aato otsivaquitsi paamari.

⁴⁷ Aisa irogueti covaeguishetacaquempine poquija, pintaguirorejaatsitempa. Cameetsavetacaquea apaoquivetaquempi pinquijapojajegueti imajirontagueti Aapani Irioshi, aatoniji mavioquivetimpigueti impishoncajitaquempi camorecariqui.

⁴⁸ Ontaniquiquea aato imetojitsi igueni aisa aato otsivaquitsi paamari.

⁴⁹ Maasanojiaquea osocapojempari paamari, quejetaca icachoanejitirigueti viratsi imetojajitirigueti Aapani Irioshi.†

⁵⁰ Oraquea incachoanepane cameetsavaeque, cotanquitsiquea ariguetioma masanacategueti, ¿querocampate incojitajeroni incachoanetantajitajemparo? Pinquejetemparoja incachoanepane cameetsatatsica, aisa pinconoavacaamajaquempaja.”

10

Icanque Jesoshi aatoja quericago vashiantirotsi imanquigare
(Mt. 19.1-12; Irc. 16.18)

¹ Ariquea isotoanaque Jesoshi, yoanaquequea Joreaquei aisa intatiqueroqui Jororane. Iroompaquea yarejetapojacagueti yomporoguijajivempojacariquea aisa icaramirin-cavaeque caquinteja. Ariquea itsatacajiaqueri iquempetapiniquerogueti.

² Ariquea iconoagarantajiaquea pariseojia icoraquecoraqueipojaque icoacojiapojaqueri iramenantajiaquempariniji, icantajiapojaqueri:

—¿Arite icantimentantajitiro irovashianterogueti shirampari imanquigare?

³ Iriatimpa icanqueriquea:

—¿Querocampate icanqueni Moishishini itioncacotanaquerogueti?

⁴ Iriatimpajia icanquequea:

† 9:49 Chooa mavite ocantacoqueca ocatica. Maasano teeca intsariventempari Aapani Irioshi iroanaque camorecariqui. Irioquea aisa ocantacoque tsaroventarica Quirishito irantsipevaetanaquempa acaniqui quepatsiqui impishoncamajatanajeroniji quempevaetagantsi.

—Irraquea Moishishini ishinetsitari arigueti irovashiantanajero shirampari imanquigare, irojoquitenemparojate paperi otioncacagueti yovashianquero,* ariquea inti-garanquitsitemparo oanaje.

⁵ Icanque Jesoshi:

—Irraquea Moishishini manatarite yamenajiaquempiquea quishoshirentavaequempi, jero iquejetacaanquempiroca imaica itioncanquempiroca.

⁶ Cotanquitsiquea iroaqueragueti ipeacaaguecarigueticua Aapani Irioshi maasanopae, 'ipeacaacariquea shirampari aisa manquigarentsi.'[✧]

⁷ 'Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare,

⁸ apatsinoroquea incantanajempa. Ariquea iroaqueragueticua tequeratagueti irimanquigatemparoji, mavite icarajiveta, ariquea imanquigacarogueti ariqueate icojianaca tee irimavitetajeji, quempetanajaqueate apatsinoronica icantaja.'[✧]

⁹ Jeroquea imaica oraquea itsipatacaantacaca Aapani Irioshi, aatojate itsiparejajiro caquinte.

¹⁰ Ariquea yoayoaitanaji tsovironaqui qui icoacomajajiaqueriquea itsatacaaneja.

¹¹ Iriatimpa icanqueriquea:

—Quericaca ovashianqueroneca imanquigare manquigatajemparoneca otsipa, manaquea icovaeguisheca yaimentacocarero iroquetica.

¹² Ariquea oquempetaca, iroogueti manquigarentsi ovashiantanaquerineca manquigataroca manquigatajemparineca itsipa, manaquea aimentacari.

Jesoshi yamanacoventajiaqueri chaajaniquirijia

(Mt. 19.13-15; Irc. 18.15-17)

¹³ Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji. Irraquea itsatacaaneja yamenajiavaquerigueti yamajiaquenerigueti, icantomajavaqueriquea.

¹⁴ Cotanquitsiquea yamenaquegueti Jesoshi, osemacaaquitari icanqueriquea:

—Ariotaquetsija incoraquequetate chaajaniquirijia naatimpaqui, aatoquea pojocaavaca, ishineventajiacaritarite Aapani inquitequitica irimajirontacotaquempari quenquejajatsica quempecarica iriatimpajia.[†]

¹⁵ Iroomajaca noncantajiaquempica: quericaca nintanquitsineca impejaeri Aapani Irioshi Imajirote inquempetajempariquea chaajaniquitirajaca. Oraquea aatogueti iquempetaritsi, aatotarite iconoapojajari maasano peajiaquerica Imajirote.

¹⁶ Iroompaquea inajiaqueriquea chaajaniquiripae, ipamijiaqueri yamanacoventajiaqueri incavintsajamajiaquerinijite Aapani Irioshi.

Ajaarantavaetatsica

(Mt. 19.16-30; Irc. 18.18-30)

¹⁷ Oraquea yoanajigueti Jesoshi yameniri icoraquepoji irira caquinte ishiashitapojacariquea iguero vempojacari icanqueri:

—Tsatacaantantatsica cameetsari, ¿queroquea noncoquempani cameetsanijite nonco-guitempaninijite nonchoocaguiteni?

¹⁸ Icanqueri Jesoshi:

—¿Queroquea ococani picantantaquenaca 'cameetsari'? Teequea inchoocateji cameetsari, aparo icoca Aapani Irioshi.

* **10:4** Oratica paperi icanquero quimajareri **certificado de divorcio** (irooca aisa **carta de divorcio**). Iroguenti paperi itioncajiquerogueti quejecaroca: "Imaicaquea novashiantajiro nomanquigavetacaca, aato nomanquigatajaro." (Pamenero Os. 2.2 aisa Ireo. 24.1-4.) ✧ **10:6** Jen. 1.27. ✧ **10:8** Jen. 2.24. † **10:14** Irirajia chaajaniquitanquitsica tee iraventacojiguempaji, mana ishineventajiapojacari Jesoshi, iquemisantajiaqueri. Ari anquempejiaquempaquea aatimpa.

¹⁹ Pitsaquerouquea maasanopae itioncacotanaqueca Moishishini, ocanquequea: ‘Aatoja pimetojanti, aatoja poashitiro manquigarentsi, aatoja paitsitanti, aatoja pitsojeacotantimatatsi, aatoja pamatavijantitsi, pinquenquejacameetsatacoquerija piri aisa piniro.’

²⁰ Iriatimpa icanqueri:

—Tsatacaantantsica, aritarite noquempetaca imaica, noparianacarouquea nonet-sanamajatanaquequea maasano nochaajaniquipojigueti narejevaecaro imaica.

²¹ Yamenitsitanacariquea Jesoshi ipintsatacotanacariquea icanqueri:

—Imaica apanivani poanaquequea pojocantaguetanaquequea maasanopae pash-intaguecaca, paantajiaquemparouquea imentaquipae pojocajiaqueneri coguitejacojian-quitsica, pinquejetaquerogueti onchoocataje oganejencaro shinetacajaempineca on-taniqui inquitequi. Ariquea pincoraquetajeja poguijatanaquea.

²² Iquemitsitarouquea icanquerica ariquee ocotanaca otsimeteitacaanaqueri, ariqueeate yoanaji, ishimampojancaetaanacaquea, iriguentitari ajaarantavaetatsica.

²³ Iriaquea Jesoshi yamenajiaqueriquea maasanopae, ariquee ican-tajiguiri itsata-caanejia:

—¡Omanapitsamajataquempariquea ajaarantavaetatsica inquijanaque imajirontagueti Aapani Irioshi!

²⁴ Irooquea iquemajiaquerogueti icanqueca, yamenamenaitanaquequea intati itsat-acaanejia. Yapijitajiroquea Jesoshi icanque:

—Nirijanijiate, omanapitsamajataquempari inquijanaque imajirontagueti Aapani Irioshi iriraquea aventaroca irajaararo.

²⁵ ¿Arimpate iragavejaquequea cameyo inquijanaquequea itepoquiqui quisaatonquiri irisotoanaqueriquea antaqueronta? Aatoquea yagavejitsi. Iriompaquea ajaaran-tavaetatsica caaviji anaquerero omanapitsataquempari inquijanaque imajirontagueti Aapani Irioshi.

²⁶ Iquemitsijigari itsatacaanejia arimpaqueate yamenamenaitanaque intati, ican-tavacaajiaca:

—Iroosacánica, ¿quericampate agavejanquitsineca iraavajempa?

²⁷ Yamenajianaqueriquea Jesoshi icanqueriquea:

—Iriaquea caquinte teequea iragavejeroji, iriguentiquea Aapani Irioshi agavejatsi, yagavejaquerotari maasanopae.

²⁸ Iroompaquea ican-tanaque Peerero:

—Nomajirote, naatimpajia novashiantajianaquequea maasanopae nashintague-caca, noguijaguijaitanaquempi.

²⁹ Icanque Jesoshi:

—Iroomajaca noncantajiaquempica, quericaca vashiantajianaqueroneca itsoviron-aquite, irioca iriguentijeguitepae, itsijoitepae, iriniro, iriri, irijanijiate, irooca inigan-quitejire, cameetsanijite irisavicavenquequea notigaranquimenquerica intsavetan-timojianaqueriquea itsipapae intsatacaajiaqueriquea Quenquetsatsarentsi Oganejen-catatsica,

³⁰ irojocajitajeneriquea otsipa itsovironaquite ocaniqui quepatsiqui oshequiavae-quequea aricaca oncaravaequequea 100, aisa inchoocajiaque itsipapae iriguentijegu-itepae, itsijoitepae, iriniropae, irijanijiate, iniganquitejire. Cotanquitsiquea incatsima-timentajiqueri iramenajiquerigueti itsarovenquenaquea. Oncoramanitapojajegueti incoguitempaniquea iranijaguiteni.

³¹ Icaramirincavaequequea yamenajivetacaca imaica yanaantavaeque, cotanquit-siquea oncoramanitapojajegueti aatoquea yanaantajitsi. Aisa icaramirincavaeque-teca iranaanteji imaica, oncoramanitapojajegueti iranaantavaetanaque.

*Jesoshi icamantajajiri aisa irimetojaque**(Mt. 20.17-19; Irc. 18.31-34)*

³² Ariquea iriatimpajia ishivoquishivoquitanacaroquea quenavoquirontsi itonco-toncoitanaque iroaroaitanaquequea Jerosarequi. Iriquetitaquea oananguitsi Jesoshi, iriraquea itsatacaanejia yoguijaguijaipojiri, yamenamenaitanaquequea intati. Itsipajia guijajianaquerica itsaroajianaquequea. Ariquea yapijitajiro Jesoshi itsipajianajari tijacoñaji itsatacaanejia carajianquitsica 12, ariquea iparianacaro icamanqueri quercaca incojiquerini ontaniqui Jerosarequi.

³³ Icanqueriquea: “Imaicaquea antoncotoncoitanaque oahoaitanaque Jerosarequi. Ontaniquiquea ontaniqui arejerejeiquempagueti manaquea iraacaantajiqueru irira Irijanite Caquinte, irajaitanaqueru ichoocajiaquegueti saserorotejia anaantajianquitsica aisa tsatacaantajiguroca itioncacotanaqueca Moishishini. Iriatimpajia incanquequea: ‘Iintsishiatsi irimetojajiterini.’ Ariquea irajaitanaqueriquea ichoocajiaquegueti teeca irijorijoigueti irimetojacaanqueriquea.

³⁴ Iriatimpajia irantanaguishevaequeru, inquishoquishoavaequeru, aisa impasapaisiqueru agompiaquitempari. Ariquea irimetojajiaqueru, cotanguitsiquea aapojajempagueti 3 savincagueti intancorejanaje.”

*Inintajavecaca Santiago aisa Joanca**(Mt. 20.20-28)*

³⁵ Ariquea iquempejiquempejiipojiriquea Santiago aisa Joanca, irijanijiate Severo, icanqueriquea:

—Tsatacaantantsica, nonintajiaque pinetsanamajajiaqueroquea noncantajiaque-mpica imaica.

³⁶ Iriatimpa icanqueriquea:

—¿Taate opajita pinintajiaque nantempica?

³⁷ Icantajiaqueru:

—Aapojajempagueti pimpeaquempagueti Imajirojiate maasano, nonintajavecaquea poguisavisaviitaquena nosenampijajiaquempu, aparo savicanquitsineca pitincamijempequiqui, aparo pishinampijempequiqui.‡

³⁸ Cotanguitsiquea Jesoshi icanqueriquea:

—Teequea pintsajiguroji ocatica pinintavecaca. ¿Arimpate pagavejajiaquequea aviatimpajia pimire nomiraquempaca naatimpa? ¿Arimpate pagavejajiaque poviñacajatacaantantaquemparo noviñacajatacaantantaquempaca naatimpa?§

³⁹ Iriatimpajia icanqueriquea:

—Jeejeguitatsi nagavejaquempa.

Icanqueriquea Jesoshi:

—Pitampaticamajataquero pimiraqueroquea nomiraquempaca naatimpa, arimaja poviñacajatacaantantaquemparo noviñacajatacaantantaquempaca naatimpa.*

⁴⁰ Cotanguitsiquea teequea naatimpa cantatsineca quericaca senampijaquenanece savicanquitsineca notincamijempequiqui aisa noshinampijempequiqui. Iriguentiquea cantanquitsica Aapani Irioshi paesatoniqui iroaqueragueti.

⁴¹ Ariquea iquemajivaquegueti itsipajia 10 itsatacaanejia itijerequijianaqueru Santiago aisa Joanca.

⁴² Cotanguitsiquea Jesoshi icajemajiaqueriquea icanqueriquea:

‡ **10:37** Irira savicatsica itincamijempequiqui majirontatsica yanaajiaqueru itsipajia, iquejemajirovecari majirontatsica, aisa iquejetaca savicatsica ishinampijempequiqui, iquejemajirovetajari. § **10:38** Ocaticaquea icanqueca Jesoshi manaquea iquejetacaacaro irantsipequempagueti, oquejetaca incanquegueti: “¿Arimpate pagavejajiaquequea aviatimpajia pantsipevaequempaquea pinquempejiaquenaquea naatimpa nantsipevaetaquempagueti?”

* **10:39** Iquempetacaacaro Jesoshi, quejetacaquea incanquegueti: “Pitampaticamajataquero pantsipevaequempaquea pinquempejiaquenaqueate naatimpa nantsipevaetaquempagueti.”

—Pitsajiguiritarite iriraquea ipejiaqueca imajirojiate teeca irijorijoigueji manaquea yatsanavaecari igonorija, ariquee iquempejiaca iramajiroreja yomperaperacari irashijia.

⁴³ Cotanquitsiquea aviatimpajia aatoquea piquejejiga. Ariguenti quericaca nintanquitsineca iranaantimojiaquempi, impeitsitimpaja amijiguempineca.

⁴⁴ Quericaca nintanquitsineca irijivatante, impeitsitimpaja iromperare maasano.

⁴⁵ Quempecaquea Irijanite Caquinte teequea irooquea incoraquetashiteji iramijitavaqueri, iroguenti icoraquetashique incavintsajantapoje, aisa irimetojaventsitempariquea maasanojia, onquejevequempaquee irivegaraventajajeneri irisotoimentajianajeniji santanatacojiavetanquitsica.

Jesoshi yamenacajairi shamponcajari Varitimeo
(Mt. 20.29-34; Irc. 18.35-43)

⁴⁶ Iroompaquea yarejetapojacaroquea Jesoshi Jericoqui, itsipatsipaitapojacariqueea itsatacaane. Oraquea yoanajigueticquea arimpaqueate yoshequiavaetanaquequea oguijaguijaitanaquerica. Ariquee oraniqui ocaravoquitapojigueti quenavoquirontsi isavicaque shamponcajari pajitatsica Varitimeo, iriguentiquea irijanite Timeo. Iriatimpaquea iroguenti isavicaventi yamanantagueti imentaquipae.

⁴⁷ Irooquea iquemacoquerigueti coraquetapojishiatsi Jesoshi Nasarequitica, icajemitsitanacaquea iririjencatanaque, icanque:

—¡Jesoshii, Ichoviquitanaqueca Taavini, pimpintsatacotenashiatsi!

⁴⁸ Icantomajajiaqueriquea oshequini, icantsijavetari irisanticotanaque, cotanquitsiquea iriatimpa arimpaqueate icajemamajatanaquequea:

—¡Ichoviquitanaqueca Taavini, pimpintsatacotenashiatsi!

⁴⁹ Icatiapojaquea Jesoshi icanque:

—lintsijate pincajemerijate.

Icajemitsitari shamponcajari icanqueriquea:

—lintsija, imaica pishinevaetanajempaja, pincatianaje, icajemaquempiqueate.

⁵⁰ Icatiitsitanaca ipishoncapanajantiroquea isavotacaca ishiashitanacariqueea Jesoshi.

⁵¹ Icantavaqueri Jesoshi:

—¿Taa opaji pininque nantaquempiro?

Icanti shamponcajari:

—Tsatacaantantatsica, noninque namenaje.

⁵² Icanqueriquea Jesoshi:

—lintsija poanaje, pitsaquetarite nagavejaque namenacaajempi, paventantaquenaca, irootaquequea pamentanajaca.

Ariquee icotanaca amenaji, yoguijatanajiri quenavoquirontsiqui.

11

Yarejetapojacaroquea Jesoshi Jerosarequi
(Mt. 21.1-11; Irc. 19.28-40; Jn. 12.12-19)

¹ Iroompaquea irooshipojigueti irarejerejeipojemparo Jerosare, yarejerejeipojajaroquea Vetepaje aisa Vetania Orivotsempiqui. Ariquee iriraquea Jesoshi itigarancajiaqueriquea mavite itsatacaane icantajiavaqueriquea:

² —Poanaquequea ontaniqui quempeji guinteninintsiqui, ariquee pamenajapojeri aparo aashino irijanigantirenajaniqui shiticacotaca, tequeratatirajaquea irishiashiavijitacotantajitempariji. Pishiticarejacojianaqueri pamajiaquenarija.

³ Choocagueti cantajiaquempineca: ‘¿Querocampate pincojiaquerini?’ Aviatimpajia pincantajigueri: ‘Iriguenti coacotacari Amajirote, taampinatari iroguipijaempiri.’

⁴ Ariquea yoayoaitanaquequea yamenajiapojiriquea shiticacotaca tsovironaqui qui sotomorontsi qui ocaravoquitapojigueti quenavoquirontsi, ari quea ishiticarejacojiaqueriquea.

⁵ Iri quea choocajianquitsica oraniqui icanqueriquea:

—¿Querocaqueate pincojiguerini? ¿Taaquea pishiticarejacotancarica aashinogantirenananiqui?

⁶ Icantanaqueriquea iriatimpajia icantajiavaquerica Jesoshi, ari quea ishinejiaqueneri iraaianaqueneri.

⁷ Ari quea yaajianaqueriquea yamajiaqueneriquea Jesoshi, ipashicamititsajiaqueneri iitsaarepaequi, iriatimpa isavicantanacari ishiacotantanacari quea.

⁸ Irirajia tirorencaventajiacarica iconoagarantajiaca quea yovemaroncaashijiavaqueri iitsaare quenavoquirontsi qui, itsipapae aavashijiavanquitsica ovashi ivemaroncaashijiavaqueriquea.*

⁹ Irirajia iriquetica oahoaitananquitsica aisa irirajia guijaguijaitaquerica icajemajianaque, icanque:

—¡Caaviji yoganejencamajataca!

—¡Intsishiatsi irishineventajiquempari iricatica coraquetapojatsica itigarancaqueca Majirontamajatsica!

¹⁰ —¡Ari incoquempani irishineventajiquempariquea iricatica peanquitsineca Amajirojiate inquempetajempariquea Taavini ipeavecagueti coramani imajirojiate choviquijianacajica!

—¡Caaviji yoganejencamajataca Aapani Irioshi choocatatsica jenoqui!

¹¹ Ari quea yarejetacaroquea Jerosarequi, yoanaquequea teemporoqui itsaromentantajitarica Aapani Irioshi, yamenaguepojiroqueate itsitacaguetapojiroquea. Iroompaquea incajaranquiguitetanaquitigui isotoanaji yoanaji Vetaniaqui, itsipatsipaitanajari itsatacaanejia carajianquitsica 12, javaetanaji catsirincaiteri tsaparoncaguite-tanaja.

*Jesoshi icanqueroquea iguera aatotarite ochoocatajitsi osovena
(Mt. 21.18-19)*

¹² Ari quea osavincaguitetanajigueti isotoanajirogueti Vetania, itaseapojiquea Jesoshi.

¹³ Yamenacotsitapojacaroqueate iguera choocatanquitsica ovana, irootaquequea yoantapanajantaca iramenamajapananteroquea choocaca osovena, cotanquitsiquea iquempejivetapojacaroquea quempeji teequea anejeroji, iroguentini ovana. Tequeratarite arejetempaji ochoocatantaca osovena.

¹⁴ Icantsitaroquea:

—Imaicaquea imaica aatoquea ishecatimajitajarotsi pisovena.

Iquemajiaqueriquea itsatacaanejia.

*Jesoshi yoguivorocajiaqueri jocantantajiavecaroca teemporoqui
(Mt. 21.12-17; Irc. 19.45-48; Jn. 2.13-22)*

¹⁵ Ari quea yarejerejeitaca Jerosarequi, iquijianaque Jesoshi oniganquirequi oticaacoroqui teemporo itsaromentantajitarica Aapani Irioshi, yamenajiapojiriquea jocantantaguetirica viratsipae intsompogui oniganquirequi aisa vegaratantajiguirica. Yoguivorocajiapojaqueriquea maasanojia, aisa yapitaquiaguequeroquea ishitaponcaropae

* **11:8** Yovemaroncaashijiavaquerigueti iitsaare quenavoquirontsi qui aisa ivemaroncaavoquitashijiavaquerigueti ovashi, manaquea iquejetacaavacari majirontatsica ishineventajigueti.

yojoquijitantarica imentaquitsite guipiantajiguirica imentaquipae.† Iquejetsigueta-
roquea aisa isavisaviitantacaca jocantajiguirica emorenipae.

¹⁶ Icantimentajiaqueriquea maasano aatotarite iquijacaantajianacaro oniganquire-
qui teemporo irajaianaquero irajaararopae iravisacaantajianaquemparo antaque-
ronta.

¹⁷ Ariquea itsatacajiaaqueriquea icanqueriquea:

—¿Arimpate tee ontionquempaji: ‘Oratica notsovironaquite incantacojitero iroguenti
ashi incoraquebantapinijitempa caquinteguetsica iramanajiaquenani?’* Cotan-
quitsiquea aviatimpajia manaquea pipeacajiacaro imoro itsititancaca aitsitantajiat-
sica.*

¹⁸ Iroompaquea iquemacojiaqueriguete saserorotejia anaantajianquitsica aisa tsat-
acaantajiguiroca itioncacotanaqueca Moishishini inintajiavecaquea irimetojajiaquer-
ime, cotanquitsiquea querocampate incojiaquerini, itsaroacaajiacariquea, yamenajia-
queri yomporoguiaventajiacari maasanopae yamenamenaitanaquequea intati ishin-
eventajianacari itsatacaantavaequegueti.

¹⁹ Ariquea opitsecajencatanajiguete, yoanaji Jesoshi, isotoanaquero Jerosare.

Oshimpeguiricanaquequea iguera

(Mt. 21.20-22)

²⁰ Osavincaguitetanajiguete yoayoaitanaji, yamenacojianajiro iguera jac sampirocani
metojamajataque maasano ovaritsa.

²¹ Iiraquea Peerero iquenquejitanajaro chapinquitica, icanque:

—Tsatacaantantatsica, iintsija pameneroja intati ontatica iguera picantaqueroquea
chapiniqui aatonijite ochocatajitsi osovena, imaicaquea metojaque.

²² Icanque Jesoshi:

—Paventaventaitemparijate Aapani Irioshi.

²³ Iroomajaquea noncantajiaquempica, quericaca cantaqueroneca ocativa ot-
sempi: ‘Poanaquetsija pojocajatemala inirojaniqui quantijani’, aatoguete iquenque-
javeta: ‘Arica’, iroguenti iraventamajaquempariquea Aapani Irioshi, ariquea oanaque-
quea ojocajapojempa.

²⁴ Jero imaica nocantantajiaquempica, taaca opajita pamanajajiaquerica Aapani
Irioshi pamanajiaqueriguete, paventamajaquemparija pintsamajajiaqueja arimajaca
irojocajiaquempi, ari oncotanaquempa.

²⁵ Oraquea pamanajigueriguete Aapani Irioshi, choocaguete picatsimajiaqueca, iro-
quetitaquea pimpeacojiajempari taaca opajita icatsimatacaquempica cameetsani-
jite irishinevenquempinijite Piri choocatatsica inquitequi irishetajempironijite pipea-
caaguishejiacaca aviatimpajia.

²⁶ Cotanquitsiquea aatogueteja pipeacojiajaritsi ipeacaajiacaca catsimatacaquem-
pica, aatoquea ishetajirotsi Aapani Irioshi choocatatsica inquitequi pipeacaaguisheji-
acaca aviatimpajia.

Icoacojitaqueriquea Jesoshi taaquea tigarancaqueri

(Mt. 21.23-27; Irc. 20.1-8)

²⁷ Ariquea yarejerejeitapojajaro Jerosare, iriraquea Jesoshi iquijanaquequea intsom-
pogui oniganquirequi teemporo yanijivijitaque. Incajaranquiguitetanaqueguete ico-
raquecoraqueitashipojaqueri saserorotejia anaantajianquitsica, itsipatsipaicariquea
tsatacaantajiguiroca itioncacotanaqueca Moishishini, icoraquejiaquequea aisa jivajiat-
sica.

† 11:15 *guipiantajiguirica imentaquipae*. Incoraquequeguete joriojia quenajiapojatsica otsipapae guintenin-
intsipaequi iramajiaqueguete cantashitatiaguetanquitsica imentaquipae, irojocajiapojaqueneri guipiantajirica
imentaquipae irojocajivajeneriniji itsipapae cameetsaniji irojocagarantajiajeneriniji Aapani Irioshi teemporoqui,
irioica irivegarajiaque viratsi irojocajiaquenerica. * 11:17 Is. 56.7. * 11:17 Jer. 7.11.

²⁸ Icantajipojaqueri:

—¿Taaquea cantaquempi piquempetancaroca imaica poguivorocantajiacarica jocantantajatsica? ¿Taampate tigarancaquempiquea?

²⁹ Iriroquea Jesoshi icanqueri:

—Iintsija naatimpa noncoacotempi. Poguisotoaquenarogueti, ariquea nonquempetsitempa naatimpa noncamanquempiquea queri tigarancaquenaca.

³⁰ Iviñacajatantigueti Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquinteja? Iintsija pincamantena.

³¹ Irooquea iquemajivaquegueti iquenquetsatavacaajianaca icantajianaque:

—¿Querote ancoterini? Ancantsivetemparigueti oquenantapojaca inquite, iriatimpa incantanaque: ‘Iroosacanica ¿queroquea ocoani teeca pinquemisantantajiguempariji?’

³² ¿Cotanquitsiquea arigueteja ancantsivetempari oquenantapojaca caquinteja...?

Manatari itsaroacaajiacariquea omporoguijajianquitsica, maasanopaetari icanque irira Joancani iriguenti tsavetantatsica itigarancaqueca Aapani Irioshi.

³³ Jero icantantajiacarica Jesoshi:

—Teetari nontsajiguenica.

Ariquea Jesoshi icantajipojaqueri:

—Iroosacanica, ariquea nonquejetaquempaquea naatimpa, aatoquea noca-mantimpitsi quericaca tigarancaquenaca naatimpa.

12

Jesoshi iquempetacaajiacariquea quempoguijavetaroca ovaitsoquimashi
(Mt. 21.33-46; Irc. 20.9-19)

¹ Ariquea Jesoshi iquempetacaacotacanari icanqueriquea:

—Ichooqueue aparo caquinte yashincaquea iguepatsite. Iroompaquea imiamaroncaqueroquea ovaitsoqui, itantotacoqueroquea. Iqueecashiqueroquea yagaticantajitaroca ovaitsoqui osotoajatantanaquempaca ovaja, ipeacaitsitaroqueuea irisavican-taquempaca jenoqui quempoguijaqueroneca cameetsanijite iramenamajaqueronijite aatonijite yaajiguetirotsi. Iroompaquea icajemajiaqueri itsipapae irishiacojiaqueneriquea. Oraquea onchoocatanaquegueti irojocagarantajiaqueneri iriatimpa. Ariquea yoavaetanaquequea jmm osamani.

² Ocoramanivaetapojigueti aapojajaguetei osamparipiotantanacaca ovaitsoqui itigarancavecari aparo yashincaca iramanajajateriquea irojocagarantajiajenerime iriatimpa.

³ Cotanquitsiquea iriraquea shiacojiaqueroca manaquea yaajivaqueri itavatavaajiaqueri itigarancajajiri ejempaco.

⁴ Ariquea irira ashincarooca itigarancquitsitaja itsipa. Iriatimpa iroguenti iquirajashitequitacaajivaqueri icantaguishejiavaqueri.

⁵ Itigarancavetaja itsipa, ariquea imetojajivaqueri. Iroompaquea itigarancquitsive-taja itsipapae oshequini. Iconoagarantacaqueate itavatavaajivaqueri, itsipapae imetojajivaqueri.

⁶ “Iriguenti choocatajatsi irijanite ipintsamajatacaca. Ariquea itigarancquitsitari iriatimpa, icanque: ‘Iriocampa nirijanite, iriguentiquea irajaitavaque cameetsa, in-quemisantajivaqueri.’

⁷ Cotanquitsiquea iriatimpajia irooquea yamenavaqueriguetei icoraquepojiguetei iquenquetsatavacaajianaca icanquequea: ‘Jeeri irintatica ashinquemparoneca maasanopae irimetojanajeguetei iriri. Jamequetiroshiatsi ametojajivaqueri cameetsanijite aatimpajia ashintamajatajemparoneca.’

⁸ Iroompa yarejevipojaca yaajivaqueriquea imetojajiaqueri, ipishoncavaequitiri antaqueronta otantotacocaguetei ovaitsoquimashi.

⁹ “¿Imaica querocaca incojiaquerini ashincaroa iguepatsite? Manaqueate iroashiji-aquiteriquea irimetojajiaquiteri, itsipapaequeate incajemajiaje quempoguijitaжеринеца iniganquitejire.

¹⁰ “¿Arimpate teequea pampatsajavantacojigueroquea Itioncacaantaqueca Aapani Irioshi coramaniqui? Ariqueate ocanquequea imaica: ‘Oraquea ogota mapi teeca irishineventajiavetempaji peacaajiacaroca mapipanco, opeanacaquea anaantamajatanquitsica quishotacaaqueroca.

¹¹ Iiraquea Aapani Irioshi ipeacajaaroquea. Amenajiaqueroquea aatimpajia oganejencani.’ ”

¹² Iriatimpajia inintajiaveca iraacaantajiaquerimequea, iquemajiavaqueritari iriguenti iquejetacaajia, cotanquitsiquea itsaroacaajiacariquea omporoguijajian-quitsica, jero yoayoaitantajanacaca.

Icoacojiqueri Jesoshi cameetsavaequempa irojocajiqueneri Sesa imentaquipae (Mt. 22.15-22; Irc. 20.20-26)

¹³ Iiraquea pariseojia itigarancagarantajiaquequea itsatacaane aisa shinevencarica Erorishi* iroaroaitanaque ichoocaquegueti Jesoshi incommitacaajiaquempari cameet-sanijite onchoocaquenijite incanqueca ompampiatantapojempaca incatsimatacaanta-jiaqueri.

¹⁴ Iriatimpajia yoayoaitanaquequea icantajiapojiri:

—Tsatacaantantatsica, notsajiaque aviatimpa teetarite pamataguempaji. Tee inchoocateji quericaca pagamajaquempaca, aisa teequea pintsaroacaguempariji caquinte, irioca anaantavetanquitsica, irioca teeca iranaanteji. Pitsataciantigueti tam-patica poaquero picamanquerigueti queroquea incojiaquempani irinetsanajigueroniji inintaguetica Aapani Irioshi. Aviatimpa pitsatiroqueate incanqueca majirontatsica Sesa incanquegueti maasanojia joriojia irojocagarantapinijiaqueneri imentaquipae. Imaica ¿queroca pincanteni? ¿Cameetsampa nojocajiaqueneri, aricaca tee oncameetsateji?

¹⁵ ¿Ariquea nojocajiaqueneriquea, aricaca aato nojoquiniritsi?

Cotanquitsiquea Jesoshi itsatavaqueroquea teequea cameetsa incantajigueji, man-aquea ishinetamampeajiaqueate intati, irootari icantantacarica:

—¿Quero ocoani pinintantajiacaca pincommitacaajiaquename? Iintsija pojocajigue-narijate apamentaquiuro tenario† nameneritate.

¹⁶ Iriatimpajia yojocajiaqueneriquea. Iroompaquea icanqueriquea:

—¿Taa ipajita iricatica ivaantorijiqueca? ¿Taaquea ashintaro ivajiro tioncanquitsica?

Icanqueriquea:

—Iriguenti majirontatsica Sesa.

¹⁷ Icantsijigari Jesoshi:

—Iroosacánica, pojocajiajenerijate Sesa yashincaca iriatimpa pinetsanati-menqueroniji incanqueca, aisa pinquejetacaajiaquempariquea Aapani Irioshi, pinetsanamajajiaqueroja maasanopae icantaguequeca.

Iquemajiavaqueroqueti icantajiaquerica, ariquea yamenamenaitanaque intati.

Icoacojitaqueriquea Jesoshi quero oncoquempa intancoretancoreitanajegueti oncora-manitapojajegueti

(Mt. 22.23-33; Irc. 20.27-40)

¹⁸ Iroompaquea irioquea oahoaitananquitsica saroseojia iramenajiaquiteriquea Je-soshi. Iriatimpajia iriguentiquea cantajiatatsica aatoquea itancoretancoreitanajitsi metojatsica. Icantajiapojiaqueri:

* **12:13** Pamenero Mr. 3.6 otioncacagueti isavi itsavetacojiquerigueti **shinevencarica Erorishi**. † **12:15** Iri-raquea **tenario** irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

¹⁹ —Tsatacaantantatsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempaji, aapojempagueti irimetojanajegueti irojocapanajantero imanquigare, choocaguétiquea iriguentijeguite irioquea manquigatajemparone irijanintacajaemparoquea quempetaja irioca irijanintajari metojanquitsica.

²⁰ Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji.

²¹ Iroompaquea irioquea manquigavetajaro itsipa oguijatirica. Ariquea iquempetaja iriatimpa, imetojanaji teequea irijanintacaguemparoji. Ariquea iquempetaja itsipa niganquítica.

²² Arimpaquea iteroncanaca maasano imanquigajiavecarogueti, teequea irijanintacajaiguemparoji. Ariquea ometojitsitanaja iroatimpa.

²³ Imaica, iintsija pincantenaja, oraquate oncoramanitapojajegueti intancoretancoretitanajegueti maasano metojatsica, ¿quericaca manquigamajatajemparoneca? Maasanotari imanquigajiavecaroqueuea.

²⁴ Icanqueri Jesoshi:

—Aviatimpajia manaquea picomijiaca, teetarite pintsajigueroji querocaca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa.

²⁵ Oncoramanitapojajegueti intancoretancoretitanajegueti maasanopae metojatsica, aatoquea quericaca manquigatajatsineca, aisa manquigarentsi aatoquea yojocantajitajirotsi irimanquigajitajemparo, manatarite inquempjejianajempariquea irashivanti-jitete Aapani Irioshi choocajiatsica inquitequi.

²⁶ Imaica aviatimpajia iroguentiquea picanque aatoquea itancoretancoretitsi metojaripae. ¿Arimpate teequea pampatsajavantacojigueroji itioncacotanaqueca Moishishini coramani iquenquetsataquegueti Aapani Irioshi maequitatsicaqui? Icanqueriquea: ‘Naroguenti Irioshimajate Averaame, Ishaaco aisa Jacovo.’

²⁷ Teequea irio Irioshite metojatsica, iriguentiquea Irioshite anijatsica. Aviatimpajia iroguenti picomimajajiaca.

Queroca caavijica anaaque irinetsanamajajiqueca

(Mt. 22.34-40)

²⁸ Ariquea icoraquepojaque aparo tsatacaantiroca itioncacotanaqueca Moishishini, iquemapojaqueri iquenquetsatavacaajiaca. Yamenaquequea itampaticamajataqueroquea Jesoshi itsatacaquerigueti saroseojia, ariquea icanqueriquea iriatimpa:

—Oraticapae icantacaantica Aapani Irioshi irinetsanajite ¿querocate anaantamajatatsica?

²⁹ Iriraquea Jesoshi icanqueriquea:

—Oraquea caavijica anaaque icantacaantica irinetsanajite iroguenti cantatsica: ‘Pinquemisantamajatenajate, ishiraerijia. Iriraquea Arioshite Majirontamajatatsica, iriguenti apaniromajaca.

³⁰ Pimpintsamajataquemparija Majirontamajatatsica Pirioshite, pampaniromajatanajuera, pimpintsashirentamajaquempari, pimpintsaguenquejanemajatanajuempari, pintampishiventamajaqueneri irooriji pipintsamajatacari.’[✧]

³¹ Oraquea mavitetapojatsica iroguentiquea cantanquitsica: ‘Pimpintsataquemparija pigonoro pinquejetacaajempa pipintsatagueti aviatimpa.’[✧] Teetarite onchoocateji otsipa icantacaantaqueca anaqueroca ocativa mavite.

³² Iriraquea tsatacaantiroca itioncacotanaqueca Moishishini icanque:

✧ 12:30 Ireo. 6.4-5. ✧ 12:31 Irev. 19.18.

—Tsatacaantantsica, arimajaca pinetsanamajaqueroquea, iriraquea Irioshimajaca iriguentiquea aparomajaca, teequea inchoocateji itsipa.

³³ Ampintsamajaquempariquea ampanirontamajatanaqueri iriatimpa, ampintsaguenquejanemajatanaquempari, ampintsashirentamajatanaquempari, antampishiventamajaqueneri. Aisa ampintsamajaquempari agonoro anquejeta-caajempa apintsatagueti aatimpa. Irootaquequea inintamajataque Aapani Irioshi, anaqueroquea antaajiguenerigueti viratsipae maasanomontiina irooca aisa ajocajiguenerigueti Aapani Irioshi taaca opajitapae.

³⁴ Iriraquea Jesoshi yamenaquerigueti iquenquejamajaquero itampaticamajataque-roquea yoaquero, icanque:

—Irooshipojishiatsi pimajirontamajaquempari Aapani Irioshi.

Ariquea icantajiaquiti mariric, ariquea oparianaca teequea quericaca cocotajer-ineca.

¿Taaquea choviquitanaqueri Quirishitotatsica?

(Mt. 22.41-46; Irc. 20.41-44)

³⁵ Oraquea itsatacaantanajigueti Jesoshi oniganquirequi teemporo icanque:

—Iriraquea tsatacaantajiguiroca itioncacotanaqueca Moishishini icanquequea: ‘Iri-raquea Quirishitotatsica‡ iriguenti ichoviquini Taavini.’ ¿Querocaquea ococani icantan-tajiacaroca?

³⁶ Coramanitari Ishire Aapani Irioshi iquenquejacaquerigueti Taavini icanque:

‘Iriraquea Majirontatsica Aapani Irioshi icanqueriquea Nomajirote:

Pisaviquetaja pisenampijaquenaja notincamijempequiqui,

pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanque-gontatsitempari.’

³⁷ Iriraquea Taavini iriotaquequea cantaquerica: ‘Nomajirote’, ¿queroquea incoquem-pani inchoviquitanaqueri?

Icaramirincavaetanaquequea omporoguijaventacarica, iquemajivaquerigueti ishinejianaca.

Icanque Jesoshi aatojate yoguijaguijaitacotiritsijate tsatacaantajiguiroca itionca-cotanaqueca Moishishini

(Mt. 23.1-36; Irc. 11.37-54; 20.45-47)

³⁸ Ariquea itsatacaantanajigueti Jesoshi icanque:

—Inchiquiojitaja poguijaguijaitacotiritsijate tsatacaantajiguiroca itionca-cotanaqueca Moishishini. Iroguenti ishineventajiacca inquitsaajerontajiaquemparo ontiasearo cameetsanjite irisemeque. Aisa yoayoaaitapinique ontaniqui yojocantajigueti rogueti taaca opajitapae ajaararontsipae inintajiaque inquenquet-satacaajitavaqueriquea.

³⁹ Icoquitani yoapinijiguigueti shinagogaqui icapiocantapiniyacaca, inintajiaque-quea iroguisavicajitavaqueri intsipatsipaipojempariquea anaantajiatatsica. Ariquea iquejejiacaquea aisa icapiocajiacagueti irishecajiaquempa quea, inintajiaque irogu-isavicajitavaqueriquea intsipatacaantajiquempariquea anaantajiatatsica.

⁴⁰ Aisa yamatavimatavivaetaqueroquea metojacoropae iteroncamajatsitaqueroquea ashintaguecaca. Aisa yamanamampeajiacariquea Aapani Irioshi teetaquea irisanticot-sitempaji, isemejiaque intati. Iriatimpajia caaviji iranaajiaquequea incatsimamajajita-queri oncoramanitapojajegueti.

‡ 12:35 *Quirishitotatsica.* Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca im-peaquempa imajirojiate irooca isaserorrotejiate. Iriira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano.

*Metojacoro ojocaqueneriquea Aapani Irioshi omentaquitsite
(Irc. 21.1-4)*

⁴¹ Ariquea yoanaquequea Jesoshi isavicaque tampatica ochoocaqueguete itentan-
tajitarica imentaquipae yojocajiquenerica Aapani Irioshi. Yamenajivaqueriquea
maasano yojocajiaqueguete imentaquitsite. Iconoajiaca ashintajianquitsica yojocama-
jataquequea oshequini.

⁴² Iroompaquea ocoraquepojiqnea aparo metojacoro, teequea ashintempaji, otepo-
jiri iroatimpa mavimentaquitejaniqui omentaquitsite.

⁴³ Yamenaqueeroquea Jesoshi icajemajiaqueriquea itsatacaanejia icanqueriquea:

—Arimajaca ocativa metojacoro teeca ashintempaji yamenaqueeroquea Aapani
Irioshi otetaquequea oshequini, anajiaqueriquea maasano.

⁴⁴ Iriatimpajia yaagarantavajiri imentaquitsite, yashintavaevetacatari, cotanquit-
siquea iroatimpa teeca ashintamajavetempaji manaquea aacaajaniquicari maasano
ashincaca ovegaratantajempameca osheca.

13

*Jesoshi icanque irisovejaiquero teemporo
(Mt. 24.1-2; Irc. 21.5-6)*

¹ Ariquea isotoanajiroquea Jesoshi intsompogui oniganquirequi teemporo, icanque-
quea aparo itsatacaane:

—Tsatacaantantatsica, pameneroja inirotsentseina mapipae ipeacaantajitaroca.
¡Cameetsavaequequea mapipancopae!

² Cotanquitsiquea iriraquea Jesoshi icanqueri:

—¿Arite pamenajiaquero maasanopae ocativa? Aatoquea ochoocatajitsi aparo mapi
ogataajatsineca, maasanopae irisoveacomajitaquero.

*Queroquea oncotanaquempani irooshipojeguete onteroncaguetanajempa quepatsi
(Mt. 24.3-28; Irc. 21.7-24; 17.22-24)*

³ Ariquea yoayoaitanaquequea Orivotsempiqui otampaticatacoqueroquea teem-
poroqui, ariquea isavicaque Jesoshi oraniqui. Iroompaquea iriraquea Peerero, Santi-
ago, Joanca, Antirishi iquempejiquempejiipojacariquea, icantajiapojiri:

⁴ —Pincamantena, ¿querocate oncarateni irisovejaiqueroni? Irooshipojeguete onet-
sanatantaquempaca, ¿taa opaji nontsatantajivaquemparoca?

⁵ Iriraquea Jesoshi icanqueriquea: “Shoshoh yamatavijajitimpitsija.

⁶ Incoraquecoraqueitaquetari oshequini pinajajiaquenane ca cantajianquitsineca:
‘Naroguenti’, ariquea iramatavijajiaqueri incaramirincatashivaetanaqueri.

⁷ Pinquemacojiavaqueriguete irashimirintavacaajianaquempaquea quempeji, aisa
otsipapaequi quepatsi, aatoquea pitsaroajiguetsi. Aritarite onquejetanaquempaquea
imaica, cotanquitsiquea aatotaja arejetsitatsi onteroncantanaquempaca maasanopae
quepatsi.

⁸ Iriraquea guintenijianquitsica otsipapaequi quepatsi iroaroaitashijianaqueriquea
osamanipaequitica, ariquea irashimirintavacaajiaquempa. Ariquea inquempejiaque-
mpaquea majirontajiatatsica inchoocagarantajiaque intigarancajiaqueri igoaretajiate
iroaroaitashijianaqueriquea itsipa majirontatsica irashimirintavacaajiaquempa. Aisa
omoguecaguetanaquempaquea. Irantsipevaejitaquemparoquea tasetzijencapae. On-
quejeguetaquempaguete imaica mana oparianaca intati irantsipevaetantajitaquem-
paca.

⁹ “Pagamajaguitempani. Irajaianaquempiquea icapiocajiacagueti jivajiatsica incat-simatacaantajiaquempiquea, impasatacaantajiaquempi agompiaquitempi shinagoga-paequi icapiocantapinijiacaca pignonorjia. Aisa irajaianaquempiquea quejemajiroji-avetatsicaqui, aisa majirontajiatatsicaqui. Ariquea aviatimpajia pintsavetantimojiana-queri pintsavetacotantajiaquenaqueate naatimpa.

¹⁰ Iroquetitaquea intsavetacojiqueroquea Quenquetsatsarentsimajaca Oganejen-catatsica intsitacacovaetanaquempariquea maasanopae caquinteguetatsica, ariquea onteroncapojajempa.

¹¹ Oraquea iracaantajiquempigueti irajaianaquempigueti majirontajiatatsicaqui aatoquea pishoshoguiteta aatoquea piquenquejajigui pincantajigue: ‘¿Querocaca non-canque nonpetanaquempagueti coajica?’ Poapoitanaquengueti iriatimpajiaqui aatoquea inchiquioji piquenquetsatashijiaquempa aviatimpajia, iriguenti quenquejacaajiaquempironeca Ishire Aapani Irioshi cameetsanijite pintsajiaquenijite querocaca pincanque.

¹² “Inconoagaranquempaquee iracaantajiaqueri iriguentijeguitepae irashimajaca igonoromajaca irimetojacaantajiaqueri. Ariquea inquejejiaquempaquee irijanintajiatatsica irimetojacaantajiaqueriquea irijanijiate. Itsipaquea incatsimajianaqueri iriri iriniro irimetojacaantajiaqueri.

¹³ Maasanopae irisemaneguintimentajiaquempiroquea novajiro pitsaromentajiaquenagueti, cotanquitsiquea quericaca atsipetacovaetanquitsineca aatogueti yovashi-antirotsi itsarovenquenagueti arejevaequempa irimetojanaje, irioquea iriguenti irajaitanaje inquitequi.*

¹⁴ “Oraquea pamenajiaquerigueti iriraquea covaeguishetaqueroneca teemporo incatianquemparogueti ontaniqui icantimentajitirigueti incatigue (quericaca apatsajavanqueroneca ocatica pinquenquejamajateroja pintsatimenqueroniji), ariquea inchoocaquegueti ontaniqui pintampinajapanajantejate maasanopae Joreaquitica pishiashiaitapanajantejate otsempitsempiacagueti.

¹⁵ Quericaca choocatanquitsineca sotsiqui omencotapojacagueti itsovironaquitequi ovancaitoqui, aatoquea yaguijitapanajanti, aato iquiji iraguepanajantero taaca opajitapae choocatanquitsica intsompogui.

¹⁶ Quericaca choocatanquitsineca iniganquitejirequi, aatoquea ipiapanajanti irapanajantero iitsaare.

¹⁷ ¡Ooshiatsi manquigarentsijia tsaraquijianquitsineca, aisa atsomijianquitsineca, caaviji antsipemajajiaquempaquee!

¹⁸ Aviatimpajia pamanacoventajiguempaja aatonijite otampaticatirotsi oncatsinca-guitemajategueti.

¹⁹ Caavijitari irantsipejitaquempa anaavaequero maasanopae yatsipejiguetaacaca iroaqueragueti ipeacaacarogueti Aapani Irioshi quepatsi arejevaequemparoquea imaica. Aisa aatoquea yamenajitajirotsi oncoramanitapojajegueti.

²⁰ Aatomegueti icaratacaapojirome Amajirote oratica savincaguiterripae irantsipetantajiavetaquempaca interoncamajajiaquempamequea caquinteja. Cotanquitsiquea ipintsatacotacari icoguiajiaqueca,† icaratacaantapojacanarica.

²¹ “Querica cantajiaquempineca: ‘Jeeri iricatica Quirishitotatsica’, irooca incanquempi: ‘Ichoocaque ontaniqui’, aatoquea piquemisantajiguiritsija.

²² Incoraquecoraqueitaquequea tsavetantamampejaigatsica amatavijantajanquitsineca incanquequea: ‘Naroguentiquea Quirishitotatsica.’ Itsipaquea cantajianquitsineca: ‘Naroguentiquea tsavetantiroca incanquenaca Aapani Irioshi.’

* 13:13 Mt. 10.21-22. † 13:20 Irirajia **icoguiajiaqueca** iriojiatari aventaventajiaquemparineca.

Aisa ironigaanqueroquea oacaantantatsica intati cameetsanijite iramatavijajianaquerinijite oshequini. Inquejetacaajitsivetempariquea icoguiajiaqueca Aapani Irioshi, cotanquitsiquea aatoquea yagavejiritsi.

²³ Pagamajaventajiguempaja, nocamantsiquempiquea imaica maasano ocatica tequerataguetei arejepojempa.

Querocaca oncoguetanaquempani incoraquetajateguetei Irijanite Caquinte
(Mt. 24.29-35, 42-44; Irc. 21.25-36)

²⁴ “Iroompaquea oncaraguijanaqueguetei atsipevaerentsi impitsecajencatanaque catsirincaiteri, taai aato iquitasetaji.

²⁵ Irieraquea impoquiropae irasacaraaguetanaquempani. Irimoguecanaquempaniquea choocaguetanquitsica jenoqui inquitequi.

²⁶ Iroompaquea iramenajitavaqueriquea Irijanite Caquinte incoraquetapojajeguetei incoraquetantapojajempa mararoqui, iragavejavaetapojempa iranaajiaqueriquea maasano, iroganejencavaetapojempa.

²⁷ Ariquea intigarancajiaqueriquea irashivantijitete iroaroaitanaquequea intsitacaguitejajiaquitero quepatsi aisa inquite, incapiocajiaqueriquea icoguiajiaqueca Aapani Irioshi.

²⁸ “Imaica pintsajiavaqueroja nontsatacaajiaquempani, nonquempetacaquempani piroja iguera. Iroaquerasano etsocorevanatanaque pitsajiaquequea irooshipojajajagantsipojaje.

²⁹ Ariquea onquempetajempaquea oncoramanitapojajeguetei pamenajiaavajeroguetei onquempetanajempaguetei nontsatacaajiaquempani imaica, irooquea pintsatantajiaavajempa irooshipojajajishiatsi incoraquetajate Irijanite Caquinte, quejetaca catiapojajajagantsipojaje.

³⁰ Arimajaca noncantajiaquempani, maasanopae ocatica nocantajiaquempani imaica onetsanamajatanaquempaniquea tequerataguetei interoncajiguempajajagantsipojaje maasano choocajianquitsineca omparianaquempaguetei nontsavetantsitacaca imaica.‡

³¹ Oraquea inquite aisa quepatsi ompeaquempa, cotanquitsiquea oraquea nocantaguequea aato opegatsi.

³² “Teequea inchoocateji tsatatsineca querocaca savincaguiteri onetsanatantaquempani, tee aisa intsajiteji quero incarateni catsirincaiteri. Irirajia ashivantijite inquitequitica tee intsajigueji, ariquea iquempetaca Irijanite Aapani Irioshi teequea intsateji. Aparoquea icocani Aapani Irioshi iriatimpa itsaqueroquea.

³³ Pagamajavajemparija. Pincoguitempaniquea poguijajiaavajeri, aisa pamanaguiterini Aapani Irioshi, teetarite pintsajigueji querocaca aantapojempaca oratica savincaguiteri.

³⁴ Onquempetaquempaniquea iroguetuetei caquinte osamani, irojocajianajeri irashijia incantajianajeriquea maasanojia taaca opajita irisavicaventajiajeneri. Incanteri yashincaca quempoguijiroca sotomorontsi incantacoguitempani iramenaguiteri.

³⁵ Irootaquequea noncantantaquempani aviatimpajia, pincoquempaniquea poguijamajaguiterini, teetari pintsajigueji querocaca incoraquetantajatempaca ashincaro ca tsovironaqui. Aisa teequea pintsajigueji aricaca incoraquetaje ompitsecajencaguitetanajeguetei, irooca nianquiite, irooca irinijanajeguetei chaapa, irooca osavincaguitetanajeguetei.

‡ 13:30 Otioncacaca acaniqui, iguenquetsatsarequi guiriegojia ocanque **genea**. Chooca mavitepae agavejaque oncantacotaque. **Genea** agavejaque oncantacoqueri (1) irioca maasano choocajianquitsica icantaqueroguetei (**esta generación** o **la gente de este tiempo**); (2) irioca oncantacoque maasano jorijia (**esta raza**); (3) irioca oncantacoque maasano choocajianquitsineca omparianaquempaguetei itsavetantsitacaca (**esta generación, es decir, la generación que ve el comienzo de estas cosas**).

³⁶ Taampinaquea incomirejapojajempiquea, inchiquiojitaja yamenajiapojajimpitsijate teequea poguijajigueriji.

³⁷ Oraquea nocantajiaquempica aviatimpajia, irooquea nocantajiaqueriquea aisa maasanojia: Pagamajiaquempaja.”

14

Iquemavacaimentajiacari Jesoshi iracaantajiaqueri (Mt. 26.1-5; Irc. 22.1-2; Jn. 11.45-57)

¹ Ariquea iriraquea saserorotejia anaantajanquitsica itsipajiacari tsatacaantajiguiroca itioncacotanaqueca Moishishini yamenajiavaquerogueti mavitetapoji savincaguiteri arejetantapojempaca Paashicoa,* aisa savincaguiteri ipae ishecatantajitaroca pan teeca inconoantajitemparo anempoacaanaqueroneca, iquenquejajianaque queroquea incoquempani iracaantajiaquerinijite Jesoshi irimetojacaantajiaqueri, cotanquitsiquea teequea irininteji inquemacojitaqueri.

² Icanquequea:

—Oraquea anaanajempagueti Paashicoa, ariquea aacaantajiaqueri. Imaicaquea imaica aatotaja aacaantajiguiritsijate aatonijite icatsimatacojianaqueritsijate maasano omporoguijaventajiacarica.

Ishaguitantajicari Jesoshi casancajencajari (Mt. 26.6-13; Jn. 12.1-8)

³ Ariquea yoanaque Jesoshi Vetaniaqui itsovironaquitequi Shimo icantajitica Avejancavetatsica. Isavisaviitaquequea ishecajiacaqueate, ariquea ocoraquepoji manquigar-entsi amacopojiri casancajencajari vegaramajatatsica, ipeacaantajitaroquea naarero, tee inconoajatantajitemparoji otsipaja. Iroguenti yoguijaantajicaro chovintyoriqui ipeacaajitaca mapi icantajitica aravasetero. Amapojiaquerogueti iriatimpaqui ot-sanorejacotsitaroquea oshaguitantsitariquea ishinquireguishiqui.

⁴ Iconoagarantajiaquea savisaviitanquitsica oraniqui icatsimajianaquequea iquenquetsatavacaajianaca icanquequea:

—¿Querocaquea? Opomatsajatacashiat si casancajencajari.

⁵ Ovegaravaecaqueate anaanaquero 300 tenario.† Arimesano irojocantajiquerome aanquemparome imentaqui irojocajitaquenerimequea coguitejacojianquitsica.

Ariquea icatsimajiaqueroquea.

⁶ Cotanquitsiquea Jesoshi irooquea iquemajiavaquerigueti icantsijigariquea:

—Intsija ariotaquetsijate, aatoquea pasereaajiguirotsi, cameetsavaequequea oshaguitanquenaro.

⁷ Iriraquea coguitejacojiatsica icoguitanitarite pintsipajiajempariquea, pinintajiaquegueti pincavintsajajiaqueri pincavintsajajiaqueriqueate, cotanquitsiquea naatimparite aatoquea picoguitani pitsipajiajanatsi.

⁸ Imaica iroatimpa onetsanaquero agavejaqueca, oshaguitsinotantaquenaro casancajencajari ashi irojoquijijitajatenagueti nometojanaquegueti.

⁹ Imaica noncamanquempiquea arimaja querocagueti intsavetantajiqueroni Quenquetsatsarentsi Oganejencatatsica maasanopae quepatsipaequi, ariquea intsavetantajiqueriquea ocatita manquigar-entsi oshaguiquenagueti cameetsanijite inquenquejacobitentajitajeronijite iroatimpa.

Jorashi inique iracaanqueriquea Jesoshi (Mt. 26.14-16; Irc. 22.3-6)

* **14:1** Pamenero **Glosario** itsavetantajitirogueti **Paashicoa**. † **14:5** Iriraquea **tenario** irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

¹⁰ Ariquea yoanaque Jorashi Ishicariote iramenajiaquiteriquea saserorotejia anaantajianquitsica incantajiaquiteri ininquequea iracaantaqueri Jesoshi. Irioveca itsatacaane carajianquitsica 12.

¹¹ Iriatimpajia ishinejianacaquea icanqueriquea irojocajiaqueneri imentaquipae. Iriaquea Jorashi yoanaji, iroompa ariquea iquenquejanaquequea queroca incoquerini iracaantaquerigueti.

Jesoshi ishecatacaajianajari itsatacaanejia
(Mt. 26.17-25; Irc. 22.7-18; Jn. 13.21-30)

¹² Ariquea aapojaca savincaguiteri pariantajaroa savincaguiterpae ishecantantajitaroca pan teeca onconoguemparoji anempoacaqueroneca, irooquea aisa ijitorejantajitarica ovejaniqui irishecajiaquempaca inquenquejacojiaqueroquea Paashicoa. Iriaquea itsatacaanejia Jesoshi icanqueriquea:

—¿Querocaquea pininqueni nonetsanajiaquempironi maasanopae cameetsanijite ashecajiaquempañijite coajica ashineventajiaquemparo Paashicoa?

¹³ Ariquea iriatimpa itigarancajiaqueringuea mavite itsatacaane icantajiavaqueri:

—Poapoitanaquequea Jerosarequi, pintonquivojajiavaquempari shirampari iramapojaqueroqueti ijatsite, irioquea poguijaguijaitanaque.

¹⁴ Querocagueti inquijanaqueni oraniqui ariquea pinquijaquijaitanaquequea aviatimpajia, pincantajiapojeriquea ashincaroa itsovironaquite: ‘Iriaquea Tsatacaantantatsica icanque: ¿Querocaqueate oraniqui noshecajiaquempañi coajica nontsipatsipaiquempañi notsatacaanejia nonquenquejacojiaqueroquea Paashicoa?’

¹⁵ Iriatimpa intsipatsipaitanaquempiquea oshitamencotacagueti jenoqui, irijicojiaquempiroquea otantotacagueti caguetejeginica, jac netsanaguecaquea maasanopae. Ariquea oraniqui pinetsanamajiaqueroquea maasanopae ashecajiaquempagueti coajica.

¹⁶ Yoayoitanaquequea itsatacaanejia, yarejerejeica Jerosarequi, ariquea yamenajiapojiroquea maasano quejemajataca icantajiavaquerica Jesoshi incajaranqui. Ariquea inetsanajiaqueroquea maasanopae irishecajiaquempaca irishineventajiaquempañijia Paashicoa.

¹⁷ Iroompaquea opitsecaguitetanaquegueti yoanaque Jesoshi Jerosarequi, itsipatsipaitanacariquea itsatacaanejia carajianquitsica 12.

¹⁸ Ariquea ipimerequijajiapojaca shitaponcarontsiqui ishecajiaca. Icanque Jesoshi:

—Imaica noncamanquempi, iconoquempiquea aviatimpajia aparó aacaante-naneca, ishecaticotaquena.

¹⁹ Ariquea icohicoitanaca itsatacaanejia ishimampojancajianaca, yacayacaitanaque:

—¿Naroguenticampa aacaanquempineca?

²⁰ Iriaquea Jesoshi icanqueriquea:

—Iriguenti aacaanquenanea notsatacaane conoavetaquempica aviatimpajia 12, iriguentiquea tsipavacoquenaca notsiantancarogueti pan shovaogui.

²¹ Aritarite ontampaticamajatanaque ocanqueca tioncanquitsica coramani itsave-tacotsijicarigueti Irijanite Caquinte, cotanquitsiquea jirantsipevaetempañishiatsi irira aacaanquerineca! Aatomesano ivoguime iriatimpa.

Jesoshi icotarejaqueroquea pan yojocajiaqueneri itsatacaanejia
(Mt. 26.26-29; Irc. 22.14-20; 1 Co. 11.23-26)

²² Iroompaquea ishecajiacagueti, yaitsitaroquea Jesoshi pan, yamanaqueriquea Aapani Irioshi, icantacovenquero: “Arioteesaa.” Ariquea icotarejaqueroquea yojocajiaqueneriquea itsatacaanejia icanqueriquea:

—Paajiaqueja. Iroguenti notsino.

²³ Iroompaquea incajaraanquiguitetanaquegueti yaacoquero chovintyoriqui,‡ ya-manajiriquea aisa Aapani Irioshi, icantacovenquero: “Arioteesaa.” Ariquea yojocacojiaqueneriquea itsatacaanejia, imirajivaca maasano.

²⁴ Icanqueriquea:

—Iroguentiquea noriraja§ sotojaatananquitsineca nometojaventajiaquerigueti caramirincavaetananquitsineca. Ocantacoqueroquea iroaqueraro paaquito.*

²⁵ Imaica noncanquempiquea, aatoquea nomirajaro vinoja arejevaetapojempa nomirajemparo iroaquerajaro impeaquempagueti Aapani Irioshi Imajirojiate maasano.

Jesoshi icamanqueri Peerero iromanacoqueriquea
(Mt. 26.30-35; Irc. 22.31-34; Jn. 13.36-38)

²⁶ Iroompaquea iteroncajianaqueroqueti yamashaiventajiaquerigueti Aapani Irioshi, isotosotoitanaji yoayoaitanaque Orivotsempiqui.

²⁷ Ariquea icanqueri Jesoshi:

—Ocatita pitsecanquitsica maasano aviatimpajia pimpashiventacaajiaquenaquea pojocajiapanajantena. Otioncacatari ocanque: ‘Aapojempagueti nometojaqueri quem-poguijirica oveja. Irieraquea ovejajia imporocajencatesano maasano.’*☆

²⁸ Cotanquitsiquea nontancorejanajegueti naroquetiquea jivatanaquempine noanaquequea Garireaquei.

²⁹ Icanquequea Peerero:

—Impashiventacaajiavetanaquempiquea maasanopae irojocajocaivetanaquempi, cotanquitsiquea naatimpa aatotarite nojoquimatimpitsi.

³⁰ Cotanquitsiquea Jesoshi icanqueri:

—Noncamanquempiquea, coajica tequeratagueti omavitetempaji irinijeji chaapa, pomanacoquenaquea 3.

³¹ Cotanquitsiquea arimpaquea icantamajatanaque Peerero:

—Arigueta intsipatacaantajitenajate irimetojajitena, irimetojajiquenaquea, cotanquitsiquea aatoquea nomanacotimpitsi.

Ariquee iquejejaquero maasano icantajiaqueca.

Jesoshi yamanaqueriquea Aapani Irioshi Jetsemaniqui
(Mt. 26.36-46; Irc. 22.39-46)

³² Ariquee yoayoaitanaquequea Jetsemaniqui. Irooquea yarejerejeipojacagueti iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa namanaquiterija Aapani.

³³ Iriguenti itsipatsipaitanaca Peerero, Santiago, Joanca. Iriatimpa ishimampojancavaetanacaquea yatsipeshirentavaeca.

³⁴ Incajaraanquiguitetanaquegueti icanqueriquea:

—Noshimampojancavaetatiganimaja irooshipojishiatsi ometojavaetenanishiatsi, picancanija ocaniqui pintinajaventajiaquena.

³⁵ Iriatimpa yoanaque tijai ontaniqui itigueroasetanaca quepatsiqui, yamanaqueriquea Iriri ininquegueti impejaeneri maasanopae irantsipetaquempaca.

³⁶ Oraquee yamanaquerigueti icanqueriquea:

‡ 14:23 Iroguenti yaacotaque vinoja. § 14:24 Icanquerogueti **noriraja** mana iquejetacaacaro intati, cameetsaniji amirapinjiaquerogueti anquenquejapinjiaquero imetojaventajiacajigueti. * 14:24 Oraquee **paaquito** iroguenti icantamajajitirica itsipa irinetsanamajajitenerica. Ocatitacquea **iroaqueraro paaquito** icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichooaquegueti Moishishini, otsipa icanquerica Taavini. ☆ 14:27 Sac. 13.7.

—Aapani, pagavejaquequea maasanopae. Imaica nonintaveca paapitsatenarojate nantsipequempaca,[†] cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

³⁷ Ariquea yoanaji incajaranquiqui ichoocajiaquegueti itsatacaanejia, yamenajiapojiri maajiaque. Icantapojiri Peerero:

—Shimo, ¿pojocanacaniquea tin? ¿Arimpate teequea pagavejajigueji osamanicoñaji pintinajajigueji?

³⁸ Pintinaje, aatoquea pimaajiguitsi. Pamanacoventajiguempaja aatonijite ocovaeguishedacaajianaquempitsi covaeguisherentsi. Aviatimpajia pinintajivecaqueate pishirequi pinetsanamajiaquero inintaguetica Aapani Irioshi, cotanquitsiquea teetarite pintampishijigueji pitsinoqui.

³⁹ Ariquea yoanaji aisa yamanajiri Iriri oquejetajaro icanquerica incajaranquitica.

⁴⁰ Iroompaquea icoraquevetaja aisa yamenajiapojiri yojocajianacani tin aisa, otiavaetanacaritari pochoquirentsi. Ipashiventavaetanacaquea, cotanquitsiquea teeintsajigueji querocampate incantajiaquerini.

⁴¹ Yoanaji aisa, iroompaquea icoraquevetaja, ariquea icantajiapojajiri:

—Arisacanica picantacoguitani maaguitatsimpi magorejajianaquempi. Imaica ariotapoji, arejetapojaca iracaantantajitaquemparica Irijanite Caquinte irimetojajiaqueri covaeguishejiatsica.

⁴² Pincatintiitanaque, jamequetiro, jac coraquetapojishiatsi aacaanquenanea.

Yaajitaquerigueti Jesoshi

(Mt. 26.47-56; Irc. 22.47-53; Jn. 18.2-11)

⁴³ Quenquetsatanatsitiraja Jesoshi, icoraquetapoji Jorashi, irioveca itsatacaane iriojiaveca carajiavetanquitsica 12. Itsipatsipaitapojacari icaramirincavaequequea caquinteja, yamashijapojiri itsaampitsantsameniritepae aisa inchaquiji. Iriguentijia tigarancajiaqueri saseroroteja anaantajanquitsica aisa tsatacaantajiguicroca itioncotaquea Moishishini aisa jivajiguirica joriojia.

⁴⁴ Iriaquea Jorashi, aacaanquerinea Jesoshi, itsatacaaitsitanacari, icanqueriquea:

—Quericaca nonintavorotapojaqueca,[‡] iriotaquequea pinintajiaqueca, paitajiguempari paajianaqueriqueate inchiqiojitaja poguishiguiritsijate.

⁴⁵ Iroompaquea yarejetapojatiga iquempejitapojacari Jesoshi, icantapojiri:

—¡Tsatacaantantatsica!

Ariquea inintavorotsitari.

⁴⁶ Ariquea iriatimpajia yaitsijiapojacari yajiricajiapojiri.

⁴⁷ Cotanquitsiquea chooca aparo itsipatacaca Jesoshi yaitsitanacaroquea itsaampitsantsamenirite, itsopajitaro, iguempitarejitsitari yashintacaca saserorote anaantamajatanquitsica.

⁴⁸ Iquenquetsatanaque Jesoshi icantajiguiri coraquetashijiaquerica:

—¿Arimpate naroguenti catsimari aapitsatantatsica pamashitantajiaquenaca pitsaampitsantsamenirite aisa inchaquiji pamentajianaquenaniijite?

⁴⁹ Nocantacoguitani savincaguitariqui notsipatsipaitaquempiquea aviatimpajia ontaniqui oniganquirequi teemporo notsatacaantavaeguitini, teequea ari paajiguenaji, cotanquitsiquea oquempetantanacaca imaica cameetsaniji onetsanamajatanaquempañiji itioncacojiaqueca tsavetantatsicani coramaniqui.

⁵⁰ Iroompaquea iporocajencajianaque maasano itsatacaanejia itsinampirejajianaqueri Jesoshi.

[†] 14:36 Icanquegueti Jesoshi *paapitsatenarojate nantsipequempaca* iroguenti ishimampojancomajatacaro incatarojitanaqueri igovaeguisherajia maasanojia caquinteguetananquitsica quericaca aventajiaquemparinea. Pamenero 1 Pe. 2.24. [‡] 14:44 *Quericaca nonintavorotapojaqueca*. Yamejiaca joriojia coramani inintavorotavacaajivaca yamenavacaajiacagueti.

⁵¹ Cotanquitsiquea chooca itsipa tequeratatirajaca inquenquevarimajate yoguijave-tanacari, manaquea isavotacaroquea aramaroncajaro. Yaajiavevari,
⁵² ipotequitsitanaca tancoren, ishiapanajanta cajaratsinoni.

Yaajitanaqueriquea Jesoshi icapioacajiacaguetei imajirotepaee joriojia
(Mt. 26.57-68; Irc. 22.54-55, 63-71; Jn. 18.12-14, 19-24)

⁵³ Ariquea yaajianaqueriquea Jesoshi ichoocaqueguetei saserorote anaantamajatan-quitsica. Ariquea icoraquecoraqueipoji yomporoguijajipojaca saserorotejia anaantajianquitsica aisa tsatacaantajiguiroca itioncacotanaqueca Moishishini, irirajia aisa jivajiguirica joriojia.

⁵⁴ Iriraquea Peerero yoguijatacovetanacari cotanquitsiquea impoivaetapojaque. Oraquea yarejetapojacarogueti pampatejijaniquiqui itsovironaquitequi saserorote anaantamajatanquitsica, iquijapojaque otantoqui, yamenapojiri coaretajia itajiaque. Ariquea iconoajipojacari isavicapoji itatapojaque.

⁵⁵ Iriraquea saserorotejia anaantajianquitsica itsipajiacari maasano majirontajiat-sica capioacajianquitsica icajemacaantajiaqueriquea itsipapae intoseventajiaquem-pari Jesoshi cameetsanijite onchoocaquenijite ompampiatantapojempaca irimetojan-tajitaquemparica, cotanquitsiquea tee onchoocateji.

⁵⁶ Itsoseventajiacariquea oshequini, irooquea icanque irooquea icanque, cotanquit-siquea querocampate incojiaquempani iriatimpajia teequea inquemavacaajiguempaji.

⁵⁷ Iconoagarantajiacari itsipapae icatintiitanaca itsoseventajiacari, icanqueriquea:

⁵⁸ —Naatimpajia noquemajiaqueriquea icanqueguetei: ‘Nosoveguero ocatita teem-poro ipeacaacaca caquinte, nompeacaajempa otsipa aatoca ipeacaaja caquinte, ontres-pojajeguetei savincaguiteri nontsitacantajemparo.’

⁵⁹ Icantaveca imaica, cotanquitsiquea itsipapae cantashitatiavacaro.

⁶⁰ Ariquea icatiitsitanaca saserorote anaantamajatanquitsica icanqueriquea Jesoshi:
 —¿Aatempa paquiri? ¿Taaquea opajita ocatita icantacojiaquemparica iricajia?

⁶¹ Cotanquitsiquea Jesoshi teequea incanteji, teequea iranqueriji. Ariquea icoacotsi-tajari aisa, icanqueri:

—¿Arimajampa aviguentica Quirishitotatsica, Irijanite Itsaromentajitaca?

⁶² Icanquequea Jesoshi:

—Naroguentiguitatsi. Oncoramantapojajeguetei pamenajiaqueriquea Irijanite Caquinte irisavicaque itincamijempequiqui§ Agavejamajatatsica. Aisa pamenaji-avajeri inquenapojaje mararoqui.

⁶³ Ariquea icotanaca icatsimatanaque saserorote anaantamajatanquitsica iperejitsi-taroquea iitsaare sarararara,* icanque:

—¿Arimpatate ancoguimenquempari itsipapae cantacoquerineca?

⁶⁴ Jac piquemajiaquerishinete iquejemanatanacariguetei Aapani Irioshi imaica. Iintsija ¿querocaca pincantajiguenei aviatimpajia?

Maasanoquea icantajigui iquempetacaanca irimetojajiqueri.

⁶⁵ Iconoajiacari iquishoquishoavaequeriquea. Iponaajiaqueriquea icapocapovae-queriquea, icantajiavaqueri:

—Iintsijate pintsatavaqueja taaquea capojaquempi.

Iriraquea coaretajia yapatompatoncavaequeri.

§ 14:62 *itincamijempequiqui*. Yamejiaca coramani iriraquea majirontatsica incajemajiaqueri ishineventa-majatacaca iroguisaviquitempari itincamijempequiqui, inquejemanantavetaquempari iranaajiaqueri maasano itsipajia. * 14:63 Ari icojiacari joriojia, inquemaqueriguetei itsipa inquejemanataquempariguetei Aapani Irioshi irooca incantaguishetaqueriguetei, imperejitsitemparo iitsaare intsatantajitaquempari icovaeguishemajat-aca. Otioncaca irira quejemanataquemparineca Aapani Irioshi irioca cantaguishetherineca intsinaquitajitempari irimetojajiqueri.

*Peerero yomanacoqueriquea Jesoshi**(Mt. 26.69-75; Irc. 22.56-62; Jn. 18.15-18, 25-27)*

⁶⁶ Iiraquea Peerero ichooaque oraniqui isavi pampatejijaniquiqui. Iroompaquea coraquepoji aparo iromperare saserorote anaantamajatanquitsica,

⁶⁷ amenapojiri Peerero itataque, amenamajatanaqueriquea sorererere, ariquea ocanqueri:

—Aviatimpa aisa itsipapinitimpi Jesoshi Nasarequitica.

⁶⁸ Cotanquitsiquea yomanacotsitanaquea, icanquero:

—Tee notsatsitavaquempiroji. Teequea nonquemeji querocaca picanqueni.

Isotoanaque iquijanajiro oaguitetanaquegueti osotomorotapojacagueti. Ariquea oraniqui icatiaca, iroompa inijanaque chaapa.

⁶⁹ Amenitsitajariquea aisa omperarentsi ocantajiguiri choocajianquitsica oraniqui, ocanque:

—Iricatica irio itsipavijire Jesoshi.

⁷⁰ Cotanquitsiquea yomanacotsitanaja Peerero.

Iroompaquea incajaranquiguitetanaquitigui icantajiguiri choocajianquitsica oraniqui:

—Arimajaca pitsipatari, aviguenti Garireaqueitica.

⁷¹ Iiraquea Peerero icantsitanaja aisa:

—¡Nocanqueshinete tee nontsatimateriji iricatica piquenquetsatacojiaqueca! Namataacagueti incatsimatimentenaronishiatsi Aapani Irioshi.

⁷² Iroompaquea icanquitigui, inijanajiquea chaapa. Iquenquejitsitanacaroquea Peerero icanquerica Jesoshi incajaranquitica icanqueri: “Coajica tequeratagueti omavitetempaji irinijeji chaapa pomanacoquenaquea 3.” Ariquea icotanaca iraitsitanaquea.

15*Yaajitanaqueriquea Jesoshi Piratoqui**(Mt. 27.1-2, 11-14; Irc. 23.1-5; Jn. 18.28-38)*

¹ Osavincaguitetanaquigueti icapiocajiaca saserorotejia anaantajianquitsica, aisa jivajiguirica joriojia, aisa tsatacaantajiguicroca itioncacotanaqueca Moishishini, aisa maasano imajirotepae joriojia. Iquemavacaajiaca querocaca incojiaquerini Jesoshi. Ariquea yoishojianaqueri, yaajianaqueneriquea Pirato, yojocajiaipojaqueneri.

² Iriatimpa icoacoqueriquea icanqueri:

—¿Arimajaca aviguenti Imajirote jorio?

Icanque Jesoshi:

—Tampatica poaquero.

³ Cotanquitsiquea iriraquea saserorotejia anaantajianquitsica arimpaquea itsojeventajianacari.

⁴ Iiraquea Pirato icantsitajari aisa icanqueri:

—¿Aatompa paquiri? Pinquemavaqueroja maasano icantacoguetaquempica.

⁵ Cotanquitsiquea Jesoshi teequea incantimateji, jero yamentanacaca Pirato intati.

*Icanque irimetojajiqueri Jesoshi**(Mt. 27.15-31; Irc. 23.13-25; Jn. 18.38-19.16)*

⁶ Icantacoguitani aapojajagueti Paashicoa, iriraquea Pirato yametapinitaca yoguipaquiijiri aparo isantanatacotimentajiquerica ipeacaaguishetacaca, quericaca inintajiaqueca igonorojia iroguipaquiijaje.

⁷ Ichooaque aparo shirampari ipajita Varavashi, iroguenti isantanatacotimentajiqueri imetojantaquegueti itsipatacaantajicari itsipapae itsipatashijiacaca imetojantajiaquegueti, iroguenti inintajiaveca iroguisotoajiajerime majirontatsica.

⁸ Icaramirincavaequequea oraniqui joriojia, ariquea iconoagarantajiaca yoayoaitanaque Piratoqui icantajiapojaqueri irantajeneri yametapinicaca.

⁹ Iriatimpa icantavaqueri:

—¿Irioquea pinintajiaque noguipaquijajempiri Imajirote jorio?

¹⁰ Iriatimpa itsaque irirajia saserorotejia anaantajianquitsica manaquea icatsimamentajiaqueriquea Jesoshi yamenajiaquegueti iriguenti yomporoguijaventajiaca, irootaquequea yaantajitanacarica iriatimpaqui.

¹¹ Cotanquitsiquea iriraquea saserorotejia anaantajianquitsica itsatacajiaaqueri omporoguijajianquitsica icantajiaqueri:

—Iintsija pincantejate: ‘Iriompaqueate poguipaquijaje Varavashi.’

¹² Iriraquea Pirato icanqueriquea:

—Arisacanica imaica ¿querocaca noncoquerini irica picanqueca Imajirote jorio?

¹³ Iriatimpajia icajemitsijianaca:

—¡Pompajacoteri!

¹⁴ Icanqueri Pirato:

—¿Taampate ipeacaaca?

Icajemamajajianaji:

—¡Pompajacoterishine!

¹⁵ Iriraquea Pirato inintaquequeate iroguishinejajiaqueriquea omporoguijajianquitsica, yoguipaquijajiajiniri Varavashi. Ariquea icantacaantsitariquea Jesoshi intavaajitaqueri, irajaitanaqueri irompajacojiqueri.

¹⁶ Iriraquea coaretajia yaajianaqueriquea intsompoguiqui pampatejijaniquiqui imapipancotequi Pirato, icantajitiro “Peretorio”, ariquea icajemacaantajiaqueri maasano irapicoaretajiate.

¹⁷ Ariquea iquitsaatantajiacari otsipa quitsaarentsi camachoncamorenari. Yaajiaque tseitseiario, ipeacaashijiacanari iramatsaero, yamatsaetsitari.

¹⁸ Ariquea ishiroshirontimentavaecari icanqueriquea:

—¡Iricashia Imajirote jorio!

¹⁹ Itavatavaavaetaqueriquea iguitoqui savoroquijiqui, iquishoquishoavaequeri, igueroventajiacari iquempetacaajiacari ishineventajitariguete majirontamajatatsica, manaquea ishiroshirontimentavaecariquea intati.

²⁰ Iroompaquea iteroncajianaqueguete ishiroshirontimentavaecariguete, isapocajiri camachoncamorenari, irooquea iquitsaatantajari iitsaare, yaajianaqueri irompajacojiqueri.

Yompajacojitaqueriguete Jesoshi

(Mt. 27.32-44; Irc. 23.26-44; Jn. 19.17-27)

²¹ Chooa aparo Shirenequitica ipajita Shimo, iriri Arijantero aisa Iropo. Yavisanaque iquenavaetapoji ontaniqui niganquitejipaequi. Icantajiaaqueri coaretajia irinatashitanaqueriquea Jesoshi igoroshite.

²² Ariquea yaavaetanaqueriquea Jesoshi ontaniqui osamani opajitaquea Gorogota, (ocanquequea: “Ochoocatiguetei Shocoitontsi”).

²³ Yojocajivecanariquea vinoja iconoantajicaro mira,* cotanquitsiquea teequea irimiremparaji.

²⁴ Iriraquea coaretajia yompajacojiqueri. Ariquea ipegavijijiaca intsajiaquenijite quericaca ashinquemparoneca iquitsaaguevecaca.†

²⁵ Oraquea yompajacojiqueriguete iroaquerasano ijenoquivaepoji catsirincaiteri.

* **15:23** Oraquea *mira* iroguenti casancatatsica, inconoantajiquemparoguete oja irojocajiqueneri aatonijite ocatsitiri. † **15:24** *iquitsaaguevecaca*. Irooca icantacotaque isavoguinaro, igaviguitire, ichompimashite, aisa yogatacaca, ocarataque 4.

²⁶ Oraquea itioncacojiquerogueti taate imetojimentajiqueri ocanque: “Iriguenti Imajirote jorio.”

²⁷ Itsipatacaantajicari mavite aitsitantatsica yompajacojitaqueriquea, aparo yogatiacojiqueri itincamijempequiqui, iriraquea itsipa iroguenti yogatiacojiqueri ishinampijempequiqui.

²⁸ Oraquea oquejetacagueti imaica iroguenti irinetsanajiqueroquea itioncacojiquerogueti coramaniqui ocanque: “Itsipatacaantajicari covaeguishetatsica.”[☆]

²⁹ Iriraquea avisavisaitanquitsica oraniqui inijashinatacari icantajianaque chaguito chaguito, icanqueriquea:

—¡Arisacanica querocampate imaica! Arimpate picanque: ‘Nosoveaqueroquea iteemporote Aapani Irioshi, ariquea nompeacaitajemparo, nontsitacajero 3 savincaguiteri.’

³⁰ Iintsijate pompetanaquempajate imaica, pintsoparejacotanajempajate coroshiqui paguijitapojaje.

³¹ Ariquea iquempejiaca saserorotejia anaantajianquitsica itsipajiacari tsatacaantajiguiroca itioncacotanaqueca Moishishini ishishirontimentavaecari, iquenquetsatavacaajiaca icanqueriquea:

—Yamijiaqueri itsipapae yompeticoguetacari, cotanquitsi teequea iragavejempaji irompetacotanaquempa iriatimpa.

³² Iriovetaca Quirishitotanquitsica Amajirojiate ishiraerijia, iintsija intsopajacotanajempaja coroshiqui iraguijipojaje, amenajiaquerinijite antsatimenqueriniji antsaromentimentajiaquempari.

Iquejetsijianaca itsipatacaantajicarica yompajacojitaquerigueti, icantacantaguishevaetaqueri.[‡]

Imetojanaquegueti Jesoshi

(Mt. 27.45-56; Irc. 23.44-49; Jn. 19.28-30)

³³ Iroompaquea itampaticavepojaca catsirincaiteri, ocantanaque pitsec maasano quepatsi, arejetacovaeca ijaguitetanajigueti.

³⁴ Ariquea icotanaca iririjencavaetanaque Jesoshi icanque: “Eloi, Eloi, ¿lama sabactani?”[§] (Ocanque: “Aapani Irioshi, Aapani Irioshi, ¿queroquea ocoani pojocantanaquenaca?”)

³⁵ Iconoagarantajiacaquea choocajianquitsica oraniqui irooquea iquemajivaquegueti icantajianaque:

—Pinquemerija, icajemaqueri tsavetantatsica Iriashini.

³⁶ Ishiitsitanaca aparo, yaanaquequea atsimijicajatiroca oja, iticajatsitaroqueea viñoja cachonerontouijajaro, yogajenocacoqueneriquea savoroquijiqui irantsimijicajatacaquerime. Icanque:

—Iintsijate pamenerijate, amenajivaqueritaja incoraquetashipojeri Iriashini irogaguijitajeri.

³⁷ Iroompaquea icajemapanajanti Jesoshi iririjencavaetanaque, ariquea imetojanaque.

³⁸ Irooquea imetojanaquitigui, ariquea ocotanaca operejanaque omorena ticaamorenatanquitsica teemporoqui jocagatsica aatonijite iquijajitirotsi intsompoguiremaja-caqui. Opecotarejanaque tampaticaquea niganquisano ocantanaque sarararararara, oquenapojiquea jenoqui arejevaetacaquea isavi.

[☆] 15:28 Is. 53.12. [‡] 15:32 Pamenero aisa Irc. 23.39-43. Apara cantashitatiananquitsi coajica, yaventanacari Jesoshi inquenquejacotajeriniji irimajironquempagueti. [§] 15:34 *Eloi, Eloi, ¿lama sabactani?* oponeaca iguenquetsatsarequi arameo. Mateo itioncaque *Elí, Elí* iguenquetsatsarequi evereo (Mt. 27.46).

³⁹ Iriraqeua imajironcaca 100 igoaretajiate Iromaquitica icatiaca oraniqui itampaticatacotaqueri Jesoshi. Oraquea iquemavaquerigueti icajemanaquegueti, aisa yame-
navaquerigueti quero icotanacani imetojanaquegueti, icanque:

—Arimajaca iriguenti Irijanite Aapani Irioshi.

⁴⁰ Aisa ariqueua ochoocajiaque manquigarentsijia tiijacoñajisano ontaniqui, amena-
jiaqueriquea Jesoshi. Oconoacaroquea Maria Magararaquitica, Sarome, aisa Maria
iriniro Jose aisa Santiago* guijapojirica.

⁴¹ Iroguentijiatari oguijajiaquerica yanijivaetigueti Garireaquí, amitacojiaque-
riquea. Aisa ariqueua ochoocajiaque oraniqui otsipapae ocaramirincavaeque
manquigarentsijia tsipatsipaitacarica iroaqueragueti icoraquetaquegueti Jesoshi
Jerosarequi.

Yojoquijitantajitari Jesoshi imperitamoroqui
(Mt. 27.57-61; Irc. 23.50-56; Jn. 19.38-42)

⁴² Ariqueua ijaguitemajanaji. Oratica savincaguiteri iroguenti inetsanatantajiacaca
joriojia maasanopae incoguitejacojiaquempaca osavincaguitetanaquegueti aapojajem-
paca imagorejantajitaca.

⁴³ Iriraqeua Jose Arimateaquitica, iriguenti anaantatsica iguejemajirore joriojia,
itsipajiacari imajirotepae icapiocapinijiacagueti. Yoguijaqueriquea Aapani Irioshi im-
peaquempagueti Imajirojiate maasanojia. Iriatimpa teequea intsarogueji, yoashitana-
queriquea Pirato icanqueriquea ininque irajaitanajero itsino Jesoshi.

⁴⁴ Cotanquitsiquea Pirato iquemaquegueti metojaque Jesoshi yamenanaquequea
intati. Icajemacaanqueriquea imajirote coaretajia icoacojiaqueriquea arimajaca meto-
jaque.

⁴⁵ Iquemavaquerogueti icanquerica coareta, iriaraqeua Pirato ishinetsitacanari Jose
iraanajero itsino.

⁴⁶ Irootarite yoantanacaca Jose ivegarataquitiquea iniromorena shipetari. Iroompa
yoanaque itsopajacotajitiri, yampiguiricantajiacari, yaanajiriquea ontaniqui yojo-
quijitajitiri imperitamoroqui imorotashijitirigueti metojatsica. Itigaritashitancari
iniroshimentapiri mapi, iticaacotantacari.

⁴⁷ Oraquea Maria Magararaquitica aisa Maria iriniro Jose amenacojiaqueriquea
yojoquijitajirigueti.

16

Ipochatanajigueti Jesoshi
(Mt. 28.1-10; Irc. 24.1-11; Jn. 20.1-10)

¹ Ariqueua opitsecanajigueti savincaguiteriqui imagorejantajitaca,* oraquea Maria
Magararaquitica otsipatanacaroquea Sarome aisa Maria iriniro Santiago oahoai-
tanaque ovegarajiaquitiquea poncajencajaripae, oahoaitanaqueniji oshaguitantaji-
aquitemparime Jesoshi.

² Iroompa osavincaguitetamanaque pariapojajaroca semana,† iroaqueragueti iso-
toapojajigueti catsirincaiteri oahoaitanaquequea ontaniqui yojoquijitajirigueti.

³ Oraquea oahoaitanaquegueti quenavoquirontsiqiqui ocanque:

—¿Taaquea tigaritajerone mapi iticaacotantajivecarica imperitamoroqui?

⁴ Inirojeguimajaca ocanca, cotanquitsiquea arejerejeivetapojaca amenajiapojiro oo
jac yoguishirincajiqueroquea.

* **15:40 Santiago.** Icantajitiri aisa Jacovo.

* **16:1 imagorejantajitaca.** Irirajia joriojia imagorejantaro
savincaguiteri saavaro. Opitsecapojajigueti oteroncapojaca imagorejantajitaca, irootaque oteroncampojaja sem-
ana, ariqueua oparianaja otsipa. † **16:2** Iroguenti opariantanaja semana savincaguiteri tominco.

⁵ Oquijaquijaipoji intsimpoguiqui imperitamoroqui, amenajipojiriquea shirampari iriaqueraca quenquevaritananquitsica,‡ isavicaque otincamijempequiqui, quitamarovaegue iitsaare. Ariquea ocojianaca otsarotsaroitanaque.

⁶ Cotanquitsiquea iriatimpa icanqueroquea:

—Aatoquea pitsaroajiguisti. Imaica aviatimpajia picoajivecariquea Jesoshi Nasarequitica yompajacojivecaca, cotanquitsiquea imaica jac pochatanaji. Teequea inchoocatajeji ocaniqui. Iintsijate pamenerojate intati yojoquijijivecarigueti.

⁷ Imaica poapoaitanaquegueti pincamantajipojerija Peerero aisa maasano itsatacaanejia pincanqueriquea: ‘Iroanaquequea Jesoshi Garireaque, iriquetiquea oanankuitsine. Pamenajipojajeri ontaniqui. Aritarite icantajianaquempi tequeratagueti irimetojeji.’

⁸ Osotosoitapanajanti oshiashaitanaca ompioncajianacaquea mana oajianaque intati. Teequea oncamantapojeji irooriji otsaroajianaque.

Jesoshi yonigaajarogueti Maria Magararaquitica

(Jn. 20.11-18)

⁹ Oraquea ipochatanajigueti Jesoshi iroaqueragueti osavincaguitetamanaji pariapojajaroaca semana, iroqueti yonigaaja Maria Magararaquitica yoguisotoacoventajiaquea 7 ampatsini ishaquiavecarogueti.

¹⁰ Iroatimpa oanaque ocamantajivetapojari maasano itsipavetacaca. Amenajipojiri iraacojiaqueri ishimampoancajianaca.

¹¹ Cotanquitsiquea iquemajivetavacarogueti ocanquegueti anijanaji Jesoshi, amenajiri, teequea inquemisantajigueroji.

Jesoshi yonigaajari mavite itsatacaane

(Irc. 24.13-35)

¹² Iroompaquea Jesoshi irioquea yonigaaja mavite itsatacaane yoayoitanaquegueti ishivoquijiavetanacaro quenavoquirontsiqui niganquitejipaequi, cotanquitsiquea manaquea icantashitatiimojiacari.

¹³ Iroompa iriatimpajia icantacantaitanaja Jerosarequi icamantajivetapojajari itsipajia, cotanquitsiquea teequea inquemisantajigueriji iriatimpajia aisa.

Jesoshi icantajianajiri itigarancanejia intsavetacojianaqueriquea

(Mt. 28.16-20; Irc. 24.36-49; Jn. 20.19-23)

¹⁴ Iroompaquea ishecajiacagueti itsatacaanejia carajianquitsica 11, yonigaimojiajariquea Jesoshi. Ariquea icantomajajiaqueri yamenaquegueti manaquea iquishoshirentavaetanaque, teetarite inquemisantajigueriji cantajivecarica amenajivecarica ipochatanajigueti.

¹⁵ Iroompaquea icanqueriquea:

—Poapoaitanaquequea pintsitacaguitejavaetanaqueroquea maasano quepatsi, pintsavetanteroquea Quenquetsatsarentsi Oganejencatatsica pintsavetantimojiaqueriquea maasano caquinteja.

¹⁶ Taacagueti quemisantajivaqueroneca aisa iriviñacajatacaantajianaquempa irishetacojiqueriquea iriantajitavaquemparica aatoniji yogui camorecariqui, cotanquitsiquea quericaca aatoca iquemisantirotsi, manaquea incatsimatimentajiqueri igovaeguishere.

¹⁷ Irieraquea aventaquenaneca manaquea iramenajitaqueri iroguisotoaguetaqueriquea ampatsinipae shaquajiacarica caquinte, iraventashitaquemparigueti novajiro, aisa inquenquetsatantajiaquemparoquea otsipapae quenquetsatsarentsipae tecca intsajiveteparoji.

‡ 16:5 *shirampari iriaqueraca quenquevaritananquitsica*. Iriotaque irashivantite Aapani Irioshi, amenajiaqueri quempevaeca caquinte.

¹⁸ Irajiricajivequempari camaarini, aisa arigueti irojocajivequenempari quepigatatsica irimirajivequemparoquea, aatoquea aanaqueri. Aisa impamijiaqueri joquijiguetatsica, impeaguetanajempauea.

Yatsomajanajagueti Jesoshi

(Irc. 24.50-53)

¹⁹ Iroompauea iteroncanaquerogueti Amajirote Jesoshi iquenquetsatacaajianajirigueti itsatacaanejia, yatsomajanaja yoanaji jenoqui inquitequi isenampijapojajari Aapani Irioshi isavicapojaji itincamijempequiqui. §

²⁰ Iriatimpajia yoayoaaitanaque itsavetantajianaque itsitacaguitejavaetanaquero guinteninintsipae. Irirauea Amajirote yamijiaqueriquea yagavejacaajiaqueri yonigaantajiaquero oacaantantatsica intati cameetsanijite intsajiaquenijite iriratica itsavetantimojiaueca teequea iramatavijajigueriji.

§ 16:19 Irira savicatsica *itincamijempequiqui* majirontatsica yanaajiaqueri itsipajia, iquejemajirovecari majirontatsica.

QUENQUETSATSARENTSI OGANEJENCATATSICA ITIONCAQUECA IROCASHI

Antsatantaquemparoca

Ocatica iroguenti antsatantaquemparoca iroquetica itioncaqueca Irocashi itioncaco-
taquerigueti Jesoquirishito aisa itigarancanejia. Mavitetaojatsica itioncaqueca opajita
Yantajiguica Itigarancanejia Jesoshi. Irocashi iriguenti ogavintantatsica. Chooqa quen-
quejajianquitsica tee irio jorio. Iriraquea Paavoro itsipatanacari iquenaguetanaque-
gueti itsavetanquerogueti Iguenquetsatsare Aapani Irioshi guinteninintsipaequi (Ya.
16.10). Ariquea inintajivetacagueti irimetojajiteri Paavoro, teequea irovashianteriji.
Ipintsacotanacariquea yamenaquerigueti itsaroventacari Jesoshi. Itsamajaquero-
quea paperi itioncantacaca cameetsa.

Tee intsajiteji quero ichoocaqueni itioncaquerogueti ocatica paperi. Chooqa quen-
quejajianquitsica arica ichoocataque Iromaqui, irooca Cesareaqui, irooca Acayaqui.
Chooqa quenquejanquitsica tequeratagueti intionqueroji Irocashi ocatica, iriqueti tion-
cotaqueri Jesoshi Maricoshi, irooca ajagantsiniqui 60, irooca otsipaequi ajagantsini
arejevaetacaro 65. Irocashi tee intsipavetempariji Jesoshi, cotanquitsi itsaquero yan-
taguetaqueca Jesoshi, yapatsajavantaquerotari itioncaqueca itsipapae aisa icoacoma-
jajiaqueriquea oshequini amenaquerica Jesoshi intsamajatacotantaquemparica (1.1-
4).

Itioncaquegueti Irocashi yonigaajiacaji quero icocani Jesoshi: iriovetaca Irioshima-
jaca, cotanquitsi iriotaque aisa caquinte. Irocashi itioncacojiaqueri choviquijianaque-
rica Jesoshi irosati ichoocaquegueti Araini (3.23-38). Aisa itioncotaqueri ivoaque-
gueti Joanca Viñacajatantatsica, aisa ivoaquegueti Jesoshi, aisa chaajaniquitirajagueti.
Icantajiacaji quero ancojiaquempani amanajiaquerigueti Aapani Irioshi (5.16; 6.12;
9.18; 11.5-13; 18.1-8; 22.32; 23.40), itioncacojiaquero manquigarentsijia (quejecaroca
iriniro Joanca Viñacajatantatsica aisa iriniro Jesoshi: 2.36-38; 7.1-18, 37-38; 8.1-3; 10.38-
42; 13.10-17; 15.8-10; 18.1-8; 21.1-4; 23.27-28), itioncacojiaqueri caquinteja tecca
irishineventamajajitempariji, quejejiaca chaajaniquirijia, coguitejacojianquitsica, aisa
capiocapinitinirica majirontatsica imentaquipae. Itsavetacotaqueri Jesoshi yantague-
taqueca, iparianacarogueti irosati iteroncapojirogueti. Itioncaciaqueneri jivatatsica
pajitatsica Teopiro aisa itsipajia tecca irijorijoigueji intsajiaqueniji iroomajaca ocatica
quenquetsatsarentsi iquemacojiaquerica Jesoshi (1.3-4). Irootaquequea itioncanta-
jiacanarica cameetsaniji intsajiaqueriniji Jesoshi iriguenti aajivajerineca maasano
caquinteja aventajiaquemparineca, irioca jorio, irioca aisa tecca irijorijoigueji, aa-
toniji yatsipeventajigaro igovaeguisherejia.

Irocashi itioncaqueneriqueate Teopiro

¹ Icarajiaquequea oshequi panquenapanquenaicaroca itioncacojiaquero maasano
aquemacojiaqueca acaniqui aguinteniguetaagueti.

² Itioncaciaqueroquea itsatacaajiaquenaca irirajia amenamajajiaquerooca maasano
oparianacagueti arejevaetanacaro imaica, iriojiaquea tsavetantaquerooca.

³ Naatimpaquea napatsajavantaqueroquea noteroncamajaqueroqueate
maasanopae, aisa nocoacomajaguetaqueriquea tsavetantaquerooca. Imaicaquea,
Teopiro, namenaqueroquea cameetsataque nontioncaquempiquea nontsatacaama-
jaquempiroquea maasanopae, nonetsanamajaquero,

⁴ pintsaquenijite teetarite iramatavijajiguempiji tsatacaajiaquempiroca, iroomaja-
caquea.

Irashivantite Aapani Irioshi icamanqueriquea Sacaria inchoocataque irijanite

⁵ Coramani, imajirontagueti Erorishini Joreaqui, ichoocaquequea saserorote pajitatsica Sacaria. Ariquea yantavaetapiniqugueti teemporoqui* itsaromentantajitarica Aapani Irioshi, teetarite aparoquea irantavaetequeate Sacaria iriguentiquea itsipajiacac ichoviquijianaqueca itsipajiacaca Aviashini coramani. Choocaquea imanquigare opajitaquea Erisaveti.† Oquempetacariquea iroguentiquea ichoviquitanaqueca Aaroni.‡

⁶ Iriaqueate Aapani Irioshi yamenaqueriquea Sacaria aisa Erisaveti icomajamajajiacaca, inetsanamajajiaqueroquea maasanopae icanquerica Amajirote itioncacoji-querogueti coramani. Teetarite inchoocateji agavejanquitsineca incanque: “Tee irinet-sanamajateroji.”

⁷ Iriaquea Sacaria aisa imanquigare jac quenquevarimajajianaji, teequea inchoocateji quea irijanite, teetarite irijanintimatempajiqueate Erisaveti.

⁸ Iroompaquea aapojajaqueate savincaguiteri yoayoaitantanacaca Sacaria aisa irirajia itsipajiacaca irantajigueneriquea teemporoqui itsaromentantajitarica Aapani Irioshi.

⁹ Igamejigaroquea isaserorotejiate jorio impegavijijiaquempa cameetsanijite intsajiaqueni- jite taaca opajitaquea irantajiaquequea aparopae irantajiaqueca. Iroompaquea yarejerejeipojacaquea teemporoqui icoguijiaqueroqueate, iroompaquea iriguen- tiquea otampaticatanaquequea Sacaria inquijaqueni- jite intsompogui intaaqueneri- quea Aapani Irioshi casancavaneri.

¹⁰ Iroompaqueate aapojacagueticquea capichajaniquinivani intaaqueneriquea, iqui- janaquequea intsompogui. Maasano omporoguijajianquitsica ichoocaquequea sot- siqui yamanajiaqueriqueate Aapani Irioshi.

¹¹ Icatiaqueate Sacaria intsompogui itaaguequeneriquea, yamenitsitariquea irashivantite Amajirote catiaqueate ocaratapojiguetiquea aretare itaantajitaroca casancavaneri ocantanacaguete itincamijempequiqui.

¹² Yamenitsitariqueate ari- quea icotanacani itsaroitsitanacaquea yamenanaque- queate intati.

¹³ Cotanquitsi icantiri ashivanti:

—Sacaria, aatoquea pitsaroguitsi, iquemaquempiqueate Aapani Irioshi pama- naque- rigueti. Pimanquigare Erisaveti ovojaempiri pirijanite. Pimpajiteri Joanca.

¹⁴ Aviatimpaquea oshequi pishinevenquempari, aisa irishinejiaquempa- quea oshe- qui caquinte- jia inquemacojiaquerigueti voaque.

¹⁵ Irishineventamajaquempariquea Amajirote. Aatoqueate imirimataro- queate vi- noja aisa otsipapae cachojaguetatsica. Choocatirajagueti inchoocaque omotijaqui iriniro inchoocamajaqueriqueate Ishire Aapani Irioshi.

¹⁶ Iroompaquea intsaromentacaajiaquempariqueate igonorojia ichoviquijianaqueca Ishiraeri cameetsanijite intsaromentajiaquemparinijite Aapani Irioshi ashincarica.

¹⁷ Iriaquea pirijanite inquejetaquempariquea iriratica tsavetantatsica Iriashini, inchoocamajaqueriqueate Ishire Aapani Irioshi choocaque- rica Iriashini paesatoniqui, iragavejacaqueriquea quejetacaquea yagavejacaquerigueti. Iriatimpa manaqueate irijivaqueriquea Amajirote intsatacaajiaqueriquea igonorojia irivetsinantajiaque- rita shiramparijia irijanijiate. Irirajiaquea teeca inquemisanteji intsatacaajiaque-

* **1:5 teemporo.** Oratica teemporo iroguenti inirojegui mapipanco choocatatsica Jerosarequi. Irira joriojia iroguenti itaantapinitantarica viratsipae intsaromentantajitaquemparica Aapani Irioshi. Pamenero ovaantorite otsapaqui Mt. 21.23. † **1:5 Erisaveti.** Iguenquetsatsarequi guiriego Erisaveti opajita **Elisabet.** Yogui- pitsocaque- rogueti quimajareri iguenquetsatsarequi iriatimpa iconoagarantaca icanqueroquea **Isabel** (ancanque “Isavera”). Iconoacaquea itsipa yoguipitsocaquero icanqueroquea **Elisabet.** ‡ **1:5 Aaroni.** Iriaquea Aaronini iriguentiquea saserorote paesatinica. Aisa maasano ichoviquijianaqueca iriguentijiaquea saserorotejia.

riquea incomajamajiaquempa cameetsanijite irinetsanatashitimentajiaquaquemparinijite Amajirote incoraquepojaquegueti.

¹⁸ Icantiri Sacaria:

—¿Queroquea noncoquempanti nontsamajatantaquemparoca ocativa picanquenaca? Jac quenquevarimajatanajatarite, aisa nomanquigare jac quenquevaromajatanaji.

¹⁹ Ariqueate icanqueriquea ashivanti:

—Naroguentiquea Gaviriero, catiimotarica Aapani Irioshi. Itigarancaquenaquea nonquenquetsatacaquempiniji noncamanquempi ocativa oguishinejantatsica.

²⁰ Cotanquitsiquea imaica teetarite pinquemisantavaquenaji, aatoqueate pagavejaja piquenquetsatajitsi arejevaetaquempa irivoajeguete pirijanite. Coajicaquea aapojacaguete onetsanatanantaquempaca nocanquempica ariquea pinquenquetsatanaje.

²¹ Irirajia omporoguijajianquitsica sotsiqui yoguijaveguitarini teequea irisotojaeji Sacaria, iquenquejajiaquequea: “¿Quero ocotacani osamani ichoocatantacaca intsompogui teemporoqui?”

²² Iroompaquea isotoavetapojajaguete teequea iragavejajempa inquenquetsataje. Yamenajivaqueriguete itsajianaque chooca yamenaqueca intsompoguiqui teemporoqui. Iriatimpaquea teetarite inquenquetsatajequea, manaqueate ijicojicotapojiquea.

²³ Iroompaquea aapojajaguetequea savincaguiteri iteroncantanajaroca yantague-taqueneriguete Aapani Irioshi, yoanajiquea itsovironaquitequi.

²⁴ Ariquea oaque Erisaveti, imanquigare Sacaria, cotanquitsiquea ocancaniquea otsovironaquitequi 5 taai, teequeate onigaantajempaquea.

²⁵ Ocanquequea: “¡Caavijiqueate icavintsajamajaquenaquea Nomajirote! Ipintsatacotaquenaqueate aatoniji yoguipashiventajana nogonoropae incantajiaque: ‘Aricajate icatsimaqueroquea Aapani Irioshi jeroqueate teeca irijanintantempaji.’ ”

Irashivantite Aapani Irioshi icamanqueroquea Maria irooshipojiquea inchoocaque irijanite

²⁶ Iroompaquea aapojacaguete 6 otaate otsaraquitanaqueguete Erisaveti, iriraquea Aapani Irioshi ariquea itigarancuquitsitariquea irashivantite pajitatsica Gaviriero iroanaquequea Nasarequi Garireaquei.

²⁷ Aritaquequea ochoocatiquea oraniqui manquigarentsi pajitatsica Maria. Iroguenti majinaro iroaquera oquenquevarotanaque. Chooa cashiacaroca ipajitaquea Jose irooshivetapojaca irimanquigatemporoquea. Iriguentiquea ichoviquini Taavini imajirote joriojia coramaniqui.

²⁸ Iroompaquea iquijapoji ashivanti otsovironaquitequi, icantapojaqueroquea:

—¡Pishinetempa, aviguenti ishineventamajatacaca Aapani Irioshi! Itsipataquempi Amajirote. Icaavintsajamajataquempi, anaquero icavintsajajiaqueroguete otsipapae manquigarentsi.

²⁹ Oquemitsitariquea ariquea ocotanaca otsaroanaque oquenquejanaque: “¿Quero-caca icanque?”

³⁰ Icanqueroquea ashivanti:

—Maria, aatoquea pitsaroguitsi, icavintsajamajataquempiquea Aapani Irioshi.

³¹ Imaicaquea irooshipojiquea inchoocapojempi pirijanite. Oncoajicaguitepojeguetiquea irivoaqueguete pimpajitsitempariquea Jesoshi.

³² Caavijiquea iranaantaquequea iroganejencamajaquempaqueate iranaajiaque-riqueate maasano. Incantajiqueriqueate Irijanite Aapani Irioshi Anaantamajatacaca. Iriraquea Amajirote Aapani Irioshi impeacaquempari majirontatsica inquejetajem-pariquea Taavini choviquitaquerica.

³³ Impeaquempaquea Imajirojiate ichoviquijianaqueca Jacovoni, incoguitempaniquea irimajirontaquempa, aatoquea opejaa imajirontaguete.

³⁴ Cotanquitsiquea ocancuqueri Maria ashivanti:

—¿Querocaquea oncotanaquempani picanquenaca? Tequeratatirajatarite quisho iroguenaji shirampari.

³⁵ Icanqueroquea ashivanti:

—Incoraqueataquequea Ishire Aapani Irioshi aviatimpaqui. Iriraqueate Irioshimajaca Anaantamajatatsica iragavejacaquemparite. Iriraquea pirijanite voanquitsineca aatotarite icovaeguishedimatatsi, incantajiqueriqueate Irijanite Irioshimajaca.

³⁶ Quejetacaquea pijitica Erisaveti jac quenquevarovaevetanajaquea, aisa icantajivetaroquea tee agavejempaji orijanintempaji, choocaquequea imaica irijanite, imaicaquea tsaraquitanaquequea icaratacotanaquequea yarejetapojacaroquea 6 otaate.

³⁷ Yagavejaquequeate Aapani Irioshi maasanopae, teequeate taaca opajitaquea manapitsatimatemparineca.

³⁸ Iroatimpaquea ocanquequea:

—Iintsija. Ariquea inquempetacaaquenaquea Aapani Irioshi maasanopae picanquenaca. Naroguentiquea yashincaca.

Ariquea yoanaji ashivanti.

Maria oanaquequea onejaquitero Erisaveti

³⁹ Ariqueate onetsanatanacaquea Maria otaampinatanaque oanaquequea guintenintsiqui Joreaqi otsempitsemapiapojacagueti.

⁴⁰ Arejetapojaca oquijapojiquea itsovironaqueitequi Sacaria amenapojiroquea Erisaveti, oquenquetsatacaapojaquero.

⁴¹ Oquemitsitaroqueate Erisaveti ocantapojaqueca Maria, ariquea icotanaca imoguecanaquequea irijanite omotijaqui, ichoocamajaqueroqueate Ishire Aapani Irioshi.

⁴² Oquenquetsatsitanacaquea ocarajencavaetanaquequea ocanque:

—Aviguentiquea icavintsajamajataque Aapani Irioshi. Maasano manquigarentsi icavintsajaqueroquea, cotanquitsiquea aviatimpa caavijiqueate anaquero ipintsamajataquempi. Ariquea iquejetacaquea pirijanite voanquitsineca caavijiqueate icavintsajamajataqueri.

⁴³ ¡Ariotesaa, ocoraqueataquequea onejaquitana iriniro Nomajirote!

⁴⁴ Jeroquea noquemaquempiqueti piquenquetsatapojaquegueti ariquea icotanacaquea nirijanite ishinevaetanacaquea imoguecanaque nomotijaqui.

⁴⁵ Icavintsajaquempiqueate Aapani Irioshi piquemisantavaqueritari, pitsaquequea irinetsanaqueroquea maasanopae itsatacaquemfica.

⁴⁶ Ariquea ocanquequea Maria:

“Noquenquetsashirentanaquequea noshirequi nocanquequea: ‘Caaviji yoganejenca-majata Nomajirote.’

⁴⁷ Noshinevaecaquea noshirequi, noshinevencariquea Aapani Irioshi meshijaanaca.

⁴⁸ Yamenaqueatari naroguentiquea yashincaca teetarite nashintempajiquea ipintsat-acotantaquenaca.

Irosatiquea imaica maasano choocajianquitsineca ocaniqui quepatsiqui incantajiaquequea: ‘Caavijiquea icavintsajamajataquero Aapani Irioshi’,

⁴⁹ iroorijite iriraquea Agavejamajatatsica yantaquena oganejencaguetatsica.

Saanca onaque ivajiro Iriomajatatsica.

⁵⁰ Icocaniquea ipintsatacojiacaji maasano pincatsajiguirica.

Ariqueate iquejetacaajiacariquea avaesatiniteni, manaquea oavaetanaque.

⁵¹ Yonigaaqueroqueate yagavejica yantaguetaquequea oacaantantatsica intati.

Yoguivorocajiaqueriquea aventacojiatsica.

⁵² Yoguisotoajiaqueriquea majirontajiatsica.

Iriraqueate teeca irimajirontempaji yanaacaajjavajiri.

⁵³ Iriraqueate taseajiatatsica yojocajiaqueneriquea cameetsaripae.

Irraqueate ashintavaetatsica ejempacotia yoajiaqueriquea.

⁵⁴ Yamitacomajajiaqueriquea ishiraerijia, iriguentitarite irashimajaca.

Iquenquejajiaqueriquea icocaniquea ipintsatacomajajiacari.

⁵⁵ Icanqueritarite choviquijianacajica paesatoniqui:

‘Nococaniqueate nompintsatacoquempariquea Averaame aisa maasano inchoviquitanaqueca.’ ”

⁵⁶ Oraqueate Maria ochoocaquequea otsovironaquitequi Erisaveti aapojajagueti 3 taai, iroompaquea oanajiqueate ochoocatigueti.

Ivoaquegueti Joanca Viñacajatanatsica

⁵⁷ Ocoajicaguitetapojajigueti arejetapojacaquea ovoantajemparica Erisaveti, ovoacotajiqueate iriguenti shirampari.

⁵⁸ Oshinevaetanacaqueate ocanca. Ariqueate iquemacojiaquerogueti maasano irooshiguetanquitsica aisa ojiguetica caaviji icavintsajamajaquero Aapani Irioshi, ishinejianacaquea maasano.

⁵⁹ Iroompaquea aapojajagueti 8 savincaguiteri icoraquecoraqueitaquequea intotsaiquitacaantajiaquero ichonquimashi§ chaajaniquitirajaca. Inintajiavecaquea impajiaquerimequea Sacaria iraacotsiquerime iriri.

⁶⁰ Cotanquitsiquea iriniro ocanquequea:

—Aato, ariguentiquea impajiquempa Joanca.

⁶¹ Iriatimpajia icantajianaquequea:

—¿Oo querocaquea ococani? Tee inchoocatenicate pijiguetica pajitatsica Joanca.

⁶² Ariquea ijicojiqueriquea Sacaria incanquequea ininqueca impajiquempa irijanite.

⁶³ Ariqueate iriatimpa ijicotsitaroquea inchapataquiqui intioncanquemparoqueate, yojocajiqueneriquea intioncanquemparoca, itionquitaquea: “Ipajita Joanca.” Mana yoayoaitanaquequea intati maasanojia.

⁶⁴ Iroompaqueate itionquitsitarogueti, ariquea icotanajaqueate iquenquetsatanaquea, ishinevencariqueate Aapani Irioshi.

⁶⁵ Ariquea iquemacojiaquerogueti maasano quempejitacogecaroca yamenajianaquequeate intati. Ariquea iquejedianacaquea maasano choocajiatatsica otsempipaequi Joreaniqui iquenquetsatacojiaqueroquea.

⁶⁶ Maasano quemacojiaquericaqueate iquenquejajianaquequea icantavacajianacaquea: “¿Querocaquea incotanaquempani irira chaajaniquiri oncoajicatapojagueti?” Yamenajiaquetarite icavintsajamajataqueriquea Amajirote.

Sacaria ishineventamajatanacariquea Aapani Irioshi

⁶⁷ Irraquea Sacaria iriri chaajaniquiri ichoocamajaqueriqueate Ishire Aapani Irioshi, iquenquejacaqueriquea icanquequea:

⁶⁸ “Caavijiquea yoganejencavaeca Amajirote Irioshimajaca ashintajiacajica aatimpajia ichoviquijianaqueca Ishiraeri.

Icoraquetashijiacajitari irajaiavajajiquea.

⁶⁹ Itigarankuimojiaquea Meshiantatsica agavejamajatatsica, irioquea ichoviquitanaqueca Taavini netsanapinitinirica ininqueca coramani.

⁷⁰ Irootaquequea icantsitacaca paesatoniqui iquenquejacaajiaquerigueti comajamajajiatatsica tsavetacojiaqueroica icantaquerica.

⁷¹ Inchoocavetaquempaquea iroshequiavaetaquequea catsimajiacajica aisa semaneguintajiacajica, cotanquitsiquea irompejiacajiquea.

⁷² Iquenquejajiaqueritari maasano avaesatinite ipintsatacojiaquea, iquenquejacoguitironi ivaaquitote oganejencatatsica icantajiaquerica irinetsanajiaqueneri.

§ 1:59 Pamenero *Glosario* itsavetantajitirogueti *Totsaiquimashitagantsi, itotsaiquijiquero ichonquimashi.*

⁷³ Aapani Irioshi icantaqueriquea avaesatinite Averaameni coramaniqui icantamajaqueriquea

⁷⁴ irompejiacajiquea inchoocajiaquegueti catsimajiacajineca aatonijite atsaroimati antsarotentajiaquemparigueti anetsanajiaqueroniji inintacaajiacajica,

⁷⁵ ancomajamajajiaquempaquea, anetsanashirentimojiaquempari maasano savincaguiteriqui anijatirajajigueti.

⁷⁶ Aisa aviatimpa, irijani, incantacojiuempiquea: 'Iriouea tsavetacotantirica Aapani Irioshi Anaantamajatatsica', aviguentitarite jivaquerineca Amajirote, pincamantajiaqueriquea ishiraerijia irinetsanatsijiaquempaquea iroguijajivaqueri Amajirote incoraquepojaquegueti.

⁷⁷ Aisa pintsatacaajiaqueriquea intsajianaquenijite queroquea incojiaquempani irimeshiantajitaquemparica aatonijite iquenquejacaguiriquea Aapani Irioshi maasanopae igovaeguishere.

⁷⁸ Ipintsatacomajajiacajitarite Aapani Irioshi intigarancantaquemparica irira quenapojatsica inquitequi quempevetarica catsirincateri isotoguigueti,

⁷⁹ irisavincaguitetacojiaqueriquea pitsecacojianquitsica, irirajia guintenijianquitsica otsimancacojiavetacarigueti metojagantsi.

Intsatacaajiacaji queroquea ancojiaquempani aatoniji ashoshoguiteta mana anchoocajiaque cameetsa."

⁸⁰ Ariquea iquenquevaritanaquequea chaajaniquiri, itampishishirentanaquequea. Ariguenti ichoocaguitini osamani oquitamampororoipojigueti irosati yonigaampojaca ipariitanacaroquea itsatacaajiaqueri ishiraerijia.

2

Ivoaquegueti Jesoshi (Mt. 1.18-25)

¹ Ariqueate chaajaniquitirajagueticquea Joanca icanquequea majirontatsica Sesa Aogoshito intioncacojiaquempaquea maasano caquinteja guinteninintsipaequi intsatanquemparica quero icarataqueni maasano,

² teetarite intioncacotempanica coramaniqui. Iroaqueratarite intioncacotaquem-paquea imaica ipeacagueti Shirenio quejemajirovetacarica Sesa irinetsanaguequeneriquea maasano ontaniqui Shiriaqui.

³ Iroompaquea yoayoaitanaquequea maasano querocagueti ichoocajiavetagueti choviquijianaquerica coramani, intioncacojiaquempaqueate.

⁴ Iriouea Jose iquenapojaque Nasarequi Garireaque, itoncotoncoguetanaque Joreaque, yoanaquequea iguinteniqui Taavini, opajita Verene, iriotarite choviquitanaquerica coramani, irio ivaesatiniteni.

⁵ Yoanaque ontaniqui intioncacotempaniji, itsipatanacaroquea Maria icashiacaca irimanquigaquempaca, tsaraquitaquequeate.

⁶ Ariquea yarejevipojacagueti Verenequi aapojacaquea ovoacotantajempaca Maria.

⁷ Ovoaquequea opariacaca. Ampiguiricacotantacariqueate paañoqui, ojoquijitancariquea ishecatantaca viratsi, teetarite onchoocavetempaji querocampate irimaapojeni tsovironaqui qui imaantapinijitacaca.

Irashivantijitete Aapani Irioshi yonigaajipojacari quempoguijajiguirica ovejapae

⁸ Ontaniquiquea irooshiquegueti Verene ochoocaquegueti cataromashi ichoocajiaquequea quempoguijajiguirica oveja itinajaventajiacariquea irovejajiate.

⁹ Ariqueate yamenitsitari catiaca irashivantite Amajirote. Itsirencacotantajipojacariquea iroganejencare Amajirote, itsaroamajajianaquequea.

¹⁰ Cotanquitsiquea icantajiguiri ashivanti:

—Aato pitsaroajiguisti. Iroguentiquea nocoraquetantacaca noncamanquempiquea shinetacaajiaquempineca pishinemajatantajianaquempaca aviatimpajia aisa maasano pigonorogija.

¹¹ Ontaniquiquea ontaniqui Verenequi ichoocavetagueti Taavini coramaniqui voaquequea Meshiajiaquempineca, iriotaque Quirishito* Amajirote.

¹² Imaicaquea poapoaitanaquegueti pamenajiaipojaqueriquea ampiguirica-cotacaquea paañoqui yojoquijicaquea ishecatantaca viratsi. Irootaquequea pintsatantaquempaca teetarite namatavijajiguempiji.

¹³ Taampina iconijatsitapoja iriatimpaqui itsipapae inquitequitica catintijicaquea icarapiovaetaque. Ishineventajiacariquea Aapani Irioshi icantajigui:

¹⁴ “Ontaniquiqueate jenoqui incantajiqueriqueate: ‘Caavijiquea yoganejencamajata Aapani Irioshi.’

Acaniquiquea quepatsiqui inchoocajiaquequea cameetsa maasano incavintsajajiaqueca Aapani Irioshi.”

¹⁵ Ariqueate yoayoaitanajigueti irashivantijitete Aapani Irioshi jenoqui inquitequi, iquenquetsatavacaajianacaquea iriatimpajia icantajigui:

—Jamequetishiatsi oahoaitanaque Verenequi amenajiaquiteriqueate itsatacajiajanacajica.

¹⁶ Yoayoaitanaquequea, itaampinatanaque yarejerejeipojaca yamenajiaipojiroquea Maria aisa Jose jeri aisa chaajaniquiri joquijitaca, yojoquijitantacariquea ishecatantaca viratsipae.

¹⁷ Iroompaqueate yamenajiapojirigueti itsavetantajiaipojaqueroquea maasanopae icamanquerica irashivantite Aapani Irioshi irashi chaajaniquitirajaca.

¹⁸ Maasano quemajiavaquerica itsavetantajiaqueroqueti yamenajianaquequeate in-tati.

¹⁹ Oraquea Maria oocaniquea oquenquejaguitironiquea maasanopae, teetarite om-peacotemparoji.

²⁰ Ariquea yoayoaitanajiquea quempoguijajiguirica oveja, ishineventajianacariquea Aapani Irioshi, yamenajiaquequeate onetsanatanacaquea maasanopae icantajiaquerica irashivantijitete Aapani Irioshi.

Yaajitanaqueriquea Jesoshi teemporoqui

²¹ Ariqueate yarejetacotapojacarogueti savincaguiteri 8 itotsaiquijiqueriquea ichon-quimashi irijanite Maria. Ipajijiqueriquea Jesoshi, aritarite icanquero irashivantite Aapani Irioshi itsatacaaquitirogueti tequeratagueti inchoocatimateji.

²² Ariquea iriraquea Jose aisa Maria inetsanaqueroquea ocanqueca itioncacotanaqueca Moishishini,† jeroquea arejetapojajagueti savincaguiteri incantantajiaquemparica saserorote: “Cameetsatanajimpi imaica aatoniji picovaetajiro teemporo itsaromentantajitarica Aapani Irioshi”, yoanaquequea Jose aisa Maria Jerosarequi yaajianaqueriquea Jesoshi teemporoqui incanquequea: “Jeri irica irijani.”

* **2:11 Quirishito.** Iguenquetsatsarequi guiriegojia icanquegueti **Christos** (Quirishito) manaquea ocanque “Ish-aguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajiaitsica coramanitica intigarancaque Aapani Irioshi impeaquempaniji Imajirojiate maasano. † **2:22** Coramani Aapani Irioshi itioncacaquerigueti **Moishishi** (Irev. 12.2-8) icanti ovoacotajeguete manquigarentsi irijanite, oguijacotempa 40 savincaguiteri aato oita teemporoqui. Avisanaquegueti 40 savincaguiteri oanaque teemporoqui ojocapojaqueneri saserorote ovejajanique aisa emoreni (irioca jeento) intaashitaquenerica Aapani Irioshi. Aatoguete ichoocati ovejate cameetsataque ojocaqueneri mavite emoreni (irioca jeento).

²³ Ariquea iquejetacaajiacaroquea imaica cameetsanijite irinetsanatementajiaque-ronijite Itioncacaantaqueca Amajirote coramanitica ocanquequea: “Maasano iriquet-ica pipariacaca pirijanincaca pojocajeneriquea Amajirote irashintajempariniji.”

²⁴ Yoayoaitanaquequea yaajianaquequea viratsi yojocajiaqueneriquea saserorote intajiaqueneriquea Aapani Irioshi, irinetsanajiaqueroniji Itioncacaantaqueca Amajirote ocanquegueti irojocajiaqueneriquea “mavite jeento irioca mavite emoreni iria-queraca quimoponatananquitsica.”

²⁵ Oraniquiquea Jerosarequi choocaquea aparo tsaromentamajatarica Aapani Irioshi, ipajitaquea Shimeone. Icomajamajatacaquea. Yoguijaguitiniquea coramaniqui incoraquequequea Meshiantanquitsineca shinetacaajiajemparinica ishimampojancajiacaguete maasano ishiraerijia. Iriguentiquea choocaqueri Ishire Aapani Irioshi.

²⁶ Iriotaquequea cantaquerica aatotaguete yameniri incoraquequeguete Meshiantanquitsineca intigarancaqueca Aapani Irioshi, aatotajate imetojita.

²⁷ Irira Ishire Aapani Irioshi itigarantiquitariquea Shimeone iroanajequea teem-poroqui, iquijapojajiquea otantotacaguete. Ariquea ichoocaque incoraquejiaqueguete Jose aisa Maria yamajiaqueriguete Jesoshi irinetsanataqueronijite itioncacotanaqueca Moishishini coramanitica.

²⁸ Iiraquea Shimeone yamenavaqueriguete Jesoshi yaitsitariquea yatsomajitsitari ishineventanacariquea Aapani Irioshi icanqueriquea:

²⁹ “Imaicaquea, Nomajirote, jac netsanatapojaca picanquenaca coramanitica. Pininqueguete nometojaque imaica naatimpa paajanire, cameetsavaeque.

³⁰ Imaicatari nonejaqueri noquijaqui meshiantanquitsineca pitigarancaqueca,

³¹ pinetsanatimojiaquerica maasano caquinteguetanquitsica.

³² Intsirencacoshirentajiaqueriquea teeca iriojia joriojia intsajiaquenijite queroquea incojiaquempani irimeshiantajitaquemparica. Inquemacojiaqueriguete irishinevaejiaquempaquea, irishineventajitaquempariquea ishiraerijia pashintajaca.”

³³ Ariquea iquemavaqueriguete Jose aisa irinero Jesoshi iquenquetsatacoqueriguete yamenajianaquequeate intati.

³⁴ Iiraquea Shimeone yamanacoventajiaqueriqueate icanquequea incavintsajama-
jajiaqueriquea Aapani Irioshi, ariquea icanqueroquea Maria irinero Jesoshi:

—Pamenequea quero incotanaquempani iricatica, irio iromposantajiaquempaca oshequini Ishiraeriqui, irio aisa incatiantajianajempaca itsipajia oshequini.‡ Ironigaan-
taqueroquea inintaqueca Aapani Irioshi, cotanquitsiquea inchoocagarantajiaquequea oshequini manintaquerineca,

³⁵ onconijavaetantanaquempaca iquenquejajiaqueca. Maasanopaequea ocatica manaqueate oshimampojancacaquempiquea aviatimpa, manaquea onquejevequem-
paro irisatajajitempiguete osotoatsantsamenivaeque.

³⁶ Ariquea ochoocaquequea oraniqui aparoquea manquigarentsi tsavetantiroca icanquero-
ca Aapani Irioshi opajitaquea Aana, iroguentiquea irorijanite Panoerini ichoviquitanaqueca Ashereni coramanitica. Iroatimpaquea oquenquevarovaetini coramani. Oraqueate iroaqueraguete oquenquevarotanaqueguete imanquigajivecaro-
quea, ariquea anaanajaguetequea 7 ajagantsini imetojaquequea manquigavecaroca.

³⁷ Imaicaquea ochoocatashitajaquea ocaravaetanaque 84 ajagantsini. Ocogui-
taniquea ochoocapiniquequea teemporoqui. Osanticopiniqueroquea osheca teequea oshecatajempaji cameetsanijite osavicavenquerinijite Aapani Irioshi amanaqueriquea savincaguiteriqui aisa pitsecariqui.

‡ 2:34 Icanqueguete *irio iromposantajiaquempaca* icantacotaqueri irirajia caarica quemisantirica Jesoshi impo-
matsajiaquempaquea quejetaca iromposaquempa. Icanqueguete *irio aisa incatiantajianajempaca* icantacota-
queri irirajia quemisantaquerineca Jesoshi, irogueshishirentajiguete incatiashirentajianaje.

³⁸ Irooqueate amenavaquerigueti Jesoshi yamajiquerigueti ocoraquepojiqate ocanqueriquea Aapani Irioshi:

—¡Ariotesaa, cameetsavaeque!

Ariquea otsavetacotantaqueriquea ocantajiaqueriquea maasano oguijajiaquerica incoraqueque ompetajemparoneca Jerosare.

³⁹ Iroompaquea Jose aisa Maria iteroncajianaquegueti inetsanajiaquerogueti maasanopae Itioncacaantaqueca Aapani Irioshi icampojaqueate Garireaqi, yoayoaitanaquequea iguintenicagueti Nasarequi.

⁴⁰ Iiraquea Jesoshi arimpa ijariquea iquenquevaritanaque itampishitanaquequea, aisa itsamajati iquenquejamajatanaque. Caavijiquea icavintsajamajataqueri Aapani Irioshi.

Yoaquitigueti Jesoshi teemproqui

⁴¹ Icantacoguitani iriri aisa iriniro aapojajagueti savincaguiteri Paashicoa yoayoaitapiniqequa Jerosarequi.

⁴² Iroompaquea yajagantsitacocagueti Jesoshi 12 irajagantsite, aapojajagueti aisa Paashicoa, ariquea itsipatanacari.

⁴³ Iroompaquea anaanajagueticquea Paashicoa icantajianajagueti, iriraquea Jesoshi chaajaniquitirajagueti ichocatajiquea oraniqui Jerosarequi. Cotanquitsiquea Jose aisa iriniro Jesoshi teequea intsajigueji,

⁴⁴ yamenajiaquequea ariji yoguijaguijaitanajiriquea igonorroja. Ariquea opitsecavetanajagueti yamenaguevetajari tee anejeriji, itsitacaguevecaroquea oraniqui icoacotsivetariquea ijigueticquea aisa itsipatsipaicaca,

⁴⁵ teequea iramenajigueriji, tee anejeriji. Osavincaguitevetanacagueti yoayoaitajaquea Jerosarequi iramenaguetaapananajanteritaquea.

⁴⁶ Ocarataque 3 savincaguiteri yamenaguetajari, ariquea yamenapojajiri quijaque otantotacagueti teempro, savicaquequea iconoajiacariquea tsatacaantajigueroica itioncacotanaqueca Moishishini coramanitica, iquemisantajiaquequea icoacotantavaquequea.

⁴⁷ Iriatimpajia icoacotsimajavetariquea manamajaguetaquitsica, cotanquitsiquea iriatimpa yoguisotoajiaqueeneriquea. Maasano quemajiaquequea yamenamenaitanaquequea intati, yamenajiaquequeate caaviji itsamajati.

⁴⁸ Oraquea Maria aisa Jose yamenapojajirigueti yamenajianaquequea intati. Ariquea ocanqueriquea iriniro:

—¿Taaquea, irijani, piquejetantajiaquenaca imaica? Namenaguevetajimpiqueate naatimpa aisa piri notsitacaguevecaroqueate, tee anejempiji, ocantavaetaquitanaquea tsarorec.

⁴⁹ Iiraquea Jesoshi icanqueroquea:

—¿Queroquea ococani pitsitacavaetantavetanacaroca pamenajiaquea? ¿Arim-pate tee pintsateji iroguentiquea nosavicaventamajaque inintaguetica Aapani?

⁵⁰ Cotanquitsiquea iriatimpajia teequea intsajigueji taacaquea icanqueca.

⁵¹ Ariqueate itsipatsipaitanajiriquea Nasarequi. Iriatimpaquea icocaniquea iquemisantamajatariquea iriri aisa iriniro. Iroatimpaquea ococaniquea oquenquejacoquequea maasanopae icanqueca, teequea ompeacotemparoji.

⁵² Iiraquea Jesoshi arimpaquea iquenquevaritanaque, aisa arimpaquea itsamajatanaque. Iiraquea Aapani Irioshi ishinevencariquea, aisa caquinteja maasano ishineventajiacariquea.

3

Itsavetantanaquequea Joanca Viñacajatantatsica oquitamampororoipojaquegueti (Mt. 3.1-12; Mr. 1.1-8; Jn. 1.19-28)

1 Coramani imajirontaca Tiverio Sesa Iromaqui. Iroompa ovegaratacagueti 15 ajagantsini imajirontacagueti, choocaquea iramajirore pajitatsica Pontsio Pirato itigarancaqueca irinetsanajiaqueneriniji Joreaquitica. Iriraquea Erorishi* iriguentiquea netsanajiguirica Garireaquitica. Choocaquea iriguentijeguite pajitatsica Jeripe, iriatimpaquea iriguentiquea netsanajiguirica Itoreaquitica aisa Teraconitequitica. Iriraquea netsanatantatsica ontaniqui Aviriniaqui ariguenti ipajica Irisaniashi.

2 Aisa choocaquea mavite saserorote anaantamajatanquitsica. Aparoquea ipajitaquea Anashi, iriraquea itsipa ipajita Caipashi. Iriraquea Joanca, irijanite Sacaria, choocaquea ontaniqui, ichoocaquequea osamani oquitamampororoitapojigueti. Ariquea iquenquetsatacaqueri Aapani Irioshi.

3 Iquemaquerigueti Joanca yoanaquequea icantanacaroquea Jororanequi, itsitacavaejianaqueriqueate choocajiatsica oraniqui, itsavetantavaetanaqueroqueate icantajiguiriquea: “Pincantashitatijaianajempa povashiantajianajero pipeacaaguishejivecaca, piviñacajajianaquempaquea aatonijite icatsimatimentajiguimpiquea Aapani Irioshi maasanopae pigovaeguisherejia, manaqueate irishetajempiquea.”

4 Aritarite itionquicaroquea Isaiashini coramani incanquequea: “Inquenquetsataquequea oquitamampororoitapojigueti iririjencani, incanquequea: ‘Pinetsanatahijiavaquempari Amajirote inquentapojempaca, pintanarejagueteneri iguenaovoquiropae ontampaticapoquitanaquempaca.

5 Querocaquea oquichovitoquiagueti intijajiquero cameetsanijite ovepampajantanajempaca.

Oraquea otsempiguetatsica aisa otsonquiinapae irivepampajajiguequero.

Oraticaquea quenavoquirontsi ticopoquiguetanquitsica ontampaticavoquitanaque.

Irooqueate quenavoquirontsi quichovitoquiaguetanquitsica irivevajajiguetaqueate.

6 Ariquea iramenajiaque maasano caquinte quero icota Aapani Irioshi imeshiantigueti.’

”☆

7 Oraqueate yoayoaitanaqugueti tirorerere caquinteja iriviñacajajigueriquea Joanca, iriatimpa icantajiavaqueriquea: “¡Quejejaquempiquea irijanijiate sanatari! Pitsanirovetacaquea. ¿Taate cantajiaquempi picoraquecoraqueitancaca acaniqui noviñacajajiaquempiquea aatonijite icatsimajiguimpiquea Aapani Irioshi oncoramanitapojajegueti incatsimatimentajiaquerigueti maasano igovaeguisherejia?”

8 Iintsija pinetsanamajajianaquempaja iramenajiaquempinijite maasano arimajaca picantashitatijaianaja povashiantajianajero picovaeguishevetacaca, pintsaromentajantanajemparija Aapani Irioshi. Imaica aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamenajigueroja oratica mapiporoqui. Irininqugueti Aapani Irioshi iragavejaquequeate impeacaajiaquemparoquea ichoviquivaejianaqueca Averaameni.

9 Jac, yaajitiro poshontyo, itsitijitanaquero inchaquijitaquero ovari maasano inchato teeca oncameetsateji oitsoqui, ariquea intajaiquero paamariqui.”

10 Iriatimpajia icantsijigariquea:

—¿Querocaquea noncojiaquempani?

11 Icantiriquea Joanca:

—Choocagueti ashintanquitsica mavite iitsaare irojocagaranqueneriquea quericaca teeca inchoocatacoteji. Aisa quericaca choocatacotanquitsica isheca irojocaqueneriquea teeca inchoocatacoteji.

* 3:1 Iriratica **Erorishi** irio icantajitica Erorishi Antipashi. Iririni aisa ipajita Erorishi, irio majirontanquitsica ivoaqugueti Jesoshi (pamenero Irc. 1.5; Mt. 2.1-19). ☆ 3:6 Is. 40.3-5.

¹² Ariquea ichoocajiaquequea oraniqui capiocapinijiguinirica majirontatsica imentaquipae,[†] iroguentiquea icoraquetashijiaque iriatimpajia aisa incampojeriquea Joanca iriviñacajajiaqueri. Iquemajiaquerigueti iquenquetsavaequegueti Joanca icantsitanacaquea iriatimpajia:

—Tsatacaantantatsica, naatimpajia, ¿querocaquea noncojiaquempani?

¹³ Icantsijigariquea:

—Imaicaquea aviatimpajia aatoja poganaajiguiniriquea pignonoroja, iroguenti paajiaque intati ícanqueca majirontatsica.

¹⁴ Ariquea icoacojiaqueriqueate coaretapae aisa icantsijigariquea:

—Naatimpajia, ¿querocaquea noncojiaquempani?

Icantajiguiriquea Joanca:

—Aviatimpajia aatoqueate paapitsajiguiritsi taaca opajitapae yashincaca itsipapae aisa aatoquea picantajiguiri: ‘Aatoguetei pojocanaro noninqueca noncatsimaquem-piquea.’ Aatoja pamanantajigui imentaquipae itsipa, aatoja picantitsi: ‘Aatoguetei pojocana nontsojevenquempiquea incatsimaquem-piquea majirontatsica.’ Irieraquea imentaquitsite ivegaraquempica majirontatsica ariotapojaquequea, aatoquea pininta-jiguitsi itsipapae.

¹⁵ Iirajiaquea maasano capiocajianquitsica oraniqui ariquea icojianaca inintamaja-jianaquequea intsamajajiaqueri Joanca iriocajate Quirishitotatsica.[‡]

¹⁶ Cotanquitsiquea Joanca icantajiguiriquea maasano: “Naatimpa iroguenti nantaque noviñacajatantajiaquempiro oja iramenantajiquemparoca arimajaca picantashitatijaijanaca povashiantajianajiroquea pipeacaaguishetacaca, cotanquitsiquea incoraquepoje impoitapojenaneca caaviji yanaaquenaquea yagavejamajati. Ooshiatsi, aatotarite noquempejitaritsiquea iriatimpa nompeaquempame amiquerineca noishorejacoquerimeca igaviguitire. Iriatimpa inquempetacaantaquemparo iroviñacajatantajiaquempiri Ishire Aapani Irioshi aisa paamari.[§]

¹⁷ Incoraquepojaquegueti iroashiguetajempariquea queri tsaromentamajacarica. Inquempetanaquemparoquea agueroguetei oitsoqui, asagorejitemparo, ampishon-cavaqueroquea oncoraquejencaqueguetei chovigajenca, aanaqueroquea osagoma, onchoocatashitanaquempa oitsoqui. Aguijaavaqueroquea shimatoqui anquempogui-jitemparoquea. Oraquea osagoma antaitemparoquea. Ariquea inquempetaquem-paquea Amajirote incapiocajiajojaquequea tsaromentamajacarica intsipatsipaitana-jempari jenoqui ichoocatiguetei Aapani Irioshi. Irieraquea teeca intsaromentajiguem-pariji intigarancaquequea camorecariqui teeca ontsivacavaete, incoquempaniquea irantsipevaejiaquempaquea.”

¹⁸ Ariquea iquejetacaquea imaica Joanca icamantajiaqueri maasano quero incoji-aquempani, oshequi icamantaguetaquea, itsavetacotimojiaqueri Quenquetsatsarentsi Oganejencatatsica.

[†] **3:12 imentaqui.** Coramani tee inchoocavetempaji quenapapana ipeacaantajitaca paperipana, iroguenti choocatanquitsi imentaqui cavorejatatsica. Irootaque ivegaratantajitaca coramani. [‡] **3:15 Quirishitotatsica.** Iguenquetsatsarequi guiriegojia ícanqueguetei **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserrotejiate. Iriera Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano. **§ 3:16 Paamari** oquenquetsatocotaquero mavitepae. (1) Pamenero otsapa 17 acaniqui ocantacoqueroguetei camorecari intaantajitaquempaca caarica netsanatiro ininqueca Aapani Irioshi. (2) Pamenero aisa Ya. 2.3 ocantacoqueroguetei icoraquepojaqueguetei Ishire yamenajiquero quejevetaca paamari. (3) Pamenero aisa 1 Co. 3.13 ocantacoqueroguetei iramenantajitaquemparoguetei yantaguetaqueca maasano caquinte.

¹⁹ Aisa icantomajaqueriquea majirontatsica Erorishi, yamenaqueriquea yaapitsa-queriqueate iriguentijeguite imanquigare pajitatsicaquea Eroriashi. Teetarite aparoquea onchoocateji ocatica. Icantimentaguequeriquea aisa taaca opajitapae icov-aeguisheguetacaca.

²⁰ Ariquea yogaavaetanaca Erorishi, yogavitaquero oca: isantanatacotsitariquea Joanca.

Iviñacajatacaantacaquea Jesoshi

(Mt. 3.13-17; Mr. 1.9-11)

²¹ Oraqueate tequerataguetiquea irisantanatacojiteriji Joanca, choocatirajaquea iviñacajatantaguitiniquea, ariquea iviñacajatacaantajiacaca oshequini caquinteja, ariquea iquejetacaquea aisa Jesoshi iviñacajatacaantacaquea iriatimpa. Ariquea iriraquea Jesoshi yamanaqueriquea Iriri. Iroompaquea yamanaquitiguiriquea otanarejanacaquea inquite

²² yamenajitavaqueriquea Ishire Aapani Irioshi iquempetapojacariquea emoreni yampiguiricashipojacariquea iriatimpaqui. Ariquea iquenquetsajencajitanaque jenoqui inquitequi, icanque:

—Aviguentiquea Irijani nopintsamajatacaca, noshineventamajataquempiquea aviatimpa.

Choviquijianaquerica Jesoshi

(Mt. 1.1-17)

²³ Ariquea yajagantsitacotanaquequea Jesoshi 30 ajagantsini iparianacarogueti it-satacaantaque. Ijijitaquejiquea iriojiquea irijanintamajatari Jose, cotanquitsiquea iriguentiquea choviquitanaqueri Eri.*

²⁴ Iriraquea Erini iriguenti irijanite Matate.

Irira Matateni iriguenti irijanite Irevi.

Irira Irevini iriguenti irijanite Merequi.

Irira Merequini iriguenti irijanite Jana.

Irira Janani iriguenti irijanite Jose.

²⁵ Irira Joseni iriguenti irijanite Matatiashi.

Irira Matatiashini iriguenti irijanite Amoshi.

Irira Amoshini iriguenti irijanite Naomo.

Irira Naomoni iriguenti irijanite Eseri.

Irira Eserini iriguenti irijanite Nagai.

²⁶ Irira Nagaini iriguenti irijanite Maati.

Irira Maatini iriguenti irijanite Matatiashi.

Irira Matatiashini iriguenti irijanite Semei.

Irira Semeini iriguenti irijanite Joseco.

Irira Joseconi iriguenti irijanite Jora.

²⁷ Irira Jorani iriguenti irijanite Joanani.

Irira Joanani iriguenti irijanite Iresa.

Irira Iresani iriguenti irijanite Sorovaveri.

Irira Sorovaverini iriguenti irijanite Saratieri.

* **3:23** Omanaca ocatica oguipitsocaquerogueti. Oraquea iguenquetsatsarequi guiriegogia icanquegueti **huios**, chooca mavite aguenquetsatsarequi oguipitsocaquerogueti: oconoagarantaca ocanque “irijanite”, oconoagarantaca aisa ocanque “ichoviquitanaqueca”. Omanaca aisa otsipa: tee onconigamajateji queri ocantacotaqueca ichoviquitanaqueca Eri. Iriogueti Jose ocantacotaque guiriegotsaqui ocanquegueti **huios...tou Eli**, oguipitsocaquero “irijanite Eri”. Cotanquitsiquea iriogueti ocantacotaque Jesoshi, oguipitsoqueroquea “ichoviquitanaqueca Eri”. Mateo 1.16 ocanti iriri Jose ipajita Jacovo, irootaquequea namenantacaca acaniqui irio ocantacotaque Jesoshi ichoviquitanaqueca Eri. Chooca otsipa itioncaqueca jorio coramani ocanti iri Maria ipajita Eri. Irioca tioncacotancatsica acaniqui, iriotari choviquitanaquerica Jesoshi.

Iira Saratierini iriguenti irijanite Neri.
²⁸ Iira Nerini iriguenti irijanite Merequi.
 Iira Merequini iriguenti irijanite Ari.
 Iira Arini iriguenti irijanite Cosame.
 Iira Cosameni iriguenti irijanite Erimarami.
 Iira Erimaramini iriguenti irijanite Eri.
²⁹ Iira Erini iriguenti irijanite Josoe.
 Iira Josoeni iriguenti irijanite Eriesere.
 Iira Eriesereni iriguenti irijanite Jorimo.
 Iira Jorimoni iriguenti irijanite Matate.
³⁰ Iira Matateni iriguenti irijanite Irevi.
 Iira Irevini iriguenti irijanite Shimeone.
 Iira Shimeoneni iriguenti irijanite Joraa.
 Iira Joraani iriguenti irijanite Joname.
 Iira Jonameni iriguenti irijanite Eriaquime.
³¹ Iira Eriaquimeni iriguenti irijanite Merea.
 Iira Mereani iriguenti irijanite Mena.
 Iira Menani iriguenti irijanite Matata.
 Iira Matatani iriguenti irijanite Natani.
³² Iira Natanini iriguenti irijanite Taavi.
 Iira Taavini iriguenti irijanite Isai.
 Iira Isaini iriguenti irijanite Overi.
 Iira Overini iriguenti irijanite Voose.
 Iira Vooseni iriguenti irijanite Saramoni.
 Iira Saramonini iriguenti irijanite Naasone.
³³ Iira Naasoneni iriguenti irijanite Aminaravo.
 Iira Aminaravoni iriguenti irijanite Arame.†
 Iira Arameni iriguenti irijanite Eserome.
 Iira Eseromeni iriguenti irijanite Parese.
 Iira Pareseni iriguenti irijanite Joraa.
³⁴ Iira Joraani iriguenti irijanite Jacovo.
 Iira Jacovoni iriguenti irijanite Ishaaco.
 Iira Ishaaconi iriguenti irijanite Averaame.
 Iira Averaameni iriguenti irijanite Tare.
 Iira Tareni iriguenti irijanite Nacori.
³⁵ Iira Nacorini iriguenti irijanite Serogui.
 Iira Seroguini iriguenti irijanite Iragao.
 Iira Iragaoni iriguenti irijanite Peregui.
 Iira Pereguiini iriguenti irijanite Evere.
 Iira Evereni iriguenti irijanite Shera.‡
³⁶ Iira Sherani iriguenti irijanite Cainane.
 Iira Cainaneni iriguenti irijanite Arepaquisare.
 Iira Arepaquisareni iriguenti irijanite Sheme.
 Iira Shemeni iriguenti irijanite Noe.
 Iira Noeni iriguenti irijanite Irameco.
³⁷ Iira Irameconi iriguenti irijanite Matosare.
 Iira Matosareni iriguenti irijanite Enoco.
 Iira Enocconi iriguenti irijanite Jarete.

† **3:33** Oconoagarantaca paperi ocanti ocaniqui: “Iira Aminaravoni iriguenti irijanite Aramini. Iira Araminini iriguenti irijanite Arini.” ‡ **3:35 Shera.** Icantajitiri aisa “Sara” (**Sala**).

Iira Jareteni iriguenti irijanite Maarareere.
 Iira Maarareereni iriguenti irijanite Cainane.
³⁸ Iira Cainaneni iriguenti irijanite Enoshi.
 Iira Enoshini iriguenti irijanite Sete.
 Iira Seteni iriguenti irijanite Arai.
 Iira Araini iriguenti irijanite Aapani Irioshi. §

4

Inintavecaquea ampatsini irantacaaquerime Jesoshi teeca irininteji Aapani Irioshi
 (Mt. 4.1-11; Mr. 1.12-13)

¹ Oraquea iroaqueraguete iviñacajatacaantacaguete Jesoshi Jororaneniqui ichoocamajapojaqueeriqueate Ishire Aapani Irioshi, yaanaqueriquea ontaniqui oquitamamporo-roitapojaqueguete.

² Ariquea icoraquetashiqueriquea imajirote ampatsini yasereseretaqueriquea yamenantavetacari inintavecaquea irantacaaquerime teeca irininteji Aapani Irioshi. Ariquea ichoocaque Jesoshi oraniqui oavaetanaquequea 40 savincaguiteri, teequea irishecatempaji. Ogatsimajatanaqueri itase.

³ Iroompaquea icantaqueriquea ampatsini:

—Iintsija arimajaguete aviguentica Irijanite Irioshi iintsijate pincanteroja ocatica mapi ompeanaquempata pan pishecataquempaca.

⁴ Cotanquitsiquea Jesoshi icanqueriquea:

—Choocatarite otioncacocaguete ocanquequea: ‘Teequea aparo ontampishitacaanteji isheca caquinte, jero aisa maasano icanqueca Aapani Irioshi.’

⁵ Iroompaquea yaanaqueriquea jmm agasataanquitsica yonigaaguetaqueri maasanopae quepatsi yashincaca majirontaguetsica aisa maasanopae yashintajiacaca.

⁶ Icanqueriquea:

—Iintsija nompeacaitsitempiquea imajirojiate maasano, nojocaquempiquea maasano yashintajiacaca. Aritarite maasanopae ocatica pamenaguequeca iroguentitari nashi. Naatimpaquea nagavejaque nojocaqueneri quericaca nonintacaaqueca.

⁷ Arigueteja pigueroventuena pintsarovenquena, pashintaguetaquemparoquea maasano.

⁸ Icantsitanajaquea Jesoshi aisa icanqueri:

—Choocatarite otioncacaguete ocanquequea: ‘Pintsarovenquemparija Majirontamajatsica Pirioshite, aparoqueate iriguenti pimajirontamajaquempa.’

⁹ Iroompaquea ariquee yaanaqueriquea Jerosarequi icatiacaapojaqueate teemporoqui itsarovenantajitarica Aapani Irioshi ochoviinatapojaguete ocaravaequaquea jenoqui ocanca, icanqueriquea:

—Iintsija arimajaguete aviguentica Irijanite Irioshi, iintsijate pisapocanaque isaviji,

¹⁰ ocanquetarite itioncacojiquerogueti ocanque:

‘Intigarancajaquempiriquea Irioshi irashivantijitete, quisho iroaroaitanaquempi.’

¹¹ ‘Trajiricanaquempiquea irantsomajanaquempi aatonijite pitsitincapojaro mapi.’

¹² Icantsitanacaquea Jesoshi icanqueriquea:

—Cotanquitsiquea choocatarite itioncacojiquerogueti aisa ocanquequea: ‘Aatoquea pamenantaritsi Majirontamajatsica Pirioshite.’

§ 3:38 Icanque *Iira Araini iriguenti irijanite Aapani Irioshi*, teenica inchoocatenica caquinte irijanintacarica Arai, mana ipeacaacariquee Aapani Irioshi.

¹³ Ariquea iriraquea imajirote ampatsini iteroncaquerogueti maasano yamentantave-tacarigueti, itsinampirejavetajitari.

Yoanajiquea Jesoshi Garireaquei itsatacaantaguetanaque
(Mt. 4.12-17; Mr. 1.14-15)

¹⁴ Iroompaquea yoanajiqueate Jesoshi Garireaquei. Ariquea ichoocamajaqueriquea Ishire Aapani Irioshi yagavejacaqueriquea, ariquea iquemacojiaqueriquea maasano choocajiansica oraniqui.

¹⁵ Itsatacaantaguetanaquequea shinagogapaequi* icapiocontapinijiacaca joriojia, ishineventajianacariquea maasano.

Itsatacaantavetacagueti Jesoshi Nasarequi
(Mt. 13.53-58; Mr. 6.1-6)

¹⁶ Ariquea yoanaquequea Jesoshi Nasarequi iquenquevaritaquegueti coramani. Iroompaquea aapojajagueti savincaguiteri imagorejantajitaca yoanaquequea shina-gogaqui icapiocontapinijiacaca joriojia, iquijapojaquequea, ariqueate icotaniquea iri-atimpa yoampinicaroqueate savincaguiteri imagorejantajitaca.† Ariquea icatiacaquea irampatsajavantaquero Iguenquetsatsare Aapani Irioshi.

¹⁷ Yojocajiqueneriquea paperi itioncanaqueca tsavetantatsica Isaiashini coramaniqui. Yaitsitaroquea iponarejitaro yapatsajavantaqueroquea yamentague-queeroquea otioncacagueti ocanquegueti:

¹⁸ “Ichoocaquenaqueate Ishire Amajirote,
iroorijite inintacaquenaquea nontsavetantavaetanaqueneriqueate maasano co-
guitejacojianquitsica,
nontsatacaantaquemparica Quenquetsatsarentsi Oganejencatatsica.
Itigarancaquenaquea nontsavetantavaejianaqueneriqueate maasano yaajivecaca
nontsatacaantaquemparicaquea queroquea incojiaquempani cameetsanijite
iroguipaquijajitajerinijite.

Itigarancaquenaquea namenacajajajerinijite shamponcajaguetatsica,
nompejiaquempariquea icatsimacatsimajitica.

¹⁹ Nontsatacaajiaqueriquea noncanquequea: ‘Imaicaquea aapojacaquea incav-
intsajamajatantaquempica Aapani Irioshi.’ ”

²⁰ Iroompaquea iteroncanaquitiguiroquea yapatsajavantaquerogueti yampiguirica-
jiroquea yojocajiniri jocaquenerica incajaranqui, isavicanaquequea. Maasanoquea
choocajianquitsica shinagogaqui yamentamentanaqueneriquea sorerere.

²¹ Ariquea iquenquetsatanaquequea icanquequea:

—Imaicaquea onetsanatimojiaquempi ocatica Tioncarentsi piquemajiaqueca.

²² Maasanoquea iquenquetsatacotaquerigueti Jesoshi, ishinevencariqueate, yame-
najanaquequea intati, yamentajiaqueroquea cameetsavaequequea icantaguetaqueca,
cotanquitsiquea icantavacaajianacaquea:

—Nojiquerisacanicaria irio irijanite Jose.

²³ Icantajiguiriquea:

—Arimaja pincantajiaquena: ‘Aavintantatsica, paavintajempaquate avisati.’
Aisa pincantajiaquena: ‘Maasanopae noquemacojiaquero pantaguetaqueca
Caperenaoniqui iintsijate pantagueteroquea aisa imaica acaniqui piguinteniqui.’

²⁴ Icantsitanaquea aisa icanquequea:

* **4:15** Oratica icantajitica *shinagoga* iroguenti icapiocontajiacaca joriojia yapatsajavantantaroca Iguenquetsatsare Aapani Irioshi aisa yamentantapinicarica. Querocagueti iguinteniguetaqueti joriojia incarajiaquegueti 10 shiram-
pari quenquevaritatsica iragavejaque impeacaquempari shinagoga. Incoguitempariquea aparo jivaquerineca.
† **4:16** *imagorejantajitaca*. Irira joriojia imagorejapinijiaque saavaroqui.

—Arimajaquea noncantamajajiaquempiquea iriraquea tsavetantiroca icanquerica Aapani Irioshi aatoquea ishineventajitari iguinteniqui.

²⁵ Piquemacojiaqueroqueate paesatoniqui choocatirajagueti Iriashini teequeate ontejimatajeji incani anaavaetanacaquea 3 ajagantsini aisa 6 taai. Itaseajianaquequea maasano Ishiraeriqui. Ochoocavetacaquea oshequiavaeveca metojacoropae Ishiraeriqui,

²⁶ cotanquitsiquea itigarancaquerigueti Aapani Irioshi Iriashini teetarite irooquea intigarancaqueneriji, ariguentiquea itigarancaqueri Sarepetaqui irooshitacoqueroquea Shirone, iroimotanaqueroquea otsipaquea metojacoro teeca iro igonoromajaca.

²⁷ Aisa coramani choocatirajagueticquea tsavetantatsica Eriseoni ichoocajiavecaquea yoshequiavaeveca avejancarijia Ishiraeriqui, cotanquitsiquea teequeate impeaguetempaji aparo, iriguentiquea pejaatsi aparo Shiriaquitica pajitatsica Naamanini.

²⁸ Irooqueate iquemaquemaitavaquitiguicquea capiocajianquitsica icatsimamajajianaquequea maasano.

²⁹ Icatintijianacaquea yoguisotoitsitariquea yaajianaqueri tijjacoñajiquea oraniqui ocaratapojigueti ocapiocagueti tsovironaquipae. Yaajiavetanacariqueate ocogara-japojacagueti intanquirejitsitemparimequea, iroguentiquea ocapiocacagueti itsovironaquitepae otsempiqui.

³⁰ Cotanquitsiquea iriatimpaquea iquenaguijianaqueriquea niganquiqui yomporoguijajiacagueti, yoapanajanti.

Jesoshi yoguisotoajiri ampatsini
(Mr. 1.21-28)

³¹ Iroompaquea yoanajiquea Jesoshi Caperenaqui, iroguenti guinteninintsi choocatanquitsica Garireaqui. Arejetapojagueticquea savincaguiteri imagorejantajitaca yoanaquequea shinagogaqui icapiocantapinijiacaca joriojia itsatacaantaquequea.

³² Iquemajiaqueroqueti itsatacaantaqueca mana yamenamenaitanaquequea intati, agavejavaequetari icanqueca.

³³ Ariquea ichoocaque oraniqui shinagogaqui aparoquea ishaquiacaca ampatsini, icajemavaequeate iririjencani:

³⁴ —¡Ariotaqueshiatsi, Jesoshi Nasarequitica! ¿Queroquea pincojiaquenani naatimpajia? ¿Irooquea picoraquetashique pinteroncajiaquena? Notsatavaquempiquea aviguenti Iriomajaca irashi Irioshi.

³⁵ Icantanaquequea Jesoshi:

—¡Pisanticote! Pisotoanajeri.

Irooquea iquemaquitiguiriquea ampatsini ariquea icotanaca yoguitejanaqueri ishaquiacaca, iquenapanajantiquea isotoapanajanti yovashiantanajiriquea, teequea queroca incotajeri.

³⁶ Maasanojia mana yoayoaitanaque intati, iquenquetsatavacaajianaca:

—¿Quero ocoani iquejequeroqueti? ¡Icantaquitigui iquemisanqueriquea ampatsini-pae, isotoapanajanti! ¡Caavijitari imajirontamajaca! ¡Caavijiquea yagavejamajati!

³⁷ Iroompaquea maasanopae choocajiatatsica oraniqui iquemacojiaqueroqueate Jesoshi.

Jesoshi yogueshitajirogueti ivaguirote Shimo
(Mt. 8.14-15; Mr. 1.29-31)

³⁸ Ariqueate isotoanajiqueate Jesoshi shinagogaqui icapiocajiacagueti, yoanaquequea itsovironaquitequi Shimo. Oraqueate ivaguirote Shimo ashinoncajavaecaquea ocatsirincavaeque. Icamantajitavaqueriquea Jesoshi irogueshitajero.

³⁹ Yoanaquequea iroatimpaqui icanaanaquea iquenquetsatacaaqueoqueea joquijirentsi yoguisotoajiroqueea. Iroatimpaqueea ariqueea ocotanaja osavogatanaji. Ariqueea ocatianaja ojocacojiajiniri irishecaciaquempaca.

Jesoshi yogueshiguetajirigueti yoshequiavaequeequea ashinoncajajiatsica

(Mt. 8.16-17; Mr. 1.32-34)

⁴⁰ Oraqueea itsaparoncaguitetanajigueti icoraquecoraqueitaqueequea maasano ashinoncajajiatsica ocantashitajencaguecaqueea ashinoncajagantsipae, yaajianaqueneriquea Jesoshi irogueshiguetajeri. Ipamijiavaqueriquea, ipeaguetana-jaqueea maasano.

⁴¹ Iconoagarancaqueea mana ishaquiajiacari ampatsini. Yoguisotojaijainirigueti yoguisotosotoitajiri icajemavaetanaqueequea icanqueri:

—Aviguenti Irijanite Irioshi.

Cotanquitsiquea Jesoshi icantimentajiaqueriquea inquenquetsajiaje, irioriji itsajiaque iriguenti Quirishito Meshiantatsica.

Itsavetantaqueeate Jesoshi Joreaqi

(Mr. 1.35-39)

⁴² Osavincaguitetanajigueti yoanaquequea Jesoshi oraniqui teegueta inchoocateji caquinte, cotanquitsiquea icoajiaqueriquea caquinteja ariqueea yarejetacovaejiacari ichooaquegueti. Inintajiavetacaqueea irajiajaquerime aatonijite yoanaji.

⁴³ Cotanquitsiquea iriatimpa icantajiguiriquea:

—Noanaquetarite noncamantajiaqueriquea aisa choocajianquitsica otsipapaequi guinteninintsi, nontsavetantaquero Quenquetsatsarentsi Oganejencatatsica nontsat-ajajiaqueri quero icotani imajirontaguetai Aapani Irioshi, irootaqueequea itigarankuimenquenaqueea Aapani.

⁴⁴ Iroompaqueea yoanaquequea Joreaqi itsavetantanaqueroqueea shinagogapaequi icapiocapinijaguetai joriojia.

5

Yaajiaqueequea icarapiovaetaqueequea shima

(Mt. 4.18-22; Mr. 1.16-20)

¹ Ariqueeate yoanaquequea Jesoshi otsapijaqui iniromotija pajitatsica Jenesare.* Itiorencaventajianacariqueea caquinteja, itsinacajianaqueri Jesoshi. Inintajiaqueeate inquemisantajiaqueriquea itsavetantaquerogueti Iguenquetsatsare Aapani Irioshi.

² Ariqueea yameniroqueea Jesoshi mavite quenajarontsi ogataaguetaca. Igataajiaque-roqueate ashincaroquea, yaguijijianaqueequea yajacajiajiroqueate imantsatsite.

³ Iroompaqueea itetanajaqueea Jesoshi iguenajaroqui Shimo icanqueriquea iraimatanajerota niganquijacoñaji. Isavicaqueequea itsatacaajiaqueriquea irirajia omporoguijajianquitsica otsapijaqui.

⁴ Ariqueea iteroncanaquerogueti iquenquetsataqueguetai icanqueriquea Shimo:

—Jaameja ontaniqui osaanajataqueguetai panquitacotantajiguempari shima pimantsatsite.

⁵ Icanqueequea Shimo:

—Tsatacaantantatsica, nanquitacoveguitarini incajaranqui pitsecariqui nocantacoveguitaniquea aapojaja osavincaguitetanaji, teequeate naimajigueji. Cotanquitsiquea imaicaqueea aviguenti cantanquitsi, intsishiatsi.

⁶ Irooqueea yojocajiaqueroqueea inoshicajatsijivetarooqueea taaja itseraiquivaecaro-queate shimapae icanca, niganquiqueate otsatitsatiavetanaca imantsatsite.

* **5:1 Jenesare** opajita aisa Garirea.

⁷ Ariquea yacocovaetanaquequea vacoc vacoc icajemaguitetsijigariquea mavinaquitantquitsica quenajarontsi iramitacojiaquerinijite. Yoayoaitanaquequea yamitacojiaqueriquea yaajiaquequea itseraiquivaequeri mavinaquite quenajarontsiqiu, tsitijaat-acovaeca.

⁸ Iriraquea Shimo Peerero yamenaquerigueti caaviji yagavejamajati Jesoshi, igueroventsitariquea icanqueri:

—Nomajirote, cameetsa poanaje, aato pitsipatanatsi, naroguentiquea covaeguishetatsica.

⁹ Itsaroanaquequeate iriatimpa irisatijiaquea itsipatsipaicaca yamenajiaquequeate yaajiaquequea icarapiovaetaquequea shimapae.

¹⁰ Iriguentiquea itsipatsipaitacaquea irijanitepae Severo ipajitaquea Santiago,† iriraquea itsipa ipajitaquea Joanca. Itsaroajianaquequea iriatimpajia aisa, cotanquitsiquea Jesoshi icanqueriquea Shimo:

—Aatoquea pitsaroguitsi. Imaicaquea irioquea pimpitsocashijianaquempa caquinte-jia, pinquejetacaajiajempari shima panquitacojiguirigueti.

¹¹ Iroompaquea itsinampijaatacojianaquea igataapanajantiro iguenajaropae, itariapanajantiroquea maasanopae, yoayoaitanaji yoguijaguijaitanaqueriquea Jesoshi.

Jesoshi ipeajiriquea avejancari

(Mt. 8.1-4; Mr. 1.40-45)

¹² Ariquea ichoocaquegueti Jesoshi ocapiocacagueti tsovironaquipae, icoraquepo-jiquea avejancari. Yamenapojaquerigueti Jesoshi iguero vempojacari yarejevaetaquita ivancaqui isavi, icanqueriquea:

—Nomajirote, arigueti pininque, pagavejaque piveajena navejancavejancaacagueti.

¹³ Iriraquea Jesoshi icanantajempequitanaica ipamitsitari, icanqueri:

—Jeeje, noninque. ¡Pimpeanajempaja!

Irooqueate icanquitiguiri jac peanaja yavejancavejancaacagueti.

¹⁴ Ariquea icanjavajiriquea Jesoshi:

—Aatoquea picamantitsi. Iriguentiquea poimotanaque saserorote ponigaapojempari-iquea, paanajenerija viratsipae, pinetsanaqueroja icantaqueca Moishishini cameet-sanijite iramenamajaquempinijite, ariquea incanquempi peanajimpi, intsajiaque-mpinijite maasano peamajatajimpi.

¹⁵ Cotanquitsiquea arimpaqueate iquemacomajajianaqueriquea Jesoshi, itiroren-cashijianacariquea oshequini inquemisantajiaqueri intsavetantaquegueti, aisa im-peaguetajeriquea irashinoncajanejia.

¹⁶ Cotanquitsiquea Jesoshi yoapiniti osamani teegueti inchoocatimateji caquinte iramananaqueriquea Iriri.

Jesoshi yogatiajirigueti teeca ironquempaji

(Mt. 9.1-8; Mr. 2.1-12)

¹⁷ Iroompaquea itsatacaantaqueguetiquea Jesoshi, ariquea ichoocajiaquequea oraniqui isavisaviique pariseojia irisatijiaquea tsatacaantajiguiroca itionca-cotanaqueca Moishishini quenajiapojatsicaquea Jerosarequi aisa guinteninintsipaequi Garireaque aisa Joreaque. Iriraquea Jesoshi yogueshijiaqueriquea ashinoncajajatsica, iriguentiquea agavejacaqueriquea Aapani Irishi.

¹⁸ Ariqueate icoraquecoraqueipoji itsipapae caquinte yamacojiapojaqueriquea teeca ironquempaji irajianaqueneriqueate intsompogui ichoocaquegueti Jesoshi.

† **5:10 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaque-rogueti ivajiro ipajitiri **Santiago,** itsipa ipajitiri **Jacobo.** Mavite oponeaca iguenquetsatsarequi evereo, ipajitiri **Yaakob.**

¹⁹ Cotanquitsiquea querocampa inquenacaajiaqueri inquijacaantajianaquemparicate, omporoguijajiaquea tirorererere caquinteja. Yataitaitanaquequea jenoqui sotsiqui ocantamencotacaguetei itsopajaguequero ogotapae ivichajajiguequea quepatsi, ishimatarejitaro, yoguisoroncacojiaqueriquea teeca ironquempaji itampaticatacotaqueguetei ichoocataqueguetei Jesoshi.

²⁰ Iriraquea Jesoshi itsajiavaqueri yaventajiapojacari irogueshitajeriniji, icanqueriquea teeca ironquempaji:

—Shirampari, jac shetacotajimpi maasano pipeacaaguishevecaca.

²¹ Iriraquea tsatacaantajiguiroca itioncacotanaqueca Moishishini, irirajia pariseojia iquenquejianaque intati: “¿Taate ipaji irira quejemanatacarica Aapani Irioshi? ¿Ooqueate choocampaca itsipa agavejanquitsineca irishetaqueroqueate covaequisherentsi? Aparoqueate yagavejaque Aapani Irioshi.”

²² Cotanquitsiquea Jesoshi itsajiavaqueriquea iquenquejiaqueca icantsijigariquea: —¿Queroquea picopicoitanacani piquenquejianaquequea piquejejaqueroquea imaica?

²³ ¿Querocampate caavijica anaque mananquitsica? ¿Iroocajate noncantaqueriguetei teeca ironquempaji: ‘Jac shetacotajimpi maasano pipeacaaguishevecaca’, iroocajate noncantaquitigueri: ‘Pincatianaje panijitanaje?’

²⁴ Imaicaquea namenacaajiaquempiroquea yagavejaquequea acaniqui quepatsiqui irira Irijanite Caquinte[‡] irishetacoitajeri ipeacaaguishevecaca caquinte.

Irooquea icantanaquitigui ipitsocashitari teeca ironquempaji icanqueriquea:

—Iintsija noncanquempiquea pincatianaje, paanajero pinorijancaca, poanaje pitso- vironaquitequi.

²⁵ Irooquea icantaquitiguiriquea icampanajantaquea icatiapanajanta, yaanajiroqueate inorijancaca yoanaji itsovironaquitequi, ishineventamajatanacariquea Aapani Irioshi, icanquequea: “Ariotesaa, Aapani, poganejencamajata.” Maasanojia yamenajia- avajiriquea.

²⁶ Yamenamenaitanaquequeate intati ishineventamajajianacariquea Aapani Irioshi iriatimpajia aisa, itsaroamajianaquequea icantajigui:

—Imaica ocativa savincaguiteri amenantajiacaroca oganejencatatsica teeca iramena- jiteroji.

Ishecatacaquea Jesoshi itsovironaquitequi Irevi

(Mt. 9.9-13; Mr. 2.13-17)

²⁷ Ariqueate isotoanajiquea Jesoshi icantanaja ontaniqui yamenapojiaqueriquea aparo capiocapinitinirica majirontatsica imentaquipae. Ipajitaquea Irevi.[§] Isavi- caquequea ipashicatsarajitiroguetei yoguijajiavaqueri avisavisaitatsica ivegaratacaa- jiavaqueriqueate imentaquitsite maasano aajiananquitsica irajaararopae aisa taaca opajitapae. Ariquea icanqueriquea:

—Jameja, poguijatanaquena.

²⁸ Ariquea yovashiantaguetanaqueroquea Irevi maasanopae, icatiitsitanaca, yogui- jatanaqueri.

²⁹ Iroompaquea itiacanquequeate Irevi taaca opajitapae, icajemaqueriqueate Je- soshi irishecaquempa itsovironaquitequi. Icajemacaantaguequeri itsipapae oshequini capiocapinijiguirica majirontatsica imentaquipae, itsipapae caquinte, irishineven- quempari Jesoshi. Itsipatsipaicaca ishecajiaca.

³⁰ Cotanquitsiquea iriraquea pariseojia itsipatsipaicari tsatacaantajiguiroca itionca- cotanaqueca Moishishini, icantajiaqueri itsatacaane Jesoshi:

[‡] 5:24 Icanqueguetei Jesoshi **Irijanite Caquinte** mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojatsica jenoqui inquitequi, icaquintetapojquetari ivoapojaque.

[§] 5:27 Iriratica **Irevi** ipajita aisa Mateo (pamenero Mt. 9.9; Mr. 2.14).

—¿Querocaquea picojiacaniquea pishecajiagueta pitsipatsipaitantacarica capiocapiniijiguinirica majirontatsica imentaquipae aisa itsipajia covaeguishetatsica?

³¹ Icantanaquequea Jesoshi:

—Iriraquea teeca irashinoncajempaji teetarite incoguitejacotempariji aavintantatsica. Iriguenti coguitejacojigari ashinoncajajatsica.

³² Ariqueate noquejetacaquea naatimpa teequea irioquea noncoraquetashiteji teeca incovaeguishejiguempaji noncajemajiaqueri incantashitatijaijanajempaja, iriguenti nocoraquetashijiaque covaeguishejiatsica noncajemajiaqueriquea cameetsanijite incantashitatijaijanajempanijite irovashiantanajeronijite ipeacaaguishevecaca.

Icoacojitaqueriquea Jesoshi irisanticotantajitemparoca isheca

(Mt. 9.14-17; Mr. 2.18-22)

³³ Iroompaquea icantajitaqueri Jesoshi:

—Iriraquea itsatacaaneja Joanca aisa irashijia pariseojia yoguipaquijapinijiaque-roquea isheca teetaquea irishecatsitajempauea cameetsanijite incantacoguitempaniquea iramanajiaqueriquea Aapani Irioshi. Cotanquitsiquea pashijia pitsat-acaguica ¿querocaquea icojiacani teequea inquejejiguempariji iriatimpajia, manaqueate incantacoguitaniquea ishecaguitani, imiraguitani?

³⁴ Iroompaquea iquempetacaanca Jesoshi icanque:

—Pinquenquejeja inchoocateguetiquea iriaqueraca manquigatanquitsineca incajemajiaqueriquea itsipavijijiaca irishecajiaquempa, ¿arimpaqueate aatompate ishecajiga? Irishecajiaquempauea, itsipajiacaritarite cajemajiaquerica, shinejiacaquea.

³⁵ Cotanquitsiquea oraqueate aapojempagueta incatsimatantajitaquemparica irajaitanaqueri osamani, ariquea iroguenti iroguipaquijantajiaquemparoca isheca, irishimampojanacojianaquempari.

³⁶ Ariqueate Jesoshi iquejetacaajiacanariquea aisa icanque:

—Aato agaveji atotashitaro iroaqueraro quitsaarentsi capichaji ampatacanquemparogueti iroaqueraro, ompomatsaquempauea. Oratica aavetacaca capichaji ompat-acamataquivetaquempa, aato ocameetsamajati, aatotari oquejetaro.

³⁷ Aisa aritarite onquejetaquempauea iroguijaatantajitaquemparogueti vinoja iroaquerajatica oncachotapoje iroguijaatantajivetaquemparogueti imeshinanaquiqui iriquetnica. Oroameshinatanaquetari, oncachojamajavetanaquempagueti oshimoajavetanaquempauea, ariquea oncotanaquempa aravoavetaquitempa imeshina, ariquea intyaquisanaque oshacojaatanaquempauea vinoja, aisa impomatsataquempauea imeshina.

³⁸ Jeroquea caavijiquea ocameetsataque: oraquea vinoja iroaquerajatica iroguentiquea iroguijaatantajiquemparogueti iriaquerameshinari cameetsanijite aatonijite opomatsajata vinoja, aisa aatonijite ipomatsata imeshina.*

³⁹ Aisa quericacaquea miraroca vinoja iroquetijaca teequea irinintajeroji iroaquerajaca, manaqueate icanquequea: ‘Oraticaquea iroquetica irooquea cameetsajamajatanquitsica.’†

6

Ishireguijiaque tirigoitsoqui itsatacaane Jesoshi savincaguitერიკი imagorejantajitaca
(Mt. 12.1-8; Mr. 2.23-28)

* **5:38** Itsatacaantica Jesoshi iroguenti quejetacaroca quitsaarentsi iroaqueraro, oquejetacaroc aisa vinoja iroaquerajatica. Aato agaveji otsipataro itsatacaantica pariseojia aisa tsatacaantajigueroa itioncacotanaqueca Moishishini.

† **5:39** Ari iquejejiaca caquinteja, iconoagarantaca tee irininteji inquemisantajero iroaqueraca itsatacaantaqueca Jesoshi.

¹ Iroompaquea aapojajaguetei savincaguiteri imagorejantajitaca yoanaquequea Jesoshi icantanaca tirigomashiqui, itsipatsipaitanacari itsatacaanejia. Irooquea icantajanacaguetequea oraniqui ishireguipanajanti tirigoitsoqui isagorejajiaqueoquea ishecajiacaro.

² Iroompaqueate yamenajiaqueguetei pariseojia icantsijigariquea:

—¿Quero ocotacani paajianaquequea tirigoitsoqui? Imaicatarite iroguentequea savincaguiteri imagorejantajitaca icantimentantajitirotarite irantantajitemparo.

³ Icantanaquequea Jesoshi:

—¿Arimpate teequea pampatsajavantacotimajigueroji aviatimpajia itioncacojitaqueriguetei Taavini coramani ocanqueguetei itaseanaque iriatimpa aisa itsipajianacaca, teequeate onchoocatimajaniquiteji taampaquea irishecajiaquempaca?

⁴ Iquijitsitanacaqueate itsovironaquitequi Aapani Irioshi* ishecatacaroquea pan icantimentantajitica irishecajitemparoguetei, manaquea yojoquijitaquero oraniqui shi-taponcarontsiqui cameetsanijite iramenaqueronijite Aapani Irioshi. Iriguentequea shecataroquea saserorotejia, iriotaquequea cantaqueroqueate Aapani Irioshi. Cotanquitsiquea iriraquea Taavini ishecatacaroquea, aisa yojocajiaqueneriquea itsipatsipaitacaca.

⁵ Icanquequea aisa:

—Iriraquea Irijanite Caquinte iriguentequea cantatsica queroca icantimentantajitica irantantajitemparoguetei savincaguiteri imagorejantajitaca, aisa querocaquea teeca incantimentantajiteroji.

Jesoshi yogeshitajiri chompevacovetatsica savincaguiteri imagorejantajitaca (Mt. 12.9-14; Mr. 3.1-6)

⁶ Iroompaquea aapojajaqueate otsipaquea savincaguiteri imagorejantajitaca yoanaquequea Jesoshi shinagogaqui icapiocantajiacaca joriojia itsatacaantaquequea. Ariquea ichooaque oraniqui chompevacotantacaroca itincamijempequiqui, teequea iragavejempajiquea impacorejempaji.

⁷ Iriraquea tsatacaantajiguero itioncacotanaqueca Moishishini aisa pariseojia yamenamajataqueriqueate Jesoshi iramenajiaqueriquea arica impeajeriqueate savincaguiteriqui imagorejantajitaca intsavetantimenquerinijite incantajigue ipeacaaca teeca oncameetsateji ipeajiriquea chompevacori savincaguiteriqui imagorejantajitaca.

⁸ Cotanquitsiquea Jesoshi itsataquequea iquenquejajiaqueca. Icantsitariquea chompevacovetanquitsica:

—Intsijate pincatigue iramenajiaquempinijite maasano.

Icatiitsitanacaquea.

⁹ Ariquea icantajiguiri Jesoshi:

—Intsija noncoacajiguempi. ¿Querocaquea icanque Moishishini coramani? ¿Taaca irantantajitempara savincaguiteriqui imagorejantajitaca? ¿Ari quea icanque impeacaantajitemparo cameetsa, irooca irantantajitaquemparoquea covaeguisherentsi? ¿Ari icanque aavajeri agonoro aatoniji imetoji, irooca icanque ametojaqueri?

¹⁰ Ariqueate yamenaqueriquea maasano capiocaventajiacarica icanqueriquea chompevacovetanquitsica:

—Pincantavacotempaja.

Irooquea icantavacovetanaquitiga ari quea icotanaja iraco jac peamajatanaja.

¹¹ Cotanquitsiquea iriatimpajia icatsimamajianaquequea icanca, iquenquetsatava-caajianacaquea querocaca incojiaquerini Jesoshi.

* **6:4** Ocanqueguetei *itsovironaquite Aapani Irioshi* iroguenti ocantacoque quitsaarentsivanco itsarorentantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica **teemporo** intsarorentantaquemparica. Ipajiqueroquea iroatimpa aisa *itsovironaquite Aapani Irioshi*.

Icoguiajiaqueri Jesoshi 12 impeacaajiaquempaca itigarancane
(Mt. 10.1-4; Mr. 3.13-19)

¹² Otsipa savincaguiteri yoanaquequea Jesoshi otsempiqui iramaneriquea Aapani Irioshi. Yamaqueriquea icantacoguitani osavincaguitetanaji.

¹³ Osavincaguitetanajigueti icajemajiaqueriquea itsatacaanejia iriatimpaqui. Ariquea icoraquejiaquegueti icoguiaque 12, ipeacaajiacari itigarancane.

¹⁴ Maasano yaajiaqueca ariqueate ipajijiaquea: Shimo (ipajitajica Peerero), Antirishi (iriguentijeguite Shimo), Santiago, Joanca, Jeripe, Varitorome,

¹⁵ Mateo, Tomashi, Santiago (irijanite Arejeo), Shimo (icantajitica “Serote”),†

¹⁶ Jorashi (irijanite Santiago)‡ aisa Jorashi Ishicariote (aacaanquerineca Jesoshi oncoramanitanajegueti).

Itsatacaajiaqueriquea Jesoshi oshequi caquinte
(Mt. 4.23-25)

¹⁷ Ariquea yoguirincajiaquea Jesoshi itsipatsipaitajiariquea itsatacaanejia isavisavi-
ipojaji opiguetejacagueti. Yomporoguijaventajianacariquea itsipapae itsatacaanejia
yoshequiavaequequea aisa itsipapae quenaquenaitapojatsica osamani Joreaque aisa
Jerosarequi aisa quenajiapojatsica otsapijaguetapojacaguetiquea Tiroqui aisa Shirone.
Iroguentiquea icoraquetashijiaquequea inquemisantajiaqueriquea Jesoshi intsavetan-
taquegueti aisa cameetsaniji irogueshitimentajeriniji yojoquijiguetaqueti.

¹⁸ Iriaquea ishaquiaguetaacaca ampatsinipae yoguisotoaguetajiniriquea.

¹⁹ Maasanopae inintajiaquequea inchagajiaqueriquea, yamenajiaqueriquea yagave-
jamajati, yogueshiguetajiriqueate maasano.

Quericaca shinetavajatsineca aisa quericaca atsipetavajatsineca
(Mt. 5.1-12)

²⁰ Iroompaquea yamenajiguiriquea Jesoshi itsatacaane icantajiguiriquea:
“Caavijiquea pishinevaejiaquempa aviatimpajia coguitejacojianquitsica, §
pimajirontajiacaritarite Aapani Irioshi.

²¹ Caavijiquea pishinevaejiaquempa aviatimpajia taseajianquitsica imaica,*
pinquemajiaquempitari.

Caavijiquea pishinevaejiaquempa aviatimpajia iraaajianquitsica imaica,
iroguishinejajiaquempitari Aapani Irioshi pishirontajiaquempaquea.

²² Caavijiquea pishinejianaquempaquea aviatimpajia irisemajitempigueti
iramenajiaquempigueti pitsaromentajiacari irira Irijanite Caquinte.

Aricaquea aatoquea inintajigui pinconoajiaquempari manaqueate incantaguishe-
jianaquempi

aisa incantacojiaquempi: ‘Iriguenti covaeguishemajatanquitsica.’

²³ “Iriaquea choviquijianaquerica ariquea iquejejaqueriquea tsavetantajigunirica
Aapani Irioshi coramanipaequitica icatsimajiaqueriquea. Ariquea aviatimpajia pa-
menajiaquegueti inquejejaquempigueti imaica pishinejianaquempaquea, pishinema-
jajianaquempa, pitsajiaquequea caaviji iroguishinejamajaquempiquea Aapani Irioshi
oncoramanitapojajegueti ontaniqui inquitequi, ipeacaajiaquempitotari irojocajiaque-
mpica.

† **6:15 Serote** ocanque “nintamajatatsica”. Irooquea icantajitiri irirajia joriojia nintamajatanquitsica iroguiso-
toajigueri Iromaquitica omperaperaacarica onchoocatashitajempanijite iguepatsite ishiraerijia. ‡ **6:16** Iriratica
Jorashi (irijanite Santiago) ipajita aisa Tareo. Pamenero Mt. 10.3; Mr. 3.18. Iguenquetsatsarequi guiriego
ocanque “irashi” Santiago irootaquequea iconoagarantantacaca caquinte yoguipitsocaquerogeti icantiri “iriguen-
tijeguite” Santiago. § **6:20** Icanquegueti **coguitejacojianquitsica** iquejetacaacari aisa irirajia tsatanquitsica
ishirequi tee iragavejamajatempani. Pamenero Mt. 5.3. * **6:21** Icanquegueti **taseajianquitsica** iquejetacaacari
aisa nintamajajanquitsica incomajamajajiaquempa, iragavejacajaiqueritari irinetsanajiguero ininqueca quejetaca
inquemajiaquempatica. Pamenero Mt. 5.6.

24 ¡Cotanquitsiquea imaicashiatsi pantsipevaejiguempa aviatimpajia ajaarantajiatsica!†
Aatotarite querica guishinejajimpitsi oncoramanitapojajegueti, iroorijite pishinet-
sicaquea imaica, pishineventavecarioquea pashintaguecaca.

25 ¡Imaicashiatsi pantsipevaejiguempa aviatimpajia quemajianquitsica imaica, pintasea-
jigue!

Imaica pijique: ‘Teetarite taaca noncoguitejacojiguempaji.’

Oncoramanitapojajegueti pinquenquejajavetanaquemparoquea pininta-
janaquequea incavintsajajiaquempiqueate Aapani Irioshi, cotanquitsiquea
aatoquea ichoocatimati amijiajempineca.

¡Imaicashiatsi pantsipevaejiguempa aviatimpajia shirontajiatsica imaica, pishinevencar-
oqueate maasanopae quepatsipaequitica!

Oncoramanitapojajegueti pishimampojancajiaquempa quea pirajaiaquempa.

26 ¡Imaicashiatsi pantsipevaejiguempa aviatimpajia irishineventajiaquempigueti
maasano!

Ariqueate iquejejiacariquea paesatinijianacarica ishineventajiacari tsavetantaji-
atsica amataajiatsica.

Ampintsajiaquempari catsimajiacajica

(Mt. 5.38-48; 7.12)

27 “Imaicaquea aviatimpajia quemisantajiaquenaca noncantajiaquempiquea aisa.
Pimpintsajiaquempariquea catsimajiaquempica aisa pincavintsajajiaqueriquea se-
maquempica.

28 Irirajia cantavetaquempica: ‘¡Shoo poanaque camorecariqui!’ manaquea pinquen-
quetsatacaqueriquea cameetsa, pincanqueri: ‘Noninque pinchoocajiaque cameetsa.’
Pamanacoventajiaqueriquea quenquetsaguishetacovequempica.

29 Inchoocaquegueti capojaquempineca pivoroqui pimpitsoquempa queate acaque-
rocatita otsipavoro inquejetacaitemparoquea iroatimpa. Inchoocaquegueti aapitsa-
taquempironeca piitsaare, irinintsitaquempirogueti otsipa intsompoguitica piitsaare,
pojoquitenempari.

30 Inchoocaquegueti amanaquempironeca taaca opajitapae, pojocaqueneriqueate.
Inchoocaquegueti aapitsaquempironeca pashincaca, aatoquea picantajiri: ‘Pojojaje-
naroja.’

31 Pincavintsajajiguerija itsipajia, pinquejetacaguempari piningueteu incavintsa-
jaquempia aviatimpa.

32 “Managueteu irioca pimpintsajiguempa pintsajiguempica aviatimpajia, ¿arimpa
irooquea irishinevenquempia Aapani Irioshi? Ariqueate icojiga aisa coguishejiatsica,
itsajiguiretari impintsataquempari pintsatarica iriatimpa.

33 Managueteu irioca pincavintsajajigue cavintsajajiaquempica aviatimpajia, ¿arimpa
irooquea irishinevenquempia Aapani Irioshi? Ariquea icojiga aisa coguishejiatsica,
itsajiguiretari incavintsajajigueri cavintsajirica iriatimpa.

34 Aisa arigueteu pojocaqueneri pigonoro yamanaquempica iramanaquempigueteu
iroguipijaempica coajica, cameetsavaeque. Cotanquitsiquea managueteu irioca pojo-
quene quejetacaajajempineca ¿arimpa irooquea irishinevenquempia Aapani Irioshi?
Ariqueate icojiga aisa coguishejiatsica, yojocajiguiniri igonoro cameetsaniji inquejeta-
caajempari iriatimpa.

35 Cotanquitsiquea aviatimpajia noncantajiaquempiquea pimpintsajiaquem-
pariquea catsimajiaquempica, pincavintsajantaquequea, aisa pojocaquenerigueteu
cantaquempica iroguipiajempiro, aatoquea poguijacojiaja inquejetacaajempia.
Pinquenjejaquempigueteu imaica, incavintsajamajajianaquempiquea Aapani Irioshi

† 6:24 Icanquegueteu *ajaarantajiatsica* icantacotaqueriquea aisa irirajia quenquejajiaatsica: “Teetarite noncogui-
tejacotempariji impintsatacotena Aapani Irioshi, caavijiquea naatimpa nagavejaque.”

Anaantamajatatsica aisa pinquejejaquempariquea iriatimpa, icavintsajajiaqueritari teeca inquenquejacogijueriji aisa covaeguishetatsica.

³⁶ Pimpintsatacotantajiguempaquea, pinquejejaquempariquea Piri Irioshimajaca ipintsatacotantamajatagueti.

Aatoja piquenquejacoguishetsitiritsi peacaajigaroca covaeguisherentsi
(Mt. 7.1-5)

³⁷ “Pamenitaquerigueti yantaguishetaqueca itsipa aato piquenquejitsi: ‘Teequea incameetsateji, icovaeguishetaca’, ariquea aato iquejetacaajitimpi aviatimpa. Aatoquea pinintitsi incatsimatimentero Aapani Irioshi covaeguishetanquitsica, ariquea aato iquejetacaajitimpi aviatimpa. Pimpeacotsitajempari itsipajia, ariquea inquejetacaajitaquempi aviatimpa.

³⁸ Pincavintsajantamajajigue, ariquea inquejetacaajitaquempiquea aviatimpa. Incavintsajamajajiquempiquea, onquejetaquempa incavintsajamajaquempigueti intseraiquimajataquempiro pishimatotequi irivinacamajatavaquero irantecacotavaquero irosati osocaguitanaquempa. Querica caavijica iranaaque incavintsajantamajataque, caavijiqueate incavintsajajiqueriquea iriatimpa, cotanquitsiquea iriraquea arica igoca icavintsajanquequea, ariqueate inquejetacaajitaquempari iriatimpa ariquea igotaquempa incavintsajajiqueriquea.”

³⁹ Ariqueate iquenquetsatanajiquea Jesoshi iquenquetsatacotaqueriquea tsatacaantantatsica, icanquequea: “¿Arimpaqueate iragavejaque shamponcajari iranaqueri itsipa shamponcajari ironigaantaque? ¿Aatompaquea itanquiretanquireitanaque mavite ocogarajapojacagueti?”

⁴⁰ Iriraquea itsatacaajitica, teequea iranagueriji tsatacaguirica, cotanquitsiquea arigueti intsitacacaaguetaqueri intsatacaquerigueti irooquee inquejetantanaquemparica iriatimpa.

⁴¹ “¿Querocaquea picocani pamenantacarica itijaarojaniqui pigonoro cotanquitsi tee pinquenquejacoteroji inchapoa poquijaqui pashi aviatimpa?”

⁴² Aatogueti pameniro inchapoa poquijaqui pashi aviatimpa, ¿arimpate pagavejaquempa pincanqueri pigonoro: ‘Intsija, iguentijegui, nonquitsoajempiro pitijaaro?’ Cameetsatamampeatsica, iroquetitarite pijivatavaque pinquitsoavajerota inchapoa poquijaqui pashi aviatimpa, ariquea pamenamajatanaje pinquitsoimentajenerinijite tijaataquerica pigonoro.‡

Jesoshi iquenquetsatacojiaqueriquea caquinte iquejetacaacari inchato sovenatatsica
(Mt. 7.17-20; 12.34-35)

⁴³ “Maasano inchatopae choocatatsica osovena ishecajitaca aatoquea agavejitsi onchooqueue osovena teeca irishecajitemparoji. Ari oquejetaca inchatopae choocatatsica osovena teeca irishecajitemparoji, aatoquea agavejitsi onchooqueue osovena ishecajiguetaca.

⁴⁴ Maasanopae inchato iroguenti itsatantajitaroca osovena. Iguerasovena teequea onchoocatantemparoji samerento. Aisa ovaitsoqui teequea onchoocatantemparoji poronqueto.

⁴⁵ Ariquea iquempetaca caquinte comajamajatatsica iroguenti iquenquetsatacoguetaque cameetsaripae, irootari iquenquejacoguetaque. Iriraquea teeca incomajamajatempaji iroguenti iquenquetsaguishetaque taaca opajitapae, irootarite iquenquejacoguetaque iriatimpa. Maasanopaetari iquenquejacogijuetica irootaquequea iquenquetsatacojiguetica.

‡ **6:42 tijaataquerica pigonoro.** Oquejetacaró arigueti pinique pincanqueri pigonoro irovashiantajero covaeguisherentsipae yantaguetica, aviquetita jivaquerone povashiantajero pantaguisheguetica aviatimpa. ¿Querocaquea picocani pamenantacarica ipeacaaguishetacaca pigonoro cotanquitsi teequea pameneroji pashi aviatimpa caaviji pogaaca?

Jesoshi itsavetacotaqueriquea caquinte iquejetacaajiacari peacagaroca tsovironaqui
(Mt. 7.24-27)

⁴⁶ “¿Querocaquea picojiacani picantajiaquenaqueate intati: ‘Nomajirote, Nomajirote’, cotanquitsiquea teetarite pinetsanajiavaqueroji nocantajiavequempica?”

⁴⁷ Imaicaquea noncantajiaquempiquea queri iquejetaca iriraquea quericaca coraquetashiquenaca iquemisantaquenaquea ariquea inetsanamajaquero nocantaquerica.

⁴⁸ Manaqueate iquejetacariquea caquinte vinchajiroca itsovironaquite. Iqueequitaroquea yoavaequeroquea jmm isavi imontsitajacotantacaró shiratantapi. Ariquea ivinchajavaquero. Iroompaquea amaravepojacaquea oja anaacotanaqueroqueate itsovironaquite otampishijavaetanaquequea ocanca, cotanquitsiquea teequea agueroji, ocatiavaecaqueate isaviqui imontsitajacotantacarotari mapi oquishomajatantacaca.

⁴⁹ Iriraquea quemavetavacaroca nocanqueca cotanquitsiquea teequea irinet-sanateroji manaqueate iquejetanacari itsipa ipeacaacaqueate itsovironaquite teequea iroguijaamajateroji isavi, querocampaquea onquishotanguempaca. Iroompaquea amaranaquegueti oja anaacotanaquero itsovironaquite, otampishijatanaque osoveanaquero, jac aapanajantiro, oteroncamajatanaquero oanaquero.”

7

Jesoshi yogueshitajiriquea yashincaca imajirojiate coaretajia
(Mt. 8.5-13)

¹ Iteroncanaqueroquetiquea Jesoshi itsatacaajiaquerigueti yoanajiquea Caperenaoqui.

² Ariquea ichoocati oraniqui coareta Iromaquitica. Iriatimpa iriguentiquea imajironcaca 100 igoaretajiate. Yojoquijivaecaquea yashincaca caavijica ipintsamajatacaca, iroovepojaca irimetojeme.

³ Irootaquequea iquemacotantaquerigueti Jesoshi itigarancaqueriquea iramajiroreja joriojia incamanquiteri incoraquequeniji irogueshitajeri yashincaca.

⁴ Iroompaquea yoayoaitanaquequea icantajiaipojaqueriquea Jesoshi:
—Nonintamajiaque poanaque pogueshitajateneri yashincaca imajirojiate coaretajia, caavijitari icameetsati ashintantanquitsica.

⁵ Ipintsamajiacajitari aatimpajia joriojia, yantacaantaquenaro shinagoga nocapio-cantapinijiacaca.

⁶ Ariquea yoanaquequea Jesoshi yoguijaguijaitanaqueriquea. Yaajivetanacaro quempeji tsovironaqui itonquivojajiavacari itsipavijijiacaca imajirojiate coaretajia. Iriatimpa iroguentiquea itigarancajiaqueri intonquivojajiavaquempari incantajia-queri:

—Itigarancajiaquena notsipavijitaca icanquempi: ‘Nomajirote, aatoquea patsipeventanaqueate pincoraquetashivaequena notsovironaquitequi. Aatotarite piquijitsitanarotsi notsovironaquite, notsaquetarite panaamajataquenaquea.

⁷ Irootaquequea nopashiventantacaca naatimpa inchiquioji noanaque nonquenuetsatacaajiaquitempi. Pincantajaniquiqueja impeapanajantempaquea nashincaca.

⁸ Quejetaca naatimpa ichoocaveca tigarancanaca, ariqueate ichoocaque nashi nogoaretajiate notigarancajiguica. Querica noninqueca nontigarancaqueca inquemisantaquenaquea iroanaque. Itsipaquea nocajemirigueti icoraquetaque. Aisa ichoocaque nashincaca taaca opaji nomperacarica iquemisanquenaquea.’

⁹ Irooquea iquemavaquerigueti Jesoshi icanqueca yamenanaque intati. Ipitso-cashijianacariquea maasano oguijaguijaiquerica icantajiguiriquea:

—Noncanquempiquea, choocavetaca oshequini quemisantajiaquenaca acaniqui Ishiraeriqui, cotanquitsiquea teequea namenimaguteji aparó inquejetempariji íríca itsamajatiguéti nagavejamajati.

¹⁰ Ariquea irirajia itigarancajiaqueca imajirojiate coaretajia icoraquecoraqueiveta-
jaquea tsovironaqui qui yamenavepojariquea jac peamajatanaja yashincaca.

Jesoshi itancorejajiniroquea irijanite metojacoro

¹¹ Iroomba yoanaque Jesoshi guinteninintsiqui icantajitica Naine, yoguijaguijaitana-
queriquea itsatacaanejia aisa oshequi caquinteja.

¹² Ariquea yaavetapojacaroquea quempeji osotomoro otantotacojiacaguéti tsoviron-
aquipae, yamacojipojiri metojatsica inquitajajateri. Iriguentiquea irijanite metoja-
coro, aparoqueate icocaniquea iriatimpa irijanincaca. Icantaventajianaqueroquea
tirorererere caquinte oguijaguijaitanaquero ca irijanincarica.

¹³ Ipintsatacotanacaroquea Amajirote yamenaqueroguéti iráaca, icanqueroquea:

—Aato piraga.

¹⁴ Yoashitanaqueroquea yamancarica ipamitsitaro. Ariquea icatintiitapojacaquea
natacojiaquerica. Ariquea icanqueriquea Jesoshi metojanquitsica iriaqueraca quen-
quevaritananquitsi:

—Shirampari, noncanquempiquea pintinajanaje.

¹⁵ Ariquea isavicanaji metojavetanquitsica iquenquetsatanajiquea. Yojocajiniroquea
iriniro.

¹⁶ Yamenaqueguetiquea maasano yogueshitajiriguéti yoayoaitanaque intati, aisa
ishineventajianacariquea Aapani Irioshi. Icantajiaquequea:

—Icoraquetimojiacaji tsavetantatsica anaamajatantatsica. Iquenquejacojiacajiquea
Aapani Irioshi, icavintsajajiacaji aatimpajia yashincaca.

¹⁷ Iroompaquea maasanopae choocajitsica Joreaqúi aisa irooshitacoguetanquitsica
iquemacojiaqueriquea Jesoshi itancorejajiri metojavetanquitsica.

*Joanca itigarancajiaqueriquea itsatacaane incoacojiaquiteri Jesoshi
(Mt. 11.2-19)*

¹⁸ Ariquea irirajia itsatacaanejia Joanca icamantajiaqueriquea yantaguetaqueca Je-
soshi. Ariquea icajemaqueriquea mavite,

¹⁹ itigarancaqueri incoacojiaquiteri Jesoshi: “¿Avigüentica noguijajivecaca? ¿Irooca
nontacoguitempani noguijajiaquiterini itsipa incoraquetaque?”

²⁰ Ariqueate yoayoaitanaquequea yarejerejeipojaca ichoocaqueguéti Jesoshi icanta-
jiapojaqueriquea:

—Itigarancajiaquenaquea Joanca Viñacajatantatsica noncoacojiaquempiquea:
‘¿Avigüentica noguijajivecaca? ¿Irooca nontacoguitempani noguijajiaquiterini itsipa
incoraquetaque?’

²¹ Oraqueate yarejetapojacaguéti yamenacojiapojaqueriquea yogueshiguetajiri os-
hequini ashinoncajaguetatsica iconoagarantajiacaaajiaqueri joquijirentsi anaague-
tatsica. Irraquea ishaquiaguetacaca ampatsinipae yoguisotoaguetajiniriquea. Aisa
yamenacaajajiri shamponcajavetatsica.

²² Ariquea icantajiguiriquea Jesoshi:

—Imaicaquea poapoaitanaje pincamantajiapojajerija Joanca maasanopae pamenaguetaqueca aisa piquemaguetaqueca. Iriraquea shamponcajaviavetatsica yamenamaitanaji. Iriraquea teeca iranijijivavetempaji yanijijianaji. Ariquea iquejejiaca avejancaripae ipejaianaja. Iriraquea teeca inquemajivavetempaji iquemajianaji. Aisa iriraquea metojaguetatsica itancorejajianaji. Iriraquea coguitejacojianquitsica* imaica itsavetantimojiqueriquea itsatacajaiqueri Quenquetsatsarensi Oganejencatatsica.

²³ Caavijiquea irishinevaetaquempa quericaca incantacoguitempani intsaroventamajataquena aatoca yovashiantajana.

²⁴ Ariquea yoayoaitanajigueti itigarancajiaqueca Joanca iquenquetsavaetaquequea Jesoshi iquenquetsatacoqueri Joanca, icantajiguiri maasano: “¿Taacaquea poapoaitashitaquiti ontaniqui oquitamampororoitapojigueti? ¿Arimpa irooquea poapoaitashitaquiti pamenajiaquitiro savorovana ojeonquirogueti choviga, ariquea oaquiti oaquiti?†

²⁵ ¿Ariquea taaquea poashijiaquiti? ¿Iriocaja poashijiaquiti pamenajiaquitiri caquinte quitsaatatsica shipetamorenaro quitsaarentsi? Pitsajiaquequea maasano quitsaatatsica shipetamorenaro quitsaarentsi manaquea isavisaviiti itsovironaquitequi majirontatsica, icantacoguitaniquea isavicaventiro taaca opajitapae ishinevencaca iriatimpajia.

²⁶ Iroosacanica ¿taaqueuea poashitaquitiquea? ¿Iriocaja poashijiaquiti pamenajiaquitiri tsavetantaquerica Aapani Irioshi? Jeejeguitatsi, iriotaque, cotanquitsiquea iriatimpa caaviji yanaaguequeri itsipajia tsavetantajiatatsica.

²⁷ Iriotaque itioncacojiiquea coramani iquenquetsatacaquerigueti Aapani Irioshi Irijanite, icanqueri:

‘Ari nontigarancaqueri iriquetica oananguitsineca intsavetacotempi.

Irio camantajiaquerineca igonorojia queroca pinquenanaqueni irinetsanatashitantajiaavaquempica.’☆

²⁸ Imaica noncantajiaquempi: maasanopae caquinteja teetarite inchoocatimateji aparo anaaquerineca Joanca, cotanquitsiquea maasano majirontajiacarica Aapani Irioshi, irirajia teeca iranaajencavaevetempaji, caavijiquea icavintsajamajajiaqueri, oquejevetaca yanaajiaqueri Joanca.

²⁹ “Maasano caquinteja quemajiavaquerica Joanca itsatacaantigueti icantajiaqueri iriviñacajajiaqueri, yamenajiaqueritarite icantamajati Aapani Irioshi icantaquegueti iriguentijia covaeguishejiatsica. Ariquea iquejejiacaquea irirajia capiocapinijiguinirica majirontatsica imentaquipae iviñacajatacaantajiaquea iriatimpajia aisa.

³⁰ Irirampani pariseojia itsipatacariquea tsatacaantajiguero itioncacotanaqueca Moishishini teequea irishineteriji iriviñacajajigueri Joanca. Inintavetacaquea Aapani Irioshi incavintsajajiaqueri, cotanquitsi iriatimpajia teequea irinintajigueji inquemisantajiaqueri.

³¹ “¿Quero icojigani caquinteja choocajianquitsica imaica? ¿Taa ipaji iquempejiaca?

³² Iriguentiquea iquempejiaca chaajaniquitirajaca irisavisaviitaquegueti tsoviaguiteri qui iritanavijitempagueti iroompa ari incatsimatavacaajianaquempa incantajiaquequea:

‘Nocovitimojiavequempiquea

teequea pintsamarojianaque.

Ariquea namashaitimojiavetaquempi amashairensi yamashajitica ishimampojancajitaqueti

teequea pirajaguempaji.’

* 7:22 Icanquegueti **coguitejacojianquitsica** iquejetacaacari aisa irirajia tsajianquitsica teequea iragavejeji inchiqiojita irimeshiguempaji. Pamenero Mt. 5.3. † 7:24 Icanquegueti **savorovana** iquejetacaacari aisa caquinte teeca intampishitashigueteroji maasano amataagantsi, aca icanti aca icanti. ☆ 7:27 Mara. 3.1.

³³ Ariqueate piquempejiaca aviatimpajia. Icoraquevetaca Joanca Viñacajatantatsica teequea irishecatempaji ishecapinitaca igonorojia, aisa teequea irimirimatemparoji cachojaro, manaquea picantacojiaqueriquea: ‘Ishaquiacari ampatsini.’

³⁴ Ariquea imaica icoraquevetaca irira Irijanite Caquinte, ishecataca iriatimpa, imiraca, ariqueate picantajiaque: ‘Iriguenti shecajanti, iriguenti shinquitatsica, aisa iriguenti itsipavijijiapojaca covaeguishejiatsica aisa capiocapiniijiguirica majirontatsica imentaquipae.’

³⁵ Cotanquitsi onconijavaetanaque itsatica tsamajatatsica amenajiaquegueti quero oco-cani yantaguetaqueca.”

Ishecatacaquea Jesoshi itsovironaquitequi pariseo pajitatsica Shimo

³⁶ Ichooaque pariseo icajemaqueriquea Jesoshi irishecatacaaquempari itsovironaquitequi. Ariquea yoanaquequea Jesoshi iquijapoji ipimerequijapojaca shitaponcarontsiqui irishecaciaquempa.

³⁷ Ochooque manquigarentsi quempevaetatsica, ariquea oguintenica quempeji. Ariquea oquemacoquerigueti Jesoshi yoanaque irishecatempa itsovironaquitequi pariseo, oanaque aanaquequeate casancajencajari yoguijaantajicaro chovintyoriqui ipeacaajitaca mapi icantajitica aravasetero.

³⁸ Iroompaquea arejetapojaca ichooaquegueti Jesoshi ocatiapojaca igontatapojacagueti, iraanaca oparijaatanaquequea ojaquija oshaguitsitariquea iguitiqui. Ariquea osheguititantajariquea omae, onintaguititanaqueriquea, aisa oshaguiguititantacari casancajencajari.

³⁹ Ariquea yamenaquerogueti pariseo cajemaquerica Jesoshi itsovironaquitequi iquenquejanaque: “Arimajagueti iriogueti tsavetantatsica intsatsitavaquempa taaqueate pamipojiri, intsaque queroca ocoani, intsatavaquequea iroguenti quempevaetatsica.”

⁴⁰ Iroompaquea icantanaquequea Jesoshi icanqueri pariseo:

—Shimo, chooca noncanquempica.

Icanqueriquea:

—Intsijate, Tsatacaantantatsica, pincantenaja.

⁴¹ Icanqueriquea Jesoshi:

—Chooca mavite shirampari, yaacoqueri imentaquitsite jocavaquenerica, icanqueriquea: ‘Oncoajicatapojajegueti poguipiajatenaja.’ Aparoquea yaacoqueri 500 tenario.‡ Iriraquea itsipa ariguenti yaacoqueri 50.

⁴² Cotanquitsiquea iriatimpajia ocoajicavepojaja aavetapojaja iroguipiantajenemparimeca teequea inchoocatajeji imentaquitsitejia querocampaquea irajaiajeri irivegaratantajemparica. Ariquea icantajiriquea: ‘Ompeashitanajempa quea intati.’ Imaicaquea iintsija pincanquena ¿queri pintsamajaquemparineca?

⁴³ Icanqueriquea Shimo:

—Iriocajate ipeacomajacaca.

Icanqueriquea Jesoshi:

—Pitampaticamajataquero.

⁴⁴ Ariqueate ipitsocavetanaca yamenanaquero manquigarentsi, icanqueriquea Shimo:

—¿Ari pamenaquero ocatita manquigarentsi? Noquijavepojaca pitsovironaquitequi teetari pojocavaquena pijatsite najacaguititaquempame. Iroatimpa ajacaguititanquenaro ojaquija, osheguititantajanaroquea omae.

‡ 7:41 Iriraquea **tenario** irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparó tenario. Ari iquejevecari itsipa imentaqui icantajitica iraquima, iriguenti imentaquitsite guiriegojia.

⁴⁵ Aisa teequea pinintavorotenaji,§ cotanquitsiquea iroatimpa onintaguitique-naquea incajanganqui arejevaeca imaica.

⁴⁶ Teetarite pimpantantenaroji orejiqui noguitoqui, cotanquitsiquea iroatimpaquea oshaguiguititaquenaquea casancajencajari.

⁴⁷ Irootaquequea imaica noncanquempi ocovaeguishevecaroqueate taaca opajitapae, cotanquitsiquea imaica shetajaqueate maasanopae, irooriji opintsamajataquena. Cotanquitsiquea iriraquea irishetsijitaqueca capichaji ipeacaaguishetacaca, capichajaniqui impintsatantavequempa.

⁴⁸ Iroompaquea icantsitaroquee manquigarentsi:

—Imaicaquea shetanajaquea picovaeguishevetacaca.

⁴⁹ Ariqueea irirajia icajemajiqueca itsipatsipaicaca ishecajiacaguete icantavacaa-jianaquea:

—¿Taashia ipajita iricatica shetsitantaqueroca covaeguisherentsi?

⁵⁰ Cotanquitsiquea Jesoshi icantsitaroquee aisa:

—Imaicaquea meshiajimpi irooriji pavempojana. Poanaje pishinevaequempa.

8

Manquigarentsijia amijiaquerica Jesoshi

¹ Iroompaquea iquenaquenaguetaquequea Jesoshi guinteninintsipaequi ichoocajiguiguete oshequini caquinteja aisa guinteninintsipaequi teeguete iroshequiamajateji, itsavetantaquero Quenquetsatsarentsi Oganejencatatsica icantajiaqueri quero icotani imajirontaguete Aapani Irioshi. Itsipatsipaitanacari itsatacaanejia carajianquitsica 12.

² Aisa oguijaguijaitanaqueriquea manquigarentsijia yoguisotoacoventajiajica ishaquiajavecaroguete ampatsini, aisa yogueshijiajica ashinoncajajavecaguete. Ariqueea ochoocaque Maria icantajitica Magararaquitica yoguisotoacovenqueca ishaquiyavetacaroguete 7 ampatsini.

³ Otsipatsipaicaro Sosana aisa Joana, imanquigare Cosa iramajirore Erorishi. Oa-hoaitanaquequea aisa otsipapae manquigarentsijia. Iroatimpajia amiqueriqueate Jesoshi ojocajiaqueneriquea omentaquitsite cameetsanijite irivegaratantaquempaca taaca icoguitejacocaca.

Jesoshi iquejetacaacari pishoncaguitiroca oitsoqui

(Mt. 13.1-9; Mr. 4.1-9)

⁴ Ariqueate icoraquecoraqueitaque caquinteja icaramirincavaeque, iquenaquenaitapojaque guinteninintsipaequi yomporoguijaventajiapojacari Jesoshi. Iroompaquea iriatimpa iquejetacaacanari, icantajiguiri:

⁵ “Yoanaque aparo caquinte impishoncaguitero oitsoqui. Ipishoncavoncaquitanaqueroquea tacororo tacororo, itsitacaguetaquero. Oconoagarancaqueate asacaraaguiguetaanaca quenavoquirontsiqui, ariqueea yagatigatiiquero, iroompaquea isavisaviitashipojioquea tsimeripae ishecajiapojacaro.

⁶ Otsipa oconoagaranca asacaraanaca mapiporoquiqui, taampina otsoroavetanaca cotanquitsiquea oshimpeguiricanaque ometojanaji, pirijaguitevaetaquetarite quepatsi.

⁷ Oconoacaquea otsipapae asacaraanaca ochoocaqueguete ovarishitsa samerento. Otsoroavetanacaquea oquenaquequea otsoroitsitanacaquea samerento iroatimpa otsincoanaqueroquea ometojanaji.

⁸ Otsipapae oconoacaquea asacaraanaca ocameetsaguitequeguete quepatsi, otsoroanaquequea otaganaanaca ochoocatanaque opitsaraquiacotanacaqueate oitsoqui, oconoacaquea ochoocaque 100.”

§ 7:45 *teequea pinintavorotenaji.*
yamenavacaajiacaguete.

Yamejiaca joriojia coramani inintavorotavacaajivaca

Irooqea iquejetaquerogueti Jesoshi imaica iquenquetsatanajiquea iririjenca icanquequea: “Choocagueti piguempita pinquemantavaquempaca, pinquemeja.”

Jesoshi itsatacajiaqueriquea quero ocoani iquempetacaantaguecaroca
(Mt. 13.10-17; Mr. 4.10-12)

⁹Iroompaquea icoacojiavaqueri itsatacaanejia taa opajita oquejetaca itsavetanqueca incajaranqui.

¹⁰Iriatimpaquea icantajigui: “Imaicaquea ininque Aapani Irioshi pintsajiaquero aviatimpajia queroquea icotani imajirontagueti iriatimpa. Teetarite intsajiteroji pae-satoniqui, aviguentiquea tsajiaquerone imaica. Oraqueate notsatacajiaquerigueti itsipapae manaquea noquejetacaacaroquea maasanopae, manaquea iramenamenaivetanaquempaquea, cotanquitsiquea aato inejajiguiti; inquemajivequempaqueate, cotanquitsiquea aato itsajivaquerotsi.✧

Jesoshi itsatacaajiaqueri itsatacaanejia taaca opajita iquejetacaaca incajaranqui
(Mt. 13.18-23; Mr. 4.13-20)

¹¹“Imaicaquea nontsatacaajiaquempiquea taaca opajitapae noquejetacaaca. Oraticaquea oitsoqui iroguentiquea noquejetacaacaro itsavetantajitirogueti Iguenquetsatsare Aapani Irioshi.

¹²Oraticaquea asacaraaguitananquitsica quenavoquirontsiqui iriguentiquea noquejetacaaca caquinte quemajiavetavacaroca Iguenquetsatsare Aapani Irioshi, cotanquitsiquea iroompaquea icoraquetashiqueriquea ampatsini ipeacotacaacari maasanopae aatonijite iquemisantajirotsi imeshajitiritsi.

¹³Oraticaquea asacaraaguitananquitsica mapiporoquiqui iriguentiquea noquejetacaaca caquinte quemajiavetavacaroca Iguenquetsatsare Aapani Irioshi ishin-eventajiavetavacaroquea shine, cotanquitsiquea teequea intsamajateroji, tee inquenquejamajateroji, mana iquejetacararo panquirentsi teeca onquijamajateji ovaritsa. Iquemisantajiaqueta cotanquitsiquea ocoraquetashiquerigueti atsipetagantsi ariquea icotanaca yovashiantanajiroquea itsaromentane.

¹⁴Oraticaquea asacaraaguitananquitsica ochoocaquegueti samerento, iriguentiquea quejecaroca caquinte quemajiavetacaroca Iguenquetsatsare Aapani Irioshi. Cotanquitsiquea ariqueate iquenquejiajiajiroqueate taaca opajitapae ishoshomentajijaaro, ishinevencariquea imentaquitsite aisa taaca inintajigui iriatimpa. Irooqea anaanaquero Quenquetsatsarentsi iquemavetacaca, iquejetacaroquea panquirentsi caarica oitsoquitatsi.

¹⁵Cotanquitsiquea oraticaquea asacaraaguitananquitsica ocameetsaguitetaquegueti quepatsi, iriguentiquea quejecaroca caquinte tampaticatiroca netsanamajatiroca cameetsaguetatsica. Iriatimpajia iquemisantamajatavaqueroquea Iguenquetsatsare Aapani Irioshi, ipampiamajaqueroquea, iroompaquea arimpaqueate ipampiatsimajatanacaroquea.

Iquejetacaacaroquea Jesoshi maasanopae senacacovetanquitsica
(Mr. 4.21-25)

¹⁶“Oraquea itsivojitirigueti tsivorentsi teequea ari iriguivotacojiteriji chomoqui. Aisa teetarite ariquea iroguisavicacojiteriji isaviquea omencoqui imaantajitaca. Iroguentiquea yoguisavicajitiriquea jenoquijaniqui cameetsanijite intsivoguitetanaquenerinijite maasano quijaquijaitanquitsica oraniqui.

¹⁷Ariquea oquejetacaquea taaca opajitapae senacaguetatsica imaica, oncoramanitapojajegueti ironigaantajiquero. Aisa taaca opajitapae teeca intsajiteroji imaica, oncoramanitapojajegueti intsajitaqueroqueate, aatotarite osenaquimatajatsiqueate.

¹⁸ Irootaquequea imaica pinquenquejamajateja quero pincoquempani pinquemisan-tamajatantaquempaca. Quericaca tsatavaqueroneca icantajiquerica intsatacaajita-queriquea otsipapae. Quericaca teeca irininteji intsatavaquero, irapitsatsijitavaque-riquea ijivetaca itsaque.”

Iriiro Jesoshi aisa iriguentijeguitepae

(Mt. 12.46-50; Mr. 3.31-35)

¹⁹ Ariqueate ocoraquequequea iriuro Jesoshi aisa iriguentijeguitepae tsoviron-aquiqui ichoocaquegueti iriatimpa, cotanquitsiquea teequeate iragavejajigueji inqui-jaquijaiteji intsompogui, yojocajajiacatarite yoshequiavaequequea caquinte.

²⁰ Ariquea icamantajiqueriquea Jesoshi icantajitiri:

—Coraquetaque piriuro aisa piguentijeguitepae. Chooca sotsiqui, inintajiaque irame-najiaquempi.

²¹ Cotanquitsiquea icanquequea:

—Maasano quemisantajiavaqueroca Iguenquetsatsare Aapani Irioshi aisa netsanaji-avaqueroca, iriotaque nopejiaque iinanijia aisa iguentijeguijia.

Jesoshi ipejairoquea choviga aisa imagojatacajairo iniromotija

(Mt. 8.23-27; Mr. 4.35-41)

²² Iroompaquea yoanaquequea Jesoshi iniromotijaqui itetanacaroquea quena-jarontsi itsipatsipaitanacariquea itsatacaane icanqueriquea:

—Jameja intatiqueroqui.

Ariqueate yoayoaitanaque.

²³ Iquenajatacojianaquegueti imaquequea Jesoshi quenajarontsiqui. Iroompaquea ochovigaguitevaepojiquea inirojencatapojaque choviga jeoc jeoc jeoc jeoc, ariqueate ocotanaca ovorevoreanaca otserajatanacaquea oja quenajarontsiqui iroovepojaca ontsitijaatanaqueme.

²⁴ Ishiashijianacariquea Jesoshi itinaitari icantsijigari:

—¡Tsatacaantantatsica! ¡Tsatacaantantatsica! ¡Ojocajajiguempani!

Itinajitsitanacaquea Jesoshi iquenquetsatacaquero choviga icanquero:

—Pimpejaencatanajempaja.

Icantsitaroquea aisa iniromotija vorevoreananquitsica icanqueroquea:

—Pinchopecajatanajempaja.

Ari ocotanaja osanticojencatanaji choviga, ari oquempetanaja iniromotija ochopeca-jatanaja.

²⁵ Iroompaquea icantsijigariquea itsatacaane:

—¿Quero ocotaca caarica pitsatantajigana nagavejamajati?

Cotanquitsiquea iriatimpajia itsaroamajajianaquequea yamenamenaitanaque intati icantavacaajianacaquea:

—¿Taashia ipaji irica? Icantaquitiguiro choviga aisa iniromotija oquemisanqueriquea.

Gararaquitica ishaquiacaca ampatsini

(Mt. 8.28-34; Mr. 5.1-20)

²⁶ Iroompaquea yarejerejeitapojacaro iguepatsitequi Gararaquitica* otampaticata-comajataquero quepatsi Garirea.

²⁷ Irooquea yaguijivetanacaquea Jesoshi yameniriquea icoraquepoji shirampari choocatatsica ocaniqui. Ishaquijiacariquea ampatsini, yajagantsitacovaetanaque-quea teequea inquitsaatajempaji, aisa teequea inchoocateji tsovironaquiqui ariguen-tiquea ichoocati imperitamoroqui yojoquijitantapinijitarica metojaripae.

* **8:26 Gararaquitica.** Chooca otsipa paperi otioncacotacaguetei ocaniqui Jerasaquitica (*gerasenos*).

²⁸⁻²⁹ Querocaguétiquea savincaguiteri ishoncacoguitevaetanaqueri. Yaajitapinive-cari yoishotantajivetacari cavorejatsariqui iracoqui aisa iguitiqui, yamenamajajive-cari, cotanquitsiquea teetarite iragavejajiteriji. Icaratsarejaguetaqueroquea ocanca, ishiashiatacaaguitarini ampatsini ontaniqui teeca inchoocateji caquinte. Ariquea yamenavaqueriguetei Jesoshi iguerotashitapojacari icajemanaquequea:

—¿Querocaquea pincoquenani, Jesoshi Irijanite Irioshimajaca Anaantamajatatsica? Iintsijate aatoqueate patsipetacaavaetana. ¡Pimpintsatacogajoitenashiatsi!

Icantantacaroca ocativa irooriji icanqueri Jesoshi ampatsini irisotoanaje irovashi-antanajeri.

³⁰ Iroompaquea icanqueriquea Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica.

Icantantacarica: “Nopajita Caramirincatatsica”, irooriji yoshequiavaeque ampatsini shaquiajiacarica.

³¹ Iriatimpajia icantajiaqueriquea Jesoshi aatonijite itigarancajiguiritsi oagantavae-tananquitsica jmm isaviji.

³² Cotanquitsiquea ontaniqui otapiqui choocaquea chancho† icarapiovaeque, isheca-jiaca. Iroompaquea irirajia ampatsini icantajianaqueriquea Jesoshi iroashijianaque-rita chancho inchoocajipojaqueriniji. Iriatimpaquea icantsijigariquea:

—Intsiquetirote poapoaitanaque.

³³ Icampanajanta isotosotoitapanajanti ampatsini yovashiantajianaqueri ishaquiavetacaca, irioquea yoashijiavetanaca chancho. Iroompa ishaquiajive-tapojacari ariquea icohicoitanaca ishiajianaca ocogarajacaguetei itanquireajianaque vojocajajipojaca, icampoja teron maasanojia.

³⁴ Irooquea yamenajiaqueriguetei quempoguijajiguirica chancho itsaroajianaque-quea ishiashiaitanaca yoayoaitanaque itsavetantajipojaqueroquea ontaniqui ichoocajiguiguetei itsitacavaepojiroquea, iquemacotantajiacarica choocajiatatsica acaniqui aisa choocajiatatsica quempejipaequi.

³⁵ Yoayoaitanaquequea iramenajiaquiteriquea. Ariquea yarejerejeipojacaro ichoocaqueguetei Jesoshi yamenajipojiriquea ishaquiajivecaca ampatsinipae savicaji iquempejitacocari iquemisantajiri. Quitsaataja quenquejanaji. Itsarotsaroitanaque-quea.

³⁶ Iriaquea amenajiaquerica yoguisotojainiriguetei itsatacaajivaqueri querocaca icoquerini yonigaitsijiacariguetei ishaquiavecariguetei.

³⁷ Ariquea maasano choocajiatatsica Gararaqui itsaroacaamajajianacari Jesoshi ya-manamanaitantacarica irovashiantajianajeriniji. Ariquea itetanajaro quenajarontsi iquenajatacotanaji.

³⁸ Ariquea iriratica isotoanaqueca ampatsinipae icantavetacari inique intsipataquempari, cotanquitsiquea Jesoshi itigarancaqueri, icanqueri:

³⁹ —Poanaje pitsovironaquitequi, pintsavetampojajeroquea maasano queroquea ico-quempini Aapani Irioshi.

Iriatimpa yoanajiquea yoguisotojaiipojaqueneri maasano choocajiatatsica oraniqui ipintsatacotacariguetei Jesoshi.

Jesoshi ivochatajiro irorijanite Jairo

(Mt. 9.18-26; Mr. 5.21-43)

⁴⁰ Ocoajicatapojajiguetei icoraquetajiquea Jesoshi, yagatanaji intatiqueroqui. Maasanopae yaajivaqueri ishineventajivacari, iroorijite icocani yoguijaguijaitava-queri.

† 8:32 Irira **chancho** iriguenti viratsi quejvetarica santaviri.

⁴¹ Iroompaquea icoraquepoji shirampari ipajitaquea Jairo. Iriatimpa iriguenti jivatanquitsica shinagogaqui icapiocantajiacaca joriojia. Ariquea yamenapojirigueti Jesoshi itaampinatashipojiriquea iguero vempojacari icanqueriquea iroanaquequea itsovironaquitequi.

⁴² Irooshipoji ometojaque irorijanite irapatiroritsite. Ocaratacotaque 12 ajagantsite.

Ariquea yoanaquegueti Jesoshi yoguijaguijaitanaqueriquea icarajiavaeque caquinteja icantavaetanaque tirorererere oraniqui iroovepojaca irivinacajianaquerimequea.

⁴³ Ariquea ochoocaque aisa manquigarentsi ashinoncaavaetanquitsica ososoajavaetini coramani, ariqueate ocaratacovaetanaqueni 12 ajagantsiteni. Yaavintanajivetacaroquea teequea inchoocatenica agavejanquitsineca iroveajero, niganquiquea oteroncamajatanakeri omentaquite site, ejempacotia oanaca.

⁴⁴ Imaicaquea ocoraquetaque oquenashipojaqueri Jesoshi itaqui qui ochagatsaequit-sitavaqueri ocaramagotapojaquegueti irogataamagoro. Irooqueuea ochagatacotaquiteigui ri jac osanticojatanaji ososoajare.

⁴⁵ Icantanaquequea Jesoshi:

—¿Taaqueuea chagatacoquena?

Icantajianaquequea maasano:

—Tee, jmm.

Cotanquitsiquea icantsitanacaquea Peerero aisa itsipatsipaitacaca icantajigui ri:

—Tsatacaantantsica, pamenavecaqueate itsinacajianaquempi itatsintatsiitanaquempi.

⁴⁶ Cotanquitsiquea Jesoshi arimpaqueate icantanaquequea:

—Choocaguitatsi chagatacoquenaca, notsatavaquetari ocantapanajantana shirec nagavejane osotoanaquegueti.

⁴⁷ Iroatimpa amenavaquerogueti tee agaveji omanacotempaji, ocoraquepojaque-quea iriatimpaqui ompioncanacaqueate pion, pion, pion, oguero vempojacari quea. Maasano iquemajiaqueroquea ocamanquerigueti taaqueuea opaji ochagatimenqueri, aisa ocamanqueriquea ocanque:

—Iroompaqueate nochagatacoquempigueti jac osanticojatanaji noriraja.

⁴⁸ Iriatimpa icanqueroquea:

—Orijani, irooriji pavenquenatarite naatimpa, irootari piveantanajaca. Imaicaquea poanaje pishinevaequempa.

⁴⁹ Iroompaquea quenquetsatatsitiraja Jesoshi icoraquepoji itsipa, iquenapoji itsovironaquitequi Jairo, jivatanquitsica shinagogaqui, icanqueriquea:

—Jac metojaque porijanite, ariotapojaque pasereguiritsi Tsatacaantantsica.

⁵⁰ Cotanquitsiquea Jesoshi iquemaqueriquea, icanqueri Jairo:

—Aato pitsaroguitsi. Mana paventanaquena naatimpa, ariquea ompeanajempa.

⁵¹ Ariquea yarejetapojacagueti itsovironaquitequi icanque aatoquea iquijitsi itsipa, iriguenti itsipatsipaitanaca Peerero, Joanca, Santiago, iri joquijitanquitsica aisa iniro, iquijaquijaitanaquequea intsompogui.

⁵² Manaquea icatintijiacaca sotsiqui itsipajia iraacojiaqueroquea metojatsica cajemajiaque icanca, cotanquitsiquea Jesoshi icantajapanajantiriquea:

—Aato piraajiga, teetari ometojeji, manatarite omaaque intati.

⁵³ Cotanquitsiquea ishirontimentajianacari, itsajiaquetari metojamajataque.

⁵⁴ Iriaquea Jesoshi yaavacopojaquero, iririjencatanaque icanqueroquea:

—Chaajaniquitirajaca, pincatianaje.

⁵⁵ Ariquea opiapojaja oshire, ocatianaja. Iroompaquea icanque Jesoshi irojocajiaque-nero oshecatajempata.

⁵⁶ Manaquea yamenamenaitanaque intati iri aisa iniro, cotanquitsiquea Jesoshi icantajiguiiri aatoquea icamantitsi.

9

Jesoshi itigarancajiaqueri 12 itsatacaane iroaroaitanaque intsavetantajianaque (Mt. 10.5-15; Mr. 6.7-13)

¹ Ariquea icajemajiaqueriquea Jesoshi itsatacaane carajianquitsica 12, icapiocajiaqueriquea yagavejacaajiaqueri iroguisotoaguetaqueri maasano ampatsinipae aisa irogueshiguetajeri joquijiguetsica.

² Itigarancajiaqueriquea intsavetantimojianaqueri maasano intsatacaajianaqueri quero icocani imajirontagueta Aapani Irioshi. Icantajiaqueriquea aisa irogueshiguetajeriquea joquijiguetsica.

³ Icantajiavaqueriquea:

—Aatoquea paimatitsi. Aatoquea paguirotsi pigotiro, pitsarate, pisheca, aisa pimentaquitsite. Aatoquea paguirotsi mavite piitsaare, iroguentiquea oratica piquitsaacaca.

⁴ Querocagueta oraniqui poapoaitanaqueni incajemavaquempigueta pimaque itsovironaquitequi, poapoaitanaquequea pimaque. Picocaniquea pimaimotaqueriquea arejetapojajempa poapoaitantanajempaca.

⁵ Oraqueate aatogueta quericaca aavaquempineca, poapoaitanaquequea, cotanquitsiquea iroquetitaquea pantecamajatanaquevoja quepatsivane pagatiquitsitapojaquegueta, iroonijite iramenantajiaquempaca manaquea yantaque teeca oncameetsateji teetarite iraavaquempi irishineventajiaquempi.

⁶ Iroompaquea yoayoaitanaquequea itsitacavaetanaquero querocagueta oraniqui ichoocajigueta caquinteja, intsavetantimojianaqueriquea Quenquetsatsarentsi Oganejencatatsica. Aisa yogueshiguetaanjiri joquijiguetsica.

Erorishi iquenquejajiro imetojacaanquerigueta Joanca Viñacajatantatsica (Mt. 14.1-12; Mr. 6.14-29)

⁷ Ariquea iriraquea majirontatsica Erorishi* iquemacoquerogueta maasanopae yantaguetaqueca Jesoshi, yamenanaquequea intati querocampa incanque, choocatari cantajianquitsica: “Tancorejanajishia Joancani Viñacajatantatsica.”

⁸ Itsipaqueate cantajianquitsi: “Iriocajate coraquetajatsiquea tsavetantatsicani Iriashini coramaniticaní.” Itsipapaequeate cantajianquitsica: “Jac pochatanaji itsipa tsavetantatsica coramaniticaní.”

⁹ Cotanquitsiquea icanquequea Erorishi:

—Irirampani Joancani nojitorejacaanqueriquea naatimpa. ¿Taampaqueate imaica irira noquemacoqueca icamantacojitirini?

Ariquea inintaveca iramenaquerime.

Ishecatacaajiacari Jesoshi 5,000 shirampari (Mt. 14.13-21; Mr. 6.30-44; Jn. 6.1-14)

¹⁰ Ocoajicatapojigueta icoraquecoraqueitaji itigarancaqueca Jesoshi icamantague-tapojiri maasanopae yantaguetaquitica. Iquemajiavaqueriquea Jesoshi, itsipatsipaitanacariquea osamani irooshitigueta guinteninintsi icantajitica Vetsaira.

¹¹ Cotanquitsiquea ari iquemacojiquerigueta yoayoaitanaque isaquiritsaevae-tanaque caquinte yoguijaguijaiqueriquea. Iriraquea Jesoshi ishineventajiavacari intsavetantimojiaqueri icamantajiaqueri quero icocani imajirontagueta Aapani Irioshi, aisa yogueshiguetajiriquea ashinoncajajatsica.

* **9:7** Iriratica **Erorishi** irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquguetai Jesoshi (pamenero Irc. 1.5; Mt. 2.1-19).

¹² Iroompaquea ijaguitevaetanajigueti catsirincaiteri iquempejiquempeji-itanacariquea itsatacaane icantajiguiri:

—Poguipaquijajajeri maasano irirajia iroaroaitanajeta ontaniqui guinteninintsipaequi irooshitacoguetanquitsica cameetsanijite irimagorejajiaquequea aisa irivegarajiaque isheca irishecaciaquempanijite. Ocaniquiquea ocaniqui tee anejeronica quero-campa irishecaciaquempaca.

¹³ Cotanquitsiquea Jesoshi icantajiguiri quea:

—Pojocajigueneri aviatimpajia irishecaciaquempaca.

Yacajianaque icantajiguiri quea:

—Tee anejeroji quero-campa nojocajiaquenerica. Iroguentinivani 5 pan, iriraquea shima mavipaquite icarati. ¿Querocaquea noncojiaquempa? ¿Ari nagavejajiaque noanoaitanaque novegarajiaquiteneriquea irashijia maasano irishecaciaquempaca?

¹⁴ Icantantajiacaca imaica yamenajiaquequea iriguentipioniquea tirorererere caquinteja, icarajia vaetaquequea aricaquea 5,000 shiramparija. Cotanquitsiquea Jesoshi icantajiguiri itsatacaaneja:

—Poguisavicajigueri, poashiguequempari arica incarajiaquequea 50 irisavisavitaquequea.

¹⁵ Ariquea iquempejiaqueriquea, yoguisavicaguequeri maasano.

¹⁶ Iroompaquea iriraquea Jesoshi yaitaroquea 5 pan aisa mavipaquite shima, yajiricaqueriquea, ipaguitetanaquero inquite yamanaqueriquea Aapani Irioshi, icanta-queri: “Arioteesaa.”

Iroompaquea icotarejaguequeroquea pan, yojocajiaqueneriquea itsatacaane, iriatimpajia yojocajiaqueneriquea maasano.

¹⁷ Ishecajiacaquea maasano, iquemajianaca. Ariquea iriraquea itsatacaane yaague-tajiroquea choocatajatsica, itetajiroquea cantiriqui tseraiquipae ocaratacovaequequea 12.

Peerero icanque Jesoshi iriguenti Quirishitotatsica

(Mt. 16.13-16, 20; Mr. 8.27-30)

¹⁸ Querocaguetei savincaguiteri ichooaque Jesoshi yamanaqueriquea Iriri, iriguentiquea itsipajiacca itsatacaaneja. Ariquea icoacojiaqueri icanque:

—¿Taa ipaji ijijiaquena caquinteja? ¿Quero icantajiguini?

¹⁹ Iriatimpajia icantajiguiri quea:

—Iconoagarantajiacca icantacojiaquempi: ‘Iriguenti Joancani Viñacajatantatsica.’ Itsipa cantajiananquitsi: ‘Iriguenti Iriashini.’ Itsipaquea cantajiananquitsi: ‘Iriguenti itsipa tsavetantatsicani paesatinica, tancorejanajishiatsi.’

²⁰ Ariquea icantajiguiri quea:

—Aviatimpajia, ¿quero picantajiguini? ¿Taa nonaque naatimpa?

Icantsitanacaquea Peerero:

—Aviguenti Quirishitotatsica† itigarancaqueca Aapani Irioshi.

²¹ Icantajiguiri quea:

—Aatojate picamantitsi.

Jesoshi icamantsicaro irimetojaque

(Mt. 16.21-28; Mr. 8.31-9.1)

²² Icantanaquequea aisa:

—Iransipevaequempaquea irira Irijanite Caquinte. Irimanintajiaqueriquea jivajitsica, saserroteja anaantajianquitsica aisa tsatacaantajiguiroca itioncacotanaqueca

† **9:20 Quirishitotatsica.** Iguenquetsatsarequi guiriegojia icanquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajitsica coramanitica itigarancaqueca Aapani Irioshi impeaquempañiji Imajirojiate maasano.

Moishishini. Ariquea irimetojajiqueriquea, cotanquitsiquea aapojajempagueti 3 savincaguiteri impochatanaje.

²³ Ariquea icantajiguiriquea maasano:

—Quericaca nintanquitsineca iroguijatacoquena irovashiantanaqueroja inintashiguevetacaca iriatimpa, maasanopae osavincaguitetegueti irinatashitap-iniquempa inchapoa irompajacotantajiquemparica, mananiji iroguijatacoquena.

²⁴ Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenanea irooca irimetojavenquena, incoquempaniquea inchoocaguiteni.

²⁵ Arigueti inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapojajegueti irimetojanaquegueti arigueti impeaquempa camorecariqui, ¿arimpate agavejaque irajaararo aavajeri? Aatoquea agavejitsi.

²⁶ Quericaca pashiventacaaquenanea naatimpa aisa nocantaguequeca, ariquate inquejetaquempaqueea irira Irijanite Caquinte impashiventacaapojaquempariquea iriatimpa oncoramanitapojajegueti incoraquetajegueti. Iroganejencapojajempaqueea, inquempetapojajempari Iriri aisa irashivantijitete comajashirentanquitsica yoganejencajiacagueti.

²⁷ Noncanquempija arimajaguitatsi iconoagarantaca catintiitimojiaquenaca imaica, aato imetoji tequeratagueti iramene quero icotani Aapani Irioshi imajirontagueti.

Jesoshi icantashitatiimojiacariquea itsatacaanepae
(Mt. 17.1-8; Mr. 9.2-8)

²⁸ Iroompaquee anaavaetanajagueti arica 8 savincaguiteri yoanaquequeea otsempiqui iramanajeriquea Iriri, itsipatsipaitanacari Peerero, Joanca, Santiago.

²⁹ Ariquea yamanaquerigueti Iriri taampinaqueea icantashitatanaca ivoroqui, ariqueea ocotanaca iitsaare ocavorejatanaque ocantanaquequeea tsiren oquitamaromajatanaque.

³⁰ Ariqueea iconijajianaque mavite shirampari, itsipajiacariqueea Jesoshi iquenquetsatavacaajiaca. Iriotaque Moishishini aisa Iriashini.

³¹ Icavorejamajatanaquequeea icantajianaquequeea tsiren. Iroguentiquea iquenquetsatacojiaque irimetojiaque Jesoshi Jerosarequi onetsanatantaquempaca itioncacojiquerigueti.

³² Iriraquee Peerero aisa itsipatsipaitacaca manaquea ipochoquipochoquiitanaque, cotanquitsiquea opeamajatanacagueti yamenitsijigariqueea Jesoshi cavorejavaequequeea cantavaeque tsiren itsipatsipaitacari Moishishini aisa Iriashini.

³³ Iroompaquee itsinampirejajitanajatiguii Jesoshi icantsitanacaqueea Peerero:

—Tsatacaantantsica, cameetsavaeque achoocajiaque ocaniqui. Intsishiatsi nompeacaguempaja 3 catisetarentsi, aparo pashinquempa aviatimpa, aparo irashintaquempa Moishishi, otsipaquee irashintaquempa Iriashi.

Cotanquitsiquea irira Peerero tee intsatavajeroji icantavecaca.

³⁴ Quenquetsavetanatsi omanacojiapojajiri mararo, itsarotsaroitanaque yamanaquequeea omanacojianajiri.

³⁵ Ariqueea iquenquetsajencajitanaque omararosecanquegueti icanquequeea:

—Iricatica irio Irijani, nopintsamajatacaca.‡ Pinquemisantamajajiguerija.

³⁶ Ariqueea opeanacagueti iquenquetsataquegueti yamenitsijiavetajari Jesoshi aparo icatiaja. Ariqueea yoayoaitanajiquea imajerejiapoji teequeea incamantapojajaji iroaquegueti yamenavecaca.

‡ 9:35 *nopintsamajatacaca*. Chooa otsipapae paperi iroquetinica cantanquitsica ocaniqui “iriguenti nocoguaquea.”

Jesoshi yogueshitajiri chaajaniquitirajaca, yoguisotoajiniri ampatsini
(Mt. 17.14-21; Mr. 9.14-29)

³⁷ Osavincaguitetanajiguete icoraquetaji Jesoshi aisa itsatacaane iquenaquenaipojaji otsempiqui. Ariqueate yoayoaitanaquequea oshequini caquinte itonquivotonquiv-
oitavajari.

³⁸ Ariquea iquenquetsatanaquequea aparo irijencavaetanaque icanca, icanqueriquea Jesoshi:

—Tsatacaantantatsica, iintsija pamenerija nirijanite, apatiroti icancaquea iriatimpa.

³⁹ Ishaquiacaritari ampatsini icajemamajatacaqueri aisa icantacaqueri tinguininini, ishimotyonaajatanaquequea icanca. Icocaniquea yatsipetacaaguitarini, tee irinintenica iroguipaquijajeri.

⁴⁰ Nocantajavecariquea pitsatacaane iroguisotojiaiaquerime, cotanquitsiquea tee-
quea iragavejajigueriji.

⁴¹ Icantanaquequea Jesoshi:

—¡Arisa picomirincajiga teequea paventemparoji iragavejane Aapani Irioshi, ariguen-
tiquea picovaeguishejiga! ¿Querocaquea oncarashequiavaeteni nosavicaventajiaque-
mpi? ¿Queroca oncarashequiavaeteni nantsipetacojiaquempi?

Ipitsocashitanacari iriri icanqueriquea:

—Pamaquenarijate acaniqui pirijanite.

⁴² Cotanquitsiquea irooquea yaavetanacanariguete, iriraquea ampatsini yoguitejana-
queri isavi quepatsiqui icantacaanaqueri tinguininini. Cotanquitsiquea icantoma-
jitsitari Jesoshi, yoguisotoitari, ariquea icotanaja chaajaniquiri jac peamajatanaja.
Yojoquitajanariquea iriri.

⁴³ Maasanopae yoayoaitanaque intati, yamenaquequeate yagavejamajati Aapani
Irioshi.

Jesoshi icamantsitajariquea irimetojaque
(Mt. 17.22-23; Mr. 9.30-32)

Icojiacaniquea quenquejajianatsitiraja iquenquejacojanaqueroguete ipeacaague-
caca Jesoshi, iquenquetsatanaquequea iriatimpa icantajiguiri itsatacaane:

⁴⁴ —Imaicaquea pinquemisantamajatavaqueroja noncanquempica. Iriraquea Irijan-
ite Caquinte iracaantajiqueriquea iraaajiavaqueri caquinteja.

⁴⁵ Cotanquitsiquea iriatimpajia teequea intsatavaquero taaca icantaqueca,
omanapitsajiacariquea. Cotanquitsiquea omintsaroanaqueri incoacojiaquerime taa
opaji icanque.

Quericaca anaamajatantanquitsineca
(Mt. 18.1-5; Mr. 9.33-37)

⁴⁶ Iroompaquea ipariajanacaro itsatacaane iquenquetsatavacaajiaca iquenquejaco-
jiaca quericaca anaamajatantanquitsine, irooquea icanque, irooquea icanque.

⁴⁷ Cotanquitsiquea Jesoshi itsaqueroquea maasanopae iquenquejajiaqueca. Ariquea
yaaquequea aparo chaajaniquiri isenampijacari.

⁴⁸ Icantajiguiri quea:

—Quericaca aavaquerine shineventavaquemparine chaajaniquiri quempecarica iri-
catica iroorijite nonintacaantaquero naatimpa, quempecaqueate naroguentica ishin-
eventavaca. Quericaca shineventavaquenane naatimpa, irioquea aisa irishineven-
tavaquempa tigarancaquenaca. Taacaguete cavintsajantamajatantanquitsine in-
cavintsajamajatanaqueriquea teeca iranaanteji, irioquea iriguenti caaviji yanaan-
tavaeque.

Quericaca teeca incatsimajiaji iroguenti itsipatacaji
(Mr. 9.38-40)

⁴⁹ Ariquea icanqueriquea Joanca:

—Tsatacaantantatsica, chapinqui namenajiaqueriquea aparo yoguisotoaqueriquea ampatsini, iroguentiquea yaventashicari pivajiro. Cotanquitsiquea naatimpajia nocantimentsitariquea, namenaque tee intsipatacaji.

⁵⁰ Icanquequea Jesoshi:

—Imaicaquea aatoquea picantimentiri, maasanotari teeca incatsimajiacaji iroguenti itsipatacaji.

Jesoshi icantomajiaqueri Santiago aisa Joanca

⁵¹ Irooshipojigueti iroantanajempaca Jesoshi jenoqui inquitequi itampishitashitanaquero iroanaque Jerosarequi.

⁵² Itigarancajiaqueri iriquetita oananquitsineca incamantanquequea coraquetapoji Jesoshi. Iriatimpajia yoayoaitanaquequea irinetsanaguequeneri, iquijaquijaivetapojaca apatiroca guinteninintsi ichoocatantajiacaca Samariaquitica.

⁵³ Cotanquitsiquea iriatimpajia yamenamenaiquegueti ariguenti iroaroaitanaque Jerosarequi, teequea irinintajigueji irajiajaqueri. §

⁵⁴ Iriiraquea itsatacaane pajitatsica Santiago aisa Joanca yamenaquegueti teequea irajiajaqueriji, icantajiguiriquea Jesoshi:

—Nomajirote, ¿ari pininque noncantajiaque asacaraaquempa paamari jenoqui inquitequi ampevoquijajiaqueri onteroncamaajiaqueri?

⁵⁵ Ipitsocashijigari Jesoshi icantomajajiaqueri, [icanti:

—Tee pintsateji quero icocani Ishire ashintajiaquempica;

⁵⁶ teenicate ironica incoraquetantempa Irijanite Caquinte interoncaguetaqueri caquinte, iroguentiquea icoraquetantacaca irajiajavajeri.]*

Iroompaquea yoayoaitanaquequea otsipaqui guinteninintsi.

Nintajatsica iroguijagujaitanaqueri Jesoshi

(Mt. 8.19-22)

⁵⁷ Ariquea ishivoquishivoquiitanacaro quenavoquirontsi, icoraquepojaque shirampari icampojiri Jesoshi:

—Nomajirote, noninque noncoguitempini noguijaguitempini querocagueti poanaque.

⁵⁸ Icanquequea Jesoshi:

—Iriiraquea zorro† chooca imoro iquijantacaca. Ariquea iquempejiaca tsimeripae chooca imencoshi, cotanquitsiquea iriraquea Irijanite Caquinte teequeate onchoocateji itsovironaquite irimaantaquempaca.

⁵⁹ Ariquea icanqueriquea itsipa:

—Jameja poguijaguitenani.

Cotanquitsiquea iriatimpa icanquequea:

—Nomajirote, iroquetita nonquitatanajeritaja aapani.

⁶⁰ Icanquequea Jesoshi:

—Iriiraquea metojashirentari irio quitatajerine metojari. Aviatimpa poanaque pintsavetantaqueroquea quero icotani imajirontaguetai Aapani Irioshi.

⁶¹ Icantanaquequea itsipa:

—Nomajirote, iintsija naatimpa noguijaguitempini, cotanquitsiquea iroquetita pishinetena noapanajanteta notsovironaquitequi noncamantantaguetapanajanteta.

⁶² Cotanquitsiquea Jesoshi icanqueriquea:

§ 9:53 Irirajia Samariaquitica oshequi icatsimaneguintajiaqueri joriojia, teequea irininteji inquinaquenait-sitaqueri joriojia iguinentiqui iroaroaitanaquegueti Jerosarequi intsarorentajiaquemparigueti Aapani Irioshi, irootaquequea teeca irinintantempaji iravajeri Jesoshi. * 9:56 Oconoagarantaca paperi iroquetinica manaquea ocanti acaniqui: "Ipitsocashijigari Jesoshi icantomajajiaqueri." † 9:58 Ichocati **zorro** tomirishiqui, iquejevecari shiishi. Iriguenti shecatarica chaapa, quepigari, maasano.

—Quericaca parianaquemparoneca inquitencavatsatacaantempari igaapironcaarite quepatsiqui, arigueti iramenamenatanaque itaquitapojacagueti, aato otampaticati iquitencaqueca. Ari iquejetaca quericaca parianaquemparoneca iroguijatacotena, arigueti iramenamenatajaterogueti iquejeveguitanigueti coramani, aatoquea yagaveji inetsanamajatiro inintacaavecarica Aapani Irioshi, teetarite irimajirontamajatemparinica.

10

Jesoshi itigarancajiaqueriquea 72 intsavetantanaque

¹ Coajicaquea iriraquea Amajirote icoguiaguetaqueri itsipapae itsatacaanejia carajianquitsica 72,* itigarancajiaqueriquea irijivajivaitanaqueri intsipatavacaanaquempa mavite mavite, intsitacaguetejavaetanaquero guinteninintsipae querocagueti iroanaqueni iriatimpa.

² Iroompaquea icantajiavaqueri: “Chooaquea oshequini coguitejajianquitsica irimeshijiaqueri, cotanquitsiquea teemajacaquea iroshequigueji tsatacaajiaquerineca cameetsanijite irimeshiimentajiquerinijite. Manatarite iquejejiacaroquea osampatigueti tirigoitsoqui ocaraguitetacovaeque catejiegui teemajacaquea iroshequiama-jateji aviitaqueroneca. Irootaquequea imaica nocamantantajiaquempica pamanajiaqueriquea Aapani Irioshi intigarancajiaque tsatacaajiaquerineca.

³ Poajianaquequea aviatimpajia. Iroguentiquea nontigarancajiaquempiquea inchoocajiaquegueti catsimatantajiatsica irantsipetacaavaequempiquea quempecaquea irioca notigarancaquequea irijanigantirenajaniqui oveja iroanaquequeate yomporoguijagueti lobopae† shecatarica oveja.

⁴ Aatoquea paajiguetsi pitsaratote, aisa pitetantarica pimentaquitsite, aisa aatoquea paajiguetsi itsipapae pigaviguitire. Aatoquea pisavicaguetanaquequea quenavoquirontsi qui pinquenquetsatavacaajianaquempa pintsipatsipaiquempariquea quericaca pintonquivojajipojaquempaca.

⁵ “Querocagueticquea oraniqui incajemajiaquempi pimaajianaque itsovironaquitequi pinquijaquijaitanaquegueti intsompogui iroquetitaquea pincantajiaqueri: ‘Noninquequea incavintsajamajiaquempi Aapani Irioshi maasano choocajianquitsica pitsovironaquitequi.’

⁶ Irishinevaetanaquempagueti iriatimpa irininqueguete incavintsajamajaqueriquea Aapani Irioshi, ariquea inquejetaquempaquea Aapani Irioshi incavintsajamajataqueriquea. Cotanquitsiquea aatoguete ininti, aatoquea icavintsajiritsi Aapani Irioshi, aviguentiquea incavintsajajiaque.

⁷ Irishineventajiaquempiguete pincoquempanija pimaimojiaqueri aapojempaguete poapoaitantanajempaca, aatoquea pigajaiatsi. Pishecajiaquemparoquea taaca opajitapae irojocajiaquempica, aisa pimirajiaqueroquea imirajiacaca iriatimpajia. Icantajitiroquea cameetsavaeque irivegarajiaqueriquea catsiquetatsica. Jeroquea cameetsavaeque irojocajiaquempiquea maasanopae picoguitejacojiacaca, poimojianaqueritarite pitsavetantimojiaqueritarite.

⁸ “Querocagueticquea oraniqui poapoaitanaque, incajemajiaquempiguete pishecajianaquempaquea pisecatavaquemparoquea taaca opaji yojocacojiaquempica.

⁹ Pogueshiguetajeriquea ashinoncaaguetatsica, aisa pincantajiaqueriquea maasano: ‘Irooshitapoji irimajirontaquempa Aapani Irioshi.’

¹⁰ Cotanquitsiquea querocaguete poapoaitanaque aatoguete icajemimpi, pinquenauenaitanaquequea quenavoquirontsi qui canqueguete tirorererere caquinteja pincantajianaqueja:

* **10:1** Oraquea itioncajijiroguete coramani oconoajiaca itioncajiquero 70, otsipapae otioncaca 72. † **10:3** Irira **lobo** iriguenti tomirishiquitica catsimari quejevecarica iririjegui shiishi.

11 ‘Noshegontamajajianaqueroquea quepatsivane nagatiquitsitapojaquempica ironijite pintsajiaquenijite manaquea pipeacajaiaca covaeguisherentsi teetarite pishineventajiavaquenaji. Cotanquitsiquea noninque pintsajiaque irooshipojaque-quea irimajirontaquempaquea Aapani Irioshi.’

12 Pitsajigui coramaniqui icatsimajiaqueriquea Aapani Irioshi Soromaquitica yapevoquijajiaqueriquea iteroncajiaqueriquea. Imaica noncantajiaquempiquea aavaepojajempagueti incatsimatantajiaquemparica Aapani Irioshi maasano teeca intsaroventajiguempariji, caaviji irigaajiaqueri teeca irinintajigueti inquemisantajiaquempiji, anaamajataquero irantsipejiaquempaca Soromaquitica.

Jesoshi icantomajajiaqueriquea guintenijiatsica Corashiniqui, Vetsairaquí aisa Caperenaquí

(Mt. 11.20-24)

13 “¡Imaicashiatsi patsipevaetempanshiatsi aviatimpajia guintenijiatsica Corashiniqui! ¡Imaicashiatsi patsipevaetempanshiatsi aviatimpajia guintenijiatsica Vetsairaquí! Pamenajiavecaroquea nonigaimojiavequempica oacaantantatsica intati, cotanquitsiquea teequea pinintajigueti pincantashitatijaianajempa povashiantajiana-jeroji picovaeguishejiacagueti. Iiraquea guintenijavetatsica coramani Tiroqui aisa Shironequi iriome amenajiguerome, incantashitatijaianaquempamequea inquitsaa-jiaquemparome jiriquiquijiporoqui, aisa irigachoncaguinajiaquemparomequea cachopoqui ironigaantaquempanshiatsi ishimampoanajiaque yamenajiaque icovaeguishejiaca, incantashitatijaianajempamequea.

14 Cotanquitsiquea aviatimpajia arejetapojajempagueti incatsimatantajiaquemparica Aapani Irioshi maasano teeca intsaroventajiguempariji, caaviji irogaamajajiaque-mpi anaamajaqueroquea incatsimajiaquerigueti Tiroquitica aisa Shironequitica.

15 Aviatimpajia guintenijiatsica Caperenaquí paventacojiaca. ¿Ari pijitaque poapoaitanaque jenoqui inquitequi? ¡Aatotarite! Manaquea poapoivaetanaque isaviji Areshiqui.‡

16 “Notsatacaanejia, quericaca quemisantamajatavaquempineca aviatimpa, naroguenti iquemisantamajatavaque. Quericaca manintaquempineca aviatimpa, naroguenti imanintaque. Quericaca manintaquenaneca naatimpa, iriguenti imanintaque tigarancaquenaca.”

Icoraquecoraqueitaji itigarancajiaqueca Jesoshi

17 Ocoajicaguitevaetanaquequea icoraquecoraqueitaji irirajia 72§ itigarancajia-queca, ishinejiapojaquea icantajigui:

—Nomajirote, iquemisantajianaque ampatsinipae, noguisotoantajiacari pagavejica naventajiacarogueti pivajiro.

18 Icantajigui Jesoshi:

—Jeejeguitatsi arimajaca namenaqueriquea Satanashi yagavejajitaqueri yasacaraan-tanacaro inquite iquejetanacaro careti.

19 Naatimpa nagavejacaajiaquempi pagaticajiaqueriquea camaarini aisa oseroticona. Aisa pagavejajiaqueriquea ampatsini catsimatantanquitsica agavejavetanquitsica, aatoquea querocaca icojiguiimpiniqua.

20 Cotanquitsiquea noncantajiaquempi, aatoquea irooquea pishineventajiatshi pamenajiaquagueti pagavejajiaqueriquea ampatsinipae. Iroguentiquea pishinejiaquem-paquea pamenajiaque tioncacojiacquempiqueate jenoqui inquitequi.

Jesoshi ishinevencariquea Aapani Irioshi

(Mt. 11.25-27; 13.16-17)

‡ 10:15 Oraquea **Areshi** iroguenti ichoocajiaquagueti metojatsica.

§ 10:17 Pamenero tioncanquitsica isavi-

vanaquí otsapaquí 10.1.

²¹ Iroompaquea ariquea icotanaca Jesoshi ishinemajatanaca icanca, yoguishinejaqueriquea Ishire Aapani Irioshi, icanquequea: “Aapani Majirontamajatatsica, aviguenti majirontacojiacarica maasano inquitequitica aisa quepatsiquitica. Noshin-evenquempiquea nocanca, pitsititapitsajiaqueritari tsajiatsica teequea ponigaajigueriji querocaca picotani aviatimpa. Iriguentiquea ponigaajiaque teeca intsajigueji. Ari oquempetantacaca imaica, Aapani, irootari pininque aviatimpa.

²² “Yojocaguetaquenaroquea Aapani maasanopae, aisa yagavejacaamajaquena maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia inintacajiaqueca Irijanite intsatacaajiaqueri.”

²³ Irioquea ipitsocashitanaca itsatacaanejia icanqueri: “Icavintsajamajiaquem-piquea Aapani Irioshi pamenantajiacaroca maasanopae pamenajiaqueca imaica.

²⁴ Nocantajiaquempi ichoocajiaveca oshequiniquea majirontajiatatsica aisa tsavetan-tajiguiroca icanquerica Aapani Irioshi inintajiaveca iramenajiaquerome pamenajia-queca aviatimpajia imaica, cotanquitsiquea teetarite iramenimajigueroji. Aisa in-intajiaveca inquemajiaqueroquea piquemajiaqueca, cotanquitsiquea teequea inque-meroji.”

Samariaquitica cavintsajacotantatsica

(Mt. 22.34-40; Mr. 12.28-34)

²⁵ Iroompaquea icatiitsitanaca aparo tsatacaantiroca itioncacotanaqueca Moishishini, icoacoqueriquea Jesoshi inintavetaca iramenantempari. Ariquea icanqueri:

—Tsatacaantantatsica, ¿querocaquea noncoquempani imaica iranijacaantajenacate Aapani Irioshi cameetsanijite nonchoocaguiteni?

²⁶ Icanqueriquea Jesoshi;

—¿Querocaquea ocanqueni itioncacotanaqueca Moishishini? Papatsajavantirogueti, ¿querocaquea ocanqueni?

²⁷ Icanquequea iriatimpa:

—Manatarite ocanque: ‘Pimpintsamajataquemparija Majirontamajatatsica Pirioshite, pampaniromajatanakeri, pimpintsashirentamajaquempari, pintamp-ishiventamajaqueneri irooriji pipintsamajatacari, pimpintsaguenquejanema-jatanaquempari.’ Aisa ‘Pimpintsataquemparija pignonoro pinquejetacaajempa pipintsatagueti aviatimpa.’[✧]

²⁸ Icanqueriquea Jesoshi:

—Pitampaticamajataqueroquea. Pincoquempagueti pinetsanamajaquerogeti ocan-queca, ariquea iranijacaajempi Aapani Irioshi pinchoocaguiteni.

²⁹ Cotanquitsiquea iriatimpa inintaque irompetanaquempa, icoacotsitariquea otsipa icanqueriquea:

—¿Querimpate nogonoro?

³⁰ Icantsitariquea Jesoshi:

—Aparo jorio yoavetanacaquea Jericoqui iquenavepojaca Jerosarequi. Cotanquit-siquea ariquea yarejevecaro niganquipoqui yaavaqueriqueate aitsitantajiatatsica yait-simajataqueriquea maasanopae aisa iquitsaacaca yoajiaqueriquea ejempaco, ita-vatavaaqueri semic semic semic, yamenajiguiquea ijiqueji metojanaque yoguipaqui-japanajantiri.

³¹ Iroompaquea yoanaquequea oraniqui aparo saserorote iquenapojiroquea iriatimpa aisa Jerosarequi, yamenavetanacari itomicapitsapanajantiri tiijacoñaji oraniqui, yoanajiquea.

[✧] 10:27 Ireo. 6.4-5; Irev. 19.18.

³² Aisa icoraquepoji oraniqui aparo irevita amijiguirica saserorotejia, ariquea iquem-petacaquea iriatimpa yamenavetanacari itomicapitsapanajantiri.

³³ Cotanquitsiquea icoraquepoji aparo Samariaquitica* yamenitsipojacariquea ip-intsatacotanacari.

³⁴ Ishiashitanacari yaanaquequea ashiti aisa vinoja yaavintasetsiqueriquea imaaguequeri. Iroompaquea igataitsitariquea iraashinotequi quijavecarica iriatimpa, itsipatanacari tsovironaquiqui imaantajitaca oahoaitatsica oraniqui. Iquem-poguijaqueriquea yojocaguequeneri icoguitejacoguecaca.

³⁵ Iroompaquea osavincaguitetanaquegueti aisa, yaitsitanaca mavite tenario† yojocagueneriquea ashincaroa itsovironaquite icanqueriquea: 'Jeri iricatica imentaqui novegaratanquempica pamenamajatajerija iricatica. Aatogueti yarejetaqueate imentaqui oncoajicatanajeguete novegaratapojajempi noncoraquetajeguete.' Ariquea yoanajiquea Samariaqui.

³⁶ Imaicaquea imaica iintsija pincanquenaquea, ¿querica peamajaquerica igonoro yaajiaqueca aitsitantajatsica?

³⁷ Icanque iriatimpa:

—Iriguenti iricatica pintsatacocarica.

Icanqueriquea Jesoshi:

—Iroosacanica imaica ariquea pinquempequempa aviatimpa.

Yoanaquequea Jesoshi otsovironaquitequi Marita aisa Maria

³⁸ Arimpaquea yoavaetanaquequea Jesoshi, iroompaquea yarejevaeca ichoocajigu-guete itsipapae. Ariquea ochoocatiquea oraniqui manquigarentsi opajitaquea Marita, ocajemaqueriquea otsovironaquitequi.

³⁹ Chooa oguetyote opajitaquea Maria. Iroatimpa osavicaventavaqueriquea Jesoshi oquemisantamajatavaqueri itsavetantaqueguete.

⁴⁰ Cotanquitsiquea oraquea Marita oshoshoguitevencaroquea antaguequeca. Iroom-paquea oashitsitanacariquea Jesoshi ocanqueriquea:

—Nomajirote, pamenashicaroquea intati iguetyo teequea amitacotenaji, aparo nantaveguitaroni maasanopae, teequea querocaca pincanteroji. Iintsijate pincanteroja amitacotenata.

⁴¹ Icantsitaroquea Jesoshi:

—Marita, iroguentiquea piquenquejacogueque taaca opajitapae pishoshovencaro-quea.

⁴² Cotanquitsiquea chooca aparo caavijica anaaquequea irinintamajajiteca. Irootaquequea ocoguiavaqueca imaica Maria. Aatoquea ichoocati quericaca jocaavaqueroneca.

11

Jesoshi itsatacajaiaqueri itsatacaanejia quero incojiaquero iramaneriguetei Aapani Irioshi

(Mt. 6.9-15; 7.7-11)

¹ Ariquea otsipa savincaguiteri yoanaque Jesoshi iramaneriquea iriri. Iroompaquea iteroncanaquitiguiroquea, icantanaque aparo itsatacaane:

—Nomajirote, iintsija pintsatacaajiguenaja quero noncoqueroni namaneriguetei Aapani Irioshi, pinquejetacaguemparoja itsatacaqueriguetei Joanca itsatacaanejia.

² Icantajiguiri Jesoshi:

—Pamanajiaqueriguetei Aapani Irioshi, jero pinquejetacaguemparoj:

* **10:33** Icatsimatavacaaca joriojia aisa *Samariaquitica* iroorijite itsarotentajiacariguetei Aapani Irioshi irirajia Samariaquitica tee iroguijamajateroji yamejigaca joriojia iriatimpa. † **10:35** Iriiraquea *tenario* irio imentaquitsite Iromaquitica. Iramiteriguetei itsipa apajencaro savincaguiteri irivegarataqueri aparo tenario.

‘Aapani choocatatsica inquitequi,
 noninque intsaromentamajiaquempiquea maasano caquinte.
 Caacateja pimajirontamajapojempa.
 Noninquequea irinetsanamajajiqueroja ocaniqui quepatsiqui maasanopae pininqueca
 aviatimpa,
 onquejetantaquempaca inetsanamajajiquerogueti ontaniqui inquitequi.
³ Pojocaquenaja imaica noshecatapinijiaquempaca.
⁴ Pimpeacotsitajenaroja nogovaeguishere,
 aritarite noquempetaca naatimpa nopeacotsitajari ipeacaavecaca atsipetacaavetaque-
 naca.
 Aato pishinejiganarotsi oncoraquetashiquena aatoca notampishitashiti.
 Manaquea noninque pintampishitacaamajiaquena aatonijite yagavejajana am-
 patsini incovaeguishetacajaena.’
⁵ Iroompaquea icantajiguiri aisa:
 –Pinquenquejeroja, ariguete poanincanaqueguete itsovironaquitequi pitsipavijitaca
 nianquiite pincajemacotapojaqueri: ‘Anianishi, pojoquenashiatsi 3 pan,
⁶ iriaquerasanoquea arejetapojatsi nogonoro, teetari onchoocatenica nojocavaque-
 nerica.’
⁷ Ariquea irancanaquequea iriatimpa ontaniqui intsompoguiqui incanquempiquea:
 ‘Jaashinete pasereganatsi, ashitacojianajanatarite, maajianajanaqueate maasano. Aa-
 toquea nagaveji nojoquimpitsi.’
⁸ Aatoquea yojocavetimpitsi, cotanquitsiquea pincantacoguitempaniguete pama-
 guiterini incatiitanaquempaquea irojocaquitempi maasanopae picoguitejacocaca.
 Cotanquitsiquea aatoquea iro yojoquimentimpi ipeaquempiguete itsipavijitacaca,
 iroguentiquea irojoquimenquempi picantacoguitani pamanaguitirini.
⁹ Irootaquetari noncantantajiaquempica: pamanaguitirini Aapani Irioshi taaca
 picoguitejacojiacaca, ariquea iriatimpa irojocajiaquempiro. Pamenagueteroja taaca
 opajita, ari pamenapojero. Aisa pintinquiapojerogueti sotomorontsi, ari irashirejaco-
 quempi.
¹⁰ Aritarite iriraquea amanantatsica irojocajiqueneri. Iriraquea amenaguetatsica
 iramenapoje. Aisa iriraquea tinguiguiroca sotomorontsi irashirejacojiqueri.
¹¹ “¿Arimpate piquempejiga aviatimpajia iramanempiguete pirijanite pan, paitsiten-
 empari mapi pojoquitenempari? ¿Arimpate iramanempiguete pirijanite shima, pait-
 sitenempari camaarini pojoquitenempari?
¹² Iriogueti iramanaquempi iitsoqui, ¿paitsitenempari pojoquitenempari oseroticono?
¹³ Quempevecaquea aviatimpajia, picoguishejiavecaquea, cotanquitsi pojocajigu-
 iniriquea pirijanijiate taaca opajitapae cameetsaguetatsica yamanajiaquempica, iri-
 ompate Aapani Irioshi choocatatsica inquitequi caaviji intigaranquimojiaqueri Ishire
 inchoocajiaqueri maasano amanajiaquerineca.”

Icantajiqueriquea Jesoshi iriguenti shaquiacariquea ampatsini
 (Mt. 12.22-32, 43-45; Mr. 3.20-30)

¹⁴ Iroompaquea Jesoshi yoguisotoaqueriquea ampatsini macanari, irooquee iso-
 toanajiguete ampatsini iquenquetsatanaji shirampari macanavetanquitsica. Yamena-
 menaitanaquequea intati maasanojia.

¹⁵ Cotanquitsiquea iconoagaranca manaquea icantajianaque: “Iriguentiquea
 shaquiacari Veerevevo* imajirote ampatsinijia. Iriotaquequea agavejacaquerica
 yoguisotoantaguetacagnarica ishaquajiacaca ampatsinipae.”

* **11:15 Veerevevo.** Iguenquetsatsarequi guiriego icanqueri **Beezeboul** aisa **Beelzeboul**. Icanqueri quimajareri **Beelzebú**. Iriotaque pajitatsica aisa Satanashi.

¹⁶ Ariquea iconoagarancaqueate itsipapae inintajiaque iramenanquempari icantan-tajiacarica: “Iintsija pamenacaajiguenaroja otsipa oacaantantatsica intati onquen-an-tapojaquemparo inquite.”

¹⁷ Cotanquitsiquea iriatimpa itsatavaquero iquenquejajiaqueca icantajiguiri: “In-choocategueti caquinte incapiocajiaqueriquea igonorojia impeaquempaquea ima-jirote, iroompaquea ariguete impariajiaquemparo incatsimatavacaajianaquempa, ari-quea intsinampirejavacaajianaquempa, aatotari itsipatavacaaja, aato imajironta-jiajari. Ariquea iquempejiaca tsipatsipaitarica ijijiguica, ariguete incatsimatava-caajianaquempaquea, ariquea incojianaquempaquea intsinampirejavacaajianaquem-paquea, aatotarite iconoavacajajaa.

¹⁸ Ariquea iquejetaca Satanashi iriatimpa, ¿arimpate queroquea incoquempani incat-simatavacaajempagueti igonorojia ampatsinijia? Aato iconoavacaaja, aato imajironta-jitajari. Manaquea noncantajiaquempi imaica notsaque picantajiaque: ‘Iriguenti shaquiacari Veerevevo agavejacaquerica yoguisotoitantajijaarica ishaquiaguevecaca ampatsinipae.’

¹⁹ Iriomegueti agavejacaquename Veerevevo, ¿ariquea taaquea agavejacaajiaqueri ogujatacoquempica aviatimpa yoguisotoitantajijaarica ishaquiaviavetacaca ampatsinipae? Irootaquequea itsatantajitacaroca manatarite picomica aviatimpajia.

²⁰ Cotanquitsiquea iriguenti agavejacaquena Aapani Irioshi noguisotoitantajijaar-ica ampatsinipae, irooquea pintsatantajiaquempaca jac imajirontapojaca Irioshima-jaca acaniqui aviatimpajiaqui.

²¹ “Iriaquea ampatsini manaquea iquempecariquea caquinte tampishitatsica choocatatsica ishiquiripite, igotsirote, maasanopae iticaancaca, iquem-poguijama-jatsitaroquea itsovironaquite, aatoquea quericaca agavejerineca iraitsijiteri.

²² Cotanquitsiquea incoraqueeteguete itsipa caavijica yanaaqueri, irioquea iriguenti iragavejaque iraitsiqueri maasanopae yaventaguevecaca irashinquemparoquea maasanopae yashintaguevecaca, irojoquitenempariquea quericaca inintacaaqueca iriatimpa.

²³ “Iriaquea teeca irishineventavaquenaji, manaquea icatsimaquena; aisa iriraquea teeca intsipatenaji nocapiocantaqueguete, iroguenti yoguivorocantaque.

Ampatsini incoraqueetashitajiri aisa ishaquiavetacaca

(Mt. 12.43-45)

²⁴ “Oraquea irovashiantanajeriguete ampatsini iriraquea ishaquiaveta-caca, iroanaque ontaniqui oquitamampororoitapojiguete irinintavequempa irimagorejavaequeme. Cotanquitsiquea iroompa iramenavetapojaquemparo querocampa inchoocateni oraniqui. Inquenquejitsitanaquemparoquea incanque: ‘Noantanajemparota notsovironaquiteni nosotoantavetanacaca.’

²⁵ Ari incoraquevetajempa iramenapojajeri ishaquiavetacaca quempeca tsoviron-aqui ipishijitiroguete inetsanajitiroguete, cajaraguetejisano oncanquempa.

²⁶ Ariquea iroanaque iraaquiteri itsipajia 7 ampatsini caavijica igajaiaca. Iroom-paquea irishaquiapijajempari irira ishaquiavecaca iroaqueraguete, ariquea iri-atimpa ari incotanajempa arimpa irogaamajatanajempa.”

Quericaquea caavijica icavintsajamajajique

²⁷ Iroompaquea choocatirajaguete iquenquetsavaetaque Jesoshi ocajemitsi-tanacaquea aparo manquigarentsi tsipajiacarica omporoguijajianquitsica, ocanque:

—¡Icavintsajamajajiqueroquea piniro irijaninquempica atsomitimpica!

²⁸ Cotanquitsiquea iriatimpa icanquequea:

—Iriompaqueate icavintsajamajajique quemajivaquero Iguenquetsatsare Aapani Irioshi netsanamajajiaquero.

Irraquea covaeguishejiatsica icantajiavecariquea Jesoshi iramenacaajiaquerime oacaantantatsica intati

(Mt. 12.38-42; Mr. 8.12)

²⁹ Iroompaquea arimpaquea yomporoguijaventavaetapojacari Jesoshi, yanquitacojiapojiri icanca, iroompaquea itsatacaajiaqueriquea, icanque: “Aviatimpajia otiavaetaquempiquea covaeguisherentsi, pinintantajiacaca namenacaajiaquemprome oacaantantatsica intati, cotanquitsiquea aatoquea nonigaguimpirotsi. Iroguentiquea nonigaajiaquempi otsipa onquempemparoquea iquejejiquerigueti tsavetantatsica Jonashini coramani.

³⁰ Piquemacojiguiritarite Jonashini coramaniqui. Aapani Irioshi manatarite yamenacaajiaqueriquea Ninivequitica intsajiaquenijite arimajaca iriguenti tigarancaqueri. Ariquea inquempetaquempaquea irira Irijanite Caquinte, manaquea inquejetacaquempari Aapani Irioshi Jonashini cameetsanijite pintsajiaquenijite aviatimpajia irio-taque itigarancaque aisa.†

³¹ Oncoramaniguitevaepojajeguete aapojajempaguete incatsimatantajiaquemparica Aapani Irioshi maasano teeca intsaromentajiguempariji, oraquate imajirojiate Savaquitica oncatiitsitanaquempaquea onsavetacotsitaquempiro pantaguishequeca aviatimpajia choocajianquitsica imaica. Coramanitari ocoraquetashivaequeri Saromonini oquemisanqueriquea itsatacaqueroguete, oquenaetapojiquea jmm osamani oquemacoqueriguete itsamajati. Cotanquitsiquea imaica icoraquevetapojaca caavijica anaavaequerica Saromonini, teequea pinquemisantajigueriji.

³² Ariquea inquempejiaquempa aisa Ninivequitica incatintiitsitanaquempaquea oncoramanitapojajeguete incatsimatantajiaquemparica Aapani Irioshi maasanojia teeca intsaromentajiguempari, intsavetacotantsitaquempiroquea pantaguishejiaqueca. Maasanotari Ninivequitica iquemisantajiaqueriquea Jonashini itsavetantimojiaqueriguete, ishimampoanacajianaca yamenajiacaguete ipeacaaguishejiaaguete covaeguisherentsi, ariquea icantashitajiaanaca. Cotanquitsiquea imaica icoraquevetapojaca caavijica anaavaequerica Jonashini, teequea pinquemisantajigueriji.

Iquempetacaacaro tsivorentsi

(Mt. 5.15; 6.22-23)

³³ “Oraquea itsivojitiriguete tsivorentsi, teequea ariquea intsitijiteriji, aisa teequea irisasaviacojiteriji chomoqui, ariguenti yoguisavicacojitiri jenoquijaniqui, cameetsanijite intsivoguitetanaquenerinijite maasano quijaquijaitanquitsica oraniqui.‡

³⁴ Poquija oquempavecaro otsivore pitsino. Ariguete oncameetsate poquija, pamenamajate, onquempetaquemparo otsivoguitemajatiguete. Aatoguete ocameetsate poquija, aato pamenantamajataro, onquempetaquemparo pipitsecacotiguete maasanotsino.§

³⁵ Pamenamajateroja quero ocotaca piquenquejaguetaqueca. Inchiquiojitsi pijitirotsi cameetsa piquenquejavetacaca, pijitirotsi oquempetacaro tsivoguitetanquitsica, pamenitsivetemparoquea coajica manaquea ocanque pitsec.

† **11:30** Irraquea *Jonashini* icaratacovaetanaque 3 savincaguiteri imotijaqui quejevetarica iririjegui quiterinqueni niavetacarica. Imaica icanti Jesoshi inquempetaquempaquea iriatimpa irimetojaqueguete iroguiaajivetaquitempariquea omoroqui incaratacovaevempojempa 3 savincaguiteri. ‡ **11:33** Ari iquejetacaquea Jesoshi, teequea intsititeroji maasano yantaguetaqueca aisa itsatacaantaqueca, oconijatimojiaqueriquea maasano coraquetashiquerica. Arimeguete irininqueme joriojia, iramenamajaquerome, intsaqueme inintaguetica Aapani Irioshi, aatome icantirime Jesoshi: “Intsija pamenacaajiguenaroja otsipa oacaantantatsica intati.” § **11:34** Ariguete anintamajataque anetsanatero inintaguetica Aapani Irioshi, anquempetaquempari cameetsatanquitsica iroquija, amenamajataquerotari ocanqueca Iguenquetsatsare Aapani Irioshi, anquemaquero. Aatoguete anintamajati anetsanatiro inintaguetica Aapani Irioshi, manaquea anquempetaquempari teeca oncameetsateji iroquija, amenavequemparoguete ocanqueca Iguenquetsatsare Aapani Irioshi, aato aquemirotsi.

³⁶ Arigueti ocameetsataque maasano piquenquejaqueca, onquempetaquem-parogueti tsivoguitetanquitsica teeca ompitsequimateji, ari pamenamajataqueroquea maasano, onquempetimotaquempi itsivotacoquempigueti tsivorentsi, pintsatavaque-roquea inintacaaquempica Aapani Irioshi.”

Jesoshi icantomajajiaqueri pariseojia aisa irirajia tsatacaantajiguiroca itioncacotanaqueca Moishishini

(Mt. 23.1-36; Mr. 12.38-40; Irc. 20.45-47)

³⁷ Iroompaquea iteroncanaquitiguiroquea iquenquetsavaequegueti Jesoshi, ican-tanaque aparo pariseo icajemitsitanacariquea irishecatimoquempari. Iroompaquea yoanaque iquijanaque ipimerequijapojaca shitaponcarontsiqui irishecaciaquempa.

³⁸ Cotanquitsiquea yamenitsitanacaquea intati cajemaquerica yamenaqueriquea ishecatacaquea intati teequea inquivavacotempaji inquempejiaquempariji iriatimpajia iquivavacomajataca irooshipojigueti irishecaciaquempa.*

³⁹ Cotanquitsiquea Amajirote icanqueriquea:

—Aviatimpajia pariseojia mana piquempejiacari quiviroca otaqui chotarontsi aisa perato, oraquea intompoguiqui ooquea cantaitevaequequea. Ari piquejejiaca, mana pinetsanatamampejiaca intati, cotanquitsi caaviji paitsitantagueti, otsitacashirentavaetaquempi pigovaeguisher.

⁴⁰ ¡Teequea pinquenquejajigüeji! ¿Arimpate teequea pintsajigüeji iriraquea peacaac-aroa itsino caquinte irioquea peacaacaroa ishira aisa?

⁴¹ Cotanquitsiquea pinetsanashirentajianaquempaja, pimpintsatacotantajiaquem-paja, arigueti pinquempequero, saancavaequequea oncanquempa maasano.

⁴² “¡Imaicashiatsi pantsipevaetempanshiatsi aviatimpajia pariseojia! Taaca opajitapae pashincaca irooca ovanajaniqui menta, irooca quejevecaroa sanconca, irooca otsipapae taaca opajitapae pivintyacajiguica pitsipatacaantajigaroca pisheca pojocagarantaqueneriquea† Aapani Irioshi, cotanquitsiquea pipeacojiacaroquea icantajiave-quempica: tampatica poaqueneri maasano caquinteguetatsica aisa pimpintsamajajiaquempariquea Aapani Irioshi. Cameetsavaeque pojocagarantajiaqueneriquea Aapani Irioshi pashincaca, cotanquitsiquea aatomesano pipeacojigarome ogonoropae icanqueca.

⁴³ “¡Imaicashiatsi pantsipevaetempanshiatsi aviatimpajia pariseojia! Picantacoguitaniqua poapoaitapiniquigueti tsovironaqui qui picapiocantapinijiacaca aviatimpajia pinintajiaque pisavisaviitaque pitsipatsipaitacari caavijica yanaajencavaeque. Aisa poapoaitigueti ontaniqui yojocantajigueti rogueti ajaararontsipae taaca opajitapae, pinintajiaque inquenquetsatacaajiavaquempi.

⁴⁴ “¡Imaicashiatsi pantsipevaetempanshiatsi aviatimpajia cameetsatamampejiatsica! Iroguenti piquempejiacaro yoguijaantajitarica metojatsica coramanitica iroompaquea mana omaperincanaja. Yoapinijiqueroquea yagatigativaequeroquea, iroorijite maperincanajatari teeca iramenantajitajemparoji.”‡

⁴⁵ Iroompaquea icantsitanaca aparo tsatacaantiroca itioncacotanaqueca Moishishini icanque:

—Tsatacaantantatsica, noquemajiaquempi piquenquetsataquegueti imaica, pican-timanajianaquenaquea naatimpajia aisa.

⁴⁶ Cotanquitsiquea Jesoshi icanqueriquea:

* **11:38** Iriraquea pariseojia manaquea yogavitashitajaro itioncacotaqueca Moishishini icantajiguiroca igonorojia: “Aatogueti iroquetitaja piquivacomajata manaquea incatsimajiaquempi Aapani Irioshi.” † **11:42** **pojocagarantaqueneri.** Yojocaqueneri 1/10 (**un décimo**), ocanque onchoocaquegueti 10 irojocaqueneriquea aparo, onchoocaquegueti 100 irojocaqueneri 10. ‡ **11:44** Ariquea iquempejiaca iriatimpajia imaica, yamenajiaquerigueti irirajia tsipatsipaitacarica ijigüeji ari itampaticamajataquero itsariventamajatacari Aapani Irioshi, cotanquitsiquea teequeate, teetarite intsajigüeji manaqueate iquenquejaguishejiaquequea taaca opajitapae covaequisherentsi.

—¡Imaicashiatsi pantsipevaetempanishiatsi aviatimpajia aisa, tsatacaantajiguiroca itioncacotanaqueca Moishishini! Pogujatacaantamajatacariquea caquinteja manamajatanquitsica pitsatacajiaiqueriquea taaca opajitapae irinetsanamajataqueca irishineventaquemparinijite Aapani Irioshi, cotanquitsiquea aviatimpajia teequeate pinetsanatimajigueroji.

⁴⁷ “¡Imaicashiatsi pantsipevaetempanishiatsi aviatimpajia! Iroguentiquea pipeacaashijiacanariquea inquenquejacotantajiquemparica tsavetantatsica metojajianquitsica coramanitica imetojajiaqueca choviquijianaquempica. Cotanquitsiquea manatarite pinetsanatamampeajiacaroquea intati, teequea ariquea ontampaticateji pishineventamajatempariji.

⁴⁸ Oraquea pipeacajaiacanariguete, ponigaantajiacaca mana pamenajiaquero cameetsavaeque imetojajiaqueriguete. Iriatimpajia imetojajiaqueritarite coramaniqui, imaica aviatimpajia pipeacaashijiacanariquea inquenquejacotantajitajemparica cameetsanijite aatonijite omanatsi yoguijaajiqueriguete.

⁴⁹ “Paesatoniqui itsatsitacaroquea Aapani Irioshi, irootaquequea icantantacaca: ‘Nontigarancavequenempariquea tsavetantiroca nocanqueca aisa itsipapae notigarancaneja, cotanquitsiquea inconoagaranquempaquea irimetojaqueri, itsipapae irooca irantsipetacajiaquempariquea.’

⁵⁰ Oncoramanivaetapojajeguete incatsimajiaquempiquea Aapani Irioshi aviatimpajia choocajianquitsica imaica, inquenquejacaajiaquempiroquea imetojajiqueriguete tsavetantatsica iroaqueraguete ipeacajaicaroguete quepatsi arejevaetajemparo imaica.

⁵¹ Irieraquea iriquetica imetojajique iriguenti Averi. Irieraquea impoimajatananquitsica iriguenti Sacariani§ imetojajiqueriquea teemporoqui itsaromentajitarica Aapani Irioshi ichoocavecaquea araquerora aretarequi itaantajitarica viratsipae. Irootaquequea nocantantajiaquempica imaica arimajaca incatsimamajajiaquempiquea aviatimpajia choocajianquitsica imaica inquenquejacaajiaquempiroquea maasano imetojajiguequeca, quejetacaquea aviguentijia metojajiaqueri.

⁵² “¡Imaicashiatsi pantsipevaetempanishiatsi aviatimpajia tsatacaantajiguiroca itioncacotanaqueca Moishishini! Piquejevecariquea aitsitantavetajaroquea yavi iyavitantajitaroca sotomorontsi, teequea inquijeji iriatimpa, aisa teetari irishineteriji nintavetanquitsica inquijaquijaitanaqueme. Pitsajiavecaroquea Iguenquetsatsare Aapani Irioshi, cotanquitsiquea teetarite pinintajigueje pintsamajajigueri aviatimpajia, aisa piticaacajiaqueritari itsipapae nintajiavetanquitsica intsajigue.”

⁵³ Iroompaquea isotoanajiguete icatsimamajajianaqueriquea pariseojia aisa tsatacaantajiguiroca itioncacotanaqueca Moishishini, ariquea icoacojiaqueriquea taaca opajitapae

⁵⁴ iramenanquempaca querocaca incanque cameetsanijite intoseventajiaquemparinijite incatsimatacaantajiaquemparica.

12

Jesoshi icantajiaqueri itsatacaaneja aatoquea itsaromentamampeajigari intati

¹ Iroompaquea icaramirincavaetanaquequea jmm caquinteja icantajianaquequea tiorererere icanca itsinacajianacaquea. Irieraquea Jesoshi icantajiguiriquea itsatacaaneja: “Inchiquiojitaja piquempejigaritsija pariseojia, manaquea icameetsatamampeaca intati, aisa itsaromentamampeajiac. Iquempetacaro anempoacaanaquero ca pan ose, anempoanaquempa maasanose. Shooshoh paajencatsitiritsi.

§ 11:51 Iriratica **Sacariani** tee irio iriri Joanca Viñacajatantatsica. Iriroquea iriquetinica tsipatacarica Sorovaveri icanqueriguete majirontatsica Vavironiaqui cameetsa iroajianaje Joreaque impeacaajemparo teemporo Jerosarequi 538 ajagantsini tequerataguete irivogueje Jesoshi. Pamenero 1 Coronica 24.20-22. Iguenquetsatsarequi evereo iroguenti paperi caratapojaquero ca **Iroquetinica Itioncacaantaqueca Aapani Irioshi (el Antiguo Testamento)**.

² Maasanopae yomanajivecaca imaica yamatavijantigueti oncoramanitapojajegueti intsajitaqueroquea. Ariquea oquejetaca maasanopae isenacajiguetacaca imaica, oncoramanitapojajegueti ironigaantajiqueroquea.

³ Irootaquequea imaica nocantantajiaquempica, maasanopae picantaguetaqueca pitsecariqui pomanavecaca imaica, oncoramanitapojajegueti incantajiteroquea savincaguiteri qui, intsajianaqueroquea maasano. Aisa maasano pinchiquiojijencavetaquempa iguempitaqui pigonoro intsompogui pitsovironaquitequi, oncoramanitapojajegueti intsavetantajitero sotsiqui omencotapojacagueti pitsovironaquitequi ovancaitoqui.

Apaniromajaca intsaroacaamajajitaquempari Aapani Irioshi

(Mt. 10.26-31)

⁴ “Imaicaquea nocantajiaquempiquea aviatimpajia notsipajiacaca, aatoquea pitsaroacaajigaritsi nintajianquitsica irimetojajiaquempi. Iriatimpajia ariguetei irimetojajiaquempi iroguenti metojanquitsine pitsino, cotanquitsiquea aato yagavejirotsi irimetojajiaqueroquea pishire.

⁵ Cotanquitsiquea naatimpa nontsatacaajiaquempiquea querica pintsaroacaajiaquempaca: irioquea pintsaroacaamajaquempaquea Aapani Irioshi, aparo icanca iriatimpa yagavejamajaque incanqueguetei quericaca metojanquitsineca ariquea iragavejaquequea intigarancaqueroquea ishira camorecariqui. Arimajaca irioquea pintsaroacaamajaquempa.

⁶ ¿Arimpaquea teequea pamenajiguiri tsimeripae ariguentei ivegaraca 5 tsimeri mavimentaquitequea imentaqui? Cotanquitsiquea Aapani Irioshi tee inchoocateji impeacotempaca.

⁷ Quempecaquea pimaejia, ariquitee itsaqueroquea apamaeropae. Irootaquequea nocantantajiaquempica aatoquea pitsaroajigui, caaviji panajiaiqueriquea tsimeripae.

Teeca impashiventacajaiguempariji Jesoquirishito

(Mt. 10.32-33; 10.19-20)

⁸ “Imaicaquea noncantajiaquempiquea: quericaca cantamajaqueroneca itsaroven-tamajataquena incamantajiaqueriguetei caquinteja, ariquitee inquempetaquempa irira Irijanite Caquinte oncoramanitapojajeguetei, incanquequea: ‘Naroguentei ashincari’, inquemajiaqueriquea maasano irashivantijitete Aapani Irioshi.

⁹ Cotanquitsiquea quericaca cantaquerineca caquinte: ‘Teetarite nontsaroven-mpariji Jesoshi’, ariquitee inquempetaquempaquea Irijanite Caquinte oncoramanitapojajeguetei, incanquequea: ‘Teequea naroguentei ashintemparine’, inquemajiaquenaquea maasano irashivantijitete Aapani Irioshi.

¹⁰ Quericaca cantaguishevetaquemparineca irira Irijanite Caquinte iragavejaque Aapani Irioshi irishetacotajeriquea, cotanquitsiquea iriraquea cantaguishecoquerineca Ishira Aapani Irioshi, irioquea iriguentei aatoquea ishetacojitiritsi.

¹¹ “Oraquitee ariguetei irajaitanaquempiguetei shinagogaqui icapiocantapiniyacaca irooca ichoocatiguetei jivatatsica joese irioca majirontajiatatsica, aatoquea pishoshoguiteta piquenquejajiguiroquea querocaca pincanqueca pinquenquetsatacoventaquempaguetei. Aatoquea picanti: ‘¿Querocaca noncanqueni?’

¹² aapojaquempatari inquenquejacaajiaquempi Ishira Aapani Irioshi cameetsanijite pintsajiaquequea querocaca pincanqueca.”

Teequea oncameetsateji irinintajiterogueti irajaarantajiquempa

¹³ Iroompaquea icantanaque aparo caquinte tsipatsipaitacarica omporoguijajianquitsica incanqueriquea Jesoshi:

—Tsatacaantantsica, iintsija pincanteri iguentijegui irojocagarantaquenaroquea yojoquimojianajanaca aapanini imetojanajigueti. Imashitsatapitsataquenaroquea nashintagarantaquemparome.

¹⁴ Cotanquitsiquea Jesoshi icanqueriquea:

—¿Narompate jivatatsica joese cameetsanijite nonquenquetsatacaaquempiri irojocagarantajempiro?

¹⁵ Ariquea icanantajigui maasano:

—Shooshoh pinintajiguitsija pajaarantajiaquempaquea. Pajaarantajiavequempaquea, ¿arimpate irooquea anijacaajiaquempineca?

¹⁶ Ariquea iquempetacaanacariquea ajaarantavaetatsica, icanque: “Ichoocati caquinte ajaarantavaetatsica. Yashintamajataca iguepatsite ivintyacacaantaqueroquea tirigoitsoqui, iroompaquea ochoocatanaquequea ooquea jmmtacovaequequea teetarite oncapichaguiteteji.

¹⁷ Ocoramanivaetanaquequea anaavaeguetanaqueroquea oratica icapiocantaroca querompaquea incapiocajeroni, icanque: ‘¿Querocaquea noncotajeroni? Anaanaaguetanaqueroquea nocapiocantaroca. Imaica ¿querocaca noncapiocajeroni?’

¹⁸ “Ariquea iquenquejanaqueroquea icanque: ‘Imaicaquea notsaquequea querocaca noncapiocajeroni. Nosoveacaanquerota nocapiocantavetaroca nantacaantaguetajequa otsipapae iniropaequea cameetsanijite arejetajempanijite maasanopae noncapiocantaguetajemparonijite notirigoitsoquite aisa maasanopae najaararopae.

¹⁹ Iroompaquea noshinevaequempaquea noncanque: Imaicaquea choocatacovae-tanaquenaquea oshequiavaeque, aatotaquea oteronquitajatsi oncaratacovae-tanaquequea ajagantsini, aatoquea taaca nocoguitejacotimataja. Imaicaquea imaica nomagorejaguiteniquea, noshecaguitempani, nomiraguiteniquea, noshinevaequitempani noncanquempa.’

²⁰ “Cotanquitsiquea Aapani Irioshi icanqueriquea: “Teequea pintsatimateji aviatimpa. Imaica pimetojaque ompitsecanaquegueti, povashiantaguetanaqueroquea maasanopae pashintaguecaca. ¿Taaca ashintajemparone?’

²¹ Ariquea iquempeca imaica maasano iriratica nintatsica manaquea irajaarantavaequempa intati, cotanquitsiquea iriraquea Aapani Irioshi yamenaqueriquea quempecaquea teeca irashintempaji capichaji.”

Iquempoguijaqueri Aapani Irioshi irijanijiate

(Mt. 6.25-34)

²² Iroompaquea Jesoshi icanantajigui itsatacaanejia: “Imaicaquea noncanquempi: aatoja pishoshoventajigaro pishecacia choocatacaajempineca, aisa aatoja pishoshoventajigaroquea pinquitsaajiaquempaca.

²³ Oraquea pishire anijacajaiguimpica yagavejaquequea Aapani Irioshi ichoocatacaaquempiroquea, iroompaquea pisheca caaviji irojocajiaquempiquea. Ariquea oquempecaquea pinquitsaajiaquempaca, yagavejaquequea Aapani Irioshi ichoocatacaqueroquea pitsino, iroompaquea pinquitsaajiaquempaca caaviji irojocajiaquempiquea.

²⁴ Pamenajiguiriquea cogonti, teequea irivintyacavetempaji, aisa teequea onchoocavetempajiquea incapiocantemparoca isheca iroaroaitapinijigue irapinijiaquequea irishecajiaquempaca, cotanquitsiquea Aapani Irioshi yojocapinijiaqueneriquea ishecacia. ¡Aviatimpajia caaviji irojocajiaquempiquea pishecacia pishecajiaquempaca, caaviji panajiaqueriquea araguetatsica!

²⁵ Arigueti pishoshoguiteventavequemparo pigatsantsare ¿arimpa pagavejaque pin-catsantsatanaje niganqui meetero?*

* **12:25** Agavejaque aisa oncanque: “Arigueti pishoshoguiteventavequemparo oshequianajeme pisavincaguitertepae ¿arimpa pagavejaque poshequiaquero capichaji?”

²⁶ Iroosacanica teequea pagavejajigueji teemajaca omanamajatempaji, ¿queroquea ococani pishoshomentantajiacaroca caavijica omanapitsajiaquempiquea?

²⁷ “Pamenajiguiroguetiquea ocatica ovempenaquipae inchiqiojiquea otsoroashiguetaqueate iroatimpa, teequea oncatsiquejiavetempajiquea aantaquemparomeca oitsaare, aisa teequea onquiricajavetempaji, jac ocameetsamajaquequea anaavaequequea ocanca ocameetsavaeque, anaaguequeroquea quitsaarentsi cameetsamorenaguetatsica coramanitica iquitsaajiacaca majirontatsica Saromonini caavijica anaaque ocameetsamorenataquequea.

²⁸ Quempeca ocatica ovempenaquipae oporencanaque poren icameetsatacaaguequeroquea Aapani Irioshi, cotanquitsiquea osaitequeraquea taampina oshimpeguiricanaque shimpeguiririri, irajaiqueroquea intajaiquero. ¡Aviatimpajiaquea caaviji irojocajiaquempiquea pinquitsaajiaquempaca, caavijitari panajaiqueroqueate ovempenaquipae! Cotanquitsiquea aviatimpajia teequea paventamajatempariji, manaquea pishoshomentajiacaca taaca opajitapae.

²⁹ Irootaquequea imaica nocantantajiaquempica: aatoquea pishoshomentajigaroquea pishecajiaquempaca irooca pimirajiaqueca.

³⁰ Iriguentiquea quempejiguiroquea imaica irirajia teeca intsaromentajiguempariji, ishoshomentajiacaroquea taaca opajitapae, irootaquequea isavicaventajiaquequea iriatimpajia. Cotanquitsiquea aviatimpajia aatojate piquejiguirotsija imaica, choocatarite Piri inquitequitica. Iriatimpa itsaquequea maasanopae picoguitejacojiacaca.

³¹ Aviatimpajiampani pinintamajajigue pimajirontamajatanaquempari Aapani Irioshi, ariquea iriatimpa irojocajiaquempiquea maasanopae picoguitejacojiacaca.

Pashintamajatapojajempa inquitequitantsica
(Mt. 6.19-21)

³² “Aatotarite pitsaroajigui, novejajiate. Teequea pincaramirincajiavetempaji, cotanquitsiquea Piri choocatatsica jenoqui inintacaajiaquempi pimajirontajiapojempari aisa impeacaavajempi majirontajiatatsica imajirontagueti iriatimpa.

³³ Pojocantajiaqueroquea pashintaguecaca, paanquemparoquea imentaquipae, pojocajiaqueneriquea coguitejacojianquitsica. Pinquejetaquempagueti ariquea irojocajiaquempiquea Aapani Irioshi cameetsamajaguetanquitsica ontaniqui inquitequi, onquejevetaquempaquee pinteterigueti imentaquipae tsaratoqui aatoca oshitequirejitsi, aatotari oteroncatsi irojocajiaquempica ontaniqui inquitequi, aatoquea ichoocati aitsitantatsica, aisa aato ichoocati shecaguetaroca quitsaarentsi.

³⁴ Aritarite taaca opajita pishineventamajataca manaquea pisavicaventaguitironi piquenquejaguitironi.

Agamajamajajiaquemparija Amajirote

³⁵⁻³⁶ “Aviatimpajia pinquempejiaquemparija yashintajitaca yoguijaguijaitirigueti ashincarica yoguigueti irameneri manquigatanquitsineca. Inetsanatahijjavacariquea incoraquetantajempaca, iquitsaajiacaca, itsivojiaqueriquea tsivorentsi yoguijaguijaiqueriquea incajemapojaje intanarejacojiavaqueriquea taampina.

³⁷ Irishinejiaquempaquee irirajia yashintajitacaca tinajajanquitsica guijajavajirica ashincarica incoraquepojajegueti. Noncantamajaquempiquea inquitsaatashipojajempariqueate iroguisavicajiapojaqueri shitaponcarontsiqui irojocajiapojaqueneriquea isheca.

³⁸ Incoraquevequempaquee nianquiiitequi irooca osavincaguitetamanaguegueti cotanquitsiquea iramenajiapojajerigueti irashijia tinajajanatsi, irishinejiaquempaquee yashintajiacaca.

³⁹ Iintsija pinquenquejajiguerojate, inchoocategueti itsipa choocatanquitsineca itso- vironaquite, intsatemegueti querocaca incoraquetantaquempaca aitsitantatsica, ¿arim- pate ari irimaaque? ¡Aatoquea! Manaquea intinajavenqueroquea irajaararo aatonijite iquijashitsijitiri iraitsijitaqueriquea.

⁴⁰ Irootaquequea nocantantajiaquempica: pincoguitempanija pincomajamajaji- aquempaja poguijajavajeri irira Irijanite Caquinte incoraquepojaje. Aatoguetequea piquenquejamajajiguirotsi inchiquiojitaja icomirejajipojajimpitsija.”

Yashintajitaca cameetsari aisa teeca incameetsateji
(Mt. 24.45-51)

⁴¹ Icantsitanaca Peerero:

—Nomajirote, piquejetacaacarogueti imaica ¿ari aparo pitsatacaajiaquena naatimpa- jia? ¿Arica maasano caquinteja pitsatacaajiaqueri?

⁴² Icanque Amajirote: “Imaquea iintsija pinquenquejajigueriquea yashintajicaca tsatatsica quemisantamajatarica ashincarica. Pameneja inchoocategueti ashincarica irashijia, iroompaquea iroanaquequea osamani, incanqueriquea aparo yashincaca irinetsanaguetajeneriquea maasanopae irashijia, icancani irojocajiaqueneriquea ishe- cajia.

⁴³ Irishinevaequempaquea yashincaca incoraquepojajegueti ashintarica ariguete ira- menapojajeriquea inetsanamajaguetajiro icantanaquerica, arimpaquea irishineventa- majatanaquempaquea.

⁴⁴ Arimajaquea incanqueri: ‘Imaica noninquequea pamenaguetaquenaro maasanopae nashincaca.’

⁴⁵ Cotanquitsiquea aatoguete yoguijiri ashincarica manaquea incanque: ‘Aatota ico- raquetsita’, ariquea imparianaquemparoquea incatsimajiaqueriquea irashijia shiram- parijia irooca manquigarentsijia intavatavaaitaqueriquea. Manaquea irisavicaventa- guiteroni irishecaguitempani, irimiraguiteni, irishinquiguitempani.

⁴⁶ Cotanquitsiquea taampina incoraquetapojaje ashincarica savincaguiteriqui teeca intsateji, incomirejapojajempari incatsimacatsimavaequeriquea oshequi, intsipatsi- paitacaanquempari maasanojia teeca inquemisantajigueriji.

⁴⁷ “Iriraquea yashintajitaca tsatatsica inintacaavecarica ashincarica, cotanquit- siquea teequea inquemisanteriji, aisa teeca irinetsanatempani incoraquepojajegueti, intavatavaavaequeriquea oshequi.

⁴⁸ Cotanquitsiquea iriraquea yashintajitaca teeca intsateji inintavecaca ashincarica, impeacaaguevequemparoquea teeca irininteji ashincarica, aatomajaca itavatavaa- jitiri, teetarite intsatenica. Quericaquea itsatacaamajajiqueca, inintajitiroquea inquempetaquempaquea iriatimpa inquempetacaamajaquemparoquea querocaguete icojitaquerini itsatacajaiqueriguete. Querica yojocamajajitica oshequi, inintajitiro- quea irojocamajajitajeneriquea.

Teequea irooquea incoraquetashiteji Jesoshi incantajiaqueri maasanojia inquemava- caajiaquempa
(Mt. 10.34-36)

⁴⁹ “Naatimpa nocoraquetaquequea cameetsanijite nontsitacapojaqueroniji paamari acaniqui quepatsiqui.† Nonintamajaveca osamimincajencatsiquempame.

⁵⁰ Imaica nantsipevaequempaquea. ¡Noshimampojancavetanaca nocanca, irooshipoji- tari aapojaquempa!

† 12:49 Icanqueguete Jesoshi **nontsitacapojaqueroniji paamari acaniqui quepatsiqui** irooca iquejetacaaca incatsimatavacaquempaguete caquinteja. Irirajia teeca intsarotentajiguempariji Aapani Irioshi incatsimajia- queri tsarotentajiaquemparineca. Oncoramantapojegueti Aapani Irioshi incatsimatimentajiaqueri maasano teeca inquemisanteriji.

⁵¹ ¿Pijiqueji irooquee nocoraquetashique noncanqueriquea maasano quepatsiquitica inquemavacaajiaquempa iraavacaajiaquempaquee? Teetarite irooquee nocoraquetashiteji, iroguentiquea nocoraquetashique ompampiatantanaquemparoca intsinampirejavacaajianaquempa, incatsimajitanaqueriquea tsarovoltaquenanea.

⁵² Jeroquee imaica inchoocajiaque caquinteja tsovironaqui, incarajiaque apavacoro, cotanquitsi mavitetanquitsica incatsimajiaqueri itsipajia, ari intsinampirejavacaajianaquempa.

⁵³ Iriraquee shirampari incatsimaqueriquea irijanite, iriraquee irijanite incatsimaqueriquea iriri. Oraquee imanquigare oncatsimaqueroquee orijanite aisa ovataguero, oraquee orijanite oncatsimaqueroquee iniro, ariquee onquempetaquempaquee ovataguero iroatimpa oncatsimaqueroquee ovaguirote.”

Teequee intsajigueroji yonigaimojiavecarica Aapani Irioshi

(Mt. 16.1-4; Mr. 8.11-13)

⁵⁴ Iroompaquee icantajiguiri maasano: “Oraqueate pamenajiguigueti opoasecantigueti mararo oraquee iquijigueti catsirincaiteri picantajiaquequee: ‘Imaicashia ontejapojenishiatsi incani’, ariquee otejapojigueate.‡

⁵⁵ Aisa ochovigaguitetigueti oquenajencatapojigueti quirincaqui picantajiaque: ‘Imaicashia oncatsirincaguitetanaquenishia’, ariquee ocatsirincaguitetanaque.§

⁵⁶ ¡Mana picameetsatamampeajiaca intati! Aviatimpajia pitsajiaveca pamenaguitetarogueti arica ontejaque arica aato, irooca aisa pitsajiavecaroquea querocaca oncameetsaguitetantanajempaca, cotanquitsiquea ¿quero ococani teeca pintsatantajiguempaji queroca ococani yonigaimojiavequempiroquee Aapani Irioshi maasanopae pamenajiaqueca imaica?

Pishinetacaajajempariquea catsimajiaquempica

(Mt. 5.25-26)

⁵⁷ “¿Queroquee picojiacani aviatimpajia caarica pinintantajiga pintsajiguequee taaca opaji cameetsaguetanquitsica?

⁵⁸ Incatsimataquempigueti pignonoro irinintavequempaguete iraanaquempiquea jivatatsicaqui irisantanatacotacaanquempi, pinquenquetsatacaguetanaquerija quenavoquirontsiqui pishinetacaajemparinijite aatoniji yaguimpitsi. Ontaniqui iraanaquempiguete jivatatsicaqui iriotarite cajemaquerineca coareta. Iriraquee coareta manaquee iraapanajantempiquea irisantanatacotsitempi.

⁵⁹ Noncanquempiquea, aatoguete povegaramajatajiri catsimataquempica maasanopae paacotaquerica aatotarite yoguipaquiijajimpitsi santanatacotaquempica.”

13

Icantajiaqueri Jesoshi aatoguete icantashitatijaiga interoncajiaquempaquee

¹ Iroompaquee icoraquecoraqueipojiquea itsipapae icamantajiapojiriquea Jesoshi icantajiguiri:

—Iriraquee Pirato imetojacaantajiaqueriquea Garireaquitica ontaniqui ijitorejajitiriguete Aapani Irioshi viratsipae, ochovivincajatanaquequee iriraja oconoajatanacaroquee iriraja ivirapae ijitorejajiaqueca.

² Icantsijigariquea Jesoshi:

—¿Ari pijiqueji caaviji yogaamajajiaquea icovaeguishemajaca iriatimpajia Garireaquitica yanaajiaqueriquea igonorija, jero iquempetacaajicariquea imaica? Teequee.

‡ 12:54 Icantantacaroca iroorijite ontaniqui iguinteniqui ishiraerija ochoocaquetarite inirojani quantijani iquijiguete catsirincaiteri, ontaniqui oquenantapojacaro mararo otejantapojacaca. § 12:55 Ontaniqui Ishiraeriqui oraquee choviga quenajencapojiroca oquirincaqueguete catsirincajencavaeque irooriji oquitamampororoivaque quirinca.

³ Naatimpa noncantajiaquempiquea aviatimpajia aisa: aatogueti pishimampojan-caventajigaro pigovaeguisher aisa aatogueti picantashitatijaijaa, manaquea pinteronc-ajiaquempa oncoramanitapojajegueti, pinquempejiaquempariquea iriatimpajia.

⁴ Iroompaquea aisa piquemacojiaqueriquea Jerosarequitica osoveimojiacari imapi-pancote inirochoviina coramani ontaniqui Shiroequi. Otsinacajiaqueriquea, imetojaji-avaeque 18. ¿Ari pijiqueji caaviji yanaajiaque icoguishejiaca iriatimpajia yanaajiaque-riquea igonoropae choocajatsica Jerosarequi? Teequeate.

⁵ Noncantajiaquempi aviatimpajia aisa: aatogueti picantashitatijaijaa, pinteronca-majaquempaquea pinquempejiaquempariquea iriatimpajia.

Jesoshi iquempetacaajiacariquea teeca irinetsanamajateroji icanqueca Aapani Irioshi

⁶ Iroompaquea iquempetacaajiacanariquea Jesoshi icanque: “Ichoocati aparo caquinte ivintyacaqueroquea aparo iguera iniganquitejirequi, ariquea yoapinique-quea iramenapiniquero choocatapojicaca osovena, cotanquitsiquea yoavetanacaquea teequea anejeroji.

⁷ Icantsitariquea shiacotiroca: ‘Iintsija pinquenquejeroja. Nocoraquetashitironiquea coramani, imaica ariquea omavitevaepoji ajagantsini tequerataqueate onchoocateji osovena. Pinchaquiteroshine, mana onchoocatashiguitempani intati.’

⁸ Cotanquitsiquea iriatimpa icanqueriquea: ‘Iintsija ariotaqueta. Imaicaquea imaica nonqueecavanetashitajeroquea noaviotacotajerota itigaqui viratsi.

⁹ Iroompaquea ajagantsitapojajegueti onchoocatajegueti osovena, cameetsavaeque; aatogueti ochoocatitsi, ariquea pinchaquitsitemparoquea.’ ”

Jesoshi yovejairoquea mititsajancatsica savincaguiteri qui imagorejantajitaca

¹⁰ Iroompaquea aapojacagueti savincaguiteri imagorejantajitaca itsatacaantavae-taquequea Jesoshi shinagogaqui icapiocantapinijiacaca joriojia.

¹¹ Ariquea ochoocaque oraniqui aparo manquigarentsi ocantacoguitani omititsa-jancaguitini, aapojaca 18 ajagantsini teequea ompejaempaji, iroorijite ishaquiacar-oqueate ampatsini imititsajancacaqueroquea, querocampate oncotajempani ontam-paticatantanajempacate.

¹² Oraquea yamenaquerogueti Jesoshi icajemaqueroquea icanqueroquea:

—Manquigarentsi, imaicaquea jac peajimpiquea.

¹³ Ariquea ipamitsitavacaroquea, ariquea ocotanaja otampaticatanaji oquenquetsa-tanaque oshinevencariquea Aapani Irioshi.

¹⁴ Cotanquitsiquea iriraquea jivatanquitsica shinagogaqui, yamenaquerigueti Je-soshi yoveantajaroquea savincaguiteri qui imagorejantajitaca, icatsimatsitanaca, ican-tajiguiri omporoguijajianquitsica:

—Ocaratiquea 6 savincaguiteri irantantajitempaca, irooqueate pincoraquetantapini-jiaquempaca cameetsanijite irovejaiajempinijite. Aatoquea irooquea picoraquetanta-jiga savincaguiteri imagorejantajitaca.

¹⁵ Icantsitanacaquea Amajirote, icantiri:

—Cameetsatamampeajiatsica, piquempetaquea aviatimpajia, aapojajagueti savinca-guiteri imagorejantajitaca pishiticarejacojiguiri pigaapironcaarite aisa paashinote, paajianaqueriquea pojocajiaqueneri oja, imirajiacaquea.

¹⁶ Iroompaqueate ocativa manquigarentsi ichoviquitanaqueca Averaame yagave-jaqueroquea Satanashi arejevaeca 18 ajagantsini, quejetacaquea yoishotacotaquero, ¿arimpate tee oncameetsateji iroishorejacotantajitemparo savincaguiteri imagorejanta-jitaca?

¹⁷ Iquejetacaacarogueti Jesoshi imaica, ipashiventajianaca maasano catsimajiave-carica. Cotanquitsiquea itsipajia caquinte ishinejianaca oshequi yamenajiaquerigueti Jesoshi ipeacaaguecaca oacaantantatsica intati.

Jesoshi iquempetacaacaroquea oitsoqui moshitaasa
(Mt. 13.31-34; Mr. 4.30-32)

¹⁸ Iroompaquea icanque Jesoshi: “¿Imaicaquea taaca opaji quempetaca imajirontagueti Aapani Irioshi? ¿Querocaca nonquempetacaquemparoquea?

¹⁹ Iroguenti nonquempetacaquemparoquea oitsoqui moshitaasa ivintyacajitirogueti niganquitejiqui, chaajaniqui onavetaca, cotanquitsiquea otsoroanaquequea agashimpojanacaquea otsegotsegoatanacaquea oquempetanajaroqueate inchato, ichoocatantajiacaroquea tsimeripae.”

Jesoshi iquempetacaacaroquea anempoacaguiroca pan
(Mt. 13.33)

²⁰ Iroompaquea icanque aisa: “¿Querocaca nonquempetacaquemparoquea imajirontagueti Aapani Irioshi?

²¹ Ariquea nonquempetacaquemparoquea anempoacaguiroca pan. Pamenirotarite manquigarentsi ompeacaguemparogueti pan, aquequea apamontiinaro tirigovane, ariquea onconoanquemparoo anempoacaguiroca, ariquea oncotanaquempa anempoacaanaquero maasanose.”*

Sotomorontsi chaamorojaniquitatsica
(Mt. 7.13-14, 21-23)

²² Iroompaquea arimpaquea yoanaquequea Jesoshi Jerosarequi, iquenavaetanaquequea ichoocajiguigueti caquinteja, itsatacaajianaqueriquea.

²³ Chooa aparo icoacotaqueriquea, icanqueri:

—Nomajirote, ¿teequea iroshequigueji meshiajianquitsineca?

Iroompaquea iquempetacaacaroquea Jesoshi querocaca ancojiaquempani oahoitantanaquempaca ichoocatigueti Aapani Irioshi, icantajiaqueriquea:

²⁴ —Pimpanquenaguitemparoniquea pinquijaquijaitantanaquemparoniji sotomorontsi chaamorojaniquitatsica. Noncantamajaquempiquea inchoocajiavequempaquea oshequini nintajivetanquitsineca inquijaquijaitantanaquemparoo, cotanquitsiquea aatoquea yagavejajiga iquijaquijaitiquea.

²⁵ Oncoramanitapojajegueti incatianaquequeate ashincaroa itsovironaquite irashiteroquea sotomorontsi. Aviatimpajia teeca pinquijaquijaiteji pincatintijiaque sotsiqui pintinquitavetemparoquea ashitacorontsi pincajemajivetanquempaquea: ‘Nomajirotee, pintanarejacojiguenatsija.’ Cotanquitsiquea iriatimpa incantsijiguempi: ‘¿Querompate piquenajiapojini aviatimpajia? Teequea nontsajiguempiji.’

²⁶ Pincantsijivetanquempaquea: ‘Noconoajiguimpi ashecajiacagueti aisa amirajiacagueti, aisa aviatimpa pitsatacaantavaeque quenavoquirontsiqui noguinteniqui nocaramirincavaequegueti.’

²⁷ Cotanquitsiquea iriatimpa arimpaquea incantajianaquempiquea: ‘Teequea nontsajiguempiji. Tee nontsateji quero piquenapojini. Poapoitanaquequea osamani maasano aviatimpajia antaguishejiguiroca covaeguisherentsi.’

²⁸ Ariquea piraajianaquempaquea pantsicajiaqueroqueate paji pamenajiaquerigueti Averaameni, Ishaaconi, Jacovoni aisa itsipapae tsavetantajiatsica iconoajiapojacariqueate Aapani Irioshi ontaniqui imajirontagueti, aviatimpajia manaquea impishoncajiaquempiquea osamani.

²⁹ Incoraquecoraquejiaque inquenaquenaivaepojaquequea jmm osamani oshequini otsipapaequi quepatsi irishinemajajiaquempaquea inconoajiaquempariquea Aapani

* **13:21 anempoacaanaquero maasanose.** Ariquea iquejejiaca majirontajiacarica Aapani Irioshi, yoshequianaquequea querocagueti quepatsiqui.

Irioshi irisavicajiaque irishecajiaquempa. Inquenaquenaivaepojaquequea isotoguigueti catsirincaiteri, itsipapae inquenaquenaivaepojaquequea iquijigueti catsirincaiteri, itsipapae quirinca, itsipapae inquenaquenaivaepojaquequea catonco.

³⁰ Irirajia teeca iranaantimajigueji imaica acaniqui quepatsiqui, inconoagaranquempa quea iranaampojaque. Irirajia anaantajianquitsica imaica inconoagaranquempa quea aatoquea yanaantimajiaji, maasanoquea iranaajiaqueriquea.

Jesoshi iraacojiaqueriquea Jerosarequitica
(Mt. 23.37-39)

³¹ Iroompaquea incajaranquiguitetanaquitigui icoraquecoraqueipojiquea pariseojia icantajiaipojaqueri Jesoshi:

—Poanaqueshia otsipaquei quepatsi, ininquetari Erorishi† irimetojacaantempi.

³² Cotanquitsiquea iriatimpa icantajiguiri:

—Poapoaítanajiquea pincamantajiaipojajerija irinta amatavijantatsica, pincanqueri: ‘Tintsija pameneja, imaicaquea imaica choocatirajana nonigaaquempariquea ampatsinipae aisa nogueshiguetajeri ashinoncajaguetatsica. Ariquea nonquempetaquempaquea osaitequera, aisa otsipa savincaguiteri, teetarite oshequiavaeteji savincaguiteri nonteroncaguetanajeroquea nocoraquetashitaqueca.’

³³ Cotanquitsiquea imaica arimpaqueate antanatsinaqueate, nonquejetacaajemparoqueate aisa osaitequera, ontsipavepojaquempa quea osaitequera nonquejetacaitajemparoquea aisa. Irootari Jerosarequi imetojantajicari oshequi tsvetantajiaqueroca icanquerica Aapani Irioshi. ¿Arimpate irimetojavaete otsipaquei?

³⁴ “Jerosarequitica, Jerosarequitica, pimetojajiguiriquea tsvetantajiatatsica, aisa pitsinatsinavaetaqueriquea itigaranquimojiavequempica Aapani Irioshi intsavetantimojiaquempiro Iguenquetsatsare! Pamenajiguiroquea chaapa osaavantajiguirigueti irijanijiate, nonintaguevetacaquea naatimpa nonquempetacaajiaquempimequea maasano aviatimpajia noncapiocajiajempimequeate pintsaromentajiaquena, cotanquitsiquea aviatimpajia teequea pinintajigueji.

³⁵ Imaicaquea imaica aatoquea ichoocatimojiajimpi Aapani Irioshi, aparoquea pinchocajiaje. Noncantajiaquempiquea imaica aatoquea pamenajiajana arejevaetapojajempaquea aapojajempaguete pincantajianaquetaquea: ‘¡Intsishiatsi irishineventajiquempari iriratica coraquetapojatsica itigarancaqueca Majirontamajatatsica!’ ”

14

Jesoshi ipeajiriquea eereheereatatsica

¹ Iroompaquea aapojacaguete savincaguiteri imagorejantajitaca yoanaquequea Jesoshi ishecatacaquea itsovironaquitequi pariseo anaantatsica. Itsipajia pariseojia yamenamajiaqueriquea querocaca incoquempañi.

² Ariquea ichoocaque oraniqui iriatimpaquei aparo eereheereatatsica.

³ Iroompaquea icantanaque Jesoshi icoacojiaqueriquea tsatacaantajiguiroca itioncotaqueca Moishishini aisa pariseojia, icantajiguiri:

—¿Cameetsataque ampeantajempari joquijitatsica savincaguiteri qui imagorejantajitaca, arica teeca oncameetsateji?

⁴ Cotanquitsiquea iriatimpajia imajerejanaquequea. Iroompaquea Jesoshi yajiricapojaqueri eereheereatatsica yoveajiriquea, icanqueri iroanaje.

⁵ Iroompaquea icantsijiguiriquea aisa pariseojia:

—¿Arimpaquea aviatimpajia, intanquirejuguete omoroqui pirijanite irioca pigaapironcaarite savincaguiteri qui imagorejantajitaca, arimpa aato paajiajatiri? ¿Arimpate ari poguijajiaquequea anaanajempata imagorejantajitaca ariquea paajiajateriqueate?

† 13:31 Iriratica **Erorishi** irio icantajitica Erorishi Antipashi; pamenero tioncanquitsica isavivanaqui otsapaquei 3.1.

⁶ Manaquea imajerejianaquequea, teequea intserarejimajigueji capichaji.

Iroguipashiventajiqueriquea aventacovaetatsica

⁷ Iroompaquea iriraquea Jesoshi yamenajiaqueriquea maasano icajemajiqueca irishecajiaquempa iroguenti inintamajiaquequea irisavisaviitapojaque quempeji irisenampijapojaquempari cajemajiaquerica, irishineventamajitaquempariniji iranaampojaqueniji. Ariquea itsatacajiaqueriquea icantajiguiri:

⁸ –Incajemaquempigueti iriaqueraca manquigatanquitsica pishecatimoquempargueti irishinevenquempargueti imanquigatantacaca, aatoquea pisavicampojararo irisavicanapojaquempaca anaantatsica. Aricagueti incoraquepojaque itsipapae anaquempica,

⁹ iroompa iriraquea cajemajiaquempica incoraquepojaquegueti incanquempiquea: ‘Iintsija tijaitatsija iricatica.’ Ariquea ovashiventajanaquempiquea, iroompa pintsenterejapanajante pisavicampojararoquea isavicanapinitaca teeca iranaanteji.

¹⁰ Arigueti incajemaquempi, iroguentiquea pisavicampojeempa itiinatapinitagueti teeca iranaanteji, cameetsanijite inquijapojegueti cajemaquempica iramenapojempiquea incantapojempinijite: ‘Notsipavijitaca, caacateja acaniqui pisavicampojeempoquea itiinatantajiacaca anaantatsica.’ Iroompaquea inquemajiaquegueti tsipatsipaitaquempica shitaponcarontsiqiqui intsajianaquequea aviguenti ishineventamajataca cajemaquempica.

¹¹ Iriraquea aventacotatsineca iroguipashiventajiqueriquea. Iriraquea teeca iraventacotempaji iranaacaajitaqueriquea.

¹² Ariquea iquenquetsataji Jesoshi, icanqueriquea cajemaquerica:

–Pintiacaantegueti pisheca pincajemantegueti aatoquea iriguenti pincajemapinique pitsipavijitaca, irioca piguentijeguijate, irioca pijiguetica, irioca ajaarantatsica choocajanquitsica quempeji pitsovironaquitequi. Arigueti pincajemajiaqueri iriatimpajia, inquejetacaajempi incajemaajempiquea aviatimpa pishecatimotajatempariquea iriatimpa.

¹³ Iriompate pincajemajiaque teeca irashintempaji, iriojiaca chompeguijiri, iriguentijiaca teeca iranijimajateji, iriguentijiaca aisa shamponcajari.

¹⁴ Ariquea pishinemajatanauempaquea oavaetanaque, aatotarite yagavejajiguiquea inquejetacaajiajempiquea iriatimpajia, cotanquitsiquea oncoramanitapojajegueti inquejetacaajiaquempiquea Aapani Irioshi intancoretancoretanajegueti irirajia iramenajiaqueca quempeca teeca incovaeguishetimatempaji.

Jesoshi iquejetacaajari cajemantavetatsica irishecatacaajiaquemparime

(Mt. 22.1-10)

¹⁵ Chooca aparo savicanquitsica shitaponcarontsiqiqui irooquea iquemaquerigueti Jesoshi icantaquegueti icantsitanaca:

–Irishinevaetanaquempaquea irirajia shecajianquitsineca ontaniqui imajirontagueti Aapani Irioshi.

¹⁶ Ariquea icantanaque Jesoshi, iquejetacaajiacanari, icanque:*

–Ichooacque shirampari inique incajemantaque, iroompaquea icamantacaantajiaqueri maasano incajemaqueriquea irishecatimojiaquitempari incaramirincavaequequea jmm.

¹⁷ Coajica itiacanquequeate taaca opajitapae isheca, iroompaquea oposatanaquegueti itigaranquitsitariquea yashincaca irishiashiguetiquea incanqueri: ‘Caacateshiatsi, netsanaguetacaquea maasano.’

* **14:16** Jesoshi icamantacoqueri Aapani Irioshi iriquetimajaquea icavintsajamajaveca joriojia itigaranquimovecariquea Irijanite, cotanquitsiquea teequea irishineventajiaquemparijiri iriatimpajia, irioquea ipitsocashijianaca teeca irijorioteji, icavintsajamajatsitariquea.

¹⁸ Cotanquitsiquea maasanoquea icantacantaitanaque: ‘Aato nagaveji noguitsi.’ Aparo icanque: ‘Iroaquerasano narejetapojaja novegaraquitiroquea quepatsi, noanaquequea namenajatero. Pincavintsajacotena, aato picantana.’

¹⁹ Itsipaqueate cantananquitsi: ‘Iroaquerasano narejetapojaja novegaraquitiriquea 10 caapironcaari, noanaquequea namenajateri nontsatimenqueniji arimajaca yagavejiaque inquitencavatsataque. Pincavintsajacotena, aato picantana.’

²⁰ Iiraquea itsipa icanque: ‘Iroaquerasanoitarite nomanquigacaro manquigarentsi, aato nagaveji noguitsi.’

²¹ “Ariquea icoraquetaji yashintajitaca icamantapojajiriquea ashincarica. Icat-simatsitanaca iriatimpa icanque: ‘Iroosacanica poanaquequeate ontaniqui ocapiocaguecaguetei tsovironaqui, pintsitacavaetanaqueroquea maasanopae quenavoquirontsipaequi, pintsipatsipaiquempariquea teeca irashintajiguempa, iriguentijiaca chompeguijiri, iriguentijiaca teeca iranijimajateji, irioca aisa shamponcajari, inco-raquecoraqueique irishecatacojiaquenaquea.’

²² “Osamaniguitevaepojiguetei icoraquetaji yashincaca icantapojiriquea: ‘Jac naajiaquitiriquea, cotanquitsiquea tequerataquea intsitacajiguemparoji shitaponcarontsiqui.’

²³ Icantanaque ashincarica: ‘Iroosacanica pijateja poanaje irooquea pishivoquitantaguetanaquemparoquea quenavoquirontsipaequi tequerataca poantemparoji pamenantaguetapanajantemparija maasano choocajianquitsica oraniqui, pintsipatsipaitanaquemparija incantavaetanaquetaquea tirorerere notsovironaquitequi.

²⁴ Noncamanquempiquea, irirajia iriquetica nocajemacaantaguevetacaca aatoja ishecatimataro ocatica nonetsanavetacanarica.’ ”

*Quericaca aatoca yatsipeventari Jesoshi aato ipeguiritsi itsatacaane
(Mt. 10.37-38)*

²⁵ Iroompaquea ishivoquitanaqueroquea Jesoshi quenavoquirontsi itacororoaventajanacari caquinteja. Iroompaquea ipitsocashijianacariquea icantajiguiri:

²⁶ “Taacaguetei nintanquitsineca impeamajataquempa notsatacaamajare, incantacoguitempaniquea impintsamajataquena anaimentanaqueroniji ipintsajigariguetei irijanintajigarica, irooca imanquigare, irijanijiate, irorijanijiate, irioca iriguentijeguitepae, irooca itsijoitepae. Ariquea onquempetaquempa aisa anaqueroniji ipintsatagueti iriatimpa. Oraqueate aatoguetei iquempetacagaro imaica, aatotarite yagavejitsi impeaquempa quea notsatacaane.

²⁷ Ariquea iquejetacaquea aisa quericaca teeca irininteji irinatanontanaquempa ivoatsite irompajacotantajitaquemparica irantsipeventavaetena irogujatacotantanaquenaca, aatoquea yagavejitsi impeamajataquempa notsatacaane.

²⁸ “Taacaguetei nintanquitsineca impeacaquemparoquea mapipanco inirochoviina, iroquetitaquea inquenquejamajaquero quero incaraquisequitaqueni imentaquitsite intsitacancuemparoniji.

²⁹ Oraquea aatoguetei iroquetitaquea iquenquejirotsi managuetei impeacaashiquemparoquea intati, niganquiquea interoncacopojempaquea, aato itsitaquirotsi, arica irishirontimentajiquempari iramenitsijiqueriguetei manaquea capichajaniqui yogatiaguetaqueroquea.

³⁰ Incantajigue: ‘Iriatimpa ipeacaaguevecaroquea, teequea iragavejeroji interonqueroji.’

³¹ “Ariguetei inchooacque majirontatsica ashintanquitsica 10,000 coareta iroaroaitanaquequea irashimirintavacuempaquea itsipa majirontatsicaqui ashintanquitsica 20,000 igoaretate, ¿arimpate aatoquea iroquetitaquea iquenqueji arica iragavejiaque-riquea, arica aatoca yagavejajitiri? Inquenquejanaquequea.

³² Ariquea iramenanaquegueti aatoquea yagavejiritsi, intigaranquitsitempariquea cantajiajerineca, intonquivojajiavaquempariquea caavijica yanaajiaqueri, iramenajiaqueriquea arica iragavejajiaqueri irivetsinantajiajaveri.

³³ Arimpaqueate oquejetacaquea imaica quericaguete teeca irininteji irovashi-antaguetanaqueroquea maasanopae yashincaca, aatoquea ipeamajataquea notsatacaane.

Queroquea incojiqueroni incachoanepane incachoanetantajitajemparoquea
(Mt. 5.13; Mr. 9.50)

³⁴ “Oraquea incachoanepane cameetsavaeque, cotanquitsiquea arigueteja omasan-
categoete, ¿querocampate incojitajeroni incachoanetantajitajemparo?”

³⁵ Teequea oncameetsateji onconoaquemparogueti quepatsi, aisa teequea on-
cameetsateji pinconoanquemparogueti camishitequi poaviotantaquemparoquea pan-
quirentsi. Manaquea impishoncajitaqueroquea intati. Choocaguete piguempita pin-
quemantavaquempaca, pinquemeja.”

15

Oveja peavetanquitsica
(Mt. 18.12-14)

¹ Iroompaquea icoraquecoraquetashijiaqueriquea Jesoshi maasano capiocapiniijigu-
inirica majirontatsica imentaquipae aisa itsipajia covaeguishejiatsica, iroguentiquea
icoraquecoraquetashijiaque inquemisantajiaqueriquea.

² Iroompaquea yamenajiavaqueriguete pariseojia aisa tsatacaantajiguero itionca-
cotanaqueca Moishishini, ariquee iquenquetsatacoguishejiaqueri Jesoshi, icantajigui:
—Intsija pameneri. ¿Quericaquea icocani irintatica iconoconoipojacariquea cov-
aeguishejiatsica ishecatacojiapojacari?

³ Iroompaquea icantanaque Jesoshi iquempetacaaca icanque:

⁴ “Pameneja aviatimpajia, pashinquempaguete 100 oveja paajianaqueriquea
oraniqui cataromashiqui irishecajiaquempaquea, ariquee impeaquempaguete
aparo, ¿arimpate aatoquea pitsinampirejajianaqueri igonorojia, poanaquequeate
pamenaguetajateriquea, pincantacoguitempani paantajatemparicajate?”

⁵ Ariguete paajateriguete pantsomajanajeri paanajeri pishinevaetanajempaquea os-
hequi.

⁶ Iroompaquea parejetapojajempaguete pitsovironaquitequi pincajemajiapoja-
jeriquea pitsipavijijia irioca irooshitacoguetaquempica pincantajiaqueriquea:
‘Jaameja ashinejiaquempaquea, naajatiritarite novejate peavetanquitsica.’

⁷ Imaicaquea noncantajiaquempi ariquee inquejetempaquea inchoocategoete aparo
covaeguishetanquitsica irovashianterogueti ipeacaaguishevecaca covaeguisherentsi
ariquee incantashitatanajempaquea, irishineventamajajitanaquempariqueate oshe-
qui ontaniqui jenoqui inquitequi, anaavaetanaqueroquea ishineventajiacariguete 99
comajamajianquitsica teeca incoguitejacojajempaji incantashitatijaiguempaji.

Imentaqui peavetanquitsica

⁸ “Nonquempetacaajiaquempiro otsipa. Iroguentica ashinquempaquea aparo
manquigarentsi 10 omentaquitsite* vegaravaetatsica, ariquee impeaquempaguete
aparoshimentaqui ¿arimpate aatompe otsivotiquea tsivorentsi ompishitacotsitajem-
pariqueate oncoamajatajeriquea aajerinijite?”

* **15:8 omentaquitsite.** Iriratica imentaqui ipajita **dracma** (ancanque aatimpa “iraquima”). Iramijiqueriguete
itsipa apajencaro savincagueteri irivegaraqueneri apashimentaqui iroaquima. Irira iraquima iriguente imentaquit-
site guiriego. Iquejevecariquea itsipa imentaqui icantajitica tenario irashi Iromaquitica.

⁹ Arigueti aajerigueti, oncajemajiaqueroqueate otsipavijjiaca irosati irooshitacoguetanquitsica oncantajigueroquea: ‘Jaameja ashinejiguempa, naajiriqueate nomen-taquitsite peavetanquitsica.’

¹⁰ Imaicaquea noncantajiaquempiquea ariquea iquejejiacaquea irashivantijitete Aapani Irioshi ishinejiaca oshequi yamenajiguigueti icantashitatijaiaca aparo cov-aeguishetatsica.”

Peavetanquitsica

¹¹ Iroompaquea icanquequea Jesoshi aisa: “Ichoocatiquea aparo shirampari, chooca irijanite mavite.

¹² Iroompaquea iriraquea ichoviqui icanqueriquea iriri: ‘Aapani, iintsijate pojo-quenarojate imaica maasanopae nashinquempaca naatimpa oncoramanitapojajeguete pimetojanajeguete.’ Iriraquea iriri yojocajiaqueneriquea mavite maasanopae otampat-icaguequerica.

¹³ “Iroompaquea oquempejipojajiguete savincaguiteri iriraquea ichoviqui yaague-tanaqueriquea maasanopae imentaquitsite, yoavaetanaquequea osamani ontaniqui otsipaqui quepatsiqui, ariquea oraniqui ipeacaaguishetapojacaroquea taaca opajitapae, ipomatsaqueriquea imentaquitsite, iteroncamajaqueriquea oraniqui, cajaragui-tenisano yoaqueri.

¹⁴ Ocoajicaguitevaetanaqueguete iteroncamajaqueriguete maasano imentaquitsite, oteronquitsitanacaquea isheca otsitacaguitejanacaroquea oraniqui, querocampaquea irajaeroquea irishecatajempaca, yatsipevaecaroshia itase.

¹⁵ Coajica yoanaquequea yamanapojiri guintenitaroca ocaniqui iramipojeriquea iraaquenijite imentaquitsite. Iriatimpa itigarancaqueriquea inquempoguijaqueneri ichanchotepae.†

¹⁶ Ariqueate itaseaguetapoji icanca iroovetanacaquea irishecatanaquempamequea osagoma yojocajitinerica chancho inquemanaquempanijite teenica onchoocatimateji irojoquimajiteneriji irishecaquempaca.

¹⁷ “Iroompaquea iquenquejitsitanacaroquea icanque: ‘Iriraquea amitirica aapani ishecajiaca icanca, iquemajianaca teequa interoncamajajigueroji. Naatimpa acaniqui imaicashia aanaquena notase.

¹⁸ Iintsija noanajequeate aapaniqui noncampojajeriquea: Aapanii, yamenaque-naquea Aapani Irioshi inquitequitica nopeacaaguishevaecaquea covaeguisherentsi, aisa aviatimpa noguipashivenquempiquea, noteroncamajatanaquequeriquea maasanopae pojocaguevequenaca, nopomatsaqueriquea.

¹⁹ Imaicaquea ooquea aatocaqueate picantajana irijani, manaqueate pinquempeta-caajena amitimpica.’

²⁰ “Iroompaquea yoanajiquea yarejevaepoja itsovironaquitequi iriri. Irooqueate yamenacotsitavajariguete icoraquepojjajiguete ipintsatacotanacariquea oshequi, ishi-ashitanacariquea itonquivojavacari, yaavajiriquea yavitsanoitavajiri inintavorotava-jiri.‡

²¹ Iroompaquea icantanaquequea iriatimpa: ‘Aapanii, yamenaquenaqueate Aapani Irioshi inquitequitica nopeacaaguishevaecaqueate covaeguisherentsi, aisa aviatimpa noguipashivenquempiquea, noteroncamajatanaquequeriquea maasanopae pojocagueve-quenaca, nopomatsaqueriquea. Imaicaquea ooqueate aatocaquea picantajana irijani.’

²² Cotanquitsiquea iriri icantajiguiri irashijia: ‘Poapoitanaquequea paaquite quit-saarentsi caavijica anaaque ocameetsamajataquequea, pinquitsaajiaqueri, aisa pasate-caqueneri maachapaquirentsi ichapaquiqui, aisa pincaviguitijiaqueriquea.

† 15:15 Iriira **chancho** iriguente viratsi quejevetarica santaviri. ‡ 15:20 **inintavorotavajiri**. Yamejiaca joriojia coramani inintavorotavacaajjavaca yamenavacaajiacaguete.

²³ Paajiaquiteja caapironcaari irijanigantirenajaniqui quejitanquitsica, pijitorejitempariquea. ¡Jaame ashecajiaquempaquee ashinejiaquempaquee!

²⁴ Coraquetajitarite irijani, iroaquerasanoquee namenajiri arimegueti irimetojaquemegueti. Ipeamajavetacatarite, imaicaquee imaica amenajajiriquea.' Iroompaquee ishecajiaquee ishinemajajiaquee.

²⁵ "Iiraquee iriquetica ariguenti ichooaque niganquitejiqui. Iroompaquee icoraquevetapojaca iquemajapojiri soncajatsica yoshequiavaeque, aisa itsamarojiaque.

²⁶ Iroompaquee icajemaquee apaaro yashincaca icoacojiaqueriquea icanqueri: '¿Taaquee opaji oraniqui?'

²⁷ Iriatimpa icanqueriquea: 'Iroguenti icoraquetajiquea piguentijeguite. Imaicaquee ijitorejacaanqueriquea piri irijanigantirenajaniqui caapironcaari quejitanquitsica, cameetsatari yarejetaja.'

²⁸ "Ariquea icotanaca icatsimatanaquequee iriatimpa, teequee irininteji inquije tsovironaqui. Irooquee iquemacoquerigueti iriri, isotoanaquequee yoanaque inquenquetsatacaqueriquea inquijapojenijite.

²⁹ Cotanquitsiquea iriatimpa ari icanqueriquea: 'Pameneja, pitsataquequee aviatimpa naatimpa nocantacoguitaniqueate namiguitimpiniquea, teequeate nomperati-motempiji, teequee ari pojoquimatenaji apaaro caavera irijanijaniqui noncajemajiaquerimequee notsipavijijiaca noshecatacaajiaquemparime noshinejiaquempame.

³⁰ Cotanquitsiquea imaicaquee icoraquetajigueti pirijanite teronquitanaquempirica pimentaquitsite ipomatsatacantacaroquee manquigarentsijia cantatsatantaguetatsica, paitsitanacaquee pijitorejacaantsitariquea irijanigantirenajaniqui caapironcaari quejitanquitsica.'

³¹ "Icantsitanacariquee iriri: 'Irijani, aviatimpa ariqueate pichoocaque naatimpaqui. Maasanopae nashintaguecaca iroguenti pashi aviatimpa aisa.

³² Cotanquitsiquea imaica cameetsavaeque ashecajiaquempaquee ashinejiaquempaquee, coraquetajitarite piguentijeguite, iroaqueraqueate nojiqueji ariqueate metojaque, ipeamajavecaquee, imaicaquee imaica coraquetaji amenajajiri.' "

16

Amatavijirica jivatatsica

¹ Iroompaquee Jesoshi icantajiguiri aisa itsatacaaneja: "Ichoocaque apaaro ajaaran-tatsica, chooca itigaranquica amenaguetinirica maasanopae yashintaguecaca. Iroompaquee icamantajiqueriquea ipomatsaguetaqueroqueate yashintaguecaca, opeague-taca.

² Iroompaquee icajemaqueriquea icanqueriquea: '¿Arimajaca pipomatsatsiguenaro? Iintsijate pojoquenarotate pivaperipanate pitioncacoguequerogueti maasanopae, namenerota queroquee picoqueroni, aatotarite pamitacotajanaqueate.'

³ Ariquea iquenquejanaque itigaranquica: '¿Querocaquea noncoquempani imaica? Aatotarite namitacotajiriqueate, ¿querocaquea namitacogajoitajeca? Teetarite nontampishiteji, ¿queroquee noncoquempani noshiacoquegueti? Nopashivencaquee namanapiniquerigueti itsipapae irojocashitapiniquena intati.'

⁴ Iroompaquee incajaranquiniquea icanque: 'Imaicaquee notsaquequee quero-caca noncoquempani cameetsanijite inchoocaquenijite aavajenaneca jocaquenanea nosheca coajica intigarancaquenaguete jivatanaca.'

⁵ Ariquea yoanaque icajemajiaqueriquea aacoquerica jivatirica, aparopaetaquee icajemaque. Iiraquee iriquetica icajemaqueca icanqueriquea: '¿Querocaca icarashequiguini paacoqueri jivatanaca?'

⁶ Yacanaqueriquea iriatimpa, icanque: 'Iriguenti naacoquequee ashiti icarataco-vaee 100 chomoqui.' Iroompaquee icanqueriquea: 'Jero ocatita pivaperipanate

pitioncacotancarica coramanitica paacoquerigueti. Imaica iintsija caacatequetirote taampina pintoncajeroquea acaniqui pincantashitatiejemparoquea ariguentiquea incarataje pojocaje 50.'

⁷ Iroompaquea icajemitsitaquea itsipa iquempetaqueriquea iriatimpa icanqueriquea: '¿Querocaquea ocarashequiavaequeni paacoquerigueti jivatanaca?' Iriatimpa icanque: 'Iroguenti naacoque tirigoitsoqui ocaratacovaeque 1,000 inirojeguiqui cantiriqui.*' Ariquea icanqueriquea: 'Jero ocatica pivaperipanate pitioncacotancaroca coramanitica paacoquerigueti. Imaica iintsijate caacatejate pintoncajeroquea ocatica pincantashitatiejemparoquea oncaratanajequea pojocajeca 800.'

⁸ "Iroompaquea iriraquea jivatirica itsaquegueti iquejetaquerogueti imaica, yame-nanaquequeate intati, icanque: 'Caaviji itsaveca iriraquea amatavijantanquitsica.' Irirajia quepatsiquitica choocajianquitsica imaica itsamajavecaquea querocaca incojiaquerini igonorojia cameetsanijite iragavejacojiaqueronijite taaca inintajiaqueca, yanaajiaqueriquea tsirencacoshirentajianquitsica, teemajaca intsamajajigueroji.

⁹ Cotanquitsiquea imaica naatimpa noncantajiaquempi: inchoocajiaquegueti pash-intaguecaca acaniqui ichoocajiguigueti covaeguishejiatsica pincavintsajajiaqueriquea coguitejacojianquitsica cameetsanijite inquempetacaajiaquempinijite, ariguentiquea pimetojajianaquegueti povashiantaguetanaqueroquea maasanopae pashijia irajaiavajempinijite iriatimpajia ontaniqui jenoqui tsovironaqui qui aatoca oteronquimatataja.

¹⁰ Querocaca quempoguijamajaqueroneca irojocajitenerigueti capichaji, inquejeta-caavajemparoquea aisa irojocajiquenerigueti oshequi, inquempoguijamajatavaqueroquea irinetsanamajaquero inintacaajitaquerica. Iriraquea aatoca iquempoguijamajatiro irojocajivequenemparigueti capichaji irooca iraitsiguetaqueri capichaji, inquejetaquempaquea aisa irinintajivetempagueti inquempoguijaqueneri oshequi, aato iquempoguijamajatirotsi irooca iraitsiguetaqueri.

¹¹ Cotanquitsiquea aatogueti piquempoguijamajatirotsi ajaararonsi choocagueta-sica acaniqui quepatsiqui, ¿arimpa irojocajitaquempiroquea iroomajaca caavijica ana-quero?

¹² Ariquea oquempetacaquea aatogueti piquempoguijamajatsitiri yashintagueta-caca itsipa, irooca paitsiguetaqueri, ¿taashia jocajempirone pashinquempameca avi-atimpa?

¹³ "Tee inchoocateji agavejanquitsineca irantavaetaqueneri mavite ashintaquemparica. Manaquea irisemaneguintaquempari aparo, iriraquea itsipa impintsataquempari, irooca inquemisantamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintagueticas, iroogueta pisavicaventaque pajaarantavaequempa quejetaca irooquea ashintaquempa ajaararonsi."

¹⁴ Iroompaquea irirajia pariseojia choocajianquitsica oraniqui irooquea iquemajia-querigueta Jesoshi, ariquate icohicoitanaca ishishirontimentavaecari, iriguentijiatari nintamajajiguirica imentaquipae.

¹⁵ Icantsijigariquea Jesoshi: "Aviatimpajia aviguentijia peamampeajiatsica netsanamampeajiatsica irishineventajiaquempiniji caquinteja, cotanquitsiquea Aapani Irioshi yamenashirentajiaquempi. Iriatimpa teequea irishineventemparoji ishineventajiacaca caquinteja, manaquea yatsitsiimanatacaro.

Itioncacotanaqueca Moishishini aisa imajirontagueta Aapani Irioshi

¹⁶ "Ochoocaqueu coramaniqui itioncacotanaqueca Moishishini aisa tsavetantajiat-sica, arejevaetacaquea ichoocaquegueta Joancani, ariquea imaica itsavetantajitanaque-roquea Quenquetsatsarentsi Oganejencatatsica quero icotani imajirontagueta Aapani

* **16:7 ocaratacovaeque 1,000 inirojeguiqui cantiriqui.** Iguenquetsatsarequi guiriego icanque **100 korous**, iroguenti ocarataque arica 35,000 ritoro.

Irioshi. Icaramirincavaequequea nintamajjianquitsica iroanaque ichoocaquegueti, itampishiventamajaquero.

¹⁷ Omanavaeca onteronquitsitempagueti quepatsi aisa inquite. Anaamajaquequea ompeguempagueti apaitsoquiro itioncacotanaqueca Moishishini, maasanotari onet-sanamajaquempaquea.

Icanque Jesoshi aatoja quericaca ovashiantimatirotsi imanquigare
(Mt. 19.1-12; Mr. 10.1-12)

¹⁸ “Quericaca ovashianqueroneca imanquigare otsipaquea irimanquigatajem-paquea, manaquea icovaeguisheca. Ariquea iquempetaca manquigatavajemparoneca manquigarentsi yovashiantajitica, manaqueate icoguisheca.

Ajaarrantatsica aisa Irasaro

¹⁹ “Ichoocaque aparo ajaarrantatsica iquitsaamajataroqueea quitsaarentsi aramam-poaro ogameetsareni ocanca. Icantacoguitaniqua savincaguitariqui ishecamajata-caquea taaca opajitapae, teequea taaca opaji incoguitejacotempaji.

²⁰ Ichooaque aisa aparo teeca irashintempaji, ipajita Irasaro.† Iroguentini ishi-moiriquire teetarite capichaji. Yamajiqueriquea yojoquijiqueri quepatsiqui soto-morontsiqui sotsiqui itsovironaquitequi ajaarrantatsica.

²¹ Yatsipevaecaroquee itase, inintavecaquee iroguijavaqueromequeate otsopequi-janiqui ontanquirejaguetapaje shitaponcarontsiqui ishecatacagueti ajaarrantatsica, irishecaquemparo. Icoraquecoraqueitashiqueri shiishi yaneronevaequeriquea ishi-moiriquitaquegueti.

²² “Iroompaquee imetojanaque Irasaro, iriraquee irashivantijitete Aapani Irioshi yaajianajiriquea ichoocaquegueti Averaameni. Ocoramanivaetapojajigueti imetojana-jiquea ajaarrantatsica, iquitajitajiriquea.

²³ Yatsipevaetacaquee oshequi ontaniqui Areshiqui. Iroompaquee yamenacota-jiriquea Averaameni osamani itsipatajariquea Irasaro.

²⁴ Icajemacotsitariquea icanqueriquea: ‘Aapanii Averaameni, pimpintsatacogajoite-nashiatsi, pintigaranqueriquea Irasaro irorencachapaquitapanajantemparoquea ojaaquiniqui, incoraqueque intsincapojenaquee nonenequi, natsipevaecaquee acaniqui paamariqui.’

²⁵ “Cotanquitsiquea Averaame icanqueriquea: ‘Irijani, pinquenquejajeroja cora-maniqui tequerataguete pimetoje, aviatimpa pishinevaeca oraniqui, teequea taaca opaji pincoguitejacotempaji. Iriraquee Irasaro yatsipevaeca icanca. Imaicaquee imaica irioqueate shinevaetajatsinequee ocaniqui, aviatimpaquee pantsipeguitem-paniquea.

²⁶ Aisa oquichatencanajavaecaqueate ontaniqui aviatimpaqui, taampaqueate agave-janquitsineca iroanaquequeate oraniqui. Ariquee iquempejiga choocajianquitsica oraniqui aatoquee yagavejajiga incoraqueaquequeate acaniqui, ¿querocaquea inquenaquenaiqueni?’

²⁷ “Yaquitsitanacaquee aisa ajaarrantatsica icanqueriquea: ‘Iroosacanea imaica non-inque pintigarancaqueriquea Irasaro itsovironaquitequi aapani.

²⁸ Choocajatarite ontaniqui 5 iguentijeguijia. Intsatacajaiapojaqueriquea aatonijite icoraquecoraqueitiquea iriatimpajia aisa acaniqui irantsipevaequempaquea.’

²⁹ Icanqueriquea Averaameni: ‘Choocatarite itioncacotanaqueca Moishishini aisa tsavetantajatsica, irooquea irampatsajavantajiaque inquemisantajiaque.’

³⁰ Yaquitsitanajaqueate iriatimpa icanqueriquea: ‘Aato, aapani Averaame, cotanquitsiquea ariguete iroque metojatsica intsatacajiaqueri, ariquee incantashitajiaianaque-mpaquea.’

† 16:20 Irica **Irasaro**, tee irio ivochantajica Jesoshi, iriguentei itsipa coramanitica.

³¹ Cotanquitsiquea Averaameni icanque: ‘Aatogueti inintitsi irinetsanatahitemparo itioncacotanaqueca Moishishini aisa tsavetantajiatsica, ari inquejetacaavaquempari arigueti impochatimoteri metojatsica, aatotarite iquemisantiri.’ ”

17

Caaviji incatsimamajajiqueriquea covaeguishetacaantanquitsineca
(Mt. 18.6-7, 21-22; Mr. 9.42)

¹ Iroompaquea icantajiguiri Jesoshi itsatacaanejia: “Ococaniquea onchoocaguiteni covaeguishetacaajiaquemparineca caquintejia, cotanquitsiquea jimaicashiatsi irantsipevaequempaquea quericaca covaeguishetacaquemparineca itsipa, caaviji incatsimamajajiqueru!

² Quericaca covaeguishetacaquemparineca aparo chaajaniquiri quejejiacarica iricajia, incatsimamajajiqueriquea oshequi. Iroquetitamequea intsatotacojiquenerimequea itsanoqui shimentapiri itononcantajitaca iroompaquea irajaitanaqueriquea impishoncajajiqueru inirojani quentijaniqui.

³ Inchiquiojitajate aviatimpajia.

“Arigueti impeacaaguishetaquempa pignonoro taaca opajitapae, pincantomajajit-sitempari. Inquemisantaquempigueti irovashiantaquerogueti ipeacaaguishetacaca pimpeacotajemparoja maasanopae, aatoquea piquenquejacaajiritsi.

⁴ Irooca aparo savincaguiteri querocagueti incoquempini irampijipijivetaquem-piquea oshequi ooqueate, ooqueate, ooqueate, cotanquitsiquea inquenquejana-jerogueti incantajempigueti: ‘Ariquea nococani naatimpa, imaica aatoquea noquem-petimatajirotsi aisa’, iroosacanca aviatimpa pimpeacotajemparoja maasanopae, aato-quea piquenquejacaajiritsi.”

Iraventamajajitemparigueti Aapani Irioshi iragavejajiquero maasanopae

⁵ Irirajia itigarancanejia icantajiguiri Amajirote:

—Notsajavecaquea yagavejamajati Aapani Irioshi cotanquitsiquea imaica nonintaji-aquequea pitsatacaamajajiaquena naventamajatantajianaquemparica.

⁶ Yacanaquequea iriatimpa icantajiguiri:

—Arigueti pavenquitiguemparo capichaji iragavejane Aapani Irioshi, ariquea pagavejajiaquequea pincantaquitigueroquea ocatica inchato: ‘Intisijate pintsopajanaquempaja, poanaquequea pincatijatapojaque inirojaniqui quentijani’, pagavejajiaqueroqueate oanaquequea.

Quero incoquempiani yashintajitaca

⁷ “Pameneja aviatimpajia, inchoocateguete aparo pashincaca iriaquerasanoquea arejetapojajatsi ishiacoguitini piniganquitejirequi, irooca iquempoguijaquempiriquea pigaapironcaarite, ¿arimpate paavajeriquea pincantavajeri: ‘Caacatequetija, pisavi-capojaje acaniqui pishecatapojajempaquea’? Aatoshinete.

⁸ Manaqueate pincantajavajeriquea: ‘Pintiapojajenaja nosheca, pinetsanaquempaja pojocacotsitenaroquea, noshecatavaquempa, nomiravaque. Coajica nonteroncana-queroguete, ariquea pishecatsitajempaquea aviatimpa, pimiravajequea.’

⁹ Iroompaquea pinteroncanejieroguete ¿arimpate pincanqueru: ‘¡Ooshia! Noshinevae-caquea namenaquempiguete pinetsanaqueroquea nocanquempica’? Aatotarite pican-tiritsi.

¹⁰ Aviatimpajia pinquempejiaquempaquea, pinetsanamajajiaqueroguete maasano icantajiaquempica Aapani Irioshi, manaquea pincantajiaque: ‘Naroguentijia yashinta-jitaca, teequea onchoocatimateji naventacojiaquempameca, manaquea nonetsanajia-queru intati inintacaajiaquenaca ashinquenaca.’ ”

Jesoshi ipeaguetajiriquea 10 avejancaripae

11 Iroompaquea yoanaquequea Jesoshi Jerosarequi, yoantanacaroquea ocaraguetapojigueti Samaria aisa Garirea.

12 Ariquea yarejetapojacaroquea ichoocajiguigueti itsipapae, itonquivojajiavacari avejancaguetatsica icarataque 10, cotanquitsiquea teequeate inquempejiquempeji-itempariji manaqueate ichoocajiaque tiijai.

13 Icajemajianaquequea:

—¡Jesoshii, Tsatacaantantsica, pimpintsatacogajoitenashiatsi!

14 Iquemajiaqueriguetiquea Jesoshi icantajigui:

—Poapoaitanaquequea ponigaajiguempariquea saserrotejia.

Yoayoaitanaquequea, ariquea tequeratatiraja incajaraquiguiteteji ariquea ico-hicoitanaca ipeaguetanajaquea.

15 Iroompaquea ichoocaque aparo yamenaquegueti ipeanajaqueate, icoraquetajiquea ishinevempojacariquea Aapani Irioshi inirojencaqueate icanca, icanque:

—Caaviji yagavejamajatiquea Aapani Irioshi.

16 Iguerovempojacariquea Jesoshi itaquivopojacaquea quepatsiqui yonigaantantacaca arimajaca ishineventamajatacari. Icanqueri:

—Arioteesaa —yamenajitarite yovejairi.

Iriatimpa iriguenti Samariaquitica.

17 Icanque Jesoshi:

—¿Arimpate teequea maasano impejaiguempaji carajianquitsica 10? Jeroquea aparo coraquetajatsi. ¿Quericampate itsipajia 9 imaica?

18 Iricaticaquea iricatica iriguenti teeca irioquea jorio coraquetajatsica ishineventavaetapojacari Aapani Irioshi. ¿Arimpate aparo ichoocaque iriatimpa?

19 Iroompaquea ipitsocashitanacariquea iriatimpa icanqueriquea:

—Pincatiana je poanaje. Pavempojana naatimpa, pitsaquetari nagavejaque nompe-jaempi, jeroqueate pipeantanajaca.

Jac imajirontaca Aapani Irioshi

(Mt. 24.23-28, 36-41)

20 Iriraquea pariseojia icoacojiaqueriquea Jesoshi icantiriquea:

—¿Querocaqueate impariantanaquemparoca Aapani Irioshi incapiocantajiajajica im-peaquempaquate Amajiromajate acaniqui quepatsiqui?

Icanque iriatimpa:

—Aatoquea quericaca amenimatiroca imaica, teetarite iramenajiteroji.

21 Aisa aatoquea quericaca agavejatsineca incanque: ‘Jeroquea ocatita’, irooca incanque: ‘Jero ontatica.’ Jac imajirontacatarite Aapani Irioshi imaica aviatimpajiaqui.

22 Ariquea icantiriquea itsatacaanejia:

—Aapojempaquea pinintantajavetaquempaca pinejerome apajencaro savincaguiteri ironigaimojiaquempimeca Irijanite Caquinte, cotanquitsiquea aato pinejiro.

23 Inchoocatanaquequea cantanquitsineca: ‘Jeri ocaniqui’, irooca incanque: ‘Jeri ontaniqui’, cotanquitsiquea aatoquea poapoaititsi. Incantajavetaquempiquea: ‘Jameshiatsi’, aatoquea poguijatiritsi.

24 Pamenajiguiroquea careti querocaquea ocoani otimequigueti, teequea capichajaniqui otimecaguiteteji, maasanoquea otimecaguitevaetanaqueroqueate. Ariquea inquempetaquempaquea Irijanite Caquinte incoraquetajegueti, maasanoquea iramenamenaitavajeriquea.

25 Cotanquitsiquea iroquetitaquea irantsipevaequemparoquea taaca opajita, incatsimajitaqueriquea incantajiquequeate: ‘Teetarite irioquea agamajiavetacaca.’

26 “Ariquate incoraquetajegueti irira Irijanite Caquinte onquempetajemparoquea ichoocavetanigueti Noeni.

²⁷ Ariquea iriatimpajia manaquea ishecajiaca, imirajiaca, imanquigajiaca, aisa yojocantajiaqueroquea irorijanijiate imanquigajitacaroquea, teequea intsatimajigueji irooshipoji interoncajiaquempauea. Ariquea niganqui aapojacaquea savincaguiteri iquijantanacaca Noeni intsompoguiqui quenajarontsiqui, iroompaquea otejanaquequeate incani, amaranaquequea, anaacoguetanaqueriqueate maasanopae, iteroncajiaca yojocajajiaca.

²⁸ “Ariquea oquejetaca aisa ichoocavetaniguetei Iroteni. Ariquea iquempejiacaquea iriatimpajia ishecajiaca imirajiaca, ivegarajiaquequea yojocantaguetaquequea, ivintyacajiaque, aisa ipeacaajiacaquea tsovironaquipae.

²⁹ Cotanquitsiquea aapojacaguetiquea savincaguiteri isotoantanacaroca Iroteni Soromaqui, yasacaraashiqueriquea Aapani Irioshi paamari oconoacaroquea asopiri oquenapojiquea jenoqui inquitequi, otsiajiaqueriquea maasano Soromaquitica, oteroncamaajiaqueriquea, teetarite inchoocatimajiaje aparo.

³⁰ “Ariqueate onquempetajempauea ironigaantapojajempagueti Irijanite Caquinte.

³¹ Oratica savincaguiteri quericaca choocatanquitsineca sotsiqui omencotapojacagueti itsovironaquitequi ovancaitoqui, choocagueti yashintaguecaca intsompogui, aatoquea yaguijitapanajanti iraguepanjantero.

³² Pinquenquejajiajerojate imanquigare Iroteni aatonijite piquempejigarotsi iroatimpa.

³³ Quericaca teeca irininteji irantsipevenquenaquea irooca irimetojavenquenaquea, manaquea impeaquempa; cotanquitsiquea iriraquea atsipevenquenanea irooca irimetojavenquenaquea, irioquea iriguenti incoquempaniquea inchoocaguiteni.

³⁴ “Imaicaquea noncantajiaquempi: oraquea noncoraquepojjegueti intsipatavacaquempa mavite irinorijajiaquempa, aparo irajaitanaque, iriraquea itsipa irojocajitanaqueri.

³⁵ Ariquea onquempejiaquempauea mavite manquigarentsi ontsipatavacaquempa ontsinacaguijiaque, aparo irajaitanaque, oraquea otsipa irojocajitanaquero.

³⁶ Ariquea inquempejiaquempauea aisa mavite shirampari intsipatavacaquempa niganquitejiqui, aparo irajaitanaque, iriraquea itsipa irojocajitanaqueri.”

³⁷ Iquemajiavaqueriguetei icanqueca icoacojiaqueri icantiriquea:

—Nomajirote, ¿querocaquea onchoocaqueni?

Icantiriquea iriatimpa:

—Querocagueti irojoquijiquempani metojatsica, aritaque oraniqui intirorencashijiapojempari sheetyaoni.*

18

Metojacoro aisa joese

¹ Iriraquea Jesoshi ininque intsatacaajiaqueriquea iramanajiaqueri Aapani Irioshi incantacoguitempaniquea aato ipega. Iquejetacaajiacanariquea.

² Icanque: “Ichoocaque aparo jivatatsica joese teeca intsaroacaguempariji Aapani Irioshi, aisa teeca impintsatacotempariji caquinte.

³ Ariquea ochoocaque aisa oraniqui aparo metojacoro. Iroatimpa ocantacoguitaniqua oashipiniqueri jivatatsica ocanqueriquea: ‘Pompetacotenashiatsi, chooca catsimatashitaquenaca.’

⁴ Iroaqueraguetei teetarite irinintavetempaji inquemisantero, cotanquitsiquea coajica iquenquejapojiroquea icanque: “Teetarite nontsaroacaavetempariji Aapani Irioshi aisa teequea nompintsatacotempariji caquinte,

* **17:37** Quejetaca yamenajiaqueri sheetyaoni intirorencashijiapojempari metojatsica, ariquea onquempetaquempa incoraquepojjegueti Quirishito, aato isenacapoja, maasanoquea iramenajiajaveri. Pamenero Mt. 24.28.

⁵ cotanquitsiquea ococaniqueate ocoraquetashiquenaquea asereavaequena. Imaicaquea imaica nonquemisanqueroqueate nompetanaquemparo aatonijite asereajanatsi, nocatsimatirotsi.’ ”

⁶ Iroompaquea icanque Amajirote: “Pinquemero icanqueca jivatatsica teeca in-cameetsateji.

⁷ Iriompaquea Aapani Irioshi caaviji irompejiaquempariquea icoguiajiaquea amanajiguirica cantacoguitatsica. ¿Arimpate aatoquea yamitacojiguiriquea? ¿Arimpate incantapiniqueri: ‘Aatota’?

⁸ Noncanquempiquea irompetsitempariquea taampina. Cotanquitsiquea oraquea incoraquepojjagueti irira Irijanite Caquinte, ¿ari iramenajipojjajeri acaniqui quepat-siqui tsaromentamajajigarica?”

Pariseo aisa capiocapinitinirica majirontatsica imentaquipae

⁹ Iroompaquea Jesoshi iquempetacaajiacariquea irirajia aventacotatsica amenajiavetanquitsica yanaajiaqueri igonorojia itsaromentajiacarigueti Aapani Irioshi, icanque:

¹⁰ “Mavite shirampari yoayoaitanaquequea teemporoqui itsaromentantajitarica Aapani Irioshi iramanajiaqueriquea. Aparo iriguenti pariseo, iriraquea itsipa iriguenti capiocapinitinirica majirontatsica imentaquipae.

¹¹ Iriraquea pariseo icatiapojacaqueate yamanamampeacariquea Aapani Irioshi icanque: ‘Irioshimajaca, noshineventamajataquempiquea oshequi, pagavejacaque-naqueate, teetarite nonquejetempariji itsipapae, ipeacaaguishetacaqueate taaca opajitapae covaeguisherentsi, iconoacaqueate yaitsitantaguequeate, itsipa icantatsat-acotantaque manquigarentsiqui. Teequeate nonquempejiguempariji irintatica capiocapinitinirica majirontatsica imentaquipae.

¹² Nocantacoguitani aapojajagueti 3 savincaguiteri nosanticotaquiti teequea noshe-catempaji nonquenquejamajaquempiniji. Aisa nojocagaranquempiquea taaca opajitapae nashincaca iroaquerapaetica. Naaquegueti 10, nojocajempi aparo.’

¹³ “Cotanquitsiquea iriraquea capiocapinitinirica majirontatsica imentaquipae icatiapojaca oraniqui irooshipojigueti sotomorontsi. Ipashivenca, teequea iramenimateji jenoqui inquitequi, ariguentiquea itinquitinquineguintanaca yonigaantantacaca ishi-mampojancavaeca, icanque: ‘Irioshimajaca, pimpintsatacotenashiatsi, naroguentiquea covaeguisheratsica!’

¹⁴ “Imaicaquea noncamantajiaquempi iriraquea capiocapinitinirica majirontatsica imentaquipae irioquea iriguenti ishinevenca Aapani Irioshi, ariquea yoanajigueti itso-vironaquitequi meshiacaquea. Cotanquitsiquea iriraquea pariseo teetari irishetener-iji, maasanotari aventacotatsica iroguipashivenqueriqueate Aapani Irioshi onco-ramanivaetapojagueti. Maasanoquea teeca iraventacotempaji caaviji iranaacaa-jeriqueate Aapani Irioshi oncoramanitapojagueti.”

Jesoshi yamanacoventajiaqueriquea chaajaniquiripae

(Mt. 19.13-15; Mr. 10.13-16)

¹⁵ Iroompaquea icoraquecoraqueitaquequea itsipapae yamajipojiniriquea Jesoshi chaajaniquiripae impamijiavaqueriniji. Iriraquea itsatacaanejia yamenajiavaque-rigueti yamajipojirigueti icantomajavaqueriquea.

¹⁶ Cotanquitsiquea Jesoshi icajemajiaqueri chaajaniquiripae, icanque:

—Ariotaquetsija incoraquetetate chaajaniquiripae naatimpaqui, aatoquea pojo-caavaca, ishineventajiacaritarite Aapani inquitequitica irimajirontacotaquempari quenquejajiatsica quempecarica iriatimpajia.*

* **18:16** Irirajia chaajaniquitanquitsica tee iraventacojiguempaji, mana ishineventajipojjajari Jesoshi, iquemisan-tajiaqueri. Ari anquempejiaquempaquea aatimpa.

¹⁷ Iroomajaca noncantajiaquempica: quericaca nintanquitsineca impejaeri Aapani Irioshi Imajirote inquempetajempariquea chaajaniquitirajaca. Oraquea aatogueti iquempetaritsi, aatotarite iconoapojajari maasano peajiaquerica Imajirote.

Ajaarantavaetatsica

(Mt. 19.16-30; Mr. 10.17-31)

¹⁸ Iroompaquea icoraquepoji aparo majirontatsica icanqueriquea Jesoshi:

—Tsatacaantantatsica cameetsari, ¿queroquea noncoquempani cameetsanijite nonco-
guitempaninijite nonchoocaguiteni?

¹⁹ Icanqueri Jesoshi:

—¿Queroquea ococani picantantaquenaca ‘cameetsari’? Teequea inchoocateji cameet-
sari, aparo icoca Aapani Irioshi.

²⁰ Pitsaqueroqueate maasanopae itioncacotanaqueca Moishishini, ocanque: ‘Aatoja
poashitirotsi manquigarentsi, aatoja pimetojantitsi, aatoja paitsitantitsi, aatoja pitso-
jeacotantimatatsi, pinquenquejacameetsatacotaquerija piri aisa piniro.’

²¹ Iriatimpa icanqueri:

—Arimajaca noquempetacaquea imaica noparianacaro nonetsanamajatanaquero-
quea maasano nochaajaniquipojigueti narejevaecaro imaica.

²² Iquemaqueguetiquea Jesoshi icanqueriquea:

—Imaica apanivani poanaquequea pojocantaguetanaqueroquea maasanopae pash-
intaguecaca, paantaquemparoquea imentaquipae pojocajianaqueneri coguitejacojian-
quitsica, pinquejetaquerogueti onchoocataje oganejencaro shinetacajaempineca on-
taniqui inquitequi. Ariquea pincoraquetajeja poguijatanaquea.

²³ Cotanquitsiquea iquemitsitaquea icanquerica ariquee icotanaca ishimampan-
cavaetanacaquea, iriguentitari ajaarantavaetatsica.

²⁴ Iriiraquea Jesoshi yamenavaquerigueti ishimampancanacagueti icanque:

—¡Omanapitsamajataquempariquea ajaarantavaetatsica inquijanaque imajirontagueti
Aapani Irioshi!

²⁵ ¿Arimpate iragavejaque cameyo inquijanaquequea itepoquiqui quisaatonquiri
irisotoanaqueriquea antaqueronta? Aatotarite yagavejitsi. Iriompaquea ajaaran-
tavaetatsica caaviji anaquero omanapitsataquempari inquijanaque imajirontagueti
Aapani Irioshi.

²⁶ Ariquee irirajia quemajiaquerica icantajigui:

—Iroosacanic, ¿quericampate agavejanquitsineca iraacotacaantavaquempa?

²⁷ Iriiraquea Jesoshi icantiriquea:

—Oraquea teeca iragavejeji caquinte, iriraquea Aapani Irioshi yagavejaqueroquea.

²⁸ Iroompaquea icantanaque Peerero:

—Nomajirote, naatimpajia novashiantaguetanaqueroquea maasanopae
nashintaguecaca noguijaguijaitanaquempi.

²⁹ Icanque Jesoshi:

—Iroomajaca noncantajiaquempica, quericaca jocanaqueroneca itsovironaquite,
irooca imanquigare, irioca iriguentijeguitepae, itsijoitepae, iriri, iriniro, irioca irijaniji-
ate, irorijanijiate, cameetsanijite irimajirontamajaquempari Aapani Irioshi,

³⁰ ariquee irojocajiqueneriquea otsipapae acaniqui quepatsiqui, caaviji anaavae-
tanaquero yashintavecaca, ariquee oncoramanitapojajeguete incoguitempaniquea
iranijaguiteni.

Jesoshi icamantajajiri aisa irimetojaque

(Mt. 20.17-19; Mr. 10.32-34)

³¹ Iroompaquea icajemajiaqueriquea iriatimpaqui itsatacaanejia carajianquitsica
12, icantiriquea: “Imaicaquea oajianaque Jerosarequi, onetsanaguetanaquempa

maasanopae itioncacotaqueca tsavetantajatsica coramaniqui itioncacojiaquerigueti Irijanite Caquinte.

³² Iraacaantajiqueri irajaitanaqueriquea ichoocajiaquegueti teeca irijorijoigueji, irantanaguishevaequeriquea, incantaguishejiaqueri, inquishoquishoavaequeri.

³³ Iroompaquea impasapasajiaqueri agompiaquitempari ariquea irimetojajiaqueri, cotanquitsiquea aapojajempagueti 3 savincaguiteri intancorejanaje.”

³⁴ Cotanquitsiquea iriatimpajia teequea intsatimajigueji taaca opaji icantacotaque, teetarite inquemajigueriji. Queroquea incojiaquempani intsatantajiaquempana, omanapitsajiacaritari.

Jesoshi yamenacajairi shamponcajatatsica choocatatsica Jericoqui

(Mt. 20.29-34; Mr. 10.46-52)

³⁵ Irooshipojaji irarejetajemparoquea Jesoshi Jericoqui, chooca shamponcajari isavicaque ocaravoquitaquegueti yamanantaguetaque imentaquipae.

³⁶ Iquemajivaquerigueti yavisavisaitanaquegueti oshequini caquinteja icoacotsitariquea, icanque:

—¿Taaqueate opajita?

³⁷ Icamantsijitariquea icantajiqueri iriguenti coraquetapojatsi Jesoshi Nasarequitica.

³⁸ Icajemitsimajatanaca:

—¡Jesoshii, Ichoviquitanaqueca Taavini, pimpintsatacotenashiatsi!

³⁹ Irirajia jivajivaitapojirica Jesoshi icantavetariquea irisanticotanaquenijite, cotanquitsiquea iriatimpa arimpaqueate icajemitsimajatanacaquea:

—¡Jesoshii, Ichoviquitanaqueca Taavini, pimpintsatacotenashiatsi!

⁴⁰ Iriraquea Jesoshi ariquea icatiapojaca icanque iramajiqueriquea. Iroompaquea yamajiqueriquea quempeji, icanqueriquea:

⁴¹ —¿Taaquea pininque?

Icantanaquequea iriatimpa:

—Nomajirote, noninque namenanaeje.

⁴² Icanqueriquea Jesoshi:

—¡Intsija pamenanaeja! Pitsaquequeate nagavejaque namenacaajempi, paventantaquenaca, irootaquequea pamentanajaca.

⁴³ Irooqueate icantaquitiguiari ariquea icotanaja yamenanaji, ariquea yoanajiquea yoguijatanakeri, ishineventavaetanacariquea Aapani Irioshi oshequi, icanque:

—Caaviji yoganejencamajata Aapani Irioshi.

Ariquea iquempejianaca maasano amenamenaitavaquerica ishineventajanacariquea Aapani Irioshi.

19

Jesoshi aisa Saqueo

¹ Iroompaquea yarejetapojaca Jesoshi Jericoqui icantanacaroquea ocapiocagueti tsovironaquipae.

² Ariquea ichoocataque oraniqui aparó ajaarantatsica ipajitaquea Saqueo. Iriguenti jivajiguirica capiocapinijiguirica majirontatsica imentaquipae.

³ Iriatimpa iquemacoquerigueti Jesoshi ininquequea iramenaqueri, cotanquitsiquea querocampate incoquempani iramenaquerigueti, yomporoguijaventavaetanacariqueate itsipapae igonorojia yojocajiaqueriquea, iriguentitarite chaamorintejaniqui.

⁴ Ishiitsitanacaquea tiijacoñaji oraniqui querocagueti iroanaqueniquea Jesoshi, yataitsitanacaquea inchatogui cameetsanijite iramenavaquerinijite.

⁵ Iroompaquea yarejetapojacarogueti Jesoshi ichoocaquegueti ipivancajanacaquea jenoqui, icanqueriquea:

—Saqueo, paguijita pojequea. Aviguentiquea nomaimoque.

⁶ Isoaanquitsipojacaquea ishinetanaca itsipatanacariquea Jesoshi itsovironaquitequi.

⁷ Yamenajivaquerigueti maasano yoanaquegueti icantimanajianaqueriquea icantavacaajianacaquea:

—Querocaqueate icocani Jesoshi icantanacaquea irimaacotapojaqueriquea itsovironaquitequi covaeguishetatsica.

⁸ Oraqueate ichoocajiaquegueti itsovironaquitequi icatiitsitanacaquea Saqueo icanqueriquea Amajirote:

—Iintsija pamene, Nomajirote. Maasanopae nashintaguecaca naatimpa nojocagarantajiaqueriquea teeca irashintajiguempaji, nojocavajeneriquea niganqui. Quericaca ivegaracagueti imentaqui namatavijaquerica itsipa, imaicaquea imaica nojocajeneriquea, cotanquitsiquea nanaacaantajempariquea nojocajajeneriquea. Ivegaracagueti aparo imentaqui namatavijaquerica, nojocajeneriquea oshequi 4. Ivegaracagueti 10, nojocajeneriquea 40.

⁹ Iiraquea Jesoshi icanqueriquea:

—Imaicaquea imeshiajitiriquea choocatantajigaroca ocانىqui tsovironaqui, irooriji iquempetanajari Averaameni choviquitanaquerica, ariquea iquempetajariquea iriatimpa itsarovertarigueti Aapani Irioshi.

¹⁰ Irootaquequea icoraquetantacaca Irijanite Caquinte, iramenaguetajateri peajiaventanquitsica irajiajateri.

Jesoshi iquempetacaacari caquinte ashintajiacarica caraquisequitirica imentaqui (Mt. 25.14-30)

¹¹ Iiraquea omporoguijavencarica Jesoshi iquemisantajiaqueriquea iquenquetsatacaquerigueti Saqueo, itsajiaquetarite irooshipoji irarejepojaquempa Jerosarequi, iquenquejajiaquequea ijiqueji irooquea yoashitanaque impeaquempaquate imajirojiate, ijijiaqueji irooshipoji irimajirontapojempa Aapani Irioshi ocانىqui quepatsiqui. Cotanquitsiquea iriatimpa irooriji itsaque, ariquea iquejetacaaca,

¹² icanque: “Ichoocaque aparo anaantatsica, ariquea iroavaetanaquequea osamani ontانىqui otsipaqi quepatsiqui ichoocatigueti majirontamajatatsica cameetsanijite impeacaavajemparinijite irimajirontacaavajempari, aapojajempagueti incoraqueataje ichoocatigueti ari irimajirontapojempa.

¹³ Irootapojigueti iroanaque, icajemajiaqueriquea 10 iromperarepae yashintajiacaca, yojocajianaqueriquea maasano apashimentaqui icantajitica mina,* icantajiaqueriquea: ‘Jeri iricatica imentaqui nojocajianaquempica poganencajerija, inchiquiojitarite pamenajiaquequea aviatimpajia querocaca pincojiaquerini paantajajempariquea itsipa, ariquea noncoraquepojajegueti namenajipojajempiquea querocaca incarashequianaqueniquea paajiajeca.’

¹⁴ Cotanquitsiquea iriraquea igonorojia teequeate irinintajigueriji, isemajiacari, itigarancajiaqueriquea itsipajia incamantajiaquiteri peacaajiaquemparineca majirontatsineca, incanqueriquea: ‘Teetarite nonintajigueji impeaquempaquate irira nomajirojiate.’

¹⁵ “Cotanquitsiquea arimpaquate ipecaajicariquea majirontatsica, iroompaquea icoraquetaji ichoocatigueti. Ariquea yarejetapojaja icajemajipojajiri irashijia yojoquimojianaqueneca imentaquitsite iramenapojajeriquea querocaca icarashequianaqueni yaajiaqueca itsipapae.

* **19:13** Apashimentaqui *mina* ivegaravaeque coramani. Iramijiquerigueti itsipa maasano savincaguiteriqui arejevaetempaquea 3 taai, ariquea irivegaraqueriquea apashimentaqui mina. Apashimentaqui mina iquejetacariquea 100 iraquima. Iramijiquerigueti itsipa apajencaro savincaguiteri, irivegaraqueneri apashimentaqui iraquima.

¹⁶ Ariquea icoraquepojiqnea aparo icanqueriquea: ‘Nomajirote, iriraquea pimentaquitsite pojocanaquenaca apamentaquitiro mina icaraveca, imaica naaji itsipapae, icaravaeque 10 naajica.’

¹⁷ Icanqueriquea iriatimpa: ‘Cameetsavaequequea, nomperare, pinetsanaqueroquea ocatica capichaji nocantanaquempica. Imaicaquea nompeacaaquempija imajirojiate choocajiatsica 10 guinteninintsipaequi.’

¹⁸ Ariquea icoraquepojiqnea itsipa icantapojaqueri: ‘Nomajirote, iriraquea pimentaquitsite pojocanaquenaca apamentaquitiro mina icaraveca, imaicaquea naaji itsipapae, icaravaeque 5 naajica.’

¹⁹ Ariquea iquejetaqueriquea iriatimpa icanqueri: ‘Imaicaquea aviatimpa nompeacaaquempija imajirojiate choocajiatsica 5 guinteninintsipaequi.’

²⁰ “Cotanquitsiquea itsipa icoraquevetapojaca icantapojaqueri: ‘Nomajirote, jeri iricatica pimentaquitsite. Nampiguiricacotsitajimpiriquea paañoqui noquempoguijajiri.

²¹ Notsarocaaquempitarite namenimpiquea aviguenti catsimatantatsica, paashigecariquea imentaquipae intati teequea taaca opajita panteji, aisa paitsitantagueque teeca pashinquempaji.’

²² Icantanaquequea iriatimpa: ‘Aviroveca amitacovetanaca, cotanquitsi tee pincameetsateji. Inchiquiojiqnea piquempetacaanca aviatimpa piquenquetsataquegueti imaica.

²³ Queroquea ococani teequea paanaqueriquea nomentaquitsite pojocaquenerime vegaratantatsica iraantajemparinijite itsipapae, iroompaquea pojocavajenarimequeate nocoraquevetajaguete imaica. Irooqnea pamenanaguete naroguenti catsimatantatsica, naashigecariqueate imentaquipae intati teequea taaca opajita nanteji, aisa naitsitantagueque teeca nashintempaji.’

²⁴ Iroompaquea icantajigui choocajianquitsica oraniqui: ‘Paapitsateriquetiro iricatica nomentaquitsite pojocajigueneriquea oganencajirica 10.’

²⁵ Cotanquitsiquea iriatimpajia icantiriquea: ‘Nomajirote choocatarite irashi 10.’

²⁶ Yacanaquequeate iriatimpa icanque: ‘Noncanquempiquea quericaca aamajatanquitsica, caaviji irojocamajajitaqueneri, cotanquitsiquea iriraquea teeca irashintempajiquea, capichajaniquiquea yashincaca iracaitsijiquempariqueate.

²⁷ Imaicaquea imaica irirajia catsimajiaquenaca teeca irinintajigueti nompeaquempaquea imajirojiate, pamajiaqueriquea ocantiqui pimetojajiaqueri.’ ”

Yarejetapojacaroquea Jesoshi Jerosarequi

(Mt. 21.1-11; Mr. 11.1-11; Jn. 12.12-19)

²⁸ Coajica iteroncanaquerogueti Jesoshi iquenquetsavaetaquegueti iparianajaro iroanaquequea Jerosarequi, iriquetitaquea oananquitsi. Yagatsonquivaetanaji.

²⁹ Iroompaquea irooshipojiguete irarejerejeitajempaquea Vetepajequi aisa Vetani-aqui irooshirooshitacotacariquea Orivotsempi, itigarancaquequea mavite itsatacaane, icantajivaqueriquea:

³⁰ —Poanaquequea ontaniqui quempeji guinteninintsiqui, ariqnea pamenajiapojeri oraniqui aparo aashino irijanigantirenanajiqui ishiticacojiquea, tequerataqueate irishiashiavijitacotantajitempariji. Pishiticarejacojiaqueri pamajiaquenari.

³¹ Choocaguete cantajiaquempineca: ‘¿Taaquea pishiticarejacotantacarica?’ aviatimpajia pincantajigueri: ‘Iriguenti coacotacari Amajirote.’

³² Yoayoaitanaquequea ariqnea yamenajiapojiri shiticacoca.

³³ Irooqnea ishiticarejacojianaqueriguete icantajiguiriquea ashintajigarica:

—¿Taaquea pishiticarejacotantacarica aashinogantirenanajiqui?

³⁴ Iriatimpajia icantiriquea:

—Iriguenti nintaqueri Amajirote.

³⁵ Iroompaquea yaajianaqueriquea yamajiaqueneriquea Jesoshi. Isavomititsajiaqueriquea iitsaarepaequi cameetsanijite irisavicaquenijite. Ariquea yatsomajajiaqueriquea yoguisavicajiaqueriquea.

³⁶ Ariquea ishiacotanaca yoanaquequea. Irirajia omporoguijaventajivacarica imaroncaashijiavaqueriquea iitsaarepaequi quenavoquirontsiqui ishivoquitantacaca.

³⁷ Oraquea irooshipojigueti oguirincacagueti Orivotsempiqui maasanopae quemisantajiaquerica isaquiriaventajianacariquea, ishinejianaca icanca, iririjencani yoanaquero ishineventajianacari Aapani Irioshi iroorijite iquenquejanaqueroquea yonigaantaguequeca Jesoshi oacaantantatsica intati.

³⁸ Icantajigui:

—¡Intsishiatsi irishineventajiquempari Amajirote coraquetapojatsica itigarancaqueca Majirontamajatatsica!

—¡Oganejencaguitevaeca inquitequi! ¡Caaviji yoganejencamajataca Aapani Irioshi choocatatsica jenoqui!

³⁹ Iroompaquea iconoagarancaqueate pariseojia choocajianquitsica oraniqui icantiriquea Jesoshi:

—Tsatacaantantatsica, pincantomajeritsijate guijatacojiaquempica.

⁴⁰ Cotanquitsiquea Jesoshi icantiriquea:

—Noncanquempiquea, ariguete irimajerejigue irirajia, irooqueate cajemajiananquitsineca mapi oshineventajianaquenaquea.

⁴¹ Iroompaquea yaapojaqueroqueti quempeji yamenacopojiroquea Jerosare, iraacot-sijigari choocatantajigaroca,

⁴² icanque: “¡Imaicaquea imaica choocatirajanagueti ocaniqui nonintaveca pintsajigueme quero pincojiaquempani aatonijite icatsimajiguimpitsi Aapani Irioshi! Cotanquitsiquea imaicatari omanapitsajiaquempi.

⁴³ Aapojajempagueti oncoramanitapojajegueti pantsipevaejiaquempaquea, inco-raquecoraqueitashijiaquempiquea catsimajiaquempineca iranquitacojiapojaquempi intantotacojiapojaquempi irashimirintsitempiquea.

⁴⁴ Irampeguitejajiaqueroqueate maasanopae mapi ipeacaantajicaroca piguinten-tantajiacaca, irimetojajiaquempiquea. Ontariavaetanaquempaquea isavi, aatoquea ogataavitajatsi apapiro. Onquejetaquempaquea irooriji aavepojaca icoraquetanta-quitacaca Aapani Irioshi incavintsajajiaquitempimequea, cotanquitsiquea aviatimpa-jia teequea pintsajiaqueroji.”

Jesoshi yoguivorocajiaqueri jocantantajiavecaroca teemporoqui

(Mt. 21.12-17; Mr. 11.15-19; Jn. 2.13-22)

⁴⁵ Iroompaquea yoanaquequea Jesoshi teemporoqui itsaromentantajitarica Aapani Irioshi iquijavepojacaro oniganquirequi oticaacoroqui, yamenajiapojiri jocantantajia-quequea, yoguivorocajiapojiriquea,

⁴⁶ icantiriquea:

—¿Arimpate tee ontionquempaji: ‘Oratica notsovironaquite incantacojitero iroguenti ashi incoraqueantapinijitempaca iramanajiaquenani?’* Cotanquitsiquea aviatimpa-jia manaquea pipeacajaiacaró imoro itsititantaca aitsitantajiatatsica.*

⁴⁷ Ariquea icantacoguitani savincaguitariqui itsatacaantaguitiniqua Jesoshi teem-poroqui. Cotanquitsiquea irirajia saserrotejia anaantajianquitsica, irirajia tsatacaan-tajiguiroca itioncacotanaqueca Moishishini, aisa jivajiguirica caquinteja inintajiaveca irimetojajaanquerime.

⁴⁸ Cotanquitsiquea teequea iragavejajigueji querocampate incojiaquerini, maasano-jia ishineventajiacariquea iquemisantajiaqueri.

* 19:46 Is. 56.7. * 19:46 Jer. 7.11.

20

Icoacojitaqueriquea Jesoshi taate tigarancaqueri (Mt. 21.23-27; Mr. 11.27-33)

¹ Ariqueate itsatacaantavaequequea Jesoshi oniganquirequi teemporo, itsaveta-cotaquero Quenquetsatsarentsi Oganejencatatsica. Iroompaquea icoraquecoraque-ipojiquea saserorotejia anaantajianquitsica, itsipatsipaicariquea tsatacaantajiguiroca itioncacotanaqueca Moishishini, icoraquejiaquequea aisa jivajiatsica,

² icantajiapojaqueri:

—Iintsija pincamantenajate. ¿Taaqueate cantaquempi pinquejetacaqueroquea imaica poguivorocajiaqueriquea jocantantajiguirica viratsipae? ¿Taaquea tigarancaquempi?

³ Iriraquea Jesoshi icantiriquea:

—Ochooaque noncoacojiaquempica naatimpa. Iintsija pincamantajiguenaja:

⁴ Iviñacajatantigueti Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquintejia?

⁵ Irooquea iquemajiavaquegueti iquenquetsatavacaajianaca icantajianaque: “¿Querote ancoterini? Ancantsivetemparigueti oquenantapojaca inquite, iriatimpa incantanaque: ‘Iroosacanica ¿queroquea oocani teeca pinquemisantantajiguempariji?’”

⁶ Arigueticaja ancantajiavequempariquea iriguenti tigarancaqueri caquintejia, intsinatsinavaetacaji maasano omporoguijajianquitsica, maasanotari icantajiaque irira Joancani iriguenti tsavetantatsica itigarancaqueca Aapani Irioshi.”

⁷ Jero icantantajiacaca:

—Jmm, taaca tigarancaqueri.

⁸ Ariquea iriatimpa icantiriquea:

—Iroosacanica, ariqueate nonquejetaquempaquea naatimpa, aatoquea nocamantimpitsi quericaca tigarancaquenaca naatimpa.

Jesoshi iquempetacaajiacariquea quempoguijavetaroca ovaitsoquimashi (Mt. 21.33-34; Mr. 12.1-11)

⁹ Ariqueate iparianacaroquea Jesoshi iquenquetsatacaajianaqueriquea maasano, cotanquitsiquea manaquea iquejetacaajiacanari, icantiriquea:

—Ichooaque aparo caquinte imiashiaqueroquea ovaitsoqui itsitacancaroguea apamantanejiro iniganquitejire, iroguenti igomaroncaaque. Coajica icajemajiaqueriquea itsipapae irishiacojiaqueneriquea. Oraquea onchoocatanaquegueti, irojocagarantajiaqueneriquea iriatimpa. Iroompaquea yoavaetanaquequea osamani, ichoocaguitini ontaniqui.

¹⁰ Ocoramanivaetapojigueti aapojajagueti osamparipiotantanacaca ovaitsoqui, itigarancavecariquea aparo itigarancuica iramanajiajateriquea irojocagarantajiajenerime iriatimpa, cotanquitsiquea iriatimpajia itavatavaajiaqueriquea itigarancajiajiri intati, teequea irojocajiajeneriji capichajaniqui.

¹¹ Iroompaquea iriraquea ashincaroa itigarancajiquea itsipa yashincaca. Ariquea iquejejiavaqueriquea iriatimpa, itavatavaajiaqueriquea, icaveaqueri, itigarancajiri intati ejempaconi.

¹² Ariquea itigarancuquitsitajariquea aisa itsipa, cotanquitsiquea iquitenteatantavacariquea ipishoncaquitiri.

¹³ “Iroompaquea icantsitaquea ashincaroa iguepatsite icanque: ‘¿Querocaquea noncojiaquerini imaica? Iintsija iriompate iriguenti nontigarancaquequea irijani nopintsamajatacaca, iriocaqueate intsaroacaajiaquempaquea.’”

¹⁴ Cotanquitsiquea iriatimpajia irooquee yamenajiaquerigueti icoraquepojaquegueti iquenquetsatavacaajianaca icantajianaquequee: ‘Jeeri irintatica ashinquemparoneca maasanopae irimetojanajeguete iriri. Jamequetiroshiatsi ametojajiaque-riquee cameetsanijite aatimpajia ashintamajatajemparonijite.’

¹⁵ Ariquee yaitsijianacari yaajianaqueri acaqueroca otantotacotacaguete ovaitsoquimashi, imetojitsitari.

“¿Imaicaquee querocaquea incojiaquerini ashincaroa iguepatsite?

¹⁶ Manaqueate iroashijiaquiteriquea irimetojajiaquiteri, itsipapae incajemajiaque-quee quempoguijajenerineca iniganquitejire.”

Iquemajiaqueriguete icanqueca icantsijigariquea:

—¡Oo, aatoquee!

¹⁷ Cotanquitsiquea Jesoshi yamenajiaqueriquea icanque:

—Iroosacanica, ¿taaquea ocantacoque Itioncacaantaqueca Aapani Irioshi ocanqueguete ocatica?:

‘Oraquee ogota mapi teeca irishineventajiavetempaji peacaajiacaroca mapipanco, opeanacaquee anaantamajatanquitsica quishotacaaqueroca.’

¹⁸ Querica omposaquemparoneca ocatica mapi incampojemparo jarare jarare, cotanquitsiquea querica ontsinacaqueca ompitsarepitsarejatanaqueri.*

¹⁹ Ariquee irirajia saserorotejia anaantajianquitsica aisa tsatacaantajiguiroca itioncacotanaqueca Moishishini irooquee iquemajiaqueriguete icanqueguete Jesoshi icatsimatsijianacaquee, inintajiaveca irajaianaquerime, iquemajiaqueriqueate iriguentijia iquejetacaajiacaquea, cotanquitsiquea itsaroacaajiacari omporoguijajianquitsica.

Icoacojiqueri Jesoshi cameetsavaequempa irojocajiqueneri Sesa imentaquipae

(Mt. 22.15-22; Mr. 12.13-17)

²⁰ Ariquee itigarancajiaqueriquea itsipapae iroaroaitanaque impeamampeajiaque-mpaquea arimajacaca inintamajajiaque intsajiaquequee, incoacojiaqueriquea Jesoshi iramenajiaqueri querocaca icanque, iroompaquee icanqueroguete taaca opajita, irooquee iroguinajiaquempaquea irajaianaqueneri iramajirore Sesa incatsimatacaantaqueriquea.

²¹ Irootaquequee icoacotantacarica icanqueri:

—Tsatacaantantatsica, notsajiaquempiquea aviatimpa teetarite pamataguempa-jiquea, pitsatacaantaqueguete teequee querica pagamajempaquea, teequee pincanteji: ‘Inchiquiojitaja iquemajiguitsi itsipapae.’ Pitsatacanguete tampaticaquea poaqueri picamanqueriguete queroquee incojiaquempani irinetsanajigueroniji inintaguetica Aapani Irioshi.

²² Pitsatiroqueate icanqueca majirontatsica Sesa icanqueguete maasanojia jorio irojocagarantapinjiaqueneri imentaquipae. Imaicaquee ¿queroca pincanteni? ¿Cameet-sampa nojocajiaqueneri, aricaca tee oncameetsateji?

²³ Cotanquitsiquea Jesoshi itsatavaqueroquee teequee cameetsa incantajigueji, manaquea ishinetampeajiacaqueate intati, irootari icantantajiacarica:

²⁴ —Intsijate pamaquenarija apamentaqui tenario,† nameneritate. ¿Taa ipajita iricatica ivaantorijiquea? ¿Taaquee ashintaro ivajiro tioncanquitsica?

Icantiriquea:

—Iriguenti majirontatsica Sesa.

²⁵ Iroompaquee icanque iriatimpa:

* **20:18** Oraquee *mapi* irioquee quejecaro Jesoshi. Oraquee otsinacaqueca ompitsarepitsarejatanaqueca iriojia quempecaro caarica shineventavacari Jesoshi. Ari inquempetacaajitaquempani incatsimamajajitaqueri. † **20:24** Iriraquee *tenario* irio imentaquitsite Iromaquitica. Iramiteriguete itsipa apajencaro savincaguiteri irivegarata-queri aparo tenario. Ari iquejevecari itsipa imentaqui icantajitica iraquima, iriguenti imentaquitsite guiriegajia.

—Iroosacánica, pojocajajenerijate Sesa yashincaca iriatimpa pinetsanati-menqueroniji icanqueca, aisa pinquejetacaajiaquempariquea Aapani Irioshi, pinetsanamajajiaqueroja maasanopae icantaguequeca.

²⁶ Teequea iragavejajigueji incomitsatacaguempariji. Icocani iquemajiaquerigueti maasano tampatica inetsanaquero. Ariqueate yamenamenaitanaquequea intati coa-cojiavecarica, yamenajiaqueriquea itsamajati, ariquea isanticosanticoitanaque.

Icoacojitaqueriquea Jesoshi quero oncoquempa intancoretancoreitanajegueti oncoramanitapojajegueti

(Mt. 22.23-33; Mr. 12.18-27)

²⁷ Iroompaquea irioquea oahoaitananquitsica saroseojia iramenajiaquiteriquea Jesoshi. Iriatimpajia iriguentiquea cantajatsica aatoquea itancorejajianaji metojajiat-sica.

²⁸ Icantantajiapojacarica:

—Tsatacaantantatsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempaji, aapojempagueti irimeto-janaquegueti irojocapanajantero imanquigare, choocagueti iriguentijeguite irioquea manquigatajemparone irijanintacajaemparoquea quejetaja irioca irijanintajari meto-janquitsica.

²⁹ Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarensi, cotanquitsiquea niganquiquea imeto-jaque teequea irijanintacaguemparoji.

³⁰ Iroompaquea irioquea manquigavetajaro itsipa oguijatirica. Ariquea iquejeta-jaquea iriatimpa imetojanaji, teequea irijanintacaguemparoji.

³¹ Ariquea iquejetacaquea itsipa niganquitsica, arimpate iteroncanacaquea maasano imanquigajavetacarogueti, teequea irijanintacajaiguemparoji.

³² Ariquea ometojitsitanaca iroatimpa.

³³ Imaica, iintsija pincantajiguenaja, oraquea oncoramanitapojajegueti intancoretancoreitanajegueti maasano metojajavetanquitsica, ¿quericaca manquigamajatajemparoneca? Maasanotari imanquigajavecaroquea.

³⁴ Icanqueriquea Jesoshi:

—Imaicaquea imaica acaniqui imanquigajiaa shiramparijia, ariquea oquempetaca manquigarensi yojocantajitiro irimanquigajitemparo.

³⁵ Cotanquitsiquea irirajia ishetacojiqueca intancoretancoreitanajegueti oncoramanitapojajegueti, iroaroaitanaquegueti ichoocatigueti Aapani Irioshi, aatoquea quericaca manquigatajatsineca, aisa manquigarensi aatoquea yojocantajitajirotsi irimanquigajitajemparo.

³⁶ Aatotarite imetojimajajitsi, jac tancoretancoreitanajitarite. Manaquea inquempejajempari irashivantijitete Aapani Irioshi, aisa inquempejajempari Aapani Irioshi teetarite iramenimateroji imetojane, jac ipeajiaqueri irijanijiate.

³⁷ Quejetacaquea itioncanaqueca Moishishini coramani itioncacotaqueroquea iquenquetsataquegueti Aapani Irioshi maequitatsicaqui, icanque: ‘Naroguenti Irioshimajate Averaame, Ishaaco aisa Jacovo.’ Irootaquequea itsatantajitacariquea Moishishini itsaquequea intancoretancoreitanaje metojajavetanquitsica.

³⁸ Teequea irio Irioshite metojatsica, iriguentiquea Irioshite anijatsica. Aviatimpajia pamenajavecari metojaque, cotanquitsiquea iriatimpa yamenaqueri maasano icocani yaniji.

³⁹ Iroompaquea iconoagarantajiaa tsatacaantajiguiroca itioncacotanaqueca Moishishini icanqueri:

—Tsatacaantantatsica, pitampaticamajataqueroquea.

⁴⁰ Ariquea icarajianajiquea maasanojia teequea incoacojiajeriji otsipapae, yamenaqueriqueate teequea iragavejajigueriji.

*¿Taaquea choviquitanaqueri Quirishitotatsica?
(Mt. 22.41-46; Mr. 12.35-37)*

⁴¹ Iroompaquea icanque Jesoshi:

—¿Querocaquea ococani icantantajitacaca: ‘Irraquea Quirishitotatsica‡ iriguenti ichoviquini Taavini?’

⁴² Iriotaquequea cantanquitsica Taavini iriatimpa coramani itioncaquerogueti paperiqui pajitatsica Saremo, icanque:

‘Irraquea Majirontatsica Aapani Irioshi icanqueri Nomajirote:
Pisaviquetaja pisenampijaquenaja notincamijempequiqui,

⁴³ pintsipataquenaquea arejevaetanaquempa
nagavejajiaquerigueti maasano catsimajiaquempica, onquejevequemparo povanque-
gontatsitempari.’

⁴⁴ Irraquea Taavini iriotaquequea cantaquerica: ‘Nomajirote’, ¿querocaca incoquempani inchoviquitanaqueri?

*Icanque Jesoshi aatojate yoguijaguijaitacotiritsijate tsatacaantajiguiroca itioncota-
cotaqueca Moishishini*

(Mt. 23.1-36; Mr. 12.38-40; Irc. 11.37-54)

⁴⁵ Maasano iquemisantajiaqueriquea Jesoshi icantajiaquerigueti itsatacaane, icanque:

⁴⁶ —Inchiquiojitaja poguijaguijaitacotiritsijate tsatacaantajiguiroca itioncota-
cotaqueca Moishishini. Iroguenti ishineventajiacaca inquitsaajerontajiaquemparo
ontiasero cameetsanijite irisemeque. Aisa yoayoaitapinique ontaniqui
yojocantajiguetirogueti taaca opajitapae ajaararontsipae inintajiaque inquenquetsata-
caajitavaqueriquea. Icoquitani yoapinijiguigueti shinagogaqui icapiocantapinijacaca,
inintajiaquequea iroguisavicajitavaqueri intsipatsipaipojempariquea anaantajiatsica.
Ariquea iquejejiacaquea aisa icapiocajiacagueti irishecajiaquempaquea, inintajiaque
iroguisavicajitavaqueriquea intsipatacaantajiquempariquea anaantajiatsica.

⁴⁷ Aisa yamatavimatavivaetaqueroquea metojacoropae iteroncamajatsitaqueroquea
ashintaguecaca. Aisa yamanamampeajiacariquea Aapani Irioshi teetaquea irisanticot-
sitempaji, isemejiaque intati. Iriatimpajia caaviji iranaajiaque incatsimamajajitaqueri
oncoramanitapojajegueti.

21

*Metojacoro ojocaqueneriquea Aapani Irioshi omentaquitsite aacaajaniquicari
(Mr. 12.41-44)*

¹ Ariqueate ichoocaque Jesoshi oraniqui teemporoqui ochoocaquegueti itetantajitar-
ica imentaquipae yojocajiquenerica Aapani Irioshi. Iriatimpa yamenajivaqueriquea
ashintavaejatsica yojocajiaquequeate imentaquitsite.

² Iroompaquea yameniroquea aparo metojacoro, teetarite ashintempaji, otetsi-
tarikuea iroatimpa mavimentaqueitejaniqui omentaquitsite.

³ Ariquea icanque:

—Arimajaca ocatita metojacoro teeca ashintempaji yamenaqueroquea Aapani
Irioshi otepojiri oshequi, anaitajiaqueri maasano.

‡ **20:41 Quirishitotatsica.** Iguenquetsatsarequi guiriegojia icanquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserrotejiate. Iriira Quirishito iriotaquequea itsavetacotsitacaca tsavetantajatsica coramanitica intigarancaque Aapani Irioshi impeaquempañi Imajirojiate maasano.

⁴ Iriatimpajia yaagarantavajiri imentaquitsite, yashintavaevetacatari, cotanquitsiquea iroatimpa teeca ashintamajavetempaji manaquea aacaajaniquicari maasano ashincaca ovegaratantajempameca osheca.

Jesoshi icanque irisovejaiquero teemporo
(Mt. 24.1-2; Mr. 13.1-2)

⁵ Iconoagarancaquea iquenquetsaventajiaqueroquea teemporo itsaromentantajitarica Aapani Irioshi, yamenajiaqueroquea cameetsavaequequea ocanca. Ipeacaantajitaroquea mapi ogameetsareni. Aisa yojoquijitantajiguecaroquea otsipapae taaca opajitapae cameetsaguetatsica yojocajiguequenerica Aapani Irioshi. Iroompaquea icanque Jesoshi:

⁶ –Ocaticaquea pamenajianaqueca imaica, ariquea arejetapojajempaguetei savinca-guiteri aatoquea ochoocatajitsi aparo mapi ogataajatsineca, maasanopae irisoveaco-majajitaquero.

Queroquea oncotanaquempani irooshipojeguetei onteroncaguetanajempa quepatsi
(Mt. 24.3-28; Mr. 13.3-23)

⁷ Iroompaquea icantajiguiri:

–Tsatacaantantsica, ¿querocate oncaratene irisovejaiqueroni? ¿Taa opaji nontsatan-tajivaquemparoca?

⁸ Icanque Jesoshi: “Shoshoh yamatavijajitimpitsija. Incoraquecoraqueitanquetari oshequini pinajajiaquenaneca cantajianquitsineca: ‘Naroguenti.’ Itsipa incanque: ‘Trooshipoji aguempa.’ Cotanquitsiquea aviatimpajia aatoquea piquemisantajiguiritsi-jate.

⁹ Iroompaquea pinquemacojiaqueriquea itsipapae irashimirintavacaajiaquempa. Itsipapae iroguisotoitsijiguempari imajirojiate. Cotanquitsiquea aatoquea pitsaroajigu-itsi. Ariqueate onquempeguetanaquempaquea imaica, cotanquitsiquea aatota aitsita onteroncantaguetanajempaca quepatsi.”

¹⁰ Iroompaquea icantriquea aisa: “Irirajia guintenijianquitsica otsipapaequi quepatsi iroaroaitashijianaqueriquea choocajitsica osamanipaequitica, ariquea irashimirintavacaajiaquempa. Ariquea inquempejiaquempaquea majirontajatsica inchoocagarantajiaque intigarancajiaqueri igoaretajiate iroaroaitashijianaqueriquea itsipapae majirontatsica irashimirintavacaajiaquempaquea irimetojavacaajiaque-mpa.

¹¹ Omoguecaguetanaquempaquea oshequi ooshiatsi. Irantsipevaejitaquemparoquea tasetsijencapae. Osotoajencavaetanaquequea ashinoncajarentsi, oncantashitajajencavaetanaquempaquea oshequi querocaguetei osotoajencaguetanaqueni. Ira-menajitaquero caarica yamenajiti poneanquitsica inquitequi oncantashitatiaguite-tanaquempa oncanquempa, omintsaroajianaqueriquea.

¹² “Cotanquitsiquea aatotaquea oquejeta imaica, aviquetijiaca incatsimajiaque irantsipetacaavaejiaquempiquea. Iraajianaquempiquea shinagogapaequi icapiocantapinijiacaca, incatsimatsijiguempi irisantanatacotacaantajiaquempiquea. Aisa iramenajiaquempiguetei pitsaromentajiaquena irajaianaquempiquea ichoocagueguetei majirontajatsica aisa jivajatsica cameetsaniji incatsimatimentajiaquempiroquea.

¹³ Inquempejiaquempiguetei imaica irajaianaquempiguetei querocaguetei oraniqui, ariquea pintsavetacojianaquenaqueate naatimpa.

¹⁴ Cotanquitsiquea aatoquea piquenquejajigueroquea pincantajigue: ‘¿Querocaca noncanqueca nompetanaquempaguetei coajica irajaianaquenaguetei incatsimajiaque-naguetei?’

¹⁵ Naroguenti quenquejacaajiaquempironeca cameetsanijite pintsajiaquenijite que-rocaca pincanqueca aatonijite yagavejitajiguimpirotsi, manaquea incatsimatashiji-aquempiquea intati.

16 Cotanquitsiquea aviatimpajia pinconoagaranquempaquea iracaantajiaquempi, inquejetsijianaquempiquea irijanintajiguimpica, piguentijeguijiate, pijiguetica aisa pitsipavijijaca, pinconoagarantajiaquempa irimetojacaantajiaquempi.

17 Maasanopae irisemimentajiaquempiroquea novajiro pitsaromentajiaquenuagueti.

18 Ariguete irimetojaquempi, aatoquea opegatsi apamaero pimajejaniqui piguitoqui.*

19 Pantsipevaetaquempaguete maasanopae ocativa, aatoquea povashiantajiguirotsi pitsaromentajiaquenuagueti, pinquejetaquerogueti imaica pincoguitempani panijaguiteni jenoqui inquitequi.

20 “Iroompaquea pamenajivaquerogueti Jerosare iranquijatacojiapojajemparoquea coaretajia, irooquea pintsatantajivaquempa irooshipoji onteroncaguetanaquempa maasanopae tsovironaquipae, irisoveajiaqueroquea.

21 Irirajia choocajianquitsineca Joreaquei irishiashiaitanaquetaja otsempipaequi. Irirajia choocajianquitsineca Jerosarequi irishiashiaitapanajantetaja osamani. Ariquea inquempejiaquempaquea choocajianquitsineca niganquitejiqui inchiquiojitaja yoayoitapanajantitsija Jerosarequi.

22 Inquejetaquempaja irooriji aapojaca incatsimatantajiaquemparica Aapani Irioshi, onetsanamajatanaquempaquea itioncacaanqueca paesatoniqui.

23 Ooshiatsi manquigarentsija tsaraqujianquitsineca, aisa atsomijianquitsineca caaviji antsipemajiaquempaquea, irantsipevaejiaquempatarite maasanojia choocajiatsica ocaniqui, incatsimamajajiqueriquea.

24 Inconoagarantajiaquempaquea irimetojantajiquempari tsaampitsantsameniro. Itsipapae iraashijitanaquempari quepatsipaequi osamaniguetsica. Iriatimpajia teeca irijorijoigueti quenaquenaitapojatsineca osamani iragavejantajiaipojague Jerosarequi irarejetacovaetapojemparo aapojempaguete incantantaquempaca Aapani Irioshi: ‘Imaicaquea ariotapojague.’

Querocaca oncoguetanaquempani incoraquetajategueti Irijanite Caquinte

(Mt. 24.29-35, 42-44; Mr. 13.24-37)

25 “Ariqueate incantashitatijianaquempaquea inquitepaequitica: irira catsirincateri, taai, impoquiropae. Iramenajitavaqueroquea teeca iramenajiteji coramani intsatantajitaquemparoca irooshipoji. Maasanopae choocajiatsica acaniqui quepatsiqui ariqueate incohincoitanaquempaquea intsaroamajajianaque inquemajivaquerogueti ampenejencavaetanaquempaquea inirojani quantijani, ontamacoseajavaetanaquempaquea ochonquuinaja sooooo tsacon tsacon. Irishoshoguitejianaquempacaquinteguetsica incantajianaquequea: ‘¡Imaicashiatsi querocampate oahoaitanaqueni!’

26 Caaviji intsaroamajajianaquequea, ojatacotacaquiteri itsarore inquenquejajianaquerogueti querocaca oncopojaquempani acaniqui quepatsiqui. Irimoguecanequequea choocaguetanquitsica jenoqui inquitequi.

27 Iroompaquea iramenajitavaqueriquea irira Irijanite Caquinte incoraquetapojajegueti inquenantapojajemparo mararo, iragavejavaetapojempa iranaajiaqueriquea maasano, iroganejencavaetapojempa.

28 Oraqueate pamenajivajerogueti onquempetapojajempaguete imaica, pishinejianaquempaja, irooshipojitarite irajjavajempi Aapani Irioshi patsipevaecaguete.”

29 Ariqueate iquempetacaacaroquea iguera, icanque: “Pamenajiguiroguete iguera irooca otsipapae inchato,

* 21:18 Icanque *aatoquea opegatsi apamaero pimajejaniqui piguitoqui*, iroorijite maasano tsaromentajigarica iroaroaitanaquequea ichoocagueti Aapani Irioshi, incoquempani inchoocaguiteni. Itsaventanquerogueti Paavoro icanque onchooquea otsipa atsino cameetsamajatsineca aatoca oteroncatsi. Pamenero 1 Co. 15.53.

³⁰ ochoocatanajigueti ovana irooquee pitsatantajavajaro irooshipojaji ajagantsitapojaje.

³¹ Ariquee onquempetanaquempaquea oncoramanitapojajegueti pamenajiavajerogueti onquempetanaquempagueti notsatacajiaanaquempica imaica, irooquee pintsatantajavajempa irooshipoji irimajironaquaempa Aapani Irioshi.

³² “Arimajaca noncantajiaquempica, maasanopae ocativa nocantajiaquempica imaica onetsanamajatanaquempaquea tequeratagueti interoncajiguempaji maasano choocajianquitsineca omparianaquempagueti notsavetantsitacaca imaica.†

³³ Oraquee inquite aisa quepatsi ompeaquempa, cotanquitsiquea oraquee nocantaguequeca aato opegatsi.

³⁴ “Aviatimpajia inchiqiuojitaja pisavicaventirotsijate taaca opajitapae covaeguisherentsipae, pishinquitatsija, pishoshoventajigarotsija taaca opajitapae. Pinquempajiaquempagueti imaica aatoquee pagavejajiguetsi pinquenquejajiaqueri irira Irijanite Caquinte incoraquetaje, iroompaquee manaquee incomirejajiaquempiquea.

³⁵ Manaquee onquempetaquemparo ivaracajitigueti, teequee intsatsitapojemparoji. Ariquate onquempetaquempaquea oncoramanitapojajegueti incoraquetapojajegueti irira Irijanite Caquinte, aatoquee itsatsijiga choocajiaquempica acaniqui quepatsiqui.

³⁶ Cotanquitsiquea aviatimpajia pincoquempanija poguijavajerija, aisa pincoquempanija pamanaguiterini Aapani Irioshi cameetsanijite pintampishitashiqueroniji maasanopae ocativa notsatacajiaquempica imaica, aisa cameetsanijite pincatintiitimotaqueriniji Irijanite Caquinte incoraquetapojajegueti.”

³⁷ Ariquee iquejetaqueroquee imaica icantacoguitani savincaguiteriqui itsatacaantaguitini teemporoqui itsaromentantajitarica Aapani Irioshi. Oraquee pitsecariqui manaqueate yoapiniquequea otsempiqui ipajijitica Orivotsempi.

³⁸ Icantacoguitaniquea pitsecaguitetirajagueti icoraquecoraqueipojaque maasano teemporoqui inquemisantajiaquerinijite intsavetantavaetaquegueti.

22

Iquemavacaimentajiacari Jesoshi iracaantajiaqueri

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Irooshipoji arejetempa savincaguiteri icantajitica Paashicoa ishecatantajitaroca pan teeca onconoguemparoji anempoacaguiroca.

² Iiraquee saserrotejia anaantajianquitsica itsipajiacari tsatacaantajiguiroca itioncacotanaqueca Moishishini arimpaqueate iquenquejajianaque queroquee incoquempani iracaanquerinijite Jesoshi irimetojacaantajiaquerinijite, cotanquitsiquea quero-campaquee incojiaquerini, itsarocaaajiacariquea maasano omporoguijaventajiacarica.

³ Ariquee iriraquee Satanashi icoraquetashipojiri ishaquiapojacari Jorashi pajitativa Ishicariote. Irioveca itsatacaane Jesoshi carajianquitsica 12.

⁴ Ariquee yoanaque inquenuetsatacaajigueteri saserrotejia anaantajianquitsica aisa imajirojiate coaretajia quempoguijajiguiroca teemporo itsaromentantajitarica Aapani Irioshi. Ariquee itsipajiaqueteri iquenquetsatavacaaca quero incoquempani Jorashi iracaanquerinijite Jesoshi.

⁵ Iquemajiaquerigueteri ishinejianaca, icanqueriquea irojocajiaqueneri imentaquipae.

† 21:32 Otioncacaca acaniqui, iguenuetsatsarequi guiriegajia ocanque **genea**. Chooa mavitepae agavejaque oncantacotaque. **Genea** agavejaque oncantacoqueri (1) irioca maasano choocajianquitsica icantaquerogueteri (**esta generación** o **la gente de este tiempo**); (2) irioca oncantacoque maasano joriojia (**esta raza**); (3) irioca oncantacoque maasano choocajianquitsineca omparianaquempagueteri itsavetantsitacaca (**esta generación, es decir, la generación que ve el comienzo de estas cosas**).

⁶ Iriatimpa ishinevaetanaca, ariquea yamenaguetanaque aatogueti ichoocajigui om-poroguijavencarica, ariquea iracaantsitempari.

Jesoshi ishecatacaajianajari itsatacaanejia

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Iroompaquea aapojacaquea savincaguiteri ishecantantajitaroca pan teeca on-conoguemparoji anempoacaanaqueroneca, aisa ijitorejantajitarica ovejajaniqui ishecajitacaca iquenquejacojiguirogueti Paashicoa.

⁸ Iriaquea Jesoshi itigarancaqueriquea Peerero aisa Joanca icantavaqueri:

—Poapoitanaquequea pinetsanajivaqueroquea maasanopae cameetsanijite ashecajiaquempanijite coajica anquenquejacojiajerogueti Paashicoa.

⁹ Icantiriquea iriatimpajia:

—¿Quero nonetsanajiaqueroni?

¹⁰ Icanque Jesoshi:

—Poapoitanaquequea Jerosarequi, ariquea parejejiapojempagueti pintonquivojavaquempari aparo shirampari iramacopojaqueroqueti ijatsite, irioquea poguijaguijaitanaque. Poapoitanaque tsovironaqui qui querocagueti inquijapojeni.

¹¹ Pincantajiajojerija ashincaroa itsovironaquite: ‘Iriaquea Tsatacaantantatsica icanque: ¿Querocaca oraniqui noshecajiaquempani coajica nontsipatsipaiquempari notsatacaanejia nonquenquejacojiaqueroquea Paashicoa?’

¹² Iriatimpa intsipatsipaitanaquempiquea oshitamenacoacagueti jenoqui, irijicoguequempiroquea otantotacagueti caguetejeguina, jac netsanaguecaquea maasanopae. Ariquea oraniqui pinetsanaguetaqueroquea maasanopae ashecajiaquempagueti coajica.

¹³ Iroompaquea yoayoaitanajiquea, ariquea yamenajiapojiroquea maasano quemajataca icantajivaquerica Jesoshi incajaranqui, ariquea oquejetaca. Ariquea oraniqui ipeacajaiacaro maasanopae irishecajiaquempacira ishineventajiaquemparoniji Paashicoa.

¹⁴ Ariquea opitsecaguitetanaquegueti icoraquepojaque Jesoshi itsipatsipaitanacariquea itigarancanejia, ipimerequijajiapojaca shitaponcarontsiqui irishecajiaquempa.

¹⁵ Iroompaquea icanque Jesoshi:

—Imaicaquea arejetapojaca ocatica Paashicoa nonintamajatantacaca nontsipatsipaitaquempi noshecatacaajiaquempiquea ashineventajiaquempari tequeratagueti arejetempaji nantsipevaetaquempagueti nometojaque.

¹⁶ Noncamantaquemparitarite aatoquea noshecantantajarotsi, ariguenti noshecatajempari onetsanamajatanaquempagueti ocatica maasanopae ocantacoqueca Paashicoa oncoramanitapojajegueti irimajironaquempagueti Aapani Irioshi.

¹⁷ Iroompaquea incajaranquiguitetanaquegueti yaacoquero chovintyoriqui,* yamaqueriquea Aapani Irioshi, icantaqueri: “Ariotelesaa.” Ariquea yojocacojiaqueneriquea itigarancanejia icantiriquea:

—Paajivaquero pimiramiraitavaquero.

¹⁸ Noncanquemparitari aatoquea nomirajaro vinoja arejevaetapojempa nomirajempari impeaquempagueti Aapani Irioshi Imajirojiate maasano.

¹⁹ Iroompaquea yaitsitaroquea pan, yamanajiri aisa Aapani Irioshi, icantaqueri: “Ariotelesaa.” Ariquea icotarejitsitaroquea yojocajiaqueneri, icantiriquea:

—Iroguenti notsino metojaventajiaquempineca. Pinguempinijiaquempaquea imaica, pishecajiaquemparoja pinquenquejacojiaquenajate naatimpa.

* 22:17 Iroguenti yaacotaque vinoja.

²⁰ Iroompaquea ariquea iquejetacaacaroquea otsipatacoro vinoja iteroncajianaque-rogueti ishecacijacagueti, yaacotsitaroquee icantiriquea:

—Ocativa vinoja iroguenti noriraja[†] sotojaatashiquempineca. Ocantacoqueroquee iroaqueraro paaquito.[‡]

²¹ Iriiraquea aacaanquenanea chooca imaica ocaniqui itsipavacoquenaquea shi-taponcarontsiqui ashecatantajiacaca.

²² Irimetojaquetari irira Irijanite Caquinte, onetsanaquempaquea inintacaquerica Aapani, cotanquitsiquea jooshiatsi irantsipevaequempaquea irira aacaanquerineca!

²³ Icoacotavacaajianaca maasano:

—¿Quericaqueate aacaanquerineca?

Iquenquetsatacojiaquero quericaca anaantamajatanquitsica

²⁴ Iroompaquea iparipariitanacaroquea itsatacaanejia Jesoshi iquenquetsatavacaaji-acaquea iquenquetsatacojianaquero arica chooca itsatacaane anaajiaquerica itsipajia.

²⁵ Cotanquitsiquea Jesoshi icantiriquea:

—Iriiraquea imajirojiate caquinteguetatsica teeca intsaroventempariji Aapani Irioshi iroguentiquea yatsanatanajiacaca. Aisa iriraquea majirontajiatatsica manaquea inintajia-que incantajiqueriquea caaviji icavintsajanti.

²⁶ Cotanquitsiquea aviatimpajia aatoquee piquejejiguirotsi imaica. Iriiraquea anaan-tamajatatsica inquejetanajemparija teeca iranaanteji. Ariquea inquejetaquempaquea majirontatsica, inquempetanajemparija amitantatsica.

²⁷ ¿Queri anaamajatatsica? ¿Irioca savicatsica irishecatavaquempaquea intati shi-taponcarontsiqui, irioca amitantatsica jocacotantiroca isheca? Iriotaquequee savicat-sica shitaponcarontsiqui. Cotanquitsiquea naatimpa imaica nocoraquetaque acaniqui noquempetapojariquee amitantatsica.

²⁸ Aviguentijia tsipajiaquenaca natsipevaecagueti.

²⁹ Irootaquequee imaica nompeacaantajiaquempica majirontajiatatsica, ariquea ique-jetanaquea naatimpa Aapani ipeacaaquea imaajirojiate maasanojia.

³⁰ Oncoramanitapojajeguete pintsipajiaquenaquea nomajirontaguete, pishecajianaque-mpa pimirajiaque noshitaponcaroqui, pisavisaviitantajiaquemparo isavicantaca ma-jirontatsica cameetsanijite pincantajiaquerinijite queroquee incojitaquerini ishiraerijia ichoviquijianaqueca irijanijiate Jacovoni caravaetanquitsica 12.

Jesoshi icamanqueri Peerero iromanacoqueriquea

(Mt. 26.31-35; Mr. 14.27-31; Jn. 13.36-38)

³¹ Iroompaquea icanque Amajirote aisa:

—Shimo, Shimo, irira Satanashi yamanaqueri Aapani irishinequeriniji inquempeta-caajiaquempiniji aviatimpajia yatecacojitirogueti tirigoitsoqui, iramenantajiaquem-piquea arimajacaca pitsarovenamajataquena.

³² Cotanquitsiquea naatimpa namanacovenquempiquea aviatimpa aatonijite pipea-comajatanajarotsi pitsarovenquenaguete. Ariquea pimpeacovequitenaquea, cotan-quitsiquea pincoraquetashitajenaguete, noninque pintampishitacaajiaqueriquea pa-pitsarovenarijiate.

³³ Icanque Shimo:

[†] 22:20 Icanquerogueti *noriraja* mana iquejetacaacaro intati, cameetsaniji amirapinijiaquerogueti anquenquejap-inijiaquero imetojaventajiacajiguete. [‡] 22:20 Oraquee *paaquito* iroguenti icantamajajitirica itsipa irinetsanama-jajitenerica. Ocativaquee *iroaqueraro paaquito* icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajiacajica. Ochoocaguetaquequee paaquitopae iro-quetinica icanquerica Noeni, otsipa icanquerica Averaameni, otsipa icantajiaquerica ishiraerijia ichooaqueguete Moishishini, otsipa icanquerica Taavini.

—Nomajirote, noanaquequea naatimpa quisho noacotantanaquempi, irisantanatacojiquempiguete inquejetacaajitsitenaquea naatimpa, aatoquea notsinampirejimpitsi. Irooca irimetojajiquempiquea inquejetacajaiquenaquea naatimpa aisa.

³⁴ Icanqueriquea Jesoshi:

—Peerero, noncanquempiquea, coajica tequerataguete irinijeji chaapa, pomanacouenaquea 3.

Irooshipojaque irantsipevaequempaquea Jesoshi

³⁵ Ariquea icantiriquea Jesoshi itsatacaaneja:

—Oraqueate notigarancajiaquempiguete pitsavetantajiaquitiguete, nocantajiavaquempiquea: ‘Aatoquea paajiguetsi pitsaratote, aisa pitetantarica pimentaquitsite, aisa aatoquea paajiguetsi itsipapae pigaviguitire.’ Piquejetacaguete, ¿choocampate picoguitejacoqueca?

Iriatimpajia icantiriquea:

—Tee onchoocateji.

³⁶ Ariquea icantiriquea:

—Cotanquitsiquea imaica choocaguete pitsaratote paanaqueroja, aisa pitetantarica pimentaquitsite. Aatoguete ochoocati pitsaampitsantsamenirite pojocantanaqueroja piitsaare jenoquitica paantanaquemparoja pitsaampitsantsamenirite.

³⁷ Noncantajiaquempiquea irinetsanamajajiqueroquea ocanqueca Itioncacaantaqueca Aapani Irioshi cantacotsitaquenaca: ‘Intsipatacaantajiquempiriquea covaequishejigaroca covaequisherentsi.’ Maasanopae itioncacotsijitaquena onetsanamajatanaquempaquea.

³⁸ Icantiriquea iriatimpajia:

—Jero, Nomajirote, mavite tsaampitsantsameniri.

Icanque iriatimpa:

—Ariotapojaque.

Jesoshi yamanaqueriquea Aapani Irioshi Jetsemaniqui

(Mt. 26.36-46; Mr. 14.32-42)

³⁹ Iroompaquea yoanajiquea Jesoshi Orivotsempiqui, § aritarite yoapinique oraniqui. Irraquea itsatacaaneja yoguijaguijaitanaqueriquea.

⁴⁰ Ariquea yarejerejeipojaca icantiriquea:

—Pamanacoventajiguempa aatonijite picovaequishejigatsi.

⁴¹ Iroompaquea yoanaquequea tiijacoñajiquea ontaniqui yoguerotanaca yamananaqueriquea Irii icanqueriquea:

⁴² “Aapani, pininqueguete paapitsatenarotate nantsipequempaca,* cotanquitsiquea aatoquea iroguenti netsanatatsi nonintica naatimpa, iroguentiquea netsanatananquit-sine pininqueca aviatimpa.”

⁴³ Iroompaquea icoraquetashiqueriquea irashivantite Aapani Irioshi, iquenapojaque inquitequi itampishitacaapojaqueri.

⁴⁴ Yamenacotavacaguete yatsipemajatanaca, arimpaqueate yamanacoventanacaquea, imasavivaetanaque quempeni irajantsi, ochochorojanaque inirojapae isavi quepatsiqui.

⁴⁵ Ariquea iteroncanajatiguiro yamanacovencaguete icatianaqueate yoanaji itajencashijapojiri itsatacaaneja, yamenajapojiriquea maajiaque, omagotacaanaqueritari ishimampojanicare.

§ 22:39 Irii Mateo icanque yoanaque Jetsemaniqui (pamenero Mt. 26.36). Irraquea Joanca icanquero orivoshiqui (Jn. 18.1). Oratica orivoshi opajita Jetsemani, ochoocaque niganquitapi **Orivotsempiqui**. * 22:42 Icanqueguete Jesoshi **paapitsatenarotate nantsipequempaca** iroguenti ishimampojanacomajatacaro incatarojitanaqueri igovaequishere maasanojia caquinteguettananquitsica quericaca aventajiaquemparineca. Pamenero 1 Pe. 2.24.

⁴⁶ *Icantiriquea:*

—¿Taate pimaantajiacaca? Pintinajajianaque pamanacoventajiguempaquea aatonijite aapojimpitsi covaeguishetacaanaquempineca.

Yaajitaquerigueti Jesoshi

(Mt. 26.47-56; Mr. 14.43-50; Jn. 18.2-11)

⁴⁷ Iroompaquea quenquetsatatsitiraja Jesoshi icoraquecoraqueipojaque caquinteja isaquiriaventajiapocari. Iriraquea itsatacaane pajitatsica Jorashi ijivatapojiri. Yojo-cavaetapojaca quempeji irinintavorotashipojempari[†] Jesoshi.

⁴⁸ *Ariquea Jesoshi icantavaqueri:*

—Jorashi, ¿irootaquempa picoraquetantacaca paacaanqueri Irijanite Caquinte, pinintavorotantamampeacarica?

⁴⁹ Irirajia itsatacaaneja yamenajivaquerigueti maasanojia coraquetashijiaquerica icantiriquea:

—Nomajirote, ¿arite nompejianaquempiquea noncarajivaqueri?

⁵⁰ Aparo itsatacaane icaratavaqueri yashintacaca saserorote anaantamajatanquitsica, iguempitarejitsitari iguempita itincamijempequiquitica.

⁵¹ *Cotanquitsiquea Jesoshi icanque:*

—Ariotaquetsija icocani.

Ipamitsitajiriquea iguempitaqui, jac peamajatanaja.

⁵² *Ariquea Jesoshi iquenquetsatacaajiaqueri saseroroteja anaantajianquitsica, imajirojiate igoaretatepae quempoguijajiguiroca teemporo, aisa jivajiatsica, maasanojia coraquetashijiaquerica aajiaquerineca, icantiriquea:*

—¿Arimpate naroguenti catsimari aapitsatantatsica pamashitantajiaquenaca pit-saampitsantsamenirite aisa inchaquiji?

⁵³ *Oraquea noconoajiguimpigueti nocantacoguitaniquea oraniqui teemporoqui teequa querocaquea pincotimajiguenaji, cotanquitsiquea imaica manatarite aapojaca pagavejantajiaquenaca, iroguentitari iragavejantantaquempaca imajirote pitsecacojiatsica,‡ jero piquejetantajiacaroca imaica.*

Peerero yomanacoqueriquea Jesoshi

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ *Ariquea yajiricajiaqueri Jesoshi, yaanaqueriquea itsovironaquitequi saserorote anaantamajatanquitsica. Iriraquea Peerero yoguijatacovetanacari cotanquitsiquea impoivaetapojaque.*

⁵⁵ *Ariquea oraniqui itsitacajiaque paamari niganqui pampatejjianiquiqui itsovironaquitequi, savisaviitaque itajiaque yanquitacojiacaroquea. Iriraquea Peerero iconoajiapocari isavicapoji.*

⁵⁶ *Iroompaquea amenaqueriquea aparato yashintajitaca itaquegueti, amenitsitanacariquea sorerere ocanque:*

—Iricatica aisa itsipatacari Jesoshi.

⁵⁷ *Cotanquitsiquea yomanacotsitanaca Peerero, icanque:*

—Manquigarentsi, teenicate nontsateriji.

⁵⁸ *Iroompaquea incajaranquiguitetanaquitigui itsipaquea amenaqueri icanqueri:*

—Avirotari aisa itsatacaane Jesoshi.

Icantsitajaquea aisa Peerero:

—¡Teeshinete!

⁵⁹ *Iroompaquea incajaranquiguitevaetanaquegueti arimpaquea icantanaque itsipa:*

—Arimajaca itsipatacari, iriguentitarite Garireaqueitica.

[†] 22:47 *irinintavorotashipojempari.* Yamejiaca joriojia coramani inintavorotavacaajivaca yamenavacaajiacagueti. [‡] 22:53 *Icanquegueti pitsecacojiatsica* iriguenti iquejetacaaca coguishejiatsica. Iriraquea Satanashi iriotaquequea imajirojiate.

⁶⁰ Iriraquea Peerero icanque:

—Tee nontsatsitempiro picantacotaqueca.

Iroompaquea icantanaquitigui Peerero inijanaquequea chaapa.

⁶¹ Ipitsouquitsitanaca Amajirote yamenaquitiri Peerero, ariquea icotanaca iriatimpa iquenquejitanacaroquea icantaquerica Jesoshi incajaranquitica icanqueriquea: “Coajica tequerataguete irinijeji chaapa pomanacoquenaquea 3.”

⁶² Icatiitsitapanajantaquea isotoapanajanti, iraitsitanacaquea ishimampojancaamatanaca.

Ishiroshirontimentajitacari Jesoshi

(Mt. 26.67-68; Mr. 14.65)

⁶³ Iroompaquea maasano coaretajia quempoguijajiaquerica Jesoshi ishiroshirontimentavaecari, icapocapovaetaqueri, oshequi.

⁶⁴ Iponaajiaqueriquea icapoitari icantajiavaqueri:

—Iintsijate pintsatavaqueja taaquea capojaquempi.

⁶⁵ Iquenquetsaguisheventajiaqueri.

Yaajitanaqueriquea Jesoshi icapiocajiacaguete maasano imajirotepa joriojia

(Mt. 26.59-66; Mr. 14.55-64; Jn. 18.19-24)

⁶⁶ Iroompaquea osavincaguitetanaqueguete icapiocajia jivajiguirica joriojia, saserorotejia anaantajianquitsica aisa tsatacaantajiguiroca itioncacotanaqueca Moishishini, maasano. Iroompaquea icajemacaanqueriquea Jesoshi icoacojiaqueriquea.

⁶⁷ Icantiriquea:

—Iintsija pincamanquena, ¿arimajaca aviguentica Quirishitotatsica?§

Icantiriquea iriatimpa:

—Ariguete noncantavequempi: ‘Jeejeguitatsi’, aatotarite piquemisantajianatsi.

⁶⁸ Ariquea noncoacojiavetempiguete, aatoquea picantajigui aviatimpajia.

⁶⁹ Cotanquitsiquea imaica iriraquea Irijanite Caquinte irisavicaquequea itincamijempequiqui* Aapani Irioshi Agavejamajatatsica, incoguitempani.

⁷⁰ Icantajiaqueriquea maasano:

—Arisacanica ¿aviguentimpa Irijanite Aapani Irioshi?

Icanque Jesoshi:

—Naroguitatsi, aviguenti cantaqueeroca.

⁷¹ Ariquea icantajianaque iriatimpajia:

—Iroosacanica, imaica ¿arimpate ancajemacaanque itsipapae incamancajiquea queerocaca icocani iricatica? Jac imaicaquea aquemajiaqueriqueate icantaqueguete iriatimpa.†

23

Yaajitanaqueriquea Jesoshi Piratoqui

(Mt. 27.1-2, 11-14; Mr. 15.1-5; Jn. 18.28-38)

§ 22:67 *Quirishitotatsica*. Iguenquetsatsarequi guiriegojia icanqueguete *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajiatatsica coramanitica intigarancaque Aapani Irioshi impeaquempaniji Imajirojiate maasano. * 22:69 *itincamijempequiqui*. Yamejiaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajirovequempari iranaajiaqueri maasano itsipajia. † 22:71 Iquemajiavaquerogueti icanqueca Jesoshi iquenquejajianaquequea iroguenti iquejemanatanacari Aapani Irioshi. Iriraquea joriojia intsinaquitajitempariquea quericaca quejemanacquemparineca Aapani Irioshi irimetojajiaqueri. Inquejetsijitempari aisa quericaca cantaguishequerineca.

¹ Jero maasanojia icatintijianaca yoayoaitanaque yaajianaqueriquea Jesoshi Piratoqui.

² Iroompaquea yarejerejeipojaca itsojeventajiapojacari, icanquequea:

—Iricaticaquea noquemaqueri icantacantavaequeri nogonorojia itsatacajiaique-
riquea incatsimajiaqueri majirontatsica, aisa icanquequea: ‘Aatoquea pojocagaranta-
jiguiniritsi majirontatsica Sesa pimentaquitsite.’ Aisa manaquea icanque: ‘Naroguen-
tiquea Quirishito Majirontatsica.’

³ Iiraquea Pirato icanqueriquea:

—¿Arimajaca aviguenti Imajirote jorio?

Icanquequea Jesoshi:

—Tampatica poaquero.

⁴ Icantsitariquea Pirato maasano saserorotejia anaantajianquitsica aisa maasano caquinteja:

—Iricaticaquea naatimpa namenaqueriquea teequea taaca opaji impeacaimatempaji
cameetsanijite incatsimatantajitaquemparica.

⁵ Cotanquitsiquea iriatimpajia arimpaquea itampishijianaquequea icantajiaque:

—Arimajaca icantacantajiaqueri maasano Joreaquitica itsatacajianaqueriquea
taaca opajitapae, icatsimatantajianacarica majirontajitsica. Ipariapanajantaroquea
Garireaquei, imaica ariqueeate icoraquepojiqnea acaniqui.

Yaajitanaqueriquea Jesoshi Erorishiqui

⁶ Iroompaquea iquemaquegueti Pirato icantsijigariquea:

—¿Irioca Garireaqueitica?

⁷ Irooquea icanquitigui: “Jeejeguitatsi, iriotaquequea”, itigaranquitsitari Eror-
ishiqui,* iriotaquetari netsanajiguirica Garireaqueitica cotanquitsiquea ichoocapoji
Jerosarequi imaica.

⁸ Iiraquea Erorishi yamenavaquerigueti Jesoshi ishinevaevetanaca icanca inin-
tavecaquea iramenaquerimequea coramani, iquemacotsicariquea iquenquetsatacoji-
taquerigueti, jero inintantacaca iramenaquerimequea cameetsanijite iramenacaajia-
querinijite oacaantantatsica intati.

⁹ Icoacoguevecariquea oshequini, cotanquitsiquea Jesoshi teequea incanteji.

¹⁰ Ariquea ichoocajiaquequea saserorotejia anaantajianquitsica aisa tsatacaantajigu-
iroca itioncacotanaqueca Moishishini. Iriatimpajia arimpaqueate itampishijianaque
itsojeventajianacariquea.

¹¹ Iiraquea Erorishi aisa igoaretajiate ishiroshirontimentavaecari Jesoshi, iquejeta-
caamampeacari majirontatsica, iquitsaatantajiacariquea quitsaarentsi cameetsamore-
namajatanquitsica quempetaroca iquitsaataca majirontatsica. Itigaranquitsitajari Pi-
ratoqui.

¹² Ariquea ivetsinantavacaajiacaca Pirato itsipatajari Erorishi, coramani iroguentiquea
icatsimatavacaajiveca.

Icanque irimetojajiqueri Jesoshi

(Mt. 27.15-26; Mr. 15.6-15; Jn. 18.39-19.16)

¹³ Iroompaquea iriraquea Pirato icapiocajiaqueri saserorotejia anaantajianquitsica,
jivajiguirica joriojia, aisa maasano caquinteja.

¹⁴ Icantiriquea:

* **23:7** Iriratica **Erorishi** irio icantajitica Erorishi Antipashi. Iririni aisa ipajita Erorishi, irio majirontanquitsica
ivoaquegueti Jesoshi (pamenero Irc. 1.5; Mt. 2.1-19).

—Aviatimpajia pamajivetaquenari iricatica picantajiaqueca icantacantavaejianaqueri caquinteja icanqueriquea incatsimajianaqueriquea majirontatsica, cotanquitsiquea naatimpa imaica namenavecariquea teequea inquempeteroji picamantavetapojanaca, inchiquiojiqueate piquemajiaqueri aviatimpajia icantaqueca nocoacovecariguete incajaranqui.

¹⁵ Ariquea iquejetacaquea Erorishi iriatimpa yamenavecaquea teequea impeacaguempaji covaeguisherentsi, jero yoguipiantavajarica. Imaicaquea pamenajiaquequea teequea taaca opajita impeacaguempaji cameetsanijite irimetojaquenijite.

¹⁶ Nantsipetacaavaquemparita ariquea noguipaquijitajempariquea.

¹⁷ Icanqueriquea imaica irooriji icantacoguitani aapojempaguete Paashicoa iriraquea Pirato iroguipaquijajeri aparo isantanatacotimentajiqueca igovaeguishere.

¹⁸ Cotanquitsiquea iquemajiaqueguete icanqueca Pirato, maasanojia icajemajianaque icanquequea:

—¡Irimetojetashine! ¡Irioquea poguipaquijaje Varavashi!

¹⁹ Iriraquea Varavashi iroguentiquea isantanatacotimentajiqueriquea itsipatsipaitacariquea itsipapae guisotoantanquitsinemeca majirontanquitsica Jerosarequi, aisa imetojantaquequea.

²⁰ Iriraquea Pirato inintaveca iroguipaquijajerimequea Jesoshi, icantsijajariquea aisa.

²¹ Cotanquitsiquea iriatimpajia arimpaquea icajemajianaquequea:

—¡Pompajacoteri! ¡Pompajacoteri!

²² Icantsitajariquea aisa Pirato:

—¿Taampate ipeacaaca? Nocoacotsivetariquea namenaqueroquea naatimpa teequea taaca opajita impeacaimatempaji cameetsanijite irimetojanquempaca. Nantsipeta-caavaquemparita ariquea noguipaquijitajempariquea.

²³ Cotanquitsiquea iriatimpajia arimpaquea itampishijianaquequea icajemajianaquequea:

—¡Pompajacoteri! ¡Pompajacoteri!

Caavijiquea icajemamajianaquequea, ari yagavejantajianaque.

²⁴ Ariquea irira Pirato iquemisantajiaqueri.

²⁵ Ariquea yoguipaquijajiriquea iriraquea isantanatacojivecaca itsipajiacariguete itsipapae guisotoantanquitsinemeca majirontanquitsica aisa imetojanqueguete, iriotaquetari inintajiaque iroguipaquijajitajeri. Irirampani Jesoshi, yojocajiaqueneriquea igoretajiate irinetsanajiaqueronijite inintacaajiaquerica caquinteja.

Yompajacojiaqueriguete Jesoshi

(Mt. 27.32-44; Mr. 15.21-32; Jn. 19.17-27)

²⁶ Ariquea yoayoaitanaquequea yaajianaqueriquea Jesoshi irompajacojiaqueri. Itonquivojajiacari Shirenequitica pajitatsica Shimo, iquenavaetapoji ontaniqui niganquitejipaequi. Iriatimpajia yaajivaqueriquea inatacaitsitariquea igoroshite Jesoshi, yogujatacaqueriquea.

²⁷ Isaquiriaventajanacariquea oshequini caquinteja aisa manquigarentsijia ocaramirincavaeque ocanca, iraanajanacariquea oshimampojancacoventajanacari.

²⁸ Cotanquitsiquea Jesoshi yamenajiaqueroquea icanqueroquea:

—Manquigarentsijia Jerosarequitica, aatoquea piraacopianatsi naatimpa, piraacojiaquempa aviatimpajia, aisa piraacotsitempari pirijanijiate.

²⁹ Aapojajempaquea savincaguiteri incantantajitanaquempaca: ‘Iroguenti icavintsa-jamajataque Aapani Irioshi teeca onchoocatimajigueji irijanite, teetarite amenajigueriji irijanite, teequea antsomijigueriji.’

³⁰ Iroompaquea maasano incantajianaqueroquea otsempipae: ‘¡Pintirejanaque pintsinacajiguena!’ Incantajianaqueroquea aisa aatsonquiripae: ‘Poaviotacojiguenajate, pomanacojiaquenaja.’

³¹ Iquempetacaroguetei oratica inchato janatirajaca, ¿quero incojitaquero oroavoaro?†

³² Aisa yaajitanaqueriquea mavite peacaaguishejianquitsica covaeguisherentsi irompajacojiqueriquea, itsipatacaantajiacari Jesoshi.

³³ Iroompaquea yarejerejeipojacaroquea aatsonquiri icantajitica Shocoitontsi, ariquea oraniqui yompajacojiaqueriquea Jesoshi itsipatacaantajiacari irira peacaajianquitsica covaeguisherentsi, aparo yogatiacojiquequea itincamijempequiqui, iriraquea itsipa iroguenti yogatiacojiqueriquea ishinampijempequiqui.

³⁴ Irooquea yompajacojitaqueriguetei Jesoshi ariqueate icotanaca yamanacoventajianaqueriquea ompajacojiaquerica, icanque:

—Aapani, pimpeacotsitajempari iquejejaquenaguetei imaica, teetarite intsajigueji.

Ariquea iriraquea coaretajia ipegavijijiaca intsajiaquenijite taaca aaqueroneca iquit-saaguevecaca‡ Jesoshi.

³⁵ Ariquea ichoocajiaque oraniqui oshequini caquinteja, yamenajiaqueriquea Jesoshi. Iriraquea jivajiatsica ishishirontimentavaecari, icanqueriquea:

—Yantashitacari yompetacoguetacari itsipajia, imaicaquea iriogueti Quirishitotatsica Icoquiaqueca Aapani Irioshi, iintsija irompetacotanaquempa.

³⁶ Ariquea iquempejiaca coaretajia ishishirontimentavaecari, iquempejiquempeji-itanacari yojocajiaqueneriquea vinoja cachonerontokuijajaro.

³⁷ Aisa icantiriquea:

—Aviguentica Imajirote jorio, iintsija pompetacotanaquempajate.

³⁸ Ojenoquipojaqueguetei ishinqureguishipojacaguetei ipatacajitaqueroquea ogota itioncantajicaro iguenquetsatsarepaequi guiriego, Iromaquitica, evereo, ocanque: “Iriguenti Imajirote jorio.”

³⁹ Iquenquetsatanaque aparo peacaanquitsica covaeguisherentsi itsipatacaantajiacarica, icaveitariquea Jesoshi icanqueriquea:

—Irootarite aviguentica Quirishitotatsica iintsija pompetacotanaquempajate aviatimpa, pinquejetacaitsitenaquea naatimpajia aisa.

⁴⁰ Cotanquitsiquea icantomajitari itsipa icanqueriquea:

—¿Arimpate teequea pintsarocaguempariji Aapani Irioshi? ¡Pamenavecaqueate yompajacojiquempi itsipatacaantajiquempiri, pigaanacaquea piquejetanaca imaica!

⁴¹ Aatimpajia atsipejiacaquea apeacajaiaca covaeguisherentsi iquejetacaantantajitacajica imaica, cotanquitsiquea iriatimpa teequea taaca opajita impeacaguempaji, manaqueate yatsipetacajitacari intati.

⁴² Ariquea ipitsocashitariqueate Jesoshi icanqueriquea:

—Jesoshi, pinquenquejacotajenaja naatimpa pincoraquetajeguetei pimajirontapojaguempaguetei.

⁴³ Icanqueriquea Jesoshi:

—Noncantamajataquempiquea ocativa savincaguiteri pintsipatapojaquenaquea paraisoqui. §

Imetojanaqueguetei Jesoshi

(Mt. 27.45-56; Mr. 15.33-41; Jn. 19.28-30)

† 23:31 Jesoshi iquejetacaro **inchato janatirajaca**. Teetarite impeacaimatempaji covaeguisherentsi, cotanquitsiquea yatsipetacajitacari imetojajitaqueri. Irirajia ishiraerijia manintajiaquerica iriojiatari quempecaroca **oroavoaro** inchato intajaiqueca, incatsimamajitaqueriquea. ‡ 23:34 **iquitsaaguevecaca**. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4. § 23:43 **paraiso**. Irimetojagueguetei tsaroveritarica Aapani Irioshi, ari iroanaque ontaniqui paraisoqui, ari inchoocaque irosati aapojempaguetei savincaguiteri intancorjantanajempaca. Pamenero aisa 2 Co. 12.2-4; Yonig. 2.7; Irc. 16.22.

⁴⁴ Oraqueate iquenquetsataqueguetiquea imaica jac tampaticapoji catsirincaiteri, opitsecanaquequeate maasanopae otsitacaguitejavaetanacaroquea oraniqui arejeta-covaeca ijaguitetanajigueti.

⁴⁵ Teequea irivoreitsitajempaji catsirincaiteri. Iroompaquea oraquea omorena ticaamorenatanquitsica teemporoqui jocagatsica aatonijite iquijajitiro intsompogu-iremajacaqui, ariquea opecotarejanaque tampaticaquea niganquisano ocantanaque sarararararara.

⁴⁶ Iiraquea Jesoshi icajemapanajantiquea inirojencamajaca icanca, icanque:

—Aapanii, paavajeroja noshire.

Irooquee icanquegueti imaica, ariquea imetojanaque.

⁴⁷ Iiraquea imajironcaca 100 igoaretajiate Iromaquitica yamenavaquerogueti maasanopae, ishineventavaetanacariquea Aapani Irioshi icanque:

—Arimajaca irica irio comajamajatatsica, teequea taaca opaji impeacaimatempaji.

⁴⁸ Maasanojia choocajanquitsica oraniqui yamenamenaitavaquerogueti maasanopae, yoayoaitanajiquea itinquitinquineguintajianacaquea tin tin tin, ishimampojancavaejianacatari.

⁴⁹ Cotanquitsiquea irirajia tsatirica Jesoshi aisa manquigarentsijia oguijaguijaiquer-ica iquenajiapojigueti Garireaquei icatintijiaca tiijacoñajiquea oraniqui yamenamenai-queriquea.

Yojoquijitantajitariquea Jesoshi imperitamoroqui

(Mt. 27.57-61; Mr. 15.42-47; Jn. 19.38-42)

⁵⁰ Ichooaque aparo shirampari pajitatsica Jose yamajironcaca joriojia, itsipajiacari imajirotepae icapiocapinijiacagueti. Iriguenti pintsatantatsica comajamajatatsica.

⁵¹ Tee inquejetempariji itsipapae majirontajiatatsica cantanquitsica irimetoje Jesoshi. Iroguenti yoguijaqueriquea Aapani Irioshi impeaquempaqueea irimajirontajiaquem-paca maasanojia. Ariguentiquea iquenapoji guinteninintsiqui Arimatea choocatan-quitsica Joreaqui.

⁵² Iriatimpa yoashitanaqueriquea Pirato, icanqueriquea ininque irajaitanajero itsino Jesoshi.

⁵³ Ariquea yoanaque itsopajarejacotajiriquea yampiguiricacotantajariquea iniro-morena shipetari. Ariquea yaanajiriquea yojoquijitantajari imperitamoroqui, iroa-querasanoqueea iqueecajitaquero mapichonquiinaqui, tequeratatiraja irojoquijitanta-jitempariji metojatsica.

⁵⁴ Oraquea imetojantacaca Jesoshi iroguentiquea savincaguiteri inetsanatsitanta-roca joriojia maasanopae tequerataguetei arejetempaji imagorejantajitaca, irooshipoji arejetapojemparo, iroorijite iquijanaji catsirincaiteri.*

⁵⁵ Oraquea manquigarentsijia quenaquenaitapojatsica Garireaquei oguijaguijai-querica Jesoshi icoraquequegueti, oahoaitanaquequeea amenajiaquitiro yojoquijive-cariguetei, amenamajajiaqueriquea querocaca icojitaquerini ipitsantsajajiqueriguetei.

⁵⁶ Iroompaquea ocoraquecoraqueitajiquea tsovironaquiqui onetsanapojajiroqueea poncajaguetatsica iroguentiquea ontiritsinotantaquemparica Jesoshi. Ariquea omagorejajiaque savincaguiteri qui imagorejantajitaca† onetsanajiaqueroqueea icanqueca Moishishini itioncacotanaqueca.

24

Ipochatanajiguetei Jesoshi

(Mt. 28.1-10; Mr. 16.1-8; Jn. 20.1-10)

* **23:54** Iiraquea joriojia yamenavajiriguetei iquijanajiguetei catsirincaiteri ipeavajiroqueea aapojaca imagorejanta-jitaca. Ariquea iquejetacaacaro otsipapae savincaguiteri. † **23:56** *imagorejantajitaca*. Irira joriojia imagore-japinjiaque saavaroqui.

¹ Iroompaquea iroaqueraguetei osavincaguitetamanaque parianajaroca semana* oa-hoaitanaque manquigarentsijia ontaniqui yojoquijijitaqueriguetei Jesoshi aajianaque-quea poncajatsica onetsanajiaqueca.

² Ariquea arejerejeivetapojaca amenajiapojaqueroquea mapi ticaacotantajivecarica jac tigaritaca tanarejanaque.

³ Oquijaquijaivetanaca cajaraguiteni tee anejeriji impitsantsajajempaji Amajirote Jesoshi.

⁴ Oquenquejapoji, teequea ontsateji quero ococani. Iroompaquea amenitsitariquea mavite shirampari† cantacovaequequeate iitsaarequi tsirencavaetaquequea tsiren.

⁵ Ariqueate ocohocoitanaca otsaroamajatanaquequea oguerotsitanaca arejevae-quitaro ovancaqui quepatsiqui. Iriatimpajia icanqueroquea:

—¿Quero ococani pamentaguetajatarica anijatsica acaniqui yojoquijipinijitiriguetei metojaripae?

⁶ Teequea anejeriji acaniqui, pochatanaji. Iintsijate pinquenquejajiajerojate icantaji-aquempiguetei ichoocavetacaguetei ontaniqui Garireaqui, icantacotacaquea icanque:

⁷ ‘Iriaquea Irijanite Caquinte iracaantajiqueriquea irajiaiqueriquea covaequishe-jiatsica irompajacojiaqueri, iroompaquea aapojajempaguetei 3 savincaguiteri im-pochatanaje.’

⁸ Ariquea iroatimpajia oquenquejajianajiroquea icanqueca Jesoshi.

⁹ Coajica ocoraquecoraqueitaji tsovironaqui qui ocamantajiapojiri itigarancanejia carajajatsica 11, aisa itsipajia.

¹⁰ Oratica camantajiapojaquerica itigarancanejia iroguentijia Maria Magararaquit-ica, Joana aisa Maria iriniro Santiago aisa otsipapae otsipatsipaitanacaca.

¹¹ Cotanquitsiquea iriatimpajia teequea inquemisantajigueroji. Yamenajiaquequea manacaja oquenquetsatamampeajiaquea intati.

¹² Cotanquitsiquea Peerero icatiitsitanaca ishiamajatanaca yojoquijijitaqueriguetei Jesoshi, yamenamorovepojacaro intsompoguiqui cajaraguiteniqueate, iroguentiquea yamenaguepoji omagopae yampiguiricacotantajivecarica. Ariquea yoanaji tsoviron-aqui qui, yamenanaquequea intati.

*Yoajianaque mavite itsatacaane Jesoshi Emaoshiqui
(Mr. 16.12-13)*

¹³ Iroompaquea coajica incajaranquiguitetanaqueguetei yoajianaque mavite itsat-acaane Emaoshiqui. Inquenantapojaquemparoguetei Jerosare, arica ocarataque 11 quiromeetero.

¹⁴ Iroompaquea ari yoayoaitanaquequea quenavoquirontsiqui iquenquetsatavacaa-jianaca iquenquetsatacojianaqueri Jesoshi querocaca icojiquerini imetojajiqueriguetei.

¹⁵ Irooquea iquenquetsajianaqueguetei, icoraquepojaque Jesoshi iriatimpa itsipatsi-paitanacari yoayoaitanaqueguetei.

¹⁶ Yamenajiavecariqueate, cotanquitsiquea querocaquea icohicoitaquerini Aapani Irioshi aatonijite itsajiguitsi iriguentica Jesoshi.

¹⁷ Ariquea icantiriquea Jesoshi:

—¿Taaqueate piquenquetsatacojianaque imaica?

Iriatimpajia icatintiitanaca ishimampojancajiaquea.

¹⁸ Aparo ipajita Quereopashi, icanquequea:

—¿Arimpate aparoquea picocani aviatimpa teequea pinquemacoteroji iquenquetsat-acojiaqueca maasano ontaniqui Jerosarequi? ¿Querocaquea picocani aviatimpa aparo pichoocataji teequea pinquemacoteroji chapinquitica?

* **24:1** Iroguenti opariantanaja **semana** savincaguiteri tominco. † **24:4** Ocanqueguetei **mavite shirampari**, iriotaquequea irashivantijitete Aapani Irioshi, amenajiaqueri quempetaca caquinte.

¹⁹ Iriatimpa icantsitariquea:

—¿Taaqueate opajita chapinquitica?

Icantiriquea:

—Orate imetojaquegueti Jesoshi Nasarequitica. Iriatimpa iriguentiquea tsavetantatsica agavejamajatatsica nigaantaguequero ca oacaantantatsica intati, aisa itsamajati canca itsatacaantaquegueti. Iriraquea Aapani Irioshi ishineventamajatacari oshequi, ariquea iquempejiaca maasanojia caquinteja.

²⁰ Iroompaquea iriraquea saserorotejia anaantajianquitsica aisa amajirojiate yaajianaqueriquea yojocapojiniri incantacaantajiaqueriquea irimetojaque, ariquea yompajacotsitari.

²¹ Iroaqueraguetei namenajivecaquea ari irioji ompejiacajineca aatimpajia ishi-raerijia aatonijite yashintajiajitsi itsipapae cameetsanijite anchoocajiajenijite intati. Imaicaquea yanaacovaetanaca 3 savincaguiteri imetojaque.

²²⁻²³ Cotanquitsiquea oconoagarantajia manquigarentsijia notsipatsipaitacaca oahoitanaque incajanganquini pitsecaguitetirajaguetei amenajiajaterime yojoquijijivecariguetei, cotanquitsiquea teequea anejeriji. Iroompaquea ocoraquecoraqueitaji omintsaraojiaquenaquea ocamantajia pojanaguetei amenajiaqueriguetei irashivantijitete Aapani Irioshi icamanqueroguetei jac pochatanaji.

²⁴ Iroompaquea iconoagarantajiaquea notsipajiacaca yoayoaitaquitiquea iriatimpajia yamenajiaquitiro, icantajiaque onetsanamajapojiroqueate teequea anejeriji Jesoshi.

²⁵ Iroompaquea icantiriquea Jesoshi:

—¡Tequeratamajaca pintsatimajigueji! Teetari paitsitavaquemparoji maasano icantajivecaca tsavetantajiguero ca canquerica Aapani Irioshi coramanitica.

²⁶ ¿Arimpaquea teequea incanteji iroquetitaquea irantsipevaequempaquea Quirishitotatsica maasano ocatica, coajica intsajitaqueri iriguenti Oganejencamajatatsica ariquea impeamajatanaquempaquea imajirote maasanojia?

²⁷ Iroompaquea iparianacaroquea itsatacajiaqueriquea maasanopae Itioncacaantaqueca Aapani Irioshi tsavetacotsitacarica iriatimpa, ipariapanajantaroguea itioncaca cotanaqueca Moishishini ariquea iquejeguetaqueroquea aisa itioncacojianaqueca tsavetantajiatatsica iriatimpajia, yoguisotojiaqueneriquea.

²⁸ Iroompaquea yarejerejeipojacaro Emaoshiniqui, yamenajiguiriquea Jesoshi arimpaquea iroanaqueme,

²⁹ cotanquitsiquea yaajjavajiri icantiriquea:

—Intsija aatoja poguitsi. Noninque pimaimojianaquenaja naatimpajia, irootapojajitarite ompitsecanaje.

Ariquea iquijaquijaitanaque intasompoguiqui itsipatsipaitanacari.

³⁰ Ariquea isavisaviique shitaponcarontsiqui irishecajiaquempaquea. Iriatimpa yaitsitaroguea pan yamanaqueriquea Iriri ishinevencaroguea, ariquea icotarejaqueroquea yojocajiaqueneriquea.

³¹ Ariquea oquejevetaca iroaqueraguetei ipityaquirejanaque, itsajianajiriquea iriguenti Jesoshi, cotanquitsiquea iriatimpa jac ipejaencatapsitanajari.

³² Icantavacaajianacaquea:

—Arisacanica pinquenquejajero incajanganqui ontaniqui quenavoquirontsiqui iquenquetsatacaavacajiguetei yoguisotoacajiroguetei Itioncacaantaqueca Aapani Irioshi queroquea ocojianaajini ochagashirentajianacajiquea ashirejiaqui oshinetacaavaetanacaji.

³³ Iroompaquea icaticatiitsitanaca yoayoaitanaji icantacantaitanaja Jerosarequi. Yamenajiapojajiri itigarancaneja Jesoshi carajianquitsica 11, omporoguijajia ca itsipatsipaitacari itsipapae.

³⁴ Iriatimpajia icantavaqueri:

—Arimajaca pochatanaji Amajirote, yonigaavetajari Shimo.

³⁵ Ariquea icamantajiaqueriquea iriatimpajia aisa querocaquea icojiaquerini itsipatsipaitanacariqueti quenavoquirontsiqiqui teequea intsajigueriji, iroompaquea yamenajajirigueti tsovironaqui qui icotarejaquerogueti pan, ariquea itsatantajiacarica iriguenti Jesoshi.

Jesoshi yonigaajajari itsatacaanejia

(Mt. 28.16-20; Mr. 16.14-18; Jn. 20.19-23)

³⁶ Choocatirajaquea quenquetsatavacaajianatsi, taampinaquea icatiimojiapojajari Jesoshi, icantajiapojajiri:

—Pishinejianajempa.

³⁷ Iriatimpajia itsaroajianaque oshequi itsaroacaajianacariquea yamenajiaqueriquea iriocaja sashinti.

³⁸ Cotanquitsiquea Jesoshi icantiriquea:

—¿Taaca pitsaroacaimentajiaquena? ¿Quero ococani piquenquejajiaqueca imaica?

³⁹ Iintsija pameneja intati nacoqui aisa noguitiqui yompajacojiquenagueti. Naroguentiquea. Pinchagajiguenaja pamenamajataquenaniijite. Irraquea sashinti teetarite onchoocateji itsino aisa itonqui, tee inquejetenaji naatimpa imaica pamenajiaquenagueti.

⁴⁰ Irooquea icantajiaquerigueti imaica yamenacaajiaqueriquea iracoqui aisa iguitiqui yompajacojitaquerigueti.

⁴¹ Cotanquitsiquea yamenajiaqueriquea tee iragavejajiajempaji inquenquejavajero, caavijitarite ishinemajajianaca yamenamenaitanaquequea intati, icantantacarica Jesoshi:

—¿Chooca pisheca?

⁴² Ariquea yojoquitsitanariquea shima jocavoquiri.

⁴³ Yaitsitariquea ishecatacari, yamenacojiaqueriquea maasanopae.

⁴⁴ Ariquea icantiriquea:

—Imaicaquea imaica maasanopae pamenajiaqueca irootaquequea notsatacajiaque-mpica coramani choocatirajanagueti notsipatsipaitaquempigueti, nocanquegueti ontsanamajatanaquempa quea maasanopae itioncacoquenagueti Moishishini aisa itioncacojianaquenagueti tsavetantajiatasica aisa paperiqui Saremó itioncacotanaquenagueti Taavini.

⁴⁵ Iroompaquea iriatimpa yagavejacaajiaqueriquea intsamajajianaqueronijite taaca opajitapae ocantacoqueca Itioncacaantaqueca Aapani Irioshi, icanqueriquea:

⁴⁶ —Ariquea oquejetacaquea imaica itioncacojiquerogueti ocanque irantsipevae-quepa Quirishitotatsica irimetojaque, cotanquitsiquea aapojempagueti 3 savincaguiteri impochatanaje.

⁴⁷ Ariquea intigarancaqueri tsavetantajiatasica, intsavetantimojiaqueriquea maasano caquinteguetatsica incantajiaqueriquea irovashiantajianajero ipeacaaguishevecaca covaeguisherentsi incantashitatijaijanajempa quea cameetsanijite irishetacojiajerinijite Aapani Irioshi aatonijite icatsimatimentiritsi icovaeguishejiacagueti. Ariquea omparianaquemparoquea Jerosarequi, onquejetaquempa quea imaica arejevaetanaquemparoquea ontsitacaguetejavaequemparoja maasanopae quepatsi.

⁴⁸ Aviatimpajia pamenamajajiaqueroquea maasanopae, imaica aviatimpa tsavetantajiaqueroneca.

⁴⁹ Naatimpa nontigaranquimojiaquempiriquea icantsitacaca Aapani intigarancanquimojiaquempi, cotanquitsiquea pinchoocajiguetaja acaniqui Jerosarequi aatota poapoaiti osamani. Poguijajiguetaja intigaranquimojiaquempiri Aapani agavejacaajiapojempineca poneanquitsineca jenoqui.

Yatsomajanajagueti Jesoshi
(Mr. 16.19-20)

⁵⁰ Iroompaquea Jesoshi itsipatsipaitanacari itsatacaanejia irooshipojigueti Vetani-aqui. Ariquea icantajempequitanaaja iraco yamanacoventajianaqueriquea.

⁵¹ Irooqueea iquejetanaquerogueti imaica yamanacoventajianaquerigueti yamena-jiguiriquea yatsomajanaja yoanaque, yaajitanajiri jenoqui inquitequi.

⁵² Itsaromentajavajari, coajica yoayoaitanaji Jerosarequi ishinejianaca icanca.

⁵³ Icantacoguitani yoayoaitapinijigui teemproqui ishineventajiacari Aapani Irioshi.

QUENQUETSATSARENTSI OGANEJENCATATSICA ITIONCAQUECA JOANCA

Antsatantaquemparoca

Ocatica iroguenti antsatantaquemparoca itioncaqueca Joanca irijanite Severeo itioncacotaquerigueti Jesoquirishito. Joanca iriguenti jorio guintenitanquitsica quepat-siqui icantajitica Garirea. Iriguenti itigarancane Jesoshi. Itsipatacari iriguentijeguete icantajitica Santiago iriguentijia quitsatacotirica shima tequeratagueti incajemajigueri Jesoshi iroguijatanaqueri. Irocashi itsavetacotaqueri Joanca paperiqui icantajitica *Yantajiguica Itigarancanejia Jesoshi* (Ya. 3.1–4.22). Itsipatacari Jesoshi itsatacaantigueti, cotanquitsi itsavetantacagueti quejetacaquea irio tioncaquero itsipa. Pampatsajavancotaquerigueti itsatacaane Jesoshi ipintsamajatacaca, iriotaque Joanca irijanite Severeo, cotanquitsiquea tee incanteji “naroguenti”. Chooa itsipa Joanca irijanite Sacaria, iriotaquequea icantajitica Joanca Viñacajatantatsica.

Iquenquejaitaque itioncaquero ocatica paperi ichoocaquegueti guinteninintsiqui icantajitica Epeso. Tecatsi tsamajaterone ajagantsini itioncaquerogueti, cotanquitsi chooca quenquejanquitsica arica itioncaquero ajagantsiniqui 85 irooca otsipa ajagantsini arejevaetacaró 98. Irirajia Maricoshi, Irocashi aisa Mateo itioncajiaquero ivaperitepae tsavetacoquerica Jesoshi tequeratagueti intionqueroji Joanca ocatica. Itioncaquero 3 paperipae cacaajaniquitanquitsica tequeratagueti intionquero ocatica tsavetacotaquerica Jesoquirishito. Oratica cacaajaniquitanquitsica opajijiga *1 Joanca, 2 Joanca, 3 Joanca*. Impojitapojatsica itioncaquero aisa paperi icantajitica *Yonigaajiguerica Joanca*.

Itioncaquegueti Joanca jeroquea inintamajataque antsajiaque: iriraquea Jesoshi iriovetaca caquinte cotanquitsi iriguenti Irioshi. Joanca itsavetacoguetaquero yamejigaca joriojia, irootaque atsatantacaca itioncaqueneri teeca iriojia joriojia cameetsaniji intsatantajiaquempaca iriraquea Jesoquirishito irio Meshiashi itigarancaqueca Aapani Irioshi, iriotaque irijanite Aapani Irioshi (Jn. 20.31). Irootaquequea caarica ipariantaro intsavetacotaquero ivoantacaca Jesoshi, iroguenti iparianacaró icamantajiacaji iriguenti Jesoshi peacaacaroca maasano. Irio tsavetacomajaqueroica iquejetacaacagueti Jesoshi itsatacaantaquegueti: Jesoshi iriguenti Irovejajaniquite Aapani Irioshi (1.29, 36); Jesoshi iriguenti pan anijacaantantatsica (6.35, 47-51); iriguenti Tsirencari (1.4-12; 13.19; 8.12; 9.5); iriguenti cameetsari quem poguijamajajiguirica oveja (10.11-15); iriguenti quejecaroca quenavoquirontsi (14.6); iriguenti quejecaroca ovorentsamajaca ova (15.1-8). Irira Joanca irio tsavetacomajataqueroica oratica savincaguiteri iroshipojigueti irimetoje Jesoshi, itsavetacomajaquero yantaguetaqueca aisa itsatacaantaqueca pitsecariqui oratica savincaguitერიqui (capitoropae 13-17) aisa coajica ipochatanajigueti (cap. 20-21).

Iparianacaroqueate Joanca itsavetanqueriqueate irira icantajitica Quenquetsatsarentsi

¹ Iroaqueragueti igantaga ichoocataque Quenquetsatsarentsi.* Irira Quenquetsatsarentsi itsipatacariqueate Aapani Irioshi. Irira Quenquetsatsarentsi, iriotaque Irioshi.

² Irio itsipatacaca Aapani Irioshi iroaqueragueti.

* **1:1** Irira icantajitica **Quenquetsatsarentsi** iriotaque Jesoquirishito. Pamenero otsapa 17, jero aisa 1 Jn. 1.1-3.

³ Iriotaquequeate peacaaguetacaró maasano choocaguetatsica. Tee onchoocatashitempajiqueate teeca impeacaguemparo iriatimpa, aisa aatomegueti ichoocatime iriatimpa aato ochoocaguetime.

⁴ Iriatimpa iriguentiqueate anijacaantantatsica, aisa iriratica anijacaantantatsica iriguentiquea tsirencacojiaquerica caquinteja.†

⁵ Iriaquea Tsirencari itsirencaque pitsecariqui, cotanquitsi pitsecari tee agavejava-
jeriji.

⁶ Ariqueate ichoocadini caquinte itigarancaqueca Aapani Irioshi, ipajita Joanca.

⁷ Iroguentiqueate icoraquetashitaque intsavetanqueriqueate irira Tsirencari, cameetsanijite iraventajivaquemparinijite maasano.

⁸ Iriaqueate Joanca teequeate irio Tsirencari, iroguenti icoraquetashitaque intsavetanqueri Tsirencari.

⁹ Icoraquetapojaquequea quepatsiqui irira Tsirencarimajaca tsirencacojiaquerica maasano caquinteja.

¹⁰ Ichooataque quepatsiqui, iriotaquequea peacaavetacaró quepatsi, cotanquitsiquea irirajia quepatsiquitica teequea intsajivajeriji.

¹¹ Icoraquetantavetacaróquea quepatsi yashincaca iriatimpa, cotanquitsi irirajia yashintajiacaca teequeate irishineventajivajempariji.

¹² Cotanquitsi maasano shineventajivacarica, aventacaróca ivajiro, irio icantacojiaqueca cameetsa impeaquempa irijanijiate Aapani Irioshi.

¹³ Oraqueate ipeacaajiacarigueti irijanijiate Aapani Irioshi teequea onquempetemparoji yoacaantigueti caquinte, aisa teequea onquempetemparoji inintigueti caquinte iroacaantaque, iriguentitari nintanquitsi Aapani Irioshi irijanintantaquemparica.

¹⁴ Iriaqueate icantajitica Quenquetsatsarensi icaquintetapojaque iguintenitimo-
jiapojacaji. Namenajiaqueriqueate yoganejencamajata, iriguentitarite Irijanite Aapani Irioshi apaniroquea icoca iriatimpa, caavijiquea icavintsajantavaetaque, aisa teequeate iramatavijanteji.

¹⁵ Iriaqueate Joanca itsavetacotaquerigueti iririjencani icanti: “Iriguentitarite irira noquenquetsacotaqueca iroaqueragueti nocamantajiaquempiqueate nocanti: ‘Iri-
raqueate impoitapojeneca yanaaquenaquea, iriquetitari choocatatsi.’ ”

¹⁶ Iriatimpaqueate caaviji icavintsajantamajati, icancani icavintsajapinijiacaji aatimpajia maasano.

¹⁷ Aritarite oraquea Cantacaantanentsi, irio Moishishini yojocacaitaquene, yogaaqueneri itsipajia; orampani cavintsajantamajatagantsi aisa iroomajatatsica, iriguentiquea Jesoquirishito amaquero.

¹⁸ Tecatsi nejmaterine Aapani Irioshi, cotanquitsi irira Irijanite apatirotica itsipamajatacaca itsatacaajiacajiqueate quero icotani Iriri.

*Joanca Viñacajatantatsica itsavetanqueriqueate Jesoshi
(Mt. 3.11-12; Mr. 1.7-8; Irc. 3.15-17)*

¹⁹ Iriaqueate joriojia Jerosarequitica itigarancajiaqueriqueate saserorotejia jerijia aisa irevitapae incoacojiaqueri Joanca taaquea inaque.

²⁰ Ariqueate teequeate iromanacotempaji iriatimpa, tampatica yoaquero icanquerica, icamantamajajivaqueri icantajiguiri:

—Tee naroguenti Quirishito.‡

²¹ Ariqueate yapijitajiriquea aisa icantajiguiriquea:

—Iroosacanicate, ¿taampate aviguenti? ¿Aviguenticajate Iriashini?

† **1:4 tsirencacojiaquerica caquinteja.** Iroguentiqueate icoraquetashitaque mananijite intsatacaajiaquerinijite teeca intsajivetempaji quempecaquea manaca itsirencacojiaqueriqueate pitsecacojianquitsica. ‡ **1:20 Quirishito** ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraquetaque impeaquempa imajirote ompejiaquemparineca.

Icantiri:

—Tee naro Iriashini.

—¿Aviguenti irira tsavetantatsica nagamajajiavacaca?

—Tee.

²² Ariqueate yapijitsitajariquea aisa icantajiguiriquea:

—¿Taampate aviguenti? Iintsijate poguisotoguenaro noncamantantajiapojemparica tigarancaquenaca. ¿Querocagueti pincanqueni? Intsija pincamantacotempa.

²³ Ariqueate icantajiaqueriqueate Joanca:

—Naroguentiqueate quenquetsatatsica oquitamampororoipojaquegueti niririjencani, nocantapinitaquequea: ‘Pintanarejagueteneri iguenavoquiro Amajirote ontampaticapoquitantanaquem-paca’, § irootaqueitari itioncaqueca tsavetantatsica Isaiashini coramani.

²⁴ Iriiraqueate coacojiaquerica Joanca iriguentiquea tigarancajiaqueri pariseojia.

²⁵ Ariqueate icantajiaquequea:

—Iroosacanicate teesacanicate aviguenti Quirishito, tee aviguenti Iriashi, aisa teequeate aviguenti tsavetantatsica coraquetanquitsineca. ¿Queroqueate ocotacani piviñacajatantacarica agonorojia?

²⁶ Icanti Joanca:

—Naatimpa noviñacajatantacaro oja, cotanquitsi choocaqueate conoaquempica teeca pintsajigueriji.

²⁷ Iriguentitarite impoitapojenaneca, cotanquitsi iriqueti choocatatsi. Caaviji yanaaquenaquea, aatotarite noquempejitaritsiquea iriatimpa nompeaquempame amiquerineca noishorejacoquerime igaviguitire.

²⁸ Irirajiaqueate coacojiaquerica ariquea yoashijianaqueriqueate Vetaniaqui, choocatatsica intatiquero Jororanequi, aritari iviñacajatantaque Joanca oraniqui.

Jesoshi iriguentiqueate Irovejajanique Aapani Irioshi

²⁹ Ariqueate osavincaguitetanajiguete irira Joanca yamenavaqueriqueate Jesoshi icoraquepojaqueguete icanti: “Jeri irinta Irovejajanique Aapani Irioshi shejiaquenerineca iguempvaere caquinteja.

³⁰ Iriotaquequeate notsavetantaqueca chapinqui, nocantiqueate: ‘Incoraquetaque shirampari impoitapojenaneca yanaaquenaquea, iriquetitari choocatatsi.’

³¹ Naatimpaquea aisa teequea nontsavetempariji, cotanquitsi nocoraquetaque noviñacajatantaguetantacaro oja cameetsanijite intsajiaquerinijite maasano ishiraerijia.”

³² Ariqueate icanti aisa Joanca: “Namenavaqueri Ishire Aapani Irioshi iponeapojaca jenoqui inquitequi iquejetapojacari emoreni, yampiguiricashipojacariquea Jesoshi, ichoocapojiri.

³³ Iroaqueraguete tee nontsavetempariji, cotanquitsi iriraquea tigarancaquenaca noviñacajatantacaro oja icanquenaquea: ‘Quericaca pamenavaqueri irampiguiricashitapojempari Noshire inchoocapojeri, iriotaque viñacajatantacari Noshire.’

³⁴ Namenamajatavaqueriqueate, irootaquequeate nocantantacaca iriguentiqueate Irijanite Aapani Irioshi.”

Iriquetica ipeajiaqueca Jesoshi itsatacaane

³⁵ Ariqueate osavincaguitetanajiguete iriraqueate Joanca ichoocataji oraniqui itsipajiacari mavite itsatacaane.

³⁶ Iroompaqueate yamenavaqueri Jesoshi yavisanaque, icanti:

—Jeri irinta Irovejajanique Aapani Irioshi.

§ 1:23 Icanqueguete *Pintanarejagueteneri iguenavoquiro Amajirote ontampaticapoquitantanaquem-paca*, ocantacotaque irinetsanajiguempa, incomajatashijivaquempariqueate Amajirote. Is. 40.3.

³⁷ Iroompaqueate iquemajiavaquitiguiriqueate itsatacaane mavite ariqueate yoguijaguijaitanaqueri Jesoshi.

³⁸ Ipitsocanacaqueate Jesoshi yamenavaqueri yoguijaguijaipojaqueriqueate icantajiguiriquea:

—¿Taate piningue?

Iriatimpajia icantajiguiriquea:

—Tsatacaantantatsica, ¿quero pichoocaqueni?

³⁹ Icanti Jesoshi:

—Jameja pamenaquitero.

Ariqueate yoajianaque yamenaquero, ariqueate isaviquimotapanajantiri oratica savincaguiteri, iroorijite tsaparoncaguitetanaja catsirincaiteri.

⁴⁰ Apaniroqueate quemavaquerica Joanca oguijatanakerica Jesoshi, iriguenti Antirishi iriguentijeguite Shimo Peerero.

⁴¹ Ariqueate iriatimpa iroqueti yoaquiti icoaguequitiri iriguentijeguite, inejapojaqueriqueate icampojeri:

—Nonejajiaqueri Meshiashi —ocantaque: “Quirishito.”*

⁴² Ariqueate itsipatanacari ichoocaquegueti Jesoshi. Iroompa yamenavaquerigueti icantiri:

—Aviguenti Shimo, irijanite Jonashi. Imaicaquea imaica pincantajempa Sepashi —ocanque: “Peerero”.†

⁴³ Osavincaguitetanajiguetiqueate iroanaje Jesoshi Garireaquí. Ariquea inejaqueri Jeripe icantiriquea:

—Poguijatanaquena.

⁴⁴ Iriaqueate Jeripe ari iguintenita Vetsiraquí iguintenitagueti Antirishi aisa Peerero.

⁴⁵ Ariqueate irira Jeripe yoanaquequeate icoaguequitiri Natanaere, iroompaqueate inejapojatiguii icantiri:

—Nonejajiaqueriquea irira itioncacotanaqueca Moishishini coramani jerijia aisa itsipa tsavetantajiatsica. Iriguentiqueate Jesoshi Nasarequitica, irijanite Jose.

⁴⁶ Icantiriqueate Natanaere:

—¿Choocampaca cameetsatatsica poneanquitsica Nasarequí?

Icantiriqueate Jeripe:

—Caacatejate pamene.

⁴⁷ Iriaquea Jesoshi iroompaquea inejavaquitatiguii icoraquepojaquegueti Natanaere iquenquetsatacotavaqueri icanti:

—Jeri ishiraerimajaca. Iriatimpa tee iramatavijanteji.

⁴⁸ Icantiri Natanaere:

—¿Queroquea picocani pitsatantavaquenaca?

Icantiriqueate Jesoshi:

—Nonejitsiquempiquea incajaranquí pitsimampeacarogueti iguera tequeratagueti incajemempiji Jeripe.

⁴⁹ Ariqueate icantanaquequeate Natanaere:

—Tsatacaantantatsica, aviguentiqueate Irijanite Aapani Irioshi, aviguentiqueate Imajirote ishiraerijia.

⁵⁰ Icantiri Jesoshi:

* **1:41 Meshiashi** oponeaca iguenquetsatsarequí evereo aisa arameo. **Quirishito** oponeaca iguenquetsatsarequí guiriego. Mavite ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraque-taque impeaquempa imajirote ompejiaquemparineca. † **1:42 Sepashi** aisa **Peerero**. Oraqueate ivajiro Peerero manaqueate ocanque “mapi”. Iroguenti iguenquetsatsarequí guiriego. Iguenquetsatsarequí arameojia **Sepashi** ocanque “mapi”.

—Piquemaquitatigana nocanquempigueti nonejaquempi pitsimampeacarogueti iguera ¿irootaquempa pitsatantapojacaroca picanquenaca imaica? Coajicaqueate pamenaguetavaqueroqueate otsipapae anaaqueroneca oca.

⁵¹ Ariqueate icantiri aisa Jesoshi:

—Imaicaquea noncamantamajajiaquempi, coajicaqueate pamenajivaqueroquea inquite ontanarejanaquempagueti. Iriraqueate irashivantijitete Aapani Irioshi iroaroaitanaque jenoqui, ariquea iraguijiguijitashitapojeri Irijanite Caquinte.‡

2

Iparianacarogueti imapocaquero Jesoshi yonigaanqueroquea yagavejica

¹ Aapojacagueti 3 savincaguiteri ishineventajiacaro imanquigacagueti shirampari Canaqui Garireaquí. Ariqueate ochoocataquequea oraniqui iriniro Jesoshi.

² Icajemacaantajiqueriqueate Jesoshi jerijiaquea aisa itsatacaanejia.

³ Ariqueate oteroncanacaqueate vinoja. Oraqueate iriniro Jesoshi oashitanaqueriquea ocamantaqueri ocantiri:

—Teroncanaca vinoja.

⁴ Cotanquitsiqueate Jesoshi icantiro:

—¿Querocate ocotacani, manquigarentsi, picantantaquenaca naatimpa? Tequeratatarajanica aguempaji nonigaantaquempa.

⁵ Cotanquitsiqueate iroatimpa ocantajiguiriqueate quitajatantiroca vinoja:

—Pinetsanatavaqueroqueate taaca opaji incanquempica.

⁶ Ariqueate choocaqueate oraniqui 6 inirotsentseinapae chomo ipeacaantajitaroca mapi, iroguenti yamejiga iquivantapinijiacaca joriojia. Apaniropaequeate otserajaguetacaró oja arica 50 ritorio, arica 70.

⁷ Ariqueate Jesoshi icantajiguiriqueate quitajatantiroca vinoja:

—Pishatecajaguetajero oja chomoqui.

Ariqueate ishatecajaguetajiro opancojaguetanajaroquea intati.

⁸ Ariqueate icantajiguiriqueate:

—Imaicaquea imaica pinquitajate capichaaji paacotanaqueneriquea vetsicacaantaqueroaca ashecajiacagueti iramenanquemparoquea.

Ariquea yaacojianaqueneri.

⁹ Yamentavacaroqueate oja peananquitsica vinoja, teequeate intsateroji quero oponeacani. Iriguentijiaquea tsajiaqueroqueate quitajatantiroca, iriotari tserajajiaqueroaca oja iroaqueragueti. Iroompaqueate imiraquitigaroqueate icajemaqueriqueate iriaqueraca manquigatananquitsica,

¹⁰ icantiri:

—Iroorijite amejigaro iroquetica ajivajiguiro cameetsajamajatanquitsica vinoja, coajicaqueate iquemajianacagueti irooqueate iquitajaitaque teesaconaca oncameetsajamajateji. ¿Queroqueate picotacani aviatimpa teequeate ari pinquejetero imaica? Manaquea iroquetiquea pimirajia teesaconaca oncameetsajamajateji, irooquea pitsoteajia cameetsajamajatanquitsica.

¹¹ Ocatita oacaantantatsica intati onigaantaqueroaca iragavejane, iroguenti jivatanquitsica imapocaqueca Jesoshi, ipeacaacaroquea ontaniqui Canaqui choocatatsica Garireaquí, yonigaantantacaroca iroganejencare, ariqueate iquemisantajiaqueri itsatacaanejia, yaventajianacari.

¹² Ariquea yoanajiquea Caperenaquí, itsipatanacaró iriniro, iriguentijeguitepae, jerijia aisa itsatacaanejia. Ariqueate ichoocajiaque oraniqui aparopae savincaguiteri.

‡ 1:51 Icanquegueti Jesoshi **Irijanite Caquinte** mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojanquitsica jenoqui inquitequi, icaquintetapojaguetari ivoapojaque.

Jesoshi yoguisotojiaiqueriquea jocantaguetirica viratsi teemporoqui
(Mt. 21.12-13; Mr. 11.15-18; Irc. 19.45-46)

¹³ Ariqueate oquempajipojigueti Paashicoa ishineventajiacaca joriojia, yoanaque-
quea Jesoshi Jerosarequi.

¹⁴ Ariqueate yoavetanacagueti teemporoqui itsaromentantajitarica Aapani Irioshi
iriguentiqueate inejapoji jocantaguetirica caapironcaari aisa oveja jeriqueate aisa jo-
cantaguetirica emoreni, ichoocajiaque oniganquirequi. Ariqueate ichoocajiaquequea
aisa oguipiantaguetirica imentaquipae.

¹⁵ Iriaqueate Jesoshi yaanaque peatsa, yampitaguiquero ishincantajiacariqueate
maasano, yoguivorocajiaqueriqueate yoguisotojiaiqueri itsipatacaantaguecariquea
irovejatepae aisa igaapironcaarite. Ipishoncavoncaquitsiqueriqueate imentaquit-
sitepae oguipiantajiguirica imentaquipae, yapitaquiacoguequero ishitaponcaropae.

¹⁶ Ariqueate icantajiaqueriqueate jocantajiguirica emoreni:

—Paajianajeri pemorenite ontaniqui sotsiqui. Ocaqueate itsovironaquite Aapani
aatoqueate piquejetacagaro yojocantantajiguetirogueti ajaararontsi.

¹⁷ Iriaqueate itsatacaane ariqueate iquenquejajianaqueroqueate ocanqueca ition-
cacojiquerogueti ocanti: “Nontsaneamajaquemparoqueate pitsovironaquite incov-
aeguishejitaquerogueti, osemacaamajatanaquena.”

¹⁸ Irirajia joriojia icantsijigariqueate:

—¿Taaquea cantaquempi piquejetancaroca imaica? Irioca cantaquempi Aapani Irioshi
iintsijate ponigaguenaroja oacaanaquenanea intati irooquea nontsatantajiaquem-
paca iriguenti tigarancaquempi.

¹⁹ Icantiriqueate Jesoshi:

—Iintsija pisoveguero ocativa teemporo, ariqueate aapojempagueti 3 savincaguiteri
nontsitacajeroquea aisa.

²⁰ Icantajiguiriqueate joriojia:

—Jmm aricampa, oraquea ocativa teemporo ariquea yatsipejiacaró yantajiguironi
46 ajagantsini. ¿Queroquea oncoquempani pintsitaquitsitantajemparoca aviatimpa 3
savincaguiteri?

²¹ Cotanquitsiqueate oraquea icanquegueti “teemporo” mana icantacotaca iriatimpa
iquejetacaaca intati, iroguentiquea icantacotaque itsino.

²² Irootaquequeate irirajia itsatacaanejia yamenajiaquerogueti coajica ipochatana-
jigueti imetovetacagueti iquenquejajianajiroqueate ocativa icanqueca iroaquer-
agueti, ariqueate itsajiaque arimaja ocantamajataque Itioncacaantaqueca Aapani
Irioshi coramani aisa maasano icantajiaquerica Jesoshi.

Jesoshi itsajiguirica maasano

²³ Ariqueate aapojacagueti Paashicoa choocatirajaqueate Jesoshi Jerosarequi,
ariqueate oraniqui yantaguetaquero cameetsaguetatsica oacaantantanaque
intati, yonigaajiaqueri yagavejica. Inejajivaqueriquea irootaquequeate
iquemisantantajianacarica oshequini, yaventajianacari.

²⁴ Cotanquitsiqueate Jesoshi itsatavaqueriquea tee arimaja inquemisantamajateriji
maasano, itsajiguiritari maasano caquintejiatsica.

²⁵ Teequeate incogumentempaji incamantajitaqueri quero icojiacani, inchiquiojitsi-
tari itsaque iriatimpa, itsamajatirotari maasano iquenquejajiaqueca caquinte.

3

Jesoshi aisa Nicoremo

¹ Choocaqueate pariseo icantajitica Nicoremo, iriguenti majirontatsica tsipajiacarica
itsipajia imajirojiate joriojia.

² Iriatimpaqueate yoanincanaquequea tsiteniriqui irinejeri Jesoshi, ariquea icampojaqueri:

—Tsatacaantantsica, notsajiaquempi piponeaca Aapaniqui Irioshiqui pintsatacaajiaquenaniyte, teenica inchoocateji agavejatsineca irantaque oacaantantsica intati inquejetaquempiqueate aviatimpa aatoguete iriguenti tsipatari Aapani Irioshi.

³ Iriaqueate Jesoshi icantiri:

—Imaica noncamantamajaquempi, quericaca aatoguete ivojai aisa, aato yagaveji inejiro imajirontaguete Aapani Irioshi.

⁴ Icantiri Nicoremo:

—¿Querocampate incotanajempani quenquevari irivoantajempacate aisa? ¿Arimpate iragavejaque impianajero intompogui omotijaqui iriniro irivoantajempacate?

⁵ Icantiriqueate Jesoshi:

—Imaicaquea noncamantamajaquempiquea, irira caarica voantaro oja,* caarica aisa ivoashirentica Ishire Aapani Irioshi, aatoquea yagaveji iquiji imajirontaguete Aapani Irioshi.

⁶ Iriaquea ovoaqueca tsinotsi, tsinotsi inaque; iri aquea ivoaqueca Ishire Aapani Irioshi, shiretsi inaque.

⁷ Aatoquea poanaque intati nocamantaquempiguete: ‘Picoguimentaca pivojaijae.’

⁸ Iriaquea choviga itampijataque querocaguete inintaque. Ariquea piquemavaqueri itampijatiguete ipojimajencatanaque, cotanquitsi teequea pintsateriji quero iquenajencatapoji aisa quero irojaencatanaqueni. Ariquea iquejetaca maasano ivoaqueca Ishire Aapani Irioshi.

⁹ Icantsitanajariqueate aisa Nicoremo:

—¿Queroquea ocoani oca?

¹⁰ Icantsitanajariqueate aisa Jesoshi:

—Arivetacaquea aviguenti tsatacaajiguirica ishiraerijia ¿arimpate tee pintsateroji oca?

¹¹ Arimajaquea noncamantamajaquempi, manaquea nocamantajavetaquempiro notsajiguica naatimpajia jeroquea aisa nonejaguetica, cotanquitsiquea aviatimpajia teequea pinquemisantajivaqueroji natsatacaajivequempica.

¹² Imaica nocamantajavetaquempiqueate inajiguete acaaniqui quepatsiqui, cotanquitsi teequeate pinquemisantajivaquenaji. ¿Arimpate pinquemisantajivaquena nonquenquetsatacaajivequempiroguete choocaguetsica inquitequi?

¹³ Teequea inchoocateji oanancuetsica jenoqui inquitequi, apaniro irira poneancuetsica inquitequi coraquetancuetsica isaviji. Irio nocantacotaque, Irijanite Caquinte.†

¹⁴ Coramani iri aqueate Moishishini yogatiacotaqueriqueate quejevetarica ca maarini ontaniqui oquitamampororoipojaqueguete.‡ Ariqueate inquejetacaajitaqueri irira Irijanite Caquinte irogatiacojitaqueriquea coajica,

¹⁵ aatoniji ipejaiga maasano aventajiaquemparineca, incoguitempani inchoocaguiteni.

¹⁶ “Aapani Irioshi caaviji ipintsamajatari maasano caquintejiatsica, irootaquequea ipantajiacarica Irijanite irapatiroritsite irimetojaventajiaqueri, aatonijite ipejaijaa maasano aventajiaquemparineca, incoguitempaniqueate iranijajiae.

* **3:5** Oraquea icantajitiguete acaniqui **voantaroca oja**, chooca iquejetacaajitacaca: (1) Chooa cantatsica iriguenti icantacojitaque viñacajatsica yovashiantiroguete igovaeguishere. (2) Chooa cantatsica iriguenti icantacojitaque inianquiare chaajaniquiri. (3) Chooa cantatsica iriguenti icantacojitaque Ishire Aapani Irioshi, anejaqueritari Ishire Aapani Irioshi iquejetacaajitacari oja. Pamenero Jn. 7.38, 39; 4.14. † **3:13** Chooa otsipapae paperi ocanti: **Irijanite Caquinte choocatatsica inquitequi**. ‡ **3:14** Coramani ontaniqui oquitamampororoipojaqueguete yatsicajiaqueriqueate joriojani oshequi camaarinipae. Ariqueate canqueri Aapani Irioshi Moishishini: “Intsija pinquejetacaguempa camaarini, pogatiacoteri inchapoajaniquiqui iramenajiaqueriniji pignonorjia, aatoniji imetajajigui maasano amenajiaquerineca.” Ariqueate yaaque Moishishini voronquise, ipeacaacari camaarini, yogatiacoqueri, ipeantajanajaca oshequi igonorjia.

¹⁷ Teenica irooqueea intigaranquimenteri Irijanite acaniqui quepatsiqui incantacaantajiaqueriqueate caquintepae iroajianaque camorecariqui, iroguentiquea itigaranquimenqueri irajiajateri.

¹⁸ Quericaca aventaquemparineca aato icatsimatimentajitiri igovaeguishere, iriraqueate teeca iraventempariji irioqueea icantacotsica Aapani incatsimatimentajiqueri igovaeguishere, teenica iraventemparoji ivajiro Irijanite Aapani Irioshi irapatiroritsite.

¹⁹ Jeroqueea icantimentantajiacarica: icoraquevetaca Tsirencari quepatsiqui, cotanquitsiquea irirajia caquinteja iroguenti inintamajajianaque pitsecari, teequeea irishin-eventajiavaquempariji Tsirencari, covaeguishetacatarari yantajiaqueca.

²⁰ Maasanotari antaguishejiguiroca quempevaerentsi isemamajajiacaro tsirencari, teequeea incoraquetashitero aatoniji inejitajitiri yantaguishejiaqueca.

²¹ Cotanquitsi iriraqueea comajamajatanquitsica icoraquetashitaquero tsirencari, cameetsanijite irinejitsijiqueriqueate yantaqueca intsajitaquerinijite iriguenti agavejacaqueri Aapani Irioshi.”

Joanca Viñacajatantsica itsavetantajiriquea Jesoshi

²² Ariqueate yoanaque Jesoshi Joreaquei itsipatsipaitanacariqueea itsatacaaneja. Ariqueate ichoocajiaque oraniqui oshequi savincaguiteri iviñacajatantajiaquequea.

²³ Ariqueate iquejetaca irira Joanca iviñacajatantaquequea Enonequi quempeji Sarime, choocatarite oshequi oja oraniqui. Icoraquetashipinijiaqueriqueate oshequi caquinte iviñacajajiaqueriquea.

²⁴ Tequeratatirajatari irashitacojiteriji Joanca santanaqui.

²⁵ Ariqueate irira itsatacaaneja Joanca itsipajiacari itsipa irapijorioteni iquenquetsatavacaaca iquenquetsatacotaquero ora taaca opajita caavijica osaancanti.

²⁶ Ariqueate yoashijianaqueriquea Joanca icantajiguiari:

—Tsatacaantantsica, iriraqueate pitsipatacaca chapiniqui ontaniqui intatiqueroqui Jororanequi pitsavetantaqueca imaica choocaquea iviñacajatantaque. Yoashijianaqueriquea maasano.

²⁷ Icantajiguiriqueate Joanca:

—Teequeate inchoocatimateji agavejanquitsineca inchiquioji aatogueti yagavejacaguiari irira choocatanquitsica inquitequi.

²⁸ Aviguentiquea quemajiaquena nocamantaquempigueti teequeate naroguenti Quirishito, iroguentiquea itigaranquimenquena Aapani Irioshi nojivataqueri.

²⁹ Pamenerija iriraqueate iriaqueraca manquigatanquitsica iriotaque ashintamajacaro imanquigare. Iriraqueea itsipatacaca manaqueea itsipatacari intati iquemisanqueriqueate iquenquetsaquegueti, ishinevencariqueea intati. Ariqueea noquejetaca naatimpa noshinevencariqueea namenaquerigueti yoashijianaqueri.

³⁰ Imaica arimaja oncotanaquempa iriatimpa arimpaqueea iranaantamajatanaque, naatimpa aatosaconaquea nanaantaji.

³¹ “Iriraqueate poneanquitsica jenoqui yanaamajataqueri maasano. Iriraqueate quepatsiquitica iquejejiacariqueate igonorojia, manaqueate iquenquetsatacotaquero inejaguetica quepatsiqui. Iriraqueate poneanquitsica inquitequi yanaamajataqueri maasano,

³² iroguenti itsavetantagueque inejaguetica, iquemaguetica, cotanquitsiquea tee inquemisantajitavaqueroji itsavetantaqueca.

³³ Cotanquitsiquea quericaca quemisantamajatavaqueroneca incanquequeea arimajaquea icantamajataque Aapani Irioshi.

³⁴ Aritarite iriraqueea itigarancaqueca Aapani Irioshi iquenquetsataque icanqueca Aapani Irioshi, teenica intsaneguempariji Aapani Irioshi Ishire.

³⁵ Aapani Irioshi ipintsamajatacari Irijanite, yojocaqueneriquea maasano choocaguetatsica.

³⁶ Iriraquea aventacarica Irijanite Aapani Irioshi, yashintacaro anijagantsi coguitatsineca. Irirampani teeca irininteji inquemisanteri Irijanite Aapani Irioshi, aato yameniro anijagantsi, manaquea ocancani ochoocaqueri igatsimare Aapani Irioshi.”

4

Iquenquetsatacaaquero Jesoshi Samariaquitica

¹ Ariquea pariseojia iquemacojiaqueriqueate Jesoshi arimpa yoshequiaqueri itsatacaanejia, caavijiquea yanaantaque iviñacajatantaguetanaque, yanaanaqueriquea Joanca.

² Cotanquitsi teequea arimaja irio viñacajatantatsine Jesoshi, iriguentiquea viñacajatantantsiquea itsatacaanejia.

³ Ariqueate iriraquea Jesoshi iroompaquea iquemacocagueti iquenquetsatacojiqueri, isotoantanajaro Jorea, yoanajiquea Garireaqüi.

⁴ Oraquea yoanajiguete manaquea iquenanjia Samariaqui.

⁵ Oraniquiqueate Samariaqui yarejetapojacaro guinteninintsi icantajitica Shicare oquempajiquero quepatsi yashintavecaca Jacovoni coramani yojocanajinirica irijanite icantajitica Jose.

⁶ Ariqueate ochoocataque oraniqui oja iqueecacotinica Jacovoni. Imagotapojiqueate Jesoshi yanijitaquegueti quenavoquirontsiqüi, ariqueate isavicapoji oraniqui. Tampaticapojaque catsirincaiteri.

⁷⁻⁸ Iriraqueate itsatacaanejia yoajianaquequeate ochoocatiguete tsovironaquipae irivegarajigue irishecaciaquempaca. Iriraqueate Jesoshi inejatiguero ocoraquepojaque manquigarentsi guintenitaroca oraniqui Samariaqui aajate oja, icantiroquea:

—Pojoquenajate nomire.

⁹ Ocantiriquea manquigarentsi Samariaquitica:

—Aviguentitari jorio, naatimpaquea naroguenti Samariaquitica. ¿Quero ocotacani pamanantaquenaca naatimpa oja pimire?

(Iriraqueate joriojia imanintajiguiritari Samariaquitica.)

¹⁰ Icantsitaroqueate Jesoshi:

—Pintsaqueromeguete irojocaquempica Aapani Irioshi, aisa pintsaquerime amanaquempiroca imire, pamaquerime iriatimpa, irojocaquempime oja anijacaantantatsica.

¹¹ Ocantiri manquigarentsi:

—Teenica onchoocateji paajatanquempiroca, aisa ocatica oja ochoocavaetaque jmm isaviji. ¿Querocaquea paaqueroni oja anijacaantantatsica pojocaquenaca?

¹² ¿Arimpate panaaqueri avaesatiniteni Jacovoni queecacotanaquerooca ocatica oja? Iroguentitari imirapinitaca iriatimpa, jerijia irijanijiate, jerijia aisa ivirapae.

¹³ Cantiroquea Jesoshi:

—Maasano miracaroca ocatica oja irimiretanajequeate aisa.

¹⁴ Cotanquitsiquea iriraquea miraqueroneca oja nojocaquenerica naatimpa aatoquea imiretaji. Ocaticaquea oja nojocaquenerica ompeanajempa motojaaro omotoa-jashirentanaque ishiquei, onchoocatacaqueri incoguitempaniniji iranijaguiteni.

¹⁵ Ocantiriquea manquigarentsi:

—Intsishia pojoquenaroja oratica oja nomirerota aatonijite nomiretaji, aatoniji noraquetaji acaniqui noncajapinitaje.

¹⁶ Ariqueate icantiroqueate Jesoshi:

—Intsija pincajemaquiterija manquigatimpica, pincoraquetajequea aisa.

¹⁷ Ocantiriqueate:

—Teequeate inchoocateji manquigatanaca.

Icantsitajaroquea Jesoshi:

—Pitampaticataquero picanqueguete tee inchoocateji manquigatimpica.

¹⁸ Ichocavetaca manquigavetimpica oshequi, ivegaravetaca 5. Iriraqueate pitsipatajaca imaica, teequea irio pimanquigare. Picantamajataque.

¹⁹ Ocantsitariquea manquigarentsi:

—Nomajirote, nonejaquempi aviguenticajate tsavetantatsica.

²⁰ Irirajia novaesatinite manaquea itsarorentapinijiacari Aapani Irioshi acaniqui otsempiqui. Aviatimpajia joriojia picantajiaque iroguenti Jerosare antsarorentantaquemparica.

²¹ Icantiroquea Jesoshi:

—Iintsijate, manquigarentsi, pinquemisantavaquenaja noncamantaquempigueti. Aapojempa savincaguiteri aatoquea pitsarorentajiajari Aapani Irioshi acaniqui otsempiqui, aato aisa Jerosarequi.

²² Aviatimpajia Samariaquitica teequea pintsajigueriji pitsarorentavetacaca, manaquea pitsarorentamampeajiacariquea intati. Naatimpajia joriojia notsajiguiri notsarorentacaca, aritarite irira Meshiantatsica, jorio inaque.

²³ Cotanquitsiquea imaicaquea aapojaca savincaguiteri irira tsarorentamajajiacarica Aapani Irioshi intsarorentajiaquemparigueti onquenavaetanaque intsompogui ishirequi, intsarorentamajajiaquemparitari. Irootaquetari ininque Aapani inquejeji-aquempa imaica intsarorentaquemparigueti.

²⁴ Iriraqueate Aapani Irioshi shiretsi inaque. Quericacaquea tsarorentarica intsarorentajiaquempari ishirequi, aisa arimajaquea intsarorentamajajiaquempariquea.

²⁵ Ocantiriquea manquigarentsi:

—Notsaquequeate incoraqueque Meshiashi icantajitica Quirishito.* Oraquea incoraquequegueti incamantamajajiaquenaquea maasano.

²⁶ Ariquea icantiroquea Jesoshi:

—Iriguentitari quenquetsatacaaquempica imaica, naroguentitari.

²⁷ Ariqueate icoraquejiapojajiquea itsatacaanejia. Yamenajiapojaquerigueti iquenquetsatacaaquerogueti manquigarentsi mana yamenajianaque intati, cotanquitsiquea tecatsi cantapojerine: “¿Taa opaji pininque?” Tecatsi cantatsine: “¿Quero ocotacani piquenquetsatacaantacaroca?”

²⁸ Iroompa iroatimpa ojoquijipanajantiroqueate intati icajantajitaroca oja, oanaquequeate ontaniqui oguinteniqui ocantajiapojaqueriqueate ogonorojia:

²⁹ —Caacateshiatsi pamenajiaquiterija irinta caquinte, icanquenaqueate maasano nantaguishequeca. ¿Taaca ipaji? ¿Irioca Quirishito?†

³⁰ Ariqueate yoayoaitanaque yoguijaguijaitanaqueroqueate yamenapojiri Jesoshi.

³¹ Irirajiaquea itsatacaanejia iroompaqueate yamenajiavaquerogueti oanaquegueti oncantajiaquiteri, icantajiguiriqueate Jesoshi:

—Tsatacaantantatsica, pishecatempa.

³² Icantiqueate iriatimpa:

—Naatimpa choocitari nosheca teeca pintsajigueji aviatimpajia.

³³ Iriatimpajia icantavacaajianaquea:

—¿Choocampa amaquenerica isheca?

³⁴ Cotanquitsiquea Jesoshi icantajiguiriquea:

—Iroguenti nosheca nantaqueneriqueate ininqueca tigarancaquenaca, ariquea non-teroncaqueneri nonetsanamajaqueeroquea maasano icanquenaca.

* **4:25 Meshiashi** oponeaca iguenquetsatsarequi evereo aisa arameo. **Quirishito** oponeaca iguenquetsatsarequi guiriego. Mavite ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraque-
taque impeaquempa imajirote ompejiaquemparineca. † **4:29** Pamenero tioncanquitsica isavivanaqui otsapaqui 4.25.

³⁵ Picantajaveca: ‘Cuatrotiraja taai osampatantanaquempaca oitsoqui iraviguijita-
queroqueate.’ Cotanquitsiqueate naatimpa noncantajiaquempiqueate iintsija pamene,
pamenajigueroquea niganquitejirentsipae, jac sampatanaque oitsoqui, pajiniquea ira-
jaitero.

³⁶ Iriiraqueate aguiroca oitsoqui irivegarajiqueriquea irishinevaequempanijite
tsaquiuroca intsipaquempariquea aguiroca. Iriguentitari quejecaroca oitsoqui irirajia
iquemisantacaajitaqueca incoguitempaniniji inchoocaguiteni.

³⁷ Arimajaqueate icantamajajiqueroqueate: ‘Apaniroquea tsacaqueroa, itsipaquea
aajeroneca.’

³⁸ Naatimpaqueate notigarancajiaquempi paajiaqueroqueate teeca aviro tsaca-
jiguerone. Itsipaqueate tsacajiaqueroa, imaicaquea aviguentiquea aajiaquero yat-
sipeventajiacaca.

³⁹ Ariquea oshequi Samariaquitica guintenitantaroca oratica guinteninintsi
iquemisantajianaqueriquea Jesoshi iquemajivaquerogueti manquigarentsi
otsavetantaquerigueti, ocanti: “Icantaquena maasano nantaguetaqueca.”

⁴⁰ Iroompa icoraquejiaquegueti Samariaquitica, inejajipojaqueriquea icajemajia-
queri irimaimojiaqueri. Ariqueate yoanaque imaanaque mavite savincaguiteri.

⁴¹ Ariquea iquemisantajiaqueriquea ontaniqui itsipajia oshequi, iquemamajajiaque-
ritarite iquenquetsaquegueti iriatimpa.

⁴² Ariqueate icantajiaqueroqueate manquigarentsi:

—Noquemisantajiaque pitsavetantaquerigueti aviatimpa, cotanquitsi imaica caaviji
noquemisantamajajiaque, inchiquiojitari noquemajiaqueri naatimpajia, ariquea not-
satanaque arimajasacanicate iriguenti meshajiaquerineca quepatsiquitica, iriguenti
Quirishitotatsica.

Jesoshi yogueshitajiri irijanite iramajirore majirontatsica

⁴³ Iroompa avisanaquitigui mavite savincaguiteri yogaanajaquea Jesoshi yoanaji
Garireaquei.

⁴⁴ Icantaquetarite iriatimpa Jesoshi, iriraqueate tsavetantatsica tee irishineventa-
jitempariji iguinteni.

⁴⁵ Iroompa yarejetapojatiga Garireaquei yaajivaqueri cameetsa choocajiatsica
oraniqui, yoajiaquititarite iriatimpajia aisa Jerosarequi yogavisajiaquitirogueti
Paashicoa, ariqueate yamenajiaqueri yantaguequeca oacaantantatsica intati.

⁴⁶ Ariqueate ipianajaquea Jesoshi Canaquei Garireaquei oraniqui ipeacaacarogueti
oja vinoja. Choocaqueate iramajirore majirontatsica iguintenitacaqueate Caperenao-
qui, yojoquijicaquea irijanite.

⁴⁷ Ariqueate iriatimpa iquemacotavaquerigueti Jesoshi arejetapoja Garireaquei
iponeacaquea Joreaquei, yoanaquequea icantapojiaqueri iroanaqueniji itsovironaquite-
qui irogueshitajeneriquea irijanite, pajiniquea irimetoje.

⁴⁸ Iriiraquea Jesoshi icantiri:

—Aviatimpajia aatoguetiqueate pamenajigana nantaguetaquerogueti oacaantantat-
sica intati, aatoquea pitsariventajigana.

⁴⁹ Icantiri iramajirore majirontatsica:

—Nomajirote, caacateshiatsi pajini irimetoje irijani.

⁵⁰ Icantiriqueate Jesoshi:

—Pimpianajequea imaica, anijatsi pirijanite.

Iriatimpa iquemisanqueriqueate icanquerica, yoanaji.

⁵¹ Iroompaqueate yoanajigueti pajinigueti irarejetajempa itsovironaquitequi iton-
quivojajivacariquea amitacojiguirica icantajivajiriquea:

—Anijatsi pirijanite.

⁵² Icoacotavaqueri iriatimpa queroquea icarataqueni catsirincaiteri ipeantanajaca.

Icantajiguiriqueate:

—Chapinqui iroaqueraguete icononcanaja catsirincaiteri ari icotanaja isavogatanaji ipeanaja.

⁵³ Ariquea iquenquejanaquero aritarite iroaqueraguete icononcanaja catsirincaiteri icantaqueguete Jesoshi: “anijatsi pirijanite.” Irootaquequea iquemisantantanacarica itsatantacaca iriomajaca, ariquea iquejejiaca aisa maasano conoajiacarica.

⁵⁴ Ocaticaquea iroguenti mavitetapojatsica oacaantantatsica intati yonigaantaqueca Jesoshi iponeacaguete Joreaqi yoanajiguete Garireaqi.

5

Jesoshi yogueshitajiri caarica anijivetatsi

¹ Ariquea irirajiaqueate joriojia icapiocajiacaqueate irogavisaaiajero otsipa savinca-guiteri ishineventajiacaca, ariqueate yoanaque Jesoshi itoncoanaque Jerosarequi.

² Oraniquiqueate Jerosarequi oquempejiqueguete osotomoro icantajitica Isotomoro Oveja ariqueate ochoocataque osamponaja, icantajitiro evereotsaqui Veteshita. Chooa oraniqui icatisetajiguete tsovironaqui ovegarataca 5.

³ Irootaqueitari inorijantajiga oshequini caquinte joquijiguetanquitsica, shamponca-jaripae, itsipajia teeca incatigueji, itsipajia magoviroshitatsica. [Yoguijajiaqueroqueate omparencajatavajempata oja.

⁴ Icoraquepiniquetari irashivantite Aapani Irioshi iparencajatapojiro, ariquea quer-icaca iriquetica quijaatanquitsica iquenapanajanti ipeanaja.]

⁵ Chooaqueate apaniro oraniqui yojoquijitani iriquetinica, teequea impejaempaji yajagantsitacovaetanacaqueate aavaetanacaqueate 38 ajagantsi.

⁶ Iiraqueate Jesoshi inejapojaqueriqueate norijaca, itsapojaqueri yajagantsitacovae-tanaque coramani teequea impejaempa, icantantacarica:

—¿Pinine pimpeanajempa?

⁷ Yacanaqueri joquijitanquitsica:

—Nomajirote, teequea inchoocateji jocajatavaquenanea oparencajatacaguete oja. Nopitsopitsovecaqueate naatimpa inchiquioji teequea nagavejempaji, manaqueate yanajaitanaquena.

⁸ Icantiriqueate Jesoshi:

—Iintsija pincatianaje pinatanajero pinorijantacaca, panijitanaje.

⁹ Iroompaquea icanquitigui ariquea ipeanaja, inatanajiro inorijantacaca, yaniji-tanaji. Cotanquitsiqueate iroguentiquea savincaguiteri imagorejantajitaca,

¹⁰ icantantajiacaqueate imajirojiate joriojia:

—Imaicaqueate iroguenti savincaguiteri imagorejantajitaca, tee oncameetsateji pinatanajeroguete pinorijantacaca, icantimentantajitirotarite.

¹¹ Iriatimpa icantiriqueate:

—Iiraquea ogueshitajanaca iriguenti cantaquena: ‘Pinatanajero pinorijantacaca, panijitanaje.’

¹² Ariqueate icantajiaqueriqueate:

—¿Queriquea cantaquempica: ‘Pinatanajero pinorijantacaca, panijitanaje’?

¹³ Cotanquitsiquea iriatimpa teequea intsateriji queri ogueshitajirica, icapiocajia-catari, iriraquea Jesoshi jac yoanaji.

¹⁴ Ariquea Jesoshi inejapojajiri teemproqui itsaromentantajitarica Aapani Irioshi icantiri:

—Imaicaqueate peanajimpi, aatoquea papijitajiro aisa piquempevaetaja, aapoja-jimpitsi otsipa anaqueroca.

¹⁵ Iriatimpa yoanaquequeate icamantajiaqueriquea imajirojiate joriojia, icantajipo-jaqueriqueate:

—Iriguenti ogueshitajana Jesoshi.

¹⁶ Irootaquequea icatsimatantajiacarica joriojia Jesoshi, inintajavecaqueate irimetojajiaquerime, yamenajiaqueritarite iroguenti yogueshitantajari savincaguiteri imagorejantajitaca.

¹⁷ Cotanquitsiqueate Jesoshi icantajiguiriquea:

—Ari icoca Aapani irosati yantaguitini, ari noquejetacari naatimpa aisa, irosati nantaguitini.

¹⁸ Irootaquequea arimpaquea icatsimamajatantajianacarica imajirojiate joriojia, inintamajianaque irimetojajiaqueri, teenica aparato irogueshitantantempari savincaguiteri imagorejantajitaca, manaqueate aisa iquejemanatanacari Aapani Irioshi icanquegueti iriguenti Iririmajaca.

Oraqueate yantaguetica Jesoshi teequea inchiquioji irantashitemparo iriatimpa

¹⁹ Ariqueate icantajiguiriqueate Jesoshi: “Imaicaquea noncamantamajaquem-piquea, iriraquea Irijanite Aapani Irioshi, oraqueate yantaqueca teequea inchiquioji irantashitemparo iriatimpa, iroguentiquea yantaque yamenacoquerica yantaguetica Iriri. Querocaca isavicaventica Iriri, irootaquequea isavicaventaque iriatimpa.

²⁰ Iriraquea Iriri ipintsamajatacaritari Irijanite, yonigaaguetaqueneri maasano yantaguetica. Ariquea ironigaaqueneri otsipapae anaaqueroneca pinejajiaqueca imaica, aviatimpajia pamenajianaquequea intati.

²¹ Aritarite quejetaca irira Aapani itancorejajiguiriqueate metojajivetanquitsica, yanijacaajajiri, ariqueate iquejetaca Irijanite, iranijacaajeriquea quericaca ininqueca.

²² Aisa irira Aapani tee irionica cantatsine queri irogashinoncajajiqueca, iriguentiquea Irijanite icanque incantacoqueri.

²³ Ariquea iquejetaquero imaica cameetsaniji maasano irishineventamajajiaquem-pariniji Irijanite inquejetacaajiaquemparinijite ishineventajiacariguete Iriri. Querocaca teeca irishineventajiguempariji Irijanite teequea irishineventajiguempariji Iriri tigarancaquerica.

²⁴ “Imaicaquea noncamantamajajiaquem-piquea, maasano inquemaquerogueti nocanqueca aisa inquemisanqueriguete tigarancaquenaca incoguitempaniquea inchoocaguiteni, aatoquea icatsimatimentajitiri igovaeguishere, manaquea yojocanajiro metojagantsi, yarejetapojaja anijagantsiqui.

²⁵ Aisaquea noncamantamajajiaquem-piqueate, aapojempa savincaguiteri, jac aapojacatari imaica inquemantajiaquemparoca metojajiatitsica icanqueca Irijanite Aapani Irioshi, ariqueate maasano quemisantajiaquerica iranijajianaje.

²⁶ Iriraqueate Aapani yanijashitacatari intati, iriotari anijacaantantatsica. Ariquea inintacaqueri Irijanite iquejetancarica yanijashitaca iriatimpa, aisa iriguenti anijacaantantatsica.

²⁷ Aisa icanqueriqueate iriotaque cantacotaquerine caquinte quero incojitaquerini, iriguentitari Irijanite Caquinte.

²⁸ Aatoquea pamenajianaque intati, aapojempatarite savincaguiteri inquemantajiaquemparica maasano iquitajivetacaca,

²⁹ ariquea incampanajante irisotoajianajequea. Iriraquea comajamajajianquitsica intancorejajianajequeate, iroajianaquequea jenoqui inquitequi, incoguitempani inchoocajiaje. Iriraquea teeca incomajamajajiguempaji intancorejajivetanajempaquee manaqueate incatsimatimentajiqueriqueate igovaeguishere.

Tsavetacotantajiguirica Jesoshi

³⁰ “Teequeate nantashitempajiqueate inchiquiojitsita. Querocaca icanquenaca Aapani, irooqueate nocanque naatimpa, aisa notampaticamajataquero maasano nocanqueca, teenicate iroguenti noncoraquetashite nantaquero querocaca noninqueca

naatimpa, iroguentiqueate nocoraquetashique nantaqueroquea maasano inintaguetica Aapani tigarancaquenaca.

³¹ Oraquea apanirome nontsavetanquempamequea naatimpa arimequea pincantajiaqueme: ‘Aatoquea noquemisantiri, irisati tsavetacotajatsi.’

³² Cotanquitsiqueate choocaqueate itsipa tsavetantaquenaca. Naatimpa notsataque arimaja icantamajataque itsavetacotaquenaguete, teequea iramataguempaji.

³³ Pitigarancaqueriguete coacoquerineca Joanca, iriatimpa tampatica yoavaquero itsavetanquero iroomajatatsica.

³⁴ Cotanquitsi itsavetacojitaquenaguete, teequea iro noshineventavacaca oratica poneanquitsica caquintequi, manatari noquenquejacaquempiroitari itsavetacotaquenaguete Joanca cameetsaniji pimeshijiaquempaniji.

³⁵ Irieraquea Joanca iquejevecari tsivorentsi morecanquitsica itsivotaquequeate. Aviatimpajia iro pinintajiaquequea pishineventapanajantaro itsivotacojiaquempigueti.

³⁶ Cotanquitsiquea chooca tsavetantaquenaca anaaquerooca itsavetanquenaguete Joanca. Oraquea nantaguetaqueguete icanquenaca Aapani, caavijiquea anaantaque pintsatimentajiaqueronijite arimajaquea iriguente tigarancaquena Aapani.

³⁷ Ariquea iquejetaca Aapani tigarancaquenaca itsavetantaquenaquea iriatimpa, cotanquitsiquea aviatimpajia teequea pinquemajigueroji icanqueca, aisa teequea pinejajigueriji quero icotani.

³⁸ Ariquea oquejetaca iguenquetsatsare teequea onchoocamajateji pishirequi, teetarite pinquemisantajiavaqueriji itigarancaqueca.

³⁹ Aviatimpajia papatsajavantapinijavecaroquea Itioncacaantaqueca Aapani Irioshi pijijiaqueroji irooqueate anijacaajiajempine pincoguitempaniniji panijaguiteni. Iroguentiquea tsavetantaquenaca naatimpa,

⁴⁰ cotanquitsiquea tee pinintajigueti pincoraquejigue naatimpaqui panijantajiajempaca.

⁴¹ “Tee naashitemparoji irishineventajiaquena caquinte,

⁴² cotanquitsi notsajiaquempi aviatimpajia, tee pimpintsajiguempariji Aapani Irioshi.

⁴³ Naatimpa iriguente tigarancavetaquena Aapani, aviatimpajia teequea paajiaquena. Cotanquitsiquea incoraquequeguete itsipa teeca intigarancajiteriji inchiquioguete iriatimpa incoraquequetashiquempa, irioquea paajiaquema.

⁴⁴ Manatari piquenquejajiaque pishineventavacaajiaquempa intati, teequeate iroguente pinquenquejajigue irishineventajiaquempi Irioshimajaca apatiroti icota. Piquejejiacaguete imaica ¿quero pincojiaquempani pinquemisantajigueti?

⁴⁵ Aato piquenquejajigui pijijiaqueji noncamantaqueriquea Aapani teeguete pinquemisantajigueti. Choocaquea itsipa camanquerineca, iriguente Moishishini paventamajiajetacaca.

⁴⁶ Oraqueate pinquemisantamajiaquerime Moishishini, pinquemisantajiaquename naatimpa aisa, naroguentitari itioncacotaque.

⁴⁷ Teenica pinquemisantajigueroji itioncavecaca, ¿arimpate pinquemisantajiaquero nocanquempica naatimpa?”

6

*Ishecatacaajiacariguete Jesoshi yoshequiamajataque caquintejia
(Mt. 14.13-21; Mr. 6.30-44; Irc. 9.10-17)*

¹ Ariqueate Jesoshi imontejacodianaca intatiquero iniromotijaqui icantajitica Garirea, icantajitiro aisa Tiveriashi.

² Chooaqueate oshequini caquinte guijaguijaitapiniquerica, yamenajiaqueritarite yonigaantaguequerogueti oacaantantatsica intati yogueshijiajirigueti joquijiguetat-sica.

³ Irraquea Jesoshi yoanaque otsempiqui itsipatsipaitanacari itsatacaanejia, isavica-jiapoji ontaniqui.

⁴ Irooshipojaque aantapojempaca savincaguiteri Paashicoa ishineventajigaca jorio-
jia.

⁵ Ariqueate Jesoshi yamenajiavaquerigueti icoraquecoraqueipoji oshequini caquinte, icantiriquea Jeripe:

—¿Queroquea avegarajiaqueni pan ashecatacaajiaquemparica maasano iricajia?

⁶ Manaqueate icanquegueti Jesoshi imaica iramenaque queroqueate incante Jeripe, cotanquitsiqueate iriatimpa itsaquequea queroquea iraaquero.

⁷ Irraqueate Jeripe icantiri:

—Jmm arigueti avegarajiavetaquempagueti oshequi pan vegaratanquitsica 200 tenario, aato otsitacari irishecajiaquempa apaniropae capichaji.

⁸ Ariqueate icantanaquequeate itsipa itsatacaane Jesoshi icantajitica Antirishi, iriguentijeguite Shimo Peerero, icantiri:

⁹ —Jeri irica chaajaniquitirajaca yamaque ovegarataca 5 pan ipeacaantajitaca oitso-
qui sevara, jeri aisa mavipaquite ishimate, cotanquitsi yoshequiamajatatiguinimaja
caquinte, ¿arimpate intsitacajiaquempari?

¹⁰ Irraquea Jesoshi icantiquea:

—Intisijate pincantajigueriqueate maasano irisavisaviitaque.

Oraniquiquea chooca oshequi cataroshi. Ariquea isavicajiaque maasano. Irraque-
ate shiramparijia jmm icarajiavaetaque 5,000.

¹¹ Ariqueate Jesoshi yaaqueroquea pan yajiricaquero, yamanaqueriquea Aapani
Irioshi, icantaqueri: “Ariotelesaa.” Yojocajiavaqueneriquea maasano savisaviitanquit-
sica. Ariqueate iquejetacaacari shima yojocajiaqueneri querocaca ininqueni.

¹² Iroompa iquemapojacagueti icantajiguiriquea Jesoshi itsatacaanejia:

—Paaguetajeroquea choocaguetajatsica aatoniji opomatsata capichaji.

¹³ Yaaguetajiroquea iteguetajiro cantiriqui. Ochoocavetacaquea 5 pan, jeroquea
imaica iquemajianacarogueti maasano ochoocataji otseraiquitanajaroquea ocarataji
12 cantiri.

¹⁴ Ariqueate yamenajiaquerogueti maasano yonigaanquerogueti Jesoshi oacaantan-
tatsica intati yoshequiaquerogueti pan icantajianaquequea:

—Arimajasacanica iriotaque tsavetantatsica aquemacoqueca coramani incoraque-
taque quepatsiqui.

¹⁵ Cotanquitsiqueate Jesoshi itsataque inintajiavetacaquea irajiaaquerime impeacaa-
jiaquemparime imajirote, itsinampirejajianajiri, apaniro yoanaji otsempiqui.

Yanijijatanaquerogueti Jesoshi jenoquija oja

(Mt. 14.22-27; Mr. 6.45-52)

¹⁶ Ariqueate pajinigueti ompitsecanaque irirajia itsatacaanejia Jesoshi yagategatei-
tanajiqueate omotijaqui.

¹⁷ Itejiapojajaroquea quenajarontsi imontejacojianaquea intatiquero iroaroaitana-
jequeate Caperenaquui. Pitsecanajiquea, iriraqueate Jesoshi tequerata incoraquetajeji.

¹⁸ Ariqueate icampojuquea choviga jeoc jeoc jeoc jeoc itamacosejaatanaqueroquea.

¹⁹ Ariqueate yoacojianaque niganquija arica 5 irooca 6 quiromeetero, inejajiava-
jiri Jesoshi icoraquepojajiquea yanijijatapojiroquea jenoquija oja, icantajiaquitiquea
neguic, itsaroajianaquequea intati.

²⁰ Cotanquitsiqueate iriatimpa icantajiguiriquea:

—Naroguenti, aato pitsaroajigui.

²¹ Ariqueate iriatimpajia ishinejianaja intepojajempa, ariquea oquenapanajanti agapojaji otsapijaqui Caperenaoqui.

Yamenaguetajiri Jesoshi

²² Ariquea osavincaguitetanajigueti maasanoquea capiocaventajiacarica Jesoshi chapinqui iquenquejajianajiroquea yamenajivajirigueti itsatacaanejia yoanajigueti teequea intsipajianajempari iriatimpa. Aisa teequea onchoocateji otsipa quenajarontsi, apatirotitari choocatanquitsi itehiteitanajaca.

²³ Iroompa ocoraquepojaque otsipapae quenajarontsipae Tiveriashiquitica agague-tapojiqueate oquempejiquegueti ishecajiacarogueti pan, icantacoventaquerogueti Amajirote: “Arioteesaa.”

²⁴ Ariqueate yamenajiaquegueti iriatimpajia tee inchoocateji Jesoshi irisati itsatacaanejia, itehiteitanaja yoayoaitanajiquea Caperenaoqui incoaguetajeri.

Jesoshi iriguenti isheca caquinte anijacaajajerineca

²⁵ Ariqueate yarejerejeipojacagueti inejajiapojajiriquea Jesoshi icantajiapojiriquea:

—Tsatacaantantatsica, ¿quero icaratini parejetaca acaniqui?

²⁶ Cotanquitsiqueate Jesoshi icantiri:

—Imaicaquea noncamantamajajiaquempi teequeate iroguenti pincoimentajiguena pamenajiaquenagueti nonigaanquerogueti oacaantantatsica intati, iroguentiquea picointentajiaquena pishecajiacaro pan piquemajianaca.

²⁷ Aatoquea iroguenti pitampishiventamajajigui pisheca teroncanajatsineca, iroguentiquea pintampishiventamajajigue pisheca aatoca oteronca, oncoguitempani anijacajaempiquea. Irooquea irojocajiaquempica Irijanite Caquinte, iriotarite ijicotaqueca Aapani Irioshi, quejetaca iseyotaqueri.

²⁸ Iriatimpajiaqueate icantajiguiriquea:

—¿Queroquea noncojiaquempiani nontampishiventantajiaquemparoca inintacajiaquena Aapani Irioshi?

²⁹ Icantajiguiriqueate Jesoshi:

—Jeroquea inintacajiaquempica Aapani Irioshi pintampishiventamajajiguero: paventamajajiguempari iriraquea itigarancaqueca, pinquemisantamajajianaqueri.

³⁰ Icantajiguiriqueate:

—¿Taa opajita ponigaajiaquena cameetsaniji namenajiaquerogueti nonquemisantajiaquempiniji? ¿Taa opaji pantaguetaque ponigaantaguetaque?

³¹ Coramani ichocajiavetacagueti avaesatinite ontaniquiqueate oquitamamporo-roipojaquegueti ishecajiacaroquea manaa. Oraquea itioncacojiquerogueti ocanti: ‘Yojocajiaqueneriqueate pan poneanquitsica jenoqui inquitequi.’

³² Iriraquea Jesoshi icantajiguiriqueate:

—Imaicaquea noncamantamajajiaquempiquea, teequeate irio Moishishini jocajiaquempiroca pan poneanquitsica jenoqui inquitequi, iriguentiquea Aapani jocajiaquempiroca iroomajaca panmajaca poneanquitsica jenoqui inquitequi.

³³ Oraqueate pan yojocaquempica Aapani Irioshi, irooqueate poneanquitsica jenoqui inquitequi anijacaajiaquerica quepatsiquitica.

³⁴ Ariqueate icantajiaqueri:

—Nomajirote, pincoguitempaniquea pojocapinijiaquenaro oratica pan.

³⁵ Icantiri Jesoshi:

—Naroguentitari pan anijacaantantatsica. Irira coraquetashitaquenaneca aatoquea itaseimataji. Ariqueate inquejetaquempa aventaquenaneca, aatoquea imiretimataji.

³⁶ Cotanquitsi nocamantajiavetaquempitari pamenajiavequenaquea teequeate pintsajiguenaji, tee paventajiguenaji pinquemisantajiguenaji.

³⁷ Maasano yojocaquenaca Aapani, incoraquetashitaquena; irira coraquetashitaquenanea aato noguipiavaqueri.

³⁸ Teenica iroguenti noncoraquetashite acaniqui quepatsiqui nantaque noninqueca naatimpa, mana noponeacaguetei jenoqui inquitequi iroguentiquea nocoraquetashitaque nantaqueroquea ininqueca tigarancaquenaca.

³⁹ Iroguenti ininque Aapani tigarancaquenaca aato noguipeguiri apaniro yojocaquenaca, manaquea novochantajiajeri intati aapojaquempaguetei savincaguiteri vegaratapojaatsineca.

⁴⁰ Ininquetari Aapani tigarancaquenaca incoguitempaniquea inchoocaque maasano amenajiaquerineca Irijanite, aventajiaquemparineca. Ariquea naatimpa novochantajiajeri aapojaquempaguetei savincaguiteri vegaratapojaatsineca.

⁴¹ Ariquea icantimanajianaqueri joriojia iquemajiaqueriguetei icanqueguetei: “Naroguenti pan poneanquitsica jenoqui inquitequi.”

⁴² Icantajigueteate:

—¿Teecajate irio Jesoshi irijanite Jose? Atsajiguiritari iriri aisa iriniro. ¿Quero oocani icantantacaca ‘Noponeaca jenoqui inquitequi’?

⁴³ Icantsijigariquea Jesoshi:

—Aato picantimanatantajigui picantavacaajiacaguetei.

⁴⁴ Aato icoraquetashitana caquinte aatoguetei icajemashirentiri Aapani tigarancaquenaca. Ariquea naatimpa novochantajeri savincaguiteriqui vegaratapojaatsineca.

⁴⁵ Ocanquetarite itioncaciaqueca tsavetantajiatsica ocanti: ‘Aapani Irioshi intsatacaajiaqueriquea maasano caquinte.’ Maasanoquea quemajiavaquerica Aapani, intsajiavaqueroguetei icanqueca, incoraquetashiquena naatimpa.

⁴⁶ Tee noncanteji imaica chooca nejaquerica Aapani. Apaniro irira poneanquitsica Aapaniqui Irioshiqui, irio nejaquerica Aapani.

⁴⁷ Nocamantamajiaquempiquea quericaca avempojenanea incoguitempaniquea inchoocataje, aatoquea imetojaji.

⁴⁸ Naroguenti pan anijacaantantatsica.

⁴⁹ Coramani ichoocajiavetacaguetei pivaesatinite ontaniqui oquitamampororoipoguetei ishecajiavecaroqueate manaa, cotanquitsiquea imetojajiajiquea intati.

⁵⁰ Cotanquitsiqueate ocatica pan noquenquetsatacotaqueca naatimpa ariguenti oquenapoji jenoqui inquitequi, cameetsanijite quericaca shecaquemparoneca aatoquea imetojajitsi.

⁵¹ Naroguenti pan anijatsica poneanquitsica jenoqui inquitequi. Quericaca shecaquemparoneca ocatica pan incoguitempani iranijanaque. Ocatica pan nojocaquenarica, iroguenti notsino nojocajiaquenerica maasano caquintejiatsica cameetsanijite incoguitempaninijite iranijaguiteni.

⁵² Ariqueate iquenquetsatavacaajianaquea joriojia, icantajiaque:

—¿Queroquea incoquempani iricatica irojocajiacajiroguetei itsino ashecajiaquemparoquea?

⁵³ Icantajiguiriqueate Jesoshi:

—Imaqueate noncamantamajiaquempi aatoguetei pishecatsitanaro notsino, aisa aatoguetei pimiritajiganaro noriraja, aatoquea ochoocatimpi anijagantsi.

⁵⁴ Quericacaquea shecaquemparoneca notsino aisa irimiraqueroguetei noriraja onchoocapojeri anijagantsi coguitatsica, ariquea nontinaajeri naatimpa savincaguiteriqui vegaratapojaatsineca.

⁵⁵ Oraqueate notsino iroguentiquea iroomajaca ishecajitaca. Ariquea oquejetaca iroatimpa noriraja, iroguentiquea iroomajaca imirajitaca.

⁵⁶ Quericaca shecaquemparoneca notsino, aisa irimiraqueroguetei noriraja incoguitempani inchoocaguitenani, naatimpaquea noncoguitempani nonchoocaguiterini.

⁵⁷ Itigarancaquenaquea Aapani anijatsica, ari nanijaque naatimpa irooriji yanijacaquena Aapani. Ariquea inquejetaquempa quericaca shecaquenanea naatimpa, nanijacaeri.

⁵⁸ Ocatita pan, iroguenti quenapojatsica jenoqui inquitequi. Teequea onquejetemparoji manaa ishecajiavecaca pivaesatinite imetojajianajiqueate. Quericaca shecaquemparoneca ocatita pan incoguitempaniqueate iranijaguiteni.

⁵⁹ Maasanoquea ocatita icanqueca Jesoshi manaquea itsatacajiaqueriquea shinagogaqui icapiocantapinijiacaca joriojia ontaniqui Caperenaoqui.

Quenquetsatsarensi anijacaantantatsica

⁶⁰ Iroompaqueate iquemajivaquerogueti icanqueca Jesoshi imaica, ariquea iria oshequini oguijaguijaitanaquerica icantajianaque:

—Manavaeca ocatita icanqueca. ¿Taampa quemisantavaquerone?

⁶¹ Ariqueate iriraquea Jesoshi itsatashitavacaro icantavacaajianacaguete icanti-manataquerogueti icantavecarica, icantsiijaariquea:

—¿Ari ocatsimatacajiaanaquempi nocantajiaquempica?

⁶² Iroosacanica, ¿querocaca pincojiaquempa pamenajiaquerigueti Irijanite Caquinte iroanajegueti jenoqui inquitequi ichoocatigueti coramani?

⁶³ Oraquea shiretsi, iroguenti anijacaantanquitsica, teequea agavejeji atsino. Ariquea oquejetaca nocantajiaquempica imaica, oquejetacaro shiretsi, iroguenti anijacaantatsica.

⁶⁴ Cotanquitsiquea choocaquea piconoagarantajiaca teequeate pinquemisantajiguenaji.

Iiraquea Jesoshi itsatsitacatari iroaqueragueti queri aato iquemisantajigui, aisa queri aacaanquerineca.

⁶⁵ Ariquea icantiri:

—Irootaquetari nocantantajiaquempica aato inchiquioji icoraquetashitana caquinte aatogueti yagavejacagui Aapani.

⁶⁶ Ariquea iconoagarantajianaquea oguijaguijaivetanacarica Jesoshi yovashiantajianajiriquea teequea iroguijaguijaitajeriji.

⁶⁷ Ariquea Jesoshi icoacojiaqueriquea itsatacaanejia vegarajianquitsica 12, icantajiguiriquea:

—¿Pinintajiaque poajianaje aviatimpajia aisa?

⁶⁸ Cotanquitsiquea irira Shimo Peerero icantiri:

—Nomajirote, ¿queriquea noashijianaqueca? Aviguentitari ashintaro quenquetsatsarensi anijacaantantatsica noncoguitempaniniji nanijaguiteni.

⁶⁹ Naatimpajia noquemisantajiaquempiquea, aisa notsajiaque aviguentiquea Quirishitotatsica,* Irijanite Aapani Irioshi anijatsica.

⁷⁰ Icantajiguiriqueate Jesoshi:

—¿Teempa narotaque coguijiaquempica aviatimpajia carajianquitsica 12? Cotanquitsi chooca aparo piconoacaca, ampatsini inaque.

⁷¹ Oraquea icanqueguete Jesoshi imaica iriguente icantacoque Jorashi, irijanite Shimo Ishicariote, iriguentitarite aacaanquerineca coajica. Irioquea itsatacaane inaveca, cotanquitsi coajica yaacaanqueri.

* **6:69 Quirishitotatsica.** Iguenquetsatsarequi guiriegojia icanqueguete **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserrotejiate. Iriira Quirishito iriotaquequea itsavetacotsitacaca tsavetantajitsica coramanitica itigarancaque Aapani Irioshi impeaquempaniji Imajirojiate maasano.

7

Iriguentijeguitepae Jesoshi teequea inquemisantajigueriji

¹ Ariqueate iriraquea Jesoshi tee irininteji iroanaque Joreaquei, itsaquetari inintajiaque joriojia irimetojajiaqueri. Mana ichoocataji Garireaquei itsatacaantaque oraniqui.

² Quempejitapojaquetari ishineventajiacaca joriojia ipeacaantajigaroca tsvironaquijaniquipae iquenquejajiro iquenaquenaitanajiguetei ivaesatinite oquitamampororoipojaquegueti.

³ Iriraqueate iriguentijeguitepae Jesoshi icantajiguiri:

—Iintsijate poanaque Joreaquei pinquejetaquempaqueate imaica ponigaanqueroquea oacaantantatsica intati ariniji iramenajiaquempi pitsatacaanejia choocajianquitsica ontaniqui.

⁴ Icoquitanitari quericaca nintanquitsica iramenajiaqueri, aato yomaniro yantaqueca. Imaicaquea aviatimpa, iroorijite pagavejaque ponigaanqueroqueate taaca opajitapae, iintsijate poanaque ponigaanquempa iramenajiaquempiniji maasano.

⁵ Ariqueate icojiacani iriguentijeguitepae aisa teequea intsamajajigueriji, irootaquequea icantantajiacarica imaica.

⁶ Cotanquitsiqueate Jesoshi icantajiguiri:

—Tequeratatirajatari aguempaji noantanaquempaca, cotanquitsiquea aviatimpajia cameetsaquea poajianaque querocaguetei pinintajiaqueni.

⁷ Tee onchoocateji irisemaneguintimentajiguempica quepatsiquitica. Naatimpaquea irootari isemaneguintantajiaquenaca nocanqueguetei yantaguetaqueca iroguenti cov-aeguisherentsi.

⁸ Poajianaquequea aviatimpajia pintoncoajianaque incapiocaventajiaquemparoguetei ishineventajitaca. Naatimpaquea aatota nogui, tequeratanicate aguempaji noantanaquempaca.

⁹ Icantajiaqueriguetei imaica, ari ichoocataji Garireaquei.

¹⁰ Cotanquitsiqueate ariqueate yoayoaitanaqueguetei iriguentijeguitepae impoitanajiquea yoanaque iriatimpa. Teequea ari intsipatsipaitempariji igonorojia, teenicate irininteji irinejajiteri.

¹¹ Iriraqueate imajirojiate joriojia icoaqueri Jerosarequi, icantajiaqueri capiocajianquitsica:

—¿Quericampa?

¹² Iquenquetsatacojiaqueriquea intati, choocaquea cantavanquitsica: “Iriguentiquea cameetsatatsica.” Itsipaqueate icantavaque: “Teequea incameetsateji, mana yamatavijaqueri caquinte intati.”

¹³ Cotanquitsiquea inchiquioji iquenquetsatavacaajiacaquea teequea inconijajencateji, itsaroacaajiacaritarite joriojia majirontajiatatsica.

Icatsimatimentajiaqueri Jesoshi yogueshitantajariguetei joquijitatsica savincaguiteri imagorejantajitaca

¹⁴ Oraqueate oniganquipojaqueguetei ishineventajiacaca ariqueate itoncoanaque Jesoshi, yoanaquequea temporoqui itsaromentantajitarica Aapani Irioshi, itsatacaantaquequea oraniqui oniganquirequi.

¹⁵ Ariqueate yamenajiaqueriguetei joriojia yamenajianaquequea intati icantantajianacaca:

—¿Queroquea icotacani itsatantacaroca taaca opajitapae? Teenicate intsatacaamajajiteriji.

¹⁶ Cotanquitsiquea Jesoshi icantajiguiri:

—Oraqueate notsatacaantaqueca imaica teequeate inchiquiojitsiquea nontsatashitemparoji naatimpa. Iriguentitari tsatacaaquenaro tigarancaquenaca.

¹⁷ Quericacaquea nintanquitsineca irinetsanataqueroquea ininqueca Aapani Irioshi intsaquequea iriguenti tsatacaaquena, teequeate inchiquiojitsita naashitemparoji naatimpa.

¹⁸ Iiraqueate inchiquiojica aashitaroca intati iriatimpa manaquea ininquequea irishineventajitaquempari, cotanquitsiquea iriraquea nintanquitsica iriguentiqueate irishineventajitaquempa tigarancaquerica manaqueate itampaticataquero intati que-rocaca icanqueca, teequea iramataguempaji.

¹⁹ “Coramani Moishishini itioncaciaquempiro icanquerica Aapani Irioshi cameet-saniji pintsajiaquero, cotanquitsiqueate imaica aviatimpajia tee pinetsanajigueroji. ¿Quero ocoani pinintantajiacaca pimetojajiaquenaquea?”

²⁰ Ariqueate iquenquetsajianaquequea maasano icantajiguiriquea:

—Ichoocaquempi ampatsini. ¿Quericate nintanquitsica irimetojaquempi?

²¹ Icantiri Jesoshi:

—Nonigaanqueroquea savincaguiteriqui imagorejantajitaca aparoteeca irinejajiteji, ariqueate ocaajianaquempi intati.

²² Iiraqueate Moishishini icanquequeate intotsaiquijiqueriquea ichonquimashi iri-aqueraca voanquitsica aapojempagueti 8 savincaguiteri (cotanquitsiquea tee irio pariguemparone Moishishini, ogantagatari icotani pivaesatinijiate). Irootaquequea pitotantarica. Pitotsaiquitantajigui aisa savincaguiteriqui imagorejantajitaca.

²³ Imaica pitotsaiquitantajiguigueti savincaguiteriqui imagorejantajitaca cameet-sanijite pinetsanajiaqueronijite icanqueca Moishishini, ¿queroquea ococa picatsimati-mentantajiaquenaroca pamenajiaquenagueti nogueshimajatajirigueti joquijitanquit-sica savincaguiteriqui imagorejantajitaca?

²⁴ Aatoqueate taampina picantsiija yantajitaquero teeca oncameetsateji. Iroque-tiquea pinquenquejamajiaquequea iroguentica yantajitaque teeca oncameetsateji irooca cameetsari, iroompa tampatica pincanque.

Icamantacotacagueti Jesoshi quero iponeacani

²⁵ Ariquea iconoagarantajiacaquea guintenijiatsica Jerosarequi icantajianaquequea intati:

—¿Iriotaquempa inintajiqueca irimetojajiqueri?

²⁶ ¿Queroqueate ocotacani imaica teequeate incantajiteriji icapiocaventajicarigueti iquenquetsataquegueti? Arica icantajianaque majirontajiatatsica iriotaque Quirishito.*

²⁷ Cotanquitsiquea atsajiaque queroquea iponeacani iricatica. Irirampani Quirishito incoraquequetapojegueti, aatoquea itsajitiri quero iponeacani.

²⁸ Iiraqueate Jesoshi choocatirajaquea itsatacaantaque teemporoqui oniganquire-qui oticaacoro iririjencatanaquequea icanti:

—Pitsajiaquenaquea, aisa pitsajiaque quero noponeaca. Teequea noncoraque-tashitempaji inchiquioji, cotanquitsiquea iriomajacaquea irira tigarancaquenaca. Tee-quea pintsajigueriji aviatimpajia.

²⁹ Cotanquitsiquea naatimpa notsaqueriquea, aritarite noponeaca iriatimpagui, aisa iriguentitarite tigarancaquena.

³⁰ Ariqueate inintajiavecaquea irajajiaquerime, cotanquitsiquea tecatsi ajiriquerine, tequeratatirajatari aguempaji irantajitaquemparica.

³¹ Cotanquitsiquea iquemisantajianaqueriquea oshequini caquinte, icantanta-jianacaca:

—Incoraquequegueti Quirishito ¿arimpa iranaaqueri iricatica ironigaanquero teeca irinejajiteji? Iriotaque Quirishito.

* **7:26 Quirishito** ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraque-taque impeaquempa imajirote ompejiaquemparinca.

Icanquegueti Jesoshi aatoquea inejajitajiri

³² Ariqueate irirajia pariseojia iquemajiavaquerigueti iquenquetsatacojiquerigueti Jesoshi ishineventajicari, ariqueate itsipatsipaicariquea saserorotejia anaantajianquitsica itigarancajiaqueriqueate coaretapae quempoguijajiguiroca teemporo irajiaiquiteriqueate.

³³ Cotanquitsiqueate Jesoshi icanti:

—Capichajinivani nonconoajianajempi, ariquea noanaje ichoocatigueti tigarancaqueñaca.

³⁴ Ariquea pincoaguevetajena, aatoqueate pinejajijaana, aatotarite pagavejajigui poajianaque aviatimpajia querocagueti noanajeni naatimpa.

³⁵ Ariqueate icojianaca joriojia iquenquetsatavacaajianacaqueate icanti:

—¿Querocaquea iroanaqueni aatoca anejantajajari? Aricaquea iroanaque inconoajiaquempariquea ontaniqui agonorojia varajajianquitsica conoajiacarica guiriegojia intsatacaajiaqueriquea iriatimpajia aisa.

³⁶ ¿Taaqueate opajita icantacoqueca icantantacaca: ‘Ariqueate pincoaguevetajena aatoquea pinejajijaana, aatotarite pagavejajigui poajianaque aviatimpajia querocagueti noanajeni naatimpa’?

Oja anijacaantantatsica

³⁷ Ariquea aapojaja savincaguiteri icaratantajianajaroa ishineventajiacaca. Ocatita savincaguiteri caaviji ishineventamajajigaro. Iriraquea Jesoshi icatianacaquea iquenquetsatanaquequea iririjencaniquea icanti:

—Quericacaquea miretanquitsica incoraquetashiquenaja nojocaqueneri irimirapoje.

³⁸ Quericaca quemisantaquenanea, ocantaquequea Tioncarentsimajaca, omotojaguiteni ishirequi oja anijacaantantatsica, onquempetanaquemparo iniroja oja.

³⁹ Oraquea icanquegueti Jesoshi imaica iriguentiquea iquenquetsatacotaque Ishire Aapani Irioshi choocashirentajiaquerineca maasano tsarorentajiaquemparineca, tequeratatirajatari incoraqueateji Ishire Aapani Irioshi inchoocashirentanaquequeate, tequeratancate irogajenocashitanajemparo Jesoshi iroganejencare.

⁴⁰ Ariqueate iquemajiavaquerigueti maasano iconoagarantajiacaqueate icantajiaquequeate:

—Arimajasacanicate iriguentiquea tsavetantatsica aguijajivaqueca.

⁴¹ Itsipapaequeate cantajianquitsica:

—Iriguentiqueate Quirishito.

Cotanquitsiquea itsipapae cantajianquitsicaquea:

—¿Arimpaquea imponeaquempa Quirishito Garireaqui?

⁴² ¿Teempa oncanteji Tioncarentsimajaca: iriraquea Quirishito irio inchoviquitanaqueca Taavini, imponeaquempa Verenequi, iguintenini Taavini?

⁴³ Irosatiquea tee inquemavacaimentempariji Jesoshi.

⁴⁴ Iconoagarantajiacaquea inintajiavecaquea irajiaiquerime, cotanquitsiqueate tecatsi ajiriquerine.

⁴⁵ Ariqueate irirajiaquea coaretapae oajivetanquitsica irajiaiquiterimequea ipiapiaitashitajaquea intati ichoocajiaquegueti pariseojia jerijia saserorotejia anaantajianquitsica. Iriatimpajiaquea icantajivaqueriquea:

—¿Quero ocoani caarica pamantari?

⁴⁶ Iriatimpajiaquea icantajiguiriquea:

—Iroorijite cameetsavaequetari iquenquetsataquegueti. Teequeate inchoocateji itisipa quempequemparineca iriatimpa.

⁴⁷ Iriraquea pariseojia icantajiguiriquea:

—¿Aricaja yamatavijajiaquempiquea aviatimpajia aisa?

⁴⁸ Irira majirontajiatsica teequea inquemisantajigueriji. Ariquea noquejejiaca naatimpajia pariseojia.

⁴⁹ Irirajia teeca intsajigueroji itioncanaquenica Moishishini iriguentiquea quemisantajiaquerica, cotanquitsiqueate incatsimajiaqueri Aapani Irioshi.

⁵⁰ Ariqueate ichooaque oraniqui Nicoremo oanincashitanaquerica Jesoshi chapinqui, iriguentitari pariseo. Iquenquetsatanaquequea icanti:

⁵¹ —Icantimentantajitrotari ancantsiquempagueti: ‘Chooqa yantaguishequeca’, aatoguete iroqueti aquemiri inquenquetsaqueguete cameetsaniji antsatimenqueroniji taa opajita yantaque. Aritari ocanti otioncacotacaguetei.

⁵² Icantsijaariquea iriatimpajia:

—¿Avirocagate aisa Garireaquea? Iintsijate pisavicaventamajatero Itioncacaantaqueca Aapani Irioshi, pamenaqueroquea tee oncanteji imponeaquempa tsavetantatsica Garireaquei.

Manquigarentsi teeca apaniro ogueriji manquigataroca

⁵³ Ariqueate yoayoaitanajiqueate itsovironaquitepaequi.

8

¹ Cotanquitsiquea irira Jesoshi yoanaque Orivotsempiqui.

² Osavincaguitetamaqueguetei yoanajiquea teemporoqui itsaromentantajitarica Aapani Irioshi. Ariqueate icapioaventajianajari oshequi caquinte, ari isavicanaque itsatacajiaiqueriquea.

³ Ariqueate irirajiaqueate tsatacaantajiguiroca itioncacotanaqueca Moishishini jerijia aisa pariseojia yamajiaqueroquea manquigarentsi yonigaacojicariquea shirampari, yogatijapojaqueneriqueate niganqui icapioacajiacaguetei,

⁴ icantajiguiriqueate Jesoshi:

—Tsatacaantantatsica, ocaqueate ocatica manquigarentsi choocavecaqueate manquigataroca cotanquitsiquea inejacojitapojiro itsipa shirampari.

⁵ Oratari itioncanaqueca Moishishini ocantini maasano manquigarentsi quejejianquitsica imaica intsinatsinajiqueroquea irimetojajiquero. Imaicaquea imaica avi-atimpa, ¿queroqueate pincanteni?

⁶ Iriatimpajiaquea manaqueate icantajiaquequea imaica iramenajiaqueri querocaca incanteni iramenantajiaquempariniji incatsimatimentantajiaquemparica. Cotanquitsiquea Jesoshi imaroncanaca itioncantanacaroquea ichapaqui quepatsiqui.

⁷ Jatanatsi icoacojianaqueriquea, ariquea icatianaca icantajigui:

—Quericacaquea teeca inquempevaetempaji iintsija iriquetiquea pariaquemparone intsinaquero.

⁸ Ariqueate imaronquitanaja aisa itioncanaji quepatsiqui.

⁹ Iroompaqueate iquemajivaqueriguetei canqueriguetei, ariquea yoaguetanaji. Iriquetiquea oajianajatsi quenquevarimajanquitsica. Apanirota oaguetanajatsi ari iteroncajianaja maasano. Apanivaniquea ichoocataji Jesoshi itsipatajaroquea manquigarentsi irisatiquea aisa capioaventajiacarica incajaranqui.

¹⁰ Ariqueate icatiavetanaja Jesoshi, [yamenavetari cajaraguiteni, apaniroquea ocatica manquigarentsi,] icantiro:

—Manquigarentsi, ¿quero icantajianajani amajavequempica? ¿Teequea inchoocateji catsimatimentempironeca pipeacaacaca?

¹¹ Iroatimpa ocantiri:

—Tee, nomajirote. Tee inchoocateji.

Ariqueate icantiro:

—Ariquea nonquejetaquempa naatimpa, aatoqueate nocatsimatimentimpiro imaica. Imaicaquea poanaje, aatoquea piquempevaetaja aisa.

Jesoshi iriguentiquea Tsirencari tsirencacojiaquerica quepatsiquitica

¹² Ariqueate Jesoshi iquenquetsatanajiquea icantajiguiriquea:

—Naroguenti Tsirencari tsirencacojiaquerica quepatsiquitica. Quericacaqueate guijatacotaquenanea aatoquea ipitsecacotajitsi, naroguentitari tsirencacojiaquerine cameetsaniji incoguitempani inchoocataje.

¹³ Iirajia pariseojia icantajiguiriquea:

—Avisati tsavetacotajatsi. Tee ontampaticateji pitsavetacotacagueti.

¹⁴ Cotanquitsiquea icantajiguiri Jesoshi:

—Naroguentiquea tsavetacovetajatsi, cotanquitsiquea arimajaquea nocanque, teequeate namataguempaji. Notsaquequea quero noponeaca aisa quero noanajeni, cotanquitsiqueate aviatimpajia teequeate pintsajigueji quero noponeaca, aisa quero noanajeni coajica.

¹⁵ Aviatimpajia piquejejiacari caquinte cantacotashitantatsica intati, teequeate pintampaticamajateroji. Naatimpaquea teequea noncantashijiguempariji quericaca.

¹⁶ Cotanquitsiquea noncantacotantaquegueti, tampatica noaquero, irooriji tee noncantacotanteji naatimpa apaniro, nocarataque naatimpa jeri aisa Aapani tigarancaquenaca.

¹⁷ Oraticatarite itioncajitaqueca pamenavecaca ocantiqueate omoncarajavacaque-mpagueti icanqueca mavite cantacotaqueroneca inejajiaqueca, ari pintsaque tampatica yoaquero.

¹⁸ Jero imaica, noquenquetsatacotaca naatimpa, ari iquejetaca Aapani tigarancaquenaca iquenquetsatacotaquea iriatimpa.

¹⁹ Iriatimpajia icantajiguiriquea:

—¿Queroqueate ichoocataqueni piri imaica?

Icantajiguiriqueate Jesoshi:

—Teenicate pintsajiguenaji naatimpa, ari iquejetaca teequeate pintsajigueriji Aapani. Arimegueti pintsajiaquenane naatimpa, pintsajiaquerimequea iriatimpa.

²⁰ Maasano icanquerica Jesoshi manaquea itsatacajiaaqueri teemproqui, isavicapoji ochoocaquegueti yoguijaantajitarica imentaquipae yojocajiguinirica Aapani Irioshi. Cotanquitsiquea teequeate inchoocateji aaquerineca iraanaqueri irimetojajiqueri, tequeratanica arejetempanica iraantajitaquemparica.

“Aato pagavejajigui poajianaque querocaguete noanajeni naatimpa”

²¹ Iroompa irira Jesoshi icantajajiriquea aisa:

—Naatimpaquea noanaje, ariquea pamenaguevetajena, cotanquitsiquea ogantagaquea onchoocaguiteni piguempaveere irosati pimetojacotaquero. Ontaniqui querocaguete noanajeni, aatoquea pagavejajigui poajianaque.

²² Iirajiaquea imajirojiate joriojia icantajianaquequea:

—¿Ari irimetojaquempa irisati, irootari icantantacaca aatoquea agavejajigui oajianaque querocaguete iroanaqueni?

²³ Cotanquitsiquea Jesoshi icantajiguiriquea:

—Aviatimpajia aviguentijiaquea isavijiquitica, naatimpaquea ariguenti noponeaca jenoqui inquitequi. Aviatimpajiaquea aritari piguintenimajajiga acaniqui quepatsiqui, naatimpaquea teequea noguintenimajatempaji acaniqui quepatsiqui.

²⁴ Irootaquequea nocantantajiaquemparica pimetojajianaque tequerataguete oshetem-
paji piguempaveere. Aritarite aatoguete pitsamajatana narotaque, aisa aatoguete paventana, ogantagaquea onchoocaguiteni piguempaveere irosati pimetojacotaquero.

²⁵ Iriatimpajia icantajiguiriqueate:

—Jmm, ¿taampa avia?

Icantiri Jesoshi:

—Nocamantajivetaquemparitari iroaqueraguete.

²⁶ Aisa chooca oshequini noncantacojiaquempica, cotanquitsiquea manaquea noncanque icanquenaca tigarancaquenaca. Iriatimpaquea inetsanamajaqueroquea icanquea, teequea iramataguempaji.

²⁷ Cotanquitsiquea iriatimpajia teequeate intsajigueriji iriguentiquea iquenquetsatacotanaque Iriri.

²⁸ Irootaquequea icantantacarica Jesoshi:

—Oraquea pogatiacojiaquerigueti irira Irijanite Caquinte, ari pintsaque narotaque. Aisa pintsajiaquequea teequea nanteji inchiquioji. Iroguentiquea nocanque querocaca itsatacaquenaca Aapani.

²⁹ Icoquitantari itsipataquena tigarancaquenaca, teequea irojoquenaji apaniro, nocoguitanitarite nosavicavenqueroqueate ininqueca iriatimpa.

³⁰ Iquejequeroguete imaica iquenquetsataqueguete, iquemisantajianaqueriquea oshequini.

Irijanijiate Aapani Irioshi aisa agavejajiaqueca quempevaerentsi

³¹ Ariqueate Jesoshi icantajiguiriquea irirajia joriojia quemisantajiaquerica:

—Aviatimpajiaquea pincoguitempaniguete pinquemisantajianaquena nocantajiaquempica imaica, pimpeamajajiaquempaquea notsatacaanejia.

³² Pinquejejiaquempaguete imaica ariquea pintsamajajiavaquero iroomajatatsica, irooqueate oguipaquiujacojiajempineca manaquea pinchoocatashijiajempa intati.

³³ Chooa quenquetsajianquitsica icantsiijaariquea:

—Naroguentijiatari ichoviquijianaqueca Averaameni. Teequea inchoocatimateji ashintajiganaca. ¿Queroquea ocotaca picantantacaca: ‘Pinchoocatashijiajempa intati?’

³⁴ Icantajiguiriqueate Jesoshi:

—Noncamantamajajiguempija, maasano quempevaejiatsica teequea inchoocatashijiguempaji intati, agavejajiaqueritari quempevaerentsi, quejetaca ashintacari omperaperaatacari.

³⁵ Pamenerijate aajanirentsi ivegarajitica teequeate inquejetempariji irijanite aajanitarica, teetari irio irijanite. Irinintaqueguete irojocaqueneri itsipa, irojocaqueneriqueate; cotanquitsiqueate irijanitemajaca aatoquea yojocantiri, incoguitempani inchoocaque.

³⁶ Iroguipaquiujacaajajempiroguete Irijanite Aapani Irioshi agavejajiaquempiguete quempevaerentsi, arimajaquea pinchoocatashijiajempa intati.

³⁷ Notsaquequeate aviguentijia vetaca ichoviquijianaqueca Averaameni, cotanquitsiquea tee pinintajigueji pinquemisantajigueroji nocamantajia vetaquempica imaica, irootaquequea pinintantajiacaca pimetojajiguena.

³⁸ Naatimpaquea manaquea nocantajiaquempiquea nonejaqueca notsipatacariguete Aapani. Ariquea piquejejiaca aviatimpajia manaqueate pantajiaqueroquea querocaca icantajiaquempica piri.

³⁹ Iriatimpajiaquea icantajiguri:

—Irio aapani Averaameni.*

Cotanquitsi Jesoshi icantiri:

—Iriomeguetiqueate choviquijianaquempime Averaameni pinquejejiaquempiquea iriatimpa.

⁴⁰ Cotanquitsiquea teequea pinquejijiguempariji imaica. Nocamantajia vetaquempiqueate iroomajatatsica icanquenaca Aapani Irioshi, cotanquitsiquea aviatimpajia manaquea pinintajiaque pimetojajiaquena. Teequeate inquejeteroji Averaameni imaica.

⁴¹ Aviatimpajia mana pisavicaventajiaquero isavicaventica piri.

* 8:39 Icanqueguete *aapani*, icantacotaqueri ivaesatinite.

Iriatimpajia icantajiguiriquea:

—¿Arimpa itsipa irijanintajigana? Iriguentitari irijanintajigana Aapani Irioshi ap-
atiroti.

⁴² Icantajiguiresi Jesoshi:

—Iriguentimequea irijanintajiaquempime Aapani Irioshi pimpintsajiaquename-
quea, aritarite noponeaca iriatimpaqui, teenica inchiqioji noncoraquetashitempaji
naatimpa, iriguentiquea tigarancaquena.

⁴³ ¿Queroquea ocotacani teeca pintsatantajiaquemparo nocantajivequempica?
Teequeate pinintajigueji pinquemisantajigueroji nocanquea.

⁴⁴ Iriguentitari irijanintajiaquempi ampatsini, iriguentiquea ashintajiaquempi. Avi-
atimpajia iroguenti pinintajiaque pantajiaquequea inintaqueca iriatimpa. Iriatim-
paquea iriguenti metojantatsica, irosati icocani coramani iroaqueraguete irosati
imaica. Teequea incanteroji arimajatatsica, teequea irishineventemparoji. Itso-
jeacaguete, irootaque irashi, ari icocani iriatimpa, iriguenti tsojenti, iriguentiqueate
oquenantapojaca tsojetsi.

⁴⁵ Naatimpaquea nocantamajataque iroomajatatsica, irootaquequea teeca pin-
quemisantantajiguenaji.

⁴⁶ ¿Arimpa chooca nantaqueca teeca oncameetsateji pincantacotsitantaquenaroca?
Tee anejeroji. ¿Quero ocotacani imaica teeca pinquemisantantajiguenaji? Iroguen-
tiquea nocanqueca arimajaca.

⁴⁷ Iriiraqueate yashintacaca Aapani Irioshi iquemisanqueroquea icanqueca. Cotan-
quitsi aviatimpajia teequea irio ashintajiguempine Aapani Irioshi, irootaque tee pin-
quemisantantajiguemparoji.

⁴⁸ Ariqueate icantsiijaariquea joriojia:

—Nocantamajataqueshine aviguenti Samariaquitica, aisa ichooaquempi ampatsini.

⁴⁹ Iriiraquea Jesoshi icantiriquea:

—Tee inchoocatimatenaji ampatsini. Naatimpaquea iroguentiquea noninque
iramenantajiquemparica Aapani yoganejencavaetaca noquenquetsatacotancarica
cameetsa, cotanquitsiquea aviatimpajia teequeate pinintajigueji pinquemisanta-
jiguena, mana picantacantataquena intati.

⁵⁰ Naatimpaquea teequea inchiqioji noninteji inquemisantajitena intsarotentajitena,
cotanquitsiquea choocaquea nintacaanqueroca intsarotentajiquena. Irio can-
tanquitsine quero incotanaquempiani maasano teeca intsarotentajiquena.

⁵¹ Imaicaquea noncamantamajajiaquempiquea quericaca netsanataqueroneca no-
cantica aatoquea imetojimataji.

⁵² Icantajiguiriqueate joriojia:

—Notsamajajiaquero imaica arimaja ichooaquempi ampatsini. Metojajianajitari
Averaameni jerijiaquea maasano tsavetantajiatatsica, cotanquitsi aviatimpa picanque:
'Quericaca netsanataqueroneca nocantica aatoquea imetojimataji.'

⁵³ ¿Arimpate panaaqueri Averaameni choviquijianacajica? Iriatimpa metojajitari,
ariqueate iquejejianaja tsavetantajiatatsicani. ¿Taampa aviatimpa picantantacaca?
¿Taaquea pijiqueji?

⁵⁴ Icantajiguiriqueate Jesoshi:

—Inchiqiojime narosatime quenquetsatacotajatsine cantajatsineme: 'Caaviji no-
ganejencamajata', narosatime nintajatsine intsarotentajitena, aatome ocameetsati.
Cotanquitsiquea iriguentiquea nintanquitsi Aapani picantajiavecaca aviatimpajia
iriguenti pitsarotentajiga. Irio shineventaquena.

⁵⁵ Cotanquitsiquea teequea pintsajigueriji. Naatimpa arimaja notsaqueri. Oramequea noncanquemeguetei tee nontsateriji, manamequea nontsojeaquempame nonquempejiaquempimequeate aviatimpajia. Cotanquitsiquea naatimpa arimaja notsaqueri, aisa noquemisantiri taaca icanquena.

⁵⁶ Coramani iriraquea Averaameni choviquijiaquempica ishinevaeca iquenquejaquegueti iramenaquero noncoraqueque, ariqueate yamenaquero ishinevaetanacaquea.

⁵⁷ Ariquea icantajiguiri joriojia:

—Tequerata pajagantsitacoteji 50 ajagantsi, ¿pinejirimpa Averaameni?

⁵⁸ Icanqueri Jesoshi:

—Noncamantamajiaquempi, tequerataguetei inchoocateji Averaameni, choocana naatimpa.

⁵⁹ Ariqueate yaashijianaqueriquea mapi intsinacajiaquerime, cotanquitsiqueate Jesoshi ipeapitsajianajari, isotoantanajaro oticaacoro teemporo, yoanaji.

9

Jesoshi inejacajairiguetei shamponcajari

¹ Ariqueate iquenanaqueguetei oraniqui Jesoshi inejapojiriquea shirampari shamponcajari, yashitaque yoaquero iroaqueraquetei ivoapoji tee irinejeji.

² Iriraquea itsatacaanejia icantajiguiri:

—Tsatacaantantatsica, ¿quero ocotacani ivoaqueguetei ishampontajatantacaca irica shirampari? Iriocaja quejejianquitsi iriri irooca iriniro iquempevaejiaca iquejetantanacaca irijanite, iriocaja quejetanquitsi iquempevaetaca irisati.

³ Icantajiguiriqueate Jesoshi:

—Teequea iroguentiquea quempetacaguemparine iguempevaere, aisa teequea iroquempetacaguemparine iguempevaerejia iriri irooca iriniro. Manaquea oquejetancaca imaica iramenimentajiqueroni iragavejane Aapani Irioshi.

⁴ Ogantagatirajaguetei osavincaguitetiguetei nantaguiteroni inintacaaquenaca tigarancaqueenaca. Pajinitari ompitsecanaje, tecatsi agavejanquitsine irantavaetantajemparo.

⁵ Choocatirajanaguetei acaniqui quepatsiqui, narotaque itsirencarite quepatsiquitica.

⁶ Ariquea icanquitigui imaica, iquishoaque quepatsiqui, yaaque capichaji yamirocaquero, ariquea itirijatantacariquea shamponcajari, icantiri:

⁷ —Intsija pija pinquivajatajatemala omotijaqui icantajitica Shiroe —oncanque ova-jiro “Itigarancajitica”.

Iriatimpa yoanaque iquivajapojaca, ariquea icoraquevetajaguetei jac nejanaji.

⁸ Irirajiaquea iconoajigaca iguintenijigaguetei jerijia aisa amenajiguirica isaviquiguetei yamanantapiniqueguetei imentaquipae icantajianaquequea:

—¿Teempa irio irira savicapinitatsica amanantapinitatsica imentaquipae?

⁹ Iconoagarantajiaqueate icantajiaquequea:

—Jeejeguitatsi iriguenti.

Itsipaquea cantajiananquitsi:

—Tee, mana iquempevecari.

Iriatimpa icanтанаque:

—Naroguenti.

¹⁰ Ariquea icantajiguiri:

—¿Queroquea picotanajani pinejantanajaca?

¹¹ Iriatimpa icantajiguiri:

—Iriraqueate icantajitica Jesoshi yamirocashitajana quepatsi, itirijatantajanaro, ariquea icanquena: ‘Pija pinquivajatajatemala omotijaqui Shiroe.’ Ariquea noanaque noquivajatajotajiga nonejanaji.

¹² Iriatimpajia icantajiguiri:

—¿Quericampa imaica?

Icantiquea iriatimpa:

—Jmm, tee nontsateji.

Irirajia pariseojia icoacojiaquerigueti shamponcajvetatsica

¹³ Ariqueate yaajitanaqueri shamponcajvetatsica ichoocajiaquegueti pariseojia.

¹⁴ Oraqueate yamirocashitaquerigueti Jesoshi quepatsi inejacajairigueti iroguentiquea savincaguiteri imagorejantajitaca.

¹⁵ Irootaquequea icoacotantajiacarica pariseojia quero icotajani inejantanajaca. Iriatimpaquea icantajiguiriquea:

—Itirijatantajanaro cajashepatsari, ariquea noquivajataja, ari nonejanaji imaica.

¹⁶ Ariquea iconoagarantajiacarica pariseojia icantajiaquequea:

—Iriraquea quejequeroca imaica teequea iriguenti tigarancerine Aapani Irioshi, yantantacarotari savincaguiteri imagorejantajitaca.

Cotanquitsiquea itsipaquea cantananquitsica:

—Iriomegueti quempevaetatsica, ¿arimpa iragavejaqueme ironigaanquero oacaajiacajica intati quejecaroca ocatica?

Ariqueate tee inquemavacaajiajempaji.

¹⁷ Irootaquequeate icoacotantajanajarica aisa shamponcajvetatsica, icantajiguiriquea:

—¿Aviatimpa queroquea pincanteni? Avirotari inejacajai.

Icanti:

—Iriguentiqueate tsavetantiroca icanquerica Aapani Irioshi.

¹⁸ Cotanquitsiquea irirajia joriojia teequea irinintajigueti incantajigueti inejacajairi shamponcajari icajemacaantantajiacarica iriri irosati iriniro icantajiguiriquea:

¹⁹ —¿Irio irica pirijanite picanqueca ivoaquegueti ishamponcajataque? ¿Queroquea icocani imaica inejantanajaca?

²⁰ Yacanaqueri iriatimpa:

—Notsaque iriotaque nirijanite, aritari icoca iroaquegueti ivoaque ishamponcajataque.

²¹ Cotanquitsiquea teequea nontsateji quero icocani inejantanajaca imaica, aisa tee nontsateji queri nejacaajirica. Iintsijate pincoacotari iriatimpa, quenquevaritari, inchiqiojitsitaquea incamantajiaquempi iriatimpa.

²² Iriatimpajia mana icantantajiacaca intati imaica itsaroacaajiacaritari imajirojiate joriojia, icantajiaquetarite querica cantanquitsine Jesoshi iriguenti Quirishito* incatsimatimentajiqueriquea aatoquea iquijaji shinagogaqui icapiocantapiniyacaca.

²³ Irootaquequea icantantacaca: “Iintsijate pincoacojigueri iriatimpa, quenquevaritari.”

²⁴ Ariquea irirajiaquea coacojiaquerica icajemajajiriqueate shamponcajvetatsica icantajiguiri:

—Iriguentiquea pincanque yoganejencamajata Aapani Irioshi. Iriraqueate picanqueca incajaranqui notsajiaqueriquea iriguentiquea quempevaetatsica.

²⁵ Cotanquitsiquea iriatimpa icantajiguiriquea:

—Jmm, tee nontsateji iriocampa quempevaetatsica, iroguentiquea notsaque iroaquegueti noshamponcajvetaca, imaicaquea nejanajana.

²⁶ Icantsijigariquea aisa:

—¿Queroquea icoquempini inejacaantajimpica?

²⁷ Icantsijigariquea iriatimpa:

* **9:22 Quirishito** ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraque-taque impeaquempa imajirote ompejiaquemparineca.

—Nocamantamajavietaquempiquea incajaranqui teequea pinquemajiguenaji. ¿Imaicaquea queroquea ocoani pinintantajiacaca nampijitajero aisa noncamantajem-piquea? ¿Ari pinintajiaque aviatimpajia aisa pimpejiaquempa itsatacaanejia?

²⁸ Ariqueate icatsimatsajiaqueriqueate icantajiguiriquea:

—Aviatimpaquea aviguenti itsatacaane, naatimpajiaquea naroguentijitarite oguijat-acotajironica itsatacantinica Moishishini.

²⁹ Notsajiaquetarite iriraqueate Aapani Irioshi iquenquetsatacaqueri Moishishini, cotanquitsiqueate iriraqueate irica piquenquetsatacotaqueca imaica teequea nontsateriji queroca iponeacani.

³⁰ Ariqueate iriatimpa icantajiguiriquea:

—Arisacanicate. ¿Queroquea picojiacani aviatimpajia? Iriatimpaquea inejaca-jaanaquea, cotanquitsiquea teequea pintsajigueji quero iponeaca.

³¹ Atsaqueritari iriraquea Aapani Irioshi aato iquemiri quempevaetatsica iramaner-iguete. Iriguentiquea inquemaque tsaromentamajacarica antiroca ininqueca iriatimpa.

³² Irosati coramani tecatsi quemacoterine itsipa caquinte inquejetero imaica iragave-jaque irinejacaajeri voacotiroca ishamponcajare.

³³ Irica noquenquetsatacotaqueca imaica aatomeguete irio tigaransirime Aapani Irioshi aatome yagavejime inquejetacaquemparome imaica.

³⁴ Iriatimpajia icantajiguiriquea:

—¿Oo querocaquea pincantempani pijiquejiquea pintsatacaajiguena naatimpajia? Irosati piquejetaca aviatimpa piquempevaemajatanaca.

Ariquea icatsimamajajianaquequeate yoguisotoaqueri.

Iriraquea teeca intsateriji Aapani Irioshi quejevaeca shamponcajari

³⁵ Iriraqueate Jesoshi iquemacoqueriguete icatsimajitaqueri yoguisotoajitaqueri, yoanaque icoaguequeri. Ariqueate inejapojajiri icantiri:

—¿Ari piquemisantaqueri aviatimpa Irijanite Caquinte? ¿Paventashirentacari?

³⁶ Icantiri iriatimpa:

—Nomajirote, ¿quericaquea? Intsija pincamantena naventashirentantaquemparica.

³⁷ Icantiri Jesoshi:

—Pinejaqueritari, iriotaque quenquetsatacaquemparica imaica.

³⁸ Icantiri:

—Nomajirote, naventashirentaquempi.

Ariqueate itigueroashitanacari itsarovencari.

³⁹ Icantiri Jesoshi:

—Iroguenti nocoraquetashique acaniqui quepatsiqui cameetsaniji incantacoji-queriniji caquinteja quero icocani, cameetsanijite irinejajiajeniji shamponcajave-tatsica, irirampani nejajavetanquitsica irishamponcajatanaje.

⁴⁰ Ariqueate irirajia pariseojia choocajanquitsica oraniqui iquemajiaqueriguete icanqueguete imaica iconoagarantajiacaquea icantajiaqueriquea:

—¿Arimpaquea naatimpajia noquejejiacari shamponcajari?

⁴¹ Icantajiguiriquea Jesoshi:

—Pinquejejiacquempameguete shamponcajari, aatomequea ochoocatajime piguem-pevaereja, cotanquitsiqueate imaica picantajiavetacatarite: ‘Nonejaque’, irootaque-quea ochoocatantajaca piguempevaereja.

10

Quempoguijamajatirica oveja

¹ “Imaica noncamantamajajiaquempiquea quericaca ataitashitanaquerineca on-taniqui itantacojiqueriguete oveja aatoguete iquijantaro sotomorontsi iriguentiquea aitsitantatsica aisa aapitsatantatsica.

² Cotanquitsiquea iriraquea quijanquemparoneca sotorontsi iriguentiquea quem-poguijirica irovejate.

³ Iriguentiquea irashirejavaquene timashitiroca sotorontsi. Iriraquea irovejajiate iquemajavajiri iquenquetsatigueti. Icajemajiaqueri irovejajiate apaniropae ivajiroqui, yaajianaqueri sotsiqui.

⁴ Iroomba iteroncaquerigueti yoguisotosotoitaquerigueti maasano, yoanaque ijivataaqueri. Iriraquea oveja yoguijaguijaitanaqueriqueate, itsajiguitari iquenquetsatigueti.

⁵ Cotanquitsiquea aatoquea yoguijajiguiiri itsipa teeca intsajigueriji, manaquea irishiaitapitsatanaqueri intati, aatotari itsajiguiiri inquenquetsavetaquempagueti.”

⁶ Ari iquejetacaajiacari Jesoshi imaica, cotanquitsiquea iriatimpajia tee intsajigueji taa opajita iquejetacaacaca.

⁷ Irootaque icantantacaca aisa Jesoshi:

“Imaica noncamantamajajiaquempi, naroguenti irashitacoro oveja.

⁸ Maasanoquea coraquejianquitsica tequeratagueti noncoraqueeteji naatimpa iquejetacari aitsitantatsica aisa aapitsatantatsica, cotanquitsi tee inquemisantajigueriji oveja.

⁹ Naroguenti ashitacorontsi. Quericaca quijantanaquenanea naatimpa inchoocapojaje cameetsa, inquijapojaque, irisotoanaque iramenapojero cataromashi.

¹⁰ Iriraqueate aitsitantatsica iroguentiquea icoraquetashitaque iraitsitante, irimetojante, impoguerejante, cotanquitsiquea naatimpa iroguentiquea nocoraquetashique iranijajianajeniji, iranijamajatiguenimaja.

¹¹ “Naroguenti cameetsari quem-poguijamajajiguirica oveja. Iriraquea cameetsari quem-poguijamajajiguirica oveja irimetojamentaqueriquea.

¹² Cotanquitsiqueate irira ivegarajitica intati inquem-poguijantaquenemparica oveja, iramenavaquerigueti lobo* incoraquequegueti, manaquea irishianaque intati irovashiantanaqueriquea oveja, teenica irio ashintemparine. Irira lobo iraashipojempari ovejapae, iroguivorocajencaqueri.

¹³ Irooquea ishiantanacaca shirampari, manatari ivegarajitiri intati, teetari impintsatempariji oveja.

¹⁴ “Naroguenti cameetsari quem-poguijamajajiguirica oveja. Notsamajajiguiriquea novejajiate, ari iquejejigana iriatimpajia itsamajajigana,

¹⁵ quejecaquea itsamajatanagueti Aapani, ari noquejetaca naatimpa notsamajatiri. Ariquea aisa nometojamentaqueri novejatepae.

¹⁶ Chooca itsipapae novejatepae teeca intsipajiguempariji choocajianquitsica acaniqui tantontsiqui. Namajiaqueriquea iriatimpajia aisa. Inquemisantajiaque-naquea nonquenquetsatacaquerigueti, apapioroquea incantanajempa, aparato quem-poguijaquerine.

¹⁷ “Jeroquea ipintsatanquenaca Aapani, inchiquiojititari nojocanaquero nanijane, cameetsanijite naavajero nanijanaje.

¹⁸ Tecatsi aapitsatenarone, inchiquiojita naatimpa nojocanaquero. Nagavejaque nojocanaquero, nagavejaque naavajero. Irootaque inintacaquenaca Aapani nantero.”

¹⁹ Ariquea iquemajavaquerigueti joriojia icanquegueti imaica, ariquea icojianaca tee inquemavacaajianajempaji.

²⁰ Icantajianaquequea oshequini:

—¿Quero ocoani piquemisantantajivacarica? Manatarite ichoocaqueri ampatsini, aisa mana ishoncacotaca intati.

²¹ Cotanquitsiquea icantajianaquequea itsipa:

—Iriraquea ichoocaqueca ampatsini aato yagaveji iquejetacagaro iquenquetsataquegueti imaica. ¿Arimpa iragavejaque ampatsini iramenacaajeri shamponcajari?

* **10:12** Irira **lobo** iriguenti tomirishiquitica catsimari quejevecarica iririjegui shiishi.

Imanintajiaquerigueti joriojia Jesoshi

²² Oraqueate ocatsincaguitepoajigueti iriraquea joriojia icapioaventajiacaroquea ishineventajiacaca Jerosarequi iquenquejajiajiro inetsanajiajirogueti coramani ivaesatinite teemporo itsaromentantajitarica Aapani Irioshi.

²³ Iriraquea Jesoshi yanijitaquequea oraniqui sotsiqui teemporoqui oveshintsaacagueti iniropoapae ocajaratsencoataquegueti icantajitica Irashi Saromoni.

²⁴ Iriraquea joriojia icapioaventajiaipojacariquea icantajiguiriquea:
—Noguijajavequempiquea coramani, tequerataquea pincamantajiguenaji. Aviguentimpate Quirishitotatsica iintsijate pincamantamajajiguenena imaica.

²⁵ Iriraquea Jesoshi icantajiguiriquea:
—Nomajiavequempitari nocamantajiavetaquempiquea, teequea pinquemisantajiguenaji. Oraquea nantaguequeca ivajiroqui Aapani nintacaaquenaroca, irooquea tsatacaaquempica quero nocotacani.

²⁶ Cotanquitsiquea aviatimpajia tee pinquemisantajiguenaji, teenicaquea avironica novejate.

²⁷ Irirajiaquea nashijia novejatepae iquemisantajiganaquea noquenquetsataquegueti, naatimpaquea notsajiguiri, iriatimpaquea yoguijaguijaitana.

²⁸ Nanijacaajiajeriquea mananiji incoguitempani inchoocajiaje, aato ipega camorecariqui. Aatoquea ichoocati aapitsaquenarineca.

²⁹ Aapani jocaquenarica yanaajiaqueri maasano. Aatoquea ichoocati aapitsaquerineca.

³⁰ Naatimpaquea aisa Aapani apaniro nocanca.

³¹ Ariquea irirajia joriojia yaitsijianaja aisa mapi intsinacajiaquerime.

³² Cotanquitsiqueate Jesoshi icantajiguiriquea:
—Naatimpaquea yagavejacaquenaquea Aapani nonigaaguequempiroquea taaca opajitapae cameetsaguetatsica. Imaica, ¿querocampate pintsinaquimentajiaquenaca?

³³ Icantajiguiriquea joriojia:
—Aato iroguenti notsinaquimentajiguimpi taaca opajita pantaguetaqueca cameetsaguetatsica, iroguenti piquejemanatacari Aapani Irioshi. Aviguentitari caquinte, cotanquitsiquea pipinajashicari iriatimpa.

³⁴ Icantsiijaariquea Jesoshi:
—¿Teempa oncanteji Itioncacaantaquempica Aapani Irioshi: ‘Nocanque naatimpa, aviguentijia irioshijsatsica’?

³⁵ Itsajitiroitari maasano Itioncacaantaqueca Aapani Irioshi aatoquea acanti tee iroomajaca, aisa iriguentiquea cantanquitsi Aapani irirajiaquea itigarancajiaqueneca Iguenquetsatsare iriguenti irioshijsatsica.

³⁶ Iriguentitari nintacaaquena itigarancantaquenaca acaniqui quepatsiqui, ¿queroqueate ococani picantantaquenaca ‘Pipinajashitacari Aapani Irioshi’, nocanquegueti: ‘Naroguenti Irijanite Aapani Irioshi’?

³⁷ Aatomegueti nantrome yantaguetica Aapani, cameetsamequea aato piquemisantajigana.

³⁸ Cotanquitsiquea imaica nantaquerotarite. Aatogueti piquemisantajiavetana nocantajiaquempigueti imaica, pinquemisantajiguenaja pamenajiaquerogueti nantague-
taquerogueti cameetsaguetatsica pintsamajajiaqueniji ichoocaquena Aapani, aisa noquejetaca naatimpa nochoocaqueri Aapani.

³⁹ Inintajiavetajaquea aisa iraaquerime irajaianaquerime irimetojacaantajiaquerime, cotanquitsiquea iriatimpa ariquea isotoapitsajianajiri.

⁴⁰ Ariqueate Jesoshi yoanajiqueate intatiqueroqui Jororanequi iviñacajatantaquegueti Joanca iroaqueragueti, ariquea ichoocapoji oraniqui.

⁴¹ Yoajianaquequea oshequini caquintepae iramenajiaqueri, icantajiguiriquea:

—Irraquea Joanca teequea ironigaantavetemparoji oacaantantatsica intati, cotanquitsiquea itsavetacotaquerigueti iricatica, arimaja maasano icanquea.

⁴² Ariquea itsaromentajanacariquea oraniqui oshequini.

11

Imetojaquegueti Irasaro

¹ Choocaquea joquijitanquitsica icantajitica Irasaro. Iguintenitaquea Vetaniaqui, oguintenitagueta Maria aisa oguetyote icantajitica Marita.

² Ocatica Maria, iroguentiquea shaguitantacarica Amajirote casancajari iguitiqui, ariquate osheguititancari omae. Iriira Irasaro joquijitanquitsica, iriguenti ojariri.

³ Ariquea iroatimpajia otigarancaqueri camantaquerineca Jesoshi incanquiteri:

—Nomajirote, joquijitaca pipintsamajatacaca.

⁴ Irraquea Jesoshi iquemaquegueti icanti:

—Oraquea joquijirentsi aaquerica teequea iro oncoraquetantempa ometojaqueriniji, manaquea iramenimentajitaqueroniji caaviji yagavejamajati Aapani Irioshi, aisa intsajitaqueroniji caaviji yagavejamajati Irijanite Aapani Irioshi.

⁵ Irraquea Jesoshi ipintsamajavetaro Marita aisa oguetyote jeri aisa Irasaro,

⁶ cotanquitsiqueate iquemacovetacarigueta yojoquijica teequea irogueti, manaqueate imaanaji mavite savincaguiteri ontaniqui ichoocaquegueti.

⁷ Iroompaquea icantajiguiri itsatacaanejia:

—Jameja oajianaje Joreaquei.

⁸ Irraquea itsatacaanejia icantajiguiriquea:

—Tsatacaantantatsica, iroaquerasampate inintajiavecaquea joriojia intsinacajiaquempime ontaniqui. ¿Arimpate poanajetampate aisa?

⁹ Icanque Jesoshi:

—Isotoguigueta catsirincaiteri ¿tempa oncarate 12 hora osavincaguitetanaque tequeratagueta inquijaje? Quericaca anijitatsineca savincaguiteri aato itivata, inejantacarotari otsirencaguite quepatsiquitica.

¹⁰ Cotanquitsiqueate quericaca anijitatsineca pitsecariqui intivataquempaquea, teenicate onchoocateji tsirencaguitetacotaquenerineca.

¹¹ Irosati icanque:

—Irraquea atsipavijitaca Irasaro maaquequea, cotanquitsiquea noanaque nontinajeriquea.

¹² Iriatimpajia icantajiguiriquea:

—Nomajirote, imaquegueta iroveanajempaqueate.

¹³ Oraqueate icanquegueta Jesoshi: “Maaquequea”, iroguentiquea iquenquetsatacotaque imetojane, cotanquitsiquea iriatimpajia teequea inquemajigueriji, manaqueate ijijiaqueji arimaja imaque.

¹⁴ Ariquea icamantamajiaqueriquea Jesoshi, icantajiguiri:

—Metojanaque Irasaro.

¹⁵ Cameetsa teequea nonchoocatsitimpaji naatimpa ontaniqui pintsaromententajiaquenaniijite aviatimpajia pamenajiaquerogeti nantaqueca. Cotanquitsiqueate imaica jameja oajianaque iriatimpaqui.

¹⁶ Iquenquetsatanaquequeate Tomashi icantajitica Tsipari icantiriquea itsipapae itsatacaanejia Jesoshi:

—Iroosacanicate jamequetirote oajianaque aatimpajia aisa, anquempejanaquempari Jesoshi ametojiaque.

Jesoshi iriguenti tancorejantatsica, iriguenti anijagantsi

¹⁷ Ariqueate yarejerejeipojacaguete iquemacopojaqueriqueate Jesoshi Irasaro icarat-acotanaque 4 savincaguiteri yoguijaantajitacarica omoroqui imperita.

¹⁸ Oraqueate Vetania oquempajiquero Jerosare, arica ocarataque 3 quiromeetero.

¹⁹ Ariqueate ichooaque oraniqui Vetaniaqui oshequi joriojia coraquejianquitsica iroguishinejajiajeroquea Marita aisa Maria oshimampojancacocari ojariri.

²⁰ Oraqueate Marita oquemacotavaqueriguete Jesoshi coraquetapojaque, oanaque-quea ontonquivojavaquempariniji, oraquea Maria teequea ogueji iroatimpa, mana ochooaque tsovironaqui.

²¹ Ariquea ocantavaqueriquea Marita Jesoshi:

—Nomajirote, arimeguete pinchooacqueme acaniqui aatomequea imetojime jai.

²² Cotanquitsiquea imaica notsaque taaca opaji pincanqueri Aapani Irioshi, inquemisantavaquempiquea.

²³ Icantiroquea Jesoshi:

—Impochatanaje pijariri.

²⁴ Ocantiri Marita:

—Jeejeguitatsi, notsaque impochatanajeguitatsi oncoramanitapojajeguete impochajianajeguete maasano metojajivetatsica aapojaquempaguete savincaguiteri vegarat-apojaatsineca.

²⁵ Icantiro Jesoshi:

—Naroguentiquea tancorejantatsica, naroguentitari anijagantsi. Quericaca quemisantaquenanea irimetojavequempaguete impochatanajequea.

²⁶ Maasano anijajatsica quemisantajiganaca, aato imetojamajatitsi. ¿Piquemisan-querompa ocatita?

²⁷ Ocantiri:

—Jeejeguitatsi, Nomajirote, noquemisanquempiqueate, notsaquetarite aviguentiquea Quirishito, Irijanite Aapani Irioshi, aviguentitarite icamantacojitica incoraque-
taque acaniqui quepatsiqui.

Iraanacaguete Jesoshi omorotacaguete imperita yoguijaantajicarica Irasaro

²⁸ Ariquea ocanquitigui imaica Marita, opianaja ocajemapojiro Maria oguetyote, inchiquioji oquenquetsatacaaqueroquea ocantiro:

—Arejetapojaca Tsatacaantantatsica, icajemacaanquempi.

²⁹ Ariquea oquemavaqueroguete ocatiapanajantaquea oanaque ichooaqueguete.

³⁰ Tequeratatirajatarite irarejetempaji Jesoshi ochooagueguete tsovironaquipae, manaqueate ichooapojaque ontaniqui iroaqueraguete ontonquivojavacariguete Marita.

³¹ Iirajiaqueate joriojia tsipajiacaroca Maria tsovironaqui, oguishinejaqueroca, iroompaquea yamenavaqueroguete ocatiapanajanta osotoanaque yoguijaguijaitana-
queroquea, ijiquequeate ari oanaque ichooataqueguete ojariri iracopojajeri.

³² Ariquea arejetapojacaguete Maria ichooaqueguete Jesoshi, onejapojaqueriguete otigueroashitapojacari iguitiqui, ocantiri:

—Nomajirote, arimequea pinchooacqueme acaniqui aatomequea imetojime jai.

³³ Ariquea yamenavaqueroguete Jesoshi iraanaca Maria jerijiaquea aisa joriojia tsipajiacaroca, ariquea iria ishimampojancavaetanaquea.

³⁴ Ariquea icanti:

—¿Quero pojoquijiquerini?

Iriatimpajia icantajiguiriquea:

—Nomajirote, jameja pamenaquiteri.

³⁵ Iraaca Jesoshi.

³⁶ Icantajianaquequea joriojia:

—Pameneri, caaviji ipintsamajatari.

³⁷ Cotanquitsiqueate iconoagarantajianaquea mana icantajianaque intati:

—Yagavejaquetari inejacajairi shamponcajavetatsica, ¿teempa iragavejeji irogueshitavajerime iricatica aatoniji imetoji?

Jesoshi yovochantajirigueti Irasaro

³⁸ Arimpa ishimampojancavaetanaca Jesoshi. Ariqueate yarejetapojacaroquea omorotacagueti imperita yoguijaantajicarica, iroguenti iticaacotantajicari inirotsentseina mapi.

³⁹ Icanti Jesoshi:

—Pintanarejeroja mapi.

Oquenquetsatanaquequeate Marita itsijoite metojanquitsica, ocantiquea:

—Nomajirote, aricaja pojitanaque, yoguijaitsijicaritari chapinqui, icaratacovaetanquetari 4 savincaguiteri.

⁴⁰ Icantiro Jesoshi:

—¿Arimpa tee noncantempi incajaranqui pinquemisanquenaguete pamenaqueeroquea iragavejane Aapani Irioshi?

⁴¹ Ariquea itanarejajiaquero mapi. Iriaquea Jesoshi yamenanaque jenoqui inquitequi icanti:

—Ariotesa, Aapani, noshinevaetacaqueate piquemavaquenatarite.

⁴² Notsaquetari irosati picoguitaniquea piquemaquena, cotanquitsiqueate nocanquegueti imaica, iroguenti inquemisantimentajiaquempinijite maasano iricajia catintijianquitsica, intsajiaquenijite arimaja aviguenti tigarancaquena.

⁴³ Iroompaquea icanquegueti imaica iririjencatanaquequea icajemanaquequea icanti:

—Irasaro, pisotoapojaje.

⁴⁴ Ari isotoapojaji metojavetanquitsica aguiaguaatacari omagopae iracopaequi, iguitipaequi, maasano. Oraquea ivoroqui ipashicacaro paaño. Icanti Jesoshi:

—Poishorejacoterijate iroanajeta.

Isariajicariquea Jesoshi irimetojacaantajitaqueri

(Mt. 26.1-5; Mr. 14.1-2; Irc. 22.1-2)

⁴⁵ Irootaquequea iquemisantantajiacarica oshequi joriojia oanankuitsica tsipajiacaroca Maria yamenajiaqueroguete yantaqueca Jesoshi, itsajiaipojaque iriomajaca.

⁴⁶ Cotanquitsiquea iconoagarantajiacaquea manaquea yoajianaque icamantajiaipojaqueriquea pariseojia taa opajita yantaque Jesoshi.

⁴⁷ Ariquea icapiocajiacaquea pariseojia itsipajiacariquea saserorotejia anaantajianquitsica jerijia itsipajia majirontajiatitsica, icantajiguiquea:

—¿Queroquea ancojiaquerini irintatica? Yantaguetaquetari oshequi oacaantantatsica intati.

⁴⁸ Aatoguettitari acantajigui manaquea inquemisantajianaqueri maasano, ariqueea incoraquejiaque Iromaquitica irisoveaqueeroquea teemporo itsaromentantajitarica Aapani Irioshi, irashintsijiapojajiroquea aguepatsijiate iroguivorocajiacajiquea intati.

⁴⁹ Ariquea ichooaque saserorote anaantamajatanquitsica icantajitica Caipashi. Iriatimpaquea iquenquetsatanaquequea icanti:

—Teequea pintsajigueji aviatimpajia.

⁵⁰ Tee pinquenquejajigueji ocameetsamajataque apatiroti caquinte irimetojaventaqueri caquinteja, aatoniji ateroncajiga maasano aguinteniqui.

⁵¹ Ora icanquegueti imaica teequeate inchiquiojitsita inquenquejashitemparoji iriatimpa. Iriotaquetari saserorote anaantamajatanquitsica oratica ajagantsi, irootaquequeate iquejetacaantantacarica Aapani Irioshi icantacotaqueriguete Jesoshi irimetojaventajiaqueri maasano joriojia.

⁵² Cotanquitsiquea aatoquea apaniro irimetojaventajiaqueri joriojia, irimetojaven-taqueriqueate aisa maasano irijanijiate Aapani Irioshi guinteniguetsica osamanipae-quitica, incapiocajiaquerinijite apapioro incantanajempa.

⁵³ Irosatiquea isarijantajanacarica irimetojajiaqueri Jesoshi.

⁵⁴ Ariqueate iriatimpa teequea ironigaajiajempariji ichoocamajajiaquegueti joriojia, manaquea yoanaque guinteninintsiqui icantajitica Eperaine oquempejitigueti oquita-mampororoipojigueti. Ariquea ichoocapojaji oraniqui itsipajiacariquea itsatacaanejia.

⁵⁵ Pajiniquea aapojempa ishineventajiacaca joriojia icantajitica Paashicoa. Oshe-quiniquea quenaguetapojatsica querocagueti iguinteniguetsani yoayoaitanaquequea Jerosarequi irinetsanamajajiaquempa tequeratagueti arejetempa Paashicoa, irootarite yamejigaca iriatimpajia.

⁵⁶ Icoaguequeriquea Jesoshi oraniqui. Ariquea ichoocajiaquegueti teemporoqui oniganquirequi icantavacaajiaquea:

—¿Quero pincanteni? ¿Arimpa incoraqueque imaica Paashicoaqui?

⁵⁷ Irirajia pariseojia jerijia saserorotejia anaantajanquitsica icantajiaqueritarite maasano:

—Pitsaquegueti quero ichoocaqueni Jesoshi, pincoraqueque pincamantajiguena cameetsaniji naacaanqueri.

12

Maria oshaguitancari Jesoshi casancajari (Mt. 26.6-13; Mr. 14.3-9)

¹ Ocaratapojaquegueti 6 savincaguiteri arejetantapojaquempaca Paashicoa, iri-raquea Jesoshi yoanaquequea Vetaniaqui iguintenitaguetsica Irasaro metojavetanquitsica yovochantajica.

² Ariquea oraniqui itijaiqueroquea irishecaquempaca Jesoshi, irishineventaji-avaquempariquea. Oraquea Marita iroguenti amajiaqueneri. Iriraquea Irasaro ari ichoocaque oraniqui shitaponcarontsiqui iconoajiacari maasano tsipajiacarica Jesoshi.

³ Ariquea ocoraquepojaquequea Maria amacotaquequea apanaquitiro vegarama-jatanquitsica casancajencatatsica ipeantajitaroca naarero, tee inconoajatantajitem-paroji otsipaja. Oshaguitancariquea iguitiqui Jesoshi, iroompa oshetantavacariquea omae. Ariquea ocotanaca oponcajajencatanaquequea otsitacajencatanacaro tsoviron-aqui.

⁴ Ariqueate ichoocaque oraniqui Jorashi Ishicariote irijanite Shimo, iriguentiqueate itsatacaane Jesoshi amampivenquerineca coajica.

⁵ Icanti:

—¿Queroquea ocotacani teequea irojocantajiteroji? Iraantajiquemparome oshequi imentaquipae irooriji ovegaravaevetaca 300 tenario, irojocajitaquenerime coguiteja-cojianquitsica.

⁶ Cotanquitsiquea teequea arimaja inquenquejamajateriji coguitejacojianquitsica, manaqueate icanquegueti imaica yamenaque iriguenti ajiricacotapiniquenerica imen-taquititepae itsipajiacaca, ariquea yaagarantsitaqueriquea.

⁷ Cotanquitsiqueate Jesoshi icantsitariquea:

—Ari ocotaca, naroguentitarite otsotejatashitaca oshaguitanquenaca imaica, irogu-i-jaajiquenatari omoroqui coajica nometojanaquegueti.

⁸ Iriraqueate coguitejacojiatsica icancanitarite intsipajiaquempi, naatimpaquea aa-totari nocoguitani notsipajiguimpi.

Isariajitanacari Irasaro irimetojacaantajitaqueri

⁹ Ariquea iquemacojiaquerigueti oshequini joriojia chooca Jesoshi Vetaniaqui, yoayoaitanaquequeate iramenajiaquiteri, cotanquitsiquea tee apaniro iroashijianaqueriquea iriatimpa, yoayoaitashitanaqueriquea aisa Irasaro yovochantajica Jesoshi imetojavetacagueti.

¹⁰ Ariqueate iquemavacaajianacaquea saserorotejia anaantajianquitsica irimetojacaantajiaqueri aisa Irasaro,

¹¹ yamenajiaquetarite irio iquemacojiaque oshequi joriojia yovashiantantajianarica iriatimpajia teequea inquemisantajiajeriji, iriguentiquea iquemisantajianaque Jesoshi, yaventajianacari.

Ishineventajiavacarigueti Jerosarequitica Jesoshi

(Mt. 21.1-11; Mr. 11.1-11; Irc. 19.28-40)

¹² Choocaquea oraniqui Jerosarequi oshequini coraquejianquitsica irishineventajiguemparo Paashicoa. Ariqueate osavincaguitetamanaquegueti iquemacojiavaqueriqueate Jesoshi coraquetaque.

¹³ Yaavashijianaquequea ovashi yoayoaitanaque itonquivojajiavacariquea icajemajianaquequea icantajigui:

—¡Caaviji yoganejencamajataca!

—¡Intsishiatsi irishineventajiquempari iriratica coraquetapojatsica itigarancaqueca Majirontamajatatsica! ¡Iriotaque Imajirote ishiraerijia!

¹⁴ Iroompaquea irira Jesoshi inejapojaqueri iriaqueraca quimogantirenatananquitsica aashino yaaqueriquea isavicanaqueri, ariquea onetsanatanacaquea itioncacojiquerigueti ocanti:

¹⁵ “Aatoja pitsaroajigui aviatimpajia Shionequitica, coraquetapojquetari pimajirote, ishiacotantapojari iriaqueraca quimogantirenatananquitsica aashino.”

¹⁶ Cotanquitsiqueate irirajia itsatacaanejia tequerata intsajigueji irootaquequea net-sanataqueroca itioncacojiquerigueti, cotanquitsiquea ariquea yogajenocashitanajarogueti Jesoshi iroganejencare ariquea iquenquejajianaqueroquea maasano yamenaguetaqueca ari itsajiaipojaque: arimajasacanicate iriguenti oquenquetsatacotaque itioncacojiquerigueti, irootaquequea iquejetantajicarica imaica.

¹⁷ Irirajiaquea amenajiaquerica Jesoshi yovochantajirigueti Irasaro icajemaquerigueti yoguijaajivecarigueti icamantajiaqueriquea maasano.

¹⁸ Irootaquequea yoayoaitantanacaca itonquivojajiavacariquea Jesoshi, iquemacoji-aqueritari yantaquero oacaantantatsica intati.

¹⁹ Irirajiaquea pariseojia icantavacaajianacaqueate:

—Jeroquea nocantavequempi. ¿Queroquea ancojiaquempani imaica? Pamenajiguerija maasanojia yoguijajianaqueri.

Inintajiaquequea guiriegojia iramenajiaqueri Jesoshi

²⁰ Yoagarantajianaquequeate aisa guiriegojia Jerosarequi irogavisaajiguero Paashicoa intsarotentajiguempari Aapani Irioshi.

²¹ Iriatimpajia yoayoaitanaque ichoocaquegueti Jeripe poneanquitsica Vetsairaquei choocatantaroca Garireaqui, icantajiguiriquea:

—Nonintajiaque nonejajiaqueri Jesoshi.

²² Iriraquea Jeripe yoanaque icamantapojiriquea Antirishi, ariquea itsipatanacari yoayoaitanaque icamantajiaqueriquea Jesoshi.

²³ Iquenquetsatanaquequea Jesoshi, icantajiavaqueri:

—Aapojacaquea ironigaantantajitaquemparoca iroganejencare Irijanite Caquinte.

²⁴ Imaica noncamantamajajiaquempiquea, arigueti osacoroncaguite tirigoitsoqui quepatsiqui, aatoguete osampirocaguiti oitsoqui, aatoquea oshequigui, manaquea

apaitsoquiro oncanquempa. Cotanquitsiquea osampirocaguitegueti ontsoroanaque oitsoquimajatanaque.

²⁵ Ariquea iquempetaca imaica quericaca tsaroacaatsica iriatimpa teequea irinintimateji irantsipeventaquempari itsipa, icavintsajavecaquea cotanquitsiquea irimetojaque coajica. Cotanquitsiquea iriraquea teeca incavintsajempaji iriatimpa acaniqui quepatsiqui iroguenti iquenquejacotaqueri itsipa yatsipevencariquea, iriguentiquea incoguitempaniquea iranijaguiteni.

²⁶ Quericaca nintanquitsica irantaguequero nonintaguetica naatimpa, iroguijatacotenata. Querocagueti nonchoocaquegueti naatimpa, ari inchooacque aisa iriatimpa notigaranquica. Iriraqueate antaguetiroca nonintaguetica naatimpa, irishinevenquempariquea Aapani incanqueriquea: ‘Cameetsavaetaquequea.’

²⁷ “Imaicaquea noshoshoguitevaetanacaquea, cotanquitsiquea ¿queroquea noncanteni? ¿Arimpa noncante: ‘Aapani, pincavintsajenashia aatoniji natsipeta nometojaque?’ Aatoquea nocantiritsi, irootaquetarite nocoraquetashique, irootaque narejetantapojacaroca ocativa savincaguiteri.

²⁸ Aapani, ponigaantero poganejencare irishineventajiaquemparoniji pivajiro.”

Ariquea iquenquetsajitanaquequea ontaniqui jenoqui inquitequi icanti: “Nonigaantaquerotari noganejencare, coajicaquea nonigaantajero aisa.”

²⁹ Ariquea iquemajiaquerigueti maasano catintiitanquitsica iconoagarantajiacaquea icantajianaque mana oseroroncaguitetanaque intati, cotanquitsiquea itsipa cantajiananquitsica:

—Iriocaja quenquetsatanquitsi irashivantite Aapani Irioshi.

³⁰ Iriraqueate Jesoshi icantajiguiriquea:

—Tee iro inquenquetsatantempaji nonquemero naatimpa, iquenquetsatantacaca cameetsaniji pinquemajiaqueroniji aviatimpajia.

³¹ Imaicaquea aapojaca incantantajitaquempaca quero incojitaquerini covaeguishejiatsica quepatsiquitica, aisa iroguisotoajiteri irira majirontavetanquitsica acaniqui quepatsiqui.

³² Oraqueate irogatiacojitaquenaguete acaniqui quepatsiqui noncajemashirentajiaqueriquea maasano.

³³ Oraqueate icanquegueti imaica manaqueate itsavetantanaqueroquea quero incojitaqueri irimetojajiqueriguete.

³⁴ Irirajiaquea capiocaventajiacarica icantajiguiriquea:

—Noquemajiaque itsatacajaitanaguete Itioncacaantaqueca Aapani Irioshi ocanti irira Quirishito incoguitempani inchoocaguiteni. Imaica ¿queroquea ocotacani picantantacaca irogatiacojitaqueri irira Irijanite Caquinte? ¿Queriquea imaica Irijanite Caquinte?

³⁵ Iriraquea Jesoshi icantajiguiriquea:

—Imaicaquea igantagatiraja ichoocatimojiaquempi Tsirencari, cotanquitsiquea capichajaniquinivani. Panijijiaquequea imaica igantagatirajaguete itsirenquimojiaquempi, tequerataguete pimpitsecacojigueji. Iriraquea anijitatsica pitsecariqui teequea intsateji quero iquenanaqueni.

³⁶ Nocantantaquempicaquea, pinquemisantajiguerija Tsirencari choocatirajaguete, pinquejetimentajianaquempariniji iriatimpa.

Ariquea iquejequerogueti imaica Jesoshi iquenquetsataqueguete yoanaquequea, ipeapitsajianajari.

Quero ocotacani teeca inquemisantantajiguempaji oshequi jorio

³⁷ Iriraquea Jesoshi yantavecaquea maasanopae oacaantantatsica intati yamenacajaiavecariquea maasano, cotanquitsiquea iriatimpajia teequea intsajiavaqueriji, teequea inquemisantajiavaqueriji.

³⁸ Iroguentiquea oquejetantanacaca imaica cameetsaniji onetsanatanaquempanijite itioncaqueca tsavetantatsica Isaiashini, ocantiquea:

“Nomajirote, notsavetantajiavecaroqueea picanqueca cotanquitsiquea ¿taa quemisantavaquero?

Ponigaajivetacari pagavejica cotanquitsiquea ¿taa tsatavaquero?”

³⁹ Oquejetantanacaca imaica teequea iragavejajigueji inquemisantajigueji, iroorijite icanque Isaiashini aisa itioncaquerogueti icanti:

⁴⁰ “Iiraquea Aapani Irioshi ishamponcajatacaajiaqueri,

iquishoshirentacaanaqueri,

aatonijite inejantajajarotsi iroquiya,

aatoniji itsajigui ishirequi,

aatoniji ipitsocashijigana nogueshishirentantajemparica.”

⁴¹ Iiraquea Isaiashini icanqueroqueea ocatica imaica yamenaqueritarite Jesoshi caaviji yoganejencamajata irootaquequeea itsavetacotantarica.

⁴² Oquempevecaqueea imaica cotanquitsiquea ichoocajiaque oshequini caquinteja aisa imajirojiate cantajianquitsica Jesoshi iriguenti Quirishito Meshiantatsica, cotanquitsiquea inchiquiojiquea icantajiaque imaica itsaroacaajiacaritarite pariseojia ican-timentajiguiritsiqueate inquijajianaquegueti shinagogaqui icapiocantapiniyacaca.

⁴³ Inintajivetaatari irishineventajiaquemparime Aapani Irioshi, cotanquitsi iroguenti inintamajiaque irio shineventajiaquemparine caquintepae.

Icanqueca Jesoshi oncatsimatatacaantaqueri irira teeca inquemisantavaqueroji

⁴⁴ Ariqueea iquenquetsatanaquequeea Jesoshi iririjencaqueea icanti: “Maasano quemisantanaca teequea apaniro inquemisantenaa natimpa, iriguenti iquemisantaque tigarancaquenaca.

⁴⁵ Ariqueea iquejetacaqueea nejaquenaca, inejaqueriqueate aisa tigarancaquenaca.

⁴⁶ Naroguenti Tsirencari, iroguenti nocoraquetashitaque quepatsiqui aatoniji ipitsecacotaji quericaca aventaquenaneca.

⁴⁷ Cotanquitsiqueate quericaca quemavetavaquenane aatogueti inetsanatiro nocanqueca aatoqueea naroguenti cantatsi incatsimatimentajiteri igovaeguishere, teequea iro noncoraquetashite noncantacoteri caquintejiatsica incatsimatimentajiteri igov-aeguishere, iroguentiquea nocoraquetashique naajivajeri aatoniji ipega.

⁴⁸ Querica manintaquenanea, teeca irininteji inquemisantero nocanqueca, choocaquea cantacaanquerineca: iroguentiquea nocanqueca noquenquetsavetacagueti. Irootaquetari cantacaanquerine aapojaquempagueti savincagueti vegaratapajaatsineca.

⁴⁹ Teenicaqueea inchiquiojitsi naashitemparoji naatimpa maasano querocaca nocanqueca. Iriguentiqueate cantaquena Aapani tigarancaquenaca.

⁵⁰ Notsaquequeea ora icantacaantaqueca Aapani, iroguenti anijacaantantatsica iranjantaguitepanica, irootaquequeea noquejetantacaroca imaica: ora icanquenaca Aapani irootaque nocanque.”

13

Jesoshi iquivaguitijiaqueri itsatacaaneja

¹ Tequeratagueti aguempaji Paashicoa, itsaquequeea Jesoshi aapojaca irojocantana-jemparoca ocatica quepatsi iroanajequeea Aapaniqui. Igantagaqueea coramani ipintsajiacari yashintajiacaca acaniqui quepatsiqui, icoguitaniquea ipintsamajajanacari, irosati yonigaantamajataquero quero ocarataqueni ipintsamajatacari caquinte.

² Opitsecanajigueti ishecajiaca. Incajaranqui iquenquejacaqueri ampatsini Jorashi Ishicariote, irijanite Shimo, iramampijaqueneri Jesoshi iracaanqueri.

³ Itsaquequea Jesoshi yagavejacaqueri Aapani Irioshi maasano, itsaque iponeaca Aapaniqui Irioshiqui aisa iroanaje iriatimpaqui,

⁴ irootaquequea icatiantanacaca ishecajiacagueti, iquitsaarejanacaró iitsaare jeno-
quitanquitsica, yaaquero ishetantajitaca ishipitacaró.

⁵ Ariquea ishajataqueroquea oja vantejaqui, iquivaguitijiaqueriquea itsatacaanejia,
isheguititantajajari ishipitacaca.

⁶ Yarejetapojarigueti Shimo Peerero, icantavaqueri:

—Nomajirote, ¿aviguentimpa quivaguititenane naatimpa?

⁷ Icantiriquea Jesoshi:

—Tequeratancate pintsateroji quero ocotacani noquejetancaroca imaica, cotanquit-
siquea coajicaquea pintsapojero.

⁸ Icantsitariquea Peerero:

—¡Aatoja piquivaguititimatana naatimpa!

Icantiqúea Jesoshi:

—Aatogueti noquivaguititimpi, aato nagaveji notsipatajimpi.

⁹ Ariquea icantiriquea Shimo Peerero:

—Nomajirote, arisacanicate aatoqueate aparo piquivaguititana, pinquivacotaque-
naquea, aisa pimaqueroquea noguito.

¹⁰ Cotanquitsi Jesoshi icantiri:

—Iriaquea cajatacsica mana inquivaguititajempa intati, ariquea onetsanatanaja
maasano itsinoqui. Imaica aviatimpajia netsanajavetaquempiquea, cotanquitsiquea
teequea maasano pinetsanajiguempajia.

¹¹ Itsatsitacatari queri amampijaquenerineca aacaanquerineca, irootaquetari ican-
tantacaca: “Teequea maasano pinetsanajiguempajia.”

¹² Ariqueate iteroncaqueroqueti iquivaguitijiaquerigueti iquitsaatanajaquea yovan-
quetacaca, yoanaji isavicapojaji shitaponcarontsiqui, icantajiguiriquea:

—¿Pitsajivaquerompate taa opaji noquejetacaacaca noquejejaquempiroqueti imaica?

¹³ Aviatimpajiaquea iroguenti picantajigana: ‘Tsatacaantantsica’, aisa picantaji-
gana: ‘Nomajirote.’ Tampaticaquea poaquero, aritari nocota.

¹⁴ Arivetaca imaica naroguentivetacacacaca tsatacaajiguimpica, aisa naroguentivetaca
Pimajirote, cotanquitsiquea noquivaguitijiaquempiquea. Ari pinquejetacaajajemparo
aviatimpajia pinquivaguititavacaajiaquempaqueate.

¹⁵ Naatimpaquea manaqueate noquejetaqueroqueti imaica cameetsaniji namenaca-
jiaquempiironijite pimpampiatimenqueronijite aviatimpajia, pinquejejaquenaquea
naatimpa imaica.

¹⁶ Noncamantamajiaquempiquea irirajia aajanirentsi teequea iranagueriji aajani-
tarica. Ari iquejetaca itigarancajtica teequea iranagueriji tigarancaquerica.

¹⁷ Imaica pintsajiaqueroqueti ocatica nocantajiaquempiquea, pinquejejivaqueroqueti
aviatimpajia, ariqueate pishinemajajianaquempaquea.

¹⁸ “Cotanquitsiqueate nocanquegueti imaica teequea nonquenquetsatacojiguem-
piji aviatimpajia maasano, notsamajajiguititari nocoguiajiaqueca. Cotanquitsiqueate
oquejetantanacaca imaica onetsanaquempaniji Itioncaantaqueca Aapani Irioshi
ocantigueti: ‘Iriaquea shecatacoquenaca icatsimatanaquena.’”

¹⁹ Nocamantsijiaquempiquea imaica tequeratagueti onetsanatempajia, cameetsaniji
coajica onetsanaquempagueti pintsajiaquenaniijite narotaque.

²⁰ Noncamantamajiaquempiquea quericacacacacaca shineventavaquemparineca noti-
garancaqueca naroguentiquea ishineventavaca, aisa quericaca shineventavaque-
naneca naatimpa iriguenti ishineventavaca tigarancaquenaca.”

*Jesoshi icamantaquerigueti iraacaanqueri Jorashi
(Mt. 26.20-25; Mr. 14.17-21; Irc. 22.21-23)*

²¹ Iroompa icanquitigui Jesoshi imaica, ariqueate icotanaca ishimampojancaevanaca, ariquea icamantamajajianaqueri icantajigui:

—Imaica noncamantamajajiaquempiquea, chooca aparo atsipajiacaca ocaniqui iraacanquena.

²² Ariquea icojianaca itsatacaanejia yamenavacaajianaca, tee intsateji queri iquenquetsatacotaqueca.

²³ Iriraqueate itsatacaane ipintsamajataca Jesoshi choocaquea ipimerequijaca iquempejimajacari ishecajiacagueti.

²⁴ Iriraquea Shimo Peerero icanquiti guitoc incoacotimenqueriniji Jesoshi quericaca iquenquetsatacotaqueca.

²⁵ Ariqueate iriatimpa itsipamajatapojacariquea Jesoshi icantiri:

—Nomajirote, ¿queri?

²⁶ Icantiri Jesoshi:

—Imaica nojocajaquerogueti ocatuca pan ashecajiacaca, quericaca nojocaqueneca iriotaque.

Ariquea iquejetaquero yojocajaquero pan yojocaqueneriquea Jorashi Ishicariote irijanite Shimo.

²⁷ Iroompaquea ishecataquitigaro ariquea icotanaca iquijanaqueriquea Satanashi. Iriraquea Jesoshi icantiri:

—Oraquea piquenquejaqueca iintsija pantero taampina.

²⁸ Cotanquitsiquea itsipajia shecajianquitsica teequea intsajigueji quero oocani icantaquerigueti imaica.

²⁹ Iconoagarantajiacaquea iquenquejajiaque arica Jesoshi icanqueri Jorashi iroanaque irovegarataquite irishecajiaquempaca Paashicoaqui, iroocampa irojocajigueneri imentaquipae coguitejacojianquitsica. Iriguentitari ajiricacojiguinirica imentaquitsitepae iriatimpajia.

³⁰ Ariquea yagaquegueti ishecatacaro pan yojocaquenerica Jesoshi, ari isotoapana-janti. Pitsecanaque.

Jesoshi itsatacajianaqueriquea impintsatavacaamajajiaquempa

³¹ Iroompa yoanaquitigui Jorashi icantiquea Jesoshi:

—Apojacaquea irogajenocashitantanajaroca iroganejencare Irijanite Caquinte; irooquea irinejantajitaquemparoca iroganejencare Aapani Irioshi.

³² Ironigaanquerogueti iroganejencare Aapani Irioshi, ariqueate inquejetaquempa iriatimpa ironigaanqueroquea iroganejencare Irijanite Caquinte, taampinaquea ironigaanquero.

³³ Irijanijia, imaica aato osamani notsipamajajiajimpi. Ariquea pamenaguevetajenaquea, cotanquitsi noncamantajiaquempi aviatimpajia nocamantajiaquerica apijorijiate: Aatoquea pagavejajigui poajigue querocagueti noanajeni naatimpa.

³⁴ Imaica noncamantajiaquempiqueate iroaqueratanquitsica pinetsanajiaqueca: pimpintsatavacajiaquempaja. Pinquejijiguenaquea naatimpa nopintsamajajiaquempigueti, ariqueate pinquejijiguenpa aviatimpajia aisa pimpintsatavacaamajajiaquempaja.

³⁵ Pinquejijiaquempagueti imaica pimpintsatavacaamajajiaquempagueti irooquea intsatantajitaquempica aviguentijia notsatacaanejia.

*Icantaquegueti Jesoshi iromanacotaqueriquea Peerero
(Mt. 26.31-35; Mr. 14.27-31; Irc. 22.31-34)*

³⁶ Ariquea irira Shimo Peerero icantiri Jesoshi:

—Nomajirote, ¿queroquea poanajeni?

Iriatimpaquea icantiri:

—Querocaguetei noanaqueni naatimpa, aatoquea pagaveji poguijatana aviatimpa, cotanquitsiquea poguijatanajena coajica.

³⁷ Iriatimpa icantiri:

—Nomajirote, ¿queroquea ocotacani aatoca nagavejanta noguijatimpi noanaque-
queate imaica? Naatimpaquea nometojavenquempi.

³⁸ Iriraqueate Jesoshi icantiri:

—¿Arimajampa pimetojavenquena? Imaicaquea noncamantamajaquempi, coajica
tequerataguetei irinijeji chaapa pomanacoquenaquea 3.

14

Jesoshi iquempetacaro quenavoquirontsi

¹ “Aato pitsaroashirentajigui. Iriguenti pavenquempa Aapani Irioshi, aisa paven-
quena naatimpa.

² Ontaniqui itsovironaquitequi Aapani chooca oshequini piguintenitantapojajem-
paca. Oraqueate aatomeguetei ochoocatime, noncantajiaquempimequeate. Imaicaque-
ate noanaje novetsicaguetaipojempiro pinchoocatantajiaipojajempaca aviatimpajia.

³ Ariquea noanajeguetei novetsicaguetaquitepirota pinchoocatantajiaipojajempaca,
nompishijiaquempiqueate naajiajatempi poimentajianaquenijite pinchoocatantaji-
apojempaca ontaniqui naatimpaqui.

⁴ Pitsajiaqueroquea quero noanaqueni, aisa pitsajiaquero quenavoquirontsi.”

⁵ Icantiri Tomashi:

—Nomajirote, tee nontsajiguenica quero poanaqueni, ¿querocampate noncojiaquem-
pani nontsatantajiaquemparoca quenavoquirontsi?

⁶ Iriraqueate Jesoshi icantiri:

—Naroguentitari quenavoquirontsi, aisa naroguenti arimajatatsica, aisa naroguenti
anijagantsi. Teenicate iragavejajitempaji iroashijitanaqueri Aapani aatoguetei iquen-
tanaquena naatimpa.

⁷ Pintsajiaquenameguetei naatimpa, pintsajiaquerimequea Aapani aisa. Aritaque
imaica pitsajiaqueri, pinejajiaqueri.

⁸ Iquenquetsitanacaqueate Jeripe icantiri:

—Nomajirote, iintsija ponigaajiguenari Piri, ariquea ovegarapojempa.

⁹ Icantiriquea Jesoshi:

—Jeripe, notsipatsijavetaquempiquea coramanitacotapojimpiquea. ¿Tequeratati-
jampa pintsatenaji? Maasanoquea nejaquenaca naatimpa inejaqueriquea aisa Aapani.
Imaica ¿queroquea ocotacani picantantaquenaca: ‘Ponigaajiguenari Piri’?

¹⁰ ¿Teempa pintsateji naatimpa nochoocaqueri Aapani, iriatimpa Aapani ichoocatana?
Maasanoquea nocantajiaquempica teequea inchiqioji naashitemparoji naatimpa,
ichoocaguitanitari Aapani irootaquequeate maasano nantaqueca irioquea antaquero.

¹¹ Pinquemisantajiaquenaja noncamantajiaquempiguetei naatimpa nochoocaqueri
Aapani, iriatimpa Aapani ichoocatana. Aatoguetei piquemisantajiguiro nocanqueca,
irooquea pinquemisantantaquenaca pamenajiaquerogueti nantaguetaqueca.

¹² “Imaica noncamantamajajiaquempiqueate quericaca quemisantaquenanea in-
quejetaquenaquea naatimpa irantaguequea nantaguetaqueca, aisa irantague-
taquequea otsipapae anaaqueroca nantaguetaqueca naatimpa, noanajetarite Aa-
paniqui.

¹³ Taaca opajita pamanantaqueca novajiroqui,* irootaque nantavaque nonigaan-
queronijite yoganejencamajata Aapani intsaroventantajitanaquemparica.

¹⁴ Pamanaquenaguetei novajiroqui, nonetsanatavaquempiro.

* **14:13 novajiroqui.** Amanantaquempariguetei ivajiroqui Jesoshi oncanque amanaqueri iroorijite aquenquejama-
jaquero ininqueca iriatimpa, aato amanacoventiro anintashitacaca aatimpa intati.

Jesoshi icantajiaqueri intigarancaqueri Ishire Aapani Irioshi inchoocashirentajiaqueri

¹⁵ “Arigueti pipintsajiaquena, pinetsanajigueroquea nocantajiaquempica.

¹⁶ Ariquea naatimpa namaneri Aapani intigarancaqueriquea itsipa Amitacotantat-sica incoguitempaniniji intsipajiaquempi.

¹⁷ Iriotaque Ishire Aapani Irioshi cantaquero ca iroomajatatsica. Itsipajia quepatsiquitica aatoquea yagaveja ishineventajavajari, teenicate irinejajigueriji, teequea intsajigueriji. Cotanquitsiquea aviatimpajia pitsajiguiri, ichoocatimojiaquempitari ariquea inchoocashirentajiaquempi.

¹⁸ “Aatoquea novashiantajiguimpi pinquejejaquemparime metojacori, noncoraque-tashijiajempitari.

¹⁹ Capichajaniquinivani aato inejaijaana quepatsiquitica, cotanquitsiqueate aviatimpajia pinejajajena. Iroorijite nanijaguitini naatimpa, ariquea panijaguiteni aviatimpajia aisa.

²⁰ Aapojempagueti oratica savincaguiteri ari pintsajiaque arimaja nochoocataqueri Aapani, aviatimpajia pichoocajiaquena, naatimpaquea nochoocajiaquempiquea.

²¹ Iriaquea tsatavaquero ca nocantica netsanatiroca, iriotaque pintsataquenaca. Iriaquea Aapani impintsataquempariquea pintsataquenaca. Ariquea nonquejetaque-mpa naatimpa nompintsataquempariquea, aisa nonigaaqueriquea quero nocotani.”

²² Iquenquetsatanaquequeate itsipa Jorashi (teequea irio Ishicariote), icantiri Jesoshi:

—Nomajirote, ¿queroquea ocotaca apaniro naatimpajia ponigaaajiaquena quero picotani, itsipajia caquinteja aatoquea ponigagari?

²³ Icantiri Jesoshi:

—Quericacaqueate pintsatanaca irinetsanataqueroquea nocantica. Iriaquea Aapani impintsataquempariquea. Naatimpa nontsipataquempariquea Aapani noncoraque-tashijiaquerigueti noguintenitapojempa iriatimpaqui.

²⁴ Iriaquea teeca impintsatenaji teequeate irinetsanateroji nocantica. Teequea inchiquioji naashitemparo nocantajiaquempica imaica. Iriguentiquea cantaquena Aapani tigarancaquenaca.

²⁵ “Nocanquempiroquea ocativa imaica choocatirajanaguete notsipajiaquempiguetei.

²⁶ Cotanquitsiquea intigarancaqueriguetei Aapani Ishire, Amijiajempineca quejetajenaneca, intsatacaajiaquempiquea iriatimpa maasanopae, aisa inquenquejacaajiajempiroquea maasano nocantajiaquempica.

²⁷ “Imaica noshinetacaajianaquempiquea aatonijite pitsaroajigui, pinquejejanaque-naquea naatimpa noshinevaetanacaguetei. Naatimpaquea teequea nonquejetempariji ishinetacaantaguetei caquinteguetatsica. Aatoquea pishimampojancajiga, aisa aatoquea pitsarogui.

²⁸ Imaica piquemajiaqueroquea nocanquempiguetei noanaje, coajicaquea noncoraque-tashijiajempipi. Arimajamequea pimpintsajiaquename pishinejanaquempamequea piquemajiaqueroquetei nocanqueguetei noanaje Aapaniqui, yanaaquenatari.

²⁹ Nocamantajiaquempiquea imaica tequerataguetei arejetempaji noantanajempaca cameetsaniji coajica arejetapojempaguetei pintsajiaqueniji arimajaquea nocamantamajiaquempipi irosatiquea pinquemisantajianaquena.

³⁰ Imaicaquea aato osamanitaji noquenquetsatacaajimpi, coraquetapojaquetarite irira majirontavetanquitsica acaniqui quepatsiqui. Aatoquea yagavejana,

³¹ cotanquitsiquea onquejetaquempaquea imaica cameetsanijite intsatimentajiaque-ronijite maasano naatimpaquea nopintsamajatacariqueate Aapani, aisa nonetsanataqueroquea maasano icanquenaca.

“Imaicaqueate pincatiajanaque, jamequetiro.

15

Itsavetancaquea Jesoshi iquejetacaró ovorentsamajaca ova

¹ “Naatimpa noquejetacaró ovorentsamajaca ova. Iiraquea Aapani iquejetacari shiacotiroca.

² Iriivatejatsaguetavaqueroquea maasano notsegotsa teeca onchoocatantemparoji oitsoquipae. Oraquea otsipapae pitsaraquijacotanquitsica manaquea irinetsanaguetavaquero intati intotacoguetavaquero cameetsanijite ompitsaraquijacotimentamajatanauquempianijite.

³ Imaicaquea aviatimpajia netsanataquempiquea shejiacatari piguempevaere, iroguentiquea netsanajiaquempi quenquetsatsarentsi nocantajiaquempica.

⁴ Pincoguitempaniquea pintsipamajajiaquenaja, ariquea nonquejetaquempa naatimpa noncoguitempani nontsipamajajiaquempi. Pameneroja oratica otsegotsa ova aatogueti ogavitaro ovorentsa aatoquea ochoocati oitsoqui, aatotari ochoocatashita inchiquioji. Ariquea piquejejiaca aviatimpajia, aatogueti quisho poajigana, aatoquea pagavejajigui inchiquioji pinetsanajiguero inintaguética Aapani Irioshi.

⁵ “Naatimpaquea quejequena ovorentsa, aviatimpajiaquea quejequempi otsegotsapae. Quericagueti tsipamajataquenanea nontsipamajataquempirigueti irantaguequeroquea inintaguética Aapani, inquejetanaquemparoquea otsegotsa pitsaraquijacotatsica. Arigueti pintsiparejanaquempa aatoquea pagaveji.

⁶ Iiraquea caarica tsipamajatacana manaquea inquejetanaquemparo otsegotsapae ova icaratsajitaqueca impishoncajiguetaqueroquea intati, ariqueate ompirijatanaque coajicaquea iravijiquero irojocajiquero paamariqui omorecanaquequea samimimimi.

⁷ Imaica aviatimpajia pincoguitempanigueti pintsipamajajiaquena, aisa aatogueti pipeacojigaro notsatacajiaquempica, pamanajiaqueriquea Aapani taaca opajita pinintaguequeca, ariquea irinetsanatavaquempiro.

⁸ Jeroquea irinejantajitaquemparoca iroganejencare Aapani: pimpitsaraquijacotaquempagueti pimpeantamajaquempaca notsatacaane.

⁹ “Naatimpaquea nopintsamajajiaquempiquea aviatimpajia, noquejetacari Aapani ipintsamajatanagueti. Imaica picancanija quisho poajiguena noncoguitempaninijite nompintsamajajianaquempi.

¹⁰ Naatimpaquea nonetsanatiroquea icanquenaca Aapani, ariqueate iriatimpa icoguitaniqua ipintsamajataquenaquea. Ariquea pinquejejaquempa aviatimpajia pinetsanajiaquerogueti nocantajiaquempica, naatimpaquea noncoguitempaniquea nompintsamajajianaquempi.

¹¹ Manaquea nocantajiaquempiquea imaica cameetsaniji noguishinejajiaquempiniji pishinemajajianaquempianiji.

¹² “Jero ocatia noncantaquempica poguijajianaqueca: pimpintsatavacaajiaquempaja, pinquejejaquena naatimpa nopintsajiaquempigueti.

¹³ Quericaca metojaventirica itsipavijimajajia iriotaque pintsamajatacarica. Tee iragavejeji itsipa iranaaquero ocatia.

¹⁴ Arigueti pinetsanamajajianaquero nocantajiaquempica aviguentiquea notsipavijimajajia.

¹⁵ Imaica teequea noncantajiajempiquea naajanirejia, iiraquea aajanirentsi teequea intsateroji maasano yantaguética aajanitarica. Iroguentiquea nocantajiaquempi notsipavijijiaca, notsatacajiaquempirotarite maasano icanquenaca Aapani.

¹⁶ Teequea aviroquea coguijaiguenane, naroguentiquea coguijaiaquempi. Mana nonintacaajiaquempi intati poajianaque pantaguetaquero cameetsaguetatsica pinquejetantajianaquemparoca pitsaraquijacotatsica sovenaguetaatsica, aatoquea opega.

Noninque pinquejejaquero imaica cameetsanijite irinetsanatavaquempironiji Aapani pamanaquerica novajiroqui.*

¹⁷ Jero noncantaquempica poguijajianaqueca: pimpintsatavacaajiaquempaja.

Teeca inquemisantajigueriji Aapani Irioshi incatsimajiaqueriquea quemisantajiguirica Jesoshi

¹⁸ “Pamenajiaquerigueti irisemaneguintajiaquempigueti quepatsiquitica pinquenquejajiajeroquea naroquetitari isemaneguintajiaa.

¹⁹ Pinquejejaquemparime quepatsiquitica teeca inquemisantajiguenaji impintsajiaquempimequea, inquejetacaajiaquempimequea ipintsatavacaajigagueti iriatimpajia. Cotanquitsiquea nocoguiajiaquempi piconoajiavetacarigueti irooquea isemaneguintantajiaquempica, teetarite pinquempejajempari iriatimpajia.

²⁰ Pinquenquejajigueroja nocantajiaquempica incajaranqui nocanti: ‘Irirajia aajanirentsi teequea iranagueriji aajanitarica.’ Yatsipetacaajiaquenaquea naatimpa, ariquea inquejetacaajiaquempiquea aviatimpajia aisa irantsipetacajiaquempiquea. Itsipajia iguemisantajiaqueroquea notsatacajiaquerica, ariquea inquejejaquempi aviatimpajia aisa inquemisantajiaquempiquea pintsatacaquerigueti.

²¹ Ariquea inquejejaquempiquea imaica incatsimatimentajiaquempiro piquemisantajiaquenagueti, teetari intsajigueriji tigarancaquenaca.

²² Aatomegueti nocoraquetime nontsatacajiaqueriquea, aatomequea icatsimatiementajitirime ocativa yantaguishejiaqueca, cotanquitsiquea imaica nocoraquetaquetari notsatacajiavetacaritari irootaquequea aatoquea yagavejajigui incantajiaquequea: ‘Tee nontsajiguenicate, noquejetantajiacaroca imaica.’

²³ Maasanotari semaneguintajiganaca naatimpa isemaneguintajiacariquea aisa Aapani.

²⁴ Ariquea oquempetaca aisa aatomegueti namenacajaiguirime taaca opajitapae teeca irantajiguetaji aatome iquejetacaantame, cotanquitsiqueate imaica yamenajiaavecrotari nantaguetaqueca cotanquitsiquea arimpaquea isemaneguintajianaquena naatimpa aisa Aapani.

²⁵ Oquejetantacaca imaica cameetsaniji onetsanatanaquempaniji ocantica itioncaantajiaquenerica Aapani Irioshi, ocanti: ‘Mana isemashijiaquena intati.’

²⁶ “Ariquea noncamanqueri Aapani intigarancaquempiri irira Amitacotantatsica, irioquea Ishire tsatacaajiaquempineca iroomajatatsica. Ariquea incoraquequegueti intsavetantaquenaquea.

²⁷ Ari pinquejejaquempa aviatimpajia pintsavetantajiaquenaquea, pitsipajiaquenatari iroaqueraqueti noparianacarogueti notsatacaantigueti irosati imaica.

16

¹ “Imaica nocantajiaquempiquea maasano ocativa aatonijite povashiantajianajiro piquemisantajiaquenagueti.

² Incantimentajiaquempitotari poavetanaquempagueti shinagogaqui icapiocantapinijiacaca, aisa aapojaquempagueti savincaguiteri irimetojajiaquempigueti irijique iro yantajiaque ininqueca Aapani Irioshi.

³ Inquempejiaqueroquea imaica teenica intsajiguerinica Aapani, aisa naatimpa tee intsajiguenaji.

⁴ Manaquea nocamantajiaquempiroquea ocativa imaica cameetsaniji aapojaquempagueti coajica pinquenquejajiajeronijite nocamantsijiaquempitari coramani. Coramaniquea tee noncamantajiguempi, choocanotari notsipajiaquempi.

* **15:16 novajiroqui.** Amanantaquemparigueti ivajiroqui Jesoshi oncanque amanaqueri iroorijite aquenquejamaquero ininqueca iriatimpa, aato amanacoventiro anintashitacaca aatimpa intati.

Icamantajiaqueri taa opajita intsatacaajiaqueri Ishire Aapani Irioshi

⁵ “Imaicaquea imaica noanajequea ichoocaquegueti tigarancaquenaca, cotanquitsiquea aviatimpajia teequea pincoacojiguenaji queroca noanajeni.

⁶ Manaquea intati noshimampojancaajiaquempiquea nocamantajiaquempigueti.

⁷ Cotanquitsiquea imaica noncamantamajajiaquempi ocameetsamajataquetari noanajegueti. Aatoguettitari nogui aatoquea icoraqueti irira Amitacotantatsica oguishinejajajempineca, cotanquitsi noanajegueti nontigarancajipojaquempiriquea.

⁸ Oraquea incoraquepojaquegueti inquenquetsashirentacaajiaqueriquea caquinte-jia quepatsiquitica iramenajiaquempa manaquea iquempevaejiaca, aisa intsatacaajiaqueriquea quero icotani comajamajatatsica, jeroquea aisa intsajiaque incatsimajiaqueriquea Aapani Irioshi coajica maasano teeca inquemisantajigueriji.

⁹ Inquenquetsashirentacaajiaqueriquea cameetsaniji intsajiaqueniji mana iquempevaejiaca, teenicaquea inquemisantajiguenaji.

¹⁰ Intsatacaajiaqueriquea quero icotani comajamajatatsica, noncantanajempatari naatimpa Aapaniqui, aviatimpajiaquea aatoquea pinejajijaana.

¹¹ Intsatacaajiaqueriquea intsatimentajiaqueniji incatsimajiaqueriquea Aapani Irioshi coajica maasano teeca inquemisantajigueriji, imataquerotari icantacotsitacari irira majirontavetanquitsica acaniqui quepatsiqui.

¹² “Choocaquea otsipapae oshequi noncamantajiaquempimeca, cotanquitsiquea aatoquea pagavejajiguironica imaica.

¹³ Oraquea incoraquequegueti Ishire Aapani Irioshi tsatacaajiaquempironeca iroomajaca, intsatacaajiaquempiroquea maasano. Aatoquea inchiqioji iquenquejashitaro iriatimpa, iroguentiquea incamantajiaquempi iquemaqueca. Aisa intsatacaajiaquempiroquea quero oncoguetanaquempanti coajica.

¹⁴ Iraagarantaque nocanqueca intsatacaajiaquempiroquea, irootaquequea ironigaantantaquemparoca noganejencare.

¹⁵ Maasanoquea yashincaca Aapani irooquea nashi aisa, irooquea nocantantacaca irira Ishire iraagarantaque nocanqueca intsatacaajiaquempiro.

Jesoshi icamantajiaqueri irishimampojancajavequempa cotanquitsi irishinejiana-jempa

¹⁶ “Irooshipojaquequea imaica aatoquea pinejajijaana, osamaniguitepojaquegueti ariquea pinejajijajena aisa, noncantanajempatari Aapaniqui.”

¹⁷ Ariquea iconoagaranca itsatacaanejia iquenquetsatavacaajianaca icantajiaquequea:

—¿Taa opaji oca icancajica icanquegueti irooshipojaque aato anejajiri, osamaniguitepojaquegueti ariquea anejajeri, manatari iroanaje Iririqui?

¹⁸ ¿Taa opaji icanquegueti ‘irooshipojaque’? Tee antsatavaqueroji iquenquetsatataqueca.

¹⁹ Iriraquea Jesoshi itsajiavaqueriquea inintajiavecaquea incoacoquerime, irootaquequea icantantajiacarica:

—¿Iroompa picoacotimentajiaquero nocanquempigueti ‘irooshipojaquequea imaica aatoquea pinejajijaana, osamaniguitepojaquegueti ariquea pinejajijajena aisa’?

²⁰ Imaica noncamantamajajiaquempiquea aviatimpajia pishimampojancajianaquempaquea pirajianaquempa intati, irirajiaquea teeca inquemisantajiguenaji irishinevaejianaquempaquea. Cotanquitsiquea aviatimpajia pishimampojancajiaavetaquempa, coajicaquea pishinejianajempaquea.

²¹ Pinquenquejeroja oratica manquigarentsi oncatsitegueti oshimampojancaquempaquea oquemavaquerotari ocatsitanaquerogueti, cotanquitsiquea ovoacotana-jigueti teequea onquenquejajeroji ocatsivecagueti manaquea oshinevaetanaca intati, voajitari irijanite.

²² Ariquea piquejejiaca aviatimpajia imaica pishimampojancajavequempaquea cotanquitsiquea naatimpa nonejajiajempiquea ariquea pishinevaejianajempa, aatoquea ichoocati agavejanquitsineca irishimampojancaajaijaempi.

²³ Oraquea onquejetaquempagueti imaica aatoquea picoacojiajana naatimpa. Noncamantamajataquempiquea taacaquea pamanajiaquerica Aapani novajiroqui* irojocajiaquempiroquea.

²⁴ Cotanquitsiquea imaica tequerata pamananteji novajiroqui. Iintsija pamana-jigueri, irojocajiaquempiquea cameetsaniji pishinemajianaquempaniji.

Yanaantanaque Jesoshi

²⁵ “Oraquea notsatacajiaquempigueti manaquea noquejetacaajiaquempiro taaca opajitapae, cotanquitsiquea coajica aato noquejetacaaguetajimpuro, manaquea nontsavetacomajataqueri Aapani noguisotoamajiaquempiroquea pintsamajatimentajiaqueniji.

²⁶ Onquejetaquempagueti imaica ariquea pamanante novajiroqui. Teequea ari noncanteji naroguenti amanacoventajiaquempine,

²⁷ ipintsamajiaquempitari Aapani iriatimpa, yamenajiaquempitari pipintsamajiaquenaquea naatimpa, aisa piquemisantajiavaqueroquea nocanquegueti mana noponeaca iriatimpaqui.

²⁸ Arimajatari noponeaca Aapaniqui nocoraquequequea acaniqui quepatsiqui, cotanquitsiquea imaica ariquea noanaje noncantanajempa Aapaniqui.”

²⁹ Irirajiaquea itsatacaanejia icantajiaqueriquea:

—Imaicaquea picamantamajiaquenaquea, teequea pinquejetacaaguetajemparoquea intati.

³⁰ Imaicaquea notsajiaquequea caaviji pitsamajatiro maasano, inchiquiojitari pitsatsitacaroquea iquenquejaguetica caquinte tequeratagueti incoacojiguempiji. Notsatan-tajiacaca manaquea piponeaca Aapaniqui Irioshiqui.

³¹ Iriraquea Jesoshi icantajianaqueriquea:

—¿Iroosacanicate pitsajiaquenampate imaica?

³² Aapojempa savincaguiteri, jac aapojacatari imaica, pimporocantajianaquempaca poapoaitanaque querocagueteri pojocajianaquenaquea apaniro, cotanquitsiquea aatoquea apaniro nochoocati, itsipataquenatari Aapani.

³³ Nocamantajiaquempiroquea maasano ocativa pishinemajajianajempaniji paven-tamajiaquenaqueteri. Ocaniqui quepatsiqui irantsipetacajaiquempiquea, cotanquitsiquea pishinemajianaquempa, nanajiaqueritari maasano quepatsiquitica.

17

Yamanacoventacagueteri Jesoshi

¹ Ariquea iteroncanaquerogueti Jesoshi iquenquetsatacaajiaquerigueteri, yame-naquequea jenoqui inquitequi icantiquea: “Aapani, aapojaca. Ponigaantaguetajero imaica iroganejencare Pirijanite, ironigaantantaquemparoaca Pirijanite aisa poganejencare aviatimpa.

² Aviatimpaquea pipeacaacari imajirojiate maasano caquintejiatsica cameetsaniji iragavejaqueniji iranijacaajiajeri maasano pojocajiaquenerica incoguitempaniniji in-choocaguiteni.

³ Iriguentijia anijaguitatsine, irirajia tsajiaquempineca aviatimpa, apaniro picota Pirioshimajati, ariquea inquejejiacquempa intsajiaqueriquea Jesoquirishito pitigaran-caquea.

* **16:23 novajiroqui.** Amanantaquemparigueteri ivajiroqui Jesoshi oncanque amanaqueri iroorijite aquenquejama-jaquero ininqueca iriatimpa, aato amanacoventiro anintashitacaca aatimpa intati.

⁴ Naatimpa nonigaanquero poganejencare acaniqui quepatsiqui, nonetsanaquero tarite maasano picanquenaca nantaque.

⁵ Imaicaquea, Aapani, ponigaantaguetajero noganejencare aviatimpaqui, pinquejetacaamajatajena notsipatimpigueti iroaqueragueti tequeratagueti onchoocateji quepatsi.

Jesoshi yamanacoventajiaqueri itsatacaanejia

⁶ “Irirajia picoguiajiaqueca pojocajiaquenaca notsatacajiaiaqueriquea quero picota. Aviguentiquea ashintavetari, ariquea pojocajiaquenari, iriatimpajiaquea inetsanajiaqueeroquea picanqueca.

⁷ Imaica itsajiaquequea maasano pojocaquenaca aisa pagavejacaquenaca ariguenti oquenapoji aviatimpaqui.

⁸ Nocamantajiaqueritari maasano picanquenaca, ariqueate itsatavaquero. Itsamajiaquequea arimaja noponeaca aviatimpaqui, aisa iquemisantajiaquenaquea nocamantajiaquerigueti aviguentiquea tigarancaquena.

⁹ Iriguentijiatari namanacoventajiaque. Tee irio namanacoventajigue imaica maasano quepatsiquitica, iriguentiquea namanacoventajiaque pojocajiaquenaca, pashintajiacaritari.

¹⁰ Maasanotarite nashintajiacaca pashintajiacariquea aviatimpa aisa. Ariquea oquejetaca aisa maasano pashintajiacaca nashintajiacariquea naatimpa aisa. Iriatimpajiaquea yonigaantajiaquero noganejencare.

¹¹ “Naatimpaquea aatoquea nochoocataji acaniqui quepatsiqui, cotanquitsiquea iriatimpajia icancaniquea inchoocajiaje acaniqui. Noncoraquetajequa naatimpa aviatimpaqui. Aapani Oganejencamajatatsica, pinquempoguijamajatantaquempariquea pivajiroqui irirajia pojocajiaquenaca, intsipamajatavacaajiaquempaniji inquejejiacajiniji aatimpa atsipamajatavacagagueti.

¹² Oraquea notsipajiacarigueti quepatsiqui noquempoguijantajiacariquea pivajiroqui; noquempoguijajiaqueri pojocajiaquenaca, teequea impeimatempaji, apaniroquea peanquitsi irira pomatsatanquitsineca onetsanatementanaquempaniji Tioncarentsimajaca.

¹³ “Imaicaquea noncoraquetaje aviatimpaqui, cotanquitsiquea imaica choocatirajanagueti acaniqui noncanquempiquea maasano ocatica irishinevaetimentajianaquempaniji iriatimpajia inquejejianaquenaquea naatimpa noshinevaetagueti.

¹⁴ Notsatacajiaiaqueriquea piguenquetsatsare, cotanquitsiquea irirajia quepatsiquitica teeca inquemisantajiguempiji manaquea isemaneguintajiacari yamenajiaquerigueti tee inquempejiguempariji iriatimpajia, mana iquejejiacquena naatimpa teequea nonquempejiguemparinica quepatsiquitica.

¹⁵ Tee iro namanimentempi noncanquempi paajianajeri taampina aatoniji ichoocataji acaniqui quepatsiqui, iroguentiquea pinquempoguijamajateri aatonijite agavejajigui covaeguisherentsi.

¹⁶ Iriatimpajia tee inquempejiajempariji quepatsiquitica, mana iquejejiacquena naatimpa teequea nonquempejiguemparinica quepatsiquitica.

¹⁷ Pinashitacaantajiajempari iroomajatatsica irisavicaventamajajiaqueroniji pininqueca. Piguenquetsatsare iroguentiquea iroomajatatsica.

¹⁸ Oquejetacatari naatimpa pitigarancaquenagueti ocaniqui nontsatacajiaiaqueriniji teeca intsariventajiguempiji, ariquea nonquejetaquempa naatimpa nontigarancajiaqueriquea iriatimpajia intsatacaajiaqueri.

¹⁹ Naatimpaquea nocoguitaniquea nosavicaventiro pinintaguetica aviatimpa. Iroguentiquea noquejetancaroca imaica cameetsaniji inquempejiaquenaniji iriatimpajia aisa.

Jesoshi yamanacoventajiaqueri maasano quemisantajiaquerineca

²⁰ “Cotanquitsiquea teequea apaniro namanacoventajigueriji irirajia notsipajiacaca imaica. Namanacoventajiaqueriquea aisa quemisantajiaquenanea coajica inquema-jiaquerigueti iriatimpajia intsavetantajiaquerogueti picanqueca.

²¹ Namanacoventajiaqueriquea cameetsaniji apanironiji incantajianajempa, queje-taca, Aapani, pichoocaquena naatimpa aisa naatimpa nochoocaquempi aviatimpa, ariquea inquejejiaguempa iriatimpajia apaniro incantajiaquempa inquemisantajiacajigueti, cameetsanijite intsajiaqueniji itsipajia caquinteja aviguenti tigarancaquenaca.

²² Oraquea noganejencare pojocaquenaca, ariquea nojocajiaqueneri cameetsaniji apaniro incantajianajempa, quejetacaquea aatimpa apaniro acanca.

²³ Nochoocaqueri iriatimpajia aisa aviatimpa pichoocaquena naatimpa, cameet-saniji apaniromajaca incantajianaquempa. Inquejejiaguempagueti imaica irira-jia teeca inquemisantajiguenaji intsajianaquequea aviguenti tigarancaquena, aisa intsajianaquequea pipintsamajajiacari quemisantajiaquenaca piquejetacaajiacari pip-intsamajatanagueti naatimpa.

²⁴ “Aapani, nonintaquequea irirajia pojocajiaquenaca iroajianaque inchoocajia poje ontaniqui naatimpaqui iramenimentajiaqueroniji noganejencare pojocaquenaca iroorijite pipintsamajataquena iroaqueragueti tequeratagueti onchoocateji quepatsi.

²⁵ Aapani Comajamajatatsica, irirajia quepatsiquitica teequea intsajiguempiji, naatimpaquea notsamajatimpi. Ariquea iquejejiaca irirajia notsipajiacaca imaica, intsajiaquequea aviguenti tigarancaquena.

²⁶ Notsatacajiaqueriquea quero picotani aviatimpa, irosatiquea noncoguitempani nonquejejianaquempa intsatimentamajataqueniji arimaja pipintsamajajiacari pique-jetacaajiacari pipintsamajatanagueti naatimpa, aisa naatimpa noncoguitempaniquea nontsipamajajiaquempariquea.”

18

Yaajitaquerigueti Jesoshi

(Mt. 26.47-56; Mr. 14.43-50; Irc. 22.47-53)

¹ Ariqueate iteroncanaquerogueti Jesoshi yamanaquerigueti Iriri, itsipatsipai-tanacariquea itsatacaaneja imontemonteitanacaro ajavinteni icantajitica Sereroone, yoayoaitanaquequea panquirentsimashiqui choocatatsica oraniqui.

² Iiraquea Jorashi aacaanquerineca itsatiroquea iriatimpa aisa, aritarite yoapinique Jesoshi itsipatsipaipinicare itsatacaaneja.

³ Ariquea icoraquepojaquequea Jorashi itsipajiacari oshequini coaretapae Iro-maquitica jerijia aisa coaretapae quempoguijajiguiroca teempro itigarancajiaqueca pariseojia aisa saseroroteja anaantajianquitsica. Yamajipojaquequea yashimirintan-tajigaca jeriquea aisa itsivotantajiacaca.

⁴ Cotanquitsiqueate Jesoshi itsaquetari queroquea incojitaquerini, yoanaquequea itonquivojajivacariquea icantajiaqueriquea:

—¿Taa ipaji pamenagueque?

⁵ Iriatimpajia icantajiguiquea:

—Jesoshi Nasarequitica.

Icantiquea iriatimpa:

—Naroguentitari.

Ari icatiaca aisa Jorashi aacaanquerica, iconoajiacari.

⁶ Ariquea icantajiaquerigueti Jesoshi: “Naroguentitari”, ariquea icojianaca ipiati-ganajianacaquea intati itejatejaitanaquequea isavi.

⁷ Ariquea yapijitajiri aisa icantajiguiquea:

—¿Taate ipaji pamenagueque?

Icantajiguiriquea:

—Jesoshi Nasarequitica.

⁸ Ariquea icantajajiriquea Jesoshi:

—Nocamantaquempitari naroguenti. Imaica naroguentica pamenagueque, povashi-antajajeriquea iricajia iroaroaitanajeta.

⁹ Oraquea oquejetantacaca imaica cameetsaniji onetsanatementanaquempaniji icanqueca Jesoshi icanquegueti: “Iriraquea pojocaquenaca teequea impejaiguempaji aparo.”

¹⁰ Ariquea iriraquea Shimo Peerero inoshicaqueroquea itsaampitsantsamenirite itoguempitataqueri irajaanire saserorote anaantamajatanquitsica, iguempitarejantacaro itincamijempequiquitica. Ipajitaquea aajanirentsi Maaroco.

¹¹ Jesoshi icantsitariquea Peerero:

—Pisaquiajero pitsaampitsantsamenirite. ¿Aatempa natsiperejarotsi icanquenaca Aapani?

Yaajitanaquerigueti Jesoshi ichooaquegueti saserorote anaantamajatanquitsica

(Mt. 26.57-58; Mr. 14.53-54; Irc. 22.54)

¹² Ariqueate iriraqueate imajirote coaretajia Iromaquitica itsipajiacariquea maasano igoaretatepae jerijia aisa igoaretatepae joriojia quempoguijajiguiroca teemporo, yajir-icajiaqueriquea Jesoshi, yoishojiaqueri.

¹³ Iroqueti yaajianaqueri itsovironaquitequi Anashi,* iriotarite igoonquinite Caipashi saserorote anaantamajatanquitsica oratica ajagantsi.

¹⁴ Iriraquea Caipashi iriotaque cantajiaquerica irapijorioteni ocameetsamajataque apatiroti caquinte irimetojavenaqueri caquinteja.

Peerero yomanacoquerigueti Jesoshi

(Mt. 26.69-70; Mr. 14.66-68; Irc. 22.55-57)

¹⁵ Ariquea yoguijavanacariquea Shimo Peerero, itsipatanacariquea itsipa itsatacaane Jesoshi. Irica itsatacaane irio itsatica saserorote anaantamajatanquitsica, irootaquequeate itsipatantacarica Jesoshi yoguijajitaquerigueti intompogui.

¹⁶ Iriraquea Peerero tee inquijeji, mana icatiapoja intati oraniqui sotsiqui soto-morontsiqui, cotanquitsiquea irira itsipa itsatacaane Jesoshi itsatica saserorote anaantamajatanquitsica yoanaquequea iquenquetsatacaaquero aajanirentsi quempoguij-iroca soto-morontsi, cameetsaniji inquijapoje Peerero. Ariquea iquijapojaque.

¹⁷ Ocantavaqueriquea Peerero:

—¿Aviroquea aisa itsatacaane Jesoshi?

Iriatimpaquea icantiro:

—Tee.

¹⁸ Ariquea icatintiitaca aajanirentsiija jeri aisa coaretapae paamariqui itsitacajiaqueca, ocatsincaguitetaquetari, ari itajiaque. Ari iquejetaca Peerero itsipajiacari icatiaca itaque.

Saserorote anaantamajatanquitsica icoacotaquerigueti Jesoshi

(Mt. 26.59-66; Mr. 14.55-64; Irc. 22.66-71)

¹⁹ Ariquea irira Anashi saserorote anaantamajatanquitsica icoacoqueriquea Jesoshi querijia itsatacaaneja, aisa taaca itsatacaantaguetaque.

²⁰ Iriraquea Jesoshi icantiri:

—Naatimpa notsatacaantigueti noquenquetsatacaajiaqueriquea maasano quericaca nintanquitsica inquemisantavaquero, notsatacaantaquetari shinagogapaequi aisa

* **18:13** Irira **Anashi** iriovetaca saserorote anaantamajatanquitsica, cotanquitsiquea yoguisotoaqueri Iromaquitica, irio piajari **Caipashi**. Cotanquitsiquea irirajia joriojia yamenajiaqueri Anashi iriomaja saserorote anaantamajatanquitsica.

teemproqui, icapiocontapinijiacaca maasano joriojia. Tee nomanacotimateroji nocantaqueca capichaji.

²¹ ¿Queroquea ocotacani picoacotantaquenaca naatimpa taaquea notsatacaantaque? Pincoacojiguerija quemajiaquenaca taa opajita nocantajiaqueri, itsajiaquerotari iriatimpajia nocantaqueca.

²² Ariquea icanquitigui Jesoshi imaica, aparo coareta catianquitsica oraniqui yapa-tonquitariquea icanti:

—¿Cameetsampa pinquejetaqueri imaica saserorote anaantamajatanquitsica?

²³ Yacanaqueri Jesoshi, icanque:

—Piquemaquenaguete nocanqueguete teeca oncameetsateji iintsija pincamantajigueri maasano querocaca nocantini. Iroguentiguete cameetsa nocanqueca ¿queroquea ocotacani papatoncanquenaca?

²⁴ Ariquea irira Anashi itigarancacaantaqueriquea Caipashiqui, igantagaquea yoishotaca. Irira Caipashi irioquea saserorote anaantamajatanquitsica.

Peerero yomanacotajiriguete aisa Jesoshi

(Mt. 26.71-75; Mr. 14.69-72; Irc. 22.58-62)

²⁵ Iriraquea Peerero choocatirajaquea icatiaca oraniqui paamariqui itataque. Ariquea icantajitiri:

—¿Aviroquea itsatacaane irinta?

Iriatimpaquea yomanaquequea icanti:

—Teequea naroguenti.

²⁶ Ariquea ichooaque oraniqui ijitica iguempitarejaquea Peerero. Iriquentiquea irajaanire saserorote anaantamajatanquitsica, icoacotsitariquea iriatimpa aisa icantitiri:

—¿Aviroca namenaqueca pitsipatacariguete ontaniqui panquirentsimashiqui?

²⁷ Ariquea yapijitajiro Peerero yomanajiro, icanquitiguiquea imaica inijanaque chaapa.

Yaajitanaqueriguete Jesoshi Piratoqui

(Mt. 27.1-2, 11-31; Mr. 15.1-20; Irc. 23.1-5, 13-25)

²⁸ Ariquea pajiniguete osavincaguitetanaje yoguisotoajianajiri Jesoshi itsovironaquitequi Caipashi, yaajianaqueriquea itsovironaquitequi majirontatsica Pirato itigarancane majirontamajatatsica Iromaqui. Irirajia joriojia teequea inqijajigueti intompogui aatonijite icovaeguishejitiri iragavejajiaquenijite irishecajiaquempa coajica ompitsecanaqueguete, iroguentitarite Paashicoa.

²⁹ Irotaquequea Pirato isotoantanacaca sotsiqui iquenquetsatacaajipojaqueriquea icantajiguiriquea:

—¿Taa opaji picatsimatimentajiaqueri? ¿Taate yantaque?

³⁰ Iriatimpajia icantajigui:

—Aatomeguete yantime teeca oncameetsateji aatomequea namimpirime.

³¹ Ariquea icantajiguiriquea Pirato:

—Iroosacanicate paajianaqueriquea, inchiquiojita pincantimentajiaqueriquea aviatimpajia pinquejetacaajiaquempariquea ocantiguete paperi pogujatacojiguica aviatimpajia.

Cotanquitsiquea icantajianaquequea joriojia:

—Naatimpajia joriojia aatoquea nagavejajigui nometojimentiri, icantimentajiganarotarite Sesa.†

† 18:31 Iriraquea Sesa majirontatsica Iromaqui yagavejajiaqueriguete quepatsipaequitica icantajiaqueri majirontaguevetatsica irinetsanatacojiaqueri igonorojia, cotanquitsi aato imetojimentiri caarica quemisantiro ican-tacaantaqueca. Iriquenti agavejanquitsi incante queri metojanquitsine irira Iromaquitica quejetaca Pirato itigarancaqueca Sesa irinetsanatacojiaqueri joriojia.

³² Oquejetantacaca imaica onetsanatanauquempaniji icanqueca Jesoshi icanquegueti quero incojitaquerini irimetojajiquerigueti.

³³ Ariquea iquijanaji Pirato icajemaqueriquea Jesoshi icoacotaqueri:

—¿Arimajaca aviguenti Imajirote jorio?

³⁴ Icantiriquea Jesoshi:

—¿Inchiquiojitsita paashitacaro aviatimpa picanquenagueti ‘Imajirote jorio’? ¿Choocampate itsipa camanquempica?

³⁵ Icantiri Pirato:

—¿Narompate jorio? Irirajia pigonorojia iriguentijiatari amajiaquempica acaniqui, itsipajiacari saserrotejia anaantajianquitsica. ¿Taate opajita pantaque?

³⁶ Icanti Jesoshi:

—Nomajirontagueti naatimpa, teequea omponeguempaji ocaniqui quepatsiqui. Omponeaquempamequea ocaniqui quepatsiqui impigamentajiaquenamequea gui-jatanaca aatome yaajiganame joriojia. Cotanquitsiquea imaica nomajirontagueti tee omponeguempaji ocaniqui.

³⁷ Ariquea icantiri Pirato:

—Arisacanica, ¿avirompa majirontatsica?

Irraqueate Jesoshi icantiri:

—Tampatica poaquero picanquerogueti naroguentiqueate majirontatsica. Irootaquetari novoashitaque nocoraquetashitaque ocaniqui quepatsiqui nontsavetanqueroniji iroomajaca. Maasanoquea nintanquitsica intsajiaquero iroomajaca iquemisantajiaquenaquea nocantigueti.

³⁸ Icantiri Pirato:

—¿Taate opajita iroomajaca?

Ariqueate icanquegueti imaica isotoanajiquea iquenquetsatacaajiapojajiriquea joriojia icantajiguiri:

—Naatimpa namenaqueri tecatsi iranteca.

³⁹ Cotanquitsiquea aviatimpajia oraquea aapojacagueti Paashicoa pamejiaca nogu-isotojaempiri apaniro yashitacajitica santanaqui antiroca teeca oncameetsateji. ¿Irioquea pinintajiaque noguipaquijajempiri Imajirote jorio?

⁴⁰ Iriatimpajiaquea icajemitsijianacaquea icantanaque:

—¡Aato irica! ¡Irioquea poguipaquijaje Varavashi!

Irraquea Varavashi iriguenti pigatsatanteneri.

19

¹ Ariquea Pirato icantacaantaqueri Jesoshi, ipasapasatacaantaqueriquea.

² Irirajia coaretapae itenempoashiqueri samerento yamatsaetantajiacariquea, aisa iquitsaatantajiacariquea quitsaarentsi camachoncamagori.

³ Mana icantamampeajiaquitari intati:

—¡Aviroquea Imajirote jorio!

Yapatompatojiaqueriquea.

⁴ Ariquea isotoanaji aisa Pirato icantajiapojajiri joriojia:

—Pamenajigue, namajeri pintsatimentajiaquenijite naatimpaquea namenaqueri tee-quea onchoocateji iranteca.

⁵ Irooquea isotoanajigueti Jesoshi yamatsaecaroquea samerento, aisa iquitsaataca quitsaarentsi camachoncamagori. Ariqueate icanti Pirato:

—Jeri iricatica shirampari.

⁶ Ariqueate yamenajiavaquerigueti saserrotejia anaantajianquitsica jerijia aisa coaretapae quempoguijajiguiroca teemporo icajemamajianaquequea:

—¡Pompajacoteri! ¡Pompajacoteri!

Icantajiguiriquea Pirato:

—Iintsija paajianaqueriquea pompajacojigueri aviatimpajia. Naatimpaquea name-naqueri teenica irantenica.

⁷Yacanajiri joriojia:

—Chooaquea cantacaantanentsi noguijatacotaqueca naatimpajia, ocantiquea irime-tojajiqueriquea, ipinajacaritari Irijanite Aapani Irioshi.

⁸Iroompaquea iquemauquitigui Pirato icantajiaquegueti imaica arimpaquea itsaroomajatanaquequea.

⁹Iquijanajiquea aisa intsompogui icoacopojaqueriquea Jesoshi icantiri:

—¿Quero piponeaca aviatimpa?

Cotanquitsiquea Jesoshi teequea iranqueriji.

¹⁰Iiraquea Pirato icantiri:

—¿Quero picotacani caarica pacantana? ¿Arimpaquea tee pintsateji nagavejaque novashiantajempi, aisa nagavejaque nompajacotacaantaquempi?

¹¹Icanti Jesoshi:

—Aatomegueti ishinetimpirome irira choocatanquitsica jenoqui, aatomequea pagavejaname. Irootaquequea irira cantacaanquenaca yamajitaquenaguete acaniqui aviatimpaqui yanaaque iquempevaemajataca.

¹²Ariquea iquemaguegueti Pirato icanqueriguete imaica ariquea inintamajave-tanacaquea irovashiantajerime, cotanquitsiquea irirajia joriojia arimpaquea icajemacomajianaqueriquea icantajianaqueriquea:

—Povashiantajeriguete irintatica teequea pinquenuejacomajatero irashi majirontatsica Sesa, maasanotari inchiquioji cantashitatsica: ‘Naroguenti majirontatsica’, manaquea icatsimaqueri Sesa.

¹³Ariquea iquemavaquitiguiquea Pirato isotoacaanaqueriquea Jesoshi, isavicapoji shitaponcarontsiqui ontaniqui icantomajantapiniqueguete icantajitiroguete “Ishitamencotantajitacarogueti Mapicotapae”, ora evereotsaqui opajita Gavata.

¹⁴Pajiniquea intampicate catsirincaiteri irootapojitari aapojempa Paashicoa. Iiraquea Pirato icantajiguiriquea joriojia:

—Jeri irica pimajirote.

¹⁵Cotanquitsiquea icajemajianaquequea iriatimpajia:

—¡Irimetojeta! ¡Irimetojeta! ¡Pompajacoteri!

Iiraquea Pirato icantajiguiri:

—¿Arimpa nompajacoqueri pimajirote?

Cotanquitsiquea irirajia saserorotejia anaantajianquitsica icantajiguiriquea:

—Tee inchoocatenica itsipa nomajirote. Apaniroquea icoca majirontatsica Sesa.

¹⁶Ariquea icantajiaqueriquea Pirato irompajacojiaqueriquea. Iriatimpajia yaajianaqueriquea.

Yompajacojiqueriguete Jesoshi

(Mt. 27.32-44; Mr. 15.21-32; Irc. 23.26-43)

¹⁷Ariquea inatanaquero Jesoshi igoroshite, isotoanaque iroanaque ontaniqui icantajitiroguete Shocoitontsi. Oraquea evereotsaqui opajita Gorogota.

¹⁸Ariquea oraniqui yompajacojiaqueriquea, itsipatacaantajiacariquea mavite, apaniro yogatiacojiqueri itincamijempequiqui Jesoshi, iriraquea itsipa irajampatequi.

¹⁹Iiraquea Pirato itioncaquequea ovataquiqui ocanti: “Jesoshi Nasarequitica, Imajirote jorio”, ariquea yoguipatacacaantaqueroquea igoroshitequi.

²⁰Iroguentiquea itioncancaro iguenquetsatsarepaequi evereo, guiriego, Iromaquitica. Yapatsajajiaqueroquea oshequini joriojia, aritarite yompajacojiqueriguete Jesoshi oquempejicaro ochoocaguete tsovironaquipae.

²¹Irootaquequea irirajia saserorotejia anaantajianquitsica icantantajavetacarica Pirato:

—Aatoquea pitionquiro ‘Imajirote jorio’, iroguentiquea pitioncaque oncanque: ‘Cantatsica naroguenti Imajirote jorio.’

²² Cotanquitsiquea Pirato icantiriquea:

—Oraquea notioncaqueca ari ococa, notioncaquerotari.

²³ Ariquea irirajia coaretapae ompajacojiaquerica Jesoshi iteroncaquerogueti yompajacojiaquerigueti yashintajijaaro iquitsaaguevecaca,* yaajiajiroquea apaniropae, icarajiaque 4. Apanivaniquea iitsaare intsompoguitica. Iroatimpaquea tee avotempaji yontijajiqueroquea maasano ojamorenataque.

²⁴ Ariquea icantajianaquequea:

—Aatoquea aperejajiguero, manaquea ampegavijijiaquempa antsantajiaquempaca quericaca aaqueroneca.

Oraquea oquejetantacaca imaica mananiji onetsanatanacaca intati Itioncacaantacacaca Aapani Irioshi ocantigueti: “Yashintajijaaro noquitsaaguevecaca yaajiajiroquea apaniropae, aisa ipegavijijiacaca intsantajiaquempaca quericaca aaqueroneca noitsaare.” Aritari iquejejiaca imaica coaretapae.

²⁵ Oraniquiquea yompajacojitaquerigueti Jesoshi choocaquea catiaca iriniro aisa oguetyote, jero aisa Maria imanquigare Quereopashi, jeroquea aisa Maria Magararaquitica.

²⁶ Iriaquea Jesoshi yamenaquerogueti iriniro ocatiaca otsipatacariquea itsatacaane ipintsamajatacaca, icantiroquea:

—Manquigarentsi, jeri pirijanite.

²⁷ Ariquea icantiri aisa itsatacaane:

—Jero piniro.

Ariquee yoanajigueti itsipatanajaroquea itsovironaquitequi, ariquee ochoocapojaji.

²⁸ Ariquee irira Jesoshi itsaquetari ariquee onetsanataca maasano. Imaicaquea, cameetsaniji onetsanaquempaniji Itioncacaantacacaca Aapani Irioshi, icantiquea:

—Mirepojana.

²⁹ Choocaquea oraniqui yojoquijitacojitaqueca apanaqui vinoja cachonerontocuijajaro, shatecaja. Ariqueate iticajajitaqueroquea achomiicajatiroca oja yogatiacotanaroquea oguiji isopoquiji ivagantequi Jesoshi.

³⁰ Ariquee yatsimijicajataqueroquea icantiquea:

—Imaica netsanamajatanacacacaca maasano.

Ariquee yoguivotanaca, yoguipaquijapanajantiro ishire metoc.

Isatajajitaquerigueti Jesoshi

³¹ Oraqueate imetojantacaca Jesoshi iroguenti savincaguiteri inetsanatanajiacaca joriojia maasano inintajiaqueca aapojaquempagueti imagorejantajitaca, irootaquequea inintantajiacaca intopajacotacantaguetajeri metojaguetananquitsica yompajacojiqueca tequerataguete aguempaji. Oraticaquea savincaguiteri imagorejantajitaca icantajitica Paashicoa anaaguequeroquea maasano imagorejantajitaca. Irootaquequea icantantajiacarica Pirato intigarancajiaqueri igoaretate irijararejajiaquiteri itasaquijiqui irimetojanaqueniji taampina intopajacotimentajiaqueriniji.

³² Ariquee yooyoaitanaque ijararejajipojaqueri itsipatacaca Jesoshi yompajacojitaqueriguete, imajiaqueriquea itsipa.

³³ Ariquee inquejetacaajiaquemparime Jesoshi iriatimpa yamenajavepojacariquea metojanaque, teequea irijararejeriji.

³⁴ Cotanquitsiquea apaniro coareta isatajaquitiguiriquea imerequiqui, osotoajatanaque iriraja aisa oja.

* **19:23 iquitsaaguevecaca.** Irooca icantacotaque isavoguinaro, igaviguitire, ichompimashite, aisa yogataacaca, ocarataque 4.

³⁵ Irira amenaqueroca, iriguenti camantacotaqueroca, iroomajacaquea itsavetantaqueca. Itsamajaquequea itampaticataquero icantaquegueti cameetsanijite pinquemisantajianaquenijite aviatimpajia aisa.

³⁶ Manatarite oquejetantacaca imaica cameetsaniji onetsanatementanaquempaniji Itioncacaantaqueca Aapani Irioshi ocantigueti: “Aatoquea ijararejimajitiri apatonquiro itonqui.”

³⁷ Chooaquea otsipa itioncajitaqueca ocanti: “Iramenajiaqueriquea isatajajiaqueca.”

Yoguijajitaquerigueti Jesoshi omoroqui
(Mt. 27.57-61; Mr. 15.42-47; Irc. 23.50-56)

³⁸ Ariquea imaica yoanaque Jose Arimateaquitica icamantaquitiriquea Pirato inintaque iraanajeroquea itsino Jesoshi. Irira Jose iriguenti itsatacaane Jesoshi cotanquitsiquea teequea irininteji intsajiaqueriquea joriojia, itsaroacaajiacaritarite icatsimajitirtsisi. Iriiraquea Pirato icantanaquequea:

—lintsija.

Ari yoanaque yaanajiriquea.

³⁹ Ariquea icoraquetaquequea aisa irira Nicoremo oashininquirica Jesoshi tsiteniriqui, yamaquequea casancari icantajitica mira oconoacaroquea otsipa icantajitica aaroo. Maasanoquea otenataquequea 30 quiro.

⁴⁰ Ariquea yaajianajiro itsino Jesoshi, yampiguiricacojiaqueriquea omagopaequi, itsipatacaantacaro casancari, ariquea iquejetacaajiacariquea querocaca icojigani iquitatantajiguigueti joriojia.

⁴¹ Ontaniquiquea oquempejiquero yompajacojiaquerigueti Jesoshi choocaquea panquirentsimashi. Ari ochoocaque imperitaqui imorotashijitirica metojatsica, iroaqueramorotirajaquea tequeratatiraja irojoquijitajitempariji metojatsica.

⁴² Ariquea oraniqui yojoquijijitajiriquea Jesoshi, irootari quempejitanquitsi, aisa pajiniquea aapojempa savincaguiteri imagorejantapinijiacaca joriojia.

20

Ipochatanajigueti Jesoshi
(Mt. 28.1-10; Mr. 16.1-8; Irc. 24.1-12)

¹ Ariquea osavincaguitetamanaque parianajaroca semana* ogantagatirajaquea opitsequi oanaquequea Maria Magararaquitica yojoquijijitaquerigueti Jesoshi, amenavepojaroquea mapi iticaacotantajivetacarica jac quitsorejanaquequea.

² Oshiashitanacari Shimo Peerero aisa itsipa itsatacaane, irira ipintsamajatacaca Jesoshi, ocamantajapojaqueriquea:

—Yaajitapanajantiriquea Amajirote. Tee inchoocatajeji yojoquijijivetacarigueti. Teequea nontsateji querocaca yojoquijijitajirini.

³ Ariquea irira Peerero itsipatanacari itsipa itsatacaane Jesoshi, yoajianaque yojoquijijivetacarigueti Jesoshi.

⁴ Ishiashiaivetanacaquea mavite, cotanquitsiquea ishiamajatanaca itsipa, yojocanaqueri Peerero, iriquetiquea arejetapojatsi.

⁵ Itavincapojiquea yamenapojaquero joquijimagotaca omagopae yampiguiricacotantajivecarica, cotanquitsiquea teequea inquijeji.

⁶ Ariquea yarejetapojacagueti Shimo Peerero iquijianaquequea iriguenti intsomogui. Ariquea iquejetaca iriatimpa yamenaguequero omagopae joquijiguetaquea oraniqui.

* **20:1** Iroguenti opariantanaja otsipa semana savincaguiteri tominco.

⁷ Yamenaqueroquea aisa omago ipashicavorotantajivecarica Jesoshi, teequea ontsipatemparoji otsipapae omagopae, manaquea apitivica ojoquijica tiijai.

⁸ Ariquea iquijanaque itsipa itsatacaane Jesoshi iriquetica arejevetanquitsica incajaranqui, yamenaqueroquea maasano, ari iquenquejanaque arimaja pochatanaji.

⁹ Tequeratanicate intsajivetemparoji ocanqueca Tioncarentsimajaca ocanquegueti impochatanaje.

¹⁰ Ariquea ipiapiaitanaja itsatacaane.

Jesoshi yonigaajaroquea Maria Magararaquitica

(Mr. 16.9-11)

¹¹ Cotanquitsiquea Maria ocatiaca sotsiqui oraniqui yojoquijijivetacarigueti Jesoshi, iracaquea. Ariquea otavincanaque ameni intsompogui.

¹² Onejaqueriquea mavite irashivantijitete Aapani Irioshi iquitsaataro quitamarori, savicaque ipitsantsajivetacarigueti Jesoshi, apaniroquea savicanquitsi iguitovecagueti, iriraquea itsipa ichoocaque igontavecagueti.

¹³ Icantajiguiroquea:

—Manquigarentsi, ¿taaquea piraacoque?

Ocantanaqueriquea:

—Yaajitanaqueri Nomajirote. Teequea nontsatajeriji querocaca yojoquijitajirini.

¹⁴ Iroompaquea ocanquitigui opitsocavetanacaquea onejiriquea catiaca Jesoshi, cotanquitsiquea tee ontsatavajeriji, ojiquequea tee irio Jesoshi.

¹⁵ Icantiro Jesoshi:

—Manquigarentsi, ¿taaquea piraacoque? ¿Taaquea pamenagueque?

Iroatimpaquea ojiqueriquea irio shiacotiroca panquirentsimashi, ocantsitariquea:

—Avirocajate aanaqueri, iintsijate pincamantena queroquea pojoquijitajirini, naajaterita.

¹⁶ Icantiroquea Jesoshi:

—¡Maria!

Opitsocanacaquea oquenquetsatacantanacariquea evereotsaqui ocantiri:

—¡Iravoni! —oncanquequea: “Tsatacaantantsica”.

¹⁷ Cotanquitsiquea Jesoshi icantiro:

—Aato pajiricana, tequeratanicate noanajeji jenoqui Aapaniqui. Cotanquitsiquea imaica poanaque pincamantajiapojaqueriquea iguentijeguipae:† ‘Noanaje jenoqui Aapaniqui, iriguentiquea aisa Piri aviatimpajia. Iriguenti Nirioshite aisa Pirioshite aviatimpajia.’

¹⁸ Ariquea oanaque Maria Magararaquitica ocamantajiapojaqueriquea itsatacaanejia:

—Nonejajiriquea Amajirote.

Ariquea ocantajaqueriquea aisa maasano icantaguetaqueroca.

Yonigaajajarigueti Jesoshi itsatacaanejia

(Mt. 28.16-20; Mr. 16.14-18; Irc. 24.36-49)

¹⁹ Ariquea opitsecanaquegueti oratica savincaguiteri parianajaroca semana,‡ ica-piocajiacaquea itsatacaanejia Jesoshi, yashitacojiacaquea itsarocaaajiacaritari joriojia, ariquea imapocashijiapojacariquea Jesoshi icatiimojiapojacari niganqui ichoocajiaquegueti icantajiapojaqueriquea:

—Pishinejiguempaqueea.

²⁰ Icantajaquerigueti yonigaajiaqueriquea iraco aisa imerequiqui. Ariqueate iriatimpajia ishinemajianacaquea yamenajiaqueritari Amajirote.

† 20:17 Icanquegueti Jesoshi *iguentijeguipae* iriguenti icantacoque itsatacaanejia. Pamenero Mt. 28.10; Irm. 8.29; Ev. 2.11-12. ‡ 20:19 *oratica savincaguiteri parianajaroca semana*. Pamenero tioncanquitsica isavivanaqui otsapaqui 20.1. Aisa pamenero Mt. 28.1; Mr. 16.2, 9.

²¹ Icantsiijaariquea Jesoshi:

—Pishinejiguempaquea. Quejetacaquea naatimpa itigarancaquenaguete Aapani, ariquea nonquejetacajiaquempi naatimpa imaica nontigarancajiaquempiquea.

²² Ariquea itasoncajiaqueriquea soo icantajiaqueriquea:

—Paajiavaqueriquea Ishire Aapani Irioshi.

²³ Quericaca pincantajiaque: ‘Peanajaquea piguempaveereja’, peanajaquea. Cotanquitsiquea quericaca pincantajiaque: ‘Choocatirajaquea piguempaveere’, choocatirajaquea.

Tomashi yamenajiriguete Jesoshi

²⁴ Cotanquitsiquea iriraquea itsatacaane Jesoshi icantajitica Tomashi Tsipari teequea inchoocateji iriatimpa yonigaajiaqueriguete Jesoshi itsatacaaneja.

²⁵ Manaquea icamantajiaqueri intati icantajiguiriquea:

—Namenajajiriquea Amajirote.

Cotanquitsiquea iriatimpa icantiquea:

—Aatoguete nameniro iracoqui yompajacojitaqueriguete cavorotonquiqui, aisa aatoguete noguijaguero nochapaqui omorotaqueriguete, aisa aatoguete noguijaavacota inerequiqui aatoquea nocanti: ‘Arimaja ipochatanaji.’

²⁶ Cotanquitsiquea aapojacaguete 8 savincaguiteri iriraquea itsatacaaneja Jesoshi icapioajiaaquea aisa, imaicaquea ari ichoocaque Tomashi. Yashitacojiavetacaquea cotanquitsiquea Jesoshi imapocajiaipojajiriquea icatiimojiaipojacari niganqui ichoocajiaqueguete icantajiaipojiaqueriquea:

—Pishinejiguempaquea.

²⁷ Icampojiriquea Tomashi:

—Imaicaquea jeroquea naco poguijaguero pichapaqui, aisa poguijaavacotempa nomerequiqui. Aatoquea pitsojencana, manaquea pinquemisanquena intati.

²⁸ Iquenquetsatanaquequea Tomashi icantiriquea:

—¡Nomajirote, Nirioshite!

²⁹ Icantiriquea Jesoshi:

—Pinejajana, irootaque piquemisantantajanaca. Irishinejianaquempaquea irirajia teeca irinejiajetenaji cotanquitsiquea inquemisantantajanacuena.

³⁰ Iiraqueate Jesoshi yonigaantaguequeroquea otsipapae oshequi oacaantantatsica intati yamenacajiaqueriquea itsatacaaneja, cotanquitsiqueate teequea ontionquem-paji acaniqui paperiqui.

³¹ Oatica tioncaguetanquitsica manaquea otioncaca cameetsaniji pintsajiaqueniji Jesoshi iriguenti Quirishito, Irijanite Aapani Irioshi; aisa cameetsaniji paventajiaquempariniji ivajiroqui, ariquea iranijacaajiajempi.

21

Yonigaajajariguete Jesoshi 7 itsatacaaneja otsapijaqui omotija

¹ Ariqueate Jesoshi yonigaajajariquea aisa itsatacaaneja ontaniqui otsapijaqui omotija Tiveriashi. Ari oquejetanaca imaica.

² Icapioajiaaquea itsatacaaneja. Choocaquea Shimo Peerero, Tomashi icantajitica Tsipari, Natanaere poneanquitsica Canaqui Garireaque, jerijia irijanite Severo, jerijiaaquea aisa itsipa mavite.

³ Ariquea icanti Shimo Peerero:

—Nonquitsataquitetaquea.

Icantajiguiriquea iriatimpajia:

—Noncoraquejiaquequeate naatimpajia aisa.

Yoajianaque itejiapojaca quenajarontsiqui. Iquitsaquitsajiavetacaquea iroosatiquea isavincaguitetacojianaji, teequea irajaigueji apapaqui.

⁴ Ariquea osavincaguitetamanaquegueti ari icatiapoja Jesoshi otsapijaqui, cotanquitsiquea itsatacaanejia teequea intsajigueji iriguenti Jesoshi.

⁵ Ariquea iriatimpa icantiquea:

—Irijanijia, ¿paajiaquete?

Icantajianaqueriquea:

—Tee anejeriji.

⁶ Ariquea icantajiguiriquea:

—Intsijate pinquitsajigue otsipasotaqui quenajarontsiqui pitincamijempequiqui, ariqueea paajiaque.

Iriatimpajiaquea iquitsajiaque, iroompaqueate inoshicaajivetajaro teequea iragavejajiajeroji irantsomajajiajero, itseraiquitacarotarite shimapae.

⁷ Iquenquetsatanaquequea itsatacaane ipintsamajatacaca Jesoshi icantiriquea Peerero:

—¡Iriguenti Amajirote!

Ariqueeate iquemavaquitiguiquea Shimo Peerero iquitsaatanajaro iitsaare, isapocacatari incajaranqui, ariqueeate yojocajatsitanacaquea pon.

⁸ Iriraquea itsipajiacaca manaquea iquenantajianacaro quenajarontsi, inoshicajatacojianaqueroqueate quitsari, teenica osamanimajateji otsapijaqui, arica ocarataque 100 meetero.

⁹ Iroompaquea yaguijiguijiitanaque inejapojiroquea quichagantesevaetaque paa-mari jocavoquitaca shima aisa pan.

¹⁰ Icantavaqueriquea Jesoshi:

—Intsija pamagarantajiaque shimapae paajiaqueca imaica.

¹¹ Iriraquea Shimo Peerero itetanajaquea quenajarontsiqui inoshicajatacotavaqueriquea shima tseraiquicataris antarinquetepae, yaacotanaqueriquea imparaguequi. Maasanoquea icaravaeque 153 shima. Icarapiovaevetaca, cotanquitsi teequea imperejeroji quitsari.

¹² Ariquea Jesoshi icantajiguiriquea:

—Caacate pishecajiananempa.

Inintajivetaca itsatacaanejia incantajiaquerime: “¿Taampa aviguenti?”, cotanquitsi tecatsi canterine, itsajiaqueritari iriguenti Amajirote.

¹³ Ariquea icoraquetaque Jesoshi, yaaquero pan, yojocajiaqueneri, ariqueea iquejeta-caacari aisa shima.

¹⁴ Ocaquea ocatica ocaratiquea 3 yonigaajajari Jesoshi itsatacaanejia ipochatana-jigueti.

Jesoshi iquenquetsatacaquerigueti Shimo Peerero

¹⁵ Ariquea yagashecajajianacagueti iriraquea Jesoshi icantiri Shimo Peerero:

—Shimo, irijanite Jonashi, ¿pipintsamajataquena, panajiaqueri irica pitsipajiacaca?

Icantiriquea Peerero:

—Jeejeguitatsi, Nomajirote, pitsaque aviatimpa nopintsataquempi.

Icantiriquea:

—Iroosacanicate pojocajigueneri novejajaniquite isheca.

¹⁶ Icantsitajariquea aisa:

—Shimo, irijanite Jonashi, ¿pipintsamajataquena?

Icantiriquea Peerero:

—Jeejeguitatsi, Nomajirote, pitsaque aviatimpa nopintsataquempi.

Icantiriquea:

—Iroosacanicate pinquempoguijajiguenari novejate.

¹⁷ Ariqueeate yapijitsitajariquea aisa icantsitajari:

—Shimo, irijanite Jonashi, ¿pipintsataquena?

Ariquea ishimampojancanaca Peerero yamenanaquerogueta otsipatapojacaquea icoacoquerigueta icantiri: “¿Pipintsataquena?” Icantiriquea:

—Nomajirote, pitsaquerotari maasano. Pitsaquequea nopintsataquempi.

Icantiriquea Jesoshi:

—Iroosacanicate pojocajigueneri novejate isheca.

¹⁸ Imaicaquea noncamantamajajiaquempi, iroaqueragueta piquenquevar- itapojigueta inchiqiuojitsita aviatimpa poishotacotaca piquitsaatagueta, aisa piquenaguetanaque querocagueta pininqueni, cotanquitsiquea coajica pinquenque- varivaetanajegueta aato piquejetaja imaica. Manaquea pincantajempequitana jempa iroishojitajempiquea intati, irajaitanaquempiquea querocagueta teegueta pinintavetempaji pogueji.

¹⁹ Oraquea icanquegueta Jesoshi imaica iroguentiquea icantacoque quero incojita- querini Peerero coajica irimetojajiquerigueta cameetsaniji iramenimentajitaqueriniji Aapani Irioshi caaviji yagavejamajati. Ariquea icantiri:

—Poguijatacoguitenani.

Itsatacaane Jesoshi ipintsamajataca

²⁰ Ariquea ipitsocavetanacaquea Peerero yamenavaqueriquea yoguijatapojiriquea itsatacaane Jesoshi ipintsamajatacaca. Iriatimpa irioquea pimerequijanquitsi imerequiqui Jesoshi itsipatacarigueta itsatacaanejia ishecajiacagueta pajinigueta irimetoje, irioquea cantanquitsi: “Nomajirote, ¿queri aacaanquempineca?”

²¹ Ariquea yamenavaquerigueta Peerero, icantiri Jesoshi:

—Nomajirote, iricatica ¿quero incoquempani?

²² Icantanaqueriquea Jesoshi:

—Arigueta noninque naatimpa incoguitempani inchoocaque irosatiquea nonco- raquepojajegueta, ¿queroquea ocoani piquenquejacotsitantacarica aviatimpa? Aviatim- paquea poguijatacoguitenani.

²³ Irootaquequea icantantajavetanacaca quemisantajiaquerica Jesoshi aato imetoji itsatacaane ipintsamajatacaca, ariquea ishimerancaguevetacaro, cotanquitsiquea Je- soshi teequea ari incanteji aato imetoji. Iroguentiquea icanque: “Arigueta noninque naatimpa incoguitempani inchoocaque irosatiquea noncoraquepojajegueta, ¿queroquea ocoani piquenquejacotsitantacarica aviatimpa?”

²⁴ Irioquea tsavetantaqueroca ocatica yamenamajaqueca, iriotaque tioncaqueroca ipintsamajatacaca. Itsajitaqueroquea itampaticamajataquero, tee incantashitempaji.

²⁵ Choocaquea oshequi yantaguetaqueca Jesoshi teequea ontioncacotempaji. Arimegueta interoncajitaquerome intioncacojiguetaqueromegueta maasano, aricampa anaanaquerome quepatsi.

YANTAJIGUICA ITIGARANCANEJIA JESOSHI

Antsatantaquemparoca

Ocativa iroguenti antsatantaquemparoca itioncaqueca Irocashi itioncacotaque-rogueti yantajiguica itigarancanejia Jesoshi yagavejacaajiaquerigueti Ishire Aapani Irioshi. Irocashi teequea irio jorio. Iriguenti aavintantatsica (Cor. 4.11-14). It-sipatacari Paavoro iquenaguetanaquegueti quepatsipaequi (Ya. 16.9-10). Irocashi itioncaquero otsipa paperi tsavetacotaquerica Jesoshi, tequeratagueti intionqueroji ocativa. Irootaque ochoocatantacaca mavite tsavetacotaqueroca yoantanajaca Jesoshi jenoqui inquitequi (Irc. 24.50-53 aisa Ya. 1.1-11). Iquenquejajitaque itioncaquero Irocashi ocativa paperi iroaqueragueti iteroncaquerogueti otsipa itioncaqueca tsave-tantaquerica Jesoshi, arica ajagantsiniqui 62 irooca otsipa ajagantsini arejevaetacaro 65. Teequea intsajiteji quero ichoocataqueni itioncaquerogueti.

Itioncaqueneri shirampari pajitatsica Teopiro aisa itsipajia teeca irio joriojia cameet-saniji intsajiaque itsavetantaqueca itigarancanejia Jesoshi, itsavetacotimojiavetacari joriojia, cotanquitsi oshequini tee inquemisantajigueroji, iriguentijia quemisantaji-avaquero teeca irijorijoigueji, aisa cameetsaniji intsajiaqueniji quero icojiacani ma-jirontajatsica icatsimajiaquerigueti itigarancanejia Jesoshi. Itioncacotaqueri Jesoshi icamantajiaquerigueti itigarancanejia intsavetantero Quenquetsatsarentsi Oganejen-catatsica intsavetantimojiaqueri caquinteguetatsica. Icanti: “Ariquea pintsavetan-tajiaquenaqueate ontaniqui Jerosarequi, pinquejetacaajiaquemparocaro Joreaquei aisa Samariaqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.” (Ya. 1.8) Itioncacotaquero quero icoji-aqueroni ipariajianacarogueti irinetsanajiaquero icantajiaquerica Amajirote Jesoshi. (1) Itsavetantimojiaqueri choocajianquitsica Jerosarequi (1.1-6.7); (2) itsavetantimojia-queri choocajianquitsica quepatsipaequi pajitatsica Jorea aisa Samaria (6.8-9.31); (3) aisa itsavetantimojiaqueri choocajianquitsica otsipapaequi quepatsipae (9.32-28.31): irirajia choocajianquitsica guinteninintsiqui pajitatsica Antioquia (9.32-12.24), irirajia choocajianquitsica quepatsiqui pajitatsica Ashia (12.25-16.5), irirajia choocajianquit-sica otsapijaqui quentijaniqui pajitatsica Ejeo (16.6-19.29), aisa choocajianquitsica guinteninintsiqui pajitatsica Iroma (19.21-28.31).

Irocashi itioncaqueneri Teopiro

¹ Otsipaqui paperiqui iroquetica notioncaquempica, Teopiro, notsavetantagueta-quero maasano yantaguetaquitica Jesoshi, aisa itsatacaantaguetaquitica iroaquer-agueta iparianacarogueta

² irosatiqueate aavaetanaja savincaguiteri yaajitanajirigueta jenoqui inquitequi. Tequeratagueta iroanaje jenoqui, iquenquetsatacaajiaqueri itsatacaanejia icoguijia-queca icamantajiaqueri inintacaaguetaquerica irantajiaque, iriguentiquea Ishire Aa-pani Irioshi agavejacaquerica Jesoshi.

³ Yatsipetacatarite imetovavetaquitagueta, cotanquitsi ariquea coajica ipochatanaji yonigaajianajari itigarancanejia, yantaguetaquequeate oshequi cameetsanijite irame-namajajiaquerinijite intsamajajiaquenijite arimaja ipochatanaji. Yonigaajianajari 40 savincaguiteri itsavetantaguetaqueri Aapani Irioshi quero icotani imajirontagueta.

⁴ Ariquea itsipajiacarigueta itigarancanejia icantajianajiriqueate:

—Coramani nocamantajiaquempi icanque Aapani intigarancajiaquempiri Ishire. Imaicaquea aatota pijajigui otsipaqui, pinchoocajiaqueta acaniqui Jerosarequi pogu-ijajiaqueta irinetsanataquero icanqueca Aapani.

⁵ Irooriji irirampani Joanca iviñacajatantaque oja, cotanquitsi imaicaqueate quempejitapojaque inchoocashirentajipojaquempi Ishire Aapani Irioshi quejetaca iroviñacajatantajitaquempiri Ishire, aato oshequiaji savincaguiteri onetsanatananaquempaca.

Jesoshi yoanajigueti jenoqui inquitequi

⁶ Ariquea icapiocaventajarigueti aisa icoacojiaqueri iriatimpajia icantajiguiri:

—Nomajirote, ¿ariqueate imaica aviguenti pincapiocajiajena naatimpajia ishiraerijia pimpejaempa Nomajirote, pimpigamentajiaquena cameetsanijite nonchoocajiajeniji intati?

⁷ Yacanaqueriqueate:

—Teenicate irinintacaguempiroji Aapani pintsajiguero quero oncarateni oncoguetanauempañi coajica. Iriguenti cantanquitsine Aapani.

⁸ Cotanquitsiqueate incoraquepojaquegueti Ishire inchoocashirentajipojaquem-pigueti, ariqueate iragavejacaajianaquempiqueate. Ariquea pintsavetantajiaque-naqueate ontaniqui Jerosarequi, pinquejetacaajiaquemparo Joreaqi aisa Samari-aqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajianaquena.

⁹ Ariqueate iquejetanaquerogueti imaica iriatimpajiaquea yamenajivajiri yogajeno-canaja yoanaji jenoqui inquitequi. Ariqueate ipeantapojajaro mararo, tee inconijata-jeji.

¹⁰ Ogantagatirajaquea yamenajigui sorerere jenoqui inquitequi inejaitatiguiri icati-mojiapojacari mavite shirampari, quitamarocantajiavaeque iitsaare. Icantajipoja-queri:

¹¹ —Aviatimpajia Garireaquitica, ¿taaqueate oajiaquempi ogantagatiraja pamenajigui jenoqui inquitequi? Imaica pinejajivajirigueti Jesoshi yoanaji jenoqui inquitequi, ariqueate inquejetapojajempa oncoramanitapojajegueti impijaategueti.

Icoguiajiaquerigueti Matiashi impijaempari Jorashi

¹² Iriatimpajia ariqueate yoguirincajianajaro Orivotsempi, ipiapiaitanaja Jerosare-qui. Ora Jerosare tee osamanitacoteroji Orivotsempi, ocarataque ishinetantacarica iranijitanaque savincaguiteri qui imagorejantajitaca.*

¹³ Iroompaqueate yarejerejeipojacagueti tsovironaqui qui yagatsonquijianaque ot-sipamencoqui jenoquitica. Aritarite oraniqui imajaigui Peerero, Joanca, Santiago,† Antirishi, Jeripe, Tomashi, Varitorome, Mateo, Santiago (irijanite Arejeo), Shimo (ican-tajitiri aisa Serote), Jorashi (irijanite Santiago).

¹⁴ Maasano iriatimpajia ogantaga icapiocapinijiaa itsipajiacari iriguentijeguitepae Jesoshi aisa Maria iriniro jero aisa otsipapae manquigarentsijia, isavicaventajiaquero iquenquetsatacaajiaqueri Aapani Irioshi yamanajiaqueri.

¹⁵ Ariqueate otsipa savincaguiteri icapiocajiaa oshequini tsarotentajigarica Aapani Irioshi aricampa ivegarajiaa 120. Ariqueate icatianaca Peerero icanti:

¹⁶ “Napiguemisantarijiate, inintaque Aapani Irioshi onetsanatanaca Tioncarentsima-jaca icanquegueti Ishire coramani ivagantequi Taavini itsavetantsitacariqueti Jorashi amampijajiaquerica aajiaquerica Jesoshi.

¹⁷ Iroaqueragueti itsipajia vetacaji iquejejiavetacaji aatimpajia aguijajiguirigueti Je-soshi.

* **1:12 ocarataque ishinetantacarica iranijitanaque savincaguiteri qui imagorejantajitaca.** Aricampa onaque aparo quiromeetero. † **1:13 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaquerogueti ivajiro ipajitiri **Santiago,** itsipa ipajitiri **Jacobo.** Mavite oponeaca iguenquet-satsarequi evereo, ipajitiri **Yaakob.** Aisa pamenero tioncanquitsica isavivanaqui otsapaqui Irc. 6.16.

¹⁸ Iro cotanquitsi yaajitanaqueri imentaquitsitepae yojocajitaquenerica Jorashi incovaeguishequeniji, ivegaratantajitacaro quepatsi. Ariquea ontaniqui iparianaquequeate ityaquisanaque imotijaqui tyaquic. Osocataetanaca iseito.

¹⁹ Iroompaqueate iquemacojiaquerogueti Jerosarequitica ariqueeate ipajijiaquero ora quepatsi Asererama. Oraquea iguenquetsatsarequi ocanti Irajantsiguite.

²⁰ Itioncacotaquerotarite paperiqui icantajitica Saremo ocanti:
'Trovashiantsijitaquerija itsovironaquite aatoja ichoocataji nantajemparoneca.'
Aisa ocanti:

'Cameetsa inchoocataje piajemparineca impejaempa itigarancane Amajirote.'

²¹⁻²² "Imaicaquea imaica choocajia acaniqui atsipajiacaca coramani iroaqueragueti iviñacajataqueri Joanca Jesoshi quigonquero yoanajigueti jenoqui inquitequi. Imaica jame aajiaje itsipa piajemparineca Jorashi cameetsanijite irionijite antsipajiaquempa antsavetantajiaquerigueti Jesoshi ipochatanajigueti iroorijite irootaque ininqueca Aapani Irioshi."

²³ Ariqueeate icajemajiaqueri mavite. Apaniro ipajita Jose aisa icantajiri Varesava Joshito. Iriraqueate itsipa ipajita Matiashi.

²⁴ Yamanajiaqueri Aapani Irioshi icantiri:
—Nomajirote, pamenashirentajiguiri maasano caquinteja. Jeri irica mavite, poni-gaajiaquenari queri picoguiaqueca

²⁵ impejaempa itigarancane Jesoshi intsipajiajena, iriratarite Jorashi yovashi-antaguetanaquero maasano, yoanaquequea ontaniqui otampaticataquerigueti inchoocatantanaquempaca.

²⁶ Ariqueeate ipegavijijia cameetsaniji intsatimentajiaqueriniji quericaca inintacaaqueca Aapani Irioshi. Ariqueeate iriguenti sotoacotanquitsi Matiashi. Irioqueate peajatsi itigarancane Jesoshi. Iconoajiajarigueti inajiaji 12.

2

Iroaqueragueti icoraquetaque Ishire Aapani Irioshi inchoocashirentajiaqueri tsarorentajigarica

¹ Ariqueeate aapojacagueti savincaguiteri ipajijitica Pentecoshite ariqueeate ichoocajiaque maasano tsarorentajigarica Jesoshi icapioajia tsovironaqui.

² Ariquea catsiqueti iquemajiatiguiro opojimajencapojaque quejencataca iniro-jenca tampija oponeajencataca jenoqui inquitequi. Iquemajiaquero maasano savicajianquitsica tsovironaqui.

³ Ariqueeate oconijaguetapojaque quejegueta morecaripae oashiguetaqueri maasano apaniropae.

⁴ Ariqueeate ichoocashirentajipojaqueri Ishire Aapani Irioshi yagavejacaajianaque-riquea maasano. Ariqueeate imapocajianaca iquenquetsatantajianacaro otsipapae quenquetsatsarentsi teeca intsajavetempaji, iriguentitarite quenquejacaqueri Ishire Aapani Irioshi.

⁵ Ariqueeate ichoocajiaque oraniqui Jerosarequi oshequini joriojia tsamajajiguiroca itioncanaqueca Moishishini ariguenti iponeajia otsipapaequi quepatsi.

⁶ Iroompaqueate iquemajiaquerogueti opojimajencatanaquegueti ishiashiaitanacaqueate icapioaventajianacari maasano tsavetantajiguirica Jesoshi, tee intsajipojaquero quero ococani iquemajipojaquerigueti iquenquetsatsitantajiacari iguenquetsatsareja.

⁷ Mana yoajianaque intati yamenajianaque sorerere, icantavacaajianacaqueate:

—¿Teempaueate tee iriojia Garireauitica maasano irirajia?

⁸ ¿Quero ocotaca aquemajiaqueri iquenquetsatantajiacaro quenquetsatsarentsipae? Aquemajiaqueritarite imaica iquenquetsatantajiacaro aguenquetsatsareja

⁹ aatimpajia ponejainquitsica osamanipaequitica Paritiaqui, Meriaqui, Eramequi, Mesopotamiaqui, Joreaqui, Caparoshiaqui, Pontoqui, Ashiaqui,

¹⁰ Piriijaqui, Pampiriaqui, Ejepitoqui, aisa ovegaraguetapojacaguete Irvia oquempeljiqueguete Shirene. Jeri aisa ponejainquitsica Iromaqui: irirajia joriojiamajaca aisa oguijatacojiguirica joriojia.

¹¹ Aisa choocajia ponejainquitsica Queretaqui aisa Araviaqui. Maasano aatimpajia aquemajiavaqueri iquenquetsatantajianacaro aguenquetsatsarejia itsavetantajiaqueroguete yantica Aapani Irioshi yagavejamajatugeti.

¹² Mana yoajianaque intati tee intsajigueroji icantavacaantajianacaca:

—¿Taate opajita ocatica?

¹³ Cotanquitsiqueate iconoagarantajiacaca mana ishirontimentanajiacari intati icantajianaque:

—Mana imiramajatacaro cachojari.

¹⁴ Icatianacaqueate Peerero itsipajianacari itigarancanejia Jesoshi carajianquitsica 11 iquenquetsatanaquequeate iririjenca icanti: “Napijoriojiate aisa maasano choocajianquitsica acaniqui Jerosarequi, iintsija pinquemisantamajajiavaquena noncamantajiguempiqueate nontsavetanqueroqueate ocatica pamenajiaqueca.

¹⁵ Imaica pijijiaqueji ishinquijiaca iricajia, cotanquitsi teequeate ari irishinquijiguempaji, iroaqueratarite yogajenocapojaca catsirincaiteri.

¹⁶ Manaqueate onetsanatanaca itsavetanqueca coramani tsavetantirinica Aapani Irioshi Joereni icantaqueguete:

¹⁷ ‘Icantaque Aapani Irioshi: Oncoramanitapojajeguete pajiniguete aapojempa savincaguiteri vegaratapojatsineca, nontigarancajiaqueneriqueate Noshire inchoocashirentajiaqueri maasano caquintepae.

Iiraquea irijanitepae, intsavetantajiaquero nocanquerica.

Iiraquea iriaqueraca quenquevarijiananquitsi nonigaajiaqueri cantashitatiaguetaquitsica, cotanquitsi mana onquejetimojiaquempari iguimaanequi.

Irirajia quenquevarijianatsica mana nonigaajiaqueri iguimaanequi.

¹⁸ Ariqueate noncojiaquerini maasano quemisantajiaquenanececa, shiramparijia aisa manquigarentsijia,

nontigarancajiaqueneri Noshire inchoocashirentajiaqueri intsavetantajiaqueroquea nocanquerica.

¹⁹ Ontaniquiqueate jenoqui inquitequi nonigaantaguequero teeca irinejajite,

aisa nonigaanquero nagavejane acaniqui quepatsiqui

iramenajitaquero irajantsi, aisa omorecanaque paamari jero aisa ompoasecantanaquequeate ogatsiaca.

²⁰ Impitsecanaquequea catsirincaiteri,

aisa irira taai inquityoncementatanaque inquejetanaquemparo irajantsi.

Ariqueea oncotanaquempa tequerataguete aapojempa savincaguiteri anaantantquitsineca oganejencaguitetanquitsineca ironigaantantaquemparoceca Majirontamajatatsica iragavejane.

²¹ Cotanquitsiqueate maasano aventajiaquemparoneca ivajiro Majirontamajatatsica, irajavajeri.’

²² “Shiramparijia ishiraerijia, pinquemisantamajajiguena noncamantajiaquempica. Iriguente nontsavetantaque Jesoshi, irira Nasarequitica. Yagavejacaqueri Aapani Irioshi yantaguetaqueroguete cameetsaguetatsica teeca irinejajiguete, cameetsanijite pintsajiaquenijite irio Aapani Irioshi tigarancaqueri.

²³ Ogantaga itsataque Aapani Irioshi quero incojitaquerini Jesoshi. Coramani iquenquejaquero intigarancaqueri irimetojaque acaniqui quepatsiqui. Avirojiaquea paa-caantajiaqueri pimetojacaantajiaqueri picantajiaquequeate irompajacojiaqueri quempevaejiatsica.

²⁴ Cotanquitsi ivochantajiri Aapani Irioshi aatonijite icoguitani yatsipetaro metojagantsi, teenicate agavejaguiteri.

²⁵ Iiraqueate majirontatsica Taavini itioncaquegueti coramani itsavetanqueri Jesoshi icanti:
‘Nonejapinitaqueri Nomajirote itsipataquena.

Ogantaga inaque notincamijempequiqui, caarica taaca notsaroacaanta.

²⁶ Irootaquequeate noshinevaetancaca noshirequi, noquenquetsataquegueti shine nocanca.

Notsino aisa onchoocataque, aviguentitari noguijacoque,

²⁷ aatonicate povashiantiro noshire Areshiqui,*

aato pishinetiro aisa avejanquempa itsino Pigomajamajare.

²⁸ Pitsatacaquena quero noncoquempani nanijaguiteniniji aviatimpaqui. Pincoguitempani pintsipataquena poguishinejamajataquena.’[✧]

²⁹ “Imaica, nogonorojia, atsamajajiaque irira Taavini avaesatiniteni imetojaquequeate, ariquea iquitajitajiri, aritarite onaque iquitatantajaca acaniqui aguinteniqui.

³⁰ Iriatimpa iriguenti tsavetantironica icanqueca Aapani Irioshi coramani. Itsamajatironi icantaquerica Aapani Irioshi, icantiri: ‘Coajica inchoocataque pinchoviquiqueca irimajirontajiajempaca ishiraerijia inquejetajempi aviatimpa. Aatoqueate namatavijimpitsi, naroguentitari Irioshi.’

³¹ Tequeratagueti impochatanaje Quirishito itsataquero Taavini coramani, irootaquequeate itsavetacotantacarica irimetojaquegueti aato yovashiantajitiri ishire Areshiqui, ariqueate oquejetaca itsino iroatimpa aatoqueate opatsajitsi.

³² Iriotaquetarite irira Jesoshi yovochantajica Aapani Irioshi, namenamajajiaqueritarite maasano naatimpajia.

³³ Ariqueate yoguisavicajiri itincamijempequiqui, yanaantamajataquequeate. Ariqueate yojocaqueneri Ishire icantaquerica coramani irojocaqueneri cameetsanijite intigaranquimentaquerinijite acaniqui quepatsiqui inchoocashirentajiaqueri maasano tsaromentajigarica. Imaicaqueate imaica coraquetaquequeate, irootaquequeate maasano ocativa pamenajianaqueca aisa piquemajianaqueca, iriotaquequeate quejetacaaguecaro imaica.

³⁴ Iiraqueate Taavini teenicate irioqueate ogatsine jenoqui inquitequi, cotanquitsiquea icanti:

Iiraquea Majirontatsica Aapani Irioshi icanqueri Nomajirote:

‘Pisaviquetaja pisenampijaquenaja notincamijempequiqui,

³⁵ pintsipataquenaquea arejevaetanaquempa

nagavejajiaquerigueti maasano catsimajiaquempica, onquejevequemparo povanquegontatsitempari.’

³⁶ “Imaica nonintaque antsamajajiaquero maasano aatimpajia ishiraerijia: irira Jesoshi pompajacotacaantajavetacaca ivochantajiri Aapani Irioshi, ipeacaavajari Amajirote, irisatiqueate Quirishito Meshiantatsica.”

³⁷ Iroompaqueate iquemajiaquerigueti ishimampojancajianaqueate, icantajiguri Peerero aisa itsipapae itigarancanejia Jesoshi:

—Imaica, nogonorojia, ¿querocampa noncojiaquempani?

* **2:27 Areshiqui.** Oraquea Areshi iroguenti ichooaquegueti ishirejia metojajiatsica tequeratagueti impishoncajiteriji camorecariqui. Irira guiriego icanquero **hades**, iguenquetsatsarequi evereo icanquero **sheol**. ✧ **2:28** Sar. 16.8-11.

³⁸ Icantajiguiri Peerero:

—Povashiantajanajero pipeacaaguishetacaca pincantashitatianajempa. Poviñacajatacaantimentajiguempari Jesoquirishito ivajiroqui cameetsaniji irishetajempironijite Aapani Irioshi piguempevaere, irimaisantsitajempironijite. Ariqueate intigarancajiaquempi Ishire inchoocashirentajiaquempi.

³⁹ Ariqueate inquejetacaajiaquempi maasano aviatimpajia, jerijia maasano pinchoviquijianaqueca, aisa maasano osamanipaequitica. Arimaja inchoocashirentajiaqueri maasano inintacaajiaqueca Amajirote Aapani Irioshi.

⁴⁰ Irira Peerero arimpaqueate iquenquetsatanaque icantajiaqueriqueate otsipapae icanti:

—Paventajiguemparija aajiavajempineca, aatonijite icatsimatimentimpiro Aapani Irioshi pigovaeguishere itsipatacaantimpiritsiquea covaeguishemajajiatsica.

⁴¹ Iroompaqueate iquemajiavaquerigueti Peerero iquenquetsaquegueti ishineventajanacaró icanquerica ariqueate iviñacajatacaantajiaa. Arimpaqueate yoshequiamajanaquequeate tsaromentajigarica Jesoshi. Aricampa ivegarajiaa 3,000 iriaqueraca quemisantajanquitsi ocativa savincaguiteri.

⁴² Ogantaga isavicaventajiaquero iquemisantajiaquero itsatacaajiaquerica itigarancanejia Jesoshi, tee irovashiantajigueroji. Mana itsipatavacaajiaa iquemavacaajiaa aisa yamanajiaqueri Aapani Irioshi. Jero aisa icotarejapinijiaquero pan ishecajiacaro iquenquejantajiarica Quirishito imetojaventajiacajigueti.

⁴³ Irirajia itigarancanejia Jesoshi yantapinijiaqueneri caquintepae caarica inejajiti, aisa yantajiaquero oacaantantatsica intati itsatantacarica arimaja itsipatacari Aapani Irioshi. Mana yoajianaquequeate intati maasano.

⁴⁴ Iriraquea quemisantajiguirica Jesoshi itsipatavacaajiaa iquemavacaajiaa, ipava-caajiaa yashintajiacaca.

⁴⁵ Yojocantaguequero taaca opajitapae yashintajiaa yaantajiacaro imentaquipae ipacaantagarantajiaqueri maasano coguitejacojianquitsica.

⁴⁶ Maasano savincaguiteri icapiocapinijiaa teemporoqui oniganquirequi. Ontaniquiquea tsovironaquipaequi itsipatavacaajiaaqueate ishecajiaa. Icotarejapinijiaquero pan ishecajiacaro iquenquejantajiacarica Quirishito imetojaventajiacajigueti. Ishecajiacagueti ishinejiaa tee iraventacojiguempaji.

⁴⁷ Iriguentitari ishineventajiaa Aapani Irioshi. Maasano caquinteja guintenijiatatsica oraniqui yamenajiaquerigueti iquejejiaca imaica, ishineventajanacariqueate. Maasano savincaguiteri iriraqueate Amajirote arimpaqueate ijatiri yoshequiamajanaqueri quemisantajiaquerica.

3

Yogueshijitajirigueti irira magoviroshiri

¹ Otsipa savincaguiteri ariqueate irira Peerero aisa Joanca yoajianaque itoncoajianaque teemporoqui itsaromentantajitarica Aapani Irioshi. Ogantagatari ijaguite-tanajigueti catsirincaiteri yoapinijiaque maasano joriojia yamanapinijiaqueri Aapani Irioshi.

² Ariquea oraniqui sotsiqui teemporoqui isavicaque irira magoviroshiri, igantagaqueate ivoacoquero imagoviroshica. Aritarite yamapinijiaqueri sotomorontsiqui icantajitica Cameetsari yoguisavicanajiri cameetsanijite iramanajiavaqueri imentaquitsite quijapinijiatatsica.

³ Iriatimpa inejajiavaquerigueti Peerero itsipatacari Joanca inquijajipoje teemporoqui, yamanajiavecari imentaquitsite.

⁴ Iriatimpajia yamenajianaqueri, ariquea icanque Peerero:

—Iintsija pamenajiguena.

⁵ Iriatimpa yamenajiaqueri yoguijacovetaca ijiqweji ariji irojocaqueneri imentaquit-site,

⁶ cotanquitsi Peerero icanti:

—Naatimpa ejempacona taampate nojocaquempi, tee inchoocatenica nomentaquit-site, cotanquitsi yagavejacaquena Jesoquirishito Nasarequitica nogueshitajempi intati, irootaquequeate imaica iintsija pincatianaje panijitanaje.

⁷ Ariqueate yacatsataqueri itincamijempequiqui yogatiaqueri. Ariquea icantapanajanti itampishitanaji iguitiqui aisa ishonquiriguitoqui.

⁸ Isapocanaque, icatiamajatanaqueate yanijitanaji. Ariquea yoguijajianaqueri Peerero aisa Joanca iquijaquijaitanaque oticaacoroqui oniganquirequi teempero, ariqueate yanijinijivaetanaque itincotincovaetanaquequea icantanaquequeate:

—Caaviji yoganejencamajata Aapani Irioshi.

⁹ Maasano yamenajivaqueriguete yanijitanaqueguete ishineventanacariguete Aapani Irioshi,

¹⁰ ariqueate itsaroajianaque, mana yoajianaque intati, maasanotarite itsajiguiri isav-iuguete teemperoqui yamanantapiniquguete imentaquipae ontaniqui osotomoroqui icantajitica Cameetsari.

Itsavetanaque Peerero teemperoqui

¹¹ Irira magoviroshiri yogueshijitajica ogantagaqueate quisho yoajiaqueri yajiricajiaqueri Peerero aisa Joanca. Maasanoqueate ishiashiaitashitanacariqueate iriatimpajia ontaniqui oveshintaacaguete iniroppoape oजारatsencoataqueguete icantajitica Irashi Saromoni.

¹² Yamenajivaqueri Peerero icanti: “Shiramparijia ishiraerijia, ¿quero ocotaca poantajianacaca intati? Iroguentica pijijiaqueji nocameetsamajati nogueshitantajarica irica. Aricampa pijijiaqueji nagavejashitaca intati nanijitacaantajarica.

¹³ Iriaquea Irioshite Averaameni, Ishaaconi, Jacovoni, Irioshite avaesatinite, iriguentiquea antaquero oca, yonigaantaqueroquea iroganejencare Jesoshi Irijanite. Iriaqueate Jesoshi iriotaquequeate paacaantajiavetacaca aviatimpajia, picantajiaqueri majirontatsica Pirato irimetojacaantaqueri. Iriaqueate Pirato inintavecaqueate iroguipaquijajerime, cotanquitsiqueate aviatimpajia tee pinintajigweji.

¹⁴ Pimanintajiaqueriquea irira Oganejencamajatatsica Comajamajatatsica, iriguenti pinintajiaque iroguipaquijajitajempiri metojantatsica.

¹⁵ Aritarite piquejejiaca imaica pimetojacaantajiavetacari irira Anijacaantantatsica, cotanquitsi ivochantajiri Aapani Irioshi, namenamajajajiritari ipochatanajiguete.

¹⁶ Iriotaque naventajianacaca ivajiroqui, irootaquequea itampishitantanajaca irica pamenajiaqueca pitsajiaqueca. Iroguenti ogueshimajatantajarica iragavejane Jesoshi naventajiacariguete ivajiroqui, pinejajiaqueroquea aviatimpajia maasano.

¹⁷ “Imaica nogonorojia, naatimpa notsataque pimetojajiaqueriguete Jesoshi teenicate pintsajigueriji iriguenti itigarancaqueca Aapani Irioshi. Ariquea iquejejiaca pimajirojiate tee intsajigueriji.

¹⁸ Cotanquitsi oquejetacaguete imaica mana inetsanataquero Aapani Irioshi icantsitacarica coramani tsavetantirinica itsavetantaguetaquero irantsipevaequempa Quirishito.

¹⁹ Irootaquequeate nocantantajiaquempica povashiantajianajero picovaeguishejiacaguete pincantashitatijaijanajempa, pinquemisantamajajigueri Aapani Irioshi cameetsanijite irishetajempiro piguempvaere. Ariqueate aapojaquempa intampishitacaantajiaquempica iroguishinejantajiaquempica.

²⁰ Ariqueate aisa intigarancajajempiri Jesoshi, irira Quirishitotatsica. Iriotarite coramani inintacaitsitaquempica irimeshiajiaquempi.

²¹ Cotanquitsi irira Quirishito ogantaga inchoocaque ontaniqui jenoqui inquitequi arejevaetanajemparoquea irinetsanaguetajeroguetai Aapani Irioshi maasano. Irootaquetarite icantajiaqueca igomajamajarejia tsavetantajiguirinica coramani icantashirentajiaqueriguetai Aapani Irioshi.

²² Icanquetarite Moishishini: ‘Majirontamajatatsica Pirioshite irogatiaquempiri choocatimojiajerineca pigonorojia, impeacaaquempari tsavetantatsica camantajiaquempica icanqueca, inquejetaquena naatimpa. Taaca opajita incantajiaquempi pinquemisanqueri.

²³ Maasanotarite aatoguetai iquemisantajigui interoncajitaqueri, aato itsipatajari igonorojia.’

²⁴ Maasanoqueate tsavetantirica Aapani Irioshi itsavetantaguetaquero maasano pamenaguetaqueca imaica. Iriqueti mapocaquero tsavetantirinica Aapani Irioshi irira Samoirini. Ariqueate imajianaca impoiguetaananquitsica.

²⁵ Oraqueate iquenquetsatacaqueriguetai Aapani Irioshi Averaameni icanqueriguetai: ‘Coajicani inchoocataque pinchoviquitaqueca, iriguentiquea noncavintsajacotantajiaquemparica maasanopae caquinteguetananquitsica quepatsiqui’, aviatimpajia iquenquejajiaque incavintsajajiaquempi, aviatimpajia aviguentijiatarite ichoviquijia tsavetantajiguirinica.

²⁶ Iroompaqueate ivochantajiriguetai Aapani Irioshi irijanite aviquetai itigarancajiaquene incavintsajajiaquempi cameetsanijite povashiantajianajeronijite piguempevaerejia.”

4

Icatsimajitaqueri Peerero aisa Joanca

¹ Choocatiraja iquenquetsajiaque Peerero aisa Joanca icoraquejiapojaque saserorotejia itsipajiacari imajirojiate coaretajia quempoguijajiguiroca teemporo. Itsipajiacari aisa saroseojia. (Iriatimpajia iriguenti cantajiaatsica aato itancorejajigui metojajiaatsica).

² Icatsimajiaipojaqueri itsajiaqueritarite itsatacaajiaqueri maasano intancorejajianaje oncoramanitapojajeguetai metojajiavetanquitsica inquejedianajempari Jesoshi ipochatanajiguetai.

³ Ariqueate yaajiaipojaqueri yaajianaqueri, cotanquitsi teequea incantajigueriji mana yoguijaajiaqueri santanaqui iroorijite tsitenijencaguitetanaque. Ariqueate osavincaguitetanajeguetai ariqueate incoacojiaqueri.

⁴ Cotanquitsi iconoagarantajiaica oshequi quemajiavaquerica Peerero iquemisantajiaque. Irirajia shirampari quemisantajianquitsica aricampa ivegarajiaica 5,000.

⁵ Iroompaqueate osavincaguitetanajiguetai icapiocajiaica aisa acaniqui Jerosarequi imajirojiate joriojia, itsipajiacari jivajiaatsica jeri aisa tsatacaantiroca itioncacotanaqueca Moishishini.

⁶ Ariqueate ichoocaque saserorote anaantamajatanquitsica icantajitica Anashi, itsipajiacari Caipashi, Joanca aisa Arijantero. Aisa ari ichoocajiaque maasano ijitanēja.

⁷ Ariquea itigarancajiaqueri irajajiaquiteri Peerero aisa Joanca incoacojiaqueri. Ariquea yamajitaqueri isatecajiaqueri niganqui icantajiaqueri:

—¿Taaqueate agavejacaajiaquempi? ¿Taaqueate cantajiaquempi poganijitantajarica magoviroshiri?

⁸ Irira Peerero yagavejacaanaqueri Ishire Aapani Irioshi iquenquetsatacaajianaqueriquea capiocajianquitsica icantiri:

—Nomajirojiaica aisa jivajiaatsica,

⁹ iroosacanaica picoacojiaquena quero nococa nocavintsajantacarica magoviroshiri, quero nocoquerini noganijitajiriguetai.

¹⁰ Imaica noncamantajiaquempi catinca noajiaquempiro cameetsanijite pintsajiaque aviatimpajia aisa intsajiaquenijite maasano ishiraerijia iriguenti agavejacaquena Jesoquirishito Nasarequitica nogueshitantajarica ivajiroqui. Irira Jesoshi iriotarite pompajacojiavetacaca, cotanquitsi yovochantajiri Aapani Irioshi.

¹¹ Irira Jesoshi iquejetacaró mapi pimanintajiavetacaca aviatimpajia pantajigu-irogueti mapipanco pivichajacotancarogueti mapi, cotanquitsi opeaja anaantama-jatanquitsica quishotacaaqueroca.

¹² Teequea inchoocateji itsipa aajiajavineca aatoniji apega camorecariqui, teetarite onchoocatomateji otsipa vajirontsi ipajijitaquerica caquinte acaniqui isaviji quepat-siqui aventajiaquempameca iraantajiajavajimeca, apaniro icanca Jesoshi.

¹³ Maasano imajirojiate iquemajiavaquerigueti iquenquetsatacaajiaquerigueti Peerero aisa Joanca yamenajiaquerigueti tee intsaroajigueji, mana yoajianaque intati, itsajiaqueritarite tee iranaantajigueji aisa tee intsamajajigueroji paperi. Ariqueate itsajianaqueri iriguentijia itsipajiaa Jesoshi.

¹⁴ Aritarite itsipajiacari irira magoviroshivetatsica catiaca iriatimpa ¡querocampate incantajiguero iriatimpajia!

¹⁵ Ariqueate yoguisotoacaantaqueri sotsiqui cameetsanijite inquenquetsatava-caaquempa iriatimpajia. Ariquea icantajiguero:

¹⁶ —¿Imaica quero ancojiaquerini? Maasanotarite Jerosarequitica iquemacojiaqueri yantajiaque caarica inejajiti. Aato agaveji acantajiguero: ‘Tee irogueshitanteji.’

¹⁷ Iquemajigueroirotsiqueate. Iintsija imaica ancantimentajiguero aatonijite itsavetan-tajiajiri Jesoshi.

¹⁸ Ariqueate icajemacaantajiaqueri icantajiaqueri:

—Imaica aato pitsavetantimatajiajiritsi Jesoshi, aato paventaro ivajiro, aato pitsata-caantiniri.

¹⁹ Cotanquitsiquea Peerero aisa Joanca yacajianaqueriqueate:

—Pamenerojate quero ininqueca Aapani Irioshi: ¿cameetsavaequempate nonquemisan-tajiaquempiguero aviatimpajia? ¿Iroompate irio Aapani Irioshi nonquemisantaque?

²⁰ Naatimpajia aato nagaveji novashiantajiguero notsavetantajiaquero oca nonejaji-aqueca aisa noquemajiaqueca.

²¹ Icantsijiaariqueate aisa:

—Aato pitsavetantajiajiritsi Jesoshi.

Ariqueate yovashiantajiajiri yamenajiaqueritarite querocampate incojiaquerini in-catsimajiaqueriguero, maasanotarite caquinteja ishineventajiacari Aapani Irioshi it-sajiaqueriguero yogueshitajiri magoviroshivetatsica,

²² iroorijite yajagantsitacovetanaca 40 ajagantsi magoviroshivetatsica.

²³ Iroompaqueate yovashiantajiajiriguero yoajianaji ichoocajiaqueguero irapiguemisanterijiateni icamantajiajojaqueri maasano icantajiaquerica saseroroteja anaantajianquitsica aisa jivajiatsica.

²⁴ Iroompaqueate iquemajiavaqueguero, maasano yamanajiaqueri Aapani Irioshi icantajiguero:

—Aapani Irioshi Majirontamajatatsica, avirotarite peacaagueta-caroca inquite, quepatsi, quantija aisa maasano choocatantajigaroca.

²⁵ Pitigarancaqueri Pishire quenquejacaquerica paajanire Taavini novaesatineni, picanquequea ivagantequi:

¿Quero ocotacani icatsimatantajiacaca caquintequetatsica?

¿Quero icojiacani isariajiavecaro taaca opajitapae teeca oncameetsateji?

²⁶ Irirajia majirontajiaatsica quepatsiquitica aisa iramajiroreja caquintequetatsica icapiocaventajiacari icatsimajiaqueri Majirontamajatatsica aisa Quirishito icogua-iaqueca.

²⁷ Tampatica oanaquero picanqueca icapiocantajiacarica Erorishi aisa Pontsio Pirato itsipajiacari teeca irijorijoigueji aisa ishiraerijia iquemavacaajiaca irimetojajiaqueri Pirijanite Jesoshi Oganejencatatsica pinintacaaqueca impeaquempa Meshiantatsica.

²⁸ Coramani pitsatsitaca picantsitacaqueate: ‘Aritaquequeate oncoquempani.’ Ariqueate imaica inetsanataquero irintapae.

²⁹ Imaica, Nomajirote, pinquenquejaquero maasano icantajiaquenaca icatsimajiaquenugeti. Pagavejacaajiguena naatimpajia pomperanejia aatonijite notsaroguitsi nontsavetacojiaquerogueti picanqueca.

³⁰ Pagavejacaajiguena naventajiacarogueti ivajiro Pirijanite Jesoshi teeca inquempvaetimatempaji, cameetsanijite nogueshijajeri ashinoncajajiatsica, aisa nantajiaquenijite cantashitatiaguetanquitsica caarica inejajiti intsatimentajiquerinijite caaviji yagavejamajati iriatimpa.

³¹ Iroompaqueate yagajianaquitigui yamanaquerigueti Aapani Irioshi, ariqueate ocotanaca omoguecanaque tsovironaqui, yagavejacaamajajianaqueri aisa Ishire Aapani Irioshi. Iriatimpajia ariqueate itsavetantajianajiro aisa Iguenquetsatsare Aapani Irioshi teequeate intsaroajiajeji.

Icavintsajavacaajiagueta quemisantajiatatsica

³² Maasano quemisantajiatatsica itsipatavacaaajiaca iquemavacaajiaca. Taaca yashintajia tee irimashitsatapitsatavacaajiguemparoji, tee incanteji: “Apaniro nashinquempari naatimpa”, mana ipavacaajiaca intati.

³³ Irirajia itigarancanejia Jesoshi arimpaqueate itsavetantamajajianaqueri ipochatanajigueta, yagavejacaajiaqueritarite Aapani Irioshi, aisa yoguishinejamajajianaqueri.

³⁴ Tee inchoocajiajeji coguitejacojianquitsica, maasanotarite choocajianquitsica iguepatsijiate aisa itsovironaquiijiate yojocantaguequero yaantajiacaro imentaquipae. Ariqueate yaajianaqueneri

³⁵ itigarancanejia Jesoshi cameetsanijite irojocajiaqueneri maasano coguitejacojianquitsica.

³⁶ Ariquea iquejetaca irira Jose poneatsica Tsiperequi, iriguenti ichoviqui Irevi. Iriaqueate itigarancanejia Jesoshi ariqueate ipajijiajiri aisa Verenave ocantiqueate Oguishinejantatsica.

³⁷ Iriatimpa yojocantaquero iguepatsite yaancaro imentaquipae. Ariqueate yaajianaqueneri itigarancanejia Jesoshi.

5

Yamataajiagueta Ananiashi aisa Sapira

¹ Cotanquitsi chooca itsipa icantajitica Ananiashi itsipatacaro imanquigare Sapira yojocantavetacaros iguepatsite

² yaantajiavetacaros imentaquipae, cotanquitsi iquemavacaajiaca ariquea yaagaran-tavetavaja iriatimpa iriraquea choocapojajatsica yaavetanacanariqueate itigarancanejia Jesoshi quejevetacaqueate jocaguetaquenerica maasano.

³ Cotanquitsi Peerero icantavaqueri:

—Ananiashi, ¿quero ocotaca piquemisantantacarica Satanashi pinintantavetacaca pamatavijaquerime Ishire Aapani Irioshi paagarantantavajaca imentaquipae ivegarajitaquempirogueta piguepatsiteni?

⁴ ¿Arimpate tee aviguenti ashintamajatemparone iroaqueragueti? Ariqueate oquejetaca imaica pojocantaquerogueti, ¿arimpate tee aviguenti ashintemparine pimentaquit-sitapae? Aatotarite piquejetiro imaica, teenica apaniro pamatavijigueme caquinte, aisa iriguentiqueate pinintavetaca pamataviterime Aapani Irioshi.

⁵ Iroompaquea iquemavaquegueti Ananiashi, ariquea iquenaque itejanaque imetojanaque. Maasano quemacojiavaquerica itsaroajianaque.

⁶ Ariquea iquijaquijaipoji iriaqueraca quenquevarijiananquitsi yaajianaqueri yampiguiricacojianaqueri yaajianaqueri inquitajigueri.

⁷ Iroompaqueate osamanipojaqueguetiquea ocoraquevepojaca imanquigare oquijapojaque, teequeate ontsateji imetojaquegueti manquigavetaronica.

⁸ Iira Peerero icantavaquero:

—Iintsija pincantena, ¿arimaja yojocaquenari manquigatimpica maasano imentaquipae paantajiacaca piguepatsite?

Iroatimpa ocanti:

—Jeejeguitatsi, arimajaguitatsi yojocaquempiri maasano.

⁹ Icantiroquea Peerero:

—¿Quero ocotacani piquemavacaantacaca pamatavijajiguerime Ishire Aapani Irioshi? ¿Ari pijiqueji aato icatsimatimentimpro? Coraquetapojaque quitajiajatirica manquigavetimpinica, imaica aviroqueate inquitajiajate.

¹⁰ Iroompaqueate icanquitiguiro ariquea oquenaque otejimotanaqueri ometojanaque. Ariquea iquijaquijaipojaque quitajiajatirica manquigavetaronica inejajipojoro iroatimpa metojaque. Irooquea yaajianaquero iquitajiajatiro ichooaquegueti manquigavetaronica.

¹¹ Maasano quemisantajatsica choocajianquitsica acaniqui aisa maasano quemacojiaqueroa itsaroajianaque.

Itigarancanejia Jesoshi yogueshijajiri oshequi joquijijavetanquitsica

¹² Iira Aapani Irioshi yagavejacaajiaqueri itigarancanejia Jesoshi yantimojiaqueri caquinte caarica inejajiti intsatimentajiquerinijite caaviji yagavejamajati iriatimpa. Maasano quemisantajiguirica Jesoshi icapiocajiaca teemporoqui oveshintaacagueti iniropoapae ocajaratsencoataquegueti icantajitica Irashi Saromoni.

¹³ Iira itsipajia itsaroajianaque inconoajiaquemparigueti cotanquitsi ishineventajiacari.

¹⁴ Arimpaqueate yoshequiamajatatiguinimaja quemisantajiguirica Amajirote, shiramparijia aisa manquigarentsijia.

¹⁵ Yamenajivaquerigueti yantajiaquetaqueca, yaantajanacarica ashinoncajajiat-sica quenavoquirontsiqui yoguinorijaqueri inorijantajiguetaqueca, yoguijajaiavaqueri Peerero cameetsanijite iroocampa ontsimanquimentajiaquerinijite ivaantorite iriveajianajempanijite.

¹⁶ Ariqueate iquejejiaca poneaguetanquitsica oquempejiquegueti Jerosare yamajiaqueneri yashinoncajajiat-sica aisa yatsipetacaajiacaca ampatsini, maasano ivejiajanaja.

Saserorotejia anaantajianquitsica icatsimajianaqueri itigarancanejia Jesoshi

¹⁷ Cotanquitsi irira saserorote anaantamajatanquitsica, jerijia saroseojia tsipamajajigarica arimpaqueate icatsimajianaqueri itsajiaqueritari ishineventajiacari.

¹⁸ Yaacaantajiaqueri itigarancanejia Jesoshi, yashitacotacaantajiaqueri santanaqui.

¹⁹ Cotanquitsi ariqueate onianquiitepojaquegueti icoraquetashijiaqueri irashivantite Amajirote yashirejapojaqueneri ashitacorontsi, yoguisotojajiaqueri, icantavajiri:

²⁰ —Pija, pincatiapojaje oniganquirequi oticaacoroqui teemporo, pincamantajigueri maasano quero incojiaquempani incoguitempaniniji iranijaje.

²¹ Iriatimpajia iquemajivaque, ariqueate osavincaguitetamanaquegueti yoajiamanaque teemporoqui itsitijianaquero itsatacaajipojajiri.

Cotanquitsi irira saserorote anaantamajatanquitsica aisa itsipajiaca tequerata intsajigueriji. Icajemajiaqueriqueate imajirojiate ishiraerijia jerijia jivajiatsica. Iri-atimpajia itigarancajiavetacari oanquitsineca irajiaquiterime ontaniqui yashitacojavecarigueti, iramajiaqueneri iriatimpaqui.

²² Cotanquitsi yoajiavetanacaqueate coaretapae, tee anejeriji. Ipijajaa icamantajiaqueri,

²³ icantajiapojaqueri:

—Noajiavetanaca namenajiavepojacaro ashimajataca santana. Iriaquea amenajiaquerica timashijiaque sotorontsiqui aatoniji isotoajigui, cotanquitsi nashirejiajave-tacaro cajaraguitevaetaque intsompogui.

²⁴ Iroompaqueate iquemajivaquitigui imajirote coaretajia quempoguijajiguiroca teemporo, jerijia saserorotejia anaantajanquitsica, mana yoajianaque intati icantava-caajianaca:

—¿Querocate icojiacani?

²⁵ Ariquea icoraquepojaque aparo icampoji:

—Irira pashitacotacaantajiavetacaca chapiniqui arimpate chooca itsatacaantajiaque oniganquirequi oticaacoroqui teemporo.

²⁶ Ariqueate iquemavaquegueti imajirote coaretajia itsipajianacari igoaretatepae yoajianaque cameetsaqueate yaajijatiri, itsaroajiaquetarite itsinacajitiritsi.

²⁷ Yamajiaapojaqueri yogatijiaapojaqueri icapioacajiacagueti. Ariqueate iquenquetsataque saserorote anaantamajatanquitsica icanti:

²⁸ —Nocamantamajiavetaquempi povashiantajianajero, aatoja pitsavetantajiajirotsi yantaguetaqueca Jesoshi. Cotanquitsiquea pitsitacaguetejaquero Jerosare pitsavetantajiaquero pitsatacaantane, mana pinintajiaque incantacojiaquena: ‘Iriguenti metojacaantajiaquerica Jesoshi, mana iquempevaejiaca.’

²⁹ Iquenquetsajianaque Peerero jerijia aisa itsipajiaca itigarancanejia Jesoshi icantajiguiri:

—Iriquetimpa nonquemisantamajajiaque Aapani Irioshi. Incanquegueti caquinte otsipasato, aatoqueate noquemisantajiguiritsi.

³⁰ Arimajatarite pimetojacaantajiavecari Jesoshi pompajacotacaantajiavetacari coroshiqui, cotanquitsi yovochantajiri Irioshimajaca itsaromentajiganica avaesatiniteni coramani.

³¹ Yoguisavicajiri itincamijempequiqui, imajirontacaacari aisa ipeacaacari Meshiantatsica, cameetsanijite incantashitatijaianaquempa ishiraerijia irovashiantajianaquero yantajiguica teeca oncameetsateji, cameetsaniji irishetajenerinijite Aapani Irioshi iguempevaerejia, irimaisantajeronijite.

³² Namenamajajiaqueritarite notsavetantajiacarica. Ariqueate iquejetaca Ishire Aapani Irioshi itsavetacoqueri, iriotarite iriguenti itigarancaqueca Aapani Irioshi inchoocashirentajiaqueri maasano quemisantamajajiguirica.

³³ Iroompaqueate iquemajivaquerigueti opejaianaqueri itsimajenca, inintajiavetatac irimetojajiaquerime.

³⁴ Cotanquitsi ariqueate ichoocataque acaniqui pariseo icantajitica Gamarieri, yamenajiaqueriqueate igonorojia caaviji icameetsati. Iriatimpa iriguenti tsatacaantantiroca itioncacotanaqueca Moishishini. Icatiimojianacariqueate majirontajiatitsica, icantiri itsipa:

—Paajianaquerita sotsiqui capichajaniqui.

³⁵ Ariqueate icantiri capiocajianquitsica:

—Shiramparijia ishiraerijia, inchiquiojia pimetojajiguiritsija. Iroqueti pinquenquejamajiaque.

³⁶ Pinquenquejajajero coramanitica ichoocavetacagueti Teorashini inintave-tacagueti iranaantaquemequeate yoguijajavetanacari oshequini caquinte, aricampa icarajiaque 400. Cotanquitsi teequeate iragavejeji, mana imetojajitaqueri. Irira oguijajavetanacarica ariquea yoayoaitanaji, teequeate intsipatavacaajajempaji.

³⁷ Ariqueate oquejetaca aisa coramani itioncacotacaantajiaquerigueti majirontat-sica irajaanire intsataque querocaca ivegaracani maasano, choocaqueate itsipa, irira Garireaquitica icantajitica Jorashini. Iriatimpa inintavetaca iranaantaqueme inqueje-taquemparime Teorashini. Ariqueate iquejetaca iriatimpa yoguijajavetanacari oshe-quini caquinte, cotanquitsi iroompa imetojajitaquerigueti ariqueate iporocajianaque oguijajavetacarica.

³⁸ Irootaquequeate noncantantajiaquempica imaica ariotaque icoca irirajia, povashi-antajajeri aato picantajiguiritsi. Maasano itsatacaantaqueca inchiquiojica yaashijiac-aro intati iriatimpajia, inchiquiotsi ompeashitanajempa.

³⁹ Cotanquitsi iriguentigueti tigarancaqueri Aapani Irioshi intsatacaantantajiaque querocate pincojiaquerini. Aatoshiatsi picatsimamanatiritsija Aapani Irioshi.

⁴⁰ Iroompa iquemajiavaquerigueti icantajiguiri:

—Iroosacanicate cameetsavaeque.

Ariqueate icajemacaantajajiri itigarancanejia Jesoshi, ipasatacaantajiaqueri. Ariqueate yoguipaquijajajiri icantajiavaqueri:

—Aato pitsavetantimataji ivajiroqui Jesoshi.

⁴¹ Ariqueate isotosotoitanaji icapiocaventajiacarigueti majirontajiat-sica, yoajianaji ishinejianaja itsajiaquetarite ishinevencari Aapani Irioshi, iriguentitarite yatsipeven-tajiaa Jesoshi.

⁴² Maasano savincaguiteri itsatacaantapinijiaque ontaniqui oniganquirequi oticaa-coroqui teemporo aisa tsovironaquipaequi, teequea irovashiantajigueroji, itsavetanta-jiaqueri Jesoshi, icanti iriguenti Quirishito.

6

Icoguiaque 7 amitacotantantquitsineca

¹ Ariqueate yoshequiamajatanaquegueti quemisantajiat-sica, ariqueate itsitijiana-quero irirajia quenquetsatantacaroca guiriego injashijianacariqueate irirajia quen-quetsatantacaroca evereo, icantajiaquequeate:

—Maasano savincaguiteri icavintsajajiaquerogueti metojacoguetantquitsica, tee iran-tajigueji cameetsa, teenicate irojocamajajiguenero oshecajia agonorojia.

² Irirajia itigarancanejia Jesoshi carajianquitsica 12 icapiocajiaqueriqueate maasano quemisantajiat-sica icantajiguiri:

—Teenicate oncameetsateji novashiantajianaquero notsavetantajiguirogueti Iguen-quetsatsare Aapani Irioshi irooqueate nantajiavaque nojocapinijiaquenero oshecapae.

³ Irootaquequeate, napiguemisantarijiate, noncantantajiaquempica imaica pincogu-iajigue 7 tsamajajiat-sica irira comajamajajianquitsica ichoocashirentamajajiaqueca Ishire Aapani Irioshi cameetsanijite irionijite savicaventajiaquerone irojocantajiaque.

⁴ Naatimpajia manaqueate ogantaga nosavicaventajiaquero namanajiguero Aapani Irioshi aisa nontsavetantajiaquero Iguenquetsatsare nontsatacaantajiaquero.

⁵ Iroompaqueate maasanoqueate ishineventajiacaro icantajiaquerica. IcoGUIAJIA-queriquea Ishitivano, itsajiaqueritarite iquemisantamajataque aisa ichoocashirenta-majataqueri Ishire Aapani Irioshi. Ariqueate icoguiajiaqueri aisa Jeripe, Porocoro, Nicanori, Timo, Parimenashi, jeri aisa Nicoraashi. Irira Nicoraashi ariguenti iponeaca Antioquiaqui. Tee irio jorio cotanquitsi yoguijatacotaqueri joriojia itsaromentacarigueti Aapani Irioshi. Imaica iquemisanqueri Jesoshi aisa.

⁶ Ariqueate icantajiguiri itigarancane Jesoshi:

—Jeri iricatica.

Ariqueate iriatimpajia ipamijiaqueri yamanajiaqueri Aapani Irioshi impeacaimen-
quemparinijite amitacotantajianquitsineca.

⁷ Arimpaqueate otsitacacovaetanacaroni Iguenquetsatsare Aapani Irioshi Jerosare-
qui, iquemantajiavacaroca oshequini. Arimpaqueate ijatiri yoshequiamajatanaque
quemisantajiatsica. Imajianacaqueate oshequini saserorotejia iriatimpajia iquemisan-
tjianaque.

Icatsimajitaqueri Ishitivano

⁸ Irira Ishitivano iriguenti caaviji icavintsajamajataqueri Aapani Irioshi, yagaveja-
caamajataqueri, yonigaaguetaqueri irapijoriojateni teeca irinejajigueteji, intsatimen-
tjiaquerinijite iriguenti agavejacaqueri Aapani Irioshi.

⁹ Cotanquitsi choocaqueate ontaniqui shinagoga icapioicapinijiacaguete jorio ipi-
mantajivetaca coramani cotanquitsiqueate yovashiantajiri aavetacarica. Ariqueate
iconoagarantajiaca iriatimpajia itsipajiacari ponejaianquitsica Shirenequi, Arejantiri-
aqui, Shirishiaqui, jero aisa Ashiaqui, yoashijianaqueri Ishitivano incatsimajigueri.
Iriatimpajia icapioaventajiacari icatsimajiaqueri. Irooqueea icanti, irooqueea icanti,

¹⁰ cotanquitsi teequeate iragavejajigueriji iroguemisantajigueri, caavijitarite itsaque,
iriguentitari tsatacaqueri Ishire Aapani Irioshi.

¹¹ Irootaquequeate yojocantacarica imentaquipae itsipa caquinte cameetsanijite ira-
mataajiaquempa. Iriatimpajia icantajiaque:

—Noquemajiaqueri injashinatari Moishishini, ariqueate iquejetaqueri Aapani
Irioshi iriatimpa.

¹² Iroompaqueate iquemajiavaqueguete maasano opejaianaqueri itsimajenca,
ari iquejejianaca irirajia jivajiatsica aisa tsatacaantajiguiroca itioncacotanaqueca
Moishishini. Yaajianaqueri yamajianaqueri ichoocajiaqueguete imajirojiate.

¹³ Ariqueate icajemajiaque itsipa amataajianquitsica icantajiaqueri:

—Iricatica iroguenti ichoocavenque injashinatacaro ocatica teemporo yashintacaca
Aapani Irioshi aisa injashinatacaro itioncacotanaqueca Moishishini.

¹⁴ Noquemajiaqueritarite icanqueguete: ‘Irraqueate Jesoshi Nasarequitica irisovea-
quero teemporo, aisa irogaaguetaquero maasano itsatacaantinica Moishishini.’

¹⁵ Irira capioaventajiacarica yamenajiaqueriqueate inejajiaqueriqueate ivoroqui
Ishitivano quejetaca ivoro irashivantite Aapani Irioshi.

7

¹ Ariquea irira saserorote anaantamajatanquitsica icantiri Ishitivano:

—¿Arimaja piquejetaquero imaica?

² Iriatimpa icantiri: “Imaica nogonorojia aisa jivajiatsica, iintsija pinquemisan-
tjiavaquena noncamantajiaquempiguete. Coramani itsarotentajiacari avaesatiniji-
ateni Aapani Irioshi Oganejencamajatatsica, ariqueate noquejetaca naatimpa aisa
notsarotentacari. Choocatirajaguete Averaameni Mesopotamiaqui tequerataguete
iroanaqueji ontaniqui Jaranequi, yonigaacari Aapani Irioshi,

³ icantiri: ‘Pija povashiantanaquero piguinteni, povashiantajianaqueri pijitanejia,
poanaquequeate otsipauqui quepatsi nonigaaquempa.’

⁴ Ariquea icatianaca Averaameni yovashiantanaquero iguepatsite Carereaqueitica,
yogaanaja Jaranequi, iguintenipoja ontaniqui. Oraquea imetojanaqueguete iriri,
ariqueate itigarancaqueri Aapani Irioshi icoraquequequeate acaniqui piguinteniji-
acaguete imaica.

⁵ Cotanquitsi tee irojocamajateneriji quepatsi, teenicate irashintemparoji capichaji, cotanquitsi icashiacaacari icantaqueriqueate: ‘Pimetojanaquegueti irioqueate ashintajemparone pinchoviquijianaqueca.’ Oraqueate icashiacaacarigueti tequeratanica iroacaantenica,

⁶ cotanquitsi icanqueri: ‘Irirajia pinchoviquijianaqueca mana iriguintenitantajiquempari iguepatsite itsipajia. Iromperaperaajitaquempari intati, aato ivegaratiri. Irantipetacajaiacquempari aavaetanaquempa 400 ajagantsini.

⁷ Cotanquitsi naatimpa noncatsimatimentajigueri maasano omperajiacarica intati. Ariqueate irovashiantajiajerigueti incoraquejiaje acaniqui intsaromentajiaquena.’

⁸ Icanqueri aisa: ‘Noninque imaica intotsaiquijiquero pichonquimashi aisa ariqueate iroguijatacojiajeroqueate maasano pinchoviquijianaqueca cameetsanijite inquenquejiaqueronijite nocanquempica aisa cameetsanijite ironigaaquenaniijite arimaquaqueate inintamajataque inquemisantaquena. Ariqueate naatimpa nashintajiaquempari noncavintsajajiaqueri pinchoviquijianaqueca.’ Irootaquequeate yoacaanquerigueti Ishaaco iroompaqueate aapojacagueti 8 savincaguiteri itotsaiquitaqueri ichonquimashi. Ariqueate iriatimpa Ishaaco yoacaanquerigueti Jacovo imaqueri iriatimpa. Ariqueate iquejetaca Jacovo itotsaiquitaqueri ichonquimashijia irijanijiate. Iriraqueate irijanijiate ivegarataca 12 iriojiatarite choviquijiacajica maasano aatimpajia.

⁹ “Apaniro irijanite Jacovo ipajita Jose. Iriraqueate iriguentijeguijiate icantajigui: ‘Yanajaijaiti coajica’, irootaquequeate icatsimatimenquerica yojocantantacanicarica iromperataquempari Ejepitoquitica. Cotanquitsiqueate itsipatacari Aapani Irioshi,

¹⁰ yompetanacari yatsipetacagueti, irootaquequeate ishineventantacarica imajirote Ejepitoquitica icantajitica Paraone. Yamenakeri iriguenti tsamajatatsica irootaquequeate ipeacaantajarica iriatimpa iquejemajirontantajarica imajirontantajiajarica maasano Ejepitoquitica aisa iconoajica Paraone.

¹¹ Ariqueate yatsipetanaca itase maasano Ejepitoquitica aisa Canaanequitica, maasano avaesatinijiateni, querocampate irajajiaero isheca.

¹² Ariqueate Jacovo itigarancajiaqueri irijanitepae Ejepitoqui iramanantajiaquitequeate isheca, iquemacojiaqueritarite iriguenti choocatacojianquitsi tirigo itseraiquijiaquero tsovironaquipaequi itsotejiacarero iriatimpa irishecacajajempaca coajica onteroncaguetanaquempagueti maasano.

¹³ Coajica yoajianajiquea aisa iramanajiaquiteri isheca, ariqueea icantajiaqueri Jose: ‘Naroguentitarite piguentijeguite’, itsatantacarica Paraone queri oacaantirica Jose.

¹⁴ Ariqueea Jose icajemacaantaqueri Jacovo iriri, jerijia aisa maasano ijitanejia. Maasano icarajiaque 75.

¹⁵ Yoantanacaca Jacovo iguintenitapojaca Ejepitoqui. Ariqueea ontaniqui imetojanaji. Ari iquejijanaca maasano irijanijiate, irirajia choviquijianacajica, imetojajiaque ontaniqui.

¹⁶ Ariqueea yaajitanajiri ontaniqui Shiquemequi, yojoquijijitapojajiri omoroqui yojoquijitantajitarica metojatsica, irootarite ivegaraqueca coramani Averaameni yamanajiaquerigueti irijanijiate Amore Shiquemequi, yojocaqueneri imentaquitsite.*

¹⁷ “Ariqueate pajinigueti aapojempa irinetsanatantaquemparoca Aapani Irioshi icanquerica Averaameni coramani icantaquerigueti irovashiantajiajeri omperaperaajia-avecarica inchoviquijiaqueca, ariqueate yoshequiajianaquequeate avaesatinijiateni ontaniqui Ejepitoqui.

* **7:16** Jen. 50.7-13 ocanti yojoquijitajiri Jacovoni omoroqui mortashitatsica Macaperaquitica yashintavecaca Eperoneni (Jen. 49.29-32). Irootaque ivegarataqueca Averaameni. Josoe 24.32 ocanti iriraqueea Joseni iriotaque yojoquijitajica **Shiquemequi** quepatsiqui ivegarataqueca Jacovoni (Jen. 33.18-19).

18 Ocoramanitapojajigueti yoshequiajianaquegueti, ariqueate imajirontaja Ejepitoqui itsipa teeca inquemacoteriji Jose.

19 Iriotaquequeate amatavijajiavecarica avaesatinijiateni, yatsipetacaajiacari, ipishoncacaajiaqueri irijanijiate iriaqueraca voaguetanquitsi cameetsanijite irimetojajiaque aatonijite yoshequiguitsi.

20 Irootaquequea ivoantacaca Moishishi. Irira Aapani Irioshi ishinevencari. Ocarataque 3 taai iquempoguijajitaqueri itsovironaquitequi iriri.

21 Cotanquitsiquea aapojacagueti yojoquijitantajitarica sotsiqui irimetojeme, aaqueeriqueate irorijanite Paraone, oguimoncaqueri aajanicari oquejetacaacari irijanimajate.

22 Itsatacaajitaqueriqueate Moishishi maasano itsaguetica Ejepitoquitica. Cameetsaqueate iquenquetsataque, itsamajaguetaqueroqueate taaca opajitapae yantague-taqueca.

23 “Ariqueate ovegaratacagueti irajagantsite Moishishini 40, iquenquejanaque iroanaque irinejeri igonorojia, ichoviquijiani Ishiraerini.

24 Inejapojaquequeate apaniro yatsipetacaacaca Ejepitoquitica, ariqueate ipigamempojiri Moishishini, imetojaqueriqueate Ejepitoquitica.

25 Ijiqueji ariji intsajiavaqueriji igonorojia iriguenti tigarancaqueri Aapani Irioshi iramijiaqueriqueate irajaianajeri, cotanquitsi iriatimpajia tee intsajiavaqueriji.

26 Osavincaguitetanajiguetiqueate inejiri mavite igonoro taviavacaaca. Inintaveca irogameetsajiajerime icantiri: ‘Shirampari, pigonorontavacaaca; ¿querocate pincantempaji pitaviavacaantaca?’

27 Iriiraqueate taviaquerica itsipa itatsinquiriqueate icantiri: ‘¿Taampate cantaquempi pimpeaquempa nomajirojiate cameetsanijite pincantomajajiaquena? ¿Taampate peacaaquempi nojoesete?’

28 ¿Aricampa pinintaque pimetojaquena naatimpa pinquejetacaguena Ejepitoquitica pimetojaqueca chapinqui?’

29 Iroompaqueate iquemavaquegueti Moishishi ishianaca yoanaque otsipaqui quepatsi icantajitica Mariane. Ariqueate ichoocapoji ontaniqui iconoajiacari itsipapae. Yaapojaque imanquigare, yoacaanquequeate mavite shirampari.

30 “Ariqueate anaapojacagueti 40 ajagantsi, ichoocaquegueti Moishishi oquitamampororoipojaquegueti quempejitacoquero otsempi Shinai yonigaacari irashivantite Aapani Irioshi. Ichooatantacaro inchatojaniqui maequitatsica, omorecanaque more, more, more, more.

31 Yamenaquerogueti Moishishi, mana yoanaque intati. Iquempejivetapojaca iramenamajaque, iquemaitatigui iquenquetsatanaque Amajirote, icanti:

32 ‘Naroguenti Irioshite pivaesatinijiate. Naroguenti Irioshite Averaame, Ishaaco aisa Jacovo.’ Ariqueate canquiti Moishishi soroc itsaroamajatatiguinimaja yompioncanacaqueate pion, pion, pion, tee iramenajeroji capichaji.

33 Ariqueate icantiri Aapani Irioshi: ‘Pasaterejanaquempari pigaviguitire, picatiantacarotarite noganejencaguitere.

34 Naatimpa namenajiaqueri nashintajiacaca choocajianquitsica Ejepitoqui yatsipejiacagueti, aisa noquemajiaqueri icajemajiaquegueti, irootaquequeate naguijitan-tapojarica naajiajeri namitacojiaqueri cameetsanijite irovashiantajiajeri atsipetacaajiacarica. Imaicaquea nontigarancaquempi pimpianaje Ejepitoqui.’

35 “Iriotaquetarite irira Moishishi imanintajiaqueca icantajiavecarigueti: ‘¿Taampate cantaquempi pimpeguempaja nomajirojiate cameetsanijite pincantomajajiaquenani-jite? ¿Taampate peacaquempi nojoesete?’ Imaica noncantajiaquempi iriotarite itigarancaqueca Aapani Irioshi impeaquempa imajirojiate aajianajerineca. Iriguenti-

tarite tigarancaqueri irashivantite Aapani Irioshi yonigaacarigueti inchatojaniquiqui maequitatsica.

³⁶ Oraqueate ontaniqui Ejepitoqui yantaguetaque Moishishini oshequi teeca irinejajiteji intsatimentajiaqueniji iriguenti Aapani Irioshi amitacojiaquerica, ariqueate yaajianajiri avaesatinijiate. Ariqueate iquejetaca aisa ontaniqui Quentijani Quityoncajaroqui aisa ontaniqui oquitamampororoipojaquegueti yantaguetaque oshequi teeca irinejajiguetaji. Ovegarataca 40 ajagantsi yantapiniguetaquero.

³⁷ Irieraqueate Moishishini iriotarite cantajiaqueri ichoviquijia Ishiraerini: 'Intigarancajempí Aapani Irioshi pignonoro tsavetantaquerineca, inquejetaquena naatimpa.'

³⁸ Iriotaquetarite Moishishini tsipajiacarica avaesatinijiate ontaniqui icapiocajiacaguete oquitamampororoipojaquegueti. Aisa itsipatacari irashivantite Aapani Irioshi quenquetsatacaquerica otsempiqui Shinai. Iriotaquequeate quemavaqueroca quenquetsatsarentsi oganijantatsica, yogaaajiacajiro aatimpajia atsatantajiacaroca imaica.

³⁹ Cotanquitsi irira avaesatinijiateni imanintajiaqueri teenica irinintajiguetaji inquemisantajigueri manaqueate intati ipintsapintsajianaja Ejepitoqui.

⁴⁰ Icantantajiacarica Aaronini: 'Panteshiatsi irioshijiate itsipapae cameetsanjite irionijite jivajianajineca. Iriovetaca Moishishi aajavetajajica ontaniqui Ejepitoqui, cotanquitsi tee antsateji taa opajita oaqueri, ari ipeaca.'

⁴¹ Ariqueate yantajiaque iriatimpajia irioshivijitashicaca iquejetacaacari caapironcaari iriaqueraca quimogantirenanajiquitanquitsica. Ariqueate imetojajiaqueneri viratsipae itajiaqueneri ishinevaejiaca, ishineventashijavetacari yantajiaqueca.

⁴² Ariqueate yovashiantajianaqueri Aapani Irioshi intsariventajiguemparita catsirincateri, taai, impoquiropae. Itioncacotaquerotarite coramani tsavetantatsica itioncaacaqueriguete Aapani Irioshi icanti:

'Aviatimpajia ishiraerijia,

pimetojajiaquegueti viratsipae pitajiaaqueriguete pichoocajiaquegueti ontaniqui oquitamampororoipojaquegueti 40 ajagantsi

¿arimpate naroguentimpa pojocajiaquene pitajiaaquene?

⁴³ ¡Teequeate!

Iriguentitarite pishineventajiacarica pirioshivijitashitaca icantajitica Moroco, irootaquequeate querocaguete poajianaque paajianaquero tsovironaqui ichoocatanca.

Aisa pishineventajiacarica impoquiro irashi pirioshivijitashitaca icantajitica Irepana.

Iriojia pantajiaqueca pintsariventajiaquempaca.

Irootaquequeate naacaantantajiaquempica irajaitanaquempi osamani anaacaguete Vavironia.'

⁴⁴ "Ariqueate ontaniqui oquitamampororoipojaquegueti irira avaesatinijiateni itsariventantacariqueate Aapani Irioshi quitsaarentsivanco oraquea ochoocatantaca itioncaqueca Aapani Irioshi ontaniqui Shinaiqui. Ariqueate iquejetacaajiacaro icanquerica Aapani Irioshi Moishishini yonigaaqueriguete quero incojiaqueroni.

⁴⁵ Ariqueate imetojanajiguetaji Moishishini, irioqueate piajari Josoe itsipajianajiri avaesatinijiate icoraquetashitajiro ocatica quepatsi icashiacaajiacarica Aapani Irioshi coramani, yaajianajiroqueate iitsaarevanco. Ariqueate yarejerejeivetapojacaguete inejajiapojaqueri teeca iriojia joriojia guintenijavetatsica acaniqui, cotanquitsi ariqueate yoguishiajiaqueri Aapani Irioshi cameetsanjite irojocajiaquenerinijite irionijite ashintajajemparone. Ogantaga ochoocaque iitsaarevanco Aapani Irioshi arejevaetapojacaro ichoocaqueguete Taavini.

⁴⁶ Ariquea irira Aapani Irioshi ishinevencari Taavini, icavintsajaqueri. Ariqueate iriatimpa inintavetaca irantaquenerime tsovironaqui inchoocatantaquempaca Aapani Irioshi itsariventacaca Jacovoni.

⁴⁷ Cotanquitsiqueate teequeate irinintacagueriji iranteneri, iriguentiqueate antajiniri irijanite icantajitica Saromoni.

⁴⁸ Cotanquitsi irira Aapani Irioshi Anaantamajatatsica tee inchoocatantemparo tsovironaqui ishitiqica caquinte, icanquetari tsavetantirinica Aapani Irioshi:

⁴⁹ Icanti Aapani Irioshi:

‘Maasano jenoquipaetica manaqueate oquejevecaro noshitaponcaro aisa quepatsi manaqueate oquejevecaro novanquegontare.

¿Arimpate pagavejiaque pishiticajiaquena tsovironaqui nonchoocatantempaca?

¿Queroquea ochoocaque nomagorejantaquempaca naatimpa?

⁵⁰ ¿Arimpate tee naroguenti peacaaguetaroca maasano choocaguetatsica?’

⁵¹ “Aviatimpajia aviguentijia tee pinquemeji, mana pogapianaca intati. Mana piquejejiacari teeca intsatimajigueri Aapani Irioshi, manaquea pipigatsajiacari Ishire Aapani Irioshi piquejejiacari pivaesatinijiate.

⁵² Iriguentijiarite atsipetacaajiacarica maasano tsavetantirinica Aapani Irioshi aisa imetojajiaqueri maasano camantajavetacarica: ‘Incoraqueataque coajica irira Comajamajatatsica.’ Ariqueate icoraquevetacaguete aviatimpajiaqui paacaantajiaqueri intati, pimetojacaantajiaqueri aisa.

⁵³ Pitsajavetacaro icanqueca Aapani Irioshi yogaaajiacajica irashivantijitete, cotanquitsi tee pinquemisantajigueroji.”

⁵⁴ Iroompaqueate iquemajiavaquitiguri icanqueguete opeamajajianaqueriqueate it-simajenca yatsicayajimajatashijianacariqueate.

⁵⁵ Iriaqueate Ishire Aapani Irioshi ichoocashirentamajatanakeri Ishitivano, yamenanaquequeate jenoqui inquitequi inejaquero ishimpouquirereane Aapani Irioshi cantavaetaque shimpoquirererere. Iriaqueate Jesoshi catiaca itincamijempequiqui. Icantanaquequea Ishitivano:

⁵⁶ –Jac, imaica naatimpa nonejaquero inquite otanarejanaca. Jeri irinta Irijanite Caquinte, catiaca itincamijempequiqui Aapani Irioshi.

⁵⁷ Ariquea icojianaca ishepijianaquero iguempitapae aatoniji iquemajiguri, icajemajianaque ishiashijianacari itaviajianaqueri.

⁵⁸ Yaajianaqueri ovegaraguetacaguete tsovironaquipae ipishoncashijiaqueri itsinatsinajiaqueri. Iriaqueate tsinacajiaquerica mana isapocajianacaro iitsaare jenoquitantsica yojocajianaqueneriqueate itsipa itsipajiacaca icantajitica Saoro, iquem-poguijajiniriqueate.

⁵⁹ Iroompaqueate itsinacajianaqueriguete Ishitivano, iriatimpa yamanaqueri Amajirote, icantiri:

–Nomajirote Jesoshi, paavajero noshire.

⁶⁰ Ariquea iguerotanaca icajemapanajanti iririjencani icanti:

–Nomajirote, aato piquenquejacaguiritsi ocatica iquempevaecaguete.

Iroompaqueate iquejetanaquerogueti imaica imetojanaque.

8

1-2 Irira Saoro yamenavaqueriguete imetojanaqueguete yamenavaquero cameetsa.

Saoro yatsipetacaajiacari quemisantajiatatsica

Aritarite ichoocajiaque acaniqui quemisantamajajiguirica Aapani Irioshi, yaa-jianajiriqueate Ishitivano iquitajiatitiri. Iraacomajajianaqueriqueate. Ariqueate irira teeca inquemisantajigueriji Jesoshi itsitijianaqueroqueate icatsimajianaqueri maasano quemisantajiatatsica choocajiatatsica Jerosarequi, ishiantajianacaca maasano iriatimpajia yoajianaque iporocajianaquequeate Joreaqui aisa Samariaqui. Iriguentivani choocajiatatsi itigarancanejia Jesoshi.

³ Iriraqueate Saoro inintavecaqueate interoncajiguerime irira quemisantajiatsica, yoashijianaqueri itsovironaquitapequi, iquijashijianaqueri inoshicajianaqueriqueate shiramparijia, manquigarentsijia, maasano. Yaajianaqueri yoguijajiaqueriqueate santanaqui.

Itsavetantajiquerigueti Jesoquirishito Samariaqui

⁴ Irirajiaqueate porocajiananquitsica yoajianaque itsitacaguitejajiaquero itsavetantaqueroquea Quenquetsatsarentsi Oganejencatatsica.

⁵ Apaniro icantajitica Jeripe yoanaque Samariaqui itsavetanqueri Quirishito.

⁶ Oshequini quemajavaquerica Jeripe iquemisantamajajivaqueri, yamenajiaqueritarite yantaguetaquequeate teeca irinejajiteji.

⁷ Yoguisotoaguequeriqueate ampatsinipae choocatantajiacarica caquinte. Icajemajianaquequeate isotoajianaque. Ariqueate aisa yogueshijajiri magoviroshiri, jerijia aisa teeca ironquempaji.

⁸ Irootaquequeate ishinevaetantajiacaca oshequini guintenijianquitsica Samariaqui.

⁹ Ariqueate chooca acaniqui aparo shirampari icantajitica Shimo. Yaventapinicaro iragavejane ampatsini yamitantajiavecarica, yamatavijantajiacarica Samariaquitica. Yaventacoca icanti: “Naroguenti anaantatsica.”

¹⁰ Maasanoqueate iquemisantamajajiavetacari, majirontajiatsica, aisa teeca iranaantajigueji, icantajiavetacaquea: “Irio agavejavaetatsica yagavejacaqueca Aapani Irioshi.”

¹¹ Iquemisantajiaqueri maasano, yonigaajiaqueritari taaca opajitapae teeca irinejajiteji yagavejacaquerigueti ampatsini, yamatavijantajiacarica. Iriatimpajia mana yoajianaque intati.

¹² Cotanquitsiquea yarejetapojacagueti Jeripe itsavetantaquerogueti Quenquetsatsarentsi Oganejencatatsica tsavetantaquerica Aapani Irioshi quero icotani imajirontagueti aisa tsavetantaquerica Jesoquirishito, ariquea iquemisantajiaqueri iviñacajatacaantajiacaquea, irirajia shiramparijia aisa manquigarentsijia.

¹³ Imatanacaqueate Shimo iriatimpa. Iroompaqueate iquemisantaquegueti iviñacajatacaantaca, ariqueate yoguijatanaqueri Jeripe. Mana yoanaque intati inejaqueritarite yantaque teeca iragavejeji caquinte.

¹⁴ Irira itigarancanejia Jesoshi choocajianquitsica Jerosarequi iquemacojiaquerigueti Samariaquitica ishineventamajianacaro iriatimpajia Iguenquetsatsare Aapani Irioshi, ariqueate itigarancajiaqueriqueate Peerero aisa Joanca iramenajiaquiteri.

¹⁵ Iroompaqueate yarejerejeipojacagueti yamanajiaqueriqueate Aapani Irioshi, yamanacoventajiaqueri cameetsanijite inchoocashirentajiajojaqueri Ishire Aapani Irioshi,

¹⁶ tequeratanicate inchoocashirentajigueriji, manatarite yoviñacajatimentajiacari ivajiroqui Amajirote Jesoshi.

¹⁷ Ariqueate Peerero aisa Joanca ipamijiaqueriqueate, ariqueate ichoocashirentajianaqueri Ishire Aapani Irioshi.

¹⁸ Iroompaquea yamenavaquerigueti Shimo yantaqueca itigarancanejia Jesoshi ipamijiaquerigueti caquinte cameetsanijite inchoocashirentajiajojeri Ishire Aapani Irioshi, inintavetacaquea irivegarajiaquenerime imentaquitsite,

¹⁹ icantiri:

—Iintsishiatsi pagavejacaguenaja naatimpa aisa nonquejetaquempi aviatimpajia cameetsanijite quericaca nompamitaque inchoocashirentajiajojaqueri Ishire Aapani Irioshi. Iintsija pagavejacaguena, novegaraquempitarite imentaquipa.

²⁰ Icantiri Peerero:

—Intaaquempashinete pimentaquitsitepae. Pitaatsishiatsi aisa aviatimpa camorecariqui iroorijite piji queji povegaratantaquemparo imentaquipae ora yojocashitantaca Aapani Irioshi.

²¹ Aatoqueate pagaveji piconoajigana pinquejejaquena naatimpa, tequeratanicate pincantashitiamajatepaji. Yamenaquempi Aapani Irioshi teequea ontampaticateji pishire.

²² Povashiantanaquero ocatica piquenquejaguishetaqueca imaica, pincantashitiamajatanajempa. Pamaneri Aapani Irioshi, arica impeacotajempiro piquenquejaguishequeca.

²³ Notsataquempitari oshequi picatsimatacotsitanaquenaro, ajiricashirentavaquempi covaeguisherentsi.

²⁴ Icanqueriquea Shimo:

—Pamanacoventajiguenashiatsi pincantajigueri Aapani Irioshi aatoniji nogui camorecariqui notagatsiqueate quejetaca picantajiaquenaca imaica.

²⁵ Ariqueate itigarancanejia Jesoshi icamantacojiaquerogueti maasano yamenajiaqueca aisa itsavetantajiaquerogueti Iguenquetsatsare Aapani Irioshi, ariqueate iquenaguetanaque iguinteniguetaqueti itsipapae Samariaquitica, itsavetantaqueroqueca Quenquetsatsarentsi Oganejencatatsica. Ariqueate ipiapiaitanaja Jerosarequi.

Iquemisanquegueti Etiopiaquitica

²⁶ Ariquea irashivantite Amajirote iquenquetsatacaqueri Jeripe icantiri:

—Pija oquitamampororoipojaquegueti pinquenantanaquemparo quenavoquirontsi quenavoquipojatsica Jerosarequi oavoquitananquitsica Gasaqui.

²⁷ Ariqueate icatianaca Jeripe yoanaque quenavoquirontsiqui, ariquea itonquivojavajari shirampari eonocotatsica* poneatsica Etiopiaqui. Iriatimpa iriguenti amita cotiroca ora imajirojiate Etiopiaquitica ora icantajitica Cantase. Iriguentitari netsanatiniroca omentaquitsitepae, cavorejaguetatsica. Iponeajaqueate Jerosarequi yoaquitiqueate itsarovoltaquitari Aapani Irioshi.

²⁸ Imaicaqueate iroanaje iguinteniqui, itetajaro itigaritacomento yapatsajavantaquero paperi itioncacotanaqueca coramani tsavetantirinica Aapani Irioshi icantajitica Isaiashini.

²⁹ Iriira Ishire Aapani Irioshi icantiri Jeripe:

—Poanaque pintonquivojamajatavaquempari quempeji.

³⁰ Ishiashitanacariqueate Jeripe iquemapojaqueri yapatsajavantaquero itioncanaqueca tsavetantatsica Isaiashini, icampojaqueri:

—¿Pitsatavaquerompa papatsajavantaqueca?

³¹ Iriatimpaqueate icantiri:

—¿Querocampate noncoquempani nontsatantavaquemparoca? Teenicate inchoocateji tsatacaquenaroneca. Iintsija caacateja pantaitapojaque aviatimpa pisavicapojaque acaniqui naatimpaqui pintsatacapojena.

Ariqueate yataitanaque Jeripe isavicapojaque.

³² Oraqueate yapatsajavantaqueca mana ocanti:

Yaajitanaqueri iquejetacaajitanacari yaajitiriguetei oveja ipesaitiriguetei.

Teequeate incajemanaqueji, iquejetanacari yogarajamaejitiriguetei ovejajaniqui yaajitiroguetei imae, mana iquemisantacotanaca.

³³ Ariqueate ivosantejajiaqueri, inijashinajiacariqueate, quericampate cantacotanaquerineca.

Ariquea imetojajiaqueri, tee inchoocateji quepatsiqui.

¿Imaica quericampa agavejanquitsine inquenquetsatacotaqueri inchoviquijianaqueca?

* **8:27 Eonoco** irio isoitsorejitajiqueca iguemaqui.

³⁴ Iriraqueate eonoco icantiri Jeripe:

—Pincamantenaja, ¿queri iquenquetsatacotaqueca tsavetantirinica? ¿Iriocampa quenquetsatacotajatsi, aricampa iquenquetsatacotaqueri itsipa?

³⁵ Ariqueate itsititanaquero Jeripe acaniqui ocanqueca paperi yapatsajavantaqueca, itsatacaamajataqueri itsavetantaquero Quenquetsatsarensi Oganejencatatsica tsavetacoquerica Jesoshi.

³⁶ Ariqueate yoajianaque inejajiapojaquero osamponaja. Icanquequea irira eonoco:

—Jerosa oca osamponaja. ¿Cameetsataquempa noviñacajatacaanquempa?

³⁷ Icantiri Jeripe:

—Aviompate. Piquemisantamajataquerigueti Quirishito, cameetsa piviñacajatacaanquempa.

Iriatimpa icantiri:

—Arimajatarite noquemisantamajataqueri, notsataquetarite irira Jesoquirishito iriguenti Irijanite Aapani Irioshi.

³⁸ Ariqueate icantiri tigaritacoquerica irogatiguero itigaritacotantaca, yaguijitanaque mavite, irira Jeripe aisa eonoco, yoajianaque osamponajaqui iviñacajataqueri.

³⁹ Iroompaqueate yagajianajatigui otsapijaqui yaanaqueri Ishire Aapani Irioshi Jeripe, ariquea ipeanaca. Iriraqueate eonoco, teequeate irinejajeriji Jeripe, cotanquit-siqueate yoanajiqueate ishinevaetanaca.

⁴⁰ Ariqueate irira Jeripe iconigavaeti Asotoqui itsavetantanaquero Quenquetsatsarensi Oganejencatatsica, yoavaetanaque itsitacaguitejanaquero guinteninintsipae, yarejevaecaro Sesareaqui.

9

Iquemisanquegueti Saoro

(Ya. 22.6-16; 26.12-18)

¹ Iriraqueate Saoro arimpaqueate icatsimajianaqueri quemisantajiguirica Amajirote inintavetaca irimetojajiaquerime maasano. Yoantanacaca saserorotequi anaantamajatanquitsica,

² yamanapanajantiri irojocavaqueneri paperipae cameetsanijite inquijashitimentajianaquerinijite shinagogapaequi icapiocantajiaca joriojia Tamashicoqui incoaguequiteri maasano guijatacojiguiroca icantajitica Quenavoquirontsi, irajaianaqueri irogu-ijaajiaqueri santanaqui Jerosarequi, shiramparijia aisa manquigarentsijia. Ariquea itioncaqueneri paperi, yojocavaqueneri.

³ Iroompaquea iquenavetanacaguete quenavoquirontsiqui quempejivepojacaqueate Tamashico ocantanaquitiguiqueate morec oponeajencataca jenoqui inquitequi otsirencapojaqueaqueate anquiritacotapojacari.

⁴ Ariqueate itejanaque quepatsiqui iquematiguiqueate icantapojaqueeri:

—Saoro, Saoro, ¿taate picatsimatantaquenaca?

⁵ Iriatimpa icoacotanaqueri icantiri:

—¿Queroquea pipajitani, Nomajirote?

Icantiri:

—Naatimpa naroguenti Jesoshi pipatimanataqueca.

⁶ Imaica pincatianaque poanaque Tamashicoqui. Ariqueate oraniqui incantajiquempi querocaca pincoquempani.

⁷ Iriraqueate itsipatsipaicaca Saoro itsaroajianaque iroorijite iquemajivetaca iquenquetsajiquegueti cotanquitsi teequeate irinejeriji, cajaraguiteni.

⁸ Icatiavetanaja Saoro, ipityaquirejavetanaca, tee iragavejajempaji irinejaje. Manaqueate yacatsajianaqueri intati, yaajianaqueri Tamashicoqui.

⁹ Ariqueate ichoocataque oraniqui 3 savincaguiteri tee irinejajeji, aisa tee irishecatajempaji, tee irimirajeji.

¹⁰ Ontaniquiquea Tamashicoqui ariquea ichoocataque quemisantatsica icantajitica Ananiashi. Inegaacari Amajirote mana oquejetanacaro iguimaanequi icantiri:

—Ananiashi.

Icantiri iriatimpa:

—Chocana, Nomajirote.

¹¹ Icantiri Amajirote:

—Pija ontaniqui itsovironaquitequi Jorashi, ari ochoocaque quenavoquirontsiqui icantajitica Catincapoquiri, pincoacotantapojaqueri Saoro poneanquitsica Tarisoqui. Imaica yamanaquena.

¹² Nonigaaqueritarite oquejetacaro iguimaanequi inejaqueri shirampari pajitatsica Ananiashi iquijapojaque ipamitapojaqueriqueate cameetsanijite iramenimentanajenijite.

¹³ Iroompaqueate iquemavaquitigui Ananiashi icantiri:

—Cotanquitsi, Nomajirote, noquemacotiri iriguenti catsimari yatsipetacaantajiacarica pigomajamajarejia choocajianquitsica Jerosarequi.

¹⁴ Imaicaqueate imaica coraquetaque acaniqui itigarancajiaqueri saserorotejia anaantajianquitsica cameetsanijite irajaianaquerinijite maasano aventajiguimpica pivajiroqui. Irootaquetarite icoraquetashitaque.

¹⁵ Cotanquitsi icantiri Amajirote:

—Pijja, iriotaquetarite nocoguaqueca, nonintaquetarite naatimpa intsavetanqueaqueate incamantajiaqueri teeca iriojia joriojia aisa imajirojiate. Aisa incamantajiaqueri ishiraerijia.

¹⁶ Nontsatacaaguequeri naatimpa maasano quero incoquempani irantsipeventaquena.

¹⁷ Ari yoanaque Ananiashi, iquijapojaque tsovironaqui. Ariqueate inejapojaqueri ipamitapojaqueriqueate, icantiri:

—Napiguemisantariteni Saoro, irira Amajirote Jesoshi onigaaquempica quenavoquirontsiqui itigarancaquena cameetsanijite pinejanaje, aisa inchoocashirentaquempinijite Ishire Aapani Irioshi iragavejacaanaquempi.

¹⁸ Iroompaqueate icanquitigui ariqueate ocotanaca opariapentaquigupojaque iroquijaqui quempeguetaca iventaqui shima ariqueate yamenanaji. Iroompaquea yoanaque iviñacajataca.

¹⁹ Ariqueate ishecatanaca itampishitanaji. Ariquea ichoocatanaji Saoro aparopae savincaguiteri, imaimojianajiri quemisantajatsica Tamashicoqui.

Itsavetanquegueti Saoro Tamashicoqui

²⁰ Ariqueate Saoro itsavetanquetanaqueri Quirishito shinagogapaequi icapiocantajica joriojia icantanaqueate: “Jesoshi iriguenti Irijanite Aapani Irioshi.”

²¹ Maasano quemajivaquerica mana yoajianaque intati icantajigui:

—¿Teempaqueate tee irio irira catsimajiaquerica quemisantajiguirica Jesoshi choocajiatatsica Jerosarequi? ¿Teempaqueate tee irio coraquetashijivetaquerica quemisantajiatatsica choocajiatatsica acaniqui iroishojiaquiterime irajaianaquerime saserorotejiaqui anaantajianquitsica?

²² Cotanquitsi irira Saoro arimpaqueate itsavetantamajatanakeri Jesoshi, icanti iriguenti Quirishitotatsica.* Ariqueate irirajia irapijoriojiateni choocajatsica Tamashicoqui tee iragavejajempaji impigajajempariji.

²³ Ariqueate oshequianaquegueti savincaguiteri isariajavecariquea joriojia irimetojajiaquerime,

²⁴ cotanquitsi icamantajiqueru Saoro. Ogantaga tsiteniriqui aisa savincaguiteri qui itimashijavecari sotorontsi qui itantajitaquerogueti ocapiocagueti tsovironaquipae inintajiavetaca irisotoanajegueti irimetojajiaquerime.

²⁵ Cotanquitsiqueate opitsecanaquegueti yaajianaqueru irapiguemisantarijiate otantotacagueti guinteninintsi, itetanaca cantiriqui, ariquea inchiqiojisano yogaguijitaqueru yoganoncorenacojiaqueru antaqueronta.

²⁶ Iroompaqueate yarejetapojacagueti Jerosarequi inintavetacaqueate inconoajiapojemparime quemisantajatsica, cotanquitsiqueate maasano itsaroacaajiavetavacari ijitashivetavacaritarite tee arimaja inquemisanteriji Quirishito.

²⁷ Cotanquitsiqueate yaanaqueru Verenave itsipatanacari Saoro ichoocajiaquegueti itigarancanejia Jesoshi, icamantajiaqueru quero ocotacani yonigaacarigueti Amajirote quenavoquirontsi qui iquenquetsatacaapojiaqueru. Coajica ontaniqui Tamashicoqui teequea intsarogueti iquenquetsatanaquequea ivajiroqui Jesoshi, itsavetacotaqueru.

²⁸ Iroompaqueate iquemajiaquitigui yaajianaqueriqueate itsipajianacari. Ariqueate iquijaguetanaque tsovironaquipaequi Jerosarequi,

²⁹ iquenquetsatanaquequea ivajiroqui Amajirote, itsavetacotaqueru, teequea intsarogueti. Aisa iquenquetsatacaajiaqueru joriojia irirajia quenquetsatantacaroca guiriego. Iriatimpajia inintajiavetaca inquemisantacajiaquerime cotanquitsi tee iragavejajigueru. Ariquea itsimajajianaqueru inintantajiavetacaca irimetojajiaquerime.

³⁰ Cotanquitsi iroompaqueate iquemavaquitiguiqueate irapiguemisantarijiateni yoacaajianaqueru Sesarequi. Ariqueate itigarancajiaqueru Tarisoqui.

³¹ Ariquea ichoocajiaque cameetsa maasano quemisantajatsica guintenijatsica Jorequi, Garireaque aisa Samariaqui, teequeate irasereajitajeri. Yoshequiamajatanaquequeate oraniqui quemisantajatsica, arimpaqueate iquemisantamajajianaqueru Amajirote itsamajajianaquero maasano inintica iriatimpa, iriguentitari tampishitacajiaqueru Ishire Aapani Irioshi.

Peerero yogueshitajiri Eneashi

³² Ariqueate yoanaque Peerero inejantaguetaque guinteninintsipaequi, inejajiaqueru irapiguemisantarijiate, irosati yarejetantaca Iritaqui, inejajiaqueru aisa itsipapae irapiguemisantarijiate guintenijatsica ontaniqui.

³³ Ariqueate oraniqui inejapojiaqueru teeca ironquempaji icantajitica Eneashi inorianiqueate 8 ajagantsi.

³⁴ Icantiri Peerero:

—Eneashi, imaica iriveajempi Jesoquirishito. Pincatianaje, pampiguiricanajero pinorijantacaca.

Iroompaqueate icanquitigui icanatanaqueate.

³⁵ Maasano guintenijatsica Iritaqui aisa Saronequi iroompaqueate inejavaquerugueti yogueshitajiri iquemisantajianaqueru Amajirote.

Yovochantajirogueti Irorocashi

* **9:22 Quirishitotatsica.** Iquenquetsatsarequi guiriegojia icanquegueti **Christos** (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguijitaqueca impeaquempa imajirojiate irooca isaserrotejiate. Irira Quirishito iriotaquequea itsavetacotsitacaca tsavetantajatsica coramanitica itigarancaque Aapani Irioshi impeaquempaniji Imajirojiate maasano.

³⁶ Ontaniquiqueate Jopequi ariqueate ochoocaque otsipa quemisantatsica icantajitica Tavita. Oraqueate iguenquetsatsarequi guiriego mana icantajitiro Irorocashi. Iroatimpa caaviji ocavintsajanti ocavintsajajigui coguitejacojianquitsica.

³⁷ Ariqueate ashinoncajanaca ometojanaque. Iquivatsinojitavaquero aritari icojiga joriojia. Ariqueate yaajitanaquero shitamencorentsi qui jenoqui.

³⁸ Ariqueate irira quemisantajatsica guintenijatsica ontaniqui Jopequi itsajiaque-ritarite ariquea ichooaque Peerero quempeji Iritauqui, itigarancantajiacaca mavite iroajianaque incantajiaquiteri incoraquetaque taampina.

³⁹ Iroompaqueate iquemavaquitigui Peerero icatianaca yoguijaguijaitanaqueri. Oraqueate yarejerejeipojacaguete tsovironaqui qui itsipajianacari ojoquijicaguete otsino Irorocashini. Ariqueate ochoocajiaque oraniqui metojajianquitsica omanquigarejia iracojiaquero. Iroompaqueate onejajiavaquitigui Peerero ocapiocaventajiacari onigaajiaqueri quitsaarentsipae ontijaguequeca Irorocashini choocatirajaguete otsipavetacaroguete.

⁴⁰ Irida Peerero yoguisotojiaquero maasano iguerotanacaqueate yamanaqueri Aapani Irioshi. Ariqueate ipitsocashitanacaro metojatsica icantiro:

—Tavita, pintinajanaje.

Ariqueate opityaquirejanaque onejatigui Peerero otinajanaca osavicanaque.

⁴¹ Yacatsataquero yogatiaquero icajemajajiroqueate metojacojiatsica aisa itsipajia quemisantajatsica, icantajigui:

—Jero oca, pochatanaji.

⁴² Irida guintenijatsica acaniqui Jopequi maasanoqueate iquemacojiaquero. Ariqueate yoshequiamajatanaquequeate quemisantajiguirica Amajirote.

⁴³ Ariqueate ichooaque Peerero oshequi savincaguiteri Jopequi itsovironaquitequi Shimo savicaventirica iticajagueteri imeshinapae.

10

Iquemisantaqueguete Coronerio

¹ Chooaqueate Sesareaqui coareta icantajitica Coronerio. Iriatimpa iriguenti imajirote coaretajia. Ariquea ivegarajiacaca 100 igoaretajiate. Iriatimpajia itsipajiacaca itsipajia oshequi coaretajia poneanquitsica Itariaqui.

² Iriatimpa iriguenti pincatsatirica Aapani Irioshi itsipajigari ijitanajia itsarovenajigari. Icaavintsajajigui joriojia coguitejimojiacarica. Yamanapinitiri Aapani Irioshi irosati savincaguiteri.

³ Oraqueate icononcanajaguete catsirincaiteri mana oquejetimovecari iguimaanequi icoraquetapojaque irashivantite Aapani Irioshi iconijamajatapojaque, icampojaqueri:

—Coronerio.

⁴ Yamenavaqueriqueate sorerere, itsaroanaquequeate icantiri:

—¿Taa opajita, Nomajirote?

Icantiri:

—Iquemaquempi Aapani Irioshi pamanapinitaqueriguete, aisa yamenaquempi caaviji picavintsajanti. Irootaquequeate icavintsajantaquempica.

⁵⁻⁶ Imaicaquea imaica pintigaranque iroanaque Jopequi cajemaquiterineca Shimo Peerero, incamantempi quero pincoquempa. Iriguenti imaimoque itsipa Shimo guintenitatsica quentijauqui savicaventirica iticajatiri imeshinapae.

⁷ Iroompaqueate yoanajatigui irashivantite Aapani Irioshi irida Coronerio icajemaquequeate mavite irajaanire aisa aparo coareta amitacotirica. Irida coareta caaviji ipincatsatiri Aapani Irioshi.

⁸ Oraqueate icoraquejiaquegueti icamantajiaqueriqueate maasano icanquerica irashivantite Aapani Irioshi, ariqueate itigarancajiaqueri Jopequi. Ariqueate yoajianaque.

⁹ Iroompaqueate osavincaguitetanajigueti itampaticatanaquegueti catsirincaiteri pajinigueti irarejejiguempa, iriraqueate Peerero yataitanaque jenoqui sotsiqui omen-cotapojacagueti tsovironaqui ovancaitoqui iramaneri Aapani Irioshi.

¹⁰ Itaseaque inintavetaca irishecaquempame, iroaquera itijaitanaque tequeratatiraja irishecatempaji. Ariqueate mana oquejetimovecari iguimaanegui.

¹¹ Ariqueate otanarejaguitetanaca inquite ocoraquetacopojaque quepatsiqui quejeta iniomago quitsaarentsi mana ishiticajiguequero ovegaramagoguetacagueti.

¹² Itehiteitaca taaca ipajitapae tomirishipaequitica canaaguetatsica, jeri soancaguetatsica, araguetatsica, maasano teeca irishecatempariji jorio.

¹³ Ariqueate iquemiri iquenquetsajencajitanaque icanti:

—Peerero, pincatianaque paaguetavaqueri pimetojaguetavaqueri pishecatavaquem-
pari.

¹⁴ Icanti Peerero:

—Nomajirote, aatotarite noshecataritsi, teenicate noshecatempariji icantimentanta-
jitica; tee noshecatempariji covaetantaguetatsica.

¹⁵ Iquenquetsajencatsijitanaja aisa icantiri:

—Iriraqueate icantacoqueca Aapani Irioshi: ‘Cameetsa inaque’, aatoquea pipinquir-
itsi, aato picanti: ‘Covaeguishetaca.’

¹⁶ Otsipatapojaca aisa iquejejiqueri imaica iquenquetsajencatsijitanaja, ariqueate opiacotanaja opeanaja jenoqui inquitequi.

¹⁷ Ariqueate icanti Peerero:

—¿Taate opajita ocatica?

Iroompaqueate iquenquejaquerogueti yarejerejeitapojaca itigarancajiaqueca Corone-
nerio. Icamantajitiri incajaranqui quero onaqueni itsovironaquite Shimo savicaven-
tirica iticajitiri imeshinapae.

¹⁸ Yarejerejeitapojacagueti icoacojiapojaqueri ashincaroa tsovironaqui icantajiapo-
jaqueri:

—¿Ari imaimoquempi Shimo Peerero?

¹⁹ Iriraqueate Peerero ogantagatiraja iquenquejiro yamenaqueca, icantiri Ishire
Aapani Irioshi:

—Coraquejiaque 3 shirampari icojaiaquempi.

²⁰ Pincatianaque poanaque isavi. Aato pitsarogui poguijaguijaitanaqueri, naroguen-
titarite cantajiaqueri icoraquetantajiacaca.

²¹ Yaguijitanaque Peerero ichoocaquegueti shiramparijia [itigarancaqueca Corone-
rio], icantajiapojaqueri:

—Naroguenti picojaiaque. ¿Taaqueate picoraquetashijiaque?

²² Iriatimpajia icantajiguiri:

—Iriguenti tigarancajiaquena nomajirojiate icantajitica Coronerio. Iriatimpa
iriguenti caaviji icameetsati aisa ipincatsatiri Aapani Irioshi. Maasano
joriojia ishineventajiacari. Chapinqui iquenquetsatacaapojaqueri ashivanti
comajashirentanquitsica icantiri: ‘Pincajemacaanteri Peerero pitsovironaquitequi.
Taaca incamantaguequempi pinquemisantavaquerija.’ Irootaquequeate
nocoraquetashitaque noncantajiaquitempi.

²³ Irira Peerero yoguijaajiavaqueri yonigaajiavaqueri irimaantajiaquempaca.
Ariqueate osavincaguitetanajigueti ipijaianajaqueate yoguijaguijaitanaqueri, aisa
itsipajianacari irapiguemisantarijiate ni choocajiatatsica oraniqui Jopequi.

²⁴ Osavincaguitetanajiguétiqueate aisa yarejejiapojaca Sesareaqui. Ariqueate ichooaque Coronerio, icapiocajiaqueri ijitanedia jerijia aisa itsipavijitaca, yoguijajiavaqueri Peerero.

²⁵ Iroompaqueate iquijapojigueti Peerero, itonquivojavacari Coronerio, yogueroaventavetavacari iguitiqui, iquejetacaacari irioca Irioshi.

²⁶ Cotanquitsi Peerero yogatiavajiri icantiri:

—Pincatianaje, caquintetajanatari. Aritarite noquejetajimpi aviatimpa.

²⁷ Ariquea iquenquetsatavacaaca iquijajiapojaque tsovironaquiqui, inejapojaqueri oshequi capiocajianquitsica,

²⁸ icantajiajojaqueri:

—Aviatimpajia pitsajiganatarite naatimpajia joriojia nocantashitatijaiaca, caaviji icantimentajitiro nonconoajiaquempargueti teeca iriojia joriojia aisa nonquijitajiaquerigueti itsovironaquitequi. Icantajiaque nogonoro: ‘Tee irininteroji Aapani Irioshi.’ Cotanquitsi itsatacaaquena Aapani Irioshi cameetsanijite aatonijite nopinquiritsi aisa aatoniji nocantajitsi: ‘Tee incameetsateji, covaeguishedaca.’

²⁹ Irootaquequeate imaica picajemacaantajiaquenagueti taampinaqueate nocoraquetaque, tecatsiquea nameventempaca. Imaicaqueate pincantajiguena, ¿taaqueate picajemimentajiaquena?

³⁰ Icantiquea Coronerio:

—Oraqueate chapinqui iquejetanajagueti imaica catsirincaiteri icononcanajagueti nochooaquegueti acaniqui notsovironaquitequi namanaquerigueti Aapani Irioshi, ariqueate yonigaaquena shirampari quitamarocantavaetaquequeate iitsaare.

³¹ Icampojana: ‘Coronerio, iquemaquempi Aapani Irioshi pamanapinitaquerigueti, aisa yamenaquempi caaviji picavintsajanti.

³² Imaicaqueate imaica pintigaranque iroanaque Jopequi cajemaquiterineca Shimo Peerero. Iriguenti imaimotaque itsipa Shimo guintenitatsica otsapijaqui quantija savicaventirica ticajagueterica imeshinapae.’

³³ Notigarancantajiacaca camantajiaquitimpica. ¡Ariotesaa picoraquetaque! Imaicaquea imaica acapiocajiaa ariqueate achoocatimojiaqueri Aapani Irioshi. Nonintaque pintsatacaajiaquena maasano taaca opajitapae icanquempica Aapani Irioshi.

³⁴ Iquenquetsatanaquequea Peerero icanti:

—Imaica notsamajataque yamenajiacaji Aapani Irioshi aquejetavacaajiaa, teequeate ancantashitatijaiguempaji.

³⁵ Ishineventamajiacaritarite maasano caquinteguetatsica quepatsipaequitica quericaca pincatsamajaquerica aisa icomajamajajianaca.

³⁶ Itigarancaqueroqueate Iguenquetsatsare itsatacaajiaquena naatimpajia ishiraerijia quero icotani Jesoquirishito imeshiantigueti cameetsanijite Aapani Irioshi irishineventajiacajinijite. Irira Jesoquirishito iriguentitarite Amajiromajate maasano caquinte.

³⁷⁻³⁸ Aviatimpa piquemacojiaqueritarite Joanca itsavetanquerigueti aisa iviñacajatantaquegueti. Ariqueate piquemacojiaqueri Jesoshi Nasarequitica itigarancaqueneri Aapani Irioshi Ishire jero aisa yagavejacaamajataqueri. Ariqueate iquenaquenaguetanaque manaqueate icavintsajantaguetaque yogueshijiaqueriqueate maasano yatsipetacaajiacaca ampatsini. Iparianacaroquea Garireaque, ariqueate itsitacaguetejaquero maasano iguepatsijiate joriojia. Iriguenti tsipacari Aapani Irioshi iquejetancaca.

³⁹ Naatimpajia namenamajajiaqueri maasano yantaguetaqueca Jesoshi ontaniqui Jerosarequi aisa otsipapaequi iguintenipaequi joriojia. Ariqueate imetojajiaqueri yompajacojiaqueri coroshiqui.

⁴⁰ Cotanquitsi aapojacaguetei 3 savincaguiteri ivochantajiri Aapani Irioshi itigarancajiri yonigaajianajana.

⁴¹ Cotanquitsi teequeate maasano ironigaajianajempariji, naroguentijia yonigaajianajana, naroguentijiatarite inintacaaqueca Aapani Irioshi coramani nonquemisantajiaqueri aisa noncamantajiaqueri maasano. Ipochatanajiguetei ariquea itsipajijaana noshecatacaavajari aisa nomiracaavajari.

⁴² Ariqueate itigarancajiaquena nontsavetantajiaquero Iguenquetsatsare Aapani Irioshi noncamantajiaqueri maasano caquinte, aisa noncamantajiaqueri iriotaque inintacaaque Aapani Irioshi incanque coajica quero incojiaquempa maasano, metojajianquitsica aisa tequerataca irimetojajigueji.

⁴³ Maasanotarite tsavetantirinica itsavetantajiaqueri icantajigui quericaca quemisantaquerineca Quirishito impeacotajeneri iguempevaerejia iraventaquempariguetei ivajiroqui.

⁴⁴ Ogantagatirajaguetei iquenquetsati Peerero icoraquepojaque Ishire Aapani Irioshi ichoocashirentajiaipojaqueri maasano quemisantajiavaquerica iquenquetsaqueguetei.

⁴⁵ Irira joriojia quemisantajiaatsica itsipajiacaca Peerero iponeacaguetei Jopequi mana yoajianaque intati, yamenavaqueritarite itigarancajiaqueri Aapani Irioshi Ishire ichoocashirentajiaipojaqueri teeca iriojia joriojia.

⁴⁶ Iquemajiavaqueri iquenquetsatantajianacaroquea otsipapae quenquetsatsarentsi teeca intsajiavetempaji aisa ishineventamajajianacari Aapani Irioshi, icantajigui:

—Yoganejencamajata Irioshimajaca.

⁴⁷ Iquenquetsatanaquequea Peerero icanti:

—Imaicaquea imaica ¿arimpate incantimentajiaqueri iriviñacajiaquempaguetei? Aritarite iquejejiacaji aatimpajia joriojia ichoocashirentajiacajiguetei Ishire Aapani Irioshi.

⁴⁸ Ariquea yoviñacajatacaantimentajiacari ivajiroqui Jesoquirishito.

Ariqueate iriatimpajia icantajiaqueri Peerero inintajiaque inchoocataje aparopae savincaguiteri.

11

Iquemacojitavaqueriguetei Jerosarequi quemisantajiaque teeca iriojia joriojia

¹ Ariqueate irira itigarancanejia Jesoshi jerijia irapiguemisanterite guintenijiatsica Joreaqüi quemacojiaqueri teeca iriojia joriojia itsavetantimojianaqueriguetei Iguenquetsatsare Aapani Irioshi ariqueate quemisantajiaque.

² Iroompaqueate yoanajiguetei Peerero Jerosarequi, icatsimajencajiavaqueri irapijoriojiate quemisantajiaatsica, icantajigui:

³ —¿Quero ocotaca poashitantajianacarica teeca iriojia joriojia iriraquea teeca intotsaiquijiquero ichonquimashi pishecatacojiaquitari?

⁴ Ariqueate yoguisotoanaqueneri Peerero icamantaqueri maasano, icantiri:

⁵ —Iintsija nontsavetantero. Naatimpa nochoocaqueguetei Jopequi namanaqueri Aapani Irioshi. Ariquea oquejetimovequena manaca noguimaaca namenavaquero quejetaca iniromago quitsaarentsi oponeapojaca jenoqui inquitequi, yoishojiquero ocaramagopaequi. Ariquea aguijitapojaque naatimpaqui.

⁶ Namenamajatavaquero namenaguequeri taaca ipajita tetantacaro. Namenaguequeri itehiteitaca canaaguetsatsica viratsipae aisa tomirishipaequitica. Itejiacaro aisa soancaguetsatsica aisa araguetsatsica.

⁷ Ariqueate iquenquetsajitanaque, icanquena: ‘Peerero, pincatianaque paaguetaqueri pimetojaguetaqueri pishecatavaquempari.’

⁸ Cotanquitsi naatimpa nocantavetacari: ‘Nomajirote, aato noshecataritsi, teenicate noshecatempariji icantimentantajitica; tee noshecatempariji covaetantaguetsatsica.’

⁹ Iquenquetsatsijitanaja aisa quenquetsatanquitsica inquitequi icanti: ‘Irraqueate icantacoqueca Aapani Irioshi: “Cameetsa inaque”, aatoquea pipinquiritsi, aato picanti: “Covaeguishetaca.”’

¹⁰ Otsipatapoja iquejetaquena imaica iquenquetsatacaaquena, ariqueate opianaja opeanajaqueate jenoqui inquitequi.

¹¹ Teequeate osamaniteji arejerejeipojaca tsovironaqui nomaantaca 3 shirampari poneanquitsica Sesareaqui itigarancajitaqueca camantenaneca.

¹² Ariqueate itigarancaquena Ishire Aapani Irioshi icanti: ‘Pija poguijajianaqueri, aato pitsaroguitsi.’ Ariqueate noanaque yoguijaguijaiquenaqueate irira 6 napiguemisantariteni, ariqueate narejerejeipojacagueti noquiijaquiipojaque itsovironaquitequi irira cajemacaantaquenaca.

¹³ Iriatimpa icamantajiavaquenaqueate yonigaacarigueti irashivantite Aapani Irioshi icatiimotapojacari itsovironaquitequi icantiri: ‘Pintigarancueja oajiananquitsineca Jopequi cajemaquiterineca Shimo Peerero.

¹⁴ Irioqueate camantajiaquitepine quero pincojiaquempani aviatimpa jerijia maasano pignonorjia cameetsanijite irimeshijajempinijite Aapani Irioshi.’

¹⁵ Iroompaqueate noquenquetsatacanaquitatiguiri icoraquepojaque Ishire Aapani Irioshi ichoocashirentajiapojiri iquejetacaajiacajigueti aatimpajia ichoocashirentajiacajigueti iroaqueragueti.

¹⁶ Noquenquejapojajiroqueate icanqueca Amajirote: ‘Irirampani Joanca iviñacajatantaque oja, cotanquitsi inchoocashirentajiaipojaquempi Ishire Aapani Irioshi quejetaca iroviñacajatantajitaquempiri Ishire.’

¹⁷ Icavintsajajiaqueritarite Aapani Irioshi iquejetacaajiacaji aatimpajia aquemisantajiguirigueti Amajirote Jesoquirishito. ¿Arimpate noncanqueri Aapani Irioshi aatonijii icavintsajajiguiri?

¹⁸ Iroompaqueate iquemajiavaquitigui irapiguemisantarijiateni iquemisanta-jianaque, ariqueate ishineventajianacari Aapani Irioshi icantajiguiri:

—Caavijisano icavintsajanti Aapani Irioshi, irootaquequeate icavintsajantajiacarica aisa teeca iriojia joriojia cameetsanijite incantashitatijaianaquempa, aatonijite imetojajitsi, ogantaga incoguitempani.

Quemisantajatsica Antioquiaqui

¹⁹ Oraqueate imetojajitaquerigueti Ishitivano ariqueate omapocanaca yatsipetacaajitacari quemisantajatsica, ariqueate iporocajianaque ivarajajianaca yoajianaque Penishiaqui, Tsiperequi aisa Antioquiaqui. Iriguentiqueate iquenquetsatimojianaji joriojia icamantajiaqueri quero icota Aapani Irioshi imeshiantigueti.

²⁰ Iconoagarantajiacaqueate porocajiananquitsica iponeajiaca coramani Tsiperequi aisa Shirenequi. Iroompaqueate yarejeipojacagueti iriatimpajia Antioquiaqui iquenquetsatacaajiaqueriqueate aisa guiriegojia, itsavetanquero Quenquetsatsarentsi Oganejencatatsica tsavetacotaquerica Amajirote Jesoshi.

²¹ Iriguentitarite agavejaciaqueri Amajirote iquemisantantajiacarica oshequini, yovashiantajianajiro ishineventajiavetaca, irioqueate iquemisantajianaji Amajirote.

²² Ariqueate iquemacojiaqueri quemisantajatsica guintenijatsica Jerosarequi itigarancajiaqueri Verenave ontaniqui Antioquiaqui.

²³ Iroompaqueate yarejetapojacagueti inejajipojaqueri icavintsajajiaqueri Aapani Irioshi, ishinevaetanaca icantajiguiri:

—Imaica pincoguitempani pinguemisantamajajiaqueri Amajirote, pinetsanajiaque-roja maasano inintaguequeca. Aatoqueate povashiantajiguiritsi.

²⁴ Irira Verenave caaviji icameetsati ichoocashirentamajataqueri Ishire Aapani Irioshi, aisa caaviji iquemisantamajatiri, irootaquequeate iquemisantantajiacarica oshequini caquinte.

²⁵ Ariqueate yoanaque Verenave Tarisoqui icoaqueri Saoro, inejapojajiri icantiri:
—Jame Antioquiaqui.

Ariqueate yoayoaitanaque.

²⁶ Ariqueate ichoocajiapojaque aparo ajagantsi, icapiocapinijiaca itsatacaajiaqueri oshequini quemisantajiatsica. Aritarite oraniqui Antioquiaqui imapocajitaqueri icantajiqueri quemisantajiatsica “quirishitiano”, ocanti guijatacotirica Quirishito.

²⁷ Oraqueate choocatirajaguete Verenave aisa Saoro Antioquiaqui icoraquejiaque tsavetantajiatsica iponeponeica Jerosarequi.

²⁸ Chooca aparo icantajitica Agavo. Iriatimpa icatiimodianacariqueate, ariqueate iquenquejacaqueri Ishire Aapani Irioshi icanti irantsipejitaquemparato tasetsi onsi-tacaguitejanaquemparato maasano quepatsi. Ariqueate imajirontaguete Caraorio, onet-sanatanaca icanqueca Agavo.

²⁹ Iroompa iquenquejajiaquequea quemisantajiatsica incapiocajiaqueneri imentaquipae cameetsaniji impacaantajiaqueri irapiguemisanteriteni guintenijiatsica Jore-aqui. Apaniropae yojocagarantajiaque yashintajiacaca. Iriraqueate ashintamajianquitsica irioqueate jocamajianquitsi. Iriraqueate teeca irashintamajajiguempaji capichajipae yojocajiaque.

³⁰ Ariqueate yojocajiaqueneri Verenave aisa Saoro irajaianaqueneri quempoguijajiguirica irapiguemisanteriteni Jerosarequitica.

12

Erorishi icatsimamajajianaqueri quemisantajiatsica

¹ Ariqueate irira majirontatsica Erorishi* imapocanaquero icatsimamajagarantajiaqueri quemisantajiatsica.

² Imetojacaanqueri Santiago iriguentijeguite Joanca, iroguenti ijitorejantajitacari cotsiro.

³ Ariquea iriatimpa itsanirotaque ishineventamajajiacari joriojia, yaa-caanqueriqueate Peerero aisa. Iro yaacaantantacarica savincaguiterpae ishecatantajitaroca pan teeca onconoguemparoji anempoantaca.

⁴ Yoguijacaantaqueri santanaqui, itigarancajiaque 16 coaretajia amenajiaquerineca. Ijivetaca avisanaqueguete Paashicoa iramacaantaqueri icapiocajiacaguete maasano incatsimatimentajiaquerinijite.

⁵ Ariqueate yoguisantajiaqueri santanaqui, cotanquitsi iriraqueate quemisantajiat-sica igantaga yamanajiaqueri Aapani Irioshi yamanacoventajiaqueri Peerero.

⁶ Apanivani tsiteniri intsitenitacotanaje, ariqueate osavincaguitetanaqueguete iramacaantaquerimequeate Erorishi. Imaanaque Peerero, niganqui yoajjivetacari mavite coareta, ishiticacotantajiavecari mavite cavorejatsari ijempequiqui. Iriraqueate itsipapae coareta iticaajjivetaca sotorontsiqui.

⁷ Ari imapocapojaca irashivantite Amajjirote, otsirencanaca intsompogui santanaqui. Iriraqueate ashivanti ichagatapojaqueri Peerero imerequiqui, itinajaqueri, icantiri:

—Pintinajanaque taampina.

Ariqueate mana oishorejaguetanaca cavorejatsaripae ishiticantajjivetacarica.

⁸ Ariquea icanqueri ashivanti:

—Pinchompimashitacotanajempa, pincaviguititanajempa.

Iroompaqueate yagacaguete, icantsitariqueate aisa ashivanti:

—Pampinaicanajemparato pimorenatsite quitsaarentsi, caacate poguijatanaquena.

⁹ Icatianaca yoguijatanaqueri, cotanquitsi tee intsateji arimajaca yaanajiri irashivantite Aapani Irioshi, mana oquejetimotacari yoguimagaguete.

* **12:1** Iriratica **Erorishi** irio icantajitica Erorishi Aguiripa I, irio ishaine iriquetica Erorishini majirontanquitsica ivoaqueguete Jesoshi (Mt. 2.1).

¹⁰ Iroompaqueate isotoanajigueti iriqueti yavisajianaque coaretapae amenajiavecarica isantanatacojigueta, ariqueate iquejianaqueri choocajianquitsica ontaniqui. Ariquea yarejetapojacaro otsipa sotomorontsi yashitantajitacaca cavorejamentari agasotoncacagueta quenavoquirontsiqui ochoocaguetaquegueti tsovironaquipae. Ariqueate mana inchiquiojitsitaqueate ashirejashitanaca. Isotosotoitanaque yoajianaque yagatejiaquerogueta otsipapoqui, ariqueate ipeapitsatajari ashivanti.

¹¹ Iriraqueate Peerero isavigarejacotanajigueta icanti:

—Iroosacanicate arimajasacanicate itigarancaquenari Aapani Irioshi irashivantite, yoguisotojaana aatonijite imetojacaantana Erorishi, aisa aatonijite yatsipetacaajianatsi napijoriojiateni.

¹² Ariquea yamenamajavetanajagueta teequeate inchoocatajeji santanaqui, yoanaji otsovironaquitequi Maria iriniro Joanca pajitatsica aisa Maricoshi. Ariqueate ichoocajiaque oraniqui irapiguemisantarijiateni icapioacajia yamanajiaqueri Aapani Irioshi.

¹³ Itinquiajojaqueroqueate ashitacomentontsi, ariquea ocoraqueque aajanirentsi icantajitica Irore amenaquitiri taaca ipajita.

¹⁴ Ariqueate oquemapojaqueri iriguenti quenquetsatanquitsi Peerero oshinetanacaqueate, cotanquitsi teequeate ashirejacoteriji, mana opianaca intati oshianacaqueate ocamantajiaqueri chooca Peerero sotsiqui.

¹⁵ Iriatimpajia icantajiguero:

—Mana pishoncacotaca intati.

Cotanquitsi ocanti iroatimpa:

—Arimaja.

Iriatimpajiaqueate icantajiguero:

—Iroosacanicate, iriocajate irashivantite Aapani Irioshi quempoguijirica.

¹⁶ Cotanquitsi iriatimpa arimpaqueate itinquianaquero ashitacomentontsi. Iroompaqueate yashirejacojiavecarigueta yamenajiguero iriguenti Peerero, mana yoajianaque intati.

¹⁷ Iriatimpa icantiri vacoc cameetsanijite irimajerejianaquenijite. Ariqueate icamantajiaqueri quero icotajirini yoguisotojairigueta Aapani Irioshi santanaqui. Aisa icantajiguero:

—Pincamantajiguero Santiago,[†] jerijia maasano atsipajia apiguemisantarijiateni.

Ariqueate yoanaque Peerero otsipaqui tsovironaqui.

¹⁸ Iroompaqueate osavincaguitetanajigueta itinajaviavetanajagueta coaretajia yamenavetari cajaraguiteni Peerero. Itsaroajianaque icantavacaajianacaqueate:

—¿Querocate yoanaqueni?

¹⁹ Iriraqueate Erorishi itigarancajiaqueri itsipa coaretajia incojiaaquiteri, cotanquitsi yamenajiavepojari cajaraguiteni. Ariqueate icoacojiaqueri quempoguijaviavetacarica, ariqueate imetojacaantajiaqueri. Ariqueate yojocanajiro Erorishi Jorea, yoanaque Sesareaqui, ariquea iguintenitaja ontaniqui.

Imetojaquegueta Erorishi

²⁰ Iri Erorishi icatsimajiaqueri guintenijiatsica Tiroqui aisa Shironequi, teequea capichaji incatsimajiguero, cotanquitsi iriatimpajia iquemavacaajia iroajianaque irogameetsajiajateri, iriotarite majirontatsica oponeacagueta isheca. Iriqueti yoguishinejiajojaque iramajirore icantajitica Verashito cameetsanijite irionijite amitacojiaquerine cantajiaquerineca inintaque irogameetsajiajateri.

[†] **12:17 Santiago.** Iricatica Santiago, tee irio iriguentijeguite Joanca imetojacaantaqueca Erorishi (otsapa 2), iricatica iriguenti iriguentijeguite Jesoshi (Mt. 13:55; Jn. 7:3-5; Ya. 1:14). Irioquea amenaqueca imaica jivaquerica quemisantajiatatsica Jerosarequi (Ya. 15:13; 21:18; Ga. 1:19; 2:9). Irio tioncaqueroca paperi icantajitica **Santiago**.

²¹ Ariquea irira Erorishi icajemacaantajiaqueri querocaca savincaguiteri incoraquejiaque irogameetsantavacaajiajempaquate. Ariquea aapojaca incoraquebantajiaquempaca iquitsaatanacaquate Erorishi iitsaare iquitsaatapinicaca icapioacajiaqueti. Ariqueate incoraquejiaque isavicaque iriatimpa isavicampiniquegueti iquenquetsatapiniquegueti, ariqueate iquenquetsatacaajiaqueri.

²² Ariqueate iquemajiaqueri capioacianquitsica icajemajianaquequate ishineventajianacari icantajiguiri:

—Irinta quenquetsatanquitsica teenicate irio caquinte, iriguenti irioshitatsica.

²³ Iroompaquate iquemavaquitigui Erorishi yaventacomajatatiganimaja tee incantamajateji cameetsa, tee incanteji: “Naroguenti caquinte, choocatarite apaniro Irioshimajaca agavejamajatatsica.” Iroompaquate iquejetanaquerogueti imaica incoraquebapojaque irashivantite Amajirote yashinoncajacaanacari. Ariqueate iquenaque yashinoncajanaca iquenitanaqueriqueate quenitsi, ariquea imetojanaque.

²⁴ Oraquate Iguenquetsatsare Aapani Irioshi arimpaquate ovarajacovaetanacani otsitacaguitejacovaetanaca maasano, itsavetantajitanaquero.

²⁵ Iriiraquate Verenave jeri Saoro iteroncaquerogueti incoraquebashaqueca Jerosarequi ipijaianaja Antioquiaqui itsipajianacari Joanca Maricoshi.

13

Yoajianaquegueti Verenave aisa Saoro intsavetantajiguiri Amajirote Jesoshi

¹ Iriira quemisantajiatatsica guintenijiatatsica Antioquiaqui iconoagarantajiacaca iriguenti tsavetantajiguira canquerica Aapani Irioshi, itsipa iriguenti tsatacaantiroca Iguenquetsatsare Aapani Irioshi. Jeri irica: Verenave, Shimeone (icantajitica Quisaari), Iroshio Shirenequitica, Saoro, jeri Manaene (itsipataca majirontatsica Erorishi* iquenquevarijiguigueti).

² Ariqueate icapioacajiacaca iriatimpajia yovashianquitiro isheca, iriguenti isavicaventajiaque itsarotentajigari Amajirote. Ariqueate icantajiguiri Ishire Aapani Irioshi:

—Poashitenari Verenave jeri aisa Saoro irisavicaventaroniji nocajemimentajiaquerica.

³ Iroompaquate yovashianquitirogueti isheca, yamanajiaquerigueti Amajirote, ipamijiaqueriqueate Verenave jeri Saoro icantajiaqueri:

—Pija imaica.

⁴ Ariqueate itigarancajiaqueri Ishire Aapani Irioshi yoajianaque ontaniqui Sereoshi-aqui quentijaqui. Itehiteitanaca yaacojianaqueri tampija yoajianaque inirovogorequi icantajitica Tsipere.

⁵ Iroompaquate yarejerejeipojacagueti yagatacojiapojaque guinteninintsiqui icantajitica Saramina, yoajianaque shinagogapaequi icapioacantapinijiacaca joriopae itsavetantajianaquero Iguenquetsatsare Aapani Irioshi. Itsipatanacariquate aisa Joanca† yamitacojiaqueri.

⁶ Ariqueate itsavetantajianaquero itsitacaguitejajianacaro guinteninintsipae ontaniqui Tsiperequi, iroompa yarejejiaca Paposhiqui. Ariqueate inejajiapojiaqueri amataatsica aventaroca iragavejane ampatsini, icantamampeaca: “Jero canquenaca Aapani Irioshi.” Iriatimpa iriguenti jorio icantajitica Varejesoshi, ipajijitajiri aisa Erimashi.

⁷ Iriguenti itsipataca majirontatsica Sergio Pavoro, caaviji itsamajati. Iriira Sergio Pavoro ininquetarite inquemisanquero Iguenquetsatsare Aapani Irioshi icajemacaantajiacarica Verenave, Saoro cameetsanijite intsatacaajiaqueri.

* **13:1** Iriratica **Erorishi** irio icantajitica Erorishi Antipashi; pamenero tioncanquitsica isavivanaqui otsapaqui Irc. 3.1. † **13:5 Joanca**. Irioquea icantajitica Joanca Maricoshi, mavitetatsica ivajiro. (Pamenero 12.12, 25; 13.13; 15.37-38.) Iriguenti ijitane Verenave (Cor. 4.10).

⁸ Cotanquitsi Erimashi, irira aventaroca iragavejane ampatsini (irootaquetari oncanque ivajiro oguipitsoquerogueti), iticaticatacovetavacariqueate yaacanatanantajave-tavacarica aatonijite iquemisantajiguiritsi majirontatsica.

⁹ Iiraqueate Saoro (pajitatsica aisa Paavoro) ichoocashirentamajatanaqueri Ishire Aapani Irioshi, ariquea yamenanaqueri intati sorere,

¹⁰ icantiriqueate:

—Aviguenti amatavijantatsica guijatacotirica ampatsini pantaguishetantacaroca co-vaeguisherentsi, manaquea pimanintaquero maasano iroomajatatsica. Ogantaga pogaaquero itsatacaantaqueca Amajirote. ¿Aatempa povashiantiro pantanaqueca?

¹¹ Imaicaqueate incatsimatimenquempiro Aapani Irioshi, pishamponcajatanaque-queate. Osamanitanaque aatoqueate pamenajitsi, ompitsequimotaquitempiqueate.

Ariqueate taampinaqueate opitsecacotanaqueri, teequeate iramenajeji. Ipamipami-guitetanaquequeate intati, ininquequeate quericampa acatsatanajerinca.

¹² Ariqueate yamenaqueriguetei Sergio Pavoro iquemisanqueri Quirishito, manaquea yoanaque intati iquemaqueguetei itsatacaantajiaqueca itsavetanqueriguetei Amajirote.

Yoajianaqueguetei Paavoro aisa Verenave Antioquiaqui choocatantacaroca Pishiria

¹³ Iiraquea Paavoro aisa itsipajiacaca itejianaca Paposhiqui, iquenajatacojianaque yoajianaque Perejequi choocatatsica Pampiriaqui. Irirampani Joanca ipiapitsatanajari yoanaji Jerosarequi.

¹⁴ Iriatimpajia yarejetapojacaguetei Perejequi, yavisanaque aisa yoajianaque on-taniqui otsipaquei Antioquiaqui, ora Pishiriaquitica. Ariqueate aapojacaguetei saavaro imagorejantajitaca iquijaquijaitanaque shinagogaqui icapiocantajiacca joriojia, isavica-jiaipojaquequeate.

¹⁵ Ariqueate iteroncajitaquerogueti yapatsajavantajitaquerogueti itionca-cotanaqueca Moishishini aisa itioncacojianaqueca tsavetantajiguirica Aapani Irioshi, iriraqueate jivajianquitsica shinagogaqui icapiocantapinijiacaca icamantacaantajiaqueri Paavoro jeri Verenave icampojaqueri:

—Napijoriojiateni, choocaguetei pinintajiaqueca pincamantajiaquena cameetsanijite pintampishitacaimentajiaquenanjite, iintsija pincamantajiguena.

¹⁶ Icatianaqueate Paavoro icanqueri vacoc cameetsanijite irimajerejianaque, ican-tajiguiri: “Pinquemisantajiaquena shiramparijia ishiraerijia, aisa maasano itsipa-jia pincatsajiguirica Aapani Irioshi.

¹⁷ Coramani Irioshite ishiraerijia icoguiajiaqueriquea avaesatiniteni, yoshequiamatanaqueri iguintenijavetacaguetei Ejepitoqui. Iroompa yonigaajiaqueri itampishica, yaajianajiri.

¹⁸ Yatsiperejacojiacariqueate Aapani Irioshi ovegarataca 40 ajagantsi ichoocajiaque-gueti oquitamampororoipojaqueguetei.

¹⁹ Ariqueate yamitacojiaqueri yagavejacaajiaqueri iteroncajiaqueri oshequini guin-tenijiatatsica Canaanequi, yaapitsajiaqueri iguepatsite, irioqueate yojocajiajini avaesa-tinijiateni. Iiraqueate caquinteguetatsica teroncajianquitsica ovegarajiacca iguenquet-satsarepae 7.

²⁰ Ariquea ocaratapojaque 450 ajagantsini maasano ocatita.

“Iroompa icanque Aapani Irioshi inchoocataque joese comajamajiaquerineca. Ariquea imetojavetaca, cotanquitsi choocaqueate piaguetajarica irosati aapojacaguetei ichoocaqueguetei Samoirini irira tsavetantirinicca Aapani Irioshi. Irioqueate carapoja-queroca.

²¹ Iroompa iriatimpajia icantajiaqueri Aapani Irioshi inintajiaque inchoocataque imajirojiate. Ariquea Aapani Irioshi iquemisantajiaqueri ipeacaantacarica imajirote Saoroni irijaniteni Quishini ichoviquini Vejamineni. Ariquea imajirontaca 40 ajagantsi.

²² Iroompa Aapani Irioshi yovashiantajiri Saoroni, irioqueate ipeacaaja imajirojiate Taavini irijaniteni Isaini. Ariqueate icamantacoqueri icanti: ‘Namenaqueeriquea Taavi irijanite Isai, noshineventamajatacari, irantaguequeroquea iriguenti maasano noninquca.’

²³ Imaica inetsanataquero Aapani Irioshi icanqueca coramani, itigarancaqueriquea acaniqui Ishiraeriqui irira Aantavanquitsica ichoviquiqueca Taavini, irioquea Jesoshi.

²⁴ Tequeratagueti incoraquete Jesoshi intsavetante, iriqueti parianacaro Joanca itsavetantaque icantajianaqueri maasano ishiraerijia incantashitatijianaquempa irovashiantajianaquero yantajiguirogueti teeca oncameetsateji iriviñacajatacaantajianaquempa.

²⁵ Ariqueate pajinigueti interonquero Joanca yantaqueca icantanaque: ‘¿Taa pijique-naji? Tee naroguenti, irioquea impoitapojenaneca. Iriatimpa caaviji yanaaquena, aatotarite noquempejitaritsiquea iriatimpa nompeaquempame amiquerineca noishore-jacoquerime igaviguitire.’

²⁶ “Imaica nonintaque noncamantajiaquempiqueate aviatimpajia nogonorojia ichoviquijianaqueca Averaameni, aisa aviatimpajia teeca pijorijoigueji pincat-sajiguirica Aapani Irioshi, aroguenti itigarancacajiro ocatica Quenquetsatsarentsi iraantavajajica.

²⁷ Maasano guintenijiatsica Jerosarequi, aisa imajirojiate teenicate intsajigueni-cate iroguenti icoraquetashitaque Jesoshi irimeshijajajaji, teenicate inquemeroji itioncacotaqueca tsavetantiririca Aapani Irioshi yapatsajavantapinijiavetacarogueti savincaguiteri imagorejantajitaca. Cotanquitsiqueate imetojacaantajiaquerigueti onetsanatanaca itioncacojiquerogueti.

²⁸ Teequeate onchoocavetempaji onquenantapojempaca irimetojimentantajitaque-mparica, cotanquitsiqueate arimpaqueate icantajianaqueri Pirato: ‘Pimetojacaanter-ishinete.’

²⁹ Iroompa inetsanajiaquerogueti maasano itioncacojitaquerica, imetojaquegueti ariqueate yogaguijitaqueri coroshiqui, yoguijaajitaquitiri omoroqui.

³⁰ Imetojamajavetaca, cotanquitsi Aapani Irioshi ivochantajiri.

³¹ Ariqueate ovegaratanaca oshequi savincaguiteri yonigaaguetajari oguijajianaque-rica iponeacagueti Garireaquei yoanaquegueti Jerosarequi. Iriojitarite imaica tsave-tantajajirica icamantajiaqueri caquinte.

³² “Imaica nocamantajiaquempiro aviatimpajia oguishinejantatsica: oratica icantaji-aquerica Aapani Irioshi avaesatinijiate,

³³ inetsanacajiroquea aatimpajia ichoviquijianaqueca, yovochantajiritarite Jesoshi. Iriotaque itioncacojique Saremoqui 2 icanquegueti Aapani Irioshi:

‘Aviatimpa aviguenti Irijani,

ocatica savincaguiteri aviro nashimajaca nirijanite.’

³⁴ Icanquetarite Aapani Irioshi coramani irovochantajeri Jesoshi aatonijite avejancatsi itsino. Aritarite ocanque itioncacojiqueca ocanti:

‘Aviatimpajia nonetsanaquempiro maasano nocanquerica Taavini.’

³⁵ Aisa itioncacojiquero otsipaqi [Saremo] ocanti:

‘Aato pishinetiro avejanquempa itsino Pigomajamajare.’

³⁶ Iiraqueate Taavini yamitacojiaqueri igonorojia coramani, yagaqueneri maasano in-intacaaquerica Aapani Irioshi, cotanquitsi coajica imetojanaquegueti iquitajitajigui-ri itsipajijaari avaesatinijiate, ariquee yavejancanacaqueate.

³⁷ Cotanquitsiqueate iriraticaquea ivochantajica Aapani Irioshi teequeate iravejanqui-matempaji.

³⁸ Irootaquequea, nogonorojia, nonintantacaca pintsamajiaque iriraquea Jesoshi, iriguenti agavejatsi irishejiajajiro aguempevaerejia, irootaque notsavetantimojiaque-mpi.

³⁹ Ora itioncacotaqueca Moishishini teenicate agavejeji ogameetsajiajeri iriraqueate oguijatacojiaqueroca, teequeate omeshiajigueriji. Cotanquitsi irira aventajigarica Jesoshi irimeshiajiajeri irogameetsantajiajeri.

⁴⁰ Shoshoh, inchiqiojitaja piquejejigaritsi irirajia icantacojiaqueca Aapani Irioshi itioncacaquerigueti tsavetantajiguirica icanti:

⁴¹ ‘Pamenajigue aviatimpajia shirontimentantatsica, mana poajianaque intati, pimpeajiaquempauea maasano, irooriji choocatirajampigueti nantaquequea oacaantantatsica intati, cotanquitsiquea oratica nantaqueca aato piquemisantajiguiro inchoocajiavequempagueti camantajiavequempineca.’ ”

⁴² Iroompaqueate isotosotoitanajigueti shinagogaqui, irirajia quemisantajiaquerica icantajiavaqueri:

—Pimpiajeja pinquenquetsatacaajiajena aapojajempagueti otsipa saavaro imagorejantajitaca, pinquenquetsatacotajero oatica.

⁴³ Iroompaqueate icatiajianaja Paavoro jeri Verenave yoguijaguijaitanaqueri oshequini joriojia, jerijia teeca iriojia joriojia guijatacojiguiroca itioncacotanaqueca Moishishini. Ariquea icantajiaqueri ogantagaja inquemisantamajiaqueri Jesoshi.

⁴⁴ Ariqueate aapojajagueti saavaro imagorejantajitaca icapiocajianajaqueate oshequini caquinte, icoraquetashijiaqueri Paavoro jeri Verenave iquemisantajiaqueri itsavetantajiaquerogueti Iguenquetsatsare Amajirote. Tee iroshequigueji irira teeca incoraquejigueji.

⁴⁵ Cotanquitsi irira joriojia iroompaqueate yamenajiavaquerigueti icapiocaventajianacari ocanquitiri shirec icatsimajianaquequeate. Ariqueate inijashijianacari Paavoro icantajiguiro maasano:

—Aatoqueate piquemisantajiguiritsi, mana yamatavijajiaquempi intati.

⁴⁶ Irira Paavoro jeri Verenave tee intsaroajigueji arimpaqueate iquenquetsajianaque icantajiguiro:

—Aviquetitarite nocoraquetashijiavetaca iroaqueragueti nontsatacaajiaquem-pirome Iguenquetsatsare Aapani Irioshi, aviguentitarite joriojia, cotanquitsi teequeate pishineventajiaquemparoji, teecampa pinintajigueji pincoguitempani panijajiaje. Imaicaqueate iriguenti noashijianaje nontsatacaajiaqueri teeca iriojia joriojia.

⁴⁷ Irootarite icantajiaquenaca Nomajirote, icanti:

‘Nopeacaquempi tsivotacojiguirica caquinteguetatsica, cameetsanijite pintsatacaajiaqueri quero nocotaca nomeshiantigueti, pintsitacaguetejanaquemparo maasano quepatsi ovegaraguetaojacagueti.’

⁴⁸ Iroompaqueate iquemajiavaquitiguiro teeca iriojia joriojia ishinejianaca icantajianaque:

—Oganejencamajata Iguenquetsatsare Amajirote.

Ariqueate iquemisantajiaque maasano inintacajiaqueca Aapani Irioshi coramani incoguitempani inconoajiaquempari jenoqui inquitequi.

⁴⁹ Arimpaqueate ovarajacotanacari Quenquetsatsarentsi tsavetantaquerica Amajirote iquemajiaquero maasano guintenijatsica oraniqui.

⁵⁰ Cotanquitsiqueate irirajia joriojia iquenquetsatacaajiaqueriqueate imajirojiate Antioquiaquitica jerojia manquigarentsijia anaantaguetatsica ora caavijica oquemisantamajiavetari Aapani Irioshi, inijashijiacari Paavoro aisa Verenave. Ariquea iroompaqueate iquemajiavaquitiguiro iriatimpajia icatsimajiaqueri Paavoro aisa Verenave itigarancajajiri aatoniji ichoocataji iguinteniqui.

⁵¹ Iriatimpajia ipanerejamajajianajiroqueate quepatsivane yagaticacojiaquerica cameetsanijite iroonijite iramenantajiaquempargueti intsajiaqueri aato ipiajatsi, teenica irinintajigueji inquemisante. Aritaquequeate yoajianaque Iconioqui.

⁵² Cotanquitsi iriraqueate quemisantajatsica Antioquiaquitica ishinejianacaqueate, ichoocashirentamajianaqueri Ishire Aapani Irioshi.

14

Paavoro jeri Verenave ichoocajiaque Iconioqui

¹ Ariqueate yarejejiapojaca Iconioqui iquijajipojaquequeate shinagogaqui icapio-cantajiaque joriojia iquenquetsajiaque. Iquemisantagarantajiaque oshequini joriojia jerijia aisa teeca iriojia joriojia.

² Cotanquitsi irira joriojia teeca irinintajigueji inquemisantajigueji iquenquetsatacaajiaqueri teeca iriojia joriojia yagavejajianaqueri, irootaquequeate itsititanta-jianacaca icatsimajianaqueri quemisantajatsica.

³ Cotanquitsiqueate Paavoro, Verenave teequeate intsaroajigueji arimpaqueate itsavetantajianaqueri Amajirote. Osamani ichoocajianaqueni itsatacaantajianaque. Iriguentitarite agavejacaqueri Aapani Irioshi yantantajiacaca teeca irinejajiteji cameetsanijite iramenimentajiaquerinijite iriguenti tigarancaqueri Aapani Irioshi.

⁴ Cotanquitsi iriraqueate guintenijatsica Iconioqui teequeate inquemavacaajiana-jempaji. Iconoagarantajiaqueate iriguentijia ishineventajiaque joriojia. Choocaquea aisa shineventajiacarica itigarancanejia Jesoshi.

⁵ Ariqueate irira joriojia jerijia teeca irijorijoigueti iquemavacaajiaque itsipajiacari imajirojiate icantajigui:

—Jameshiatsi ancatsimajigueri antsinacajigueri.

⁶ Iroompaqueate iquemacojiaqueriguete ishiashiaitanaca yoajianaque Irishitiraqui aisa Terevequi choocaguetatsica Iricaoniaqui, jero aisa ovegaraguetapojacagueti Iricaonia,

⁷ itsavetantajianaquero Quenquetsatsarentsi Oganejencatatsica.

⁸ Ontaniquiqueate Irishitiraqui inejajipojaqueri savicaque irira magoviroshiri ogantaga ivoacoquero iroaqueragueti imagoviroshica.

⁹ Iriatimpa iquemisantamajatavaqueri Paavoro iquenquetsataquegueti. Iroompaqueate yameniqueriguete Paavoro yamenamajatanakeri itsatantacarica arimaja itsataque iragavejaque Aapani Irioshi irogueshitajeri.

¹⁰ Icajemacotsitariqueate:

—¡Pincatiamajatanajeja!

Icatianacaqueate catic yanijitanaji.

¹¹ Irirajiaqueate capiocajianquitsica yamenajivaqueriguete yogatijiri Paavoro icantajianaque inirojencani iguenquetsatsarejiaqui Iricaoniaquitica icantajigui:

—Yaguijijipojaque irioshijia, caquintejiapojaque.

¹² Irira Verenave icantajiaque iriguenti Seoshi,* iriraquea Paavoro icantajiaque iriguenti Eremeshi, iriguentitarite quenquetsamajatanquitsica.

¹³ Oraqueate teemporo itsarotentantajitarica Seoshi ochoocaque ovegaraguetapojacagueti otantotacagueti Irishitira. Iriraqueate saserorote quempoguijiroca teemporo yamacaantajiaquequeate caapironcaaripae iconconatacaaguecari ochotentegapae itsipajipojacari oshequini caquinte. Inintajiavetaca irijitorejajiaquenerime caapironcaaripae, irojocaquenerime Verenave jeri Paavoro.

* **14:12 Seoshi** (Zeus) aisa **Eremeshi** (Hermes) iriguenti ivajirocae irioshivijirentsipae itsarotentajiacaca guiriegogija. Irira Iromaquitica ipajitaqueri Seoshi **Júpiter**, ipajitaqueri Eremeshi **Mercurio**. Icantajiaque irira Seoshi iriguenti irioshi anaantamajatsica, irira Eremeshi icantajiaque iriguenti itigarancane irioshipae, itsavetacotaquero icantajiaquerica.

¹⁴ Cotanquitsiquea iquemajiavaquegueti Verenave jeri Paavoro itigarancanejia Jesoshi, iperejacojianaca iitsaare iramenimentajiaquerinijite teequeate irinintajigueti intsaromentajiaquempari, teequeate irinintajigueti irijijiaqueri iriguenti irioshi. Ishi-ashijianacariqueate icapiocajiacagueti icajemajianaque icantajigui:

¹⁵ —Aato piquejejiguiro imaica. Aato pitsaromentajigana. Naatimpajia ariqueate noquejejaquempi aviatimpajia, caquintetarite nonajiaque. Iroguenti nocoraquetashijiaque noncamantajiguempi povashiantajianajeronijite pishineventashijiacaca intati, irionijite pinquemisantajiaje Irioshimajaca peacaaguetacaroca inquite, quepatsi, quentija aisa maasano choocatantaguecaroca.

¹⁶ Coramani Aapani Irioshi yovashiantajiavecari maasano caquinteguetatsica manaqueate ichoocatashijiajaquea intati yantajiavetaca taaca opajitapae inintajiaqueca.

¹⁷ Cotanquitsiqueate teequeate impeacomajajiguempariji irosati imaica teequea impeacojiaji aatimpajia, ogantagaqueate icavintsajajiaji cameetsanijite antsajiaquenijite chooca iriatimpa. Itejajiro incani aisa yoguimoncaguetajiro panquirentsi-pae ochoocatantajaca ashecajiaca ashinetantajiacaca. Iriguentiqueate pintsaromentajiguempa.

¹⁸ Iquejejiavecariqueate imaica teequeate inquemajigueti, quercampate incojiaquerini, arimpaqueate inintajiavetanacaqueate irijitorejajiaquenerime caapironcaari, irojocajiaquenerime.

¹⁹ Ariqueate yarejerejeipojaca joriojia Antioquiaquitica jerijia Iconioquitica iquenuetsatacaajipojaqueri maasano icantajiaqueri incatsimajiaqueri, irootaquequeate yaantajiancarica Paavoro ipishoncashijiaqueri mapi taan, taan, itsinatsinajiaqueri. Ariqueate ijijiaqueriji metojamajatanaque inoshicajianaqueri yaajianaqueri ipishoncajiaquitiri ovegaraguetapojacagueti tsovironaquipae.

²⁰ Cotanquitsi ariqueate icapiocaventajiapojacari irapiguemisantariteni itinajanaja icatianaca yoanaji Irishitiraqui. Osavincaguitetanajigueti itsipatanajari Verenave yoajianaque Terevequi

²¹ itsavetantajianaquero Quenquetsatsarensi Oganejencatatsica. Iquemisantajiaque oshequini. Ariqueate iteroncajianajirogueti ipiapiaitanaja Irishitiraqui, Iconioqui aisa Antioquiaqui.

²² Itampishitacajianajiri maasano quemisantajiaatsica icantajianajiri:

—Pincoguitempani pinquemisantamajajianaque, aato povashiantajiguirotsi piquemisantajiaqueca. Aritarite antsipejiaquempa oshequi anquijantanaquempaca imajirontagueti Aapani Irioshi.

²³ Ariqueate yaagarantajiaqueri cameetsanijite inquempoguijajiajeri quemisanta-jiatsica capiocapinijsica. Yamanajiaqueri Aapani Irioshi, yoguipaquiujajiaquitiro isheca teequeate irishecajiguempaji, ariqueate icantajianajiri:

—Inquempoguijajiajempai Aapani Irioshi piquemisantajiaqueca.

²⁴ Ariqueate yoajianaque Paavoro jeri Verenave iquenajianaquequeate Pishiriaqui yarejerejeivaetaca Pampiriaqui.

²⁵ Itsavetantajianaquero Iguenquetsatsare Aapani Irioshi Perejequi, ariquea yoajianaque Atariaqui.

²⁶ Ariquea itejianaja yoacojianaji Antioquiaqui. Ariqueate oraniqui itigarancajia-queri iroaqueragueti, icantajitiri Aapani Irioshi: “Jeri irica pincavintsajajiaqueri irinetsanajiaquempirogueti taaca opajitapae pinintacaajiaquerica.” Ariqueate inet-sanajiaquero.

²⁷ Imaica yarejetapojajagueti icajemajiaqueriqueate maasano quemisantajiaatsica icamantajiapojiaqueriqueate maasano yagavejacaquerica Aapani Irioshi aisa icamantajiaqueri icavintsajajiaquerigueti Aapani Irioshi teeca iriojia joriojia cameetsanijite inquemisantimentajiaquenijite iriatimpajia.

²⁸ Ariqueate osamani ichoocajiaque ontaniqui itsipajiacari irapiguemisantarijateni.

15

Icapiocajia Jerosarequi iquenquetsatacojiaquero itioncacotanaqueca Moishishini

¹ Choocatirajaguete Paavoro aisa Verenave Antioquiaqui icoraquejiaque joriojia poneponeitanquitsica Joreaquei itsatacaajiaqueri quemisantajiatsica icantajiguiri:

—Pinetsanajiaquero itioncacotanaqueca Moishishini, pintotsaiquitacaantajiguero pichonquimashi. Aatoguete pitotsaiquijiguero aato imeshiguimpitsi Aapani Irioshi.

²⁻³ Cotanquitsi iriraqueate Paavoro aisa Verenave icantimentajiaqueri. Arimpaqueate ipigatsatavacaajianaca teenicate inquemavacaajiguempaji. Irootaquequeate itigarancantajiacarica Paavoro aisa Verenave, jerijia itsipa quemisantajiatsica icantajiaqueri:

—Poajianaque Jerosarequi pincoacojiaquiteri querocaca incantajigue itigarancanejia Jesoshi jerijia quempoguijajiguirica quemisantajiatsica.

Itigarancajiaqueri, ariqueate yoajianaque iquenaquenaitanaque Penishiaqui aisa Samariaqui icamantaguetapojiaqueri:

—Imaica iquemisantajiaque oshequi teeca iriojia joriojia.

Iroompaqueate iquemacojiavaqueriguete maasano quemisantajiatsica ishinejianaqueate.

⁴ Ariqueate yarejerejeipojacaguete Jerosarequi yamenajiavaqueriguete quemisantajiatsica ishinejianaqueate. Aritarite ichoocajiaque itigarancanejia Jesoshi jerijia quempoguijajiguirica quemisantajiatsica. Icamantajiaqueteri maasano yantagueataqueca Aapani Irioshi yamitacojiaqueriguete itsavetantajiaqueriguete.

⁵ Cotanquitsi ariqueate iconoajiacari pariseojia quemisantajiaquerica Quirishito icatintiitanaqueate icantajiguiri:

—Intotsaiquitacaantajiaqueroqueate ichonquimashijia quemisantajiatsica teeca iriojia joriojia, aisa irinetsanajiaquero maasano itioncacotanaqueca Moishishini.

⁶ Ariqueate icapiocajiaque itigarancanejia Jesoshi jerijia quempoguijajiguirica quemisantajiatsica inquenquetsatavacaajiaquempa inquemavacaajiaquempa.

⁷ Osamaniqueate isavicaventajiaquero iquenquetsatavacaajiaque. Ariqueate icanatana Peerero icanti:

—Napiguemisantarijateni, aviatimpajia pitsajiaquetarite icoguiaquena Aapani Irioshi coramani, pinejacojiaquenatarite. Ariqueate itigarancanejia nontsavetanquero Quenquetsatsarentsi Oganejencatatsica, nonquenquetsatacaajiaqueriqueate teeca iriojia joriojia cameetsanijite inquemajiavaqueriguete inquemisantajiaqueri Jesoquirishito.

⁸ Ariqueate irira Aapani Irioshi amenashirentajiguirica maasano caquinte itigarancajiaqueneri Ishire teeca iriojia joriojia iquejetacaajiacaji aatimpajia cameetsanijite antsamajiaqueneri ishineventajiacari iriatimpajia aisa.

⁹ Ipintsajiacari iquejetacaajiacaji aatimpajia, iquemisantajiaqueritarite ariqueate imeshiajiaqueri ipeacotsijajari iguempaveerejia.

¹⁰ Imaica ¿arimpate pamentempari Aapani Irioshi? ¿Arimpate pijiqueji teeji intsateji? Picantavetaritarite teeca iriojia joriojia aatoguete inetsanajiguero itioncacotanaqueca Moishishini aato imeshiajiguiri Aapani Irioshi. Aroguenti jorio amejiavetaro, cotanquitsi tee agavejajigueji anetsanamajiaquero, aisa maasano avaesatinijiate tee iragavejajigueroji. ¿Quero incojiaquempa itsipapae caquinte irinetsanatantajiaquemparoca?

¹¹ Cotanquitsi imaica atsajiaque mana icavintsajajiacaji intati Amajirote Jesoshi yaantajiaajiaque aatoniji apegá. Ari iquejiaqueri iriatimpajia aisa teeca irijorijoiagueji, mana icavintsajiaqueri intati.

¹² Iroompaqueate yagatanaquitigui Peerero, imajerejianaque maasano iquemisantajiavaqueri Verenave jeri Paavoro itsavetantajiaqueroqueate maasano yantajiaqueca yagavejacaajiaquerigueti Aapani Irioshi iquenquetsatacaajiaquitirigueti teeca iriojia joriojia, yantajiaque oacaantantatsica intati intsatimentajiguenijite iriatimpajia irio tigarancaqueri Aapani Irioshi.

¹³ Ariqueate iteroncajianaqueroqueti itsavetantajiaqueca, irio quenquetsatananquitsi Santiago, icanti:

—Pinquemisantajiavaquena aviatimpajia napiguemisantarijateni.

¹⁴ Imaica icamantajiacaji Shimo* quero ocotacani iroaqueragueti imapocaquerogueti Aapani Irioshi icavintsajiaqueri itsipapae caquinte teeca irijorijoigueti, manatarite inintacaqueri inquemisantajiaqueri iriatimpajia aisa.

¹⁵ Tampatica oanaquero itioncacojiaqueca tsavetantajiguiroca icanquerica Aapani Irioshi ocanti:

¹⁶ ‘Oncoramanitapojajeguete noncoraquetaje,
nogatijero iitsaarevanconi Taavini† soveanquitsica,
novetsicajero pomatsavetatsica,
nonetsanatajero.

¹⁷ Ariqueate nonquejetaquero imaica cameetsanijite itsipapae caquinteguetsatsica incoaguetaqueri Majirontamajatatsica,
irirajia teeca irijorijoigueti nocantacojiaqueca nashintajiacari.’

¹⁸ Aritarite iquejetaquero imaica iquenquetsataquegueti Amajirote, itsavetanqueroguete coramani.

¹⁹ “Irootaque noncantantajiaquempica aato asereajiguiritsi teeca iriojia joriojia quemisantajiatatsica, aato acantajigui irinetsanajiaquero maasano itioncacotanaqueca Moishishini.

²⁰ Iroguentiqueate antioncajiaqueneri ancantajiaqueri: aatoja ishecatimajijaaritsi yojocajivetanarica ipeashijia caquinte irioshivijitashitaca intati; aatoqueate ijatashijiajirotsi manquigarentsi teeca iro irashi, aisa manquigarentsi, aato ojatashijiajiritsi teeca irio ashi; aatoja ishecatimajijaaritsi icaticajiguetica aisa aatoja ishecatacojijaaritsi irirajapae ishecajiguetaca.

²¹ Aritarite ocanque itioncacotanaqueca Moishishini icantimenqueriqueate oca aritarite yapatsajavantapinijiguiro coramani shinagogaqui savincaguitariqui imagorejantajitaca arejevaetanaca imaica.”

²² Iroompaqueate iquemajiavaquitigui itigarancanejia Jesoshi, aisa maasano quemisantajiatatsica jerijia quempoguijajiguirica, icantajigui:

—Intsija antigarancajiaque mavite iroguijajianaqueri Paavoro aisa Verenave iroajianaque Antioquiaqui.

Iriguenti itigarancajiaque Jorashi icantajitiriquea aisa Varesava, jeri Tsirashi. Iriatimpajia iriguentijia quemisantajiatatsica anaantajiatatsica.

²³ Itioncajiaqueneriqueate paperiqui yojocajiaqueneri irajianaqueneri, icantajiaqueri:

Imaica napiguemisantarijateni, nontioncajiaquempi paperi aviatimpajia teeca pijorijoigueti guintenijiatatsica oraniqui Antioquiaqui, Shiriaqui aisa Shirishiaqui. Naatimpajia ocaniqui novegarajia itigarancanejia Jesoshi, itsipapae quempoguijajiguirica quemisantajiatatsica aisa maasano quemisantajiguirica Jesoshi.

* **15:14 Shimo.** Iriotaque Shimo Peerero. (Pamenero otsapa 7.) Iroquetinica paperi itioncaqueca guiriegotsaqui ocanti “Simeón”, iroguenti ivajiro iguenquetsatsarequi evereo. † **15:16** Icanquegueti **nogatijero iitsaarevanconi Taavini**, icantacotaqueri inchoviquitanaqueca majirontanquitsineca quejetajemparineca Taavini imajirontaguete.

²⁴ Imaica nontioncaciaquempi aviatimpajia noquemacojiaquempitarite yoajianaquegueti guintenijiatsica acaniqui yasereaiaquempi icantashitatijaianacaro notsatacaajiaquempica. Icantajiaquempi poguijajiajeroja itioncacotanaqueca Moishishini pintotsaiquitacaantajiaquero pichonquimashi, picantantajiacaca: “¿Quero-campa noncojiaquempani cameetsanijite nontsajiaque queri nonquemisantajiaqueca?” Cotanquitsi teequeate naatimpa nontigarancajigueriji, inchiqiotsitarite yoashijianaca iriatimpajia.

²⁵ Ariquea noquemavacaajiaca nontigarancajiaqueri nocoguiajiaqueca iroajianaque irinejajiaquitempi, iriguenti iroguijaguijaitanaque Verenave aisa Paavoro nopintsajiacaca.

²⁶ Iriatimpajia tee intsaroacaguemparoji irimetojaquegueti itsavetanquerigueti Amajirote Jesoquirishito.

²⁷ Iroguenti notigarancuimentajiaqueri Jorashi aisa Tsirashi incamantamajajiaquempiqueate maasano oca notioncaciaquempica.

²⁸ Iroguenti noncantajiaquempi inintaguequeca Ishire Aapani Irioshi, ariqueate nocantajiaque naatimpajia aisa: “Cameetsavaeque, iintsija ancamantajiaqueri.” Imaica jeroqueate pinetsanajigueca:

²⁹ aatoja pishecajijaaritsi yojocajiguevecanarica ipeashijiaca caquinte irioshivijitashitaca intati; aatoja pishecajijaaritsi irirajapae ishecajiguetaca; aatoja pishecajijaaritsi icaticajiguetica; aatoja pijatashijiajirotsi manquigarentsi teeca iro pashi; pinquejetaquempa aisa aviatimpajia manquigarentsijia, aatoja pijatashijiajiritsi shirampari teeca irio pashi. Pinetsanajiaquerogueti oca pincomajamajajiaquempa. Imaica ario-tapojaque.

³⁰ Iiraqueate itigarancajiaqueca yoajianaquequeate Antioquiaqui icapiocajiapojaca maasano yojocajiaipojaqueneri paperi.

³¹ Iroompaqueate yapatsajavantajiaquerogueti ishinevaejiaca.

³² Iiraqueate Jorashi aisa Tsirashi iriguentijiatarite tsavetantajiaatsica, iquenquetsajiaque itampishitacajiaqueri yoguishinejajiaqueri irapiguemisantarijiateni, icamantamajajiaqueri.

³³ Osamaniqueate iconoajiaquitari. Ariqueate iquenquetsatacaajivajiri irira irapiguemisantarijiateni icantavajiriqueate:

—Cameetsataque poajianaje iguintenijiaqui tigarancajiaquempica iroaqueragueti. Pamenanontaguetanajempaja.

³⁴ Cotanquitsi irira Tsirashi ariqueate yamepojaca, apaniro yoanaji Jorashi.‡

³⁵ Iira Paavoro aisa Verenave ari ichoocajiaque Antioquiaqui itsipajiacari itsipapae itsatacaantajiaquequeate itsavetantajiaquero iguenquetsatsare Amajirote.

Yapijitajiro Paavoro yoaguetanaque intsavetantajeri Amajirote

³⁶ Oshequianaquegueti savincaguitari ariqueate Paavoro icantiri Verenave:

—Iintsija ampiapiaitanaje anejajijaateri maasano apiguemisantarijiateni acamantajiaquitica coramani atsavetanquerogueti iguenquetsatsare Amajirote. Amenajateri queroca icojiacani.

³⁷ Inintavetaca Verenave intsipatanajempari Joanca, icantajitica aisa Maricoshi.

³⁸ Cotanquitsiquea tee irininteji Paavoro intsipatanajempari, yamenaqueritari coramani Pampiriaqui ipiapitsatanajaritari tee interonqueroji iquenaguetanaquegueti itsavetantaquerigueti Quirishito.

‡ 15:34 Choocaguetaque paperipae iroquetinica iguenquetsatsarequi guiriego teeca intioncajerioji ocaniqui tioncancuquitsica otsapaqui 34.

³⁹ Iquenquetsatavacaajivetajaqueate aisa teequeate inquemavacaajianajempaji ariqueate itsinampirejavacaanaca. Irira Verenave itsipatanacari Maricoshi itehiteitanaca yoajianaque Tsiperequi.

⁴⁰ Irira Paavoro iriguenti itsipatanaca Tsirashi. Maasano irapiguemisantarijateni yamanacoventajiaqueri cameetsanijite incavintsajajiaqueri Aapani Irioshi, quishoniji iroajianaqueri.

⁴¹ Icatiajianaca yoajianaque Shiriaqui aisa Shirishiaqui itampishitacajiaqueri maasano quemisantajiatsica.

16

¹ Ariqueate yoajianaque Terevequi aisa Irishitiraqui. Inejajiapojaqueri quemisantatsica icantajitica Timoteo, oraqueate oguirica iroguenti jorio quemisantatsica. Iriraqueate oacaantirica iriguenti guiriego.

² Iriajiaquea quemisantajiatsica guintenijiatsica Irishitiraqui aisa Iconioqui yamenajiaqueri iriguenti caaviji icomajamajata.

³ Inintantacacaqueate Paavoro intsipatanaguempari, cotanquitsi iroquetiqueate itotsaiquitacaanqueri ichonquimashi aatonijite icatsimajivaqueritsi joriojia guintenijiatsica iroaroaitanaquegueti. Maasanotarite itsajiaqueri iriguenti oacaantiri guiriego.

⁴ Ariqueate querocagueti iquenaquenaitanaquegueti guinteninintsipaequi icamantajianaqueri irapiguemisantarijateni icantajiaquerica itigarancanejia Jesoshi jerijia quempoguijajiguirica quemisantajiatsica guintenijiatsica Jerosarequi. Ariquea icantajiaqueri inintajiaque irinetsanamajajianaquero.

⁵ Iriraqueate quemisantajiatsica arimpaqueate iquemisantamajajianaqueri Amajirote. Maasano savincaguitetapaequi arimpaqueate yoshequiamajatanaque.

⁶ Ariqueate inintajiavetaca intsavetantajiaquiterome Iguenquetsatsare Aapani Irioshi Ashiaqui, iro cotanquitsi tee irinintacagueriji Ishire Aapani Irioshi, yoantajianacaca Pirijiaqui aisa Garashiaqui.

⁷ Yarejerejeivaetanaca ovegaraguetapojacagueti Mishia. Inintajiavetaca iroajianaqueme Vitiniaqui, ari oquejetaca iroatimpa tee irininteji Ishire Jesoshi iroajianaque.

⁸ Ariquea iquenaguijianaquero yanajianaquero Mishia, yoajianaque yarejejiapojaca Toroashiqui.

⁹ Ariqueate onianquii tetapojaquegueti irira Paavoro ariqueate mana oquejetimotacari iguimaane, yameniri icatiimotacariqueate Maseroniaquitica, icampojaqueri:

—Caacate pinquenapojaque acaniqui Maseroniaqui, pamijiapojena.

¹⁰ Yameniquerigueti, taampinaquea nonetsanajianaquero* cameetsaniji nosotajianaque noajianaque Maseroniaqui, notsajiaquequeate imaica iriguenti nintanquitsi Aapani Irioshi nonquenquetsatacaajiaqueri Maseroniaquitica nontsavetantapojaquero Quenquetsatsarentsi Oganejencatatsica.

Yoanaquegueti Paavoro Piripoqui

¹¹ Ariquea notejianaca Toroashiqui namajatacojianaque, apatiroti noajianaquero Samoterashiaqui. Ariquea osavincaguitetanajigueti aisa ariquea narejejiapojaca Neaporishiqui.

¹² Ariqueate nanijinijiitanaque quenavoquirontsiqui noajianaque Piripoqui. Irootaque guinteninintsi anaqueroca otsipapae quempejitanquitsica choocajianquitsica Maseroniaqui. Iriguenti guintenipojaro poneanquitsica Iromaqui. Ariquea nochoocajianaque aparopae savincaguiteri.

* **16:10** Jero acaniqui amenaquero itioncaquegueti **nonetsanajianaquero** ocantacotaqueri Irocashi tioncaqueroca, itsipatacari imaica Paavoro.

¹³ Ariqueate aapojacagueti saavaro imagorejantajitaca nosotosoitanaque ovegaraguetapojacagueti tsovironaquipae noajianaque ojaaquí yamanapinijitirigueti Aapani Irioshi. Ariqueate nosavicapojaque notsavetantajiapojiro Iguenquetsatsare Aapani Irioshi nocamantajiaquero manquigarentsijia capiocajianquitsica.

¹⁴ Ariqueate ochoocaque ocaniqui icantajitica Riria poneanquitsica Tiatiraquí. Iroatimpa iroguenti jocantaguetiroca ametsomagori camachoncamagori. Iroguenti tsarorentarica Aapani Irioshi. Oquemisantamajatavaqueri Paavoro iquenquetsataquegueti, iriguentitarite quenquetsashirentacaaquero Amajirote, irootaquequeate oquemisantantavacarica.

¹⁵ Ariqueate oviñacajatantacaca otsipajiacari maasano maimojiguiroca. Ariqueate ocantajiaquena:

—Pitsaquenagueti arimaja noquemisantamajataqueri Amajirote pincoraquejiaque notsovironaquitequi pimaimojiaquitenata.

Ariqueate otsipajianaquena noajianaque.

¹⁶ Ariqueate noanoaitanaque yamanapinijitirigueti Aapani Irioshi, notonquivojaji-avacaro aajanirentsi iroaqueraca quenquevarotananquitsi ichoocashirenquero ampatsini otsavijiguetantacaroca querocaca oncoguetanaquempani coajica, iroguentiqueate yaampinijiacaca imentaquipae aajanijigaroca. Ininquegueti igonoro ontsatsiquenempari taaca opaji ininque, ari irovegarataquero.

¹⁷ Iroatimpa oguijajianaqueriqueate Paavoro aisa naatimpajia, ocajemanaquequeate ocanti:

—Irirajia iriguentijia itigarancanejia Irioshi Anaantamajatatsica, itsavetantaquequea icamantajiaquempi quero pincojiaquempani irimeshiimentajitajempinijite.

¹⁸ Ariqueate oquejetaquero imaica oshequi savincaguiteri noapinijiaquegueti. Ariqueate asereaqueri Paavoro ipitsocashitsitanacaroqueate icantsitariqueate choocatancaroca:

—Noncantantaquempiro ivajiroqui Jesoquirishito pisotoanajero.

Ariqueate iquenanaque isotoanaque.

¹⁹ Cotanquitsi irira aajanijigaroca itsajiaquetarite aato yaantajijaaro imentaquipae, yaitsijianacariqueate Paavoro aisa Tsirashi yaajianaqueri niganqui ochoocataquegueti tsovironaquipae, aritarite ichoocajiaque oraniqui imajirojiate.

²⁰ Yonigaajiapojiri icantajigui:

—Jeri irica joriojia iroguenti icoraquetashijiaque yasereaquiaquenaqueate itsimajiaquena maasano guintenijatsica ocaniqui aguinteniqui.

²¹ Itsatacajaipojaquenaquea yamejigaca iriatimpajia. Tee oncameetsateji anquemisantajiguero itsatacaapojacajica, icantimentajitajirotsi. Aatimpajiarite agonoroncari Iromaquitica.

²² Opejaianaqueriqueate itsimajenca maasano. Iriraqueate majirontajiatatsica icanta-caantajiaqueri isapocajiaqueri itavatavaajiaqueri.

²³ Ariqueate yagajiaquerigueti itavatavaajiaquerigueti yaajianaqueri yoguijajiaque-riqueate santanaquí, icantajiaqueriqueate ashitacotantatsica:

—Pinquempoguiacomajajiaquerija, ishianacatsi.

²⁴ Ariqueate iquemaquerigueti icantaquerica arimpaqueate yoguijamajajianaqueri intsompogui, yavinaacojiaqueri iguitiqui inchacotaquí.

²⁵ Ariqueate onianquiietapojaquegueti, irira Paavoro, Tsirashi yamanajiaqueri Aapani Irioshi aisa itsarontaventajiacari. Iquemisantajiaquaqueriqueate itsipajia santanatacojianquitsica.

²⁶ Cotanquitsiqueate omoguecanaquequeate ocantanaquequea santana mogué, mogué, mogué, ariqueate otanarejaguetanaca sottomorontsipae, oshiticarejaguetanaca

opariipariitanaquequeate cavorejatsaripae ishiticotantajivetacarica maasano yoguijajitaqueca santanaqui.

²⁷ Itinajanacaqueate ashitacotantatsica santanaqui yameniroqueate tanarejaguetanaca sotomorontsipae itsaroanaquequeate ijiqueji shiajianaca yoguijajiaqueca santanaqui, yaavetanacaqueate igotsirote irimocorojempamequeate.†

²⁸ Cotanquitsiqueate icajemanaquequeate Paavoro icanti:

—¡Aato pimocoroja! Maasano choocajiana ocaniqui.

²⁹ Iroompaqueate iquemavaquitigui icanti:

—Pintsivoteri tsivorentsi namenamajajiaquerita.

Ariqueate yamaqueneri, ishianacaqueate iriatimpa iquijanaque intsompogui itsaroanaquequeate yompioncanacaqueate, yogueroaventanacariquea Paavoro aisa Tsirashi.

³⁰ Ariqueate itsipajianacari yoguisotojaiajiri icantajigui:

—Intsija pincamantena, ¿quero noncoquempani iraantavajenaca aatoniji nogui camorecariqui?

³¹ Icantajiguiriquea:

—Paventanajempari Amajirote Jesoquirishito, irioquea aavajempineca aatoniji pogui camorecariqui, ariqueate inquejetacaajiaquempari maasano piconoacaca.

³² Ariqueate itsatacaajiaqueri iriatimpa jerijia maasano iconoajiacaca, itsavetantaquero Iguenquetsatsare Amajirote.

³³ Iroompaqueate iteroncajianajirogueti itsatacaajiaquerigueti, iriraqueate ashitacotantatsica santanaqui yaajianaqueri iquivaguetajiniri iquirajashitequitacaquerigueti itavaajiaquerigueti. Ariqueate iviñacajatacaantaca iriatimpa jerijia maasano iconoajiacaca.

³⁴ Ariqueate yaajianaqueri itsovironaquitequi yojocajiaqueneri isheca. Ishinevaejia iriatimpajia jerijia aisa iconoajiacaca iroorijite iquemisantajiaqueri Aapani Irioshi.

³⁵ Ariqueate osavincaguitetanajigueti iriraqueate majirontajiatsica itigarancajiaqueri coaretapae incantajiaquiteri:

—Poguipaquijajeri irintatica shiramparijia.

³⁶ Iriraqueate ashitacotantatsica icantiri Paavoro:

—Icanti majirontajiatsica noguipaquijajempi. Imaicaqueate pisotosotoitanaje cameetsaqueate poajianaje.

³⁷ Cotanquitsiqueate Paavoro icantsijigariqueate coaretapae:

—Aato noajiguitsi. Arimpate chapinqui manaqueate itavaajiaquena intati. Naatimpajiarite nogonoroncari Iromaquitica cotanquitsiqueate teequeate iroquetita incoajiavaquenaji taaca nantaque. Ariqueate yamenajiaque maasano yoguijajiaquena santanaqui. Imaicaquea imaica ¿arimpate iromanaquero iroguisotoajiajenagueti? Intsijate incoraquejiaque iriatimpajia, iriotaquequeate oguisotojaijaatenane.

³⁸ Ipiapiaitanajaqueate coaretapae icamantajiajojaqueri majirontajiatsica. Ariqueate iquemacojiaquerigueti iriguentijia igonoroncari Iromaquitica, ariqueate itsaroajianaque.

³⁹ Yoashijianaqueriqueate yogameetsajijaatiriquea yoguisotojaijaatiri icantajigui:

—Nonintaque poajianaque, povashiantanajero noguinteni.

⁴⁰ Iroompaqueate isotosotoitanajigueti yoajianaque otsovironaquitequi Riria iquenquetsatacaajianajiriqueate irapiguemisantarijateni yoguishinejajiaqueri. Ariqueate yoajianaji otsipaque guinteninintsi.

† 16:27 Yamejigaca iriatimpajia coramani aatogueti iquemoguijamajitiri yashitacoqueca irishianaquegueti, ariquea irantsipetacaajiaquempari quemoguijavetacarica, irimetojajiteri. Irootaquequeate itsaroantanacaca ashitacotantatsica.

17

Yoanaquegueti Paavoro Tesaronicaqui

¹ Ariqueate iquenaquenaitanaque Ampiporishiqui aisa Aporoniaqui irosati yareje-tantapojacaro Tesaronicaqui. Ariqueate oraniqui chooca shinagoga icapiocantapinijiacaca joriojia.

² Iriaquea Paavoro iquijapinitaquequeate ³ savincaguiteri imagorejantajitaca iquenquetsatavacaajiaca, itsatacaajiaqueri Tioncarentsimaajaca, ogantagatarite yamecaro itsatacaantapinique imagorejantajitaca icapiocajiacaguete joriojia.

³ Yoguisotoaqueneri ijicoguetaqueneri Tioncarentsiqui ocanquegueti irantsipevae-taquempa irira Quirishito, irimetojaque, cotanquitsi impochatanaje. Icanti: “Iricatica Jesoshi notsavetantaquempica, iriotaque Quirishitotatsica.”

⁴ Iconoagarantajia joriojia iquemisantajiaque ariqueate iconoajiacari Paavoro aisa Tsirashi. Aisa iquemisantagarantajiaque guiriego tsaromentajigarica Aapani Irioshi. Ariqueate oquejejiaca oshequini manquigarentsijia anaantajiatsica oquemisantajiaquequeate.

⁵ Yamenajivaqueriguete joriojia teeca inquemisantajigue opeacojianaqueri itsimajenca, icapiocantajiacarica peraguetatsica teeca incameetsajigueti. Iriatimpajia icajemajiaquetanaqueriquea icatsimajianaquequeate maasano, itsipatsipaitanacariquea, yoajianaque itsovironaquitequi Jasoni icojaiavecariqueate Paavoro aisa Tsirashi irinoshicajiaquerimequeate irojocajiaquenerimequeate capiocajianquitsica.

⁶ Cotanquitsiqueate tee irinejajipojaqueri. Iriguentiqueate inoshicajiaque Jasoni jerijia itsipa irapiguemisantarijiateni, yaajianaqueneri majirontajiatsica icajemajianaquequeate icantajigui:

—Irirajia asereajiguirica maasano caquinte quepatsipaequi, imaica ariqueate icoraquejiaque ocaniqui,

⁷ yaajivaqueriqueate Jasoni. Iriatimpajia yojocaavaquero icantica majirontatsica Sesa teequeate inquemisantajigueriji, icantajiaquetarite chooca itsipa majirontatsica icantajitica Jesoshi.

⁸ Iroompaqueate iquemajivaquerogueti maasano capiocajianquitsica jerijia majirontajiatsica opejaianaqueriqueate itsimajenca.

⁹ Icantajigui Jasoni jerijia irapiguemisantarijiateni:

—Iriaqueate Paavoro aisa Tsirashi teequeate nonintajigueriji ocaniqui, antigarancajiajeri iroajianaje. Cotanquitsi imaica pojocajiguena pimentaquitsitepae, coajicaqueate iroajianajeguete noguipiajajempiriqueate.

Ariqueate yojocajiaqueneri, iroompa yoguipaquijajajiri.

¹⁰ Ariqueate opitsecanaqueguete iriraqueate quemisantajiatsica itsipajianacari Paavoro aisa Tsirashi yoajivajiri iroajianaquequeate Vereaque. Iroompaqueate yarejejiapojacaguete iquijaquijaitapojaque shinagogaqui icapiocantapinijiacaca joriojia.

¹¹ Iriaquea joriojia guintenijiatatsica Vereaque teequeate inquejiguempariji guintenijiatatsica Tesaronicaqui. Iriatimpajia inintamajajiaque inquemisantajivaqueri itsatacaajiaquerica. Irosati savincaguiteri qui yapatsajavantamajajivaquero Iguenquetsatsare Aapani Irioshi iramenajiaquero cameetsaca itsatacaajiaquerica.

¹² Irootaquequeate iquemisantantajiacarica Jesoshi oshequini jorio aisa guiriego. Iquemisantajiaqueri shiramparijia jerojia manquigarentsijia anaantajiatsica.

¹³ Cotanquitsi iquemacojivaqueriguete joriojia guintenijiatatsica Tesaronicaqui chooca Paavoro itsavetanqueroqueate Iguenquetsatsare Aapani Irioshi Vereaque, icoraquejiaque icantajipojaqueri Vereaquita:

—Aato piquemisantiri Paavoro, mana pincatsimajigueri intati.

¹⁴ Iroompaqueate iquemajiavaquitigui irapiguemisantarijateni Paavoro, itigaran-cantajiacarica iroanaque otsapijaqui quentija. Iriguentinivani choocatajatsi Tsirashi aisa Timoteo.

¹⁵ Iriaqueate tsipajianacarica yoajiavaequitiri Atenashiqui, ariquiteate ipiapiaitaja. Iriaquea Paavoro icantajjavajiri:

—Pincantajapojajerija Tsirashi aisa Timoteo taampinaja incoraquejaje.

Paavoro iquenquetsataque Atenashiqui

¹⁶ Ariquiteate Paavoro yoguijajiavaquerigueti Atenashiqui, yamenaguequeri ipe-jaiguica irioshivijitashitaca guintenijiatsica ocaniqui, yoshequiamajatatiguinimaja, ariquiteate ishimampojanacavaetanacaqueate.

¹⁷ Iquenquetsatantanacacaqueate shinagogaqui icapiocantapinijiacaca joriojia. Iquemisantajiaqueri iriatimpajia jerijia itsipa caquinte tsaromentajigarica Aapani Irioshi. Ariquiteate iquenquetsatavacaajiaca. Aisa ogantaga savincaguiteriqui yoapiniquequeate oniganquiquegueti guinteninintsi yojocantajigueteroqueti taaca opajitapae iquenquetsatacaajiaqueriqueate choocajianquitsica oraniqui, iquenquetsatavacaajiaca.

¹⁸ Ariquiteate ichoocajiaque guijatacojiguiroca itioncacotanaqueca Epicoro jerijia aisa guijatacojiguiroca itioncacojianaqueca tsatacantajiatatsica icantajitica eshitoicojia. Iri-atimpajia itsipajiacari Paavoro iquenquetsajiaquequea, cotanquitsi ariquiteate iconoagarantajia icantajiaque:

—¿Querocate icocani irira quenquetsavaeri?

Itsipaqueate icantajiaque:

—Iriocampate quenquetsatacotirica itsipapae irioshipae.

Icantantajiacaca imaica itsavetanquerotarite Paavoro Quenquetsatsarentsi Ogane-jencatatsica tsavetacotirica Jesoshi aisa ipochatanajigueti.

¹⁹ Ariquiteate yaajianaqueri aatsonquiriqui icantajitica Areopago icapiocapini-iacagueti majirontajiatatsica icoacojiaqueriqueate icantajiguiri:

—¿Taate opajita ocatica iroaquerari pitsatacaantaqueca?

²⁰ Teequiteate nontsajigueroji pitsatacaajiaquenaca, nonintantajiacaca poguisotoama-jataquenaro.

²¹ Icantantajiacaricaqueate imaica iriguentijitarite Atenashiquitica jerijia poneja-ianquitsica otsipapaequi guinteninintsi oraniqui iroguentitarite isavicaventajiaque iquemisantajiaqueriqueate iquenquetsatacojiguirogueti otsipapae teeca intsajigueroji, coajicaqueate irioquiteate quenquetsajajatsi.

²² Icatianacaqueate Paavoro niganqui Areopagoqui icantiri:

“Aviatimpajia guintenijiatsica Atenashiqui, namenajiaquempi caaviji pishineventa-majjavecarí pirioshivijitashitacaca.

²³ Ontaniquiqueate noquenaguetanaquegueti namenitsiguetaquaquempiro pitsaromentapinijiacaca, nonejapojaquero aretare pitsaromentantaca chooca itioncajitaquero ocanti: ‘Iriguenti antajiaqueneca irioshi teeca inquemacojiteriji.’ Iriaqueate teeca pinquemacojigueriji, manaca pitsaromentashijiacaca intati, iriotaquequeate notsavetantica naatimpa.

²⁴ Iriatimpa iriguenti Irioshimajaca. Iriotaquequeate peacaacaroca quepatsi, jeri maasano choocatantaguecaroca. Iriatimpa iriguentitari ashintaguetaroca inquite aisa quepatsi, teequiteate inchoocatantemparoji tsovironaqui ishitiyuca caquinte.

²⁵ Teetarite incogumentempaji irantaqueneri caquinte. Iriotari peacaajiacaji, aisa irioquiteate anijacaajiacaji yojocajiacajiroquiteate maasano.

²⁶ Iroaqueraguete ipeacaacari caquinte apaniroqueate ichoocaque. Ariqueate yoshequiaqueri, ariqueate ijatacojiaque maasano caquinteguetsica teequeate incantashitatijaiguempaji. Ivoroqaqueriqueate cameetsanijite intsitacaguetejajianaquemparo maasano quepatsi. Iriotaquequeate cantanquitsi quero avoajiaqueni aisa quero caaguintenijiaquempani.

²⁷ Ariqueate iquejejiacaji imaica cameetsanijite anintajiaquenijite antsajiaqueri, antsatantajiajopemparica, teenica irisamanitacoteji itsitacaguetejacarotarite maasano.

²⁸ Iriotaquequeate anijacaajiacajica tampishitacaajiacajica. Aatomeguete ichoocacatime iriatimpa aatomete achoocajiguime. Aritarite icantajiaque pignonorojia caavijica itsamajajigui: ‘Aroguentijia irijanijiate Aapani Irioshi.’

²⁹ Aroguentiguete irijanijiate Aapani Irioshi, aato ajijigui imaica iquejetacari ipeacaajitaca cavorejaguetatsica irooca mapi, ora iquenquejashitaca intati caquinte.

³⁰ Coramani teenicate intsajiguenicate caquinte, teequeate incantajigueriji Aapani Irioshi, cotanquitsiqueate imaica icantajiacajiqueate maasano ancantashitatijaiana-jempa avashiantajianajero aguempaveaereja.

³¹ Choocatarite savincaguiteri itsatsicaca Aapani Irioshi, iriraquea shirampari inintacaaqueca incanquequea quericaca intsipatajempaca Aapani Irioshi aisa quericaca oanankuitsine camorecariqui, cameetsaqueate iroaquero, iriguentitarite cantaqueri coramani Aapani Irioshi. Iriraqueate Aapani Irioshi yovochantajiri cameetsanijite antsatimentajiaquerinijite iriguenti inintacaaqueca.”

³² Iroompaqueate iquemajiavaquitigui iquenquetsatacotaquerogueti intancorejajianaje coajica metojaguevetatsica, iconoagarantajanaca ishironantajanaca inijashijianacariqueate. Choocaqueate itsipapae cantajianquitsica:

—Coajica nonquemajiajempai aisa.

³³ Ariqueate icatianaja Paavoro.

³⁴ Cotanquitsi iconoagarantajiacajica iquemisantajiaqueri Jesoshi, ariqueate yoguijaguijaitanaqueri Paavoro. Iquemisantaque apaniro majirontatsica Areopagoqui icantajitica Tionishio. Aisa oquemisanque manquigarentsi icantajitica Tamarishi. Ariqueate iquejejiaca itsipapae iquemisantajiaqueri Jesoshi.

18

Paavoro iquenquetsataque Corintoqui

¹ Ariqueate iponeanacani Paavoro Atenashiqui yoanaquequeate Corintoqui.

² Ariqueate inejapojaqueri jorio icantajitica Aquira guintenivetatsica Pontoqui. Iri-aquerasano coraquetanquitsi iponeaca Itariaqui itsipatacaro imanquigare icantajitica Pirishira. Icoraquetantacaca manatarite yoguishiaqueri majirontatsica Caraorio, teenicate irinintajeji inchoocajiaje joriojia Iromaqui. Ariqueate yoanaque Paavoro itsovironaquitequi irinejajigueri.

³ Ariquea iquejetavacaajiacaqueate, irio avoguetiroca quitsaarentsivanco, irootaquequeate iconoampojarica itsipatavacajiacaqueate ontaniqui yantajiaque-queate.

⁴ Ogantaga savincaguiteri qui imagorejantajitaca yoapinitaque shinagogaqui icapio cantajiacajica joriojia iquenquetsatacaajiaqueri iriatimpajia jerijia aisa guiriegojia cameetsanijite inquemisantacaimentajiaquerinijite.

⁵ Ariqueate yarejerejeipojacaguete Tsirashi aisa Timoteo iponeponeitaca Maseroni-aqui, iriraqueate Paavoro arimpaqueate isavicaventanaquero Iguenquetsatsare Aapani Irioshi itsavetantamajatanaquero icamantamajiaqueri joriojia icanti:

—Ira Jesoshi iriguenti irira Quirishito Meshiantatsica poguijajaveca.

⁶ Iriatimpajia ipigatsajianacariqueate injashijianacari, ipotecantanacaroca Paavoro iitsaare cameetsanijite intsajiaquerinijite mana yovashiantajianaqueri aatoqueate isavicaventajiajiritsi intsatacaajiajeri. Icantajiguiri:

—Nocamantajiavetaquempiqueate, teequeate pinquemisantajiguenaji. Imaicaqueate inchiqiotsiqueate pinquejetacaantajiaquempa aviatimpajia pimetojajianaquegueti, aato naatimpa noquejetacaantimpitsi. Iroosacanicate imaica iriotaquequeate noashijianaque teeca iriojia joriojia nontsatacaajiaqueri.

⁷ Iroompaqueate icantajiaquerigueti isotoanaji yoanaque itsovironaquitequi Tishio Joshito tsaroverarica Aapani Irioshi. Oraqueate itsovironaquite mana otsipatacaro shinagoga icapiocantajiacaca joriojia.

⁸ Irira Quirishipo jivatanquitsica shinagogaqui iquemisantajiaqueri Amajirote. Ariqueate iquejejiaca ijitanajia jerijia aisa oshequini Corintoquitica, iquemajiavaque-rogueti Iguenquetsatsare Aapani Irioshi iquemisantajiaqueri Amajirote, ariqueate yoviñacajatacaantajiacaca.

⁹ Ariqueate yoguimaaca Paavoro tsiteniriqui, ariqueate yoguimaacari Amajirote icampojaqueri:

—Aatoja pitsaroguitsi. Arimpaqueate pinquenquetsatanaque, aato povashiantirotsi.

¹⁰ Ogantagaqueate quisho noaquempi aato yantajitimpi, choocatarite acaniqui oshequini quemisantajiaquenaca.

¹¹ Ariqueate ichoocaque Paavoro Corintoqui apatiroti ajagantsi aisa otsipa niganqui ajagantsi, itsatacaantaquero Iguenquetsatsare Aapani Irioshi.

¹² Oraqueate ichoocaquegueti acaniqui icoraquetaquequeate Gario ipeacaqueate imajirojiate Acayaquitica. Ariqueate irira joriojia icapiocaventajiacari Paavoro yaajianaqueneri iriatimpaqui,

¹³ icantajiguiri:

—Iricaqueate iroguenti yantaque icantimentajitica, iroguentitarite isavicaventajiaque iquenquetsatamampeanacaro Iguenquetsatsare Aapani Irioshi cameetsanijite inquemisantimentajiaquerinijite maasano, cotanquitsi icantashitaticaro.

¹⁴ Iroompaqueate inquenquetsatanaqueme Paavoro iquenquetsatanaquequeate Gario icantajiguiri joriojia:

—Imaicaquea joriojia, arimequeate iraitsitanaqueme, iroguenticame irimetojantaquemequeate, arimequeate nonquemisantajiaquempime.

¹⁵ Cotanquitsi teequeate ariquea inquejeteroji imaica, iroguenti picatsimatimentajiaqueri itsatacaajiaquempigueti icantashitatiitajiaquempirogueti pitsatacaantajiguica. Pinetsanajiguerojate aviatimpajia. Aatoqueate noquemisantajiguimpitsi.

¹⁶ Ariqueate yoguisotoajiaqueri.

¹⁷ Ariquea maasano [guiriegojia] icatsimajianaqueri Soseneshi jivatanquitsica shinagogaqui icapiocantapinijiacaca joriojia yaajianaqueri itavaajiaqueri tac, tac. Yamenajiavecariqueate Gario, cotanquitsiqueate tee incantajigueriji.

¹⁸ Ariqueate irira Paavoro ichoocaque oshequi savincaguiteri oraniqui Corintoqui. Ariqueate yoanaji iquenquetsatacaajianajiri irapiguemisantarijateni. Ariquea itejianaca yamajatacojianaque iroajianaque Shiriaqui itsipatanacaro Pirishira aisa irira Aquira, cotanquitsi yoajiapanajanti Senquereaqui yojocaguinatapanajantaqueate cameetsanijite irinetsanataquero icantaquerica Aapani Irioshi, icantiri: “Coajica non-teroncaquerogueti nocamantaquempica nojocaguinataquempa.” Ariqueate itejianaca yamajatacojianaque.

¹⁹ Ariquea yarejerejeitaca Epesoqui, ariquea oraniqui aguijitanaque Pirishira aisa Aquira. Irira Paavoro yoapanajanti shinagogaqui icapiocantapinijiacaca joriojia iquenquetsatacaajiaapanajantiriqueate capiocajianquitsica.

²⁰ Iriatimpajia icantajiavetavajari:

—Aatotacaja pijatitsi, pimaimojianaquena.

Cotanquitsi iriatimpa tee irininteji, icantajiguiriqueate:

²¹ —[Nonintaque noanaque Jerosarequi nogavisaaquitero Pentecoshite.] Inin-
quegueti Aapani Irioshi nompiaje.

Itetanaca yoajianaque isotoantanajaro Epeso.

²² Yagatacopojaque Sesareaqui yoanaque Jerosarequi inejajiaquitiriqueate
quemisantajiatsica. Ariqueate yoanaque Antioquiaqui.

²³ Osamani ichoocataanaque acaniqui, ariqueate yoanaque iquenaguetanaque
Garashiaqui aisa Pirijiaqui intampishitacamentajianaquerinijite maasano
quemisantajiatsica inquemisantamajajiaquerinijite Amajirote.

Itsatacaantaque Aporoshi Epesoqui

²⁴ Ariqueate yarejetapojaca apaniro jorio Epesoqui iponeaca Arejantiriaqui. Iri-
atimpa ariguenti ipajita Aporoshi, iriguenti quenquetsatatsica cameetsa aisa itsama-
jatiro Itioncacaantaqueca Aapani Irioshi.

²⁵ Iquemacomajataqueri Amajirote Jesoshi. Itsavetantamajataqueri, aisa itsatacaan-
taquegueti yoguisotoamajataqueroqueate, cotanquitsi iroguenti itsavetaca itsatacaan-
tica Joanca Viñacajatantatsica.

²⁶ Ariqueate imapocanaquero iquenquetsatanaque shinagogaqui icapiocantajiaca
joriojia, teequeate impashiventempaji. Iroompaqueate iquemajiaquitigui Aquira
aisa Pirishira yaajianaqueri oraniqui intsatacamentamajajiaqueriniji, yoguisotoama-
jajiaqueneri quero ocoani iguenavoquero Aapani Irioshi.

²⁷ Ariqueate Aporoshi iquenquejanaji iroanajequeate Acayaqui. Iriaqueate
irapiguemisantarijiate ni icantajiaqueri cameetsataque iroanaque inquenquetsate
ontaniqui.

Itioncajiaqueneri quemisantajiatsica Acayaquitica irajiajaquerija. Ariqueate cora-
mani icavintsajajiaqueri Aapani Irioshi Acayaquitica irootaquequeate iquemisan-
tajiajarica. Imaica yarejetapojacaguete Aporoshi oshequiqueate itampishitacajaiapoja-
queri.

²⁸ Iriatimpa inetsanajianaqueneriquea maasano joriojia capiocajianquitsica itsata-
caantajiavecaca, cameetsa yoanaquero maasano, iroguentitari ipampiatanaque Ition-
cacaantaqueca Aapani Irioshi itsavetantaqueriguete Jesoshi icanqueguete iriguenti irira
Quirishito Meshiantatsica. Irootaquequeate querocampate incojiaquerini iriatimpajia.

19

Ipianajaguete Paavoro Epesoqui

¹ Oraqueate choocatirajaguete Aporoshi Corintoqui, irira Paavoro itoncotoncogue-
tanaquequeate otsempipae ipianaja Epesoqui. Inejajiaipojaqueri quemisantajiatsica.
Teequeate iroshequiamajateji.

² Icoacojiaqueri icantajiguiri:

—Iroaqueraguete piquemisantaqueguete ¿ari icoraquetaque Ishire Aapani Irioshi
ichoocashirentaquempi?

Icantajiguiri:

—Teequea nonquemacojigueri chooca Ishire Aapani Irioshi.

³ Icantajiguiri Paavoro:

—Iroosacanicate ¿taampate opajita piviñacajatashijiaca?

Iriatimpajia icantajiguiri:

—Iroguenti noviñacajatashijiaca cameetsanijite nonetsanatimentajiaqueronijite itsata-
caantica Joancani Viñacajatantatsica.

⁴ Icantiri Paavoro:

—Oraqueate iviñacajatantaquegueti Joancani mana iviñacajatantaque cameetsanijite ironijite intsantajitaquemparoca jac yovashiantanaquero iguempevaerejia, cotanquitsi icantajiaqueri: ‘Pinquemisantajiaqueri impoitapojenaneca’, irioquea Quirishito Jesoshi.

⁵ Iroompaqueate iquemajiaquitigui yoviñacajatacaantajianaca ivajiroqui Amajirote Jesoshi.

⁶ Ariqueate Paavoro ipamijiaqueriqueate, ariqueate icoraquetapojaque Ishire Aapani Irioshi ichoocashirentajiaipojaqueri, imapocantajianacaca iquenquetsatantajianacaro otsipapae quenquetsatsarentsipae teeca intsajiavetempaji, itsavetantajiaqueroqueate icamantajiaquerica Aapani Irioshi.

⁷ Iriaqueate viñacajajianquitsica yovegarataca 12.

⁸ Ariqueate yoapinitaque Paavoro 3 taai shinagogaqui icapiocapinijiacaguete joriojia iquenquetsataque, teequea impashiventempaji. Itsavetanqueri Aapani Irioshi quero icota imajirontaguete, icamantamajajiaqueri.

⁹ Cotanquitsi iconoagarantajiaica imanintajiaquero icamantajiaquerica, teenicate irinintajiguenicate inquemisantajigueriji irira Quirishito, ariquea icapiocajiacaguete maasano manaquea inijashinajianacaro Quenavoquirontsi Iroomajaca.

Itsinampirejantanajaca Paavoro itsipajianacari quemisantajiatistica yoajianaque itsatacaantiguete Tirano. Ariqueate iquenquetsatavacaapinijiaica oraniqui ogantaga savincaguiteriqui.

¹⁰ Ariqueate iquejetanaquero imaica aavaepojacani mavite ajagantsi itsavetantanaqueri Amajirote Jesoshi, irootaquequeate iquemacotantajiacarica maasano guintenijiatistica Ashiaqui, joriojia aisa guiriegojia.

¹¹ Aapani Irioshi yagavejacaamajataqueri Paavoro yantaguetantacaca teeca irinejajiguetaji.

¹² Irootaquequeate yantimatavaquerogueti Paavoro paañopae irooca quitsaarentsipae, ariqueate icoraquejiapoji itsipa yaanaquero, yaajianaqueneri ashinoncajajianquitsica, ariqueate ipejiaanaja. Ariqueate iquejejianaja ichoocashirentajiaqueca ampatsinipae isotoajianaque choocashirentajiavetacarica.

¹³ Cotanquitsiqueate chooca iconoagarantajiaica joriojia iquenaguetanaque guintenintsipaequi mana yantavaeventiroqueate yonigaanontajiapinitacari caquinteja ichoocashirentajiaqueca ampatsini. Ariqueate inintajiavetaca inquejejiacquemparime Paavoro yonigaaguetariguete ampatsinipae iroguenti yaventashijiacari ivajiro Amajirote Jesoshi, icantantajiacarica choocashirentajiaquerica apaniro caquinte:

—Imaica naventashitantajiaquempiro ivajiro irira Jesoshi itsavetantica Paavoro nontantajiaquempiqueate pisotoajianaje pijajiaje.

¹⁴ Ariquea iquejejiaca irijanijiate jorio icantajitica Eseva. Irira Eseva irio saserorote anaantanquitsica, irijanijiate ivegarataca 7.

¹⁵ Cotanquitsiqueate iquejejiacaguete imaica icantajiavecariguete ampatsini, mana ipigatanacari icantiri:

—Naatimpa notsataqueri Jesoshi iriguente agavejamajatatsica, aisa irira Paavoro noquemacotiri, cotanquitsi ¿taampate pinajiaque aviatimpajia?

¹⁶ Ariqueate irira caquinte ichoocashirenqueca ampatsini ishiashitanacariqueate itaviajianaqueri icapocapotanaqueri yagavejajiaqueriqueate iperejacojiaqueri iitsaare, irootaquequeate ishiantajianacaca cajaratsinojia chochororo iriraja.

¹⁷ Iroompaqueate iquemacojiaqueriguete maasano joriojia jerijia maasano guiriegojia guintenijiatistica Epesoqui itsaroajianaque, irootaquequeate ishineventantajianacarica Amajirote Jesoshi, icantajigui:

—Iriaqueate Amajirote Jesoshi iriguente caaviji yagavejamajati.

¹⁸ Ariqueate icoraquejiapojaque oshequi quemisantajiatsica icamantacojiaquero yantaguishejiguica, icantajigui:

—Jero oca nantaqueca teeca oncameetsateji. Nonintaque irogameetsantajena Aapani Irioshi.

¹⁹ Oshequini matsiguetsatsica aisa itsipajia aventapinijigaroca iragavejane ampatsini yamatavijantajiacarica itsipapae, yamajiaqueroquea tioncarentsipae yashintajia, irootaque otsatacaavecarica yantantaguevecaroca. Icapiocajiaquero ariqueate itaimojiaquero maasano caquinteja. Ocapiocacaguete maasano paperi ovegaravaetaca, ari ovegaratacani 50,000 imentaquitsitepae.

²⁰ Arimpaqueate yoshequiamajatiguinimaja quemisantajiguirica Amajirote aisa arimpaqueate iquemisantamajianaquero quenquetsatsarentsi tsavetantaquerica Amajirote, yamenajiaquerotarite arimaja ocantamajataque.

²¹ Ariqueate Paavoro ipintsatanaja iroanaje Jerosarequi inquenanaqueate Maseroniaqui aisa Acayaqui, icanquetarite:

—Noanaqueguete Jerosarequi, ariqueate nopintsataca noavaetanaque Iromaqui.

²² Ariquea itigarancaquero mavite amitacojiguirica, irira Timoteo aisa Erashito, iroanaque Maseroniaqui, cotanquitsi iriatimpa choocatiraja Ashiaqui.

Icatsimajianaqueguete Epesoquitica

²³ Ariqueate irira Epesoquitica icantimentajiaquero Quenavoquirontsi Iroomajaca, teequeate capichaji incatsimajigueti.

²⁴ Iriguentiqueate quejetacaantaquero Irimedio vichajiroca cavorejatatsica. Iri-atimpa iriguenti vichajiroca teemprojaniqui iquejetacaacaro teempro itsarotentajigarogueti irioshivijitashitaca Aretemisa.* Iriaqueate antimojiguirica yaantamajataroqueate imentaquipae.

²⁵ Icapiocantajiacarica aisa quejejigarica iriatimpa vichajiroca cavorejatatsica icantajigui:

—Aviatimpajia pitsajigui irooqueate aantajiacarica imentaquipae antajiguica.

²⁶ Cotanquitsi imaica pamenajigueti irira Paavoro iquenquetsataqueguete icanquequeate iriraqueate irioshivijirentsi yantajiguica caquinte teequeate irioquea irioshimajaca. Piquemajiaquero aviatimpajia. Imaicaqueate imaica yoshequianaque guintenijiatsica acaniqui Epesoqui quemisantajiaquerica. Cotanquitsi teequeate apaniro inquejetero ocatita, ariqueate itsitacaguetejanacarica aisa maasano Ashiaqui.

²⁷ Quejetanquitsica imaica teequeate oncameetsateji, manaqueate aato aantajiaarotsi imentaquipae, aisa otemporote arioshite Aretemisa anaantanquitsica manaqueate irovashiantajitanaquero intati, aatoqueate ishineventajitarotsi. Maasantarite shineventajiacarica guintenijiatsica Ashiaqui jerijia aisa otsipapaequi aatoqueate ishineventajiaarotsi.

²⁸ Iroompaqueate iquemajiaquitigui opejaianaquero itsimajenca icajemajianaquequea icantajigui:

—¡Cameetsavaetaque Aretemisa, atsarotentajiacarica Epesoquitica!

²⁹ Icajemajianaque ishianajianaqueate maasano guintenijiatsica oraniqui, yaajipojaquero Gayo aisa Arishitarico, yaajianaquero yoajianaque icapioapinijiacaguete. Iriguentijia Maseroniaquitica itsipajiacarica Paavoro itsavetantirigueti Amajirote.

³⁰ Irira Paavoro inintavetacaqueate iroanaqueme iriatimpa, cotanquitsiqueate irapiguemisantarijateni icantajiaquero:

—Aatota pijati.

³¹ Ariqueate iquejejiaca majirontajiatatsica Ashiaquitica iconoagarantajiacaqueate ipintsatacari Paavoro, icantacaantajiaquero aatonijite ijati icapioajiacaguete.

* **19:24 Aretemisa.** Irirajia Iromaquitica icantajiguiroquea *Diana*.

³² Ontaniquiqueate icapioacajiacaguete icajemajianaque, itsipaqueate cantashitati-avacaroca, cotanquitsi yoshequiamajatatiguinimaja teeca intsajigueji taaca icapioquimentajia.

³³ Iconoagarantajia joriojia inejaitatigui Arijantero ariqueate ichoocaque iriatimpa oraniqui, ariquea yaajianaqueri yoajiaqueri niganqui inquenquetsatacaimentajiaqueriniji. Ariquea iriatimpa itinajavacovetanaca cameetsanijite inquemisanti-mentajiavaquerinijite maasano inquenquetsatacaquerime.

³⁴ Cotanquitsi iroompaqueate itsajiaqueriguete iriguenti jorio, arimpaqueate icajemamajianaque aricampa mavite hora, icantajigui:

—¡Cameetsavaetaque Aretemisa, atsaroventajiacaca Epesoquitica!

³⁵ Iriaqueate sequeretario tioncatsica ariqueate yagavejianaqueriguete yoguimajerentajiaqueriguete icantajigui:

—Aviatimpajia Epesoquitica, pinquemisantajiguena, maasanotarite otsitacaguetejavacovetanacaro itsajitiro aatimpajia aroguentijia quempoguijajiguiroca teemporo itsaroventantajitaroca Aretemisa jero aisa mapi quejecaroca iroatimpa parianquitsica jenoqui inquitequi coramani.

³⁶ Aato ichoocati cantashitiatiaquemparoneca, irootaquequeate nocantantajiaquem-mpica pinquemisantajiguena. Aatoqueate taaca opajita pantajiguitsi. Aatoshiatsi, iroquetita pinquenquejamajigüe.

³⁷ Iricatica pamajiaqueca tee iraitsigueteroji choocaguetanquitsica teemporoqui itsaroventantajitaroca Aretemisa, aisa tee irinijashitemparoji arioshite.

³⁸ Pincantajigueriqueate Irimedio jerijia antavaetimojiguirica, choocaca inintajiaqueca incatsimajiaqueri, iintsija iroajianaque icantomajantajiguiquete joese irioqueate quemaquerine, irootarite ichoocatashijiaque incantajiaqueriqueate quericaca quejetanquitsica aisa quericaca teeca inquejetempaji.

³⁹ Cotanquitsi choocaguete otsipa tsimajiaquempica poguijajigueriqueate mairontajiaatsica incapioacajiaquempiguete ariqueate pincantajigueri.

⁴⁰ Imaicaquea imaica aatoshiatsi icamantacojitajitsi amajirojiatequi, ijiqueji irooca acapiocashijia anaimanajiaqueri, ariqueate incoacojiacajiguete: ‘¿Taate picapio-cashijia?’ querocampate ancantajianaque.

⁴¹ Iroompaqueate icantaqueguete, itigarancajiajiri maasano capioacajianquitsica iroajianaje.

20

Yoanaqueguete Paavoro Maseroniaqui

¹ Ariqueate isanticojianajiguete Epesoquitica, irira Paavoro icajemajiaqueri irapiguemisanarijiateni icapioacajiaqueri itsatacaajiaqueriqueate yavinajiaavajiri. Ariqueate iquenquetsatacaajianajiri icantajigui:

—Noanaquequeate Maseroniaqui.

Ariqueate yoanaque.

² Iquenaguetanaquequeate iquenquetsatacaajianaqueriqueate irapiguemisanarijiateni itampishitacajaianaqueriqueate inquemisantamajajiaquerija Quirishito. Ariqueate yarejerejeivaetani Guereshiaqui.

³ Ariqueate ichoocatanaque ontaniqui 3 taai. Ariqueate pajinimequeate intetanaquem-pame iroanaqueme Shiriaqui iquemacojiaqueri joriojia isariajiacari irimetojajia-queri, ipiantanajaca Maseroniaqui.

⁴ Iriguenti itsipajianaca Sopatere (irijanite Piro poneanquitsica Vereauqui), Arishitarico jeri Segonto (ponejainquitsica Tesaronicaqui), Gayo (poneanquitsica Tereve-qui), Timoteo, Tiiquico jeri Toropimo (ponejainquitsica Ashiaqui).

⁵ Iriatimpajia ijivajianaque yoguijajiaivaetana Toroashiqui.

⁶ Ariqueate anaapojacagueti savincaguiteri ishecatantajitaroca pan teeca inconoantajitemparoji anempoantaca notenoteitanaca noponeponeitanaca Piripoqui. Ariqueate aapojacagueti 5 savincaguiteri notonquivotonquivoitavajari Toroashiqui. Ariqueate nochoocajianaque ⁷ savincaguiteri.

⁷ Ariqueate aapojacagueti savincaguiteri pariapojajaroa semana* nocapiocajiaca notsipajiacari napiguemisantarijiateni noncotarejaquero pan noshecajiaquemparo nonquenquejajiaqueri irira Quirishito imetojaventajiaquitajigueti. Ariquea iquenquetsataque Paavoro irosatiqua inianquiitetacovaetanaque, itsaquetarite osavincaguitetanajegueti iroanaje.

⁸ Ariguenti nochoocajiaqueni oshitamencoshitamencoatacagueti jenoqui notsivojiaqueate.

⁹ Ariqueate ichoocaque oraniqui iriaqueraca quenquevaritananquitsica icantajitica Eotico, isavicaque omorotacagueti. Osamanitarite iquenquetsataque Paavoro, iriraquea Eotico ipochocuitanaque imaanaque, cotanquitsi iroompaqueate imaamajavetanacagueti isorocanaquequeate yomposapojaca isavi tan. Yoajivetanacaqueate yaajivetapojacariqueate, jac metojanaquequeate.

¹⁰ Cotanquitsiqueate irira Paavoro yaguijishitsitanacari yovanquetapojacari ineguiqui yavinatanaqueri, icantajiaqueri maasano:

—Aato pitsaroajiguetsi, jeri pochatanaji.

¹¹ Ariqueate ipianaja Paavoro jenoqui, icotarejaquero pan yojocajiaquenaro maasano, ariqueate noshecajiaca. Yapijitajiroqueate iquenquetsatanaji aisa irosatiqua isavincaguitetacotantanajaca. Ariqueate yoanaji.

¹² Irira Eotico itsipajianajari itsovironaquitequi peamajatanajaqueate ishinejiaca maasano.

¹³ Naatimpajia nojivajivaitanaquequeate namajatacojianaquequeate quenjarontsiqui noajianaque Asoqui naajipapananteriqueate Paavoro, iriatimpa iroguenti ishivoquitanaque quenavoquirontsiqui.

¹⁴ Ariqueate notonquivojajajari Asoqui notejianajiriqueate noajianaque Mitirenequi.

¹⁵ Osavincaguitetamanaquegueti nogaajianaca nanajaianaquero Quio. Ariqueate otsipatapojacagueti savincaguiteri nagatacojiapanajanti Samoshiqui. [Nagatacojiapanajanti Torojirioqui,] otsipa savincaguiteri nagatacojiaque Miretoqui.

¹⁶ Apatiroti noajianaquero teequeate nagatacojigueji Epesoqui, teenicate irininteji Paavoro inchoocate oshequi savincaguiteri Ashiaqui, manatarite taampina inanaque inchiquiompate irarejetempa Jerosarequi aricaca iragavejaquempagueti irogavisaaquitero ontaniqui savincaguiteri icantajitica Pentecoshite.

¹⁷ Ontaniquiqueate nochoocajiaquegueti Miretoqui ariqueate itigarancaque Paavoro camantajiaquiterineca quempoguijajiguirica quemisantajiatsica guintenijiatsica Epesoqui, icampojaqueri:

—Icajemacaanquempi Paavoro.

¹⁸ Icoraquejiapojaquegueti icantajiavaqueri: “Aviatimpajia pitsajiaque quero nototaquita nochoocatimojiaquitimpigueti. Iroaqueragueti nocoraquetaque acaniqui Ashiaqui nocomajataca irosati imaica.

¹⁹ Ogantaga nantavaetaqueneri Amajirote, tee naventacotempaji, mana oparijaatanaque oshequi nojaquija, aisa natsipevaetaca isarijavetaquenagueti joriojia, inintajivetaacatari irimetojajiaquename.

²⁰ Teequeate novashianteji aparato noquenquetsatacaajiaquempigueti noguisotoamajataquempiro maasano. Notsatacaajiaquempi pichoocajiaquegueti icapiocajitaqueti jero aisa pitsovironaquitepaequi.

* **20:7** Iroguenti opariantanaja semana savincaguiteri tominco. Irootaque ipochatantajaca Jesoshi.

²¹ Aisa notsatacaajiaqueri joriojia jerijia aisa guiriegojia nocantajiaqueri incantashitatijaianajempa irovshiantajianajero iguempevaerejia inquemisantajiajeri Aapani Irioshi jeri aisa Amajirote Jesoquirishito.

²² Imaica noanaque Jerosarequi, iriguentitari tigarancaquena Ishire Aapani Irioshi. Teequea nontsateji taaca oaquenane.

²³ Iroguenti notsataque querocaguete noanaque icanquenaqueate Ishire Aapani Irioshi mana irashitacojitaquena santanaqui aisa irantsipetacajaiquena.

²⁴ Cotanquitsi naatimpa tee nontsarogueji capichaji, teenicate nontsaroacaguemparoji nometojaquegueti. Iroguenti nonintaque nonteroncamajaquero maasano icantaguetaquenaca Amajirote Jesoshi, nontsavetantaquero Quenquetsatsarentsi Oganejencatatsica camantacajica quero icota Aapani Irioshi icavintsajantigueti.

²⁵ “Coramani noquenquetsatacaajiaquempi noquenaguetanaquegueti notsavetantqueri Aapani Irioshi quero icota imajirontagueti. Imaica notsamajataque aato pinejajjaanatsi maasano aviatimpajia.

²⁶ Irootaquequea imaica nocamantantajiaquempica choocaguete teeca inquemisantajiguete teequeate naroguenti quejetacaanterine impeaquempaguete.

²⁷ Nontsavetantaguequerotari maasano icanquenaca Aapani Irioshi, teequeate nomanacoteji aparo.

²⁸ Irootaquequeate nocantantajiaquempica inchiqiuotsiqueate pamenajiajempa aviatimpajia. Pinguempoguijajiajerija maasano quemisantajiaatsica, iriguentitarite cantajiaquempi Ishire Aapani Irioshi pinguempoguijajiajerija quemisantajiguirica Amajirote metojaventajiacajica, ivegaratantajiacajiro iriraja.

²⁹ Naatimpa notsamajataque iroompaqueate namerencanaquitatiguempa incoquetashijiaquempi amataajiaatsica iroguivorocajiaquempi inquejejiapojaquempari lobo† yoguivoroquiriguete oveja.

³⁰ Aisa iconoajiaquempi amataajiaatsica intsatacaajiaquempiqueate teeca iroomajaca iramatavijiaqueriqueate intati yapiguemisantavetacaca iriguentijitari iroguijatacojianaque.

³¹ Cotanquitsi naatimpa noncantajiaquempi inchiquiojia yamatavijajiguimpitsi. Aato pipeacojigarotsi ogantagarite notsatacaajiguimpi savincaguiteriqui aisa tsiteniriqui niraaniraavaetaqueate irosatiqueate najagantsitacotanaque 3 ajagantsi.

³² “Imaica, napiguemisantarijiate, nocanqueri Aapani Irioshi inquempoguijajiajemp. Pinguemisantamajatero Icanqueca camantajiacajica icavintsajajiacajiguete iriatimpa, irooqueate tampishitacaajiajempineca. Coajica incapiocajiacaji ontaniqui ichooaqueguete iriatimpa, anconoajiaquempari maasano icoguiajiaqueca imeshiajiaqueca.

³³ Naatimpa teequeate nonintsijiguete itsipa igavorejaquirite, imentaquitsite, iitsaarepae.

³⁴ Pitsajiaquetarite aviatimpajia, inchiqiuotsi nantanontaca naatimpa nacoqui naaguete guete nonintaguequeca aisa nojocajiguinirica notsipajiacaca.

³⁵ Oraqueate noquejetaquerogueti imaica cameetsanijite pogujatacotimentajiaquenaniite pincavintsajimentajiaquerinijite coacojianquitsica. Pinguenquejajiajero icanqueca Amajirote Jesoshi icanti: ‘Caaviji anaantaque ocameetsamajataque pincavintsajantajiaqueguete, anaquero aviguentijia incavintsajaitaque.’ ”

³⁶ Iroompaqueate icantajiaqueriguete igueroncanaca yamanaqueri Aapani Irioshi itsipajiacari maasano.

³⁷ Irajaanacaqueate maasano, yavinajiajavajiri Paavoro, inintavorotavajiriqueate.

† 20:29 Irira **lobo** iquejevecari shiishi iririjeguini catsimari. Ichooati tomirishiqui otsipaniqui guinteninintsiqui.

³⁸ Ishimampo jancavae jianacaqueate iquemajiaqueritarite icantajianajiri aato inejajajiritsi. Ariqueate itsipatsipaitanacari yojocajijaatiri inirojeguiqui quenajarontsi yamenajivajiri itetanaja.

21

Yoanaquegueti Paavoro Jerosarequi

¹ Ariqueate nopintsamajaivecari napiguemisantarijiateni, aritaque noajianaji notejianaja namajatacojianaque, catinca noajianaquero Coshiqui. Ariquea osavincaguitetanajigueti nogaajianaca, ariqueate noquenajatacovaetanaque Irorashiqui. Osavincaguitetanajigueti nogaajianaca aisa, noquenajatacovaetanaque aisa Pataraqui.

² Ariqueate nonejajiapojaquero inirojegui quenajarontsi oananquitsineca Penishi-aqui, ariqueate notejianacaro.

³ Ariqueate namajatacojianaque noajianaque, namenacojianaquero Tsipere iroguenti ochoocatantaca najampatequi. Nanaanaquero noajianaque Shiriaqui, ariquea nagatacojiapanajanti Tiroqui irogaguijitanaquequeate ajaararontsi.

⁴ Ariqueate oraniqui nonejajiapojaqueri quemisantajiatsica, yaajiavaquena ariqueate nomaimojianaquero 7 savincaguiteri. Ontaniqui nochocajiaquegueti Ishire Aapani Irioshi iquenquetsashirentacajiaqueri iriatimpajia icantantajavetavacarica Paavoro:

—Aatocaja pijati Jerosarequi.

⁵ Aapojacagueti nopintsatancaca ariqueate noajianaji nosotosoitanaqueroqueate ovegarapojacagueti tsovironaquipae. Maasano iriatimpajia jerojia aisa imanquigarejia jerijia irijanijiate itsipajianaquena otsapijaqui impanequiqui. Notigueroajianacaqueate namanajiaqueri Aapani Irioshi.

⁶ Ariqueate noquenquetsatacaajianajiri, icantajivajana iriatimpajia: “Iintsija”, ariquea notejianaja noajianaji. Iriatimpajia ipiapiaitanaja itsovironaqueitequi.

⁷ Ariquea noponeanaca Tiroqui, namajatacotanaque noajianaquero Toremairaqui, ariqueate nagatacojiapojaque oraniqui. Noajianaquequeate nonejajiapojaqueri napiguemisantarijiateni, aparó nomaimojianaquero.

⁸ Osavincaguitetanaquegueti noajianaque Sesareaqui narejerejeipojaca itsovironaqueitequi Jeripe tsavetantiroca Quenquetsatsarentsi Oganejencatatsica. Iriatimpajia iriguenti itsipajia 7 cavintsajajiguirica quemisantajiatsica inintacajaitaqueca iroaqueraqueti savicavenqueroneca irojocajiaquenero osheca cocojianquitsica guinteni-jiatsica Jerosarequi.

⁹ Choocaqueate 4 irorijanitejia majinarojia. Iroatimpajia iroguentijia tsavetantajiguiroca icantajiguiroca Aapani Irioshi.

¹⁰ Nochocajianaquequeate oshequini savincaguiteri, icoraquetaquequeate tsavetantiroca icanquerica Aapani Irioshi icantajitica Agavo. Iponeaca Joreaquei,

¹¹ iroguenti icoraquetashitaque irinejajiaquitena. Yaitsitanaqueriqueate ichompimashite Paavoro yoishoguititaca aisa iracoqui, icanti:

—Icanti Ishire Aapani Irioshi: ‘Ariqueate inquejiaqueri joriojia Jerosarequitica iroishojiaqueri ashintarica irica ichompimashite, ariqueate irojocajiaqueneri teeca iriojia joriojia irajianaqueri.’

¹² Iroompaqueate noquemajivaquitigui naatimpajia jerijia aisa guinteni-jiatsica Sesareaqui nocantajavetavajariqueate Paavoro:

—Aatocajate pijatitsi Jerosarequi.

¹³ Cotanquitsiqueate icanti Paavoro:

—¿Taaquea oaquempi piraantajiacaca? Naroguenti pishimampo jancacaanaca. Teenicate nompincatsateroji iroishojitaquenaguete. Iriogueti nintanquitsine Amajirote Jesoshi nometojavejaqueri Jerosarequi, aatoqueate nagamajarotsi nometojaqueguete.

¹⁴ Nocantajavecari, cotanquitsi teequeate inquemisantajiguenaji, aatoquea nocantajiri, ariotapojaque. Nocantajiaqueri:

—Iriompate Aapani Irioshi querocacaqueate ininqueca.

Yarejetacagueti Paavoro Jerosarequi

¹⁵ Ariqueate nonetsanajianaca noajianaque Jerosarequi.

¹⁶ Yoguijagarantajianaquena napiguemisantarijateni guintenijiatsica Sesareaqui, yamajiaquenari Manaso poneanquitsica coramani Tsiperequi irioquea quemisantat-sica coramani, ariqueate nomaimojiaqueri.

¹⁷ Ariqueate narejerejeipojacagueti Jerosarequi yaajiavajanaqueate napiguemisan-tarijateni ishinejianaja.

¹⁸ Osavincaguitetanajiguete itsipajianaquena Paavoro noajiaquitiqueate nonejaji-aquitiri Santiago. Ariqueate ichooajiaque maasano quempoguijajiguirica quemisan-tajiat-sica icapioajiaqueate.

¹⁹ Iira Paavoro iquenquetsatacaajiaqueri itsavetacotaquero maasano quero icotani yagavejacaaguetaqueriguete Aapani Irioshi iquenquetsatacaajiaqueriguete teeca iriojia joriojia.

²⁰ Iroompaqueate iquemajiavaquitigui ishineventajianacariqueate Aapani Irioshi. Icantajiguiriquea:

—Cameetsataque, napiguemisanterite, cotanquitsi choocajia yoshequiamajatatigu-inimaja apijoriojiateni quemisantajiguirica Quirishito iroguenti inintaque irinetsana-jiguero itioncacotanaqueca Moishishini.

²¹ Iriatimpajia iquemacojiaquempi pitsatacaajiaqueri joriojia guinteniniatsica osamani conoajiacarica teeca iriojia joriojia ijijiaqueje pitsatacaajiaqueri cameetsani-jite aatonijite inetsanajiajiro itioncacotanaqueca Moishishini. Aisa ijijiaqueje picantaji-aqueri aatonijite itotsaiquitsijajiri ichonquimashi irijanijiate aisa aatonijite yoguijata-cojiajirotsi icantajiguinica avaesatinijiate.

²² ¿Querocampa ancojiaquempani? Imaica inquemacojiavaquempiguete incapio-caventajiapojempi.

²³ Noquenquejiaque caaviji ocameetsataque pinquemisantajiaquenaguete noncan-tajiaquempica. Chooca acaniqui 4 shiramparjia jocaguinatataantajianquitsineca irinetsanajiaquerogueti icantajiaquerica Aapani Irioshi icantajigui: ‘Coajica nonet-sanajiaquerogueti nocamantajiaquempica nojocaguinatataantajiaquempica.’

²⁴ Paajianaqueri teemporoqui pintsipajianaquempari pincanteri Aapani Irioshi irogameetsatantajiajempica. Pivegarajigueneri maasano cameetsanijite irojocaguina-jiaquempica. Irootaquequeate intsatantajiaquempica apijoriojiateni mana itsojeventa-jitaquempi intati, ogantagatirajatarite pinetsanatiro itioncacotanaqueca Moishishini.

²⁵ Cotanquitsi irira teeca iriojia joriojia quemisantajiat-sica notioncajiaqueneri mana nocantajigui intati aatoqueate ishecajjaaritsi imetojajitaquenerica ipejaiguica irioshivijitashitaca, aatoqueate ishecatacojjaarotsi iriraja, aatoqueate ishecajjaaritsi icaticajiguete, aisa aatoja ijatashijajirotsi manquigarentsi teeca iro irashi.

²⁶ Ariquea iquemisantajiaqueri Paavoro. Osavincaguitetanajiguete itsipajianacari jocaguinajianquitsineca irogameetsajiaquempica. Ariquea yoanaque teemporoqui it-saromentantajitarica Aapani Irioshi icamantajiaqueri saserrotejia querocaca onteron-cantanajempica irogameetsatantajiajempica cameetsanijite irijitorejiaqueneri Aa-pani Irioshi viratsipae.

Yashitacojitaqueriguete Paavoro santanaqui

²⁷ Ariqueate pajinigueti onteroncanajempaji 7 savincaguiteri yogameetsatantajiacaca, iriraquea joriojia poneaguetanquitsica Ashiaqui inejajiaqueri Paavoro oniganquirequi oticaacoroqui teemporo yogametsajajiaqueriquea capiocajianquitsica, icatsimajianaquequea, ariqueate yaajiaqueri.

²⁸ Ariqueate icajemajianaque icantajigui:

—Shiramparijia ishiraerijia, pamitacojiguenashiatsi. Iriotaque irira quenaguetatsica amatavijajiguirica caquinte. Iroguenti isavicaventi itsatacaajiaqueriqueate maasano, iquenquetsatacoguishetaqueri agonorojia jero aisa maasano itioncacotanaqueca Moishishini. Aisa injashicarocatica teemporo. Aisa yamajiaqueri guiriegojia yoguijaajiaqueri acaniqui teemporoqui, icovaeguishetacaantacaroca ocatica yashintacaca Aapani Irioshi.*

²⁹ Icantantajiacarica yamenajiaqueri itsipajiacari Toropimo poneanquitsica Epe-soqui ijiqueji ariji itsipatacari iriatimpa teemporoqui itsaroventantajitarica Aapani Irioshi.

³⁰ Opejaianaqueri itsimajenca maasano, ishijaiapojaca yaajiaipojaqueri Paavoro, inoshicajianaqueri sorororo soaa yaajianaqueri sotsiqui otantotacotacaguete teemporo. Taampina yashijiaquero osotomoro.

³¹⁻³² Irovepojaca irimetojajiaquerime, cotanquitsi iroompaqueate icamantajitaqueri imajirote coaretajia opejaianaqueri itsimajenca maasano Jerosarequitica, icajemajiaquequeate icapiocajiaqueriqueate igoaretajiate jerijia aisa itsipajia imajirojiate, ishiamajajianaca yoajianaque iramenajiaquiteri. Iroompaquea inejajiavaqueri iriatimpajia, yovashiantajajiriqueate Paavoro teequeate intavaajiajeriji.

³³ Ariqueate icoraquepojaque imajirote coaretajia yajiricapojaqueri Paavoro ishiticacaanqueri mavite cavorejatsari. Icoacojiaqueri catsimajiaquerica icantiri:

—¿Taa ipajita irica? ¿Taate opajita picatsimatimentajiaqueri?

³⁴ Cotanquitsi iriatimpajia arimpaqueate icajemajianaqueri icantashitatijaianacaro icantaguetaquerica itsipaqueueate cantashitatiavacaroca teequeate aparato incantajigueriji, irootaquequeate tee inquemamajajigueri imajirote coaretajia, yaacaantantacarica Paavoro itsovironaquequitequi coareta.

³⁵ Iroompaqueate yarejejiapojacaguete yataitapinijiguiguete coaretajia, icompijianacariqueate yogajenocajianaqueriqueate aatonijite yaajiavaqueri catsimajiaquerica.

³⁶ Yoguijaguijaipojaqueriqueate icajemajiaipojaquequeate:

—¡Imaicashia irimetoje!

Paavoro iquenquetsatacaajiaqueriguete capiocajianquitsica

³⁷ Pajiniguete inquijacaanaquerime sotomorontsiqui iquenquetsatanaque Paavoro icantiri imajirote coaretajia:

—¿Cameetsampa nonquenquetsatacaguempi?

Icantiri:

—¿Pitsatirompate aviatimpa iguenquetsatsare guiriego?

³⁸ Iroosacanicate, ¿teesacanicate aviguenti irira Ejepitoquitica nintavetanquitsica iroguisotoaquerime majirontatsica aajianaquerica 4,000 metojantatsica ontaniqui oquitamampororoipojaqueguete?

³⁹ Icantiri Paavoro:

* **21:28 icovaeguishetacaantacaroca ocatica yashintacaca Aapani Irioshi.** Chooa 3 oniganquitejirepae teemporo. Chooa aparato irashi shiramparijia ishiraerijia, chooca otsipa ashi manquigarentsijia ishiraero, chooca otsipa irashi itsipajia teeca irio ishiraeri. Inquijajeguete teeca irio ishiraeri niganquitejirentsiqui irashi ishiraeri, irimetojajiteri, icanquequea covaeguishetanaca.

—Tee. Naatimpa naroguenti jorio, ariguenti novogui Tarisoqui ora caavijica iquemacomajajiti Shirishiaquitica. Iintsija pincante nonquenquetsatacaqueri capiocajianquitsica.

⁴⁰ Iriraqueate imajirote coaretajia icantiri:

—Iintsija.

Icatianaqueate Paavoro yataitampinitacaca coareta, icanti vacoc. Imajerejianaquegueti maasano iquenquetsatacaajiaqueri, iquenquetsatantacaro iguenquetsatsare evereo, icanti:

22

¹ “Nogonorojia aisa nomajirojiate, pinquemisantajiaquena nonquenquetsaventanaquempagueti.”

² Iquemajiaquaquerigueti iquenquetsatantanacaro iguenquetsatsare evereo iquemisantamajiaquaqueri. Ariqueate icanti Paavoro:

³ “Naatimpaqueate naroguenti jorio, ariguenti novogui Tarisoqui choocatanquitsica Shirishiaqui, cotanquitsiqueate ariguenti noquenquevaritaque acaniqui Jerosarequi. Iriguenti tsatacagana Gamarieri maasano itsatacaantica avaesatinijiate. Ogantaga noquemisantamajatiiri Aapani Irioshi noquejejaquempi aviatimpajia imaica.

⁴ Coramani caaviji nocatsimamajatiiri guijatacojiguiroca ocatia icantajitica Quenavoquirontsi. Naajianaqueri shiramparijia aisa manquigarentsijia irashitacojitaqueriqueate santanaqui irosatiqueate irimetojajiguetaqueri.

⁵ Irira saserorote anaantamajatanquitsica, jerijia majirontajiatitsica itsamajajiaquena arimaja nocantamajataque imaica, iriojiatarite jocajiaquaquenaroca paperi naajianaqueneri agonorojia guintenijiatitsica Tamashicoqui cameetsanijite naimentajiaquerinijite quemisantajiatitsica naajianaqueriqueate Jerosarequi irantsipetacaimentajitaquempariniji.

⁶ “Cotanquitsiqueate iroompaqueate naavetanacarogueti oquempejipojaquegueti Tamashico pajinigueti intampaticatapojaque catsirincaiteri ocantanaquitiguiqueate morec oponeaca jenoqui inquitequi oashitapojaquena anquiritacotapojaquena.✧

⁷ Notejanaque isaviji quepatsiqui toren noquemiqueate icantajipojana: ‘Saoro, Saoro, ¿taa picatsimatantaquenaca?’

⁸ Naatimpaqueate nocantsitariqueate: ‘¿Taampate aviatimpa, Nomajirote?’ Icantanaqueate: ‘Naatimpa naroguenti Jesoshi Nasarequitica picatsimaqueca.’

⁹ Iriraqueate notsipajiacaca yamenavaquerogueti ocantaquegueti morec, itsarorajianaquequea, cotanquitsiqueate teequeate inquemajigueriji quenquetsatanquitsica.

¹⁰ Naatimpaqueate nocantiri: ‘Nomajirote, ¿quero noncoquempani?’ Icantiri: ‘Imaica pintinajanaque poanaque Tamashicoqui, ariqueate incantajiquempiqueate ontaniqui maasano taaca pisavicaventaqueca.’

¹¹ Namenavaquerogueti ocantanaquegueti morec ariqueate tee namenajeji, manaqueate yacatsajianajanaquea intati notsipajiacaca, yaajianaquena Tamashicoqui.

¹² “Ariqueate ichoocaque oraniqui apaniro icantajitica Ananiashi tsamajatiroca itioncacotanaqueca Moishishini. Maasano joriojia guintenijiatitsica ontaniqui Tamashicoqui cameetsaqueate iquenquetsatacojiaqueri.

¹³ Icoraquequitiqueate inejaquitanaqueate. Yarejetapojacagueti icampojaquenaqueate: ‘Napiguemisanarite Saoro, pamenanaje.’ Ariqueate nocotanaja namenajiji, nonejaqueriqueate.

✧ 22:6 Ya. 9.1-19; 26.12-18.

¹⁴ Ariqueate icanquena: ‘Irira Irioshite avaesatinijiate icoguaquempiqueate cameetsanijite pintsaqueronijite inintaguequeca. Icoaguaquempi cameetsanijite pinejaquerinijite irira Caavijica Icomajamajata aisa pinquemaqueronijite icanqueca ivagantequi.

¹⁵ Aviatimpa pintsavetanqueri pintsatacaajiaqueri maasano caquinte pincamanteri maasano pamenaguetaqueca aisa piquemaqueca.

¹⁶ ¿Taampa opajita poguijavaque? Pincatianaqueja poviñacajatempa paventemparija Amajirote, pincajemaqueri ivajiroqui, cameetsanijite inquivitsitajempironijite piguempevaere.’

¹⁷ “Ariqueate nopianaja Jerosarequi noanaquequeate teemproqui itsaromentajitarica Aapani Irioshi namanaqueriqueate. Ariqueate nonejaitatiguiro manaqueate oquejetimotaquena noguimaanequi.

¹⁸ Inegaaquena Amajirote icanquena: ‘Pijashiatsi taampina, pisotoantanaquemparo Jerosare, acaniquitarite pintsavetantavequenaqueate aato iquemisantajiguimpitsi.’

¹⁹ Naatimpa nocantiri: ‘Nomajirote, iriatimpajia yamenamajajiaquena coramani noapinitaquegueti shinagogapaequi icapioicapinijiacagueti joriojia naajianaqueri tsaromentajiguimpica nashitacojiaqueri santanaqui notavaacaantajiaqueri.

²⁰ Aisa coramani imetojajitaquerigueti tsavetantimpinica Ishitivano, ariqueate nochooque naatimpa noshinevaetanacaqueate, irootaquequeate nonetsanatsitantavaricaqueate iitsaarejia metojajiaquerica.’

²¹ Cotanquitsiqueate iriatimpa icantana: ‘Pija, nontigarancaquempitarite osamani pinquenquetsatacaajiaqueri teeca iriojia joriojia.’ ”

²² Ariqueate iroaqueragueti iquenquetsatanaquegueti Paavoro iquemisantajiavetavacariqueate maasanojia, cotanquitsi iroompaqueate iquemajivaquerigueti iquejetanaquero imaica icantigueti inquenquetsatacaajiaqueri teeca iriojia joriojia icajemajianaquequeate:

—Imaichashia irimetoje aatoniji ichoocataji acaniqui quepatsiqui. Teequeate oncameetsateji iranijajegueti.

²³ Arimpaqueate icajemajianaqueri ipishoncamagojianaqueroqueate otsipamago iitsaare ipishoncavanejianaqueroqueate quepatsivane cameetsanijite intsatimentajiaquerinijite icatsimamajatatiguirinimaja Paavoro.

²⁴ Irira imajirote coaretajia yoguijajianaqueri intompogui intavaacaantajiaqueri cameetsanijite incanquequeate taa opajita icatsimatimentajiaqueri.

²⁵ Iroompaqueate yoishojiavecarigueti intavaajiaquerimequeate iquenquetsatanaque Paavoro icantiri tsipatarica imajirote coaretajia catianquitsica acaniqui:

—Naroguentitarite gonorontarica Iromaquitica. ¿Arimpate pagavejaque pintavaacaanquena tequeratancate incoacomajajitenaji?

²⁶ Iroompaqueate iquemavaquitigui yoanaque icamantaquitiri imajirote icanti:

—Aatoshiatsi pitavaacaantiriti, iriguentisacanicate gonorontarica Iromaquitica.

²⁷ Ariqueate yoanaque ichoocaquegueti iriatimpa icantiri:

—Intsija pincantena, ¿arimaja aviroompaqueate gonorontarica Iromaquitica?

Icantiri:

—Jeejeguitatsi, naroguentiguitatsi gonorontarica Iromaquitica.

²⁸ Icantiri:

—Naatimpaqueate mana novegaraventaca intati oshequi imentaquipae nompeaquempaqueate igonorojia Iromaquitica.

Icantiri Paavoro:

—Naatimpaqueate naroguentiqueate nopeaca igonoro Iromaquitica iroaqueragueti novoaque.

²⁹ Ariquea iquenajianaquequea itsarajianaquequeate tavajiaaquerinemeca ariquea itsipacarejajapanajantiri. Ariqueate iquejetaca imajirote coaretajia iriatimpa itsaroanaque inejaquetarite ishiticacaanqueri gonorontarica Iromaquitica.

Yaajitanaquerigueti Paavoro incoacojiteri

³⁰ Iroompaqueate osavincaguitetanaquitigui inintaque imajirote coaretajia intsamajaquero taaqueate opajita icatsimatimentajiaqueri joriojia, ishiticarejacotacaanqueri igavorejatsarite. Ariqueate icajemacaantajiaqueri saserorotejia anaantajanquitsica jerijia majirontajatsica icapiocajiaqueri. Ariqueate yaajitanaqueri Paavoro yogatijia-apojaqueri ichoocajiaquegueti iriatimpajia.

23

¹ Iira Paavoro yamenajiaqueri sorerere majirontajatsica icantajiguiri:

—Nogonorojia, naatimpa ogantaga noquemisantamajateri Aapani Irioshi nocomajamajata irosati imaica. Notsataque tee onchoocateji incatsimatimenquenaca.

² Iiraqueate saserorote anaantamajatanquitsica icantajitica Ananiashi iquemavaquitigui icantajiguiriqueate choocajianquitsica Paavoroqui:

—Pampatoncavaganteteritsija.

³ Icantanaquequea Paavoro:

—Avirompaqueate irampatoncaque Aapani Irioshi, aviatimpa mana picameetsatamampeaca intati. Iroorijite imaica iroguenti pisavicashivetaca acaniqui pim-pampiatavaqueroqueate itioncacotanaqueca Moishishini cameetsanijite pincanque aricampate nantaque teeca oncameetsate aricaca tee. Cotanquitsi imaica mana pantaque icantimentantaqueca papatoncavagantetacaantaquenagueti.

⁴ Iira choocajianquitsica acaniqui icantajiguiri:

—Oraqueate aato piquejetiri imaica saserorote anaantamajatanquitsica antinirica Aapani Irioshi.

⁵ Icantiri Paavoro:

—Nogonorojia, teenicate nontsatenica nojiqueji tee irioji saserorote anaantamajatanquitsica. Nontsaquemequate aatomequeate noquejetirome imaica. Ocantitarite itioncacojiqteca: ‘Aatoja pinijashinataritsi pimajirojiate.’

⁶ Ariqueate iriraquea Paavoro yamenajiaquerigueti majirontajatsica iconoagaran-tajiaa jerijia saroseojia, itsipa jerijia pariseojia, icajemanaquequeate icanti:

—Nogonorojia, naatimpa naroguenti pariseo, iriguenti oacaantana pariseo, cotanquitsi imaica iroguenti icatsimatimentajitaquena nocanquegueti intancorejajianaje metojajivetanquitsica.

⁷ Iroompaqueate icantaquitigui ariqueate icojianaca iquenquetsatavacaajianaca yacavacajaianaca pariseojia jeri saroseojia icatsimatavacaajianaca.

⁸ Icantajiaquetarite saroseojia aato itancorejanaji metojajiatitsica. Icantajiaquequeate aisa tee inchoocateji irashivantijitete Aapani Irioshi, aisa tee inchoocateji jeocanquitsica. Iiraqueate pariseojia icantashitatijaiacaqueate mana icantajiaque intati intancorejajianaje metojajivetanquitsica, aisa chooca irashivantijitete Aapani Irioshi, aisa chooqueate jeocanquitsica.

⁹ Arimpaqueate icajemajianaque maasano. Icatiagarantajianacaqueate pariseojia tsatacantajiguira itioncacotanaqueca Moishishini icantajiguiri:

—Notsajiaqueri teequeate iranteji teeca oncameetsateji. Iriocampate quenquetsatacaqueri jeocanquitsica irioca irashivantite Aapani Irioshi.*

* 23:9 Chooa iroquetinica tioncanquitsica ogavitaquero acaniqui, ocanti: “Oquejetacagueti, shoshoh acatsimatiritsi Aapani Irioshi.”

¹⁰ Iriatimpajia arimpaqueate icatsimatavacaajianaca irootaquequeate yamenantacarica imajirote coaretajia yagamajacotanacari Paavoro icanti aricampa iriserajaiaqueri, icajemacaantantajiacarica igoaretajiate irapitsajivajeri irajaianajeri intsomogui itsovironaquitequi coaretajia.

¹¹ Oraqueate osavincaguitetanajiguetei coajica otsitenitanajiguetei aisa irira Amajirote yonigaacari Paavoro, icatiapojaca quempeji icantiri: “Pishinetanaquempa, Paavoro, aato pitsaroguitsi. Quejetaca pitsavetanquenaguetei acaniqui Jerosarequi, ariquiteate pinquejetaquempa ontaniqui Iromaqui.”

Isariajivecariguetei irimetojajiquerime Paavoro

¹² Osavincaguitetanajiguetei iconoagarantajia joriojia iquemavacaajiaca isariajacari irimetojajiaqueri Paavoro, icantajigui:

—Imaica, aatoguetei ametojiri, aato ashecajijaatsi aisa aato amirajijaatsi. Iintsijate irogashinoncajimentajiro Aapani Irioshi aatoguetei anetsanajiguero.

¹³ Yavisajiaquero 40 sariajiacarica irimetojajiguetei.

¹⁴ Yoashitantajianacarica saserorotejia anaantajanquitsica jerijia majirontajiaatsica icantajiaipojaqueri:

—Naatimpajia noquemavacaajiaca nocantajiaque aatoguetei nometojiri Paavoro, aato noshecajijaatsi. Aatoguetei nonetsanajiguero nonintajiaque irogashinoncajimentenaro Aapani Irioshi.

¹⁵ Imaica aviatimpa poajianaque pamatavijajiaquiteri imajirote coaretajia pincantajiaqueriqueate iramajianaquempiri Paavoro cameetsanijite pincoacotimentajiaquerinijite. Naatimpajia nosenacashijiaquempiriqueate quenavoquirontsiqui nometojajiaqueri.

¹⁶ Cotanquitsi iroompaqueate iquemacoqueriguetei irijanite itsijoite Paavoro, yoanaque itsovironaquitequi coaretajia icamantapojiaqueri Paavoro.

¹⁷ Iroompa Paavoro icajemaqueri itsipataca imajirote coaretajia, icantiri:

—Jeri irica notineri paanaqueri pimajirotequi cameetsanijite incamantimentaguetaquerinijite.

¹⁸ Yoanaque itsipatanacari icamantapojiaqueri:

—Irira Paavoro yashitacojitaqueca santanaqui icanquena namampijaquempiri irica, inintaque incamantaguetaquempi.

¹⁹ Iriatimpa yacatsatanaqueri yaanaqueri oraniqui icantiri:

—Iintsija imaica pincamantena.

²⁰ Iriatimpa icantiri:

—Noquemacojiaqueri joriojia iramatavijajiaquempi incantajiaquempi osaitequera paajianaqueri Paavoro imajirojiatequi incoacomajajiaqueriqueate.

²¹ Cotanquitsi aato piquemisantajiguiritsi, choocajiarite yavisajiaquero 40 senacashijiaquemparinca irimetojajiaqueri, icantajiaquetarite: ‘Aatoguetei ametojiri Paavoro, aato ashecajijaatsi aisa aato amirajijaatsi. Iintsijate irogashinoncajimentajiro Aapani Irioshi aatoguetei anetsanajiguero.’ Imaica chooca yoguijacojiaquempi quero pincanterini.

²² Iroompaqueate iquemaquitiguiri imajirote coaretajia itigarancajiri icantavajiri:

—Imaica aatoja pitsavetitsi.

²³ Ariquiteate icajemajiaqueri mavite itsipataca icantajiaqueri:

—Pincajemajiguetei coaretajia pincapiocajiaqueri, 200 irovegariaquempa anijiananquitsineca, aisa 70 shiacojiananquitsineca quitavaireriqui, ariquitea aisa 200 ajiricajiananquitsineca imocorojamento. Oraqueate ompitsecamajatanaquetei paajianaqueri Paavoro Sesareaqui.

²⁴ Imaica pinetsanajigueneri Paavoro quitavaireripae irishiacotantanaquempaca cameetsanijite parejetacamentajiaquemparinijite ichoocaquegueti majirontatsica Perishi.

²⁵ Yojocajivaqueneri paperi itioncaquenerica majirontatsica Perishi ocanti:

²⁶ Narotaque Caraorio Irishia, notioncaquempi, nomajirote Perishi nopincatsatica. ¿Cameetsaca pichoocaque?

²⁷ Imaica nonintaque nontioncacotaqueri irira Paavoro yaajianaquempica coaretajia. Irira joriojia yaajiaqueri icatsimajiaqueri inintajiavetaca irimetojajiaquerimequeate, cotanquitsi naatimpa iroompaqueate noquemacoquerigueti iriguenti gonorontarica Iromaquitica noanaque notsipajianacari nogoaretajiate namiqueriqueate naajivajiri.

²⁸ Ariqueate nonintaque naatimpa nontsataque taa opajita icatsimatimentajiaqueri. Irootaquequeate naantajiavetanacarica ontaniqui ichoocajiaquegueti imajirojiate.

²⁹ Ariquea iriatimpajia icamantajiaquena iroguenti icatsimatimentajiaqueri yamenajiaquerigueti teequeate irinetsanatajeroji itioncacotanaqueca Moishishini, cotanquitsi naatimpa namenaqueri tee onchoocateji querocampate iroguijamentajiaqueri santanaqui aisa irimetojajitaquerigueti. Manaqueate isarijashijiavecaro intati.

³⁰ Irootaquequeate iroompaqueate noquemacoquerigueti isariajiacari joriojia irimetojajigueri notigarancantarica aviatimpaqui. Aisa nocantajiaqueri catsimajiaquerica iroajianaque inchiquitsi incamantajiaquitempi. Imaica ariotapojaque.

³¹ Ariqueate irira coaretajia inetsanamajajiaquero icantajiaquerica. Iroompaqueate onianquiiitepojigueti yaajianaqueri Paavoro Antipatirishiqui.

³² Osavincaguitetanaquegueti irira coaretajia anijijiananquitsica ipiapiaitanaja Jerosarequi. Irira shiacojiananquitsica quitavaireriqui irioqueate tsipajianacari Paavoro.

³³ Ariqueate yarejerejeipojacagueti Sesareaqui yojocajiapojaqueneri majirontatsica paperi, ariqueea icantajiguiri:

—Jeri Paavoro irica.

³⁴ Iteroncaqueroguetiqueate yapatsajavantaquerogueti paperi, icoacoqueri Paavoro icantiri:

—¿Quero piguintenita?

Icantiri:

—Shirishiaqui.

Iquemaquegueti ariguenti iguintenita Shirishiaqui, icantiri:

³⁵ —Nonquemisanquempi incoraquejiaquegueti catsimajiaquempica.

Ariqueate icantajiaqueri coaretajia irajianaqueri imapipancotequi Erorishini, inquemoguijamajiaqueriqueate aatonijite ishianajatsi.

24

Iquenquetsatacotanaca Paavoro ipigamentacotanaca

¹ Ariqueate avisanaquegueti 5 savincaguiteri yarejetapojaca Ananiashi irira saserorote anaantamajatanquitsica, itsipatsipaitacari imajirojiate joriojia jeri cantacovenantatsica icantajitica Teritorio irira amitacoquerineca Ananiashi. Iroguenti icoraquetashitaque incantajigueri Perishi imajirojiate taa opajita icatsimatimentajiaqueri Paavoro.

² Irira Perishi icajemacaantaqueri Paavoro. Ariqueate yarejetapojatiga iquenquetsatanaque Teritorio icantiri Perishi:

—Noshineventajiaquempiqueate, jeematsiqueate aviguenti peanquitsi nomajirojiate. Imaica nochoocajiaque cameetsa, teequeate inchoocateji asereajenaneca. Pinetsanaguetajero oshequini teeca oncameetsavetempaji acaniqui aguinteniqui, cameetsatari piquenquejitsitacaro.

³ Maasano nogonorojia querocaguete ichoocajiaque itsaquero, nomajirote Perishi, nocantantajiaquempica: ‘Arioteesaa.’

⁴ Imaica aato nasereamajajiguimpitsi iroguenti nonintaque pinquemisantaquena capichaji noncanquempica.

⁵ Irira Paavoro iriguenti caaviji yasereanti aisa yoanaque itsitacaguetejanaquero iquenquetsatacaajiaqueri nogonorojia joriojia quepatsipaequi, ariqueate icatsimatavacaajianaca itsinampirejavacaajianaca. Iriatimpa iriguentitarite jivatirica quemisantirica Jesoshi Nasarequitica.

⁶ Inintavetaca aisa incovaeguishetaquerome teemporo, irootaque naantajiacarica nonintajiavetaca noncasiticajiaquerime nogujatacojiaquerome icantacaantica nomajirojiate.

⁷ Cotanquitsi icoraquetaque Irishia imajirote coaretajia itaviimentaguetaipojaquenari yaapitsajiaquenari.

⁸ Icantajiaquena quericaca catsimataquerica Paavoro incoraquejiaque incantajiaquempi taate opajita icatsimatimentajiaqueri. Imaicaquea imaica avirompate pininqueguete pincoacotaqueri, pincoacoqueriqueate cameetsanijite pintsatimenqueronijite taaca opajita nocatsimatimenqueri.

⁹ Iirajia joriojia tsipajiacarica icantajiaque:

—Jeejeguitatsi, arimajaqueate icantamajataquequeate.

¹⁰ Ariqueate icanque vacoc irira majirontatsica inquenquetsatantanaquempaca iriatimpa Paavoro. Ariquea icanti Paavoro:

—Noshinevaetaca pinquemisanquena imaica nonquenquetsaventanaquempaguete, notsaquetarite pimajirontsitacani coramani, pinetsanatacopinitavajiri nogonorojia.

¹¹ Imaica nonintaque noncamanquempi, maasano itsajiaque iroaquera avisananquitsi 12 savincaguiteri noaquitiqueate Jerosarequi notsarovenquitariqueate Aapani Irioshi.

¹² Querocaguete nochoocagueque, aricampa teemporoqui, aricampa shinagogaqui, aricampa ocapiocaguetaquete tsovironaqui, teequea ariquea noncantimajigueriji choocajianquitsica ontaniqui cameetsanijite onquenantaquemparo noncatsimatavacaajiaquempa iroguentica incatsimatavacaajiaquempa iriatimpajia.

¹³ Querocampate irajiaquero iricajia ironigaaquempica incantajiaquequea arimaja inejajiaquena nocatsimajiaqueriguete.

¹⁴ Cotanquitsi jero noncamantaquempica: nogujatacotaquero oratica icantajitica Quenavoquirontsi icantacojiavetacaca iriatimpajia, ‘Iro iguemisantashitane.’ Irootaque nantaque noquemisantamajataqueriguete Irioshimajaca itsaromentajianica novaesatinijiateni. Notsamajaque iroguenti iroomajaca maasano itioncacotanaqueca Moishishini, aisa maasano itioncacotanaqueca tsavetantironica icanquerica Aapani Irioshi.

¹⁵ Cotanquitsi ariqueate noquejejiacari iriatimpajia notsaromentajiacari Aapani Irioshi, nocantajiaquequeate intancorejajianaje maasano metojajiavetanquitsica. Intancorejajianaje antajiguiroca cameetsaguetaatsica jerijia aisa antaguetairoca teeca oncameetsateji.

¹⁶ Irootaquequeate nonintantacaca noncoguitempani noncomajamajaquempa cameetsanijite iramenaquenaniijite Aapani Irioshi jerijia maasano caquinte naroguenti comajamajataatsica.

¹⁷ “Naatimpa mana nochoocaque osamani, ariqueate anaapojacaguetei oshequi ajagantsi nopianaja Jerosarequi, naajianaqueneri imentaquipae napijoriojateni coguitejacojianquitsica, jero aisa nojocaqueneri Aapani Irioshi noguishinejantacarica.

¹⁸ Ariqueate noteroncaguetanajiroguetei nogameetsatanajeguetei ontaniqui teemporoqui icoraquejiaque joriojia ponejaianquitsica Ashiaqui yamenajiapojana, cotanquitsi tee apaniro nonejeji incapiocaventajiaquenaqueate caquinte, aisa tee nonejeji noncat-simatavacaguempaji.

¹⁹ Iriomete coraquejianquitsineme imaica incantajiaquempime taa opajita icatsimamentajiaquenaca onchoocaqueme nantaqueca teeca oncameetsateji.

²⁰ Pincantajiguerijate imaica iricajia quero incantajigue. ¿Taate inejaque ontaniqui chapinqui nochoocaqueguetei incapiocantajiacaca majirontajiatitsica? ¿Choocampate nantaqueca teeca oncameetsateji?

²¹ Aricampa iroocampa inejajiaque nocajemanaqueguetei nocanqueguetei: ‘Iroguenti picatsimatimentajiaquena nocanqueguetei intancorejajianaje metojajianquitsica.’ ”

²² Irira Perishi iquemacomajaquerotarite ocatica Quenavoquirontsi Iroomajatatsica, irootaquequeate iquemavaquitiguiiri Paavoro icanti:

—Imaicaquea ariotapojaque. Coajica incoraqueataqueguetei Irishia imajirote coaretajia, irioqueate camantamajataquitenane.

Ariqueate isanticojianaji.

²³ Ariqueate icantaqueri itsipataca imajirote coaretajia:

—Tee onchoocateji otsipa, cotanquitsi aato picantimentajiguiiri incoraquepinijiaquequeate itsipajiacaririnejapinijiaqueriguetei iramajiaqueneriqueate taaca opajita icoguitejaguequeca.

²⁴ Ariqueate anaapojacaguetei oshequi savincaguiteri icoraquetajiqueate Perishi itsipatacaro imanquigare. Iroatimpa iroguenti jorio icantajitica Toroshira. Ariquea icajemacaantaqueri Paavoro iquemisanqueri itsavetanquerogueti quero ancoquempani aventamajaquempariguetei Jesoquirishito.

²⁵ Itsavetanquero quero ancoquempani ancomajamajaquempa aisa cameetsa anchoocaque. Aisa icanqueri coajica aapojempagueti savincaguiteri irogashinoncajajiaqueri Aapani Irioshi quempevaejiatsica. Ariqueate itsaroanaque Perishi, icanqueri:

—Imaica ariotapojaque. Pijataje. Coajica aatogueti taaca opajita nosavicaventi, ariqueate noncajemacaantajempi nonquemisantajempi pinquenquetsataje.

²⁶ Iriguentitarite yoguijacovetavaca irojocaquenerime imentaquipae cameetsanijite irovashiantajeri irootaquequeate icajemacaantantapinicarica inquenquetsatacajaeri.

²⁷ Ariqueate iquejetaquero imaica aavaetanaca mavite ajagantsi. Irioqueate piajari Poroshio Peshito. Irira Perishi manatarite inintaque iroguishinejajigueri joriojia irootaquequeate tee irovashiantantajemparica Paavoro.

25

Paavoro yaventacariguetei Sesa

¹ Ariqueate icoraquepojaque Peshito Sesareaqui impeguempa majirontatsica. Avisanaqueguetei 3 savincaguiteri yoanaque Jerosarequi.

² Iroompaqueate yarejetapojatiga icoraquetashijiaqueri saserorotejia anaantajianquitsica itsipajiacari itsipa joriojia anaantajiatitsica itsojeventajiapojacari Paavoro.

³ Ariquea icantajiguiiri:

—Nonintajiaque pincajemacaantenari Paavoro iramajiqueru acaniqui Jerosarequi.

Iroguentitarite icantimentajiaque cameetsanijite irisenacashitimentajiaquemparinijite quenavoquirontsiqui irimetojajiaqueri.

⁴ Cotanquitsi Peshito icantiri:

—Irira Paavoro choocatarite yoguijaajitaqueri santanaqui Sesareaqui. Naatim-patarite taampinatarite nompianaje.

⁵ Imaica pincantajigueriqueate pimajirojiate iroguijaguijaitanaquenaqueate cameet-sanijite intsavetacotimentajiaquerinijite arigueti arimajaca yantaquero teeca on-cameetsateji.

⁶ Irira Peshito ichoocaquiti ontaniqui 8 savincaguiteri, aricampa 10, ariqueate ipianaja Sesareaqui. Iroompaqueate osavincaguitetanaigueti yoanaque isavicaque icantomajantigueti, ariqueate icajemacaantaqueri Paavoro.

⁷ Iroompaqueate iquijapojaque Paavoro itsipajiapojacari joriojia ponejainquit-sica Jerosarequi, itsojeventajiacariqueate icantajiaquequea yantaquero oshequi cov-aeguishemajaca.

⁸ Cotanquitsi Paavoro ipigamentanaca icantiri:

—Teequea taaca opajita nantagueteji: tee noncantashitatuemparo icantacaanta-jitaquenerica jorio; teequea nanteji teeca oncameetsateji teemporoqui, tee noncov-aeguisheteroji; aisa teequeate nonijashinatempariji majirontatsica Sesa.

⁹ Cotanquitsi irira Peshito ininquetarite iroguishinejajiaqueri joriojia icantiri Paavoro:

—¿Pinintaque poanaque Jerosarequi cameetsanijite noncoacomajaquempi?

¹⁰ Icanti Paavoro:

—Oraqueate arimete pincoacomajataquename acaniqui, aritarite icanque ma-jirontatsica Sesa incoacotantajitaquero acaniqui. Pitsamajataque aviatimpa tee que-roca noncantimajigueriji joriojia cameetsanijite incatsimajiaquenaniijite.

¹¹ Oraqueate aviroguetiqueate nejaquena nantaquegueti teeca oncameetsateji, iintsija irimetojajitena, nonquemisantacoquempaquate aatoqueate nopigamentatsi. Cotanquitsi oraqueate teegueti arimaja onchoocateji icantajiaquenaca, aato queri agavejatsi irojocaquena irimetojajiguena. Arimpaqueate nonintaque noanaque Sesaqui, irioqueate coacomajataquenane.

¹² Irira Peshito icoacojiaqueri itsipatashijiacaca icantomajajiaquerigueti iramene quero incojiaquerini iriatimpajia. Ariqueate icantiri Paavoro:

—Irootarite pinintavintsataque incoacoquempi Sesa, ariqueate poanaque iriatim-paqui.

Paavoro iquenquetsatacaquerigueti majirontatsica Aguiripa

¹³ Avisanaquegueti oshequi savincaguiteri, ariqueate irira majirontatsica Aguiripa* yoanaque Sesareaqui irinejeri Peshito. Oguijatanakeriqueate itsijoite Verenise.

¹⁴ Ichooacajiaquegueti ontaniqui oshequi savincaguiteri, iriraquea Peshito iquenquet-satacaqueri majirontatsica, itsavetacotaqueri Paavoro. Icantiri:

—Chooa acaniqui apaniro yashitacotaantaqueca santanaqui Perishi.

¹⁵ Ontaniquiqueate noanaquegueti Jerosarequi, irirajia saserorotejia anaantajian-quitsica jerijia aisa imajirojiate joriojia icoraquejiaque naatimpaqui, itsojeventajiacari, inintajiaveca nometojacaanquerime.

¹⁶ Cotanquitsi naatimpa nocantajiaqueri irira Iromaquitica tee irimetojantajigueji intati, mana iroqueti incajemacaantajiaqueri catsimajianquitsica jerijia icatsimaji-aqueca, inquenquetsaventaquempa inquemajiaqueri maasano.

¹⁷ Irootaquequeate iroompaqueate icoraquejiaquegueti iriatimpajia acaniqui tee osamani nogueroji, iroompaqueate osavincaguitetanaquegueti ariqueate noanaque nosavicaque nocantomajantigueti nocajemacaanqueri Paavoro.

¹⁸ Iroaqueragueti nojiqueji ariji incantajiaquena yantaque icantimentantica Sesa, cotanquitsi teequea inquejeteroji imaica.

* **25:13 Aguiripa.** Irio icantajitica Ererishi Aguiripa II, irio irijanite Ererishi Aguiripa I (pamenero Ya. 12.1, aisa tioncanquitsica isavivanaqui).

¹⁹ Iroguenti icantajiaquena yogaaquero yamejigaca itsaromentajigarigueti Irioshi aisa iquenquetsatacojiaqueri apaniro metojatsica icantajitica Jesoshi, cotanquitsi irira Paavoro icanti: ‘Pochatanaji.’

²⁰ Naatimpaqueate anaaquena nocoacotantavetacarica Paavoro: ‘¿Pinnacle poanaque Jerosarequi incoacojitaquempiqueate ontaniqui?’

²¹ Cotanquitsi iriatimpa teequea irininteji, manaqueate inintaque iroashitanaqueri Sesa, irioqueate coacotaquerine. Ariqueate nocantantacaca aato yovashiantajitiritsi ogantaga inchoocaqueni acaniqui irosati nontigarancaquerigueti ontaniqui iriatimpagui.

²² Irira Aguiripa icantiri Peshito:

—Nonintaque nonquemaqueri naatimpa.

Iriatimpa icanti:

—Intsija osaitequera pinquemaqueri.

²³ Iroompaqueate osavincaguitetanajigueti yoanaque Aguiripa inquemaqueri Paavoro, itsipatanacaro itsijoite pajitatsica Verenise, jerijia imajirojiate coaretajia jerijia aisa jivajiguirica igonorjia, netsanatacojiaavaetacaqueate maasano. Iroompaqueate iquijaquijaipojaquegueti, iriraquea Peshito icajemacaanqueri Paavoro.

²⁴ Icanti Peshito:

—Majirontatsica Aguiripa, aviguentijia maasano, jeri irica Paavoro icatsimajiaqueca maasano joriojia Jerosarequitica jerijia guintenijiatsica acaniqui. Ogantaga icantajiaquena nometojacaanteri.

²⁵ Naatimpaqueate namenaqueri teequeate iranteji querocampate irimetojimentajiquerica, cotanquitsi iriotarite nintanquitsi iroashitanaqueri Sesa, irioqueate coacotaquerine. Irootaquequeate nontigarancantaquemparica iriatimpagui.

²⁶ Cotanquitsi querocampate noncanteni nontioncaquenerigueti Amajirote Sesa noncamantaquerigueti taa opajita icatsimatimentajitaqueri, teenicate onchoocateji. Irootaquequeate imaica namacaantantacarica pinejajiaqueriniji aviatimpajia, aisa aviatimpa, nomajirote Aguiripa, nonintamajataque aviguenti nejaquerine cameetsanijite pincoacotimentamajataquerinijite, irooqueate nontsatantaquempaca quero noncanteni nontioncaquenerigueti.

²⁷ Namenaquerotari tee oncameetsateji nontigarancashivetaquemparigueti intati santanatacotanquitsica aatogueti notioncacotaqueri taa opajita icatsimatimentajitaqueri.

26

Paavoro icatiimotanacari Aguiripa ipigamentanaca

¹ Ariqueate iquenquetsatanaque Aguiripa icantiri Paavoro:

—Intsija pinquenquetsaventanaquempa.

Irira Paavoro icanti vacoc iquenquetsatanaque icanti:

² “Majirontatsica Aguiripa, notsataque piquemacojiaqueri apijoriojiateni icatsimajiaquenugeti icantajiaquenugeti taaca opajitapae. Imaicaqueate imaica noshinetaca nonquenquetsatacaquempigueti nonquenquetsatacoventanaquempa.

³ Aviatimpa pitsamajatarite yameguetaca apijoriojiateni aisa pitsati taa opajita icatsimatimentantajigui. Irootaquequeate nonintantacaca pinquemisantamajatavaquena, aato piperatanatsi.

⁴ “Naatimpa noguintenitimojiacari apijoriojiateni coramani chaajaniquitirajanagueti irosati imaica. Yamenamajajiaquena noguintenicagueti Tarisoqui jero aisa Jerosarequi, irootaquequeate itsatantamajajiaquenuca quero nocotani.

⁵ Irootaquequeate imaica irinintajiaquegueti incamantajiaquempi, incamantajiaquempiqueate. Naatimpa noponeanacaro iroaqueragueti noquenquevaritapojaque

noguijatacomajataqueri pariseojia. Iriatimpajia caaviji yanaaque itsamajatiro itioncota-
cotaqueca Moishishini.

⁶ Coramani Aapani Irioshi icantajiaqueri avaesatiniteni intancorejajiajeri metojaji-
atsica. Ariqueate noquejetaca naatimpa notsataque nometojavetaquempagueti intan-
corejajena, irootaquequeate yaimentajiaquena acaniqui cameetsanijite pincatsimati-
menquenaniijite pimetojacaantimenquenaniijite.

⁷ Arimajaqueate icanque Aapani Irioshi intancorejajiajeri metojajiatsica, irooqueate
yoguijajiaque maasano agonorojia irirajia ichoviquiguetaqueca 12 irijanijiateni Ishi-
raerini. Irootaquequeate ogantaga isavicaventajiguero irinetsanamajajiaquero inin-
taguetica Aapani Irioshi cameetsanijite intancorejajiajeri coajica. Irootaquequeate,
Nomajirote Aguiripa, icatsimatimentajiaquena imaica joriojia yamenajiaquenagueti
noquejejiacariri iriatimpajia nocanquequeate nontancorejanaje naatimpa aisa.

⁸ ¿Pijijiaqueji aviatimpajia aato itancorejajiajeri Aapani Irioshi metojajiatsica?

⁹ “Noquenquejavetaca naatimpa coramani cameetsavaetaque nantaguetaque oshe-
qui taaca opajitapae nonticaacotantaquemparoca ivajiro Jesoshi Nasarequitica.

¹⁰ Ariqueate noquejetaca Jerosarequi nocatsimajiaqueri nonintaquequeate noguija-
jiaqueri santanaqui. Irootaquequeate nocantantajiacarica saserorotejia anaantajian-
quitsica irojocajiaquena paperi iroonijite navenquempaca, ariquea noguijajiaqueri
santanaqui oshequini igomajamajare Aapani Irioshi. Oraqueate imetojajiaquerigueti
noshinevaetacaqueate.

¹¹ Ariquea noquejeveca nocatsimapinijiaqueri ontaniqui maasano shinagogapaequi
icapiocantapinijiacaca cameetsanijite novashiantacaajiajerinijite aatonijite itsaroven-
tajijaaritsi Jesoshi. Ariqueate nocatsimamajajianaqueri irootaquequeate noashitanta-
jianacarica osamanipaequitica aisa, nocatsimajiaqueri natsipetacaajiacariqueate.

¹² “Ariqueate naanaquero paperi yojocajiaquena saserorotejia anaantajianquit-
sica, noanaquequeate Tamashicoqui naajiguerime aisa itsipapae.

¹³ Cotanquitsiqueate, majirontatsica, iroompaqueate itampaticatapojaquegueti
catsirincaiteri noavetanacaqueate quenavoquirontsiqui,[☆] nonejaitatiguero ocan-
tanaque morec oponeaca jenoqui inquitequi, cavorejavaequequeate anaqueriqueate
ivoreguigueti catsirincaiteri, otsirencapojaquequeate anquiritacotapojana
naatimpa jerijia maasano notsipajianacaca.

¹⁴ Maasano notejatejaitanaquequeate isaviji quepatsiqui, noquemiqueate icantajipo-
jaquenaqueate iguenquetsatsarequi evereo: ‘Saoro, Saoro, ¿taa picatsimatantaque-
naca? Avisatiqueate atsipetacajatsi. Piquejetanacariri caapironcaari impigatanaquem-
parigueti quempoguijirica impateaterogueti inchaquiji, irisatiquea chaticavatsatajat-
sine.’

¹⁵ Naatimpaqueate nocantsitariqueate: ‘¿Taampate aviatimpa, Nomajirote?’ Ican-
tanaqueate: ‘Naatimpa naroguenti Jesoshi picatsimaqueca.

¹⁶ Imaica pintinajanaque pincatianaque, mana nonigaaquempi noncanquem-
piqueate nonintaque nontigarancaquempiqueate pintsavetantanaquena pintsave-
tacotero maasano pamenaguequeca imaica jero aisa maasano nonigaaguequempica
coajica.

¹⁷ Nontigarancaquempiqueate pinquenquetsatacaajiaqueriqueate joriojia jerijia
aisa teeca iriojia joriojia. Namiquempiqueate cameetsanijite irajaiavequempigueti
irovashiantajajempiqueate.

¹⁸ Irooqueate nontigarancantaquempica intsatantajajempaca. Oquejetimove-
cariqueate opitsecashirentimovecariqueate: teetarite intsajigueriji Aapani Irioshi,
iriguenti Satanashi amatavijajiaqueri. Poashitanaqueriqueate pintsatacaajiaqueri

[☆] 26:13 Ya. 9.1-19; 22.6-16.

cameetsanijite irovashiantimentajiajeronijite iquenquejaguishejiguica taaca opajitapae, aatonijite iquemisantajiajiritsi Satanashi, irioqueate inquemisantajianaje Irioshi, aisa inquemisantamajajiaquenaqueate naatimpa cameetsanijite nonetsanajiajeri, aato noquenquejacaajiajiritsi iguempevaerejia, inconoajiaquempaqueate maasano nomeshiajiaqueca.’

¹⁹ “Irootaquequeate imaica, majirontatsica Aguiripa, nonintaque noncanquempi nonetsanaquero maasano icanquenaca Jesoshi yonigaaquenaguete ontaniqui quenavoquirontsiqui.

²⁰ Iriquetiquea noquenquetsatacaajiaque guintenijiatsica Tamashicoqui. Ariqueate noquejejaqueri guintenijiatsica Jerosarequi jerijia maasano guinteniguetsatsica Joreaqui. Noquenquetsatacaajiaqueri aisa teeca iriojia joriojia nocantajiaqueri incantashitajianajempa irovashiantajianajero iguempevaerejia, irioqueate intsaromentamajajiaquempa Aapani Irioshi, cameetsaqueate inchoocajianaje intsatantajiaquemparica caquinte arimaja iquemisantaqueri Aapani Irioshi.

²¹ Irootaquequeate yamentajiaquenaca joriojia teemporoqui itsaromentantajitarica Aapani Irioshi inintajiavetacaqueate irimetojajiaquename.

²² Cotanquitsi yamiquena itampishitacaquena Aapani Irioshi, arimpaqueate notsavetantanaqueri arejevaetanacaqueate imaica, notsatacaajiaqueri irirajia anaantajatsica jerijia aisa teeca iranaantajigueji, mana notsatacaajiaqueri icantajiguinica tsavetantirinica Aapani Irioshi jeri aisa Moishishini. Teequeate naashitemparo intati.

²³ Iriatimpa icantajiaquetarite irantsipevaetaquempa irira Quirishito, ariquea irimetojavequempa impochatanaje. Iriqueti jivatanaajatsine impochatanaje cameetsanijite intsavetantero tsirencaguitirimajaca intsatimenqueronijite maasano joriojia jerijia teeca iriojia joriojia.”

²⁴ Iroompaqueate iquemavaqueriguete Peshito iquejetanaquero imaica iquenquet-saventanacaguete icajemanaquequeate:

—¡Paavoro, ariqueate pishoncacotanaca! Iroorijite pisavicaventaquero pivaperite manaca oshoncacotanaquempi intati.

²⁵ Icanti Paavoro:

—Teequeate noshoncacotempaji, nomajirote Peshito. Maasano nocanquempica iroguenti arimajaca teequeate namataguempaji.

²⁶ Irica majirontatsica Aguiripa iriatimpa itsamajatiro oca nocantajiaquempica, irootaquequeate noshinetantacaca iquemaquerogueti maasano. Itsatiro iroguenti arimajaca, teenicate iromanacojiteroji noquenquetsatacoguetaqueca imaica.

²⁷ Aviatimpa majirontatsica Aguiripa, ¿quero pincante aviatimpa? Oraqueate itionca-cojiaqueca tsavetantajiguirica Aapani Irioshi coramani ¿iro iroomajaca?

²⁸ Icanti Aguiripa:

—Pajiniqueate pinquemisantacaguena naatimpa aisa, nonquemisantantaquemparica Quirishito.

²⁹ Icanti Paavoro:

—Aricampa imaica, iroocampa coajica, naatimpa nonintavetaca pinquemisanqueme, cotanquitsi aato apaniro aviatimpa piquemisanti, inquemisantajiaquequeate aisa maasano quemajiaquenaca imaica inquejejaquena naatimpa, cotanquitsi aato yoishojitiri cavorejatsariqui.

³⁰ Iroompaqueate icanquitigui imaica icatianaca majirontatsica Aguiripa aisa majirontatsica Peshito itsipajianacaro Verenise. Ariqueate iquejejianaja maasano itsipajiacaca.

³¹ Yoajianaquaguete iquenquetsatacojiaqueri Paavoro, icantajiaquequeate:

—Namenaqueri naatimpa teequeate taaca opajita iranteji irimetojimentajiquerica aisa aatomesano yoguijaajitirime santanaqui.

³² Icantiriquea Aguiripa Peshito:

—Aatomeguitatsi inchiqiuotsi icantime iriatimpa ininque incoacoqueri majirontatsica Sesa, ovashiantajiajerimequeate.

27

Yaajitanaquerigueti Paavoro Iromaqui

¹⁻² Icantajiaquequeate iroanaque Paavoro Itariaqui. Icamantajiaqueri imajirojiate igoaretajiate majirontatsica Sesa Aogoshito irajaianaqueri. Iriatimpa ipajita Joorio. Itsipatacaantajianacari itsipapae yoguijaajiguequeca santanaqui. Naatimpa notsipajianacari Arishitarico noguijaguijaitanaqueri Paavoro. Irira Arishitarico ariguenti iponeaca Tesaronicaqui Maseroniaqui. Notejianaca inirojeguiqui quenajarontsi poneanquitsica Ataramitioqui, pajini oanaque Ashiaqui onquenanaque guinteninintsi-paequi ontaniqui otsapijaqui quentija. Ariqueate noajianaquequeate namajatacojianaquequeate.

³ Osavincaguitetanajigueti nagatacojiapojaque Shironequi. Irira Joorio icavintsajaqueri Paavoro icantiri:

—Pijashiatsi pinejajiaquiteri pitsipavijijiaca irojocajiaquempinijite taaca opajita pintajiaqueca.

⁴ Ariquea nogaajianaca aisa, noajianaque. Pajini oguipiacotajename tampija, irootaquequeate nopitsocacotantanacaroca ovogore Tsipere antaqueronta.

⁵ Nosenaguijacojianacaro Shirishia aisa Pampiria narejerejeipojaca Miraqui choocatanquitsica Irishiaqui.

⁶ Ariqueate inejapojaquero imajirote coaretajia quenajarontsi poneanquitsica Arejantiriqui oananquitsineca Itariaqui. Irooqueate itetantajianaquena nogaajianaca aisa noajianaque.

⁷ Inchiqiuojisano nocantacojianaque namajatacojianaque nopomerentsijianacaro oshequi savincaguiteri. Osamani nantajiaquero cotanquitsi noquempejipojaque-rogueti Guiniro oguipiacojiavaquena tampija, irootaquequeate nocononcacotantajianacaca nomontejacojianaqueate niganquivogorequitica icantajitica Quereta. Nopitsocacotanaca araquerora ontaniqui oquempejiquegueti Saramona.

⁸ Nopomerentsijianajaro nosenaguijacojianacaro Quereta, irosati narejerejeivae-tani nagatacojiapojaqueni agapiniquegueti quenajarontsi icantajitica Cameetsatsica Agatapinitaquegueti, oquempejiquegueti guinteninintsi icantajitica Irasea.

⁹ Iroorijite oshequiacotanaquena savincaguiteri noponeajiacagueti Sesareaqui pajini nontejaatacotaje, irootaquequeate arimpaqueate ojamajatiri ocovejencatanaqueni namajatacojianaquegueti, irootaquequeate icantantajiacarica Paavoro:

¹⁰ —Naatimpaqueate notsataque oajianaquegueti imaica mana antsipejianaquempa. Aato apaniro ojocajajigui quenajarontsi aisa ajaararontsi aricampa ojocajiaquempa aatimpajia aisa.

¹¹ Cotanquitsi irira imajirote coaretajia teequeate inquemisanteriji Paavoro, iriguenti iquemisantajiaque taquijatanaqueroca quenajarontsi aisa ashintaroca.

¹² Oraqueate agapiniquegueti quenajarontsi teenicate oncameetsateji tejarontsiqui, irootaquequeate inintantajiacaca oshequini irogaajianajempa aisa, ijijiaqueji iragavejajiaquempa irarejejiaquempaji ontaniqui Penisequi choocatatsica aisa Queretaqui, inchoocajiaquemequeate ontaniqui iroosati irivoreanajeguete catsirincaiteri. Ontaniquiqueate Penisequi aato yarejeta choviga poneanquitsica oquempejitacqueroguete isotoguiguete catsirincaiteri.

¹³ Ariqueate yamenajiavaquerogueti inchiquioji otampijatapojaque ijijiaqueji cameetsataqueji iroajianaje arinijite aacotimentajianaquerinijite iquenquejajiaquegueti, ariqueate inoshicajatajiro cavorejatatsica agaparancajatatsica itetajiroqueate, ariquea noajianaque nopantsapijatacojianaquero otsapijaqui quantija Queretaqui.

¹⁴ Cotanquitsi capichaji osamanijencaguitepojatigui otampijatapojiqueate inirojen-camajaca choviga poneanquitsica oquempejitacoquerogueti isotoguigueti catsirincaiteri, ocantavaetanaquequeate jeoc jeoc jeoc.

¹⁵ Nonintajavetacaquea nonquenajatacojianaqueme oquenapojaquegueti choviga, taaja esho oguipiacotanaquena, ariquea aacotanaquena intati choviga quenajarontsiqui. Naatimpajia noquemisantacojiavaca querocampate noncojiavajeroni.

¹⁶ Ariqueate noacojianaque antaqueronta otsipa niganquivogorequitica icantajitica Caraora, ariqueate teesaconaqueate ontampijamajatajeji. Osamani nantajianaquero chaajaniquitica quenajarontsi ishiticacojitica, najiricamajaquero.

¹⁷ Ariqueate itejiaquero. Ariquea ijijiaqueroji ontsiratsiraitanaque ogotapae ipeacaantacaroca inirojegui quenajarontsi, ariqueate yaguiaguaataquero ishiticaquero. Aisa itsaroajianaquequeate irivanquetacojiaquemparome onicoaquegueti impanequi icantajitica Shirete, ishiticarejaquero quitsaarentsimago yogaguijijiaquero cameetsanijite aacojianaquena choviga.

¹⁸ Cotanquitsiqueate osavincaguitevetanacagueti arimpaqueate ojatiri otampijamajatanqueri, ariqueate iparianacaro ipishoncajaguequero ajaararontsi yamajiavetacaca.

¹⁹ Ariqueate otsipatapojacagueti savincaguiteri narosatiqueate pishoncajajiaquero iniromagotanquitsica, ovoapae, otsipapae ashincaca quenajarontsi.

²⁰ Oraquea oshequianaquegueti savincaguiteri opitsecanaquequeate teequeate irivoreajeji catsirincaiteri aisa impoquiropae. Arimpaqueate ojamajatatiguiuri otampijamajatatiguinimaja nojiqueji arijite nojocacojiaquempaji.

²¹ Naanaatacoguetanaque tee noshecajajempaji, icatianacaqueate Paavoro icantiri:

—Aviguentijiarite cotanquitsi, pinquemisantajiaquenamegueti iroaqueragueti nocantajivequempigueti arimequeate anchoocajianaqueme Queretaqui, aatomecate at-sipejigame imaica, aisa aatomequeate opeaguetame maasano pamajiavetacaca.

²² Imaica aato pitsaroajiguitsi ontsiavetanaquempaqueate quenajarontsi, cotanquitsi aatimpajia aatoqueate ojocajajigatsi.

²³ Incajaranqui tsiteniriqui icatiimotapojaquena irashivantite Aapani Irioshi ashintanaca nantavaetinica,

²⁴ icampojaquena: 'Paavoro, aato pitsaroguitsi, poanaquetarite pinejeri majirontatsica Sesa. Aato yojocajatimajigatsi apaniro pitsipajiacaca quenajarontsiqui, icavintsa-jaquempitarite Aapani Irioshi.'

²⁵ Nocantantajiaquempica aato pitsaroajiguitsi pishinejiguempa. Naatimpa notsataque irinetsanataquero Aapani Irioshi maasano icanquenaca irashivantite.

²⁶ Cotanquitsi mana ovanquetacotacaji tampija ovogorequi.

²⁷ Ariqueate anaapojacagueti 14 savincaguiteri noquenacotashijianaca quantijaqui icantajitica Aririatico, oraqueate tampija ariqueate aacojianaquena. Oraqueate onianquiiitepojiugueti irira taquijajiaquero iquenquejajiaque quempejitapoji quepatsi.

²⁸ Igomarojiaquero osaanajataquegueti, ariqueate ovegarapojani 36 meetero. Ariquea osamanijencaguitepojiugueti imajijairo aisa, ariquea ovegarapojani 27 meetero.

²⁹ Itsaroajianaquequeate itsinacacotarotsi mapi yogaguijitantajiacaroca ovataqui qui cuatro cavorejatatsica agaparancajatanquitsineca quishotacaqueroneca quenajarontsi. Ishoshoguitejianaca yoguijajivajiro savincaguiteri.

³⁰ Irira taquijajiguiroca inintajavetaca irishiajianaqueme irovashiantajianajenamequea, yantamampeajianaqueate iroajianaque irojocajajiaquero cavorejatatsica

quishotacaaqueroneca otsovi, cotanquitsi iroguenti irojocajajiaqueme chaajaniquitica quenajarontsi inquenajatacotantajianaquempameca.

³¹ Cotanquitsi iquenquetsatanaquequea Paavoro, icantajiguiri imajirojiate coaretajia jerijia aisa igoaretajiate:

—Iramerencapitsajianaquempigueti ariqueate pojocajajiaquempa aviatimpajia.

³² Iroompaqueate iquemavaquitigui ipeshacojiaquero chaajaniquitica quenajarontsi, ariqueate opariajatanaquequeate.

³³ Ariqueate iroompaqueate osavincaguitetanaquitigui irira Paavoro icantajiguiri maasano irishecajiguempa, icantajiguiri:

—Manaqueueate anaapojacaqueueate 14 savincaguiteri irosatiqueate piquempoguijajiavaquero, aisa teequeueate pishecajiajempa.

³⁴ Nocantantajiaquempica pishecajiguempa cameetsanijite pintampishitimentajianaquenijite, aatotarite opeimata capichajaniqui pimajejaniqui.

³⁵ Iroompaqueueate iteroncanaquerogueti icantajiaquerigueti, yaaquero pan, icatiimojiacariqueueate maasano, icanqueriqueate Aapani Irioshi: “Ariotesaa pojocajiaquenaro nosheca”, icotarejaquero ishecatacqueueate.

³⁶ Yamenacojiaquerigueti maasano itampishishirejianaji ishecajiacaqueueate.

³⁷ Ari novegarajia 276 maasano quenajarontsiqui.

³⁸ Ariquea yagashecajaiacagueti ipishoncajajiaquero tirigoitsoqui cameetsanijite ogajenocajamajatimentanaquempanijite quenajarontsi.

³⁹ Ariqueate osavincaguitemajatanajigueti teequeueate intsajipojeroji quepatsi, mana yamenacojiaquero ocasoguiroquiiaacagueti ariqueate ochoocaqueni impanequi, inintantajiacaca impanquenajianaquemparo ijijiaqueji iragavejajiaque intsinampijatacojiaquempa.

⁴⁰ Ipeshacojiaqueroquea cavorejatatsica agaparancajatatsica quishotacaaqueroquenajarontsi, ari ochoocataji quentijaqui. Ariqueate itsajacojiaquero itaquiajatantajigaroca. Ariquea itinajacotajiro quitsaarentsimago choocatajatsica otsovi qui cameetsanijite aacotimentajianaquenaniijite tampija impanequi.

⁴¹ Cotanquitsi aacojiavetanaquena mana opishoncacojiaquena otampishijamajataquegueti oja, ovanquetantamajatapojaroca impanequi otsovi. Oraqueueate ovataqui otsirajanaquero otampishiaca ovore quentija.

⁴² Irira coaretajia inintajivetaca irimetojajiaquerimequeueate yoguijajigueticasantanaqui aatonijite yamajamajaitanaquetsi ishijaiacatsiqueate.

⁴³ Cotanquitsi irira imajirote coaretajia teequeueate irininteji intsipatacaantempariji Paavoro, icantantajiacarica:

—Ariotaque icojiacani. Quericaca tsajiatatsica yamajajigui iriqueti jivajiananquitsine iramajamajaitanaque iragajianaque.

⁴⁴ Iiraqueueate teeca intsajigueti iramajajigueti irajaianaque inchacotapae aisa taaca opajitapae cameetsanijite iragatimentajianajenijite.

Ariqueate noquejetacaajanacaro imaica nagajiapojaque maasano otsapijaqui.

28

Ichoocajianaquegueti Paavoro Marataqui

¹ Iroompaqueueate nagajiapojaquegueti maasano, icamantajitaquena ocativa ovogore opajita Marata.

² Irira guintenijiatatsica oraniqui cameetsaqueate yaajiavaquena icavintsajajiavaquena itsitacashijiaquena paamari, catsincaguitevaetaquetarite otejaquetarite incani.

³ Irira Paavoro yaviguetapojaque inchajempequi. Iroompaqueate itsitacavetac-arogueti iquemaitatiguiiri tac camaarini iracoqui, isoanacanaca oguishianaqueri paamari.

⁴ Iriraqueate guintenijiatsica oraniqui yamenajiavaquerigueti itsatanaca iracoqui, icantavacaajianaca:

—Iriocajate metojantatsica, irootaquequeate yagavetajagueti yojocajavetacagueti, imaica irioqueate atsicaqueri camaarini. Aricajate yogashinoncajimentaqueri Irioshi.

⁵ Irira Paavoro ipotecaqueri paamariqui, cotanquitsi teequeate ireeretanaqueri.

⁶ Iriatimpajiaqueate ijijiaqueji arijite ireeretanaque ariquiteate inquenaque intejanaque irimetojanaque, cotanquitsi yoguijajiavecari intati tee iragavejeriji. Ariquiteate icantajiaque:

—Iriocajate irioshitatsica.

⁷ Choocaqueate quempeji iguepatsitepae Povirio, irio jivatanquitsica ovogorequi. Iri-atimpa yaa jiavaquena icavintsajajiavaquena, ariquiteate nomaimojianaqueri 3 savincaguiteri.

⁸ Yojoquijitacaquea iriri Povirio, inorijaca, icatsirincajencatanaque, ishijatacota-quoero iriraja. Ariquea yoanaque Paavoro irinejeri. Yamanacoventapojaqueri ipamitapojaqueri, ariquiteate ipeanaja.

⁹ Iroompaqueate iquemacojiaquitiguiiri icoraquetashijiaqueri maasano ashinoncajjiatatsica iroveajiajerita, ariquiteate iriatimpa yovejaiajiri.

¹⁰ Iriatimpajia ishineventajiaquenaqueate icavintsajajiaquena. Ariquiteate nonetsanajianaja noajianaje, yojocajiavaquenaqueate maasano nocoguitejajiaqueca.

Yarejetapojacagueti Paavoro Iromaqui

¹¹ Ariquiteate nochoocajianaqueni 3 taai ontaniqui ovogorequi. Notejianaja quenajarontsiqui poneanquitsica Arejantiriaqui. Chooca isheroncaguetica ontaniqui otsovi-qui, iquejetacaacari irioshivijirentsi tsipari, aparo icantajitica Caashitoro, itsipa Porokuishi. Irira ashintaroca ichoocavaetanaquequeate oraniqui niganquivogorequitica nochoocatantajiacaca naatimpajia, yoguijavaquero osariapojajetaqueate.

¹² Ariquiteate noajianaji nagatacojiapanajanti Shiracosaqui, ariquiteate nochoocajianaque 3 savincaguiteri.

¹³ Ariquiteate nogaajianaca aisa, noquenacojianaque otsapijaqui narejevaetaniqueate Irejioqui. Osavincaguitetanajigueti otampijapojiqueate aacojianaquena noquenquejaguegueti. Namajatacojianaque mavite savincaguiteri, narejejiaca Potejoriqui.

¹⁴ Ariquea oraniqui nonejajiapojaqueri napiguemisantarijiateni. Iriatimpajia yaa jiavaquena icantajiaquenatarite: “Pinchoocatimojianaquenataja 7 savincaguiteri.” Ariquiteate noajianaque Iromaqui.

¹⁵ Irira napiguemisantarijiateni Iromaquitica iquemacojiavaquenagueti iconoagarantajiacaqueate icoraquejiaque itonquivojajiavaquenaquea Pororeapioqui. Itsipa mana icoraquejiaque yoguijajiavaquena ontaniqui icantajitica Tereshi Taverenaqui. Irira Paavoro iroompaqueate yamenajiapojaqueri icampo jiri Aapani Irioshi: “Ar-iotesaa”, ariquiteate ishinevaetanaca.

¹⁶ Ariquea noajianaque narejejiaca Iromaqui. Irira imajirote coaretajia yaajianaqueri yashitacajitica, yojocajiapojaqueneri imajirote coareta santanaqui. Icanta-jiqueriquea Paavoro inchoocatashiquempa iriatimpa, iramenaqueriqueate apaniro coareta.

¹⁷ Ichooatapojigueti 3 savincaguiteri irira Paavoro icajemacaanqueri joriojia anaantajiatatsica icantajiguiri:

—Napijoriojiateni, teequeate nonijashijiguempariji agonorojia, aisa teequeate noncanshitatiguemparoji icanqueca avaesatinijiate coramani, cotanquitsi iriatimpajia yaajiaquena Jerosarequi, ariquiteate yojocajiaquenari yaajianaquena Iromaquitica.

¹⁸ Ariquea yagajianaquegueti majirontajatsica icoacojiaquenaguete inintajiavetaca irampaquijajiajename, itsaquetarite teequeate taaca opajita nanteji querocampate irimetojimentajiquenaca.

¹⁹ Cotanquitsi irira agonorojia joriojia tee irinintajigueti irampaquijajiajena, irootaquequeate nocantantajiacarica Peshito noncoraqueataque acaniqui cameetsanijite incoacoquena Sesa. Cotanquitsi teequeate noncatsimajigueriji agonorojia, iroguenti nonintaque nonquenquetsaventaquempa.

²⁰ Irootaquequeate nocajemimentajiaquempica imaica cameetsanijite namenajiaquempi nonquenquetsatacaajiaquempi. Pinejantajiaquenaca ishiticajiaquena cavorejatsariqui mana notsavetanqueri irira Quirishito aguijajiavaqueca aatimpajia ishi-raerijia.

²¹ Iriatimpajia icantajiguri:

—Iririra guintenijatsica Joreaqui teequeate impacaantimajiguenaji paperi tsavetantaquempineca, aisa agonorojia coraquejianquitsica teequeate incantimajigueti: ‘Chooa yantaqueca’, teequeate incantaguishetacojiguempiji.

²² Imaica nonintaque nonquemisantajiaquempi quero pincanteni aviatimpa. Nonquemacojiaqueritarite maasano guinteninintsipaequi icatsimajiguiritarite quemisantajiguirica Jesoquirishito.

²³ Ariqueate yoajianajigueti icantajianaqueri querocaguete savincagueti incoraqueantajiaquempaca inquemisantajiaqueri. Ariqueate aapojacaguete incoraqueantajiaquempaca icoraquejiaquequeate oshequi iquemisantajiaqueriqueate. Iriatimpa imapocanaquero iquenquetsatanaquequea iroaquerasano savincaguitetamananquitsi ariqueate itsitenijencaguitetacovaetanaque itsavetanqueri Aapani Irioshi quero icota imajirontaguete. Iquejijianaqueriguete imaica cameetsanijite inquemisantimentajiaquerinijite Jesoshi, iroguenti ipampiataque itioncacotanaqueca Moishishini jero aisa itioncacotanaqueca tsavetantajiguirinica Aapani Irioshi.

²⁴ Iconoagarantajiaqueate iquemisantajiaqueri, chooqueate itsipapae teeca inquemisanteriji.

²⁵ Ariquea iriatimpajia yamenajiaqueguete tee inquemavacaajiguempaji, ariquea yoajianaji. Irira Paavoro icantajiaavajiriqueate:

—Arimajasacanicate icantamajataque Ishire Aapani Irioshi coramani iquenquejacaqueriguete tsavetantirinica Isaiashini, ariqueate irioqueate cantajiaqueri avaesatinijiate icanti:

²⁶ ‘Pijashia pincantajiaquiteri irica caquinteja:

“Pinquemajavequempaquee, cotanquitsiquea aato piquemajiaavajirotsi. Pamenajavequempaquee, cotanquitsiquea aato pitsatimajiaavajirotsi.”

²⁷ Iquishoshirentanaquetarite iricajia.

Oraquea iguempita tee inquemamajatantajemparo,

aisa imatsivocajataque,

aatonijite inejantajiajarotsi iroquija,

aatoniji iquemantajiajarotsi iguempita,

aatoniji itsajigui ishirequi,

aatoniji ipitsocashijigana nogueshishirentantajemparica.’

²⁸ “Imaica nonintaque noncamantamajiaquempi iriotaquequeate inquenquetsatacaajitaque teeca iriojia joriojia incamantajiaqueriqueate quero icota Aapani Irioshi imeshiantiguete. Iriatimpajia inquemisantamajiaque.”

²⁹ Iroompaqueate icanquitigui Paavoro ariqueate yoajianaji joriojia, itampishijencajianaque iquenquetsatavacaajanaca.

³⁰ Iiraqueate Paavoro ichoocaguitini mavite ajagantsi. Ogantaga ivegaraqueri ash-intacaroca tsovironaqui cameetsanijite irimaantimentaquemparonijite. Yaajiavaqueri maasano coraquejiatsica.

³¹ Itsavetantiri Aapani Irioshi quero icota imajirontagueti. Itsatacaajiaqueriqueate itsavetanqueri Amajirote Jesoquirishito. Teequeate intsarogueji, aisa tecatsiqueate ticaguerineca.

PAAVORO ITIONCAJIAQUENERI IROMAQUITICA

Antsatantaquemparoca

Ocativa iroguenti antsatantaquemparoca itioncacaantaqueca Paavoro itioncaciaque-nerigueti tsarotentajiacarica Jesoshi choocajianquitsica guinteninintsiqui pajitatsica Iroma. Iiraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacancarica. Irocashi itioncacotaqueri irira Paavoro otsipaquei paperiqui (Ya. 7.57-8.1; 9.1-31; 13.1-28.31). Itioncacotaqueri ichooaquegueti Iromaqui otsapapaequi Ya. 28.14-31. Tequerataguete intioncacaanteroji Paavoro ocativa itioncacaanquero otsipapae mavite paperi itioncaciaqueneri Tesaronicaquitica, aisa otsipa mavite paperi itioncaciaquenerica Corintoquitica, otsipa paperi itioncaciaquenerica choocajianquitsica provinciaqui pajitatsica Garashia. Coajica icamantaqueri Tereshio intionquero ocativa paperi intioncaciaqueneri choocajianquitsica Iromaqui (16.22). Paavoro icantaqueri Tereshio maasano intioncacaqueca ocaniqui ocativa paperiqui. Itioncacaantaquero ajagantsiniqui irooca 56 irooca 57, otsipatapojacaguete iquenaguetanaqueguete quepatsipaequi itsavetantavaequeriguete Jesoquirishito. Itioncacaantaquero guete Paavoro ocativa paperi iquenquejajitaque ichooaque Corintoqui irooca otsipaquei guinteninintsi choocatanquitsica quepatsiqui pajitatsica Guereshia.

Ocaniqui paperiqui itioncacaantaqueca Paavoro itsatacaajiacaji maasano aatimpajia caquinteja yamenajiacaji Aapani Irioshi chooca antaqueca icantimentantaqueca iriatimpa. Irirampani Jesoquirishito yamenaqueri Aapani Irioshi teequea inquempevaetimatempaji. Itsatacaacaji quericaca aventaquemparineca Jesoquirishito metojaventajiacajica iramenaqueri Aapani Irioshi quejetaca tee inquempevaetimatempaji. Itsatacaajiacaji quero ancojiaquempani aatimpajia quemisantajiaquerica Jesoshi anchoocajiaqueniji cameetsa, anetsanaguetaqueroniji inintaguetica Aapani Irioshi yamitacojiaajiguete Ishire.

¹ Naroguenti Paavoro tioncaquempica, iriguenti ashinquena Jesoquirishito, icajemashirentaquena nompeaquempa itigarancane, inintacaquenaqueca nontsavetantero Quenquetsatsarentsi Oganejencatatsica* itigarancaqueca Aapani Irioshi.

² Oraticaquea Quenquetsatsarentsi Oganejencatatsica irootaquequeca icantsitacaca coramani itioncacaqueriguete tsavetantajiatatsica tioncaquero Tioncarentsi Iroomajataatsica.

³ Iriguenti icantacoque Irijanite Aapani Irioshi, iriotari Amajirote Jesoquirishito. Oraquea icaquintetapojaqueguete, iriguenti choviquivaetanaqueri majirontatsica Taavini.

⁴ Ariquea imetojavecaguete Amajirote Jesoquirishito manaquea ipochatanaji, yonigaantantacaroca iriguenti Irijanite Aapani Irioshi, aisa irooquea itsatantajitacaroca iriguenti caaviji yagavejamajati, yonigaantaqueriquea Ishire Iriomajaca.

⁵ Iiraquea Aapani Irioshi icavintsajamajiaquenaqueca, inintacaantajiaquenaca Jesoquirishito nompeajiaquempaquea itigarancane nontsavetantimojiaqueri maasano caquinteguetatsica cameetsaniji inchoocagarantajiaqueniji aventaventaquemparineca Aapani Irioshi tsarotentajiaquemparineca irinetsanatantajiaquemparoca icanquerica.

* **1:1 Quenquetsatsarentsi Oganejencatatsica.** Irootarite tsavetantaquerica Jesoshi Irijanite Aapani Irioshi, shetacoshirentajiaquerineca maasano coguisherijia aventaventaquemparineca.

⁶ Ariqueate iquempetacajaiaquempiquea aviatimpajia inintacajaiaquempi Aapani Irioshi irashintajiaquempiquea Jesoquirishito.

⁷ Nontioncajiaquempiquea aviatimpajia guintenijiatsica oraniqui Iromaqui, ipintsajiacaca Aapani Irioshi icajemantajiaquempica pimpeajiaquempaniji igomajamajare.

Namanacoventajiaquempiquea incavintsajajiaquempinijite Aapanite Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

Inintaveca Paavoro iroanaquemequeate Iromaquiniqui

⁸ Imaica iroquetitaquea noninque noncamanquempi, querocaguetei quepatsipaequi itsavetacojiquempiquea aviatimpajia caaviji pitsaromentamajajianacari Aapani Irioshi. Irootaquequea nariotelesatantanacarica Aapani Irioshi, iriotaquequea agavejacaquenaca Jesoquirishito noquempetancaroca imaica.

⁹ Yamaenaquenaqueate Aapani Irioshi nocantacoguitani namanacoventajiaquempiquea, aparo iriatimpa nosavicaventaquequea, notsavetantaquero Quenquetsatsarentsi Oganejencatatsica tsavetacoquerica Irijanite.

¹⁰ Oraqueate namanacoventajiguimpiguetei nocanqueri Aapani Irioshi iriogueti nintanquitsine intigarancaquenaqueate noanaquequea oraniqui aviatimpajiaqui name-najiajatempi.

¹¹ Noninquequea namenajiajatempi namitacojiacquempiniji pishirequi pintampishishiretantamajajianaquempaca.

¹² Teequea ariqueate noncanteji aparo nontsatacaajiaquempiquea naatimpa, iroguenti nocanque noninque antampishitavacaajiaquempaqua aatimpajia, ariqueate aquejetavacaajiaca atsaromentajiacariguetei.

¹³ Napitsaromentarijiatei, noncamanquempi nopintsapintsavecaqueate namenajiajatempimequea, cotanquitsiquea teequea nagavejeji noncoraqueeteji arejevaetanaca imaica. Iroguenti nopintsatashivetaca nontsavetantimojiaquitempi pimpishivoroquijacoshirentimentanaquempanijite pinquempetantajianaquemparica guintenigueteatsica osamanipaequitica nontsavetantimojiaqueriguetei.

¹⁴ Ininquequeate Aapani Irioshi nontsavetantimojiaqueriquea maasano, irioca guiriego irioca teeca iriguiriegote, irioca tsavaetatsica irioca teeca intsavaeteji, namenajiaqueritarite inchoocatetajate tsavetantimotaquerineca.

¹⁵ Irootaquequea nonintantacaca noncoraqueataquequea nontsavetantimojiaquempiqueate aviatimpajia guintenijiatsica oraniqui Iromaquiniqui, nontsatacajiaquempiro Quenquetsatsarentsi Oganejencatatsica.

Agavejica Quenquetsatsarentsi Oganejencatatsica

¹⁶ Teequea nompashiventacaguemparoji Quenquetsatsarentsi Oganejencatatsica tsavetantaquerica Jesoquirishito, iroguentitarite iragavejane Aapani Irioshi irimeshi-antajiaquemparica maasano aventaventaiquemparineca. Iriquetitaquea intsavetantimojitaquequea joriojia, iroompaquea inquempetsijiguempariquea teeca irijorijoigueji.

¹⁷ Oraticaquea Quenquetsatsarentsimajaca otsatacaajiacaji quero icota Aapani Irioshi icomajashirentacajaariguetei caquinteja. Iriguenti icomajatacajaijaa irirajia aventaventajiacarica aisa nintanajatsiquea yaventajiacari. Ariquea ocanque itioncajiquea: "Iriaquea comajashirentanquitsica incoquempani inchoocaguiteni irooriji yaventaguitarini Aapani Irioshi."✧

Aapani Irioshi icatsimajiaqueri covaeguishejiatsica

✧ 1:17 Avc. 2.4.

¹⁸ Iriraquea Aapani Irioshi choocatatsica inquitequi yonigaantacaro igatsimare, icat-simamajatiriquea maasano teeca intsaromentempariji aisa maasano peacaaguisheji-acaroca covaeguisherentsipae. Iriatimpajia iticaaqueroquea iroomajatatsica, iticaantavacaro igovaeguisherere.

¹⁹ Choocaguetaquetarite iragavejaqueca caquinte intsaguetaque quero icoguetani Aapani Irioshi, ariquea itsajiavecaroquea iriatimpajia, inchiquiojita yoguiconijataque-neri iriatimpa.

²⁰ Aatimpajia teequea amenajivetempariji Aapani Irioshi, cotanquitsiquea oraque-ate yamenajiguetrogueti maasanopae ipeacaaguecaca paesatoniqui iroaqueragueti ipeacaacarogueti quepatsi aisa maasanopae choocatantaguetaroca, ariquea iroguenti itsajiquero iriguenti Irioshimajaca caavijica yagavejamajati, incoguitempani iragavejaguiteni, jero aatoquea queri agavejatsi incantamajate: “Naatimpa teequea nontsateroji.”

²¹ Itsajiavecashinete chooca Irioshi, cotanquitsiquea teetari intsaromentajiguem-pariji, teequea intsaroacaajiguempariji, teetarite incanteriji: “Ariotelesaa”, iroguenti iquenquejaguishevaequero covaeguisherentsi, jero teeca intsatimajigueji, quejeta-caquea ipitsecashirentacojianaque.

²² Icantajavecaquea: “Notsamajajigui”, cotanquitsiquea teequea intsajigueji.

²³ Yovashiantaquero iroganejencare Irioshimajaca icocanica ichoocati, iriguenti ishineventajiaja irioshivijijiacaca intati ipeacaacaca iriatimpajia, iquejetacaavecari caquinte teeca inquishometojaneteji, iquejetacaavecari aisa quejecarica araguetatsica, canaaguetatsica, soancaguetatsica.

²⁴ Irootaquequea iticaarejantanacaca Aapani Irioshi impeacaaguishejiguemparota taaca inintaguishejiaqueca iriatimpajia, ariquea yaagavacaajianaca impashiventacaaquempameca.

²⁵ Teequea inquemisantajigueroji iroomajaca quenampojarica Irioshimajacaqui, manaquea ipiacaantajaro amataaronsi. Itsarovensijivetariquea ipeacaajicaca, ishineventaguitarini, teequea intsaromentajiguempariji Peacaavecari. Cotanquitsiquea iriatimpa ancoguitempani ashineventaguitemparini ancantajiaqueriquea: “Caaviji poganejencamajata.” Ari oncoquempa.

²⁶ Irootaquequea iticaarejantanacaca Aapani Irioshi impeacaaguishejiguemparota inintaguisheguetaqueca impashiventacaaquempameca. Oraquea manquigar-entsijia teequea onintajiajeji irimanquigatajemparoji shirampari, manaquea onintaguishetavacaajianaca apimanquigarojiate.

²⁷ Ariquea iquempejiaca shiramparijia teequea irinintajiajeji irimanquigatajemparoji manquigarentsi, manaquea yaagavacaajianaca irapishiramparijiate opeacojianaqueriquea itiontare. Inchiquiojita iquempetacaantajiacaquea iriatimpajia yat-sipetantajiacaca iroorijite ipeacaaguishejianacaro ovashiventajantaguetatsica.

²⁸ Teequea irinintajigueji inquenquejacojiajeriji Aapani Irioshi, irootaquequea iticaarejantanacaca inquenquejaguishejianaquero tiontarentsijencani ipeacaaguishejianacaroquea covaeguisherentsi.

²⁹ Iroguenti isavicaventajiaque cantashitatiaguishejencatatsica: ipeacaaguishejianacaroquea tiontarentsijencapae, inintsiguequeriquea irashijiapae itsipapae, itsipatacantavacaro covaeguisherentsi, icatsimatacotantaque, imetojantajiaque, icatsimatantajiaque, yamatavijantajigui, iquenashivaepojaca intati, aisa icantaguishetacojiaqueri igonorojia.

³⁰ Itsojeventajiacari itsipapae, isemajiacari Aapani Irioshi, caaviji ipigatsatanta, yamenajiaque caaviji yanaajencavaeque, yaventajiacaro maasanopae itsanirore. Yaaguishetashiguetaqueroquea impeacaaguishejiaquempameca. Teequea inquemisantajigueroji irijanintajiacarica.

³¹ Tee irinintajigueji intsajiaque, tee irinetsanajigueroji icanqueca, tee impintsatan-tajiguempaji, tee impeacotantempaji, tee impintsatacotantempaji.

³² Itsajiavecaroquee icanque Aapani Irioshi quericaca quempetanquitsineca imaica irimetojaquegueti iroanaque camorecariqui, cotanquitsiquea iriatimpajia teequee in-quemajigueji, arimpaquee yogaaajianaca ipeacaaguishejianacaroquee covaeguisher-entsi, yogavitsitaroquee ishineventajiacari yamenajiaquerigueti itsipajia ipeacaagui-shevaetacarogueti covaeguisherentsi.

2

Aapani Irioshi teequee incatsimatantashitempaji intati

¹ Piconoagarantajiacaquee aviatimpajia manaquee picantajiaque cameetsavaeque incatsimamajiaqueriquea quempejiaqueroca imaica. Iintsijate pamenajiguejate in-tati. Oraquee picantajiaquegueti imaica aviguentiquea quempetacaantajianquitsica, pipeacaaguishejiacarotari aviatimpajia aisa ipeacaaguishejiacaca iriatimpajia. ¿Arim-pate quero pincojiaquerini Aapani Irioshi aatonijite icatsimajiguimpitsi?

² Oraquee icanquegueti Aapani Irioshi incatsimajiaqueri quempeguequeroca imaica, itsamajiaquero manaquee ipeacaaguishejiacaroquee covaeguisherentsi, teetarite in-catsimatantashitempaji Aapani Irioshi intati, iroomajaca maasano icanqueca.

³ Aviatimpajia picantajiaveca incatsimajiaqueriquea quempeguequeroca imaica, cotanquitsiquea irooriji piquejejiavaca pipeacaaguishejianacaroquee quempegue-taroca ipeacaaguishejiacaca iriatimpajia, ¿arimpate quero pincojiaquempani aatonijite icatsimajiguimpitsi Aapani Irioshi?

⁴ Jmm aricajate pimanintavaquero igavintsajare icavintsajantantamajatigueti, aisa yatsipetacojiaquempigueti, pamenajiaque tequerata incatsimajiguempi. ¿Arimpate teequee pintsajigueji manaquee icavintsajajiaquempi cameetsaniji povashiantajiana-jeroniji pipeacaaguishejiacaca pincantashitatijaianajempaja?

⁵ Cotanquitsiquea piquishoshirentajiaque, aisa teequee pinintajiguenica povashiantajigueroji pipeacaaguishejiacaca cameetsaniji pincantashitatijaiana-jempaniji. Arimpaqueate picovaeguishejianaca, teequee pinquenquejajigueroji oncoramanitapojajegueti arejetapojaquemparogueti incatsimatantajiaquemparica Aapani Irioshi caquinteja, caaviji irogaamajajiaquempiquea incatsimajiaquempi, pinquejetacaantajiaquempa. Iriraquee Aapani Irioshi incantamajajiaqueri maasano querocaca icojiacani.

⁶ Iriatimpa itsamajatiroquee ipeacaaguishejiacaca maasano, aisa itsamajatiro cameetsaguetsica ipeacaaguetsacaca maasano, incantantaquemparica quero incojiquerini.

⁷ Iconoagarantajiaca caquinte icantacotacaaguitarini icomajamajaca, irooriji ininta-jiaque iroganejencatacaavajempari Aapani Irioshi, irishineventajiaavajempari inquite-qui, incogitempani iranijaguiteni. Maasano quempejiatsica imaica incantajiaqueri Aapani Irioshi incoquempani inchoocajiaque iriatimpaqui.

⁸ Cotanquitsiquea caaviji incatsimamajajiaqueriquea maasano iroguentigueti irisavicaventajigue taaca inintajiguica iriatimpajia, maasano teeca irinintajigueji inquemisantajigueroji iroomajatatsica, manaquee ipeacaaguishejiacaroquee covaeguisherentsi.

⁹ Irantsipejiaquempaquee incanquempa maasano caquinte peacagaroca covaeguissh-erentsi, irishimampojancajiaquempaqueeate. Irantsipejiaquempaquee joriojia, iroom-paquea inquejetsijianaquempaquee aisa teeca irijorijoigueji.

¹⁰ Cotanquitsiquea iriraquee comajamajajiaatsica iroganejencatacaajiavajempari Aa-pani Irioshi, irishineventajiaavajempari inquitequi, inchoocamajapojaje cameetsa,

aatoquea ochoocatimatajitsi asereajerineca. Ariqueate inquempetacaajiaquempari maasano iriatimpajia, joriojia aisa teeca irijorijoigueji.

¹¹ Aapani Irioshi yamenajiaqueriquea caquinteguetsica ijamirincaque, aato ichoocatitsi impeacoquempaca.

¹² Maasano covaeguishejiatsica incatsimajiqueri. Irirajia teeca intsajiavetemparoji igantacaantane Aapani Irioshi itioncacotanaqueca Moishishini incatsimatimentajitaqueriquea iriatimpa igovaeguishere aisa, cotanquitsiquea aatotarite icantajiguiritsi Aapani Irioshi: “¿Queroquea ococani teequea pinetsanajigueroji nogantacaantane?” Iri- raquea tsajiavecaroca cotanquitsiquea nintanatsi icovaeguishejiaca irioquea iriguenti incatsimamajiaque Aapani Irioshi inquenquejacaajiaqueriquea, teetarite irinetsana- jigueroji.

¹³ Teenica irioquea yamenajiaque Aapani Irioshi icomajashirentaca irirajia quemajia- jiavetaroca intati igantacaantane, iriguentiquea incantacojiaque icomajashirentaca netsanamajatiroca.

¹⁴ Iriaquea teeca irijorijoigueji teequea intsajiavetemparoji igantacaantane itionca- cotanaqueca Moishishini, cotanquitsiquea oconoacaqueate icomajamajaca iquempe- ta- caajiacaroquea itioncacojiquerogueti, inchiqiojita itsatashijiacaroquea iriatimpajia.

¹⁵ Oraquea iquempejiacaguetei imaica itsajiquero itsajiaqueroquea iriatimpajia que- rocaca incojiaquempani incomajamajajiaquempagueti, iriguentiquea tsatacaajiaque- riquea Aapani Irioshi quejetacaquea itioncajitiro iguenquejanequi, oconoacaquea iguenquejantajiacaca: “Nocovaeguishe- taca”, oconoacaquea aisa iguenquejanaque: “Cameetsataque nantaqueca.”

¹⁶ Ariqueate onquempetanaquempa oncoramanitapojajegueti arejetapojajem- pagueti incantantaquemparica Aapani Irioshi Jesoquirishito incatsimajiaqueri maasano senacajiavecaroca ipeacaaguishejiacaca. Irootaque ocanque Quenquet- satsarentsimajaca Oganejencatatsica notsavetanqueca.

Joriojiamajaca

¹⁷ Cotanquitsiquea piconoagarantaca picanque: “Naroguenti jorio, aatoquea icatsi- matanatsi Aapani Irioshi, notsamajatirotarite itioncacotanaqueca Moishishini.” Man- aqueate aisa pisemeti pijiqueji aviguenti ivintsaremajaca Aapani Irioshi.

¹⁸ Pijivecaji pitsaqueroji inintica Aapani Irioshi, aisa pitsatiroquea taaca opaji cameetsatatsica irooca aisa taaca opaji covaeguishe- tatsica.

¹⁹ Aisa pijivecaji caaviji panaaque pitsati, jero pinintantacaca pintsatacaqueriquea teeca intsateji, pijivecaji piquejetacari acatsavacotanaquerica shamponcajari, pijive- caji piquejetacari tsirencacotaquerica pitsecacotatsica.

²⁰ Inchiqiojita pipeaca tsatacaantantatsica pamenaque ariqueate pagavejaque pintsatacaajiaqueriquea teeca intsateji aisa iriaqueraca tsajiananquitsica taaca opa- jita cameetsaguetatsica aisa taaca opajita covaeguisheguetsica, pamenaquetarite pitsamajaqueroquea itioncacotanaqueca Moishishini, aisa pamenaque irooquea tsa- tacaquempiroca pintsamajaqueroniji maasanopae taaca opajitapae itsavaejitica irooca aisa maasanopae iroomajaca.

²¹ Iriguentiquea pitsatacaajianaquequea itsipapae, ¿ari pitsatacaacampa aviatimpa? Ariquea oquempetaca picanque: “Teequea oncameetsateji paitsitantegueti”, ¿arite pait- sitantimpa aviatimpa?

²² Irootaquequea picanti aisa: “Teequea oncameetsateji poashitirotsi manquigar- entsi”, ¿arite poashitantimpa aviatimpa? Ariquea iquempetaca ipeajitica irioshivijiji- tacaca intati, irootaquequea pamenaquequeate covaeguishevaeca, ¿arite paitsitirimpa yashintacajiaquetacarica choocaguetatsica itemporotequi?

²³ Pisemetacocaró pitsavetarogueti igantacaantane Aapani Irioshi itioncá-cotanaqueca Moishishini, cotanquitsiquea aatogueti pinetsanatiro ocanqueca manaquea oquejevetaca picantaguishtacotaqueri Aapani Irioshi.

²⁴ Ariquea otioncacaquea ocanque: “Irirajia teeca irijorijoigueti icantaguishejiaque-riquea Aapani Irioshi, aviguentijiaqueate quempetacaantajiaqueri.”

²⁵ Aviatimpajia napijorijiateni pamenajiaque totsaiquijiaquempi pichonquimashi pijijiaqueji ariquea irishineventajiaquempiquea Aapani Irioshi, cotanquitsiquea naatimpa noncantajiaquempiquea pinetsanamajajiaqueroja maasanopae itioncacotanaqueca Moishishini, ariquea iroguenti irishineventajiaquempinijite pitotsaiquijiacagueti. Oraqueate aatogueti pinetsanajiguirotsi maasano igantacaantane, quejetaca teeca intotsaiquijiteroji pichonquimashi.

²⁶ Irirajiaquea teeca irijorijoigueti teequea intotsaiquijivetempariji, cotanquitsiquea intampaticaterogueti inintaguetica Aapani Irioshi, iriatimpa iramenajiaqueri quempeca totsaiquijia.

²⁷ Iramenajiquerigueti teeca intotsaiquijivetempariji cotanquitsi inetsanataquero inintaguetica Aapani Irioshi, ariquea onconijavaequequea manaquea piquempeta-caantajia aviatimpajia totsaiquijivetanquitsica tsajivecaroca itioncacotanaqueca Moishishini, cotanquitsiquea teequea pinetsanamajajigueroji.

²⁸ Iriraquea managueti itotsaiquijiqueriquea imeshinaqui teequea irio jorionmajaca yashintamajatacaca Aapani Irioshi, aisa teequea irishineventempariji Aapani Irioshi iramenajiquerigueti mana itotsaiquijiqueru itsinoqui.

²⁹ Iriraquea tsaróventamajatarica Aapani Irioshi, aisa inetsanamajaquero icantica, irioquea iriguenti jorionmajaca yashintamajatacaca Aapani Irioshi, icantashitatiama-jatanajitari ishirequi, teequea irooquea iraventempaji itotsaiquijiquerigueti. Teetari irooquea cantashitatiacaajempariji inetsanatirogueti itioncacotanaqueca Moishishini, iriguenti cantashitatiacaajari Ishire Aapani Irioshi. Iriraquea quempetiroca imaica shineventajicari, cotanquitsiquea teequea irioquea shineventajiajemparine caquinte-
jia, iriguentiquea shineventajari Aapani Irioshi.

3

¹ Iroosacánica ¿taa opajita ocameetsatantacaca irijorijoitegueti? ¿Taaquea opajita ocameetsatantacaca intotsaiquijiterigueti?

² Oshequiqueate ocameetsavaetantacaca. Aatimpajiatari jorijia icavintsajamajajia-queca Aapani Irioshi. Jeroquea anaavaequeroca maasanopae: yojocacotacaantajia-cajiro Iguenquetsatsare cameetsaniji anquempoguijajiaquero agaajiaqueneri itsipajia.

³ Oraqueate choocagueti teeca irinetsanateroji inintacaaquerica, ¿arimpate iquejeta Aapani Irioshi aato inetsanatiro icanqueca?

⁴ ¡Aatoshine! Intsojeajivetaquempaquate maasano caquinteja, cotanquitsiquea Aapani Irioshi aatoquea itsojegatsi, irinetsanamajaqueroquea icanqueca. Ariquea itioncacojitiriquea cantatsica:*

“Iramenajiquempiquea picoguitani pitampaticamajatiro, teequea pintsojeguempaji. Incantacojivequempigueti chooca pipeacaaguishetacaca, panaantequea iramenajique picomajamajata.”

⁵ Oraquea apeacaaguishetagueti covaeguisherentsi onigaantavecaroquea icomajama-jata Aapani Irioshi, Iriomajaca. Iroosacánica, ¿querocaca ancantajigueni imaica? Aricaja ancante: “Irooquea nogovaeguisher nigaantaqueroca icomajamajata Aapani Irioshi, ¿querocaquea ocotacani icatsimatimentantaquenaroca nigaantaqueroca icoma-jamajata iriatimpa? Teecajate intampaticateroji.” (Irootarite icantica caquinte.)

* 3:4 Sar. 51.4. Iriraquea Taavini itioncacotanaqueri Aapani Irioshi.

⁶ ¡Aatoshinet acantirotsi! Aatomegueti itampaticamajatirome Aapani Irioshi, ¿querocampate incoquempani intsatantajiaquemparica quepatsiquitica incatsimatimentajigueri igovaeguisherere?

⁷ Aricajate incante nintavetanquitsineca irompetacotanajempa: “Notsojeagueti irooqueea yamentantajitarica Aapani Irioshi iriguenti tampaticamajatiroca, onquenantanaquempaca intsaromentantajitaquemparica. ¿Quero ocotacani incatsimatimentantaquenaroca Aapani Irioshi notsojeagueti incanque: ‘Iriosacanica covaeuguishereri?’”

⁸ Arimequeate onquempetaquempamequeate, ¿quero ococani teequeea ancantajigueji: “Jaame ampeacaaguishejiguempajate covaeuguisherentsi cameetsaniji anigaantajiaqueriniji Aapani Irioshi teequeea incovaeuguishetimatempaji?” Ariqueate chooca cantashijavetatsica: “Ari incanque Paavoro, irooqueea itsatacaantaque”, manaquea itsojeaca intati. Cameetsataquequeea incatsimatimentajiaqueri Aapani Irioshi, iriotari quempetacaantajanquitsi.

Maasano aatimpajia agavejajiacaji covaeuguisherentsi

⁹ Iroosacanica imaica ¿querocaca ancantajigue? ¿Arica ancantajiguequeea aatimpajia joriojia caaviji anaavaequeriquea teeca irijorijoigueji? ¡Aatoshine acantajiguitsi! Aritaque nocantaque incajaranqui, maasanoqueea aatimpajia agavejajiacaji covaeuguisherentsi, iquempejiaca joriojia aisa teeca irijorijoigueji icovaeuguisherijaca.

¹⁰ Ariquea itioncacojitiroqueea, ocanti:

“Teequeea inchoocatimateji caquinte comajarimajaca teeca incovaeuguishetimatempaji, tee inchoocateji aparo.

¹¹ Teequeea quericaca tsamajatatsineca, teequeea queri nintamajatatsineca intsaqueri Aapani Irioshi.

¹² Maasano itomicapitsajiaqueri, maasanoqueea ipomatsajiacaja.

Tee inchoocatimateji comajamajatanquitsica, tee inchoocateji aparo.”✧

¹³ “Iquenquetsaguishemajaqueroqueea chomisaaromajaca, quejetaca itsano iroome omoro yojoquijitantajitarica metojari.

Yamatavijanenetantapinitacaró inene.”✧

“Iquepigavagantevaetaque iquejetacari camaarini irooriji icantaguishetacoqueri igonorojia.”✧

¹⁴ “Icantacoguitaniquea icatsimatsajencaguitirini igonorojia, manaquea osotoajencatanaque igatsimajencare.”✧

¹⁵ “Yamejiacaró iguiti yanijitantacaró ishintsitashitanaquero irimetojantajigue oshivaririncajatanaque iriraja.

¹⁶ Querocagueti iquenajiaqueni yatsipetacaajiacariquea itsipapae, ishimampojanca-caaguitarini.

¹⁷ Teequeea intsajiajeji iraavacaajajempaji inchoocajiajeji cameetsa.”✧

¹⁸ “Teequeate intsarocaaajiguempariji Aapani Irioshi.”✧

¹⁹ Imaicaqueea atsajiaque oraqueea maasanopae Itioncacaantaqueca Aapani Irioshi, itioncaciaqueneriquea irirajia inintacajiaaqueca irinetsanajiguero. Itioncacaanqueroqueea cameetsaniji irimajeretacaajiaqueriniji maasanojia, iramenajiqueriquea maasano caquinteji teequeea irinetsanajigueroji, ariquea incanque Aapani Irioshi quero incojitaquerini maasano.

✧ 3:12 Sar. 14.1-3; 53.1-3; Eq. 7.20. ✧ 3:13 Sar. 5.9. ✧ 3:13 Sar. 140.3. ✧ 3:14 Sar. 10.7. ✧ 3:17 Is. 59.7-8.

✧ 3:18 Sar. 36.1.

²⁰ Teequea inchoocateji agavejatsica irinetsanamajatero maasano Itioncacaan-
taqueca Aapani Irioshi iroome incantantaquempaceca Aapani Irioshi: “Iriguenti co-
majarimajaca, tee incovaeguishedimatempaji.” Oraquea itioncacaanqueca manaquea
otsatacaajiacaji arosacanica covaequisherija.

*Incomajatacajiaqueri Aapani Irioshi maasano aventajiaquemparineca
Jesoquirishito*

²¹ Cotanquitsiquea imaica yonigaacajiro Aapani Irioshi quero icotani icomajatacaan-
tagueti. Teequea onquejetemparoji ipanquenajivetarogueti igantacaantane. Yoni-
gaacajica imaica irootaquequea itioncacojiaqueca coramani Moishishini aisa itsipajia
tsavetantajatsica.

²² Incomajatacajiaqueri Aapani Irioshi maasano aventajiaquemparineca Jeso-
quirishito, irioca joriojia, irioca teeca irijorijoigueti, iconoacaantajiacari,

²³ aritarite icovaeguishejiaca maasano, tee inchoocateji moncarateroneca irogane-
jencare Aapani Irioshi.

²⁴ Cotanquitsiquea iriatimpa icavintsajacojiaqueri itigarancaqueri Quirishito Jesoshi
imetojaventajiacaji ariqueate imeshiajiaqueriquea maasano aventajiacarica. Aatim-
pajia teequea taaca opaji ampeacaajiaquempaceca cameetsaniji irimeshiajiajiniji,
inchiqiojita inique iriatimpa irimeshiajiacaji.

²⁵ Paesatoniqui tequeratagueti incoraquejeti Jesoquirishito yamenajavecari Aapani
Irioshi coramanipaequitica covaequishedimajataca, cotanquitsiquea yatsipetacojiacari
itsaquequea irimetojaventajiaqueri oncoramanitapojagueti Jesoquirishito. Ocora-
manipojaguegueti inchiqiojita itigarancaqueri irantsipeventajiacaji irimetojaven-
tjiajia maasano covaequishejiatsica, ipiapojajaji. Oraquea yompajacojiquerigueti
ochovivincajatanaquequea iriraja aatonijite icatsimajiguiritsi Aapani Irioshi aven-
tjiaquemparineca Jesoquirishito incantajiaquegueti: “Arimajasacanica imetojaven-
tjiaquea.” Iniquequea Aapani Irioshi intsajiaque maasano teequea quericaca irisheta-
cotantashiquempaqueate intati, aisa teequea quericaca incatsimatantashitaquem-
paguea intati.

²⁶ Ariquea oquempetaca imaica cameetsaniji antsajiaqueriniji aatimpajia iriraquea
Aapani Irioshi icocani tampatica iroaquero. Oraquea ishetacojiaquerigueti aven-
tjiajarica Jesoshi, teequea irimeshiantashitempaji intati, manaquea yamenajiaque-
riquea yaventajiapojari, itsajiaquequea imetojaventajiaqueri.

Taaqueate asemejiaquempacate

²⁷ Iroosacanicate ¿taaqueueate opaji asemetantajiaquempacate aatimpajia? ¡Taampate!
¿Arimpate quero ococani? Teequea irooquea irishetacotantajiaji Aapani Irioshi ira-
menajiacajigueti anetsanamajiaquero maasanopae igantacaantane, manaquea icav-
intsajamajajiacaji yamenajiacaji aventaventashirentajianajari Jesoquirishito.

²⁸ Irootaquequea noncantantajiaquempica irishetacojiaqueriquea Aapani Irioshi
maasano aventajiaquemparineca Jesoquirishito, teequea incantacojitajeroji imaica:
“Intsishiatsi pinetsanatajeroshiatsi itioncacotanaqueca Moishishini irishetacotimenta-
jitaquempinijite.”

²⁹ Iriraquea Irioshimajaca ¿arimpate apaniro irioshicari joriojia? ¿Arimpate teequea
irioshitempariji caquinteguetatsica? Jeejeguitatsi, irioshitacari aisa caquinteguetat-
sica.

³⁰ Tee inchoocateji itsipa Irioshimajaca, apaniromajaca icocani iriatimpa yamena-
jiaqueri maasano aventajiacarica Jesoquirishito quempejiaca teeca incovaeguishedi-
matempaji, irioca totsaiquimashitacaantatsica, irioca teeca intotsaiquimashitacaan-
tempaji.

³¹ Iroosacanicate aquempejiaquerogueti imaica aventajiacarigueti Jesoquirishito
¿arimpate ovashiantajianaqueroqueate itioncacotanaqueca Moishishini? ¡Teequeueate!

Arimpaquea anquempejanaquero imaica iroaqueragueti, anetsanamajajiaquero-quea.

4

Quero icocani Averaameni

¹ Imaica iroguenti noninque nonquenquejacaajiguempirijate Averaameni choviquimajajiaquenaca naatimpajia joriojia, ¿quero icocani iriatimpa?

² Iroomequea irishinevenquemparimequeate Aapani Irioshi Averaameni taaca opajitapae ipeacaaguetaqaca, iragavejaqueme irisemetacovaequemparomequeate, cotanquitsiquea yamenaqueriquea Aapani Irioshi tee onchoocateji taaquea irisemetacotempaca.

³ ¿Quero ocanque Tioncarentsimajaca? Ariquea ocanque: “Iriraquea Averaameni yaventanacariquea Aapani Irioshi,* jeroqueate yamentacarica quejevaecaquea tee incovaeguishetimatempaji.”☆

⁴ Iroguenti oquempetacaroquea ocativa, quericaca shiacotatsica, iroompaquea irivegarajitavajeri teequea incantajiteriji: “Manaquea nojocashiquempiri intati, nocavintsajashiquempiquea”, manaquea ivegaratsijitaroquea ishiacoquegueti irooriji yaacotantaque.

⁵ Cotanquitsiquea inchoocategueti itsipa aatoquea taaca opajita ipeacagatsi cameetsaniji irishetacojiquerinijite manaquea iraventapojempari Aapani Irioshi, inquenquejanaquequea incanque: “Notsamajaque iriraquea Aapani Irioshi ishetacotiri covaequishejiatsica”, ariquea iroguenti irishetacotaqueriqueate yamenaqueritari yaventapojajari.

⁶ Ariquea iquempetaca Taavini coramani icanque irishinevaequempa quericaca iramenaqueca Aapani Irioshi quempeca teeca incovaeguishetimatempaji, manaquea inchiqiojita icavintsajashivaecari intati, teenicate onchoocatenica cameetsatsica imepacaguempaca caquinte incavintsajacotantaquemparica Aapani Irioshi.

⁷ Ariquea icanque:

“¡Ishinevaetanaja maasano ipeacotsitajaca Aapani Irioshi ipeacaaguishecaca, irirajia imaperincacotsitaqueca igovaeguisherejia!

⁸ ¡Ishinevaetanaja irirajia teeca inquenquejacagueriji Amajirote igovaeguisherejia!”☆

⁹ ¿Arimpa apaniro irio shinejianquitsine irirajia icantajitica “totsaiquimashitacaantatsica”? ¿Aatempa irio shinejianquitsine teeca intotsaiquimashitacaantempa? Iintsijate pinquenquejajiguerijate Averaameni. Iriatimpa iquemisanqueri Aapani Irioshi iquenquejanaque: “Arimaja Aapani Irioshi irinetsanaquero icanqueca”, irootaquequea yamentacarica quempeca teeca incovaeguishetimatempaji.

¹⁰ Cotanquitsiquea ¿querote yamentacarica Aapani Irioshi quempeca teeca incovaeguishetimatempaji? ¿Ari yamenaqueri itotsaiquijiquerogueti ichonquimashi, irooca tequerataguete intotsaiquijiteriji? Teequeate ariquea irameneriji itotsaiquijiqueriguete, manaquea yamenaqueri tequerataguete intotsaiquijiteriji.

¹¹ Iriraquea Averaameni iroquetitaquea iquemisanqueri Aapani Irioshi icanqueriguete incavintsajamajaqueri, ocoramanitacovaetanaquequea itotsaiquijiqueriquea intsatantajiquemparoca jac yamenaqueriquea Aapani Irioshi quempeca teeca incovaeguishetimatempaji irooriji yaventanacari. Quempetacaquea ipeantajaca choviquishirentajianaquerineca maasano aventaventaipojajemparineca Aapani Irioshi, totsaiquivetatsica aisa teeca intotsaiquijivetempariji. Ariqueate

* **4:3** Ocanqueguete ***Iriraquea Averaameni yaventanacariquea Aapani Irioshi*** manaquea ocanque itsama-jaquero iriatimpa irinetsanaquero Aapani Irioshi maasano icanquerica, yaventantanacarica. (***Abraham creyó a Dios.***) ☆ **4:3** Jen. 15:6; Ga. 3:6. ☆ **4:8** Sar. 32:1-2.

iquempetsijigari Aapani Irioshi iriatimpajia aisa, yamenajiaqueriquea quempeca teeca incovaeguishetimatempaji.

¹² Arimajaguitatsi Averaameni iriguenti choviquijianaquerica irirajia itotsaiquijiquea, cotanquitsiquea teequea noncantacoteriji itotsaiquitamampeashijitacaca in-tati, iriguentiquea ichoviquimajajianaqueca irirajia quempemajatarica iriatimpa Averaameni itsaromentacagueta, itsaque irinetsanamajaqueroquea Aapani Irioshi icanquerica. Ariqueate iquempetaca imaica tequeratagueta intotsaiquijiteriji.

Aapani Irioshi inetsanamajaqueroquea icanquerica Averaameni

¹³ Iiraquea Aapani Irioshi icanqueri Averaameni oncoramanitacovaetanaquegueti irojocaqueneri maasanopae quepatsi, irashinquemparoquea iriatimpa aisa inchoviquijiaqueca, cotanquitsiquea teequea ariquea incanteriji imaica yamenaquerigueta inetsanataqueroquea itioncacotanaqueca Moishishini, tequeratanica onchoocatenica. Manaquea icanqueri inejaquerigueta iquemisanqueriquea icanquerigueta incavintsajamajaqueroquea incaramirincajianaquequea inchoviquijianaqueca.

¹⁴ Oraquea iriomegueta ashintajiaquemparomequea maasanopae quepatsi irirajia netsanamajajiaqueroquea itioncacotanaqueca Moishishini, aatomequea amitacotajime aventaventaivequemparigueta Aapani Irioshi, aatomequea ashintajigarotsi icantacaquerica Aapani Irioshi Averaameni yamenaquerigueta itsarovencari.

¹⁵ Iiraquea tsajiavecaroca icantaguetica Aapani Irioshi irinetsanamajajiqueca cotanquitsiquea teequea irinetsanamajateroji, incatsimatimenqueriquea. Oraquea aatomegueta itsajitromequea querocampate incojiqueroni irinetsanajiquero, teetarite intsajiteroji, aatomequeate querica quempetacaantatsineca.

¹⁶ Iroosacanica imaica, inchoviquiojita ininque Aapani Irioshi incavintsajacoqueriquea Averaameni aisa inchoviquijianaqueca, icanqueri ariquea inquempetaqueroquea imaica. Cotanquitsiquea oraquea icanquerigueta incavintsajacomajaqueroquea inchoviquijianaqueca, teequea apatiroti iriguentijia inquenquetsatacojigueti inchoviquijianaqueca netsanajiaqueroquea itioncacotanaqueca Moishishini. Iriguentiquea aisa icantacojiaque maasano aventajianajemparineca Aapani Irioshi quempemajajiaquemparineca Averaameni yaventsitarigueta. Irootaquequea icantantajicarica Averaameni iriguenti choviquijianacajica maasano aatimpajia aventajiacarica Aapani Irioshi.

¹⁷ Ariqueate ocanque Tioncarentsimajaca: “Nopeacaquempi choviquijianaquerineca oshequini caquinteguetananquitsineca.”[☆] Iriguentiquea cantanquitsi Aapani Irioshi yamenaquerigueta Averaameni yaventanacari. Iriatimpa iriguenti tancoretancorejajajerineca metojaguevetatsica, aisa iquenquetsatacotsitacaro tequerataca onchoocateji quejetaca chooca.

¹⁸ Oraquea icanquerigueta Aapani Irioshi Averaameni ipeacaacariquea choviquijianaquerineca oshequini caquinteguetananquitsineca, jac icantapaeni quenquevarivaetanaji, tequerataquea irijanintempaji. Querocampate incaramirincatantajianaquempaca inchoviquijianaquempaca. Cotanquitsiquea iriatimpa yaventana-guitarini Aapani Irioshi yoguijaguitiniquea irinetsanatavaquerotajate icanquerica, icanqueriqueate: “Ariqueate inquejejaquempaquea pinchoviquijianaqueca iroshequiavaetanaquequea.”[☆]

¹⁹ Iiraquea Averaameni irooshipoji irajagantsitacotanaque 100, yamenaca iriatimpa jac quenquevarivaetanaji icanca irooshipoji irimetoje, querocampate incoquempani iroacaantaquegueta. Ariqueate oquempetaca Sara imanquigare, pirijavaetaque oamento, cotanquitsiquea irira Averaameni teequea irimagoshirentanaqueje arimpaqueate yaventamajatanacari Aapani Irioshi.

[☆] 4:17 Jen. 17.5. [☆] 4:18 Jen. 15.5.

²⁰ Teequea incanteji: “Aricajate irinetsanataqueroquea Aapani Irioshi icanquenaca.” Manaquea arimpaquea yaventanamajatanacari, aisa arimpaquea ishineventamajatanacari icanque: “Caaviji yagavejamajati Aapani Irioshi.”

²¹ Itsamajaquequea teequea omanapitsatempariji irinetsanaqueroqueate icanquerica, yagavejamajati.

²² Irootaquequea yamentacarica Aapani Irioshi Averaameni quempeca teeca incovaeguishetimatempaji.

²³ Cotanquitsiquea otioncacagueti “yamentacarica quempeca teeca incovaeguishetimatempaji”, teequea apaniro intioncacotimentajiteriji Averaameni.

²⁴ Itioncacotsijitacajiquea aatimpajia aisa, yamenajiacajiqueate quempeca teeca ancovaeguishetimatempaji aventajianajaritari iriatimpa, iriotaquequea vochatajiri Amajirote Jesoshi imetojavecagueti.

²⁵ Iiraquea Amajirote iriotaquequea itigarancaqueca Aapani Irioshi irimetojaventajiacajiquea aatoniji icatsimatimentajajirotsi agovaeguisherejia. Ariquea imetojaguegueti ivochatajiri cameetsaniji iramenimentajajinjite quempeca teeca ancovaeguishetimatempaji.

5

Aapani Irioshi yamenajiacaji quempeca teeca ancovaeguishetimatempaji

¹ Imaicaquea imaica jac yamenajiacaji Aapani Irioshi quempeca teeca ancovaeguishetimatempaji, yamenajiacajitarite aquemisanqueroquea icanquegueti irishetacojiaqueriquea iguempevaere maasano aventajiaquemparineca Jesoquirishito. Jero imaica teequea antsaroacaajajempari incatsimajiacaji manaquea ashinejiaca, iriotaquequea quempetaquerooca imaica Amajirote Jesoquirishito.

² Iriotaquequea metojaventajiacaji, jero icocani icavintsajamajacaji Aapani Irioshi yamenajiacajitarite aventajiacari. Ashinejiaca acanca aguijacojiacagueti oncoramanitapojajegueti amenajiapojero iroganejencare Aapani Irioshi.

³ Cotanquitsiquea teequea aparo onchoocateji ocatica. Aisa ashinevaetacaquea atsipevaecagueti, atsamajajiaquetari antsipevaetaquempagueti irootaquequea antstantajianaquempaquea cameetsaniji agavejajiaqueniji antampishitashijiaqueroniji covaeeguishetantatsica arimpaquea antsaromentamajatanaquempari.

⁴ Oraquea antampishitashijiaqueroqueti antsipevaequempagueti intsajiqueroquea arimajaca otampaticataque atsaromentamajacari, iroompaquea aguijacojianaca ancquempejianaquempariquea iriatimpa oncoramanitapojajegueti.

⁵ Oraquea aguijacotavajeroqueti ontsanatantaquempaca icanqueca Aapani Irioshi aatoquea ovashiventajaji. Choocatarite ichoocashirentajiacaji Ishire Aapani Irioshi yojocajiacajica, iriotaquequea tsatacaajiacaji ipintsamajajiacaji Aapani Irioshi.

⁶ Coramani aatimpajia teequea antsajigueji querocampate ancojiaquempani asheta-cotacaantajiaquempagueti, cotanquitsiquea ocoramantapojaquegueti arejevaepojaca savincaguiteri inintantacaroca Aapani Irioshi, ariquea imetojaventajiacaji Quirishito maasano aatimpajia covaequishejiatsica.

⁷ ¿Arimpate quericampate nintanquitsineca irimetojavenqueri irapicaquintejiate comajamajataatsica? Iroompaquea inchoocateguetei cavintsajantamajataantatsica, iriotaquequea arica iragavejajite irimetojaventajiqueri.

⁸ Cotanquitsiquea jeroquea yonigaantantacajiroca Aapani Irioshi arimaja ipintsamajajiacaji: Quirishito imetojaventajiacaji aatimpajia maasano covaequishejiatsica tequeratatirajaguetei ancantashitajajiguempaji.

⁹ Ochovivincajventanacaji iriraja, irootaquequea yamentajiacajica Aapani Irioshi quempejiacaji teeca ancovaeguishetimatempaji. Jero atsamajataantacaca

arimajacatari yaajivajajitari Quirishito aatonijite icatsimatimentajiajirotsi Aapani Irioshi agovaeguisher oncoramanitapojajegueti.

¹⁰ Coramani teequea ashineventajiavetempariji Aapani Irioshi. Ariquea iquempetaca iriatimpa teequea irishineventajiavetajaji aatimpajia, cotanquitsiquea ocoramanitapojaquegueti itigarancaqueri Irijanite imetojaventajiacaji cameetsaniji ashineventavacaajiaquempaniji. Quempeca imaica ashineventavacaajiacagueti, iroompaqueate caaviji irajivajajaji aatoniji apega camorecariqui, pochatanajitarite ariquea icocani ichoocati.

¹¹ Teequea aparo ocativa, yoguishinejajiacaji Aapani Irioshi aisa, iriotaquequea quempetaqueeroquea imaica Amajirote Jesoquirishito metojaventajiacajica cameetsaniji irishineventajiajiniji Aapani Irioshi.

Araini aisa Quirishito

¹² Paesatoniqui apatsinoro caquinte covaequishetanquitsica, ariquea icanqueri Aapani Irioshi irimetojanetanaje. Irootaquequea imetojantajiajaca caquinteguetatsica iroguentsiquea quejetacaajiajariquea igovaeguisherjia, maasanotari icovaequishejiaca.

¹³ Coramani tequeratagueti intioncacoteroji Moishishini maasanopae icanquerica Aapani Irioshi, jac covaequishejiaca maasano caquinteguetatsica, cotanquitsiquea teequea incanteji Aapani Irioshi: “Teequea irinetsanajigueroji nogantacaantane, nonquenquejacaajiaqueriquea oncoramanitapojajegueti.” Tequerataqueate intioncacaanteroji.

¹⁴ Irirajiaquea caquinteguetatsica ichoviquijianaqueca Araini maasano icovaequishejiaca, cotanquitsiquea teequea inquempemajatajempariji Araini peacaaguishecaroca icantimenquerica Aapani Irioshi. Icojiacaniquea iquempejiaca imaica arejevaecaroquea itioncacotantanacaroca Moishishini icanquerica Aapani Irioshi. Oraquea icovaequishecagueti Araini irooquea oshimerancantapojaca yamentantajiajaroca maasano imetojane, cotanquitsiquea iriraquea coraquetaquitatsica ocoramanitapojaquegueti manaquea imetojaventsijigari maasano cameetsaniji irimeshijiaquerinijite.

¹⁵ Apatsinoroquea covaequishevetatsica Araini ariquea yamenajiaqueroquea imetojane maasano caquinteguetatsica, cotanquitsiquea Aapani Irioshi caaviji icavintsajamajajiacaji niganquiquea anaavaetanaqueroquea icovaequishecagueti Araini metojacaajiavecajica. Itigarancantacarica apatsinoro Jesoquirishito irimetojventajiacaji. Ocoramanitapojaquegueti icoraquetaque iriatimpa ariquea iquempetaqueeroquea imaica ipintsamajajiacaji imetojventajiacaji irimeshijiaqueriquea incaramirincajianaque caquinteguetatsica.

¹⁶ Oraquea icavintsajacajigueti Aapani Irioshi, tee onquempetemparoji icovaequishecagueti Araini. Iroaqueragueti apatsinoroquea Araini icovaequishecagueti ariquea ishimerancacajiro yamentantajiacajica Aapani Irioshi maasano acovaequishejiaca, cotanquitsiquea caaviji ipintsamajajiacaji aatimpajia caramirincatacaroca covaequisherentsi, ivetsinantacotajaji yamentantajiajajica quempeca teeca ancovaequishetimatempaji.

¹⁷ Iroaqueragueti icovaequishecagueti apatsinoro ari aapojacaji metojagantsi, imaicampani icavintsajacopojajajigueti apatsinoro Amajirote Jesoquirishito yanijacaashirentapojajaji imajirontacaashirentapojajaji maasano aatimpajia ishetacojiaqueca apeantanajaca comajari.

¹⁸ Icovaequishecatarite apatsinoroveca Araini icantomajacotantajitacarica maasano caquinteji imetojanetanacaca. Ariquea iquempetaca coramani apatsinoroquea Jesoquirishito imetojventajiaqueri maasano cameetsaniji iramenajiaqueriniji Aapani

Irioshi quempeca teeca incovaeguishedimatempaji iroompaquea incoquempani inchoocajiaje.

¹⁹ Apatsinoroquea icocani Araini teequea inquemisanteriji Aapani Irioshi, ariqueea incovaeguishedantajianacaca maasano caquinteguetatsica. Ariqueea oquempetaca aisa apatsinoroquea icocani Jesoquirishito iquemisantamajaqueri Aapani Irioshi, yamenantajicarica caramirincajianquitsica quempeca teeca incovaeguishedimatempaji.

²⁰ Coramani Aapani Irioshi icanqueri Moishishini intioncaqueroquea maasanopae icantaguetica cameetsaniji intsajiaqueniji ishiraerijia manaqueea incovaeguishejiaca, teequea irantajigueroji inintaguetica iriatimpa, cotanquitsiquea arimpaquea itiroroncamajatanacaro. Cotanquitsiquea icaramirincatacaajivecaroguetti covaeguisherentsi, arimpaquea icavintsajamajajiaqueriquea Aapani Irioshi anaavaetanaqueroquea jmm.

²¹ Coramani mana oquejevetaca omajironca covaeguisherentsi imetojanetantacaca caquinteja. Cotanquitsiquea imaica iroguenti majirontamajapojajatsi igavintsajacotantare Aapani Irioshi ancomajatimenquempaniji anijaguiteniji. Iriotari quejequero Amajirote Jesoquirishito.

6

Ametojapitsajiaqueroquea covaeguisherentsi

¹ Iroosacanicca ¿querocaca ancantajigueni imaica? ¿Arimpa jatanatsi ancovaeguishejiguempani cameetsaniji incavintsajamajajiacajinijite Aapani Irioshi?

² ¡Aatoshinete! Pamenerijate metojari imetojimaque teequea jatanatsi incovaeguishedatempaquea, jac metojaque. Ariqueea aquempejiaca aatimpajia aisa atsaroventimajiacari Quirishito quempetaca ametojapitsajiaqueroquea covaeguisherentsi, ¿ariqueea quero ancojiaquempani jatanatsi ancovaeguishedatempataja?

³ ¿Arimpa tee pintsajigueti, maasanoqueea aviñacajatimentajiacariguetti Quirishito Jesoshi, oquempetaca atsipajiacari imetojaqueguetti?

⁴ Oraqueea imetojaqueguetti Quirishito yoguijaajivequitari omoroqui. Ariqueea oquempetaca aviñacajiacaguetti aatimpajia iroguenti ocantacoque yoguijaajivequitariiguetti coramani, quempetaca aricaca aconoitajari yoguijaajiqueriguetti, cotanquitsi ipochatanaji. Iroguentiquea vochatajiri iroganejencare Aapani Irioshi. Ariqueea oquempetaca aisa asotoajajianajiguetti ojaaquí quempeca aricaca aconoitajari ipochatanajiguetti cameetsaniji ancantashitajianajempanijite aatoniji aquempejajatsi tequerataguetti antsaroventempariji.

⁵ Jac aconoajiacari Quirishito imetojaqueguetti quejetaca ametojajiaque aatimpa, ariqueea anquejejiacquempa anconoajiaquempani aisa ipochatanajiguetti.

⁶ Imaica atsamajajiaque oraqueea yompajacojiqueriguetti Quirishito quempetaca aricaca itsipatacaantajiacajiri ampajacojiaca aatimpajia ametojapitsajiaqueroquea covaeguisherentsi aatonijite omperaperaatajaji.

⁷ Iriratari metojari tee inquemajeroji covaeguisherentsi omperaperaavecarica.

⁸ Imaica jac atsipajajari Quirishito ametojajiaque, atsajiaquequeea anijajianaje anconoapojajempani.

⁹ Atsamajajiaquequeea ipochatimatanaji Quirishito imetojavetacaguetti aatoqueea imetojimatajitsi aisa, yagavejamajaqueroquea metojagantsi, aato agavejajiri.

¹⁰ Oraqueea imetojantacaca iroguenti imetojimentaquee agovaeguishejiaca, aparo imetojaquiti iteroncaquitiro. Cotanquitsiquea yanijanajiguetti iriguentiquea yanijimentanaji Aapani Irioshi.

¹¹ Imaica ariqueea pinquempejiacquempa aviatimpajia, pamenempajate quempani pimetojapitsaquero covaeguisherentsi, iriguentiquea panijimentanaji Aapani Irioshi, itsipatanajimpitari Quirishito Jesoshi.

¹² Shoshoh pimajirontacajaarotsi covaeguisherentsi pitsinometojanequi, piquemisantajirotsi pinintaguishevecaca.

¹³ Oraquea pacopae, piguitipae, pinene, poquiya, maasanopae, aatoja pipeacaaguishetantajarotsi taaca opajitapae covaeguisherentsi, iriguentiquea ashintajemparone Aapani Irioshi. Pincantsitempariquea irashintamajatempi iroorijite yanijacaa-jimpi pimetojashirentavecaguete. Manaquea irashintatsinotajempi maasano pimpeacaantanajemparoca cameetsaripae.

¹⁴ Aatotarite omperaperaatajimpitsijate covaeguisherentsi, teetarite onquejetajemparoji ipanquenapanquenajiveguitaroni itioncacotanaqueca Moishishini, manaquea icavintsajacojiaquempi Aapani Irioshi yagavejacaajiaquempi.

Quero icotani savicaventiroca covaeguisherentsi aisa savicaventiroca inintaguetica Aapani Irioshi

¹⁵ Iroosacanica ¿querocaca ancantajigue imaica? Amenajiaqueriquea icavintsajamajiacaji Aapani Irioshi, teequea incantajiajaji anetsanajiajeroji maasanopae ican-taguetica coramani irinetsanajitaje, ¿arimpate nintanatsi ancovaeguishejiguempanijate? ¡Aatojate aquempejiguirotsijate imaica!

¹⁶ Aviatimpajia pitsajiguitarite inchoocateguete aparo caquinte inchiqiuojita impi-mantaquempa irashintajiquempari, inquemisantamajaqueriquea ashinquemparineca iroompaquea irashintaquitiguempari incoquempani inquempetaquempaquea imaica, ¿arimpate queroquea incoquempani iroanaje osamani inchoocatashitajempanijite intati? ¡Aatoja yagavejitsi! Ariquea piquempejiaca aviatimpajia imaica, irooguete pishineventajiaquempaquea pincovaeguishejiguempaquea, quempecaquea ashintamajaquempi covaeguisherentsi, iroompaquea pimetojajianaque poapoaitanaque camorecariqui. ¡Querocampate pincojiaquempani povashiantajianajerojate! Oraquea irooguete pishineventajiaquempaquea pinquemisantajianajeri Aapani Irioshi, intampishitacaajianaquempiquea cameetsaniji pincomajamajianaquempaniji.

¹⁷ Coramani oquejetaca omperaperaavetaquempi pigovaeguishere ashintavetaquempi, cotanquitsiquea imaica iroguenti piquemisantajiaji itsatacaajitaquempica pinintamajajiavaquero, irootaquequea nocantantacarica Aapani Irioshi, “Ariotesaa.”

¹⁸ Yaajitanajimpi, tee ashintajempi covaeguisherentsi, irooquea imaica omperaperaatanajimpi comajamajatagantsi.

¹⁹ (Iroguenti notsavetacoguetanaquequea imaica yamenaguetica caquinteji cameetsaniji pinquemajiaqueniji taaca opaji nocanqueca, namenaquequeate aatoguete noquempetiroquea imaica manaquea omanapitsajiaquempiquea.) Quejetaca coramani pipimantatsinonetaca pimpeacaaguishetaquempaniji covaeguisherentsijia pintigariseavaequeroniji, imaicampani iroguentiquea pimpimantatsinotajempa pimpeacaantajemparoca cameetsaguetatsica pincomajatimentajempaniji.

²⁰ Ogantagatirajaguete omperaperaaquempi covaeguisherentsi, teequea pincomajamajajiguempaji.

²¹ Oraquea piquempejiavecaguete, ¿arimpate queroquea ocojiaquempini? ¿Arimpate oocani oshinetacaajiaquempi ovashiventajajiaquempica imaica? ¡Teequeate! Teequea anijacaanteji quempeguetacaroca imaica, manaquea oacaanti camorecariqui.

²² Cotanquitsiquea imaica jac yaavajimpiquea Aapani Irioshi aatonijite omperaperaatimpi covaeguisherentsi, iriguentiquea ashintajiajimpi, pisavicaventanajiroquea inintaguetica iriatimpa, ariquee picotanaca picomajamajianaca, pincantacoguitempani panijaguiteni.

²³ Oraquea irivegaratantajitaquemparica peacaacaroca covaeguisherentsi, iroguenti metojanentsi. Cotanquitsiquea ora irojocashijiaquenerica Aapani Irioshi

tsipashirentajiaquemparineca* Amajirote Quirishito Jesoshi, iroguenti anijagantsi, incoguitempani iranijaguiteni.

7

Tsaroventajatsica iquempejiacar ometojacoteguetei manquigarentsi

¹ Napitsaroventarijiate, iintsijate pamenajigue intati. Aviatimpajia pitsajiguirotarite quero ocotani maasanopae icantimentantajiguetica. Iroguentiquea icantimentajiqueriquea tequerataguetei irimetoje. Oraquea irimetojaqueguetei ariquea iroguenti aatojate icantimentajitajiritsi, metojaquetarite.

² Pameneja icantantajicaroca manquigarentsi shiramparitamatsica teequea oncameetsateji ovashiantsitaquempariguetei manquigataroca tequerataguetei irimetojeji irimanquigatajemparoquea itsipa. Oraquea ariguetei irimetojanaje, ariquea iroguenti aatojate icantimentajitajirotsi.

³ Cotanquitsiquea oraquea choocatirajaguetei ichoocati manquigataroca iroompaquea oncanqueri irimanquigatajemparoquea itsipa, ariquea iroguenti manaquea opeacaaguisheca covaeguisherentsi. Oraquea ariguetei irimetojanaje manquigataroca, ariquea iroguenti querocampate incantimentajiqueriquea, cameetsavaeque irimanquigatajemparoquea itsipa, aatoquea icantajititsi: “Opeacaaguishecaro covaeguisherentsi, aimentacari manquigataroca.”

⁴ Irootaquequea imaica, napitsaroventarijiate, aviatimpajia quempejiaquempeiquea pimetojapitsajiaqueroquea itioncacotanaqueca Moishishini, piconoitajari Quirishito imetojaqueguetei cameetsaniji irashintamajajajempiniji, iriotaquequea tancorejana-jatsica yoguijaaajivecariguetei. Ariquea oquempetaca imaica cameetsaniji pinetsanama-jaqueronijite inintaguetica Aapani Irioshi.

⁵ Oraquea tequerataguetei antsaroventajiguempariji manaquea asavicaventajiaque-roquea apeacaaguishejiacaroquea taaca opaji anintajiguica aatimpajia. Oraquea at-savetacaroguetei icantimentantajiguetica caaviji anintamajajianaque ampeacaaguishe-jianaquemparoquea taaca opajitapae covaeguisherentsi, nintanatsimequea anquempejiaquempeamequea imaica oahoaitanaquemqueate camorecariqui.

⁶ Cotanquitsiquea imaicaquea imaica quempeca aricaca ametojapitsajiaquero-quea itioncacotanaqueca Moishishini cantimentajiavecajiroca taaca opajitapae covae-guisherentsi. Imaica manaquea asavicaventajianaje anetsanamajajianajeroquea maasanopae inintaguetica Aapani Irioshi. Teequea irooquea quempejiajine itioncaco-jiqueca, iriguentiquea cantashitajiacaji Ishire Aapani Irioshi.

Covaeguisherentsi pantashirentavaetaquenaca

⁷ Iroosacanica, ¿querocaca ancantajigue imaica? ¿Arimpate ariquea ancantajigue ooquea coguishero itioncacotanaqueca Moishishini? ¡Aatoshine! Oraquea aatomeguetei notsatiromequea queroca ocanti, aatomequeate notsatimequea manaquea nocov-aeguisheca. Pameneja aatomeguetei ocanti: “Aatoja pinintsigueteiritsi yashintaguecaca itsipa”,* aatomequeate notsatiromequea covaeguisherentsi nonintsitantagueguetei.

⁸ Imaicaquea imaica notsaqueroquea, irootaquequea oshimerancantapojaca nonin-tamajaqueroquea nompeacaaguishejiacquemparoquea taaca opajitapae covaeguishe-entsi natsirecacotanacaroquea, nashiquea noaquero iroaqueraguetei nocovaeguishe-vaecaguetei. Oraquea aatomeguetei atsajiguimequea icantimentantajitiroquea taaca opajitapae, aatomequeate anintamajajimequea ampeacaaguishejiacquemparoquea, cotanquitsiquea atsajiaqueroquetei icantimentantajiqueriquea manaquea anintamaja-jianaque ampeacaaguishejianaquemparoquea taaca opajitapae covaeguisherentsi.

* **6:23 tsipashirentajiaquemparineca Amajirote Quirishito Jesoshi.** Iriojiaquea aventajigarica Quirishito, tsaroventajigarica. Pamenero aisa 8.1; 2 Co. 5.17. * **7:7** Eeq. 20.17; Ireo. 5.21.

⁹ Coramani tequeratagueti nontsamajateroji itioncacotanaqueca Moishishini tee aneroji querocampate shoshoguitetacaavaequenaneca, teequea nontsatenica manaquea nocovaeguisheretaca, cotanquitsiquea iroompaquea nontsamajatanaquerogueti name-namajataquequea manasacanica nocovaeguishevaeca ariquea noshimampoancavaetanaca, nontsatanaquequeate incatsimatenanishiatsi Aapani Irioshi oncoramanitapoja-jegueti.

¹⁰ Coramani Aapani Irioshi itioncacaqueriquea Moishishini maasanopae icanquerica irinetsanajiqueroquea cameetsaniji inchoocatimentajiaqueniji maasano netsanajiaqueroneca, cotanquitsiquea naatimpa namenaqueroquea irooquea oshimerancantapojaquempaca incatsimatantaquenaca Aapani Irioshi oncoramanitapojajegueti, teequea nonetsanamajajigueronica.

¹¹ Irooquea nontsamajaquerogueti itioncacotanaqueca Moishishini, teequea noshineventajemparoji nonetsanamajatajeroja, iroguentiquea noshineventavaetanaca maasanopae icantimentantajitica, irooquea nopeacaaguecaca. Irootaquequea itsatantajicaroca manaquea incatsimatenanishiatsi Aapani Irioshi, naroguentiquea quempetacaantanquitsineca.

¹² Cotanquitsiquea atsajiaque oratica itioncacotanaqueca Moishishini iroguenti caaviji oganejencaca, irootaquequea itioncacotaqueca icantaguetica Aapani Irioshi, aisa otsatacaajiacaji ancomajamajajiaquempaja.

¹³ Oraticaquea cameetsatatsica itioncacotanaqueca Moishishini, ¿arimpa irooquea oacaantaquenameca camorecariqui? ¡Aatoquea! Oraquea covaeguisherentsi, iroguenti metojacaantaquenameca noantanaquempameca camorecariqui. Notsavecaroquea icanqueca Aapani Irioshi, cotanquitsiquea iroguentiquea oshimerancantapojacaroquea nopeacaaguishevaetanacaroquea icantimentantajitica. Irooqueate itsatantajicaroca caaviji anaaqueroquea nocovaeguisheca.

¹⁴ Atsajiaquetari itioncacotanaqueca Moishishini oponeaca Ishirequi Aapani Irioshi, cotanquitsiquea naatimpa naroguenti caquinte, oquejevetaca ipimantajitaquena irooquea ashintajana covaeguisherentsi.

¹⁵ ¿Querocaca nococani naatimpa? Nonintaveca nonetsanaqueromequea icanqueca Aapani Irioshi, cotanquitsiquea teequea nagavejeji. Iroguentiquea nopeacaanacaquea teeca nonintavetemparoji nompeacaguemparoquea.

¹⁶ Oraquea nopeacaacagueti teeca nonintavetemparoji nompeacaguemparoquea, notsaque iroguenti covaeguisherentsi, irootaquequea nocantantacaca caaviji oganejencaca itioncacotanaqueca Moishishini, ocantimenquenaroquea nopeacaacaca.

¹⁷ Aritarite teequea naroguenti quejevetatsine, iroguentiquea quejetacaquena covae-guisherentsi pantashirenquenaca.

¹⁸ Notsaquequea ariquea nococani naatimpa, teequea nagavejeji noncomajamatempaji, caquinte nonaque. Nonintavecaquea noncomajamajaquempamequeate, cotanquitsiquea teequea nagavejeji.

¹⁹ Nonintaveca nonetsanaqueromequeate inintaguetica Aapani Irioshi, cotanquitsiquea teequea nagavejeji. Manaquea nopeacaacaroquea covaeguisherentsi teeca nonintavetempaji naatimpa nompeacaaguemparoquea.

²⁰ Arigueti nompeacaaguemparo teeca nonintavetempaji, teequea naroguenti quejetatsine, iroguenti quejetacaquena covaeguisherentsi pantashirenquenaca.

²¹ Jeroquea namenaqueca: noninquegueti nompeacaaguemparo cameetsari, quishotia oaquena covaeguisherentsi.

²² Noshineventavecarotari noshirequi maasanopae icantaguetica Aapani Irioshi,

²³ cotanquitsiquea namenaquero otsipa nontsinoqui quejevetaca ashimirintaguenquejanetacaro nonintaveca, quejetaca oishotacotaquena covaeguisherentsi.

²⁴ ¡Querocashiatsi noncotempani naatimpa! ¿Quericampate oishorejacoquenane aatoni-jite agavejajana covaeguisherentsi choocatirajanaguetti notsinometojanequi?

²⁵ Noshineventavaetanacari Aapani Irioshi, nocantanaqueri: “¡Arioteesa!” iriotaquetari oishorejashirentacotajana Amajirote Jesoquirishito.

Jeroquea namenaqueca: naatimpaquea noguenquejanequi nonintamajataque nonetsanataqueroquea maasano igantacaantane Aapani Irioshi, cotanquitsiquea notsinoqui noquemisantavecaroquea covaeguisherentsi.

8

Queroca icojigani ichoocashirentajiaqueca Ishire Aapani Irioshi

¹ Imaicaquea imaica aatoquea icatsimajiguiritsi Aapani Irioshi irirajia tsipashirentajiacarica* Quirishito Jesoshi, irioquea irirajia teeca irisavicaventajiajeroji impeacaaguishetajemparo taaca opaji inintajiguica iriatimpajia, manaquea isavicaventajiaji inintaguética Ishire Aapani Irioshi.

² Aritarite itsatacaantane Ishire Aapani Irioshi anijacaaquerica maasano aventajigarica Quirishito Jesoshi ocanquequea aato agavejajana tioncarentsi cantatsica irimetojague maasano covaeguishejiatsica.

³ Oraquea teeca agavejempaji itioncacotanaqueca Moishishini irooriji acojiaca caquinteja teequea antampishitashiteroji covaeguisherentsi, yantaqueroquea Aapani Irioshi itigarancaqueriguetti Irijanite irimetojaventajiacaji. Iriatimpa iquempetsinomajatacaji aatimpajia covaeguisherenti, cotanquitsiquea teequea incovaeguishetimatempaji, jero yagavejantacaca imetojaventajiacaji. Oraquea imetojaventajiacajiguetti icatsimatimenqueri Aapani Irioshi agovaeguisherentia aatonijite icatsimajiajitsi aatimpajia oncoramanitapojajeguetti.

⁴ Iquempetaqueroquea imaica cameetsaniji agavejajiaquenijite anetsanamajajiaqueronijite maasanopae icanqueca Aapani Irioshi, teequeate irooquea asavicaventajiajeji ampeacaaguishetajemparoquea taaca opaji anintajiguica aatimpajia, manaquea asavicaventajiaje inintaguética Ishire Aapani Irioshi.

⁵ Irirajiaquea savicaventajiguiroca taaca opaji inintajiaqueca iriatimpajia, iroguenti iquenquejacogueque irashipae caquinte, cotanquitsiquea irirajiaquea savicaventajiaqueroa inintaguética Ishire Aapani Irioshi manaquea iquenquejacoguequeroquea irashipae Ishire Aapani Irioshi.

⁶ Irirajiaquea savicaventajiaqueroa inintajiguica iriatimpajia irimetojajianaque. Cotanquitsiquea irirajiaquea savicaventajiguiroca inintaguética Ishire Aapani Irioshi iranijacaajitaqueriquea ishirejiaqui aatonijite itsaroacaajajaritsi incatsimajiajeriquea Aapani Irioshi.

⁷ Irirajiaquea maasano savicaventajiguiroca inintajiguica iriatimpajia iriguentijia catsimacatsimatirica Aapani Irioshi. Teequea irinetsanajigueroji icanqueca, aisa aatoquea yagavejajiguetsi irinetsanajiaqueroquea.

⁸ Irirajia savicaventiroca inintaguishejiaqueca teequea iragavejajigueji iroguishinejajiaqueriji Aapani Irioshi.

⁹ Cotanquitsiquea aviatimpajia teequea irooquea pisavicaventajigueji pinintajiguica aviatimpajia, iroguenti pisavicaventajiaque inintaguética Ishire Aapani Irioshi, arimajaguetti ichoocashirentajiaquempi. Quericaca teeca inchoocashirenteriji Ishire Quirishito, teequea irioquea ashintemparine Quirishito.

¹⁰ Cotanquitsiquea imaica ichoocashirentajiaquempiquea Quirishito, oraquea pitsino iroguentiquea metojanquitsine irooriji picovaeguishejiavetaca, orampani pishire anijanaji, yamenajiaquempitari quempeca teeca pincovaeguishetimatempaji.

* **8:1** *tsipashirentajiacarica Quirishito Jesoshi.* Iriojiaquea aventajigarica Quirishito, tsariventajigarica. Pamenero aisa 2 Co. 5:17.

¹¹ Iriogueti choocashirentajiaquempi Ishire vochatajirica Jesoshi imetojaventajia-cajigueti, ariquea irira vochatajirica Quirishito Jesoshi inquempetacaajiaquempiquea aviatimpajia aisa, iranijacaajiajempiro pitsino teeca onquishometojaneteji. Iriotaque-quea anijacaajempirone Ishire choocashirentaquempica.

¹² Napitsarorentarijiate, irootaquequea imaica apatsinoroquea iriatimpa antsarorentajiaquempaca aatonijite irooquea asavicaventajiguitsi taaca opaji anintajiguica aatimpajia.

¹³ Iroogueti pisavicaventajiaquequea taaca opaji pinintajiguica, ariquea pimetoja-jianaque, cotanquitsiquea pinguemisantajiaquerigueti Ishire Aapani Irioshi, iragave-jacaajiaquempiquea panaantavaquemparoca maasanopae pipeacaaguishejiavecaca, oncoramanitapojajegueti panijaguiteni iriatimpaqui.

¹⁴ Maasanotari ijivatanaqueca Ishire Aapani Irioshi, iriguentijia irijanijiate Aapani Irioshi.

¹⁵ Iiraquea Ishire Aapani Irioshi ichoocashirentajiaquempiquea, teequea irooquea inchoocashirentashijiguempiniji iromintsaroajiaquempiquea pinguempejiaquempa tequeratagueti pintsarorentajiguempariji Aapani Irioshi pitsaroacaamajatarigueti incatsimajiaquempiquea. Iroguentiquea ichoocashirentashijiaquempiquea impeacaajiaquempiquea irijanijiate Aapani Irioshi, jero amanantajiacarica Aapani Irioshi acantantajiacarica: “¡Aapani!”

¹⁶ Iquenquetsashirentacaajiacaji Ishire Aapani Irioshi atsatantajiacaca aroguentijia irijanijiate Aapani Irioshi.

¹⁷ Aromajagueti irijanijiate atsajiaque irojocajiacajiro Aapani Irioshi maasanopae inintacaitsiyacajica, cotanquitsiquea iroguentiqueate coguitejacomajatanquitsica antsipejiaquempaquea anquempajiaquempari Quirishito yatsipevaetacagueti cameetsaniji anquempajiaquempariniji iriatimpa oncoramanitapojajegueti, antsipatsipaitanajempariquea ashintashintaipojajemparo maasanopae yashintacaca iriatimpa, anquempetapojajempari yoganejencacagueti.

Oncoramanitapojajegueti anquempemajajiaquempari Quirishito

¹⁸ Iroomajaca noncantajiaquempica caaviji ashinevaequempaquea oncoramani-tapojajegueti oahoaitanaquegueti jenoqui amenajiajergueti Quirishito anquempajiaquempariquea, anaavaetaqueroquea maasanopae atsipevaetacaca imaica.

¹⁹ Maasanopae ipeacaaguecaca Aapani Irioshi oguijajiaquequea aapojempagueti ironigaantantajitaquemparica irijanijiate Aapani Irioshi.

²⁰ Maasanojiatari ipeacaaguetacaca teequea onquempetajemparoji iroaqueragueti ipeacaacarogueti, imaicampani atsipetsipeica, otsoroavequita, ichoocave-quita. Teenica irio ninterone iveacaane, iriguenti quejequero peacaacarica yamenaquerigueti icovaeguishedaca caquinte. Manaquea yoguijaguijaiquero onetsanatantajempaca.

²¹ Aatotari icotani iquempejiajatsi imaica yatsipejiacarogueti maasano imetojane, yavejancajiacaquea maasano, manaquea intsipatsipaitanaquempariquea maasano irijanijiate Aapani Irioshi incantashitajiaianaquempaquea iroganejencajiaquempa. Ariquea onquempetuetaquempa maasanopae ipeacaaguetacaca aisa, aatonica ochocotimatajitsi avejancaguetajatsineca.

²² Atsamajajiaqueroquea maasanopae ipeacaaguecaca Aapani Irioshi atsipeguitani oguijajiaquequea oncantashitatiaquempaquea, quempetacaqueate atsipevaetagueti manquigarentsi ocantagueti rogueti.

²³ Cotanquitsiquea teequea aparo atsipetatsine ipeacaaguecaca Aapani Irioshi, atsipevaecaqueate aatimpajia aisa. Ichocashirentajiacaji Ishire Aapani Irioshi at-satantajiacaca incantashitajiajiacaji Aapani Irioshi oncoramanitapojajegueti, cotanquitsiquea imaica atsipeshirentavaeguitani aguijacojiaca irojocajiacajiroquea Aapani

Irioshi inintacaajiacajica maasano irijanijiate, ampeamajaquempaqueea irijanijiate, incantashitatieajajaji aatoniji ametojatsinotaji.

²⁴ Oraqueea iroaqueraguetei atsaroventajiacariguetei Quirishito atsajiaque oncoramanitapojajeguetei ancantashitatieajianajempaqueea aatoniji ametojaji, irootaquequeea aguijajiaqueca imaica. Cotanquitsiquea arimequeea amenajiaqueromequeea imaica irishinejiacajimequeate Aapani Irioshi aatomequeea aguijacojiguromequeea, jac amenajiaqueromequeea. ¿Arimpate nintanatsi aguijacojiaguitempani? ¡Aatoshine!

²⁵ Cotanquitsiquea irooqueea aguijacojiacaqueea tequerataca amenajigueroji, imaica netsana aguijacojiacquempaqueea antsipetacojiacquemparoquea maasanopae.

Iquenquetsaventajiacaji Ishire Aapani Irioshi

²⁶ Ariqueea oquempca aisa iriraqueea Ishire Aapani Irioshi iramitacojiacaji intampishitacaajiacaji, teetari antampishijigueti. Aatimpajia amanajiguiriguetei Aapani Irioshi teequeea antsajigueti querocaca ancantajiguerini, cotanquitsiquea iroguentiguetei ancantashirentajiavequitempaqueea shirerec inquenquetsaventajiacaji Ishire Aapani Irioshi, incanqueriquea teeca agaveji aatimpa ancanteji.

²⁷ Iriraqueea Aapani Irioshi amenamajatsicajiroca aquenquejajiaqueca anintajiaqueca itsaqueroquea ininqueca Ishire, irooriji yamanacoventavaqueneriguetei igomajamajarejia iroguenti iramanacovenqueneri inintaguetica Aapani Irioshi.

Antampishitashijianaqueroqueate maasanopae

²⁸ Aisa atsajiaque maasanoqueea irantsipejiaquetaquempaca pintsajigarica Aapani Irioshi osotoanaqueneriquea cameetsa, iriojiatari icajemajiaqueca onetsanatimentanaquempanijite inintaguetica Aapani Irioshi.

²⁹ Paesatoniqui itsaqueroquea Aapani Irioshi queri tsaroventajiaquemparineca, jero icantacarica oncoramanitapojajeguetei inquempemajajiaquempariqueea Irijanite, irijivajiaquerinijite iriatimpa iriguentijeguijiate incaramirincajiavaeque jmm.

³⁰ Irirajiaquea icanqueca inquempemajajiaquempariqueea Irijanite icajemashirentajiaqueriquea cameetsaniji intsaroventajiaquemparinijite. Irirajiaquea icajemashirentajiaqueca manaquea yamenajiaqueriquea quempeca teeca incovaeguishedimatempaji, iroompaqueea iroganejencatacaajiaquempariqueea.

³¹ Iroosacanica imaica ishineventajiacaji Aapani Irioshi itsipatsipaicaji, ¿arimpate quericampate agavejajiacajineca? ¡Aatoshine queri agavejatsineca!

³² Iriraqueea teeca intsaneguempariji Irijanitemajaca, manaqueate itigarancaqueri imetojaventajiacaji, ¿aatompate yojocajiajirotsi aisa maasanopae cameetsaripae?

³³ Aatimpajia iroguenti inintacaajiacaji Aapani Irioshi irashintajiacaji. Imaica jac yashintajiacaji. ¿Arimpate quericampate cantajiacajineca chooca agovaeguisherejia? ¡Aatoshine queri agavejatsineca icantajiguitsi! Iriotaquequeea Aapani Irioshi amenajiacaji quempeca teeca ancovaeguishedimatempaji,

³⁴ ¿arimpate quericampate agavejanquitsineca inquempetacaantajiacaji incatsimajiacajinijite Aapani Irioshi? ¡Aato queri agavejatsineca! Iriotaquequeea Quirishito Jesoshi metojaventajiacaji. Teequeea aparo irimetojaventajiaji, manaquea itancorejanaji aisa, imaica ichoocapojaji isenampijapojajari Aapani Irioshi itincamijempequiqui iquenquetsaventajiacaji.

³⁵ ¿Arimpate quericampate agavejanquitsineca irovashiantacaaitajeri Quirishito aatoniji ipintsamajajiajaji icavintsajamajajiacaji? ¡Aatoshine queri agavejatsineca! Antsipevaevetaquempaqueeate irooca ashimampojancajiavequempaqueea, cotanquitsiquea iriraqueea Quirishito incoquempaniquea impintsamajajiacaji incavintsajamajatanacaji. Iroocaquea irantsipetacaajiavetacaji itsipapae incatsimajiacajiquea intati, irooca antsipevaevetempaquea atase, aricaca aatoqueea ochoocaveta querocampate anquitsaajiaquempaca, irooca onchoocaguevetaquempaqueea taaca opajita

managuetanquitsineca, aisa ametojajavetanajempaquee, cotanquitsiquea iriraquee Quirishito incoquempani impintsamajajiacaji incavintsajamajajiacaji.

³⁶ Ocanque tioncanquitsica:

“Icantacoguitani inintajiaque irimetojajiaquenaquee yamenajiaquenagueti notsaromentajiaquempiquea, inquempetacajiaquenaqueate oveja irooshipojigueti irijitorejajitaqueri.”[☆]

³⁷ Jero antsipejavequempaquee quejegueta caroca ocativa, cotanquitsiquea yagavejacaajiacajiqueate pintsamajajiacajica arimpaqueate antampishitashimajajianaqueroqueate maasanopae, caaviji anaamajatantajianaquemparoca maasanopae.

³⁸ Irootaquequee imaica naatimpa notsamajaquee aatoquee queri agavejatsineca irovashiantacaqueriquea Aapani Irioshi aatoniji ipintsamajajajaji icavintsajamajajiacaji. Aatoquee yagavejajiguetsi irashivantijitete Aapani Irioshi. Ariquea iquempejiaca ampatsinipae aisa quericaca itsipapae majirontajatsica, aatoquee yagavejajiat. Irooca ametojajavequempaquee, irooca choocatirajajigueti anchoocajiae, incoquempani impintsamajajiacaji. Ariquea oquempetaca maasanopae imaica aisa ocaraquiguetananquitsineca.

³⁹ Ariquea oquempetaca aisa choocatatsica jenoqui, irooca isavijitica, aisa taaca opajitapae otsipapae ipeacaagueta caca Aapani Irioshi aatoquee agavejitsi ovashiantacaguri Aapani Irioshi aatoniji ipintsamajajajaji, icoguitanitarite ipintsamajajaji aatimpajia maasano tsaromentajiacarica Amajirote Quirishito Jesoshi.

9

Aapani Irioshi inintacaajiaqueri ishiraerijia incavintsajamajaqueri

¹ Naatimpa naroguenti tsaromentarica Quirishito, aisa ichoocashirenquenaquee Ishire Aapani Irioshi. Irioquee nigaimoquenaqueate quero nococani noshirequi, irootaquequee notsatantacaca imaica manaquee iroomajaca noncanquempica aatoquee notsojega intati.

² Noshimampojancaetaqueate noquenquejacotaquerigueti nogonorojia tecca iraventajiguempariji Jesoshi, nocantacoguitani ocatsishirentavaetanaquena.

³ Nonintavecaquee nompiapiaitajemparime napijorijiate nashimaja nogonorojia cameetsaniji naroguentiniji incatsimataque Aapani Irioshi, iriatimpajiacajica irisheta-cojiaque, aisa naatimpa irovashiantaquequee Quirishito, irioqueate impintsamajatanajuempaca incavintsajamajajiaqueri.

⁴ Iirajiaquee nogonorojia ichoviquijiani Ishiraeri iriguentijia inintsijiacaca Aapani Irioshi coramani impeajiaqueriquea irijanijiate. Iriatimpajiaquee itsipajiacajica coramani, jero iquejetantacarica itsirencashimpoquirerejimojiaqueriquea cantavaetaque tsiren. Aisa iriguentijia yojocajiaqueneca Aapani Irioshi oratica paaquitopae,^{*} icantajiaqueri intsaromentajiaquemparigueti incavintsajamajaqueriquea. Itioncacaanqueneriquea maasanopae inintaguequeca irinetsanajiaqueca. Aisa itsatacaqueri Moishishini quero incojiaquempani intsaromentajiaquemparigueti ontaniqui Taverenacoroqui. Iroompaquee icamanqueri aisa quero incojiaquerini incavintsajajiaquerigueti.

⁵ Iriatimpajia iriguentijia ichoviquijiani Averaameni, Ishaacani, Jacovoni aisa irijanijiate. Ocoramanitapojaquegueti ivoapojaque Quirishito ocaniqui quepatsiqui, aisa iriguenti ichoviquitanaqueca, iriguentiquea Irioshimajaca, iriguenti ashintaguecaroca

[☆] 8:36 Sar. 44.22. ^{*} 9:4 Oraquee **paaquito** iroguenti icantamajajitirica itsipa irinetsanamajajitenerica. Ochoocaguetaquequee paaquitopae iroquetinica icanquerica Aapani Irioshi caquintepae: chooca aparo icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

maasanopae. ¡lintsijate incoquempanijate irishineventajiguitemparinijate! Ari onco-
quempa.

⁶ Iroosacánica, ¿arimpate ancantajigue manaquea yamatavijajiaqueri Aapani Irioshi ishiraerija, teequea irinetsanateroji icantajiaquerica coramani? Teequeate iramatavijajigueriji, teetarite maasano ichoviquijiani Ishiraeri impeajiguempaji ishiraerijiamajaca irashimajaca Aapani Irioshi.

⁷ Ariquea iquempetacaajiacari coramani ichoviquijiani Averaameni, iquenquetsatacojiaquerigueti Aapani Irioshi teequea inquenquetsatacojigueriji maasano, irootaquequea icantantacarica Averaameni: “Iriguentiquea nocantacotsitacaca Ishaaco pinchoviquivaetantanaquempaca.”✧

⁸ Irootaquequea atsantantajiacarica Aapani Irioshi teequea impeajigueriji ishiraerijiamajaca maasano ichoviquijiani Averaameni. Iriguentiquea peamajajianquitsica ichoviquijiani Ishaaconi,

⁹ iriotaquetari canqueca Aapani Irioshi coramani iquenquetsatacaquerigueti Averaameni canqueri: “Ontsipatapojajempagueti ajagantsini onquejetapojajempagueti imaica, noncoraquetajate namenajatemi, ariquea irivoaje oshiramparijaniquite Sara.”✧

¹⁰ Cotanquitsiquea teequea aparo onchoocateji ocatica. Irirajia irijanijate Ireveca, apatiroti irijanincarica, iriotaquequea avaesatinite Ishaaconi.

¹¹⁻¹³ Oraquea tequeratagueti ovojaigueriji, iriraquea Aapani Irioshi canquero: “Irraquea jivavetapojatsineca manaquea impejaitajeri iromperare carapojatsineca.”✧ Oraquea canquerogueti Aapani Irioshi tequeratatiraja impeacaguemparo cameetsatatsica aisa covaeguishedatsica, tequeratatirajanica ovojaigueriji. Ariqueate canquetioncarentsiqui: “Nopintsatacariquea Jacovo, irirampani Esao nomanintaqueri.”† Irootaquequea itsatantajicaroca maasanopae ocatica inchiquiojita canque Aapani Irioshi iriatimpa queri inintacaaqueca incoguigue incavintsajamajaqueri, ariquea irinetsanamajaqueroquea maasanopae canqueca. Teequea iroqueti iramenajigueriji ogameetsareni ipeacaaguecaca, inchiquiojita icajemashirentaqueri iriatimpa.

¹⁴ Iroosacánica ¿querocaca ancantajigue imaica? ¿Arimpate ancantajigue teequeate intampaticateroji Aapani Irioshi, mana icoguiashitanta intati? ¡Aatoshine!

¹⁵ Canqueriqueate Moishishini coramani canque:
“Querica noninque naatimpa nonpintsatacoquempari nonpintsatacoquempariqueate.

Aisa querica noninquea noncavintsajamajaqueri noncavintsajamajaqueriqueate.”✧

¹⁶ Irootaquequea imaica teequea irooquea impintsatacotimentajiacaji iramenajiacajigueti inchiquiojita anintajiaque aatimpajia impintsatacojiacaji, irooca irooriji apanquenapanquenaecaro antajiaque cameetsa, manaquea inchiquiojita ininque iriatimpa impintsatacojiacaji, irootaquequea ipintsatacotantajiacajica.

¹⁷ Itioncacojitaqueroquea aisa canquerica Aapani Irioshi Paraone, canque: “Manaquea nopeacaquempiquea majirontatsica cameetsaniji aviguentiniji intsatantajitaquempaca nagavejamajati, cameetsaniji intsavetacotimentajitaquenani onsitacaguitejanaquemparo maasano quepatsi, intsavetacojitaqueroquea novajiro.”‡

✧ 9:7 Jen. 21.12. ✧ 9:9 Jen. 18.10. ✧ 9:11-13 Jen. 25.23. † 9:11-13 Mara. 1.2-3. **nomanintaqueri.** Oguipit-socaquerogueti acaniqui “nomanintaqueri”, iguenquetsatsarequi guiriego agavejaque oncanque “nomanintaqueri” irooca “nosemacari”. ✧ 9:15 Eq. 33.19. ‡ 9:17 Eq. 9.16. Yomperaperaitacarigueti Paraone maasano ishiraerija ichoocajiaquegueti Ejepitoqui, Aapani Irioshi incantacaantaqueriquea Paraone: “Poguipaquijajerija nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacanarica Aapani Irioshi atsipetagantsipae caratanquitsica 10. Iquemacojiaqueroquea caquinteguetsatsica itsatantajiacaca arimaja yagavejamajati Aapani Irioshi.

18 Ariqueate iquempetaca Aapani Irioshi imaica. Ipintsatacojigari quericaca ininqueca impintsatacojiguempari, aisa quericaca ininqueca inquishoshirentacaaqueri, ariqueate inquishoshirentacaitempariquea.

19 Cotanquitsiquea arica chooca aparo cantenaneca: “Iroosacanic, oquempetacagueti imaica ¿queroquea ocoani icatsimatantajiacarica Aapani Irioshi teeca intsarotentajiguempariji? ¿Arimpate quericampate agavejanquitsineca incantashitajemparoquea icanqueca Aapani Irioshi?”

20 ¿Arimpate quericampate aviatimpa cameetsaniji pimpigajencatavaquempari Aapani Irioshi? Pinquenquejeroja chomo quepatsinaqui ipeacajaitarogueti, ¿arimpate oncanqueri peacaacaroca: “¿Queroquea ocoani piquempetanquenaca?”

21 Iriaquea vichajari ¿aatompate yagavejitsi impeacaaquempa taaca opajitapae inintaguequeca? Iraitsitempaquea apapitsaro iraagarantsitemparoquea impeacaaguequemparo inintaguequeca, irooca cameetsamajatanquitsineca irishineventamajajitempaca, irooca aatoca ishineventamajajita.

22 Ariquea iquempetaca Aapani Irioshi iriatimpa, inintavetacaquea ironigaanquero igatsimaca aisa iragavejane, cotanquitsiquea teequeate incatsimatanteji taampina, manaquea yatsipetacovaejiacariquea ipeacaajiacaca catsimatacaajiaquerica teroncajianquitsinemeca.

23 Manaquea iquempetaca imaica cameetsaniji iramenajitaqueriniji caaviji yoganenjencamajata icavintsajamajatantajiacarica ipeacajaiacaca inintacotsijiacaca pae-satoniqui incavintsajamajiaqueri cameetsaniji iramenajiajeroniji iroganejencaca.

24 Irootarite icajemashirentantajiacajica aatimpajia maasano, teequea aparo incajemashirentajigueriji joriojia, icajemashirentajiaqueri aisa teeca irijorijoigueji.

25 Ariqueate itioncacaquerigueti Oseashini icanque: “Irirajia teeca nashintajavetempariji oncoramanitapojajegueti nashintajajempari. Ariquea inquempejiaquempa irira teeca irio novintsare, nompeaqueriquea novintsare.”✧

26 “Querocagueti oraniqui ichoocajiaqueni nocantajavecaca: ‘Teequeate nashintajiguempiji’, ariquea oraniqui inquenquetsatacojitaqueri incantajitaque: ‘Iriguenti irijanijiate Aapani Irioshi anijatsica.’ ”✧

27 Cotanquitsiquea Isaiashini itioncacojiaqueri ichoviquijiani Ishiraeri icanque: “Incaramirincajiavetanaquempa quea ichoviquijiani Ishiraeri inquempejiavetanaquemparoquea impanequi ocaratsapijajaquitica inirojani quantijani, cotanquitsiquea iriguentijiani choocajiajatsineca apaopae irajiajavajeca Aapani Irioshi.

28 Irinetsanamajaqueroqueate Amajirote icanqueca coramani, catsiqueti incatsimatimentajiaqueriquea quepatsiquitica igovaeguisherejia, intampaticamajateroquea.”✧

29 Ariqueate icanque aisa Isaiashini coramani icanque: “Aatomegueti ipintsatacojiajimequeate Agavejamajatatsica Imajirojiate caramirincajiaatsica, interoncamajiacajimequeate maasano, anquempejiaquemparimequea guintenijavetatsica coramani Soromaqui, anquempejiaquemparimequea aisa Gomoraquitica.”✧

Irirajia joriojia teequea irishineventajiguempariji Jesoquirishito

30 Iroosacanic ¿querocaca ancantajigue imaica? Atsajiaquequea irirajia teeca irijorijoigueji teequea inquenquejiajivetempaji quero incojiaquempani cameetsaniji

irishineventajiaquempariniji Aapani Irioshi, cotanquitsiquea imaica yamenajiaqueri quempeca teeca incovaeguishetimatempaji, yaventaventaicaritari Jesoquirishito.

³¹ Irirajia ishiraerijia iroguenti yoguijaguijaiveca icanqueca Aapani Irioshi itioncacaantajiaquenerica, inintajiavecaquea irinetsanajiaqueromequeate cameetsaniji irishineventajiaquempariniji Aapani Irioshi, cotanquitsiquea teequea iragavejajigueji. Oraquea irinetsanajiaqueromegueti maasanopae, ariquea iroguenti irishineventajiaquemparimequeate Aapani Irioshi.

³² ¿Queroquea oocani teeca irishineventajiguempariji Aapani Irioshi? Manaquea yaventaventaicaroquea itioncacotanaqueca Moishishini inintajiaveca irinetsanamajiaqueromequea cameetsanijite irishineventajiaquempariniji Aapani Irioshi, teequea iro irinintajigueji iraventaventaiquempariquea Quirishito, icomijiacariqueate. Irootaquequea itsavetacotantajitacarica Quirishito iquempetacaajitacari mapi tivatan-tatsica.

³³ Jero itioncacotantajicarica coramani ocanque:
 “Oncoramanitapojajeguete nojoquijique mapi ontaniqui Shionequi,
 manaquea intivatantajitaquemparoquea,
 cotanquitsiquea quericaca avenquemparoneca aatoquea yoguipashiventajitiri, aaton-ica yaventashitarotsi intati.”[☆]

10

¹ Napitsaromentarijiate, caaviji nonintamajaque irishetacojiqueri nogonorojia ishi-raerijia, irooquea nocanqueri namanaqueriguete Aapani Irioshi.

² Naatimpaquea namenajiaqueri arimajaca inintajiaveca intsaromentamajiaquemparimequeate Aapani Irioshi, cotanquitsiquea teequea intsajigueji taaqueate ininque Aapani Irioshi, manaquea omanimojiacari.

³ Teequea intsajigueji querocaca incojiaquempani cameetsaniji Aapani Irioshi iramenajiaquerinijite quempeca teeca incovaeguishetimatempaji, iroguentiquea inintajiaveca inchiquiojita irishinetacaajiaquempari iriatimpajia. Teequea irinintajigueji iraventaventaiquempari cameetsaniji Aapani Irioshi iramenajiaqueriniji quempeca teeca incovaeguishetimatempaji.

⁴ Iriratari Quirishito inetsanatacomajaqueeroquea Icantacaantaqueca Aapani Irioshi itioncacotanaqueca Moishishini, icaratacaapojajiro irigomajaretacaajanajempariniji maasano aventaventaiquemparineca.

⁵ Iiraquea Moishishini itioncacojiaqueri nintajiavetanquitsica irinetsanamajaque-roquea icanqueca Aapani Irioshi cameetsaniji iramenajiaqueriniji quempeca teeca incovaeguishetimatempaji, icanque: “Iiraquea netsanamajaqueeroca maasano ocajia, irooquea iranijantajempaca.”[☆]

⁶ Cotanquitsiquea quericaca aventaventaiquemparineca Quirishito cameetsaniji irigomajaretacaanajempariniji, aatoquea icantashirentitsi: “¿Quericampate atsoma-jananquitsineca jenoqui inquitequi?” iraguijitacaapojaqueerime Quirishito.

⁷ Ariquea oquempetaca aisa aatoquea icantitsi: “¿Quericate oanancquitsineca isaviji oogantavaequetu ichoocajiguete metojari?” intancorejajerime Quirishito irama-jerime.[☆]

⁸ Iroosacanea, ¿querocampate ocanqueni Tioncarentsimajaca? Manaquea ocanque: “Oraquea icanqueca oquempejimajaquempi, ochoocavagantetaquempi aisa ochoocashirenquempi.”[☆] Irootaquequea notsavetantajiguica naatimpajia aisa nocantajiaquempica: paventaventaiquemparija Quirishito cameetsaniji irishetacojiaquempariniji Aapani Irioshi.

[☆] 9:33 Is. 8.14; 28.16. Pamenero 1 Pe. 2.4, 6-8 aisa Irc. 20.17-18. [☆] 10:5 Irev. 18.5. [☆] 10:7 Ireo. 30.12-13. [☆] 10:8 Ireo. 30.14.

⁹ Pincanquegueti pivagantequi: “Jesoshi iriguenti Majirontamajatatsica”, aisa pintsashirentamajaqugueti iroomajaca ivochatajiri Aapani Irioshi imetojavecagueti, ariquea iroguenti irishetacotaquempiquea Aapani Irioshi.

¹⁰ Irootarite ashire antsashirentantamajaquempaca iroomajaca aventaguitempariniji irigomajaretacaantajicajica, aisa irooquea avagante ancantantempaca: “Iriguenti Majirontamajatatsica”, irishetacotantajiacajica.

¹¹ Ocanquequea Tioncarentsimajaca: “Quericaca avenquemparineca iriatimpa, aatoquea yoguipashiventimajitiritsi, aatonica yaventashitaritsi intati.”[✠]

¹² Oraquea icanquegueti imaica, iriguenti icantajiaque maasano caquinteguetatsica, iriatimpa yamenajiacajiquea ajamirincajiaque, aquempetavacaajiaca joriojia aisa teeca irijorijoigueji, iriguentitari Amajirote maasano. Jero caaviji icavintsajamajajiacaji maasano cajemajianaquerica.

¹³ Aritarite “maasano aventajiaquemparoneca ivajiro Majirontamajatatsica, irajiaavajeri.”[✠]

¹⁴ Cotanquitsiquea aatogueti itsajiguiritsi iriguenti itigarancaqueca Aapani Irioshi ¿querocampate incojiaquempani incajemantajiaquemparica iravajerinijite? Aisa aatogueti iquemacojiguiritsi, ¿querocampate incojiaquempani iraventantajianaquemparica? Aisa aatogueti itsavetantimojitiritsi, ¿querocampate incojiaquempani inquemacotantajiaquemparica?

¹⁵ Aatogueti ichoocatitsi tigarancajiaquerineca, ¿querocampate incojiaquempani iroaroaitanaquempaca intsavetante? Ariquea ocanque tioncanquitsica: “¿Cameetsaguitivaeque iguiti amiroca quenquetsatsarentsi oguishinejantatsica tsavetanqueroca cameetsaguetatsica!”[✠]

¹⁶ Cotanquitsiquea itsavetantimojivecari, teequea maasano inquemisantajigueroji Quenquetsatsarentsi Oganejencatatsica. Aritari icanque Isaiashini coramani: “Nomajirote, ¿choocampate quemisantaquerocha notsavetantimojiaquerica incantantaquempaca: ‘Iroomajaca?’”[✠]

¹⁷ Irootaquequea nocantantaquempica, anquemajiaquerogueti itsavetantajitaqueca agavejaque aventaventaiquempari Quirishito. Iroguentiquea anquemajiavaque icanqueca Aapani Irioshi.

¹⁸ Cotanquitsiquea naatimpa nocanque: Iroosacunica, ¿teecacajate inquemajigueroji? ¡Iquemajiavecarorquea! Otioncacatari ocanque:

“Yoayoaitanaquequea tsavetantajiatatsica itsitacaguetejavaetanaqueroquea maasano quepatsipae,

iquemajiavaqueriquea itsavetantimojiaquerigueti ocaraguepojaqugueti.”[✠]

¹⁹ Cotanquitsiquea noncantsijajempiqueate aisa: ¿Aricajate iroocajate cotanquitsiquea teecajate inquemajigueroji ishiraerijia taaca opaji icantajiaqueca irirajia tsavetantimojiaquerica? ¡Iquemajiavecarorquea!, cotanquitsiquea teequea irishineventajiguemparoji icamantajiavecarica. Itioncacotanaquero Moishishini coramani icanqueca Aapani Irioshi, icanque:

“Pincatsimatacotsitaqueri itsipajia teeca irigonorontavacaajiguempaji noncavintsajajiaquerigueti.

Noncatsimatacaquempiri caquinteja teeca intsajiavetempaji.”[✠]

²⁰ Iroompaquea Isaiashini teequea intsarogueji, tampatica yoaqueroquea itioncacoqueroquea icanqueca Aapani Irioshi iquenquetsatacojiaquerigueti teeca irishiraerijiate, icanque:

“Irirajia teeca inquenquejajiavetenaji intsajiaquenani, imaica itsajiapojajana.

✠ 10:11 Is. 28.16. ✠ 10:13 Joere 2.32. ✠ 10:15 Is. 52.7. ✠ 10:16 Is. 53.1. ✠ 10:18 Sar. 19.4. ✠ 10:19 Ireo. 32.21.

Ariquea iquempejiaca irirajia teeca incoacojiavetenaji, imaicaquea imaica naatimpa notsatacaajiaqueri quero nocotani.”✠

21 Oraquea itioncacotaqueroquea icanqueca Aapani Irioshi iquenquetsatacojiaqueri ishiraerijia, icanque:

“Nocajemavacoveguitarini caquinteji pigapigatsatanerijia, eeshotia inaque.”✠

11

Inconoagarantajiaquempaquea ishiraerijia choocagarantajatsineca tsaromentamajajianaquemparineca Aapani Irioshi

1 Iroosacanica imaica nocanque: ¿Aricajate yovashiantajianajiri Aapani Irioshi maasano ichoviquijiani Ishiraeri icantajiavecaca: “Iriguenti nashijia”? ¡Teequeate! Pamenejate naatimpa naroguenti igonorona ishiraerijia, iriguenti choviquitanaquena Vejamine ichoviquini Averaameni, cotanquitsiquea iriraquea Aapani Irioshi teequeate irovashiantanajenaji.

2 Ariquea iquempejiaqueri nogonorojia teequea irovashiantajianajeriji, itsatsitacariquea coramani, icoguiajiaqueri, ariquea imaica icocani yashintajiacari. Pitsajiguirotarite itioncacojitaqueriguete Iriashini iquenquetsatacaqueriguete Aapani Irioshi, icamanqueri quero icoguishejiacani ishiraerijia, icanqueri:

3 “Nomajirote, iteroncaciaqueriquea imetojajiaqueri tsavetantajatsica pitigarankuimojiavecarica. Aisa ipishonquitaguequempiroquea paretaretepae. Aparoquea nochoocataji naatimpa, cotanquitsiquea isariimenquenaro irimetojajiaquena.”✠

4 Cotanquitsiquea ¿quero icanqueri Aapani Irioshi? Icanque: “Noquem poguijajajiriquea 7,000 shiramparijia tsaromentamajaquenaca teeca irogueroventempariji Vaare ipeajiaqueca pigonorojia irioshitashijiacaca.”✠

5 Ariquea oquempetaca imaica ichoocajiaque apaopae tsaromentajiacarica Aapani Irioshi, inchiquiojita icavintsajamajajiaqueri iriatimpa, iriotari cavintsajantaneri, icoguiajiaqueriquea cameetsaniji intsaromentajiaquemparinijite.

6 Teequea irooquea incavintsajimentajigueriji yamenavecaguete icomajavaeca iriatimpajia, manatari intati icavintsajashijiacari iriatimpa. Aatomeguete oquempetaca imaica, aatomequeate otampaticatime igavintsajantantanerini Aapani Irioshi.

7 Iroosacanica, ¿querocampate ococani? Manaquea oquempetaca imaica. Iri-
raquea ishiraerijia inintajiavecaca irishineventajiaquempari Aapani Irioshi, cotan-
quitsi teequea irishineventajigueriji maasano, manaquea ishineventajiacari icogu-
iajiaqueca paesatoniqui irashintajiaquempari. Irirajiaquea igonorojia arimpaquea
iquishoshirentajianaque.*

8 Ariquea itioncacojiquero coramani ocanque:
“Aapani Irioshi imaguempishirentacaitsijigari.
Yoquijatacaitsivetari, teequea irinejantajiguemparoji.
Iguempitatacaitavetari, teequea inquemantemparoji.
Icocaniquea iquempejiaca coramani arejevaetanacaquea imaica.”✠

9 Aisa icanque Taavini:

“Irishecashecaivequempaguete irivaracajiterita ontsatojiguerita.
Intivativaitempata, onquejetacaajemparita icatsimavecaca.

10 Impeacaitsijitemparita teeca iramenimateji.
Omititsatacaaguitemparinita yantaguishequeca.”✠

✠ 10:20 Is. 65.1. ✠ 10:21 Is. 65.2. ✠ 11:3 1 Maj. 19.10, 14. ✠ 11:4 1 Maj. 19.18. * 11:7 Pamenero 9.32: “¿Queroquea ococani teeca irishineventajiguempariji Aapani Irioshi? Manaquea yaventaventaicaroquea itioncacotanaqueca Moishishini inintajiavecaca irinetsanamajajiaqueromequea cameetsanijite irishineventajiaquempariniji Aapani Irioshi, teequea iro irinintajigueti iraventaventaquempariquea Quirishito, icomijiacariqueate. Irootaquequea itsavetacotantajiacarica Quirishito iquempetacaajicari mapi tivatantatsica.” ✠ 11:8 Ireo. 29.4; Is. 29.10. ✠ 11:10 Sar. 69.22-23.

Aapani Irioshi ishetacojiaqueriquea teeca irijorijoigueji

11 Imaica noncanque: Iroosacanica ariqueate iquempejiacagueti imaica joriojia teequea irinintajigueji intsaromentajiaquempari, ¿arite yovashiantamajajianaqueri Aapani Irioshi aatonijite ishetacojiguiritsi? ¡Teequeate! Arimpaquea iquempejiacagueti imaica teequea intsaromentajiguempariji irootaquequea ipitsocashitantajiacarica itsipapae teeca irijorijoigueji irishetacojiaqueriniji cameetsaniji irinintajiaquenijite joriojia impitsocashijiaquempari inquejetsijajempariquea iriatimpajia aisa incavintsajamajiaqueri irishetacojiaquerinijite.

12 Oraquea teequea intsaromentajiguempariji iriatimpajia joriojia, irooqueea oshimerancantapojaca icavintsajamajaqueriquea maasano caquinteguetatsica. Aisa inintaveca Aapani Irioshi incavintsajamajiaquerimequea joriojia, irishetacojiaquerimequeate, cotanquitsiquea teequea irinintajigueji, irootaquequea oshimerancantapojacaca icavintsajamajaqueri teeca irijorijoigueji ishetacojiaqueri. Oquempetaca imaica oshimerancantapojacaroquea icavintsajamajiaqueri teeca irijorijoigueji, ¡iroompaqueate intsaromentajiaquemparigueti iriatimpajia joriojia, caavijiquea oshimerancantamajaquemparoquea incavintsajamajaqueriqueate iroshequiamajata-tiguenimaja!

13 Cotanquitsiquea piconoagarantajiacaquea teeca aviguentijia joriojia. Imaica noninque noncantajiaquempi iriguenti tigarancaquenaquea Aapani Irioshi noanaquequea nontsavetantimojiaqueri pigonorojia, irootaquequea noshineventantacaroca nosavicaventamajatantacaroca,

14 namenaquetari aricaquea iramenajiaquempiquea nogonorojia pitsaromentajiacari Quirishito aviatimpajia, ariquea irinintajiaque impitsocashijianaquempari Aapani Irioshi incavintsajamajiaquerija iriatimpajia aisa, cameetsaniji inquempejiana-jempinijite aviatimpajia irishetacogarrantajiaqueri.

15 Oquempetaca imaica oshimerancantacaroquea icatsimajiaquerigueti Aapani Irioshi joriojia irioqueea ipitsocashijianaca teeca irijorijoigueji imeshiajiaqueri, arimpaqueate intsaromentajianaquemparigueti joriojia caaviji oshimerancantapojajemparoquea irishineventajiaquempariquea Aapani Irioshi iriatimpajia aisa, irishetacojiajeriquea. Iroaqueragueti quempetacatari manaca imetojajiaveca, cotanquitsiquea irimeshiajiaquerigueti ariqueate onquempetaquempa ipochajianaji.

16 Nonquejetacaguempiroja irojocagarantajitenerigueti Aapani Irioshi capichase ose pan iroquetica impeacaajitempa, iramenajiqueroqueea maasanose irashintacoquempari Aapani Irioshi. Ari oquejetaca aisa irashintacoquemparigueti Aapani Irioshi ovarishitsa inchato, maasanoshimpoqueja irashintacoquempari.†

17 Iriaquea joriojia teeca intsaromentajiguempariji manaqueate iquempejiacaroquea ojempequipae orivo ometojajempequitigueti icaratsijitaroqueea ipishonquitajitaro. Iroompaquea yaashitsijitaroqueea orivojempequiniro yovinchaquitsitantajitajaro cameetsaniji anijacaavajeroniji ojaviare. Cotanquitsiquea maasano aviatimpajia teeca pijorijoigueji, manaquea piquempejiacaro orivojempequiniro yovinchacantajitaruogueti metojajempequivetanquitsica. Aviguentiquea ipitsocashijiaja Aapani Irioshi ishetacojiajimpiquea, yanijacaashirentajiaquempi aviatimpajia, teetari intsaromentajiguempariji joriojia.

18 Cotanquitsiquea inchiquiojita pisemejiguitsijate pamenajiaque panaajiaqueriquea iriatimpajia, aviguentijiaquea ishetacojiaqueca Aapani Irioshi. Pisemejiaquegueti iintsija pinquenquejajiguroja iriquetiquea tsaromentacari coramani Averaameni, irooqueea oshimerancantantacaroca pitsaromentajiacari aviatimpajia imaica, teequea aviquetica tsaromentajiguemparine. Pameneja

† 11:16 **Capichase ose** ocantacoqueri ivaesatiniteni joriojia iriquetinica tsaromentajiacarica Aapani Irioshi, **maasanose** ocantacoqueri ichoviquijianaqueca iriatimpajia. Ari oquejetaca **ovarishitsa inchato** ocantacoqueri ivaesatiniteni joriojia.

orivo teequea irooquee anijacagueroneca ojempequi, iroguenti anijacaguiroquea ovarishitsa.

¹⁹ Iroompaquea arica pincante: “Picantamajataque, cotanquitsiquea icatsimajiaqueri Aapani Irioshi joriojia teeca intsaromentajiguempariji, naroguentiqueate ipit-socashijiaji irishetacojiaje, quempetaca icarajitirogueti metojajempequivetanquitsica irooqueate iquejetacaantajitajaro yovinchacantajitajaroquea orivojempequiniro.”

²⁰ Arimajatarite, cotanquitsiquea teequea incatsimatashijiguempari Aapani Irioshi intati, iroguentiquea icatsimatantajiacarica yamenaqueriquea tee iraventempariji. Aviatimpa manaquea paventajianacari, irootaquequea ishetacotantajiaquempica. Jero noncantantaquempica imaica aatoja pisemejiguitsija, manaquea pintsaraojiaque.

²¹ Iquejetacarogueti Aapani Irioshi orivojempequimajaca icaratsitaro, ¿arimpate aato iquejetacaitarotsi orivojempequiniro? Aviguentijia ocantacoque piquejejiacaro orivojempequiniro.

²² Iintsija pamenejate intati. Caaviji icavintsajantamajati Aapani Irioshi, cotanquitsiquea aisa caaviji incatsimajiaqueri covaeguisherijia. Irootaquequea icatsimatantajiacarica joriojia tivashirempojatsica, aviatimpa manaquea icavintsajamajaquempiquea, cotanquitsiquea pincoquempanija pintsaromentamajatanaquemparija cameetsaniji incoquempaniniji incavintsajamajaquempiquea. Oraquea aatogueti piquempetirotsi imaica, incatsimaquempiquea aviatimpa aisa, pinquempetaquemparoquea metojajempequiro icarajitica.

²³ Iriatimpajiaquea aatogueti icancani iquenquejajiaji: “Aato naventari”, iriraquea Aapani Irioshi inconoacaantsijiajempariquea irapijoriojiate tsaromentajiacarica, onquempetajemparo ivinchacantajitajarogueti ojempequi inchato, yagavejaquequea iriatimpa irivinchacantajiajempari.

²⁴ Pinquenquejajeroja orivojempequiniro, yaajivaequitiroquea ontaniqui otsoroashitanacagueti, yamajiro ivinchacampojarero orivomajaca iniganquitejirequi. Imaica iramanajerogueti ojempequimajaca icarajivetacaca choocatiraja teequea ometojamajateji, taampina iraitsitemparo irivinchacantajemparo ashimajaca ova. Quempeca aviatimpa ariqueate ishetacotimpiquea Aapani Irioshi itsipatacajiaquempiri maasano tsaromentajiacarica, iriompaqueate joriojia intsaromentajiaquemparigueti caaviji intsipatacaantajiaquempari igonorojia tsaromentajiacarica coramani.

Ishiraerijia iraventajianajempari Aapani Irioshi

²⁵ Imaica, napitsaromentarijiate, noninque pintsajiaqueroquea teeca intsajivetemparoji coramani cameetsaniji aatoniji pisemejiguitsi pincantajiaque pitsajigui. Iconoagarantajiacarica ishiraerijia iquishoshirentajianaque, cotanquitsiquea oncoramanitapojajegueti intsaromentajiaquemparigueti maasano teeca irijorijoigueji tsaromentajianquitsineca, ariquea aato iquempejiaja imaica.

²⁶ Onquempetanaquempagueti imaica ariquea irishetacojiqueriquea maasano ishiraerijia, ariquea ocanque Tioncarentsimajaca:

“Incoraquetaque Ompetantatsica irisotoantapojemparo Shionequi, irovashiantacaajipojajeri icovaeguishejiacagueti ichoviquijiani Jacovo.”✧

²⁷ “Irootaquetari nocantajiaquerica nonetsanajiaquenerica noshetacojiaquergueti igovaeguishe.”✧

²⁸ Irirajia nogonorojia joriojia tee irinintajiajavajero Quenquetsatsarentsi Oganejencatatsica irootarite icatsimatimentantacarica Aapani Irioshi, cotanquitsiquea imanintaquerogueti irooquee amishirentantajimpica aviatimpajia teeca pijorijoigueji itsavetantimojitaquempitotari. Cotanquitsiquea iroorijite icoguiacovaequeri ivaesatiniteni irashintajiaquempariniji, icocaniquea ipintsajiajari.

✧ 11:26 Is. 59.20. ✧ 11:27 Jer. 31.33-34.

²⁹ Aritarite aatoquea icantashitatijaarotsiquea Aapani Irioshi icanqueca. Taaca opaji irojocajiacaji aatoquea yaapitsajajajirotsi. Ariquea oquempetaca quericaca icajemashirentajiaqueca aatoquea icantiritsi: “Teetari noncajemempinica.”

³⁰ Oraquea coramani aviatimpajia teequea pinquemisantajavetempariji Aapani Irioshi, cotanquitsiquea iriatimpa ipintsatacomajaquempiquea imaica, yamenajiaqueritari joriojia teequea inquemisantajigueriji.

³¹ Ariqueate iquempejiaca iriatimpajia imaica teequea inquemisantajigueriji, cotanquitsiquea oncoramanitapojajegueti impintsatacojiaquempiquea Aapani Irioshi inquempetacaajiaquempiquea aviatimpajia ipintsatacojiaquempigueti.

³² Yamenajiaqueriquea Aapani Irioshi icovaeguishejiaca maasano caquinteja, teequea inquemisantajigueriji, irootaquequea icantantacaca: “Ari icojiaca maasano caquinte.” Manaquea iquempetacaajiacari imaica cameetsaniji impintsatacojiaquemparinijite maasano incavintsajajiaqueri.

³³ ¡Jeejeguitatsi, caaviji icavintsajantamajati Aapani Irioshi!

¡Caaviji itsamajati, itampaticamajatiro maasanopae!

Aatoquea atsajiguirotsi iquenquejaguetica iriatimpa, ariquea oquempetaca aisa aatoquea atsajiguitsi quero icotani iriatimpa.

³⁴ “¿Quericampate tsatiroca iquenquejaguetica Aapani Irioshi?

¿Quericampate agavejanquitsineca intsatacaqueri?”[☆]

³⁵ “¿Quericampate agavejanquitsineca irojocaqueneriquea taaca opajitapae cameetsaniji iroguipiantajate iriatimpa?”[☆]

³⁶ Maasanoquea yamenajiguetica iriguenti peacaaguecaro, aisa iriguenti tampishita-caaguetiroquea, iriotaquequea ashintaguecaroquea maasanopae.

Irioshiatsi antsaromentamajatempaca, ancoguitempaniquea ancantajiaqueri: “¡Caaviji poganejencamajataca!” Ari oncoquempa.

12

Pimpaquerija Aapani Irioshi pitsino

¹ Imaicaquea imaica, napitsaromentarijiateni, aritaquequea ipintsatacojiaquempi Aapani Irioshi, irootaquequea nocantantajiaquempica iintsishiatsi pimpaquerija pitsino, pinquejevequempiquea viratsi imetojajiquenerica, cotanquitsiquea aviatimpajia panijimojianajiri, pincomajamajaventanajempari pishinetacaajemparinijite, irootarite pintsaromentashirentantamajaquemparica.

² Aatoja piquejejajaritsijate choocajanquitsica imaicatica quepatsiqui, manaquea piroaqueraquenquejanetanaje pincantashitiantanajempaca, cameetsaniji pintsajiaqueniji oganejencaropae inintaguetica Aapani Irioshi, iroguentitari shinetacaantat-sica, oganejencavaeca.

³ Iriaquea Aapani Irioshi icavintsajaquenaquea inintacaquenaquea nontsavetan-timojiaqueri maasano, irootaquequea imaica nocantantajiaquempica aatoquea pise-mejiguitsi pincantajiaque: “Nanaaqueri itsipapae”, manaquea iroquetiquea pamena-majaquempa apaniropae quero picojiacani cameetsaniji pintampaticamajaqueroniji poaqueroquea. Irooquea pamenaquempa quero picojianacani yagavejacaquem-pigueti Aapani Irioshi paventajiaquemparigueti: irooca pitampishitashimajatana-quero paventacarigueti, irooca mana paventavetaquitari capichaji.

⁴ Quempetaca aatimpajia chooca acojia, aquijajia, aguitija, maasanopae. Tee-quea ariquea onquempemajatempaquea ogonoropae, apaniropae ocantashitajia-aca. Pameneroja acotsi manaquea yajiricantajicarero, oraquea oquijantsi manaquea yamenantajicaroquea, irooquea guititsi manaquea yanijitantajitaroquea.

[☆] 11:34 Is. 40.13. [☆] 11:35 Jope 41.11.

⁵ Ariquea aquempejiaca aatimpajia tsaromentajiacarica Quirishito, acaramirin-cavaeveca cotanquitsiquea iriatimpa yamenajiacaji aparo achoocajiaque, aquempeji-acaroquea itsino apatsinoro ocantaca, ariqueate atsipatavacajiacaca atsaromentajiacari.

⁶ Aapani Irioshi icantashitaticajiacaji apaniropae yagavejacaajiacaji. Taaca inintacajiacajica iriatimpa antajiaqueca yagavejacaajiacaji. Choocaguete aparo irooguete yagavejacaquerica intsavetantero icanquerica, iintsija intsavetanteroja, cotanquitsiquea incoquempanija iraventanaquempari.

⁷ Irooguete yagavejacaquerica iramitacotantavaequeguete, intampaticamajaquerica iroaquerico iramitacotantavaequeguete. Irooguete yagavejacaquerica intsatacaantantaquequea, irooquee irisavicaventaque intsatacaantantavaeque.

⁸ Ariquea oquempetaca irooguete yagavejacaquerica intampishitacaantantaque, irooquee irisavicaventaque. Ariguete icanquerico Aapani Irioshi incavintsajiaque-riquea irapitsaromentarijiate ni irojocagarantajiaquenerico yashintaguecaca, cameetsavaeque irojocajiaqueneriquea aatoquee itsaneapitsataritsi. Irooguete yagavejacaquerica irijivajivaitante, cameetsaja iroaquerico. Irooguete yagavejacaquerica impintsatacoquempariquea atsipejianquitsica, irishinevaequempaquea incavintsajiaque-riuguete.

Quero incojiaquempani tsaromentamajatarica Aapani Irioshi

⁹ Pimpintsamajatantempaja, aatoquee pipintsatantamampega intati. Pisemaquem-paroja covaeguisherentsi, quisho poaquericoja cameetsaripae.

¹⁰ Pimpintsamajaquemparijate papitsaromentarijiate ni, pinquempetacaamajaquem-parija iriguentica pigonoromajaca. Pamenajiaquerijate yanaajiaquempikea pishineventajiaquempari.

¹¹ Taaca opaji pantajiaque aatoquee peeshojiguitsi, manaquee pishineventajiaquem-paroquee, pitsajiaque iriguenti pantajiaquenequeate Amajirote.

¹² Pishinevaequempaqueate pincanquempa, pitsajiaquetari irinetsanaquericoquee Aapani Irioshi inintacotsijiaquempikea incavintsajiaquempikea. Cameetsavaeque pantsipetacovaequemparico taaca opaji pantsipejiaquempacica, picancanija pamanapini-queriquea Aapani Irioshi.

¹³ Pincavintsajiaqueriquea igomajamajarejica Aapani Irioshi coguitejacojianquitsica, pojocagarantajiaquenerico icoguitejacojiacaca. Querica arejetimojiguimpica paacameetsatavaquerico.

¹⁴ Pamanacoventajianaquerijate atsipetacajiaquempikea. Aatojate picantirico Aapani Irioshi: "Pincatsimatimenterico", manaquee pincantsitempariquea: "Pincavintsajeri."

¹⁵ Pamenakeriguete pigonoro irishinevaequempaquea, pishinevaetanaquem-paquea aviatimpa aisa. Oraquee pamenakeriguete ishimampoancavaeca, pishimampoancacotanaquempariqueate aviatimpa.

¹⁶ Aatoja picatsimatavacajiatitsi, cameetsaja paavacajiaquempacaja. Aisa aatoja pisemetimatitsi, manaquee pinconoajiaquemparijate teeca iranaantejico. Aatoquee piquenquejajiguitsi: "Notsamajati nocanca."

¹⁷ Querocaguete incoquempani itsipa, aatojate pipigajigaritsijate. Pincomajamaja-jiaquempacaja pinchoocajiaquenijico cameetsa, iramenajiaquempanijate maasano arimajaca otampaticataque picomajamajajiacate teequee pamatavijantejico.

¹⁸ Ariguete pagavejaque, pivetsinantavacajiaquempa paavacaimentajiaquempanijico.

¹⁹ Napitsaromentarijiate ni nopintsamajataca, aatoquee pipigatanta, manaquee pogu-ijavaquerico igatsimare Aapani Irioshi. Otioncacatari: "Icanque Amajirote: Naro ashin-carico pigmentagantsi, narooquee vegaratacaquerico."*

²⁰ Irootari ocanque:

* 12:19 Ireo. 32.35.

“Pamenavequemparigueti catsimaquemfica taseanaque, pojoquitsitenempariquea isheca.

Irooca imire, pojoquitsitenempariquea irimireta.

Pinquempetaquerogueti imaica ariquea incotanaquempa ovashiventajavaetanaqueriquea,

onquempetanaquemparoquea pogatacotenerigueti ishinquireguishiqui quichagan-temenquiro.”*

²¹ Aatojate pishinetirotsi agavejimpitsija covaeguisherentsi, manaquea panaanaquero, jeroquea panaantanaquemparooca pincavintsajacotantanaque.

13

¹ Imaica noncantajiaquempi cameetsavaeque maasanojiaquea pinquemisantajiaquerija pimajirojiate. Ijamirincajiaque teequea inchiqiojita impeajiguempaji intati pimajirojiate. Iriguenti majirontacaacari Aapani Irioshi.

² Jero quericaca catsimatashitaquemparinca imajironcaca pigatsataquemparinca, incatsimaqueriquea Aapani Irioshi, teetari inquemisanteriqueate ipeacaavecaca imajirote. Iriatimpaquea quempetacaantanquitsineca.

³ Irirajiaquea pimajirojiate teequea irooquea inchoocatashiteji iromintsaromintsarovaqueriquea comajamajajianquitsica, iroguentiquea ichoocatashijiaque iromintsaromintsarovaqueri peacaaguishetanquitsica covaeguisherentsi. Teegueti pininteji iromintsaromintsarovaquempiquea pimajirojiate, iroosacanica pinchoocajiguequeate cameetsa irishineventajiaquempinijite.

⁴ Irooguentitari ipeacamentajiacariquea Aapani Irioshi pimajirote irinetsanajiaquempiniji pinchoocatantajiaquempaca cameetsa. Oraquea aatogueti piquemisantajiguiritsi, ariquea iroguenti pintsarocaajiaquempariquea, teequea intati impeacaajiguempariji Aapani Irioshi pimajirojiate. Iroguentiquea ipeacaimencari incatsimajiaqueriquea peacaaguishetatsica covaeguisherentsi.

⁵ Irootaquequea noncantantajiaquempica pinquemisantamajaquerija pimajirojiate. Aatoquea aparo piquemisantajiguiritsi aatoniji icatsimajiguimpitsi, manaquea aisa pinquemisantajiaqueri irooriji pitsajiaque ininque Aapani Irioshi pinquemisantajiaqueriquea.

⁶ Irootaquequea povegaratantacaroca icantajitica *impuesto* * pojocagarantantajiacanarica majirontatsica pimentaquitsitepae, iroguentiquea isavicaventajiaque inintacaajiaquerica Aapani Irioshi irantajiaqueca irimajironquempa.

⁷ Povegarajigueri maasano paacotirigueti. Incanquegueti majirontatsica povegarataqueroquea icantajitica *tributo* † irooca *impuesto*, povegaraqueroquea pojocagarantajiaqueneriquea pimentaquitsite, aatoquea pipeacojigaritsi. Irirajia comajarijia, pinquenquejacameetsatacovaqueri, pinquenquetsatacoventaquerija cameetsa.

⁸ Onchoocategueti paacotantegueti aatoja pipeacotantajigui, manaquea poguipiajeneri taampina paacoqueca. Pincoguitempani pimpintsatavacaamajaquempaquea. Aritarite quericaca pintsamajacarica irapicaquintete, jac netsana inetsanaqueroquea icantacaantaqueca Aapani Irioshi itioncacotanaqueca Moishishini.

* **12:20** Tsa. 25.21-22. Pinquejetaquempagueti arica incantashitatanquempira iraventanaquempari Aapani Irioshi irishetacotajeriniji. * **13:6** *impuesto*. Oraquea icantajitica *impuesto* iroguenti icantaqueca majirontatsica irojocajigueneri cameetsaniji irovegarataqueneri amitacojiaquerica quejecarica coareta, itsipajia netsanatiroca quenavoquirontsipae, maasano. † **13:7** *tributo*. Iroguenti quejevecaroca *impuesto*. (Pamenero otsapa 6.)

⁹ Icantajiquerotarite: “Pimpintsataquemparija pigonoro pinquejetacaajempa pipintsatagueti aviatimpa.” Iiraquea quempetiroca imaica inetsanataqueroquea itioncacojiqueca ocanti: “Aatoja picantatsatacotantitsi, aatoja pimetojanti, aatoja paitsitantitsi, aatoja pitsojeventaritsija pigonoro, aatoja pinintsigueteritsija yashintajiacaca itsipa.” Aisa irinetsanatsigueterparoquea ogonoro quempeguetacaroca ocatica.*

¹⁰ Maasanoquea pintsamajatarica igonoro teequea querocaca incojiguerini. Irootaquequea nocantantacaca iriraquea pintsatantamajataatsica inetsanaqueroquea maasanopae itioncacotanaqueca Moishishini.

¹¹ Imaica noncantajiaquempiquea pinquempejiaquempaquea imaica, pinquenquejacomajateroja savincaguiteriapae achooatantacaca. Aapojacaquea pintinajashirentantajianaquempaca, irooshipojitari incoraquetajate Amajirote iraaajatajiqueate intsipatsipaitanajaji inquitequi. Oquempejitacotapojacaji imaica incoraquetantajempaca, anaqueroquea oquempejitacovetapojacajigueti iroaqueragueti atsaroventajiacarigueti.

¹² Imaicaquea imaica achooajiaquequea ocانىqui oncaviacagueti covaequisherentsi iroguentica quempetaca manaca amanquimanquitacovaequequea, cotanquitsiquea irooshipojaji incoraquetajate Amajirote. Oraquea incoraquetajategueti ariquea iroguenti onquempetaquemparoquea asavincaguitetacojiguigueti, aatoqueate amenaajajirotsi covaequisherentsi. Irootaquequea imaica jaame ampishoncajianajerojate maasanopae isenacajigueticapitsecacotanquitsica, irooquea asavicaventajianaje inintaguetica Aapani Irioshi, onquempetaquempaquea anquitsaatajemparo aguishorijiate tsirencanquitsica ticaavaqueroneca covaequishetacaajinemeca.

¹³ Ancomajamajianaquempaqueate quejetaca savincaguitetacotajaji. Aatoja apeacaajiatijate taaca opajitapae ovashiventajantaguetatsica. Aatoquea oimatitsi yomporoguijajiacagueti ipeacaaguishejiaacarogueti tiontarentsijencani covaequisherentsi. Aatoja ashinquitatsi. Aatoja oashitirotsi manquigarentsi. Aatoja ationtajigatsi. Aatoja acatsimatavacaajigatsi, aisa aatoquea acatsimatacotsitiritsi itsipa.

¹⁴ Iriguentiquea pinquitsaatajempa Amajirote Jesoquirishito, aatoja piquenquejajiguetsi queroquea pincoqueroni pimpeacaaguisshetaquemparogueti pinintaguishevecaca.

14

Irirajia teemajaca intsateji quero ancojiaquempani aventamajacarigueti Quirishito

¹ Choocagueti papitsaroventarijiate teemajaca intsateji quero ancojiaquempani aventamajacarigueti Quirishito, cotanquitsiquea ininquequea inconoajiaquempiquea ontانىqui picapioacajigagueti, aviatimpajia paajiavaqueriqueate aatoja picantajiguiritsija: “Teemajacatarite pintsamajateji.”

² Pamenejate iconoagarantajiacaquea icantajiaque cameetsavaeque ashecajiaquem-paquea taaca opajitapae: iteshipae, maasano. Itsipa teemajacaca intsajigueti teequea irishecajiguempariji iteshi.

³ Iiraquea shecajiacarica iteshi aatoquea icantajiguiritsi teeca irishecajiguempariji: “Teequea pintsateji.” Iriogueti teeca irishecatempariji aatoja icantajiguiritsi shecajiacarica: “Manaquea pipeacaaguishecaroquea covaequisherentsi pishecatacarigueti iteshipae”, jac yashincariquea Aapani Irioshi ipeaqueriquea irijanite.

⁴ ¿Arimpate taampate aviatimpa cameetsaniji pincanqueriniji papitsaroventarite arigueti ichooaque cameetsa aricaca tee? Iriotari ashincari Amajirote. Inchiqiojita incanqueri iriatimpa, iriotaquequea amenamajaqueriquea quero icotacani. Cotanquitsiquea inchooque cameetsa, iragavejacaqueritari Amajirote.

* 13:9 Irev. 19.18; Eeq. 20.13-15, 17; Ireo. 5.17-19, 21.

⁵ Oquempetaca aisa iconoagarantajiaca chooca cantajiatsica: “Chooça savincaguiteri caavijica anaaque oganejencavaeca, manaquea irisavicaventajiquerojate irishineventajiaquemparinijite Aapani Irioshi.” Itsipapaequeate cantajianquitsica: “Ojamirincavaeque savincaguiteri ariquea oquempetavacaaca.” Cotanquitsiquea aviguentimpate aviatimpajia, apaniropae pinquenquejamajiaqueroquea quero pincojiaquempani cameetsaniji irishineventajiaquempinijite Amajirote.

⁶ Iriroquea cantajiatsica chooca savincaguiteri caavijica anaaque oganejencavaeca, manaquea icanque imaica cameetsaniji iroguipaquijajateronijite yantavaequegueti irionijite irisavicavenquerinijite Aapani Irioshi irishinevenquempariquea. Ariqueate iquempetaca aisa shecajiacarica iteshi, ishecajiacarica yamenajiaquetari irooquea ininqueca Aapani Irioshi, jero icantacoguitani ishecajiacagueti ishineventajiacari Aapani Irioshi, yamanajiaqueri icanqueri: “Ariotesaa, Aapani.” Ariqueate iquempejiaca teeca irishecajiguempariji iteshipae, yamenajiaque arica teeca irininteji Aapani Irioshi irishecajiaquempari. Aisa iriatimpajia icantacoguitani ishecajiacagueti ishineventajiacari Aapani Irioshi icantajiaqueri: “Ariotesaa, Aapani.”

⁷ Teequea anchoocatashijiguemparoji intati cameetsaniji antajiaqueroquea taaca opaji anintajiguica aatimpajia. Ariqueate onquempetaquempa ametojajiaquegueti, aatoquea inchiqiojita ametojimentiro anintajiguica aatimpajia.

⁸ Choocatirajajigueti, iroguentiquea achoocatashijiaque antajiaqueroquea inintaguetica Amajirote. Oraquea ametojajiaquegueti, manaquea oahoaitanaque iriatimpagui antsipatsipaipojajempari. Ariqueate oquempetacaquea imaica, arica anchoocajiaque irooca ametojajiaquequea, icocani irashintajajaji Amajirote.

⁹ Imetojaquititarite Quirishito ariquea ipochatanaji cameetsaniji impeaquempaqueate Imajirojiate maasano tsaromentajiacarica, choocatajatsica iriguentijia aisa metojajianquitsica.

¹⁰ Iroompaquea aviatimpaquea,* ¿quero ocotacani picantacotancarica papitsaromentarite incatsimatimentajiterinishiatsi iquejequerogueti imaica? Aviatimpampani aisa ¿quero ocotacani pitsojencancarica papitsaromentarite? Maasanoquea aatimpajia anticantiitimojiaqueriquea Aapani Irioshi oncoramanitapojajegueti incantajiacaji aricaca atampaticamajiaqueroquea ininqueca iriatimpa aricaca tee.

¹¹ Chooçaquea tioncanquitsica ocanque:

“Icanque Amajirote: ‘Arimajaca nochooçaque naatimpa, maasanoquea irogueroventajiapojajena, incantajiaquequea: Arimajacatarite aviguenti Irioshimajatatsica.’”[✧]

¹² Irootaquequea atsatantajiacaca oncoramanitapojajegueti ironigaajiacajiro Aapani Irioshi maasano agoguisherejia, incoacotsitaji maasanojia apaniropae: “¿Quero ococani piquejetancaca?”

Aatojate ativashirentacagaritsi apitsaromentarijiate

¹³ Irootaquequea ovashiantantanajemparoca acantaguishetacotavacaavetacagueti. Manaquea pincantajigue: “Aatojate notivashirentiritsi napitsaromentarite, ocoguishetanaqueritsi. Aatojate noticaashirentiritsi.”

¹⁴ Naatimpa notsaromentamajatacariqueate Amajirote Jesoshi notsamajatantacaca tee onchoocateji shecatsipae covaequisheshirentacaantatsineca, cotanquitsiquea inchooçaquegueti quenquejanquitsineca: “Shoshoh ashecataritsi, icoguisheshirentacaanacajitsi”, aatoquea ishecataritsi. Irishecaquemparigueti manaquea impeacaquempacovaeguisherentsi.

* **14:10** Icanquegueti Paavoro **aviatimpaquea** iriguenti icanque teeca irishecatempariji iteshipae. Icanquegueti **aviatimpampani** manaquea ipitsocashitari itsipa shecatarica iteshi. ✧ **14:11** Is. 45.23.

¹⁵ Arigueti pishimampojancaacari papitsaroventarite pishecataquemparigueti iteshi icanqueca teequea oncameetsateji irishecajiquempariquea, oraquea pinquejeta-querogueti imaica, teequea pimpintsamajatempariji papitsaroventarite. Shoshoh picovaeguishedacagaritsijate iramenaquempigueti oo shecaquempi, ariquea incotanaquempa aato itsaroventajaritsi Quirishito. Iriguentitari imetojavenaqueca Quirishito.

¹⁶ Pamenaquegueti aviatimpa cameetsavaeque pishecataquempariquea iteshi, cotanquitsiquea choocagueti itsipapae papitsaroventarite cantanquitsineca teequea oncameetsateji pishecataquemparigueti, iroosacanica aatoquea pishecataritsi aviatimpa aatonijite icantitsi picovaeguisheca.

¹⁷ Aritarite imajirontacagueti Aapani Irioshi teequea irooquea anaantamajatatsine ashecapae irooca amirepae. Jero anaantamajatanquitsica ancomajamajaquempagueti, antsipatavacaquempaquea cameetsa aisa aatoja ashoshoguitetsi, manaquea ashineshirentajivaequempa, irioquea agavejacaacajirone Ishire Aapani Irioshi.

¹⁸ Quericaca quempetemparineca imaica irantaventenerigueti Quirishito, iriguenti ishinevenca Aapani Irioshi, ariquea inquempequempeitanaquempa caquinteja.

¹⁹ Iroosacanica imaica jaameshiatsi ancomajamajajianaquempaquea cameetsaniji aatoniji acatsimatavacaajajatsi, ironijite amitacotavacaajiaquempaniji arimpaqueate antsaroventamajatanaquempariquea Aapani Irioshi.

²⁰ Aatoja pipomatsatirotsi yantaqueca Aapani Irioshi ishirequi pigonoro pishecquemparigueti icantimentantavetacaca papitsaroventarite. Cameetsaveca pishecajiaquempariquea cantashitatiaguetanquitsica iteshipae, cotanquitsiquea oraquea pincovaeguishedacaaquemparigueti papitsaroventarite pishecatacarigueti iteshi, ariquea iroguenti teequea oncameetsateji pishecataquemparigueti.

²¹ Cameetsamajataque aatoja pishecataritsi iteshipae, irooca pimirarotsija quepishijaripae, irooca pantaguetaque taaca opajitapae pamenaquegueti ontivashirentacaanaquempari papitsaroventarite.

²² Oraquea pamenacagueti aviatimpa cameetsavaeque pishecataquempariquea iteshi, aatojate pisemetitsi picamantiritsi itsipa, iriguentiquea pincamanque Aapani Irioshi. Cameetsavaeque iroquetitaja pinquenquejamajaqueroja taaca opaji cameetsatatsica pimpeacaguempaca, ariquea pimpeacaaquemparogueti pishinevaequempaquea irooriji pintaque teequea pincovaeguishedimatempaji.

²³ Cotanquitsiquea iriraquea teeca intsamajate aricaca cameetsavaeque irishecaquempariquea iteshi aricaca tee, ishecatacagueti iroguentiquea icovaeguisheca, ariqueate icanque: “Aricajate teecajate oncameetsateji noshecataquemparigueti.” Aritarite taaca opaji antajiaque, arigueti ancantajiaque: “Aricajate teecajate oncameetsateji nompeacaaquemparoquea”, iroguentiquea acovaeguishejiaca.

15

Anquenquejacojiaqueri itsipajia

¹ Irootaquequea imaica aatimpajia tampishishirentajiatsica cameetsavaeque antampishitacajiaqueriquea apitsaroventarijiate teeca intampishishirentamajateji. Aatoja aparo aatimpa aquenquejacotajatsi anetsanajiaquero anintajiguica aatimpajia.

² Anquenquejacotsijiguempariquea apitsaroventarijiate ancavintsajajiaqueri ashinetacaajiaquemparijate cameetsaniji arimpaquea intsaroventamajatanaquempariquea Aapani Irioshi.

³ Aritarite iquempetaca Quirishito, teequea irioquea quenquejacotajatsineca iriatimpa iranquequeate ininqueca iriatimpa, manaquea iquejetacari itioncacojiqueca

Tioncarentsimajacaqui, ocanquegueti: “Oraquea icantaguishetacojiaquempigueti, naroguentiquea otiavaetapojaca.”✧

⁴ Maasanoquea Itioncacaantaqueca Aapani Irioshi manaquea itioncantajicaroca ontsatacaacaji, cameetsaniji antsipetacoguitempanigueti ontampishishirentacaacaji arimpaquea aguillacoshirentajianaquempa irinetsanatanquemparo ca maasanopae icanqueca paesatoniqui.

⁵ Iriotaquequea Aapani Irioshi agavejacaajiacaji antsipetacovaequempaquea, aisa irioquea shinetacaajiacajine. Noninquequea iragavejacaajiaquempiquea pintsipashirentavacaajiaquempa pinquejejaquemparigueti Quirishito Jesoshi,

⁶ cameetsanijite pintsipashirentavacaajiaquempa pishineventajiaquemparigueti Irioshite Amajirote Jesoquirishito, iriotaque aisa Iriri, pincantajiaque: “Caaviji yoganejencavaeca Aapani Irioshi.”

Teeca irijorijoigueti itsavetantimojiqueri Quenquetsatsarentsi Oganejencatatsica

⁷ Irootaquequea imaica noncantantajiaquempica paavacaajiaquempajate, aritarite iquempetacaajiacaji Quirishito aatimpajia icavintsajavajaji yaavajaji. Iquempetacaajiacaji imaica cameetsaniji iramenajiquerinijite Aapani Irioshi caaviji yoganejencamajataca.

⁸ Imaica noncantajiaquempiquea, coramani icoraquetaquiti Quirishito Jesoshi ocaniqui quepatsiqui ichoocatimojiaquitiri nogonorojia joriojia yamitacojiaqueriquea cameetsaniji onetsanamentaquempianiji icantajiaquerica Aapani Irioshi coramani choviquijiaquenaca naatimpajia joriojia iroonijite intsamentajiquerinijite Aapani Irioshi teequea incantashitatiguemparoji icanqueca.

⁹ Icoraquetashijiaqueriquea aisa teeca irijorijoigueti cameetsaniji irishineventajiaquemparinijite Aapani Irioshi, incantajiaque: “Caaviji ipintsatacotantaca Aapani Irioshi.” Ocanquequea Tioncarentsimajaca:

“Irootaquequea noshineventantajiaquempica nontsipatsipaitaquemparigueti teeca irijorijoigueti, namashaiventajiaquempiquea.”✧

¹⁰ Aisa chooca otsipa itioncacojiqueroquea ocanque:

“Maasano teeca pijorijoigueti, ipishinejiaquempaja pintsipatsipaitaquempariquea igaquintejiate Aapani Irioshi!”✧

¹¹ Ariquate chooca otsipa ocanque:

“Pishineventajiaquemparija Amajirote maasano teeca pijorijoigueti, maasanoqueate caquinteji pincantajiaqueri caaviji icavintsajantamajati.”✧

¹² Itioncaque aisa Isaiashini coramani icanque:

“Oncoramanitapojaque irivoaque aparo ichoviquini Isaini.

Iriatimpa peanquitsineca oncoramanitapojajegueti Imajirotiate maasano caquinteguetatsica.

Irirajia teeca irijorijoigueti iroguijacojiaquemparija incavintsajajiaqueriquea.”✧

¹³ Iriraquea Aapani Irioshi iriotaquequea agavejacaajiacajica aguillacojiaquempagueti onetsanamajaquempa maasanopae icanqueca paesatoniqui inintacaitsicajica irishetacojiaqueca. Noninquequea iroguishinejajiaquempiquea aatoniji taaca pishoshoguiteventatsija, paventaventaicaritarite. Aisa noninque iragavejacaajiaquempiquea Ishire Aapani Irioshi aatonijite piperataro poguijacoquemparigueti.

¹⁴ Napitsaromentarijiate, imaica tsamajataquenaquea picavintsajantamajataque, aisa pitsamajatanaque maasanopae icanqueca Aapani Irioshi, pagavejamajajiaque pincantomajavacaajiaquempa cameetsa, aisa pintsatacaavacaajiaquempa cameetsa.

¹⁵ Cotanquitsiquea naatimpa teequea nontsarogueji nontioncaciaquempiquea quempetaca imaica noquenquejacaajiaquempiroquea nocamantajiaquempica coramani aatonijite pipeacojigarotsija. Notioncantajiaquempica imaica icavintsajaquenaqueate Aapani Irioshi,

¹⁶ inintacaaquenaquea Jesoquirishito nontsavetantimojiaqueriquea teeca irijorijoigueji, noquejetanacariquea saserorote nontsavetantavaequero Quenquetsatsarentsi Oganejencatatsica itigarancaqueca Aapani Irioshi, cameetsanijite irinetsanashirentacaajiaquemparigueti Ishire Aapani Irioshi iriraquea teeca irijorijoigueji, onquempevetaquempa irio namaquenerica Aapani Irioshi nojocapojaqueneri irishineventajiaquempariniji.

¹⁷ Cameetsavaeque noshinevaequempaquea namenaquerogueti yantacaaquenaca Quirishito Jesoshi nantinirigueti Aapani Irioshi.

¹⁸ Iroguenti nonquenquetsatacoque yagavejacaquenaqueti Quirishito nontsaroventacaajiacariquea teeca irijorijoigueji iquemisantantajiacarica Aapani Irioshi. Iquemajiaquenaqueate nontsavetantimojiaquerigueti, aisa yamenajiaquenaqueate quero nococani naatimpa.

¹⁹ Yagavejacaquenaqueate Ishire Aapani Irioshi nonigaantantaqueroquea oacaantantatsica intati cameetsaniji intsajiqueronijite arimajaca iriguenti tigarancaquenaquea Aapani Irioshi. Noquempetaca imaica nontsavetantavaequero Quenquetsatsarentsi Oganejencatatsica tsavetacoquerica Quirishito. Nopariapanajantaroquea Jerosarequi notsitacaguitejavaetanaqueroqueate oraniqui arejevaequemparoquea Iriricoqui.

²⁰ Iroguentiquea noninque nontsavetanterogueti Quenquetsatsarentsi Oganejencatatsica nontsavetantimojiaqueriquea irirajia tequerataca inquemacotimateriji Quirishito aatonijite iriguenti nosavicaventajiguetsi nontsavetantimojiaqueriquea irirajia itsavetantimojiquea.

²¹ Iroguentiquea noninque onetsanamajaquempa ocanqueca coramani Tioncarsentsimajaca ocanque:

“Inquemacojiaqueri teeca inquemacojiavetempariji,
intsajianaque teeca inquemacotimajavetempariji.”[☆]

Paavoro inintaveca iroanaquemequeate Iromaquiniqui

²² Nontsavetacotimojiaquerigueti itsipapae, irooquea tempajacaaquenaca, nonintagueveca noanaquemequeate namenajiajatepimequeate.

²³ Cotanquitsiquea imaica notsitacajiaqueriqueate nontsavetantimojiaqueriquea guintenijatsica ocaniqui. Nococaniquea nopintsataca namenajiajatempiquea.

²⁴ Ariqueate noanaquegueti Esepañaqui noninque narejetimotapanajantempi. Aopojempagueti noncoraquequegueti oraniqui namenajipapanajantempiquea noshinevaequempa noncanquempa amenavacaajiaquempaqueate. Iroompaquea navisanaquegueti Esepañaqui noninque poavoquijiaquitenaqueate, arica pagavejajigue pojocajiaquenaqueate nocoguitejacovaecaca.

²⁵ Cotanquitsiquea imaica iroquetiquea narejetapanajantemparoquea Jerosarequi, namitacojiaqueri apitsarorentarijiate guintenijatsica ontaniqui.

²⁶ Icapiocajiaqueneritari Maseroniaquitica aisa Acayaquitica imentaquipae itigarancacaantajiaqueneriquea apitsarorentarijiate coguitejacovaetanquitsica guintenijatsica ontaniqui Jerosarequi.

[☆] 15:21 Is. 52.15.

²⁷ Iriatimpajia teetari irio joriojia cotanquitsiquea iquenquejacojiaqueriquea irami-tacojiaqueri joriojia tsaromentajatsica, yamenajiaqueriqueate irioquea joriojia tsave-tantimojiaqueri icamanqueriquea quero incojiaquempani irishetacojiaquerigueti. In-intantajanacaca iraagarantajiaquequea yashintajiacaca iriatimpajia intigarancacaan-tajiaqueneriquea.

²⁸ Irootaquequea imaica noantanaquempaca Jerosarequi nojocajapanajantenerija, iroompaquea nontempajantanajemparo Esepaña, ariqueate namenajapanajantempiquea pichoocajiaquegueti.

²⁹ Notsamajaquequea noncoraquequegueti oraniqui incavintsajamajaquenaquea Quirishito iragavejacaquenaqueate nontsavetantimojiaquempiqueate cameetsaniji ashinejiaquempaniji.

³⁰ Napitsaromentarijiate, aviatimpajia pitsaromentajiacari Amajirote Jesoquirishito, aisa yagavejacaajiaquempiquea Ishire Aapani Irioshi pipintsajiaquenaquea. Noncantantajiaquempica imaica nonintamajataque pamanacoventajiaquenajate.

³¹ Pincantajiaqueriquea Aapani Irioshi irompetaquenaqueate aatonijite queroca icojianatsi Joreaquitica teeca intsaromentajiguempariji, aisa cameetsanijite irajiaja-querinijite imentaqui namajiaquenerica apitsaromentarijiate Jerosarequitica,

³² cameetsaniji iroompaquea iriogueti nintanquitsineca Aapani Irioshi narejevae-quempaquea oraniqui noshinevaequempaquea namenajiaquempigueti, ariqueate ashinetacaavacaajiaquempaquea.

³³ Imaicaquea noninque maasano aviatimpajia quisho iroaroaitanaquempi Aapani Irioshi, iriguentitari choocatacaajiacajica cameetsa aatoniji ashoshoguiteta. Ari onco-quepa.

16

Paavoro iquenquejacojiaqueri irapitsaromentarijiate guintenijiatsica Iromaqui

¹ Aricaca pamenajiavaqueroquea oratica apitsaromentarote Peve arejetaquem-pagueti oraniqui. Iroatimpa iroguenti amitacopinijiguirica tsaromentajatsica capio-capinijiatsica Senquereaquei.

² Cameetsaja paajiavaquerojate ariqueate oquempajiaquempiquea aviatimpajia ot-sarovencarigueti Amajirote. Pinetsanajiavaqueroja, aviguentijiatarite tsaromentama-jajatsica. Pamitacojiaqueroqueate, aisa pojocajiaqueneroquea taaca opaji oncogu-itejacoquempaca. Ariqueate oquempetaca iroatimpa amitacotantavaeque, amita-cotanaquenaqueate naatimpa aisa.

³ Pincantajiaqueroquea Pirishira* aisa irira Aquira noquenquejajiaqueri cameet-saca ichoocajiaque. Iriguentijia notsipatashijiacaca coramani nantavaequenerigueti Quirishito Jesoshi.

⁴ Ipajiavetanacaroquea imetojane aatonijite naroguenti metojatsi, irootaquequea imaica noshineventantajiacarica nocanca, cotanquitsiquea teequea aparo naatimpa noshineventajiaquempari ishineventajiacariquea aisa maasano tsaromentajatsica teeca irijorijoigueti capiocapinijiatsica osamanipaequitica.

⁵ Pincantajiaqueri aisa noquenquejajiaqueriquea apitsaromentarijiate capiocapiniji-atsica itsovironaquitequi. Noquenquejaqueri aisa nopintsatacaca Epeneto iriquetica tsarovencari Quirishito ontaniqui Ashiaqui.

⁶ Pincantajiaqueroja aisa Maria noquenquejajiro, namenaquequea antavaeque ami-tacojiaquempiquea aviatimpajia.

⁷ Noquenquejajiaqueri nogonorojia Anteronico aisa Joniashi itsipatacaantajique-naca coramani isantanatacojitaquenagueti. Iriatimpajia iriquetica tsarovencari

* **16:3 Pirishira** aisa opajita Pirishica. Pamenero 2 Ti. 4.19.

Quirishito tequeratagueti nontsaroventempariji naatimpa. Maasano itigarancanejia Quirishito ipintsamajajiacariqueate icancani ishineventamajatacari.

⁸ Pincantajiaqueriquea aisa Ampiriato noquenquejaqueri, iriguenti napitsaroven-tarite nopintsamajacari.

⁹ Noquenquejaqueri aisa Orovaano, notsipatashijiacaca coramani nantavaejiaque-nerigueti Quirishito Jesoshi. Noquenquejaqueri aisa nopintsamajataca Esetaqui.

¹⁰ Noquenquejaqueri aisa Apereshi. Iriatimpa yatsipevaeca cotanquitsiquea arim-paquea itampishitanaquequea itsarovenanacari Quirishito. Iriguentijia aisa choocati-mojiacarica Arishitovoro noquenquejaqueri.

¹¹ Pincantajiaquerija aisa Eroriono noquenquejaqueri, iriguenti nogonoro. Iriguenti-jia aisa choocatimojiaquerica Narishiso tsarovenajiacarica Amajirote pincantajiaque-rija noquenquejaqueri.

¹² Noquenquejaquero aisa Tiripena aisa Tiriposa antajiguinirica Amajirote.

Noquenquejaquero aisa Perishira apintsamajajiacaca. Ariquea oquempetaca iroat-impa antavaequeneri Amajirote.

¹³ Pincantajiaqueri aisa Iropo icoguiaqueca Amajirote noquenquejaqueri. Ariquea oquempetaca iriniro iroatimpa noquenquejamajaqueroquea, oquempetacaamajaque-naquea naroguentica ashimajaca irijanite.

¹⁴ Pincantajiaqueri noquenquejajiaqueri aisa Ashinquirito, Peregonte, Eremeshi, Paterova, Eremashi, iriguentijia aisa apitsarovenarijiate tsipajiacarica.

¹⁵ Noquenquejajiaqueri aisa Pirorogo aisa Joria, iriguenti aisa Nereo aisa itsijoite. Noquenquejaqueri aisa Orimpashi iriguentijia aisa maasano apitsarovenarijiate tsi-pajiacarica.

¹⁶ Netsana pinintavorotavacaavaquempa.† Maasanoquea tsarovenajiacarica Quirishito capiocapinijatsica inintajiaque pinquemacojiaqueriquea choocajia iquenquejajiaquempiquea.

¹⁷ Imaica napitsarovenarijiate, noncantajiaquempi shoshoh yamatavija-jiguimpitsijate itsipa tsatacaantajiguiroca teeca onquempetemparoji notsat-acaajiaquempica naatimpa aisa itsipajia tsavetacotantajiaquerica Quirishito. Pinquemisantajiaquerigueti iriatimpajia ariquea pincojianaquempaquea pincatsimatavacaajiaquempaquea iroompaquea pintsinampirejavacaajianaquempa aatoquea pitsipatavacaajatsi. Aatoja piconoajigaritsija.

¹⁸ Iriatimpajia teequea irioquea irantajigueneji Amajirote Jesoquirishito, iroguenti isavicaventajigui taaca opaji inintajiguica iriatimpajia. Iquenquetsavijitanaque cameetsaja itampaticamajaveca ariquea yamatavimatavivaequeri teeca intsamaja-jigueti.

¹⁹ Maasanoquea iquemacojiaquempi piquemisantamajataque, irootaquequea noshineventantajiaquempica, cotanquitsiquea noninque pintsamajajiaquequea cameetsaniji ponigaantajiaqueronijite inintaguetica Aapani Irioshi. Oraquea taaca opaji covaeguisherentsi irooquea iroguenti aatoja piquenquejajiguitsijate.

²⁰ Pinquempajiaquempagueti imaica, iriraquea Aapani Irioshi choocatacaajiajajica cameetsa caarica ashoshoguitetanta incatimatsitempiquea iragavejacaajiaquempi pa-gavejajiaquerinijite Satanashi, onquempetaquempa pagaticanaqueri impotsocanaque. Imaica noninque incavintsajavaequempiquea Amajirote Jesoquirishito.

²¹ Iriraquea Timoteo notsipatashitaca nantinirigueti Amajirote ininque pinquemacojiajeri iquenquejajiaquempi. Ariquea iquempejiaca nogonorojia Iroshio, Jasoni aisa Soshipatero iquenquejajiaquempi.

† 16:16 *Netsana pinintavorotavacaavaquempa*. Yamejiaca coramani inintavorotavacaajiaavaca yamenavacaajiacagueti, ari iquejejiaca tsarovenajigarica Quirishito coramani.

²² Ariquea noquempetaca naatimpa noquenquejajiaquempi. Naroguenti papit-sarorentarijiate nopajitaca Tereshio. Naroguenti tioncavaqueneriquea Paavoro ican-queca ocaniqui paperiqui.

²³ Iquenquejajiaquempi aisa Gayo nomaimoqueca, iriotaquequea imaimojiguica maasano tsarorentajiatsica avisavisaitatsica ocaniqui. Ariquea iquempetaca Erashito iriatimpa iquenquejajiaquempi. Iriguenti *tesorero* amitacotirica majirontatsica guinteninintsiqui, inetsanaguetaqueneri imentaqui icapiocajiguica guintenijiatsica ocaniqui ashi irinetsanatantaquemparoca iriguinteninitantajiaquempaca. Aisa apit-sarorentarijiate Coareto ininque pinquemacojiaqueri iquenquejajiaquempiquea.

²⁴ Imaica, napitsarorentarijiate, noninque incavintsajamajaquempiquea Amajirote Jesoquirishito. Ari oncoquempa.

Ashineventajiaquempari Aapani Irioshi

²⁵ Imaicaquea imaica jame ashineventajiaquempari Aapani Irioshi, iriotaquequea agavejanquitsineca intampishitacaantajiaquempiroquea Quenquetsatsarentsi Ogane-jencatatsica camantajiacajica quero icotani iriatimpa ishetacotantigueti. Irootaque-quea notsavetantica naatimpa notsavetantirigueti Jesoquirishito. Aisa irootaquequea yonigaimojiacajica Aapani Irioshi imaica. Iriatimpa icocani inintacotsijiacaji coramani irishetacojiacaji, cotanquitsiquea teequea intsajivetemparoji.

²⁶ Imaicaquea imaica jeroquea itsatantajicaroca, onigaacajiroquea itioncaco-jianaqueca coramani tsavetantajiatsica, iriotaquequea cantanquitsica Aapani Irioshi onquempetaquempaquea imaica. Iriatimpa icoguitani ichoocaguitini coramani tequeratagueti onchoocagueteji, aisa incoguitempani inchoocaguiteni. Icanque onquempetaquempaquea imaica cameetsanijite onsitacaguitejavaetanaquem-paroniji jmm inquemajiaquenijite maasano caquinteguetatsica, cameetsaniji incaramirincajiaque iraventaventaquempari inquemisantajiaqueriquea.

²⁷ Iroosacania imaica iintsijate incoquempani irishineventajiaquempari Aapani Irioshi, aparo icota iriatimpa itsamajati, irioquea Jesoquirishito amenacaajiaquerineca maasano arimajaca caaviji yanaaque yoganejencamajataca. Ari oncoquempa.

PAAVORO ITIONCAJIAQUENERI CORINTOQUITICA

Antsatantaquemparoca

Ocatica iroguenti antsatantaquemparoca iroquetica itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Corinto. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarensi Oganejencatatsica, teetarite inquemisantajigueroji jorio itsavetantimojiavetacagnarica. Irocashi itioncacotaqueri irira Paavoro otsipaque paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Corintoqui otsipaque Ya. 18.1-18. Tequeratagueti intioncacaanteroji ocatica Paavoro itioncacaanquero otsipapae mavite paperi itioncaciaqueneri choocajianquitsica guinteninintsiqui pajitatsica Tesaronica. Paavoro icamantaqueri amitacoquerica intioncaciaquenerica Corintoquitica. Itioncacaantaquero ocatica paperi ajagantsini irooca 54 irooca 55, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito. Itioncacaantaquerogueti Paavoro ocatica paperi ichoocaque guinteninintsiqui pajitatsica Epeso (16.8; Ya. 19).

Ocaniqui paperiqui itioncacaantaqueca Paavoro itsatacaajiacaji aatimpajia tsaromentajigarica Jesoshi quero ancojiaquempani anchoocajiaquegueti. Yoguisotoajiaqueneri icoacojiaquerica Corintoquitica itioncaciaquenerigueti. Icoacoajiaqueri quero incojitaquempani irimanquigajitempagueti (capitolo 7), quero incojitaquerini iteshi yojocajitinirica irioshivijirensi (cap. 8), aisa quero incojiaquempani intsatantajiaquemparoca cantashitatiaguetanquitsica yagaveja-caajiaquerica Ishire Aapani Irioshi apaniropae tsaromentajiacarica (cap. 12-14). Itsatacaajiaqueri quero incojiaquempani incapiocajiaquenerigueti imentaquitsitepae intigarancacaantajiaquenerica coguitejacojiaquitsica quemisantajiaquerica Jesoshi choocajianquitsica Jerosarequi (cap. 16). Aisa icantomajajiaqueri quemisantajiaquitsica Corintoqui yamenaquerigueti mana itsinampirejavacaajianaca tee intsipatavacajiajempaji (cap. 1-3), aisa yamenaquerigueti choocajianquitsica Corintoqui teequea incantomajajigueriji irapiguemisantariteni icovaeguishetacagueti (cap. 5). Incantomajajiaqueri aisa yamenaquerigueti icatsimatavacaajiacagueti teequea irivetsinantavacaajiajempaji, irioquea yaventajianaca joesepae teeca intsaromentajiguempariji Jesoshi (cap. 6). Otsipaquea icantomajimentajiaqueri yantajiaqueca teeca oncameetsateji icapiocajiacagueti (cap. 11). Paavoro itsatacaajiaqueri quero incojiaquempani quemisantajiaquitsica, inquejejiaquempariquea itigarancanejia Jesoshi (cap. 4), aisa icamantaqueri inquejejiaquempari iriatimpa (cap. 9), aisa iquenquejacaajiajiri ishiraerijia quemisantajiaquerica Aapani Irioshi coramani (cap. 10). Aisa iquenquejacaajiajiri Quenquetsatsarensi Oganejencatatsica tsavetacoquerica Jesoshi (cap. 15).

¹ Naroguenti Paavoro itigarancane Jesoquirishito, iriotari nintacaaquena Aapani Irioshi. Iriquenti notsipataca apitsaromentariteni Soseneshi.

² Imaica nonintaque nontioncaciaquempani aviatimpajia choocajiaquitsica Corintoqui tsaromentajigarica Aapani Irioshi. Inintacajiaquempani pintsaromentajiaquempari Quirishito Jesoshi cameetsanijite irashintamajiaquempaniji. Aisa inintacajiaquempani povashiantajianaquero maasano teeca oncameetsateji irooqueate pisavicaventajianaje maasano inintaguetica iriatimpa, pintsipajiaquempari maasano choocajiaquitsica

osamanipaequitica aventajigarica Amajirote Jesoquirishito. Iriatimpaqueate iriguenti irashijia Imajirojiate, aisa iriguentiqueate ashijia Amajirojiate maasano aatimpajia.

³ Namanacoventajiaquempiqueate incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

Paavoro ishineventacari Aapani Irioshi yamenaquegueti icavintsajajiaquerigueti Corintoquitica

⁴ Nocancaniquea nocanqueri Aapani Irioshi, “¡Arioteesa!”, namenaquegueti icavintsajajiaquempi aviatimpajia, pitsaroventajiacaritarite Quirishito Jesoshi.

⁵ Piquemisantajiaqueriquea irootaquequeate yagavejacaantajiaquempica piquenquetsajiaquegueti aisa pitsajiaquegueti.

⁶ Pitsajiaquetarite arimajaquea nocantamajataque notsavetanquerigueti Quirishito noquenquetsatacaajiaquempigueti iroaqueragueti.

⁷ Irootaquequeate tecatsi coguitejacojiaquempine pishirequi yagavejashirentacaajiaquempigueti Aapani Irioshi pantajiaqueneriniji poguijajivajirigueti ironigaantajiajempaca Amajirote Jesoquirishito.

⁸ Iriatimpaqueate igantagaquea intampishitacajiaquempi aatonijite povashiantajianajirotsi pitsaroventajiacarigueti, aatonijite ochoocati querocaca incantomajimentajiaquempica Amajirote Jesoquirishito savincaguiteri qui incoraquetantapojajempaca.

⁹ Iriira Aapani Irioshi igantagaqueate inetsanatiro icantaguequeca, iriotaquequea cajemajiaquempica inintacaquempiri pintsaroventajiaquempari Irijanite, irootaque-tari pitsipamajatantajanacarica Amajirote Jesoquirishito.

Icantajiaqueri: “Pinquemavacaajiaquempaja”

¹⁰ Imaica, napiguemisantarijiate, noncantajiaquempi quejetaca iriguentica cantanquitsi Amajirote Jesoquirishito, pinconoavacajiaquempa pintsipatavacaamajajiaquempa, aatoqueate picatsimatavacaajiatsi mana pinquemavacaajiaquempa.

¹¹ Manaqueate noncantajiaquempi imaica, napiguemisantarijiate, noquemacojiaquempitarite picatsimatavacaajiaca, icamantajiaquenatarite oconogaca Coroe.

¹² Apaniropae picantajiaque: “Naatimpa iriguenti noquemisantaque Paavoro.” Itsipaqueate mana icantajiaque intati: “Iriguenti noquemisantaque Aporoshi.” Itsipaqueate mana icantajiaque: “Iriguentiqueate noquemisantaque Sepashi.”* Itsipaqueate cantajianquitsica: “Naatimpa iriguentiqueate noquemisantaque Quirishito.”

¹³ ¿Arimpate ivorocacampate Quirishito irootaquequeate piquejetantajiacaroca imaica? ¿Arimpate naroguenti yompajacojitaqueca nometojaventajiaquempi naatimpa Paavoro? ¿Arimpate noviñacajatacaantajiaica ivajiroqui Paavoro?

¹⁴ Noshinevencari Aapani Irioshi namenaquegueti tee noviñacajajiaquempiji naatimpa, iriguentiqueate apaniro noviñacajataque Quirishipo, jeri aisa Gayo.

¹⁵ Irootaquequeate aatoqueate quericaca cantashitatsine mana iviñacajataqueri impampiatacoquenaniiji naatimpa.

¹⁶ Aisa noviñacajataqueri Esetepana jerijia iconoajiacaca itsovironaquitequi. Arigueti noviñacajataqueri itsipa tee nonquenquejajeroji.

¹⁷ Teenicate iroguenti intigaranquimentenaji Quirishito noviñacajatantaguiteni, iroguentiqueate itigaranquimenquena nontsavetantero Quenquetsatsarentsi Oganejencatatsica. Cotanquitsiqueate nocamantajiaquerigueti, tee nontsatacagueriji iquenquejaguetaqueca intati caquinteja. Iroomeguete nontsatacaquerime iquenquejagueticacaquinte, aatome yaventajigarime Quirishito metojaventajiacajica coroshiqui.

* **1:12 Sepashi.** Irootaque otsipa ivajiro Shimo Peerero. Pamenero Jn. 1.42.

Aapani Irioshi caaviji itsamajati, yanaajiaqueri maasano tsajiavetatsica

¹⁸ Oraqueate atsavetanquerigueti Quirishito imetojaventajiacajigueti coroshiqui irirajiaqueate oanankuitsineca camorecariqui yamenajiaqueroqueate teequeate quero-caca oncameetsatantempaji. Cotankuitsiqueate aatimpajia imeshiajiaqueca Aapani Irioshi atsajiaque irootaquequeate imeshiantajiacajica.

¹⁹ Aritarite ocanque Itioncacaantaqueca ocanti:

Coajica iramenitajiqueriqueate teequeate intsatimateji irirajia tsaguevetatsica. Ariqueate onquejetaquempaueate maasano iquenquejajiguica tsatamampeajiatsica iramenajitaqueroqueate tee ontampaticamajateji. Naroguentitarite quejegueta-querone imaica.

²⁰ ¿Taa opajita ocameetsatantacaca itsatamampeajiacaca tsatamampeajiatsica, jeri aisa tsatacaantamampeajiatsica, jeri aisa quenquetsatacoventajiguero ca taaca opajitapae quepatsipaequitica? Yonigaanquerotarite Aapani Irioshi maasanopae ocatica itsatamampeajiacaca quepatsipaequitica teequeate onetsanamajatempaji.

²¹ Iiraqueate Aapani Irioshi caavijiqueate itsamajati, irootaquequeate icantantacaca aato inchiquioji itsatashitari caquinteja iraventajiavetaquemparogueti itsatamampeajiavetacaca, iriguentiqueate ininque irimeshiajiaque quemisantaqueroneca Quenquet-satsarentsi itsavetantajitaqueca, yamenajiavetacaroqueate itsipapae ijiqueroji tee-queate onetsanamajatempaji.

²² Iiraqueate joriojia inintajiaque iramenacaajitaqueri oacaantantatsica intati. Iiraqueate guiriegogia manaqueate inintajiaque intsajiaque.

²³ Cotankuitsiqueate naatimpajia manaqueate notsavetantajiaqueriqueate Quirishito yompajacojitaquerigueti. Iiraqueate joriojia manaqueate ocatsimatacajiaqueri. Iiraqueate teeca irijorijoigueji manaqueate yamenajiaquero ijiqueroji teequeate onetsanatempaji.

²⁴ Cotankuitsiqueate maasano inintacajiaqueca Aapani Irioshi intsarotentajiaque-mpari iriogueti joriojia jerijia aisa guiriegogia itsajiaquequeate iroguenti imeshiimentajiaqueri Aapani Irioshi intsarotentajiacarigueti Quirishito. Aatomegueti yaventajigarime querocampamequea incojiaquempame irimeshiajiajempame, igantagatarite icanquequeate Aapani Irioshi paesatoniqui onquejetaquempa imaica, caavijitarite itsamajati.

²⁵ Oraqueate itsatica Aapani Irioshi yamenajiavecaca caquintejiatsica ijiqueroji tee-queate ontampaticamajateji, caaviji anaamajaquero itsajiguica iriatimpajia. Ariqueate oquejetacaqueate yagavejica Aapani Irioshi, yamenajiavecaroqueate iriatimpajia ijiaquejite teeji iragavejeji Aapani Irioshi, caaviji anaamajaquero yagavejiajetacaca iriatimpajia.

²⁶ Pinquenquejajiguero, napiguemisantarijiate, quero picojiacani icajemajiaquem-pigueti. Teequeate poshequigueji tsamajiajetacaroca itsatica caquinte, teequeate poshequigueji agavejiajetanquitsica, teequeate poshequigueji anaantajiajetanquitsica.

²⁷ Inintacajiaqueritarite intsarotentajiaquempari teeca intsajiajetempaji cameet-sanijite iroguipashiventajimentajiaquerinijite caavijica itsajiajeta. Ariqueate iquejeji-aqueri aisa inintacajiaqueri teeca iragavejiajetempaji cameetsanijite iroguipashiventajiaquerinijite agavejiajetatsica.

²⁸ Inintacaaqueritarite intsarotentajiaquempariqueate teeca iranaantajigueji, jeriquea aisa teeca irinintajiteriji, jeriquea aisa teeca irishineventajitempariji aatonijite yanaantajajitsi yamenapinijivetacaca yanaantajiaque.

²⁹ Ariquea iquejetaquero Aapani Irioshi imaica aatonijite quericaca agavejatsi isememotiri.

³⁰ Iriguentiquea Aapani Irioshi tsipashirentacajiaquempirica Quirishito Jesoshi. Iriotari itigarancaqueca Aapani Irioshi antsatimentamajiaquenijite. Iriatimpa

iriguentiquea shetaqueroca aguempevaerejia cameetsanijite iramenimentajiacajini-
jite Aapani Irioshi quejevaetanaca teenica anquempevaejiguempaji. Aisa iriguen-
tiquea agavejacaajiacaji ancomajajiaquempa asavicaventajiaqueroqueate inintague-
queca Aapani Irioshi. Imetojaventajiacaji imeshiaajiacaji aatonijite yashintajijaaaji am-
patsini, iriguentiquea ashintajajine Aapani Irioshi.

³¹ Aritarite ocanqueni itioncajitaquerogueti ocanti: “Aatoqueate aventacota, irio-
quea ashineventamajataquempa Amajirote.”

2

Quero icoca Paavoro itsavetanquerigueti Quirishito

¹ Napiguemisantarijiate, coramani noaquitigueti noquenquetsatacaaji-
aquitimpigueti notsavetanquerigueti Aapani Irioshi quero icota imeshiantigueti,
teequeate nonquejetempariji iquenquetsajiavetacagueti tsamajavetaroca itsatica
caquinte, teequea noquenquetsateji cameetsanijite pishineventaquena naatimpa.

² Aisa teequeate nonintimateji nonquenquejajeji otsipa nochoocatimojiaquem-
pigueti, iriguentiqueate noquenquejamajataque Jesoquirishito imetojaventajia-
jigueti coroshiqui.

³ Oraqueate nocatiimojiaquempigueti noquenquetsatacaajiaquempigueti
manaqueate notsaroanaquequea intati nompioncanacaqueate, namenacatarite
teequeate inchiqiojitsita nagavejempaji naatimpa.

⁴ Ariqueate oquejetaca aisa noquenquetsatacaajiaquempigueti notsavetan-
querogueti Iguenquetsatsare Aapani Irioshi teequeate ariqueea nonquejeguempariji
tsamajavetaroca itsatica caquinte iquenquetsajiguigueti, teequea noninteji nagave-
janquempiro nocanqueca naatimpa, inchiqiojitsiqueate yagavejajiaquempiqueate
Ishire Aapani Irioshi iquemisantacajiaquempi, pamenajiaquetarite iriguentiquea
agavejacaquena Aapani Irioshi.

⁵ Oraqueate noquejetancaroca imaica aatonijite iroguenti piquemisantimentajigui
pishinetimentajiguiro itsatica caquinte, manaqueate pinquemisantajiaque pamenaji-
aquegueti iriguenti agavejacaquena Aapani Irioshi.

⁶ Cotanquitsiqueate oraqueate noquenquetsatacaajiaquerigueti irirajia quemisanta-
majajiananquitsica ariqueate nocamantajiguiriqueate taaca opajitapae managuetan-
quitsica, cotanquitsiquea teequeate iroguenti itsatica quepatsiquitica, aisa teequeate
iroguenti itsajiguica majirontajiavetanquitsica imaica teroncaguetanajatsineca coa-
jica.

⁷ Iroguentiqueate notsavetacotanque iquenquejaguetica Aapani Irioshi tecca
intsajivetemparoji coramani. Aritarite tequeratagueti impeacaguemparoji quepatsi
inintacajiaacaji irimeshiaajiacaji intsipajianacaji ontaniqui jenoqui inquitequi.

⁸ Teequea intsatimajigueroji majirontajiavetanquitsica quepatsiqui imaica. Oraque-
ate intsajiaquerome aatomecagate yompajacojiguirime Amajirote caavijica yoganejen-
camajata.

⁹ Cotanquitsiqueate aritarite ocanque itioncacojitaquerogueti ocantiquea:
Chooaquea oshequi cameetsaguetatsica inetsanataqueca Aapani Irioshi cameetsani-
jite incavintsajimentajiaquerinijite irirajia pintsajigarica,
cotanquitsiqueate teequeate quericaca nejerone,
tee inquemacotimajiteroji,
aisa tee inquenquejimajiteroji.

¹⁰ Cotanquitsiqueate aatimpajia yonigaajiacajiroqueate Ishire Aapani Irioshi, itsamaja-
querotarite maasano iquenquejaguetica Aapani Irioshi tecca intsajiteroji, iteroncama-
jaqueroqueate.

¹¹ Arimpate caquinte teequeate inchoocateji tsateroneca taaca iquenquejaque, apaniroqueate itsataque iriatimpa ishirequi. Iriompa Aapani Irioshi aatoqueate quericaca tsatatsi taaca iquenquejaque, apaniroquea itsataqueroqueate Ishire.

¹² Aatimpajiaquea imaica teenicate anquenquejajiajeji onquejetajemparoji iquenquejajiguica teeca intsaromentajiguempariji Aapani Irioshi, itigarancajiacajiritarite Aapani Irioshi Ishire cameetsanijite antsajiaquenijite inintacajaiacajica icavintsajajiacajigueti.

¹³ Oraqueate notsatacaantajiguirogueti maasano ocativa teequeate inchiqiuojitsita nontsatacaantashijiguemparoji intati naatimpajia, iriguentitarite tsatacaajiaquenaroguea Ishire Aapani Irioshi. Aisa itsatacaajiaquenaro quero noncantajiaque nontsatacaantajiaquegueti, irooquea notsatacaajiaqueri irirajia ichoocashirentajiaqueca Ishire Aapani Irioshi.

¹⁴ Irirajiaqueate teeca inchoocashirentajigueriji teequeate irishineventajiavaquemparoqueate itsatacaajiacajica, yamenaquerotarite ijiqueroji tee onetsanatemparoji. Teequeate iragavejeji intsatavaqueroji, teenicate inchoocashirenteriji Ishire Aapani Irioshi tsatacaquerineca.

¹⁵ Cotanquitsi iriraqueate ichoocashirentaqueca irioquea tsatavaquero, aisa itsaque queroca cameetsatatsica aisa queroca teeca oncameetsateji. Iriraqueate teeca inchoocashirenteriji aatoquea yagaveji itsatacaguiritsi ichoocashirentaqueca, aato yagaveji icantiri queroca cameetsaguetatsica aisa queroca teeca oncameetsaguetateji.

¹⁶ Aritarite ocanque itioncacojiquerogueti ocanti: “¿Queriqueate tsataqueroca iquenquejica Amajirote cameetsanijite intsatacaquerinijite?” Cotanquitsiqueate aatimpajia iriguentiqueate tsatacaajiacaji Ishire Aapani Irioshi, irootaquequea atsatantajiacaroca iquenquejaguetica Quirishito.

3

Itsinampirejavacajaiianaqueate Corintoquitica

¹ Imaica, napiguemisantarijateni, noncantajiaquempiqueate oraqueate noquenquetsatacaaatimpigueti teequeate nonquejetacaajiguempiji noquenquetsatacaajiguirigueti quemisantamajajiguirica Ishire Aapani Irioshi, manaquea noquenquetsatacaajiaquempi noquejetacaajiaquempiqueate teeca inquemisantamajajigueriji, noquejetacaajiaquempi iriaqueraca aventajianacarica Quirishito, quejejaquempitarite chaajaniquitirajaca iriaqueraca voananquitsica.

² Iroguentiqueate notsatacaajiaquempica teeca omanempaji, noquejetacaajiaquem-piqueate yatsojitirigueti chaajaniquitirajaca iriaqueraca voanquitsi tequeratatirajaca intijaiteriji, tequeratatirajatarite pagavejajigueti pintsajiavaqueroqueate mananquitsica. Arimpate imaica tequeratatirajaja pagavejajigueti pitsajiavaqueroqueate,

³ tequeratatirajatarite pinquemisantamajajigueriji Ishire Aapani Irioshi. Pigan-tagatirajaja picatsimatimentajiguiriqueate querocagueti icojiacani papiguemisantarite, aisa picatsimatavacaajiaqueate pitsinampirejavacajaiianaqueate. Pigantagatirajaja piquejejiacari tequeratatirajaja inquemisantajigueriji Aapani Irioshi.

⁴ Choocatarite cantanquitsica: “Naatimpa iriguenti noguijatacotaque Paavoro.” Itsipaquea cantanquitsica: “Naatimpaqueate iriguenti noguijatacotaque Aporoshi.” Piquejejaqueroguetiqueate imaica manaqueate piquejejiacari intati teeca intsaromentparoji Aapani Irioshi.

⁵ ¿Taampa ipaji Paavoro? ¿Taampa ipaji Aporoshi? Mana amitantatsica nonajiaque intati, naroguentijiatari irajaanire Aapani Irioshi itigarancaqueca nonquenquetsatacaquempiniji paventantajiacarica. Apaniropaequeate nonetsanajiaquero icantajiaquenaca Amajirote.

⁶ Naatimpaqueate quejetaca manaca noquitataquero oitsoqui, naroguentitarite tsatacaajiaquitimproca Icanqueca Aapani Irioshi. Iriraqueate Aporoshi quejetacaquea iriguentica orencacotavaquero, iriguentitarite tsatacaamajiaquempiroqueate. Cotanquitsiqueate apaniroqueate Aapani Irioshi itampishitacajaiquem-piqueate arimpaniji pintsaromentamajianaquempiriqueate.

⁷ Teequea omanempaji iquitajitirogueti oitsoqui aisa yorencacojitirogueti, cotanquitsiqueate apaniroqueate Aapani Irioshi yagavejaquequeate intoroacaquero.

⁸ Iriraqueate quitajiatsica jeriqueate aisa orencacotiroca ariqueate iquejetavacaajiacaca, cotanquitsiqueate coajica irovegarajitajeriqueate apaniropae querocagueti ovegraquempani yantajiaquegueti.

⁹ Naatimpa ariqueate noquejetacariqueate Aporoshi, iriguentitarite notsipatashitaca nantajiguinirigueti Aapani Irioshi. Aviatimpajia manaqueate piquejejiacaró iniganquitejire Aapani Irioshi, aisa manaqueate piquejejiacaróqueate mapipanco itsinetacójitica.

¹⁰ Naatimpaqueate naroguenti quejetaca caavijica itsatiro tsinetacomajatiroca mapipanco, inintacaquenatarite Aapani Irioshi narogueti jivaquero noqueecashiquero notsinetacotantamajatacaro mapicota isavi cameetsaniji onquishomajatanaqueeniji. Itsipaquea itantotavaquero. Cotanquitsiqueate apaniropae tantotavaquero irinet-sanamajataqueroja aatonijite omanimotari.

¹¹ Aatoquea queri agavejatsine inqueecaje otsipa quishotacajaeronca. Iriotaque ocantacotaque Jesoquirishito quishotacaquero. Iriotaque nocantacotaque notsat-acajaiquem-pigueti.

¹² Cotanquitsiqueate irirajiaqueate tantojiavaqueronca intantotantajiaquem-paroqueate cavorejamajataatsica icantajitica ooro, iriguentica itsipa cavorejatatsica icantajitica perata, iroguentica oganejencaguetatsica mapi, irooca ogota, irooca savoroquiji, irooca ovashi.

¹³ Oraqueate coajicaqueate aapojempagueti incatsimatantajiaquemparicaquea Aapani Irioshi maasano teeca intsaromentajiguempiriji, ariqueate iramenajitaqueroqueate taa opajita itantotantajiacaró apaniropae. Iriguenticaqueate itantotantacaró ooro, iriguenticaqueate perata, iroguenticaqueate oganejencaguetatsica mapi, aatoqueate otaguicrotsi paamari, quishovaetaquetarite. Cotanquitsiqueate iroguentigueti itantotantacaró ogota, iroguentica savoroquiji, iroguentica ovashi, ontaaquempaqueate.

¹⁴ Aatogueti otaga yantaqueca irovegarajiqueriqueate.

¹⁵ Oraqueate ontaaquempagueti ompomatsaquempaqueate maasano yantaqueca, cotanquitsiqueate iriatimpa aato itaga, onquejetaquempa manaqueate irajaitavajeri pajinigueti intaguempame.

¹⁶ ¿Arimpate teequeate pintsajigueji aviatimpajia quejejiacquempi itemporote Aapani Irioshi, ichoocashirentajiaquempitarite Ishire?

¹⁷ Taacagueti pomatsataquerone itemporote Aapani Irioshi, ari inquejetaqueri Aapani Irioshi, impomatsataqueriquea iriatimpa, yashintamajatacarotarite. Aviguentijiatari itemporote.

¹⁸ Aato pamatavijatsi avisati. Choocagueti oraniqui aviatimpajiaqui jivetatsica itsamajati taaca opajitapae itsanirovecaca quepatsiquitica, iintsija iramenaquempaqueate iriatimpa teequeate intsatimateji. Iramanaquerigueti Aapani Irioshi ariqueate intsatacaqueriqueate, coajica ariqueate intsamajatanaquequeate.

¹⁹ Maasanotarite itsajiguica quepatsiquitica ijivetacaróji cameetsavaeque, iriraquea Aapani Irioshi yamenaqueroqueate teequeate oncameetsateji. Choocaqueate itioncacojiqueca ocanti: “Iriraqueate Aapani Irioshi manaquea yoguipiashitantajigari intati tsanirojiavetatsica yamatavijantajiaquegueti, irisatitari amatavijaatsi, manaquea apitivitanajari iriatimpaqui.”

²⁰ Aisa ocanti: “Irraqueate Amajirote itsamajatiroquea maasano iquenquejajiguica caquinte tsanivetatsica yamenitaqueriquea teequea oncameetsateji.”

²¹ Irootaquequeate imaica aatoquea pisemetacotsitajari irirajia caquintepae, maasanotarite choocaguetatsica ipeacaajiaquempiroquea Aapani Irioshi.

²² Ariqueate noquejetaca naatimpa aisa Aporoshi jeri aisa Sepashi,* itigarancaji-aquenaqueate nontsatacajiaquempi. Aisa ipeacaajiaquempiro maasano choocaguetatsica quepatsiqui. Arigueticquea pinchoocajiaqueguete manacampaqueate pimetojajiaque intati, pishineventajiaquempariqueate. Pishinetimentajiaquemparoqueate choocaguetatsica imaica jeroqueate aisa choocaguetanquitsineca coajica, aviguentijitarite ashintajigaroqueate maasano.

²³ Aviatimpajia iriguentiqueate ashintajiguimpi Quirishito. Irraquea Quirishito irioquea tigarancaqueri Aapani Irioshi.

4

Itigarancanejia Jesoquirishito

¹ Pitsajiaquequea naroguentijiaquea irajaanirejia Quirishito, inintacajiaquenatarite nontsatacajiaquempiro iquenquejagueticquea Aapani Irioshi teeca intsajiteroji.

² Quericacaqueate inintacajiaqueca iroguentiqueate inintajiti irinetsanamajataquero maasano icanquerica nintacaaquerica.

³ Cotanquitsi queroca pincantajiaquena aviatimpajia aatoqueate querocaca nocantitsi naatimpa. Aviguentijia cantajiaquenane, iriguentica cantajiaquenane it-sipa nonetsanajiaqueroqueti icanquenaca Amajirote, aatoqueate querocaca nocanti. Iroguentica pincantajiaquena tee nonetsanateroji, ariqueate nonquejetaquempaqueate aisa, aatoqueate querocaca nocanti. Noquejetaca naatimpa namenacocaguete, teequeate noncanteji.

⁴ Namenavecaqueate naatimpa nonetsanaqueroqueate, cotanquitsiquea jmm iriom-pate Amajirote, inchiquiojitsitarite incantaquenaqueate iriatimpa.

⁵ Irootaquequeate nocantantajiaquempica imaica aatoqueate inchiquiojitsita picantajiguiritsi aviatimpajia papiguemisantarijiate arica inetsanamajajiaquero icanquerica Amajirote, arica tee. Oraqueate incoraquepojjaguete iriatimpa ariquea ironigaajipojaguete tsitivetanquitsica ariqueate intsajitaqueroqueate quero iquenquejaguetaqueca apaniropae. Ariqueate irira Aapani Irioshi irishineventamajaquempariquea maasano netsanamajajiaquero inintagueticquea, incantajiaqueriqueate: “Cameetsavaeque.” Cotanquitsiquea irirajia temajaca irinetsanamajatero aato ishineventajigari.

⁶ Napiguemisantarijiate, maasano ocatica nocantaqueca imaica noquenquetsatacotaguete naatimpa, jeroqueate aisa noquenquetsatacotaguete Aporoshi, manaquea nocantajiaquempiqueate cameetsanijite pintsajiaqueroniji pinetsanajiaquero Itioncacaantaqueca Aapani Irioshi, aatoniji ichoocatajitsi pisemetacojiaquempaca itsipaqueate pincatsimajiaqueca.

⁷ ¿Ariquea quericampa amenajiaquempineca panajiaqueri itsipa? ¿Arimpate pagavejaque aviatimpajia inchiquiojitsita aatoguete yagavejacaguimpi Aapani Irioshi? Irioguete agavejacaquempi, iroosacanicate ¿queroqueate ocotaca panaantacaca quejecaquea inchiquiojitsita pagavejajiaque aviatimpa?

⁸ ¿Arimpate jac tsamajajiaquempi maasano Iguenquetsatsare Aapani Irioshi, teempaquea pincogumentajempaji intsatacajaitajempi? ¿Arimpate jac agavejamajajiaquempi? ¿Arimpate pipeajica majirontajatsica panajiaquenampa naatimpajia? ¿Arimajamequea pimpeamajajiaquempame majirontajatsica cameetsamequea nonquejejaquempamequea naatimpajia nomajirompojaquempamequea!

* **3:22 Sepashi.** Irootaque otsipa ivajiro Shimo Peerero.

⁹ Namenajiaquetarite naatimpajia itigarancane Amajirote quejecaqueate manaca iquejetacaavaejiaquenaqueate Aapani Irioshi irirajia ipincajitica, quejecaqueate manaca inintajitaque irimetojajitaquena. Yamenajiaquenaqueate maasano: caquintejiat-sica jerijia aisa irashivantijitete Aapani Irioshi.

¹⁰ Naatimpajia notsavetantajiaqueriqueate Quirishito irootaquequeate yamenantajavetaquenaca teeca intsaromentajiguempariji teequeate nontsajigueji, cotanquitsiqueate aviatimpajia pitsaromentajiacarigueti Quirishito ariqueate pamenajiaqueate pitsamajiaque. Naatimpajia mana yamenajiaquena teequeate nagavejajigueji, cotanquitsiqueate aviatimpajia pamenajia pagavejamajiaque. Aviguentijia ishin-eventajia, naatimpajia tee irinintajavetenaji.

¹¹ Natsipejiaqueate notase jero aisa nomirejia, aisa notsoncashitequijacoca irosatiguea imaica. Itavatavaajiquenaquea, noanoaitapiniquequea, teequeate onchoocatajeji notsovironaquite.

¹² Natsipejiaqueate nantajiaquegueti nacoqui naanquempaca. Icatsimatsajiveque-naquea, cotanquitsiqueate naatimpajia tee nompigajiguempariji, manaqueate nocantajiaqueri Aapani Irioshi incavintsajiaqueri. Yatsipetacaajivetaquenaqueate, cotanquitsiqueate natsiperejacojiacaro.

¹³ Icantacantajivetaquenaquea, cotanquitsiqueate naatimpajia cameetsa noanaqueri. Iquempetacaajitaquena otaqui, quejevaequena cantaitero irosati imaica.

¹⁴ Teequeate iroguenti nontionquimentajiguempiji noguipashiventajiaquempi, manaqueate nonintaquequeate noncantomajiaquempi nonquejetacaajiaquempi aviguentijia nirijanitejia nopintsamajiacaca.

¹⁵ Inchoocajavetaquempaquate iroshequiamajavequempaquate tsatacaajiaquempineca pintsaromentamajiaquemparinijite Quirishito, cotanquitsiquea aatoquea yoshequiguetsi irijanintajiaquempineca, apanirotarite nococa naatimpa nirijanintajiaquempi, naroguentitari quemisantacaajiaquempi iroaqueragueti notsavetantajiaquerigueti Quirishito Jesoshi notsatacaajiaquempirogueti Quenquetsatsarentsi Ogane-jencatatsica.

¹⁶ Irootaquequeate imaica nonintantacaca pinquejemajiaquena naatimpa.

¹⁷ Irooquea nontigarancantaquemparica imaica Timoteo quejemajatacaquea irijani, nopintsamajatari. Iriatimpaqueate isavicaventamajatiro inintaguetica Amajirote. Oraqueate iroanaquegueti oraniqui inquenquejacaajiaquempiroqueate quero nocotaca naatimpa notsaromentarigueti Quirishito notsatacaantigueti querocagueti oraniqui icapioajigagueti tsaromentajigarica Quirishito.

¹⁸ Piconoagarantajiaqueate aviatimpajia panaantajiaque pijijiaqueji aato noanaque namenajijatempi.

¹⁹ Cotanquitsiqueate iriogueti nintanquitsine Amajirote noanaquequea taampina, ariqueate namenajiajateri irirajia anaantaguetatsica arimajacagueti yagavejajiaque, manaca iquenquetsatashijiaca intati.

²⁰ Aritarite imajirontagueti Aapani Irioshi, teequeate aparo inquenquetsatashitempa intati, manaqueate yagavejacaantiqueate aisa.

²¹ ¿Taaqueate pinintajiaque aviatimpajia? ¿Aricaqueate pinintajiaque noncantomajiajiapojempi, irooca pinintajiaque noncavintsajiajiapojempi cameetsaqueate nonquenquetsatacaajiapojempi?

5

Icantimentajiaqueriqueate inconoajiaquemparigueti antanquitsica tiontagantsi

¹ Noquemacojiaquempi chooca apaniro papiguemisantarite peacaacaroca tiontagantsi caarica iquemacojiti inquempetajemparo impeacaguemparo teeca intsaroven-tajiguempariji Aapani Irioshi: ipashinincacarotari imanquigavetacaca iriri, yaajiro-quea.

² ¿Querocaquea picojiacaniquea aviatimpajia aventacojiaquempi? ¿Quero ocotacani teequea pishimampoancacotempariji? Pincantajiaqueriqueate quejequeroca imaica aatoqueate itsipajijaimpi.

³ Teequeate nontsipajiavetempiji, cotanquitsiqueate noquenquejajiaquempiquea quejeca manaca notsipajiaquempi. Irraqueate quejequeroca imaica jac nocanque-quea manaquea ipeacaaca covaeguisherentsi.

⁴ Irootaquequeate nocantantajiaquempica imaica queroqueate pincojiaquerini, que-jevaetaca iriguentica cantanquitsi Amajirote Jesoquirishito. Pincapiocajiaquem-pagueti pintsajiaque nocancani noquenquejajiaquempiquea, aisa iragavejacaajiaque-mpiqueate Amajirote Jesoshi,

⁵ pincantajiaqueri aatonijite itsipajijaimpitsi picapiocapinijiacagueti cameetsani-jite irantsipetacaimenquemparinijite Satanashi itsinoqui. Pinuejejiaquempaquea irovashiantanajeronijite yantaqueca imaica arinijite iraimentajitavajerinijite ishire coajica incoraquetajegueta Amajirote Jesoshi.

⁶ Teequeate oncameetsateji paventacojiacagueta piquejejiacagueta imaica. ¿Arimpa tee pintsajigueroji icantajitiro impeacajaitemparogueta pan: “Onconoaquemparogueta capichajaniqui anempoacaaqueroneca, ariqueate oncotanaquempa anempoanaque-quea maasano ose”?

⁷ Imaicaqueate pincantajiaqueriqueate irira quejequeroca imaica aatoqueate itsipa-jijaimpi cameetsanijite pinquejejiaquemparonijite pan ishecajitaca Paashicoaqui teeca onconoguemparoji anempoantaca. Iriatimpa manatarite iquejetacaroqueate iroque-tinica anempoantaca pan. Oraqueate aatogueta piquejejiguiritsi imaica manaqueate paajencatsijiaqueriqueate aviatimpajia aisa, pinquejejianaquempariqueate iriatimpa. Aviatimpajia manatarite piquejejiacaroraqueate pan ishecajitaca Paashicoaqui teeca onconoguemparoji anempoantaca, imetojaventajiacajitarite Quirishito ishetaquero-queate aguempavejia. Iquejetacariqueate ovejajaniqui imetojajitica ishecajitaca Paashicoaqui.

⁸ Iroosacanicate imaica anquejetaquempariqueate shineventacaroca Paashicoa ipis-honcaquerogueta maasano iroquetinica anempoantaca pan, iintsija avashiantamaja-jianaqueroqueate maasano teeca oncameetsateji ancomajamajianaquempa, ancan-tamajajianaque aatoqueate amatavijantajajitsi.

⁹ Oraqueate notioncajiaquempigueta iroquetica nocantajiaquempiqueate aatoqueate piconoajigaritsi oashitiroca manquigarentsi teeca iro irashimajaca.

¹⁰ Cotanquitsiquea teequea irio noncantacoteji irirajia teeca intsaroven-tajiguempar-iji Quirishito oashitaqueroca manquigarentsi, jerijia nintsitantaguetairoca yashintague-tacaca igonoro, jerijia aitsitantajatsica, iriguentica irioshivijitashitatsica irioshivijire. Oraqueate iriomegueta noncantacojiaqueme, queroquea poajianaqueme aatonijite pi-conoajijaaritsi.

¹¹ Iriguentiqueate nocantacojiaquequeate irirajiaquea cantajiatatsica: “Naroguen-tiqueate papiguemisantarite, naroguenti tsaroveratarica Quirishito”, cotanquitsiqueate igantagatirajaquea yaacojiguero manquigarentsi, aricaquea igantagatiraja inintsigue-tiri yashintaguetacaca igonoro, aricaquea irioshivijitashitaca irioshivijire, aricaquea igantagatiraja iquenquetsaguisheguetaquequeate intati, aricaquea igantagatiraja ish-inquitaca, aisa aricaquea igantagatiraja yaitsitantagueta. Irioqueate iriguenti nocan-taquequeate aatoquea piconoajijaari, aatoqueate pitsipajijaari pishecajiaquempagueta.

12-13 ¿Arimpa querocampate noncantajiaqueriqueate irirajia teeca intsaromentajiguempariji Quirishito? Iriguentiqueate Aapani Irioshi inchiquiojitsiquea incanqueri iriatimpa. Cotanquitsiqueate aviatimpajia pincantajiaqueriqueate quero incojitaquerini papiguemisantarite antaqueroca quempevaerentsi. Irootaquequeate nocantantajiaquempica imaica pincantajiaqueriqueate iriraquea manquigatacaroca imanquigavetacaca iriri aatonijite iconoajiajimpitsi picapiocapinijiacagueti.

6

Queroquea pincojiaquempani pivetsinantavacaajiaquempagueti

¹ Arigueti pincatsimaquerigueti papiguemisantarite pamenakerigueti querocagueti icotaquempi, ¿arimpate oncameetsataque poanaque pincamantaqueri joese cantacotantatsica teeca intsaromentajiguempariji Quirishito cameetsanijite incanque quero incojitaqueri irira picatsimataqueca? Iriguentijiaquea pincamantajiaquequeate papiguemisantarijiate cameetsanijite incantajiaquempinijite quero incojitaqueri.

² ¿Arimpaqueate tee pintsajigueji aviatimpajia irirajiaqueate tsaromentajigarica Aapani Irioshi iriguentiqueate cantajianquitsine coajica queroqueate incojitaqueri maasano caquintejiatsica? Oraqueate arigueti pinquejejiacquempa imaica, caavijiqueate pagavejajiaquequeate pincantajiaque imaica quero incojitaquerini querica catsimatacaquerineca irapiguemisantarite.

³ ¿Arimpate teempa pintsajigueji aroguentijiaquea cantajianquitsine quero incojitaqueri ashivantijite? Atsajiaquetarite ariqueate onquejetaquempa imaica coajica, iroosacanicate imaica caavijiqueate agavejajiaquequea ancantajiaque quero incojitaquero taaca opajitapae amenajiaqueca teeca oncameetsateji.

⁴ Arigueti picatsimatavacaajiacaca querocagueti picotavacaajiacani, ¿queroqueate ocoatac iriguentiqueate paventajiacaca teeca intsaromentajiguempariji Quirishito incantajiaquempiqueate quericaca quejetanquitsica?

⁵ Imaicaqueate imaica ariqueate mana notionquimentajiaquempi oca noguipashiventajiaquempinijite. ¿Arimpaqueate teempa inchoocatimateji apaniro papiguemisantarite tsatanquitsineca cantanquitsineca quero pincojiaquempani pivetsinantavacaajiaquempagueti?

⁶ Cotanquitsiquea picatsimataquerigueti papiguemisantarite, iriguentiqueate paventajiacaqueate joese cantacotantatsica teeca intsaromentajiguempariji Quirishito.

⁷ Oraqueate piquejejiacagueti imaica teequeate oncameetsateji. Arimequeate pantsiperejacojiavaquemparome querocagueti icojiaquempini papiguemisantarite. Quejecaqueate impomatsatsijiaquempirogueti taaca opajitapae pashintaguecaca irooca iramatavijaquempigueti, pantsiperejacojiacquemparoqueate.

⁸ Cotanquitsiqueate aviatimpajia patsipetacaantajiacaqueate, pamatavijantajiaquequeate, piquejetacaajanacariqueate aisa papiguemisantarijiate iriatimpajia.

⁹ ¿Arimpaqueate tee pintsajigueji maasano antajiatatsica teeca oncameetsateji aatoquea yoguitsi ichoocaquegueti Aapani Irioshi? Inchiquiojija picomijigarotsi ocatita. Aatotarite yoajiguitsi ichoocaquegueti Aapani Irioshi oashitanaqueroca teeca iro imanquigare, jerijia irioshivijitashitatsica, jerijia aimentaroca imanquigare, jerijia cantatsajiguirica irapishirampariteni,

¹⁰ jerijia aitsitantajiatatsica, jerijia nintajiatatsica irajaarantajiaquempa, jerijia shinqiijiatsica, jerijia cantacotashitantatsica, jerijia aisa amatavijantatsica.

¹¹ Piconoagarantajiacaqueate aviatimpajia ariqueate piquejejiavecaqueate imaica, cotanquitsiqueate oraqueate pitsaromentajiacarigueti Amajirote Jesoquirishito ishejiacquempiroqueate maasano piguempavejajia, yamenantajiaquempicaqueate Aapani

Irioshi quejevaeca teeca pinquempevaetimajiguempaji, ariqueate yagavejacaajiaque-mpi Ishire Aapani Irioshi povashiantamajajianaqueroqueate pantaguishejiavetaca, ariqueate pisavicaventajianaqueroqueate inintaguetica Aapani Irioshi.

Yashintajiacaji Aapani Irioshi atsinojia

¹² Choocaqueate taaca opajitapae teeca incantimentenaroji Amajirote, cotanquitsiqueate mana nonquenapitsatapanajantero intati querocaguete namenaqueca naatimpa manaqueate ovashiantacaanaquenaro notsaromentamajatariguete Amajirote. Teequeate incantimentenaroji Amajirote, cotanquitsiqueate querocaguete namenaqueca arica agavejaquena coajica, manaquea nontomicapitsapanajantero intati.

¹³ Arimajaqueate ipeacaaguecaroqueate Aapani Irioshi maasano ishecajiguetaca cameetsanijite oanaquenijite atsicotoqui anquemimentajianaquempanijite. Ariqueate oquejetaca atsicoto iroatimpa manaqueate ipeacaashitacaroqueate ontetantaquempari ashecaguequempaca, cotanquitsiqueate coajica aatoqueate oquejetajatsi imaica, impejaerotarite Aapani Irioshi atsicoto aisa asheca. Cotanquitsiqueate atsino teequeate iroguenti impeacaashijigaji Aapani Irioshi oashitantajiaque. Iroguentiqueate ipeacaantajiacajica antsaromentajiaquempariqueate Amajirote, iriatimpaqueate Amajirote inchoocashirentajiacajiqueate.

¹⁴ Ariquea iquejetacaacariquea Aapani Irioshi Amajirote ivochantajiriqueate, ariqueate inquejejiacaji aatimpajia aisa irovochantajijaajiqueate coajica, yagavejamajatitarite.

¹⁵ ¿Arimpate teequeate pintsajigueti aviatimpajia yashintamajajiaquempiqueate Quirishito? Pitsino iroguenti irashi iriatimpa. ¿Queroqueate incoquempani yashincaca Quirishito iroashitanaquerogueti icantatsapinijitica? Inquejetaquerogueti imaica jooshiatsi, quejevaecaqueate iriguentica quejequero Quirishito imaica!

¹⁶ ¿Arimpaqueate teequeate pintsajigueti querica oashitanaqueroneca icantatsapinijitica ariqueate incotanaquempa intsipamajatanaquemparoqueate quejecaqueate apanironica inchoocatanaquequeate? Aritarite ocanque itioncacojiquerogueti ocanti: “Iroaqueragueti mavite icarajiavetaca, cotanquitsiqueate ariqueate icojianaca quempetanaja apatsinoronica icantaja.”

¹⁷ Cotanquitsiqueate quericaca tsaromentamajatarica Amajirote intsipamajatariqueate ariqueate iquejetanacariqueate iriatimpa quejetaca apanironica ichoocatanaque ishire.

¹⁸ Pishiapitsatanaqueroja quempevaetagantsi: aatoquea picantatsatimajiguirotsi teeca pimanquigatempaji; aisa manquigarentsi aatoquea pinevejigaritsi caarica manquigatimpi. Maasanotarite otsipapae quempevaetagantsi yantaguishejitica teesacona onquejetemparoji ocatica: iriraqueate cantatsataqueroaca teeca iro imanquigare iquempevaetacaacaroquea itsino iriatimpa.

¹⁹ ¿Arimpate tee pintsajigueti aviatimpajia oraquea pitsino iroguentiquea ichoocatanacaca Ishire Aapani Irioshi itigarancajiaquempica? Oquejetacaroquea itemporote. Teequea aviguenti ashintajatsine,

²⁰ yamanantaquempitarite yovegarataquempi* cameetsanijite irashintamajajiaquempanijite. Irootaquequeate imaica nocantantajiaquempica pincomajamajajiguempaqueate cameetsanijite pamenacajiaquerinijite maasano caavijiqueate yoganejen-camajata Aapani Irioshi. Pinquejejiacquempaquea pitsinoqui [aisa pishirequi, iriotari ashintaroca].

* **6:20 yamanantaquempitarite yovegarataquempi.** Irootaque yovegaratantaquempica imetojane Quirishito. Pamenero 1 Co. 7.23; Yonig. 5.9; Irm. 3.24.

7

Icamantajiaqueri quero incojiaquempuni manquigajiatsica

¹ Imaicaqueate imaica irooqueate noncamantajiaquempi picoacojiaquenaca pitioncajiaquenagueti. Cameetsavaetaquequeate aatogueti imanquigajigatsi shirampari.

² Cotanquitsiqueate aatonijite yoashitajirotsi manquigarentsi cameetsavaetaquequeate irimanquigajiaquempa apaniropae shirampari imanquigare. Ariqueate onquejejiaquempaquateate manquigarentsijia iroatimpajia omanquigajiaquempaquateate omanquigare.

³ Oraqueate manquigarentsi aatoqueate otsinampirejiritsi manquigataroca irininqueguete inquishotajemparo. Ariqueate inquejetaquempaquateate iriatimpa aatoqueate itsinampirejiritsi iroatimpa.

⁴ Oraqueate manquigarentsi manquigatatsica teenicaqueate ashintemparo otsino, iriguentitarite ashintaroqueate omanquigare. Ariqueate iquejetacaqueate manquigataroca, teequea irashintemparo iriatimpa itsino, iroguentitari ashintaroquea imanquigare.

⁵ Noncantantajiaquempicaqueate aatoqueate pitsinampirejavacajaiatsi, cotanquitsiqueate mavitegueti pinintajiaquegueti pinorijashijiajempa cameetsanijite pisavicaventajiaquero pamanajiaqueri Amajirote cameetsavaetaquequeate. Coajicaqueate pintsipatavacajiajempaquateate aatonijite iquempevaetacaajiguimpitsi Satanashi imajirote ampatsini, aatotarite pagaveji pitampishitashijiguiro pinchoocatashijiaquem-paguete.

⁶ Cotanquitsiqueate nocantajiaquempiguete imaica teequeate ariqueate noncantajiguempiji pimanquigajiaquempaja, manaqueate nocantajiaquempiqueate ariguete pinintajiaqueguete pimanquigajiaquempa cameetsavaetaquequea. Oraqueate aatoguete pinintajiguitsi cameetsavaetaque aisa.

⁷ Naatimpa nonintavecaqueate inquejejiaquename naatimpa maasano shiramparijia, cotanquitsiqueate irira Aapani Irioshi icantashitajiaiacaji apaniropae yagavejacaajiacajiguete.

⁸ Irirajiaqueate tequeratatirajaca irimanquigajiguempaji cameetsataquequea inchoocatashijiaquempa intati inquejejiaquenaqueate naatimpa. Ariquea onquejejiaquempa tequeratatirajaca omanquigajiguempa, jerojiaqueate metojacoguetanquitsica manquigataroca.

⁹ Cotanquitsiqueate aatoguete pagaveji pinchoocatashitempa cameetsavaequequea pimanquigatempa, anaaqueroqueate pinevetashiguecaroguete intati.

¹⁰ Cotanquitsiqueate oraquea manquigajiatsica noncantajiaqueroqueate aatoquea ovashiantajiguiritsi manquigataroca, teequea naroguenti cantatsine, iriguentiqueate cantanquitsi Amajirote.

¹¹ Ariguete ovashiantanaqueri manquigataroca, aatoqueate omanquigatimatajatsi itsipa, cotanquitsiqueate oninqueguete ompishitanajeriquea manquigataroca cameetsavaetaquequea. Ariquea inquejetaquempa shiramparijia aatoqueate yovashiantimajiguirotsi imanquigarejia.

¹² Imaicaqueate imaica irioquea nonquenquetsatacaajiaque tsaromentajigarica Quirishito choocajiaatsica imanquigarejia teeca ontsaromentajiguempariji, cotanquitsiqueate teequeate iriguenti cantatsine Amajirote, naroguentiquea cantanquitsi. Noncantajiaquerequeate ariguete onintaque imanquigare quisho oanaqueri, aatoqueate yovashiantirotsi.

¹³ Ariqueate onquejetaquempa manquigarentsi tsaromentarica Quirishito choocaguete manquigataroca teeca intsaromentempariji, ariguete inintaque quisho iroaquero, aatoqueate ovashiantiritsi.

14 Iriatimpa teequea intsaromentavetempariji Quirishito, cotanquitsiqueate ot-saromentacaritarite iroatimpa ariquea intsipatacanquemparoqueate Aapani Irioshi incavintsajaqueri. Ariquea oquejetacaquea aisa manquigarentsi teeca ontsaromentempariji Quirishito, irioguetiqueate tsaromentarica manquigataroca ariqueate intsipatacanquempariqueate Aapani Irioshi incavintsajaquero. Aatomequeate oquejetame imaica irijanijiate inquejemajiaquemparime irijanijiate teeca intsaromentempariji Quirishito, cotanquitsiqueate imaica iriri iriguentiquea tsaromentarica irootaquequeate incavintsajantajiaquemparica Aapani Irioshi.

15 Cotanquitsiqueate choocaguetei teeca intsaromentempariji Quirishito, iriogueti nintanquitsine irovashiantanajero imanquigare tsaromentarica, manaquea oncanque: “Querocaguetei pininque, avirompate.” Ariquea oquejetacaquea manquigarentsi teeca ontsaromentempariji Quirishito iroguetiqueate nintanquitsineca ovashiantajeri omanquigare tsaromentarica, manaquea incanquero: “Querocaguetei pininque, avirompate.” Ininquetarite Aapani Irioshi anchoocajiaquequeate cameetsa, teequeate irininteji ancatsimatavacaguempa.

16 Aviatimpaqueate manquigarentsi, tee pintsateji arica pagavejaque pimeshiacaanqueri manquigatimpica, arica aato. Ariquea piquejetacaqueate aviatimpa shirampari, tee pintsateji arica pagavejaque pimeshiacaanquero pimanquigare, arica aato.

17 Querocaguetei picotacani iroaqueraguetei icajemajiaquempiguetei Aapani Irioshi imaicaqueate pantaqueneri iriatimpa, iriotarite nintacaquempica pinquejetaquempaqueate imaica. Aritarite noquejiguiriqueate imaica nocantajiguiriguetei maasano tsaromentajigarica Aapani Irioshi querocaguetei icapioaventajiacari.

18 Ariguetei itotsaiquijiquero pichonquimashi pogujatacotaqueroguetei yamejigaca joriojia tequerataguetei incajemempi Quirishito, ari ootaca aato pipashiventacagaro imaica. Oraqueate teeguetei intotsaiquijitempiji ariqueate onquejetaquempaqueate aisa, ariqueate pincoquempani imaica aatoquea pitotsaiquitacaantatsi.

19 Teenicaqueate iroguenti irishineventempa Aapani Irioshi iramenaquempi itotsaiquitsijitaquempiro pichonquimashi, iroguentica tee intotsaiquijitempiji, manaqueate ishineventamajacaroqueate pinetsanapinitaqueroguetei icantaguetaqueca iriatimpa.

20 Irootaquequeate nocantantacaca querocaqueate picojiacani iroaqueraguetei icajemajiaquempiguetei Aapani Irioshi, aritaque picotaca.

21 Ariguetei yashintajitaquempi icajemajiaquempiguetei Aapani Irioshi, aatoquea pishoshomentarotsi queroca pincojiaquempani pinchoocatashijiaquempaguetei intati, cotanquitsiqueate ariguetei irovashiantajitajempi cameetsavaetaquequeate irovashiantajitajempiqueate.

22 Maasantarite yashintajitaca icajemajiaqueriguetei Amajirote, quejecaqueate manaca ichoocatacajairiqueate intati, teetari irashintajempariji ampatsini. Irirajiaqueate teeca irashintajitempariji icajemajiaqueriguetei Quirishito, iriguentiquea ashintajari Quirishito imaica.

23 Oquejetaca yamanantaquempi iriatimpa, imetojaventajiaquempitarite cameetsanijite irashintimentajiaquempinijite Aapani Irioshi. Imaicaquea imaica, aatoquea pishinetiri irashintajajempi caquinte.

24 Irootaquequeate nocantantajiaquempica, napiguemisantarijiateni, queroquea picojiacani iroaqueraguetei icajemajiaquempiguetei Aapani Irioshi, ariquea picoca pintsipamajiaquempariguetei iriatimpa, ariqueate irio tsipamajiaquempine.

25 Imaica irooquea nonquenquetsatacojiaque tequeratatirajaca omanquigajiguempaji, cotanquitsiqueate teequea iriguenti cantenane Amajirote nonquenquetsatacojiaquero, inchiquiojiqueate naatimpa nonquenquetsatacojiaquero, namenaquequea incavintsajaquena Amajirote yagavejacaquena nonquemisantamajataqueri.

²⁶ Imaicaquea chooca atsipetagantsi, irootaquequea namenantacaca naatimpa oca: querocaca picocani imaica, aritaque pincoquempa.

²⁷ Choocaguete pimanquigare, aato pinintitsi povashiantero. Oraqueate teeguete onchoocateji, aatoqueate pinintitsi pimanquigatempa.

²⁸ Cotanquitsiqueate pimanquigatempaguete cameetsataquequeate, aatoquea icatsimatimentimpirotsi Aapani Irioshi. Ariquea oquejetacaqueate manquigarentsi iroatimpa omanquigaquempaguete cameetsataquequeate aisa. Cotanquitsiqueate quericaca manquigatanquitsineca irantsipetaquemparoqueate taaca opajitapae yatsipejigaca caquinte. Nonintavecaqueate aatosacona patsipemajajiga, irootaquequeate nocantantajiaquempica imaica.

²⁹ Imaicaqueate imaica, napiguemisantarijiate, manaqueate nocantajiaquempi namenaque aatoquea osamanititsi agavejajigui antajiaqueneri Amajirote. Irootaquequeate noncantantajiaquempica imaica irirajia manquigajiatsica aatoqueate iroguentiqueate iquenquejajiguitsi imanquigarejia, manaqueate inquenquejamajiaquequeate quero incojiaquempiani irisavicaventajiaqueronijite maasano ininqueca Amajirote.

³⁰ Ariqueate inquejejiaquempaquate irirajia shimampojancajianquitsica irisavicaventajiaqueroqueate ininqueca Amajirote quejecaqueate teeca irishimampojancajempa. Ariqueate inquejejiaquempaquate aisa shinejianquitsica. Iriojiaqueate quericaca ashintajianquitsica taaca opajitapae aatoqueate iroguenti ishineventatsi, quejetacatari tee irashintajiguemparoji, aatotarite icoguitani yashintajigaro.

³¹ Ariqueate inquejejiaquempaquate aisa shineventajigaroca cameetsaguetatsica choocaguetatsica quepatsiqui, aatoqueate iroguenti ishineventamajajigatsi, aatonicate ocoguitani ochocotitsi.

³² Teequeate noninteji pinquenquejajiaquero taaca opajitapae pishoshoventajiaquempaca. Iriraqueate teeca irimanquigatempaji iragavejaquequeate inquenquejaque quero incoquempiani irisavicaventaqueronijite ininqueca Amajirote.

³³ Cotanquitsiqueate iriraqueate choocatanquitsica imanquigare iquenquejaqueroqueate aisa choocaguetatsica quepatsiqui, iquenquejaquetarite quero incoquempiani oshinevaetantanaquempaca imanquigare.

³⁴ Ariqueate oquejetacaqueate aisa manquigarentsi choocatanquitsica omanquigare, teequeate onquejetemparoji teeca omanquigatempaji. Oraqueate teeca omanquigatempaji agavejaque onquenquejaque quero oncoquempiani osavicaventaqueronijite ininqueca Amajirote, oncomajamajaquempianiji otsinoqui aisa oshirequi. Cotanquitsiqueate oraqueate manquigatatsica oquenquejaqueroqueate aisa choocaguetatsica quepatsiqui, oquenquejaquetarite quero oncoquempiani irishinevaetantanaquempaca manquigataroca.

³⁵ Oraqueate nocantajiaquempiguete imaica teequea ariqueate noncantimentajiguempiroji pimanquigajiaquempaguete, aparoqueate nocantajiaquempiqueate caaviji anaantaque ocameetsataque pinchoocajiaqueguete intati aatonijite taaca piquenquejajiguitsi otsipa, iroguentiqueate pisavicaventajiaquequea inintaguetica Amajirote pincomajamajiaquempaquae pinchoocajiaquequea cameetsa.

³⁶ Choocaguete cashianquitsica iroaqueraguete ininque irimanquigataquemparo manquigarentsi coajica, iramenavaqueroguete oquenquevarotanaque ariqueea inintanaque irimanquigaquemparo, cameetsaquea irimanquigataquemparo, teequea incantimentanteroji Aapani Irioshi.

³⁷ Cotanquitsiqueate choocaguete itsipa cashiavetanquitsica manaqueate iramenaquero cameetsataque aatoguete imanquigataro manquigarentsi, aisa aatoguete ochocoti taaca opajitapae onquenantaquempaca irimanquigatantaquemparo, cameetsataquequeate aatoqueate imanquigataro.

³⁸ Irootaquequeate noncantantajiaquem-pica imaica quericaca manquigataquem-paroneca manquigarentsi icashiacaca cameetsavaetaquequeate, cotanquitsiqueate iriraqueate aatogueti imanquigata caavijiqueate ocameetsataque.

³⁹ Oraqueate manquigarentsi manquigatanquitsica teequeate oncameetsateji ovashianquerigueti manquigataroca, cotanquitsiqueate arigueti irimetojanaje cameetsataquequeate omanquigatajempa itsipa quericaca onintaqueca iroatimpa, cotanquitsiqueate iriguentiqueate omanquigaquempa tsaroveritarica Amajirote.

⁴⁰ Cotanquitsiqueate naatimpa namenaque caavijiqueate oshinemajataquempaquee aatogueti omanquigatajatsi itsipa, aisa namenaquequeea iriguentiquea cantaqueena Ishire Aapani Irioshi.

8

Iteshi viratsipae yojocajiquenerica irioshivijitashijiguetaca

¹ Imaicaqueate imaica irioqueate nonquenquetsatacotaque iteshi viratsipae imetojajitaqueca yojocajiquenerica irioshivijitashijiguetaca. Arimajaguitatsi atsajiavetacaqueate cameetsataque irishecajitaquemparigueti irira iteshipae, cotanquitsiqueate quericaca amenanquitsineca itsamajaquequeate manaqueate iraventacotanaquempaqueeate. Cotanquitsiqueate oraqueate arimajagueti ancoquempani ampintsajiaquemparigueti apiguemisantarite, manaqueate antamp-ishitavacaajiaquempaqueeate cameetsanijite anquemisantamajajianaquerinijite Aapani Irioshi.

² Quericaqueate jivetanquitsica itsaque, teequeate intsamajateji.

³ Cotanquitsiqueate ampintsajiaquemparigueti Aapani Irioshi, itsamajajiacajiquea iriatimpa.

⁴ Imaicaqueate nonquenquetsatacotaqueriqueate iteshi viratsipae imetojajitaqueca yojocajiquenerica irioshivijitashijiguetaca. Aatimpajia atsajiaquequeate maasano irioshivijitashijiguetaca intati teequeate queroca iragavejaquequeate, apaniroquea icoca Aapani Irioshimajaca ichoocaquequeate yagavejamajaquequeate.

⁵ Ichocavetacaqueate ontaniqui jenoqui inquitequi jeroqueate aisa quepatsiqui oshequini itsaroveritajiguevetacaca, jerijiaqueate imajirontajiguevetacaca,

⁶ cotanquitsiquea aatimpajia atsajiaquequeate teequeate inchoocateji itsipa Irioshimajaca, apaniroquea icoca Aapani Irioshi ichoocataquequeate. Iriguentitarite choocatacaquero maasano choocaguetatsica, aisa aatimpajia iroguentiqueate achoocatashijiaque asavicaventajiaqueroqueate maasano inintaguequeca. Aisa choocaqueate apaniromajaca Amajirote, irioquea Jesoquirishito. Iriguentitarite peacaaguetacaroca maasano choocaguetatsica, aisa iriguentiqueate anijacaajiacajica aatimpajia.

⁷ Cotanquitsiqueate choocaqueate tsaroveritajigarica Aapani Irioshi teeca intsamajateroji oca nocamantaquempica. Iconoagarancaqueate irirajia ameji-avetatsica ishineventajiavetariqueate irioshivijitashijiguetaca, igantagatirajaqueate itsaroacagari irishecajiaquemparigueti iteshi yojocajiquenerica irioshivijitashirentsi, yamenajiaquequeate irishecajiaquemparigueti manaqueate irantajiaquequeate teeca oncameetsateji quejecaqueate manaca ishineventajiacariqueate irioshivijitashijiguetaca.

⁸ Iriraqueate Aapani Irioshi aatoqueate iroguenti ishineventajiajiqueate ashecajiaquemparigueti, aatonicate ishineventamajajigaritsi shecagigarica, aisaqueea aatoqueate icatsimatimentajiguiritsi teeca irishecajiguempariji.

⁹ Cotanquitsiqueate oraquea pincantajiaquegueti cameetsataque irishecajitaquemparigueti iteshi yojocajiquenerica irioshivijirentsi inchiquiojitsitaja piquempevaeta-caajigaritsija papiguemisantarite tequeratatirajaca intsaajiguetaji.

¹⁰ Pamenejate arigueti iramenaquempigueti papiguemisanterite tequerasanotirajaca intsateji shecaquempiqueate tsovironaquiqui itsaromentantajitarica irioshivijirentsi, ariqueate arica irinintaquequeate inquejetaquempaquate iriatimpa, yame-naquempitarite aviguenti irapiguemisanterite.

¹¹ Arigueti inquejetaquempa imaica aviguenti quejetacaantaqueri, aviguentitarite iramenacotaquequeate pinquejetaquerogueti imaica, ariqueate irovashiantanaqueroqueate iquemisantavetacagueti. Aviguentiquea quejetacaantaqueriquea papiguemisanterite imetojavenaqueteca Quirishito.

¹² Oraqueate pinquejetaquempagueti imaica pinquempevaetacaquemparigueti papiguemisanterite tequeratatirajaca intsateji, iriraqueate Quirishito iramenaquem-piqueate mana pantaque teeca oncameetsateji, iriatimpaqueate teenica irininteji an-quempevaetacaguempari apiguemisanterite.

¹³ Irootaquequeate nonquejetantanaquempaca naatimpa namenaquegueti manaqueate nonquempevaetacaquempari napiguemisanterite noshecatemparigueti iteshi, aatoja noshecatajaritsi aatonijite noquempevaetacagaritsi.

9

Quero icocani Paavoro isavicaventirogueti ininqueca Aapani Irioshi

¹ Naatimpaqueate naroguenti itigarancane Amajirote Jesoshi, namenaqueritari, aisa iriguentitarite tigarancaquena notsavetantimojiaquempiqueate pitsaromentantajanacarica. Nagavejaquequeate nantaque taaca opajita teeca incantimentenaroji iriatimpa.

² Arigueti choocagueti itsipa teeca irinintajigueti incantajiaquena itigarancane Quirishito, cotanquitsiqueate aviatimpajia pitsamajiaque iriguentiqueate tigarancaquena, naroguentitarite quenquetsatacaajiaquempi pitsaromentantajiacarica. Aviguentijia imaica iramenajiaque intsatantajitaquempa naroguenti itigarancane Amajirote.

³ Jero imaica noncantajiaquerica irirajia tsojencaguevetaquenaca, noncantajiaque-riquea:

⁴ Cameetsavetacaqueate irojocajitaquena intati nosheca jeroqueate nomire que-rocagueti oraniqui nonchoocaqueni nontsavetantimoquerigueti.

⁵ Aisa cameetsavetacaqueate nomanquigataquempa manquigarentsi quemisanta-majataquerica Quirishito nontsipatanaquemparonijite nonquejejaquempariqueate itsipapae itigarancanejia Amajirote, jerijia iriguentijeguijiate, jerijia aisa Sepashi,* cotanquitsiquea teequea nonquejetero imaica.

⁶ Iriatimpajia teequea irishiacojigueti irisavicaventajiaqueronijite intsavetacota-queri Quirishito, ¿arimpate pamenajiaque apaniro naatimpa nontsipataquempari Ver-enave nantsipeventajiaquemparo novegarajiaqueronijite nosheca?

⁷ Nonquejetacaguempiro: Iriaquea coareta ¿arimpate irovegarataque inchiquiojitsita iriatimpa isheca? Ariqueate iquejetaca sevaguetiroca ova ¿arimpaqueate isevatashitac-aro intati teequea irishecatavaquemparo? Ariqueate iquejetaca quempoguijirica oveja iriatimpa ¿arimpaqueate incantimentajiqueriqueate irimiraquerogueti itsomija?

⁸ Imaica aatoja pijijiguitsi mana noquenquetsatacoguetaque intati itsatacaantica caquinguetatsica. Irosatiquea iquejetantacaroca Aapani Irioshi itioncacaquerigueti Moishishini coramani.

⁹ Ocanquetari itioncanaqueca Moishishini: “Aatoquea pisavotsovativitsija caapiron-caari pisagorejacaantaquemparigueti tirigoqui.” Oraqueate ocanquegueti imaica, ¿arimpate apaniro iriguenti icavintsajaque Aapani Irioshi caapironcaaripae?

* **9:5 Sepashi.** Irootaque otsipa ivajiro Shimo Peerero.

¹⁰ ¿Teempaquee aroguentijia oshiacaantaca? Jeeje, aroguentijia itionquimentajia-
quero, irooriji iriraqueate quitencavatsatashitiroca tirigo† inquitataqueroniji itsaque-
queate irojocajitajeneriqueate coajica onchoocatanaquegueti. Ariqueate iquejetaca
isagorejajaitica itsaquequeate irojocagarantajiqueneriqueate.

¹¹ Imaica naatimpajia notsatacaajiaquempirogueti Icanqueca Aapani Irioshi que-
jecaqueate manaca noquitaguijiaqueroqueate Icanqueca pishirequi. ¿Imaicaquea
aatompa pagavejajigui pojocagarantajiaquena nosheca, noitsaare, taaca opajitapae?
¿Pamenajiaquerompa tee oncameetsateji? Cameetsavetacaqueate, oquejetacatarí yojoca-
garantajitinirigueti quitaguijiatsica.

¹² Aritarite pojocagarantajiaqueneriqueate itsipapae tsatacaajiguimpica, naatimpa-
jiaqueate caavijiqueate pojocagarantajiaquenamequeate. Cotanquitsiqueate naatim-
pajia teequeate noncantimajiguempiji pojocagarantajiaquena taaca opajitapae, man-
aqueate natsipetacaqueate aatoniji querica cantanquitsine mana notsavetanqueri
Quirishito irovegarajiquenanijite, iroompa arica aato ininti iquemisantiro Quenquet-
satsarentsi Oganejencatatsica tsavetacotaquerica.

¹³ Aviatimpajia pitsajiguitarite maasanoqueate amitacotantajiaatsica teemproqui
itsaromentajitarigueti Aapani Irioshi ishecagarantajiacaroqueate maasano yamapini-
jiguequeca irojocajitaqueneri Aapani Irioshi. Irirajiaqueate savicaventajiguica ita-
jiaqueneriqueate iteshi viratsipae yojocajiquenerica Aapani Irioshi aretarequi yaa-
garantajiaqueate ishecajiacariqueate, iriguentitarite cantanquitsi Aapani Irioshi.

¹⁴ Ariqueate oquejetacaqueate imaica iriguenti cantanquitsi Amajirote maasano
tsavetantajiguiroca Quenquetsatsarentsi Oganejencatatsica cameetsataquequeate iro-
jocajitaqueneriqueate taaca opajita coguitejimotacarica, iriguentiqueate jocajiaque-
nerine irirajia itsavetantimojiaqueca.

¹⁵ Cotanquitsiqueate naatimpa teequeate noncantajiguempiji pojocajiaquena taaca
opajita coguitejimojiaquenaca, aisa imaica teequeate irooqueate nontionquimenta-
jiguempiji noncantajiaquempi pojocajiaquena. Arimpate ometojanaquenagueti no-
tase ometojenataquea, caavijiqueate anaquequeate noshinemajacagueti notsavetan-
tigueti intati aatoqueate taaca opajita namanimpitsi.

¹⁶ Naatimpaqueate notsavetantirogueti Quenquetsatsarentsi Oganejencatatsica tee-
queate nosemetimateji, iriguentitarite cantaquena Aapani Irioshi nontsavetantaquero-
quea. Oraqueate aatogueti notsavetantiro jooshiatsi!

¹⁷ Oraquea inchiqiojitsimequea noninque naatimpa nontsavetantaquero ariqueate
noncantaquemeequea irovegarajiquenaquea, cotanquitsiqueate teequea onquejetem-
paji imaica, iriguentitarite nintacaquena Aapani Irioshi nontsavetantaquero.

¹⁸ Arisacanicate imaica ¿taaquee shinetacaquenane? Teequea noninteji
irovegarajiquena nontsavetanterogueti Quenquetsatsarentsi Oganejencatatsica, mana
noshinevaetacaqueate nagavejaque nontsavetantero intati.

¹⁹ Cotanquitsiqueate imaica teequea inchoocateji ashinquenaneca, aatoqueate
querica cantana taaqueate nosavicaventaque. Inchiqiojitsitaquea naatimpa no-
quejetacaacaquea naroguentinica irajaanirejia maasano, natsipeventajiacariqueate
maasano nonintamajataque nonquemisantacaajiaqueri intsaromentajiaquemparin-
ijite Quirishito.

²⁰ Oraqueate notsipajiacarigueti nogonorojia joriojia noquejemajajiacariqueate iri-
atimpajia cameetsanijite nonquemisantacaimentajiaquerinijite. Teenicaqueate nogu-
ijatacovetajemparoji naatimpa itioncanaqueca Moishishini, cotanquitsiqueate noque-
jejiacariqueate iriatimpajia, noninquetarite nonquemisantacaajiaqueri.

²¹ Oraqueate notsipajiacarigueti teeca iroguijatacojigueroji itioncanaqueca
Moishishini, ariquea noquejejiacari iriatimpajia cameetsanijite nonquemisanta-

† 9:10 *quitencavatsatashitiroca tirigo*. Pamenero ivaantorite Irocashiqui 9.62.

caajiaqueri iriatimpajia aisa, cotanquitsiqueate nocancaniquea nonetsanamajatiro inintaguetica Aapani Irioshi, noquemisantaqueritarite Quirishito.

²² Oraqueate notsipajigarigueti quemisantajiguirica Quirishito tequeratati-
raja intsamajajigueji, noquejejianacariqueate iriatimpajia cameetsanijite
nontampishitacajiaqueriniji arimpanijite inquemisantamajajianaqueriniji.
Arimajatari noquejetaqueroqueate imaica quericaca notsipajiacaca manaqueate
noquejejiacari iriatimpa cameetsanijite nonquemisantagarantacaajiaquerinijite
irimeshijiaquerinijite Aapani Irioshi.

²³ Nosavicaventaquerotarite Quenquetsatsarentsi Oganejencatatsica, irootaque-
queate noquejetantacaroca imaica aisa nonintaquetarite nontsipajiaquempariqueate
maasano icavintsajajiguica Aapani Irioshi.

²⁴ Aviatimpajia pitsajiguirotarite oraqueate ishiashiavijijigagueti iramenajiaque
quericaca anaantanquitsineca, maasanoqueate ishiashianaca, cotanquitsiqueate
coajica teequeate maasano iramatsaejiteriji, apaniroquea yamatsaejitaqueri iriraque-
ate anaantamajatanquitsica. Imaica aviatimpajia pinquejejiaquempari iriraqueate
anaantamajatanquitsica pintampishitashijiaqueroqueate taaca opajitapae inintacaja-
iaquempica Aapani Irioshi cameetsanijite irishineventaquempinijite.

²⁵ Maasanotarite nintajiatsica iranaantajigue irishiashiavijijiaquegueti icomajama-
jajiaqueate cameetsanijite iragavejimentajiaquenijite iranaantajiaqueniji. Iriatim-
pajia manaqueate inintajiaque iranaantajiaque cameetsanijite iramatsaetimentajita-
querinijite amatsaerontsi teeca onquishoteji teroncanajatsineca. Cotanquitsiqueate
aatimpajia iroguentiqueate ancomajatashijiaquempaquate cameetsanijite irishin-
eventajiacaji Aapani Irioshi irojocajiacajiro amatsaerontsimajaca caarica teroncasi.

²⁶ Irootaquequeate naatimpa noquejetantacarica shianquitsica teeca irishiashiav-
ijitashitempaji intati. Aisa noquejetacariquea capojantatsica teeca incapojaguiteteji
intati.

²⁷ Oraqueate onintacaaguevetaquenaca notsino teequea nonquemisantavaquero,
naroquea cantavaquero quero oncoquempani. Manaquea nocomajamajatanaca intati.
Namenquetari naatimpa notsatacajiaqueriqueate itsipa intsaroventajiaquempari
Aapani Irioshi, teequeate noninteji incanquena iriatimpa coajica: "Tee noshineventem-
piji."

10

Icantajiaqueri aatoquea itsaroventajigaritsi irioshivijitashijigueta intati

¹ Imaica, napiguemisantarijiate, nonintaque nonquenquejacaajiajempiro
quero ocotacani paesatoniqui ichoocajiaquegueti novaesatinijiateni ontaniqui
oquitamampororoipojaquegueti. Maasanoqueate omarrarotacojiaqueriqueate
mararo, aisa maasanoqueate yagategateitanaquero Quentijani Quityoncajaro
ocaranarejajatanaquequea niganquija opijoncaguitetanaquequea.

² Ontaniqui mararoqui aisa quentijaniqui quejecaqueate manaca
iviñacajajitaqueriqueate iroonijite intsatantajitaquemparooca iriguenti iroguijatacojigue
Moishishini.

³ Ariqueate oquejetaca aisa maasano ishecajiacaroqueate manaa yojocajiaquenerica
Aapani Irioshi.

⁴ Aisa maasanoquea imirajiacaroqueate oja yojocajiaquenerica Aapani Irioshi imoto-
jataqueneriquea mapiqui. Oraqueate mapi iriguenti quejecaro Quirishito tsipajiacar-
ica ontaniqui oquitamampororoipojaquegueti.

⁵ Maasanoquea yamenajiavecaroquea maasano oatica, cotanquitsiqueate iriraquea
Aapani Irioshi tee irishineventajiguempariji oshequini yamenajiaquerigueti teequeate

inquemisantamajajigueriji, irootaquequeate imetojantajianacaquea ontaniqui oquita-mampororoipojaquegueti.

⁶ Ariqueate oquejetacaquea imaica cameetsanijite amenajiaquero aatimpajia aatonijite aquempejigaritsi iriatimpajia anintajiaque antajiaque teeca irininteroji Aapani Irioshi antajiaque.

⁷ Irootaquequeate nocantantajiaquempica aviatimpajia imaica aatoquea pitsaromentajigaritsi irioshivijitashijiguetaca intati pinquejejiacquempariqueate iriatimpajia, iconoagarantajiacatarite itsaromentajiacari. Ariqueate ocantaquequeate Itioncacaantaqueca Aapani Irioshi ocanti: “Iriatimpajia isavicaventajiaqueroqueate ishecajiaca aisa imirajiaca, ariqueate iteroncajianaqueroqueti icatintiitanaca itontoroncaventajiaqueri irioshivijitashitaca itsaromentajiacariqueate.”

⁸ Aisa aatoquea oashitantajigui aquempejigaritsi iriatimpajia yoashitantajiguigueti ariqueate imetojajiaquequeate aparo savincaguiteri 23,000.

⁹ Ariqueate oquejetaca aisa aatoqueate amenantajigaritsi Amajirote. Aatoquea aquejejiari iriatimpajia iconoagarantajiacaqueate yamentajiacari irosatiquea itigarancantajiacanarica camaarini yatsicajiaqueriquea, ariqueate imetojajianaque.

¹⁰ Jeroqueate aisa aatoqueate atsojenquitiritsi Aapani Irioshi irioca itsipa, aquejejiaritsi iriatimpajia iconoagarantajiacaqueate itsojenquitsijiaqueri, ipincajiaquero yojocajiaquenerica icantajiaquero tee oncameetsateji, ariqueate itigarancajiaqueneriqueate irashivantite imetojajiaqueri.

¹¹ Ariqueate iquejejiacquériqueate Aapani Irioshi imaica anquenquejajiaqueronijite, ariqueate itioncacojiqueroqueate antsajiaquenijite aatimpajia choocajiaatsica imaica pajinigueti aapojempa savincaguiteri pae vegaratapajaatsineca. Ininquetarite Aapani Irioshi antsajiaquero aatoniji aquejejiaritsi iriatimpajia.

¹² Pamenavequempagueti pagavejaque pitampishitashiquero quempevaerentsi, jshoshoh! Pagamajamajaquemparoja aatoniji piquempevaeta.

¹³ Taacaqueate opajita coraquetashijiaquempica teequeate apaniro oncoraque-tashijiguempi aviatimpajia, ocoraquetashijiguiriquea aisa maasano caquintejiatsica. Cotanquitsiqueate Aapani Irioshi icoguitanitari inetsanatiro icantica, paventajiaquemparigueti aatoquea yoguishinejiro oncoraque-tashijiaquempime agavejajianaquem-pimeca, manaqueate intsatacajiaquempiqueate quero pincojiaquempani aatonijite agavejajiguimpi taaca opajitapae coraquetashijiaquempica.

¹⁴ Irootaquetari nocantantajiaquempica imaica, nopintsamajajiaca, aatoqueate pitsaromentajigaritsi irioshivijitashijiaca intati.

¹⁵ Manaquea noquenquetsatacajiaquempiquea imaica notsaquetari pinquemaji-avaquena, aisa pitsajiaque pincantajiaque arica nocantamajataque arica tee.

¹⁶ Oraqueate atsipatavacaajiacagueti aquenquetsatacajiaqueriqueate Aapani Irioshi ashineventajiacaro amire cantacotaqueroca iriraja Quirishito osotoajatanaque-gueti imetojaventajiacajigueti. Oraqueate aquejejiacagueti imaica manaqueate iramenajitaquero atsipatavacaajiaa aquenquejajiaqueroquea iriraja shetaqueroca aguempevaerejia. Ariqueate oquejetaca aisa ashecajigarogueti pan quejecaroca itsino manaquea iramenajitaqueroquea atsipatavacaajiaa aquenquejajiaquero yompajacojitaquerigueti.

¹⁷ Oshequi acarajavecaquea aatimpajia tsaromentajigarica Quirishito, cotanquit-siqueate maasanoqueate atsipatavacaajiacaqueate ashecajiacarogueti ocatica pan, aparotarite ocanca. Irootaquequeate maasano aatimpajia ashecajigarogueti atsi-patavacaamajajiacaqueate quejecaqueate apaniroca achoocajiaque.

¹⁸ Pinquenquejajiguerijate ichoviquijiani Ishiraerini queroqueate icojigani. Iri-raqueate shecajigarica iteshi viratsipae yojocajiquenerica Aapani Irioshi aretarequi itsipamajatariqueate Aapani Irioshi.

¹⁹ Cotanquitsiquea iriraqueate irioshivijitashijiguetaca intati teequeate noncanteji arimaja irioshivaequempate, aisa teequeate noncantempi iriraqueate viratsipae yojocajiguetinirica icantashitatiaca, manaqueate iquejetacariquea itsipapae iteshi.

²⁰ Manaqueate nocanque irirajiaqueate jocajiguinirica iteshi irioshivijitashijiaca iriguentiquea yojocaquene ampatsinipae, teequeate iriguenti irojoquene Aapani Irioshi. Naatimpaquea teequea nonintimateji pintsipajiaquempari ampatsinipae.

²¹ Oraqueate pimirajigarogueti vinoja quejetacaroca iriraja Amajirote, aato pagaveji pimiraventajigari aisa ampatsinipae pishineventajiaquempari. Ariqueate oquejeta- caqueate aisa pitsipatavacaajigagueti pishecaventajigarigueti Amajirote piquenqueja- jiaquerigueti imetojaventajiacajigueti, aatoqueate pagavejimajiguetsi pishecaventaji- gari aisa ampatsinipae.

²² ¿Arimpa anintajiaque incatsimajiacaji Amajirote ashineventajiaquemparigueti irioshivijitashijitaca intati? ¿Arimpate atampishimajati anajaiqueri Amajirote?

²³ Arimajaqueate chooca taaca opajitapae teeca incantimenteroji Amajirote, cotanquitsiqueate querocaca anejajiaqueca manaqueate ovashiantacajaianacajiro atsaroventamajajigarigueti Amajirote, teequeate oncameetsateji antajiaquerogueti. Teequeate incantimentajivetajiroqueate, cotanquitsiqueate querocaca anejajiaqueca arigueti aato otampishitacajaiguiritsi apiguemisantarijiate ni inquemisantamaja- jianaqueniji, arisacanicate aatoqueate antajiguirotsi.

²⁴ Aatoqueate aparo aquenquejatsi aatimpa, anquenquejajiaqueriqueate apiguemisantarijiate aisa.

²⁵ Cameetsataquequeate pishecajiaquempariqueate iteshipae yojocajiqueca on- taniqui yovegaratapinijitigueti iteshi, aatoqueate picoacojiguiritsi queroqueate yaaji- taquerini aatonijite piquenquejajiguirotsi aricaqueate cameetsataque pishecajiaquem- parigueti arica tee.

²⁶ Maasanotarite quepatsi jeroqueate aisa maasano choocaguetatsica iriguentiquea ashintaro Amajirote.

²⁷ Arigueti incajemajiaquempi teeca intsaroventempariji Quirishito irishecaque- mpagueti pincavintsajajiaqueriqueate aviatimpajia poajianaque, cotanquitsiqueate pishecajiaquemparoquea taaca opajita yojocajiaquempica. Aatoqueate picoacojiguir- itsi iteshi aricaca yojocajivetacanari irioshivijitashijiguetaca intati aatonijite piquen- quejajajirotsi aricaca cameetsataque pishecajiaquemparigueti aricaca tee.

²⁸⁻²⁹ Cotanquitsiqueate oraqueate choocaguetsi cantajiaquempineca incanquegueti: “Iricatica irica iteshi yojocajivetacanarica irioshivijitashiguetaca intati”, ariquiteate aatoqueate pishecajigaritsi, manaqueate pinquenquejajiaqueriqueate irira camanta- jiaquempica. Iriatimpaquea yamenaquetarite arica tee oncameetsateji irishecaque- mparigueti irootaquequeate icantantacaca imaica. Iroosacanicate arigueti yame- naque iriatimpa tee oncameetsateji irishecaquemparigueti, aatoqueate pishecataritsi. Pishecajiavequemparigueti aatoqueate queroca icojiguimpitsi pishecajiaquempica, cotanquitsiqueate irioqueate pinquenquejajiaque irira camantajiaquempica aatonijite piquempevaetacaimajigaritsi.

Cotanquitsiquea arica chooca cantanquitsineca: “¿Querocaca ocotacani tee oncameet- sateji noshecataquempari iteshi yamenaqueca itsipa arica teeca oncameetsateji, teeni- caqueate incantimenteroji Aapani Irioshi?”

³⁰ Nocancaniquea noshecatariguetsi iteshi noshineventariqueate Aapani Irioshi not- saquequea iriguenti jocaquenari. ¿Querocampaquea oncoquempa incantajiaquena tee oncameetsateji noshecataquempariguetsi?”

³¹ Imaicaqueate imaica noncantajiaquempiqueate quero ocotacani. Maasanoqueate taaca opajita pantajiaque pamenacajiaqueriqueate maasano arimaja yagavejamajati

Aapani Irioshi, iroogueti pishecajiacagueti, iroguentigueti pimirajiacagueti, aisa taaca opajitapae pantajiguica.

³² Aatoqueate aquempevaetacaajigaritsi apiguemisanterite. Aisa aatoqueate antajiguitsi taaca opajitapae iramenajiacajigueti teeca intsarotentajiguempariji Quirishito ariqueate aato inintajiguitsi intsarotentajiguempari iriatimpajia aisa, iriguenticaqueate joriojia, iriguenticaqueate teeca irijorijoigueji.

³³ Ariqueate noquejetacaquea naatimpa manaquea nonintaque noshinetacaajiaquempariquea maasano, teequeate narosati quenquejaatsine, iriguentiqueate noquenquejajiaque itsipa queroquea noncojiaqueri cameetsanijite irimeshiimentajiaquerinijite Quirishito.

11

¹ Noninquequeate poguijatacojiaquenaqueate pinquejejaquena naatimpa noguijat-acotirigueti Quirishito.

Quero oncoquempani manquigarentsi amanaquerigueti Aapani Irioshi icapioacajiacagueti

² Noshineventajiaquempiqueate namenaquegueti picancaniquea piquenquejajiaquena, aisa picancani piquenquejajiaquero notsatacajiaquempica pinetsanajianaqueroqueate.

³ Cotanquitsiquea jeroquea oatica noninque pintsajiaque: iriraquea shirampari irio cantaquerine Quirishito quero incoquempani, oraqueate manquigarentsi irioquea cantaquerone manquigataroca, ariqueate iquejetacaquea Quirishito iriatimpa irioquea cantaquerine Aapani Irioshi.

⁴ Irootaquequeate iriraquea shirampari iramanaquerigueti Aapani Irioshi ontaniqui icapioacajiaqueti aisa intsavetanterogueti Icanqueca Aapani Irioshi, teequea irametemparoji intatainatempa. Oraqueate intatainataquempagueti quejecaqueate iriguentica iquemisanti irapicaquinteteni, teequea iriguentiquea inquemisantamajateji Quirishito.

⁵ Cotanquitsiqueate oraqueate manquigarentsi iroguentiquea ametaro ontatainataquempa amanaquerigueti Aapani Irioshi picapioacajiaqueti irosati ontsavetanterogueti icanqueroca. Oraqueate aatogueti otatainatatsi manaqueate quejetaca teeca onquemisanteriji manquigataroca aisa quejetacaquea manaca yojocaguinajiqueroqueate.

⁶ Oraqueate aatogueti onintitsi ontatainataquempa iintsija ojocaguinataquempaquea. Cotanquitsiqueate teequea ametemparoji manquigarentsi onquejetaquempari shirampari, ompashivenquempatari ojocaguinatacaanquempagueti irooca aama-jaqueroqueti omae, irootaquequea nocantantacaca iintsija ontatainataquempa.

⁷ Cotanquitsiqueate irira shirampari aatoqueate itatainatatsi, aritarite iquejevecariqueate Aapani Irioshi, aisa irootaquequeate iramenantajiquemparoca arimaja yagavejamajati Aapani Irioshi. Oraqueate manquigarentsi ontatainataquempagueti irootaquequeate iramenantajitaquemparoca yanaantaque shirampari.

⁸ Iriquetitarite ipeacaaca Aapani Irioshi shirampari, ariqueate yaaqueroqueate imerequi ipeacaantacaro manquigarentsi, teequeate iroquetiqueate impeacaguempa manquigarentsi.

⁹ Teequea impeacagueriji shirampari ashi manquigarentsi, iroguentiquea ipeacaacaniquea manquigarentsi irashi shirampari.

¹⁰ Irootaquequeate imaica cameetsataque ontatainataquempa manquigarentsi cameetsanijite iramenajiaqueronijite irashivantijitete Aapani Irioshi arimajaquea oquemisantaqueriqueate manquigataroca.

¹¹ Cotanquitsiquea atsaromentajiacarigueti Amajirote yamenajiacajiquea ariqueate aquejetavacaajiacaquea: teequeate inchoocatashitajempa intati shirampari, ariqueate oquejetacaqueate manquigarentsi teequeate onchoocatashitempa intati.

¹² Iroorijite iroaqueragueti ipeacaacarogueti Aapani Irioshi manquigarentsi iroguentiquea ipeacaantacaro imerequi shirampari, ariqueate iquejejiacaquea shiramparijia iroguentiquea oajiaqueri manquigarentsijia, cotanquitsiqueate iriguenti anijacaajiaqueriqueate Aapani Irioshi peacaaguetacaroca maasano.

¹³ Iintsijate pamenajigueroqueate aviatimpajia: ¿Ari cameetsataque amaneri Aapani Irioshi manquigarentsi aatogueti otatainata?

¹⁴ Aatimpajia teequeate amejiguemparoji irontijavenajaquempaquea shirampari, impashiventacaaquempaquea.

¹⁵ Cotanquitsiqueate oraqueate manquigarentsi irooquee iroguenti cameetsataquequee ontijavenajaquempaqueate. Irootarite oshineventacaqueate iroatimpa, aisa iroguentitarite ochocatashitaque omae onticaacotaqueroqueate aatonijite ejejunatitsi.

¹⁶ Cotanquitsiqueate choocagueti cantanquitsineca teequee ariquea onquejetempaji imaica, nonintaque intsataque naatimpajiaquee irooquee namejigaquee noquejيجا imaica. Ariquea iquejejiacaquea aisa maasano tsaromentajigarica Aapani Irioshi que-rocagueti icapioapinijia.

Paavoro icantomajiaqueri Corintoquitica

¹⁷ Cotanquitsiqueate oraquee noncantajiaquempigueti imaica aatoqueate noshineventajiguimpitsi manaqueate noncantomajiaquempiquea, irosatarite picapioacajaguete tee oncameetsateji pantajiaqueca, teequee pintampishitavacaajiguempa pinquemisantamajajianaqueniji.

¹⁸ Noquemacojiaquempitarite irosati picapioacajiacaguete teequeate pinconoavacaamajajiguempaji. Naatimpa nocantanaque arimajacampate.

¹⁹ Aritarite oquejetantanacaca imaica pitsinampirejavacaantajianacaca irootari yamenantajitacaca queriquea caavijica yanaaque itsaromentamajatari Amajirote.

²⁰ Irootaquequeate picapioacajiavetacaqueate pishecaventajiacariguete Amajirote piquenquejiaqueriguete imetojaventajiacajiguete, teequeate ariquea pinquejetacaa-jiguemparo itsatacajaiacajica iriatimpa, quejevaecaqueate teeca iriguenti pinquenque-jajigue.

²¹ Teetari poguivavacaajiguempaji pintsipatavacajiaaquempa pishecajiaquempaguete. Manaqueate pishecatapitsatavacaajiacaqueate pamajiavetacaca. Iconoagarantajiacaqueate tee inquemajiguempaji, itsipaqueate mana iquenajiaquero intati imirajia irosati ishinquitantajanaca.

²² Aatoquee piquejiguero imaica. Pamenajiavecaquee piquejejiacquerogueti imaica arimequeate pishecajiaquempame pitsovironaquitepaequi. Oraqueate piquejejiacquerogueti imaica mana panaimanajiaqueriquea papiguemisantarijiate, aisa mana poguipashiventajiaqueriquea coguitejacojianquitsica. Imaica ¿queroqueate noncoji-aquempi? ¿Arimpa noshineventajiaquempiqueate? Aatoquee noshineventajiguimpitsi piquejejiacaguete imaica.

Quero ancojiaqueroni ashecaventajiaquempariguete Amajirote anquenquejiaquereguete imetojaventajiacajiguete

²³ Notsatacajaiavequempitarite coramani itsatacaaquenaca Amajirote, nocanti: Iroompa opitsecanaquaguete iracaantantajiquemparica Amajirote Jesoshi irimetojantajiaquemparica, yaaqueroqueate pan yajiricaquero,

²⁴ icantiquea: “Arioteesa, Aapani.” Ariqueate icotarejaquero, icanti: “Paajiavaqueja pishecajiavaquemparo. Iroguenti notsino,* metojaventajiaquempineca. Pinquejepini-
jiaquempa imaica pishecaventajiaquena pinquenquejajiajenaqueate naatimpa.”

²⁵ Ariqueate iteroncanaquerogueti ishecajiacagueti, iquejetaqueroquea chovinty-
oriqui, yaacotaquero, icanti: “Ocatuca choocatanquitsica chovintyoriquiqui ocan-
tacoquero iroaqueraro paaquito† nonetsanataqueca osotoajatanaquegueti noriraja.
Pinquejepinijiaquempa imaica pimirapinijiaquerogueti, pinquenquejajiajenaqueate
naatimpa.”

²⁶ Aritarite pishecatapinijiaquemparogueti ocatuca pan, pimirajiaquerogueti
choocatanquitsica chovintyoriquiqui, ariquea irooquea pintsavetacotantemparoca
imetojane Amajirote arejevaetempa incoraquetantapojajempaca.

²⁷ Irootaquequeate imaica nocantantajiaquempica quericaca shecatashitaquem-
paroneca intati, irooca irimirashitaquemparogueti intati aatogueti iriguenti iquenque-
jitsi Amajirote imetojaventajiacajigueti, inchiquiojitsitaquea inquejetacaanquempa
iriatimpa, icovaeguishequerotarite itsino jero aisa iriraja Amajirote.

²⁸ Irootaquequeate quericaca nintanquitsineca irishecaquemparo pan aisa irimi-
raquero vinoja inquenquejajerigueti Amajirote imetojaventajiacajigueti iroquetiquea
inquenquejamajaquequeate, iroompaqueate arigueti icomajamajaca cameetsataque-
queate irishecaquemparo aisa irimiraquero.

²⁹ Quericaatari shecatashitaquemparoneca intati, aisa irimirashitaquemparogueti
intati, aatogueti iquenquejirotsi iroguenti ocantacotaque itsino Amajirote, inchiquio-
jita inquejetacaantaquempa iriatimpa irishecataquemparogueti aisa irimiraquem-
parogueti, incatsimatimentajiqueriquea.

³⁰ Irootaquequeate pojoquijigarantantajianacaca, itsipaquea teequeate intampishi-
jigueti, itsipaquea mana imetojajiaque.

³¹ Oraqueate iroquetitaquea amenashirentamajajiaquempaqueate acomajajiacaca
ariquea querocampa incatsimatimentantajiacajica Aapani Irioshi.

³² Cotanquitsiqueate oraquea iramenajiacajigueti Aapani Irioshi antajiaquerogueti
teeca oncameetsateji, incantomajajiacajiqueate aatonijite itsipatacaantajiajiriti teeca
intsaromentajiguempariji incatsimatimentajiaquerigueti coajica.

³³ Irootaquequeate imaica, napiguemisantarijiate, nocantantajiaquempica
oraqueate pincapiocajiaquempagueti pishecaventajiaquemparigueti pinquen-
quejajiajerigueti Amajirote imetojaventajiacajigueti poguijavacaajiaquempa
pintsipatavacajiaquempa.

³⁴ Quericaqueate taseanquitsica irishecataanaquempa itsovironaquitequi aatoni-
jite icatimatiro ontaniqui picapiocajiacagueti, aatonijite icatsimatimentiri Aapani
Irioshi. Oraqueate otsipapae picoacojiaquenaca noncamantajiaquempiquea coajica
noanaquegueti nonejajiaquitempigueti.

12

Quero icota Ishire Aapani Irioshi yagavejacaajiacajigueti

¹ Imaica napiguemisantarijiate, noninque noncamantajiaquempi quero icota
Ishire Aapani Irioshi yagavejacaajiacajigueti apaniropae. Noninque pintsamajajia-
quero aatoniji picomijigaro.

* **11:24 Iroguenti notsino.** Pamenero Mt. 26.26-28. † **11:25 Oraquea paaquito** iroguenti icantamajajitirica
itsipa irinetsanamajajitenerica. Ocatucaquea **iroaqueraro paaquito** icantajiacajiquea Aapani Irioshi irisheta-
cotajeri igovaeguisHERE maasano aventaventaquemparineca Meshiantatsica metojaventajiacajica. Ochoocague-
taquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica
ishiraerijia ichooaquegueti Moishishini, otsipa icanquerica Taavini.

² Aviatimpajia pitsajiaquetarite tequeratagueti pintsaromentajiguempariji Quirishito manaquea yamatavijajiaquempiqueate ampatsini pishineventantajiacarica irioshiviji-tashijiguetaca intati teeca inquenquetsajigueji.

³ Irootaquequeate nonintantacaca pintsajiaque teequeate iriguenti quenquejaca-guerine Ishire Aapani Irioshi quericaca cantanquitsineca: “Tee incameetsateji Jesoshi.” Aisaquea aatoqueate querica cantanquitsineca inchiqiojiqueate: “Jesoshi iriguenti Majirontamajatatsica”, aatogueti iriguenti quenquejacaguiri Ishire Aapani Irioshi.

⁴ Icantashitatiacajaiavecajiqueate yagavejacaajiacajigueti apaniropae, cotanquitsiqueate iriguenti agavejacaajiacaji Ishire Aapani Irioshi.

⁵ Aisa acantashitajaiavecaqueate antajiaqueca apaniropae, cotanquitsiqueate apaniroqueate antajiaqueneri Amajirote.

⁶ Teequea anquejetacaamajajavetemparoji querocagueti icojiguiro itsipa yantajigu-igueti, cotanquitsiqueate iriguentiquea agavejacaajiacaji Aapani Irioshi apaniropae.

⁷ Yagavejacaajiacajitarite Ishire Aapani Irioshi apaniropae cameetsanijite amitava-caimentajiaquempanijite arimpanijite anquemisantamajajianaqueri Amajirote.

⁸ Apaniroquea yagavejacaqueriqueate Ishire intsavetanquero itsatacaquerica. It-sipaqueate iroguenti yagavejacaqueri intsatavaquero itsavetantajiquerogueti Ican-queca Aapani Irioshi ariqueate intsatacaantanaquequea iriatimpa.

⁹ Itsipaqueate iroguenti yagavejacaqueri intsamajaque caaviji yagavejamajati Aa-pani Irioshi yaventashirentamajatantacarica. Ariqueate itsipa iroguenti yagavejaca-queri irogueshijiaqueri joquijiguetatsica.

¹⁰ Iconoagarantajiacaca itsipa iroguenti yagavejacaajiaqueri ironigaantajiaquero oa-caantantatsica intati. Itsipaquea iroguenti yagavejacaajiaqueri intsavetanquero ican-querica Aapani Irioshi. Itsipaquea iroguenti yagavejacaqueri intsatavaqueri quen-quetsatatsica iriguentica agavejacaqueri Ishire Aapani Irioshi iriguentica agaveja-caaqueri ampatsinipae. Choocaqueate itsipa iroguenti yagavejacaqueri inquen-quetsatantaguetaquempari otsipapae quenquetsatsarentsipae teeca inquenquetsa-tantajitemparoji, ariqueate itsipa yagavejacaqueriqueate intsaque impitsocavaquero cameetsaniji intsatimentajiaqueronijite maasano queroqueate icanti.

¹¹ Pamenequeate imaica yagavejacaajiavetacajiqueate taaca opajitapae cotanquitsiqueate iriguentiqueate Ishire Aapani Irioshi agavejacaajiacajiquea, apanirotarite icota. Yagavejacaajiacajiqueate apaniropae antajiaque taaca ininqueca iriatimpa an-tajiaque.

¹² Apaniroqueate ochoocavetaca itsino caquinte, cotanquitsiqueate choocagueque-queate iraco, iguiti, iguempita, maasano. Ariqueate aquejejiacaqueate maasano aatimpajia tsaromentajigarica Quirishito oshequijavetacaqueate aisa acantashitati-jaiavetaca, cotanquitsiqueate apaniroquea ichoocataque atsaromentajiacaca quejetaca apaniroquea achoocajiaque.

¹³ Ariqueate oquejetaca aisa apanirotarite icotaca Ishire Aapani Irioshi viñacajatacaajiacajica, ariqueate atsipatavacaajiacaqueate quejeca apaniroca achoocajiaque. Aconoagarantajiavecaqueate aroguentijia joriojia aisa guiriegojia. Ariqueate oquejetaca aisa aconoagarantajiavecaqueate manaquea yaajanijitacaji, aisa aconoagarantajiavecaqueate manaquea achoocajiaque intati, cotanquitsiqueate ichoocashirentajiacajigueti Ishire Aapani Irioshi aquejetavacaajiacaqueate.

¹⁴ Oraquea itsino caquinte teequea manaquea onchoocatashitempaji yamentantaca intati. Choocaqueate aisa yajiricantaca, jero aisa yanijitantaca, jeroqueate aisa ique-mantaca, maasano.

¹⁵ Oraqueate onquenquetsataquemeguete iguiti oncanquemeguete: “Iroorijite imaica tee nonquejetemparoji iraco, teequea irashintenaji”, aatoqueate yovashiantajiro, igan-taqueate irashintempari.

¹⁶ Iroomeguete quenquetsatanquitsineme iguempita oncanquemeguete: “Iroorijite tee nonquejetemparoji iroquija, teequea irashintenaji”, aatoquea yovashiantajiro, igantagaquea irashintemparo.

¹⁷ Iroomeguete choocatanquitsine intati iroquija, ¿taaquea inquemantaquempame? Ariquea oquejetaca aisa iroomeguete choocatanquitsine intati iguempita, ¿taaquea inquemajencatantaquempame?

¹⁸ Cotanquitsiquea Aapani Irioshi inetsanataquero atsino ipeacaacaroguete, irootaquequeate ochoocatantaguetacaca aquemantajiacaca, aisaquea amenantajiacaca, jeroqueate aisa anijitantajiacaca, maasano. Aisa ichoocatacaaguetacajiroqueate querocaguete ininqueca inchoocatacaacajiro.

¹⁹ Oraqueate iroomeguete choocatanquitsine intati amenantaca ¿querocampate onchoocaqueni atsino?

²⁰ Cotanquitsiquea teequea ari onquejetempaji imaica, manaquea ochoocague-taquequeate aisa aguiti, aguempita, aco, maasano. Oquejeguevetacaqueate imaica ochoocaguetaquequeate maasano, cotanquitsiquea apaniroqueate ochoocaque atsino.

²¹ Oraqueate aquija aatoqueate ocantimajiguirotsi aco: “Teequeate nonintempiji.” Ariquea oquejetacaquea aguito iroatimpa aatoquea ocantimatiro aguiti: “Teequeate nonintempiji.”

²² Choocatarite atsinoqui taaca opajitapae teeca ontampishiteji, cotanquitsiqueate anintamajajiaqueroqueate, teequea onchoocatashitempaji intati.

²³ Ariquea oquejetaca aisa teeca anintajigueji iramenajiguequero, caavijiqueate acomajamajajiaqueroquea irootaquequeate aquitsaatantajiacaca aatonijite yamenajiguetirotsi, apashiventacajaiacarotarite.

²⁴⁻²⁵ Cotanquitsiquea oraquea teeca ampashiventacajaiguemparoji teequea anquejigueroji imaica. Ariqueate iquejetacaajiacajiqueate Aapani Irioshi aatimpajia tsarotentajigarica, itsipatacaantajiacaji cameetsanijite ancavintsajajiaqueriniji caarica inintajiveta aatonijite acatsimatavacaajiat si antsinampirejavacajaiaquempaqueate, manaquea anquenquejavacajaiaquempaquea ancavintsajavacaajiaquempa intati.

²⁶ Ariguete yatsipetacaguete apaniro, maasanoqueate atsipejiaca. Oraqueate managuete ishineventajitacaruete itsipa, ariqueate aquejejiacaquea aatimpajia maasano atsipajiacariqueate ashinejiacaquea.

²⁷ Irootaquequeate aviatimpajia imaica pitsarotentajiacaruete Quirishito piconoavacaajiacaqueate quejecaquea apaniroca pichoocataque, piquejejiacarotarite itsino Quirishito.

²⁸ Avegarajiacaquea oshequi tsarotentajigarica Quirishito cotanquitsiqueate Aapani Irioshi inintacajiacajiqueate apaniropae antajiaqueneri. Iriquetiquea yoguijivajiaquequeate itigarancanejia Quirishito intsavetantajiaqueriqueate. Itsipajia inintacajiaque tsavetantajiaqueroica icantajiaquerica. Ariqueate iquejejiaceriquea aisa tsatacaantajiaqueroica Iguenquetsatsare Aapani Irioshi. Ariqueate iconoagarantajiacaqueate itsipa inintacajiaqueri ironigaantajiaquero oacaantantatsica intati. Itsipaqueate manaqueate inintacajiaqueriqueate irogueshijiaqueri joquijiguetatsica, itsipaquea manaquea incavintsajantajiaque, itsipaquea manaquea incantajiaqueriqueate irapiguemisantarite taacaqueate irantajiaque, ariqueate itsipa manaquea inquenquetsatantajiaquemparoqueate otsipapae quenquetsatsarentsipae teeca inquenquetsatantajitempaji.

²⁹ ¿Arimpa maasano iriguentijia itigarancanejia Quirishito? ¿Arimpa maasano iriguentijia tsatacaantajiguiroca Iguenquetsatsare Aapani Irioshi? Ariquea oquejetacaquea aisa ¿arimpa maasano yagavejiaque ironigaantajiaquero oacaantantatsica intati?

³⁰ ¿Arimpa maasano yagavejiaquequeate irogueshijiaqueri joquijiguetatsica? ¿Arimpa maasano iquenquetsatantajiacaro otsipapae quenquetsatsarentsipae teeca

inquenquetsatantajitempaji? Ariquea oquejetacaquea aisa ¿arimpa maasano yagavejajiaquequeate impitsocajivaquero cameetsaniji intsatimentajiaqueronijite maasano queroca icanti quenquetsatantaroca? Teequeate.

³¹ Cotanquitsiquea pinintamajajiaquequeate iragavejacaajiaquempi Aapani Irioshi pantajiaqueneri caavijica anaantaque ontampishitacajiaqueriniji papiguemisan-tarite. Cotanquitsiquea choocaqueate otsipa noninque nontsatacajiaquempi imaica, caavijiqueate oganejencamajataca.

13

Quero icotani pintsatantatsica

¹ Ariguete nonquenquetsatantaguevetaquemparoqueate otsipapae quenquetsatsar-entsipae irooca iguenquetsatsare irashivantijitete Aapani Irioshi, cotanquitsiqueate aatoguete nopintsamajatanta, manaqueate noquenquetsatamampeacaquea intati, que-jecaqueate cavorejamentatatsica iteencajitiroguete opojimatanaquequea teen teen teen, teequea queroca oncanteji.

² Aisa manaca nagavejavetaquempaguete nontsavetantavequemparo icanquenaca Aapani Irioshi, cotanquitsiqueate aatoguete nopintsamajatanta, teequea noncameet-satimateji. Ariqueate oquejetaca aisa ariguete nontsaguevequemparo taaca opaji-tapae teeca intsajivetemparoji, managuete nontsitacaguevequemparo nontsagueve-quemparoqueate maasano, cotanquitsiqueate aatoguete nopintsamajatanta, nontsa-tashiquemparoquea intati. Aisa managuete nontsavetaquemparoqueate yagave-jaque Aapani Irioshi iragavejacaquena nogaaquero otsempi, cotanquitsiqueate aatoguete nopintsamajatanta, manaquea nontsatashiquemparoqueate intati, teequea noncameetsatimateji.

³ Ariqueate oquejetaca aisa ariguete nojocashijiavetaquenempari coacojianquit-sica maasano nashintaguevetaca, aisa ariguete incatsimatimentajiquena nontsaroven-taquempariguete Aapani Irioshi intaimentantajiquenaca, cotanquitsiqueate aatoguete nopintsamajatanta, ¿arimpa irishineventaquenaquea Aapani Irioshi?

⁴ Iriaquea pintsatantamajatatsica yatsiperejacoca intati, aisa caavijiquea icavintsa-janti. Teequea incatsimatimenteriji itsipa yamenaqueriguete yanaaqueri, teequea irisemeteji, aisa teequea iraventacotimatempaji.

⁵ Iriaquea pintsatantamajatatsica ichoocaque cameetsa, manaquea yamenaque-roguete guipashiventajagueterica itsipa aatoquea iquejetiro imaica. Teequeate apaniro inquenquejacotempaji iriatimpa. Teequeate incatsimateji, aisa teequea incoguitem-pani inquenquejaguiteroni querocaguete icoquerini itsipa, manaqueate ipeacotajaro intati.

⁶ Iriaquea pintsatantamajatatsica yamenaqueguete yantajitaqueroqueate teeca on-cameetsateji, teequeate oshinetacaguempariji, manaquea oshimampoancacaanacari intati. Cotanquitsiqueate iroguentiguete yantajitaque cameetsaguetatsica irosati iquen-quetsajitaqueroguete arimajatatsica, ariquea irishinevaetanaquempa.

⁷ Querocaguete incovetaquempariquea igonoro irantsiperejacotemparoj, manaque-ate incoguitempani impintsamajatanaquempari. Ariguete inquemacotaqueri ini-jashinajitacari aato yaquiro iriatimpa, manaqueate incantanaque intati: “Jmm arica tee inquejetempaji iriatimpa.” Ariguete iramenavetaquemparo yantaguishetaque teeca oncameetsateji manaquea inquenquejanaque intati: “Arica impishoncajero coajica.” Ariguete irantsipetacajaitempari icanquiquea impintsatantanaquempa.

⁸ Aatoquea opega pintsamajatagantsi. Intsavetantajivetemparoguete icanquerica Aapani Irioshi, ari ovegarapojempa; inquenquetsatantajivetemparoguete quenquetsatsarentsipae teeca inquenquetsatantajitemparoji, majere incantanajempa; intsajiguevetempaca, mana oshetajempa intati.

⁹ Imaicaquea imaica teequea antsamajajigueti, aisa teequea antsamajajigueti antsavetantajigueti Iguenquetsatsare Aapani Irioshi.

¹⁰ Cotanquitsiquea oraquea coajica incantashitiamajajiacajigueti Aapani Irioshi, aatoquea aquejejijaa imaica teemajaquea antsajigueti.

¹¹ Oraqueate chaajaniquitirajanagueti noquejemajatacariqueate maasano chaajaniquitica iquenquetsatigueti aisa iquenquejajigueti. Cotanquitsiquea noquenquevaritanaquegueti teequea nonquejetajempariji chaajaniquitirajaca.

¹² Ariqueate oquejetaca imaica teemajaquea antsamajajigueti quero icota Aapani Irioshi, quejecaquea manaca amenantajiacaroquea amenajarontsi teemajaca onconijateji, cotanquitsiqueate coajicaquea amenamajajiaqueriquea ariquee antsamajajiaquea quero icota quejetaca yamenamajajiacajigueti aatimpajia, itsamajajiacajiquea.

¹³ Ancoguitempaniquea antsaromentamajajiaquempari Aapani Irioshi, ancoguitempani antsamajajiaquequea irinetsanamajajiaquero maasano icantaqueca, aisa ancoguitempaniquea ampintsamajatantajiaquempaquee, cotanquitsiquea caaviji ocameet-samajataque ampintsamajatantajiaquempaquee.

14

Quero incojiaquempani tsavetantajiguiroca icanquerica Aapani Irioshi aisa quero incojiaquempani quenquetsatantajigaroca quenquetsatsarentsipae teeca intsajiteji

¹ Pinintajiaquequeate pimpintsatantamajataquempa, aisa pinintaquequeate iragavejacaajiaquempi Ishire Aapani Irioshi taaca inintaque iragavejacaajiaquempi, iroguentiquea pinintamajajiaqueja pintsavetantajiaqueroqueate incantajiaquempica Aapani Irioshi.

² Iriiraquea quenquetsatantaroca quenquetsatsarentsi teeca inquenquetsatantajitemparoji, iriguentiqueate iquenquetsatacaaquequea Aapani Irioshi. Teequea iriguenti inquenquetsatacaaquequea igonorroja, teenicate inquemajigueriji. Iriguenti agavejacaqueri Ishire Aapani Irioshi iquenquetsatantacaroca, cotanquitsiquea iroguenti iquenquetsatacotaque teeca intsajiteroji.

³ Cotanquitsiquea iriraquea tsavetantaqueroca icanquerica Aapani Irioshi, iriguentiqueate iquenquetsatacaaque irapiguemisantarijiate itampishitacajiaqueriqueate arimpaniji inquemisantamajajianaquequea manaquea aisa irishinetacajiaquempariquea.

⁴ Iriiraquea quenquetsatantaroca quenquetsatsarentsi teeca intsajiteroji, irisatiquea tampishitacaajatsi inquemisantamajatanaquequeate. Cotanquitsiquea iriraquea tsavetantaqueroca icanquerica Aapani Irioshi, iriguentiquea itampishitacajiaquequea maasano irapiguemisantarijiate arimpaniji inquemisantamajajianaquequea.

⁵ Nonintavecaqueate iragavejacaajiaquempi Ishire Aapani Irioshi maasano aviatimpajia pinquenquetsatantajiaquemparoqueate quenquetsatsarentsipae teeca inquenquetsatantajitemparoji, cotanquitsiquea caavijiquea nonintamajataquequea iragavejacaajiaquempiqueate pintsavetantajiaquero icanquempica Aapani Irioshi, caavijitari oganejencavaetaca pintsavetanquegueti anaquequea pinquenquetsatantajitemparogueti quenquetsatsarentsi teeca intsajiteroji aatogueti ichoocati pitsocavaqueroneca pincantajiaquerogueti cameetsaniji pintampishitacaimentajiaqueriniji papiquemisantarijiate incoguitempaniquea inquemisantamajajianaque.

⁶ Imaicaquea, napiguemisantarijiate, ariguete noanaque namenajiaquempigueti iroogueti nonquenquetsatantajiaquemparoqueate quenquetsatsarentsipae teeca intsajiteroji ¿arimpate irooqueate nontampishitacaantajiaquempi? Cotanquitsiquea oraquea managueti nonquenquetsatacaantajiaquempiroquea piguenquetsatsare nontsatacaajiaquempi yonigaaquenaca Aapani Irioshi irooca itsatacaaqueenaca,

iroogueti noncamantajiaquempi icanquenaca Aapani Irioshi nontsatacajiaquem-pigueti, ariqueate irooquea nontampishitacaantajiaquempiquea.

⁷ Nonquejetacaquempiroqueate soncari: teequea anijavetempaji cotanquitsiquea pojimavaetaquequea. Oraquea isoncajitirogueti, aatogueti inetsanajitirotsi, aatoqueate itsajitavaquero querocaca ocantini. Ariqueate oquejetacaquea itencatsajitica iroatimpa itencatsajitirogueti.

⁸ Ariqueate oquejetacaqueate aisa yoajiguigueti yashimirintajigagueti, aatogueti inetsanajitirotsi itivojitigueti tivorentsi, aatoquea itsajitavaquero taaquea itivotantajitacaroa, aatoquea quericaca netsanatatsi iroanaque irashimirintaquempa.

⁹ Ariqueate piquejejiacaqueate aisa aviatimpajia pinquenquetsatantajiguemparogueti quenquetsatsarentsipae teeca intsajigueteroji ¿queroquea incojitaquempani inquemantajitavaquempica pincantavequemparigueti? Quejetacaquea mana piquenquetsatashitaca intati.

¹⁰ Choocavecaquea oshequini quenquetsatsarentsipae cantashitatiaguetaquitsica, cotanquitsiquea maasano aquemajiguero aguenquetsatsare.

¹¹ Cotanquitsiquea arigueti inquenquetsatacaaqueate itsipa teeca nontsateroji iguenquetsatsare intsaquequea teequea naroguenti igonoro. Ariquea nonquejetaquempaqueate naatimpa nontsataquequea teequea irio nogonoro.

¹² Irootaquequea noncantantajiaquempica imaica nontsataquequea pinintajiaqueate iragavejacaajiaquempi Ishire Aapani Irioshi taaca opajitapae, ariqueate imaica iroomajaquea pinintamajajiaqueja oraqueate tampishitacajiaquerineca papiguemisantarijiate incoguitempaniniji inquemisantamajajianaqueri Amajirote.

¹³ Quericaquea quenquetsatantaquemparoneca quenquetsatsarentsi teeca intsajiteroji iramanaqueriqueate Aapani Irioshi iragavejacaqueri impitsocavaqueroquea icanquerica.

¹⁴ Pamenenaja naatimpa arigueti nonquenquetsatacaqueri Aapani Irioshi quenquetsatsarentsi qui teeca intsajiteroji manaqueate nonquenquetsatacaqueri noshirequi, cotanquitsiquea aatoquea nontsati quero nocanti.

¹⁵ Iroosacanea ¿queroquea noncoquempaquea? Nonquenquetsatacaqueriqueate Aapani Irioshi noshirequi, cotanquitsiquea nontsatavaqueroqueate aisa nocanquerica. Namashaiventaqueriquea noshirequi, cotanquitsiquea aisa nontsatavaqueroqueate namashaiquegueti.

¹⁶ Pamenejate aviatimpa arigueti pishineventaquempari Aapani Irioshi cotanquitsiquea iroogueti pinquenquetsatantaquempa quenquetsatsarentsi teeca intsajiteroji, ariquea ¿quero incoquempani intsatantavaquemparoca papiguemisantarite teeca intsateroji quenquetsatsarentsi piquenquetsatantacaca cameetsanijite intsipataquempinijite irishinevenquempariquea iriatimpa aisa?

¹⁷ Pinquejetaquerogueti imaica oncameetsaguevetaquempaquea pincanquerica Aapani Irioshi, cotanquitsiquea aatogueti iquemajiguimpi papiguemisantarite aatoquea otampishitacajiguiri.

¹⁸ Naatimpaquea noshineventacariquea Aapani Irioshi namenaquegueti yagavejacaaquea Ishire noquenquetsatantacaroca quenquetsatsarentsipae teeca intsajiteroji. Noquenquetsatantacarocquea naatimpa oshequi. Piquenquetsatantacarogueti aviatimpajia maasano teequea omoncaratemparoji.

¹⁹ Cotanquitsiqueate nontsipajiaquemparigueti napiguemisantarijiate noncapiocajiaquempagueta, namenaquequea caavijiquea anaaque ocameetsataque nonquenquetsataquequeate capichaji nontsataqueca naatimpa cameetsanijite nontsatacajiaqueri, anaqueroqueate noncantacoguitempanigueta nonquenquetsaguitenigueta oshequini quenquetsatsarentsi qui teeca intsajiteji, aatotari iquemajitavaquena.

²⁰ Imaica, napiguemisantarijiate, noncantajiaquempiquea aato piquenquejajigui

quejejiaca iquenquejajiguica chaajaniquitirajaca, manaqueate pinquejejiacquempari-
iquea maasano quenquevarijia tsajiatsica iquenquejamajati. Aparoquea pinquejeji-
acquempariquea iriaqueraca voanquitsi, teequeate inquenquejero quero incojiaquem-
pani irantajiaquero teeca oncameetsateji.

²¹ Ocantiquea Itioncacaantaqueca Aapani Irioshi:

“Icanti Amajirote: ‘Nontigarancajiaqueneri itsipapaetica quenquetsatantajigaroca ot-
sipapae quenquetsatsarentsi,

inquenquetsatacaajipojaqueri iricaticajia incamantajiavetaquempariquea
nocanqueca, cotanquitsiquea igantaga aato iquemisantajigana.’ ”

²² Irootaquequea atsatantajiacaca yagavejacaajiacaji Ishire Aapani Irioshi anquen-
quetsatantajiaquemparo otsipapae quenquetsatsarentsi teeca intsajiteji cameetsani-
jite intsajianaqueniji teeca inquemisantajigueji incatsimajiaqueriquea Aapani Irioshi.
Cotanquitsiquea anquenquetsatantajiaquemparogueti aguenquetsatsare yagavejaca-
jiacajigueti antsavetantajiaquero icantajiacajica Aapani Irioshi, iroguentiquea tamp-
ishitacajiaquerine quemisantajiaatsica, ariquea irijamajatanaque intsarorentama-
jatanaquempari.

²³ Oraquea pincapiocajiaquempagueti iroguentigueti maasano pinquenquetsatanta-
jiaquempa quenquetsatsarentsipae teeca intsajiteroji, ariguentiquea inquitajipojaque
itsipa teeca intsarorentempariji Quirishito iriguentica tequeratatirajaca intsateji quero
picojiaca piquejejiacagueti imaica, ¿arimpate aato icomijiguimpi ijiquequeate ariji pis-
honcacojiacaquea?

²⁴ Cotanquitsiquea irooca pinquenquetsatantaquemparo piguenquetsatsare pintsave-
tantajiaqueroqueti icanquempica Aapani Irioshi, arigueti inquitajipojaque itsipa teeca
intsarorentempariji iriguentica tequeratatirajaca intsateji, inquemajiaquempigueti
ariqueate iramenaquempa iriguentiquea quempevaetatsica inquenquejanaquero-
quea yantavetacaca.

²⁵ Intsapojaquequea covaeguishedaca iquenquejaguetaqueca itsitivetacaca, ariquea
irogueroventanaquempariquea Aapani Irioshi intsarorentaquempariquea, incanta-
taque: “Arimajasacanicate itsipajiaquempi Aapani Irioshi.”

²⁶ Irootaquequea imaica, napiguemisantarijiate, noncantantajiaquempica oraquea
pincapiocajiguempagueti iroguentiquea pincapiocaventajiaquempa pintampishitava-
caajiaquempaquea. Pinconoagarantajiaquempa pincantajiaqueriqueate maasano:
“Intsija amashaiventajigueri Aapani Irioshi.” Ariquea itsipa manaqueate intsa-
tacaantaque. Itsipaquea manaqueate intsavetanqueroqueate icanquerica Aapani
Irioshi. Itsipa manaqueate inquenquetsatantaquemparoqueate quenquetsatsarentsi
teeca intsajiteroji, ariquea itsipa impitsocavaquero icantaqueca.

²⁷ Oraquea pinquenquetsatantajiguemparogueti quenquetsatsarentsipae teeca
intsajigueteroji ariquea inquenquetsate mavite arica mavitepae, cotanquitsiquea
apanirota quenquetsatavanquitsine, aisa inchoocataquequea apaniro pitsocavaque-
roneca.

²⁸ Oraquea aatogueti ichoocati pitsocavaqueroneca ariquea aatoquea piquen-
quetsatantaro picapiocajiacagueti, manaquea pamenajiaque pinchoocaquegueti
apaniro, ariquea cameetsavaequequea pinquenquetsatantajiaquemparoqueate
inquemajiaquempiquea Aapani Irioshi.

²⁹ Ariquea oquejetaca aisa iroguentigueti pintsavetantajiaquequeate icantajiaquem-
pica Aapani Irioshi, ariquea inquenquetsate mavite arica mavitepae, ariquea itsipa-
jia capiocajianquitsica incantajiaquequea iriguentica agavejacaqueri Ishire Aapani
Irioshi aricampa teeca.

³⁰ Cotanquitsiqueate choocagueti itsipa savicanquitsica iquenquetsashirentacaaque-
riqueate Aapani Irioshi irioquea tsavetantaquerone imaica, iriraqueate iriquetica

quenquetsatanquitsica interoncanajeroqueate cameetsanijite irioquea quenquetsat-
apojasine.

³¹ Ariqueate pinquejejiaquempaquea imaica apaniropae quenquetsatanquitsine
arinijite pagavejimentajiaqueronijite maasano pintsavetantajiaquero icanquempica
Aapani Irioshi cameetsanijite pintsatacaimentajiaquerinijite maasano papiguemisan-
tarijiate, aisa pintampishitacaimentajiaquerinijite.

³² Iiraquea yagavejacaajiaqueca Ishire Aapani Irioshi intsavetantajiaquero ican-
querica Aapani Irioshi irinetsanajiaqueroquea intsavetantajiaqueroqueti, aatoquea
ininti apaniro inquenquetsaquequea iriatimpa.

³³ Teetari irininteji Aapani Irioshi ancantavacaajiaquempa manaqueate ininque
anetsanajiaqueroqueate maasano. Ariquea iquejejiaca igomajamajarejia Quirishito
querocaguete icapiocapinijiaica.

³⁴ Oraquea pincapiocapinijiaquempaguete majereniquea oncanquempa manquigar-
entsijia, teenica irishinejiteroji onquenquetsateguete iroatimpajia. Aritarite ocunque-
quea itioncanaqueca Moishishini onquemisantajiaquequea.

³⁵ Oraquea onintajiaqueguete ontsajiaque taaca opajita, oncoacotaqueriqueate man-
quigataroca otsovironaquitequi. Teequea oncameetsateji onquenquetsajiaqueguete
manquigarentsijia icapiocapinitaguete maasano.

³⁶ ¿Arimpate oponeaca Iguenquetsatsare Aapani Irioshi aviatimpaqui? ¿Iroocampa
apaniro aviatimpaqui arejetapojaca?

³⁷ Quericaquea amenanquitsineca yagavejacaqueri Ishire Aapani Irioshi intsave-
tanquero icanquerica Aapani Irioshi, iroguentiguete yamenaque yagavejacaqueri
taaca opajitapae otsipa, intsaquequeate iriguentiquea cantaquena Amajirote noqueje-
tancaroca imaica notioncajiaquempiguete.

³⁸ Aatoguete iquemisantiro oca, aatoquea piquemisantiri iriatimpa.

³⁹ Irootaquequea imaica, napiguemisantarijiate, noncantantajiaquempica pinin-
tamajajiaqueja iragavejacaajiaquempi Ishire Aapani Irioshi pintsavetantajiaquero
icanquempica, aisa aatoqueate picantimentajiguiritsiqueate itsipa inquenquetsatanta-
jiguemparoguete quenquetsatsarentsipae teeca intsajiteroji.

⁴⁰ Maasanoquea pantajiaqueca pinetsanatavaqueroquea cameetsa.

15

Ipochatanajiguete Quirishito

¹ Imaica, napiguemisantarijiate, nonintaquequea nonquenquejacaajiajempiro-
queate Quenquetsatsarentsi Oganejencatatsica notsavetantajiaquempica, ariqueate
piquemisantajiaquero, irosati imaica picananiquea piquemisantajianaque,
pitsamajajiaquequea iroomajaca.

² Irooquea meshiantajiaquempica ariguete quisho poajiguero Quenquetsatsarentsi
notsavetantimoquempica, aisa teeguete pinquemisantamampeajiguempaji intati.

³ Ariqueate iroquetiquea notsatacajiaquempiqueate itsatacajaiquenaca naatimpa,
nocantajiaquempiquea imetojaventajiacajiqueate Quirishito irishetajero aguempe-
vaerejia, aritarite ocantsitaca Itioncacaantaqueca Aapani Irioshi.

⁴ Yoguijaajivetacariqueate omoroqui, ariquea aapojacaguete 3 savincaguiteri
ipochatanajiqueate, aritarite ocantsitaca aisa Itioncacaantaqueca Aapani Irioshi.

⁵ Ariqueate yonigaacariquea Sepashi,* ariquea iquejetacaajiacariqueate aisa itsata-
caanejia carajiavetanquitsica 12.

⁶ Coajicaquea yonigaajajariquea aisa oshequini apiguemisantarijiate icapiocaji-
acaguete. Icarajiaavaetaquequea yanaaqueroquea 500. Imaica choocatirajaqueate
oshequi amenajiaquerica, cotanquitsiquea iconoacaquea imetojajiaque.

* **15:5 Sepashi.** Irootaque otsipa ivajiro Shimo Peerero.

⁷Yonigaacariqueate aisa Santiago† ariquea iquejetacaajiacari maasano itigarancanejia.

⁸Coajicaquea yonigaaquenaquea naatimpa, manaquea noquejetacariquea chaajaniquitirajaca voashitatsica niganqui.

⁹Caavijitarite yanaaquenaquea iriquetica peajianquitsica itigarancane, teenicaquea nomoncaratempariji iriatimpajia. Aatomequea naroguentime itigarancane, caavijitari nocatsimajiavetacari quemisantajiguirica Quirishito natsipetacaajiacariquea.

¹⁰Cotanquitsiquea icavintsajaquenaquea Aapani Irioshi iquejetacaquenaqueate itigarancane, ariquea nanajiaqueriquea maasano itigarancane nantaquenerigueti, cotanquitsiquea teequea inchiqiojitsi nagavejashitempa naatimpa nantaqueneri, iriguentiqueate agavejacaquenaquea Aapani Irioshi cavintsajaquenaca.

¹¹Cotanquitsiquea imaica aatoquea iroguenti noquenqueji queri caavijica yanaaque, naroguentica, iriguentica itsipapae itigarancanejia, maasanotarite notsavetantajiaqueriqueate Aapani Irioshi nocamantajiaquempiquea quero icota Aapani Irioshi imeshiantigueti, irootaquequea piquemisantantajiacaca.

Intancoretancoreitanajegueti

¹²Itsavetantajiqueritarite Quirishito ipochatanajigueti imetojavetacagueti. ¿Queroqueate ocotaca piconoagarantajiacaquea aviatimpajia picantajiaque aatoquea itancorejajiti?

¹³Aatomegueti arimajatime itancorejajiti, aatome ipochatime Quirishito.

¹⁴Aatomegueti ipochatime Quirishito, manamequea nonquenquetsavijitashitaquem-pame intati, arimequea pinquejejiacquempame aviatimpajia manamequea pinquemisantamampeaquempame intati.

¹⁵Aatomegueti itancorejajitime, antsaqueme teequea irovochateriji Aapani Irioshi Quirishito. Arime onquejetaquempame imaica naatimpajia manameca namataaventashijiaquemparime Aapani Irioshi notsavetantajiaquerigueti nocantajiaquegueti yovochantajiriqueate Quirishito.

¹⁶Picantajiaquetarite aatoquea itancorejajiti, iroosacanica aatomegueti arimajatime itancorejajiti, arime inquejetaquempame Quirishito iriatimpa aatome ipochatime.

¹⁷Oraquea aatomegueti itancorejajime Quirishito maname pinquemisantashijiaquem-pame intati, aatome imeshiajiguimpime Aapani Irioshi choocatirajamequea piguempavaerejia incatsimatantajiaquempimeca.

¹⁸Arimequea onquejetaquempame, inquejetaquempamequea aisa metojajianquitsica tsaromentajiacarica Quirishito iroajianaquememequea camorecariqui.

¹⁹Oraquea aatomeguetiquea arimajatime antancorejajianaje coajica, iroosacanica maname antsaromentashijiaquemparime Quirishito intati, maname ancantashijiavetaquempame imaica intancorejajitanaje, cotanquitsiquea coajicaquea amenajiaquem-pame caavijiquea acota aatimpajia amatavijajiacaquea aatimpa, incantacojitacajime: “Oo caaviji yatsipetashitaca intati.”

²⁰Cotanquitsiquea teequea ariquea onquejetempajiqueate imaica, atsajiaquetarite arimaja ipochatanajiqueate Quirishito imetojavetacagueti. Iriotarite pariacaroca ipochatanajiqueate iroaqueragueti, ijivajiaqueriquea maasano metojajianquitsica tancorejajianajatsineca oncoramanitapojajegueti.

²¹Aritarite oquejetacaquea iroaqueragueti apaniroquea pariacaro metojavetanquitsica ariquea imetojajitanaquequea imaica, ariquea oquejetacaquea aisa apaniroqueate jivatanquitsica ipochatanajiquea imetojavetacagueti.

† 15:7 **Santiago**. Iguenquetsatsarequi guiriego ipajita **Iakobos**. Iconoagarantaca quimajareri yoguipitsocaquerogueti ivajiro ipajitiri **Santiago**, itsipa ipajitiri **Jacobo**. Mavite oponeaca iguenquetsatsarequi evereo, ipajitiri **Yaakob**.

²² Maasanoqueate ichoviquijianaqueca Araini ametojaquequea. Ariquea oquejeta-
caquea aisa maasanoquea tsaromentajiacarica Quirishito intancorejajianaje.

²³ Cotanquitsiquea iriquetitari pochatanajatsi Quirishito. Ariquea incoraqueta-
jategueti intancorejajianajequeate maasano tsaromentajiacarica.

²⁴ Ariquea oncaratapojaque maasano, iriraqueate Quirishito iragavejaji-
aqueriqueate maasano imajirojiate quepatsiquitica, jerijiaquea imajirojiate
teeca inconijateji, jerijiaquea aisa agavejajiatsica, apaniroquea iriatimpa
irimajirontajiaquempariqueate maasano choocajatsica acaniqui quepatsiqui jero
aisa jenoqui inquitequi. Ariquea incanqueriquea Aapani Irioshi: “Jero imaica, Aapani,
apaniroquea aviatimpa pimajirontamajata.”

²⁵ Iriraquea Quirishito irimajirontaquempaqueate irosatiquea iragavejajiaque-
rigueti Aapani Irioshi maasano catsimajiaquerica, impincatsajiaquerinijite Quirishito.

²⁶ Coajicaquea aato imetojajitajitsi.

²⁷ Aritari iriraquea Aapani Irioshi yagavejacaamajaqueriqueate Quirishito yanaa-
majatantacarocaqueate maasano. Cotanquitsiquea oraquea ocanquegueti itioncajita-
querogueti yanaamajataquero maasano, teequea ariquea oncanteji yanaaqueri Aapani
Irioshi aisa, iriguentitarite agavejacaqueriquea.

²⁸ Ariquea iragavejajiaquerigueti Aapani Irioshi maasano, irimajirontajiaquempar-
igueti Quirishito maasano, iriatimpaquea incanqueri Aapani Irioshi agavejacaque-
rica: “Imaica, Aapani, apaniroquea picoca aviatimpa pimajirontamajatacaqueate,
aviguenti anaquena.” Ariquea onquejetaquempaquea cameetsanijite apaniroquea
irimajirontamajaquempanijite Aapani Irioshi, iranaajiaqueriquea maasano.

²⁹ Choocaquea aviatimpagui irirajia cantajatsica aato itancorejajiti, cotan-
quitsiquea iconoagarantajiacaqueate iviñacajatashitavajariquea metojaguetatsica.
Iroomajataquemegueti icantavetacagueti aatoquea itancorejajiti, ¿queroquea ocotaca
iviñacajatashitantavajarica?

³⁰ Ariquea noquejejiacaquea naatimpajia oraquea aatomegueti itancorejajiti
¿arimpa nantsipeventapinijiaquero nantajiaquenerigueti Amajirote? Maname
nantsipetashitaquempame intati.

³¹ Nocantaguitanitarite nantsipetacaqueate. Maasano savincaguiteriqui chooca nin-
tavetanquitsica irimetojena, arimajaquea nocantamajataque. Ariquea oquejetaca aisa
arimajaqueate noshinemajaca namenajiaquempigueti pitsaromentajiacarigueti Ama-
jirote Jesoquirishito.

³² Yatsipetacaajitaquenaquea Epesoqui icatsimajitaquenaquea, quejeca manaca ip-
ishoncajitaquena casecariqui irishecaquena. Oraqueate arimajame aatomegueti itan-
corejajiti maname nantsipetashitaquempame intati, cameetsame nonquejejiacquem-
parime cantajatsica: “Jame ashecajiguempa aisa ashinquijiguempa, osaitequeratari
ametoje.”

³³ Inchiquiojitaja yamatavijajitimpitsi piquejigaritsi. Icantamajajititari: “Pintsipa-
jiaquemparigueti teeca incomajajiguempaji manaqueate pinquejetanaquempari iri-
atimpa.”

³⁴ Iintsija pinquenquejamajataje, manaquea pincomajamajajiaquempaquea intati,
aatoquea piquempaveajiaja. Piconoagarantajiacatarite teequeate pintsajigueriji Aa-
pani Irioshi. Manaquea intati nocantajiaquempiqueate imaica ironiji pimpashiven-
tantajianaquempaca.

Quero oncoquempani intancoretancoretanajegueti metojajavetanquitsica

³⁵ Cotanquitsiquea arica inchoocaque nintanquitsineca incanque: “¿Queroca onco-
quempani intancorejantajianajempaca metojajianquitsica? Oraqueate intancoretan-
coreitanajegueti ¿querocaca oncotajempani itsino?”

³⁶ Quericaa quejequeroneca imaica cantanquitsineca, teequea intsateji. Itsajitaquerotarite aatogueti iquitaguijitiro, aatoquea otsorogui. Ontoroanaquegueti ompejaempaquea oratica oitsoqui.

³⁷ Oraquea iquitajitirogueti teequea iro inquitatacojite otasaquiji, ojempequi, ovana, maasano; iroguentiqueate iquitajiti oitsoqui, irooca tirigo irooca taaca opajitapae otsipa choocatatsica oitsoqui.

³⁸ Ariquea inchiquiojita yoguitsoroaquero Aapani Irioshi iriatimpa, iquejetacaamajatajaroquea querocagueti inintacaqueroni. Pameneroja iquitajitirogueti tirigoitsoqui iroguentiquea tsoroananquitsi tirigo. Ariquea oquejetacaquea oitsoquipae iquitajiquerogueti irosati tsoroanajatsine. Ocantashitatiaguecaquea teequea onquejetavacaguempaji.

³⁹ Ariqueate oquejetaca aisa maasano anijaguetatsica, teequea inquejetavacaguempa manaquea icantashitatiaguecaquea. Pamenerija caquinte teequea inquejetempariji canaaguetatsica. Ariquea iquejeguecaquea aisa araguetatsica, teequea inquejetempariji choocaguetatsica ojaaquiniqui. Maasanoquea icantashitatiaguecaquea.

⁴⁰ Ariquea oquejetaca aisa choocaqueate choocajiatsica jenoqui inquitequi aisaquea acaniqui quepatsiqui, cotanquitsiquea teequea inquejetavacaguempa yoganejencaguecagueti, icantashitajiacatarite yoganejencajiacagueti choocajianquitsica jenoqui inquitequi, ariquea iquejejiaca aisa choocaguetatsica quepatsiqui icantashitatiaguecaqueate yoganejencajiacagueti.

⁴¹ Pamenerijate catsirincaiteri ivoreguigueti teequea inquejetempariji iquitasetigueti taai, aisaquea teequea inquejetempariji iquitamiriaquitigueti impoquiropae, cotanquitsiquea iconoagarantacaquea irira anaantanquitsica iquitamiriaquimajatanaquequea, itsipaquea teesaconaquea.

⁴² Ariquea oquejevecaquea aisa intancorejajianajeguetei metojajianquitsica. Oraquea iquitajiqueriguetei yavejancavetanacaquea, cotanquitsiquea intancorejajianajeguetei aatoquea yavejancaja.

⁴³ Oraquea iquitajiqueriguetei itsino teequeate irishineventajitajemparoji, cotanquitsiquea intancorejajianajeguetei aatoquea oquempetaja imaica manaquea oganejencamajatanaquempaquea. Ari oquejetaca aisa iquitajiqueriguetei teequea intampishiteji, cotanquitsiquea intancorejajianajeguetei incantapanajante intampishimajatanaquequea.

⁴⁴ Iroaqueraguetei irooquea iquitajitaque itsino gametatsica ocaniqui quepatsiqui, cotanquitsiquea coajica manaquea ontancorejijanaje otsipa itsino iroaquerari gametanquitsineca ontaniqui jenoqui inquitequi. Choocatarite gametatsica ocaniqui quepatsiqui. Ariqueate oquejetaca aisa choocaquea gametatsica jenoqui inquitequi.

⁴⁵ Aritarite ocanquequea itioncajitaqueca ocanti: Iriaqueate Araini iriquetica parivecaro “ipeacaajitacari anijatsica”. Imaicaquea irira Arai impoitajatsica[‡] irioquea anijacaantantatsica, yanijacaacajitarite Ishire.

⁴⁶ Cotanquitsiquea teequea iroquetei pariguemparone atsinojia gametanquitsineca jenoqui inquitequi. Iroquetiquea pariacaro gametatsica quepatsiqui, ariquea omapojempaqua gametanquitsineca jenoqui inquitequi, impoitapojequea.

⁴⁷ Iriaquea iriquetica ipeacajaitacaca iroguentiquea ipeacaantajitacariqueate quepatsi, aisa manaquea ichoocataque ocaniqui quepatsiqui. Iriaquea impoitajatsica manaquea iponeca jenoqui inquitequi.

⁴⁸ Ijamirincataquequea caquinte ariquea iquejetacariquea Araini ipeacaantajitacariquea quepatsi, iriotarite paesatijianaquerica iroaqueraguetei. Ariquea inquejiaquempaquea aisa maasano tsarotentajiacarica iriiraquea poneanquitsica jenoqui inquitequi, ariquea inquejijanajempariquea iriatimpa.

[‡] 15:45 Ocanqueguetei **Arai impoitajatsica** iriotaque ocantacotaque Quirishito.

⁴⁹ Aritarite aquejejiacariquea iriraquea ipeacaantajitacaca quepatsi, ariqueate anquejejaquempariqueate aisa irira poneanquitsica jenoqui inquitequi.

⁵⁰ Imaica, napiguemisantarijiate, nonintaquequea noncamantajiaquempi oraquea aquejejigaguete acaniqui atsinojigaguete aisa arirajajiguete, aatoquea ojaiguitsi jenoqui ichooaqueguete Aapani Irioshi. Oraquea atsinojia teequeate onquishoteji irootaquequeate aatoquea agavejajigui oantajianaquemparo ontaniqui jenoqui inquitequi, ontaniquitarite aatoquea ametojajiajitsi.

⁵¹ Aisa imaica nonintaquequea pintsajiaque teeca intsajiteji. Aatoquea ametojajigui maasano, cotanquitsiquea maasanoquea ancantashitatijaianajempaqua, irojocajiacajitarite Aapani Irioshi atsinojia iroaquerari.

⁵² Iroompaqueate anquemajivaqueroguete intivojiqueroguete tivorentsi carapojeroneca, ariquea ancojianaquempa ancampanajante ancantashitatijaianaquempa. Intivojitaqueroguete tivorentsi ariqueate inquenapanajante intancorejajianaquea metojajivetanquitsica, ariquea aatoquea imetojimajiaji, aatimpajiaquea tequeratatarajaca ametojajigueti ancantashitatijaianaquempa.

⁵³ Oraquea atsinojia avejancatsica aatotarite irooquea anijanajatsine, otsipaquea piajeroneca aato avejancajatsi. Ocaticaquea imaica iroguentiquea metojatsica, jeroquea otsipa piajeroneca aatoquea ometojajitsi.

⁵⁴ Aapojempaguete avejancatsica ompeajempaguete caarica avejancatsi, aisa oratica metojatsica ompeajempaguete caarica metojatsi, ari onetsanatanaquempa itioncajita cantatsica:

“Iteroncajiquero metojagantsi yanajaiquero.”

⁵⁵ “Metojagantsi, ¿querocaquea pitseji?”

Areshi, § arimpa pagavejaque panaante imaica?”

⁵⁶ Oraquea quempevaerentsi, iroguenti otseji metojagantsi. Oraquea cantacaantantsi, iroguenti otampishica quempevaerentsi.

⁵⁷ Cotanquitsiquea imaica arioteesaa icavintsajajiacajiquea Aapani Irioshi yagavejacaajiacaji antampishitashitimentajiaqueronijite quempevaerentsi aatoniji aquempevaejiaja, atsaroventajiacaritarite Amajirote Jesoquirishito.

⁵⁸ Irootaquequea imaica, napiguemisantarijiate nopintsamajiacaca, noncantantajiaquempica picancaniquea pinguemisantamajiaqueri Amajirote pintampishitashimajiaqueri nintajivetanquitsica irovashiantacaajiaquempiro piquemisantajiaquete. Aisa picancaniquea pantamajiaqueneri, aatoquea piperajiga, pitsamajiaquetarite aatoquea mana pantajiguiniri intati.

16

Incapiocajiaqueneriqueate imentaquipae intigarancajiaqueneri irapiguemisantarijiate

¹ Imaicaquea imaica irooquea noncamantamajiaquempi quero pincojiaquempanti pincapocajiaqueneriguete imentaquipae pintigarancajiaqueneriguete igomajamajarejia Aapani Irioshi. Manaquea noninque pinquejetacaajiaquemparoqueate nocantajiaquerica apiguemisantarijiateni Garashiaquitica.

² Pincoguitempaniquea savincaguiteri qui pariantajemparoca semana* apaniropae aviatimpajia paagarantajiaque pimentaquitsitepae ivegarajitimpiroguete pantajiguica. Iriraquea aamajatanquitsica iraagarantaquequea oshequi. Iriraquea capichajica aanquitsica iraagarantaquequea capichajiquea. Ariquea pojoquijijiaqueriquea ontaniqui pitsovironaquitequi pojoquijitashiquempariquea tiijacoñaji aatoniji iroaquera pinca-piocajianaqueri noncoraquepojaquete.

§ 15:55 Oraquea **Areshi** iroguenti ichooajiaquete metojatsica. Iquejetacaaca acaniqui, quejetaca iquenquetsatacaquero “Metojagantsi” aisa “Areshi”. * 16:2 Iroguenti opariantanaja semana savincaguiteri tominco.

³ Ariquea narejetaipojaquempagueti nontigarancajiaqueriqueate irirajia pinintajiaqueca iroajianaque Jerosarequi. Nontioncavaquequeate paperi irajaianaquenerinijite imentaquipae pintigarancajiaqueneriquea apiguemisantarijiate choocajiaatsica ontaniqui.

⁴ Arigueti namenaque cameetsataque noanaque naatimpa aisa, ariquea nontsipajianaquempariquea.

⁵ Oraquea noncoraquequegueti manaquea noapanajante Maseroniaqui, ariquea narejevaetapojaquempa oraniqui Corintoqui. Noninquetarite noapanajante Maseroniaqui.

⁶ Aviatimpajiaqui arica osamani nonconoajiaquitempiquea, arica nontejaatacovaequitequea irosatiquea ajagantsitanajegueti, ariqueate pagavejajiaquequea pincavintsajajiavaquena noanaquegueti querocagueti noncantanaquempa aisa.

⁷ Teequea noninteji mana namenajapanajantempi intati, manaquea nonintaquequea osamani nonconoajianaquempiquea, iriogueti nintanquitsine Amajirote.

⁸ Cotanquitsiquea imaica mana noninque nonchoocatanaque acaniqui Epesoqui irosati arejetantapojempaca savincaguiteri Pentecoshite.

⁹ Namenavecaquea choocaquea oshequi catsimajiaquenaca, cotanquitsiquea aisa choocaquea oshequi tsaromentajigarica Aapani Irioshi. Ariquea oquejetacaquea aisa choocaquea oshequi nintanquitsica nonquenquetsatacaajiaqueri.

Iteroncaquerogueti itioncaguetaqueca

¹⁰ Arigueti irarejetaipojaquempagueti Timoteo oraniqui pincavintsajajiavaquerija pinconoajiaquempariquea cameetsanijite irishinetaquempanijite, aatoniji ishoshoguiteta. Aritarite iquejetaquenaquea naatimpa, yantiniriquea Amajirote.

¹¹ Irootaquequea nocantantajiaquempica inchiquiojija pitsojencavaqueritsi. Ariguetequea incantanajempagueti pincavintsajajiaavajerija pinquenquetsatacaajiaavajeriquea cameetsanijite incoraquetaje acaniqui, noguijajiritarite incoraquetaje iriatimpa jerijia aisa apiguemisantarijiate oguijaguijaitaquerineca.

¹² Iiraquea apiguemisantarite Aporoshi nocantavecariqueate iroanaque oraniqui irinejajiaquitempime, intsipajianaquemparime itsipapae tsaromentajigarica Quirishito. Teequeate irininteji iroanaque imaica, cotanquitsiquea coajica iragavejaquegueti ariquea iroanaque.

¹³ Inchiquiojija yamatavijajitimpitsija yovashiantacajaiguimpirotsi piquemisantajiaquegueti. Manaquea picancaniquea pinquemisantamajajianaque. Aatoquea pitsaromentajiguiro piquemisantajiaquerigueti Quirishito, manaquea pintampishitashijiaquequea.

¹⁴ Taaca opajitapae pantajiaqueca pimpintsatavacaajiaquempaqueea.

¹⁵ Napiguemisantarijiate, aviatimpajia pitsajiaquetarite iriraqueate Esetepana jerijia iconoajiaa iriguentijia iriquetica tsaromentajiacari Amajirote Acayaqui, ariqueate isavicaventajiaqueeroquea icavintsajajiaqueri igomajamajarejia Aapani Irioshi, yamitacojiaqueriquea.

¹⁶ Imaicaquea noninque pinetsanajiavaqueroja incanquempigueti iriatimpajia, cotanquitsiquea aatoquea apaniro iriatimpajia. Ariquea pinquejejiaquempariquea aisa maasano quejejigarica iriatimpajia yamitacotantajiguigueti, aisa yantajiguinirigueti Amajirote.

¹⁷ Jeematsitia icoraquegajoitaquequea acaniqui Esetepana, aisa Jorotonato, jeriqueate aisa Acaico, yoguishinejajiaquenatarite noquenquejajiaquempigueti pichoocajiaquegueti osamani.

¹⁸ Yoguishinejajiaquenaquea naatimpa aisa aviatimpajia. Pishineventajiaquempariquea iriatimpajia pamenajiaquerigueti caaviji yantajiaqueneri Amajirote.

¹⁹ Irireaquea tsaromentajigarica Quirishito capiocabiniatsica iguintenipaequi Ashiaqui inintajiaquequea pinquemacojiaqueriqueate irosatiquea iquenquejajiaquempi. Ariquea iquejetacaquea Aquira aisa iroatimpa Pirishira jerijiaquea aisa maasano capiocabiniatsica itsovironaquitequi, inintajiaquequea pinquemacojiaqueri irosatiquea iquenquejajiaquempi, iquejejaquempitari pitsaromentajiacarigueti Amajirote.

²⁰ Ariquea iquejejiacaquea aisa maasano apiguemisantarijiate acaniqui icancani iquenquejajiaquempi. Netsana pinintavorotavacaavaquempa.†

²¹ Naatimpa Paavoro ocatica imaica inchiquiojita notioncaquero nacoqui, noncantajiaquempiquea noquenquejajiaquempi.

²² Quericaquea teeca impintsamajatempariquea Amajirote incatsimajitaqueriquea. ¡Nomajirote, pincoraquetajequeti!

²³ Namanacoventajiaquempiquea incavintsajimentajiaquempinijite Amajirote Jesoquirishito.

²⁴ Nopintsamajataquempiqueate maasano aviatimpajia, atsaromentajiacaritari Quirishito Jesoshi. Ari oncoquempa.

† **16:20 Netsana pinintavorotavacaavaquempa.** Yamejiaca coramani inintavorotavacaajivaca yamenavacaajiacagueti, ari iquejejiaca tsaromentajigarica Quirishito coramani.

PAAVORO ITIONCAJIAJINIRI CORINTOQUITICA

Antsatantaquemparoca

Ocatica iroguenti antsatantaquemparoca mavitetapojatsica itioncacaantaqueca Paa-
voro itioncajiaqueneriguetti tsariventajiacarica Jesoshi choocajianquitsica guintenin-
intsiqui pajitatsica Corinto. Iriraqea Paavoro iriovetaca jorio, cotanquitsi irio it-
igarancane Jesoshi tsavetantimojiaquerica teeca irijorijoigueji itsavetantimojiaqueri
Quenquetsatsarensi Oganejencatatsica, teetarite inquemisantajigueroji jorio itsave-
tantimojiavetacanicarica. Irocashi itioncacotaqueri irira Paavoro otsipaquei paperiqui
(Ya. 7.57-8.1; 9.1-31; 13.1-28.31), aisa itioncacotaqueri ichooaqueguetti Paavoro
Corintoqui otsipaquei Ya. 18.1-18. Tequerataguetti intioncacaanteroji ocatica Paa-
voro, itioncacaanquero otsipapae mavite paperi itioncajiaqueneri choocajianquitsica
guinteninintsiqui pajitatsica Tesaronica aisa itioncacaantaquero iroquetica paperi
itioncajiaquenerica Corintoquitica. Itioncacaantaquero ocatica paperi ajagantsini 55,
otsipatapojacaguetti iquenaguetanaqueguetti quepatsipaequi itsavetantavaequeriguetti
Jesoquirishito. Iquenquejajitaque itioncacaantaqueroqueti Paavoro ocatica paperi
ichooaque guinteninintsiqui pajitatsica Piripo choocatatsica Maseroniaqui (Ya. 20.1-
2).

Ocaniqui paperiqui itsavetanqueroquea Paavoro quero icojiaquerini Aapani Irioshi
aventajiacarica Jesoshi iramenajiaqueriniji quempetaca tee incovaeguishetimatem-
paji. Icanti Paavoro itsatacaajiaqueri iroomajatatsica ichooatimojiaqueriguetti Cor-
intoquitica, cotanquitsi imaica chooca tsatacaantamampeajiatatsica ontaniqui tsata-
caantantajiguero teeca iroomajateji, icantajiavetaca itsavetacojiaqueri Jesoshi. Iri-
atimpajia icantashijiacari Paavoro teequea irio itigarancane Jesoshi. Niganquiquea
itioncacaantajiaquenerica Paavoro icamantajiaqueri quemisantajiatatsica incapiocajia-
queri imentaquitsitepae iramitacojiaqueriniji quemisantajiatatsica coguitejacojianquit-
sica (cap. 8-9).

¹ Naroguenti Paavoro itigarancane Jesoquirishito, iriotari nintacaaquena
Aapani Irioshi. Imaica noninque nontioncajiaquempiquea aviatimpajia
Corintoquitica tsariventajiacarica Aapani Irioshi aisa maasano igomajamajarejia
choocatantaguetaroca Acaya. Iriguenti notsipataca apitsaroveriteni Timoteo.

² Namanacoventajiaquempiquea incavintsajamajajiaquempinijite Aapani Irioshi
aisa Amajirote Jesoquirishito, inchoocatacaajiaquempinijite cameetsa aatonijite
pishoshoventajigaro taaca opajitapae.

Ishinetacagari Aapani Irioshi atsipejiatsica

³ Jaameshiatsi ashineventajiaquempariquea Irioshite Amajirote Jesoquirishito, irio-
taque aisa Iriri, ancanqueriquea: "Poganejencamajata", ipintsatacomajajiacaji yogu-
ishinejajiacaji

⁴ atsipevaejiacaguetti cameetsanijite agavejajiaquenijite oguishinejajiaquerinijite
itsipapae atsipevaetanquitsica anquempejiaquempari iriatimpa yoguishinejajia-
jiguetti.

⁵ Quejetacaquea atsipejiaca atsipajajiariguetti Quirishito, ari onquejetaquempa aisa
iroguishinejavaejiacaji iriatimpa.

⁶ Oraquea natsipejiacaguetti naatimpajia iroguenti cameetsanijite iroguishinejaji-
aquempinijite aviatimpajia, aisa iroguentinijite irimeshiimentajiaquempiniji. Ariquea
oquejetaca aisa yoguishinejajiaquenaguetti Aapani Irioshi iroguenti cameetsanijite

pintsatimentajiaqueniji ariquea inquejetacaajiaquempi aviatimpajia aisa iroguishinejajiaquempi iramenajiaquempigueti pantsipevaetaquempaquee pinquempejiaque-naquea naatimpajia natsipevaetagueti. Iroguenti iroguishinejajiaquempiquea ironi-jite pantsipevaetantanaquemparoca.

⁷ Notsamajiaquequea pinquejejiaquenagueti pantsipejiaquempagueti, ariquea pinquejejiaquena naatimpajia aisa iroguishinejajiaquempiquea Aapani Irioshi.

⁸ Imaica, napitsaromentarijiate, nonintajiaque pintsajiaquequea natsipevaecaquee Ashiaqui namenajiaque aricaca nometojajiaque, namenajivacaquee teequeate nagavejajiajeji nontampishitashijiajeroji.

⁹ Noquenquejantavetacaca: “Imaicashiatsi nometajavaeteni.” Cotanquitsiquea iroguenti oquejetacaquee imaica cameetsanijite nontsamajiaquenijite aatoquee inchiqiuojiquea naatimpa nagavejajiguetsi nontampishitashijiaquero, iriguenti naven-tajiaquempa Aapani Irioshi tancoretancoretirica metojajiavetatsica.

¹⁰ Ariquea iriatimpa yompejiaquenaquee, jero teeca nometojantajiguempaji. Ariquea inquejetanaquempa imaica irompejianaquena. Notsajiaquequea icocaniquea iramitacojiaquenaquee taaca opaji nantsipevaequempaca.

¹¹ Pamijiaquenaquee aviatimpajia pamanacoventajiaquena. Iroshequiavaequegueti amanacoventajiaquenaca, ariquea onquempetaquempaquee aisa incaramirincavae-quequee shineventajiaquemparineca Aapani Irioshi iramenajiaquegueti icavintsajamajiaquena, incanquequee: “Arioteesaa.”

Quero ocoani teeca iroantempaji Paavoro Corintoqui

¹² Noshinevaejiacaquee nocanca namenajiaquegueti nococani nocomajamajajiaca acaniqui quepatsiqui, aisa teequee namataajiguempaji, pamenamajajiaquenaquee aviatimpajia noguintenitimojiaquitimpigueti. Cotanquitsiquea noquejejiacagueti imaica, teequee noguijatacojigueroji itsatica caquinte, manaquee icavintsajaquena intati Aapani Irioshi yagavejacaantaquenaca.

¹³ Oraquee notioncajiaquempigueti maasanopae tee nomanacaguemparoji aatoni-jite omanapitsajiguimpitsi pampatsajavantajiaqueroqueti, manaquee pinquemamaja-jiavaquero, noninquetari

¹⁴ pintsamajajiaquenaquee querocaca nococani naatimpajia. Pitsajiavequena capichaji, noninque pintsamajajiaquenaquee cameetsanijite pishineventamaja-jianaquenaniijite oncoramanitapojajegueti incoraquetajategueti Amajirote Jesoshi, pinquempejiaquenaquee naatimpajia noshineventajiaquempigueti.

¹⁵ Irootaquequee nopintsatantavecaca iroaqueragueti aviquestime nonejajijaateme, cameetsaniji pishinevaequempaniji mavite narejetimotajatempime.

¹⁶ Nopintsaveca noanaquegueti Maseroniaqui ariquea noncoraquetaquemeequee oraniqui narejetimojiapanajantempimequee aviatimpajia. Iroompa noanajegueti ari narejetsitimopanajantempimequee aisa. Iroompaquee aisa noquenquejavecaquee nonchoocaquemegueti oraniqui nonquenapojequee aviatimpajiaqui noanaquequee Joreaqui pincavintsajajavajena pojocajavajena noncoguitejacoquempaca, ariquea pamenajavajena.

¹⁷ ¿Nopintsavecagueti arimpate tee nonquenquejamajateroji? ¿Arimpate noquejejiacari teeca intsaromentempariji Aapani Irioshi icantajiguigueti manaquee icantashitajiaji-avajiro intati teequee irinetsanajigueroji?

¹⁸ Cotanquitsiquea Aapani Irioshi teequee inquempetempaji imaica, manaquee inetsanamajatiro icanqueca, ariquea noquempejiaca naatimpajia, teequee namatavijan-teji, nocanquegueti: “Jeeje”, teequee noncantashitempaji aisa: “Tee.”

¹⁹ Ariqueate iquejetacaquea aisa Jesoquirishito, Irijanite Aapani Irioshi, notsave-tacotaqueca naatimpa notsipatashijiacarigueti Shirivano* aisa Timoteo notsavetanti-mojiaquempigueti aviatimpajia. Pinquenquejerija iriatimpa queroca icanque icocani inetsanamajatiro.

²⁰ Aisa oraquea icoraquequitigueti iroguenti netsanamajajiqueroquea maasanopae icanqueca Aapani Irioshi paesatoniqui icanquegueti intigarancaqueri Meshiantan-quitsineca. Irootaquequea imaica ashineventantajiacarica Aapani Irioshi acan-queriquea: “Ari netsana”, atsajiaquetari iriguenti Jesoquirishito quempetacaague-caroca.

²¹ Iriotarite Aapani Irioshi tsaromentacaamajatacajiri Quirishito, naatimpajia aisa aviatimpajia, cameetsanijite aguijamajaqueriniji aatoniji oguipaquijajiguirotsi at-saromentajiacarigueti. Icoquiajiajia.

²² Ariquea oquejetaca iseyotacaji ocanque aatimpajia irashimajaca, jero itigarancan-tacajirica Ishire inchoocashirentajiapojacaji cameetsanijite antsajiaquenijite irinet-sanamajajiacajiro maasanopae icanqueca.

²³ Imaica pamenajiaque teequea nogueji oraniqui Corintoqui namenajiajatempime, teetarite noninteji noshimampojancacaajiapojempi, nopintsatacojiaquempitarite. Yamenaqueaquea Aapani Irioshi teequea namatavijajiguempiji arimajacatari nocanque.

²⁴ Teequea irooquea nonintajigueji noncanquempiquea pinquemisantamajajiaque-naja naatimpajia pinetsanamajajiaqueroquea nocantajiaquempica, iroguenti non-intamajiaque nontsatacaajiaquempiroquea otsipapae cameetsanijite pincoguitem-paninijite pishinevaejiaquempanijite, iroorijite paventaventaicarigueti Aapani Irioshi pitampishishirentantajanacaca.

2

¹ Irootaquequea noquenquejantacaca aatotaja noguitsi namenajiajatempi cameet-sanijite aatonijite noshimampojancacaajiguimpitsi ariquea noshimampojancanaque-mpaquea naatimpa aisa.

² Namenaqueitari arigueti noshimampojancacaajiaquempi, ¿quericampate oguishine-janajenaneca? Aparo picojiacaquea aviatimpajia poguishinejajiaquenaquea, cotan-quitsiquea arigueti noshimampojancacaajiaquempi ¿querocampate noncotajempani naatimpa noshinetantajempaca?

³ Irootaquequea notioncantajiaquempica nocantajiaquempi pincomajamaja-jianaquempaja, namenaquequea noncoraquevetaquempagueti manaquea pishi-mampojancacaajiaquenaquea, teetarite irooquea noninteji onquempetaquempaquea imaica, iroguentiquea noninque poguishinejajiaquenaquea naatimpa cameetsanijite pishinetimentajiaquempanijite aviatimpajia aisa.

⁴ Oraquea notioncajiaquempigueti coramaniqui taaja noshimampojancavaecaquea nocanca noquenquejacojiaquempigueti, niganquiquea niraanaca. Cotanquitsiquea teequea irooquea nontionquimentajiguempiji noshimampojancacaajiaquempiniji, iroguenti noninque pintsajiaque caaviji nopintsamajajiaquempiquea.

Icantajiaqueri impeacojiajemparijate peacaanquitsica covaeguisherentsi

⁵ Irraquea peacaanquitsica covaeguisherentsi teequea aparo irishimampojan-cacaguenaji naatimpa, aviguentijiamaja ishimampojancacaajiaquempiquea, cotan-quitsiquea teequea noninteji noncanque caaviji ishimampojancacaamajajiaquempi, teequea noninteji nontiavaetacaantempiro.

* 1:19 Irraquea **Shirivano** icantajitiri aisa **Tsirashi**.

⁶ Ariquea picapioacajiacaguete piconoagarancaquea picantajiaque incantimentajiqueriquea peacaaguishetanquitsica covaeguisherentsi. Itsipapae cantanquitsica aatoja icantimentajitiritsi, cotanquitsiquea iriguenti oshequijianquitsica cantajianquitsica incantimentajiqueriquea, jero piquempejiaqueri imaica. Cotanquitsiquea imaica ariotapoji oncaratapoje picantimentajiaqueriguete.

⁷ Irootaquequea nocantantajiaquempica imaica pimpeacojiajemparija, aisa pogu-ishinejajajerija aatonijite otiroroncavaetanacari ishimampojanicare irishoshoguitevaetanaque.

⁸ Aisa aviatimpajia noncanquempiquea imaica pamenacaajajerija picocani pipintsajiacari.

⁹ Oraquea notioncajiaquempiguete coramani, nocantajiaquempiguete querocaca pincopincoitaquerini, manaquea noningue nontsaque aricaca pinquemisantajiaquenaquea pinetsanamajiaquero nocantajiaquempica.

¹⁰ Quericaca pimpeacojiajempaca aviatimpajia, ariquea nonquejetaquempaquea naatimpa nompeacotajempariqueate. Teequea querocaca incovetenaji, cotanquitsiquea yamenaquenaquea Quirishito arimajaca nopeacotsitajari, iroorijite nopintsat-acojiaquempi.

¹¹ Iroguenti noquempequeroquea imaica cameetsanijite aatoniji ochoocatitsi ompampiatantaquempaca iragavejajiacaji Satanashi, atsamajajiguiritari queroquea icota iriatimpa icocani isemajiacaji iramatavimatavivaecaji.

Icanqueri iriguenti agavejacaajiaqueri Quirishito

¹² Narejetsipojacaguete Toroashiqui nontsavetanteroniji Quenquetsatsarentsi Oganejencatatsica tsavetacoquerica Quirishito, choocajia icaramirincavaeque nintajianquitsica nontsavetantimojiaqueri, iriguenti nintacaajiaqueri Amajirote, oquejevetaca yashirejacotaquena Amajirote sotorontsi.

¹³ Cotanquitsiquea naatimpa noshoshoguitevaeca teequea nontonquivojapojempari apitsaroventarite Tito, ariquea nocantajianajari choocajiatatsica oraniqui noanaquequea Maseroniaqui.

¹⁴ Noshineventajiacariquea Aapani Irioshi, nocanqueriquea: "Arioteesaa", yagavejacaajiaquenatari nagavejajiaqueriniji maasano catsimatashitarica, nontsipamajiacaritari Quirishito, irootaquequea yagavejacaantajiaquenaca nontsavetacojiaqueriquea iriatimpa, nontsitacaguitejavaetanaqueroquea maasano quepatsi.

¹⁵ Aquempetacaroquea casancajencaro. Iriaquea Aapani Irioshi ishineventajiacajiquea yamenajiacajiguete atsavetacojiaqueriquea Quirishito atsavetantimojiaqueriquea irimeshiajiaqueca aisa aatoca imeshiajiti.

¹⁶ Iriaquea aatoca imeshiajiti teequea irishineventavaquemparoji, yamenaquero quejetaca aajencatiroguete metojantatsica, cotanquitsiquea irirajia irimeshiajiqueca ishineventajiavacaro, oquempetomotacari aajencatiroguete oganijantatsica casancajencatatsica. Cotanquitsiquea ¿taampate agavejanquitsineca intsaroventacaajiaquempariquea itsipapae aatoguete irioquea agavejacaguiritsi Aapani Irioshi?

¹⁷ Choocajiatarite icaramirincavaeque amatavijantajiatatsica manaquea itsavetantamampeajiacaroquea intati, inintajiaque iraatajiaquemparoi imentaquipae. Cotanquitsiquea naatimpajia teequea nonquempejiguempariji iriatimpajia, manatarite itigarancajiaquenaquea Aapani Irioshi nontsavetantajiaquero Iguenquetsatsare. Itsaquequea iriatimpa arimajaca nocantamajaque teequea namataguempaji, iriguenti agavejacaajiaquena Quirishito.

3

Irimeshiajiqueriquea maasano tsaroventajiaquemparineca Quirishito

¹ Oraquea nocantajiaquempigueti imaica, aricaca pamenajiaque naroguentica semetajatsi nocanquegueti cameetsatia nochoocavaejigui. Teequea ariquea nonquempejiguempaji imaica, aisa teequea noncoguitejacojiguempaji nontigarancacaantajiaquempiroquea paperi itioncacojiquenagueti itsipa icantacojiaquena cameetsatia nochoocavaejigui. Ariquea oquempetaca aisa teequea nonintajigueji pintioncacojiaquenaquea aviatimpajia pintsavetacojiaquena nocomajamajajiacagueti.

² Aviatimpajiatari piquejejiacaró paperi itioncajitaquenaca, itioncajitaqueca noshirequi, cotanquitsi itsajiaquero maasano, quejetaca yapatsajavantaquero maasano.

³ Manaquea piquejetacaró paperi itioncaqueca Quirishito. Teequea intioncacotenaji paperiqui, cotanquitsiquea itigarancajiaquena notsavetantimojiaquempigueti, ariquea Ishire Aapani Irioshi anijatsica icantashitajiaquempi, jero itsatantajiacaca maasano tee namatavijanteji. Teequea intioncacotantajitenaroji mapicotaqui, manaquea oquejetaca iroguenti itioncacojiquena pishirequi.

⁴ Notsamajajiaque nocantajiaquempigueti imaica teequea noncantashitempaji, yamenaquenatari Aapani Irioshi notampaticamajiaqueroquea, iriguentitari agavejacaajiaquena Quirishito noquejetantajiacaca imaica.

⁵ Teequea noncanteji inchiquiojiquea nagavejajiaque naatimpajia nompeacaajiaquempa cameetsaripae, iriguentiquea agavejacaajiaquena Aapani Irioshi.

⁶ Yagavejacaajiaquenaquea ipeacaajiaquena tsavetantiroca iroaqueraro paaquito.* Teenicate onquejetemparoji iroquetinica tioncanquitsica mapicotaqui, ocaticaquea iroaqueraro yamaqueroquea Ishire. Oratica tioncanquitsica, aatogueti inetsanajitiro aanaqueri camorecariqui. Cotanquitsiquea Ishire Aapani Irioshi yanijacaanti.

⁷ Coramani itioncajiaquenerigueti Aapani Irioshi ishiraerijia maasanopae ininqueca irinetsanajiaqueca iriatimpajia, iroguenti itioncancaró mapicota, iroompaquea yojocaqueneri Moishishini irajaijanajeneri. Iroompaquea icoraquevetaja Moishishini ichoocajiaquegueti iriatimpajia tsirencashimpoquirerencavaetanaca icanca ivoroqui. Querocampate incohincoitaquempani iramenajiajavajerigueti, itsirencajiaipojaqueritari, cotanquitsiquea opeitanaja. Ocaticaquea ocatica itioncajiaquenerica Aapani Irioshi ishiraerijia iroguenti oquempetacaantajiaqueri maasano teeca irinetsanamajajigueroji, cotanquitsiquea oraquea yojocaquenerigueti Moishishini manaquea itsirencacaaqueri.

⁸ Oraquea yojocavecanarigueti quempetacaantantatsica ariqueate itsirencashimpoquirerejacaavaequeri, iroompaqueate yonigaimojiacajica Ishire Aapani Irioshi ashirejiaqui caaviji anaavaequero oganejencamajataca,

⁹ otsatacaajiacajitari yamenajiacaji Aapani Irioshi quempeca teeca ancovaeguishetimatempaji. Ocaticaquea ocatica caaviji anaaque oganejencamajataca, anaavaetaqueroquea yamenacaajiaquerica Aapani Irioshi ishiraerijia coramani yamajiaquenerigueti Moishishini itioncaqueca Aapani Irioshi quempetacaantajiaquerica maasano teeca irinetsanajigueroji.

¹⁰ Oganejencaveca itioncajiaquenerica otsatacaajiavecari quero icotani iriatimpa, cotanquitsiquea caaviji anaavaeque oganejencamajataca yonigaimojiacajica Ishire Aapani Irioshi imaica.

¹¹ Yojocavecanarigueti carapojatsineca itsirencashimpoquirerejacaavaevetacari, imaicompani ¿aatompate oganejencamajatatsi caaviji anaamajaque iroaqueraca coguitatsica? Anaavaequeroquea.

* **3:6** Oraquea **paaquito** iroguenti icantamajajitirica itsipa irinetsanamajajitenerica. Ocaticaquea **iroaqueraro paaquito** icantajiacajiquea Aapani Irioshi irishetacotajeri igovaeguishere maasano aventaventaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

¹² Notsajiaque arimaja onquejequempa, irootaquequea notsavetantajiaquegueti noguisotoamajatantacaroca caarica nopashiventacaantantaro.

¹³ Teequea nonquempejiguempariji Moishishini iticaacoquerogueti ivoro paañoqui aatoniji yamenajiguirotsi ishiraerijia ompeanajempatajate otsirencashimpoquirerejanequi.

¹⁴ Manaquea oquejeveca oticaacaguete paaño, icocani ishiraerijia arejeveca imaica yapatsajavantavetacarogueti iroquetinica paaquito itioncanaqueca Moishishini tee intsatacoteroji, quempetaca opaañotacotaca. Tequerataquea impaañoorejacojiteneriji, iriguentitari Quirishito paañoorejacoquerone antsarovenquempariguete, ironigaajiacajiro.

¹⁵ Yarejetacovaetaca imaica yapatsajavantajiavecarogueti itioncanaqueca Moishishini teequea inquemajigueroji, quempetaca ipaañoshirentacoca.

¹⁶ Cotanquitsiquea taacaguete pitsocashitanajemparine Amajirote, impaañoreshirentacotajeri, inquemamajaquero.

¹⁷ Iriaquea Amajirote iriotaque Ishire. Querica ichoocashirentajiaqueca Ishire Amajirote tecatsi omperaperaashirentajemparineca.

¹⁸ Ariquea oquejeveca ipaañoorejacojicaji atsirencashimpoquirerejanaque itsirencanequi Amajirote, icantashitatanacajitari anquejetantaquemparica iriatimpa, yoganajencatacaanacaji oavaetanaque anquejemajatantanaquemparica. Irioquea quejetacaacaroca Ishire Amajirote.

4

Paavoro tampatica yoaquero itsavetantavaequerogueti Iguenquetsatsare Aapani Irioshi

¹ Ipintsatacojiaquea Aapani Irioshi inintacajiaquea nontsavetantavaequero Iguenquetsatsare, irootaquequea pamentantajiaquenaca teeca noshimampojancajatempaji, teeca novashiantimajigueroji.

² Teequea noshineventemparoji isenacashijiguetacaca guipashiventantatsica. Teequea namatavitanteji, aisa teequea noncantashitatuemparoji Iguenquetsatsare Aapani Irioshi. Yamenajiaqueate iriatimpa aisa maasano caquinteji notampaticat-acotaquero notsavetantiroguete iroomajaca.

³ Cotanquitsiquea ariguete omanaca Quenquetsatsarentsi Oganejencatatsica notsavetantajiaqueca quempetaca ipashicapitsajitaqueri iguenquejanequi quemajiavetavacaroa, iriguentijia omanapitsajiacajira irirajia peajianquitsineca.

⁴ Iriaquea Satanashi icantajitica "irioshite quepatsiquitica" ishampocajashirentajiaqueri maasano teeca iraventempariji Quirishito, aatonijite yagavejajiguiti intsajiaquero Quenquetsatsarentsi Oganejencatatsica. Quejetacaquea tee irinejeroji tsirencari shiacaroca iroganejencare Quirishito quempemajatacarica Aapani Irioshi.

⁵ Teequea naatimpa tsavetantajatsineca, iriguenti notsavetantajiaque Jesoquirishito nocantajiaque iriguenti Imajirojiate maasano. Nantajiaqueneri Jesoshi jero nocantantajiacaca quempejiaca naroguentijiacajira paajanire, inintacaaquenatari namitacojiaquempi.

⁶ Iriaquea Aapani Irioshi irioquea cantanquitsi: "Ontsirenquempara pitsecamajaventanquitsica", aisa irioquea tsirencashirentacotacajira antsatantajiaquemparoca quero ocotani iroganejencare Aapani Irioshi otsirencashimpoquirerencavaetanaca ivoroqui Jesoquirishito.

Quero icoqueroni itsariventamajatacariguete Jesoquirishito

⁷ Quempetacaquea itejitajiroguete cavorejatatsica oganejencaro chomopitoqui ipeacaantajitacaca quepatsi. Mana noquempejiacaro chomo teeca ovegaramajatempaji, cotanquitsiquea oraquea notsavetanqueca iroguenti oganejencamajaro. Teequea

taaca opaji nagavejajiguempaji naatimpajia inchiqiojita, cotanquitsiquea yagavejacaamajaquenaquea Aapani Irioshi notsavetantajiaquerigueti cameetsaniji intsatimentajiaqueroniji teequea inchiqiojita nagavejashijiaquemparoji naatimpajia, iriguenti agavejacaajiaquenaqueate Aapani Irioshi.

⁸ Jero natsipevaevecaroqueate covaeguishetacaantatsica cotanquitsiquea teequea agavejajiguenaji, choocatirajana tsavetacotanatsinaqueate Quirishito. Aisa ochoocaveca oshequi noquenquejajiaqueca teeca nontsavetemparoji quero noncoqueroni, cotanquitsiquea tee noshoshoguiteteji.

⁹ Yatsipetacaavaequenaquea caquinteja, cotanquitsiquea tee intsinampirejenaji Aapani Irioshi. Aisa yoncaracaravaevequena, cotanquitsiquea tee irimetojajiguenaji.

¹⁰ Querocagueti noanoaitaqueni icatsimacatsimavaetaquenaquea iquempeta-caavaequena Jesoshi inintajiaque irimetojajiaquena, irootaquequea yamentajiacaroca ariquea noquempejiacari natsipevaeagueti. Cotanquitsiquea iriatimpajia teequea iragavejajiguenaji, irootaquequea itsatantajitacaroca iriraquea Jesoshi icocani ichoocati, iriguenti agavejacaajiaquenaca.

¹¹ Naatimpajia anijajajatsica, nocantacoguitani natsipevaejiaca icatsimajiaquenagueti, inintavecaquea irimetojajiaquename irooriji noguijatacomajaqueri Jesoshi. Noquejetantajiacaca cameetsaniji namenacaajiaqueriniji maasano teequea inchiqiojita nagavejajigueti naatimpajia, irioquea agavejacaajiaquena Jesoshi notsinometojanequi.

¹² Notsavetantavaequerigueti iroovepojaca irimetojajiquename, cotanquitsiquea aviatimpajia piquemisantajiaqueri irootaquequea pinchoocatantajiajempaca pincoguitempani.

¹³ Chooca itioncacojiqueca ocanque: “Notsatajimpi naventanaquempi, irootaquequea noquenquetsatantacaca.”[☆] Irootaquequea noquempetantajiacaca naatimpajia imaica, notsamajiaquequea caaviji yagavejamajati Aapani Irioshi, jero nontsavetacotantajiacarica.

¹⁴ Naatimpajia notsamajiaque iriraquea vochatajirica Amajirote Jesoshi imetojave-tacagueti inquempetacaajiajenaquea naatimpajia aisa, irivochajiajena intsipatsipaitanajena jenoqui ichoocatigueti iriatimpa, intsipatacaantajiaji ironigaantajiapojajaji.

¹⁵ Aviguentijia natsipeventajiacaca cameetsaniji inchoocajiaqueniji incaramirincatimentanaqueniji incavintsajiaqueca Aapani Irioshi, iroompaquea inchoocajiaque aisa incaramirincavaequequea cantajiaquerineca: “Arioteesaa”, ariqueate iramenajiaqueriquea iriatimpa caaviji icavintsajamajatanti.

¹⁶ Irootaquequea noquempetantajiacaroca imaica teequea noshimampojancomajatempani. Manaquea natsancotsinojiavetanaca, cotanquitsiquea noshirejiaqui itampishishirentacajaitanajana maasano savincaguiteri, ijananeshirentacajaitanajana.

¹⁷ Notsajiaque ocativa capichajaniqui natsipevaejiaveca imaica, taampina ompañajempa. Ompañiatantanaquempaca noshinevaetantajempaca ontaniqui inquitequi oganejencavaetapojajempa, noncoguitempani nonchoocajiapojaje, anaavaetajero maasano natsipevaevecaca.

¹⁸ Irootaquequea teeca nonintamajatantajiguemparoji yamenajigueticimaica, iroguenticaquea nonintamajajiaji teeca iramenajiteji. Maasanotari yamenajigueticimaica taampina onteroncaguetanajempa, cotanquitsiquea oraqueate tequerataca iramenajiteji aatotari oteroncatsi, oncoguitempaniquea onchoocaguiteni.

5

Paavoro itsamajaque irimetojanajegueti iroanaje inquitequi

[☆] 4:13 Sar. 116.10.

¹ Naatimpajia notsajiaque aricaguete irimetojajiquena oraquea notsinojia imaicatica avejancanajempa, mana onquempetaquemparo isoveajitiroguete quitsaarentsivanco, cotanquitsiquea onchoocataje notsinojia otsipa impeacaajempaca Aapani Irioshi inquitequi, oncoguitempani onchoocaguiteni, aatoquea oquejetajarotsi quitsaarentsivanco ipeacaacaca caquinte.

² Ocaniquiquea ocaniqui quepatsiqui noshimampojancaevaeca natsipevaeca nonintantajiacaca incantashitajiajajenaqueate Aapani Irioshi, onchoocaque notsinojia iroaqueraro, onquejetajemparo tsovironaquimajaca inquitequitica.

³ Onquejetajemparo aisa oitsaare noshire, nonquitsaatajempaguete aato nocarashirentajitsi.

⁴ Oraqueate choocatirajanaguete ocaniqui quitsaarentsivancoqui noshimampojancaevaetacaqueate natsipevaeca, cotanquitsiquea teequeate irooquea nonintajigueji irisoveajitero, iroguentiquea noninque nonchoocatantapojajemparo notsovironaquitemajaca inquitequitica. Aritarite choocatirajanaguete notsinoqui teequea nonintajigueji nometojajiaque avejancanajempa notsinojia, iroguenti nonintajiaveca nojoquijipanajantero noanoaitanaque inquitequi onchoocaque iroaqueraro notsinojia aatoca oteroncatsi. Ocaticaquea ocatica teequea onquishometojaneteji, cotanquitsiquea ontaniquiquea ontaniqui noncoguitempani nonchoocajiauiteni.

⁵ Iriiraquea peacaajiacajica cameetsaniji anchoocajiauiteni, irio Aapani Irioshi. Iriotaquequea aisa tigarancajiacajirica Ishire, atsatantajiacaca irinetsanamajaquero maasano otsipapae icantaguequeca icanqueguete quero oncotaquempapani oncoramanitapojajeguete.

⁶ Irootaquequea imaica nocantacoguitani notampishishirentanaque. Notsajiaque choocatirajana nochoocajiaqueguete ocaniqui notsinojiaqui tequeratamajaca nonconoamajatempariji Amajirote.

⁷ Imaica tequerata namenajiavetempariji cotanquitsiquea notsajiaque oncoramanitapojajeguete namenajiaqueri, noquemisantajiaqueri icanqueguete irajianaque-naquea iriatimpaqui.

⁸ Irootaquequea teequea nontsaroacajaiguemparoji nometojane, caaviji anaaque oganejena nojocanajero notsino noanoaitanaque ontaniqui jenoqui nonconoamajapojajempari Amajirote.

⁹ Irootaquequea nonintamajajiaquequea nantajiaque inintaguetica iriatimpa cameetsaniji noshinetacaajiaquemparinijite, ariguete choocatirajanaguete notsinoqui ocaniqui quepatsiqui irooca noanoaitanaque ontaniqui jenoqui nonintajiaque nonquempejiaquempaquea imaica.

¹⁰ Iriiraquea Quirishito yamenamajataqueroquea maasanopae taaca opaji antajiaquea tequerataca ametojajigueji, jero oncoramanitapojajeguete arejetapojajempaguete incapiocantajiaajica maasanojia, ancatintiitimojiaqueri imajirontamentoqui incantajiacaji taaca ontampaticajiacaji maasano, intsitacajiacaji.

Aapani Irioshi yamenajiacaji quempetaca teeca ancovaeguishedimatempaji

¹¹ Nocantacoguitani nontsaroacaamajajiacari Amajirote irootaquequea nopanquena-panquenaguitarini maasano caquinteja nontsaroventacaajiaquempari. Iriiraquea Aapani Irioshi itsamajatiro arimajaca nocomajamajajiac nontsavetantimojiaquempiguete teequea namatavijiguempiji. Imaica nonintajiaque pintsajiaque aviatimpajia aisa.

¹² Oraqueate nocantajiaque imaica teequeate nonintajigueji naatimpajia semetacojiajatsine noncantajiaquequea noganejencare nocojiaca nantajiaqueneriquea Amajirote, manaquea noncantajiaquempiquea aatoniji pipashiventacaajiganatsija, manaquea pishineventajiaquenaquea cameetsaniji pagavejajiaqueniji pimativicacajia-

queri irirajia cantimanajianaca. Iriatimpajia isemejiaque, cotanquitsiquea manaquea itsaromentamampeajia intati.

¹³ Oraqueate yamenajiaquenaguete iriatimpajia manaquea noshoncacojiaca, teequea noshoncacojiguempaji, iroguenti nantajiaquitinirini Aapani Irioshi noshinetacajiaquemparinijite. Oraqueate notsatacaamajajiaquempigueti aviguentijia noquenquejacojiaqueca cameetsaniji pintsaromentamajajianaquemparinijite Aapani Irioshi.

¹⁴ Ipintsamajajiaquenaquea Quirishito icavintsajamajajiaquenaquea, irootaquequea tigarancavaquenaca. Oraqueate imetojaventajiacajigueti Quirishito quempetaca aricaca ametojajiaque aatimpajia.

¹⁵ Imetojaventajiacaji maasano cameetsaniji imaica aatimpajia yanijashirentacajiaqueca aato asavicaventajiajiro anintajiaqueca, iroguenti asavicaventajiaque inintaguetica iriatimpa metojaventajiacajica ariquea ipochatanaji.

¹⁶ Irootaquequea teeca namenantajiguemparica itsipajia quejetaca yamenajiaqueri teeca intsaromentempariji Aapani Irioshi, teequea irooquea noshineventimentempariji aricaca yanaajencavaevetaca irooca tee. Ariquea noquempetacaajiavecari Quirishito coramani manaquea namenajiavecari tee iriomajateji, cotanquitsiquea teequea nonquempetajempaji imaica.

¹⁷ Irootaquequea noncantantajiaquemfica imaica iriraquea tsipashirentacarica Quirishito imaica, iroaquerashiretanaji icantanaja. Teequea inquempetajempaji coramani, icantashitatanajitari, maasano iroaqueratimotanajiritari.

¹⁸ Iriotaquequea quempequeroca Aapani Irioshi imaica. Itigarancaqueri Quirishito iraaajavajajinijite, yovetsinantantajiajajica. Imaica inintacajiaquenaquea nontsavetantimojianaqueri maasano irovetsinantantajiajemparica.

¹⁹ Itigarancaqueriquea Quirishito coramani acaniqui quepatsiqui irovetsinantajiaqueriniji quepatsiquitica cameetsaniji iramenajiaqueriniji quempeca teeca incovaeguishedimatempaji. Imaica inintacajiaquenaquea naatimpajia nontsavetantero quenquetsatsarentsi vetsinantantatsica.

²⁰ Irootaquequea imaica itigarancuimenquenaca Quirishito noncantajiaquempi inintacaaquemfica. Manaquea nonquenquetsatacaajiaquempi quempeca irioca cantanquitsica Aapani Irioshi. Intsishiatsi ininque Quirishito pivetsinantajiajerija Aapani Irioshi.

²¹ Iriraquea Quirishito teequea incovaeguishedimatempaji, cotanquitsiquea icatsimatimenqueri Aapani Irioshi agovaeguisherija, iquempetacaacari covaequisherija cameetsaniji irimetojaventajiacajiniji aatimpajia. Ariquea iquempetaquero imaica Aapani Irioshi cameetsaniji aventaventaquempariniji Quirishito iramenajiacajiniji Aapani Irioshi quempeca teeca ancovaeguishedimatempaji.

6

¹ Naroguentijia amitacojiaquemfica, irootaquequea noncantantajiaquemfica imaica, shoshoh pitsaromentamampeajiatijate intati, pipomatsajiguirotsijate icavintsajacotaquempigueti Aapani Irioshi.

² Icanquetari:

“Oraquea aapojacagueti savincaguiteri ocameetsatantanacaca nonquemaquempi, nonquemaquemfica.

Aapojacagueti savincaguiteri naantavajimpica, ariquea nocavintsajitsitimpiquea.”[☆] Imaicaquea imaica jac aapojaca ocameetsatantanacaca inquemaquemfica, imaicaquea aapojaca irantavajempica.

³ Teequea nantajigueti taaca opajita intivashirentajitaquempac aatonijite icantaguishtacogijana nontsavetantajiaqueguete.

[☆] 6:2 Is. 49.8.

⁴Maasanopae taaca opaji nantajigui manaquea nocomajamajaqueate cameetsaniji nonigaajiaquempariniji maasano arimajaca naroguentijia inintacaajiaqueca Aapani Irioshi nontsavetantavaetaqueroquea Iguenquetsatsare. Manaquea natsiperejaguitaroni taaca opajitapae coraquetashijiaquenaca: yatsipetacaajitaquenaquea, oconoaca nocoguitejacovaejiaca, natsipevaecaquea.

⁵Itavatavaavaejiaquenaquea catsimajiaquenaca, oconoacaquea manaquea isanatanatacojitaquenaqueate. Ochooacque manaquea itiavaejiapojana icatsimajiaquenaguete. Nantajiaque oshequi, otiavaetanaquenaquea pochoquirentsi manaquea aisa aajiavetanaquenaqueate notase.

⁶Cotanquitsiquea nococaniquea nocomajamajajiaca, aisa notsamajiaque iroomajatsica. Natsipetacovaevari catsimajiaquenaca, aisa nocavintsajamajiaqueriquea maasano, ichoocashirentajiaquenatari Ishire Aapani Irioshi yagavejacaajiaquenaqueate. Arimajaca nopintsatantamajajiaca.

⁷Nocantacoguitani taaca nocantajiaque arimajaca notampaticamajaqueeroquea teequea namataajiguempaji. Aisa icocani yagavejacaajiaquenaqueate Aapani Irioshi. Oquejevetaca nashimirintajiaca, najiricaquero nogotsirote notincamijempequiqui aisa noguisherite najampatequi aatoniji taaca quempevaetacagana.

⁸Oconoacaquea ishineventajitaquenaquea, oconoacaquea manaquea inintajiaque iroguipashiventajitaquena. Oconoacaquea icantaguishetacojitaquenaquea, oconoacaquea itsavetacojitaquena cameetsa. Oconoacaqueate aisa manaquea icantashijitaquenaquea: "Iriguentijia amataatsica", cotanquitsiquea nocantacoguitani notampaticamajaqueeroquea teequea namatavijanteji.

⁹Oconoacaquea ariqueate icantashijitaquenaquea: "Tee intsajiteriji", cotanquitsiquea maasano nontsavetantimojiaqueca itsamajiaquena quero nocojigani. Nococani nopajiavecaroquea nometojane, cotanquitsiquea choocatatsitirajana nochoocajiaji. Itavatavaajivetaquena, cotanquitsiquea tee irimetojajitenaji.

¹⁰Noshimampojancajiaveca, cotanquitsiquea nococani noshinevaeca. Teequea nashintajiavetempaji, cotanquitsiquea quempeca iroguentica naajarantacaajiacari itisipapae icaramirincavaeque, irooriji nopaguenquejanequeri. Teequea taaca opaji nashintajiguempaji naatimpajia, cotanquitsiquea Aapani Irioshi icavintsajamajaque-naquea, jero quempetaca naroguentica ashintajigaroca maasano.

¹¹Corintojiaquitica, nocamanquempiquea maasanopae, teequea taaca opaji nontsittimateji, nopintsamajiaquempi.

¹²Teequea nomashitsatapitsatimogiguempiroji pintsatagantsi nopintsajiaquem-piguete, aviguentijia quejejianquitsi, tee pimpintsamajajianaquenaji naatimpajia.

¹³Imaica noncantajiaquempi quempeca aviroca nirijanijiate. Nonintajiaque pimpintsamajiaquenaquea, pinquempejiaquenaquea naatimpajia nopintsamajiaquempi.

Aatimpajia aroguentijia itsovironaquite Aapani Irioshi

¹⁴Quejetaca irira ashintarica caapironcaari aato itsipatacaantari tampishitatsica aisa teeca intampishiteji titonquirontsiqui ishiguitiqui, ari pinquejejiaquempa aato pitsipamajajigari caarica tsaromentari Aapani Irioshi, teequea ariquea pinquejetavacaajiguempaji. Irraquea comajamajajiatsica ¿arimpate iragavejajiaque intsipatsipaitaque-mpari savicaventajiguiroca covaequisherentsi inquemavacaajiaquempaquea? ¡Aato-tarite yagavejitsi! ¿Arimpate agavejaque tsirencari onconoaquemparo pitsecari?

¹⁵Quempeca Quirishito ¿arimpate iragavejaque inconoaquempari Veriari* inquemavacaajiaquempaquea? ¡Aatoquea yagavejitsi! Ariquea iquempetaca aisa tsaroven-

* **6:15 Veriari.** Jero otsipa ivajiro imajirote ampatsinipae, icantajitiri aisa Satanashi. (Iguenquetsatsarequi quimajareri itioncajiquero **Belial** ocantiqui.)

tajiatsica ¿arimpate iragavejaque intsipatsipaitaquempari caarica tsaromentatsi inquemavacaajiaquempaquea? ¡Aatotarite yagavejitsi!

¹⁶ Oraquea iteemporote Aapani Irioshi, ¿arimpate ocameetsataque inchoocatantajiguemparo ipeajitica irioshivijirentsi intati? ¡Aatotarite ocameetsati! Aatimpajia aroguentijia iteemporote Aapani Irioshi anijaguitatsica.✠ Icanque Aapani Irioshi:

“Nonchoocatimojiaqueri nontsipatsipaitaquempari; iriatimpajia impeaquenaquea Irioshite intsaromentajiaquempaca, naatimpa nashintajiaquempari.”✠

¹⁷ Irootaquequea icantantacaca aisa Amajirote Irioshi:

“Pintsinampirejajianajerija pisotoapitsapanjanteri, pomporoguijashijianajempajate.

Aato pantajiguiro covaeguisherentsi.

Pinquempejiaquempaguete imaica naatimpa noshineventajiavaquempi.”✠

¹⁸ “Ariqueate nompeaquempaquea Piri,

nompejaiaquempiquea nirijanijiate aisa orijanijia.

Ariqueate icanque imaica Amajirote Agavejamajatatsica.”✠

7

¹ Imaica, nopintsajiacaca, atsajiaquero ocativa icanqueca Aapani Irioshi irinet-sanaqueca, iintsijate ampishoncamajianaqueroquea maasanopae covaeguisherentsipae irooca aquenquejaguishejiaqueca irooca apeacaaguishejiaqueca, maasanopae covaeguisheretaqueroneca atsino irooca ashire, manaquea antsarocaaajiaquemparija Aapani Irioshi ancomajamajianaquempa, isaancashirencajitarite.

Paavoro ishineventajiacariquea Corintoquitica

² ¡Pishinetacaamajatenaja pimpintsamajajiaquenajate! Naatimpajia teequea quericaca noncotimajigueriji, teequea querica noncovaeguisheretacaimatempaji, aisa teequea querica namatavijimajigueji.

³ Teequea irooquea nontionquimentajiguempiji noncantajiaquempiquea pipeacaaguishejiacaroguete covaeguisherentsi. Nocantajiaquempiquea coramani nopintsamajajiaquempiquea oshequi. Notsajiaque ancoquempani antsipatavacaaajiaquempaquea choocatirajajiajiguete irooca ametojajianajeguete ancoquempaniquea antsipatavacaaajiaquempaquea.

⁴ Notsamajajiaquequea piquemisantajiaquenaquea jero noshineventantajiaquempica. Natsipevaevetacaqueate cotanquitsiquea nocantacoguitani noshinevaeca, aviguentijiaquea shinetacaajiaquena.

⁵ Irooquea narejejiacaguete Maseroniaqui teequea nomagoremagorejiteji, ichoocajiaque icaramirincajiaque catsimajiaquenaca teeca intsaromentajiguemparija Quirishito. Aisa noshoshoguitejiaca nocanca notsaroaneguintavaetanaquequea.

⁶ Cotanquitsiquea Aapani Irioshi ishinetacaantatarite ishimampojancajitagueti, ishinetacaajiaquenaquea namenajiajavajiriguete icoraquetaji Tito.

⁷ Teequea aparo noshinejiaquempaji namenajiajavajiriguete, manaquea aisa icamantajiapojana pishinetacaajiacari iriatimpa, aisa pinintajigui pamenajiajena, pishimampojanca covaejiacaroquea notioncajiaquempica coramani pishoshoguitetimenta-jiaqueroquea pinintajiaque pinetsanamajajiaqueroquea maasanopae nocantajiaquempica cameetsaniji pishinetacajaiajenaniji. Iroompaquea irooquea noquemavaquitiguiquea noshinemajatanacaquea nocanca.

✠ 6:16 1 Co. 3.16; 6.19. ✠ 6:16 Irev. 26.12; Jer. 32.38; Esq. 37.27. ✠ 6:17 Is. 52.11. ✠ 6:18 2 Sam. 7.14; 1 Crn. 17.13.

⁸ Coramani notioncajiaquempiquea noshimampojancaajiaquempiquea, ariquea noquemacojiaquempigueti noshimampojanquitsitanacaqueate naatimpa aisa. Cotanquitsiquea teequea oncantacoguitempani noshimampojancaaguitempani, ariqueate piquempejiaca aviatimpajia teequea pincantacoguitempani pishimampojancaaguitempani.

⁹ Imaica shinevaetajana. Teequea irooquee noshineventempaji pishimampojancajiaqueti, iroguenti noshinevenca namenaquequea pishimampojancaavaetanacagueti pamenajiaquegueti pipeacaaguishejiacaro covaeguisherentsipae, iroompaquea picantashitatijaianaja. Oraqueate piquempejiacagueti imaica picantashitatijaianacagueti manaquea pishinetacaajiacari Aapani Irioshi. Irootaquequea noshinevaetantanaacaca namenaquequea teequea ariquea novashiantacaajiguemproji pitsaromentajiacarigueti.

¹⁰ Oraquea shimampojancaarentsi inintica Aapani Irioshi irooquee ashimampojancaacotaquemparogueti aguempevaere avashiantanajero cameetsaniji irishetacojiacajinijite iraaajivajaji aatoniji apejaiga. Oraticaquea shimampojancaarentsi aato aquenquejacotiro: “Aatomesano noshimampojanca.” Cotanquitsiquea irishimampojancahitanaquempagueti intati irirajia teeca intsaromentempariji Aapani Irioshi, mana irimetojashirentanaque.

¹¹ Aviatimpajia arimaja ishimampojancaajiguimpi Aapani Irioshi yamenajiaquempigueti pipeacaaguishevaecaroquee covaeguisherentsipae, iroompaquea pinintamajiaque pintsaromentajianaquempari pincomajamajianaquempa, osemajencatacaajianaquempi pamenaqueroagueti ipeacaaguishejicaca, aisa pitsaromentanaque. Iroompaquea pinintamajiaquequea noanaque nontsipatsipaitaquempi, cotanquitsiquea iroquetitaquea pinintamajatanaquequea pintampaticamajiaqueroquee nocantajiaquempica. Imaicaquea imaica pinetsanamajatanaquequea maasanopae, tee anejeri querocampate incatsimatimentajiaquempica Aapani Irioshi, jac comajamajajiaquempiquea.

¹² Oraqueate notioncajiaquempica teequea aparo nonquenquejajigueriji irira peaacaaguishetanquitsica covaeguisherentsipae, iriguentica aisa ishimampojancaacaca. Aviguenti noquenquejajiaque aisa noninquequea pintsamajiaque yamenaquempitari Aapani Irioshi arimajacaca pipintsamajiaquenaquea.*

¹³ Imaica noquemacojiaquempiquea piquempejiaqueroagueti imaica pishineventajiaquena, irooquee shinetacaajiaquenaquea, cotanquitsiquea caaviji noshinevaetanaca namenajivajirigueti Tito cameetsa icoraquetaji ishinevaetapaja, aviguentijiaquea shinetacaajiacari, paajivaqueri cameetsa pinetsanajivaqueriquea.

¹⁴ Oraquea tequeratagueti nontigaranqueriji Tito oraniqui aviatimpajiaqui nocanqueri: “Noshineventajiacari tsaromentajiatrica Corintojiaquitica, notsaque cameetsa iraaajivajempiquea.” Ariquea imaica yamenajiaquempigueti itsaque arimajaca nocamanquerica teequea namatavijeriji, manaquea noquempejiaquempi aviatimpajia teequea namatavitempiji.

¹⁵ Imaicaquea imaica iriatimpa caaviji ipintsajiaquempi, yamenaquequea piquemisantamajiaqueriquea taaca opaji icantajiaquempica, aisa paajivaqueri cameetsa, pishineventajivacari.

¹⁶ Naatimpa aisa noshineventajiaquempi oshequi notsaque pinintajiaque pincoquempani pisavicamentajiaquero inintaguetica Aapani Irioshi.

8

Icavintsajantajiaque Maseroniaquitica

* **7:12** Ochoocataquetari otsipa paperi iguenquetsatsarequi guiriego ocanti ocantiqui: “pintsamajiaque yamenaquenatari Aapani Irioshi arimajacaca nopintsamajiaquempi.”

¹ Imaica, napitsaromentarijiate, noninque noncamanquempiquea quero icocani Aapani Irioshi icavintsajajiaquerigueti tsaromentarijatsica capiocaguetanquitsica guinteninintsipaequi Maseroniaqui, jero ariquea iquempejiaca iriatimpajia ipintsatantajiacaca.

² Yatsipejiavecaquea iquemisantajiaquegueti, cotanquitsiquea ishinejiaca icanca. Teequea irashintajavetempaji cotanquitsiquea icavintsajantajiaque quempeca iroguentica yashintajiacaca.

³ Namenaquequea naatimpa manaquea yaagarantajiaquequea imentaquitsitepae itigarancacaantajiaqueneri irapitsaromentarijiate coguitejacovaetanquitsica. Teequea irioqueate iraagarantajigueti choocagarantajatsica ichoocataji teeca incoguitejacotempariji, yaagarantajiaque aisa icoguitejacovetacaca iriatimpajia.

⁴ Iroompaquea inchiqiojita icantacantajiaquenaquea inintajiaquegueti inquejijanaquempauea iriatimpajia incavintsajajiaqueri irapitsaromentarijiate guintenijiat-sica Jerosarequi.

⁵ Cotanquitsiquea teequea aparo irinintajigueti incavintsajajigueti irojocagarantajiaqueneri imentaqui, manaquea inintamajajiaque irantajiaque taaca opaji ininque Aapani Irioshi, aisa inintamajajiaque iramitacojiaquenaquea naatimpajia aisa, irootaquequea ininque Aapani Irioshi. Yanaitipojanaroquea noquenquejajavetacaca.

⁶ Jero noquenquetsatacanarica Tito iroanaquequeate oraniqui iramijiatempipi paagarantajiaque itsipa pimentaquitsitepae pintigarancajajenerija papitsaromentarijiate pinetsanajajerojate pipariajiavetanacaca coramani icantajiaquitimpica yoaquitigueti yamenajiaquitimpigueti.

⁷ Aviatimpajia caaviji picojiaca, caaviji pitsamajajiaque inetsanamajaqueroquea Aapani Irioshi maasanopae icantaguetica. Pitsamajajigueti pitsavetantajiaquerogueti Iguenquetsatsare Aapani Irioshi, aisa pitsamajajiaqueroquea queroca ocanque. Pishineventamajacarouquea pantavaequenerigueti Amajirote, manaquea aisa pipintsamajajiaquenaquea. Imaica noninque aisa pinetsanamajaquero ocatica pincavintsajantegueti pojocashiguetacananarigueti itsipapae.*

⁸ Cotanquitsiquea teequea noncantajigueti: "Iintsijate pinetsanamajajiaqueroja." Manaquea noninque noquenquejajiaquempiroquea quero icojiacani icavintsajantajiaquegueti itsipa papitsaromentarijiate pinquejetantajianaquemparica aviatimpajia, irootarite intsamajatanajitanaquemparoca arimajaca pipintsatantajianaca.

⁹ Pitsajiaquequea icavintsajamajaquempiquea Amajirote Jesoquirishito. Yashintamajavetacarouquea iriatimpa maasano coramani, cotanquitsiquea yojocapanajantiro iquempetacotapojacari teeca irashintimatempaji cameetsaniji incavintsajajiaquempiniji aviatimpajia, inquempetacajiaquempiniji ashintavaejiat-sica.

¹⁰ Imaica namenaque cameetsa pinetsanajiaqueroquea pipariajianacaca coramani cameetsaniji pishinejiaquempaniji, aviguentijiaquea nintajianquitsica iroaqueragueti paagarantajajeneri pimentaquitsite, iroompaquea ariquea pipariajianacarouquea.

¹¹ Imaica pincoquempanija paagarantajiaquenerija pinetsanajiaqueroquea pipariajianacaca aviatimpajia iroaqueragueti, pishineventajiacarotari. Inchiqiojijate pinquenquejajiaqueroquea aviatimpajia querocaca pagavejajiaque paagarantajiaque.

¹² Arimajacagueti netsana pinintamajajiaque pojocantajiaquequea, irishineventajiaquempiquea Aapani Irioshi querocaca pojocantajiaque. Iriraquea ashintamajatanquitsica irojocantaquequea oshequi. Iriraquea teemajaca irashintempaji capichajaniqui irojocantaque, teequea incanteji Aapani Irioshi pojocantajiaquequea teeca pashintempaji.

* **8:7** Pamenero 1 Co. 16.3. Icantajiaque Corintoquitica inintajiaque impintsatacojiaquempari irapitsaromentarijiate Jerosarequitica iraagarantajiaqueneri imentaquitsitepae intigarancajiaqueneri.

¹³ Teequea ariquea noncantajiguempiji pincavintsajajiaquerijate itsipapae papitsarorentarijiate cameetsaniji onchoocaquenijite icoguitejacojiacaca iriatimpajia ariquea aviatimpajiaquea atsipejianquitsineca pincoguitejacovaeguitempañi.

¹⁴ Iroguenti noninque pinguempetavacaajiaquempaquea. Imaicaquea imaica aviatimpajia pashintajiaca jero picavintsajantajiacarica papitsarorentarijiate, cotanquitsiquea iroompaquea ariqueate avirogueti coguitejacojianquitsineca irioqueate cavintsajajiajempineca. Pinguempējaquempaguēti imaica ariquea iroguenti manaquea pinquejetavacajiaquempa.

¹⁵ Otioncacatarite: “Irraquea aamajatanquitsica teequea onchoocatajeji choocatajatsica. Ariquea iquempetaca aanquitsica capichajaniqui teequea interoncacotempaji.”✧

Iroajate Tito iramenajiajateri

¹⁶ Noshinevencari Aapani Irioshi namenaquequea iquenquejacaqueriquea Tito iquenquejacojiacquempi iquempetaquenaquea naatimpa noquenquejacojiacquempiguēti.

¹⁷ Jero ishinevaetantacaca nocanqueriguēti nonintaveca iroajateja iramenajiaquempañi, irootaquequea inintamajaque iriatimpa.

¹⁸ Nontigarancajiaqueri aisa itsipa papitsarorentarite intsipatanacquempaca. Ishineventamajiacari maasano tsarorentajiatsica capiocapinijiatsica, icamantacojiacquériquea yamenajiaqueriquea caaviji itampishiventamajaquero Quenquetsatsarentsi Oganejencatatsica.

¹⁹ Cotanquitsiquea teequea aparo onchoocateji ocatita, inintacaajiaqueriquea aisa nontsipatanajempañi oncoramanitapojajeguēti naajianaqueneriguēti imentaquipae pojocashijiaquenempañica coguitejacojianquitsica. Ariquea nonquempējaquempaquea imaica cameetsaniji iramenajitaqueriniji Amajirote caaviji icavintsajantavaēti ariquea irishineventajitaquempañi, aisa cameetsaniji iramenajitaqueroja arimajaca nonintajiaque naatimpajia noncavintsajajiaqueriquea apitsarorentarijiate.

²⁰ Noshinevaeca intsipatsipaitanaquenaquea aatoniji icantaguishetacotimentanaritsi imentaqui iriraquea aagarantajiaquerica.

²¹ Teequea aparo nonintajigüeji iramenajiaquenaqueate Amajirote nocomajamajaca, iroguentiquea nonintajiaque intsamajiaque caquinteji aisa.

²² Imaica nontigarancaqueri aisa itsipa apitsarorentarite intsipatsipaitanaquempañi, namenamajiaqueriquea iriguēti caavijica itsarorentamajatarĩ Aapani Irioshi. Aisa nocamantaqueri caaviji pinintajiaque pincavintsajajiaqueri papitsarorentarijiate, irootaquequea inintantacaca iroaquite oraniqui iramenajiaquitempi.

²³ Iricatica Tito, iriguēti notsipamajare nantiniriguēti Quirishito noconoajiaquempiguēti. Irirajia apitsarorentarijiate intsipatsipaitanaquempaca iriguēti itigarancajiaqueca tsarorentajiatsica capiocapinijiatsica guinteninintsipaequi. Iriatimpajia caaviji itsarorentamajatariquea Quirishito.

²⁴ Irootaquequea noncantantajiaquempica imaica netsanaja paamajajiaqueri cameetsaniji intsajiaqueniji maasano tsarorentajiatsica capiocapinijiatsica arimajaja notampaticamajaqueroquea nocantajiaqueriguēti caaviji pipintsamajatanaca.

9

Incapiocajiaqueri imentaquitsite intigarancacaantajiaqueneri irapitsarorentarijiate

¹ Nocantajavequempi imaica cotanquitsiquea notsaque teequea pincogumentacogiguempañoji nontioncaciaquempiquea noncantajiaquempi paagarantajiaquenerijate pimentaquitsitepae papitsarorentarijiate.

² Notsamajaque caaviji picavintsajantajiaque. Nocantantajiacarica apitsarorentarijiate Maseroniaquitica pinintamajiaquequea aviatimpajia guintenijiatsica

✧ 8:15 Eeq. 16.18.

Acayaqui paagarantajiaqueneriquea pimentaquitsitepae Jerosarequitica, pipariavaetanacaroquea otsipaniqui ajagantsiniqui. Oraqueate iquemajiaquegueti iriatimpajia ariqueate inintagarantajiaque inquempejiaquempiquea aviatimpajia iraagarantajiaqueneriquea iriatimpajia aisa.

³ Irootaquequea imaica nontigarancantajiaquemparica apitsarorentarijiate irami-
jiaquempiquea paagarantajiaquerigueti aatoniji manaquea intati noncamanqueri
Maseroniaquitica pinetsanajiaqueroquea maasanopae.

⁴ Noncoraquequetaarite namenajiaquempiquea aricaquea nontsipagarantajiaque-
mpari Maseroniaquitica. Oraqueate noncoraquecoraqueivequempagueti arigueti na-
menajiapojempiquea teequea pinetsanamajajigueroji nocantajiaquerica, manaquea
ovashiventajavaetanaquenaquea, ariqueate pinquempejiaquempaquea aviatimpajia
ovashiventajavaetanaquempiquea. Iroompaquea noncanque: “Arimpate nocanque
irinetsanajiguerojate maasanopae.”

⁵ Irootaquequea namenantacaca aricaquea cameetsaca nontigarancajiaqueri iri-
atimpajia apitsarorentarijiate iriquetitaquea oahoaitanquitsineca iramenajiaquem-
piquea iramijiaquitempi paagarantajiaquerigueti pimentaquitsitepae pinetsanamaja-
jiaqueroquea picantajiaqueca coramani. Pinquempejiaquempagueti imaica intsaji-
queroquea inchiquiojita aviatimpajia pinintajiaque pincavintsajantajiaquequea, tee-
quea naatimpajia cantajiguempironeca.

⁶ Iintsija pinquenquejajiguerojate ocatica:
Quericaca vintyacatsica capichajaniqui,
capichajaniqui iraaaje.

Iiraquea vintyacamajatatsica,
oncarapiovaetanaquequea iraaaje.

⁷ Inchiquiojiquea pamenajiaquempa aviatimpajia querocaca incarajigueni pimen-
taquitsite pinintajiaque pojocagarantashitantempa, irooquea pojocantajigue; cotan-
quitsiquea aatoja picatsimajencatacojiguiritsijate pojocantajiaquegueti. Aisa aatoja
irooquea pojocantantajiga pamenajiaquegueti incantajitaquempi: “Pojocantetsija.”
Iiraquea Aapani Irioshi iriguenti ishinevenca shinevencaroca irojocantavaetaque-
queafe.

⁸ Yagavejaquequea Aapani Irioshi incavintsajamajajiaquempi cameetsaniji pagavejaji-
aqueniji pincantacoguitempani pincavintsajantajiaque aviatimpajia aisa. Irioquea os-
hequiajempirone pincoguitejacojiaquempaca onchoocatantaquempaca otsipa cameet-
saniji pojocagarantajiaqueneri coguitejacovaetanquitsica.

⁹ Otioncatari:

“Ipintsatacotacari coguitejacovaetanquitsica yojocaguetaqueneri;
itampaticamajataquero yoaquero, ariquea incantacoguitempani.”

¹⁰ Iiraquea Aapani Irioshi iriotaquequea jocaqueneri vintyacatsica oitsoqui aisa
ishecaguetacaca, ariquea inquempetacaquempiroquea aviatimpajia aisa, iroshequia-
queroquea pashi pincavintsajacomajatantanaquemparica itsipajia.

¹¹ Arimajaca iramitacoguetaquempiquea Aapani Irioshi onchoocamajaqueniji can-
tashitatiaguetatsica cameetsaniji pagavejajiaqueniji pincoguitempani pincavintsajan-
tajiaque. Oraqueate arejetapojaquempagueti naajianajenerigueti paagarantajiaque-
nerica papitsarorentarijiate irishineventamajajitaquempariquea Aapani Irioshi in-
cantajiaque caaviji ipintsamajatantaca.

¹² Aritarite pojocantajiacanarica, teequea mana pojocajigueneri intati icoguiteja-
cojiacaca igomajamajarejia Aapani Irioshi, irooquea onquenantanaquempaca aisa
incantantajiaquemparica: “Arioteesa, Aapani.”

¹³ Ariqueate iramenajiaquegueti pintigarancacaantajiaqueneri pimentaquitsite
intsajiaque teequea pimashitsajiguempaji manaquea pipintsajiacariquea iriatimpajia
aisa maasano tsarorentajiatsica, ariquea irishineventajiaquempariquea Aapani

Irioshi iramenajiaquetari tee pincantashijiguempaji intati: “Noquemisantaquero Quenquetsatsarentsi Oganejencatatsica tsavetantaquerica Quirishito”, iroguentiquea iramenajiaque arimaja pitsaromentamajiacari Quirishito pinetsanamajaqueroquea icanqueca.

¹⁴ Ariqueate iramanacoventajiaquempiquea impintsamajajiaquempi iramenajiaquempigueti picavintsajajiaqueri, iriguentitari chagashirentajiaquempiquea Aapani Irioshi piquempetantajiacaroca imaica.

¹⁵ ¡Jaameshiatsi ashineventajianaquemparija Aapani Irioshi, ancantajiaqueri: “Arioteesa”, caavijitari ipintsamajatantaca!

10

Icanque Paavoro iriguenti tigarancaqueri Quirishito

¹ Imaica naatimpa Paavoro noncantajiaquempigueti nonintacotaquempica, noninquequea nonquejetaquempari Quirishito yatsipetacovaetagueti icavintsajantigueti. Icantacojivetaquena notsaroanaque nochocatomojiaquempigueti, cotanquitsi nochocaquegueti osamani notampishivetaca.

² Nonintaquequea nonchocatomojiaquempigueti aato noshiramparitimogiuimpi noncantomajajiaquempiniji, irirampani jivetanquitsica noguijatacotiro iquenquejaguetica caquinte, arica irioquea noncantomajajiaipojaque.

³ Arimajasacanica naroguentijia caquinte, cotanquitsiquea teequea nonquempejiguempariji itsipajia caquinte nashimirintempagueti.

⁴ Nashimirintamentopae teequea onquejetemparoji yaventajiacaca teeca intsaromentempariji Aapani Irioshi, iroguentiquea navenca itampishica Aapani Irioshi, nagavejantacarica tampishijiavetatsica.

⁵ Nagavejajiaqueriquea maasano teeca irishineventemparoji Iguenquetsatsare Aapani Irioshi manaquea itampishitashijiavetavacaroquea. Jero yagavejacaantajiaquenaca cameetsanijite nomajeretacaajiaqueriniji maasano ticaticaaquerineca itsipajia aatoniji itsajiguri Aapani Irioshi. Iquenquejaguetaqueca caquinte oquejevecariquea ashimirintavecajica aajivaqueca. Yagavejacaajiaquenaquea aisa Aapani Irioshi nagavejajiaqueriquea quenquejaguishejiatsica covaequisherentsi cameetsaniji aatoniji iquenquejaguishevaetajitsi irioquea inquemisantamajajianaque Quirishito.

⁶ Iroquetitaquea noninque pinquemisantamajajianaqueriquea, iroompaquea noncantimentsijiguempariquea irirajia maasano pigatsatacarica.

⁷ Aviatimpajia pijijiaqueji pitsajiaque, cotanquitsi tee pamenamajajigueroji. Cotanquitsiquea choocagueti amenanquitsineca iriguenti tigarancaqueri Quirishito, iintsijate intsaque iriatimpa itigarantquitsijianaquea naatimpajia aisa.

⁸ Choocagueti quenquejashitanquitsica: “Mana isemetaque”, nocantajiaquempigueti iriguenti tigarancajiaquenaquea Amajirote, cotanquitsiquea teequea ovashiventajenaji nocanqueca, arimajacatari iriguenti tigarancajiaquenaquea yagavejacaajiaquenaqueate nontsatacajiaquempi arimpaqueate pintsaromentamajajianaquempari pintsipatavacamajajianaquempa, aatoquea nopeacotacajaiguimpro pitsaromentajiacarigueti pincampanajante pintsinampirejavacaajianaquempaquea.

⁹ Teequea noninteji onquempetimojiguempi notioncajiaquempi nomintsaroajiaquempiniji.

¹⁰ Iconoagarantajiacatari icantajiaque: “Oraquea itioncajianaqueca Paavoro ooqueate itampishijaniquique icatsimajiaquenaquea, cotanquitsiquea oraquea ichoocagueti quempeji itsaroaque teequea intampishiteji, aisa teequea intsatimateji inquenquetsateji.”

¹¹ Cotanquitsiquea imaica noncantajiaqueriquea irirajia cantajianquitsica imaica, noncoraquequegueti oraniqui aviatimpajiaqui, ariqueate nonquempetacaajiaquem-
pari notioncajiaquempica nontampishimajaquequea noncanquempa.

¹² Naatimpajia aatoja noquempejigaritsi irirajia aventajiatsica cantajiatsica: “Not-
sajiaque nocanca”, inchiqiojitaja icantajiaja iriatimpa. Iriatimpajia yamenavacaave-
taca ijiquejeji irioji cameetsari, cotanquitsiquea teequea intsatimateji taaca opaji cameet-
satatsica, aisa taaca opaji covaeguishetatsica.

¹³ Naatimpajia teequea nonintajigueji nosemejigue nonquempējaquemparimequea
iriatimpajia. Oraqueate nocantacojiaquerogueti nantajiaquenerica Amajirote, teequea
nonquenacaashitemparoji, manaquea tampatica noajiaquero, iriguenti cantanquitsi
Aapani Irioshi iroaqueragueti querocagueti oraniqui nonchoocajiaque nontsavetanta-
jiaquerogueti Iguenquetsatsare, jero arejetantajiacaroca oraniqui aviatimpajiaqui.

¹⁴ Oraquea aatomegueti nontsavetantimojiguimpimequea, ariquea iroguenti
manamequea noncanqueme intati naatimpajia tsaromentacaajiaquempi,
cotanquitsiquea teequea ariquea nonquempetempaji imaica, narouquetitarite
itigarancaqueca Amajirote nontsavetantimojiaquitempiroquea Quenquetsatsarentsi
Oganejencatatsica tsavetantirica Quirishito.

¹⁵ Teequea ariquea naitshivacotantimateji noncantajiaque naroguentijia tsaroven-
tacaajiacari itsavetantimojiaqueca itsipa. Imaica manaquea nonintamajajiaque
pintsaromentamajajianaquempari cameetsaniji nontsatacajiaquempiniji otsipa non-
tampishitacaajiaquempiniji arimpaquea pintsaromentamajajianaquempari.

¹⁶ Iroompaquea namenajiaquempigueti pinquempejiaquempaquea imaica, ariquea
noanoaitaque osamanipaequi tiijaconñajisano ontaniqui ichoocajiaquegueti tequerataca
intsavetantimojiteriji noncamantaqueriquea iriatimpajia aisa Quenquetsatsarentsi
Oganejencatatsica. Manaquea nonquempējaquempaquea imaica aatoniji nopinajava-
covaetantatsi.

¹⁷ Irira shineventacotatsica, iriguenti irishineventacotimentempa Amajirote.✠

¹⁸ Aatoquea irio ishineventajita irira cantacotatsica: “Caaviji nonetsanamajatiro.”
Iriguentiquea irishineventajitempa incantacotaqueca Amajirote: “Caaviji inetsanama-
jatiro.”

11

Paavoro aisa irirajia tsavetantamampeajiatsica

¹ Teequeate nonintavetempaji nonquempetaquempariquea aventacovaetatsica
intati, cotanquitsiquea pantsipetacovaejiaquenaquea nonquempetaquempagueti
imaica.

² Oshequi nagamajacotaquempi, irira Aapani Irioshi quejetacaaquenaro, namena-
queroquea naroguenti tsaromentacaajiaquempica jero nonintantacaca apaniro poa-
majaqueri Quirishito cameetsaniji oncoramanitapojajegueti incoraquetajategueti ira-
menajiapojajempiniji comajamajajiaquempiquea quempejiaquempiqueate majinaro
comajamajatatsica, aparo oguijaqueri manquigataquemparoneca.

³ Pinquenquejerija coramani iriraquea camaarini* manaquea yamatavijaquero
Evani icovaeguishevaetacaacaroquea, irootaquequea notsaroantacaca imaica name-
naque choocagueti irirajia amataajiatsica inquempetacaajiaquempiquea aviatimpajia
aisa, iroompaquea pinquenashijianajempa aatoquea quisho poajiajiriti Quirishito,
aatoquea pitsaromentajajari.

⁴ Namenajiaquempitari iriguenti pishineventamajajiaca iriatimpajia. Oraqueate
itsavetantajiavecarigueti Jesoshi teequea intampaticateroji iroajigueroji, quempetaca

✠ 10:17 Jer. 9:24. * 11:3 *camaarini*. Pamenero Jen. 3:1-7. Iriraquea Satanashi yonigaacaroquea Evani,
iquejetapojacari camaarini.

iriguentica itsipa itsavetantajiaque. Ariquea oquempetaca aisa manaquea pinintajiaquequea irishaquiajipojempiquea itsipa teeca irioquea Ishire Aapani Irioshi choocashirentajiavequempica iroaqueragueti. Aisa piquemisantamajajiaguitirini tsavetantajiavecaroca otsipa oganejencavetatsica teeca onquempetemparoji Quenquetsatsarentsi Oganejencatatsica notsavetantimojiaquempica piquemisantajiaqueca iroaqueragueti.

⁵ Cotanquitsiquea namenaque teequea iranaajiguenaji irirajia tsavetantajiaatsica amenajiaatsica iriguentijia itigarancanemajaca Jesoshi.

⁶ Arica tee nonquenuetsavetempaji cameetsa notsavetantigueti, cotanquitsiquea oraquea notsaqueca cameetsavaeque onaque. Irootaquequea pamentantajiaque-naca notsatacaajiaquempigueti, noguiconejamajataquempiro.

⁷ ¿Arimpate pinejaquero tee oncameetsateji teegueti novegaratacajaguempiroji not-savetantaquempirogueti Quenquetsatsarentsi Oganejencatatsica itigarancaqueca Aapani Irioshi? ¿Arimpa pinejaquero iroguenti coguisherentsi teegueti nanaajencajia-po-jaquempi, aviguentiquea nanaajencatacaajiaipojaque?

⁸ Aisa manaquea quempeca iroguentica naapitsajiaqueriquea imentaquitsitepae tsarorentajiaatsica osamanipaequitica, yojocajiaquenatarite cameetsaniji onchoocaqueniji nocoguitejacocaca nagavejaquenijite nontsavetantimojiaquempiniji aviatimpajia intati.

⁹ Quempeca nocoguitejacovaecagueti teequea ariquee nasereseretempiji namana-jiaquempiquea. Oraqueate icoraquecoraqueiquegueti apitsarorentarijiate Maseroni-aquitica ariquee yojocajiaquenaquea. Ariqueate noquempetaqueroquea coramani tee-quea noninteji nasereserejiaquempi, imaica nococani noquempetaqueroquea imaica.

¹⁰ Notsamajaquequea iriguenti nintacaquenaquea Quirishito nontsavetaco-queriquea, ariquee oquempetaca aisa notsamajaque teequea namataguempaji. Irootaquequea noncantantajiaquempica imaica naatimpa aatoja yojoquimajiganatsi imentaqui guintenijiaatsica Acayaqui, aatonica nonintitsi, iroguentiquea noninque nontsavetantimojiaquempiquea intati.

¹¹ ¿Queroquea ococani noquempetantacaroca imaica? ¿Arite teete nompintsamaja-jiguempiji? ¡Iriraquea Aapani Irioshi itsamajaque arimajaca nopintsamajaquempiquea!

¹² Cotanquitsiquea arimpaquea nonquempetanaqueroqueate imaica aatonica non-intsijiguimpiritsi pimentaquitsite cameetsaniji aatoniji yagavejajiguitsi semejiatsica tsavetantamampeajiaatsica intati incantajiaque: “Manaquea noquempejiacari Paavoro nontsavetantajiaquegueti.”

¹³ Iriguentijia amatavijantajiaatsica, teequea irioquea tigarancerine Aapani Irioshi, manaquea ipeamampeajia intati itigarancanejia Quirishito.

¹⁴ Iriatimpajiaquea caaviji iquempejiaca imaica, quempeca Satanashi ariquate iquempetamampejaariquee irashivantite Aapani Irioshi iramatavijanquenijite.

¹⁵ Ariquate iquempetacaquea iriatimpa imaica, jero irirajia antajigunirica ariquee inquempējaquempa iriatimpajia aisa impeamampeajiaquempa quea tsatacaantanta-jiguiroca comajatagantsi, cotanquitsiquea incatsimamajajitaqueriquea oncoramani-tapojajegueti, yamatavimatavitantavaequetari.

Paavoro yatsipeventavaetacaroquea itsavetantavaetaquegueti

¹⁶ Noncantsijiajempiquea aisa aatoja pijijiguitsijate ariji nopigataca intati, pantsipetacovaequenaquea nonquempetaquempagueti imaica cameetsaniji naventacovequitempanijite capichajaniqui.

¹⁷ Oraquea nocanqueca imaica teequea irioquea cantenane Amajirote inchiquioji-taquea nocanque naatimpa naventacoquempagueti quempequenaquea naroguentica shoncacori.

¹⁸ Quempetaca irirajia catsimajiaquenaca icantaguishetacovaequenaguete icantacoguitani yaventacojiaca, irootaquequea namenantacaca aricajate nonquempetaquempajate naatimpa naventacotempajate.

¹⁹ Aviguentijia tsajiavetatsica, patsipetacotantavaevecarica irirajia shoncacorijia, aisa pishineventajiacari.

²⁰ Aisa patsipetacojiaca yomperaperaivaequempiguete quempeca irioca ashintajigui-
impi, aisa yamanamanavaequempiquea cantashitatiaguetanquitsica taaca opaji inin-
tajiaquea, manaquea aisa yanaajencavaetaquequea, ariquea aisa yapatoncavorotsi-
jiguiimpi.

²¹ Aricaquea pinintajiaveca aviatimpajia nonquempejiaquemparimequeate iriatim-
pajia, cotanquitsiquea teequea nagavejeji, teequea ariquea nonquempejiguempariji
iriatimpajia itampishijiguete.

Manaquea noncantajiaquempiquea aisa taaca opaji yaventacojiaca iriatimpajia,
ariqueate nonquempetaquempa naatimpa naventacovaequempajate (iroguenti no-
quenquetsaque quempeca naroguentica shoncacori).

²² Irooguete yaventacojiaca icantajiaque iriguente evereojia, ariqueate noquem-
petaca naatimpa aisa naroguenti evereo. Irooguete icantajiaque iriguente ishiraerijia,
ariqueate noquempetaca naatimpa aisa naroguenti ishiraeri. Irooguete icantajiaque
iriguente ichoviquijianaquea Averaameni, naatimpa naroguenti aisa ichoviquini.

²³ Arica icantajiaque iriguente yantajiaquene Quirishito, ariqueate noquempetaca
naatimpa aisa iriotaquequea nantaquene, cotanquitsiquea caaviji nanajiaaqueri
iriatimpajia. Manaquea noquempetacari shoncacotatsica noquenquetsaqueguete,
cotanquitsiquea caaviji nanajiaaqueri nantiniri Amajirote. Aisa caaviji nanaaque
naatimpa itavatavaavaetanaquequea, aisa isantanatacojitanaquenaqueate. Aisa caav-
iji nanaaque natsipevaeguitaniqueate irooshivetapojaca irimetojajitenamequea.

²⁴ Ipasapasavaetaquenaquea nogonorojia joriojia agompiaquitana ocaravaeque 39.
Yaitsitajanaquea aisa yarejetacaavaetanaro 5.

²⁵ Ariquea oquempetaca aisa itavatavaajitaquenaquea inchaquijiqui, yarejeta-
caavaequenaro 3. Itsipajia itsinatsinavaejiaquena. Ocarataque 3 notsitijaatacov-
etanaca quenajaronsiqui noquenajatantavetanacaca. Aisa notsitijaatacotanaqueguete
ontaniqui niganquijaqui inirojani quantijani teequea noncatimatajempaji nagatsita-
jempaji, manaquea nopitsecacotanaque apajencaro aisa nocantacoguitani namajagui-
tini apajencaro savincaguiteri.

²⁶ Oshequi noquenaguetanaque. Ochoocaguetaque covejencaguetatsica: chooca
covejencatatsica ojaaquiniqui, chooca aisa aitsitantaguetatsica senacashitaquenaca.
Irraquea nogonorojia iquejetsijianacaquea iriatimpajia aisa, irooshivetapojaca irime-
tojaquename. Ariquea iquempejiaca itsipapae caquinteja teeca irioquea nogonorojia.
Choocaquea covejencatatsica nochoocaqueguete guinteninintsipaequi, aisa noanaque-
guete teeguete inchoocamajateji caquinte, chooca aisa noquenajatanaqueguete iniro-
janiqui quantijaniqui. Aisa ariquea iquempejiaca cantajiavetanquitsica iriguente
tsaromentajatsica inintajiaveca irimetojajiaquename.

²⁷ Natsipevaeca nocanca nantaqueguete, natsipevetacaroqueate taaca opajitapae.
Otiavaetanaquenaqueate novochoquire, aisa otiavaetanaquenashiatsi notase aisa
nomire. Oconoacaquea nosavicashitacaqueate intati teequea noshecatimajaniquit-
empaji. Natsipevaecaro catsincaguiteri, aisa nocajaratsinovaetanaque.

²⁸ Teequea aparo nantsipetemparoji ocaticapae, manaquea oavaetanaque savinca-
guiteri qui noquenquejacojiaqueriquea aisa maasano tsaromentaripae noshoshoguite-
timentajiacari.

²⁹ Quericaca noquemacoqueca teeca intampishiteji irooca yojoquijitaca oquejeti-
motaquenaquea naroguentime joquijitanquitsi. Quericaca noquemacoqueca icov-

aeguishetacajaicari manaquea ocatsishirentavaetanaquena.

³⁰ Oraquea naventacoquempamegueti iroomecaquea naventacoquempame name-naquequea teequea nagavejeji.

³¹ Iriiraquea Aapani Irioshi Iriri Amajirote Jesoquirishito itsaque teequea namatavijanteji. Iriatimpa caaviji yoganejencamajataca ancoquempanija ashineventajiaquem-parija.

³² Oraqueate coramani nochoocagueti Tamashicoqui iriraquea iramajirore majirontatsica Aretashi itigaranquitsijiavecari igoaretajiate isenacashijiaquenaquea so-tomorontsiqui yanquitsaegotatantarogueti mapi ocapiocagueti tsovironaquipae iraa-jiavaquenamequeate irisantanatacojiaquenamequea.

³³ Cotanquitsiquea iriraquea napitsaroveritarijiate itetsijianaqueate cantiriqui yoguisotoacotsitana ishagaraquirejajiquerogueti yoguivarintsajacojiaquenaquea yovan-quirejacojiaquena antaqueronta noshiapitsatapanajantari.

12

Paavoro itsavetantajiro yonigaimojiquerica

¹ Teequea nonintavetempaji nosemetaque namenaquequeate nosemevequem-pagueti ariquea queroca noncoqueroni, cotanquitsiquea imaica irooqueate nontsavetacotaque yamenajiguetaqueca quejevecaroca yoguimaacagueti aisa yonigaantaqueca Amajirote.

² Notsataqueri irira shirampari yashintacaca Quirishito, ocoramanivaetapojaque-gueti ocarataque 14 ajagantsini imaica, yatsomajajitaquitiri inquitequi jenoquima-jatanquitsica, cotanquitsiquea teequea nontsateji aricaca yatsomajajitanaqueri maasanotsino irooca yaashirentajitanaqueriqueate, aparo itsaquequea Aapani Irioshi.

³ Noncantsijajempiquea aisa, teequea nontsateji aricaca yatsomajajitanaqueri maasanotsino manaca yaashirentajitanaqueriquea, aparo itsaquequea Aapani Irioshi.

⁴ Iroguenti notsaque arimajaca yatsomajajitanaqueriquea ontaniqui jenoqui paraisoqui,* ariquea oraniqui iquemagueque cantashitatiejencaro iquenquet-sajencajitaquegueti, cotanquitsiquea teequea iragavejeji caquinte incante queroca icantajiqueni, teequea irininteji Aapani Irioshi intsavetantero.

⁵ Nagavejaque nontsavetacoteri quempecarica, cotanquitsiquea aatoquea nosemetitsi, iroguenti nosemetacoquempaquea namenaquegueti teequea nagavejempaji.

⁶ Arimegueti noninquemegueti nontsavetacotaca maasano cameetsaguetatsica nantaguetaqueca, aatomequea querica agavejatsi incanque manaquea isemetaque intati, arimajacatari nocantamajati nontsavetacotagueti. Cotanquitsiquea aatoja noque-jetimatirotsijate imaica aatonijite pitiavaetacaantajigarotsi pishineventajianaquena, iroguentiquea noninque pishineventajiaquemparoja pamenaqueca nantaguetaqueca aisa nocanqueca.

⁷ Oraqueate yonigaimoquenaca Aapani Irioshi caaviji oganejencamajataca oacaavaequenaqueate intati, cotanquitsiquea iriatimpa teequea irininteji nosemete jero iticaarejantacarica Satanashi irantsipetacaavaequenaquea. Oquejevetacaquea otseji opirijapatitacoquena.

⁸ Tres nocantavecari Amajirote intsoparejacotajenaromequea aatonijite natsipevae-tajatsi.

* **12:4 paraiso.** Irimetojaquegueti tsaroveratarica Aapani Irioshi, ari iroanaque ontaniqui paraisoqui, ari inchooacque irosati aapojempagueti savincaguiteri intancorejantanajempaca. Pamenero aisa Yonig. 2.7; Irc. 16.22; 23.43.

⁹ Cotanquitsiquea iriatimpa icanquena: “Aritaque oocani noncavintsajacoguitempini. Iroguenti nonigaanquero nagavejane caquintequi caarica agavejama-jatatsi.” Jero imaica noshinevaetantacaca nontsavetantaquerogueti teequea inchiquiojita nagavejeji naatimpa, cameetsaniji iroguenti agavejacaamajaquenane iragavejane Quirishito.

¹⁰ Irootaquequea noshinevaetantanacaca namenaquegueti teequea inchiquiojita nagavejempaji naatimpa, aisa icantaguishejitanaquenagueti, natsipevaetacagueti, aisa yatsipetacaavaequenagueti catsimajiaquenaca, manaquea aisa taaca opajitapae tiavaequenaca natsipevencarigueti Quirishito. Namenaquetari oraquea teegueta nagavejeji naatimpa, choocaquea agavejacaquenaca.

Paavoro ishoshoventajiacari Corintoquitica

¹¹ Aviguentijiatarite quejetacaajiaquena imaica nontsavetacotantacaca quempeca manaquea noshoncacoca, aviguentijamequea quenquetsatacoventanaquename pishineventajiaquename. Naatimpa arimajaca teequea taaca opaji nagavejempaji, cotanquitsiquea teequea iranaajiguenaji irirajia tsavetantamampeajiatsica pishineventajiacaca piquemisantajiaqueca pajitashitajatsica “itigarancanemajaca Jesoshi”.

¹² Oraqueate nochoocaquitigueta aviatimpajiaqui nontsavetantimojiaquitimpigueta natsipetacovaecaroquea nonigaimoguevetaquempirogueta oganejencaropae teeca iragavejeji caquinte oacaantantatsica intati pintsatimentajiaqueniji arimajaca narogueta itigarancane Jesoshi.

¹³ Ariquea noquempetacaamajaquempiri maasano tsariventajiaatsica capiocapinijia-atsica tsovironaquipaequi, apanivani arica pamenajiaquena tee nasereacotsitempiri noncantajiaquempi pojocajiaquenaquea nocoguitejacoguetacaca. ¡Imaica iintsija pim-peacotsitajenaro pamenajiaquenagueta noquempetaqueroquea imaica teequea taaca opaji namanajiguempiji!

¹⁴ Imaica noanaque namanajiaquitempiquea aisa. Oraqueate noanaquegueta irooquea trestapojatsineca namanajiajatempiquea. Cotanquitsiquea aatoja nasereseretimpitsi namanajiguimpitsi, teequea irooquea noashite pashintajiacaca, aviguentijiaquea noashijianaque nontampishitacaajiaquempiquea arimpaqueate pintsaroven-tamajatanaquempari Quirishito. Iriiraquea irijanintajiaatsica irioquea jocajiaquenerineca irijanijiate icoguitejacojiacaca, aatoquea iriatimpajia jocajiguiniritsi irijanijiate.

¹⁵ Naatimpa noshinevaequempaquea noncanquempa nonteroncacaamajaquempiro maasanopae nashincaca, cotanquitsiquea aatoquea aparo noteroncacajaiguimpiro-quea nashincaca, manaquea nonquejetanaquempaquea naatimpa nantsipeventa-jiaquempiquea pajinitia ometojanaquena magorentsi. Oncantacoguitempanigueta nompintsamajianaquempi naatimpa, ¿arimpaqueate aviatimpajia capichajaniqui pimpintsavequena?

¹⁶ Iconoagarantajiacaca catsimajiaquenaca, yamenajiaveca teequea noncantimatempiji pojocajiaquenajate nocoguitejacojiacaca, cotanquitsiquea icantajiaque: “Teequea iramanajiavetempiji imentaquipae, cotanquitsiquea caaviji itsamajati yamatavijan-tigueta, jero teequea pamenacojiguempaji yaitsijiaquempirigueta pimentaquitsitepae.”

¹⁷ ¿Arimpate ariquea noncantajiaqueri irirajia notigarancajiaqueca iramenajiajatempiquea iramanamanavaequempiniji pimentaquitsite cameetsaniji naagarantavaqueniji naatimpa?

¹⁸ Coramani nocanqueri Tito iroaquitequea oraniqui iramenajiaquitempiquea. Oraqueate yoanaquegueta notigarancuitsitaquea itsipa apitsarovenarite intsipatanaquempaca. ¿Arimpate yamatavijijiaquempi Tito? Mavitepaetari naatimpajia ariquea noquempetavacaajiacaca noquenquejajiguigueta, aisa ariquea noquempetavacaajiacaca nantinirigueta Amajirote.

¹⁹ Oraqueate nocantajiaquempigueti imaica aviatimpajia arica pamenajiaque ari-
cajate nonintajiaque nonijacoventajianaquempa, cotanquitsiquea teequea irooquea
nonintajigueji. Yamaenaqueate Aapani Irioshi manaquea noquempejiaquero-
quea imaica cameetsaniji nontampishitacaajiaquempi arimpaqueate pintsaroven-
tjianaquempari, aviguentijiaquea napitsarovenarijiate nopintsajiacaca, aisa iriguenti
nintanquitsica Quirishito noquempetantajiacaroca imaica noquenquetsatacaajiaque-
mpi.

²⁰ Otsaroneguintavaequitanaqueate namenaquequea arica noavetempagueti
oraniqui namenajiavepojajempiquea cotanquitsiquea aato noshineventajigu-
impitsi, iroompaquea ariquea pinquempejiaquempa quea aviatimpajia aisa
aatoquea pishineventajianatsi. Aisa arica manaqueate namenajiapojempiquea
catsimatsatavacaajiaquempi, catsimajencatacotantajiaquempi, catsimatsitanta-
jiaquempi, aviguentijiaquea quenquejacojiajatsi, tsojeventantavacaajiaquempi,
nijashitavacaajiaquempi, nintajiaquempi panaimanatavacajiaquempa, aisa teequea
pinquemavacaajiguempaji.

²¹ Otsaroneguintavaequitanaqueate namenaquequea noncoraquetajategueti aisa
namenajiajatempiquea arica manaquea irovashiventajavaequenaqueate Aapani
Irioshi namenajiapojajempiquea picaramirincavaeque aviatimpajia teequeate
povashiantajigueroji pigovaeguisherejia, nintanatsiqueate poashitantajiaquequea,
aisa pipashinincajiaca irooca aisa teequea pinejashitemparoji manquigarentsi, ariquea
niraacojiaguitempiniquea.

13

Icanque Paavoro ininque irinetsanavaejiaquempa

¹ Imaicaqueate imaica otrespojaque noncoraquetantaquempaca namenajia-
jatempi. Otioncacaquea: “Choocaguete mavite irioca 3 amenajiaquerica itsipa
icovaeguishecaguete, ariquea iroguenti pincantomajitsitempariquea.”[☆]

² Coramani namenajiajatimpiguete nocantajiaquitiri irirajia covaeguishejianquit-
sica irovashiantajianajeroja maasanopae ipeacaaguishejiacaca. Imaica nochoocaveca
osamani, cotanquitsiquea noncantsijajempariqueate iriatimpajia aisa maasano quer-
icaca peacaaguishejiacaroca covaeguisherentsipae, noncoraquetajategueti noncan-
tomajamajiaqueri. Aatotarite notsarocaaajigaritsi.

³ Pinintajiaquetarite pamenajiaque arimajacaca iriotari Quirishito quenquetsatan-
tacaroca novagantequi. Iriatimpa teequea intsarogueji incatsimatimentajiaquempiro-
quea pipeacaaguishejiacaca.

⁴ Oraquea yompajacojitaqueriguete quempeca teeca iragavejajeji, cotanquitsiquea
arejetapojaguete ivochatajiri Aapani Irioshi yagavejacaajiri. Ariqueate noquempeji-
aca naatimpajia imaica teemajaca nagavejajigueji, cotanquitsiquea iriraquea Aapani
Irioshi yagavejacaajiaquenaquea iquempetacaajiaquenariquea Quirishito yagaveja-
caaqueriguete, irootaquequea nagavejantajiaquempaca noncantomajajiaqueriquea
peacaaguishejiacaroca covaeguisherentsipae.

⁵ Iintsija pamenajiajempaqueate aviatimpajia arimajacaca pitsarovenamajajiacari.
Noncantsijajempiquea aisa iintsijate pamenajiajempajate. ¿Arimpate teequea
pintsajigueji ichoocashirentaquempi Jesoquirishito? Teeguete pintsarovenamam-
peajiguempariji intati, ichoocashirentaquempi.

⁶ Ariquea oquempetaca imaica noninque pintsajiaquequea arimajaca naatimpajia
naroguentijia itigarancanejia Jesoquirishito, teequea naroguentijia amataajiatitsica.

[☆] 13:1 Ireo. 17.6; 19.15.

⁷ Namanacoventajiaquempi nocantajiaqueri Aapani Irioshi intampishita-caajiaquempiniji aatoniji pipeacaaguishetajarotsi taaca opaji covaeguisher-entsi. Cotanquitsiquea teequea ariqueea noncantajigueji imaica cameetsaniji iramenajiqueroniji cameetsa nantajiaqueneriquea Amajirote, manaqueate nonintamajataquequea pincomajamajiaquempajate. Iroompaquea aricagueti oshimerancavetapojempa incantacojivetaquenaqueate: “Teecajate iriguentijia itigarancanemajaca Jesoquirishito”, aviatimpajiaquea pincantacoguitempani pincomajamajiaquempa.

⁸ Teetari nagavejajigueji naatimpajia nonticaajiguero Iroomajatatsica, manaquea noninque nontampishiventajiaquero.

⁹ Nonintamajajiaquequea pintsaromentamajajiaquemparija. Oraqueate arimajamegueti pintsaromentamajatemparimegueti noshinevaetaquempamequeate, aatomequeate querocaca ocojiganamequea naatimpajia pamenajiaquenagueti teequea nagavejajigueji. Manaquea nintanatsi namanacoventajiaquempiquea cameetsaniji arimpaquea pintsaromentamajajianaquemparijate pincomajamajianaquempaja.

¹⁰ Irootaquequea notioncantajiaquempica ocatica paperi tequeratagueti noanoaiteji namenajijatempiquea cameetsaniji pincomajamajajianaquempiniji aatoniji nocantomajamajatapojimpi. Iriraquea Amajirote itigarancaquenaqueate nontsatacaajiaquempiquea arimpaquea pintsaromentamajajianaquempariniji pintsipatavacaamajatanaquempaquea, aatoquea iroguenti novashiantacaajiguimpitsi pintsinampirejava-caajiaquempa.

Paavoro iteroncanajiro icantajiaquerica

¹¹ Imaicaquea imaica, napitsaromentarijiate, noninque pishinejiguempajate, aisa noninque pincomajamajajiguempajate. Pinquenquejacomajateroja notioncaajiaquempica imaica. Pinquemavacaajiaquempajate aatoja picatsimavacaajiatssi. Pinquempejiaquempagueti imaica intsipamajajiaquempiquea Aapani Irioshi, iriatimpa iriguenti pintsatantamajatanatsica, iriguenti choocatacaacajica cameetsa aatonijite taaca opaji ashoshoventajiajatsi.

¹² Netsana pinintavorotavacaavaquempa.*

¹³ Maasano ipeacaajiacaca Aapani Irioshi igomajamajarejia inintajiaque pinquemacojiaqueri chooca iquenquejajiaquempi.

¹⁴ Noninque incavintsajamajajiaquempiquea Amajirote Jesoquirishito. Aisa noninque pintsamajajiaquequea iriraquea Aapani Irioshi incoguitempani impintsamajajiaquempiquea, aisa Ishire intsipamajaquempiquea.

* **13:12 Netsana pinintavorotavacaavaquempa.** Yamejiaca coramani inintavorotavacaajiajavaca yamenavacaajiacagueti, ari iquejejiaca tsaromentajigarica Quirishito coramani.

PAAVORO ITIONCAJIAQUENERI GARASHIAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaroventajiacarica Jesoshi choocajianquitsica quepatsiqui pajitatsica Garashia. Iiraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaquei paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Garashiaqui paperiqui Yantajiguica 13-14; 16.1-6. Chooca quenquejanquitsica itioncacaantaquero Paavoro ocatica paperi ajagantsiniqui 48, ichoocaquegueti guinteninintsiqui pajitatsica Antioquia quepatsiqui icantajitica Shiria. Itsipajia iquenquejajiaque itioncacaantaquero ajagantsiniqui 52, mavitetapojacagueti iquenaguetanaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Corinto. Itsipajia iquenquejajiaque itioncacaantaquero ajagantsiniqui 56, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Epeso.

¹ Naroguenti Paavoro tioncaciaquempica imaica. Naroguenti itigarancane Jesoquirishito. Teequea iriguenti nintacaguenane caquinte, teequea iriguenti tigarancuenane caquinte, iriguentitarite tigarancaquena Jesoquirishito jeri aisa Aapani Irioshi vochantajirica.

² Notsipajiacariqueate apitsaroventarijiate notioncaciaquempigueti maasano aviatimpajia choocajiatatsica ontaniqui Garashiaqui capiocapiniijiatatsica tsovironaquipaequi.

³ Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigararo taaca opajitapae.

⁴ Ipacajiroquea Quirishito imetojane irishejiajajironijite agovaeguisherajia aatonijite aquejejijaari choocajianquitsica imaica antaguishetiroca covaeguisherentsi, irootaquetari ininqueca Aapani Arioshite.

⁵ Cameetsaquea ancoguitempani antsaroventajiaquitemparini Aapani Irioshi. Ari oncoquempa.

Tee onchoocateji otsipa Quenquetsatsarentsi Oganejencatatsica itigarancaqueca Aapani Irioshi

⁶ Icajemajiaquempiquea Aapani Irioshi incavintsajajiaquempiniji Quirishito. Imaicaquea manaquea namenanaque intati noquemacojiaquempigueti teequea picancani pinquemisantamajajigueroji Quenquetsatsarentsi Oganejencatatsica itigarancaqueca Aapani Irioshi, iroguentiquea taampinaquea pipitsocashijianacaro icantajiaqueca cantashitatigaroca.

⁷ ¿Pijiqueji chooca otsipa Quenquetsatsarentsi Oganejencatatsica itigarancaqueca Aapani Irioshi? ¡Teequea onchoocateji! Manatarite ichoocajiaque intati cantashitajiacaroca Quenquetsatsarentsimajaca tsavetantaquerica Quirishito, iriotari asereaajiaquempi.

⁸ Quericaca cantashitatiequemparoneca Quenquetsatsarentsi Oganejencatatsica notsavetantimojiaquempica cameetsataquequea iroanaque camorecariqui. Arigueti naatimpa noncantashitatiequemparo incatsimatimenquenaroquea Aapani Irioshi.

Ariquea inquejetaquempagueti irashivantijitete manaquea inquenavepojaquempa jenoqui inquitequi, iriogueti cantashitatiequemparone incatsimatimenqueriquea iri-atimpa.

⁹ Nocantajiavequempiqueate coramani imaicaquea noncantsitajempiqueate aisa: cameetsataque iroanaque camorecariqui quericaca cantashitatiequemparone Quenquetsatsarentsimajaca paajiavaqueca nocamantajiaquempigueti.

¹⁰ Teequea irooquee noninte irishineventena caquinte. Iroguentiqueate nonintaque irishineventaquena Aapani Irioshi. Iriomegueti nonintaque noshinetacaquemparime caquinte aatomequea nopegame itigaranguica Quirishito, aatome nocantirime: “Quirishito, pashintenaja.”

Quero oquenapojini itsavetantica Paavoro

¹¹ Napitsarorentarijiate, imaica nonintaque pintsamajiaquequea oratica Quenquetsatsarentsimajaca Oganejencatatsica notsavetantaqueca teequeate iroguenti irashijia caquinte iguenquejane.

¹² Teetari irioquee camantenarone caquinte, teetari irioquee tsatacaajiguenane. Iriotaquequea tsatacaquenaro Jesoquirishito.

¹³ Piquemacojiavetaquenatarite quero nocotani coramani noquejejiavetariqueate nogonorojia joriojia savicaventiroca itioncanaqueca Moishishini, caavijiquea nocat-simajiguiro tsarorentajigarica Quirishito, natsanajiacariquea nonintavecaquea non-teroncajiaquerimequea maasano.

¹⁴ Noquejejiavecariquea nogonorojia joriojia nonetsanamajavetacaroqueate icantajiguica novaesatinijiateni nanaaqueriquea maasano notsipajiacaca noquenquevari-jiguigueti.

¹⁵ Cotanquitsiquea caaviji icavintsajamajataquena Aapani Irioshi, icoguaquenaquea coramani tequerataguete novogueji, ariquea icajemaquena. Aapojacaguete savincagui-teri inintantacaca

¹⁶ yonigaaquenariquea Irijanite cameetsanijite nontsavetantaqueriniji noncamantajiaqueriquea caquinteguetatsica teeca irijorijoigueti. Yonigaaquenariguete teequeate quericaca caquinte naventanaquempariquea noashitanaqueriquea noncoacotaquiteri taa nantaque.

¹⁷ Teequea ariquea noncantanaquempaji Jerosarequi ichoocajiaqueguete iriquetica peajianquitsica itigarancane Jesoshi naventajianaquemparimequeate noncoacojiaquiterime, manaquea taampina nocantanaca Araviaqui. Coajica noanaji Tamashicoqui.

¹⁸ Ariqueate avisanaqueguete 3 ajagantsi ariquea noaquiti Jerosarequi none-jaatiriquea Peerero, noconoaquitariqueate 15 savincaguiteri.

¹⁹ Ontaniquiqueate aisa nonejaqueri Santiago* iriguentijeguite Amajirote. Tee none-geriji itsipajia itigarancanejia Jesoshi.

²⁰ Yamenamajataquena Aapani Irioshi teequeate namatavijajiguempiji, arimajaquea nocantajiaquempi.

²¹ Ariquea noanaque nochoocaquitiquea Shiriaqui jero aisa Shirishiaqui.

²² Iriaqueate Joreaquitica tsarorentajigarica Quirishito tequerataquea irinejajiguenaji.

²³ Manaquea iquemacojiaquena intati icantacojitaquenaguete icantajitiqueate: “Iriacatsimavetacajica nintavetanquitsica interoncajiacajime imaica chooca icamantajiaqueri maasano: ‘Paventempari Jesoquirishito irimeshiantaquempica.’ ”

²⁴ Irootaquequeate ishineventantajanacarica Aapani Irioshi iquemacojiaquenuete.

* **1:19 Santiago.** Iguenquetsatsarequi guiriego ipajita **Iakobos.** Iconoagarantaca quimajareri yoguipitsocaquerogueti ivajiro ipajitiri **Santiago,** itsipa ipajitiri **Jacobo.** Mavite oponeaca iguenquetsatsarequi evereo, ipajitiri **Yaakob.**

2

Yoanaquegueti Paavoro Jerosarequi

¹ Ariqueate ocoramanivaetapojigueti 14 ajagantsi ariqueate noajati aisa Jerosarequi, iriguentiqueate notsipatanaca Verenave notsipatsipaitanacariqueate Tito.

² Iriguentitari tigarancaquena Aapani Irioshi noantanacacaquea. Ontaniquiquea Jerosarequi iriguentiqueate noconoajiapoja quempoguijajiguirica quemisantajiatsica, nocapiocajiacaqueate nocamantamajajiaqueriquea quero nococa notsavetantimojiaquerigueti teeca irijorijoigueji notsavetacotaquerogueti Quenquetsatsarentsi Oganejencatatsica. Nocamantantajiacarica cameetsanijite iramenimentajiaquenijite iriatimpajia teequea ari nonquenquetsatashitempaji intati.

³ Irraqueate Tito iriguentivetacaqueate guiriego cotanquitsi teequea quericaca cantatsine intotsaiquimashitacaantaquempa inquejetantanaquemparica joriojia.

⁴ Oraqueate nocapiocajiacagueti ariquea iconoapojana irira tsaromentamampeajiat-sica. Icantavetacaquea iquemisantajiaqueri Quirishito cotanquitsiquea manaqueate icoraquetashijiaquequea intati iramenajiaquena querocaca nocojiacani notsaroven-tamajajiacarigueti Quirishito Jesoshi. Teequea incantajiaji Quirishito anetsanajiajero itioncanaqueca Moishishini cameetsaniji irimeshiantajajica, cotanquitsiquea inintajia-avetacaquea iriatimpajia acancani anetsanajiaquerome quejetaca omperaperaatajaji.

⁵ Cotanquitsi naatimpajiaquea teequeate nonquemisantimajigueriji aatonijite ican-tashitatiimajitarotsi Quenquetsatsarentsimajaca itigarancaqueca Aapani Irioshi, non-inquetari pintsamajajiaqueroqueate Quenquetsatsarentsi Oganejencatatsica.

⁶ Choocajiavetaca jivatatsica, teequea intsatacaguenaji otsipa, manaquea icantajia-que: “Cameetsavaeque pitsavetanqueca.” Iriovecaquea jivatatsica cotanquitsiquea teequeate irooquea nameneji, manaquea yamenajiacaji Aapani Irioshi maasano ari aquejetavacaajiaa.

⁷ Teequeate intsatacajaiavaquena, yamenajiaquetarite iriguenti tigarancaquena Aa-pani Irioshi notsavetanquero Quenquetsatsarentsi Oganejencatatsica, notsatacajia-queri teeca irijorijoigueji. Aritarite iquejetacaacari Peerero itigarancaquerigueti Aa-pani Irioshi intsavetantimojiaqueriniji joriojia.

⁸ Irra Aapani Irioshi tigarancaquerica Peerero intsatacaajiaqueri joriojia, iriotarite tigarancaquena naatimpa aisa nontsatacaajiaqueri teeca irijorijoigueji.

⁹ Oraqueate nocapiocajiacagueti ariquea ichoocajiaque Santiago, Sepashi,* jeri Joanca. Iriatimpajia iriguentijia quempoguijajiguirica quemisantajiatsica. Ariquea ya-menajiaquenagueti iriguenti cavintsajaquena Aapani Irioshi, iriguenti tigarancaque-naca nontsavetante, yaajiaavaquenaquea yaavacojiaavaquena naatimpa aisa Verenave, icantajiaquenaqueate: “Aviatimpajia cameetsavaetaque pisavicaventajiaqueriqueate teeca irijorijoigueji pintsavetantimojiaqueri. Naatimpaquea nocancaniquea nosavi-caventajiaqueriqueate agonoro jorio nontsavetantimojiaqueri.

¹⁰ Cotanquitsi aparo nonintajiaque pincavintsajajiaqueriqueate irira apitsaroverar-ijiate teeca onchoocatimoteriji, aato pipeacojigari.” Tampatica yoaquero, irootaque-quea nonintamajataqueca naatimpa, irootari nameta.

Paavoro icantomajaqueriqueate Peerero Antioquiaqui

¹¹ Ariquea icoraquequegueti Peerero Antioquiaqui nocantomajaqueriquea namena-queritarite mana yantaquequeate teeca oncameetsateji.

¹² Oraqueate tequeratagueti incoraquejigueji itigarancajiaqueca Santiago† iriraquea Peerero manaquea iconoavajari ishecatapinicagueti apitsaroverarrijiate teeca irijorijoigueji, cotanquitsiquea coajica yamenajiavaquerigueticquea icoraquejiaque

* **2:9 Sepashi.** Irootaque otsipa ivajiro Shimo Peerero. Pamenero Jn. 1.42. † **2:12 Santiago.** Yogui pitsocaji-tirogueti ivajiro icantajitiri aisa Jacovo.

ariqueate icantapanajanta itsinampirejajianaqueriquea, itsaroacajiacaritarite incatsimatimentajiaipojaqueri iramenajiaipojaquerigueti inconoajiaquempari teeca irijorijoigueji irishecajiaquempagueti.

¹³ Ariquea yamenajiaquerigueti itsipapae jorio, ariqueate iquejetanacari itsinampirejajianaqueriquea apitsaromentarijiate teeca irijorijoigueji, aisa Verenave iquejetsitanacaquea iriatimpa aisa. Itsajivetacaroquea cameetsataque inconoajiaquempari irishecajiaquempagueti, cotanquitsiquea manaquea itsaroajianaque intati iquejetantanacaroca imaica itsinampirejantajianacarica.

¹⁴ Cotanquitsiquea naatimpa namenajiaquerigueti iquejejianacagueti imaica notsaquequea teequea irinetsanatajeroquea ocatica Quenquetsatsarentsimajaca. Nocantsitariquea Peerero nocapiocajiacagueti: “Joriovequempiquea aviatimpa, cotanquitsi tee poguijatacotajeroji yameguetaca jorio, mana piquempetacotacari teeca irijorijoigueji. ¿Queroquea ocotacani imaica picantantacaca irirajia caquinte teeca irijorijoigueji iroguijatacoteraja yameguetaca jorio?”

¹⁵ Naroguentijia joriojia, iriguentitari irijanintajiaquena. Teequea iriguenti irijanintajiguenane irirajia teeca irijorijoigueji, irirajia teeca intsateroji itioncanaqueca Moishishini.

¹⁶ Cotanquitsiquea notsajiaquequea aatoquea iroguenti imeshiimentajiganatsi Aapani Irioshi iramenajiaquenagueti nonintajivetaca nonetsanajiaquero maasano itioncanaqueca Moishishini, aatotarite nagavejajigui nonetsanajiguiro. Notsajiaquequea iroguentiquea irimeshiimentajiacaji aventaquemparigueti Jesoquirishito anquemisantaquerigueti, irooqueate iramenantajiacajica Aapani Irioshi quejetaca tee ancovaeguishedimatempaji. Irootaquequea noquejetantajiacaca naatimpajia aisa, naven-tajianacariquea Jesoquirishito cameetsaniji irimeshiajiaquenani. Noncantsijajempiqueate aisa aatoquea iroguenti imeshiimentajaji anintajiavequempagueti anetsanajiaquero itioncanaqueca Moishishini.

¹⁷ Cotanquitsiqueate anintajiaquegueti irimeshiajiajicaji Aapani Irioshi aventajiaquemparigueti Jesoquirishito arigueti incantajite: “Jeriquetisa covaequishedantquit-sica teeca inquemisanteroji itioncanaqueca Moishishini”, ¿iroompa oncanque icovaequishedatacajiajicaji Quirishito? ¡Teequeate!

¹⁸ Oraqueate arigueti nompiashitanajerogueti novashiantaguetanaqueca noquemisantavetacagueti iroaqueragueti, ariquea manaquea noncovaeguishedaquempaqueate intati.

¹⁹ Coramani nonintavetacaqueate nonetsanataquero maasano itioncanaqueca Moishishini, cotanquitsiqueate teequea nagavejeji nonquejetacaamajaquemparoquea. Irootaque notsatantacaca naroguenti covaequishedatsica. Imaicaquea teequea iroguenti nonquenquejacotajeji itioncanaqueca Moishishini nonetsanaquero iroonijite irimeshiimenquena Aapani Irioshi, manaquea namenaquero quejetaca teeca onchoocatajeji. Iriguentitarite noquemisantamajatanaque Aapani Irioshi nonetsanatanaquequeate maasano icanqueca iriatimpa.

²⁰ Oquejetacaquea yompajacojitaquerigueti Quirishito coroshiqui mana itsipatacaantajiquenari yompajacojitaquena naatimpa aatonijite noquenquejacotajiro maasano covaequishedatacaquenaca. Oquejetanacaquea mana nometojapitsatanaquero intati. Choocavequenaquea cotanquitsiquea teequea ariquea nonchoocatashitajempaji intati, iriguentitarite choocatanaqueca Quirishito. Imaica choocatirajanagueti notsinoqui irioquea agavejacaquena Irijanite Aapani Irioshi noquemisantamajatanaquerigueti. Iriatimpa caaviji ipintsamajataquena imetojaventantaquenaca.

²¹ Irootaquequea naatimpa aatoquea nocantitsiquea mana imetojaque Quirishito intati. Oramequea iroomegueti irimeshiimentajiacajime Aapani Irioshi anetsanama-

jajiaquerogueti itioncanaqueca Moishishini manamequea irimetojaqueme Quirishito intati.

3

Ichocashirentajiguiriqueate Ishire Aapani Irioshi maasano quemisantajiguirica

¹ Aviatimpajia, Garashiaquitica, ¿arimpate tee pintsatimateji? ¿Teequea pamenacojiavaquempaji yamatavijitaquempigueti? Pitsajiavetacaquea noquenquetsatacaajiaquempigueti coramani iriguenti notsavetantaque Jesoquirishito yompajacojitaquerigueti coroshiqui. Oconijatimomajajiaquempiqueate, notampaticamajataquerotari nocantajiaquempica.

² Imaica pincantajiguena, ¿taaqueate itigarancantacarica Aapani Irioshi Ishire ichocashirentajiajojaquempigueti? Teequea iro intigarancantaquemparica pinetsanamajajiaqueromegueti itioncanaqueca Moishishini. Iroguentiquea itigarancantacarica manaquea yamenajiaquempi piquemacotavaquerigueti Quirishito Meshiantatsica ariquea piquemisantajianaqueri.

³ ¿Queroquea ocotanacani teequeate pintsajiajeji? Pipariajianacarogueti iroaqueragueti piquemisantajiaquerigueti Quirishito, iriotaque agavejacaajiaquempi Ishire. ¿Pijiqueji imaica pagavejaquero aviatimpa pitampishicaqui?

⁴ Iroaqueragueti piquemisantajiaquerigueti oshequiquea patsipeventajiacariquea Jesoquirishito. Imaicaquea aatogueti poguijatacotanajiri manaquea patsipetashitaquita intati.

⁵ Aapani Irioshi itigarancajiaquempiri Ishire yagavejacaajiaquempiquea ariquea pamenacaantajiaquero oacaantantatsica intati, cotanquitsiquea teequea irooquea intigarancantajiguempiri pinetsanamajajiaqueromegueti itioncanaqueca Moishishini. Iroguentitarite itigarancantajiaquempirica yamenajiaquempitari piquemacojiaquerigueti Quirishito Meshiantatsica piquemisantajianaqueriqueate.

⁶ Ariquea iquejetaca Averaameni iquemisanqueriqueate Aapani Irioshi, irootaquequea yamentancarica iriatimpa quejevaecaquea tee incovaeguishetimatempaji.

⁷ Irootaquequea pintsatantajiaquempica maasano quemisantamajajiaquerica quejejiacaquea iriguentica ichoviquini Averaameni, iquejejiacaritarite.

⁸ Coramani itaquequea Aapani Irioshi incavintsajajiaqueri caquinteguetatsica tecca irijorijoigueti, irimeshijiaqueriquea maasano aventajiaquemparineca iramenantajiaquempirica quejevaeca tee incovaeguishetimatempaji. Ariquea icantacotsijiacariquea icanquerigueti Averaameni, itsavetantaqueroquea oguishinejantatsica, ocanquetari itioncacaantaquerogueti ocanti: “Aviguentiquea noncavintsajacotantajiaquempirica maasano caquinteguetatsica quepatsipaequitica.”

⁹ Ariqueate iquejetacaajiacariqueate Aapani Irioshi maasano aventajiacarica icavintsajajiaqueriquea iquejetacaajiacari Averaameni yaventacarigueti.

¹⁰ Maasanotari aventavetaroca yantaqueca ipanquenavetacarogueti irimoncarataquerome Cantacaantanentsi itioncanaqueca Moishishini, ariquea incatsimatimentajiaqueri Aapani Irioshi. Itioncacojiquerotarite ocanti: “Incatsimatimenqueriquea Aapani Irioshi maasano tecca irinetsanamajataqueroji maasano Cantacaantanentsi itioncanaqueca Moishishini.”

¹¹ Itsamajajitaqueroquea teequea quericaca agavejatsine irinetsanamajataqueroquea maasano Cantacaantanentsi itioncanaqueca Moishishini iroonijite iramenanquemparime Aapani Irioshi quejeaqueate tee incovaeguishetimatempaji. Choocatarite otsipa itioncajitaqueca ocantiquea: “Iriaquea comajashirentanquitsica incoquempani inchoocaguiteni irooriji yaventaguitarini Aapani Irioshi.”

¹² Oraqueate Cantacaantanentsi teequea oncanteji mana aventajiguempari Aapani Irioshi anquemisantajigueri cameetsanijite acancani anchoocaguiteni, manatarite ocantavecaquea: “Quericacaquea netsanamajataquerone ocaticapae incoguitempaniquea inchoocaguiteni.”

¹³ Cotanquitsiquea ivegaraventacajiro Quirishito aatoniji icatsimatimentajitacajiro tioncanquitsica teeca anetsanajigueji, iriguentitari piajaji yatsipetacaantajitacarica iriatimpa. Choocatarite tioncanquitsica ocanti: “Yompajacojitriguetei caquinte inchooapqui yonigaantajiqueriquea mana icatsimatimenqueri Aapani Irioshi igov-aeguishere.”

¹⁴ Iriaquea Quirishito Jesoshi teequea apaniroquea irimetojaventajiguenaji naatimpajia joriojia, imetojaventajiaqueriqueate aisa teeca irijorijoigueji cameetsanijite irimeshijiaquerinijite maasano aventajiaquemparineca quemisantajiaquerineca, aritarite icanquerini Averaameni coramani. Imeshijiacajiquea cameetsanijite intigarancaquerinijite Ishire inchoocashirentajiacaji aatimpajia aventajiaquemparineca, icanquetari coramani intigarancacajiri.

Icanquerica Aapani Irioshi Averaame

¹⁵ Imaica, napitsaromentarijiate, nonintaquequea pinquenquejajigueri ocatica amejigaca. Taaca opajitapae anintacaanaquerica ojocanajenerica itsipa, manaquea antioncacotsitemparoquea paperiqui, ariqueate aisa antioncaquero avajiro aatoniji yogaashijitajaro acantajiaquea.

¹⁶ Coramani icamantaqueriguetei Aapani Irioshi incavintsajaqueri Averaameni ican-tiriquea inquejetacaquempariquea aisa inchoviquitanaquea. Teequea incanteriji: “pinchoviquijianaquea”, manaquea icantiri: “pinchoviquitanaquea”, iriguentitarite icantacoque Quirishito.

¹⁷ Ariquea ocoramantapojaqueguetei aapojacaguetei 430 ajagantsini iquenquetsajencatacaqueriquea Moishishini icamanqueriquea quero inchojiaquempa ishiraerijia intsaromentajiaquempariguetei. Ariquea itioncavaqueroquea Moishishini, cotanquitsiquea Aapani Irioshi teequea incantashitatuemparoji icanquerica Averaameni coramani, iroorijite icanqueri irinetsanataqueroquea icanquerica.

¹⁸ Iroomequea incavintsajimentajiacajime anetsanajiaquerogueti itioncanaqueca Moishishini arimequea aatomequea icantirime Averaameni mana incavintsajaqueri intati yamenaqueguetei iquemisantaqueri. Cotanquitsiquea inchoquijitsita inintanaque Aapani Irioshi incavintsajaqueri, ariquea irooquea icantaquerica.

¹⁹ Iroosacanicate ¿taaqueate itioncacaantacaricaquea Aapani Irioshi Moishishini? Manatarite itioncacaantacarica intsamajamentajiquerinijite mana yantaguishejiguiro covaequisherentsi maasano caquinte. Manatarite inintaque Aapani Irioshi irinetsanajitaquero itioncacotanaqueca Moishishini arejevaetapojemparoquea irinetsanataquero icanquerica Averaameni coramani incoraquepojaqueguetei inchoviquitanaqueca. Itigarancaqueritarite Aapani Irioshi irashivantijitete incamantajigueri Moishishi maasano icantajiaquerica, irioquea tsatacaajiaquerine igonorojia. Ariquea yogaajivaqueneri.

²⁰ Cotanquitsiquea icamanqueriguetei Averaameni, inchoquijitsitaquea icamanqueri iriatimpa, teequeate iriguenti incajemeji itsipa aanaquenerineca.

²¹ ¿Arimpate oratica itioncanaqueca Moishishini mana ocantashitatiacaro icanquerica Aapani Irioshi Averaameni? ¡Teequeate! Oraquea anijacaantemeguetei itioncanaqueca Moishishini acancaninijite anchoocajiaque, iroomequea anetsanashirentantajiaquem-pamequea.

²² Cotanquitsiquea oraquea Tioncarentsimajaca ocanti agavejajiaqueri covaeguish-erentsi maasano caquinteja, oquejevetaca osantanatacotaqueri, teequeate iragavejajigueji irovashiantajigueroji. Oquejetantacaca imaica cameetsanijite onetsanatimentaquempanijite icanqueca Aapani Irioshi coramani, irinetsanataqueneriquea maasano aventajiaquemparineca Jesoquirishito.

²³ Coramani tequerataguete aguempaji ocatica aventashirentagantsi, oquejevetaca oquempoguijajiacaji itioncanaqueca Moishishini, oquejevetaca ashitacojiacaji arejevaetantacaro yonigaantantajitacaroca aventashirentagantsi.

²⁴ Oraquea itioncanaqueca Moishishini oquejetacari quempoguijantatsica aajianacajineca Quirishitoqui irinetsanashirentajiacajiniji aventajiaquempariguete.

²⁵ Cotanquitsiquea imaica aventashirentaquempariguete, teequea irio camantajajine quempoguijantatsica.

Maasano quemisantamajajatsica quejejiacaquea iriguentica ichoviquitanaqueca Averaameni

²⁶ Maasano aviatimpajia aviguentijia irijanijiate Aapani Irioshi, piquemisantajiaqueritarite Quirishito Jesoshi, paventajiacari.

²⁷ Maasanotarite aviatimpajia viñacajianquitsica quemisantajiaquerica Quirishito manaquea piquejejiacari iriatimpa, oquejetaca piquitsaajajari.

²⁸ Imaica acarajivetacaquea jorio jeri teeca irijorioteji, yaajanijitacaca jeri teeca irajaanijitempariji, shirampari jero aisa manquigarentsi, cotanquitsiquea aquejetavacaajiacaquea maasanotarite atsipajiacariquea Quirishito Jesoshi ariquea aquejejianacari.

²⁹ Quejejiacajiquea apatiroti acanca. Imaica aviatimpajia quemisantajiguirica Quirishito quejejiacquempiqueate aviguentijia ichoviquitanaqueca Averaameni, icavintsajantajiaquempica Aapani Irioshi inetsanaqueroquea icanquerica Averaameni.

4

Quero icojiavetani tequerataguete incoraquejeji Quirishito

¹⁻² Jero imaica nonquejetacaajiaquempiroquea aisa. Quericaca irijanintanquitsica incanquequea: “Oraquea nometojanajeguete irioqueate ashintajemparone irijani maasano nashintaguetacaca, cotanquitsiquea aatotaquea yojoquitajitanari. Oraqueate inquenquevaritanajeguete ari irojocajitajeneri irashintamajatajemparoqueate.” Pamenerija, irira irijanite yashintaguevetacaroqueate maasano, cotanquitsiquea tequeratancate inquenquevariteji manaquea iquejemajatajariqueate aajanirentsi, choocatarite aajanitajarica oguimoncajirica. Iriatimpaqueate yoguijaqueriquea inquenquevaritanaqueta, ariquea irojocajitajeneri irashintamajatajemparoqueate.

³ Ariqueate aquejejiacaquea aatimpajia iroaqueraguete tequerataguete anquenquevarishirenteji, apampiatacojiavetacaroquea yamejigaca caquinte, itsatacantica quepatsiquitica. Quejevetacaquea aajanijiacaji.

⁴ Cotanquitsiquea aapojacaguete savincaguiteri inintacaaqueca Aapani Irioshi coramani, ariquea itigarancaqueri Irijanite, ovaqueriquea manquigarentsi, inetsanatan-tacaroca iriatimpa itioncanaqueca Moishishini.

⁵ Oquejetantacacaquea imaica cameetsanijite irovegaraajataji aatimpajia maasano irooriji omperatacaji itioncanaqueca Moishishini aguijatacojiaqueroguete. Yovegaraajatajiqueate cameetsaniji impeantajajajica Aapani Irioshi irijanijiate.

⁶ Aroguentijia irijanijiate imaica, irootaquequea itigarancantacarica Ishire Irijanite inchoocashirentajiacaji, icajemaquequea: “¡Aapani! ¡Aapani!”

⁷ Teequea omperatajempí omperavetaquempica, imaicaquea avirotaquequea irijanite Aapani Irioshi. Irijanintamajaquempiquea Aapani Irioshi, icavintsajaquempitarite yojocantaquempiroca maasano irojocajiaquenerica irijanintajiacaca.

⁸ Coramani tequeratagueti pintsajavetempariji Aapani Irioshi, iriguentiquea pirioshimajaviavetaca caarica irioshimajatatsi, ariquea yomperajivequempi.

⁹ Cotanquitsiquea imaica pitsajiaqueriquea Aapani Irioshi, arimequea noncanteme iriatimpa itsajiaquempiquea icavintsajiaquempiquea. Imaicaquea ¿quero oocani pinintantajiacaca pinquejetanajempa coramani poguijatacojiavetacarogueti yamejigaca caquinte teeca agavejeji omeshiante? ¿Arimpa pininque omperajajempi?

¹⁰ Aviatimpajia pishineventajianajaroquea savincaguiterripae aapojacagueti pishine-tantacaca, aisa iroaqueragueti isotoaji taai, jero aisa ishinetantajitaca yogavisajaguet-ica arejetajagueti ajagantsipojajigueti, maasanoqueate pishineventajianajaro pijiji-aquejeji ariji poguishinejantajiaquemparica Aapani Irioshi.

¹¹ Notsarocojianaquempiquea aricaja natsipeventashijiaquempi intati notsatacaja-iaquempigueti piquejetanajampaquea coramani poguijatacotantanajarica itsatacaan-tajiguica caquinte.

Paavoro iquenquejajiaqueriqueate quemisantajatsica

¹² Napitsarorentarijiate, coramani teequeate poguijatacojiavetemparoji itioncanaqueca Moishishini. Ariqueate noquejejaquempi naatimpa iroaqueragueti noquemisantaque novashiantanaquero teequeate nonetsanatajeroji. Imaicaquea aviroquea poguijatacojiavetanajaro, cotanquitsiquea nonintaquequea pinqueje-jianaquena naatimpa povashiantajianajeroqueate, aatoqueate poguijatacojiajirotsi. Coramani noimojijaatimpigueti cameetsa paajivaquena intati teequea pimanintenaji.

¹³ Pitsajiaquetari nashinoncajacagueti teequea nagavejajempaji noaguetajeji osamani, manaquea aviguentiquea nochoocatimoguitimpini nopariantanacaroca notsatacaajiaquempi notsavetantaquero Quenquetsatsarentsi Oganejencatatsica.

¹⁴ Nashinoncajamajavetacaquea cotanquitsiquea teequea pimanintajiguenaji, man-aquea patsiperejacocaró intati. Piquemisantajivaquenaquea manaquea piquejeta-caajivaquenaquea irioaquea coraquetanquitsi irashivantite Aapani Irioshi, aisa que-jetaca irioaca coraquetanquitsi Quirishito Jesoshi.

¹⁵ Coramani pishinevaejianacaquea noconoajiaquempigueti. Noncantajiaquem-pimeguetiquea “Pojoquenaroshiatsi poquija”, pinquitsorejaquenarome pojocajiaque-naromequea. ¿Quero ootacani imaica teequea pishineventajiajenaji?

¹⁶ Notsatacaamajajiaquempitari iroomajatatsica. Imaica ¿iroocampa picatsimatimen-tajiaquena?

¹⁷ Iriaqueate itsipa caquinteja manatarite inintajiaquequea povashiantajianaje-naquea aatoquea piquemisantajianajana, irootaquequea inintantajiacaca intsatacaja-iaquempiquea itsatacaantajiguica iriatimpajia cameetsaniji pishineventajiaquempar-iniji pinquejejianaquempariquea. Irootaquequea yoguishinejantamampeajiaquem-pica.

¹⁸ Cameetsavecaqueate irinintajiaquegueti itsipa pishineventajiaquempari, cotan-quitsiquea cameetsaquea irinintajiaquegueti, aatoquea yamatavijajiguimpi. Arimpa naatimpa teequea namatavijajiguempiji tampaticaquea noaquero notsatacajiaque-mpigueti, cotanquitsiquea imaica nochoocaquegueti osamani jac pimaisantajiana-janaquea. Aatomesano piquejejiga imaica, nonintavecatarite picancaniquea pishin-eventajiaquenaquea.

¹⁹ Nirijanijiate, naatimpaquea natsipeventajiaquempiquea aisa, nonintamajataque-tarite namenajiaquempi pinquejemajajiaquempariquea Quirishito, caavijiqueate nat-sipeventajiaquempi quejecaquea atsipetagueti manquigarentsi ovoacotigueti.

²⁰ Nonintavecaquea imaica nonchoocaqueme aviatimpajiaqui anquenquetsatava-caaquempa, nontsaqueroniji queroca oocani piquejetantanajaca.

Iquejetacaacanari Agare aisa Sara

²¹ Pincantajiguenajate aviatimpajia nintajiatsica pinetsanajiaqueroqueate itioncanaqueca Moishishini: ¿arimpate tee pintsamajajiguroji maasano ocanqueca?

²² Itioncacojiquerotarite ocanti choocaquea mavite irijanite Averaame, aparoquea ashi iroatimpa ashincaca imanquigaremajaca, choocaquea itsipa ashi iroatimpa imanquigaremajaca teeca irashintajitemparoji.

²³ Iriiraquea irijanite ovoaqueca yashintajitaca manaquea ivoaque iroorijite inintashitacari caquinte, cotanquitsiquea irira irijanite ovoaqueca teeca irashintajitemparoji ivoaque irooriji iriotaque icantacotsitacaca Aapani Irioshi irojocaqueneri Averaameni.

²⁴ Choocaquea oshiacaantacaca ocatica, oraquea manquigarentsijia oshiacaantacacrotari mavite paaquito. Aparo paaquito oponeaca otsempiqui icantajitica Shinai, iroguenti quejetacaró Agare voaquerica chaajaniquirijia peajianquitsineca yashintajitaca.

²⁵ Oraquea Agare ocantacotaquero otsempi Shinai choocatanquitsica Araviaqui, aisa ocantacotaquero Jerosare choocatanquitsica imaica, maasanotari joriojia ipomereventsiventajavetacaró itioncacotanaqueca Moishishini irinetsanajiaquero, quejetaca omperaperaajiacari.

²⁶ Cotanquitsi aatimpajia aroguenti aquejejiacari ochoviquijianaqueca imanquigaremajaca Averaame teeca iromperaperaajitempaji. Iroatimpa iroguenti ocantacotaqueotsipa Jerosare inquitequitica.

²⁷ Choocatarite itioncanaqueca Isaiashini ocanti:

Pishinetempaja shiravaro, aviatimpa teeca pogueji.

Tequerataquea pantsipetimatempariji pirijanite, imaicaquea pishinevaetempaja.

Iroshequiamajatanquetari pinchoviquijianaqueca,

iranaamajianaqueriqueate onchoviquijianaqueca pomperare irijanintacaacaca manquigatimpica.

²⁸ Napitsaroventarijiate, aatimpajia quejejiacajiqueate Ishaaco, irijanintajiacajitarite Aapani Irioshi quejetaca icanquerica Averaame.

²⁹ Coramani iriraquea irijanite voanquitsica irooriji inintashicari iriatimpa, icatsimapiniqueriqueate Ishaaco ovoaqueca Sara yagavejacaqueroqueti Ishire Aapani Irioshi. Ariqueate iquejejiacariqueate imaica netsanajiaqueroica itioncanaqueca Moishishini icatsimapinijiacajiqueate aatimpajia irijanintajiacaca Ishire Aapani Irioshi.

³⁰ Cotanquitsiqueate ¿quero ocanque Tioncarentsi? Ocantiquea: “Manaquea pintigaranquerotsija osamani oratica omperarentsi ontsipatanaquempariqueate irijanite. Irijanite omperarentsi aatotarite itsipatashitimaritsi irijanite manquigarentsi teeca iromperaperaajitemparoji irashintaquemparogueti yashintaguevetacaca iriri.”

³¹ Imaicaqueate, napitsaroventarijiate, teequea iro choviquitajine omperarentsi, oquejevecaquea irooquea choviquijiacaji teeca iromperaperaajitemparoji.

5

Aatoqueate piquemisantajiguiritsi cantajiatsica: “Pinetsanajiaquero itioncanaqueca Moishishini”

¹ Yoguiapaquijacaantajiacajiqueate Quirishito aatoniji atsipeventajarotsi aquemisantajiajirotsi omperaperaajivetaacajica, mananijite anchoocatashijiajempa intati. Imaicaquea pintimanaque, aato piquemisantajirotsi omperajivetaquempica.

² Naroguentiquea Paavoro tioncaquempiroca. Pinquemisantamajajivaqueroja noncamantajiaquempica imaica: pintotsaiquimashitacaantavequempagueti pijiquegueti irooquea irishetantajempiroca Aapani Irioshi pigovaeguishere—pinquejejiacquempagueti imaica aato yagaveji Quirishito irimeshiguempi.

³ Noncantsijajempiquea quericaca nintanquitsineca intotsaiquimashijiqueri, manaquea irinetsanamajateroja maasano itioncanaqueca Moishishini, teequea apaniro oncanteji intotsaiquimashijiqueriquea.

⁴ Aviatimpajia nintajianquitsica pinetsanajiaquero itioncanaqueca Moishishini iroonijite irimeshiantajiaquempicaquea Aapani Irioshi, manaquea piquenashijianaca intati teequeate pintsipajajempariji Quirishito, aisa teequeate pinintajigueji incavintsajajiguempiji Aapani Irioshi.

⁵ Cotanquitsiquea naatimpajia noguijajiaquequea incavintsajajiaquenaquea oncora-manitapojajegueti, incameetsamajajajena iramenajiaquenaquea quejetaca tee nonco-vaeguishedimajiguempaji. Irioquea agavejacaguenane Ishire noguijatanquemparica, naventacaritarite.

⁶ Arimajagueti aquemisantamajajiaqueri Quirishito Jesoshi iriraqueate Aapani Irioshi aatoquea iquenquejacotiro aricaca atotsaiquimashijiaa aricaquea tee, iroguentitarite inintamajati iriatimpa anquemisantamajajiaqueri. Anquemisantamajajiaquerigueti ariquea ampintsajianaquempari maasano caquintepae.

⁷ Oraqueate iroaqueragueti piquemisantamajajiavecaroquea iroomajatatsica. Ariquea iticaajitavaquempi irootaquequea povashiantantajianacaroca.

⁸ Teequeate irioquea quejetacajaiguempine Aapani Irioshi, iriguentitarite cajemajiaquempiquea iroaqueragueti.

⁹ Icantajitiquea: “Onconoaquemparogueti capichajaniqui anempoacaqueroneca pan, ariquea oncotanaquempa anempoanaquequea maasano ose.” Ariqueate iquejejiaca caquinte inchoocaqueguetiquea apaniro amataatsica impajencajiaqueriqueate igonoro.

¹⁰ Naatimpaquea notsaqueriquea Amajirote, irioquea amitacojiaquempine aatoniji piquenashitanaca pipampiatacotirotsi teeca iroomajaca. Cotanquitsiquea quericaca asereaquempica incatsimaqueriquea Aapani Irioshi.

¹¹ Napitsaroveritarijiate, naatimpaquea arimegueti nocancanimegueti noncancueme intotsaiquimashitacaantajiaquempaquea maasano inquejetantajianaquemparica joriojia, aatomequea icatsimajiganame nogonorojia joriojia, aisa aatomequea icatsimatimentajiganarome notsavetanquerigueti Quirishito imetojaventacajigueti coroshiqui.

¹² Iroosacanicate iquejevintsajiaqueroguetiqueate imaica, jarimesano incanquempame tsein tsatic iriatimpa maasano asereajiaquempica cantajiatistica pintotsaiquimashijiaquempa!

Arigueti pimpintsatavacaajiaquempa, ari ovegarapoja

¹³ Aviatimpajia, napitsaroveritarijiate, icajemajiaquempiqueate Aapani Irioshi irimeshijiaquempiniji, aatoniji patsipeventajijaaro pinetsanajiajero itioncanaqueca Moishishini, cotanquitsiquea teequea irininteji ancovaeguishejiaquempa, aatoquea picantajiguetsi: “Imaicaquea cameetsavaeque nantaquequeate taaca opajitapae non-inqueca naatimpa.” Manaqueate pimpintsatavacaajiaquempa pamitavacaajiaquempa intati.

¹⁴ Icanquetarite Aapani Irioshi itioncacaquerigueti Moishishini: “Pimpintsataquemparija pigonoro pinquejetacaajempa pipintsatagueti aviatimpa.” Pinquejetacaajiaquemparogueti imaica piteroncaqueroquea pinetsanaqueroquea maasano itioncacaquerica.

¹⁵ Cotanquitsiquea namenajiaquempi manaqueate picatsimatavacaajianaca intati, piquejejianacari chaonarijite yatsicavacaagueti. Inchiquiojisanoja pitsinampirejavacajiaanacatsijate aatoquea pitsipatavacaaja.

Pinquemisantamajajiaqueri Ishire Aapani Irioshi

¹⁶ Imaica noncamantajiaquempiqueate pincoguitempanija pinquemisantamajajia-querijate Ishire Aapani Irioshi tsatacaashirentajiaquempica. Pinquejejaquempaguete imaica aatoquea pipeacajajaa pinintaguishejiguica aviatimpajia.

¹⁷ Choocatarite covaeguishtacaacajica anintajiguica ampeacaaguishejiguempa, cotanquitsiquea irira Ishire Aapani Irioshi iroguentiquea inintaque ancomajamajajiaquempa, irootaquequea ampeacaajiaquempaguete anintaguishejiaqueca aatimpajia aatoquea aquemisantajiguiritsi iriatimpa. Oraquea anquemisantajiaqueriguete, aatoquea apeacajajaatsi anintaguishejiaqueca aatimpajia.

¹⁸ Irioguete choocashirentajiaquempine Ishire Aapani Irioshi, aatoquea irooquee patsipeventajijaatsi pinetsanajajero itioncanaqueca Moishishini aatoniji icatsimajigui-impia Aapani Irioshi.

¹⁹ Atsajiguirotarite yantaguishejiguica irirajia quemisantaqueroca inintashiguetacaca: yoashijiguiro teeca iro imanquigare, manaquea icovaeguishejiaca intati, yantaguishejiaqueroguete teequeate impashiventacaguemparo.

²⁰ Itsaromentajiacari irioshivijitashitacaca, imatsitantajigui, icatsimatantajigui, yantashitantajiga, icatsimatacotsitantagueteiro taaca opajitapae, icatsimajiaquequea, iriguente quenquejacotajatsi, aisa teequea intsipatavacaajiguempaji manaquea itsinampirejavacaajiaaca intati.

²¹ Inintsijiguiriqueate yashintaguetaca itsipa, imetojantajigui, ishinquijiga, aisa iconoajiavaqueroquea yantaguishejiaquequea taaca opajitapae. Noncantsijajempiqueate iriraquea quejejaqueroca imaica aato yoajigui ichoocatiguete Aapani Irioshi.

²² Cotanquitsiquea ichoocashirentajiacajiguete Ishire Aapani Irioshi apintsatavacaajiaqueca, ashinevaejiacaquea, teequea ashoshoguitejajempa, manaquea atsiperejacojiaca intati, apintsatantajanacaquea, acavintsajantajianaquequea, netsanaquea oaquero acanqueca.

²³ Aisa aquemisantacojiacaquea intati teequea ampigatantajiguempaji, aisa atampishitashiguetaqueeroquea taacaguete opajitapae. Teequea incantimentajitajiroji anquejejaquempaqueate imaica.

²⁴ Irraqueate tsaromentamajajigarica Quirishito Jesoshi quejetanacaquea itsipajiacari yompajacojitaqueriguete coroshiqui, manatarite imetojapitsajianaquero inintajiavecaca, irootaquetari teeca irantantajajemparoji.

²⁵ Ichocashirentajiacajiguete Ishire Aapani Irioshi itsatacaajitacajiqueate, iroosacanicate imaica jamequetirote anquemisantamajajianaqueriquea anetsanaqueroqueate maasano inintaquequeca.

²⁶ Aatoquea aventacojiga, aatoquea acatsimatacagui itsipa, aisa aatoquea anintajigui anaimanatantajiaquequeate.

6

Pamitacotavacaajiaquempa

¹ Napitsaromentarijiate, aviatimpajia ichoocashirentamajajiaqueca Ishire Aapani Irioshi pamenajiaqueriguete pignonoro ipeacaaca covaeguisherentsi cameetsaquea poaqueri pincantomajajiaqueriquea cameetsanijite impishonquimentanajeronijite, cotanquitsiquea inchiquiojia picatsimajiguiritsi, manaquea pincavintsajeriquea. Ariquea pamenamajajiaquempaquea aatonijite piquejejianaca aviatimpajia aisa pincovaeguishejianaquempa.

² Pamitacotavacaajiaquempaquea pintampishitashitimentajiaqueronijite covaeguishtacaantatsica. Pinquejejaquempaguete imaica jac pinetsanajiaqueroquea itsatacaajiacajica Quirishito.

³ Choocaguete teeca iranaantimateji cotanquitsiquea iramenaquempaguete ijiqueji caaviji yanaantaque, irisatiquea amatavijaatsi.

⁴ Pamenajiguempaja maasano aviatimpajia, pamenajiaquempaguetiquea picomajamajajia aviguentiquea shineventajatsine. Aatoqueate iro pishineventajiga pijiquegueti panaaqueri itsipa.

⁵ Maasanojiatari inchiquiojitsitarite iquejetaca iriatimpa yantajiguigueti irooca cameetsatatsica irooca covaeguishedatsica, tee irio itsipa quejetacaguemparine.

⁶ Imaica nonintaque noncamantajiaquempiquea ancavintsajajiaqueriquea tsatacaajiacajica Iguenquetsatsare Aapani Irioshi, ojocajiaqueneriquea taaca opajitapae cameetsaguetatsica.

⁷ Inchiquiojitaja pamatavijatsi aviatimpa: iriraqueate Aapani Irioshi incatsimajiaqueri maasano cantimanajiguirica. Taaca opajita itsaqui caquinte, irootaque iraavaje.

⁸ Irira antaguishejiguiroca inintashiguetica, quejetaca iro itsaquica, coajica ontsoroanaque, ariquea iraviguitaje covaeguisherentsi; cotanquitsiquea iriraquea savicaventiroca inintaguetica Ishire Aapani Irioshi, quejetaca iro itsaquica, ariquea iraavaje anijagantsi poneanquitsica Ishirequi Aapani Irioshi, incoguitempani iranijaguiteni.

⁹ Imaica jamejate antampishitashijiaquero antajiaquequea cameetsaguetatsica, aatoquea aperataro. Aatoguetei aperajiga anquejetaquempariquea aavajiroca oitsoqui, incavintsajacajitari Aapani Irioshi oncoramanitapojajeguetei.

¹⁰ Irootaquequea nocantantajiaquempica jaameja ancavintsajajiaqueriquea maasano, ariquea agaanaquempa ancavintsajamajatanakeri apitsarorentarijiate tsarorentajiacarica Quirishito.

Iteroncajianajiniriguetei icantajiaquerica

¹¹ Imaica narotaque Paavoro tioncavaquempiroca ocativa. Irootaque pintsatantavaquemparoca: inirojegui nocanquero notioncaqueroguetei nacoqui.

¹² Iriraqueate cantajiatatsica pintotsaiquimashitacaantajiaquempa manatarite inintajiaque irishinetimentajiaquempari igonorojia joriojia. Yamenajiaquetari incantajiaquequempaguetei: "Iriguentiquea anquemisantajiaque Quirishito metojaventajiacajica coroshiqui", manaquea irantsipetacajiaquempariquea incatsimajiaqueri. Irootaquequea icantantajiaquempica pintotsaiquimashitacaantajiaquempa.

¹³ Jeriquea totsaiquimashitacaantajiatatsica teequea arimaja irinetsanamajajigueroji itioncanaqueca Moishishini, cotanquitsiquea manaquea inintajiaque pintotsaiquimashitacaanquempa irooquea iraventantajianaquempaca iramenajiaqueguetei yagavejajiaquempi itotsaiquimashitacaajiaquempiquea pinquejetantajianaquemparica iriatimpajia pitsinoqui.

¹⁴ Cotanquitsiquea naatimpa teequea noninteji naventacotempaji, irooquea noshineventamajataca imetojaventacajiguetei Amajirote Jesoquirishito coroshiqui, teequea noshineventajemparoquea maasano ishineventaguishedacaca quepatsipaequitica, quejetacaquea mana ometojapitsatanaquena intati, aisa oquejetaca nometojapitsatanaquero, teequea nonintimatajeroji nonquenquejaguetajero.

¹⁵ Aritarite aventajiaquempariguetei Quirishito Jesoshi, teequea iro incoacotempaji antotsaiquimashitaquempa irooca aato, iroguentiquea icoacotaca iroaquerashirentajianajaji.

¹⁶ Maasano quemisantajiaqueroneca ocativa, noninque Aapani Irioshi inchoocatacaajiaqueri cameetsa, incavintsajajiaqueri, iriojiaquea yashintamajajiacaca quejetaca yashintajiacari ishiraerijiani coramani.

¹⁷ Imaicaquea ariotapojaque yasereajitaquena ipigapigajiquena, choocatarite notsinoqui piropiroini ipiropiroitimentajiquenari Amajirote Jesoshi.

¹⁸ Imaica, napitsarorentarijiate, noninquequea incavintsajajiaquempi Amajirote Jesoquirishito pishirequi. Ari oncoquempa.

PAAVORO ITIONCAJIAQUENERI EPESOQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Epeso. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueti itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncacotaqueri irira Paavoro otsipaquei paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Epesoqui paperiqui Yantajiguica 18.19-20.1; 20.17-38. Tequeratagueti intioncacaanteroji ocatica paperi, itioncacaantaquero otsipa mavite paperi itigarancaciaquenerica quemisantajiatatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Epesoquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajiaqueneri quemisantajiatatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icantaque, tequeratagueti impeacaguemparoji Aapani Irioshi maasano ipeacaacaca, itsatsitacaquea incapiocajiaqueriquea maasano quemisantajiaquerineca Jesoquirishito, irioca jorio aisa teeca irijorijoigueti, maasanoquea irimajirontajiajempari Jesoquirishito. Chooca 3 iquempetacaacaca Paavoro antsatantajiaquemparoca ichoocashirentacajigueti Quirishito quejetaca aparo anajiaje. Jero imaica: (1) aatimpajia aquejejiacararo tsovironaqui ipecaajitaca mapipanco, irira Quirishito irio quejetacararo mapi anaantamajatanquitsica itampaticatacotantacaroca otsipapae (2.20-22); (2) aatimpajia aquejejiacararo tsinotsi, iriraquea Quirishito irio quejetacararo aguito (4.15-16; 5.23); aatimpajia aquejetacararo manquigarentsi, irira Quirishito irio quejetacari manquigatacajica (5.25-32). Icamantajiaqueri Paavoro maasano quemisantajiaquerica Quirishito irashimirintajiaquempari ampatsini, iquejetacaacari coareta Iromaquitica yashimirintagueti chooca yashimirintantaguetacaca (6.11-17).

¹ Naroguenti Paavoro itigarancane Jesoquirishito, iriotari nintacaaquena Aapani Irioshi. Imaica nontioncaciaquempiqueate maasano aviatimpajia choocajianquitsica Epesoqui yashintajiacaca Aapani Irioshi, aisa tsaromentamajajigarica Quirishito Jesoshi.

² Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatoniji pishoshoventajigaro taaca opajitapae.

Icavintsajajiacajiquea Quirishito

³ Iintsija ashineventajiguempari Irioshite Amajirote Jesoquirishito, iriotaque aisa Iriri, ancantajiaque caaviji yoganejencamajata. Irio cavintsajajiacajica ontaniqui inquitequi, icavintsajamajajiacaji ashirequi yashintajiacajigueti Quirishito.

⁴ Coramani tequerataguete impeacaguemparo quepatsi icoguiajiacajiquea inintacaajiacaji acancaniquea antsaromentajiaquempariqueate Quirishito ancomajatimentajiaquemparinijite aatoniji acovaeguishejiaja, aisa iramenimentajiacajiniji quejevacaquea teeca ancovaeguishtematempaji.

⁵ Aritarite iquejetaquero imaica icantsicaroquea paesatoniqui impeajiacaji irijanijate, ipintsajiacajitarite, itigarancantacarica Jesoquirishito irimetojajentajiacaji, iriotarite nintanquitsi Aapani Irioshi irootaque iquejetancaroca imaica.

⁶ Iintsija ashineventajiaquempariqueate Aapani Irioshi irooriji icavintsajamajajiacaji itigarancuimojiajiriquea Irijanite ipintsamajataca.

⁷ Iriotaque oguisotoajiajaji yovegaratantacaji iriraja, ipeacojiajajiroquea agovaequishejia, caavijitari icavintsajanti Aapani Irioshi,

⁸ icavintsajamajatantajiacajica, anaavaetaquetari itsamajare, iroomajaca iguenquejane.

⁹ Coramani teequeate antsajavetempaji intigarancuimojiajajiri Quirishito irimetojajentajiacaji, tequeratatirajataritari ironigaanteroji icanquerica iroaqueraguete. Cotanquitsiquea imaica atsajiaqueroquea, jac netsanatapoja itigarancuiqueriquea.

¹⁰ Icanquetarite coramani: “Noncapiocamajajajeriqueate maasano choocajatsica jenoqui inquitequi jerijia aisa quepatsipaequitica cameetsaniji irimajirontajiaquempariniji Irijani Quirishito.” Oraqueate oncoramanitapojajeguete aapojempaguete irinetsanatantaguequemparoca, irinetsanataqueroqueate icanqueca.

¹¹ IcoGUIAJIACAJIQUEA aatimpajia tsaromentavaquemparineca Quirishito intsipati-mentavajajiniji jenoqui inquitequi inquejetacaamajajiacajiqueate irijanite. Coramanitari tequerataguete onchoocatimagueteji inintacaitajiacajiqueate irashintajiacaji. Iriatimpaquea inintaquequea ariquea oncoguetanaquempani imaica, iriotaquequea amenaguequeroquea cameetsavaequequea.

¹² Inintaqueatarite Aapani Irioshi noshineventajiaquempariquea naatimpajia, noncantajiaqueriquea iriguenti caavijica yoganejencamajata. Naroquetiquea pariacaro noquemisantajiaqueri Quirishito.

¹³ Ariquea piquejejiacaquea aviatimpajia iroompaquea piquemajavaqueroguete Quenquetsatsarentsimajaca tsavetanquerica Quirishito meshajiaquempineca, paventamajajanacariquea, irootaquequea icoraquetantacaca Ishire Aapani Irioshi ichoocashirentajiaquempiquea, pitsatantajiacaca aviguentijia irijanimajajiate. Aritarite icanque Aapani Irioshi coramani intigarancuqueri.

¹⁴ Arimajaquea itigarancuimojiajajiriquea Ishire, ichoocashirentajiacajiquea aatimpajia cameetsanijite antsatimentamajajiaquenijite irinetsanajiaqueroquea Aapani Irioshi maasano icantajiacajica, intsipajianacajiqueate jenoqui inquitequi incavintsajiacajiqueate maasano aatimpajia yashintajiacaca. Iroosacanicate iintsija ashineventamajajiguempariquea, ancantajiaqueri: “Poganejencamajata.”

Paavoro yamanacoventajiaqueri quemisantajiaquerica Quirishito

¹⁵ Coramani noquemacojiaquempiqueate pitsaromentajiacari Amajirote Jesoshi aisa pipintsamajajiacari maasano igomajamajarejia, irootaquequea

¹⁶ noquenquejantajiaquempi namanakeriguete Aapani Irioshi nocancaniquea nocantacoventajiaquempi: “Arioteesaa.”

¹⁷ Namanakeriquea Irioshite Amajirote Jesoquirishito, iriotaquequea Aapani oganejencatsica, namanacoventajiaquempi intsatacajiaquempi Ishire pintsatimentamajajiaqueronijite maasano inintaguetica, aisa namanakeri ironigaajiaquempi quero icota iriatimpa pintsatimentamajajiaqueriniji.

¹⁸ Namanacoventajiaquempiquea intsatacajiaquempi cameetsanijite pintsamajajiaquenijite quero oncotanaquempani oncoramanitapojajeguete anchoocajiaqueguete

ontaniqui iriatimpaqui, oganejencavaetacaquea. Icajemajiaquempitarite incavintsajiaquempiniji irishinetacaamajajiaquempi. Ariquea inquempetacaajiaquempari maasano igomajamajarejia.

¹⁹ Aisa namanacoventajiaquempiquea pintsamajajiaque iriraquea Aapani Irioshi iriguentiquea caavijica yagavejamajati yanaajiaqueriquea maasano, yagavejacaantajiacajicaquea aatimpajia atsaroventajiacarigueti.

²⁰ Pamenejate arimajaguitatsi yagavejamajati, yonigaanquerotarite yagavejica coramani ivochantajirigueti Quirishito imetojavetacagueti. Ariqueate yaanajiriquea jenoqui inquitequi yoguisavicajiriquea itincamijempequiqui.

²¹ Yanaamajatantajiacaricaqueate maasano majirontaguetatsica, iramajirorepae, agavejaguevetatsica, jivaguetatsica, maasano. Yanaajiaqueriqueate maasano choocajianquitsica imaica jerijia aisa coajicajianajatsineca.

²² Aapani Irioshi yanaacaaqueriquea Quirishito yashintacaaguecariquea maasano, aisa ipeacaavajari imajiromajajiate maasano imeshiajiaqueca.

²³ Aatimpajia quemisantajiaquerica aquejejiacariquea itsino Quirishito, aroguentijia ichoocashirentamajataqueca. Iriguentiquea peacaaguetacar maasano choocaguetatsica inetsanamajaqueroqueate itsitacamajaguetaqueroqueate maasano.

2

Icavintsajiacajiqueate Aapani Irioshi yaajiajajiqueate

¹ Coramani oquejetacaquea metojajiaque pishirejia, pantajiavetacarotari icantimentaguetaqueca Aapani Irioshi, pipeacaajiavetacaquea covaeguisherentsipae.

² Irooquea pantapinijavetaca, poguijatacojiaqueroquea iquenquejajiguica quepatsiquitica, piquemisantajiaqueriquea imajirote ampatsinipae quenaguetatsica otampijaguitetigueti. Iriatimpa iriguentitarite omperajigarica maasano pigatsajigarica Aapani Irioshi.

³ Aatimpajia maasano aritarite aquejejiavecariqueate iriatimpajia. Aquenquejaguishevetacaquea, aisa antaguishejiavetacaquea taaca opajitapae anintajiguica. Irootaquequea icatsimatantajiavecajica Aapani Irioshi, iquejetacaajiavetacajiquea iriatimpajia.

⁴ Cotanquitsiquea Aapani Irioshi cavintsajantamajatantatsica yagamajacomajajiacajiquea, caavijitari ipintsamajajiacaji,

⁵ yanijacaantajiacajicaquea ashirequi ometojashirentavetacajigueti agovaeguishere, itsipatacaantajiacajiri Quirishito yanijacaajirigueti. (Inchiquiojitaquea icavintsajiacajica imeshiantajiacajicaquea.)

⁶ Ariquea itsipatacaantajiacajiriqueate Quirishito Jesoshi ivochantajiajajiquea, ariquate yaajianacajiqueate jenoqui inquitequi yoguisavicajiavacajiquea iriatimpaqui.

⁷ Iquejetacaacajiquea imaica cameetsaniji oncoguitempaniquea intsamajajiaque maasano caavijiquea ipintsamajajiacaji. Aritarite icotaca iriatimpa, irootaquequea icavintsajantajiacajica aatimpajia tsaroventajigarica Quirishito Jesoshi.

⁸ Inchiquiojitaquea icavintsajajiaquempiquea Aapani Irioshi imeshiajiaquempiquea paventajiacarigueti Quirishito, pamenajiaquetarite arimaja imetojajentajiaquempi. Teequeate inchiquiojitsita pimeshiajiguempaji, inchiquiojitsitarite inintaquequea iriatimpa irimeshiajiaquempi.

⁹ Tee onchoocateji ampeacaguempaca aatimpa ameshiantaquempameca, arimequea aventacoquemparomequea.

¹⁰ Iriotaquetari peacaajiacaji Aapani Irioshi, imeshiajiacajiquea aventaventaicarigueti Quirishito Jesoshi. Icantashitatijaiacajiquea anetsanjiaqueroniji

maasano cameetsaguetatsica inintsitacaajiacajica coramani tequeratagueti anchoocajigueji.

Ariquea aquejetavacaajiacaquea maasano tsaromentajigarica Quirishito

¹¹ Imaicacuate imaica aviatimpajia teeca pijorijoigueji, iintsijate pinquenquejajeroja queroqueate picojiavetani coramani, manatarite teequea inconoajiavetempiji joriojia yamenajiaquempiqueate teequea pinquejiguempariji iriatimpajia itotsaiquijitirogueti ichonquimashi, irootaquequea icantantajiaquempica teequea pintsajigueriji Aapani Irioshi.

¹² Pinquenquejacojigueroja coramani teequea pintsajiavetempariji Quirishito, yamenaquempiquea teequea irashintajiaquempiquea Aapani Irioshi jero aisa teequea pintsajiavetemparoji icantajiaquerica Aapani Irioshi ishiraerijia coramani irinet-sanatavaqueneriquea incavintsajajiaquerigueti, teetari aviguenti igonorojia. Pichoocatashijiavetaca quepatsiqui, tecatsi poguijacovetempaji, teetari pintsajiavetempaji ininque incavintsajajiaquempi, teequea pintsajiavetempariji Aapani Irioshi.

¹³ Coramani teequate pintsajiavetempariji Aapani Irioshi, quejevetacaquea pichoocavaetini jmm osamani. Cotanquitsiquea imetojaventajiaquempiquea Quirishito Jesoshi, osotoajatimentajiaquempi iriraja. Imaicacaquea paventajiacariquea yaantajiaavaquempicacaquea, quisho yoajimpi.

¹⁴ Coramani maasano naatimpajia joriojia nocatsimaneguintajiaquempiquea maasano aviatimpajia teeca pijorijoigueji, tee pinquemisanteronicate itioncanaqueca Moishishini. Ariquea acatsimaneguintavacaajiavetaca, cotanquitsiqueate imeshiajiacajiqueate Quirishito, ipejairoquea acatsimaneguintacojiavetacaca. Imaicacaquea teequea ancatsimatavacaajiajempaji, manaquea aconoavacajaiacaquea, yamenajiacajitari Aapani Irioshi ariquea aquejetavacajiaaquea maasano quemisanquerica.

¹⁵ Imetojaque Quirishito itsinoqui aatonijite quericaca atsipeventajemparone irinet-sanatajero itioncanaqueca Moishishini ironijite irimeshiantajempa. Irootaquequea imaica teeca ancantashitatijaiguempaji, ariquea aquejetavacaajiacaquea maasano iriooca joriojia iriguentica teeca irijorijoigueji. Imaicacaquea aquemisantajiaqueriquea iriatimpa teequea ancatsimatavacaajiajempaji.

¹⁶ Imetojaventajiacajitarite Quirishito coroshiqui cameetsanijite antsaromentajiaquempariniji, ariqueate imaica atsaromentajiacarigueti ariqueate ashineventajiacariqueate Aapani Irioshi. Ariqueate iquejetaca iriatimpa ishineventajiacaji maasano. Imaicacaquea imaica ariquea aquejetavacaajiacaquea atsaromentajiacarigueti, teequate ancatsimatavacaajiajempaji icameetsatacojiaajitari.

¹⁷ Naatimpajia joriojia notsajiavetaro Icanqueca Aapani Irioshi, cotanquitsiquea teequea nontsaromentamajiguempariji. Aviatimpajiaquea teequea pintsatimajiavetempariji, cotanquitsiquea oraquea icoraquequitigueti Quirishito ariquea itsatacajiaicajiquea maasano aatimpajia quero ancojiaquempiani antsaromentajiaquemparigueti Aapani Irioshi arinijite antsipatavacajiaquempaquea aatonijite acatsimatavacaajiajatsi.

¹⁸ Imetojaventajiacaji Quirishito, irootaquequea nagavejantajiacaca naatimpajia joriojia nocancani noncoraquetashiqueri Aapani Irioshi namanajigueri, cotanquitsiquea teequea apaniro nagavejajigueji naatimpajia, pagavejajiguiquea aviatimpajia aisa pamanajigueri, iriguentitarite agavejacaquempi Ishire Aapani Irioshi agavejacaajiaque-nacaquea.

¹⁹ Coramani teequea pigonorontajiavetenaji, teequea pintsajiavetemparinica Aapani Irioshi, cotanquitsiquea imaica manaquea piquejedianajana maasano tsaromentajigarica Aapani Irioshi, pitsaromentajiacaritarite aviatimpajia aisa, irootaquequeate irijan-intantajiaquempicacaquea, ariquea agonorontavacaajiacaquea.

²⁰ Aquempejiacaró aisa imapipancote itsinetacotica. Irirajiaquea itigarancanejia Jesoquirishito jerijia tsavetantajiguiroca icantajiaquerica Aapani Irioshi, irio quempejiacaroca mapicotapae isavijitica itsinetacotantamajatacaca cameetsaniji onquishomajatanaqueniji. Iriraquea Jesoquirishito, irioquea quempetacaroca mapi anaantamajatanquitsica itampaticatacotantacaroca otsipapae.

²¹⁻²² Imaica maasanoquea aatimpajia tsaróventajiacarica Quirishito aroguentijia itsovironaquite Aapani Irioshi, aroguentijia itemporote, ichoocashirentajiacajitarite Ishire. Yagavejacaajiacajiquea maasano antampishitavacaajiaquempaqueate antsaróventantamajajianaquemparicaquea. Pitsipajiaquenaqueate aviatimpajia aisa, pitsaróventamajianacaritarite, aisaquea ichoocashirentajiaquempitarite Ishire.

3

Isavicaventica Paavoro

¹ Naroguenti Paavoro isantanatacojitaqueca notsavetantaquerigueti Quirishito Jesoshi nosavicaventajiaquempigueti aviatimpajia teeca pijorijoigueji.

² Piquemacojiaquenampaquea icavintsajaquenagueti Aapani Irioshi itigarancaquenagueti nontsavetantimojiaquempiqueate maasano aviatimpajia teeca pijorijoigueji.

³ Iriatimpa yonigaaquenaroqueate isenacavetacaca, itsatacaaquea notioncantavacarocaquea capichaji.

⁴ Imaica papatsajavantajiaquerogueti pintsamajajiaquequea arimaja notsaquero maasano yonigaaquenaca Aapani Irioshi yonigaaanquerigueti Quirishito.

⁵ Coramaniquea tee inchoocateji caquinte tsataqueroneca, cotanquitsiquea imaica irira Ishire Aapani Irioshi icoguiajiaquenaquea yonigaaajiaquenaroquea naatimpajia itigarancanejia Jesoshi jerijia aisa tsavetantajiguirica.

⁶ Jeroquea teeca intsajavetempaji: Aapani Irioshi incavintsajajiaqueriquea maasano teeca irijorijoigueji quemisantajiaqueroca Quenquetsatsarentsi Oganejencatatsica tsavetacoquerica Quirishito Jesoshi, inquejetacaajiaquempariquea icavintsajajiguirigueti ishiraerijia quemisantamajatatsica. Oraquea icantajiaquerica joriojia coramani, ariquea inquejetacaajiaquempariquea iriatimpajia imaica, aritarite igonorontavacaaja.

⁷ Irooquea notsavetanque, icavintsajaquenatari Aapani Irioshi inintacaaquea nontsavetanqueri Jesoquirishito, irootaquequea inchiquiojitsitaquea iriatimpa itigarancaquena yagavejacaquena. Irootaquequea imaica nagavejancaca notsavetanqueri.

⁸ Caavijiquea yanaajiaquena maasano itsipajia tsaróventajigarica Aapani Irioshi, cotanquitsiquea icavintsajaquenaquea Aapani Irioshi itigarancaquena nontsavetantimojiaqueri teeca irijorijoigueji noncamantajiaqueri quero icota Quirishito, caavijiquea icavintsajamajiaqueri.

⁹ Iriraquea Aapani Irioshi peacaaguetaroca maasano igantagaquea coramani inintaque irimeshijajitajeri teeca irijorijoigueji, cotanquitsiqueate mana isenacacovecaroquea ininqueca. Ariquea itigarancaquenaquea nontsatacajiaqueri quero incojiaquempa cameetsanijite irimeshiimentajiajeriniji.

¹⁰ Ariqueate iquejetaca imaica ininquequea irimeshijajiaqueri quericaca tsaróventajiaquemparineca iroonijite intsatantajiaquempaca maasano majirontajiatatsica choocajiatatsica jenoqui inquitequi jerijia aisa agavejajiatatsica choocajiatatsica inquitequi caavijiqueate itsamajaque Aapani Irioshi.

¹¹ Igantagaquea coramani iroaqueragueti inintaque irimeshijajiaqueri maasano tsaróventajiaquemparineca Amajirote Quirishito Jesoshi.

¹² Imaica atsaróventajiacariquea teequa antsaróajigueji amanajiguirigueti Aapani Irioshi, atsajiaquetarite igantagaquea iquemajiacaji.

¹³ Imaica pitsajiaquequea choocatirajana acaniqui, isantanatacojiquena natsipeta-caquea, cotanquitsiquea pishinejiguempa quea aatoquea pishimampojancajiajatsi, aviguentijatarite natsipeventajiacaca.

Paavoro yamanacoventajiaqueri Epesoquitica

¹⁴ Irootaquequea nogueroventantacarica Iraapanite Amajirote Jesoquirishito.

¹⁵ Iriguentitarite ashintajigarica maasano tsaromentajigarica, irirajia choocajatsica jenoqui inquitequi jerijia aisa choocajatsica acaniqui quepatsiqui, icantantajitarica “irijanijiate Aapani Irioshi”.

¹⁶ Iriatimpa iriguenti caavijica yoganejencamajata, aisa caaviji yagavejamajati, irootaquequea namanantacarica nocanqueriquea nonintaque iragavejacaantajiaque-mpiri Ishire, intampishitacajaiaquempi intompogui pishirequi.

¹⁷ Namanacoventajiaquempiquea aisa nocanqueriquea noninque incoguitempani inchoocashirentajiaquempi Quirishito, piquemisantajiaqueritarite. Noninque quea taaca opajitapae pantajiaque picananiquea pimpintsatantamajajiaquempa,

¹⁸ iragavejacaajiaquempiniji aviatimpajia aisa maasano itsipajia igomajamajarejia pintsajiaquequea caavijiquea yanaaque ipintsamajajiaquempiquea Quirishito.

¹⁹ Atsajiavetacaquea ipintsamajajiacajiquea Quirishito, cotanquitsiquea aatoquea agavejajiguiti antsamajajiaqueroqueate, anaamajaquerotari apintsatantajigagueti aatimpajia caquinteja. Cotanquitsiquea nonintaquequea pintsamajajiaque caavijiquea yanaaque ipintsamajajiaquempiquea. Pintsamajajiaquerogueti ariquea pin- quenquejamajajiaqueriquea Aapani Irioshi aisa inchoocamajajiaquempiquea.

²⁰ Caavijiquea yagavejamajataquequea iriraquea choocashirentajiacajica, yagave- jaque iranaamajatavaqueroquea taaca opajita amanaquerica, jero aisa maasano an- quenquejavequempa.

²¹ Irootaquequeate imaica maasano aatimpajia quemisantajiaquerica Quirishito Jesoshi iintsija ashineventajiguempariquea Aapani Irioshi. Iintsija acananiquea ashineventajiaquempariquea. Cameetsaquea inquejejaquempa aisa maasano an- choviquijianaqueca, incoguitempani intsaromentajiaquempari ajagantsinipaequi. Ari oncoquempa.

4

Icantajiaqueriqueate intsipashirentavacajaiaquempa maasano tsaromentajigarica Quirishito

¹ Notsavetacotaquerigueti Amajirote, irootaquequea isantanatacotimentantajique- narica. Imaica noncantajiaquempiquea pincomajamajajiaquempa quea pinetsana- timenqueroniji inintacaquempica Aapani Irioshi iroaqueragueti icajemajiaquem- pigueti.

² Aatoquea panaanatavacajiga, pincavintsajavacaajiaquempa quea, pamenaco- jianaquempa quea intati irantashijitaquempigueti. Pimpintsatavacaajiaquempa quea pantsiperejacotavacaajiaquempa.

³ Imaica piquemisantajiaquerigueti Aapani Irioshi ichoocashirentajiaquempiquea Ishire, iriotaquequeate agavejacaajiaquempica pitsipatavacaaantajiacaca cameetsa, piquemavacaajia. Cotanquitsiquea pincoguitempani pinquejejianaquempa imaica.

⁴ Maasanotarite aatimpajia tsaromentamajajigarica manaquea atsipatavacajia- caquea quejecaquea apanironica achoocajiaque, apatirotitarite ichoocaque Ishire Aapani Irioshi choocashirentajiacajica. Aisa maasano icajemajiacajiquea Aapani Irioshi cameetsaniji incavintsajajiacajiniji oncoramanitapojajegueti ontaniqui jenoqui inquitequi.

⁵ Chooca apatiroti Amajirote, apatiroti aventajiacaca aatimpajia maasano, apatiroti aviñacajatimentajiacaca maasano.

⁶ Chooça apatiroti Aapani Irioshi, iriguentiquea Aapanite aatimpajia maasano. Iriatimpa iriguentiquea Amajirojiate maasano, iriguentiquea agavejacaajiacajica maasano, aisa iriguentiquea choocashirentajiacajica maasano.

Icantashitatiacaaguecajiquea yagavejacaajiacajigueti Quirishito

⁷ Caaviji icavintsajamajiacajiquea Quirishito maasano, cotanquitsiquea icantashitatiacaaguecajiquea maasano yojocaguecajigueti yagavejica antajiaqueneriniji inintacaajiacajica.

⁸ Itioncacojiqueriguetiquea coramani ocanti:

“Yoanaji jenoqui, ijivajianaqueri yaajiaqueca yanaajiaqueca.

Ariquea yojocajiaqueneriquea caquinteja inintacaajiaquerica.”

⁹ Imaica ¿taaca opaji oncanque “yoanaji jenoqui”? Jeroquea oncanque aritarite iquenapoji iroaqueragueti ontaniqui jenoqui inquitequi icoraquequitigueti acaniqui quepatsiqui.

¹⁰ Iriiraquea quenapojatsica jenoqui inquitequi iriotaquequea atsomajanajatsica, yoavaetanaji jenoqui yavisanajiro inquite, intsitacamajaguetaqueronijite maasano, yanaajiaqueriquea maasano.

¹¹ Iriatimpaquea yagavejacaajiaqueriquea quemisantajiguirica irantajiaqueneriniji inintacaaguetaquerica: iconoagarantajiacaquea ipeacajiacariqueate itigarancane; itsipaquea ipeacajiacariquea tsavetantajiguiroca ícanquerica; itsipaquea yagavejacaajiaquerigueti yaanaqueroquea Quenquetsatsarentsi Oganejencatatsica, itsavetantajiaquero; itsipaquea ipeacajiacariquea quempoguijajiguirica quemisantajiatatsica itsatacajiaqueriqueate.

¹² Ariquea iquejetacaajiacajiquea maasano aatimpajia yashintajiacaca cameet-sanijite agavejajiaqueneriniji amitacotavacaajiaquempa antampishitavacaajiaquempa arinijite anquemisantamajajianaqueri Quirishito maasano aatimpajia quejejiacaroca itsino.

¹³ Acancaniquea anquejijianaqueroquea imaica arejevaetapojempa antsipatavacaamajajiaquempagueti maasano, anquemisantamajajiaqueriquea Irijanite Aapani Irioshi, aisa antsamajajiaqueri. Ariquea anquenquevarishirentanaque, anquejemajaquempariquea Quirishito.

¹⁴ Aatoquea aquejejijaaritsi chaajaniquipaetirajaca tequeratatirajaca intsajigueji, shinetimentajiatitirajaquea taaca opajitapae icantajiquerica. Aatoquea aquemisantajiguiritsi cantashitataroca Iguenquetsatsare Aapani Irioshi. Iriatimpajiatarite itsanijiguitari yamatavijantajigui, manaquea inintajiaque intati iramatavijajiacaji aatonijijiquemisantamajajajiritsi Quirishito.

¹⁵ Cotanquitsiquea aatimpajia iintsija ampintsamajajiguempariquea maasano, ancantamajataquequea anquenquetsatacaajiaquerigueti arimpanijite anquenquevarishirentanaquequea arejevaetajemparonijijiquemisantamajajiaquempariquea Quirishito anetsanajiaqueroqueti maasano inintacaajiacajica, iriguentitarite Amajirote.

¹⁶ Iriguentitarite agavejacaajiacajica antsipatavacaantajiaquempaqueate asavicaventajiaqueroqueti taaca opajita ininqueca iriatimpa, maasanotarite icantashitatiacaaguecajiquea yagavejacaajiacajigueti antajiaque taaca opajita inintaguetic. Iroosacanicate maasanojia asavicaventamajajiaqueroqueti ariquiteate anquemisantamajajianaqueriquea antampishitavacaajianaquempaquea ampintsatavacaamajajianaquempaquea.

Aatoquea piquejejijaatsi tequeratagueti pinquemisantajigueji

¹⁷ Imaica noncantajiaquempiqueate aatoja piquejejijaaritsi teeca inquemisantajigueji quenquejaguishejiatsica intati, teenicate irininteji Amajirote pinquejejiajempaquea imaica.

¹⁸ Iriatimpajia ipitsecaquenquejanetanaque, teequea iranijashirentacaajigueriji Aapani Irioshi aisa teetarite irinintajigueji intsajiaqueriquea, manaquea iquishoshirentajianaque.

¹⁹ Iroguentiquea yantajigui yantaguishejiaquequea taaca opajitapae covaequisherentsi, manaquea itsanirojiaquequea intati, teequea impashiventacajaiguemparoji, ishineventajiacarotarite intati.

²⁰ Cotanquitsiquea aviatimpajia teequea iro itsatacaajitaquempica pitsapojaquerigueti Quirishito,

²¹ arimajagueti piquemajiaqueri, arimajagueti iro itsatacaajitaquempi iroomajatatsica itsatacaantica Jesoshi.

²² Imaica aatoquea piquempejijaaquea paesatoniqui pantaguishejiavetacagueti covaequisherentsi, aritarite picojiacani pishineventajiavecaroquea, manaquea amatavijajiaquempi.

²³ Imaicampani iroaqueraro oncantanajempa pishire aisa piguenquejane.

²⁴ Piroaquerashirentajianaje, irootaquetari ipeacamentantajiaquempica Aapani Irioshi pinquempejiaquempariniji iriatimpa, comajashirerimajaca pincantajempa, pincomajamajianajempa.

Icantajiaqueriqueate quero incotajempa incomajamajajiaquempagueti

²⁵ Aatoquea pamatavijajiajiritsi pigeonoropae, manaquea pincantamajataque, aatoquea picantashita intati, maasanotarite aatimpajia manaquea atsipatavacaajiaquea intati atsaroventajiacarigueti Amajirote Jesoquirishito.

²⁶ Piquemavaquerogueti oncoraquetaquegueti pigatsimare, aatoja picovaeguisheta, taampinaquea pimpetsimarejajianaje tequeratagueti ompitsequeji,

²⁷ aatonijite yagavejajiguimpitsi ampatsini incovaeguishetacaajiaquempiquea.

²⁸ Iriraquea aitsitantajiatsica ariotapojaque paitsiantaque, manaquea pincatsiquetaque intati, irooca pantajiaque otsipa cameetsaguetatsica irootaquequea onchoocatantaquempaca pincavintsajanquemparica coguitejacojianquitsica.

²⁹ Aatoquea picantaguishtetsi, manaquea pincanquequea cameetsaguetatsica amijiaquerineca quemisantajiavaquempineca pintampishitacaantajiaquemparica. Cameetsaquea pinquenquetsatacaajiaqueri irooquea pincavintsajanquemparica.

³⁰ Aatoquea pishimampojancacaajigaritsi Ishire Aapani Irioshi, iriotaquetarite itigarankuimojiaquempica Aapani Irioshi ichoocashirentajiaquempiquea, quejetaca iseyotaquempi intsatantajitaquempaca aviguentijia irashimajaca arejevaetantapojempaca savincaguiteri iraantajiaavajerica Amajirote maasano yashintajiacaca.

³¹ Imaicaquea pimpishoncajero picatsimashirentajiguigueti, aatoquea picatsimajencajaji, manaquea povashiantanajero pigatsimaca. Aatoquea pitampishijencatantajaji, aatoquea picantashitari itsipapae. Povashiantajianaqueroqueate maasanopae covaequisherentsi quejecaroca ocatita.

³² Pincavintsajajiaqueriqueate pigeonorolja, aisa pimpintsamajajiaquempariquea. Aatoquea picatsimashirentiri itsipa querocagueti incoquempini, manaquea pimpeacotajemparo intati, pinquempejiaquempariqueate Aapani Irioshi ipeacotsitajimpirogueti picovaeguishejiacagueti, aatoquea icatsimatimentimpiro, paventajiacaritarite Quirishito.

5

Icantajiaqueriqueate inquejiaquempariqueate Quirishito

¹ Aviatimpajia aviguentijatarite irijanijate Aapani Irioshi ipintsamajajiacaca, imaica pinquejiaquempariqueate iriatimpa.

² Picancanija pimpintsatantamajataquempa, quejetaca Quirishito ipintsamajajiacaji ipimantantacaroca imetojane imetojaventajiacajiquea. Irootaque oquempetacaro cameetsajencatatsica yojocajitaquenerica itaajitaquenerica Aapani Irioshi, ishineventavacaro.

³ Aatoquea poashitimajiguirotsi manquigarentsi teeca irooquee pimanquigare. Ari pinquejejaquempaquee aisa manquigarentsijia, aato poashitiritsi shirampari teeca irio pimanquigare. Aatoquea piquenquejacotimajiguirotsi taaca opajitapae covaequishetatsica. Aato pinintsiguetiri yashintaguecaca itsipa, aisa aatoquea pinintavaque pinintavaque. Icoquiajaquempitarite Aapani Irioshi pincomajamajajiaquempaniji.

⁴ Aatoquea piquenquejajiguitsi taaca opajitapae oguipashiventajantatsica. Aatoquea picantaguishejigui intati, aisa pinquenquetsataquegueti aatoquea piconoantavacaro covaequisherentsi, manaquea pinquenquetsajiaque cameetsa pishineventajiaquempariqueate Aapani Irioshi cavintsajajiaquempica.

⁵ Pitsamajajiaquetarite aato yogui ontaniqui imajirontaguete Quirishito jeri aisa Aapani Irioshi quericaca oashitiroca manquigarentsi, jeri aisa antaguishetiroca taaca opajitapae covaequisherentsi, jeri aisa nintsiguequerica itsipa yashintaguetacaca, jeri aisa quejecarica irinintavaque irinintavaque. Iiraqueate nintatsica irajaarantamajaquempa quejevaetacacacua manacacua iroguenti irioshivijique irajaararopae.

⁶ Inchiqiojotaja yamatavijajiguimpitsija cantashijiatsica intati. Icatsimamajajiguiarite Aapani Irioshi maasano quejejiguiroca imaica teeca irinintajigueji inquemisantajigueriji.

⁷ Irootaquequea noncantantajiaquempica aatoquea pitsipaguishejigaritsi iriatimpajia.

⁸ Paesatoni oquejeveca pipitsecacojiaque iroorijite pantaguishejiavetacacuate taaca opajitapae covaequisherentsi teenicate pintsajavetempariji Aapani Irioshi, cotanquitsiquea imaica pitsajiaqueriquea piquemisantajiaqueriguete Amajirote, quempecaquea itsirencacotapojajimpi. Irootaquequea noncantantajiaquempica: arimpacua pinquempejianajempariquea choocatatsica savincaguiteriqui, manaquea pincomajamajajianaquempa.

⁹ Maasanotarite tsamajajiguirica manaquea icavintsajantajiguiquea intati, icomajamajajigacua, aisa icantamajajiaquequea, teequa iramataajiguempaji.

¹⁰ Irooquee pintsajiaque ishineventaguetaca Amajirote.

¹¹ Aatoqueate pishineventimajijaarotsi maasano yantaguishejiacua irirajia pitsecacojianquitsica, manaquea pincantimentantajiaqueroquea, teetarite irishineventemparoji Aapani Irioshi.

¹² Aato ocameetsati anquenquetsaguishetacotsitantaquerogueti taaca opajitapae yantaguishejiguete imanavecaca, oguipashiventajantitarite intati.

¹³⁻¹⁴ Cotanquitsiquea aviatimpajia pincomajamajajiaquempaguete, iriraquea antaguishejiguiroca covaequisherentsi inchiqiojitsitarite iriatimpajia iramenajiaquempa manaquea icovaequishejiaca, iroompacua arica irinintajiaquequea inquejejanaquempi aviatimpajia inquemisantajianaqueriquea Quirishito. Irootaquequeate itioncacojiquerogueti ocantiquea:

“Pintinajanaquequea aviatimpa maanquitsica,
aviatimpa metojanquitsica pimpochatanajequea,
ariquea intsirencacotaquempiquea Quirishito.”

¹⁵ Imaica pincomajajiguempaquate aatoquea piquempejijaaritsi teeca intsajigueji, manaquea pinquejejaquempariquea tsajiatsica icomajajigaguete.

¹⁶ Pisavicaventamajajiaqueroqueate pantsipeventamajajiaquempariquea Aapani Irioshi imaica, choocatarite oshequini antaguishejiguiroca covaequisherentsi.

¹⁷ Irootaquequea noncantantajiaquempica aatoquea piquejigari teeca intsajigueji inquenquejigie, manaquea pincantajiaqueriquea Amajirote intsatacajiaquempiro maasano inintaqueca pantajiaqueca.

¹⁸ Aatoqueate pishinuijiga, piquenanaquetsiqueate picovaeguishetatsi. Irooquee pinintamajate inchoocamajatanaquempi Ishire Aapani Irioshi.

¹⁹ Pinquenquetsatavacaajiaquempaquea, pincantsitemparoquea ocanqueca amashairentsipae itsaromentantajitarica Aapani Irioshi. Pamashaiventajiaqueri Amajirote, pintsaromentamajajianaquempariquea onquenavaetanaque pishirequi.

²⁰ Paventajiacaritari Amajirote Jesoquirishito imaica, iintsija pincoguitempani pishineventajiaquempariquea Aapani Irioshi pincantapinitaqueriquea: “Arioteesaa”, iroorijite icoguitaniquea icavintsajajiaquempiquea.

Quero incojiaquempani inchoocajiaqueniji cameetsa manquigajatsica aisa imanquigare

²¹ Arigueti pitsaromentamajiacari Quirishito aatoquea pinintajiguitsi panaanaatavacajiaquempaquea, maasanoquea pinquemisantavacaajiaquempaja pamtavacaajiaquempaquea intati.

²² Manquigarentsija, pinquemisantamajajiaqueri manquigatimpica quejetacaquea piquemisanquerigueti Amajirote.

²³ Irraqueate shirampari iriguentitarite jivatiroca imanquigare iquejetacariqueate Quirishito ijvajibuirigueti maasano tsaromentajigarica, aisa irioquee meshiajiaquerica. Irraquea Quirishito yamenajiaqueri quemisantajatsica quempetacaquea iriojia itsino, Quirishito irio quejecaroca iguito.

²⁴ Aritarite oquejetacaquea imaica maasano tsaromentajigarica iquemisantajiaqueriquea Amajirote Quirishito, ariquea onquejejaquempaquea manquigarentsija onquemisantamajajiaqueriqueate manquigataroca, aatoquea opigapigatsajigariquea.

²⁵ Shiramparija, pimpintsamajajiaquemparoqueate pimanquigare, pinquejejaquempariqueate Quirishito ipintsamajajiacarigueti maasano tsaromentajigarica, iquejetaaacari imanquigare, ipacaro imetojane imetojaventaqueroquea,

²⁶ cameetsanijite irogameetsantajiaquero, apanironijite irashintajiaquemparo. Isaancantacaro iquivantacaro oja aisa iguenquetsatsare.*

²⁷ Ininquetarite iramajero intsipataquemparo, aato opintatimata, aato otsiñoamagoti, aato ochoocati quejecaroca, manaquea oganejencataquempa oncameetsamajataque. Ariquea inquejetacaajiaquempari maasano igapiocane, iroganejencatacaajiaquempari.

²⁸ Imaica aviatimpajia shiramparija, pimpintsajiguemparojate pimanquigare pin-cavintsajajiaqueroquea pinquejetacaajiaquemparo pipintsajigagueti aviatimpa. Irraquea cavintsajiroca imanquigare irisatiquea cavintsajaatsi.

²⁹ Tecatsi sematsine itsino iriatimpa, maasanoquea acavintsajajiacaquea ashecajiacaquea aatonijite ametojajiguitsi, aisa amenanontajiacaquea aatoniji taa oajigaji. Ariqueate iquejetacaajiacariqueate Quirishito maasano tsaromentajigarica ipintsajigarigueti.

³⁰ Aatimpajia aisa tsaromentajigarica maasanoquea atsipajiacariqueate atsaromentamajajigarigueti quejevaecaquea aroguentica itsino, irootaquequea icavintsajantajajajica.

³¹ Ariquea itioncacojiquerogueti ocanti: “Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare,

* **5:26** Coramani ontaniqui Joreaque yamejigaca irooshipojigueti irimanquigajitaquemparo manquigarensi, otsipataca onquivamajataquero aisa onetsanamajataquero onquitsaatajemparo saancamorenaro teeca ontsiñoamagoteji.

apatsinoroquea incantanajempa. Ariquea iroaqueraguete tequerataguete irimanquigatemparoji, mavite icarajiveta, ariquea imanquigacaroguete ariqueate icojianaca tee irimavitetajempaji, quempetanajaqueate apatsinoronica icantaja.”

³² Omanavecaquea ocativa, cotanquitsiquea mana nocantajiaquempiroquea irooquea pintsatantajiaquempaca ariquea iquejetacaajiacajiquea Quirishito maasano aatimpajia atsaromentajigariguete. Itsipajiacajiqueate iriatimpa quejevaecaquea aparoquea acantaja, quishoquea yoajiacaji.

³³ Noncantsijajempiqueate aisa maasanopae shirampari impintsamajataquemparoqueate imanquigare, incavintsajaqueroquea inquejetacaquemparoquea icavintsajaguete iriatimpa. Aisa maasanopae manquigarentsi onquemisantamajajiaqueriquea manquigataroca.

6

Quero incojiaquempani irijanintajatsica aisa irijanijiate

¹ Aviatimpajia chaajaniquipaetirajaca, ariguete piquemisantajiaqueri Amajirote inque pinquejetacaitempariquea piri aisa piniro pinquemisantajiaqueriqueate, caavijiquea ocameetsati pinquejetaqueroguete imaica.

²⁻³ Paesatoniqueate Aapani Irioshi icantavecariqueate Moishishini taaca opajitapae, ariquea itioncacoguequeroquea cameetsanijite irinetsanajiaquero avaesatinijiateni, cotanquitsiquea teequea incanteji irinetsanajiaqueroguetiquea maasano osamaniqueate inquishojiaque acaniqui quepatsiqui. Cotanquitsiqueate choocaquea apatiroti icantaquerica irinetsanataqueroguete osamaniquea inquishojiaque acaniqui quepatsiqui, irootaquequea ocativa: “Pinquenquejacameetsatacotaquerija piri aisa piniro.”

⁴ Aviatimpajiaquea irijanintajatsica, aatoquea picatsimatacaashijigaritsiquea intati pirijanijiate aisa porijanijiate, manaquea pintsatacaajiaqueriquea maasano icanqueca Amajirote, aisa pincantomajajiaqueriquea irantajiaqueguete covaeguisherentsi.

Quero incojiaquempani yashintajitaca aisa ashincarica

⁵ Aviatimpajia yashintajitaca, pinquemisantamajajiaqueriqueate ashinquempica acaniqui quepatsiqui, aatoquea pipigapigajigari manaquea pintsaroacaajiaquempariqueate, aisa aato pamatavijajiguiri, manaquea pincatsiquejiaqueneriqueate quempecaquea iriguentica picatsiquejiaqueneca Quirishito.

⁶ Aatoquea apatiroti pinetsanajiguirotsi icantajiaquempica yamenajiaquempiguete irooqueate pishinetacaantajiaquemparica, picancaniquea pincatsiquemajajiaqueate, iriotaquetari ashintamajiaquempica Quirishito, aviguentijiarite irajaanirejia Quirishito. Pinintamajajigueja pinetsanamajajiguero maasano inintaguetica Aapani Irioshi.

⁷ Pinetsanamajatanaqueroja incanquempiguete ashinquempica quejecaquea irioquea pantamajaquene Amajirote Quirishito, aatoquea aparoquea pishinetacagari pappicaquinteteni.

⁸ Pitsajiaquetarite iriraquea Aapani Irioshi irishineventajiaquempariquea maasano antiroca cameetsatatsica, irivegarajiaqueneriquea. Inquejetacaajiaquempariquea irirajia yashintajitaca, jerijia aisa teeca irashintajitempariji, maasano.

⁹ Aviatimpajiaqueate ashintajigarica caquinte yojocantajitica, iintsijate pinquenquejajigueroquea ocativa. Choocaqueate apaniromajaca ashintajiguimpica aviatimpajia jerijiaquea aisa pashintajiacaca, iriotarite pimajiromajate choocatatsica jenoqui inquitequi. Iriatimpaquea yamenajiaquempi teequea pincantashitajiaiguempaji, ariquea piquejetavacaajiacaquea maasano. Irootaquequea noncantantajiaquempica pincavintsajajiaqueriqueate pashintajiacaca, aatoquea picatsimajiguiritsi.

Quemisantajiatsica iquejetacariquea ashimirintajiatsica

¹⁰ Napitsarorentarijiate, apanivaniqueate noncantajiaquempiqueate, aviguentijiatarite tsarorentajigarica Amajirote imaica pamaneriquea pincantajiaqueri intampishitacaamajajiaquempi, aisa iragavejacaamajajiaquempi, caavijitarite yagavejama-jati.

¹¹ Iriiraqueate ashimirintajiatsica yashimirintavacaajiacaguete iroguentiquea yaventajiga iguishoritepae aatoniji isatajajitiri. Imaica aviatimpajia pinquejijianaquempariquea paventajianaquempariqueate Aapani Irioshi irojocajiaquempiquea maasano pimpigatantajiaquemparica ampatsini aatonijite yagavejajiguimpitsi yamatavijajiguimpitsi.

¹² Aatimpajiaqueate teetari iriguenti ashimirintajiguempa choocatanquitsica itsino, iriraja. Iriguentijiaquea ashimirintajiaquea majirontajiavetanquitsica teeca inconijajigueti, iriraja tigarancajiaquerica quemisantajiaquerica, iriguentijia agavejajiaque-rica pitsecashirentacojianquitsica acaniqui quepatsiqui, iriguentijia ampatsinipae que-naguatanquitsica inquitequi peacagaroca covaeguisherentsi.

¹³ Irootaquequeate nocantantajiaquempica imaica, pinquejetempariquea ashimirin-tatsica yaventarogueti iguishoritepae, paventamajajiaquempariquea aviatimpajia Aa-pani Irioshi yojocaquemparitari maasano pimpigatanquemparica ampatsini pagavejaji-aqueniji pintampishitashitimentajiaquerinijite incoraquetashijiaquempiguete, aatonijite yagavejajiguimpitsi, manaquea pinquemisantamajajianaqueriquea Aapani Irioshi.

¹⁴ ¡Pintimanaqueshiatsi! Picancaniquea pinquenquejajiaqueroqueate maasano ari-majatatsica teecaquea amatavijanteji, oquejetacaquea yoishotacomajatacarogueti ashimirintatsica ichompimashite. Pincomajamajajiaquempaqueate pinquejetanta-naquemparicaquea ashimirintatsica yavencarogueti isavoneguitacaca.

¹⁵ Quejetacaquea irira ashimirintatsica icavimajatanacaqueate cameetsanijite iranijitantanaquemparonijite, ariqueate pinetsanatanaquempacea poajianaque-quea, pinquenquetsatacaapojeriquea caquintepae pintsatacaajipojeriquea Quenquetsatsarentsi Oganejencatatsica inchoocatantajiaquempaca cameetsa.

¹⁶ Aisa choocaquea ashimirintatsica iticaancaca, iticaantavacaroquea shiquiripi morecatsica aatoniji iquentajitiri. Aisa aviatimpa, paventamajatanaquemparija Aa-pani Irioshi, pinquemisantamajatanaqueeriquea aatonijite yagavejimpitsi ampatsini-pae incovaeguishedacaquempiquea.

¹⁷ Aisa, quejetacaquea ashimirintatsica yasatirijarogueti cavorejatatsica ichoocatantajaca, pintsamajajiaquequea arimajaquea imeshiajiaquempi Quirishito pinchoocatantajempaca. Choocaquea aisa ashimirintatsica itsaampimenirite yagavejantarica yashimirincaca. Oquejetacaroquea Iguenquetsatsare Aapani Irioshi yojocajiacajica Ishire agavejanquemparicaquea ampatsinipae.

¹⁸ Picancaniquea pinquenquetsatacaqueri Aapani Irioshi, pamanamajapinjia-queriqueate pincantajiaqueriquea incavintsajajiaquempi iramitacojiaquempi. Pin-quemisanqueriquea Ishire intsatacaajiaquempiguete querocaca pincanqueni. Pin-quenquejamajajigue pamanaqueeriguete, aatoquea piperajigarotsi. Picancaniquea pa-manacoventajiaqueri maasano tsarorentajiatatsica.

¹⁹ Pamanacoventajiaquenaqueate naatimpa aisa, intsatacaguenaniji Aapani Irioshi quero noncanqueni aatoniji notsarogui nontsavetanquerogueti Quenquetsatsarentsi Oganejencatatsica teeca intsajivetempaji.

²⁰ Aapani Irioshi itigarancaquea nontsavetanqueroquea, irootaquequea isan-tanatacotimentajitaquenaca yoishoitsijitanaquea cavorejatsariqui. Pamanacoventaji-aquenaja cameetsanijite nontsavetantaqueronijite, pincantaqueriquea intampishita-caaquena aatoniji notsarocagarotsi, irootaquetari inintacaquenaca.

Interoncacaajianajerica

²¹ Ariquea ichoocataquequea apitsaroveritarite Tiiquico apintsajigaca. Iriatimpa yantamajatiniriqueate Amajirote. Imaica nontigarancaqueriquea iroanaquequea aviatimpajiaqui pinquemacotimentajiaquenaniijite, inchiqiojitsitarite incamantajiapojempiroquea maasano.

²² Irootaquequea nontigaranquimenquerica irishinetacajaiapojempiquea intampishitacajaiapojempiquea.

²³ Imaica, napitsaroveritarijiate, nonintaque irishinetacajaiaquempi Aapani Irioshi jeri aisa Amajirote Jesoquirishito inchoocatacaajiaquempiquea cameetsa, aatonijite taaca opajita pishoshoventajiajatsi, aisa intampishitacajaiaquempiquea pintsaroven-tamajianaquempariniji, aisa pimpintsatavacaajiaquempaniji.

²⁴ Aisa nocanqueriquea incavintsajajiaqueriquea maasano pintsamajajiaguitarica Amajirote Jesoquirishito.

PAAVORO ITIONCAJIAQUENERI PIRIPOQUITICA

Antsatantaquemparoca

Ocatia iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Piripo. Iriraqe Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueti itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiave-tacanarica. Irocashi itioncacotaqueri irira Paavoro otsipaqui paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti Paavoro Piripoqui paperiqui Yantajiguica 16.11-40; 20.1-6. Itioncacaantaquero Paavoro ocatia paperi isantanatacotacagueti. Chooa quenquejajianquitsica itioncacaantaquero ajagantsiniqui 55 isantanatacotacagueti Epesoqui. Itsipajia iquenquejajiaque itioncacaantaquero irooca ajagantsiniqui 60, irooca otsipa ajagantsini arejevaetacaro ajagantsini 63, isantanatacotacagueti Iromaqui. Irootaquequea iquenquejantajitacaca, tequeratagueti intioncacaaneroji ocatia, itioncacaantaguequero paperipae itigarancaciaquenerica Tesaronicaquitica, aisa mavite paperi itioncacaantajiaquenerica Corintoquitica, aisa paperi itigarancaciaquenerica Garashiaquitica. Chooa itsipajia quenquejajianquitsica itioncacaantajiaqueneri Iromaquitica, Epesoquitica, Corosaquitica, jeri aisa Piremoni tequeratagueti intioncacaantajigueneri Piripoquitica.

Ocaniqui paperiqui Paavoro iquenquejajiajiri tsaromentajiatatsica Piripoquitica icavintsajajiaquerigueti itigarancaciaqueneri imentaquitsitepae iramitacojiaqueriniji itsavetacotantaquerigueti Quirishito (2.25; 4.14-19). Isantanatacojivetacarigueti Paavoro, ogantaga ishinemajataca (1.12-26; 2.17-18; 3.20-4.1; 4.10-13). Itioncacaantajiaquenerigueti itsatacaajiaqueri iroo iniqueca Aapani Irioshi ogantaga irishinejiaque-mpa quemisantajiaquerica, irooca onchoocaquegueti cameetsagetatsica, irooca aisa managuetanquitsica ichoocajiaquegueti acaniqui quepatsiqui, ari iquejetaca iriatimpa Jesoquirishito (2.5-11). Itioncacotaqueri Timoteo (2.19-23), aisa Epaperorito (2.25-30), aisa itsavetacotaca yantaguetaqueca iriatimpa (1.3-8, 12-26; 3.4b-14), aisa icamantajiaqueri quero inchojiaquempani inchoocajiaquenijite cameetsa quemisantajiatatsica (1.9-11, 27-2.4; 2.12-16; 3.1-4a; 4.2-9).

¹ Naroguenti Paavoro, notsipatacari Timoteo, naroguentijia inintacajiaqueca Jesoquirishito nantajiaqueneri. Imaica nontioncaciaquempiqueate maasano aviatimpajia choocajiatatsica Piripoqui yashintajiacaca Aapani Irioshi, pitsaromentajiacaritarite Quirishito Jesoshi. Notioncaciaquempi maasano, aviatimpajia aisa quempoguijajiguirica quemisantajiatatsica jerijia aisa amitacojiaquerica.

² Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshomentajigaro taaca opajitapae.

Paavoro yamanacoventajiaqueriqueate quemisantajiatatsica

³ Nocoguitaniqueate noquenquejajiaquempigueti nocantaqueri Aapani Irioshi noshinevaeca.

⁴ Namanacoventajiaquempigueti noshinevaetacaqueate

⁵ namenaquequea aquejetavacaajiacca antajiaqueneri Amajirote cameetsanijite intsavetantimentajiaqueronijite Quenquetsatsarentsi Oganejencatatsica, piparianacaroquea iroaqueragueti piquemisantajiaquegueti arejevaecaquea imaica.

⁶ Notsamajaquequeate incogitempani incavintsajajiaquempi Aapani Irioshi iragavejacaajiaquempi, incogitempaniqueate incavintsajajiaquempi inquejetacaajiaquempi iroaqueraguete piquemisantajianaque arejevaetapojempa aapojajempaguete incoraquetantapojajempaca Jesoquirishito.

⁷ Noshinetimentajianaquempiquea. Cameetsatarite nonquejetaquempaguete imaica, nopintsamajajiaquempitarite, namenaquempiquea yagavejacaajiaquempiqueate Aapani Irioshi patsipeventajiacaroquea Iguenquetsatsare, piquejejaque-naqueate naatimpa nantaqueneriguete Amajirote. Coramaniquea tequerataguete irisantanatacojitenaji choocanaqueate notsavetantaqueroquea Quenquetsatsarentsi Oganejencatatsica tsavetantaquerica Jesoquirishito, nocantajiaqueriqueate maasano iroguentiquea iroomajaca. Aviatimpajiaqueate picavintsajajiaquenaqueate pamitacojiaquenaquea. Ariqueate oquejetacaqueate imaica yoguijaajitaquenaguete santanaqui picoguitaniqueate picavintsajajiaquenaqueate.

⁸ Itsamajaqueroquea Aapani Irioshi nopintsamajajiaquempiquea noquenquejajiaquempiquea, iriguentitarite quenquejacaamajataquenaqueate Jesoquirishito.

⁹ Irootaquequea namanacoventantamajajiaquempica arimpaniji pimpintsatavacaamajajianaquempaquate, pinquenquejamajajianaqueroqueate oganejencamajatatsicaquea, aisa pintsamajajianaqueroqueate maasano ininqueca Aapani Irioshi.

¹⁰ Namanacoventajiaquempiqueate pintsamajajiaqueronijite querocaca cameetsaguetsatsica, pincomajamajajiaquempianijite, aatonijite ochoocati querocaca incantomajimentajiaquempica Quirishito savincaguiteriqui incoraquetantapojajempaca.

¹¹ Yagavejacaajiaquempitarite Jesoquirishito pincomajamajajianaquempaquate onquejetanaquemparo pimpitsaraquijacomajajianaquempa, irooquea irishin-eventantamajajitanaquemparica Aapani Irioshi, incantajitequea caavijiquea yoganejencamajata Aapani Irioshi.

Ishinevaecaquea Paavoro itsavetantajiqueriguete Jesoquirishito

¹² Napitsaroventarijiate, noninquequea pintsajiaquequeate isantanatacojiveque-naqueate, cotanquitsiquea arimpaquea itsavetantamajajitanaqueroqueate Quenquetsatsarentsi Oganejencatatsica tsatacaajiacajica quero icota Jesoquirishito imeshiantiguete.

¹³ Maasanotarite coareta quempoguijajiguinirica itsovironaquite majirontatsica jerijiaquea maasano quemacotaquenaca isantanatacojitaquenaguete itsajiaquequeate iroguentiquea isantanatacotimentajiquenaqueate nococanitari notsavetanqueri Quirishito.

¹⁴ Choocaquea oshequi apitsaroventarijiate tsaroventajigarica Quirishito yamenajiaquenaguetequea yoguijaajitaquenaguete santanaqui teequeate intsaroajianaque-queate iriatimpajia, icocaniquea itsavetantajiaqueroquea Iguenquetsatsare Aapani Irioshi.

¹⁵ Cotanquitsiqueate ichoocagarantajiaquequea itsipa manaqueate icatsimatimentajiaquenaroqueate intati yamenajiaquenaguete icaramirincatimentajianaquenaquea ontaniqui caquinte, irootaquequeate itsavetacotantavecariqueate, inintajlavetacatarite iranaajiaquename intati. Cotanquitsiqueate ichoocagarantajiacaqueate itsipa manaquea itsavetacovintsamajajiaqueri Quirishito, ishineventamajajiacarotarite Iguenquetsatsare Aapani Irioshi.

¹⁶ Iriatimpajiaquea ipintsamajajiaquenaquea yamenajiaquenaguete iriguentiquea nintacaquena Aapani Irioshi nontsavetantajiaqueriquea Quirishito nontsatacajaiaqueriquea maasano quero icota imeshiantiguete.

¹⁷ Cotanquitsiquea irirajiaquea nintajlavetanquitsica iranaajiguena teequea irantamajateneriji Quirishito, manaquea itsavetantavetacariquea intati ijiqueji ari noshimampojancanaquempa, yamenajiaquenatarite isantanatacojitaquena.

¹⁸ Noncamantajiaquempiqueate choocaqueate tsavetantamajajiaquerica Quirishito. Choocajiaqueate aisa itsipa tsavetantajiguirica manaqueate inintajiaquequea intati irishimampojancaajiaaquena, cotanquitsiqueate naatimpa teequea noshimampojanquempaji, manaqueate noshinevaetanacaquea namenaquerigueti iriguentiquea itsavetantaquequea Quirishito.

Imaicaquea arimpa noamajatanaque noshinemajatanaquempaqua,

¹⁹ notsaquetari pamanacoventajiaquenagueti aisa yamitacotaquenagueti Ishire Jesoquirishito, irooquee iraantajitavajenaca.

²⁰ Teequea noninteji nantaque taaca opajita guipashivenquenanea, manaquea noninque nonquemisantamajataniqueriquea Quirishito, aatoquea notsaroguitsi. Arigueti osamanigueticquea nonchoocaque, aricampa irimetojajiquenaquea, noninquequeate noncoguitempaniquea nonquejetaquempa imaica intsaromentamajajiquemparinijite Quirishito.

²¹ Imaicaqueate imaica choocatirajanagueti iroguenticquea noninque nonchoocaventaqueroqueate nantaqueneriqueate Quirishito. Cotanquitsiquea caavijiquea anaquero nometojaquegueti, noninquequeate manaquea noanaque iriatimpaqui noncoguitempaniquea nonconoapojempariquea.

²² ¿Querocacaquea caavijica anaantamajatanquitsica? Jmm, teequea nontsateji. Iroguenticqueate notsaquequea choocatirajanagueti acaniqui quepatsiqui noncoguitempani nontsavetanqueriqueate Quirishito intsaromentajiaquemparinijite itsipa caquinte.

²³ ¿Querocaquea noncoquempani? Omanamajatacaquea, mavitetarite noninquequea. Nonintavecaqueate nometojaque imaica noanaquequea nonconoapojajempariquea Quirishito noshinevaetapojajempaqua.

²⁴ Cotanquitsiqueate ariquea nonintavajiqueate aatotaquea nometoji, namenaquetarite caaviji ocameetsataque nonchoocataquequea namitacomajajiaquempanijite.

²⁵ Irootaquequeate notsatantacaca aatotaquea nometojitsi, iroguenticquea nonchoocatashitaque nontampishitacajiaquempiquea pishinevaejiaquempanijite pintsaromentamajajianaquemparigueti Jesoquirishito.

²⁶ Oraquea irovashiantajitajenagueti ariquea noncoraquetajatequea namenajajatempi pintsatimentajiaquenijite manaqueate icavintsajamajataquenaqueate Quirishito Jesoshi, ariquea pishineventamajajianaquempari.

²⁷ Jeroquea aparo pinquempejianaquempa: pincomajamajapinijiaquempaqua pinquejetantanaquemparoca ocanqueca Quenquetsatsarentsi Oganejencatatsica tsavetantirica Quirishito. Pinquejejiaquempagueti, aricagueti noashijianaquempiquea iroguenticaquea nonchoocavetaquempaqua osamani, nonquemacojiaquempiquea picancani pitsaromentamajajianacari Quirishito teequeate povashiantajigueriji, aisa piconoavacajianacaquea patsipeventajiacaroquea Quenquetsatsarentsi Oganejencatatsica pitsatacajiaqueriquea maasano quero ocanti.

²⁸ Aatoquea pitsaroacagaritsi catsimajiaquempineca, ariqueate iramenajiaquempiqueti teequea pintsaroacaajiguempariji ariquea intsamajajiaquequea iriatimpajia arimajaquea incatsimamajajiaqueriquea Aapani Irioshi oncoramanitapojajegueti, cotanquitsiquea aviatimpajia manaquea irajavajempiquea.

²⁹⁻³⁰ Teequeate apaniroquea irinintacaajiguempiji Aapani Irioshi pintsaromentamajiaquempariquea Quirishito. Inintacajiaquempiqueate aisa pantsipeventajiaquempariqueate pinquejejiaquenaquea naatimpa natsipeventarigueti Quirishito, aisa imaica piquemacojiaquenaquea atsipetanatsinaqueate.

2

Pinquejejiaquempariqueate Quirishito

¹ Imaica itampishitacajaiacquempiquea Quirishito, aisa ipintsamajajiaquempi irootaquequea pishinevaetantajiacaca. Aisa ichoocashirentajiaquempiquea Ishire Aapani Irioshi aisa picavintsajavacaajiacaquea pipintsatavacaajiacaquea.

² Irootaquequea nocantantajiaquempica pinintajiaquegueti pishinetacajiaquenaquea, pincomajajiaquempaqueate aatoquea picatsimatavacaajiga, pimpintsatavacaamajajiguempaqueate, pinquemavacaamajajiguempaquea aisa pintsipatavacaamajajiguempaquea pantajiaquenerigueti Amajirote.

³ Aatoquea pinintajiguetsi panaimanajigueri papitsaroveritarite. Aatoquea piquenquejajiguirotsi pantajiaque paventacojiaquempaca. Majereni pincanquempa, pimpintsamajaquempariquea maasano pinquejetacaguempari pipintsamajatacarigueti anaamajiaquempica.

⁴ Aatoquea apaniro piquenquejatsi aviatimpa, pinquenquejacojiaqueriqueate aisa itsipapae.

⁵ Pincoguitempaniquea pinquejejaquempariquea Quirishito Jesoshi, pinquenquejajiguetac quejetaca iquenquejaquea.

⁶ Arimpate iriatimpa iriguentivetacaqueate Irioshimajaca, cotanquitsiquea teequeate iranaanteji. Irootaquequeate icanquerigueti Iriri incoraquequequeate acaniqui quepatsiqui irivoaque inquejejiacajiquea aatimpajia, teequea incantanaquequea: “Aatoquea noguitsi, naroguentitari Irioshi.”

⁷⁻⁸ Manaquea yovashiantaguetanaqueroqueate maasano yashintaguevetaca icoraquequitiquea acaniqui quepatsiqui, ivoaquitiquea icaquintemajatanaquequea, teequea irimajirontajempaji, manaquea iquejetanacariquea yomperaperaitaca. Yatsipetacaqueate iquemisantacocaquea intati. Icoquitaniquea iquemisantamajataqueri Iriri, jeroquea inchiquiojita ipanacaroquea imetojantacaca imetojaventajiacajiqueate coroshiqui.

⁹ Irootaquequeate icajemantanacarica Aapani Irioshi irimajirontamajatapojajempanijite, yanaacaavaetajiri irootaquequea ivajiro anaavaetantacaroca ivajiropae maasano.

¹⁰ Iquejetantacaricaqueate imaica irogueroventajiaquemparinijite Jesoshi maasano-ja choocaguetatsica jenoqui inquitequi, acaniqui quepatsiqui, aisa isavipatsaqui.

¹¹ Maasanoquea incantajiaquequea: “Jesoquirishito iriguentiquea Majirontamajataatsica”, ariquea intsaroveritajitaquempariquea Aapani Irioshi.

Ironigaacaantajiaquempa arimajaca itsaroveritamajatacari Jesoquirishito

¹² Nopintsamajajiacaca, coramaniquea nochoocavecagueti aviatimpajiaqui piquemisantamajajiaquenaqueate pinetsanamajajiaqueroquea maasano nocantajiaquempica. Cotanquitsiquea imaica nochoocaquegueti osamani noninquequea arimpaquea pinquemisantamajajianaquenaqueate. Imeshiajiaquempitarite Aapani Irioshi nocantantajiaquempicaquea pimpincatsamajajiaqueriqueate pinetsanamajajiaqueroqueate maasano inintaqueca.

¹³ Iriguentitarite quenquetsashirentacajiaquempiqueate Aapani Irioshi pinintimentajiaquenijite pantajiaquequea maasano ininqueca iriatimpa, aisa iriguentiquea tampishitacajiaquempineca pagavejantajiaquempaca pantantajiaquemparoca.

¹⁴ Maasanoquea pantaguequeca arigueti aseraquempi aatoquea picantanaque pitse pitse, manaquea pishinevaetanaquempaquea intati, aisa aatoquea pipigatsatavacaanaca,

¹⁵ aatoniji ochoocatitsi querocaca incantomajimentajitaquempica. Aisa netsana poguero piguenquejane, aatoquea piconoaguishetiroquea covaeguisherentsi pinquejemajamentajiaquemparinijite Aapani Irioshi, aviguentijatarite irijanijiate. Ariquea

irirajiaquea antaguishejiaqueroca covaeguisherentsi iramenajiaquempiqueate quejevaejiaquempi impoquiropae iquitamiriaquitigueti opitsecaquegueti, teetari pinquejijiguempariji iriatimpajia, manaquea picomajamajatanacaquea intati,

¹⁶ aisa pitsatacaantamajajiaqueroquea Quenquetsatsarentsimajaca Anijacaantantat-sica. Ariqueate incoraquetajategueti Quirishito noshinevaequempaquate, irame-naquenatarite teequea nantsipeventashitempariquea intati, manaquea noquemisan-tacaamajajiaquempiquea.

¹⁷ Noquejetacaroquea imirajitaca ishaguitsijitantacarica viratsi itaajiquenerigueti Aapani Irioshi, aviguentijia quejiaquempiquea itaajiquenerica, patsipeventajiacaritari paventajiacaca pantajiaqueneriquea. Natsipevetacaquea, iro cotanquitsi noshinevaetaca namenajiaquempigueti aviatimpajia pishinevaejianaca.

¹⁸ Imaicaquea ariquea pinquempejiaquempaquate aviatimpajia aisa pishinejiaquempaqua pamenajiaquenagueti nococaniquea noshinevaetanacaquea natsipeventacarigueti.

Timoteo aisa Epaperorito

¹⁹ Irininquegueti Amajirote Jesoshi, iroaquerasanoquea nontigarancaqueriquea Timoteo iramenajiaquitempi. Irarejepojajempagueti incoraquetajegueti noshinevaetanaquempaqua nonquemacojiajempigueti.

²⁰ Tee anejerijiquea itsipa quejetaquemparineca iriatimpa, iquejetaquenaquate naatimpa noquenquejamajajiguimpigueti.

²¹ Itsipapaequea iriguentiquea quenquejacojiajatsi, teequea irioquea inquenquejamajajigue Quirishito Jesoshi.

²² Cotanquitsiquea aviatimpajia pitsamajajiguiritari Timoteo itsipamajatanaqueate yamiquenaquea notsavetantirogueti Quenquetsatsarentsi Oganejencatatsica quejevaecaquea irio nirijanitemajaca.

²³ Arigueti nontsaqueguetiquea querocaca incojiaquenani santanatacojiaquenaca nontigarancaqueriquea iramenajiaquitempi.

²⁴ Ariquea nonquejetaquempaqua naatimpa, noquenquejaquetari inintaque Amajirote iroguipaquijajajena taampina, ariquea noncoraquetaquitequea namenajiajatempi.

²⁵⁻²⁶ Coramani pitigarancajiaqueriquea papitsaroventariteni Epaperorito iramitacouena. Irioquea notsipatashitaca notsavetantaquerigueti Quirishito. Imaicaquea namenaquequea cameetsataque nontigarancajeri iroanaje pinejajivajeriquea, ininquequate inchiquiojita iramenajiapojajempi, itsaquetarite piquemacojiaqueri yashinoncajavaetaca.

²⁷ Arimajaquea yashinoncajamajatacaquea pajinimequea irimetojeme, cotanquitsiquea icavintsajaqueriquea Aapani Irioshi. Teequea apaniroquea incavintsajeriji iriatimpa, icavintsajaquenaquate naatimpa aisa aatoniji noshimampojancamajata.

²⁸ Irootaquequea nonintantacaca nontigarancajeri taampina iroanajequea aviatimpajiaqui cameetsaniji pishinetimentajianajempaniji, aatonijite noshimampojanquimentajiguimpitsi.

²⁹ Iriatimpa iriguentiqueate papitsaroventarite pinconoajivajempariquea pincavintsajivajeriquea, ariquea pinquejetacaajiaquempariquea maasano quejejiacarica iriatimpa.

³⁰ Coramaniquea pajinimetarite irimetojaventanaquerome yantaquenerica Quirishito. Iriguentiqueate coraquetanquitsica yamiquenaquea, teenicate pagavejajigueji aviatimpajia pinchoocajiaque naatimpaqui pamijiaquenaquea.

3

Inchiquiojitaja piconoajigaritsijate cantashitatigaroca Quenquetsatsarentsimajaca

¹ Imaica, napitsaromentarijiate, pishineventamajajiguempariqueate Amajirote. Teequea nomperatemparoquea notioncajiajimpigueti aisa, napijijiajimpiquea nocantajiaquempica coramani pincomajatimentajiaquempanijite aatonijite querica amatavijajiguimpitsi.

² Pagamajajiaquempari irirajia amatavijantatsica quempevetacarica shiishi, pagamajajiaquempari irirajia peacagaroca covaeguisherentsi, irirajia nintanquitsica intotashivijitacaantempi intati pitsinoqui.*

³ Aroguentijiatari totsaiquimashimajatanquitsica, atsaromentamajajiacaritarite Aapani Irioshi yagavejacaajiacajigueti Ishire, yashintajiacajiquea Quirishito Jesoshi irooquea ashineventajiaica, teequea aventajiguempari amenavequempaca atsinoqui.

⁴ Cotanquitsiqueate naatimpa noninquemegueticquea naventavetaquempari amenaqueca atsinoqui, nagavejaquemequeate. Choocagueti jivetatsica iragavejaque iraventempari amenaqueca itsinoqui cameetsaniji iro irimeshiantajitaquemparica, caaviji anaaque nashi naatimpa naventavetaquempameca.

⁵ Iroorijite novoaquegueticquea iroompaquea aapojacagueti 8 savincaguiteri itotsaiquijiqueroqueate nochonquimashi, naroguentitarite ishiraeri ichoviquini Vejamineni, evereomajaca nonaque, noguenquetsatsare iroguenticqueate evereotsa, naroguentiquea pariseomajaca notsipajiacariqueate nogonorojia pariseojia nonetsanajiavetacariquea itioncacotanaqueca Moishishini.

⁶ Caavijiquea nonintamajaveca nontsaromentamajataquemparime Aapani Irioshi, nocatsimatantajianacaricaquea tsaromentajiacarica Quirishito, nojiqueji arijiquea icantashitaticaro nonetsanaguevecaca, namenavecatarite caavijiquea nocomajamajatacaquea.

⁷ Cotanquitsiquea imaica teequeate nonquenquejacotajeroji maasano noshineventavetacaca coramani, teequea noshineventajemparoquea iriguenticqueate nonquenquejamajaquequea Quirishito nontsamajatimentajiaquempari.

⁸ Caavijiquea anaaquequea oganejencamajataca nontsamajataqueriqueate Amajirote Quirishito Jesoshi, anaaquequeate maasano. Namenaguetanaaquequeate maasano nonintaguevetanica quejetanacaquea cajarashitequi nontsatimentamajataquerinijite iriatimpa,

⁹ aisaquea nonconoimentamajaquemparinijite. Teequea noncameetsatashitimpaji naatimpa. Nonetsanaguevecaroquea itioncanaqueca Moishishini, cotanquitsiquea tee onetsanatenaji. Manaquea naventacarigueti Quirishito, irotaquequea inetsanatantaquenaca Aapani Irioshi. Ariquea inquejetacaguempariquea maasano aventajiaquemparineca irinetsanajiaqueriquea.

¹⁰ Imaicaquea naatimpa manaquea nonintamajataquequea nontsamajaqueri Quirishito. Noninquenequea iragavejacaquenaquea naatimpa quejetacaquea yagavejacaquerigueti Aapani Irioshi yovochantajirigueti. Aisa noninquenequea nantsipevenquempari nonquejetaquempariquea iriatimpa yatsipeventajiacajigueti. Teequea noninteji nonquenquejajeroquea nonintaguevetacaca naatimpa, quejecaquea manaca notsipatacari Quirishito imetojaquegueti, ariquea nometojapitsatanaaquequea maasano nonintaguevetacaca.

¹¹ Noninquetarite nontancorejanaje oncoramanitapojajegueti nonchoocapojajequa iriatimpaqui.

Isavicaventamajatica Paavoro

* **3:2 nintanquitsica intotashivijitacaantempi intati pitsinoqui.** Iriojia icantacotaque irirajia cantajianquitsica intotsaiquimashitacaantempa maasano cameetsanijite irishineventavaquempari Aapani Irioshi.

¹² Teequea noncanteji netsanataca maasano nocantacoguequeca imaica, aisa teequea noncanteji jac cameetsamajatanajana. Manaquea panquenatanatsinaquea nonetsanatinenqueroniji inintacaaquenaca Quirishito Jesoshi iroorijite yashintajana.

¹³ Napitsaromentarijiate, tequerataqueate nonetsanamajaguetaquero maasano inintacaaquenaca. Cotanquitsiquea jeroquea nosavicaventica imaica: teequea noninteji nonquenquejacotajero querocaca nantaguetaqueca coramani, manaquea arimpaquea noamajatanaque nomoncaraqueroniji inintacaaquenaca.

¹⁴ Ariqueate noncotanaquempaniqueate imaica incavintsajimenquenaniijite Aapani Irioshi iraanaquenaquea jenoqui inquitequi, irootaquetari icajemantimentajiacajica aventacarigueti Quirishito Jesoshi.

¹⁵ Maasanoqueate tsaromentamajigarica Quirishito ariqueate inquejejaquem-paquea imaica. Choocaguetiqueate itsipaquea cantashitaticaroca iquenquejajiaque-gueti, inchiquiojitaquea ironigaajiaqueriqueate Aapani Irioshi.

¹⁶ Cotanquitsiquea aatimpajia iintsija anetsanajiaqueroquea maasano itsatacajaiaca-jica iriatimpa.

¹⁷ Napitsaromentarijiate, pincomajajiguempaqueate pinquempejiaquenaqueate naatimpa nocomajamajataca, nonigaajiaquempirotarite naatimpajia quero nocojigaquea noquemisantamajajiguirigueti Quirishito. Nocantantajiaquempicaquea anquejianaquempariqueate maasano quejejaqueroquea imaica.

¹⁸ Nocantajiaquequempiqueate coramani, cotanquitsiqueate imaica noncantsijajem-piqueate aisa, choocaqueate oshequini teeca irinintajigueroji Quenquetsatsarentsi Oganejencatatsica tsavetantaquerica Quirishito imetojaventajiacajigueti coroshiqui imeshiajiacajiqueate. Noshimampojanquimentajiacariqueate irirajia quejejianquit-sica imaica, oparijaatantanacaca nojaquija nocantajiaquempigueti.

¹⁹ Iriatimpajia iroaroaitanaquequea camorecariqui. Iroguentitarite ichoocaventa-jiaquequeate isheca, quejetaca iro irioshite. Teequea impashiventajiguempaji yan-taguishejaqueroqueti covaeguisherentsi, manaquea isemetacojiaqueroquea intati. Iroguentiqueate iquenquejajiaquequea quepatsipaequitica.

²⁰ Cotanquitsiquea aatimpajia atsajiaquequea manaquea oajianaquequeate jenoqui inquitequi ancoguitempaniqueate anchoocajiaque ontaniqui. Irootaquequeate imaica oguijantajiacaricaqueate incoraqueetajegueti Amajirote Jesoquirishito meshiajiacajica, iriguentitarite aajianajajineca.

²¹ Oraquea incoraqueepojajegueti incantashitatijaiapoajajiroqueate atsinojia tee-tarite onetsanamajatem-paji, oganejencatanajempaquea onquejevetanaquemparoniji irashi iriatimpa itsino oganejencatagueti. Iroguentiquea incantashitatieantajiacajiro-quea iragavejane yagavejancarocaqueate maasano.

4

Icantajiaqueriquea irishinejiaquempaquea

¹ Imaica, napitsaromentarijiate, irootaquequea nocantantajiaquempica pincogui-tempanija pintsaromentamajajianaquemparija Amajirote. Naatimpa noquenquejaji-ajimpiquea noninquequea nonejajiaquitempi iroorijite nopintsajiaquempiquea. Avi-atimpajiaquea pishinetacaajiaquenaquea, aviguentijiarite noshinetimentajiacaca.

² Oraqueate Evoria aisa Shintique noninquequea ovetsinantavacaajiajempa-queate onconoavacaajiajempanijite, iroguentijiarite tsaromentajigarica Amajirote Jeso-quirishito.

³ Aviatimpa napitsaromentarite, notsipatashitacaca antaquenerigueti Amajirote, noninquequeate pintsatacaajiaqueroquea ovetsinantavacaajiajempa-queate onetsanatanajempanijite. Iroguentijiarite notsipatashijica coramaniqui

natsipeventajiacaroguetti Quenquetsatsarentsi Oganejencatatsica notsavetantajiaqueriguetti Jesoquirishito. Jeriqueate aisa notsipatashijiacaca Querimente jerijia aisa itsipapae amitacojiaquenaca, tioncacoguetacatari ontaniqui jenoqui inquitequi itioncacotantajiacarica Aapani Irioshi maasano choocajiapojajatsineca ontaniqui jenoqui inquitequi aatonijite imetojajiajitsi.

⁴ Pincoguitempanijate pishinetimentajiaquempariqueate Amajirote. Noncantsijiajempiquea aisa pishinejiguempa.

⁵ Pincavintsajantajiaquequeate, aatoquea pipigatsatantajiaatsi iramenimentajiaquempinijite maasano picomajamajajiaquea intati, irooshipojajitari incoraquetaje Amajirote.

⁶ Aatoquea querocaca pishoshoventajiajatsi, manaquea pincamantajiaqueriquea Aapani Irioshi pamanajiaqueriqueate taaca pinintajiaqueca. Pincouquempaniquea pishineventaquempariquea pincanqueriquea: “¡Ariotesaa!”

⁷ Pinquejejiaquempaguetiquea imaica iroguishinejamajajiaquempiquea. Pincoguitempaniquea pishinemajajiaquempa quea pishirequi aatoniji pishoshoguitejiajatsi, pitsaromentamajajiacaritarite Quirishito Jesoshi. Cotanquitsiquea aatoquea oquejetarotsi oguishinejantajiguiguetti aatimpajia, caavijitarite anaqueroquea. Aatimpajiaquea teequeate agavejajigueji antsajiaquero quero icojiacajini Aapani Irioshi yoguishinejajiacajiguetti.

Icantajiaqueriquea inquenquejacojiaqueroquea cameetsaguetatsica

⁸ Imaica, napitsaromentarijiate, apanivaniquea noncantajiaquempi noninquequea pinquenquejacoguequeroja maasano iroomajaguetatsica teeca amatavijanteji, jeroquea aisa maasano atsatacoguetica caavijica ocameetsamajati. Manaquea pinquenquejajigueja pantajigue cameetsaguetatsica, aatoquea piquenquejajigui pantajigue covaeguisherentsi. Pinquenquejajigueja quero pincojiaquempa pincomajamajajiaquempagueti, aisa pinquenquejamajajigue quero pincojiaquerini pignonropae pinchoocatantajiaquempaca cameetsa. Pinquenquejacojigueroja maasano acantacojiaqueca oganejencavaeca. Iroguentiqueate pinquenquejacojigue maasano cameetsaguetatsica caavijica ishineventacaca Aapani Irioshi.

⁹ Coramani nochoocatimojiaquitimpiguetti piquemisantajiaquenaqueate notsatacajiaquempigueti, aisa pamenajiaquena quero nocota. Imaicaquea imaica noninquequea pinetsanamajajiaqueroqueate maasano notsatacajiaquempica, aisa pincomajamajajiaquempa queate pinquejejiaquenaquea naatimpa nocomajamajataguetti. Pinquejejiaquempaguetiqueate imaica iriraquea Aapani Irioshi quisho iroaquempi, inchoocatacajiaquempiquea cameetsa aatoniji taaca opajita pishoshoventajiajatsi.

Iriraquea Piripoquitica icavintsajajiaqueriquea Paavoro

¹⁰ Imaica noshinetacaquea noshinetimentanacariquea Amajirote namenaqueguetti piquenquejajiajanaquea irootaquequea picavintsajantajiajanaca. Cotanquitsiquea teequea noncanteji pipeacojiavetajana coramani, notsaquetarite piquenquejajiaventaquea cotanquitsiquea teequea pagavejajigueji pincavintsajajiguenca.

¹¹ Teequea noncanteji nocoguitejacoca, irooriji namecaroquea nococani noshinevaeata, aatoguetti ochoocaveta shinetanatsinaquea.

¹² Notsamajaquerotarite quero noncoquempa nantsipetaquempagueti. Ariguettequea noncoguitejacoquempagueti aricaquea aato, iroocaquea nontaseaqueguetti ariguettequea onchoocaqueguetti oshequiavaetaqueguetti nosheca, cotanquitsiquea aatoquea noshimampoancatsi, nococaquea noshinevaetanaquempa quea.

¹³ Nagavejaguequeroqueate maasano inintacaaquenaca Aapani Irioshi, iriguentitarite agavejacaquenaqueate Quirishito.

¹⁴ Cotanquitsiquea cameetsavaetaquequea picavintsajajiaquenagueti, pitigarancaantajiaqueaquea nocoguitejacovetacaca.

¹⁵ Notsaquequea teequeate pimpeacojiguenaquea arejevaecaroquea coramani notsavetanquerogueti Quenquetsatsarentsi Oganejencatatsica Maseroniaqui. Irootapojegueti nosotoanaque noanaquegueti osamani, apaniroquea picojiaca aviatimpajia Piripoquitica picavintsajajiaqueaqueate pitigarancacaantantajiaquenaca nocoguitejacovetacaca. Itsipapae quemisantajatsica teequea irojocajiguenaji.

¹⁶ Ariquea piquejetaqueroquea aisa choocatirajanagueti Tesaronicaqui pitigarancaantajiaqueaquea nocoguitejacovetacaca, coajicaquea papijitsijiajanaquequea aisa.

¹⁷ Noshinevaetanacaquea namenaquegueti pojocajiaquena, cotanquitsiquea arimpaqueate noshinemajatanacaqueate notsaquetarite incavintsajajiaquempiqueate Aapani Irioshi, yamenaquempitari iriatimpa picavintsajajiaquenagueti.

¹⁸ Yojocapojajanaroquea Epaperorito maasano pitigarancacaantaquenaca, choocaquea imaica anaapojajiroquea nocoguitejacovetacaca, oshequiavaepojiquea. Namenaquequea mana pojocajiaqueaqueate quejecaquea irioca pojocajiaquene Aapani Irioshi. Ishineventanacaroquea iriatimpa, yamenaquerotarite oganejencavaeca, oquejetimotacari casancajencari. Oquempetacaro aisa imetojajiquenerigueti viratsipae itajaiqueneri.

¹⁹ Ariquea Nirioshite irojocamajajiaquempiro maasano coguitejimojiaquempica, oganejencavaetacatari iragavejane aisa yashintavaetacaca yashintacaacarica Quirishito Jesoshi.

²⁰ Ancoguitempaniqueate antsaromentajiaquempiriquea Aapani Irioshi, aatotari oteroncajatsi intsaromentajiaquempirigueti. Ari oncoquempa.

Icamantajiaqueriquea iquenquejajiaqueri maasano

²¹ Pincamantajigueriquea maasano tsaromentamajajigarica Quirishito Jesoshi nococaniquea noquenquejajiaquempi. Iriraquea napitsaromentarijiate notsipatsipaitacaca inintajiaquequea pinquemacojiaqueri icancaniquea iquenquejajiaquempi.

²² Ariquea iquejejiacaquea maasano quemisantajatsica choocajatsica acaniqui, iniquequea pinquemacojiaqueri icancaniquea iquenquejajiaquempi. Iriguentiqueate nintamajajianquitsi pinquemacojiaqueri choocajatsica itsovironaquitequi Sesa.

²³ Noninquequeate incavintsajashirentajiaquempiquea Amajirote Jesoquirishito maasano aviatimpajia pishirequi.

PAAVORO ITIONCAJIAQUENERI COROSAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsarotentajiacarica Jesoshi choocajianquitsica guinteninintsiqui pajitatsica Corosa. Irocashi itioncacotaqueri irira Paavoro otsipaku paperiqui (Ya. 7.57–8.1; 9.1-31; 13.1–28.31). Tee iroavetempaji Paavoro Corosaku, cotanquitsi ipintsajiacari tsarotentajiatatsica Corosaquitica, irootaquequea itioncacaantantajiacanarica (2.1-5), aisa irira Epaperashi icamantaqueri Paavoro quero icojiacani Corosaquitica (1.7-8). Tequeratagueti intioncacaanteroji ocatica paperi, itioncacaantaquero otsipa mavite paperi itigarancaciaquenerica quemisantajiatatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Corosaquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajiaqueneri quemisantajiatatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icamantajiaqueri quemisantajiaquerica Jesoshi quero incojiaquempani intsipamajajiaquemparigueti Amajirote (3.1–4.6). Itsavetacojiaqueneri Quirishito, iriotaque peacaacaroca maasano aisa iriotaque choocatacaaquero, iriotaque agavejamajatatsica yanaajiaqueri maasano (1.15-23). Apaniro iriatimpa yagavejaque iramitacojiaqueri quemisantajiaquerica incomajamajajiaquempa aatoniji yamatavijajigui tsatacaantamampeajiatatsica (2.6-23).

¹ Naroguenti Paavoro itigarancane Jesoquirishito, iriotari nintacaquena Aapani Irioshi. Choocana acaniqui notsipatacari apiguemisanteritene Timoteo.

² Imaica nonintaque nontioncaciaquempi paperi maasano aviatimpajia choocajiatatsica Corosaku comajamajajiatatsica quemisantamajajiguirica Quirishito. Namana-coventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoguiteventajigarogaro taaca opajitapae.

Paavoro ishineventacari Aapani Irioshi

³ Nocancani namanacoventajiaquempiqueti nocanqueriquea Aapani Irioshi, Iriri Amajirote Jesoquirishito: “Arioteesaa.”

⁴ Noquemacojiaquempi piquemisantamajajiaqueri Quirishito Jesoshi, aisa noquemacojiaquempi pipintsamajajiacari maasano yashintajiacaca, irootaquequea noshinevaetantanacaca.

⁵ Piquejetantanacaca imaica poguijacojiacatarite incavintsajajiaquempi Aapani Irioshi jenoqui inquitequi. Aviatimpajia iroaqueragueti piquemajiaquerogueti Quenquetsatsarentsimajaca, piquemaquegueti irimeshijiaquempi, ariqueate piquenajiaque poguijacojianaca incavintsajajiaquempi.

⁶ Ocatica piquemaqueca ojatacoguetanaque otsitacaguitejanacaro maasano quepatsi, icantashitiantajianacaca oshequi caquinte iquejejiaquempi aviatimpajia

piquemisantajiaquerigueti Aapani Irioshi. Aritarite iroaqueragueti piquemajiava-querogueti aviatimpajia, pitsajiaipojaquegueti arimaja icavintsajajiaquempi Aapani Irioshi, ariqueate icantashitatijajiaquempi.

⁷ Coramani notigarancaqueri notsipajiacaca Epaperashi nopintsajiacaca itsatacaamajajiaquempiquea Quenquetsatsarentsimajaca, iroomajaca. Iriatimpa iriguentiquea aisa savicaventiroca inintaguetica Quirishito.

⁸ Ariquea icoraquetajigueti icamantapojaquena icanti caaviji pipintsatantajanaca aviatimpajia, yagavejacaajiaquempitari Ishire Aapani Irioshi.

Yamanacoventajiaqueri Corosaquitica

⁹ Irootaquequea icamantajiaquenagueti nocancani namanacoventajiaquempi nocantajiaqueri Aapani Irioshi iroguiconijajiguempiro ininquca, intsatacajajiaquempi pintsamajajiaqueniji pishirequi quero pincojiaquempani.

¹⁰ Irooquea namanantajiacarica cameetsaniji pagavejajiaqueniji aviatimpajia pinetsanavaejianaquempa, irishineventaquemparoniji maasano pantaguetaqueca. Ariquea pantajiaque taaca opajitapae cameetsaguetatsica, aisa pintsamajajiaqueri Aapani Irioshi.

¹¹ Namanacoventajiaquempi aisa intampishitacaajiaquempi Aapani Irioshi, iriotarite tampishitacaantamajatatsica. Nocantiri intampishitacaajiaquempi cameetsaniji pantsiperejacojiaquempaniji maasano, aatoniji pisemarotsi mana pishinevaejiaquempa intati.

¹² Pincanqueri Aapani Irioshi pishinevaejiaquempa, pitsaquetari imeshiajiaquempi cameetsaniji pintsipajiaquempariniji maasano tsaromentamajajiacarica incavintsajajiaquerigueti coajica ontaniqui otsirencaguitemajaquegueti.*

Jesoquirishito

¹³ Coramani iriguenti ashintajiavecaji ampatsini, oquejevetaca aguintenivetacagueti ontaniqui opitsecamajaquegueti. Imaica yaavajaji Aapani Irioshi, irioquea ashintajaji Irijanite ipintsamajatacaca, irosati ipeanaca Amajirote.

¹⁴ Irioquea metojaventacaji ochovivincajavanacaji iriraja irooquea yovegaratan-
tacaji cameetsaniji irajaiavajaji Aapani Irioshi iroguipejajeroniji aguempevaereja.

¹⁵ Iiraquea Quirishito iquejemajatacari Aapani Irioshi teeca inconijateji, yonigaajiacajiri. Iriatimpa iriguenti iriquetica choocatatsica, yanaajiaqueri maasano ipeacaajiacaca.

¹⁶ Iriotarite ipeacaantajiguetacana maasano: choocaguetatsica jenoqui inquitequi aisa choocaguetatsica quepatsiqui, conijaguetatsica irisati teeca inconijajigueti, maasano. Iiraquea teeca inconijajigueti chooca imajirojiate, irira itsipa anaantatsica, aisa agavejajiatatsica, cotanquitsi iriguenti Quirishito ipeacaantajitacana maasano cameetsaniji irashintajiaquempariniji.

¹⁷ Iriatimpa icancani ichoocatini coramani tequeratagueti onchoocagueti, irioquea aisa netsanamajaquero maasano imaica. Icanqueri maasano ipeacaacaca: "Aritaque pincojiaquempani."

¹⁸ Iriotaque iguito quemisantajiaquerica, aatimpajia quemisantajiaquerica aroguenti itsino. Iriotaque meshiajiajajia, irio aisa jivaqueri maasano tancorejajiananquitsineca cameetsaniji irimajirontamajaquempariniji maasano, iranaamajajiaqueriniji.

¹⁹ Inchiquiojitarite ininque Aapani Irioshi icantaguitani inquejemajataquempari iriatimpa.

* **1:12 Ontaniqui otsirencaguitemajaquegueti** ocantacotaquero inquite ichoocaquegueti Aapani Irioshi, teegueti onchoocateji covaeguisherentsi.

²⁰ Ininque aisa irogameetsatanajeri maasano catsimajiaquerica choocajiatsica quepatsiqui aisa choocajiatsica jenoqui inquitequi, irishineventajiajempariniji. Irootaque itigarancantarica Quirishito osotoajatimentajiacajiniji iriraja coroshiqui imetojimentajiacajigueti.

²¹ Coramani aviatimpajia tee pintsipashirentajiguempariji Aapani Irioshi, mana picatsimajiaqueri piguenquejanequi, picovaeguishejiacatari. Cotanquitsiquea imaica ivetsinantajiajimpi,

²² irooquee yogameetsatantajiaquempica itsino Quirishito imetojiventajiaquem-pigueti. Iquejetantacaca imaica cameetsanijite irinejajiacaji netsanjiaacaji quejeta-canica tee anquempevaetempaji, aatoniji icantajigaji: “Chooa piguempevaere.”

²³ Cotanquitsi imaica pinquemisantamajajiaqueroja Quenquetsatsarentsi Ogane-jencamajatatsica piquemajiaqueca iroaqueragueta, aato povashiantajiguero, aisa aa-toja piquemisantajiguero cantashitigaroca aatoniji pipeacojigaro imeshiajiaquempi Aapani Irioshi. Irootaquequea ocatica Quenquetsatsarentsi imaica itsavetantaji-tanaqueca otsitacaguetejanacaro maasano. Irootarite nosavicaventaque naatimpa notsavetantaquero.

Paavoro iriguenti amitacojiguirica quemisantajiguirica Quirishito

²⁴ Imaica noshinevaeca natsipeventajiaquempigueti, notsaquetarite irootanaque nonteronquero acaniqui notsinoqui inintacaquenaca Quirishito: natsipeventajiacari maasano quemisantajiguirica, maasano iriraja iquejetacaajiacaca itsino.

²⁵ Iriotaque tigarancaquena Aapani Irioshi nosavicaventajiaquempi maasano tsariventajigarica, nontsatacamajajiaquempiro maasano Iguenquetsatsare.

²⁶ Coramani tee intsajiteroji, iroguentitari yomanavecaro Aapani Irioshi, cotanquitsi imaica imaquero yoguiconijajiaqueneri maasano quemisantajiguirica.

²⁷ Ininquetari Aapani Irioshi pintsajiaquero ocatica: iriraquea Quirishito ichoocashirentajiaqueri maasano quemisantajiguirica irioca joriojia aisa teeca irijorijoigueti, irootaque ichoocashirentantajiaquempica aviatimpajia. Iroompa iraanaquempi jenoqui ichoocatigueti pinquejetajempari iriatimpa.

²⁸ Iriotaque notsavetantajiaque. Nocantsijiavacari maasano namitacojiaqueri aatoniji icovaeguishta, aisa notsatacaajiaqueri cameetsaniji intsamajajiaqueriniji, intsariventamajajiaqueriniji Quirishito Jesoshi.

²⁹ Jeroquee nosavicaventaquero natsipevencaro, iriguentitari tampishitacaquena Quirishito, yagavejacaamajaquena.

2

¹ Imaica noninque pintsajiaque oshequi natsipeventajiaquempi namanacoventaji-aquempi aviatimpajia, aisa maasano choocajiatsica Iraoriseaqui, aisa maasano tecca irinejajiavetenaji.

² Noquejetaca imaica cameetsaniji pishinejiaquempaniji, aisa pimpintsatavacaja-iacquempaniji. Noninque pintsamajaque aatoniji ichoocati amatavijaquempineca, aisa noninque pintsamajajiaqueri Quirishito. Coramani tee intsajiteji irio meshiajia-ca-jineca, yomanaquerotari Aapani Irioshi, cotanquitsi imaica imataquero atsajiaque, yonigaajiacajiroitari.

³ Iriatimpa Quirishito intsamajataque. Apaniro iriatimpa iragavejamajataque intsata-caacaji maasano.

Shoshoh yamatavijajitimpitsi

⁴ Irooquee nocamantajiaquempi cameetsaniji aatoniji yamatavijajitimpitsi, pijijigu-irotsi cameetsa icantavequempica.

⁵ Tee nontsipajavetempiji, cotanquitsi oshequi noquenquejajiaquempi. Noshinevae-taca noquemacojiaquempi pitsipatavacajaijanaca cameetsa, quisho poamajajianajiri Quirishito, paventajianajari.

⁶ Imaicaquea imaica piquemisantajiaqueritari Amajirote Jesoquirishito, picancanija poguijamajianaquerija.

⁷ Nonquejetacaaquempiro: oratica panquirentsi irooquea oshipaqui anijacaaquero, aisa irooquea tampishitacaaquero. Aisa pinquejejiaquempa aviatimpajia, quisho poanaqueri Quirishito intsatacaquempi, aisa intampishitacaaquempi. Picancaniquea pinquemisantamajajianaqueri, pinquejetacaajianaquemparo itsatacaajitaquempica. Picancani pishineventajianaquempari Aapani Irioshi, pincanqueri: “Ariotesaa.”

⁸ Inchiqiojिता yamatavijajiguimpitsi cantashijigaroca iquenquejashiguetacaca caquinte; tee iroonica inquenquetsatacojigue itsatacaacajica Quirishito, iroguenti iquenquetsatacojiaque yamejigaca caquinte, itsatacantica quepatsiquitica.

⁹ Aritarite Aapani Irioshi ichoocatsinomajatantacari Quirishito.

¹⁰ Imaica piquemisantamajajiaqueritari Quirishito, tecatsi pincoacojiajempaji pinchoocajajeniji cameetsa, iriotari agavejacaaquempineca maasano. Iriatimpa caaviji yanaanti, yanaajiaqueri maasano majirontaguevetatsica, irirapae anejaqueca aisa teeca irinejajiteji, yagavejamajaquetarite.

¹¹ Paventashirentaquemparigueti iriatimpa, quejetaca itotsaiquijitaquempi, cotanquitsi teequea iro totsaiquitimpi iraco caquinte, irio totsaiquitimpi Quirishito pishirequi, ipishoncajimpuro pinintaguishevetacaca.

¹² Ariquea iviñacajitaquempigueti ari oquejetaca pitsipajiacari Quirishito yoguijajitaquerigueti yoguijantapinijitarica metojaguetatsica, iroompaquea pisotojaatanajigueti ari oquejetaca pitsipajijaari itancorejanajigueti. Pinejajiaqueriquea caaviji yagavejamajati Aapani Irioshi, iriotari tancorejajiri Quirishito. Irootaquequea itancorejantajimpica paventajiacarogueti iragavejane.

¹³ Coramani pipeacaaguishejiaca covaeguisherentsi, quejetaca metojajiaque pishirejia. Tee pintotsaiquivetempaji, cotanquitsi icavintsajajiaquempi Aapani Irioshi, itancorejajajimpi, quejetaca pitsipajijaari Quirishito itancorejajirigueti. Ariquea ipeacotsitajajiro maasano aguempavejereja.

¹⁴ Coramani atsiperejacojiacararo itioncacotanaqueca Moishishini antsajiaquerome cameetsaniji irimeshijajiniji Aapani Irioshi, cotanquitsi tee agavejeji irootari oacaanacajinemeca camorecariqui. Oquejetaca itioncacojiquero antavetacaca covaequishetatsica antsipetaquempameca coajica. Cotanquitsi imetojaventajiacajigueti Quirishito coroshiqui imeshiajajaji ipishoncaquero itioncacojitacajigueti aatoniji atsipejajaro coajica. Quejevetaca yompajacojiquero coroshiqui.

¹⁵ Ontaniqui imetojaventacajigueti coroshiqui, irooquea yagavejantajiacarica maasano agavejaguevetatsica aisa majirontaguevetatsica, yoguipashiventajiaqueri, inejacajiaqueri maasano arimaja yanaamajajiaqueri iriatimpajia maasano.

Aatoja piquemisantajiguiri teeca intsarovementajiguempariji Aapani Irioshi

¹⁶ Imaica aatoja piquemisantajiguiri cantajatsica pantajiaque teeca oncameetsateji irinejajiaquegueti pishecajiaquemparo irooca pimirajiaquero icantimentantajitica. Irooca aisa incanque piquempaveatata irinejajiaquegueti tee pishineventajiguemparo savincagüteripae ishineventajiacaca iriatimpajia, iroguentica iroaqueragueti irisotoaje taai. Iroguentica aisa incanque tee oncameetsateji pantaqueca irinejajiaquerogueti pantajiaque icantimentantajitica irivetsicajitempagueti savincagüteri imagorejantajitica.

¹⁷ Maasano oratica isavicaventajiaqueca joriojia iroguenti mana oquejevetacararo intati ivaantorite coraquetanquitsineca, ocantacoqueri Quirishito incoraquetaque irimeshijajiacaji. Imaicaquea imaica mataka coraquetaque. Iriguenti iriomajatatsica.

¹⁸ Aatoja piquemisantajigui irirajia cantajavetaquempineca: “Aatogueti pitsaromentajigari irashivantijitete, ¿arimpate irimeshiajiaquempi Irioshi? Teenica pintsajigueji aviatimpajia. Naatimpa iroguenti iquenquetsatacaaquena Irioshi noguimaanegui, irootaque notsantajiacaca.” Maasano quejejaqueroca imaica iriguenti amataatsica, mana yaventacojianaca intati, iroguentitari iquenquejiaque irashipae caquinte.

¹⁹ Teenicate intsaromentamajajiguempariji Quirishito Amajirote. Iriotaque tampishitacaajiacaji maasano quemisantajiguirica cameetsaniji antsipamajajiaquempari, arimpaquea antsaromentamajajianaquempari quejetaca ininque Aapani Irioshi.

²⁰ Ariquea pitsipajiacarigueti Quirishito imetojaquegueti, oquejetacarero iroguentica pimetojapitsajiaquero itsatacaantajiguica caquinte aatoniji piquemisantajiro. Iriguenti Quirishito pinquemisantaque. Imaicaquea imaica ¿quero ocoani piquemisantantajiacarica teeca intsaromentajiguempariji?

²¹ Iriatimpajia icantimentantajiaqueri irishecaquempari maasanopae iteshipae, icantajiaque: “Aatoja pishecata irira, ari icoca, aisa aatoja pipamitiri. Picoguishetatsi.”

²² Cotanquitsi maasano irira icantimentajiaqueca iriguenti cantimenqueri caquinte, teenicate irio cantimenterine Aapani Irioshi. Iroguenti ipeacaancarica ashi ashecajiguempaca, iroompa ashecajiacarigueti tee anejeriji.

²³ Irirajia quejejaqueroca imaica ijiqueji iriatimpa itsajiaque, aisa ijiqueji yantajiaque ininqueca Aapani Irioshi, yatsipejiacarero itijiqui itijiacagueti, cotanquitsi iroguenti yamatavijajia. ¿Querocaquea incojiguempanti ititantajiacaca? ¿Arimpa agavejaque onchoocatacaajiaqueri cameetsa aatoniji ipeacaaguisheta teeca oncameetsateji? Mana yaventacojia intati.

3

¹ Aviatimpajia itancorejajajimpi Aapani Irioshi pishirequi quejetaca pitsipatacari Quirishito yovochantajirigueti, irootaquequea pinquenquejajiaquero choocaguetatsica ontaniqui jenoqui ichoocatigueti Quirishito: isavicaque itincamijempequiqui Aapani Irioshi, itsipatacari imajirontajiaqueate. Pinquenquejajigueroquea ininqueca iriatimpa.

² Arimpaquea pinquejejaquempa imaica pinquenquejamajajianaquero choocaguetatsica jenoqui, aatoquea pinquenquejamajajiguiro isavijiquitica quepatsiquitica.

³ Oquejetacatari pimetojaque, aatoquea imaica piquejetaja coramani. Cotanquitsi tancorejanajitari pishire pintsipajajempariniji Quirishito Irioshiqui. Omanaca pishire imaica, tee irinejajiteroji.

⁴ Cotanquitsi oncoramanitapojajeguete ironigaanquempaguete Quirishito tancorejajajimpica, ariquea ironigaantajiaqueri maasano quero picojiacani, pintsipajiaquempari poganejencavaequempa.

Pimpishoncamajajianaqueroja pipeacaaguishejiavetacaca

⁵ Noncantajiaquempi aatoja papijitajiro aisa pipeacaaguishejiavetacaca: aatoja poashitantajigui; aato pinquenquetsaguisheti, aisa aato pantaguisheti; aato pinquenquejavijiti teeca oncameetsateji, aisa aatoja pantajiro pinquenquejaguishequeca; shoshoh aatoja pinevemajataro ajaararonsi, pishineventamajatarotsi quejetaca iro Irioshi.

⁶ Maasanotarite quempevaetatsica quejecaroca incatsimatimentajiaqueri coajica Aapani Irioshi, teenicate inquemisantajigueriji.

⁷ Aisa piquejejiavecari aviatimpajia coramani piquempevaeguishejiavetaca oshequi.

⁸ Cotanquitsi imaica pimpishoncamajatanaqueroja maasano teeca oncameetsateji. Pimpishoncanaqueroja pitsimajencajia, aatoja picatsimatantajiaji, aatoja picatsimashiretantajiaji, aatoja picaveantajigui, aisa aatoja pinijaguishejigui.

⁹ Aatoja pamatavijavacaajiaja, picantashitatanacatari. Tee pinquempejiajempa coramani, pipishoncaguetanaquerotari pantaguevetacaca.

¹⁰ Ariquea icantashitajiajaimpi Aapani Irioshi, aisa imaica igantaga icantashitajiajanquempi cameetsaniji pinquejejjajempariniji iriatimpa peacaquempica irosati pintsamajiaqueri.

¹¹ Arigueti atsarovencari Quirishito yamenajiacaji Aapani Irioshi ari aquejetavacaajia maasano aatimpajia. Ariquea iquejejiaca joriojia aisa guiriegojia, ari iquejetavacaajia. Ari iquejejiaca aisa quenajiapojatsica otsipaqui guinteninintsi aisa catsimari, itsipajia aisa teeca irinetsanateroji yamejigaca joriojia tee intotsaiquijiteriji, ari iquejejjiaari netsanatiroca. Ariquea iquejetaca aisa yomperanajitaca, iquejetacari irira teeca irashintajitempariji. Maasano iquemisantajiaquerigueti Quirishito ichoocashirentajiaqueriquea, yamenantajiajarica Aapani Irioshi ari iquejetavacaaca.

Pinchoocajigue cameetsa

¹² Maasano aviatimpajia ipintsamajiaquempi Aapani Irioshi, icoguajiaquempi inintacajiaquempi irashintamajiaquempi, nocantantajiaquempica: pishimampojancacoventajiaqueri atsipejianquitsica; pincavintsajante; aatoja panaavacaga; aatoja pipigatanacari catsimajiaquempineca, pinquenquetsatacagueri cameetsa; aisa pinquenquetsatacagueri cameetsa irasereajiaquempigueti.

¹³ Pimpintsatavacaajiguempa pantsiperejacojiguempa. Aatoja picatsimajiguiri papiquemisantariteni catsimajiaquempica, iroguenti pimpeacotajemparo querocagueti canquempini. Irira Amajirote imeshiajiacaji imaisantajajiro maasano antavetacaca teeca oncameetsateji. Ariquea pinquejejjajempari iriatimpa pimpeacotsitajempari papiquemisantariteni.

¹⁴ Cotanquitsi picancani pimpintsatavacaamajiaquempa, caavijitari anaantamajataque. Ampintsatavacajiaquempigueti anquejeshirentavacaajiaquempa.

¹⁵ Noninque iroguishinejajiaquempi Quirishito aatoniji taaca opajita pishoshoguiteventa, irootaque inintaque Aapani Irioshi iroaqueragueti inintacaquempigueti pintsipajijajempariniji maasano tsaromentajigarica. Aisa pishineventajiaquempari iriatimpa, pinejaqueritari caaviji icavintsajajiaquempi.

¹⁶ Pinquenquejamajatapinijiaqueroja maasano canqueca Quirishito. Pintsatacaava-caajiaquempaja pintampishitavacaajiaquempaja pinquejejjajempari quenquejamajajiguirica Aapani Irioshi. Pamashaiventajiaquerija Aapani Irioshi, pinquenquejajiajerija quero icotacani icavintsajaquempigueti. Pamashajiaquero sarempopae yamashaiventirica joriojia coramani, aisa pamashaitacoqueri Quirishito, aisa pamashaitacojiaquero otsipapae itsatacaquempica Ishire Aapani Irioshi.

¹⁷ Taaca opajitapae pantajiaque aisa taaca opajitapae pincantajiaque pinquenquejajiaquerija Amajirote Jesoshi, irooquea pantajiaque ininqueca iriatimpa. Aisa picancani pishineventajiaquempari Aapani Irioshi, pincanqueri caaviji icavintsajanti, itigarancakeritari Jesoshi.

Quero incojiaquempani tsaromentajigarica inchoocajiaquigueti cameetsa

¹⁸ Aviatimpajia manquigarentsijia, pinquemisanqueri manquigatimpica aatoja pipigatsatari, irootaquetari ininqueca Amajirote.

¹⁹ Aviatimpajia shiramparjia, pimpintsamajaquemparo pimanquigare aato picatsimajiguero.

²⁰ Aviatimpajia chaajaniquiguetanquitsica, irosatija pinquemisantajiaqueri piri aisa piniro, irootaquetari ishineventaca Amajirote.

²¹ Aviatimpajia choocajiatsica pirijanite irooca porijanite, pintsatacagueri cameetsa. Aato picantimentashitari intati. Arica pincantimentashiquempargueti intati aato inintaji iquemisantajimpi.

²² Aviatimpajia yashintajitaca, pinquemisantamajaquerija ashintimpica acaniqui quepatsiqui, pantajiaqueroja maasano querocaca incantajiaquempica, cotanquitsi aato apatiro piquemisanti pamenajiaqueri iramenajiaquempiguetei poguishinejimenqueriniji, picancani pinquemisanqueri, iriguentitari pinquenquejaque Aapani Irioshi poguishinejantaquemparica.

²³ Maasano taaca opajita pantajiaque pishinejiaquempa quejetaca iriotaque pantajiaquene Amajirote, pintampishiventeneri teenica apatiro pamitacoqueri omperatimpica.

²⁴ Pitsajiaque icavintsajaquempi Amajirote Quirishito irovegaramajajiaquempiro ontaniqui jenoqui, iriotaquetari pantajiaquene.

²⁵ Cotanquitsi iriraquea covaeguishetatsica inchiquiojita inquejetacaanquempa iriatimpa irantsipevaequempa, yamenajiacajitari Aapani Irioshi maasano ari aquejetava-caaca.

4

¹ Choocaguetei caquinte povegarataquea pashintacaca, pincavintsajajiaquerija, choocatarite ashintajiaquempica aviatimpajia aisa ontaniqui jenoqui inquitequi.

² Imaica noncantajiaquempi maasano aato piperajiga pamanajiguetei Aapani Irioshi, pinquenquejamajiguero, aisa picancani pishinevenquempari pincanqueri: “Ariotesaa.”

³ Aisa pamanacoventajiaquena naatimpajia cameetsaniji nagavejamajajiaqueniji nontsavetantajiaqueri Quirishito noncamantajiaqueri maasano quero icotani imeshiantiguetei, irootaque yashitacotantajivequenaca.

⁴ Pamanacoventajiguena cameetsaniji quishoniji nontsavetacotantamajataqueriniji noguisotoajiaqueneriniji maasano, irootaqueitari inintacaquenaca Aapani Irioshi.

⁵ Aviatimpajia pintsipajiaquempariguetei teeca intsariventajiguempariji Amajirote, pinchoocajiaquequea cameetsa, pinquenquetsatacaajiaqueri cameetsa aatoniji icatsimajiguimpi. Aatoquea pichoocatashijiga intati.

⁶ Aatoja piquenquetsatashijiga intati jeoc jeoc jeoc. Cameetsaja pinquenquetsajiaque cameetsaniji irininque inquemisantamajajiaquempi, aisa pinquenquejamajaque cameetsaniji pintsajiaqueniji querocaca pincanqueri taaca coacojiaquempine.

Itioncacoqueri Tiiquico

⁷ Imaica nontigarancaqueri apiguemisanteriteni Tiiquico nopintsajiacaca, iroanaque pichoocajiaqueguetei, irosati incamantajiaquitempi quero ocoani acaniqui nochoocajiaqueguetei. Iriatimpa iriguenti caaviji yamitanti. Irioquea notsipataca nantajiguiniriguetei Amajirote.

⁸ Iroguenti nontigarancantaquemparica ashi iroguishinejajiaquitempi pinquemacotantajiajenaca choocatirajana.

⁹ Iriguenti intsipatanaquempa apiguemisanteriteni Oneshimo nopintsajiacaca conoajivetaquempica. Aisa iquejetaca iriatimpa iriguenti quemisantamajatatsica. Iriatimpajia iriotaque camantajiaquempineca maasano.

Ovegarapojaca itioncaquenerica

¹⁰ Iriraquea Arishitarico notsipatacaca nashitacojiacaguetei ininque pinquemacojiajeri chooca iquenquejajajimpi. Aisa iquejetaca Maricoshi iriguentijeguitsorite Verenave,* iquenquejajajimpi iriatimpa. Imaica noncantajajempi aisa, ariguetei iroanaque

* **4:10 iriguentijeguitsorite Verenave.** Omanaca oguipitsocaquerogueti ocatica tioncanquitsica acaniqui guiriegotsaqui: ocanti **anepsios**. Agavejaque ojicotaqueri irioca itineri, irioca aisa iranianishite, irioca iriguentijeguitsorite Verenave. Yoguipitsocaquerogueti quimajareri versión Reina Valera icanti “el sobrino de Bernabé”, ancanque “itineri”. Yoguipitsocaquerogueti quimajareri Versión Popular icanti “el primo de Bernabé”, ancanque irooca “iranianishite” irooca “iriguentijeguitsorite”.

irinejajiaquitempi cameetsaja paajiavaqueri.

¹¹ Jeri irira Jesoshi icantajitica aisa Joshito, inique pinquemacotajeri chooca iquenquejajiajimpi. Ichoocajaveta oshequini joriojia quemisantajiguirica Quirishito, cotanquitsi apaniroquea iriatimpajia itsipajiaquena notsavetantigueti nocamantajiaquerigueti maasano quero icocani Aapani Irioshi imajirontagueti. Oshequi yoguishinejajiaquena.

¹² Iriraquea pigonoro Epaperashi inique pinquemacotajeri chooca iquenquejajiajimpi. Irio irisati antavaetinirica Jesoquirishito. Irosati yamanacoventajiaquempi picancaniniji pintsarovenquempari Quirishito Jesoshi aisa pintsamajajiaqueroniji maasano ininquea Aapani Irioshi.

¹³ Nonejaqueritari yatsipeventamajajiaquempi aviatimpajia, aisa yatsipeventajiacari irirajia Iraoriseaquitica aisa irirajia Yeraporishiquitica.

¹⁴ Aisa ichoocaque acaniqui aavintantatsica Irocashi, caaviji ipintsajitari. Inique pinquemacotajeri chooca iquenquejajiajimpi. Aisa iquejetaca Temashi.

¹⁵ Pincamantajigueri apiguemisantarijiateni choocajiatistica Iraoriseaqui choocana noquenquejajiajiri. Pinquejetaquempa pincamantero iroatimpa Nimpa, aisa maasano quemisantatsica capiocajianquitsica otsovironaquitequi, pincamanquerija choocana noquenquejajiajiri iriatimpajia aisa.

¹⁶ Pinteroncaquerogueti pampatsajavanquerogueti ocatica notioncaqueca imaica, pintigarancajiaquenerija quemisantajiatistica choocajiatistica Iraoriseaqui irampatsajavanquero iriatimpajia, iroompa iriatimpajia impacaanquempiro notioncacaantajiaquenerica, aviatimpaquea pampatsajavantajiaquero.

¹⁷ Pincantajigueri Arequipo: "Pisavicaventavaetanaquero maasano inintacaquem-pica Amajirote, pimoncaramajaquero."

¹⁸ Naroguenti Paavoro, jeroquea inchiquiojita notioncajiaquempiro oca nacoqui. Pinquenquejajiajena choocatirajana yashitacojitaquena. Nonintaque incavintsajama-jajiaquempiquea Aapani Irioshi.

IPARIACANARIGUETI PAAVORO ITIONCAJIAQUENERI TESARONICAQUITICA

Antsatantaquemparoca

Ocatica iroguenti antsatantaquemparoca iroquetica paperi itioncacaantaqueca Paa-
voro itioncajiaquenerigueti tsaromentajiacarica Jesoshi choocajianquitsica guintenin-
intsiqui pajitatsica Tesaronica. Irocashi itioncacotaqueri irira Paavoro otsipaqui
paperiqui (Ya. 7.57-8.1; 9.1-31; 13.1-28.31), aisa itioncacotaqueri ichoocaquegueti
Paaavoro Tesaronicaqui paperiqui Yantajiguica 17.1-10; 20.1-5. Itioncacaantaquero Paa-
voro ocatica paperi tequeratagueti intioncacaanteroji maasano otsipapae paperipae
itioncacaantaqueca choocajianquitsica paperiqui icantajitica *Tsavetacoquerica Jeso-
quirishito*. Itioncacaantaquero ocatica paperi irooca ajagantsiniqui 50, irooca 51,
iquenaguetanajigueti mavitetapojatsica itsavetacovaequerigueti Quirishito.

Timoteo icamantaqueri Paavoro quero icojiacani tsaromentajiatatsica Tesaronicaqui,
cotanquitsi tee iragavejeji Paavoro irogueji iramenajiaqueri, irootaquequea intionca-
caantantajiacanarica ocatica paperi (2.17-3.6). Icamantajiaqueri iraventamajajiaque-
mpari Quirishito intampishitacaajiaqueriniji, aatoquea yovashiantajiguirotsi yaven-
tajiacarigueti, irantajiaqueroquea inintacaajiaquerica Jesoshi (1.2-10; 3.7-9). Icaman-
tajiaqueri quero incojiaquempani irinetsanajiaqueroniji inintacaajiaquerica Aapani
Irioshi (4.1-12; 5.5-22), tee inchoocateji tsatanquitsineca quero oncarateni incor-
quetantajatempaca Quirishito acaniqui quepatsiqui aisa intancorejantajianajempaca
quemisantajiaquerica (4.13-5.11). Paavoro iquenquejacaajiaqueri Tesaronicaquitica
quero icotaca iriatimpa ichoocatimojiaquerigueti, aatoniji iquemisantajiguiri tsojeven-
tajiacarica Paavoro (2.1-12).

¹ Imaica naatimpaquea Paavoro notsipatacari Shirivano aisa Timoteo, notioncaji-
aquempiquea maasano aviatimpajia choocajiatatsica oraniqui Tesaronicaqui tsaroven-
tajigarica Aapani Irioshi aisa Amajirote Jesoquirishito. Namanacoventajiaquempiquea
incavintsajajiaquempinijite Aapani Irioshi aisa Amajirote Jesoquirishito, inchoocata-
caajiaquempinijite cameetsa aatonijite pishoshoguiteventajigaro taaca opajitapae.

Irirajia Tesaronicaquitica iquemisantamajajiaqueroquea Quenquetsatsarentsi Oganejencatatsica

² Nocantacoguitaniquea namanaguitirini Aapani Irioshi nocantajiaqueriquea
noshinejiaca namenajiaquempigueti pitsaromentamajatanacariquea Amajirote
Jesoquirishito.

³ Aisa namanajiaquerigueti nocantacoguitaniquea noquenquejajiaqueroquea pisav-
icaventamajatanaquero maasanopae inintaguetica iriatimpa, iriotaquetari paventa-
jiacaca. Picocani pantamajajiaqueneriquea, pipintsajiacaritarite. Aisa patsipeta-
cojianaca maasanopae, irooriji poguijajiaqueri incorquetajategueti Amajirote Jeso-
quirishito oncoramanitapojajegueti.

⁴ Napitsaromentarijiate, ipintsamajajiaquempiquea Aapani Irioshi, aisa notsajiaque-
quea icoguijajiaquempi.

⁵ Oraquea notsavetantimojiaquempigueti notsatacajajiaquempiquea Quenquet-
satsarentsi Oganejencatatsica, teequea nonquenquetsatacaashijiguempiquea intati,
iriguentiquea agavejacaquenaquea Ishire Aapani Irioshi. Aisa notsamajajiaquequea
oraquea Quenquetsatsarentsi notsavetantimojiaquempica iroomajaca. Aviatimpajia
pamenamajajiaquenaquea queroquea nocojiacani nochoocatimojiaquitimpigueti. No-
quejetacaajiacaroquea imaica cameetsanijite pintsamajajiatimentajiaqueniijite.

⁶ Iroompaquea pamenamajajiaquenagueta piquejejianaquea aviatimpajia, piquejejianaquea naatimpa, aisa piquempejianacariquea Amajirote. Patsipevaejiaquea cotanquitsiquea pishineventamajajiacaroquea notsavetantimojiaquempica, iriguenti oguishinejaquempi Ishire Aapani Irioshi.

⁷ Jeroquea irooquee iquemacojiaquempigueta maasano tsaromentajigarica Maseronicaquitica aisa Acayaquitica iquempejianaquempiquea aviatimpajia.

⁸ Cotanquitsiquea teetarite aparoquea inquemacojiteroji Quenquetsatsarentsi Oganejencatatsica Maseronicaquitica aisa Acayaquitica, iquemacojiaqueroquea aisa osamanipaequitica, otsitacaguitejavaetanacaroquea. Aisa iquemacojiaquempi maasano pitsaromentamajatanacariquea Aapani Irioshi. Teequea noncamantajiajeriji naatimpajia,

⁹ itsavetacojiaquempitari maasano, iquenquetsatacojiaquempi querocaca picojiacani pishineventamajatacarogueta notsavetantimojiaquitimpigueta coramaniqui narejerejeitaquitagueta namenajiaquitimpigueta, ariquea pipishoncajanaqueriquea pipeaguevetacaca pirioshigueta intati iriotaquequea pitsaromentamajajianaja Irioshimajaca teeca irimetojimateji.

¹⁰ Aisa iquenquetsatacojiaquempiquea icantajiaque picocaniquea poguijajiaqueri incoraquetajategueta Jesoshi Irijanite Aapani Irioshi ivochatajica, iriotaquequea meshiajiajica aatonijite icatsimajiajiquea Aapani Irioshi oncoramanitapojajegueta.

2

Queroquea icocani Paavoro ichoocaquegueta Tesaronicaqui

¹ Imaicaquea, napitsaromentarijiate, pitsajiaquequea coramaniquea narejerejeitaquitagueta namenajiaquitimpigueta teetarite noanoaitashitempaji intati.

² Pitsajiaquequea ontaniquiquea ontaniqui Piriponiqui, icantacantaivaequenaquea yatsipetacaajiaquena, cotanquitsiquea nocoraquejiaquegueta aviatimpajiaqui itampishitacajiaquenaquea Aapani Irioshi noquenquetsatimojiaquempiquea notsatacajaiapojaquempitotarite Quenquetsatsarentsi Oganejencatatsica. Ichoocajiavecaquea oshequini catsimajiaquena, cotanquitsiquea naatimpajia teequea nontsaroojigueti.

³ Manatarite notsavetacovintsajianaqueroquea Quenquetsatsarentsimajaca, teequea noncantashitatuemparoji. Teetarite nonquenquejajiajeroji taampaquea naantajiajeparo naatimpajia, aisa teequea namatavijantajigueti.

⁴ Inintacaajiaquenatari Aapani Irioshi nontsavetacojiaqueroquea Quenquetsatsarentsi Oganejencatatsica. Ariquea noquejejiguroquea imaica notsavetantavaetigueta. Teetarite irioquea nonintajigueti noshinetacaajiaquempari caquinte, iriguentiquea nonintajiaquequea noshinetacaajiaquempa Aapani Irioshi amenamajajiacajica queroquea acojiacani ashirequi.

⁵ Pitsajiaquequea aviatimpajia noquenquetsatacaajiaquempigueta teequea noshinetacaamampejaiguempiji intati, aisa teetarite noshoshomentparoji pivegarajiaquenaniijite pimentaquitsitequi. Yamenajiaquenaquea Aapani Irioshi arimajaca nocantajiaquempica.

⁶ Naatimpajia teequea nonintimateji inquejetacaajitaquenaquea quempeca naatimpajia majirontajatsica, tee nonintajigueti pinquejetacaajiaquena aviatimpajia, aisa tee nonintajigueti inquejetacaajiaquena itsipajia. Nagavejajiavecaquea nomperajiaquempime, naroguentijiatari itigarancanejia Quirishito, cotanquitsiquea teequea nonquempejiguempaji imaica,

⁷ manaquea inchiquiojiquea nonetsanajiaquempiquea noquempetacaajiaquempi chaajaniquitirajaca oguimoncajiguirigueta iriniro.

⁸ Caavijiquea nopintsamajajiaquempi, jeroquea teequea aparo nonintajigue nontsavetantaquempiro Quenquetsatsarentsi Oganejencatatsica itigarancaqueca Aapani Irioshi, quempecaquea nometojaventajiaquempi, teetari nontsaroacaguemparoji iroorijite nopintsamajajiaquempi.

⁹ Napitsarorentarijiate, picocanicajate piquenquejajiajiro quero nocojiaca naatimpajia: nantajiaquequea nomagotimentajiaqueroquea nosheca. Noquejejiaqueroquea imaica savincaguiteri qui aisa pitsecariqui aatonijite natsipetacaajiguimpi aviatimpajia pojocashijiaquenamegueti intati arinijite nontsavetantimojiaquempironijite Quenquetsatsarentsi Oganejencatatsica itigarancaqueca Aapani Irioshi.

¹⁰ Aviatimpajia tsarorentajigarica Aapani Irioshi pamenajiaquenaquea nochoocantimojiaquempigueti, aisa Aapani Irioshi yamenajiaquenaquea, nocomajamajajia teequea noncovaeguishetempaji. Aisa nonetsanamajajiaqueroquea maasanopae icantaguetaqueca Aapani Irioshi cameetsanijite iramenajiaquenijite teequea taaca opajita nompeacaimatempaji covaequisherentsi.

¹¹ Aisa pitsajiaquequea nocantajiaquempiquea arimpaquea pintsarorentamajajianaquempari Aapani Irioshi, jero aisa noguishinejajiaquempi noquempetacaajiaquempiquea aviguentijia niri janijiate.

¹² Notsatacaamajajiaquempiquea nocantamajajiaquempi queroquea pincojianaquempani pincomajamajajianaquempanijite cameetsanijite irishineventajiaquempinijite Aapani Irioshi. Iriotaquequea cantatsica iroaqueragueti ininquequea pintsipajiaquempari impeaquempagueti Imajirojiate maasano, iramenajiaquerigueti maasanojia yoganejencamajata.

¹³ Nocantacoguitaniqua nocantajiaqueri Aapani Irioshi noshinevaetacaquea, namentajiaquequea nontsavetantimojiaquempigueti Iguenquetsatsare piquemisantajiavaqueroquea pishineventajiavacaroquea, pamenajiaquetarite teequea iro iguenquetsatsare caquinte, pitsajiavaqueroquea iroguenti Iguenquetsatsare Aapani Irioshi, arimajatarite irootaquequea. Irootaque cantashitajajianaquempica aviatimpajia quemisantajianaqueroca, agavejacaajianaquempi.

¹⁴ Napitsarorentarijiate, oraquea coramaniqui icatsimamajajianaquempigueti pigonoropae yatsipetacaajiaquempigueti manatarite iquejetacaajiaquempiquea tsarorentajigarica Quirishito Jesoshi choocajiatsica Joreaque capiocaventapinijigarica Aapani Irioshi. Aritarite iquejetacaajiacari igonorojia iriatimpajia joriojia, manaquea yatsipetacaajiacari.

¹⁵ Iriatimpajia joriojia metojacaantajiaquerica Amajirote Jesoshi iquejetacaajiaqueriquea imetojajiaquerigueti coramani tsavetantajiatatsica. Ari iquejejiaquenaquea naatimpajia, icatsimamajajiaquenaquea, yoguisotojiaquena. Teequea irinetsanateroji inintacaquerica Aapani Irioshi, icatsimajiaqueriquea aisa maasanopae caquinte,

¹⁶ aritarite inintajiavecaquea irojocavaquename yamenaquenagueti nonintajiaque nontsatacajiaqueri teeca irijorijoigueji cameetsanijite irimeshiajitaquerinijite. Iquejejiacagueti imaica, icovaeguishemajajia, irootaquetari aapojaca imaica, icatsimamajajiaqueriquea Aapani Irioshi.

Inintavecaquea Paavoro irinejajajaterime Tesaronicaquitica

¹⁷ Napitsarorentarijiate, coramaniqua nojocajianaquempigueti oraniqui Tesaronicaqui teetarite namenajiavetajempiji, cotanquitsiquea nococani noquenquejajiaquempi, teetarite nompeacojiguempiji. Imaica nonintamajajiavecaqueate namenajiajatempime.

¹⁸ Irooshivecaquea noncoraquejiaquemeequea, naatimpa Paavoro nonintamajapinivetaca noncoraquetaquequea, cotanquitsiquea teequea nagavejajigueji, vojocavaquenatarite Satanashi.

¹⁹ Cotanquitsiquea imaica noninquequea noncantajiaquempi taa ipajita noguijamajataavaje naatimpajia. Iriguentiquea noguijamajataavaje incoraquetajategueti Amajirote Jesoquirishito, oncoramanitapojajegueti nontsipatsipaitanaquempi noncantajiaqueri: “Jeeri irirajia notsaromentacaajiacaca.” ¿Quericaquea shinetacaajiaquenanea? ¿Quericaquea noshineventamajataquempaca oncoramanitapojajegueti? Aviguentijiaquea noshineventajiaquempa.

²⁰ Arimajacaquea aviguentijiaquea shinetacaajiaquenanea, aisa aviguentijia noshineventamajiaquempa.

3

¹ Coramaniquea nopintsapintsajiavetaca cotanquitsiquea namenajiaquequea teequea nagavejajigueji noncoraquejigueji, noquenquetsatavacaajiacaquea, iroompaquea nocantajiaqueri irioqueate oanankuitsine Timoteo, naatimpajia choocajiajatsine Atenashiqui.

² Iroompaquea notigarancaqueriquea Timoteo iramenajiajatempiquea. Iriguentiquea apitsaroveritarite antaquenerica Aapani Irioshi, iriguenti notsipatashijiacaca notsavetantaquerogueti Quenquetsatsarensi Oganejencatatsica tsavetacotaquerica Quirishito. Namenajiaquequea iragavejaque intsatacaamajiaquempiroquea, aisa intampishitacaajiaquempi

³ aatonijite quericaca ovashiantirotsi itsaromentamajatariguete iramenaqueguete yatsipetacaajitacaruete, inintacaacajitari Aapani Irioshi antsipeventajiaquempipari Quirishito.

⁴ Oraquea nochoocatimojiaquitimpiguete nocantajiaquempiquea: “Ariquea irantsipetacajaicaji.” Imaica pitsajiaque onetsanatanaca.

⁵ Nonintamajataquequea nonquemacomajiaquempi, notigarancantacaricaquea Timoteo iramenajiaquitimpi picantacoguitanica pitsaromentamajatanacariquea Quirishito. Notsarocaanaquempiquea noquenquejaque arica yamatavijajiaquempi ampatsini nintatsica incovaeguishedacaante. Aricaja manacajate noquenquetsatimojiaquetempiquea intati.

⁶ Imaicaquea coraquetajiquea Timoteo yamenajiajatimpi icamantajiapojajanaquea arimpaquea pitsaromentamajajianacari, aisa pipintsatantajianaca. Icamantajiaquenaquea piquenquejajianaquenaquea pinintamajajiaque pamenajiajena piquejejiaquena naatimpajia nonintamajajiaquequea namenajiajatempi.

⁷ Natsipevaejiacaquea taaca opajita, aisa yatsipetacaajiaquenaquea itsipa caquinte, cotanquitsiquea poguishinejamajataquenaquea, napitsaroveritarijiate, noquemacojiaquempiguete arimpaquea pitsaromentamajajianacariquea Amajirote Quirishito.

⁸ Arimajacaquea noshinemajajianaquea, noquemacojiaquempitari picoguitaniquea pitsaromentamajaguitarini teequea povashiantajeriji.

⁹ Jeroquea namananaqueriguete Aapani Irioshi nogaamajatanacaquea noshinemajatanaca oshequi teequea nontsajigueji querocaquea noncantajigue, caavijitari yoguishinejajianaquena namenajiaquempiguete pitsaromentamajajianacari.

¹⁰ Oavaetanaquequea savincaguiteri aisa pitsecariqui namanajiaqueriquea Aapani Irioshi nocantajiaqueri nonintajiaquequea namenajiajatempi nontsatacaamajiaquitempipiro tequerataca pintsamajajigueji.

¹¹ Nonintajiaquequea irojacaconomentavaquena Aapani Irioshi aisa Amajirote Jesoquirishito nagavejajiaqueniji noncoraquejiaquitequea namenajiajatempi.

¹² Aisa nonintajiaquequea iragavejacaajiaquempi Amajirote arimpaniji pimpintsamajatavacajianaquempa, aisa arimpaquea pimpintsamajajianaquempipari maasano caquinte, pinquempejiaquenaquea naatimpajia nopintsamajajiaquempiguete aviatimpajia.

¹³ Ariquea pinquejejanaquempaquea imaica cameetsanijite intampishitacaimenquempinijite Aapani Irioshi pishirequi aatonijite pipeacajaiga covaeguisherentsi manaquea pincomajamajajianaquempaquea. Oncoramanitapojajeguetequea incoraque-tajeguete Amajirote Jesoshi intsipatsipaitaquempariguete maasano igomajamajarejia, iramenajiaquempiquea Aapani Irioshi netsanamajajiaquempiquea.

4

Queroquea incojitaquempani iroguishinejajitaqueriniji Aapani Irioshi

¹ Napitsarorentarijiate, coramaniqui notsatacajiaquempiquea queroquea pincoji-aquempani pincomajajiaquempaguete cameetsanijite pishinetacaajiaquempariniji Aa-pani Irioshi, ariquea piquemisantamajajianaquenaquea nocantajiaquempica. Imaica noncantsijiajempiquea arimpaquea pinquejejanaquempa imaica, iriguentiquea can-tanquitsi Amajirote Jesoshi.

² Pitsajiaquerotari notsatacajiaquempica icantacaaquenaca Amajirote Jesoshi.

³ Iniquequea Aapani Irioshi pincomajamajajiaquempaquea. Aatoquea poashijigu-iro manquigarentsi teeca irooquea pashiquea pimanquigare. Ariquea pinquejejiaque-mpaquea manquigarentsijia aatoquea poashijiguiritsi itsipa shirampari teeca irionica pashiquea manquigajiguimpica.

⁴ Iiraquea shiramparijia noninque intsajiaque cameetsataquequea irimanquigaji-aquempa manquigarentsi, cotanquitsiquea netsanaquea iroajiaquero irimanquigaji-aquemparoguete.

⁵ Aatoquea iquejejigaritsi irirajia teeca intsarorentajiguempariji Aapani Irioshi, opeacojianaqueriquea itsanireore yoashijiaqueroquea manquigarentsijia intati.

⁶ Aisa teequea oncameetsateji pincantatsatacotsijigueri pigonoro. Nocantajiaquem-piquea coramaniqui, cotanquitsiquea imaicaquea noncantsijiajempiquea aisa, incatsi-mamajajiaqueriquea Amajirote maasano quempejiguiroca imaica.

⁷ Teetarite irooquea incajemimentacajiquea Aapani Irioshi cameetsanijite ancoquempaniquea ampeacaaguitemparoni taaca opajitapae covaeguisherentsi. Iroguentiquea icajemimentajiacajiquea ancomajamajajiaquempaniji antajiaquero-quea cameetsaripae.

⁸ Nocantantajiaquempicaquea, quericacaquea teeca irininteji inquemisantajigueroji ocatica notsatacajiaquempica tee naroguentijia irimaninteji, iriguenti imanintaque Aapani Irioshi tigarancaquerica Ishire inchoocashirentajiaquempi.

⁹ Notsataquequea Aapani Irioshi itsatacaajiaquempiroquea pimpintsatavacaamaja-jiaquempaquea. Irootaquequea imaica aatoquea notioncajiguimpi noncantajiajem-piroquea aisa.

¹⁰ Aritarite piquejejiacaquea imaica pipintsajiacariquea maasano papitsarorentari-jiate choocajiatsica guinteninintsipaequi Maseroniaqui, cotanquitsiquea nonintaque-quea arimpaquea pimpintsamajajianaquempariquea.

¹¹⁻¹² Cameetsaquea pinchoocajianaquequea. Iroguentiquea pisavicaventamaja-jianaquequea pashipae pantajiaqueca. Inchiquiojitaquea pincatsiquetimojiajem-paquea aviatimpajia irooca otsipa panteca, aatoquea pasereantajiguetsi, manaquea pinquempetacajiguemparoquea nocantajiaquempica cameetsanijite aatonijite ishi-rontimentajiguimpi itsipa teeca intsarorentempariji, aisa cameetsanijite onchoocati-menquenijite taaca opajitapae picoguitejacojiacaca.

Quero oncotanaquempani oncoramanitapojajeguete incoraque-tajateguete Amajirote

¹³ Napitsarorentarijiate, nonintajiaquequea pintsajiaque querocaquea incojianaquempani oncoramanitapojajeguete metojajianquitsica cameetsanijite aatonijite pishimampojancajiga piquempejigaritsija itsipa teeca intsajigueji intancoretancoreitanaje.

¹⁴ Aatimpajia atsajiaquequea imetojavetaca Jesoshi, ariquea ipochatanaji. Aisa atsajiaquequea ariquea inquempetacaajiaquempariquea Aapani Irioshi irivochajiajeriquea maasano tsaromentajiacarica metojajavetanquitsica cameetsanijite iramamirincajiajeri oncoramanitapojajeguetei incoraquetajateguetei Jesoshi.

¹⁵ Itsatacajiaaquinaquea Amajirote notsatantajiacaca, aatimpajia tequeratacaquea ametojajigueji incoraquetajateguetei iriatimpa aatoquea aro jivajiguiri metojajianquitsica.

¹⁶ Ariquea iraguijipoje Amajirote, incantajiacaji iririjencani, ariquea inquejetsitempa irashivantite anaamajatanquitsica iririjencani incanquempa, aisa intivojiqueroquea itivore Aapani Irioshi. Iriquetiquea tancoretancoreitanajatsine metojajavetanquitsica aventajiacarica Quirishito.

¹⁷ Coajicaquea aatimpajia tequerataca ametojajigueji anconoajianaquempari iriatimpajia metojajavetanquitsica oahoaitanaquequea mararoqui antonquivojajivaquempari Amajirote jenoqui, ancoguitempaniquea antsipamajatajempari iriatimpa.

¹⁸ Irootaquequea noncantantajiaquempanica imaica pinquenquejavacaajiaquemparoja ocativa poguishinejavacaajiaquempanijite.

5

¹ Imaicaquea, napitsaromentarijiate, tee pincoacotajempaji nontioncaquempi noncamantajiaquempi quero incarate catsirincaiteri aisa quero oncarate savincaguiteri onetsanatananaquempanica ocapae.

² Pitsajiaquetari oratica savincaguiteri incoraquetantajempaca Amajirote manatarite incatimapojajempaquea inquempetapojajempari aitsitantatsica icoraquetiguetei pitsecariqui.

³ Incantajiavequempaniguetei maasano: “Imaicaquea cameetsavaequequea achoocajiaque, aatoquea taaca opajita oajiaji”, incatimajiaqueriquea incatsimamajiaqueriquea Aapani Irioshi irantsipetacaajiaquempari, querocampate iroaroaitanaqueni. Manaquea onquejetaquemparoquea oncantaguetanajerogueti manquigarentsi, ocatimapojiro oquemavaquero ocantaguetanajiroguetei, queroquea oncoquempani.

⁴ Cotanquitsiquea aviatimpajia, napitsaromentarijiate, teetarite pinquempejiguetempariji teeca intsaromentajiguempariji, teequea pimpitsecashirentacojigueji. Aatoja ari iquejetacaajiguimpiquea iriatimpajia oncoramanitapojajeguetei incatimapojajeriguetei.

⁵ Aviatimpajia quempetaca pitsirencashirentacojiaque, pisavincaguiteshirentacojiaque, jeroquea poguijantajavajemparica incoraquetajateguetei, teetarite pinquempejiguetempariji covaequisherijia pitsecashirentacojiatsica.

⁶ Iriatimpajia teequea inquenquejeroji incoraquetantajempaca Amajirote, quempevetacaquea mana imaajiaque. Cotanquitsiquea aatoquea aquempejigaritsi iriatimpajia. Jaamejate agamajaguitemparini anquenquejamajajigue.

⁷ Iraquea maajianquitsica iroguentiquea imaajiaque pitsecariqui. Ariquea iquempejiacaquea aisa shinquijianquitsica iroguenti ishinquijiaca pitsecariqui.

⁸ Cotanquitsiquea aatimpajia mana asavincaguitetacojiaquequea atsaromentajiacaritarite Amajirote, jeroquea jamejate anquenquejamajajianaquequea. Oncoraquetashicajiguetei covaequishetagentsi jeroquea anticaanquemparoca: aventajiaquempariquea Amajirote, aisa ampintsatavacaamajajianaquempaniquea, iroocaquea aisa aguijaguiteniquea aapojajempaguetei savincaguiteri oahoaitananaquempanica jenoqui inquitequi antsipajiaquempariquea Jesoquirishito meshajiacajica.

⁹ Teetarite incanteji Aapani Irioshi ininque incatsimajiacaji, manaquea icanque ininquequea irimeshijiacaji aventajiaquempariguetei Amajirote Jesoquirishito aatonijite oahoaititsi camorecariqui.

¹⁰ Iriatimpa imetojaventajiacajiquea cameetsanijite ancoquempaniquea antsipajiaquempari, aricaquea choocatatsitirajajigueti oncoramanitapojajegueti incoraquetantajempaca, aricaquea ametojajiaque.

¹¹ Jeroquea nocantantajiaquempica poguishinejavacaajiaquempaquea, aisa pintangpishitavacaajiaquempaja, aritarite picojiaca piquempejiaqueroquea imaica.

Icamantajiaqueri quero incojiaquempani

¹² Imaicaquea, napitsaroveritarijiate, noninquequea pinguemisantajiaqueriquea irirajia inintacajiaqueca Aapani Irioshi intsatacajiaquempi aisa intampishitacaajiaquempi pinetsanamajajiaqueroniji icanqueca Amajirote.

¹³ Icoquitaniquea isavicaventamajajiaquero itsatacaajiaquempica, irootaquequea nocantantajiaquempica pishineventamajajiaquemparija pimpintsamajajiaquemparija. Aisa noninquequea pintsipatavacaajiaquempagueti pinchoocajiaquequea cameetsa.

¹⁴ Jero aisa, napitsaroveritarijiate, nonintajiaquequea pincantomajajiaqueriquea perajiatsica, pintangpishitacaajigueraja tsarontijia aisa teeca intampishitashijigueroji taaca opajita coraquetashijiaquerica, pantsiperejacojiaquemparoja querocaca incoquempani maasano.

¹⁵ Querocaca incojiaquempini papitsaroveritarijiate aatoquea pipigajigari, manaquea pincavintsajavacaajiaquempaja aisa pincavintsajitempariquea maasano.

¹⁶ Pingoquempanija pishinejiaquempaja.

¹⁷ Pingoquempaniquea pamanajiaqueri Aapani Irioshi.

¹⁸ Aricaquea pinchoocajiaque cameetsa, arica pantsipevaequempa, cotanquitsiquea pingoquempaniquea pishineventamajataquempari Aapani Irioshi, pincanqueriquea: "Ariotesaa", irootaquequea ininqueca iriatimpa, aviguentijiatari tsaroverantajigarica Quirishito Jesoshi.

¹⁹ Aatoquea pisantereguiri Ishire Aapani Irioshi.

²⁰ Aisa aatoquea pimanintajiguero icanqueca tsavetantajigueroica icanquerica Aapani Irioshi.

²¹ Cotanquitsiquea iroquetiquea pinguemisantajiavaqueriquea itsatacaajiaquempica, iroompa pamenajiaquegueti tampatica yoaquero, ariquea pinguemisantsijiguempariquea.

²² Oraquea maasano covaeguisherentsi aatoquea piquenquejajigueroitsi, aatoja pi-peacagarotsi.

²³ Iriiraquea Aapani Irioshi irioquea choocatacaajiacajica cameetsa aatonijite ashoshoguiteta. Imaicaquea noninque intampishitacaajiaquempiquea cameetsanijite pinquenquejamajaquerinijite iriatimpa, aisa pisavicaventamajaqueronijite maasanopae inintaguequeca. Noninquequea inquempoguijamajiaquempiroquea pishire, piguenquejane, pitsino, maasano, cameetsanijite incoraquetapojajegueti Amajirote Jesoquirishito iramenajiapojajempiquea netsanamajajiaquempi.

²⁴ Iriiraquea cajemajiaquempica icancaniquea inetsanamajaquero maasano icanqueca, ari irinetsanaqueroquea maasano ocatica.

²⁵ Imaicaquea, napitsaroveritarijiate, noninquequea pamanacoventajiaquenaja.

²⁶ Netsana pinintavorojiavaqueri* maasano apitsaroveritarijiate.

²⁷ Ocaticaquea paperi notioncajiaquempica noninquequea pampatsajavantajiaquererija maasano papitsaroveritarijiate choocajiatasica oraniqui, iriguentiquea nintanquitsica Amajirote.

²⁸ Namanacoventajiaquempiquea maasano incavintsajimentajiaquempinijite Amajirote Jesoquirishito.

* **5:26 Netsana pinintavorojiavaqueri.** Yamejiaca coramani inintavorotavacaajiavacava yamenavacaajiacagueti, ari iquejejiaca tsaroverantajigarica Quirishito coramani.

PAAVORO ITIONCAJIAJINIRI TESARONICAQUITICA

Antsatantaquemparoca

Ocatica iroguenti antsatantaquemparoca mavitetapojatsica paperi itioncacaantaqueca Paavoro itioncajiaquenerigueti tsaromentajiacarica Jesoshi choocajianquitsica guinteninintsiqui pajitatsica Tesaronica. Irocashi itioncacotaqueri irira Paavoro otsipaequi paperiqui (Ya. 7.57-8.1; 9.1-31; 13.1-28.31), aisa itioncacotaqueri ichooaquegueti Paavoro Tesaronicaqui paperiqui Yantajiguica 17.1-10; 20.1-5. Iteroncaquerogueti Paavoro iroquetica paperi itioncacaantajiaquenerica Tesaronicaquitica, avisanaquegueti aparopae taai, ari itioncacaantaquero ocatica ichooaquegueti Corintoqui, irooca ajagantsiniqui 50, irooca 51, iquenaguetanajigueti mavitetapojatsica itsavetacovaequerigueti Quirishito.

Itioncacaantaquerogueti Paavoro ocatica paperi icamantajiaqueri Tesaronicaquitica intampishitashitero yatsipeventajiacarigueti Jesoshi (1.3-12; 2.13-3.5), aisa itsatacaajiaqueri quero oncotanaquempani incoraquetantajatempara Jesoquirishito ocantiqui quepatsiqui, aatoniji ijijigui coraquetaji quejetaca icantashijiacarigueti amataajiatsica (2.1-12), aisa icantajiaqueri quemisantajiaquerica Jesoshi incatsiquejiaque irooca otsipapae cameetsaguetatsica irantajiaque, aato iperajiga (3.6-15).

¹ Imaica naatimpaquea Paavoro notsipatacari Shirivano aisa Timoteo, notioncajiaquempiquea maasano aviatimpajia choocajiatatsica oraniqui Tesaronicaqui tsaromentajigarica Aapani Irioshi aisa Amajirote Jesoquirishito.

² Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoguiteventajigaro taaca opajitapae.

Aapani Irioshi incatsimajiaqueriquea maasano teeca intsaromentamajajiguempariji

³ Napitsaromentarijiate, noquemacojiaquempiquea arimpa pogaamajajianaca pitsaromentamajajianacariquea Aapani Irioshi, aisa pipintsatantamajajianaca, jeroquea nocantacoguitaniquea namanajiaquerigueti Aapani Irioshi noshinemajajiaquea nocanqueri noshineventajianaquempi aviatimpajia aisa, notsataquequea irooquea inique iriatimpa.

⁴ Aisa noquenquetsatacojiaquempiquea nocamantajiaqueri maasano tsaromentajigarica Aapani Irioshi capiocapinijianquitsica tsovironaquipaequi noshineventajiaquempi oshequi, namenajiaquempiquea patsipetacojiacariquea maasano catsimajiaquempica asereajiaquempica, teequea pimpigajiguempariji, picocaniquea pitsaromentamajatanacariquea Aapani Irioshi.

⁵ Irootaquequea itsatantajitacaroca iriraquea Aapani Irioshi teequea queri incatsimatashitempariji intati, iriguentiquea Iriomajatatsica, tampatica yoaquero. Iriguentiquea tampishitacajiaquempiquea patsipetacotantajiacaroca taaca opajita, cotanquitsiquea oncoramanitapojajegueti impeaquempagueti Imajirojiate maasano incajemajiaquempiquea poapoaitanaquequea pinchoocatimojiaqueri pamenajiapojeroquea maasanopae patsipeventajiacaca imaica.

⁶ Otampaticatimotaqueri Aapani Irioshi impigataquempari atsipetacajiaquempica irantsipetacajiaquempariquea,

⁷ cotanquitsiquea incavintsajajiaquempiquea aviatimpajia atsipejianquitsica imaica, aatoqueate patsipevaejjaja, ariquea inquempetacaajiaquenaquea naatimpajia aisa.

Ocaquea onetsanatanauempa ironigaantaquempagueti Amajirote Jesoshi, inque-
napojajequea jenoqui inquitequi, intsipatsipaipojajempariquea irashivantijitete caav-
ijica yagavejamajajigui.

⁸ Oraqueate incoraquetajategueti anquiritacotapojempariqueate paamari, incatsi-
mamajajiaqueriquea maasano teeca intsajigueriji Aapani Irioshi, maasano teeca irinet-
sanajigueroji Quenquetsatsarensi Oganejencatatsica tsavetantaquerica Amajirote Je-
soquirishito.

⁹ Ariquea incoquempaniquea irantsipeguitempani camorecariqui. Aatoquea yagave-
jajigui inchoocatimojiaqueri Amajirote, aisa aatoquea yamenimajajiroquea irogane-
encare ironigaantaquerogueti iragavejane.

¹⁰ Oraqueate incoraquetajategueti manaquea incoraquetashiquequea irishineven-
tajiavaquempariquea maasano yashintajiacaca, inquenquetsatacaajiavaqueriquea
maasano tsaromentajiacarica incanqueriquea iriguenti caaviji yoganejencamajata.
Aviatimpajia aisa pintsipatsipaitanaquempariquea iriatimpajia, piquemisantajiaque-
natari notsavetacoquerigueti.

¹¹ Irootaquequea nocantacoguitaniquea namanacoventajiaquempi aviatimpajia.
Namanajigui iragavejacaajiaquempi Aapani Irioshi pantajiaquequea maasanopae
inintacaaguequempica icajemajiaquempigueti irishineventajiaquempiniji. Aisa
namanacoventajiaquempi iragavejacaajiaquempi pantajiaque maasanopae
cameetsaguetatsica pinintajiaqueca aviatimpajia. Aisa nocantajiaqueri nonintajiaque
iragavejacaajiaquempi pinetsanamajajiaquero maasano pantajiaquenerica
pintsaromentamajajianaquemparigueti.

¹² Ariqueate pinquejejaquempagueti imaica iramenajiaquempiquea caquinteja
irioqueate agavejacaajiaquempine Amajirote Jesoshi, irishineventajiaquempariquea.
Ariqueate inquempējaquempiquea iriatimpa irishineventajiaquempiquea cameet-
saniji iramenajiaquequea aviguentijia irashijia, icavintsajamajajiaquempitari Aapani
Irioshi aisa Amajirote Jesoquirishito.

2

Queroquea oncoquempani irooshipojajegueti incoraquetajategueti Quirishito

¹ Imaicaquea, napitsaromentarijiate, pitsajiaquequea oncoramanitapojajegueti inco-
raquetajategueti Amajirote Jesoquirishito iromporoguijajiapojacajiquea cameetsani-
jite amporoguijaventajiaquempariquea. Imaicaquea noncantajiaquempiquea,

² arigueti pinquemajiaqueri incantajiavetaquempiquea: “Jac coraquetapojaji Ama-
jirote”, aatoquea pitsaroajigui aisa aatoquea pishoshoguitejiga. Ariguetiquea inconoa-
garantajiaquempa incanque: “Iriotaquequea tsatacaaquevaroquea Ishire Aapani
Irioshi”, cotanquitsiquea aatoquea piquemisantimatiritsi. Arigueti intsavetacogueve-
tanaquempariquea incantajiaquequea: “Ariquea ocanque paperi itioncaqueca Paa-
voro”,

³ cotanquitsiquea aatoquea piquemisantimajiguiriquea aatonijite yamatavijajigu-
impi. Oraquea irooshipojajegueti incoraquetajategueti Quirishito iroquetiquea in-
conoagaranquempaquea tsaromentajigarica irovashiantajianajeroquea itsaromenta-
jiavecarigueti incatsimajianaqueriquea Aapani Irioshi. Iroompaquea ironigaan-
tanaquempa irira caavijica iranaaque pigapigamajataquemparineca Aapani Irioshi,
cotanquitsiquea oncoramanitapojajegueti intsijaiqueriquea camorecariqui.

⁴ Iriatimpa iriotaque catsimacatsimataquerineca Irioshimajaca iranaimanata-
queriqueate. Ariquea inquempetacaajiaquempariquea aisa maasano ipeajiguetica
irioshivijirensi intati itsaromentajivetacaca, arimpaquea irogaamajatanauempa

incatsimamajajiaqueriquea. Iroompaquea inquijanaquequea teemperoqui itsaroven-
tantajitarica Aapani Irioshi irisavicanaquequea inquejetamampeanaquempariquea
Aapani Irioshi incanquequea: “Naroguentiquea Irioshimajaca.”

⁵ ¿Arimpaqueate teequa pinquenquejajigueroji nocantajiaquempica coramaniqui no-
choocatimojiaquitimpigueti?

⁶ Imaicaquea aviatimpajia pitsajiaquequea taacaquea ipajita ticaacotaquerica aa-
toniji yonigaantsita, cameetsanijite aapojaquempagueti savincaguiteri inintacaque-
rica Aapani Irioshi ironigaantanaquempa, ariquea iroguentiquea ironigaantanaque-
mpa.

⁷ Imaicatari imaica jac icovaeguishetanacaquea, cotanquitsiquea teejemajacaquea
onconigamajatejiquea, manaquea isenacacojiqueroquea. Cotanquitsiquea irira ticaa-
coquerica inquejetanaquempa irosati arejetapojempagueti irajaitantajemparica inti-
caarejantajempaca.

⁸ Iroompaquea ironigaantajitaquempari iriatimpa, irira caarica quemisantiro ican-
queca Aapani Irioshi, cotanquitsiquea iriraquea Amajirote Jesoshi incoraquepoja-
jegueti irimetojantapojempari ijenca sotoanquitsica ivagantequi, interoncantapojem-
pari itsirencashimpoquirerejane.

⁹ Oraquea tequeratagueti irimetojeriji, iriraquea Satanashi iragavejacaqueriquea
irantacaaguetaqueriquea taaca opajitapae iramenamenaitanaquequea intati oshe-
quini caquinte cameetsanijite iramatavijijianaqueriquea iramenajiaquerigueti irijiji-
aquequea ipeacaaguecaro teeca iramenajigueteji.

¹⁰ Arimajacaquea irantaguishetanaquempa taaca opajitapae covaeguisherentsi ira-
matavijitanaqueriquea irirajia oahoaitananquitsineca camorecariqui, teetarite irinin-
tajiguejiquea irishineventajiguemparoji Quenquetsatsarentsimajaca irimeshiimenta-
jiquerinijite.

¹¹ Irootaquequea icantantacaca Aapani Irioshi: “Intsiquetiroshiatsi inquemisanta-
majajigueri amatavijantatsica, inquemisantajigueri tsojetsi.”

¹² Ariquea oncoramanitapojajegueti incatsimamajajiaqueriquea maasano teeca irin-
inteji inquemisantajigueroji Quenquetsatsarentsimajaca, iroguentiquea ishineventa-
majaca covaeguisherentsi.

Aapani Irioshi icocaniquea inintacaajiacaji antsaromentajiaquempari

¹³ Napitsaromentarijiate ipintsamajajiacaca Amajirote, cameetsataquequea nonco-
guitempaniquea noshineventajiaquempariquea Aapani Irioshi, irorijite notsajiaque-
quea paesatoniqui tequeratagueti onchoocatimatejiquea icocaniquea icoguiajiaque-
mpi irimeshijiaquempi. Iroompaquea iriraquea Ishire Aapani Irioshi icantashirenta-
jiaquempiquea cameetsanijite pincomajamajatanaquempa quea pinquemisantama-
jatanaqueroquea Quenquetsatsarentsimajaca, irootaquequea imeshiantajiaquempi-
caquea Aapani Irioshi.

¹⁴ Piquemisantajiavaquerogueti Quenquetsatsarentsi Oganejencatatsica notsavetan-
timojiaquempica, icajemajiaquempiquea cameetsanijite pinquempejiaquempariquea
Amajirote Jesoquirishito yoganejencamatagueti.

¹⁵ Iroosacánica imaica, napitsaromentarijiate, pincoquempaniquea pintsaromenta-
majajianaquempariquea Amajirote, aatoquea pipeacojianajaroquea notsatacajiaque-
mpica notsavetantimojiaquitimpigueti, aisa aato pipeacojianajaro notioncajiaquem-
pica paperiqui.

¹⁶⁻¹⁷ Iriraquea Amajirote Jesoquirishito aisa Aapani Irioshi ipintsamajatacajiquea
icavintsajamajajiacaji. Oavaetanaquequea ishinetacajaiacaji, aisa itampishitacaja-
iacaji cameetsanijite ancoguitempaniquea aguijajiaque oahoaitanaquequea jenoqui

antsipajiaquempariquea. Irootaquequea namanacoventantajiaquempica iroguishinejajiaquempi, aisa intampishitacajaiaquempi pincomajamajajianaquempaquee pinchoocamajatanaque cameetsa.

3

Paavoro icantajiaqueri: "Pamanacoventamajajiaquena"

¹ Imaicaquea, napitsaroveritarijiate, noninquequea pamanacoventamajajiaquena naatimpajia cameetsanijite nontsavetacotantajiaquerinijite Amajirote taampinanjite intsitacaguitejacovaetanaquempaquee, aisa irishineventajiaquemparinijite oshequini caquinte intsaroverantajiaquempari Jesoquirishito inquempejanaquempiquea aviatimpajia pishineventamajajiacariquea piquemacojiaquerigueti irosatiquea piquemisantajianaqueri.

² Choocatarite oshequini catsimajiaquenaca antaguishetiroca covaeguisherentsi. Irootaquequea nonintantajiacaca pamanacoventajiaquenaquee cameetsanijite irompejiaquenanjite Aapani Irioshi aatonijite quericaca agavejajiatsi irovashi-antacaajiaquenaro nonquenquetsajiaquegueti, teetarite intsaroverantajiguempariji maasano.

³ Cotanquitsiquea iriraquee Amajirote icocaniquea inetsanamajaquero icanqueca. Iriatimpa intampishitacajaiaquempi, aisa irompejiaquempi aatonijite yagavejajigu-impimpi ampatsini.

⁴ Nonintajiaquequea arimpaquee pinquempejanaquero imaica pinetsanamajajiaqueroquee maasanopae nocantajiaquempica. Iriguentiquea agavejacaajiaquempine Amajirote.

⁵ Namanacoventajiaquempiquea iragavejacaajiaquempi Amajirote pimpintsatan-tajiaquempanijite pinquejejiaquempariquea iriatimpa ipintsamajatantagueti, aisa intampishitacajaiaquempiquea pantsipetacojiaquempanijite pinquempejiaquempariquea Quirishito yatsipetacotagueti.

Aatoquea iperajiga tsaroverantajigacarica Quirishito

⁶ Imaicaquea, napitsaroveritarijiate, noncamantajiaquempiquea oca inintacaquempica Amajirote Jesoquirishito. Aatoquea piconoajigariquea papitsaroveritarijiate peratatsica teeca irininteji irantsipevenquempari ishecapae, aisa teeca irinintajigueji irinetsanajiaquero notsatacajiaquempica.

⁷ Aviatimpajia pitsajiaquequea queroquee pincojiaquempani pinchoocajiaqueniji cameetsa, pinquejejanaquenaquee naatimpajia coramani nochoocatimojiaquitimpigueti teequea nomperatimatempaji.

⁸ Teequea noshecatimotantempaji intati, manaqueate nantajiaquequea savincagui-teriqui aisa pitsecariqui natsipevencaroquee nosheca novegarajiaqueroquee aatonijite natsipetacaajiguimpiquea aviatimpajia pojocajiaquenaromequee intati.

⁹ Cameetsavaevecaquee namanajiaquempiromequee pojocajiaquenaromequee intati, cotanquitsiquea naatimpajia teequea nonintajigueji. Manaquee nantajiaquequee cameetsanijite pinquejetimentajianaquenanjite aviatimpajia.

¹⁰ Pamenajiaquenaquee coramaniqui nochoocatimojiaquitimpigueti notsatacajiaquempiquea nocantajiaquempi: "Aatogueti ininti irantsipevenquempari ishecapae, aato ishecata."

¹¹ Noquenquejacaajiaquempiroquee imaica manatarite noquemacojiaqueriquea iconoajiaquempiquea perajiatsica, teetarite irinintajigueji irantsipevenquempari isheca, iroguentiquea isavicaventajiaque iquenquetsavijitashijiaa intati yasereantajiaque.

¹² Imaicaquee noncantajiaqueriquea irirajia perajiatsica aatotarite iquejejiajiaquee imaica, manaquee irantajiaquequee cameetsanijite inchoocatacojiaquenijite

taaca opajitapae icoguitejacojiacaca, iriguentiquea nintacaajiacajiro Amajirote Jesoquirishito.

¹³ Napitsaromentarijiate, aatoquea piperajigaro pantajiaquerogueti cameetsaguetanquitsica.

¹⁴ Inchoocajiaqueguetiquea caarica nintanquitsi irinetsanataqueroquea notioncaji-aquempica imaica paperiqui, aatoquea piconoajajariquea cameetsanijite impashiventajianaquempanijite.

¹⁵ Cotanquitsiquea aatoquea picatsimajiguiritsijate, cameetsaquea pincantajiaque-riquea pincantomajajiaquerigueti, ariqueate pinquejetacaajiaquempariqueate pitsat-ajajiaquerigueti papitsaromentarijiate.

Irovegatanajerogueti incantajianajerigueti

¹⁶ Amajirote inetsanatacaavajajiro ashirequi aatoniji ashoshoguiteta. Imaica namanacoventajiaquempiquea incantacoguitempani irinetsanatacaavaquempiro pishirequi aatonijite taa opaji pishoshoguitetimentajiatasi, aisa intsipatsipaitaquempiquea querocagueti pinchoocajiaqueni.

¹⁷ Imaicaquea naatimpa Paavoro inchiquiojitaquea nontioncavaquempiro oca acaniqui paperiqui cameetsanijite pintsajiaqueniijite naroguentiquea tigarancacaantajiaquempiro. Irooquea nametaca noquejequero notioncacaanquerogueti paperiqui.

¹⁸ Imaicaquea noninque incavintsajajiaquempiquea Amajirote Jesoquirishito aviatimpajia maasano.

IPARIACANARIGUETI PAAVORO ITIONCAQUENERI TIMOTEO

Antsatantaquemparoca

Ocatica iroguenti antsatantaquemparoca paperi iroquetica itioncacaantaqueca Paa-
voro itioncaquenerigueti Timoteo. Irocashi itioncacotaqueri irira Paavoro otsipauqui
paperiqui (Ya. 7.57–8.1; 9.1–31; 13.1–28.31), aisa itioncacotaqueri Timoteo paperiqui
Yantajiguica 16.1–3; 17.13–16; 18.5; 19.22; 20.4. Tequeratagueti intionqueroji Paavoro
ocatica paperi itioncacaanquero otsipapae 10 paperipae choocajianquitsica paperiqui
icantajitica *Tsavetacoquerica Jesoquirishito*. Iroaqueragueti iteroncaquerogueti Paa-
voro ocatica paperi itioncacaantaqueneri Tito, coajica itioncacaantaquero mavitetapo-
jatsica paperi itioncacaantaquenerica Timoteo. Itioncacaantaquero ocatica paperi
ajagantsiniqui 63, ichoocaquegueti quepatsiqui icantajitica Maseronia.

Itioncacaantaqueneri Timoteo acaniqui intampishishirentacaqueriniji (1.18–19;
4.1–16; 6.11–21), aisa cameetsaniji incantaqueri Timoteo incamantajiaqueri Epesoquit-
ica aato itsatacaantajajiro caarica iroomajatatsica (1.3–11; 6.3–10), aisa intsatacaaji-
aqueri quero incojiaquempani jivajiguirica quemisantajiatatsica aisa amijiguirica (3.1-
16; 5.1–6.2), aisa intsatacaajiaqueri quero incojiaquempani intsaroventajiaquempani
Aapani Irioshi (2.1–15).

¹ Naroguenti Paavoro itigarancane Jesoquirishito, iriguentiquea tigarancaquena
Aapani Irioshi Shetacojiacajica, aisa iriguentiquea tigarancaquenaquea Jesoquirishito
aguijajavajeca aventajiaquempani, irooquea oguishinejajiaajajica.

² Imaica nontioncaquempani, irijani Timoteo. Nirijanintamajataquempani, naroguenti-
tari tsaroventacaquempani. Noninquequea incavintsajamajataquempani Aapani Irioshi
aisa Amajirote Quirishito Jesoshi, noninque impintsatacomajataquempani, inchoocata-
caquempani cameetsa aatonijite pishoshoguitetajatsi.

Inchiquiojitaja yamatavijajiguimpitsija amataajiatatsica

^{3–4} Coramaniquea noanaquegueti Maseroniaqui nocantanaquempaniquea picocani
pinchoocaque Epesoqui. Imaicaquea noncantsitajempiquea aisa pincoquempanija
pinchoocaque oraniqui, choocatarite tsatacaantajiguiroca otsipapae teeca irooquea
Quenquetsatsarentsimajaca, manatarite isavicaventajiaqueroquea iquenquejajiguica
paesatinipaequitica, yapatsajavantacojiaqueroquea ipajiguetaqueti choviquijianaque-
rica ariquea itsavetacojiaqueriquea. Manatarite isavicaventajiaqueroquea intati. ¿Que-
rocampaquea incojiaqueroniquea? Irootaquetarite oquenancacaca icatsimatavacaan-
tantajiacaca. Teetarite irooquea inintagueticas Aapani Irioshi. Iroguenti inintagueti-
caquea iriatimpa manaqueate antsaroventamajataquempaniquea Jesoquirishito, aisa
ancomajamajajiaquempaniquea. Imaicaquea, aviatimpa Timoteo, pincantajiaquerija
irovashiantajianaqueroquea oratica itsatacaantaguishejiaqueca.

⁵ Nonintaquetari pincomajamajajianaquempaniquea aatonijite ochoocatiquea taaca
ogui-pashiventajiaquempaniquea. Aisa pintsaroventamajajiaquempaniquea Aapani
Irioshi cameetsanijite pagavejajiaquenijite pimpintsatavacaamajajianajempanijite.

⁶ Choocajiaquea iconoagaranca manaqueate icantashitatijaiacariquea itsatacaan-
tajiguica. Teequea ariquea inquempiejajiquea aatimpajia atsatacaantajiguirogueti.
Iroguentiquea iquenquetsatashijiaquea intati.

⁷ Inintajavecaquea intsatacaantajiaqueroquea igantacaantane Aapani Irioshi
itioncacotanaqueca Moishishini quempeca arimajaca itsamajaqueo, cotanquitsiquea
teequea intsatimajiguroji taaca ocantacoque manaquea iquenquetsatashicaro
intati.

⁸ Aatimpajia atsajiaquequea maasano igantacaantane Aapani Irioshi iroguenti caavijica oganejencavaeca, cotanquitsi mana inintajiti intsajite queri icantacaaqueca aatoniji icomijitaro.

⁹ Atsamajajiaqueroquea teequea iriojia incantacajaigueji comajamajajianquitsica, iriguentiquea icantacaaqueca teeca inquemisantajigueji iriguentijia aisa pigatsantajatsica. Aisa iriguentiquea icantacaaqueca caarica tsaroacagari Aapani Irioshi, iriguentijia aisa covaeguishevaetaroca coguisherentsipae, iriguentijia aisa teeca intsaromentajiguempariji Aapani Irioshi, iriguentijia aisa metojajiguirica iriri aisa iriniro, iriguentijia aisa maasano metojantajatsica.

¹⁰ Aisa iriguentiquea icantacaaqueca oashijiguiroca manquigarentsi, aisa manquigarentsijia oashijiguirica shirampari. Iriguentiquea icantacaaqueca cantatsajiguirica irapishirampariteni iquempetacaacari manquigarentsi, iriguentijia aisa aguirica caquinte irojocantajiaqueri, iriguentijia aisa tsojeajatsica, iriguentijia aisa cantashijiatatsica: “Yamenaquenaqueate Aapani Irioshi tee nontsojeguempaji”, cotanquitsiquea itsojeajiaquea. Aisa iriguentijia icantacaaque maasano peacagaroca taaca opajitapae ocantimentantaqueca Quenquetsatsarentsimajaca

¹¹ tsavetacoquerica Aapani Irioshi quero icocani imeshiantigueti. Iroguentiquea caaviji oshinetacaanta. Irooquea itigaranquimenquenaquea Aapani Irioshi nontsave-tantaguiteroni. Iriatimpa iriguentica caavijica yoganejencavaeca.

Paavoro ishinevencariquea Aapani Irioshi yamenaqueriquea iriguenti caaviji ipintsatacovaecari

¹² Noshineventacariquea agavejacaquenaca, iriraquea Quirishito Jesoshi, Amajirote, nocanqueriquea: “Arioteesa”, yamenaquenatari nocoguitani noguijamajatanaqueri, inintacaantaquenaca nantavaetaqueneri.

¹³ Coramaniquea caaviji nocantaguishetacovecari, aisa nocatsimamajajiavecariquea tsaromentajigarica natsipetacaajiacari, cotanquitsiquea ipintsatacovaequenaquea Aapani Irioshi, yamenaquenaquea noquejetaquerogueti imaica teequea nontsateji, teetarite nontsaromentavetempariji Quirishito.

¹⁴ Cotanquitsiquea coajicaquea icavintsajamajataquenaquea Amajirote itsaromentacaaquena, aisa yagavejacaquenaquea nompintsatantamajaquemparica nonquempejiaquempari maasano tsaromentajigarica Quirishito Jesoshi.

¹⁵ Ocaticaquea ocatica noncanquempica imaica iroguentiquea arimajaca, cameetsaquea paamajajiavaqueroja: iroguentiquea icoraquetashitaquiti Quirishito Jesoshi irimeshijiaqueri covaeguishetatsica. Ariquea iquempetacaquenaquea naatimpa nanaavecaquea nocovaeguishemajavetaca.

¹⁶ Cotanquitsiquea yamenaquenagueti Aapani Irioshi noquejetaquerogueti imaica, ipintsatacovaequenaquea cameetsanijite iramenajitaquenaniijite icocaniquea yatsipetacomajaquenaquea Jesoquirishito teequea incatsimatimatenaji. Iroompa iramenajiaquerogueti oshequini caquinteja incantajiaque: “Iroosacanica impintsatacojiaquenashiatsi naatimpajia aisa.” Iroompaquea intsaromentajianaquemparigueti Jesoquirishito incoguitempaniquea inchoocaguiteni.

¹⁷ Jaamejate ancoquempaniquea ashineventajiaquempari Aapani Irioshi, ancantajiaqueri: “Caaviji poganejencamajata.” Iriotaquetari Majirontamajatatsica irimajirontaguitempani, icocaniquea ichoocati, teequea inconijateji, aparoquea icocani iriatimpa Irioshimajaque. Ari oncoquempa.

Itsatacaamajaqueri Timoteo

¹⁸ Irijani Timoteo, ocatica nocamanquempica oquejetaqueroquea itsatacotsitaquem-pica tsavetantajatsica coramaniqui. Nocanquempiquea cameetsanijite poguijatacotaquerogueti pinquejetaquempari coareta yashimirintagueti itampishiventaquero icanquerica imajironcaca.

¹⁹ Pincoquempaniquea paventamajatanaquempari Amajirote, pintsaromentamajatanaquempari, pincomajamajaquempaquea aatoniji ochoocati chagashirentapojaquempineca. Iconoagarantajiacaquea itsavecaroquea covaeguishevaeca taaca opajitapae, cotanquitsiquea arimpaquea ipanacaro, iroompa yovashiantajianaqueroquea itsaromentajiavecarigueti ipomatsatantajiacaroca.

²⁰ Ariquea iquejianaqueroquea Imeneo aisa Arijantero. Irootaquequea nocantacaca cameetsaquea irantsipetacaaguitemparini Satanashi* intsajiaquenijite aatoquea icantaguishetacotiritsi Aapani Irioshi.

2

Quero incoqueroni iramanajiterigueti Aapani Irioshi

¹ Iroquetiquea noninquequea noncantaquempiquea pamanacoventajiaqueri maasano caquinteja pincantajiaqueri Aapani Irioshi impintsatacojiaquempari, aisa pincantacoventajiaqueri: "Arioteesa."

² Pamanacoventajiaqueriquea majirontajiatistica aisa iguejemajirojiate, jivajiatsica, maasano, anchoocajiaquenijite cameetsa aatonijite ochoocati taaca ashoshomentajiaquempaca, manaqueate asavicaventamajaqueroquea maasanopae inintaguetica Aapani Irioshi, ancomajamajiaquempa.

³ Cameetsavaequequea anquempajiaquerogueti imaica amanajiaqueriquea Aapani Irioshi Meshiantanquitsica, irootaquequea ishineventaca iriatimpa,

⁴ irooriji ininque irimeshijiaqueriquea maasano, aisa ininque intsamajiaqueroquea Quenquetsatsarentsimajaca.

⁵ Choocaqueate aparo Irioshimajaca. Aisa chooca aparo cantacoventajiguirica caquinte aatonijite icatsimajiguiritsi Aapani Irioshi, iriotaquequea Jesoquirishito caquintetatsica.

⁶ Iriatimpa ipanacaroquea inchiquiojitaquea imetojaventajiaqueri maasano aatonijite yashintajajari ampatsini, iriguentiquea ashintajajempari Aapani Irioshi. Iroompaquea aapojacagueti savincaguiteri inintantacaca Aapani Irioshi intsajitaqueronijite teeca intsajivetemparoji, itigarancajiaqueriquea itigarancaneja intsatacaajiaqueriquea maasano.

⁷ Jeroquea ipeacaanquenaca itigarancane camantantanquitsineca, icanquenaquea nontsatacaajiaqueri maasano teeca irijorijoigueji queroquea icotani Aapani Irioshi imeshiantigueti. Arimajaca nocanqueca, teequea nontsojeguempaji.

⁸ Imaicaquea noninque querocagueti ichoocajiaqueni shiramparijia iramanajiaqueriquea Aapani Irioshi, irancojempeventanaqueri, cotanquitsiquea incomajatimempari, aatoquea icatsimashirenti, pinquenquetsatavacaquempagueti aatoquea pipigapigatavacaaca.

⁹ Aisa noninquequea manquigarentsijia netsanaqueate onquitsaajiaquempa, aatoquea onintajigui osemejaquequeate. Aisa aatoquea iroguentiquea osavicaventajiaquequea ampitapitaaqueroquea omae. Aisa aatoquea caavijiquea oshineventajiaquemparoquea nenquetsiqui, ooro, quitsaarentsipae aisa taaca opajitapae vegaramajatatsica.

¹⁰ Iroguentiquea osavicaventajiaque oncavintsajantajiaquequea. Irootarite ininque Aapani Irioshi onquempajiaquempaquea imaica manquigarentsijia cantajiatistica ot-saromentajiacari.

¹¹ Oraquea manquigarentsijia onquemisantamajiaquequea itsatacajaiqueroca on-taniqui tsovironaqui qui icapiocapinijitagueti, omativicaquempa.

* **1:20** Pamenero 1 Co. 5.5, 13. Icanqueri aatonijite itsipajajari tsaromentajigarica icapiocajiaqueti cameetsanijite irantsipetacaaguitempariniquea Satanashi.

¹² Teequea noshineteroji ontsatacaantajiaquequea iroatimpajia icapiocapini-jitagueti. Aisa teequea oncameetsateji anaimananaqueriquea shirampari, manaquea omativicaquempa.

¹³ Iriquetitarite ipeacaacaqueate Aapani Irioshi Araini, iroompaquea iquejetacaitsitaroquate Evani.

¹⁴ Teequea irio Araini iramatavije ampatsini. Iroguentiquea icoraquetashitaque Evani yamatavijitsitaroquea ocovaeguishedantacaca.

¹⁵ Irooquea icantantacaroca Aapani Irioshi antsipevaequempa irijanintaquem-pagueti, cotanquitsi incavintsajacoqueroquea maasano manquigarentsijia arigueti oncoquempani avenquempari, aisa ompintsatacotanquempa aisa onquenquejamaja-jiaquero quero oncoquempani oncomajamajaquempagueti.

3

Quero incojiaquempani quempoguijajiguirica tsaromentajiacarica Aapani Irioshi

¹ Arimajaquea noncantajiaquempica: choocagueti nintanquitsineca impeaquempaquea quempoguijajiguirica tsaromentajiacarica Aapani Irioshi, cameetsavaeque.

² Cotanquitsiquea irira quempoguijajiguirica tsaromentajiacarica incoquempani-jate incomajamajaquempajate aatonijite ochoocatitsi taampate incantimentajiquerica, manaquea iramenajitaqueriquea icomajamajaca, aisa irimanquigatimataquem-paquea aparo manquigarentsi. Aatojate ishinquitatsi, intsamajaque inquenquejama-jaque, irinetsanamajaquempa, cameetsa irajiaqueriquea iroguisavisaviitavaqueriquea arejetimojiacarica, intsamajaque intsatacaantaque.

³ Aatoquea ishinquiguitani, aatoquea yaashitantatsi, manaquea incavintsajantaque-quea, iroguishinejantanaje, aisa aatoquea ishineventaritsi imentaquipae incaraquise-quivaequeri.

⁴ Intsamajaquequea irinetsanajiaqueriquea choocatimojiaquerica, aisa intsatacaaji-aqueriquea irijanijiate inquemisantamajajiaqueriquea aatoquea ipigatsaritsi.

⁵ Quericaca teeca intsateji irinetsanaqueri choocatimojiaquerica, ¿arimpate iragave-jaque irinetsanajiaqueri maasano tsaromentajiaatsica inquempoguijajiaquerigueti? Aa-totarite yagavejitsi.

⁶ Iiraquea iriaqueraca tsaromentatsica teequeate oncameetsateji impeaquempaquea quempoguijajiguirica tsaromentajiaatsica, isemetitsi, iquempetaritsi ampatsini isemetaquegueti jero icatsimatantacarica Aapani Irioshi.

⁷ Iiraquea quempoguijajiguirica tsaromentajiaatsica iintsijate incomajamajatempaja cameetsanijite iramenajiaquerinijite teeca intsaromentajiguempariji Aapani Irioshi manaquea icomajamajataca. Oraquea aatogueti incomajamajata, iroguenti incan-taguishedacojiaqueri maasano, iroompaquea iragavejaqueri ampatsini manaquea in-covaeguishedacaamajataquempari.

Quero incojiaquempani amitacopinijiguirica tsaromentajiaatsica

⁸ Ariqueate inquejiaquempaquea amitacopinijiguirica irapitsaromentarijiate, inco-quempanijate incomajamajajiaquempaquea, aisa irinetsanamajajiaqueroquea ican-queca. Aatoquea ishinquiguitani, aisa aatoquea yamatavijiguiritsi igonorojia iraitsijia-queriquea imentaquitsitepae intati.

⁹ Manaqueate incomajamajaquempajate intsaqueniji tee anejeroji yantaqueca, aisa intsatacaantamajaqueroja iroaqueraro yonigaimojiacajica Aapani Irioshi teeca intsajivetemparoji coramani.

¹⁰ Iroquetitaquea iramenamajajitaqueri arimajacaca icomajamajaca, iroompaquea iramenajiaquerigueti itampaticamajataqueroquea ipeacaaguecaca maasanopae, irooquea iintsijate impeaquempaqueate amitacopinijiguirica irapitsaromentarijiate.

¹¹ Ariqueate onquempējaquempauea manquigarentsijia oncomajamajajiaquem-paquea, aisa onetsanamajajiaquero ocanqueca, aatoquea ocantashijia intati, aatojate oshinquitatsi, aisa ontampishitashijiaqueroquea maasanopae covaeguisherentsipae.

¹² Iriraquea amitacopinijiguirica irapitsaromentarijiate irimanquigatimataquem-paquea aparo manquigarentsi, aisa intsaque irinetsanamajajiaqueriquea irijanijiate aisa maasano choocatimojiaquerica.

¹³ Intampaticamajataquerogueti yamitantaquegueti, irishineventamajajianaquem-pari irapitsaromentarijiate, aisa iragavejaque intsavetacomajaqueeriquea Quirishito Jesoshi, aatoquea itsaroimatitsi, yaventamajatacaritarite.

Iroaqueraca yonigaimojiacajica Aapani Irioshi

¹⁴ Noninque taampina noanaque namenajajatempi, cotanquitsi notioncantaquem-piroca ocatica

¹⁵ cameetsaniji aatogueti nagavejitsi noguitsi taampina, pintaqueniji quero ancoji-aquempani ancomajamajajiaquempagueti maasano aatimpajia choocatimojiaquerica Aapani Irioshi itsovironaquitequi, maasanotari aatimpajia yashintajiacaca Aapani Irioshi anijatsica, apeanaja quejetaca ovoa titaqueroca iroomajatatsica, aroguenti ompetanacaroca.

¹⁶ Arimajaca caaviji anaaquequea oganejencamajataca maasanopae teeca intsajivetemparoji iroaqueraca yonigaimojiacajica Aapani Irioshi. Irootaquequea ocatica:

Yonigaampojaca Quirishito icaquintepojaquegueti.

Ishire Aapani Irioshi yagavejacaqueriquea intsajiqueronejite iriguenti Irijanite,

aisa irashivantijitete yamenajiaqueriquea.

Itsavetantimojitaqueri caquinteguetatsica,

itsaromentajianacariquea quepatsiquitica.

Yatsomajanaja jenoqui, yaajitavajiri inquitequi.

4

Ovashiantajianajeroneca itsaromentajiavecarigueti

¹ Imaica noninque noncamanquempi iriraquea Ishire Aapani Irioshi icanque oncoramanitapojaquegueti arejetapojaquempagueti savincaguiteri inchoocagarantajianaquequea irovashiantajianajero itsaromentajiavecarigueti. Iriguenti irogujatacojianaquequea amatavijajiaquerica, aisa iroguenti inquemisantajianaquequea itsatacaantica ampatsinipae.

² Iriguenti inquemisantamajajiaquequea cameetsatamampeajiatsica caavijica yamataamajaca, yamemajatanajarotari igovaeguisherere aatotari ochagashirentajiri.

³ Irirajia quejiaqueroca imaica icantimentantajiaqueroquea irimanquigajitemparogueti manquigarentsijia, aisa manquigarentsijia omanquigajiaquemparogueti shirampari. Aisa icantimentantajiaqueroquea irishecajitaquemparogueti taaca opajitapae teeca incantimentantavetemparoji Aapani Irioshi, ipeacaaguetacarotari irishecajitaquempacae cameetsaniji ashecajiaquemparoniji aatimpajia tsaromentajiaatsica tsamajiguiroca iroomajatatsica, ancantajiaqueri: "Arioteesa."

⁴ Maasanopae ipeacaaguetacaca Aapani Irioshi iroguenti cameetsavaeque. Aatoquea icantimentantajitirotsi ashecajiaquemparogueti arigueti ancantajiaqueri: "Arioteesa."

⁵ Irootarite cameetsatacaguerone Iguenquetsatsare Aapani Irioshi aisa amanacoventaqueerogueti.

Quero incoquempani Timoteo irisavicavenquerogueti inintaguetica Jesoquirishito

⁶ Pintsatacaajiaquerigueti papitsaromentarijiate maasanopae ocaticapae, iramenaquempiquea Jesoquirishito pinetsanamajaqueeriquea ininqueca iriatimpa. Arimpaquea pintsamajataqueroquea Quenquetsatsarentsimajaca piquemisanqueca.

⁷ Aatoquea piquemisantajiguiro itsavetashijiacaca caquinte, irooca otsavetashijave-tacaca quenquevarovaejianquitsica. Iroguenti pisavicaventajiaquequea inintaguetica Aapani Irioshi.

⁸ Oraqueate anintajiguigueti antampishijiaquequea atsinoqui cameetsaveca, cotanquitsiquea caaviji anaaque ocameetsavaeque anquenquejamajaqueri Aapani Irioshi asavicaventajiaqueroquea inintaguetica iriatimpa anchoocajiaquenijite cameetsa ocaniqui quepatsiqui aisa ontaniqui jenoqui.

⁹ Iroomajaquea ocativa nocanquempica imaica, cameetsavaeque inquemisanta-majajiquero.

¹⁰ Aatimpajia aventaventaicari Aapani Irioshi anijatsica. Irootaquequea asavicaven-tantajiacaroca maasanopae inintaguetica, aisa atsipetacovaejiaca taaca opajitapae. Iri-atimpa inintavecaquea irimeshijiaquerimequea maasano caquinteguetatsica, cotan-quitsiquea iriguenti imeshijiaquequea aventaventaicarica irimeshijiaqueriniji.

¹¹ Pincantajiaqueriquea maasano tsaromentajigarica irinetsanatavaquero ocativa notioncaquempica, pintsatacaamajaqueriquea.

¹² Pintsavetantimojiaqueriguetei Iguenquetsatsare Aapani Irioshi inchiquiojitaja pi-peacagatsi covaeguisherentsi, manaquea pincomajamajaquempa cameetsaniji ira-menajiaquempinijite papitsaromentarijiate ariqueate inquempeljianaquempaquea iri-atimpajia. Pimpintsatacojiaquempari pigonoro, pintsaromentamajataquempariquea Aapani Irioshi, pincoquempaja pincomajamajajiaquempajate. Pinquempetaquero-quea imaica inquemisantamajajiaquempinijite aatonijite icantajigui: “Arisa icota quenquetsatanquitsica iriaqueraca quenquevaritananquitsica, aatoqueate iquemisan-tiritsi.”

¹³ Oraqueate aatotagueti nocoraquetsitsi, pisavicaventamajaquerojate pampatsa-javanqueroja Iguenquetsatsare Aapani Irioshi picapiocapinijiacagueti pintsavetanta-queeroquea, aisa pintsatacaantamajatanaqueroja.

¹⁴ Pinquenquejeja coramani ipamijiaquempiquea pishinquireguishiqui quempogu-ijajiguirica tsaromentajiacarica iquenquetsashirentacaajiaqueriguetei Aapani Irioshi icantantajiaquempica pisavicaventamajaquero pintsavetantaguiteni, aisa pintsata-caantajiaquequea, iroompaquea ariquea yagavejacaquempiquea Aapani Irioshi. Irooquea imaica pisavicaventamajaque, inchiquiojitaja povashiantanajirotsijate.

¹⁵ Noncantsijiajempiquea aisa pisavicaventamajatanaquerojate iramenajiaque-mpinijite maasano picancani pitsatanaquequea.

¹⁶ Pincomajamajaquempajate, cameetsaquea pintsatacaantaguiteni, pintampati-camajatero. Pincoquempanija pisavicaventamajaqueroquea. Pinquempetanaque-roguetei imaica incoquempani incavintsajamajaquempi Aapani Irioshi. Ariquea in-quempeljiaquempariquea quemisantajiaquempineca.

5

Quero incoquempani Timoteo intsatacaajiaqueriguetei tsaromentajiatatsica

¹ Aatojate picantomajiritsijate quenquevarivaetatsica, cameetsaja pintsatacaaque-riquea pinquempetacaquempariquea irioca piri. Iriaquea iriaqueraca quenquevar-ijiananquitsica pinquempetacaajiaquemparija irioca piguentijeguitepae.

² Oraqueate quenquevarovaetatsica pinquempetacaajiaquemparoquea irooca iri-janintajiguimpica. Irooquea iroaqueraca quenquevarojiananquitsica pinquempeta-caajiaquemparoja pitsijoitepae, pincomajaquequejanequempaja.

³ Pimpintsamajajiaquemparoja metojacorojia teeca inchoocateji ojitane. Iroatimpa-jia caaviji ocoguitejacovaejiaca.

⁴ Cotanquitsiquea choocagueti irijanijiate, orijanijiate, irioca oshaijiate, oshaojiate, intsajiaquequea impintsatacojiaquemparoquea irojocajiaquenerojate ocoguitejacojiacaca, iroorijite coramani iriri, iriniro, ityaine, ityaone yojocajiaqueneriquea iriatimpajia. Inquempejiaquerogueti imaica irishinevaetanaquempauea Aapani Irioshi, irootaquequea ininqueca iriatimpa.

⁵ Oraquea metojacoromajaca coguitejacomajatanquitsica choocatajatsica apaniro, teeca inchoocateji ojitane, manauea oguijaguitiniquea incavintsajaqueronijite Aapani Irioshi, ocoguitani osavicaventaguitirini amanaguitirini savincaguitiriqui aisa pitsecariqui.

⁶ Cotanquitsiquea oraquea metojacoro savicaventiroca taaca opajita oninqueca iroatimpa, manauea quempetacaqueate metojaque, teetarite ontsaterinica Aapani Irioshi.

⁷ Pincamanterijate tsaromentajatsica irinetsanatavaquero maasanopae ocatica aatonijite icantimanajitiritsi.

⁸ Iiraquea teeca incavintsajacogijueriji ijitanepae, teeca irojocajiaqueneriquea icoguitejacojiacaca ijitanemajaca, manauea yovashiantaquero itsaromentavecagueti, caaviji yogaamajataquero yantaguishequeca teeca intsaromentimatempariji Aapani Irioshi.

⁹ Oraqueate pitioncacojiguirogueti metojacorojia, iroguentiquea pitioncacojiaquequea quenquevaromajatananquitsica apanirontamajatarica manquigataroca tequeratagueti irimetojeji, teeca omanquigatajempaji itsipa. Oraquea tequerataca ajagantsitacoteji 60 ajagantsite aatoja pitioncacotirotsijate.

¹⁰ Aisa iroguenti pitioncacojiaquequea iquemacojitaqueca caaviji opintsamajatanajia: irooca oquenquevarijiajiri irijanijiate onetsanajiajiri, aisa netsana aajiavaqueri apitsaromentarijiate coraquejianquitsica, irooca aisa amijiaqueriquea itsipapae tsaromentajatsica, irooca aisa ocavintsajacovaequeri atsipevaetanquitsica, irooca aisa taaca opajitapae cameetsaripae.

¹¹ Cotanquitsiquea aatoja pitioncacojiguirotsijate metojacorojia tequerataca onquenquevaromajateji, iroorijite iroaqueragueti oncantajavequempari Quirishito: "Noncoguitempani nosavicaventaguitempini", cotanquitsiqueate iroompaquea manauea onintajianaque omanquigajiajempaquea ariqueate ompeacojianajemparoquea ocantajiavecaca.

¹² Inchiquiojitsitaqueate onquejetacaantajiaquempauea iroatimpajia, aatotarite onetsanajiguirotsi ocantajiavecaca.

¹³ Aisa omperamajajianaquempa iroguenti osavicaventajianaquequea onejantajianaquequea. Aatoquea aparoperajigatsi, aisa aajianaqueroquea tsojetsipae, oncantaquequequea veaa veaa, asereseretantaguetaque, onquenquetsaguishetanaque.

¹⁴ Irootaquequea nonintantacaca omanquigajiajempaja metojacorojia tequeramajaca onquenquevaromajateji, irijanintajiaquempauea osavicaventajiaqueronijite otsovironaquite onetsanajiaqueroquea aatonijite taaca opaji ompampiatantaquem-paca incantaguishtacojiaqueroquea teeca intsaromentajiguempariji Quirishito.

¹⁵ Choocatarite oconoagarantajiacca metojacorojia opeacojianajaroquea otsaromentajavecarigueti, iriguenti opitsocashitanaja Satanashi oquemisantajianajiri.

¹⁶ Iiraquea tsaromentajatsica choocagueti ijitane metojacotanquitsica omanquigare, iintsija impintsatacotajemparoja iriatimpajia irojocajiajenerojate ocoguitejacojiacaca. Aatoquea icantitsi incavintsajerojate itsipa irapitsaromentarite itsipatsipaitacaca icapiocapinijigagueti, irioquea cavintsajerone, iragavejaqueniji itsipajia tsaromentajatsica incavintsajacojiaquero metojacoromajaca teeca onchoocateji ojitane.

¹⁷ Iiraquea quempoguijamajajiguirica tsaromentajatsica cameetsavaeque irishin-eventamajajitaquempari, aisa inquemisantamajajitaquerijate. Iiraquea savicaventa-

jiaqueroca itsavetantajiaquero Iguenquetsatsare Aapani Irioshi itsatacaantajiaquero-quea, iriomajaca irishineventamajajiquempa.

¹⁸ Ocanquetari Itioncacaantaqueca Aapani Irioshi: “Aatoquea pisavotsovotirit-sija caapironcaari pisagorejacaantaquempariguete tirigoqui, cameetsataque irisheca-garantavaquemparo.” Aisa otsipa otioncacoca ocanque: “Iiraquea catsiquetatsica irovegaraajitaqueriquea.”

¹⁹ Choocaguete cantanquitsica ipeacaaca covaeguisherentsi quempoguijajiguirica tsaromentajatsica, aatoguete ichoocajiguiti mavite irooca 3 amenamajatanquitsica, aatoquea piquemisantiriti.

²⁰ Cotanquitsiquea choocaguete quempoguijajiguirica tsaromentajatsica, aatoguete yovashiantirotsi icovaeguishecaguete, pincantomajaqueriqueate picapiocapinijiacaguete cameetsanijite intsaroajianaquenijite igonorojia aatonijite iquempejigaritsi iriatimpajia.

²¹ Ariqueate yamenajiacaji Aapani Irioshi, jeri aisa Amajirote Jesoquirishito, aisa irashivantijitete icoguajiaqueca, irootaquequea noncantantajiaquempica imaica pintangamicamajaterojate maasanopae ocatica nocantaguetaquempica. Pintsatacaanteguete aisa pincantomajanteguete pinquejetacaajiaquempari maasano.

²² Aatoja paguiritsija taampina itsipa pimpeacaajiaquempariquea quempoguijaque-rineca tsaromentajatsica aatoguete iroquetita pamenamajajigui aatonijite piquejeta-caantatsi aatoguete icomajamajata. Aviatimpa arimpaqueate pincomajamajatanaque-mpaquea.

²³ Pojoquijijoquijitaguete ocatsitimpiguete pimotijaqui, aatoquea aparo pitsatitsi pimiraroquea oja, pimiraguetavajemparoqueate capichajaji vinoja.

²⁴ Choocajia iconoagarantajiacaquea itsajiquero taampina ipeacaajiacaroguete cov-aeguisherentsipae ariquea icantomajajitaqueriquea, cotanquitsiquea iconoagaranta-jiaa itsipapae oncoramanitapojajeguete intsajiqueroquea incatsimajiaqueriquea Aa-pani Irioshi maasano peacaaguishetacaroca covaeguisherentsi.

²⁵ Ariqueate iquempejiaca peacaajianquitsica cameetsaripae iconoagarantajia-caquea itsajitaquero taaca opaji ipeacaajiacaca. Itsipapae teequea intsajiteroji, cotanquitsiquea oncoramanitapojajeguete intsajitaqueroqueate.

6

¹ Iiraquea yashintajitacaca tsaromentatsica inquemisantamajataqueri ashincarica aatojate ipigapigatsataritsijate aatonijite icantaguishetacojitiriti Aapani Irioshi, aisa aatonijite icovaeguishetacojitirotsi atsatacaantajiaqueca.

² Oraqueate iriguentiguete ashinquemparine tsaromentatsica aatoquea icantitsi: “Teequea nontsaroacaguempariji, iriguentiquea napitsaroveritarite.” Caaviji iranaaque irantimomajaqueriquea, yamenaqueriquea iriguenti icatsiqueti-moquequea irapitsaroveritarite ipintsamajatacaca. Imaica, irijani, noninque pintsatacaanqueroquea ocatica, pincantajiaqueriquea papitsaroveritarijate irinetsanamajajivaquero.

Quero caaviji anaavaeque maasanopae

³ Oraqueate atsatacaantajiaqueca aatimpajia iroguenti Quenquetsatsarentsimajaca, atsatacaantaquequea canqueca Amajirote Jesoquirishito, atsaromentamajatacariquea Aapani Irioshi. Cotanquitsiquea choocajatarite teeca irinintajigueji inquemisantama-jajigueriji, iroguenti itsatacaantajiaquequea teeca irooquea Quenquetsatsarentsima-jaca.

⁴ Iriguenti caavijica yaventacovaeca. Teequea intsatimateji. Iroguenti ishinevenca impigapigajencatantajiaquempa, irootaquequea opampiatantapojacaroquea isemacotsitanta, icatsimatacaanti, icantaguishetacotanti, aisa mana iquenquejashitaca: “Ar-ica chooca yantaqueca.”

⁵ Icatsimatavacaapinijiaca irirajia quenquejajiguiroca covaeguisherentsi, teetari in-quenquejajeroji iroomajatatsica, manaquea icomajamampeaca intati, ijijiavetaca igomajamampeane iraantajiaquemparome taaca opajitapae. Pintsiparejitempariquea quejecarica.

⁶ Cotanquitsiquea ancomajatimenquemparigueti Aapani Irioshi, aatogueti anintavaque anintavaque, manaquea ashinevaejianaquempaquea, irooquea caaviji anaavaeque.

⁷ Oraqueate iroaqueragueti avojaiguigueti teequea taaca opaji ashintempaji. Ariquea onquempetaquempaquea ametojajiaquegueti aatoquea taaca opaji aajianajitsi.

⁸ Cotanquitsiquea imaicaquea imaica iroguentigueti choocavetanquitsineca asheca-
jia aisa aitsaarejia, ashinevaequempaquea.

⁹ Iiraquea nintajiatsica irajaarantaquempa irantamampeaguishequemparo taaca opajitapae incarapiotantemparoca irajaararo. Ontiavaetapojempari iguenquejane. Yamenavecaro cameetsavaeque, oquejetaca imorotashijitirigueti tomirishiquitica, manaquea isanareacotanaque yomposapojaca isavi. Ari iquejejiaca caarica quenquejama-
jatatsi, inintamampeacaro taaca opajitapae, iroompa aapojempagueti irimetojaque-
gueti impomatsavaequempa iroaroaitanaque camorecariqui.

¹⁰ Arimajaca irinintamajajiterigueti imentaquipae oshimerancantapojemparo coguisherentsipae. Choocatarite iconoagarantajiaaca tsaromentantajavetatsica, inintamajaqueri imentaquipae, itsegoantanacaca yovashiantantanacaroca itsaromentavecarigueti, yatsipevaetantajiacaca.

Paavoro icanqueriquea Timoteo aatoquea yovashiantimatirotsi itsaromentacagueti

¹¹ Cotanquitsiquea aviatimpa, yashintamajatacaca Aapani Irioshi, aatojate pishin-
eventimatarotsi maasanopae ocativa ishineventajiacaca iriatimpajia, pishiapitsat-
apanajanteroja. Iroguentiquea pishineventamajaquempaja pincomajamajaquem-
pajate, pinetsanamajaqueroja inintaguetica Aapani Irioshi, paventamajatanquem-
parijate Jesoquirishito, aisa pimpintsatantavaequempaquea, pantsipetacovaequem-
paquea, aatoja pipigatantatsijate.

¹² Pinquejetemparija ashimirintatsica, pintampishiventenerija Amajirote. Aato-
quea povashiantiritsijate pitsaromentacarigueti arejevaequemparoquea poanaque-
gueti piguintenitomotajemparigueti Aapani Irioshi pincoguitempanti pinchoocagui-
teni, irootaquequea icajemanquempica, irootaquequea coramani picamantantacarica
maasano capiocajianquitsica: “Notsarovencari Jesoquirishito.”

¹³ Ariqueate yamenajiacaji Aapani Irioshi anijacaagueterica maasanopae, aisa ya-
menajiacaji Jesoquirishito tsavetacotantanquitsica icoacoquerigueti Pontsio Pirato,
itampaticamajaquero, teequea incantashitempaji.

¹⁴ Irootaquequea noncantantajiaquempica imaica pintampaticamajaterojate nocan-
quempica, aatoja picantashitatiimatarotsija, aatonijite ochoocatitsi taaca opaji incanti-
menquempica. Ariquea pinquejetanaqueroja imaica pincoguitempanti arejetapojempa
incoraquetantajatempacaca Amajirote Jesoquirishito.

¹⁵ Iroompaquea arejetapojajempagueti savincaguiteri incoraquetantajempaca inti-
garancajeri Aapani Irioshi incoraquetaje ocaniqui quepatsiqui, choocatarite aparo
Aapani Irioshi Agavejamajatatsica, iriguenti Irioshimajaca anaajiaquerica maasano
majirontajiatatsica anaaguevetatsica, anaajiaqueriquea maasano anaajencavetanquit-
sica.

¹⁶ Aparomajaca ichoocaque iriatimpa icoguitani ichoocati paesatoniqui tequeratagueti onchoocatimateji, aisa icocani inchoocaguiteni aatoquea imetojimatitsi. It-sirencashimpoquirerejavaequequea icanca, cantavaeque tsiren, teequea inchoocateji agavejanquitsineca inquempejitaquempari. Teequea inchoocateji caquinte amenimaterineca, aisa aatoquea yagaveji irameneri. Incoquempanijate irishineventamajajitaquemparija incantajiqueriquea caaviji yanaaque yagavejamajati. Ari oncoquempa.

¹⁷ Pincantajiaqueriquea ajaarantavaetatsica ashintamajaguetaroca quepatsiquitica, aatoja yaventacotatsija, aisa aatoja ishineventajigarojate yashincaca, onteroncaguetanajempatari oncoramanitapojajegueti. Iriguenti irishineventamajaquempaja Aapani Irioshi pintsatacocarica, jocajiacajiroca maasanopae cameetsanijite ashinejiaquempaniji.

¹⁸ Aisa pincantajiaqueriquea incavintsajacotantajiaque, iramitacotantajiaque, irojocagarantajiaqueneri igonoro.

¹⁹ Inquempejiaquerogueti imaica oncoramanitapojajegueti iroaroaitanaquegueti jenoqui, incavintsajamajaqueriquea Aapani Irioshi iramenacaajiaqueriquea maasanopae yoguijacaquerica, ariquea incoguitempani inchoocajiapojaje, iroguenti anijagantsimajaca.

Iteroncanajirogueti Paavoro itioncaquenerica Timoteo

²⁰ Imaica, Timoteo, pinquenquejamajatavaqueroja Quenquetsatsarentsimajaca itsatacaajitaquempica, pintampaticamajateroja, shoshoh picantashitatigarotsijate. Aatojate piquemisantiritsija cantashijiatsica intati. Iriatimpajia icantajiavecaca itsamajati, cotanquitsiquea teequea intsatimateji. Oraqueate itsatacaantajiaqueca teetari onquempetemparoji Quenquetsatsarentsimajaca aquemisantajiaqueca aatimpajia.

²¹ Choocajiarite iconoagarantajiacaca iquemisantajiaqueriquea quempejiaqueroaca imaica, iroompaquea yovashiantajianajiro Quenquetsatsarentsimajaca iquemisantajiavecaca.

Noninque incavintsajamajajiaquempi Amajirote.

PAAVORO ITIONCAJINIRI TIMOTEO

Antsatantaquemparoca

Ocatica iroguenti antsatantaquemparoca paperi mavitetapojatsica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipauqui paperiqui (Ya. 7.57-8.1; 9.1-31; 13.1-28.31), aisa itioncacotaqueri Timoteo paperiqui Yantajiguica 16.1-3; 17.13-16; 18.5; 19.22; 20.4. Ocatica paperi iroguenti teroncapojatsica itioncacaantaqueca Paavoro, choocaquea otsipa 12 paperipae itioncacaantaqueca choocajianquitsica paperiqui icantajitica *Tsavetacoquerica Jesoquirishito*. Itioncacaantaquero ocatica paperi ajagantsiniqui 64, ichoocaquegueti Iromaqui, pajinigueti irimetojaque. Itioncacaanquerogueti iriguenti itsipataja Irocashi, tee irovashi-antjeriji (4.11).

Itioncacaantaquero ocatica paperi itsaquetari irooshipoji imetojajitaqueri, inintaque intampishishirentacaqueri Timoteo aisa icantaqueri quero incoquempani inchoocaquegueti cameetsa (1.3-14; 2.1-13; 3.14-4.2, 5). Aisa itsatacaqueri aatoja iquemisantiritsi tsatacaantajiguiroca teeca iroomajateji (1.15-18; 2.14-3.9; 4.3-4). Icamantacotaca quero incojitaquerini (3.10-13; 4.6-8, 14-18). Aisa icanqueri Timoteo iramajeri Maricoshi aisa yashintaguetacaca Paavoro yoanaqueca ontaniqui (4.9-13, 21).

¹ Naroguenti Paavoro itigarancane Jesoquirishito, iriguentiquea nintacaquenaro Aapani Irioshi nontsavetantaqueroquea icantacaacajica icanquegueti iranijacaajaji Quirishito Jesoshi.

² Imaica nontioncaquempi, irijani Timoteo nopintsamajatacaca. Namana-coventaquempi incavintsajamajajiaquempinijite Aapani Irioshi aisa Amajirote Jesoquirishito, impintsatacotaquempinijite, inchoocatacaajiaquempinijite cameetsa aatonijite taaca opaji pishoshoguiteventajigatsi.

Aatojate itsaroguitsi intsavetantaquerigueti Jesoquirishito

³ Nocoguitani tsiteniriqui aisa savincaguiteriqui namanaquerigueti Aapani Irioshi noquenquejapinitaquempi, nocanqueri: "Arioteesa." Iriguentiquea notsaroventacaca, noquempetacari choviquijianaquenaca, teequea onchoocateji nantaqueca chagashirentaquenaneca.

⁴ Noquenquejajiro pijaquija, nonintantacaca namenajatempiquea imaica cameetsanijite noshinevaequempanijite.

⁵ Aisa noquenquejacoquempi pitsaromentamajatacariquea Aapani Irioshi piquempemajajiacaroquea pishaote Iroira aisa piniro Eonise. Notsamajaquequea arimajaca piquempejiacaroquea iroatimpajia pitsaromentamajajiacariquea.

⁶ Irootaquequea nonintantacaca nonquenquejacaajempiroja coramani nopamiquempigueti pishinquireguishiqui yagavejacaanquempica Aapani Irioshi pintsavetantavaeque. Imaica noncanquempiquea pintampishiventerojate.

⁷ Teetarite irooquea intigarankuimentjeriji Aapani Irioshi Ishire antsaroajiaquequea, iroguenti itigarankuimentjeriquea iragavejacaamajacaji, aisa cameetsanijite ampintsamajajiaquempinijite maasano caquinteguetatsica, aisa antsajiaqueniji anquenquejamajaque anchoocatimentqueniji cameetsa.

⁸ Imaica noncanquempiquea aatoquea pipashiventatsi pintsavetantavaequerigueti Amajirote. Aisa naatimpa aatoquea pipashiventacaanatsi pamenaquenagueti isantanatacotimentajiquenaro notsavetantavaequerigueti. Manaquea pinquejetaquenaja pantsipeventaquemparo Quenquetsatsarentsimajaca Oganejencatatsica, irio-taque tampishitacaajiaquempineca Aapani Irioshi.

⁹ Iriatimpa imeshiajiacaji, aisa icajemantacajica asavicaventajiaqueroniji inintaguetica, ancomajamajajiaquempa. Teequea irooquee incajemacotantaji agameet-sareni, inchiquiojitaquea iriatimpa inintacaajiacaji. Icocani icavintsajajiacaji pae-satoniqui tequeratagueti onchoocatimateji, icantacoguitani coramani inintaguitini Aapani Irioshi incavintsajajiacaji Quirishito Jesoshi,

¹⁰ cotanquitsiquea imaica yonigaajiacaero iconijataquegueti Meshiantatsica Quirishito Jesoshi icoraquequitigueti, yanaavaetaquitiroquea metojanentsi, ariquea itigarancacajiro Quenquetsatsarensi Oganejencatatsica, irooquee atsatantacaroca anijagantsimajaca, oguiconijatacaero quea quero ancojiajempani ancoguitempaniniji anijaguiteni.

¹¹ Irooquee inintacaquenaca Aapani Irioshi nontsavetantavaeque, ipeacaquenae itigarancane aisa tsatacaantantatsica nontsatacaqueriniji teeca irijorijoigueti.

¹² Irotaquequee natsipevaetantacaca, cotanquitsiquea teequea nompashiventacaguemparoji isantanatacotimenquenarogueti nontsavetantavaequerogueti, notsaquetarite queri navencaca. Aisa notsamajaquequee aatoquee yamatavijanatsi, yagavejamajati inquempoguijamajataquenaro nojoquitajanarica, arimpaquee incavintsajacomajatanacuena arejevaetapojempa incoraquetajategueti.

¹³ Ariqueate imaica pintsatacaantavaequerogueti pintampaticamajatanacueroquee Quenquetsatsarensimajaca nontsatacaquempica, aatoquee picantashitatarotsija. Pinquemisantamajatanacuero Quirishito Jesoshi, aisa pimpintsamajataquemparijate papitsaroverarijate.

¹⁴ Pintsavetantavaequerooquee Iguenquetsatsare Aapani Irioshi yojocajitaquempica, pintampaticamajateroja pincanquero, iriguentiquea agavejacaquempine Ishire Aapani Irioshi choocashirentajiacajica.

¹⁵ Pitsaquequee maasano guintenijiatsica Ashiaqui yovashiantajanajana, iquejejiaca Pijero aisa Eremojene.

¹⁶ Namanacoventajiaqueriquea ijitanepae Oneshiporo impintsatacojiaquempari Amajirote. Iriatimpa icavintsajapiniacuena ishinetacaajatana, teequee impashiventacaguenaji isantanatacojitaquenagueti.

¹⁷ Quempetaca yarejetapojacagueti ocaniqui Iromaqui icoapojana yamenaguevetapojana, itsitacavaepojajiro, ariquea yamenapojajana.

¹⁸ Namanacovenqueri incavintsajamajaqueeriquea Amajirote incoraquetajategueti oncoramanitapojajegueti. Aviatimpa pitsaquetarite yamitacovaequenaquee nochoocaquitigueti Epesoquiniqui.

2

Pinquempetaquemparija igoaretate Jesoquirishito

¹ Imaica, irijani, arimpaquee pintampishitashimajatanacueroquee maasanopae inintaguetica Aapani Irioshi, iriguenti tampishitacaquempine Quirishito Jesoshi.

² Oraqueate maasanopae piquemaquenaca nontsatacaantavaequegueti icapiocapinijiacagueti tsaroverantajiacarica, imaica aviguentiquea tsatacaajiajerineca itsipapae papitsaroverarijate comajamajianquitsica agavejajianquitsineca intsatacaajiaqueriquea itsipapae.

³ Aisa pinquempetaquenaja naatimpa pantsipetacovaequemparooquee maasanopae, pisavicaventamajaqueerijate maasanopae inintaguetica Amajirote Jesoquirishito, pinquempetaquempariquea coareta isavicaventirogueti maasanopae inintaguetica imajirote.

⁴ Iriaquea coareta teequee inquenquejeroji inintaqueca iriatimpa, iroguentiquea isavicaventavaequequee taaca opaji icanquerica imajirote cameetsanijite irishinetacaaquemparinijite.

⁵ Ariquea iquempetaca neshintsicatavacagatsica iramenajitaqueriniji queri tamp-
ishimajatanquitsica, aatogueti inetsanatavaquero incantajiquerica, taampina irogu-
isotoitsijiquempari, aatoquea yojocajitiniri amatsaerontsi inintacajaivetacagnarica
iranaantaquemegueti.

⁶ Ariquea iquempetaca aisa vintyaquitaroca oitsoqui, iriquetiquea aavajatsine.

⁷ Pinquenquejacoterojate ocatica nocanquempica. Inchiqiojiquea iragavejacaaque-
mpi Amajirote pinquemamajataqueronijite maasanopae.

Inquenquejamajaquerija Jesoquirishito

⁸ Pincoquempanijate pinquenquejamajaquerija Jesoquirishito ichoviquitanaqueca
Taavini, iriotaquequea pochatanajatsica imetojavetacagueti. Irootaquequea Quen-
quetsatsarentsi Oganejencatatsica notsavetantaqueca.

⁹ Ariqueate natsipeventavaecaroquea, icavorejatsatacojiquena, iquempetacaavae-
quenaquea metojantatsica. Cotanquitsiquea oraqueate Iguenquetsatsare Aapani
Irioshi aatoquea icavorejatsatacojitiro, arimpaquea ontsitacaguitejavaetanaquempa.

¹⁰ Natsipetacovaecaroquea taaca opajitapae, iriguentiquea natsipeventavaetaca
maasano icoguijiaqueca Aapani Irioshi, noninquequea iraventaventajitanaquempari
Quirishito Jesoshi irimeshijiaquerinijite, iroaroaitanaquequea ichoocatigueti Aapani
Irioshi incoguitempani inchoocaguiteni.

¹¹ Iroomajaca ocatica icantajitica:

Imetojanaquegueti Quirishito atsipajianacari, anchoocatantajiapojajempaca iriatim-
paqui.

¹² Arigueti antsipevenquempari, anquejemajirontaquempari.

Managueti ancantajiaque: “Teetarite nontsateriji”, ariqueate inquempetaquempa iri-
atimpa incanque: “Teequea nontsateriji.”

¹³ Arigueti avashiantajianajeri, iriatimpa arimpaqueate irinetsanamajatanaqueroquea
maasanopae icantaguequeca, teetarite iragavejempaji iramataguempaji.

Antamajaqueneri Aapani Irioshi irishineventantacajica

¹⁴ Pinquenquejacaajiaquerijate papitsaroventarijiate maasanopae ocatica nocan-
taguequempica. Iramenajiaquempiquea Amajirote pintsatacaquerigueti. Pincanta-
jiaqueriquea inquemavacaajiaquempaja, aatoja queroca icotavacaajiatasi. Oraqueate
incotavacajiaquempagueti querocampate incojiaqueroni, yovashiantacaguiritsi que-
maquemaiquerica.

¹⁵ Pantamajaquenerija Aapani Irioshi irishineventantaquempica aatonijite
ochoocatitsi querocampate oguipashiventajaquempineca oncoramanitapojajegueti.
Pintsatacaantamajatanaquerojate Quenquetsatsarentsimajaca, aatojate pican-
tashitatiimatarojate.

¹⁶ Aatojate picantaguisheta, aisa aatoja picantashiguetsi intati. Iriraqueate queje-
queroa arimpaquea impeacaaguishevaetanaquemparo covaeguisherentsi.

¹⁷ Oraqueate itsatacaantajiaqueca quempejiguiroca imaica arimpaquea ontsitaca-
guitejavaetanaquemparoquea, manaquea onquempetaquemparo ompatsajanaque-
gueti ateshi. Jero yovashiantantajianajaroca itsaroventajavecarigueti Amajirote. Ar-
itarite iquempejanaqueroquea Imeneo aisa Pireto.

¹⁸ Iriatimpajia iroguenti icantashititajianacaroquea Quenquetsatsarentsimajaca,
icantajiaque: “Jac avisanaque itancoretancoretantajitaca.” Iquejijianaqueroqueti
imaica manaqueate yovashiantacaagarantajiaqueri tsaroventajavetatsica.

¹⁹ Cotanquitsiquea quempetaca tsovironaqui ivinchajacojitirogueti oquishomaja-
tigueti, oraticaquea tsovironaqui ipeacaacaca Aapani Irioshi quishovaeque,* aritarite

* **2:19** Maasano tsaroventajiacarica Jesoquirishito aquempejiacarico **tsovironaqui ipeacaacaca Aapani Irioshi**.
Jesoshi iriguenti quempecaroca quishotacaaquero. (Pamenero 1 Co. 3.9-11.) Maasano aventaventaquemparineca
aato ipega.

itioncacojiquerogueti ocanque: “Iriraqeua Amajirote itsamajati querica yashintamajatacaca.” Aisa ocanque: “Maasano aventacaroca ivajiro Amajirote, iintsijate irovashiantaguetanaqueroja maasanopae covaeguisherentsi.”

²⁰ Oraqueate tsovironaqui qui caratsantsanaquivaetanquitsica ochoocaguetaquequea ipijatantajiguetaroca taaca opajitapae. Oconoagarantacaquea ipeacaantajiguetaroca cavorejatatsica icantajitica ooro, otsipa icantajitica perata. Ochoocagarantsitaquea ipeacaantajiguetaroca inchatomenta, otsipapae ivinchajantajiguetaroca quepatsi. Oconoagarantaca ishineventamajatacaro iraapinitero, otsipapae manaquea itariantajicarocajashitequi.

²¹ Quericagoeti shetacaantaqueroneca igovaeguisherere pishoncamajatanajeroneca covaeguisherentsi, inquempetanajemparoquea ipijatantajitaca ishinevencaca ashincaroca. Irishineventsitempariquea Ashincarica iragavejaque intigaranquitsitempari irinetsanaguequeneri taaca opajitapae cameetsaripae inintaguequeca.

²² Pintomicaguenquejanetapitsapanajanteroja inintaguishetaqueca iriaqueraca quenquevarijiananquitsica. Arimpaquea pincomajamajatanaquempaja, pintsaromentamajatanaquemparija Jesoquirishito, pimpintsatantempaja, aisa pinconoajiaquemparija comajashirentajiatatsica amanajiguirica Amajirote, paavacaajiaquempa cameetsa.

²³ Aatoja piquemisantajiguiritsija quenquejamampeajiatsica cantamampeajigaroca intati taaca opajitapae, pitsaquequea maasano quempejiacarica iriatimpajia manaquea icatsimatavacaajia.

²⁴ Maasanopae antajiguinirica Amajirote aatoquea icatsimatantajitsi, manaquea impintsajianaquempari maasano, intsajiaque intsatacaantajiaque, aisa irantsipetacovaequempaquea.

²⁵ Netsanajate incantomajajiaquerija teeca irinintajigueji inquemisantamajajiaqueroquea Quenquetsatsarentsimajaca, aatoja icatsimajiguiritsi. Aricajate inchagashirentajiaqueriquea Aapani Irioshi, ariquea incantashitajiaianajempaquea irovashiantajianajero ipeacaaguishejiavecaca, inquemisantajianaje,

²⁶ iroompaquea intsajianaje inquenquejajianaqueroquea cameetsaripae aatonijite yagavejajiguiritsi ampatsini ashintajiavecarica aisa omperajiavecarica.

3

Quero incojianaquempani caquinteguetatsica oncoramanitapojajegueti

¹ Noninque pintsaque oca: oncoramanitapojajegueti pajinigueti aapojempa savinca-guiteri vegaratapajaatsineca, omanavaequempa.

² Iriraqeua caquinteguetatsica irisati quenquejacotajatsine, aisa iriguenti inquenquejacojianaquequea imentaquipae, iraventacovaequempa, irisemejiaque, incantaguishejiaqueriquea Aapani Irioshi, aatoquea iquemisantajiguiritsi iriri aisa iriniro, aatoquea iquenquejajajiritsi pintsatacojiacarica, aisa aatoquea iquemisantajajiritsi Aapani Irioshi.

³ Aatoquea ipintsatacotantajiga, aatoquea ipetsimarejajajatsi, incantaguisheta-cotantajiaque intati, aatoquea yagavejitsi itampishitashijiguirotsi covaeguisherentsi-pae, irantsipetacaantavaejiaquempa, aisa aatoquea ishineventajigarotsi maasanopae cameetsaripae.

⁴ Iriatimpajia irampigarancashitantaquempa, aisa irantashitantaguetaquempa, caaviji iraventacoquempaquea. Aatoquea inintajiguitsi irishineventajiaquempariquea Aapani Irioshi, manaqueate irinintajiaquequea taaca opaji ishineventacaca iriatimpajia.

⁵ Aisa intsaromentamampeajiaquempari Aapani Irioshi, cotanquitsiquea aato itsaroacagaritsi, iroguenti iramenajiaqueriquea tee irioshimajateji. Aatojate piconoajigaritsija quempejiaqueroca imaica.

⁶ Iconoagarantajiacaqueate yoayoaitanaquequea otsovironaquitequi manquigarentsijia teeca ontampishitashijigueroji ogovaeguishere yamatavijijiaqueroquea, ocantacoguitaniquea oshineventamajatavacari quericaca tsavetantajiaqueroca otsipapae quenquetsatsarentsi, oquemisantamajatavaqueroquea.

⁷ Iroatimpajia ocantajaveca onintajiaque ontsamajajiaquero Quenquetsatsarentsimajaca, cotanquitsiquea teequea agavejajigeeji ontsatimajigueroji, ocancani oquemisantamajatanaqueriquea amatavitantajatsica.

⁸ Iriatimpajia iticaacovetavacaro Quenquetsatsarentsimajaca, manaquea iquempejiacari Janeshini aisa Jaampereshini ticaavetavacarica Moishishini coramani. Iquenquejaguishevaequegueti taaca opajitapae covaeguisherentsipae, yovashiantajiajiro itsaromentajiavecarigueti.

⁹ Cotanquitsiquea aatoquea icojigani iquemisantajitajiritsi, maasanotari iramenajianaqueri teequea intsatimateji, manaquea inquempejiaquempari irirajia ticaavetavacarica Moishishini coramani teequea inquemisantajitajeriji.

Paavoro icantanajiri Timoteo incoquempanijate intsavetantavaequeriquea Jesoquirishito

¹⁰ Imaica, irijani, notsaque pitsamajatavaqueroquea notsatacaaguequempica, ariqueate piquejetanacaquea aviatimpa piquempemajatanaquenaquea naatimpa. Pitsaquequea teequea nompeacaguempaji covaeguisherentsi, manaqueate nosavicaventamajaqueroquea notsavetantavaequeriquea Quenquetsatsarentsimajaca, aisa notsaromentamajacariqueate Jesoquirishito. Teequea noncatsimajigueriji teeca irinintajigeeji inquemisantajigueroji Iguenquetsatsare Aapani Irioshi, manaqueate natsipetacovaeca, aisa nocavintsajajiaqueriquea maasano caquinteja, nocoguitani.

¹¹ Aisa pitsaque yatsipetacaavaequenaqueate ontaniqui Antioquiaqui, Iconioqui aisa Irishitiraqui. Caavijiquea icatsimacatsimavaequena, cotanquitsiquea ipintsatacotajanaqueate Amajirote yoguipaquijacotajana.

¹² Ariqueate inquempejiaquempaqua maasano nintajianquitsica intsaromentamajajiaquempari Quirishito Jesoshi, irantsipeventavaetanaqueriquea.

¹³ Cotanquitsiquea iriraquea peacaaguishevaecaroca taaca opajitapae coguisherentsipae, aisa irirajia amataajatsica, caaviji irogaajianaquempaqua iramatavimataviantanaque, aisa iramatavijitajitempari iriatimpa.

¹⁴ Cotanquitsiquea aviatimpa pincoquempanija pinquemisantamajataquerojate itsatacaajitaquempica, pitsaquetari iroguenti iroomajaca, aisa pitsaquequea queri tsatacaaquempiroca.

¹⁵ Chaajaniquitirajampigueti pitsatsimajacaroquea Iguenquetsatsare Aapani Irioshi. Irootaquequea tsatacaanaquempineca pintsatantamajatanaquempaca, aisa paventantamajatanaquemparica Quirishito Jesoshi poimentanaqueniji ichoocatigueti pincoguitempani pinchoocaguiteni.

¹⁶ Iriguentiquea tioncacaantaqueroquea Aapani Irioshi maasanopae Iguenquetsatsare. Irootaquequea tsatacaajiacajica, ocantomajajiacaji, otampaticatacanacaji, otsatacanacajiro quero ancojiaquempani ancomajamajajianaquempanijite.

¹⁷ Irootaquequea oquempetantacaca imaica cameetsanijite intsamajaquenijite yashintajiacaca Aapani Irioshi, iragavejajiaqueniji irinetsanaquero maasano cameetsague-tatsica.

4

Paavoro itampishitacaaqueriquea Timoteo

¹ Oncoramanitapojajeguetei incoraquetajateguetei Jesoquirishito impeapojempaquate imajirojiate maasano choocatajatsica anijajiatsica aisa metojajianquitsica, incantajiapojajeri quericaca peacaatsica cameetsari, aisa quericaca peacaatsica coguish-erentsipae. Iriatimpa yamenajiacaji imaica. Ariqueate iquempetaca Aapani Irioshi yamenajiacaji iriatimpa.

² Irootaquequea noncantantaquempica pintsavetantavaequeriquea Jesoquirishito pincantajiaqueriquea maasano quero icotani Aapani Irioshi imeshiantiguetei. Pintsavetantapiniteroja ariguetei irinintajiaque, aisa aatoguetei inintajiguetsi. Pincantomajantaquequea, pintampishitacaantaquequea. Netsanaja pintsatacaantaquequea, inchiquiojita pisemashirentaritsi.

³ Aapojaquempatarite savincaguiteri aatonicate inintajiguetsi inquemisantajiajeri tsavetantajiguiroca Quenquetsatsarentsimajaca, iriguentiquea irinintajiaquequea it-sipa tsatacaajiaquerineca taaca opajitapae inintajiaqueca iriatimpajia irishineventajianaquempaca.

⁴ Aatonica iquemisantajiajirotsi iroomajatatsica, manaquea impitsocashijianajem-paro iquenquejashijiacaca caquinteja.

⁵ Cotanquitsiquea aviatimpa arimpaquea pincomajamajatanaquempaquea, pinquenquejamajatanaquerojate cameetsaripae. Pantsipevaetanaquemparoquea maasanopae, pisavicaventavaetanaquero pintsavetantavaetanaqueroquea Quenquetsatsarentsi Oganejencatatsica. Pintampaticamajatanaqueroquea maasanopae inintacaquempica Amajirote.

⁶ Imaica noquejetacaró imirajitaca ishaguitsijitantacarica viratsi itaajiqueneriguetei Aapani Irioshi, natsipeventacaritari. Irooshipoji noantanaquempaca iriatimpaqui.

⁷ Noquejetacariquea ashimirintamajatatsica, aisa noquejetsitariquea shiamajatat-sica narejetsipojajaro ocaratapojaqueguetei, nonetsanamajaquerotari maasanopae icanquenaca Amajirote, teequea novashiantimateroji notsarovencariguetei.

⁸ Iriatimpa iriguenti Majirontamajatatsica Joesemajaca tampaticamajatiroca maasanopae, incanquequea quero incohincoitaquerini maasano caquinte. Yamenaquea notsaroventamajatacari, irootaquequea imaica yoguijacaaque-naroquea amatsaerontsi* iramatsaetantaquenaroquea oncoramanitapojajeguetei, cotanquitsiquea aatoquea aparó naatimpa yamatsaetitsi, inquejetsijiguempariquea aisa maasano oguijamajatajavajirica incoraquetajateguetei.

Icaratacaaguetanajiniri

⁹ Pinetsanatsitemparoja pincoraquepojajejate taampina pinejaatenaja,

¹⁰ iroorijite itsinampirejanaquenaquea Temashi yoanaque Tesaronicaqui, caavijiquea anaaque ishineventavaetanacaroquea quepatsipaequitica. Iriiraquea Quere-seente yoanaquequea Garashiaqui. Iriiraqueate Tito yoanaquequea Tarimashiaqui.

¹¹ Apatiroti notsipatajari Irocashi. Ariguetei pincoraquequeguetei paajaterita Maricoshi pintsipatajempari, nonintaquetarite iramitacovaetapojajena nantavaetaqueneriguetei Amajirote.

¹² Iriiraquea Tiiquico notigarancaqueri Epesoqui.

¹³ Pincoraquequeguetei pamajenaroja nogataamorenare nojoquijitanaqueca Toroashiqui itsovironaquitequi Caripo. Aisa pamajenaroja novaperitepae, irootarite nonintamajataqueca nomeshinatsitepae notioncantaguetacaca.

¹⁴ Iriiraquea Arijantero peacaaguetaroca taaca opajitapae cavorejaguetatsica icatsimatacaantaquena. Inchiquiojitaquea inquejequeri Amajirote.

* **4:8 amatsaerontsi.** Manaquea iquempetacaacaró coramani ishiashiavijitaguetei iramenajiaqueri quericaca anaantanquitsineca, iriiraquea majirontatsica iraitsitempariquea iramatsaetsitempari.

¹⁵ Shooshoh icatsimatacaantimpitsijate aviatimpa aisa, iticaaquenatari notsavetan-taquerigueti Jesoquirishito.

¹⁶ Iroaqueragueti yaajitanaquenagueti jivatatsicaqui teetarite inchoocateji aparo amitacotanaquenanea, maasanoquea itsinampirejajianaquenaquea, aparoquea no-quenquetsaventanaca naatimpa. Cotanquitsiquea teequea noninteji inquenquejacaajiaqueriquea Aapani Irioshi oncoramanitapojajegueti.

¹⁷ Cotanquitsiquea iriraquea Amajirote yamitacovaequenaquea itampishitacaanaquena, nagavejantacaca notsavetantavaequeriquea Jesoquirishito cameetsanijite inquemajiaquenijite maasano teeca irijorijoigueji. Aisa yaajitavajana yatancavequenagueti casecari.†

¹⁸ Arimpaqueate impintsatacomajatanaquena Amajirote querocaca incojivequenani, iroompa iranaquenaqueate jenoqui inquitequi imajirontacagueti. Jaameja ancoguitempani ashineventajiaquempari, ancantajiaqueri: “Caaviji poganejencamajata!” Ari oncoquempa.

¹⁹ Pincamanqueroja Pirishica nococani noquenquejajiro, aisa Aquira noquenquejaqueriquea, aisa ijitaneja Oneshiporo pincamanquerijate noquenquejajiaqueriquea.

²⁰ Iriraquea Erashito ichooaque Corintoqui. Iriraquea Toropimo nojocanaqueri Miretoqui yojoquijitaca.

²¹ Aviatimpa, irijani, pincoraquepojajeja taampina tequeratagueti oncatsincagui-teteji. Iirajia Eovoro, Porente, Irino, jero Caraoria, aisa maasano apitsarorentarijiate inintajiaquequea pinquemacojiaqueri choocajia iquenquejajiaquempiquea.

²² Noninque intsipamajaquempiquea Amajirote Jesoquirishito pishirequi, incavintsajamajiaquempiquea aviatimpajia maasano.

† **4:17** Icanquegueti *yaajitavajana yatancavequenagueti casecari* arica mana iquejetacaajiacanari intati, quejetaca incante: “ipintsatacovaetaquena teeca irojocantajitenaji irimetojajiquenanijite, quejetacashia yatancavequenagueti casecari”.

PAAVORO ITIONCAQUENERI TITO

Antsatantaquemparoca

Ocativa iroguenti antsatantaquemparoca paperi itioncacaantaqueca Paavoro itioncaquenerigueti Tito. Irocashi itioncacotaqueri irira Paavoro otsipae paperiqui (Ya. 7.57-8.1; 9.1-31; 13.1-28.31). Paavoro icantacotaqueri Tito itioncacaantajiaquerigueti Garashiaquitica aisa itioncacaantaquerogueti paperipae icantajitica 2 Corintoquitica aisa 2 Timoteo (2 Co. 2.13; 7.6, 13-14; 8.6, 16, 23; 12.18; Ga. 2.1, 3; 2 Ti. 4.10) Tequeratagueti intionqueroji Paavoro ocativa paperi itioncacaanquero otsipapae 11 paperipae choocajianquitsica paperiqui icantajitica *Tsavetacoquerica Jesoquirishito*. Pajinigueti itioncacaantaquerogueti Paavoro ocativa paperi itioncacaantaqueneri Timoteo, iroquetica itioncacaantaquenerica. Itioncacaantaquero ocativa paperi ajagantsiniqui 63, ichooaquegueti quepatsiqui icantajitica Maseronia.

¹ Naroguenti Paavoro antinirica Aapani Irioshi ashintajanaca, aisa naroguenti itigarancane Jesoquirishito. Iriatimpa itigarancaqueua nontsaromentacaajiaquempari maasano icoguijiaqueca Aapani Irioshi, cameetsanijite intsatimentajiaqueronijite Quenquetsatsarentsimajaca incomajatashitantaquemparoca.

² Aisa intsamajajiaqueroquea iroaroaitanaquequea maasano tsaromentajiacarica inchoocaguiteniquea Irioshimajacae, aatoquea imetojaji. Iriaquea Aapani Irioshi teequea intsojeimatempaji. Paesatoniqui tequeratagueti onchoocatimateji, icanque aatoja imetojitsi maasano quericaca tsaromentajiaquemparineca Quirishito, incoguitempani inchoocaguiteni iriatimpaqui.

³ Imaicaquea imaica jac aapojaca savincaguiteri intsatantajiaquemparoca maasano Iguenquetsatsare Aapani Irioshi Meshiacojiacajica. Irootaquequea itigarancuimenquenaquea nontsavetacotaqueriqueate Jesoquirishito, noncamanqueriquea maasano.

⁴ Notioncaquempiquea aviatimpa Tito napitsaromentarite, naroguentiquea tsaromentacaquempica nopeantajimpica nirijanitemajaca. Namanacovenquempiquea incavintsajamajaquempinijite Aapani Irioshi aisa Jesoquirishito Meshiacojiacajica, noninquequea inchoocatacaquempi cameetsa aatonijite taaca opaji pishoshoguiteventa.

Yantavaequequeate Tito Queretaniqui

⁵ Oraqueate nojocanaquempigueti oraniqui Queretaniqui nocanquempiquea pinteroncaguetajerojate maasanopae tequerataca anteronqueji. Aisa nocanquempiquea querocagueti oraniqui guinteninintsipaequi icapioicapinijiacagueti apitsaromentarijiate, paajiaquenerijate quempoguijajiaquerineca, pinquempetacamajaquemparoja nocanquempica.

⁶ Iriaquea quempoguijajiguirica tsaromentajiatitica incoguitempanija incomajamajaquempaquea iramenajitaquerinijite inchoocamajaque cameetsa. Irampanironquemparoja imanquigacaca. Iriaquea irijanijiate intsaromentamajajiaquemparija Quirishito incomajamajaquempaquea, aisa intsajiaqueriquea iriri aatoja ipigapi-gaataritsi.

⁷ Iriaquea quempoguijajiguirica tsaromentajiatitica iriguentiquea savicaventiroca maasanopae inintaguetica Aapani Irioshi, irootaquequea nocantantacaca incoguitempanija incomajamajaquempaja aatoniji ochoocatitsi incantimentajiaquerrimeca. Aatoquea yaventacotatsi, aatoquea itijerequitatsi, aatoja ishinquiguitani, aisa aatoquea yaashitantatsi. Aatoquea yamatavijiguiritsi itsipapae iraaquenerijite imentaquipae.

⁸ Cameetsa iraajiavaqueriquea iroguisavisaviitavaqueriquea coraquecoraquejianquitsica itsovironaquitequi. Irishineventamajaquemparoquea cameetsaripae, intampishitashiguetaqueroquea maasanopae covaequisherentsipae, incomajamajaquempa, irinetsanamajataqueneri Aapani Irioshi, aisa iramenanontamajaquempaja cameetsa incomajamajaquempanijite.

⁹ Iriraquea quempoguijajiguirica tsaromentajatsica aatoja icantashitatarotsijate Iguenquetsatsare Aapani Irioshi, manaqueate inquenquejamajaqueroquea cameetsanijite iragavejaquenijite intsatacaajiaqueriquea itsipapae, aisa iragavejaquenijite irimajeretacaajiaquerinijite maasano cantashitaticaroca Quenquetsatsarentsimajaca.

¹⁰ Choocatarite icaramirincavaequetarite pigapigaatantatsica, manaqueate icantashijiacaro intati yamatavijantigueti. Iriojatarite quempetanquitsica imaica cantajianquitsica maasano tsaromentajatsica iroguijatacojianajero intsataantica joriojia icantajiaque intotsaiquimashitacaantajiaquempa maasanojia.

¹¹ Irirajia quempejiaqueroica imaica iintsija iramimicacaajitempari, manaqueate yovashiantacaagarantajiaqueri tsaromentajavetatsica, iquejetacaajitsitaroquea imanquigarejia aisa irijanijiate. Itsatacaantamampeajianaqueroquea intati, teetarite oncameetsateji, manaquea inintajiaque irantajiaquemparo imentaquipae.

¹² Coramani ichooaque tsavetantatsica Queretaquiticani. Iriatimpa iquenquetsatocojiaqueri igonorojia icanque: “Ari icojiaca Queretaquitica iriguenti tsojeajatsica, teequea impintsatacotantajiguempaji quempejiaquea chaonarijite. Iriguentijiaquea shecajtanti perantijia.”

¹³ Icantamajataqueshiatsi. Irootaquequea nocantantaquempica pincantomajamajaterija irirajia quempejianquitsica imaica cameetsanijite intsaromentamajatanaquemparinijite Quirishito,

¹⁴ aatonijite iquemisantajajiritsi joriojia tsavetamampeajigaroca iquenquejashijitacaca intati. Aisa pincanquerijate aatojate iquemisantajiguiritsijate intsatacaantajiaqueca itsipa pitsocapitsatanacaroca Quenquetsatsarentsimajaca.

¹⁵ Iriraquea comajari icocaniquea iquenquejacomajaquero maasanopae, manaquea icomajatacocaroc, cotanquitsiquea iriraquea teeca incomajatempaji teeca iraavajeroji iroomajataatsica icancaniquea teequea incomajatacotemparoji maasanopae. Manaquea ocovaequishetanaca iguenquejane, aisa chagashirentavequemparimeca aatonijii icovaeta manaquea ocovaequishetanaca.

¹⁶ Iriatimpajia icantajiaveca itsatiri Aapani Irioshi, cotanquitsiquea ipeacaaguishejiacaca onigaantajianaqueri teemajaca intsateriji. Iriguenti coguisherimajaca, tee inquemisantanteji, teequea intsatimajigueji irinetsanajiaqueroquea cameetsaripae.

2

Quero ancojiaquempani anchoocajiaquegueti cameetsa

¹ Aviatimpaquea pintsatacaantaquegueti pintampaticamajatanaquerojate Quenquetsatsarentsimajaca.

² Irirajiaquea quenquevarimajajiananquitsica aatoja ishinquitatsi, intampishitashijiaqueroquea maasanopae covaequisherentsipae, irishineventajiaquemparo cameetsaripae, intsaromentamajajiaquempari Jesoquirishito, impintsatantajiaquempa, incoguitempani.

³ Ariquate onquempejiaquempaquea quenquevaromajajiananquitsica pincantajiaqueroquea oncomajamajajiaquempajate, aisa aatoja ocantashiguetsatsi intati, aisa aatoquea oshinquitatsi. Iroguentiquea ontsatacaantajiaque cameetsaripae.

⁴ Onquejetaqueroqueti agavejajiaque ontsatacaajiaquero apimanquigarojiate tequerataca onquenquevaromajateji ompintsamajataquemparija manquigataroca aisa irijanijiate.

⁵ Aisa ontsatacaajiaqueroquea onquenquejamajaqueronijite cameetsaripae, oncomajamajaquempaquea, onetsanajiaquero otsovironaquite, oncavintsajantajiaque, aisa onquemisantajiaquero manquigataroca. Noncantantajiaquempica imaica aatonijite icantaguishetacojitirotsi Iguenquetsatsare Aapani Irioshi.

⁶ Ariqueate pinquempejiaqueriquea tequerataca inquenquevarimajajigueji pincantajiaqueriquea intampishitashijiaqueroquea maasanopae covaeguisherentsipae.

⁷ Maasanoquea pantaqueca pincomajatimenquemparo cameetsaniji inquejijianaquempiniji. Pintsatacaajiaquerigueti pintampaticamajatero, pinetsanama-jateroja.

⁸ Pinquenquetsatsitemparo cameetsaguetatsica aatoniji ochoocati incantacoguisheti-mentajitempimeca, manaquea impashiventanaquempa ticaavequempimeca iramenajiaquegueti tee onchoocatimateji.

⁹ Pincantajiaquero yashintajitacaca irinetsanajiaqueroja maasano incantajiaquerica ashincarica cameetsanijite iroguishinejajiaqueriniji, aatoja ipigatsajencataritsi.

¹⁰ Aisa aatojate yaitsitiritsi, manaqueate intsamajaquero ashincarica aato yamatavirititsi, cameetsanijite iramenajiaquenijite maasano oganejencavaeca Quenquetsatsar-entsimajaca tsavetantaquerica Aapani Irioshi Meshiajiacajica.

¹¹ Yonigaanquerotari imaica Aapani Irioshi icavintsajajiaquerigueti maasano caquinteguetatsica inintantacaca irimeshiajiaqueriquea.

¹² Irootaquequea atsatantajiacaca cameetsanijite avashiantantajianacaroca apeacaaguishejiavecaca taaca opajitapae covaeguisherentsipae aatonijite aquempejigaritsi teeca intsaromentajiguempariji iquenquejaguishejiaqueroquea taaca opajitapae, manaquea antsajiaque antampishitashijiaquero maasanopae covaeguisherentsipae, anchoocajiaque cameetsa, ancoguitempanija antsaromentamajaguitemparini Aapani Irioshi achoocajiaquegueti quepatsiqui.

¹³ Aatimpajia arimpaquea ancomajamajatanaquempaquea aguijaguijaitavajerogueti onetsanamajaquempagueti oguishinejavaetacajica: iroguentiquea savincaguiteri ironigaantantajempaca Arioshite agavejamajatatsica Aavajajica, iriotaque Jesoquirishito, ariquea iroganejencavaetapojajempa.

¹⁴ Aatimpajia apeacaaguishevaevecaroquea taaca opajitapae covaeguisherentsipae, cotanquitsiquea ocoramantapojaji imetojaventajiacaji ishetacojiajaji yoguipaquiia-cojiajaji yashintavecajigueti ampatsini, aisa ishetacomajatajaji cameetsanijite irionijite ashintamajajiajajinijite anintamajajiaquenijite anetsanajianaquero maasanopae cameetsaripae.

¹⁵ Irootaquequea pintsatacaanteja. Pintampishitacaanque, aisa pincantomajanteja, iriotarite nintacaquempica Aapani Irioshi. Aato ocameetsatitsi intsojencajiguempi.

3

Quero incoquempani tsaromentajiatatsica

¹ Noninque pinquenquejacaajiajeri maasano tsaromentajiatatsica inquemisantajiaqueriquea majirontajiatatsica aisa jivajiguirica, aatojate ipigapigaataritsijate, manaqueate irinintanintaitanaque irantajianaquero cameetsaguetatsica.

² Aatoquea icantaguishetacotiritsi itsipa, aatoquea icatsimatantajiguitsi, manaquea impeaquempa matinari, aato yanaaguenquejanetanti, manaquea impintsajiaquempariquea maasano caquinteja.

³ Coramanitari aatimpajia aritarite aquejetaca, teequea antsateji anquenquejamajajigueji, teequeate anquemisantanteji. Atimpinashirentaveca, manaquea omperavecaji taaca opajitapae covaeguisherentsipae ashineventajiavecaca. Acatsimajencajiaqueriquea agonorolja, acatsimatacotsitantagueque. Aatimpa isemaneguintajitacaji, ariqueate acohaoitanaca asemaneguintavacaajianaca.

⁴⁻⁵ Cotanquitsiquea ocoramanitapojaquegueti arejetapojacaguetei savincaguiteri ipintsatacotantajiacarica Aapani Irioshi maasano caquinteguetatsica, iquejetacaajiacaji aatimpajia imeshiajiacaji, iriguentitari Meshiantatsica. Teequea irooqueea irimeshiantajiajaji iramenajiacaji acomajamajajia, manaqueate ipintsatacojiacaji intati, irootaquequeea imeshiantajiacajica. Oraqueate ishetacojiacajiguetei agovaeguisheredia manaqueate oncanque jac acantashitatiejianaja quempetaja iroaquerasano voajiajatsi, iriguentiquea cantashitatiejianaja Ishire choocashirentajiacajica.

⁶ Aventaventaicaritarite Jesoquirishito Meshiajiacajica, jero itigarancantarica Aapani Irioshi Ishire inchoocashirentajiaipojacaji iragavejacaamajajiacajiqueate.

⁷ Ariqueate iquempejiacaji imaica Aapani Irioshi ipintsajiacajiguetei iramenajiacajinijite quempeca teeca ancovaeguisheretimatempaji. Imaicaqueate imaica iroguentiquea aguijamajaquequeea antsipatsipaitaquempari jenoqui inquitequi ancoguitempani anchoocaguiteni.

⁸ Maasanopae ocativa nocanquempica iroguenti iroomajaca, nonintantacaca pintsatacantamajateroja cameetsanijite maasano aventaventaicarica Aapani Irioshi irisavicaventamajianaqueroqueea irinetsanajianaquero maasanopae cameetsaguetatsica. Caaviji anaaque ocameetsavaeque, aisa irootaquequeea amitacojiguirica maasano.

⁹ Imaica noncanquempi aatojate pitsipajiaritsija itsipapae pinquenquetsatavacaajiaquempaquea intati pinquenquetsatacojiaqueroqueea taaca opaji teeca irooqueea iroomajatatsica, aisa aatoqueea piquejetaritsi savicaventajiaquerooca iquenquejajiaquero ipajiguetaqueti choviquijianaquerica, aatoja pipigatsajencatavacaga, aisa aato piquejetaritsija catsimatimentantajiguiroca itioncacotanaqueca Moishishini. ¿Arimpate amiquempite? ¿Taa opaji ocameetsatantacaca? Teenica onchoocateji.

¹⁰ Inchooqueguetei gametsajantanquitsineca, paitempariquea pincantomajitsitempari. Aatoguetei iquemisantimpitsi pinquejetacaitempariquea aisa. Iroompa inquejetsitajemparoguetei aisa aatoguetei iquemisantimpitsi pincantimentsitempari aatoja iquijajitsi picapioapinijiguetei.

¹¹ Itsajitaquetari quejejiacarica irica mana yaacoguisheretanaca, aacoguisheni ican-tanaca, irioqueea quempetacaantanquitsineca.

Iteroncacaanajiri

¹² Ariqueate nontigarancaqueriguetei Aretemashi aisa Tiiquico aviatimpaqui oraniqui pintampinaquequeea poanaquequeea Nicoporishiqui. Ariqueate noanaquequeea ontaniqui nonchoocavaequitequeate arejevaetajempa osaaajencatanajeguetei catsincaguiteri.

¹³ Iriraqueea Senashi, guisotoguiroca itioncacoguequeea majirontaguetatsica, aisa Aporoshi pinetsanamajajiaquaquerijate pojocajiaquaquenerija taaca opaji incoguitejacojiaquempaca aatonijite iteroncacojianacatsi quenavoquirontsiqui.

¹⁴ Pincantajiguerijate apitsarorentarijiate guintenijianquitsica oraniqui irantapinitaque cameetsaguetatsica cameetsanijite inchoocatacotimenquenijii iramitacotantajiaquemparica coguitejacomajatanquitsica, aatonijite manaqueate irisavisaviitashitaquempaquea intati aatoqueea taaca opaji yantitsi.

¹⁵ Maasano tsipatsipaitaquenaca ocaniqui inintajiaque pinquemacojiaqueriquea chooca iquenquejajiajimpi. Pincamanquerijate maasano apitsarorentarijiate pintsajiaquena choocajiana ocaniqui noquenquejajiajiri. Imaica noninque incavintsajama-jajiaquempi Aapani Irioshi aviatimpajia maasano.

PAAVORO ITIONCAQUENERI PIREMONI

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaquenerigueti Piremoni. Irocashi itioncacotaqueri irira Paavoro otsipae paperiqui (Ya. 7.57–8.1; 9.1–31; 13.1–28.31). Tequeratagueti intioncacaanteroji ocatica paperi, itioncacaantaquero otsipa mavite paperi itigarancajiaquenerica quemisantajiatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatsica choocajianquitsica Iromaqui. Chooca quenquejajianquitsica tequeratagueti intioncacaantaqueneri Piremoni, itioncacaantajiaqueneri choocajianquitsica Piripoqui. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparato itioncacaantajiaqueneri quemisantajiatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Iraquea Oneshimo, irajaanire Piremoni, ishiapitsatanacari ashincarica, irosati yarejevaetaca Iromaqui. Ontaniqui iquemaqueri Paavoro itsavetantaquerigueti Jesoquirishito, ariquea iquemisantaque. Aritari ocantaque icantacaantaqueca majirontatsica Iromaqui iraavajerigueti aajanirentsi shiavetananquitsica, iroguipiajeneri ashincarica. Irootaquequea imaica itigarancantajarica Paavoro Oneshimo, cotanquitsi itioncacaantaqueneri Piremoni icantiri incavintsajavajeri Oneshimo, icantiri: “Paavajeri quempetaca naroguentica paavaqueca.”

¹ Naroguenti Paavoro, choocana ocaniqui nosantanatacotaca, iroguenti isantanat-acotimentajiquena notsavetantaguitirini Jesoquirishito. Notsipatavajari apitsaroven-tarite Timoteo notioncaquempigueti aviatimpa Piremoni nopintsajiacaca. Aquejetava-caaca antaventiniri Jesoquirishito.

² Noquenquejajiroquea aisa apitsarovenarote Aapia, jeri aisa Arequipo noquejeta-caacaca apicoaretate, atsipevencaritari Jesoquirishito. Noquenquejajiaqueriquea aisa maasano tsarovenajatsica capiocapinijatsica pitsovironaquitequi.

³ Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

Caavijisano ipintsatantamajataca Piremoni

⁴ Nocantacoguitani namanaguitirinigueti Aapani Irioshi nocanqueriquea: “Ario-teesaa”,

⁵ noquemacoquempitari caaviji pipintsajiacari maasano tsarovenajiacarica, aisa pitsarovenamajatacariquea Amajirote Jesoshi.

⁶ Aritarite aquejeshirentavacaaca atsarovenacarigueti, nocantacoguitani namana-coventaquempiquea nocanqueri Aapani Irioshi noninque pintsamajatanaquequea quero icojiacajini Quirishito Jesoshi icavintsajajiacajigueti maasano aatimpajia tsarovenajigarica.

⁷ Oshinetacaamajaqueate, napitsarovenarite, namenaquegueti pipintsaji-acari igomajamajarejia Aapani Irioshi, pitampishitacaajianajiri, ariquea otamp-ishishirentacaajana.

Paavoro icanqueriquea Piremoni cameetsa iraavajeri Oneshimo

⁸ Naatimpa naroguenti itigaranquica Quirishito jero nagavejatantacaca noncanquempime pinetsanamajaqueroja noncanquempica.

⁹ Cotanquitsiquea aviropate aviatimpa, caavijitarite pipintsatantaca. Ariqueate noquempetaca naatimpa nopintsataquempiquea. Naatimpa naroguenti Paavoro jacquenquevatanajana. Imaica choocatatsitirajana isantanatacotimentajiquenaroquea notsavetantaquerigueti Jesoquirishito.

¹⁰ Irootaquequea nonintantacaca nontioncaquempi noncantacoventaqueriniji irira Oneshimo* nopeaqueca irijani, notsaromentacaacaritari ocaniqui nosantanatocogueti.

¹¹ Coramani pashintavecarigueti tee incameetsatimotempiji, cotanquitsiquea imaica peanajaquea amitacotantatsica, iramitacotapojempiji, quempetaca naatimpa yamitacovaequena.

¹² Imaica nontigarancajempiri, paavajerija pinquejetacaavajempari paavaquenagueti naatimpa, iriguentitari nopintsamajatacaca.

¹³ Nonintavecaquea inchoocaquemequeate ocaniqui iramitacoquenamequea choocatirajanagueti santanaqui, isantanatacotimentajiquenaro notsavetantavaequerogueti Quenquetsatsarentsi Oganejencatatsica. Arimequea inchoocaqueme ocaniqui quempetaca aviguenticaca amitacoquena.

¹⁴ Cotanquitsiquea teequea noninteji naavajeri tequeratagueti pincanteji, teetarite nonintencia noncanquempi inchoocateta ocaniqui. Manaqueate noninque inchiqiuojitari pincanquenaqueate aviatimpa pininquegueti.

¹⁵ Ishiapitsatanaquempigueti aricaqueate itsinampirejavetaquitimpi cameetsanijite paavajerigueti pincoquempaniquea pintsipatajempari.

¹⁶ Imaica aatoja aparo pashintajaritsi, imaicaquea iriotaque papitsaroventarite pivintsare. Naatimpa nopintsamajatacari, imaicaquea panaavaeque pimpintsamajataquempari aviatimpa, iriotarite apicaquinteteni, cotanquitsi caaviji anaaque imaica iquejetsaroventajimpitari.

¹⁷ Iroosacana imaica pamenamajataquenagueti naroguenti papitsaroventarite paavajerijate quempetaca naroguentica paavaqueca.

¹⁸ Querocagueti icoquempini, irooca yaacotaquempi, naatimpaquea pincoacotaje.

¹⁹ Naatimpa naroguenti Paavoro tioncaquerooca oca nacoqui imaica, noncanquempi: naro vegaratajerone. Cotanquitsiquea nagavejaqueme nonquenquejacaajemprome: aatomegueti notsatacaguimpime pimpomatsaquempame.

²⁰ Nonintavecaquea, napitsaroventarite, pincavintsajacotename, apatsinorotari inaque Amajirote. Poguishinejavaequenaquea, agujatacoqueritari Quirishito.

²¹ Notsaquequea pinetsanatero nocanquempica, irootaquetari notioncantaquempiroca ocatita, aisa notsaque panaavaetanaquero.

²² Imaica nonintaveca pinetsanatenaro oraniqui nomaantapojempaca noncoraquequitegueti, namenaquequeate aricaca iroguipaquijajitajena, iquemajiaquempiqueate Aapani Irioshi pamanacoventajiaquenagueti.

Paavoro iteroncanajiro icanquerica

²³ Chooca ocaniqui Epaperashi, itsipatacaantajiquenariquea isantanatacotimentajiquenarogueti notsavetantavaequerigueti Quirishito Jesoshi. Iriatimpa ininque pinquemacotajeri chooca iquenquejacoquempi.

²⁴ Ariqueate iquempejiaca aisa Maricoshi, Arishitarico, Temashi aisa Irocashi, inintajiaque pinquemacojiaqueri iquenquejajiaquempiquea, iriatimpajia iriguentijia notsipatashijiacaca nantaquenerigueti Jesoquirishito.

* **1:10 Oneshimo** oncanque **amitacotantatsica** (pamenero otsapa 11).

²⁵ Noninquequea incavintsajashirentajiaquempi Amajirote Jesoquirishito pishire-
qui.

ITIONCAJITAQUENERICA EVEREOJIA

Antsatantaquemparoca

Ocatia iroguenti antsatantaquemparoca paperi itioncajitaquenerica evereojia quemisantajiaquerica Jesoshi, ipajijitajiri aisa joriojia. Teequea intsajiteji queri tioncaquero ocatia paperi. Cotanquitsi jero atsaguetaqueca: iricatica tioncaquero tee irinejeriji Jesoshi, iriguenti iquemaque itigarancanejia itsavetacojiaquerigueti (2.3). Tee intsipajiguempariji itioncajiaqueneca (13.7). Inintaque impianaje ichoocajiaquegueti itioncajiaqueneca (13.19). Inintaque intsipatanaquempari Timoteo iroanaquegueti (13.23). Itsipajiacari quemisantajiaquenerica choocajianquitsica quepatsiqui icantajitica Itaria (13.24). Chooqa quenquejajianquitsica irioca Aporoshi tioncaquero ocatia paperi (Ya. 18.24-28). Itsipajia iquenquejajiaque irioca tioncaquero Irocashi, yamenaquero oquejeguevetacaró otsipapae mavite paperi itioncaqueca iriatimpa (aparo opajita *Irocashi*, otsipa opajita *Yantajiguica Itigarancanejia Jesoshi*). Itsipajia iquenquejajiaque irioca tioncaquero Verenave (Ya. 11.22-26; Ga. 2.1-21). Tee intsajiteji quero itigarancaqueroni iroaquerugeti, aisa tee intsajiteji quero ichoocaqueni tioncaquero itioncaquerugeti. Chooqa cantanquitsica arica itioncaquerugeti ichoocaque irooca Jerosarequi, Antioquiaqui, Iromaqui, irooca Arejantiriaqui. Iquenquejajitaque itioncaquero ocatia paperi tequeratagueti irisoveajigueroji coaretajia teemporo choocatanquitsica Jerosarequi, iroguentiquea isoveantajitacaroca ajagantsini 70. Iquenquejajitaque arica itioncaquero ajagantsiniqui 66.

Ira tioncaquero ocatia paperi itioncajiaqueneri joriojia quemisantajiaquerica Jesoshi aatoniji yovashiantajiguero iquemisantajiaquerigueti. Iquenquejajiavetacatari incantashitajiaquemparo quero icojiaqueroni itsarotentajiacarigueti Aapani Irioshi, impiashijianajemparo intsarotentajiajempari inquejetacaajiajemparo coramani itsarotentajiacarigueti tequeratagueti inquemisantajigueriji Jesoshi. Itioncajiaqueneri icantajiaqueri teequea inquenquejamajigueroji iquenquejajiavetacaca. Inquenquejajiaqueme imaicaquea ipochatanajigueti Jesoshi imetojaventajiacaji ishetajajiro aguempavaerejia maasano aventajiacarica Jesoshi, yamentantajiacajica quempejica tee ancovaeguishetimatempaji. Avisanaquequea coramanitica: oratica teemporo, saserorotejia, aisa ijitorejajiaquenerigueti ivirapae aretarequi. Imaicaquea Aapani Irioshi ipeacaacari Jesoshi Asaserorotete Anaantamajatatsica, apaniroquea iriraja Jesoshi agavejaque ovegaratacajiro aguempavaerejia, apaniro choocatajatsi imaica teemporamajaca inquitequitica. Ira tioncaquero itsatacaajiacaji iroaqueri paaquito inetsanataqueca Jesoshi anaquero iroquetinica paaquito yojocaquenerica Aapani Irioshi Moishishini.

Aapani Irioshi itigarancaqueri Irijanite intsatacaajiacaji

¹ Paesatoniqui Aapani Irioshi iriguenti iquenquetsatacaaque tsavetantajiaquenerica ajagantsinipaequi, icamantaguetaqueriqueate cantashitataropae aisa ocantashitatiequeca quero icoqueroni, iroompaqueate irioquea ogaajiaqueneri avaesatiniteni.

² Cotanquitsiquea imaica itigarancanquitsitariquea Irijanite intsatacaajiacajiqueate quero icotani. Iriotaquequea inintacaqueca irashintajemparo maasano, iriotaque aisa ipeacaantacaroca maasano choocaguetsica.

³ Iriotaque nigaantaqueroca iroganejencare Aapani Irioshi, iquempemajatacaritari Iriri atsatantacaca quero icotani iriatimpa. Oraquea icanqueca agavejamajatiquea, irootaquequea ichoocatacaantaquero maasano choocaguetatsica ochoocatan-tanacaca. Ishemajaqueroquea agovaeguisherjia, iroompa iteroncaquerogueti yatso-majanajaquea jenoqui inquitequi isavicapojaji isenampijapojajari Oganejencamajata-sica itincamijempequiqui.

⁴ Caaviji yanaavaepojajiri irashivantijitete Aapani Irioshi, iriguentitari Irijanimajate yanaantajiacarica ashivantijite.

Quirishito caaviji yanaaqueriquea irashivantijitete Aapani Irioshi

⁵ ¿Choocacampate ashivanti icantaqueca Aapani Irioshi:

“Aviatimpa aviguenti Irijani,

imaica ocatica savincaguiteri aviro nashimajaca nirijanite”?✧

Teequea inchoocateji. Aisa teequea incantacoteriji irashivantijitete incanteji:

“Impeaquenaqueate Iriri,

naatimpaquea nompeaqueriquea irijani.”✧

⁶ Cotanquitsiquea oraqueate itigarancaquerigueti Irijanite iriquetica choocatanquitsi incoraqueataquequea ocaniqui quepatsiqui, icanti:

“Maasano nashivantijitete intsaromentajiaquemparija.”

⁷ Cotanquitsiquea oraqueate icantacojiquerigueti irashivantijitete, iroguenti icanta-jique:

“Aritari icotacagari irashivantijitete inquempelijanaquempariquea choviga.

Aisa irirajia irashivantijitete iriotaquequea itigarancanejia, inquempelijanaquemparo-quea osamimicatsantsajencatigueti paamari.”✧

⁸ Cotanquitsi iriraqueate Aapani Irioshi icantacoquerigueti Irijanite icantiri:

“Irioshi, pincoguitempani pimajirontaguitempani pimajirontamentoqui pisavicanta-caca, aatojate pisanticoguitejacotimatitsi.

Pajiriquitemparoquea pimajirontaquijire pintampaticamajatantemparoca pimajirontagueti.

⁹ Caaviji pishineventamajataroquea cameetsaripae, irooqueate pisemaca covaeguisher-erentsipae.

Irootaquequea nocoguiantaquempica naatimpa Pirioshite Irioshimajaca, noshaco-jatantaquempiro orejiqui pishinquireguishiqui,

irootaquequea nonigaantacaca arimaja noshinetacaquempiquea,

nanaacaajiaquempiri maasanopae pitsipatsipaitacaca.”✧

¹⁰ Aisa icanti:

“Majirontatsica, aviguenti peacaacaro iroaqueragueti quepatsi,

aisa aviguenti peacaacaro inquite.

¹¹ Oncoramanitapojajegueti ompeaguetanajempauea maasanopae pipeacaagueta-caca,

cotanquitsiquea aviatimpa picocani pichoocati.

Maasanopae ompaesatoguetanaquequea onquempeguetanaquemparoquea opaesato-tigueti quitsaarentsi.

¹² Pampiguiricajeroquea pinguempetacaajemparoquea yampiguiricajitirogueti quit-saarentsi,

aisa pinquejetacaajemparoquea otsipa iroaquerari,

pinguempetacaajemparoquea quitsaarentsi isapocajitarogueti otsipaqueate inquitsaa-jitajempa.

Cotanquitsiquea aviatimpa aatoquea picantashitatiatsi,

aisa aatoquea pisanticoguitejacotajatsi.”✧

¹³ ¿Choocampate irashivantijitete icanqueca Aapani Irioshi:
 “Pisaviquetaja pisenampijaquenaja notincamijempequiqui,
 pintsipataquenaquea arejevaetanaquempa nagavejajiaquerigueti maasano
 catsimacatsimajiguimpica, onquejevequemparo povanquegontatsitempari”?[✧]

¹⁴ Maasanoquea irashivantijitete iroguentiquea ichoocatashijiaque iramitacotantajiaque. Iriatimpajia manaqueate ivejencajiaca. Icocaniqueate itigarancajiaqueriquea iramitacojiaqueriquea maasano irajaitavajeca.

2

Ancoguitempaniquea antsaromentajiaquempari

¹ Irootaquequea noncantantajiaquempica imaica jaameja ancoguitempaniquea anquenquejamajaquerojate aquemajiaqueca, aatonijite avashiantanajirotsi.

² Paesatoniqui Aapani Irioshi itigarancajiaqueri irashivantijitete incamantanque icanquerica iriatimpa intampaticamajiaqueronijite. Irirajia teeca irinetsanama-jateroji maasano, inchiquiojitaquea iquempetacaantacaquea iriatimpajia, icatsimatimentantajitacarica, itampaticamajatirotari Aapani Irioshi.

³ Quempetaca icatsimajiaquerigueti irirajia teeca irinetsanajigueroji icantajiavecarica irashivantijitete, imaicampani aatimpajiaqueate aatogueti aquemisantiritsi icavintsajamajacajigueti Meshiantatsica ¿arimpate agavejaque ashiapitsatanaquempari aatoniji icatsimatimentajiro agovaeguishereja? Aato agaveji. Iriquetitaqueate tsavetantaqueroca Amajirote queroca ancojiaquempani irimeshiantantajiacajica, iroompa iriraquea quemisantajiaquerica itsatacaajiacaji aatimpajia.

⁴ Iroompa iriraquea Aapani Irioshi irioquea agavejacaajiaqueriquea tsaromentajiacarica Jesoquirishito yonigaantajiaqueroquea oacaantantatsica intati cameetsanijite intsajitaqueroniji tampatica yoaqueroquea itsavetantajiaquerogeti. Aisa apaniopae ocantashitatiaguetaca yojocajiacajica iragavejane yagavejacaajiacajigueti Ishire Aapani Irioshi, iriotaquequea nintanquitsi Aapani Irioshi iquempetantaguecaroca imaica.

Jesoquirishito ipeacaajiacaji iriguentijeguijiate

⁵ Iriraquea Aapani Irioshi teequea irioquea incanteji irashivantijitete irashintajiaquemparoquea iroaquerari quepatsi choocatajatsineca nocantacoqueca imaica.

⁶ Itioncacojiaquerotarite icantamajajitaque:

“¿Arimpate yanaantaque caquinte piquenquejacotantajiacarica?
 Caquintetari inaque, ¿queroca ocotacani pisavicaventajiaqueriquea?”

⁷ Panaacaavetaquitariquea capichaji pashivantijitete,
 cotanquitsiquea pishineventajiacariquea caquinte panaacaavaequeriquea.

⁸ Pinintacaajiaqueri maasanopae pipeacaaguecaca inquemisantajiaqueri.”[✧]

Ariqueate iquempetaqueroquea imaica Aapani Irioshi yanaacaamajatsitariquea maasanopae, teequeate iranoncorejanajeji aparo aatoca yanajaiguitsi, cotanquitsiquea imaica tequerataquea amenajigueji yagavejajiaqueroquea maasanopae.

⁹ Cotanquitsiquea Aapani Irioshi caaviji ipintsamajajiacaji maasano, itigarancantacarica Jesoshi ocaniqui quepatsiqui. Oraqueate icoraquequitigueti teetarite iranaapoja-geriji irashivantijitete Aapani Irioshi, cameetsanijite irantsipeventajiacajinijite iroompaquea imetojaventajiaquitaji. Ariqueate ishineventamajatacari Aapani Irioshi itsipatanajari iriatimpaqui imajirontacaamajatajari yanaajiapojajiri irashivantijitete.

[✧] 1:13 Sar. 110.1. [✧] 2:8 Sar. 8.4-6.

¹⁰ Maasanopae choocaguetatsica iriguenti peacaaguetacarouea Aapani Irioshi, iriguenti nintanquitsi ochoocatantajiacaca, aisa iriatimpa ininque iroaroaitanaque-quea maasano irijanijiate inchoocatimojiaqueri inquempempevetapojajempariquea yoganejencamajatagueti. Irootaquequeate ocameetsamajatantacaca itigarancakeriquea Jesoshi yatsipetacaajivaecariquea cameetsanijite interoncamajaquero maasano irinetsanaqueca iragavejaquenijite irimeshiajiaqueriniji maasano tsaroven-tajiaquemparineca.

¹¹ Ishemajatajiroquea agovaeguisherejia icameetsashirentacaajaji, jero acantantajia-ajarica Iriri: “Aapani.” Iriatimpa Jesoshi teetarite impashiventacaajiajaji icantajiacaji: “Aviguentijia iguentijeguijia.”

¹² Irootaquequea iquenquetsatacantacarica Iriri icanti: “Nontsavetantimojiaqueriqueate iguentijeguijia nontsavetacotantaquempiquea. Oraqueate incapiocajiaquempagueti nontsipajiaquemparigueti namashaiventajiaque-mpiquea noshineventajiaquempi.”✧

¹³ Aisa icanti:

“Naatimpa aparoqueate naventanaquempari iriatimpa.”✧

Ariqueate icanti aisa:

“Choocana ocaniqui, nontsipatsipaitacari irijanijiate Aapani Irioshi iquempoguija-ccaquenaca.”✧

¹⁴ Maasano irijanijiate ijamirincajiaque, choocaquea itsinojia, iriraja. Irootaquequea iquempetantacaca Jesoshi ivoaquequea iquempejiapojacajiquea aatimpajia caquin-tejia cameetsanijite irimetojaquenijite iroonijite iragavejantaquemparica ampatsini agavejaguevetatsica irimetojacaante.

¹⁵ Paesatoniqui atsaroacaamajacaroquea ametojane, querocampate ancojiaquem-pani, cotanquitsiquea imaica icoraquequitiquea iriatimpa imeshiajiacaji, jero imaica teequea antsaroacaajemparoji.

¹⁶ Atsajiaquequeate teequea iriojiaqueate incoraquetashijigueji irashivantijitete Aa-pani Irioshi impintsatacojiaquempariquea, aroguentijiaquea icoraquetashijiaquiti, aatimpajiaquea ichoviquijianaqueca Averaameni.

¹⁷ Irootaquequea iquempemajatantapojacajica aatimpajia iriguentijeguijiate cameetsanijite iragavejaquenijite impeaquempa Saserorote Anaantamajatatsica pintsatacotacajica, aisa netsanamajataqueroneca maasano inintaguetica Aapani Irioshi. Aisa iquempemajajiacaji cameetsanijite irimetojaventajiacajiniji impeacotajemparoquea Aapani Irioshi agovaeguisherejia.

¹⁸ Yatsipevaetacaquea iriatimpa, yamentajivecariquea irovashiantacaajiquerime aatonijite iquemisantajiritsi Aapani Irioshi, irootaquequea yagavejantacaca iramitaco-jiacaji intampishitacaajiacaji aatonijite icovaeguishedacaajitajaji.

3

Jesoshi caaviji yanaavaequeriquea Moishishini

¹ Imaicaquea imaica, napitsarorentarijiate igomajamajarejia Aapani Irioshi, noncan-tajiaquempiquea aviatimpajia icajemashirentaqueca irira Inquitequitica: pinquen-quejamajaterija Quirishito Jesoshi itigarancane Aapani Irioshi, irio Asaserorotete Anaantamajatatsica, iriotaquequea atsarorentajiacaca aatimpajia.

² Iriatimpa iriguenti tampaticamajatiroca inintaguetica tigarancakerica, iquem-petacari Moishishini itampaticamajatirogueti yamitacojiaquerigueti maasano ishi-raerijia icantajitica choocatimojiaquerica Aapani Irioshi itsovironaquitequi.

³ Cotanquitsiquea Jesoshi caaviji yanaavaequeriquea Moishishini. Manaqueate iquempetacari peacagaroca tsovironaqui, iriguenti anaanquitsi peacagaroca, yanaa-queriquea tsovironaqui.

⁴ Maasano tsovironaqui choocatarite peacaacaroca, cotanquitsiquea maasanopae choocaguetatsica iriguenti peacaaguecaroquea Aapani Irioshi.

⁵ Iriraqueate Moishishini iriguenti amitantatsica netsanaguequeroca maasanopae icantaguequerica Aapani Irioshi, manaqueate isavicaventiroqueate icamantsicariquea maasano ishiraerijia incantaguequeca Aapani Irioshi oncoramanitapojajeguati.

⁶ Cotanquitsiquea iriraquea Quirishito iriguentiquea Irijanitemajaca Aapani Irioshi netsanamajatapiniqueroca icanqueca Iriri, ipeacaancaricate Imajirote maasano choocatimojiaquerica itsovironaquitequi. Aroguentiquea choocatimojiaquerica itsovironaquitequi ariguati ancantacoguitempani aventajianaquempari aguijavaquequea irinetsanataqueroquea maasano icantaguequeca.

Aapani Irioshi irimagorejacaajiaqueri maasano tsaromentajigarica

⁷ Irootaquequea noncantantaquempica ocatica Itioncacaantaqueca Ishire Aapani Irioshi ocanqueguati:

“Imaicaquea ocatica savincaguiteri pinquemajiaqueriguati Aapani Irioshi inquenquet-satacaajiaquempiguati,

⁸ aatojate piquishoshirentajiguatsijate

piquempejigaritsi choviquijianaquempica ipigapigatsajiacariguati,

yamentajiacariguati ichoocajiaqueguati oquitamampororoitapojaqueguati.*

⁹ [Icanti Aapani Irioshi:] Oraniquiquea irirajia choviquijianaquempica yamentajiavecaroquea maasanopae nonigaimojiaquerica oavaetanaque 40 ajagantsini.

Osamaniqueate natsipetacojiavetacari,

cotanquitsiquea teequeate irinintajigueti inquemisantajiaquena.

¹⁰ Irootaquequea nocatsimatantajianacarica,

nocanque: ‘Icantacoguitani itimpinashirentapinijianaque,

tee irinintajigueti intsajiguero noguenavoqui.’

¹¹ Nocatsimamajiaqueri nocantantacarica:

‘Iroosacanca imaica aatojate narejetacaajigaritsi ontaniqui nomagorejacaantajiaquemparimeca.’ ”☆

¹² Napitsaromentarijiate, inchiqiojitaja picovaeguisheshirentatsijate, piquenquejavetatsija picantitsi: “Aato naventari”, povashiantiritsijate Aapani Irioshi anijatsica.

¹³ Imaicaquea imaica pintampishitavacaanaquempajate pincoquempani savincaguiteri aatonijite pinejacameetsatashitaro quempevaerentsi pinquishoshirentantaquempaca.

¹⁴ Ariguati quisho oamajaguiterini Quirishito arejevaetapojajempaguati savincaguiteri ametajantaquempaca, aventaguitempariguati quejetaca iroaqueraguati aventanacariguati, ariquea iroguenti antsatantaquempaca arimajaquea ipeacaji itsipavijimajacaca yashintamajatacaji.

¹⁵ Irootaquequea ocantantacaca itioncacotantajitacaroca ocanti:

“Imaicaquea ocatica savincaguiteri pinquemajiaqueriguati Aapani Irioshi inquenquet-satacaajiaquempiguati,

aatojate piquishoshirentajiguatsi

piquempejigaritsi choviquijianaquempica ipigapigatsajiaquenaguati.”☆

* **3:8** Irirajia ishiraerijia caaviji yogaajiacca ichoocajiaqueguati oquitamampororoitapojaqueguati, icantajiaque aatoca yagavejitsi Aapani Irioshi irajianaqueriquea quepatsiqui icantacaajiaquerica, ariqueate ipigatsajianacari.

☆ **3:11** Sar. 95.7-11. ☆ **3:15** Sar. 95.7-8.

¹⁶ ¿Queri quemajivecarica Aapani Irioshi iquenquetsatacaajiaqueri, cotanquitsiquea ipigapigatsajiacari? Iriguentijia maasano guintenijavetanquitsica Ejepitoqui yaajiajatica Moishishini itsipatsipaivetanajari osamani.

¹⁷ ¿Queri icatsimajiaqueca Aapani Irioshi anaavaetanajaqueate 40 ajagantsini? Iriguentijiaquea covaeguishejianquitsica, ariqueate imetometoitanaji ontaniqui oquitamampororoitapojaquegueti.

¹⁸ ¿Queri icanqueca Aapani Irioshi: “Aatojate narejetacaajigaritsi ontaniqui nomagorejacaantajiaquemparimeca”? Iriguentijia teeca irinetsanatavaqueroji icanquerica.

¹⁹ Irootaquequea amenantajiacaca teequa irarejejiapojemparoji quepatsi icantacaajivecarica Aapani Irioshi, teetarite iraventamajajiguempariji, manaquea iquenquejajivetaca: “Yamataaca Aapani Irioshi.”

4

¹ Iroosacanicimaica, choocatirajaquea icanqueca Aapani Irioshi irinetsanajiacajica icanquequea irarejetacaajiacaji ontaniqui irimagorejacaantajiacajica. Irootaquequea noncantantajiaquemparimeca inchiqiojijataja ochoocatitsi ticaavaquempineca aatoca parejetantajaro.

² Iriatimpajia coramani iquemajivecaroquea maasanopae icanajiaquerica Aapani Irioshi, cotanquitsiquea iquenquejajivetaa aatoca yagavejitsi Aapani Irioshi irinetsanataqueroquea, jero icanantajiacarica iriatimpa aatoja yamenajiguirotsi icanatacaajivecarica irimagorejajiaquemquea. Ariqueate aquempejiacarica aatimpajia imaica aquemajiaquero icamancajica itsavetantajiquerogueti Quenquetsatsarentsimajaca Oganejencatatsica.

³ Cotanquitsiquea aroguenti irimagorejacaajiaque, aatimpajia aventajiacarica Jesoquirishito, icanquetari Aapani Irioshi itsavetacojiaquerigueti choviquijianacajica, icanti:

“Nocatsimamajiaqueri nocantantacaca:

‘Iroosacanicimaica aatojate narejetacaajiacaritsi ontaniqui nomagorejacaantajiaquemparimeca.’”[✧]

Cotanquitsiquea iriraquea Aapani Irioshi iteroncaqueroquea maasanopae paesatoniqui iroaqueragueti ipeacaaguetaarogueti quepatsi.

⁴ Choocatarite itioncacojiqueroquea savincaguiteri sietetapojatsica ocanti:

“Iriraquea Aapani Irioshi imagorejantacaroqueate savincaguiteri 7, irooriji iteroncaguetaquero maasanopae ipeacaaguecaca.”[✧]

⁵ Aisa chooca ontaniqui otioncacagueti, ocantiquea:

“Aatojate narejetacaajigaritsi ontaniqui nomagorejacaantajiaquemparimeca.”[✧]

⁶ Cotanquitsiquea choocatiraja itsipajia irarejetacaajiaquemparimeca ontaniqui irimagorejacaantajiaquemparica. Irirajia iriquetica itsavetacotimojivetacaca icamantajivetacarigueti shinetacaajiaquemparinemeca teequa irarejejiapojemparoji irooriji ipigapigatsajiacari.

⁷ Irootaquequea icantacotsitantacaroca Aapani Irioshi otsipa savincaguiteri ipajitaqueroquea “ocatica savincaguiteri.” Ocoramanivaetapojaji anaanaaguetaanajirogueti oshequi ajagantsini iriraquea Aapani Irioshi ichagashirentaqueriquea Taavini itioncantacaca icanti:

“Imaicaquea ocatica savincaguiteri pinquemajiaquerigueti Aapani Irioshi inquenquetsatacaajiaquemparimeca,

aatojate piquishoshirentajiguitsi.”[✧]

✧ 4:3 Sar. 95.11. ✧ 4:4 Jen. 2.2. ✧ 4:5 Sar. 95.11. ✧ 4:7 Sar. 95.7-8.

⁸ Arimegueti irimagorejacaajiaquerime Josoeni igonorojia, aatomequeate ocoraman-itapojajigueti iquenquetsatacotirome Aapani Irioshi otsipa savincaguiteri irimagorejacaantajiaquemparica.

⁹ Irootaquequea itsatantajitacaroca iriraquea Aapani Irioshi irimagorejacaajiaqueriquea maasano yashintajiacaca.

¹⁰ Maasanotari imagorejacaajiguica Aapani Irioshi aatoquea yatsipeventajiajarotsi ipanquenajiavetacaca irimagorejacotapojaqueroquea,* manaqueate iquempejiajari Aapani Irioshi iriatimpa imagorejaquequeate paesatoniqui iroaqueragueti iteroncaguetaquerogueti ipeacaaguecarogueti maasanopae.

¹¹ Iroosacanica imaica jaameshiatsi antampishiventamajateroja aguijamajatanaqueriqueate Aapani Irioshi aatonijite aquempejiajaritsi iriatimpajia coramanipaequitica teeca inquemisantajigueriji, manaqueate antsipatsipaiquempari amagorejajiapojaje.

¹² Maasanoqueate iguenquetsatsare Aapani Irioshi anijaque aisa caaviji agavejamajati. Oquempevecaroquea cotsiro tsaampitsantsameniri mavite otsaampinampitaque cotanquitsiquea caaviji anaaqueroquea, agavejaquequea onchagashirentajiacajiqueate ashirequi quejetaca tsaampitsantsameniri osatajavaecajigueti agaviroqui irooca aguesaqui, aisa oguisotoaguetaqueroqueate maasanopae aquenquejajiaqueca irooca cameetsari irooca covaeguisherero.

¹³ Yamenamajatiroquea Aapani Irioshi maasanopae, jero aatoquea quericaca agavejatsineca intsititapitsaquempariquea, aisa irioquea cantanquitsineca aricaca apeacajiacca inintaguetica irooca tee.

Jesoshi iriguenti Asaserorotete anajaiguirica maasano saserorotejia

¹⁴ Cotanquitsiquea choocaquea Asaserorotete anajaiguirica maasano saserorotejia. Iriatimpa iriguenti Jesoshi Irijanite Aapani Irioshi. Iriotaquequea atsomajanajatsica jenoqui itsipatapojajari Irii inquitequi. Irootaquequea nocantantaquempica quisho oamajaterojate aventashirentacaca acantajiaquegueti: Notsaromentacari Jesoshi.

¹⁵ Iriiraquea Asaserorotete Anaantamajatatsica teequea inquempejiguempariji itsipajia teeca iragavejajigueti impintsatacojiacaji yamenajiacajigueti teequeate antampishitashijigueroji covaeguisherentsipae. Ashi aatimpa Asaserorotete Anaantamajatatsica yamenaquitiroqueate coramani yatsipevaequitarogueti maasanopae atsipevae-caca aatimpajia, jero aisa yasereserevaequeriquea ampatsini yamentantavetacari in-intavecaquea irantacaquerime teeca irininteji Aapani Irioshi quempetaca yasereserejiajigueti aatimpajia imaica incovaetacajiacajiniji, cotanquitsiquea iriatimpa teequea iragavejeriji incovaeguishetacaguempariji.

¹⁶ Iroosacanica imaica anquempejiquempejiitapojaquempari cavintsajantamajatan-tatsica savicanquitsica imajirontamentoqui, aatojate atsaroacagarotsija aventanaque-mpari impintsatacojiacajiniji, aritaque incavintsajamajacaji iramitacojiacaji.

5

¹ Maasanoquea ipeacaajitaca saserorote anaantamajatanquitsica icoguiimojitiri irapicaquintete inintacaajiqueriquea cameetsanijite irioniji quenquetsatacojaquerine iramanapiniquerigueti Aapani Irioshi, aisa irajaiavaqueronijite yaajianaquenerica irojocajiaquenerica Aapani Irioshi. Aisa irioquea jitorejajiaquenerineca viratsipae itaapinjiaqueriquea cameetsanijite aatoniji icatsimatimentiriti Aapani Irioshi igov-aeguisherejia.

* **4:10** Ocaticaquea teequea oncanteji aato acatsiqueti acaniqui quepatsiqui. Choocaquea mavite ocantacoquea: (1) Maasano yashintajiacaca Aapani Irioshi aato imaica yatsipeventajiajarotsi ipanquenajiavetacaca cameetsanijite irimeshiaqueriniji, yagataquerotari Jesoshi imetojaventajiacajigueti ishetacojaqueri maasano aventajiacarica. (2) Aisa ocantacotaquero arejiaquempagueti inquitequi irimagorejacaamajiacaji maasano yashintajiacaca.

² Ariqueate iquempejiacariquea irapicaquinteteni, teetarite intampishitashijigueroji taaca opajitapae. Irootaquequea yatsipetacotantajiacarica irapicaquinteteni teeca intsajigueji itimpinashiretantajianacaca, ipintsatacojiacariquea.

³ Yamaaquequea ariqueate iquempetacari iriatimpa aisa icovaeguishedaca, jero icantacoguitani yaapinijiguiniriqueate Aapani Irioshi viratsipae ijitorejajiaqueneriquea cameetsanijite aatonijite icatsimatimentiritsi igovaeguisherere, ariquea iquempet-sitaroqueea ijitorejajiaqueneriquea irapicaquintejiate cameetsanijite aatoniji icatsimatimentajiguiritsi Aapani Irioshi igovaeguishererija irashijia iriatimpajia.

⁴ Teequeea quericaca inchiqiojitsita impeashiquempa saserorote anaantamajatanquitsica, ijamirincaque iriguentiquea nintacaaqueriquea Aapani Irioshi. Quempetaca Aaronini iriotaquequea nintacaaquerica.✧

⁵ Ariqueate iquempetaca Quirishito teequeea inchiqiojitaja impeguempaji saserorote anaantamajatanquitsica irishineventantajitaquemparica, iriguentiquea nintacaaqueriquea Aapani Irioshi ipeacaacariquea, icocanitarite icantiriquea paesatoniqui:

“Aviatimpa aviguenti Irijani,

imaica ocatica savincaguiteri aviro nashimajaca nirijanite.”✧

⁶ Aisa chooca otsipaqi itioncacojiqueroqueea icanqueca:

“Aviguenti saserorote, pincoguitempaniquea pisaseroroteguiteni,

quempetajimpiqueate Merequisereni.”✧

⁷ Coramani choocatirajagueti Quirishito acaniqui quepatsiqui, irooshipojigueti irimetojaque, yamaaqueeriquea Aapani Irioshi agavejanquitsica iraavajeri aatoniji imetojitsi, icajemanaque iririjencani yapijipijivaequeneriquea yamaaqueerigueti, oparijaatanaque ijaquija. Iriatimpa iquemavaqueri, iquemisantamajataqueritarite inetsanamajaqueroqueea maasanopae inintaguetica.

⁸ Arimajaveca irio Irijanite Aapani Irioshi, cotanquitsiquea yatsipevaecaqueate cameetsanijite intsaquenijite inquemisantamajaqueri Iriri irinetsanamajaqueroqueea maasanopae inintacaaquerica.

⁹ Iroompaquea inetsanamajaqueroqueea maasanopae ipeantacaca meshiajiaquerineca maasano quemisantaquerineca netsanataqueroneca icanqueca cameetsanijite incoquempaninijite inchoocajiaque.

¹⁰ Irootaquequea inintacaantacarica Aapani Irioshi impeaquempa saserorote anaantamajatanquitsica, inquempetajempari Merequisereni.

Shoshoh povashiantajiguirotsijate pitsarotentajiacarigueti

¹¹ Chooca oshequi nonintavecaca nontsatacaajiaquempime quero ococani ocatica, cotanquitsiquea inchiqioji poanaquero caarica pitsatantajaro.

¹² Piquemitsijavetacaniqueate coramani itsavetacojiqueroqueea iguenquetsatsare Aapani Irioshi. Pintsatacaantajiaquemeequeate aviatimpajia imaica, cotanquitsiquea coacojianatsimpiquea intsatacaajitajempi iroquetinica itsatacaajivequempica iroaqueragueti. Manaqueate quempetatsitirajampitarite chaajaniquirijia tequerataca irishecatempaji, inintajiaqueroqueea itsomija.

¹³ Irirajiaquea coacojianquitsica intsatacaajitajeri iroquetinica itsatacaajiquerica teequeea intsajigueji taaca opaji cameetsatatsica, aisa taaca opaji covaequisherentsipae, manaqueate iquempejiacari chaajaniquiri tequerataca irantsopireje atsomitatsitiraja.

¹⁴ Cotanquitsiquea irirajiaquea amejatsica icomajamajajiaqueate jac itsamajajiaqueroqueea taaca opaji cameetsatatsica aisa taaca opaji covaequisherentsipae. Iriatimpajia iquempejiacari quenquevari shecaguetatsica, yagavejajiaquequea inquemajiaqueroqueea managuetanquitsica.

6

¹ Irootaquequea noncantantajiaquempica imaica jaame anaavaetanaquero notsatacaajiaquempica iroaqueragueti noparianacarogueti notsavetantaquerigueti Quirishito, antsamajajiaqueroquea maasanopae Iguenquetsatsare Aapani Irioshi, anquenquevaritantanajempaca ashirequi. Aatoja apijipijivaetiro intati notsatacaajiaquempica iroaqueragueti. Jac notsatacaajiaquempirotarite teequea quericaca agavejatsineca irimeshiacaanquempauea inchiquiojitaja. Iriguenti irishetacojitaquequeate irirajia pishoncajianaqueroaca ipanquenajiavecaca metojashirentaquerimeca, ariqueate incantashitatijaianaquempauea ishirequi iraventajiaquempari Aapani Irioshi.

² Aisa aatoja aquenquetsatacotapinijajirotsi intati quejecaroca ocatica: iviñacajatantajitigueti, irooca ipamijitirigueti ishinquireguishiqui tsaromentajiacarica, irooca intancoretancoreitanajequeate metojaripae, irooca aisa savincaguiteri incatsimatantajiaquemparica Aapani Irioshi teeca intsaromentajiguempariji.

³ Iriogueti nintanquitsineca Aapani Irioshi, arimpate antsamajatanaqueroquea maasanopae inintaguequea.

⁴⁻⁶ Choocajiavecaqueate quemajiavecaroca Iguenquetsatsare Aapani Irioshi, cotanquitsiquea yovashiantajianajiroquea itsaromentajiavecarigueti. Icavintsajamajiavecari Aapani Irioshi, aisa ichagashirentajiavecariquea Ishire irooca aisa itsajiavecaro caaviji oganejencamajataca Iguenquetsatsare, cotanquitsiquea iriatimpajia yovashiantajianajiroquea maasanopae. Yamenajiavecaroqueate aisa yonigaimojiaquerica Quirishito capichaji iragavejane ironigaamajataqueca oncoramanitapojajegueti, cotanquitsiquea querocaca icojiacani quempecaquea teeca iramenimajigueroji. Imaicaquea imaica querocampate ancojiaquerini incantashitiantajianajempaca inquempejianajempauea itsaromentajiavecarigueti iroaqueragueti, oquempetacaquea yapijitajiri aisa, yompajacojiajiriquea Irijanite Aapani Irioshi, yoguipashiventajiajiri aisa, yamenacaajiaqueriquea maasano.

⁷ Oquempetacaroquea quepatsi omiguijaatapinitirogueti otejigueti incani, iroogueti tsoroantaguetaquemparone panquirentsi ishecajiguetaacaca ishineventacaca ashincarooca, iriguentiquea guitsoroaguequero Aapani Irioshi, icavintsajaqueriquea ashincarooca.

⁸ Cotanquitsiquea oraqueate quepatsi otsoroantacaca samerento aisa poronquetopae teequea oncameetsapatsateji, manaquea incantajiqueroquea: "Isaa", iroompauea intaitsijitemparoquea.

Aapani Irioshi inetsanamajaqueroquea maasanopae icanqueca

⁹ Noquempejiavecaroquea imaica noquenquetsatacaajiaquempigueti, cotanquitsiquea notsajiaque aviatimpajia, nopintsajiacaca, imeshiaajiaquempiquea, panaana-jiriquea nocantacovecaca iroaqueragueti.

¹⁰ Iriaquea Aapani Irioshi icocaniquea itampaticamajaqueroquea maasanopae, jero incavintsajantajiaquempica oncoramanitapojajegueti, aatoquea ipeacotsitimpirotsi maasanopae cameetsaripae pipeacaajiacaca, aisa aatoquea ipeacotsitimpirotsi pipintsamajatacarigueti pamitacojiaquerigueti papitsaromentarijiate, pamitacoguitiriniquea arejevaeca imaica.

¹¹ Nonintajiaque maasanojiaquea pincoquempanijate pinquempejiaqueroquea imaica pintampishiventamajajianaqueroquea oavaetantanaquempaca pamenamajantajemparoca poguijacoqueca onetsanatantajempaca.

¹² Teequea nonintajigueti pimperajiguempa, iroguenti nonintajiaque pinquempejiaquempariqueate coguitatsica atsipetacovaetanquitsica tsaromentamajianacarica, iriojiaqueate icavintsajamajataque Aapani Irioshi yojocajiaqueneriquea icantacaajiaquerica.

¹³ Coramani iriraquea Aapani Irioshi icanqueri Averaameni inchoocaque irijanite, cotanquitsiquea teequea incanteji: “Yamenaquenaquea anaaquenaca teequea namataimatempaji”, teetarite inchoocateji anaaquerineca iriatimpa. Manaquea ican- taque: “Arimaja nonetsanaquempiro, naroguentitari Yave cantaquempica.”

¹⁴ Ariqueate icanqueri: “Arimajaca noncavintsajamajaquempi noshequiamajaque- riquea pinchoviQUIJIANAQUECA.”[✧]

¹⁵ Iriraquea Averaameni teequea imperatemparoji yoguijawaquerogueti, manaque- ate yoguijaguitiniqua irinetsanatavaquerotajate Aapani Irioshi maasanopae ican- queca, iroompaquea inetsanamajaqueroquea.

¹⁶ Cotanquitsiquea iriraquea caquinte taaca opaji ininqueca incanqueriquea itsipa, ininquegueti inquemisantamajaquericquea, yaventacocaroquea ivajiro anaaquerica, iroguenti icanqueri: “Arimajaca nocanque, yamenaquenaqueate Aapani Irioshi tee nontsojeimatempaji. Oraqueate managueti namatavijaquempiquea incatsimataque- naqueate.” Iquempetaquerogueti imaica itsaque itsipa teequea iramatavijeriji.

¹⁷ Irootaquequea iquempetacaancaroca imaica Aapani Irioshi, ininquequea intsaji- aque irirajia incavintsajajiaqueca aatoquea icantashitatigarotsiquea icantajiaque- rica, icantantacarica: “Nonetsanamajaqueroja maasanopae nocantajiaquempica, naroguentitari Irioshimajaca. Aatoquea nocantashitatigarotsi.”

¹⁸ Pinquenquejeroja, iriraquea Aapani Irioshi iroquetitaqueate icanque incavintsa- jacomajajiaqueri tsaromentajiaquemparinca, ariquea icanque aisa irinetsanataquero- quea maasanopae icantajiaquerica aatoquea icantashitatigarotsi, iriguentitari Irioshi- majaca, aato yagavejitsi yamataga, aisa aato yagavejitsi itsojega. Irootaquequea ats- simajatantajiacaroca aventaventaicariguetti amanajiaqueriguetti irimeshiacojiajaji, jac imeshiajiajaji. Irooquea shinetacaavaejiaajica aguijaguijaiqueriguetti irinetsanamaja- queroquea icanqueca.

¹⁹ Irootarite tampishishirentacaajiacajica aatonijite otatsincajitsi covaeguisheta- caantatsica, quishoquea ajiricamajaqueri aatonijite oguipegajitsi, quejetacaquea ca- vorejatatsica agaparancajatatsica ajiriquiroca quenajarontsi aatoniji itatsinquiro choviga. Oraquea tampishishirentacaacajica manaquea agaparancaaveta- poja anta- querontamorenauitica intompoguiremajacaqui Taverenacoromajacaqui,

²⁰ iquijapojajiguetti Jesoshi, iroorijite ijivajivaitsitacaji inquenquetsaventapojajaji. Ipeapojaja Saserorote Anaantamajatatsica isaserorotepojaji, manaquea incoguitem- pani irisaseroroteguiteni, iquejetantapojajarica Merequisereni.

7

Jesoshi iriguenti saserorote quempecarica Merequisereni

¹ Coramani iriraquea Merequisere iriguenti imajirojiate Saremejiaquitica, aisa iriguenti isaserorotete Irioshimajaca Anaantamajatatsica. Iroompaquea aapojacaguetti savincaguiteri yoanaque Averaameni itsipatsipaitanacari yashintajiacaca itonquivo- javajari majirontajiatatsica aanaquerica irijanitsorite yashimirintavacaajiacca, ariqueate yagavejajiaquericquea. Iroompaquea icoraquejiajiguetti, isotoanaque Merequisere yaa- jlavajiri icantavajiriquea: “Incavintsajamajaquempi Aapani Irioshi.”

² Ariquea iriraquea Averaameni yojocagarantsitanariquea 1/10 (*un décimo*) * maasanopae irajaararopae yaapitsajivajirica majirontajiatatsica yashimirintava- caacaguetti. Oraqueate ivajiro Merequisere iroguenti ocanque “majirontatsica tampaticamajatiroca”. Aisa oraquea Sareme iroguenti ocanque “anchoocajiaque cameetsa, teequea taaca opaji ashoshoguitementempaji”, irootaquequea icantantajitacarica “Majirontatsica guintenitacaantantatsica cameetsa”.

[✧] 6:14 Jen. 22.16-17. * 7:2 *Yojocagarantsitanariquea 1/10 (un décimo)* ocanque onchoocagueueti 10 irojocagueneriquea aparo, onchoocagueueti 100 irojocagueneriquea 10.

³ Oraquea tioncarentsi teequea oncanteji taaquea irijanintacari aisa taaquea choviquitanaquerica. Aisa teequea oncanteji querocaca ivoantacaca aisa querocaca imetojan-tacaca, manaquea oquejevecaro teeca irimetojaneteji, irootaquequea icantantajicarica manaquea iquejevecari Irijanite Aapani Irioshi, icocaniqueate isaserorotetini.

⁴ Iriraquea Averaameni caaviji yanaantavecaquea iriguenti choviquijianacajica aatimpajia, cotanquitsiquea yojocagaranqueneriquea Merequisere 1/10 yaapitsajia-avaquerica majirontajatsica yashimirintajiacarigueti, irootaquequea atsatantajiacaca caaviji yanaaque Merequisere, yanaaqueriquea Averaameni.

⁵ Ocoramanitapojigueti ichooaque Irevi ichoviquitanaqueca Averaameni. Iroom-paquea ocoramanitapojigueti aisa iriraquea Aapani Irioshi iquenquetsashirentacaa-queri Moishishini itioncantacaroca icanti: “Iriguenti peajianquitsineca saserorotejia ichoviquijianaqueca Irevi.” Aisa icanti: “Iriraquea saserorotejia irojocajitaquenerija 1/10, iriguenti jocajiaquenerineca maasano igonorojia.” Pinquenquejerijate iriraquea ishiraerijia, iriguentijavetaca igonorojia, iriguentijavetaca aisa ichoviquijianaqueca Averaameni, cotanquitsiquea yojocajiaqueneriqueate.

⁶ Iriraquea Merequisere teequea irioqueate choviquivetemparine Irevi, cotanquit-siquea yaavaqueroquea 1/10 yojocaquenerica Averaameni. Ariqueate icantiri: “Incav-intsajamajaquempiquea Aapani Irioshi.” Pinquenquejeja iriguenti cantanquitsi imaica Merequisere iquenquetsatacaquerigueti Averaameni icantacoqueca Aapani Irioshi incavintsajamajaqueri.

⁷ Irira anaquerica itsipa, iriotari cantaquerine: “Incavintsajamajaquempiquea Aa-pani Irioshi”, irootaquequea imaica itsamajatantajitacaroca iriraquea Merequisere yanaaqueriquea Averaameni.

⁸ Iriraquea saserorotejia yojocajiqueneca 1/10 iriguentijia metojanetatsica, cotan-quitsiquea itioncacojiquerigueti Merequisere iroguenti iquempetacaajitacari sasero-rote teeca irimetojaneteji.

⁹ Oraqueate yojocagaranquenerigueti Averaameni 1/10, quempecaquea iriguen-tica jocagaranquenerica Irevi aisa maasano ichoviquijianaqueca, iriguentijiatari ichoviquijiani Averaameni.

¹⁰ Oraqueate yoanaquegueti Merequisere itonquivojavajarigueti Averaameni, quempecaquea ariguentica iconoajiacari Averaameni maasano inchoviquijianaqueca, irooriji quempetaca ichooajiaque itsinoqui Averaameni.

¹¹ Coramani itioncacotaquerogueti Moishishini Icantacaantaqueca Aapani Irioshi, ocanquequea iriojia peajianquitsine saserorotejia ichoviquijiani Aaronini, ichoviqui-tanaqueca Irevini. Irirajia saserorotejia itsatacaajiaqueriquea maasano irinetsanaji-aquero, cotanquitsiquea teequea iragavejajigueti saserorotejia irogameetsashirentan-tajigueti. Arimegueti iragavejajiaquero, aatomequea itioncacojiritirime itsipa Sasero-rote quempetajemparineca Merequisere, aatoca ichoviquiti Aaronini.

¹² Aritarite inchoocategueti itsipa saserorote teeca inchoviquitanaque Aaronini, on-choocatejate otsipa Incantacaantaqueca Aapani Irioshi irinetsanajiteca inchoocaque-nijite itsipa saserorote.

¹³ Iriraquea icantacajitaqueca quempetajarica Merequisere, teequea irio ichoviquini Irevini, itsipaquea choviquitaqueri teeca inchoocatimateji aparó igonoro peanquitsica saserorote amitacotirica ishiraerijia aretarequi.

¹⁴ Atsajiaquetarite iriraquea Amajirote iriguenti choviquitanaqueriquea Joraa. Iri-rajiaquea ichoviquijianaqueca Joraa teequea incantajigueriji Moishishini irisasero-roteteja.

¹⁵ Ariquea maasano ocativa nocantaqueca imaica oconijamajataquequea aquenque-jaquerogueti choocaquea imaica itsipa saserorote quempetajarica Merequisere.

¹⁶ Ipeacagueti saserorote, teequea inquempvetempariji irirajia ocantacotaqueca tioncarentsi cantatsica iriguentijia peanquitsineca saserorotejia ichoviquijiani Aaronini. Irirampani peanquitsica saserorote imaica, choocaquea iragavejane, teequea agavejeriji metojagantsi, irootaquequea ipeantacaca saserorote.

¹⁷ Icantaqueritarite Aapani Irioshi:

Aviguenti saserorote, pincoguitempanija pisaseroroteguitenija, quempetajimpiquea Merequisereni.✠

¹⁸ Choocavetaca icantacaantaqueca Aapani Irioshi itioncacaantaqueca coramani, cotanquitsiquea icaratacaapojajiro, teetarite ontampishimajateji, tee agavejamajateji.

¹⁹ Jero teequeate agavejeji ogameetsashirentanteji. Cotanquitsiquea choocaquea imaica cameetsamajatanquitsica aguijacoshirenqueca piajaroca, irootaquequea aventavaquempaca anquempajipojempariniji Aapani Irioshi.

²⁰ Tee incantashitempaji Aapani Irioshi, icantamajataque: “Arimaja oca noncamentempica, naroguentitari Irioshimajaca.” Oraqueate ipejaiavecagueti ichoviquijianaqueca Irevini saserorotejia, teequea incanteji Aapani Irioshi incoquempanijate irisaseroroteguitenija.

²¹ Cotanquitsiquea oraquea ipeacaacarigueti Quirishito saserorote, icantaqueriquea. Choocaquea tioncanquitsica, ocanti:

“Irioquea Majirontamajatatsica cantatsica, aatoquea yamatagatsi,

aatoquea icantashitatigarotsi icanquempica, icanquequea:

‘Aviguenti saserorote, pincoguitempaniquea pisaseroroteguiteni, quempetajimpiqueate Merequisereni.’ ”†

²² Irootaquequea ipeantacaca Jesoshi amenamajatajeronca iroaquerari paaquito‡ onetsanatenquempianiji, ocaticaquea anaavaetapojajiro iroquetinica.

²³ Iiraquea ichoviquijianaqueca Irevini peajiavetanquitsica saserorotejia icaramirincavaequequea jmm, teetarite inquishometojanejigueji, imetojajiavajiqueate itsipaquea quejejiapojajarica.

²⁴ Cotanquitsiquea iriraquea Jesoshi icoguitani yanijaguitini, aatoquea ichoocati quejetimatajemparineca, incoguitempani irisaseroroteguiteni.

²⁵ Irootaquequea yagavejantacaca incoquempanijate irishemajataqueneri igovaequishere maasano aventajiaquemparineca aatonijite icatsimatimentiritsi Aapani Irioshi igovaequisherejia, icocanitarite ichoocati iquenquetsaventajiaqueriquea nintajianquitsica inquempajipojajempari Aapani Irioshi.

²⁶ Irootaquequea atsatantajiacarica Jesoshi iriosacanica Asaserorotete Anaantamajataatsica acoacojiacaca. Iriguentiquea Iriomajataatsica, teequea incovaeguishetimatempaji, teequeate impeacaaguishetimatemparoji covaequisherentsi. Aisa teequea inconoajiguempariji covaequishejiatsica inquempajiaquempariquea iriatimpajia, apojajagueti icajemajiri Aapani Irioshi yatsomajanajiri jenoqui ichoocatigueti, yanaacaavajiri yanaantamajataque.

²⁷ Teequea ariquea inquempajiguempariji itsipa saserorotejia anaantamajajianquitsica. Iriatimpajia icantacoguitaniquea ijitorejajiguiniriquea Aapani Irioshi viratsipae yojocajiaqueneriquea aatonijite icatsimatimentajiguiritsi icovaeguishejiacagueti, iroompaquea iquejejiagueneriquea igonorojia. Cotanquitsiquea iriraquea Jesoshi inchiquiojitaquea ipimantaca imetojaventajiacaji iriatimpa. Irooquea

✠ 7:17 Sar. 110.4. † 7:21 Sar. 110.4. Oconoagarantaca iroquetinica paperi iguenquetsatsarequi guiriego tee ontionquempaji acaniqui, “quempetajimpiqueate Merequisereni”. Maasano itioncaciaquero Evereojiaqui 5.6; 7.17. ‡ 7:22 Oraquea **paaquito** iroguenti icantamajajitirica itsipa irinetsanamajajitenerica. Ocaticaquea **iroaquerari paaquito** icantajiacajiquea Aapani Irioshi irishejiajeneri igovaequisherejia maasano aventajiaquemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaguegueti Moishishini, otsipa icanquerica Taavini.

imetojimataquegueti aparo, ari iteroncaquero maasano, teequea irinintacojitajeroji irimetojaventajajaji aisa.

²⁸ Oraquea itioncacotanaqueca Moishishini coramani ocanti iriguenti peajianquitsineca saserorotejia anaantamajajianquitsica ichoviquijianaqueca Aaronini. Cotanquitsiquea iriatimpajia tee intampishiteji, caquintejiatarite ijamirincati. Irootaquequea icantantacaca Aapani Irioshi ocoramanitapojajigueti: “Naatimpa naroguenti Irioshimajaca teequea namataguempaji. Iriiraquea Irijani incoquempaniquea irisaseroroteguiteni, icocaniquea icomajamajataca teequea incovaeguishetimatempaji.”

8

Jesoshi iriguenti asatecapojanquitsica niganqui onetsanamajaquempaniji iroaquerari paaquito

¹ Jero ocativa imaica nonintamajataque pintsajigue: choocaquea Asaserorotete Anaantamajatatsica notsavetantaqueca. Imaica chooca jenoqui inquitequi isavicaque itincamijempequiqui Oganejencamajatatsica isenampijacari imajirontamentoqui.✧

² Isaserorotetaquequea Taverenacoroqui, orativa Taverenacoromajatatsica ipeacaa-caca Amajirote, teequea impeacaajiguemparoji caquinte.*

³ Maasano saserorote anaantamajatanquitsica iroguenti ipeashicariquea sasero-rote anaantamajatatsica iramaquenerinijite Aapani Irioshi irojocapinijiquenerica, aisa irijitorejiaquenerinijite viratsipae irojocajiaqueneriquea Aapani Irioshi aatonijite icatsimatimentajiguiritsi igovaeguisherjia irashi iriatimpajia aisa irashijia igonoro-ja. Ariquea oquejetimotacari aisa iricativa Asaserorotete inintacotimentajiquero onchoocaque irojocajenerica Aapani Irioshi, ipimantatsinotantajaca.

⁴ Icocanime inchoocaqueme ocaniqui quepatsiqui aatomequea ipegame saserorote, choocajiatarite saserorotejia jitorejajiguinirica Aapani Irioshi viratsipae iquempeta-caajaroquea itioncacotanaqueca Moishishini.

⁵ Iriatimpajia manaquea yantapinijigui Taverenacoroqui ipeacaajicaca iquem-petacaajitacaro icantajiaquerica Aapani Irioshi coramani, manaquea oquejevecaro ovaantorite Taverenacoromajaca inquitequitica. Irootaquequea icantsitancarica Moishishini coramaniqui irooshipojigueti impeacaaquemparo: “Arimajaca pimpea-caamajaquemparoja pinquempetacaamajaquemparojate nocantaguequempica on-taniqui otsempiqui nonigaaguetaquempirogueti.”✧

⁶ Cotanquitsiquea imaica isaserorotetaquegueti Jesoshi anaavaequero isasero-rotetaquegueti iriatimpajia, iriotarite amaqueroca paaquito anaantavaetanquitsica, anaantavaetaquetari icantacaacajica irinetsanaguecajica.

⁷ Oganejencamajataquempagegueti iroquetica paaquito, aatomequea inintacoji-tirome otsipa.

⁸ Cotanquitsiquea Aapani Irioshi teequea irishineventajiguempariji irirajia ition-caqueneca Moishishini, teetarite irinetsanamajateroji icantajiaquerica. Irootaquequea icantantacaca iriatimpa:

“ ‘Oncoramanitapojajegueti nompeacaaquenempari inchoviquijianaqueca Ishiraeri aisa inchoviquijianaqueca Joraa paaquito iroaqueratajatsineca.’ Irootaque icanque Amajirote.

⁹ ‘Aatoja noquempetacaajarotsi paaquito nocantajivecarica choviquijianaquerica nacatsajianajirigueti noguisotojaijairigueti Ejepitoqui,

✧ 8:1 Sar. 110.1. * 8:2 Oraquea quitsaarentsivanco icantajitica **Taverenacoro** isaserorotejivetacagueti coramani, manaquea oquejevecaro ovaantorite **Taverenacoromajaca** choocatatsica jenoqui inquitequi, iroguentiquea Taverenacoromajaca itsaromentantajitarica Aapani Irioshi. (Pamenero otsapa 5.) ✧ 8:5 Eeq. 25.40.

teetari irinetsanapiniigueroji nocantajiavecarica paaquitoquitica.
Irootarite nopitsocapitsatantanacarica.’ Irootaque icanque Amajirote.

¹⁰ ‘Jeroquea paaquito nompeacaajenemparica ishiraerijia oncoramanitapojajegueti.’
Icantagea Amajirote:

‘Noamajaqueneri nogantacaantanejia iguenquejanejiaqui,
nontioncantsitenempari ishirejiaqui.

Naroguentiquea irioshiquempaca,
iriojiaquea nashintajiaquempaca.

¹¹ Aatoquea quericaca cantajiritsi igonorojia aisa ijitanepae: Intsishiatsi pintsatavaque-
rija Amajirote,

maasanotari intsajiaquena,
intsajiaque maasano teeca iranaanteji aisa anaantajiatsica.

¹² Nompintsatacojiguempari nompeacotsitajempari igovaeguisherejia,
aatoquea noquenquejajirotsi ipeacaaguishevecaca.’ ”✧

¹³ Oraqueate icantacoquerogueti Aapani Irioshi ocatica paaquito “iroaquerari”,
iroguenti ocanque opijaaro iroquetinica coramanipaequitica. Oraqueate iroquetinica
paaquitoquitica opaesatotacovaetanaque, irooshipoji ompeanajempa.

9

Taverenacoro quepatsiquitica aisa otsipa inquitequitica

¹ Oraqueate iroquetica paaquito, iroguentiquea icamanquerica Aapani Irioshi
intsatimentajiaqueniji quero incojiaquempani intsarovenquemparigueti aisa impea-
caajiaquenemparigueti tsovironaqui quepatsiquitica irashintaquempaca.

² Ipeacaajiacanari quitsaarentsivanco icantajitiro Taverenacoro. Ariquea oti-
caamorenataca ovagantepojacagueti. Intsompoguiguitepojaquegueti icantajitiro Igove-
ejencarequi irooriji irashi Aapani Irioshi, ochoocatantapojacaro tsivorentsi manaquea
ojerenquijerenquiatacotaca, aisa chooca mencotsi itaromaantajitaroca pan ipeacaaji-
canarica.

³ Antaqueronta tsipamorenatapojatsica ochoocaque otsipaguite icantajitica Igove-
jencamajarequi inatojencatapojacagueti Aapani Irioshi.

⁴ Ochoocaque ashi iroatimpa itaantajitaroca casancavaneri, yapamancajistica cavore-
jatatsica ooro. Ochoocatsita aisa inchacotanaqui icantajitica *aareca* ashi paaquito*
yapamanquitsitantajitaro ooroqui. Oraqueate intsompoguiqui inchacotanaquiqui
ariquea osavicaque gorintenaqui ipeacaantajicaroquea ooro yoguijaantantajitaroca
manaa, otsipatsipaicaro igotiro Aaronini peshiananquitsica, aisa mavite mapicota
it ioncantacaroca Aapani Irioshi paaquito.

⁵ Oraqueate osavoqui inchacotanaquiqui itsiquirijapinijitirogueti iriraja viratsipae
aatonijite icatsimatimentiritsi Aapani Irioshi igovaeguisherejia choviquijianacajica,
ariqueate ichoocajiaque mavite irashivantijitete Aapani Irioshi, ipeacaajitaca cavore-
jatatsica ooro, cantashivanquijiacaquea ishivanquipae. Ipajitacaquea querovipae.
Oraniquiqueate oraniqui ariquea icoraquepiniquequea Aapani Irioshi iriatimpa it-
sirencashimpoquirerejavaequequea. Imaica ariotapoji nocamantajiaquempica, aato-
quea noguisotoamajatirotsi maasanopae.

⁶ Oraqueate iteroncamajajiaquerogueti ipeacaajiacarogueti maasanopae, iquijaqui-
jaitapinique saserorotejia savincaguiteripaequi isavicaventajiaqueroquea icantague-
queca Aapani Irioshi, cotanquitsiquea iroguenti iquijantapojaca iroquetiguitepojat-
sica.

✧ 8:12 Jer. 31.31-34. * 9:4 Ocatica **paaquito** ocantacoqueca iroguenti yojocaquenerica Aapani Irioshi
Moishishini. Pamenero itsavetacojiquerogueti **paaquito** isavivanaqui otsapaqui 7.22, iro tsatacaaquempirone.

⁷ Teequea inqijajaitantajiguemparoji otsipaguite intsompoguiremajacaqui. Iriguentiquea quijantaro saserorote anaantamajatanquitsica. Iriatimpa apaniro iquiji apajencaro savincaguiteri ajagantsinipaequi. Aato iquijashita aatogueti yaajatanontanaca iriraja viratsipae aatonijite icatsimatimentiritsi Aapani Irioshi igovaeguishere teeca intsatacojiguempaji iriatimpa aisa igonorojia.

⁸ Iriraquea Ishire Aapani Irioshi iquenquejacaajiacajiroquea maasanopae ocatica cameetsanijite antsajiaqueniji, choocatirajagueti iroquetica Taverenacoro, tequeratati-
raja ironigagajiro quero ancojiaquempani anquijantapojempaca Igovejencamajare-
qui.

⁹ Ocameetsavaeque anquenquejajiaquerojate cameetsanijite antsajiaqueniji maasanopae yojocajiquenerica Aapani Irioshi aisa maasano viratsipae ijitore-
jajiquenerica teequea iragavejajigueji irishejiaqueroqueate igovaeguisherejia
amajiaquenerica Aapani Irioshi aatonijite icatsimajiguiritsi, irootaquequea icanta-
cotantaguitanica omintsaroashirentaguitirini yamenajiaquegueti icovaeguishejiaca.

¹⁰ Tequeratagueti incoraqueteji Quirishito, icocaniquea iquenquejajiaque iriatimpa-
jia taaca opaji irishecajiguempaca aisa irimirajiguempaca teeca incantimentanta-
jiteji, irooca aisa quero incojiaquempani inquivatsinojiaquempagueti, aisa otsipapae
itsatacaantajitica tsinotsiquitica. Ocameetsaveca coramani, cotanquitsiquea imaica
icantashitatijaaroquea Aapani Irioshi maasanopae.

¹¹ Jac icoraquequititarite Quirishito ipeaca Asaserorotete anaajiguirica maasano
saserorotejia, irisaserorotetacotaquero cameetsaguetanquitsineca.† Ocoramanitapo-
jigueti yatsomajanaja jenoqui iquijantapojaro Itaverenacorotemajaca Aapani Irioshi
caavijica anaaque oganejencamajataca, teequea irioquea peacaajiguemparone caquin-
tejia, aisa teequea onchoocateji ocانىqui quepatsiqui.

¹² Oraqueate iquijapojirogueti Igovejencamajarequi ichoocamajatigueti Aapani
Irioshi, teequea irooquea quijacaguerine iriraja caaverapae aisa irijanishigantire-
najaniqui caapironcaaripae, iroguentiquea quijacaapojajiri iriraja irashi iriatimpa.
Aparoquea iquijapojatigui ashijia maasano ivegaratacotanontajaji aatoniji yashintaji-
ajaji omperashirentajavetacajica ancoguitempaninijite anchoocajiaje iriatimpaqui.

¹³ Arimajaca ocameetsaveca iriraja caapironcaaripae aisa caaverapae,✱ aisa
intsiquirijaguinatantajiquemparoquea osamamporevaneja orijanishigantirena-
janiqui caapironcaaro itaaqueca✱ cameetsanijite irisaancatsinotimentanajeniji
choocagueti pantatsinotanacarica.

¹⁴ Quempetaca iriraja viratsipae agavejaveca osaancantiquea maasanopae
covaetsinotantaguetatsica, iroompate iriraja Quirishito caaviji agavejamajaque
osheshirentamajatacaji acovaeguishetacagueti cameetsanijite asavicaventajiana-
queroniji maasanopae icantajiacajica Aapani Irioshi anijatsica. Iriraquea Quirishito
teequea incovaeguishetimatempaji iriatimpa, ariquea Ishire Aapani Irioshi icocanica
ichoocati itampishitacaaqueriquea impimanquempaniji yogameetsashirentantajajica
Aapani Irioshi aatonijite omintsaroashirentajaji apeacaaguishejiaveca
aantanacajimeca camorecariqui.

¹⁵ Irootaquequea ipeantacaca Quirishito asatecapojanquitsica niganqui onetsana-
majaquempaniji iroaquerari paaquito, cameetsaniji irirajia icajemajiaqueca irashin-
tajiapojemparo inintacaitsicarica caarica teroncajatsi. Imetojaventajiaqueritari yogu-
ipaquijacoventaqueri aatoniji omperaperaashirentajajari igovaeguisherejia ipeacaja-
iacaca choocatirajagueti iroquetica paaquito.

¹⁶⁻¹⁷ Pinquenquejerija inchoocategueti aparo caquinte iroompa intioncanaquequea
paperi incanquequea taaquea ashintajemparoneca maasanopae yashintaguecaca iri-

† **9:11** *irisaserorotetacotaquero cameetsaguetanquitsineca*. Chooa mavite otsipa paperi iroquetinica iguen-
quetsatsarequi guiriego ocanti: "isaserorotetacotaquero cameetsaguetanquitsica". ✱ **9:13** Irev. 16.15-16. ✱ **9:13**
Nm. 19.9, 17-19.

atimpa oncoramanitapojajeguete irimetojanajeguete. Oraqueate aatotaqueti imetojitatssi aatotaquea inetsanatsijitaroquee tioncanquitsica, tequeratanica irimetojenica. Cotanquitsiquea oraqueate irimetojanajeguete ariquea iroguenti irinetsanamajajiqueroquee itioncanaquea.

¹⁸ Ariqueate oquempetaca coramani iparianacaroguete iroquetica paaquito, teequea ompariguempa tequerataguete iraashijiteroji iriraja.

¹⁹ Jero Moishishini iroquetitaquea yapatsajavantamajajiaqueneriquea maasano ishi-raerijia icantaguequea Aapani Irioshi, ariqueate yaaqueroquee imae oveja yajavica-maejitica oquityoncamaetanaque, itsipatacotacaantsitaroquee aisa ochajempequijaniquipae isopo, yojocajatsitaroquee irirajaqui irijanishigantirenanajiqui caapiron-caaripae aisa caaverapae iconoajatsitantacaca oja, ariqueate itsiquirijitsitaroquee itioncameshinatantajicaroca paaquito, iroompaquea iquejetacaajiajariquee maasano igonorojia itsiquirijantsijigariquee.

²⁰ Ariquea icantajiaqueri: "Ocatiquea iriraja iroguenti ashi paaquito‡ icamantajiaquempica Aapani Irioshi pinetsanataquea."*†

²¹ Ariqueate iquempetsitaroquee Taverenacoro ipeacaacaroguete itsiquirijantsijigaroquee iroatimpa iriraja, ariquea iquempetacaaguecaroquee maasanopae choocatantaguecaroca ininqueca saserorotejia ashi irisaseroroteteguete.

²² Aritarite ocanque itioncacotanaquea Moishishini oraquee iriraja irootaquequee osaancantacaca maasanopae taaca opajitapae covaeguishetanquitsica. Ariqueate iquempejiaca caquinte aatomeguete ichoocatime metojaventirica ochovivinca-jatanaque iriraja, aatomequee ipeacotsijitarime igovaeguishere.*

Imetojaque Quirishito cameetsanijite oshetantaquempaca covaeguisherentsi

²³ Ocaniquiquea ocaniqui quepatsiqui ochoocaveca Taverenacoro aisa choocatantaguecaroca intsompoguiqui. Manaquee oquejevecaro iroomajatatsica inquitequitica. Iriaraquee saserorote iquijanaque intsompoguiqui, itsiquirijantsiguetaoquee iriraja viratsipae ijitorejancarica cameetsanijite osaancaguetajempa. Cotanquitsiquea oratica inquitequitica ocoacomajacaquee otsipa caavijica anaavaequeroquee iriraja viratsipae.

²⁴ Pinquenquejerojate imaica, imetojaventajiacajiguete Quirishito teequea irooquee inquijantempaji Taverenacoro ipeacaacaca caquinte quempevecaroca iroomajatatsica, manaquee iquijantapojajaro inquite ichoocaqueguete Aapani Irioshi iquenquet-satacoventajiapojajaji.

²⁵ Aisa teequea inquijeji inquitequi cameetsaniji impimampimantavaequempame-quee, inquempequemparimeguete saserorote anaantamajatanquitsica quepatsiquitica iquijapinitajini Igovejencamajarequi Aapani Irioshi ajagantsinipaequi iramacotapinita-queteni iriraja teeca iro irashi.

²⁶ Arimeguete onquempetaquempameguete imaica, irantsipetsipepiniquempame-quee iroaqueraguete ipeacaacaroguete Aapani Irioshi quepatsi arejevaeca imaica. Cotanquitsiquea imaica irooshipojajeguete onteroncapojajempaguete ajagantsinipae, aparo icoraqueequiti imetojaquitatigui cameetsanijite irishemajajiacajironijite Aapani Irioshi maasanopae agovaeguisherajia impeacomajatajemparoniji.

²⁷ Maasanomajaca caquinteguetaatsica imetojimaque aparo, iroompaquee incanque Aapani Irioshi queri oanajatsineca inquitequi, aisa queri oananquitsineca camore-cariqui.

²⁸ Ariqueate iquempetaca Quirishito aparo imetojaquiti imetojaventajiaquitiri caramirincavaetanquitsica caquinteja cameetsaniji iraitsijianaqueriniji igov-aeguisherajia. Oncoramanitapojajeguete incoraqueataje aisa, cotanquitsiquea aatoquee

‡ **9:20 iriraja iroguenti ashi paaquito.** Oraquee iriraja irooquee intsatantajitempaca icantavacaajiaa arimaja irinetsanajiaquero tioncanquitsica paaquitoqui. * **9:20** Eq. 24.8; Mt. 26.28. † **9:22** Irev. 17.11.

irooquee icoraquetashitajatsi irimetojaventajajeriqueate covaeguishejiatsica, iroguentiquea incoraquetashitajate irajajateriquea maasano oguijajavajirica.

10

¹ Oraquea itioncacaquerica Aapani Irioshi Moishishini manaquea oquejevecaro ovaantorijencate intati cameetsaguetatsica coramanivaepojatsineca. Teequea onquejemajatemparoji vaantorijencatacaacaroca, irootaquequea teeca agavejantempaji itioncacotanaqueca Moishishini oganejencashirenteriji quempejiquempejiipojaquerineca Aapani Irioshi ijitorejapinijitaquenerigueti viratsipae ajagantsinipaequi.

² Agavejaquemegueti, incaratacaapojerome ijitorejapiniquerigueti. Iriasaan-cashirentaquerimetari aparo, ari oncaratapojeme, aatomequea iquenquejacotajime: “Chocasacanica nogovaeguisHERE.”

³ Cotanquitsiquea ijitorejapinijiguinirigueti Aapani Irioshi viratsipae icantacoguitani ajagantsinipaequi, irooquee quenquejacaapiniqueriquea choocasacanica igovaeguisHERE.

⁴ Teetarite agavejempaji iriraja caapironcaari aisa caavera oncatarogueru covaequisHERENTSI.

⁵ Irootaquequea, icoraquequitigueti Quirishito ocaniqui isaviji quepatsiqui, icantantacarica Aapani Irioshi:

“Teequea pinintajeji irijitorejajitempiriji viratsipae irooca irojocajitempiji otsipapae iroguishinejantajitempica, irootari picaquintetsinotacaantaquenaca.

⁶ Teequea pishineventemparinica viratsipae irampevaneajitaquempirigueti irooca aisa irijitorejimentajiqueneri igoguishere.

⁷ Ariquee nocanque: ‘Chocana acaniqui, quejetaca itioncacojiquenagueti yampinaicameshinajitaqueca.*

Iroguenti nocoraquetashique nonetsanatimenqueroniji pinintaguetica aviatimpa, Aapani Irioshi.’ ”[☆]

⁸ Iroquetitaquea icanque: “Teequea pinintajeji irijitorejajitempiriji viratsipae irooca irojocajitempiji otsipapae iroguishinejantajitempica, irooca irampevaneajitaquempirigueti viratsipae irooca aisa irijitorejimentajiqueneri igoguishere, teequea pishineventempariji.” Irooveca icantacaantaqueca Aapani Irioshi irinetsanajitaqueca itioncacaquerigueti Moishishini.

⁹ Iroompaquea icanque Quirishito: “Chocana acaniqui, iroguenti nocoraquetashique nonetsanatimenqueroniji pinintaguetica aviatimpa.” Yaitsitaroquee iroquetica itsipacarejitsitaro cameetsanijite impiacaantajemparoniji iroaqueratajatsineca.

¹⁰ Inetsanamajaqueroquee Jesoquirishito maasanopae inintaguetica Aapani Irioshi, ipimantatsinotsita apametojaro manaquea oavaetanaje, irooquee icomajareshirentacaantajajica.

¹¹ Irirajiaquea saserorotejia joriojia yoapinique Taverenacoroqui savincaguiterripaequi isaserorotetapinitigueti, yapijipijitapiniqueneri ijitorejajiniri viratsipae, cotanquitsiquea teequea agavejeroji oncatarogueru covaeguisHERENTSI.

¹² Cotanquitsiquea iricampani Quirishito Asaserorotemajate aparoquee ipimantaca imetojaventsijigaro covaeguisHERENTSIIJA manaquea oavaetanaje, ariquee isenampijapojajari Aapani Irioshi isavicapojaji itincamijempequiqui.

¹³ Chooca imaica yoguijacotaca iragavejamajaquerigueti Aapani Irioshi maasano catsimajiaquerica, ariquee onquejevequemparu Quirishito irovanquegontatsitempariquea catsimajiavecarica,

* **10:7 yampinaicameshinajitaqueca.** Coramani tequeratagueti intsajiteroju paperi, manaquea itioncantacaro imeshinaqui, yampinaicacotsintaroquee maviquijite inchaquiji. [☆] **10:7** Sar. 40.6-8.

14 iroorijite aparoquea ipimantacagueti yoganejencashirentacaavaetajiriquea icomajashirentacaajiajica iroganejencashirentaguitempani.

15 Ariqueate iquempetaca Ishire Aapani Irioshi iriatimpa icantacomajacajiro, iroquetitaquea icanque:

16 “Icanque Majirontamajatatsica: ‘Jero paaquito nonetsanajiaquenerica oncoramanitapojajeguetai avisanajempaguetai ajagantsinipae: Noamajaqueneri nogantacaantanejia ishirejiaqui, nontioncantsitenempari iguenquejanejiaqui.’ ”[✧]

17 Ariquea icantsitaquea aisa:

“Aatoquea noquenquejimatajirotsi maasanopae igovaeguisherajia, maasanojia ipeacaaguishevaevecaca.”[✧]

18 Aritarite impeacomajatanajemparoguetai covaequisherentsi, aatoquea ijitorejimentajitajiro.

Anquempejiquempejiipojajemparija Aapani Irioshi

19 Irootaquequea, napitsarorentarijiate, aatoca atsaroacaantaro amanapojajiri Aapani Irioshi, iroguentitari quijacaanacajine Igovejencamajarequi iriraja Jesoquirishito.

20 Itanarejavoquitajajiro iroaqueravoquitica anijashirentacaantantatsica avisana-jeroniji ticaamorenaveatatsica, irootarite quempecaroca itsino ipimantatsinoventajiacajiguetai.[†]

21 Ariquea ipeapoja asaserorotete anaantamajatatsica, isaseroroteventajiaqueri maasanojia yashintajiacaca Aapani Irioshi.

22 Jaameshiatsi anquempejiquempejiipojajempari Aapani Irioshi, iintsija anintamajateja, atsamajaquetarite Iriomajaca aventaventaitantaquemparica, itsiquirijashirentajitacajitarite irisaancacojitajajironijite coguisherentsi chagashirentavecajica, aisa aquivatsinotantajaroquea saancajariqui.[‡]

23 Jaameshiatsi ancoguitempani antampishitashiguiteroni irinetsanataquero maasano atsavetacotanqueca, aatojate asanticotavaji, atsajiaquetari iriratari camancajica: “Nonetsanatacaamajaquempiro”, icocaniquea inetsanamajatiro maasanopae icanqueca.

24 Jaame anquenquejamajateroja quero ancoqueroni antampishishirentavacaajiaquempaguetai ampintsatantamajataquempaniji, aisa ampeacaimenquemparoniji cameetsaguetatsica.

25 Aatoquea avashiantirotsi acapiocapinijiacaguetai, choocapaetari quejepiniquero caovashiantapinitiroca icapiocaguetai, manaqueate aatimpa antampishitavacaajianaquempaqueate. Arimpa agaamajatanaquempa amenavajeroguetai irooshipojaji savinca-guiteri incoraquetantapojajempaca Amajirote.

26 Antsamajavequemparoguetai iroomajatatsica, cotanquitsiquea avashiantanajeroguetai, jatanatsiguetai ancovaecovaeguisheretanajempa, teequea inchoocatajeji metojaventajeroneca agovaeguishere.

27 Iroguentishiatsi choocatanquitsine mintsaroamajacajineca oguijavetavajemparoguetai oncatsimatacaantajinishiatsi ompishoncacaantajinishiatsi camorecariqui quichagantemenquimajatatsica, ontaniquiquea interoncapojaquempa maasanojia catsimatiquerineca Aapani Irioshi.

[✧] 10:16 Jer. 31.33. [✧] 10:17 Jer. 31.34. [†] 10:20 Imetojaquaguetai Jesoshi opecotarejanaque ticaamorenatanquitsica teemporoqui jocagatsica aatonijite iquijajitiro intosompoguiremajacaqui (Mt. 27.51; Mr. 15.38; Irc. 23.45). Opecotarejanaquaguetai iroguenti quempecaro yatsipetsinovaecaguetai anquijaquijaitanajeniji ichoocamajatiguetai Aapani Irioshi. [‡] 10:22 *aquivatsinotantajaroquea saancajariqui*. Iquenquejacaajajiro saancajari iquivantajiacaca saserorotejia (Eq. 29.4) aisa irevitajia coramani iramaneriguetai Aapani Irioshi (Nm. 8.6-7). Choocacantajianquitsica arica ocantacotaquero aisa avifacajatacantaquetai oguijatacotaquerguetai Quirishito.

²⁸ Paesatoniqui icanque Aapani Irioshi quericaca aatoca iquemisantirotsi itioncaca cotanaqueca Moishishini, choocagueti mavite amenaquerica irooca 3, irimetojajiqueriquea, aatoquea ipintsatacojitaritsi.

²⁹ Yogaamajatanacaquea covaeguishedacotarica Irijanite Aapani Irioshi, oquejevetaca mana yagatigativaequeri intati, icantacoguisheditiro iriraja Jesoshi. Oraquea iriraja iroguenti ashi paaquito, osaancashirentavecari iroaqueragueti. Iquejetacagueti mana icantaguishedaqueri Ishire Aapani Irioshi cavintsajajiacajica, caaviji incatsimamajajitaqueriquea.

³⁰ Atsamajajiaqueritari iriraquea cantatsica: “Naroguentiquea quenqueventaquerine caquinte. Inchiquiojitaquea naatimpa nonquenquejacaantaque noncatsimajiaqueriquea.”✧ Otsipa tioncanquitsica ocanti: “Irraquea Amajirote iramenitsijiguempari igaquintejiate incantsitempaquea queri covaeguishedanquitsica.”✧

³¹ ¡Ocovejencamajataque irajiricantaquegueti Aapani Irioshi anijatsica!

³² Imaica pinquenquejajiguerojate aviatimpajia coramani iroaqueragueti pitsivoshirentacotapojajigueti patsipetacovaecaquea yashimirintashirentajivequempigueti, arimpaquea pitampishijianaquequeate pitsariventajanacari teequea povashiantajigueroji.

³³ Piconoagarantajia icaramirincatashivaetanaquempiquea icatsimajitaquempigueti icantaguishedacojiaquempigueti yatsipetacaajitaquempigueti. Aisa oconoacaquea manaquea pisenampijajiacari papitsariventarijiate pamenajiaquegueti iquejetacaajitacarigueti iriatimpajia.

³⁴ Pipintsatacojiacari isantanatacojitaqueca, aisa yaapitsatsijiquempirogueti pashincaca pishinevaetanaqueate, pitsajiaquetari choocatarite pashincaca inquitequitica anaavaequeroca, aatotarite oteroncajatsi.

³⁵ Irootaquequea pintampishishirentanaquempaca, aatoquea pitsarogui, pinquejegerogueti imaica irishinetacaavaetavajempi Aapani Irioshi.

³⁶ Pinquenaquero pinetsananaquerogueti inintaguetica Aapani Irioshi cameetsanijite paampojajemparoca icantsijiaquempica.

³⁷ Aritarite ocanque Itioncacaantaqueca Aapani Irioshi:

“Irooshipojishiatsi incoraquetapoje coraquetanquitsineca. Aatoquea osamani ipeatsi.

³⁸ Irraquea comajashirentanquitsica incoquempani inchoocaguiteni irooriji yaventa-guitarini Aapani Irioshi.

Arigueti impianaje, aatoquea noshineventajaritsi.”✧

³⁹ Cotanquitsiquea aatimpajia teequea anquempajiguempariji pianajatsica oahoaitananquitsineca camorecariqui, iriguentitari aquejetaja aventaguitarinica inchoocatantaguitempanica.

11

Coramanipaequitica aventashirentajiacarica Aapani Irioshi

¹ Oraquea aventashirentacarigueti Aapani Irioshi iroguenti ocanque arimajaca atsamajiaque inetsanamajatiro icanqueca. Choocatarite oganejencatatsica teeca amenajivetemparoji imaica, cotanquitsiquea aventashirentaquemparigueti atsajiaque arimaja amenajiapojajero oncoramanitapojajigueti.

² Irootaquequea ishineventantajiacarica Aapani Irioshi irirajia coramanipaequitica, manaquea yamenajiaqueriquea yaventashirentacari itsamajiaquequea irinetsanamajataqueroquea maasanopae icantaquequeca.

³ Oraqueate aventashirentajiacarigueti Aapani Irioshi irootaquequea atsatantajiacaca paesatoniqui iroaqueragueti irioquea peacaaguetacaroquea maasanopae quepatsi, inquite aisa maasanopae choocatantaguecaroca. Teequea taaca opaji

choocatimatatsineca, cotanquitsiquea icantimaquitiguiquea ariquea ocotanaca ochoocaguetanaque maasanopae.

⁴ Pinguenquejerija Averini yaventashirentacarigueti Aapani Irioshi, ijitorejaqueriquea ivira yojocaqueneri, ariquea ishineventantacarica yamenaqueriquea quempetaca teeca incovaeguishetimatempaji. Iiraquea yojocaquenerica yanaaqueriquea yojocavetacananica irira Caini.* Imaica imetojavecaquea Averi, cotanquitsiquea ochoocataji iquenquejacojitajiri yaventashirentacarigueti.

⁵ Ariqueate iquempetaca Enoconi iriatimpa, yaventashirentacarigueti Aapani Irioshi yatsomajantajitanajarica inquitequi maasanotsino, teequea irimetojeji. Tee irinejajitajeriji irooriji yatsomajanajiri Aapani Irioshi. Aritarite tequeratagueti irantsomajatsinonjiteriji, icantacojitaqueriquea irio ishineventaca Aapani Irioshi.

⁶ Cotanquitsiquea Aapani Irioshi aatoquea ishinetantimatatsi intati aatogueti yaventashirentajitari. Taacagueti nintanquitsineca inquempejipojajeri iroquetitaja intsamajaquequea arimaja choocasacanica, aisa intsamajaquequea incavintsajamajajivaqueriquea maasano coamajaguetajerineca.

⁷ Iiraquea Noeni yaventashirentacariquea Aapani Irioshi, irootaquequea itsavetacotsicarogueti teeca iramenajiteji, omintsaroanaqueri ipeacaantantanacaroca quenajarontsitsantsa icantajitica aareca, aatonijite yojocajajigatsi arejetapojempagueti agamirijaatantapojempaca incani anaaguetanaqueriquea maasanopae quepatsi. Aapojacagueti iquijantanacaca iriatimpa, irijanijiate, imanquigare aisa iranropae, teequea irojocajajiguempaji. Iquemisanquegueti Noeni yonigaantaqueriquea iquejetacaantajiacaquea quepatsiquitica, iteroncamaajatantajiacaca. Irirampani Noeni yaventashirentacarigueti Aapani Irioshi yamenancanica quempetaca teeca incovaeguishetimatempaji.

⁸ Ariqueate iquempetaca Averaameni, yaventashirentacariquea Aapani Irioshi, itsaque inetsanamajaqueriquea icanqueca, irootaquequea yoantanacaca icanquerigueti iroanaquequea otsipaquei quepatsi irashinquemparoquea, teequea intsavetempaji querocaca iroanaqueni.

⁹ Yaventashirentacariquea Aapani Irioshi, irootaquequea iguintenitomotantajiacarica otsipapaequi quepatsi icantacaquerica Aapani Irioshi irashinquemparoquea, manaquea ichoocatimotantapojaque intati irooriji iquejetaca tequeratatiraja irashintemparoji. Iroguenti ichoocatantapojaca quitsaarentsivanco. Iroompaquea ariquea iquempejiaca Ishaaconi aisa Jacovoni, ariqueate iquempetacaajiacari Aapani Irioshi iriatimpajia icantajiaqueriquea irashintamajaquemparoquea oratica quepatsi.

¹⁰ Icocani iquempetaca imaica Averaameni irooriji itsamajaque intsipatsipaitajempariquea maasano tsarotentajianquitsineca iriguintenitantapojajemparoquea oganejencatsovironaquiripae quishomajatanquitsica iquenquejacotsitacaca Aapani Irioshi ipeacaajiacanarica.

¹¹ Ariquea oquempetaca Sarani iroatimpa jac quenquevaromajavetanaja aatometarite ichoocatime irijanite, cotanquitsiquea aventashirentanacariquea Aapani Irioshi, amenaquetari irinetsanamajaqueriquea icanqueroca: “Inchoocaque pirijanite”, irootaquequea ichoocatantacaca.

¹² Ariqueate iquempetaca iriatimpa Averaameni jac quenquevarimajavetanaja aatomequea irijanintame, cotanquitsiquea irijanintaca, iroompaquea icaramirincavaetanaquequea ichoviquijianaqueca ooqueate teequea iragavejajitajeriji intsajajeriji, manaqueate iquempevirincavaetanacari impoquiropae irooca aisa impanequi ocaratsapijajaquitica inirojani quantijani.

* **11:4** Aapani Irioshi teequea irishineventempariji **Caini**, teequea iraventashirentemparinica iramaquenerime viratsi, iroguenti yaavetanacanari tsoroanquitsica iniganquitejirequi. (Pamenero Jen. 4.3-10.)

¹³ Maasanojia noquenquetsatacojiaqueca imaica icancani yaventaventashirentanacari Aapani Irioshi imetojaquegueti. Teequea iramenajivetanajemparoji irinet-sanateroji Aapani Irioshi maasanopae icantajiaquerica, cotanquitsiquea ishineventacotsivaecaro quejetaca yamenacovaequero jmmtacovaeque. Yamenacojiaca ocatiquea quepatsi teetarite iriguintenimajatemparoji, quempeca iquenaquenavaeque intati.

¹⁴ Oraqueate iquempejiaquerogueti imaica iro intsatantajitaquempaca icoaguetaquero iriguintenimajatantapojajempaca.

¹⁵ Iroomegueti inquenquejacojiaquemequea iguepatsite iquenaquenaitantapojacaca, iragavejaqueme iroaroaitanajeme.

¹⁶ Cotanquitsiquea iroguenti inintajiaquequea otsipa caavijica oganejencavaeca iriguintenitantajiapojajempaca, irootaquequea inquitequitica. Irootaquequea teeca impashiventantempaji Aapani Irioshi icantajiaquegueti: “Iriguenti Nirioshite”, ipeacaajijajaritari tsovironaquimajapae inconoavacaajiapojajempa.

¹⁷⁻¹⁸ Quempeca coramani ininquegueti Aapani Irioshi iramenanquempari Averameneni canqueri: “Paanaquerija pirijanite Ishaaco pintaaquenarijate.” Iriatimpa itsavetaca canquerica Aapani Irioshi: “Iriguentiquea nocantacotsitacaca Ishaaco pinchoviquivaetantanaquempaca”,^{*} cotanquitsiquea yaventashirentanacari, yaantanacarica intaaquerimequeate.

¹⁹ Itsaque intaaquerigueti Ishaaco iragavejaque Aapani Irioshi irovochantajeri. Ari-taque quejetacaquea metojaque iroompa pochatanaji yaavajiri.

²⁰ Iriaquea Ishaaconi yaventashirentanacari Aapani Irioshi, icantantacarica Jacovoni aisa Esaoni incavintsajamajaqueriquea Aapani Irioshi oncoramanitapojajegueti.^{*}

²¹ Iririquea Jacovoni yaventashirentanacari Aapani Irioshi, jero irooshiveca irimetojeme yovajecashitsita igotiquijiroqui itsariventanacari Aapani Irioshi. Icajemitsitari aisa irijanijiate Jose yamanacoventsitanacariquea incavintsajamajaqueriniji Aapani Irioshi.^{*}

²² Ariqueate iquempetaca Jose iriatimpa yaventashirentacari, irootaquequea irooshipojigueti irimetojanaje itsavetacotsitantacarica inchoviquijianaqueca Ishiraeri, canque irisotosotoitantanajemparo Ejepito. Iroompaquea icantajianajiri quero in-tonquijitajerini.^{*}

²³ Irirajia irijanintajiacarica Moishishini yaventashirentanacariquea Aapani Irioshi, irootaquequea itsititantacarica 3 taai iroaqueragueti ivoaque, yamenajiaqueritari igameetsareni teequeate intsaroacaajempariji majirontatsica cantajiavecarica irimetojitavaqueri.

²⁴ Ariquea iquenquevaritanajigueti Moishishini yaventashirentanacariquea Aapani Irioshi, irootaquequea teeca irinintantajempaji incantacojiqueri iroguenti irijanintajari irorijanite Paraone.

²⁵ Yamenanontantacaca iroguenti intsipatsipaitajempari irashijia Aapani Irioshi yat-sipetacaajitacariqueti, teetari irininteji irishinevenquempari coguisherentsi shineta-caanirotaquemparimeca taampinaca avisanaque.

²⁶ Aisa yamenaque caaviji anaaque ocameetsavaeque irantsipeventavaequempariquea Quirishito, anaavaequeroquea irashinquemparogueti maasanopae choocaguetatsica Ejepitoqui. Iroguentiquea yoguijacotaca incavintsajaqueriquea Aapani Irioshi oncoramanitapojajegueti.

²⁷ Yaventashirentanacariquea Aapani Irioshi, irootaquequea yovashiantantanacaroa Ejepito, caarica itsaroacaantantari majirontatsica icatsimaquerigueti, manaquea iquenaquero quejecaquea yamenaqueri irira Teeca Iramenajiteji.

^{*} 11:17-18 Jen. 21.12. ^{*} 11:20 Jen. 27.27-29, 39-40. ^{*} 11:21 Jen. 47.31-48.20. ^{*} 11:22 Jen. 50.24-25; Eeq. 13.19.

²⁸Yaventashirentanacariquea Aapani Irioshi, irootaquequea choocatirajagueti Ejepitoqui ipariantanacaroca icantajitica Paashicoa, icamantajiaqueri igonorojia irinetsanatavaquero icanquerica Aapani Irioshi, itsiquirijantaguetacaroca iriraja ovoapaequi osotomorotapojacagueti itsovironaquitepaequi, cameetsanijite incoraquequegueti irashivantite metojajiaquerineca iriquetica voapojatsica, aatoquea imetojitajiguiri irianijiate ishiraerijia.

²⁹Aisa irirajia ishiraerijia yaventashirentajianacariquea Aapani Irioshi, irootaquequea ocaranarejatatantacaca niganquija Quentijani Quityoncajaro oroguitetantanacaca isaquiritsaejianaquequea imontemonteitanacaroquea intatiqueroqui. Cotanquitsiquea iroompaquea iquejejiavepojaquea igoaretajiate Ejepitoquitica patimajiaavecara, ariqueate ocotanaca oquejetanajaquea aisa, yojocajajiaqueate maasano.

³⁰Irirajia ishiraerijia yaventashirentajianacariquea Aapani Irioshi, irootaquequea otaromaquirejantanacaca otantotantavetacaca Jerico, yanquitsaepinijiacarogueti 7 savincaguiteri.

³¹Oraquea Iraava icotapinijiavetaca yoashitapinijiguero, cotanquitsiquea aventashirentsitajari Irioshimajaca, irootaquequea icoraquejiaquegueti ishiraerijia amenanontantajatsica aahaitantavacarica cameetsa, teeca irimetojantajitemparoji iteroncajitaquerigueti teeca inquemisantajigueteriji Aapani Irioshi.

³²¿Queri itsipa nontsavetantajiaqueca? Aatoquea nagavejitsi notsitacacovaetiritsi maasano quejejiacarica Jereonini, Varaconi, Sasonquini, Jepeteni, Taavini, Samoirini aisa itsipajia tsavetantajatsicani.

³³Iriatimpajia yaventashirentanacariquea Aapani Irioshi, irootaquequea yagavejacaantajiacarica. Iconoagarantajiacarica yashimirintajiacari guinteninintsipaequitica, ariquea yagavejajiaqueri. Iconoagarantajiacarica yagavejajiaqueri irinetsanamentajiaquerinijite igonorojia iriguintenijiaquempaniji cameetsa, aisa yamenacojiaqueroquea icamantajiaquerica Aapani Irioshi irinetsanatacotsitantaquenemparica. Itsipajia yamimicacaajiacarica ajitsipae.

³⁴Itsipajia yanaajiaquero paamari osamimincavaevetacagueti. Itsipajia inintajivecaqueate irimetojantajiaquemparime tsaampitsantsameni. Itsipajia yojoquijianacaqueate teequea intampishijiajeji, cotanquitsiquea yogueshijiajiriquea Aapani Irioshi itampishitacaajiajiri. Itsipajia teequea intampishijiavetempaji, cotanquitsiquea oraqueate itampishitacaajiaquerigueti Aapani Irioshi irootarite itampishitantajianacaca, yashimirintajiacarigueti catsimajiaquerica yagavejajiaqueriquea yoguishi-antajiacarica maasano.

³⁵Oconoagarantajiacarica manquigarentsijia aventashirentanacarigueti Aapani Irioshi itancoretancoretantanjaca ometojacovecagueti. Itsipapae manaquea yatsipetacaajivecari, icantajivecari iroguipaquiijitajeri aatogueti itsaromentajiaritsi Aapani Irioshi, cotanquitsiquea teequea irovashiantajigueroji, itsajiaquetari aatogueti yovashiantajiguero intancoretancoretantaje oncoramanitapojajegueti iroaroaitanajequea ichoocatigueti Aapani Irioshi, anaavaetaqueroquea intancoretanivotanajempagueti teeca intsaromentajiguempariji.

³⁶Iconoagarantajiacarica itsipajia yatsipetacovaeca icantaguishejiaquerigueti ishironimentajiacarigueti, ipasapasataquerigueti. Itsipapae iroguenti yoishotantajiacariquea cavorejatsari isantanatacotsijitariquea.

³⁷Iconoagarantacaca imetojaqueri itsinatsinatantavaecari mapi, itsipapae manaquea iquitencaqueri mavicotate serochoqui. Itsipapae iroguenti imetojantajiacarica tsaampitsantsameni. Itsipapae manaqueate ishiasiavaeguitani, iriguenti iquitsaajiacarica ovejameshina aisa caaverameshina, teequea irashintimatempaji. Yatsipevaeca icoguetejacaovaeca, aisa yatsanajivaecari catsimacatsimatashijivaecari.

³⁸ Ishiapitsajianacari catsimajiaquerica yoayoivaetanaquequea oquitamamporo-roitapojaquegueti irooca aisa otsempitapojacagueti. Itsitijiaca imperitamoroqui aisa omoroguecagueti quepatsi. Irirajiaquea quempejianquitsica imaica caaviji yanaavaetaquequea icameetsavaejaque, yanaajiaqueriquea itsipajia quepatsiquitica.

³⁹ Iriraquea Aapani Irioshi ishineventajiacariquea yamenajiaquerigueti yaventashirentajiacariquea, cotanquitsiquea imetojajiaquegueti tequerataquea iramena-jigueroji maasanopae icantacaajiaquerica Aapani Irioshi.

⁴⁰ Yamenaquequea iriatimpa caaviji anaaque ocameetsavaeque intsipatsipaitacaji aatimpajia tsaromentajiaquemparineca Quirishito oncoramanitapojajegueti, incoma-jashirentacaamajiacaji aatimpajia maasano.

12

Jaame amenashirentaguiteri Jesoshi ashirequi

¹ Imaica atsajiaque icaramirincavaequequea coramanipaequitica quejetaca notsave-tacotsitacaca nigaantajiaqueroca arimaja yaventashirentajiacari Aapani Irioshi, yan-quitacojiacajiquea, quempetacaquea amenajiguerica shiashiavijijiatsica iramenanta-jitaquemparica queri shiamajatatsica, iroosacanica jaameshiatsi ovashiantamajatan-aqueroja maasanopae tenatavacajineca aisa coguisherentsijia avironcajiavacajineca, jaameshiatsi anquenavaquero ashiaguiteni ampampiavoquimajatanaquero inintacaa-jitacajica.

² Jaameshiatsi amenashirentacomajajianaqueriquea Jesoshi pariacajaiacajiroca at-saromentantancarica aisa irio teroncacajaiacajirone antsaromentantamajatanaquem-parica. Iriatimpa itsatsitacaro irishinevaepojajempa, irootaquequea yatsipevaetancar-oca coroshi, teequea oguipashiventajeriji irimetojantajitemparogueti, iroompaquea isenampijapojajari Aapani Irioshi imajirontagueti imajirontamentoqui, isavicapoja-jiquea itincamijempequiqui.*

³ Pinquenquejajiguerija iriatimpa atsipetacojiacarica covaeguishejiatsica catsimacatsimavaequerica, aatonijite pimagoshirentapojitsi, aatonijite pishimam-pojancamajatanaca povashiantajiguirotsi maasano.

⁴ Tequeratatirajatari osotoajatacaitempiro piriraja pashimirintajencatacarogueti coguisherentsi.

⁵ Pipeacojianajaro quenquetsatsarentsimajaca tampishishirentacaajiaquempica ipe-jaiquempigueti irijanijiate, ocanquetari:

“Irijani, aatoja pimanintavaquerotsija incantomajaquempigueti Majirontamajatatsica, aisa aatoquea pishimampojancamajatanaca incantimentajempirogueti pipeacaagui-shevecaca,

⁶ iroorijite Majirontamajatatsica icantomajajiguiriquea ivintsarejia, aisa icatsimatimentajiguiriquea igovaeguishere maasano ipejaiavajica irijanijiate.”☆

⁷ Incantomajaquempigueti Aapani Irioshi manaquea pantsipetacotavaquempari, manatari ipeajiaquempi irijanijiate icantomajimentantajiaquempiroca. ¿Choocampate chaajaniquiri teeca incantomajeriji iriri?

⁸ Ariqueate iquempetaca Aapani Irioshi iriatimpa icantomajajiguiriquea maasano ipeamajaqueca irijanijiate. Aatogueti icantomajajiguimpitsi, teequea impeamajatem-piji irijanijiate, quempetacaquea itsipaquea irijaninquempica.

⁹ Quempetacaquea chaajaniquitirajajigueti icantomajajiacajigueti irijanintajiacajica, manaquea amativicanaquequea amenacotanaqueritari cameetsani, iriompate Irijanintashirentajiacajica caaviji amativicajianaque incantomajajiacajigueti cameet-sanijite ancoquempani anchoocajiaje iriatimpaqui.

* **12:2 itincamijempequiqui.** Oraquea itincamijempequi, irootaque yamejiaca coramani iroguisavicaqueri ishineventamajatacaca. ☆ **12:6** Tsa. 3.11-12.

¹⁰ Iriraquea irijanintajiacajica icantomajajiacaji aparopae ajagantsinipaequi que-roca yamenaqueca cameetsatatsica, cotanquitsiquea iriraquea Aapani Irioshi icantomajajiacaji cameetsanijite ancomajamajajiaquempinijite anquempetantajianaquemparica iriatimpa yoganejencamatagueti.

¹¹ Arimajacaquea teequea ashineventemparoji icantomajacantomajajitacajigueti, ogatsireni, oshimampojancaanacaji, cotanquitsiquea anquenquejacomajajiaquerogueti quero ocoani icantomajantajitacajica, antsamajaquero itsatacaajiacajica, manaquea ancomajamajajianaquempaquea aatoca ashoshoguitetanta manaquea ashinevaetanaquempa.

Shoshoh pipomatsatirotsishiatsi icavintsajamajaquempigueti Aapani Irioshi

¹² Irootaquequea noncantantaquempica pintampishitacaanajero patsancovacore aisa pisorocagueretore.†

¹³ Pimpeacaaquempa pampavoquitanquitsica pinquenantaquempaca‡ aatonijite itacosatsi magotsari, mananijite impeanajempa.

¹⁴ Cameetsajate paavacaanaquempajate, aatoja picatsimatavacaanacatsijate, aisa pincomajamajajiaquempaja, aatotarite yamenimajiguiritsi Amajirote teeca incomajamajajiguempaji.

¹⁵ Pinquempoguijavacaajiaquempaja aatoniji ichoocatitsi pomatsataqueroneca icavintsajaquerigueti Aapani Irioshi, aisa aatoja pisemaneguintavacagatsija, inchiqiuojita oquejetarotsi quepishishitsaqui onto sorogueti, iroompaquea pincatsimatavacaajiaquempa, iraaajencatsijiavaquempiro caramirincajitsica.

¹⁶ Shoshoh poashijiguirotsijate manquigarentsi teeca irooquea pashi, aisa aatojate piquempejigaritsija Esaoni coramani, teequea inquenquejerinicate Aapani Irioshi icavintsajamajavecarigueti. Pitsajiaquequea aavetarigueti itase yamanitsivetariquea apatacoro isheca iriguentijeguite ichoviqui, cotanquitsiquea iriatimpa icanqueri in- inque inquejetajemparija quempetaca iriguentica iriquetica voapojatsi cameetsanijite irionijite ashinquempariniji oncoramanitapojajegueti maasanopae irojocaquenerica iriri pariapojatsica. Iroompaquea icanque Esaoni: “Iintsija cameetsavaeque”, iroorijite irooshipojaque aguerime itase.✧

¹⁷ Ariqueate inintavetaja inquempetajempaquea iroaqueragueti tequeratagueti inquejetempariji iriguentijeguite, cotanquitsiquea teequea iragavejajempaji incantashitajemparoquea icanquerica. Iraitsivetanacaqueate, cotanquitsiquea quero campate incotajempani, ipomatsaqueroquea.✧

¹⁸ Aviatimpajia teequea pinquempejiguempariji choviquijianaquempica oahoitananquitsica coramani otsempiqui Shinaiqui yagavejajiquero impamijiquero. Iri-atimpajia iroguenti yamenajivaqueroquea osamimicatsempitanaquogueti, opitsecasecantajencavaetanaquequea ocanca, ochovigaguitevaetanaquequea jeoc jeoc jeoc.

¹⁹ Iquemajivaqueroquea tivorensi itivojiqueroquea. Ariquea iquemajiaquerigueti Aapani Irioshi iquenquetsatacaquerigueti, ariquea icojianaca itsaroajianaque, icantantajiacarica Moishishini: “Iintsishiatsi aatojate iquenquetsatacaajajitsi.”

²⁰ Iquempetantajiacaroca imaica itsaroantajianacaca irooriji icantajiaqueri Aapani Irioshi: “Incoraquetimaquogueti taaca ipajita incatiaquemparogueti ocatita otsempi nochoocatantacaca pintsinatsinavaequeriquea irooca pinquentajiaqueri, pimetojitempariquea, irioca viratsi aisa caquinte.”✧

† **12:12** *pintampishitacaanajero patsancovacore aisa pisorocagueretore.* Manatarite iquejetacaacotacaroteeca intampishitashiteroji inintaguetica Aapani Irioshi. ‡ **12:13** *Pimpeacaaquempa pampavoquitanquitsica pinquenantaquempaca.* Iroguentiquea iquejetacaacotaca incanquerigueti: “Pincomajamajajiguempajate aatonijite povashiantacaguiritsi papitsaroveritarite teemajaca intampishiteji.” ✧ **12:16** Jen. 25.29-34. ✧ **12:17** Jen. 27.30-40. ✧ **12:20** Eeq. 19.12-13.

²¹ ¡Ooshiatsi ocovejencavaequequea yamenajiaqueca! Icantantacaca Moishishini: “Notsaroamajatanaque nocanca nompioncavaetanacaqueate.”✠

²² Cotanquitsiquea aviatimpajia quempetaca jac arejevaetapojajimpiquea Shionetsempiqui, Jerosaremajacaqui inquitequitica, irootaquequea ichoocatantacaca Aapani Irioshi anijatsica. Piquempejitacopojajari irashivantijitete icaramirincavaequequea icanca itsaromentajiacariquea Aapani Irioshi.

²³ Pitsipatsipaitapojajari maasano irijanijiate Aapani Irioshi tioncacojianquitsica inquitequi, iquejetacaajajari iriquetica voatsi. § Aisa pitsipatsipaitapojajari Aapani Irioshi amenajiguirica maasano caquinteja, irio cantatsica queri comajamajatatsica aisa queri teeca incomajamajatempaji. Ariqueate pitsipatsipaitacariquea ishirejia comajarijia yogameetsashirentajitajica.

²⁴ Aisa pitsipatsipaitapojajari Jesoshi asatecapojanquitsica niganqui onetsanama-jaquempaniji iroaquerari paaquito, irootarite iriraja iriatimpa itsiquirijaventajitaquem-mpica. Oraquea ocantacoqueca anaavaequeroquea ocantacoqueca iriraja Averini.*

²⁵ Iroosacana imaica pipigatsataritsi Aapani Irioshi quenquetsatacaajiaquem-mpica imaica. Coramani teequea iragavejajigueti irishiapitsatanaqueri pigatsajavecarica icantajavecariguete acaniqui quepatsiqui. Aatimpajia ¿arimpate agavejaque ashia- pit-satanaqueri ampigatsajiaquempariguete inquitequitica cantajiacajica: “Shoshoh”?

²⁶ Oraqueate iquenquetsatacaqueriguete Aapani Irioshi coramani imoguecanaque- roquea quepatsi, cotanquitsiquea imaica icanque: “Apanivani nomoguecajeta, cotan- quitsiquea aatoquea aparo quepatsi, nonquejetsitemparoquea aisa inquite.”✠

²⁷ Icanqueguete “apanivani”, iroguenti oncanque impishoncaguetajero maasanopae ipeacaaguecaca agavejanquitsica omogueque, irooquea choocatajatsine caarica moguecatsi oncoquempanica onchoo- caque.

²⁸ Oncoramanivaetapojajeguete ariqueate ancoquempani anchoocataje ontaniqui amenajiaqueroquea caarica moguecatsi caarica teroncatsi, antsipatsipaitajempari Aa- pani Irioshi imajirontaguete. Iintsija imaica ancantajiguete: “Ariotesaa.” Antsaroacaa- jiaquempari antsaromentajiaquempariguete, ancantajiguete: “Caaviji poganejencama- jata”, irootaquetari ishineventacaca iriatimpa.

²⁹ Iriratarite Arioshimajate iquejecaroquea samimicatsantsajencaro teronquiroca maasano otaaqueca.✠

13

Quero ancojiaquempani cameetsanijite irishineventajiacajinijite Aapani Irioshi

¹ Pincoquempanija pimpintsaguitemparini papitsaromentarijiateni.

² Incoraquejiaqueguete papicaquinteteni incoguitejacojiaquempaguete querocaca irimaajiapojaqueni, aviatimpajia paajivaquerijate pitsovironaquitequi pincav- intsajitempariquea. Ichocagarantajiaquetari itsipa teequea intsajigueti iriguente yaajivaquequea irashivantijitete Aapani Irioshi.✠

³ Pinquenquejacojiguerija isantanatacojitaqueca quempeni pitsipatajari isantanat- acojitaquem-mpiquea. Pinquenquejacojiguerija aisa yatsipetacaajitacaca quempeca aviguentijica atsipetsipeitanquitsi.

✠ 12:21 Ireo. 9.19. § 12:23 Iriraquea *iriquetica voatsi* iriguentiquea ashintamajatajemparone yashintaguecaca iriri. * 12:24 *ocantacoqueca*. Oraticaquea iriraja Averini iroguenti ocantacoque incatsimatimenqueri Aapani Irioshi metojantatsica aisa itsipajia covaequisherijia. (Pamenero Jen. 4.10.) Orampani iriraja Jesoshi chovivinca- jatananquitsica imetojaventajiacajiguete, iroguenti ocantacoque irishetajeneri igovaeguisherijia maasanojia aven- tavitantajemparinca. Irootaquequea anaavaetantacaroca. (Pamenero Ev. 9.12; 10.19; Cor. 1.20; 1 Jn. 1.7.)

✠ 12:26 Ajeo. 2.6. ✠ 12:29 Ireo. 4.24; 9.3; Mt. 3.12; 2 Ts. 1.7-8. ✠ 13:2 Jen. 18.1-8; 19.1-3; Irm. 12.13; 1 Pe. 4.9.

⁴ Pincomajamajianaquempaueate, apaniroqueate poanaquero pimanquigare, aatojate pinintitsi otsipa. Ariquea pinquejejaquempa aviatimpajia manquigarentsijia apaniroquea poanaqueri manquigatimpica. Incatsimatimentajiaqueritari Aapani Irioshi quericaca teeca irampanironteroji imanquigare, iriguentijiaca aisa oashijiguiroca manquigarentsi teeca irooquea imanquigare. Ariquea inquejejaquemparoquea Aapani Irioshi manquigarentsijia oashitirica itsipa shirampari.

⁵ Aatoquea pishineventamajigaritsi imentaqui pincaraquisequivaequeri. Taaca opajitapae pashincaca pishinejaquempauea, icanquetarite Aapani Irioshi: “Aatoquea notsinampirejimpitsi, aatoquea novashiantimatimpitsi.”[✧]

⁶ Irootaqueuea aatoca atsaroantamajata ancantantajiaquempaca: “Irraquea Nomajirote irio amiquenaca, aatoquea notsaroguitsi. ¿Querocaca incojiavetaquenani caquinteja?”[✧]

⁷ Pinquenquejajerija jivajiguimpica tsatacaajiaquempica Iguenquetsatsare Aapani Irioshi, pamenajiaqueriquea quero icojiacani iriatimpajia, taa opaji sotoananquitsineca, ariquea pinquempequempeitanaquemparija yaventashirentamajacarigueti Quirishito.

⁸ Irraquea Jesoquirishito teequea incantashitatiguempaji, icocani iquejetaca coramani, arejevaeca imaica, ariquea incoguitempani inquejeguitempani.

⁹ Aatojate poguijatacotirotsi itsatacaantamampeajitica teeca onquejetemparoji Quenquetsatsarentsimajaca. Oganejencavaetaca ontampishishirentajiacaji igavintsajare Aapani Irioshi. Aatoquea iro tampishishirentaji ashecaquempaca irooca antiquempagueti. Maasano quejetaroca, aato amishirentaji.

¹⁰ Choocaquea ashijia aatimpa aretarete* imetojajitaquerigueti metojavencajica. Oraticaquea teequeate iragavejeji irishecatacotsitemparo saserorotetevantquitsica Taverenacoroqui iroquetinica.

¹¹ Irraquea saserorote anaantamajatanquitsica iroguenti yaajatapinijiaqueroquea iriraja viratsipae Igovejencamajarequi Aapani Irioshi intsompoguiremajacaqui Taverenacoroqui cameetsanijite oshequempanijite covaeguisherentsi, cotanquitsiquea oraquea itsinopae manaquea itajaiqueroquea osotsiquivaepojaquegueti iguintenijiacagueti.

¹² Ariqueate iquejetaca Jesoshi iriatimpa, manaquea yaajitanaqueriquea osotsiquivaepojaquegueti iguintenijiacagueti isotoacaitsitanacari osotomoroqui, ariquea yat-sipevaetaca imetojaque cameetsanijite irogameetsashirentantajajironijite iriraja.

¹³ Irootaqueuea noncantantajiaquempica imaica, jaame ovashiantaguetanaqueroquea maasanopae aventajiacaca paesatoniquitica, oahoaitashitanaqueri Jesoshi, onquejetaquempauea oahoaitashitanaqueri osotsiquivaepojaquegueti, aatoja atsaroacagaro intsojencajitacaji quejetaca itsojencajiaqueri iriatimpa.

¹⁴ Ocaniquitarite quepatsiqui tee onchoocatenica aguintenitantajiaquempaca oocanica ochoocati, manaqueate oguijacojiacaroquea guinteninintsimajaca irojocajiacajica Aapani Irioshi oncoramanitapojajegueti.

¹⁵ Aatimpajia atsaroventajiacari Jesoshi, irootaqueuea noncantantajiaquempica jaameshia ashineventajiguempari Aapani Irioshi ancantajiaqueri: “Caaviji poganejencamajataca.” Irootaqueuea quejevecaroca yojocajitinirica aretarequi. Irooquea sotoantanaquemparoneca itseraqui cantatsica: “Irio Nomajiromajate Jesoshi.”

[✧] 13:5 Ireo. 1.6, 8; Jos. 1.5; Pp. 4.11-13. [✧] 13:6 Sar. 118.6-7. * 13:10 *aretarete*. Icanquegueti aretarete manaqueate oquenquejacaacajiro coroshi imetojantacaca Jesoshi, itsicarejanajiro iroquetica paaquito. Anquenquejacotajerigueti ashecatajempargueti pan cantacoqueroca itsino, oquejevacaquea ashecatacotaquempari aretarequi. Irirajaquea ogantagatirajagueti iquenquejacotiro iroquetica paaquito aato yagaveja ishecatacotaro iroaqueratica paaquito.

¹⁶ Aisa aatoja pipeacojigaro pantaguetaqueja cameetsaguetatsica, pamitacotava-caaquempaquee pincavintsajavacaquempa, irootaquequea ishineventacaca Aapani Irioshi quejevecaroca yojocajitinirica aretarequi.

¹⁷ Pinquemisantajiguerija jivajiguirica tsaromentajatsica, aatoja pipigatsajigari. Iccanitari iquempoguijashirentajiaquempi, itsajiaque oncoramanitapojajeguete incati-imojiaqueriquea Aapani Irioshi incamanqueriquea quero icojiaquempini iquempoguijajiguimpiguete. Pinquemisantajigueri irishinetimentaquempanijite irinetsanaquerogueti, aatonijite otenatiri. Ontenavaequeriguete, aato amishirentimpi aviatimpa.

¹⁸ Pamanacoventajiguenaja. Notsamajajiaque tee onchoocatajeji chagashirentajenaneca, nonintajiaquetari noncoguitempani noncomajatimenquemparo maasano.

¹⁹ Nonintamajaque pamanajiaqueriquea Aapani Irioshi cameetsanijite taampinanjite namenajiajempiniji nontsipajiajempiniji.

Iteroncapojaqueroquea tioncaquerooca

²⁰ Iriaquea Aapani Irioshi iriguenti choocatacaajiacajica cameetsa aatoniji ashoshoguiteta, aisa iriguenti vochantajiri Amajirote Jesoshi quempoguijamajacajica aatimpajia irovejajiate. Iroguenti ivochatantajarica iriraja ashi paaquito coguitatsineca.

²¹ Imaica noninque Aapani Irioshi iragavejacaantaquempiro maasanopae cameetsaguetatsica pinetsanatimenqueroniji inintaguetica. Aisa noninque intampishishirentacaamajajiacaji cameetsanijite ancomajamajajiaquempaniji ashinetacaajiaquempariniji, iriguenti iragavejacaantajiacaji Jesoquirishito. Ancoguitempanijate ancantacoguiteterini Quirishito: “¡Caavijisano poganejencamajata!” Ari oncoquempa.

²² Napitsaromentarijateni, noninque pampatsajavantamajatavaqueroja ocatica notioncajiaquempica, aato piperatsitavaquenaro notampishitacaaquempiguete, capichatsajeaniquitari.

²³ Imaica noncamanquempiquea iriraquea apitsaromentarite Timoteo jac isantanatacorejajitajiri. Incoraquetajeguete taampina, nontsipatajempari noajiaquite namenajijatempi.

²⁴ Pincantajiguerija maasano jivajiguimpica aisa maasano yashintajiacaca Aapani Irioshi, noninque inquemacojiajenaja choocana noquenquejacojiajiri. Ariquea iquempejiaca irirajia Itariaquitica inintajiaque pinquemacojiajeri chooca iquenquejacojiaquempiquea.

²⁵ Imaica noninque maasano aviatimpajia incavintsajamajajiaquempiquea Aapani Irioshi.

ITIONCAQUECA SANTIAGO

Antsatantaquemparoca

Ocatica iroguenti antsatantaquemparoca itioncaqueca Santiago itioncaciaquenerigueti ishiraerijia tsarotentajiacarica Jesoshi oaguetananquitsica quepatsipaequi. Iri-raquea Santiago irio jorio iriguentijeguite Jesoshi. Iquenquejajitaque itioncaquero ocatica paperi ajagantsiniqui irooca 40, irooca otsipaqui ajagantsini arejevaetacaro ajagantsini 60. Itsipajia iquenquejajiaque itioncaquero tequerataguete intioncajerioji otsipapae paperi choocajianquitsica ocaniqui paperiqui icantajitica *Tsavetacoquerica Jesoquirishito*, arica ajagantsiniqui 40, irooca otsipaqui ajagantsini arejevaetaro ajagantsini 50.

Acaniqui paperiqui icantajiaqueri quemisantajiaquerica Jesoshi intampishitashijiaqueroja yatsipeventajiacariguete (1.2-4, 12-18). Itsatacaajiaqueri cameetsaguetatsica irantajigueca quemisantajiaquerica Jesoshi (1.5-11, 19-27; 2.14-26; 3.13-18; 5.7-20) aisa taa opajita teeca oncameetsateji irantajiaqueroguete (2.1-13; 3.1-12; 4.1-17; 5.1-6).

Iquenquetsatacaajiaqueri irira joriojia quemisantajiatitsica

¹ Naroguenti Santiago tioncaciaquempiroca oca, naroguenti savicaventiroca inintaguetica Aapani Irioshi aisa Amajirote Jesoquirishito. Imaica nonintaque nontioncaciaquempi maasano aviatimpajia oaguetananquitsica quepatsipaequi, aviguentijia ichoviquijiaqueca irijanitepae Ishiraerini carajianquitsica 12.*

Intampishitashijiaqueroqueate maasano irantsipejiaquempaca

² Napiguemisantarijiate, pantsipejiaquempaguete taaca opajitapae pishinejiaquempaqueate.

³ Pitsajiaquetarite aatoguete piquemisantajiguero patsipejiacaca irosati pamananaqueri Aapani Irioshi, ariqueate pintampishitashijianaquero pincoguitempani.

⁴ Cotanquitsiquea irosati pintampishitashimajajianaqueroja cameetsanijite pinquenquejamajiaqueronijite ora taaca opajitapae cameetsaguetatsica aisa cameetsanijite pincomajamajajianaquempaniji, pagavejajianaquenijite pintsamajajianaquero inintaguequeca Aapani Irioshi, aatoniji oquempevaetacaguimpi taaca opajitapae quempevaetacaantatsica.

⁵ Choocaguete oraniqui tequerataca intsamajajiguero ininqueca Aapani Irioshi iramanajiaqueriqueate incantajiaqueri intsatacaimentajiaquerinijite. Iriatimpa inquemajiaqueri, igantagatarite iquemiri amanajiguirica ariqueate itsatacaamajajiaqueri, tequea incanteji: “¿Quero ocotaca pamanantaquenaca?”

⁶ Cotanquitsi quericaca cantaquerineca Aapani Irioshi intsatacaqueri intsamajataquequeate arimaja intsatacaqueri, aatoqueate icantajigui: “Aricampa aatoca iquemana, aatocajate itsatacagana.” Maasanotarite quejejiatsica imaica mana iquejejiacaro otamacojatiguete quentija itampijatiguete choviga, ariqueate ojaquiti von von, yoguipiguipijaatanaqueroqueate.

⁷⁻⁸ ¿Arimpate inquemiqueri Aapani Irioshi irica quejetiroca imaica? Aatoquea iquemiri, teenicate apaniro oneji iquenquejamajataqueca manaqueate iroota icanti iroota icanti. Ari oquejetaca aisa yantaguevetacaca teenica intsateji quero incoquempa.

* **1:1** Icanqueguete ocaniqui **oaguetananquitsica quepatsipaequi**, icantacojiaqueri quemisantajiaquerica Quirishito, yamenaqueriquea yoaguetanaquequea guinteninintspaequi quejetaca iporocajianaque coramani ishiraerijia icatsimajiaqueriguete Ashiriaquitica aisa Vavironiaquitica.

⁹ Cameetsavaetaquequeate irishinejiaquempaguete irirajia apiguemisantarijiate ni teeca iranaantajigueti, ipejiaaqueritarite Aapani Irioshi irijanijiate.

¹⁰ Iriraqueate apiguemisantarijiate ni ajaarantajatsica cameetsavaetaquequeate irishinejiaquempaqueate intsatacaajiaqueriguete Aapani Irioshi aatonijite yaventacojajaro yashintajiacaca, manatarite iquejejiacaro ovempenaqui teeca onquishopempenaquiteji, tee osamani onchoocateji.

¹¹ Arimpate iroatimpa arimpaguete icatsirincaguitemajatiaguete catsirincaiteri icatsirincatanaqueroguete ariqueate jac oshimpeguiricanaquequeate opariapempenaquitanaque teequeate oncameetsapempenaquitanajeji. Ariqueate iquejejiaca ajaarantajatsica aatoqueate osamani ichoocajiguiti, manaqueate taampina irimetojajianaque irovashiantaguetanaquequeate maasano isavicaventavecaca.

¹² Quericaca teeca inquemisantajeroji yatsipeguetacaca mana arimpaqueate itampishitashitanaquero ariqueate icavintsajamajataqueri Aapani Irioshi, yamenaqueritarite itampishitashiquero tee inquemisantero. Ariqueate intancorejajeriqueate, aatoquea imetojajitsi. Ariqueate inquejetacaajiaquempari maasano pintsamajajigarica, irinetsanataquero icanqueca iroaqueraguete.

¹³ Choocaguete quenquejanquitsica irante teeca oncameetsateji aatoqueate icanti: "Iriguente quenquejacaquenaro Aapani Irioshi." Iriraqueate Aapani Irioshi teenicate irinintenicate irantaquero teeca oncameetsateji, aisa teequeate inquenquejacaanteroji yantaguishejiguica.

¹⁴ Inchiquiojitarite iquenquejashitacaro iriatimpa inintaquequeate irantaquero covagueishetatsica. Irooqueate agavejaquerine inintaguisqueta.

¹⁵ Iroquetiqueate ocoraquetashiqueri iquenquejaquero, coajica inintamajaquerogueti ariqueate yantaquero. Oraqueate yantaquerogueti irooqueate onquenantanaquempa iroantanaquempaca camorecariqui.

¹⁶ Napiguemisantarijiate ni nopintsamajajiacaca, aatoqueate avisatiqueate amatavijaijaatsi.

¹⁷ Aapani Irioshi icavintsajamajajiacajiqueate irootaquequeate maasano cameetsaguetatsica irioqueate jocajiacajiro. Iriatimpa iriguente peacaaguetarica taai aisa impoquiro jeri aisa catsirincaiteri savincaguitetacotantatsica. Teequeate incantashitaitiguempaji, irosati icocani icavintsajantamajati.

¹⁸ Irijanintajiacaji, inchiquiojitarite inintaque iriatimpa. Irootaquetari choocatacaajia Quenquetsatsarentsimajaca. Aatimpajia aroguentijia aroquetica irijanintajiacaca ajivatimentajiaquerinijite maasano irijanintajiaquempaca.

Quero incojiaquempani inquemisantamajajiaqueguete

¹⁹ Imaica, napiguemisantarijiate ni nopintsajigaca, pintsajivaquero oca: cameetsataque taampina anquemavaquero icancajica itsipa, aatoquea aquenquetsatacaguiri taampina tequerataguete anquenquejamajateji querocaca ancantari, aisa aatoquea taampina acatsimati.

²⁰ Ancatsimajavetaquempaguete aatotari agaveji anetsanatero inintaguetica Aapani Irioshi, aato agaveji ancomajamajaquempa.

²¹ Irootaquequeate nocantantajiaquempica povashiantajianajero maasano piquenquejaguishejiguica, aisa taaca opajitapae pantaguishejiguica teeca oncameetsateji. Aato paventacojiga manaqueate pinquenquejamajajiaquero Iguenquetsatsare Aapani Irioshi itsatacaajiaquempica, irootarite meshiajajimpi.

²² Aatoqueate piquemashitaro intati manaqueate pinquemisantamajajiguero quero ocanqueni ariqueate pincojiaquempani. Oraqueate managuete pinquemashijiaquempari intati avisatiqueate amatavijaijaatsi.

²³ Quericaca quemashitaroca Iguenquetsatsare Aapani Irioshi, aatoguete iquemisantiro ocantaqueca iquejetacari amenavorovetatsica amenajarontsiqui.

²⁴ Yamenajavetaca quero icocani, iroompaqueate yoanajatigui jac ipeacotajaro.

²⁵ Oraqueate Iguenquetsatsare Aapani Irioshi caaviji ocameetsamajataque, ovashi-antacajaiacajiroqueate teeca oncameetsateji antaguishejiavetacaca. Irooqueate meshi-ajiacajica, cotanquitsi Aapani Irioshi incavintsajamajataqueri quericaca teeca im-peacotemparoji queroca ocanqueca, mana inquemisantamajatanaquequeate, aisa intsamajaqueroqueate ocantaqueca.

²⁶ Chooa cantatsica: “Naroguenti quemisantatsica”, cotanquitsi tee irampavirajero inene. Iriraqueate quejecarica imaica teequeate arimaja inquemisantamajatero ican-queca Aapani Irioshi, irisatiqueate amatavijajatsi.

²⁷ Iriraqueate yamenaqueca Aapani Irioshi arimaja iriguenti iquemisantama-jataque irioqueate cavintsajajiaquerica chaajaniquipaetica metojacoguetatsica aisa manquigarentsijia metojacoguetatsica atsipejianquitsica, aisa inetsanajiaa aatoniji opantari quempevaerentsi ipeacaapinijiacaca quepatsiquitica.

2

Ampintsajiaquempari maasano

¹ Napiguemisantarijateni, imaica piquemisantajiaquerigueti Amajirote Jesoquirishito oganejencamajatatsica, aatoquea apaniro iriguenti pishineventajiga irira anaantaguetanquitsica, irioqueate pimanintajiaque teeca iranaanteji. Maasanoqueate pishineventajiaquempari, iriogueti anaantanquitsica irisati teeca iranaanteji.

² Arigueti picapiocajiaa ariqueate inquijajiaipojaquegueti mavite caquinte, apaniro iriguenti netsanatacovaetacaqueate aisa yasatecacari ichapaquiqui imaachapaqui-jitaca ipeacaajicaca cavorejatatsica vegaramajatanquitsica, iriraqueate itsipa tson-cashitequijacotaca;

³⁻⁴ iriguentigueti paajiavaque netsanatacotanquitsica pinetsanajiavaqueri poguisav-icajiavaqueri, iriraqueate teeca irinetsanatempaji manaqueate pogatiavaqueri intati irooca poguisavicajiavaqueri intati querocagueti, ¿arimajampate aviguentijia quemisan-tamajajatsica? Teequeate, teenicate pincavintsajajigueriji teeca irinetsanajiguem-paji, iriguentitarite pishineventajiaa netsanatacojianquitsica. Teequeate pinetsana-jigueroji piquenquejajiaqueca, iroguenti piquenquejajiaque teeca oncameetsateji.

⁵ Napiguemisantarijateni nopintsamajajiaa, iintsija pinquemisantajiguena non-cantajiaquempica. Aapani Irioshi icoguiajiaqueri teeca irashintamajajiguempaji acaniqui quepatsiqui cameetsanijite inquemisantamajajiaqueri iroajianaquenijite iriguintenijiaquempa ontaniqui imajirontagueti. Aritarite inquejetacaajiaquempari maasano pintsamajajiacarica, iriotaquetarite cantanquitsi.

⁶ Cotanquitsi aviatimpajia mana poguipashiventajiaqueri teeca irajaarantajiguem-paji, iriguenti pishineventajiaa ajaarantajiatatsica. ¿Teempaqueueate iriguenti catsima-jiguimpica ajaarantajiatatsica nintatsicaqueate irashitacotacaantapinijiaquempiqueate santanaqui?

⁷ Aviatimpajia pitsariventajiacari Jesoquirishito piquemisantajiaqueritarite, cotan-quitsi iriatimpajia iriguenti cantimanatirica cantatsica: “Caari.”

⁸ Chooa otioncacotaca icanqueca Aapani Irioshi ora anaamajaguequerooca maasano cameetsamajatanquitsica, ocanti: “Pimpintsataquemparija pigonoro pinquejetacaa-jempa pipintsatagueti aviatimpa.” Pinquemisantajiaquerogueti ocatica aisa pinetsana-majajiaquerogueti, cameetsamajataquequeate.

⁹ Cotanquitsi teegueti maasanojia pincavintsajajigueriji pigonorojia, manaqueate pantajiaque teeca oncameetsateji, teenicate pintsamajajigueroji icantaqueca Aapani Irioshi.

¹⁰ Quericaca tsamajatiroca maasano itioncacotanaqueca Moishishini cotanquitsi onchoocatimaquegueti aparo teeca irinetsanate, iquempevaetaca, ari oquempetaca tee irinetsanateroji otsipapae.

¹¹ Iriotaquetarite cantanquitsi Aapani Irioshi: “Aatoja poashitirotsi manquigarentsi”, aisa iriguentiqueate cantanquitsi: “Aatoja pimetojanti.” Irootaquequeate quericaca aatogueti yoashivetaro manquigarentsi cotanquitsi irimetojantaquegueti, tee irinetsanatero icantica Aapani Irioshi, igantagatiraja iquempevaeta.

¹² Imaica aviatimpajia pinetsanamajajiaqueroja picanqueca aisa cameetsaja pinchocamajajiaque. Aatogueti pinetsanata incatsimatimentajiaquempiro Quirishito oncoramanitapojajegueti, teenicate pinquemisantamajajigueroji Quenquetsatsarentsimajaca ovashiantacajaiacajiroca teeca oncameetsateji acoguishejiavetacaca.

¹³ Aatoqueate icavintsajajajiri Quirishito oncoramanitapojajegueti maasano teeca incavintsajantajigueji, iriguentiqueate incavintsajajiaque maasano cavintsajantajiat-sica, aatoquea itsaroajigui iriatimpajia oncoramanitapojajegueti incatsimatimentajia-querigueti Quirishito quempevaejiatsica.

Arimajagueti aquemisantamajataqueri Aapani Irioshi, anteneri inintacaacajica

¹⁴ Napiguemisantarijateni, inchoocaquegueti cantavetanquitsineca: “Naatimpa naventacari Aapani Irioshi”, cotanquitsi aatogueti yantaguetaque cameetsaguetatsica, ¿arimpa amitacoshirenteri icantavetacaca intati? ¿Arimpate iro meshiashirenteri managueti incantashitaquempagueti intati: “Naventacari”? Aato.

¹⁵ Ariguetiija pinejaqueri papiguemisantariteni tee onchoocateji inquitsaaquempaca jero aisa irishecaquempaca,

¹⁶ iroompa pincantavetaquemparigueti intati: “Cameetsaquea pincantanajempa, pinquitsaatempa cameetsa aatoniji picatsincati, aisa pishecapinitaquempa cameetsa pinquemanaquempa”, cotanquitsiquea aatogueti pojocavaqueneri coguitejimotacar-ica, ¿arimpate picavintsajaqueri?

¹⁷ Aritarite iquejetaca imaica cantatsica: “Naventacari Quirishito.” Teegueti irinetsanatero icantica Aapani Irioshi manaqueate iquemisantamampeaca intati, teequeate arimaja iraventamajatempari.

¹⁸ Cotanquitsi arigueti incantajiquempi: “Aviatimpaqueate mana paventacari Aapani Irioshi intati, naatimpa nonetsanaqueroquea icanqueca”, cameetsataquequea. Aatogueti pinetsanaguetirotsi icantaqueca Aapani Irioshi ¿querocate ponigaanquenarocate arimaja paventacari? Naatimpa nonetsanaguetaqueroqueate icantaqueca irootaquequeate pitsantajiacaca arimaja naventacari noquemisantaqueri.

¹⁹ Aviatimpajia picantajiaque chooca apaniro Irioshimajaca. Cameetsataquequeate, cotanquitsi itsajiguiqueate ampatsini iriatimpajia chooca apaniro Irioshimajaca, irootaquequeate itsaroantajiacaca yompioncantajiacaca piompiompio.

²⁰ Teequeate pintsatimajigueji aviatimpajia. Quericaca teeca irinetsanateroji ican-taqueca Aapani Irioshi manaqueate iquemisantamampeaca intati.

²¹ Pamenerija avaesatiniteni Averaameni arimajagueti iquemisanqueri Aapani Irioshi inetsanaqueroqueate icantaquerica. Pajinimequeate irimetojanaquerime Ishaaco aretarequi intaaquenerimequeate, icantantacacaqueate Aapani Irioshi: “Imaica namenaqueri Averaame quejetaca teeca inquempaveatimatempaji, inetsanaquerotarite nocantaquerica.”

²² Pameneri imaica Averaame teequeate apaniro inquemisanteriji Aapani Irioshi icanquerigueti: “Inchoocataque pinchoviquijianaqueca iroshequiamajatigueni-maja”, inetsanataqueroqueate aisa icanquerica. Itsatantajitacarocaqueate arimaja iquemisantamajataqueri.

²³ Onetsanataca Itioncacaantaqueca Aapani Irioshi itioncacojiquerogueti ocanti: “Averaame iquemisantamajataqueri Aapani Irioshi, irootaquequeate icantantaca-
caqueate: ‘Namenaqueri Averaame quejetaca teeca inquempevaetimatempaji.’ ”
Ariqueate icantajiqueri itsipataca Aapani Irioshi.

²⁴ Pamenamajajiaque imaica ariguetei mana anquemisantamampeaquempari intati
Aapani Irioshi, aatoqueate yamenajiaji quejetaca tee anquempevaetempaji, cotan-
quitsiqueate oraqueate aventajiacariguetei, aisa anetsanjiaquerogueti icanqueca,
irooqueate iroguenti yamentajiacajica quejetaca tee anquempevaetimatempaji.

²⁵ Ariqueate oquejetaca Iraava iroatimpa icotapinijavetaca yoashitapinijiguiro,
cotanquitsi cameetsaqueate aajiavaqueri omanajiaqueriqueate itigarancajiaqueca
Josoe amenanontaguequiteroneca oguinteni, ariqueate yamenaquero Aapani Irioshi
quejetacaqueate tee onquempevaetempaji. Ocamantajiaqueritarite aisa iroantajiana-
jemplo otsipapoqui quenavoquirontsi irishiapitsajianaqueriqueate catsimajiaquer-
ica.

²⁶ Oraquea itsino caquinte, aatogueti ochoocatantaro ishire, ompeaquempa, meto-
jani oncantanaquempa. Ariqueate iquempetaca teeca irinetsanamajateroji icantica
Aapani Irioshi, ompeaquempaqueea yaventavetariguetei.

3

Caavijisano oquempevaetacaanta anene

¹ Napiguemisantarijiateni, aato inchiqiuoji pishineventajigaro pintsatacaajiaqueri
papiguemisantarijiateni, pitsajiaquetarite maasano naatimpajia tsatacaantajiguiroca
Iguenquetsatsare Aapani Irioshi yamenamajajiaquenaqueate Aapani Irioshi, yamena-
jiaquena aricaca nonetsanamajajiaquero notsatacaantajiguica aricaca tee. Aatogueti
nonetsanamajatiro naroguenti incatsimamajajiaque oncoramanitapojajegueti.

² Maasano aatimpajia aquempevaejiaca, cotanquitsi choocagueti teeca inquempe-
vaetantemplo icanqueca ivagantequi, iriguenti caavijica icameetsati, itsamajataque
icomajamajataca maasanotsino.

³ Asatecaqueneri quitavaireri capichaji cavorejaquijitatsica ivagantequi iroonijite
inquemisantantaquempaca atinincacoqueriguetei, ariquea oacaanaquerini maasan-
otsino querocagueti aninqueni.

⁴ Ariqueate oquejetaca inirojegui quenajarontsi. Inirojeguivecaqueate aisa ita-
mpijaguevetanacaqueate tampija jeoc jeoc jeoc, cotanquitsi itaquiajatavaqueroqueate
pataquitaquero ca itaquiajatantavacaro itaquiajatantajitaroca. Chaapataquijianiqui
onavetaca cotanquitsi ivetincajantavacaro yoacotanaquequeate querocagueti inin-
taque iriatimpa.

⁵ Ariqueate oquejetaca anene iroatimpa chaajaniquiqueate onavetaca, cotanquit-
siqueate aquenquetsatantaguetacaros taaca opajitapae. Pameneroquea paamari-
janiqui, chaamenquijianiquiqueate onavetaca, cotanquitsi agavejaquequea ontaa-
quero inirojegui mencoanentsi antsicanaquetarite.

⁶ Ariquea ococa aisa anene, oquempetacaros paamari, caaviji oquempevaetacaaji-
acaji, ocovaetanaquero maasanotsino, otsitacaquero maasano antaguetaqueca acov-
aeguishetantacaca. Oquejetaca iroguenti camorecari tsitacaquero ca anene.

⁷ Aatimpajia agavejajiaque avirajiaquempari taaca ipajitapae canaaguetatsica,
araguetatsica, soancaguetatsica, jeri aisa choocaguetatsica ojaaqui. Agavejajiaqueri
antsatacaajiaqueri.

⁸ Cotanquitsi aatoqueate ichoocati agavejanquitsineca intsatacaaquero inene aa-
tonijite iquenquetsatimati teeca oncameetsateji. Oraqueate ashecajiguemparogueti

quepigatatsica aatoqueate achoocajiaji, ametojajianaque. Ariqueate oquejetaca anquenquetsaguishejigueroguetei teeca oncameetsateji aatoqueate achoocajiaji cameetsa, ancatsimatavacaajiaquempaqueate intati.

⁹ Aatimpajia amanajiaqueri Amajirote Aapani atsaroventajijaari, cotanquitsiqueate irooqueate atsipatavaquero anijashijavajempari agonorojia ipeacaajiacaca iquejeta-caajiacaca iriatimpa.

¹⁰ Oconoacaqueate aquenquetsajiaque manaqueate atsaroventajiacari Aapani Irioshi. Oconoaca aisa mana anijashijiacari agonorojia. Napiguemisantarijiateni, teequeate oncameetsateji anquejejaquempaguetei imaica.

¹¹ ¿Arimpate inejajitiro oraniqui ochovivincajatiguetei chovivincajari ontsipajapojem-paro cameetsajatatsica aisa quepishijatatsica? Teequeate irinejajiteroji onquejetem-paji imaica.

¹² Aisa, napiguemisantarijiateni, ¿arimpate inejajitiro orivoitsoqui oraniqui ochoocatantaro iguera? Ariqueate oquejetaca igosovena ¿arimpate inejajitiro ochoocatantaro omantsa ova? Noncamantsijiajimpiqueate aisa tee irinejajiteroji. Ari oquempetaca chovivincajari cachojaamajatanquitsica aato agaveja ompeanajempa cameetsajatatsica. Ari anquempetaquempa aatimpa, apaniro anquenquetsate cameetsatanquitsica.

Apaniroqueate Aapani Irioshi yagavejacaamajatacaji antsamajajiaquequeate

¹³ Choocaguetei oraniqui tsatatsica quenquejatsica, iintsija incomajamajaquempa, aisa incavintsajantamajataqueja, cotanquitsi aatoqueate yaventacota cameetsaniji ironigaantaquempa arimaja itsamajataque.

¹⁴ Cotanquitsiqueate pincatsimamajaqueriguetei pigonoro pininqueguetei panajiaia-queri, aisa avisatiguetei quenquejacotajatsi, aatoja pamataga pincanqueguetei: “Not-samajati.”

¹⁵ Teenicate irio quenquejacaguempirone Aapani Irioshi pinquejetaquempa imaica, inchiqiojitari piquenquejashicaro aviatimpa, aritarite icojiaca caquintepae, aisa iriguenti quenquejacaqueri ampatsini.

¹⁶ Noncantajiaquempi querocaca ichoocajiaqueni catsimamajajianquitsica, aisa irisati quenquejacotajatsi, igantaga icatsimatavacaaca, aisa yantaguishejiaque taaca opajitapae teeca oncameetsateji.

¹⁷ Cotanquitsi irira iquenquejacaamajataqueca Aapani Irioshi, icomajamajataca, cameetsaqueate ichoocaque, teequeate incatsimatanteji, aisa iquenquejacojiaqueri itsipapae quero incoquempa incavintsajaqueriguetei. Querica quenquetsatacaqueri iquemisantavaqueri. Ipintsatantamajata, icavintsajajiaqueri maasano. Aisa inetsana-majataquero icanqueca, teequeate iramatavijanteji.

¹⁸ Taaca opajita apanquiti, aguero oitsoqui ashi. Aisa oquejetaca ariguetei aguinenitaquempa cameetsa, agameetsantavacaquempaguetei aatoniji acatsimatavacaga, ariqueea anetsanajianaquempa.

4

¿Taa opajita icatsimatimentantajitica?

¹ ¿Quero ocotacani picatsimatavacaantajiacaca? Manatarite piquenquejaguisheji-aque taaca opajitapae teeca oncameetsateji, irootaquequeate picatsimatavacaantajia-caca.

² Pinintajiavetacaqueate pajaarantajiguempame, cotanquitsi teequeate pagaveja-jigueji, niganquiqueate pimetojavacaajianaca. Pashintsimanatsijiacari yashintaji-acaca itsipa pamenajiaque tee pashintajiguemparoji, queroqueate pincojiaqueroni ariqueate picatsimatimentajianaquero. Teequeate pagavejajigueji pashintajiguem-paro pinintajiavecaca, teenicate pamanajajeriji Aapani Irioshi.

³ Pamanajivecarigueti teequeate irojocajiguemproji, manatarite teenicatarite cameetsa pamanajigueriji. Manatarite pinintashijiavetaca pantajiaquemeequeate taaca opajita pishineventajiacaca aviatimpajia.

⁴ Manaqueate piquejejiacaro manquigarentsi teeca apaniro ogueriji omanquigare. ¿Arimpate tee pintsajigueji pishineventajijajemparogueti inintaguishejiaqueca quepat-siquitica manaqueate pisemaneguintajiacari Aapani Irioshi? Nocamantantajiaque-mpica quericaca shineventaquemparone inintaguishejiaqueca quepatsiquitica mana-queate icatsimajiaqueri Aapani Irioshi.

⁵ Teenicate oncanteroji intati Tioncarentsimajaca ocantigueti: “Irraqueate Ishire Aapani Irioshi choocashirentajiaquem-pica inintamajataque pimpintsamajajiaquempari apaniro poamajatanaqueri.”

⁶ Cotanquitsi Aapani Irioshi icavintsajajiacaji yamitacojiacaji antampishitashitanta-jiaquemparoca aatonijite ashineventajigarotsi teeca oncameetsateji yantaguishejitica. Aritari ocanque itioncacoji-queca: “Aapani Irioshi tee irishineventempariji aventaco-tatsica, cotanquitsi irira teeca iraventacotempaji irioqueate iriguenti icavintsajajiaque yamitacoji-queri.”

⁷ Nocantantajiaquem-picaqueate pinquemisantamajajiaquerija Aapani Irioshi pinet-sanamajajiaquero icanqueca. Pintampishitashijiaqueri ampatsini aatoja piquemisan-tajiguri. Pinquejeji-quempagueti imaica irishiapanajante.

⁸ Pinquempejijiapojaquemparija Aapani Irioshi, ariqueate inquempejijiapojaquem-piquea aviatimpajia. Nocantajiaquem-pi aviatimpajia antaguishejiguiroca teeca on-cameetsateji, povashiantajanajero, aato papijijajiro aisa. Aviatimpajia quemisanta-mampeajiatsica pinetsanamajajiguempa aatonijite pantaguishejijajiro teeca oncameet-sateji.

⁹ Pishimampojancajiguempa, pirajaiguempa, pamenajiguem-paqueate mana pan-taguishejiaque teeca oncameetsateji. Aviatimpajia shirontajiat-sica pirajaiguempa, aisa aviatimpajia shinejianquitsica pishimampojancajiguempa.

¹⁰ Aatoja paventacojiga manaqueate pincantajiaqueri Amajirote: “Pamenaquena avi-atimpa teequeate naatimpa nagavejempaji.” Pinquejetaquerogueti imaica iriatimpa iragavejaca-quempiqueate.

¹¹ Napiguemisantarijiateni, aatoqueate pinijashinatantajijaatsi, pitsajiaquetarite ocanque Iguenquetsatsare Aapani Irioshi pimpintsatavacaamajajiaquem-paja, cotan-quitsi quericaca nijashinacarina igonoro irooca icanti: “Chooa yantaqueca”, teequea irinetsanateroji Iguenquetsatsare Aapani Irioshi, quejevaetaca manaca inijashinatac-aro intati icanque: “Tee oncameetsateji Iguenquetsatsare Aapani Irioshi, aatoqueate nonetsanatiro ocantaqueca.”

¹² Apaniro icanca tigarancacajiroca Iguenquetsatsare, apaniro iriatimpa iriguenti Joese cantanquitsineca oncoramanitapojajegu-eti querica quempevaetanquitsica, aisa querica teeca inquempevaetempaji, apanirotari iriatimpa yagavejaque irimeshi-antaque, aisa incatsimatimentajiaqueri quempevaejiatsica. Aviatimpa, ¿quero ocota-cani picantacotantacarina pigonoro tee incameetsateji?

Icamantajiaqueriqueate pimantajiat-sica jerijia aisa ajaarantajiat-sica

¹³ Pinquemisantajiguena aviatimpajia cantajiat-sica: “Imaica, aricampa osaitequera oajianaque osamani, aguintenijiaquitem-pa apaniro ajagantsi, ampimantajiaquite-queate, aajigueta caquisequipae imentaquipae.”

¹⁴ Teequeate pintsateji taaca oajiaquem-pine osaitequera. Manatarite piquejejiacaro mararo omararosecanquiti iroompaqueate taampina osaamencorencaguitetana-ji.

¹⁵ Iroguentiquea pincantajigue: “Iriogu-eti nintanquitsine Aapani Irioshi anchoocaji-aque antajiaquero aquenquejaguetaqueca.”

¹⁶ Cotanquitsi aviatimpajia manaqueate paventacojiaca piquemacaantajiaca. Naatimpa noncantajiaquempi tee oncameetsateji pinquejejaquerogueti imaica.

¹⁷ Iriiraqueate tsavetanquitsica taa opajita ininqueca Aapani Irioshi iroompa tee irinetsanateroji, manaqueate iquempevaetaca.

5

Iquenquejacaajiaqueriqueate ajaarantajiatsica

¹ Imaica noncamantajiaquempi aviatimpajia ajaarantajiatsica. Pirajaiguempa aa aa, pincajemajiaque pantsipejiaquempatarite coajica.

² Maasano pashintajiavetaca aatonica ocameetsatanaji. Aisa piitsaarepae irishecataquemparo shecaguetaroca quitsaarentsi.

³ Iriiraqueate pigavorejaritepae aisa pimentaquitsitepae incantaiteguetanaquempa, aato ivegarataja. Incantaitetanaquempagueti intsajitaquempi picapiocashicari intati. Irootaque atsipetacaantajiaquempineca, onquempetaquempa onteroncaquero paamari piteshi, picapiocajiaqueritarite pimentaquitsitepae pajinigueti aapojempa savincaguiteri vegaratapojaatsineca.

⁴ Teenicate pivegaramajajigueriji antimojiguimpica manaqueate pamatavijajiaqueri intati, irootaquequeate iriatimpajia imaica inquenquejacojiajero teeca pivegarajigueriji. Iriira Agavejamajatatsica Imajirojiate caramirincajiatsica iquemajiaqueriqueate antimojiguimpica yamanaquerigueti.

⁵ Pajaarantavaejiaca taaca opajitapae acaniqui quepatsiqui. Manaqueate pisavicaventajianaquero pishineventajiacaca aviatimpajia. Manaqueate piquejejiacari viratsi itijaitica iriguejintajiaqueriqueate irishecajitaquempariqueate, interoncajiaquemparitarite Aapani Irioshi coajica intigarancajiaquempi camorecariqui.

⁶ Pitsojeventajiacaritarite netsanajiatsica pimetojacaantajiaqueri. Iriatimpajia teequeate impigamentajianaquempaji.

Pagamajavajemparija Amajirote

⁷ Imaica, napiguemisantarijiateni, noncantajiaquempiqueate picancanija pantsiperejacojiaquempa irosati incoraquetajegueti Amajirote. Pinquejejiaquemparija panquitatsica teequeate incatimateroji iraguero ivanquire, manaqueate yoguijavaquero ajagantsitanajigueti osampamajatanaqueta ariqueate iraaquero.

⁸ Ariqueate pinquejejiaquempa aviatimpajia pinquemisantacojiaquempa, aatoja piperajiga. Arimpaqueate pintampishimajajianaque pinquemisantamajajianaquequeate, pajinitarite incoraquetaje Amajirote.

⁹ Napiguemisantarijiateni, aatoja pinijashitavacaajiga aatoniji icatsimatimentajiapojimpro. Catiapojacatari sotomorontsiqui irira Joese cantanquitsineca quero incojitaquerini maasano caquinte.

¹⁰ Napiguemisantarijiateni, pinquejejiaquempariqueate tsavetantajiguironica icanquerica Aapani Irioshi coramani, iquemisantacovaejiacaqueate yatsipeventajiacarigueti.

¹¹ Imaica pitsajiaque ishinevaejiaca maasano quemisantacojiatsica yatsipetacaajiacarigueti catsimajiaquerica. Piquemacojiaqueritarite Jopeni coramani iquemisantacocaqueate, teequeate irovashiantanaqueri Aapani Irioshi, arimpaqueate ijatanaqueri iquemisantamajatanakeri. Ariqueate icavintsajiaqueri Aapani Irioshi arimpaqueate yojocamajataqueneri anaamajataqueroqueate iroquetinica yashintaveca. Caavijitarite icavintsajantamajati Aapani Irioshi, aisa ipintsatantamajata.

Aatoqueate picantashivijita

¹² Imaica, napiguemisantarijateni, pinquemisantamajajiaquena noncantajiaquem-pica. Pincantamajajiaquejate, aatoja pamataajiga, aato picantashita: “Yamenaquenatarite Aapani Irioshi teequeate namataimatempaji.” Aato picantajigui: “Ariguetei namataaca ontsinacaquena inquite.” Ariqueate oquejetaca aisa aato picantajigui: “Ariguetei namataaca ontijaquena quepatsi.” Manaqueate pincantajiaque: “Jeeje arimaja”, irooca manaqueate pincantajiaque: “Teequea”, aatonijite icatsimatimentimpiro Aapani Irioshi coajica.

Pamaneri Aapani Irioshi

¹³ Choocaguetei atsipetanquitsica iramanaqueri Aapani Irioshi. Irraqueate shinemajatanquitsica iramashaiventaqueri.

¹⁴ Choocaguetei ashinoncajanquitsica incajemajiaqueriqueate quempoguijajiguirica quemisantajiatsica iramanacoventajipojaqueriqueate, aisa impantantajiaquempariqueate oreji ivajiroqui Amajirote.

¹⁵ Iramanacoventajiaqueriguetei intsamajajiaque arimaja iquemisantavaqueri Amajirote. Inquejetaquempaguetei imaica ariqueate irogueshitajeri ashinoncajanquitsica, aisa irishemajaquero maasano iguempevaere irimaisantajeneri.

¹⁶ Irootaquequea nocantantajiaquempica pinquempevaejiaquempaguetei pincamantajiaqueriqueate papiguemisantarijateni, aisa pamanacoventavacaajiaquempajate cameetsanijite intampishitacaajiaquempinijite Amajirote pincomajamajajiaquem-paja, aisa irogueshitimentajiajempinijite pashinoncajajiacaguetei. Irraqueate quemisantamajatirica Aapani Irioshi yamanaqueriguetei, oshequi agavejaque.

¹⁷ Pamenerija Iriashini, irira tsavetantirinica Aapani Irioshi coramani, iquejemajajiacaji aatimpajia, cotanquitsi yamanaqueriguetei Aapani Irioshi icantaqueriguetei aatoja otejajitsi incani ariqueate tee ontejajeji irosati yaapojajaguetei 42 taai.

¹⁸ Ariqueate yamanajiri aisa icantajiri ontejapojaje incani, ariqueate otejapojaji, ariqueate otsoroaguetanaji ishecajia maasano.

¹⁹⁻²⁰ Napiguemisantarijateni, pintsamajajiguero ocativa noncantajiaquempica. Choocaguetei quempevaetanquitsica quemisantavetacaroca Quenquetsatsarentsimajaca, ariguetei iramitacotaqueri itsipa irinetsanatanajempanijite, manaqueate yamitacotaqueri aatonijite inejajiro imetojane, irimeshiaqueritari Aapani Irioshi irimaisantsitajeri maasano yantaguishevetacaca oshequiavaevetanquitsica.

IROQUETICA ITIONCAQUECA PEERERO

Antsatantaquemparoca

Ocativa iroguenti antsatantaquemparoca iroquetica itioncaqueca Peerero itioncaciaqueneriguetti joriojia tsaromentajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1.1). Peerero irio jorio, irio itigarancane Jesoshi. Irocashi itioncacotaqueri irira Peerero otsipaequi paperiqui (Ya. 1.12-5.42; 8.14-25; 9.32-12.19; 15.7-11). Iquenquejajitaque itioncaquero ocativa paperi irooca ajagantsiniqui 63, irooca 64. Chooqa quenquejajianquitsica itioncaquero ichooaqueguetti guinteninintsiqui pajitatsica Vavironia (5.13). Cotanquitsiquea iconoagarantajiacarica pariacaroca quemisantajiaquerica Quirishito iquenquetsatocoqueroguetti Iroma, teequea tampatica incanteroji ovajiro, mana yomanaquero, iquempetacaacaro Vavironia iponeajiacaguetti catsimajiaquerica ivaesatiniteni paeatoniqui. (Pamenero Yonig. 14.8; 17.5; 18.2.) Chooqa quenquejanquitsica arica ichooaque Peerero Iromaque itioncaquerooguetti ocativa paperi.

Itioncaciaqueneri inquenquejacaajiaqueriniji joriojia quemisantajiaquerica Jesoshi intampishitashijiaquero yatsipeventajiacariguetti Amajirote yoguujajiaquerooguetti cameetsaguetatsica irantaguetaqueca Aapani Irioshi yamenajiaqueriguetti iquemisantajiaqueri Jesoshi (1.2-12), yatsipeventajiacajitari iriatimpa (2.18-25). Itsatacaajiaqueri icantashitajiacarica Ishire Aapani Irioshi (4.1-11). Icantajiaqueri irantsipejiaquempa acaniqui quepatsiqui quemisantajiaquerica Jesoshi (3.18-22; 4.12-19). Icantajiaqueri quero incojiaquempani inchoocajiaqueniji cameetsa igomajamajarejia Aapani Irioshi (1.13-2.3), aisa quero incojiaquempani irantajiaqueneriguetti inintaguetica Aapani Irioshi (2.11-17). Itsatacaajiaqueri quero incojiaquempani shirampari aisa imanquigare inchoocajiaqueguetti cameetsa (3.1-7), aisa quero incojiaquempani quempoguijajiguirica quemisantajiaatsica (5.1-11). Icantajiaqueri irira Jesoshi iquempetacaro mapi anijatsica, irirajia quemisantajiaatsica iquejejiacaro otsipapae mapicota anijatsica ipeacaantacaca Aapani Irioshi tsovironaque inchoocashirentaqueca (2.4-10).

¹ Naroguenti Peerero tioncaciaquempiroca oca, naroguenti itigarancane Jesoquirishito. Imaica nonintaque nontioncaciaquempi paperi maasano aviatimpajia icoguajiaqueca Aapani Irioshi porocajiananquitsica guinteninintsipaequi, oajiananquitsica Pontoqui, Garashiaqui, Caparoshiaqui, Ashiaqui jero aisa Vitiniaqui.

² Igantagaqueate coramani icoguajiaquempi Aapani Irioshi, itsatsijiaquempitarite tequerataguetti pinchoocateji. Ariqueate yogameetsashirentajiajimpi Ishire cameetsanijite pisavicaventajiaje inintaguetica iriatimpa. Icojuajiaquempitari pinquemisantajiaqueriniji Jesoquirishito, intsiquirijashirentantajiajempironiji iriraja. Namana-coventajiaquempi incavintsajimentajiaquempiniji Aapani Irioshi inchoocatacaajiaquempinijite cameetsa aatonijite pishoshoguiteventajigaro taaca opajitapae.

Peerero itsaromentacari Aapani Irioshi

³ Iintsija ashineventajiaquempari Irioshite Amajirote Jesoquirishito, iriotaque aisa Iriri, ancantajiaqueriquea: "Poganejencamajata." Incavintsajamajiacajiqueate irijiantantajiacajica quejetaqueate iroaquerasano avojaijaiqueate cameetsanijite anijimentajiajenijite coajica. Ivochantajitarite Jesoquirishito, irootaquequeate atsatantajiacaca anijajiajesacanica aatimpajia aisa oajianajesacanica ontaniqui jenoqui inquitequi.

⁴ Imeshiajiajitarite Aapani Irioshi cameetsanijite oimentajianaquenijite ontaniqui jenoqui inquitequi ivetsicajiacajigueti anchoocatantajiapojempaca. Aatoqueate opejaa, aato ocantaiteti, aisa ocancaniquea oganejencaguitemajataquempa. Iquempoguijiaquempiroquea ontaniqui inquitequi.

⁵ Paventajiacariquea Aapani Irioshi irootaquequea iquempoguijantajiaquempica iragavejanequi, ariquea inquejetanaquempa arejevaetantapojempaca parejejiapojempagueti ontaniqui inquitequi pamenajiapojero maasano ironigaantajiaqueca oncoramanitapojegueti.

⁶ Irootaquequeate pishinemajatantajiacaca. Arica imaica pantsipejiaquempa taaca opajitapae, cotanquitsi aato osamanititsi avisanaque maasano patsipejiavetaca.

⁷ Oraqueate patsipejiacagueti mana iramenajitaquero arimajaca piquemisantamajataque, aricampa tee. Quejevaetaca cavorejatatsica icantajitica ooro itajaitirigueti cameetsanijite intamentajiquerone conoacarina, iriguentiqueate igotanajatsine cavorejatanquitsica. Ivegaramajavetacaqueate ooro cotanquitsiqueate oncoramanitapojegueti interoncanajempa. Aviatimpajia caaviji panajaiqueri ooro, irootaquequeate imaica pantsipemajataquempagueti maasano arimpagueti pinquemisantamajataqueri irishineventamajataquempiqueate Jesoquirishito oncoramanitapojajegueti incoraquetajegueti incantajiaquempiqueate: “Cameetsavaequempiqueate, imaicaqueate iintsija naajianaquempi jenoqui inquitequi picancaniqueate pinconoajiaquena naatimpa, noshineventajiaquempitarite.”

⁸ Teequeate pinejaviavetempariji, cotanquitsi pipintsajiacari. Tee pinejaviavetempariji imaica, cotanquitsiquea paventajianacari, irootaquequeate pishinemajatantajiacaca. Caaviji pishinemajajiacaca, oganejencavaeca ocatica shinevaetagantsi,

⁹ imeshiajiaquempitari pishirequi aatoniji pipejajaa, irootaquetari paventimentantajiacarica.

¹⁰ Coramani irirajia tsavetantajiatatsica yapatsajavantamajajiaquero Itioncacaantaqueca Aapani Irioshi, aisa iquenquejamajajiaquero intsajiaque quero incojiaquempini Aapani Irioshi incavintsajajiaquempigueti irimeshiajiaquempigueti, aisa irajajiaempigueti coajica, ariqueate iquenquetsatacojiaquero aisa.

¹¹ Iriiraqueate Ishire Quirishito choocashirentajiaquerica iquenquetsashirentacaajiaqueritarite itsatacajiaqueri irantsipeventajiacaji Quirishito coajica, ariqueate irime-tojaventajianacaji, coajica iramenajero iroganejencare. Ariqueate iriatimpajia iquenquejamajajiaquero inintamajajiaquetarite intsajiaqueme querocaqueate aanquempaca inquejetaquempa imaica, aisa quero oncoguetanaquempiani.

¹² Cotanquitsi ariqueate itsatacajiaqueri Aapani Irioshi aatoqueate yamenajiguiro iriatimpajia onetsanamajataquempagueti maasano itsavetantajiaqueca, iriguentijiarite amenajiaquerone impoiguetanquitsineca. Irootarite imaica itsavetantajiaqueca quenquetsatacaajiaquempica icamantajiaquempigueti quero icota Aapani Irioshi imeshiantigueti, iriotaquequeate agavejacaajiaquerica Ishire Aapani Irioshi poneanquitsica jenoqui inquitequi. Iriiraquea irashivantijitete Aapani Irioshi inintajiavetaca intsamajajiaqueromequeate maasano ocatica itsavetantajiaqueca.

Aapani Irioshi inintaque incomajamajajiaquempa maasano quemisantajiguirica

¹³ Irootaquequeate nocantantajiaquempica imaica pinquenquejamajajiaqueroja quero pincojiaquempiani pincomajamajajiaquempagueti aisa pinquenquejamajajiguiro quero incojiaquempi Aapani Irioshi incavintsajajiaquempigueti coajica incoraquetajegueti Jesoquirishito.

¹⁴ Pinquemisantamajajiaqueri Aapani Irioshi, aviguentijiarite irijanijiate. Aatoquea piquejejijaa coramani tequeratagueti pintsajigueriji pantaquerogueti pinintashiguetaacaca intati.

¹⁵ Iroguentiquea pinquempejiaquempariquea Iriomajatatsica cajemajiaquempica teequea incovaeguishetimatempaji, pinquejetantajiaquempaca aviatimpajia pincomajamajiaquempaja querocaca pantajiaqueca.

¹⁶ Aritarite ocantaque Itioncacaantaqueca: “Pincomajamajiaquempaja aviatimpajia, irooriji nocomajamajataca naatimpa.”

¹⁷ Piquenquetsatacaajiguirigueti Aapani Irioshi picantajiguiri: “Aapani.” Iroosacanicate imaica picancanija pimpincatsamajiaqueri irosati pimetojajianaje, teenicate inchoocatenica apaniro iranaaque impintsamajataquempaca. Irosatiquea mana ipintsamajiacari maasano intati, yamenajiaqueritarite ariqueate iquejetavacaajiaca maasano. Irootaquequeate icantomajantajiacarica maasano antaguishejiguiroca teca oncameetsateji.

¹⁸ Coramani mana poguijatacojiavetacaroqueate itsatacaajiaquempica pivaesatinite, cotanquitsi manaqueate poguijatacotamampeajiacaro intati, teequeate omeshiajiguempiji. Cotanquitsi coajica yaajiajimpiqueate Aapani Irioshi aatonijite piquempejiaa imaica. Tee irioqueate irovegaratantajiguempiji imentaquipae teroncanajatsineca yaajiajimpigueti,

¹⁹ iroguentiqueate yovegaratantajiaquempi iriraja Quirishito quejetacarica ovejajaniqui teeca incovaeguishetempaji, teeca inchacotimateji.*

²⁰ Coramani tequeratagueti impeacaguemparo Aapani Irioshi quepatsi igantagaqueate icantsitaca quero incoquempani Quirishito, cotanquitsiquea imaica pajinigueti aapojempa savincaguiterpae vegaratapojaatsineca yonigaantaqueriquea incavintsajiaquempiniji.

²¹ Pitsajiaquerigueti Quirishito paventajiacariquea Aapani Irioshi tancorejajirica imetojavetacagueti, aisa yoganejencatacaajari, irootaquequea paventantajiacarica Aapani Irioshi, poguijajivaqueri incavintsajiaquempi.

²² Piquemisantamajiaquerogueti Quenquetsatsarentsimajaca ishejiajimpipiguempevaere, imaicaquea jac netsanamajianaquempi cameetsanijite arimaja pimpintsatimentajiaquemparinijite papiguemisantarijiateni. Imaica picancaniquea pimpintsatavacaamajiaquempaja aatoqueate picatsimatavacaimajijaatsi.

²³ Quejejiaquempiqueate iroaquerasanoca pivoajiaji. Teequeate iriguenti ocaantajiguempine caquinte metojajijaatsineca, iriguentiqueate irijanintajiguimpi Aapani Irioshi, piquemisantajiaquerotarite Iguenquetsatsare. Oraqueate Iguenquetsatsare anijaque, oncoguitempani onchoocaguiteni, aato opega.

²⁴ Aritarite ocanti tioncanquitsica:

“Maasano caquinteja manaqueate iquejejiacararo cataroshi ometojitagueti, ariqueate iquejejiaca iriatimpajia teequeate inquishojigueji.

Ariqueate oquejetaca aisa yanaantajiguigueti manaquea oquejetacararo ovempenaquipae teequeate onquishopempenaquiteji, ariqueate inquejejiaquempa iriatimpajia aatoqueate igantaga yanaantajigui.

²⁵ Cotanquitsi oraqueate Iguenquetsatsare Amajirote oncoguitempani onchoocaguiteni.”

Irootaquequeate quenquetsatsarentsi itsavetantajitaqueca icamantajitaquempirogueti Quenquetsatsarentsi Oganejencatatsica.

2

¹ Irootaquequeate nocantantajiaquempica povashiantajianajero maasano pantaguevetacaca teca oncameetsateji. Aatoqueate pamatavijantajiaji, aisa aato

* **1:19** Coramani yamejiacaqueate joriojia icarajiguiniriqueate Aapani Irioshi oveja, cotanquitsi iriguenti icarajiaqueneri oveja cameetsamajatanquitsica quericaca **teeca inchacotimateji**. Ariqueate iquejetaca Quirishito iriatimpa icameetsamajataque teequeate inquempevaetimatempaji, irootaquequeate yagevejantacaca imetojaventajiacaji.

picantashijaja intati. Aato picatsimatacotsitiri itsipa querocaguete icocani jero aisa taaca opajita yashintacaca, aisa aato pinijashitantajaja.

² Aviatimpajia pinintamajajiaqueroja Iguenquetsatsare Aapani Irioshi, pinquejejaquemparija chaajaniquitirajaca iriaqueraca voanquitsi yametaroguete itsomi imponcantanaquempaca. Ariqueate pinquejejaquempa pinquenquejamajajiaqueroja Quenquetsatsarentsimajaca ontampishitacaajiaquempiniji pishirequi arimpanijite pinquemisantamajajianaqueri Aapani Irioshi irosati irajaianaquempi jenoqui inquitequi.

³ Pitsajiaquetarite yoganejencamajataca Amajirote, icavintsajajiaquempitarite.

⁴ Pinquempejijiapojaquempari iriatimpa quempetacaroca mapi anijatsica. Irirajia caquinte imanintajiavetacarocaticamapi yantajiguiroguete mapipanco, cotanquitsi Aapani Irioshi icoguiaquero, ishinevencaro yamenaquerotarite oganejencamajata.

⁵ Aisa aviatimpajia mana piquejejiacarocotsipapae mapicota anijatsica ipeacaantacaca Aapani Irioshi tsovironaqui inchoocashirentaqueca. Aisa piquejejiacari isaserorotejiate, quejetaca pitaajiaqueneri viratsi ishineventacaca pisavicaventamajaquerogeti maasano inintaguetica, piquemisantajiaqueritari Jesoquirishito.

⁶ Aritarite ocanti itioncajatica coramani:

ICANTI AAPANI IRIOSHI: “Nonquejetaquempari coguiaquero mapi yantaqueroguete mapipanco, icoguiaquero cameetsamajatanquitsica ompeaquempanijite anaantamajatanquitsineca. Aritarite nocoguiaquero Quirishito nontigarancaqueri Shionequi, namenaqueritarite caaviji yoganejencata.

Maasanoqueate quemisantajiaquerineca aatoquea ipashiventa.”

⁷ Aviatimpajia quemisantajiaquero pamenajiaqueri yoganejencamajata. Irira tecca inquemisantajigueriji iriotaquequeate ocantacotaque itioncacojiqueriguete ocanti:

“Iriaqueate antajiguiroca mapipanco itsinetacotantaroguete mapicota imanintaque-roqueate mapicota cameetsamajatanquitsica,

cotanquitsi opejaaqueate anaantamajatanquitsica quishotacaaquero otsipapae.”

⁸ Aisa onetsanataca itioncacojiqueroguete ocanti:

“Iriatimpa mana iquejetacarocamapi itivatantajitaca ariqueate iromposantajitaquem-paro.”

Teenicate irinintajiguijeji inquemisantajiaquero Iguenquetsatsare Aapani Irioshi, irootaquequea tee intasantajiaquemparica Quirishito, mana icomijiavacari, irootaquetarite icantaque Aapani Irioshi coramani.

⁹ Cotanquitsi aviatimpajia icoguiajiaquempi Aapani Irioshi igonorontajiajimpi, inintacajiaquempi pimpeajiaquempa isaserorotejiate Majirontamajataatsica. Aisa inintacajiaquempi pincomajamajajiaquempaqueate maasano, yashintamajajiaquempitarite. Mana oquejetaca imaica cameetsanijite pincamantimentajiaquerinijite maasano quero icota Aapani Irioshi, caaviji yoganejencamajata. Coramani teequete pintsajiavetempaji quejevaevetacaqueate manaca pipitsecacojiaque intati, pantaguishejiavetararite tecca oncameetsateji, cotanquitsi ariqueate imeshiajiajimpi quejevaetaca manaca pisavincaguitetacojianaji, teenicatarite pantajiajeroji pantaguishejiavetacaca coramani.

¹⁰ Coramani tee irashintajiavetempiji Aapani Irioshi, cotanquitsi imaica aviguentijaqueate irijanijiate. Aisa teequete queri incavintsajiavetempiji, cotanquitsi imaica icavintsajiaquempiqueate Aapani Irioshi.

¹¹ Napiguemisantarijiateni nopintsamajajiacaca, aato osamani pichoocajigui acaniqui quepatsiqui. Ariguente poajianaque pinchoocamajajiaquempaquea ontaniqui jenoqui inquitequi ichoocaqueguete Quirishito. Nocantantajiaquempiqueate pintampishitashijiaquerojate maasano tecca oncameetsateji

ishineventajiacaca caquinte, quejetacaquea ashimirintacaro pishire arisanoja oquempevaeshirentacaajanajimpitsi.

¹² Imaica pinconoajiaquempariguetei teeca inquemisantajigueti cameetsaqueate pinchoocajigue. Arigueteija irinijashijiavetaquempi ijiqueji irooquea pantajiaque teeca oncameetsateji, cotanquitsi coajica iramenajiaquempi arimaja picomajamajajiaca irishineventajiaquempariqueate Aapani Irioshi incoraquetajeguetei, incantajiaqueri: “Arimajasacanicate yantajiaque cameetsatatsica.”

Peerero icantajiaqueri inquemisantajiaquerija majirontajiatsica

¹³ Aviatimpajia piquemisantajiaqueriguetei Amajirote, imaica pinquemisantajigueri aisa maasano pimajirojiate choocatanquitsica acaniqui quepatsiqui.

¹⁴ Pinquemisantajigueri pimajirote anaantatsica aisa quejemajirovecarica itigarancaqueca incantajiaqueriqueate antaguishejiguiroca teeca oncameetsateji incantomajajiaqueri, jero aisa irishineventajiaquempari netsanajanquitsica.

¹⁵ Irootarite ininqueca Aapani Irioshi pinetsanamajajiaquempaja cameetsanijite poguemisantimentajiaquerinijite nijashijiaquempica teeca intsajigueriji Aapani Irioshi.

¹⁶ Tecatsi omperajiaquempine imaica, nocantantajiaquempica pantajiaquero cameetsaguetatsica. Aatoquea picantitsi: “Imaica nantaguisquetaque taaca opajitapae nonintaguetica naatimpa, tecatsitarite omperataquenane.” Aato ocameetsati pinquejetaquempaguetei. Pinquemisantajiaquerija Aapani Irioshi ashintamajajiaquempica.

¹⁷ Cameetsaja pinquenquetsatacaajigueri maasano caquinte, paajiavaqueri maasano. Pimpintsajiaquemparija papiguemisantarijiate. Pimpincatsajiaqueriqueate Aapani Irioshi, pintsariventajiaquempari. Pimpincatsajiaqueri aisa pimajirojiate, cameetsaja pinquenquetsatacaajiaqueri.

Quero incojiaquempani aajanirentsijia

¹⁸ Aviatimpajia yomperajiacaca, pinquemisantamajajigueri omperajiguimpica aato pipigatsajigari. Aato apaniro piquemisantajigueri cavintsajajiaquempica, pinquemisantajiaqueriqueate aisa semajiguimpica.

¹⁹ Incatsimatashijitaquempiguetei intati pantsiperejacojiaquemparoqueate. Pinquejejaquempaguetei imaica pintsajiaque iriguenti piquemisantajiaque Aapani Irioshi, ariqueate imaica irishineventaquempi.

²⁰ Oraqueate managuetei pantsipejiaquempa incatsimatimentajitaquempiroguetei pantaquerogueti teeca oncameetsateji, ¿arimpate irooqueate irishineventimentenquempi Aapani Irioshi? Aatoqueate. Cotanquitsi oraqueate iroogueti pantsipejiaquempa pimajeretanaque incatsimatashijitaquempiguetei intati pantaquerogueti cameetsatatsica, ariqueate imaica irishineventimentajiaquempiro.

²¹ Irootaquequeate inintaque Aapani Irioshi pinquejejaquempa imaica. Pinquenquejamajajiaqueri Quirishito yatsipeventajiacajiguetei, ariqueate intsatacajiaquempi quero pincojiaquempani pantsipejiaquempaguetei incatsimatashijitaquempiguetei intati.

²² Iriatimpa tee inquempevaetempaji, aisa teequeate iramatavijantimateji.

²³ Oraqueate inijashijitacariquetei teequeate impigatantempaji. Aisa yatsipeta-caajitacariquetei teequeate incatsimajigueriji atsipetacaajiacarica, mana icantaque: “Inchiquiojita incantaque Aapani Irioshi quero incojiaquempani.”

²⁴ Oraqueate imetojaventajiacajiguetei Quirishito coroshiqui manaqueate yaitajianacajiro aguempevaerejia itsinoqui yatsipeventajiacaji aatonijite icatsimatimentajiro Aapani Irioshi. Imetojaventantajiacajica aatonijite aquempevaejiajatsi, manaqueate ancomajamajajanajempa intati. Yompajacojitaqueri coroshiqui cameetsanijite irimeshiimentajiajinijite ancoguitempainijijite anijajiajeniji.

²⁵ Coramani manaqueate piquejejiavecari intati oveja timpinanquitsica, cotanquitsi imaica pipianaja ichoocaquegueti Quempoguijantatsica Agamajacoshirentaquempica.

3

Quero incojiaquempani shirampari aisa imanquigare inchoocajiaquegueti cameetsa

¹⁻² Aviatimpajia manquigarentsijia pinquemisantamajajiaquerija manquigatimpica. Irioguetiqueate teeca inquemisantero Iguenquetsatsare Aapani Irioshi cotanquitsi iramenaquempiguete pinquejetaquero imaica arica irinintanaque inquemisantanaque iriatimpa aisa. Aatoqueate icoacota pinquenquetsatacaajeri pincantajiaqueriqueate inquemisantajiaque, yamenaquempitarite picomajamajajica, piquemisantajiaqueri.

³ Aato iroguenti piquenquejajiguiti pinetsanamajajiaquempaguete pinetsanajiaquero pitsinoquitica quejetacaroca pimaie jero pinenquequijiaquempa taaca opajitapae vegaramajatanquitsica jero aisa pinquitsaajiaquempa quitsaarentsi cameetsamagotanquitsica.

⁴ Iroguenti pinetsanajiaque pishire pinquenquejajiaque quero pincojiaquempani pinchoocatimentajiaqueniji cameetsa aatonijite osemashirentacaguimpi taaca opajita. Aritarite anetsanajiaquerogueti ashire ancoguitempani anchoocajiaque cameetsa. Irootaquequeate inintamajatica Aapani Irioshi.

⁵ Aritarite oquejejiaca manquigarentsijia coramanitica quemisantamajajiguirica Aapani Irioshi, ochoocajiaque cameetsa, aisa oquemisantamajajiguiri manquigataroca.

⁶ Ariqueate oquejetaca coramani Sarani iroatimpa, oquemisantamajatiri Averaa-
meni, aisa opincatsamajatiri amenaqueriguete iriguenti ashintaro. Imaica aviatimpajia pinchoocajiaqueguete cameetsa, aisa aatoguete pitsaroajigui, ariqueate pinquejejiaquemparo iroatimpa.

⁷ Aviatimpajia shiramparijia cameetsaqueate poajiaquero pimanquigarejia, teesaconatarite ontampishimajajigueti onquejajigueti aviatimpajia, aisa mavite-
tarite icavintsajajiaquempi Aapani Irioshi imeshiajiaquempiguete cameetsanijite irosatiniji pinchoocajiaque iriatimpaqui. Pinquejejiaquempa imaica cameetsaqueate poajiaquero pimanquigarejia cameetsanijite inquemimentajiaquempinijite Aapani Irioshi pamanajigueriguete.

Quero ancojiaquerini atsipetacaajiacajica

⁸ Imaicaquea imaica mana noncantajiaquempi pinquemavacaajiaquempaja, aisa pincavintsajavacaajiaquempaja. Pimpintsajiaquemparija papiguemisanteriteni, pincavintsajantajiaquequeate, aatoqueate pinintajigui panaantajiaque.

⁹ Querocaguete incojiaquempini itsipa aatoja pipigajigari. Incatsimajiaquempiguete incatitsajiaquempiguete, aatoja pipigajigari. Iroguentiquea pamanajiaqueri Aapani Irioshi incavintsajiaqueri. Irootaquetari inintacaantajiaquempica Aapani Irioshi incavintsajimentajiaquempinijite.

¹⁰ Ocanquetarite itioncacojiqueca ocanti:

“Quericaca nintanquitsineca irishinevaequempa aisa iriguintenitaquempa cameetsa, aatoqueate inijaguishevaeti, aisa aatoquea yamataga.

¹¹ Aato yantaguishetajiro teeca oncameetsateji, mana irantaque cameetsaguetatsica, irinintamajataquequeate inchoocajiaque cameetsa.

¹² Icavintsajajiguiritarite Amajirote maasano quemisantajiguirica, aisa icancani iquemajiguiri quenquetsatacaajiguirica, cotanquitsi iriraqueate antaguishetiroca teeca oncameetsateji teequeate irishineventajiguempariji.”

¹³ Pinintamajajiaqueguete pantajiaquero cameetsaguetatsica, ariqueate querocampate incatsimatimenquempica.

¹⁴ Cotanquitsi inchoocajiaquegueti catsimatimentajiaquempironeca pantaquegueti cameetsaguetatsica, picancaniquea pishinejiaquempa. Aatoqueate pitsaroacagari, aatoja pishoshoguiteta.

¹⁵ Manaqueate pintsaromentamajajiaquempari Quirishito, pamenajiaqueriqueate tee inquempevaetempaji, pincantajiaqueri: “Aviguenti Nomajirote.” Incoacojiaquem-pigueti quero ocotaca piquemisantantacarica Aapani Irioshi, pishinejiaquempaqueueate pincantajiaqueriqueate. Pincamantamajajiaqueri quero picotacani pitsatantajiacaca poajianaque jenoqui inquitequi ichoocaquegueti Aapani Irioshi picancaniquea pin-choocajiaipojaque.

¹⁶ Cotanquitsi cameetsaqueate pinquenquetsatacaajiaqueri, aatoja picatsimajiguri. Pinetsanamajajiaquempaja cameetsanjite impashiventimentajianaquempanijite quericaca catsimatimentajiaquempirineca Quirishito ariguete irivosantejimentajitaquempiri iramenajiaquempiguete piquemisanqueri.

¹⁷ Irioguete nintanquitsine Aapani Irioshi pantsipejiaquempa incatsimatimenta-jiquempiroguete cameetsaripae, cameetsavaetaque, caavijitarite anaaque ocameet-samajataque onquejetaquempaguete imaica, anaquero pantsipejiaquempaguete incatsimatimentajiquempiroguete pantajiguiroguete teeca oncameetsateji.

Yatsipetacaguete Quirishito

¹⁸ Aritarite yatsipetaca Quirishito aisa. Imetojaventajiacajiguete irishejiaqueronijite aguempavaerejia, apatiroqueate imetojaventajiacaji yagaqueroquea maasano. Iri-atimpa yoganejencamajatacaqueueate teequeueate inquempevaetempaji, cotanquitsi imetojaventajiacaji aatimpajia quempevaejatsica cameetsanjite iraajianacaji anconoajiaquempariniji Aapani Irioshi. Imetojajivetacari itsinoqui, cotanquitsi yanijacaajiri Ishire.

¹⁹ Yoashirentanaquequea iquenquetsatacaajiaquitiriqueate ishirejia ashitacoshire-jianquitsica.

²⁰ Iriojitarite teeca inquemisantajigueji coramani ichoocaqueguete Noeni. Oraqueate tequerataguete interonqueroji inirojegui quenajarontsi icantajitica aareca, irira Aapani Irioshi osamaniqueate yoguijajivecari teetaqueueate irantsipetacaajiguempariji. Oraqueueate iteroncaqueroguete quenajarontsi, ariqueate itejaquero inirojenca incani anancacojianaqueri maasano, ariqueate iteroncajiaca yojocajajiaca. Iriguentinivani yaajivajaji 8 amajatacojianquitsica aarecaqui.

²¹ Irooquea ogomarotaque imaica piviñacajiacaguete iraaajivajempiniji Aapani Irioshi. Tee irooquea piviñacajatashijiguempaji pinquivero cantaitero pitsinoqui, manaqueate piviñacajatantajiacaca pincantajiaqueriniji Aapani Irioshi pinintaque irishejia-jempi pishirequi aatoniji ochoocataji incantomajimentaquempica manaquea pinquen-quejajianaquero cameetsaguetatsica. Ipochatanajitarite Jesoquirishito yagavejanta-caca iraaajivajempi.

²² Cotanquitsi ipochatanaji ariqueate yoanaji jenoqui inquitequi. Imaica chooca isavicaque itincamijempequiqui Aapani Irioshi imajirontamajataguete, yanaajiaqueri maasano: irashivantijitete Aapani Irioshi, majirontaguevetatsica, agavejantaguevetatsica, maasano.

4

¹ Nocamantantajiaquempicaqueueate imaica cameetsataque pantsipejiaquempaguete aviatimpajia pinquejejiaquempari Jesoquirishito yatsipeventajiacajiguete itsinoqui. Antsipeventajiaquempariguete iriatimpa atsinoqui, aato aquenquejajajiro teeca oncameetsateji.

² Imaica choocatirajajigueti atsinoqui acaniqui quepatsiqui, aatoqueate coanatsi antaguishejigüero taaca opajitapae teeca oncameetsateji, iroguenti anquenquejamajajaque antajiaque inintaguetica Aapani Irioshi.

³ Coramani pantaguishejiaquetarite taaca opajitapae teeca oncameetsateji ishin-eventaca teeca inquemisanteriji Aapani Irioshi. Poashijiaquero manquigarentsi aisa piquenquejaguishejiaquero teeca oncameetsateji. Pishinquieriaca, aisa picapiocajiaaca cameetsanijite pishinquieriacaquempa pantaguishejiaqueniji teeca oncameetsateji. Icantavecaqueate Aapani Irioshi: “Aatoja pitsariventari itsipa”, cotanquitsi teequeate pinquemisantajigueriji, arimpaquea pijatiri pitsariventarianacari pirioshivijitashitacaca.

⁴ Imaica teenicate pinconoajajempariji antaguishejigüiroca teeca oncameetsateji, irootaquequeate icantantajianacaca: “Querocate icojianacani imaica teequeate inconoajajajiji”, ariqueate inijashijianaquempi.

⁵ Cotanquitsi chooca ontaniqui inquitequi irira Cantimentantatsica, incoacojiavaqueriqueate irira nijashijiaquempica, incantajigueri: “¿Quero ocotaca pinijashitantajiavetacarica irira quemisantajiaquenaca?” Aritarite incantimentajiaqueriqueate maasano taaca opajitapae yantajiaqueca maasano quempevaejiatsica imaica, iriocampa metojajianquitsica jerijia tequerataca irimetojajigüejiji.

⁶ Irootaquequeate iquenquetsatacaantajitacarica irirajiaqueate metojajianquitsica coramani. Imetojajiavetaca, iriguentijiatarite quempevaejiatsica quejecarica maasano igonorojia, cotanquitsi iquenquetsatacaajitaquero itsavetacojitaquero Quenquetsatsarentsi Oganejencatatsica cameetsanijite incoguitempaninijite inchoocajiaque ishirejia inquempejajempari Aapani Irioshi.

Icantajiaqueriqueate incavintsajajiaquerija irapiguemisanteriteni

⁷ Imaica pajiniqueate aguempa onteroncantapojempaca maasano acaniqui quepatsiqui. Nocantantajiaquempica pinquenquejamajajiaqueja quero pincojiaquempa, pincomajajigüempaja. Irosati pinquenquetsatacaajiaquero Aapani Irioshi.

⁸ Pinintamajajigüejia pimpintsatavacaamajajiaquempa. Pinquejejaquempagueti imaica aatoquea piquenquejajigüiro quero incojiaquempini papiguemisanterijiateni, manaqueate pimpeacotajemparo.

⁹ Paavacaajiaquempa, poguimaajiaquero osamanipaequitica, aato picantimanatiri.

¹⁰ Aapani Irioshi icantashitajiaquempiqueate yagavejacaajiaquempi apaniropae. Irootaquequeate nocantantajiaquempica imaica querocaca yagavejacaajiaquempica irootaquequeate pisavicaventajiaque cameetsanijite pamitacojiaquerinijite papiguemisanteriteni, cotanquitsi pisavicaventamajajiaquerojate cameetsanijite iramenimentajitaqueronijite arimaja icavintsajantamajati Aapani Irioshi.

¹¹ Choocagueti tsavetantatsica irooqueate intsavetantaque icanqueca Aapani Irioshi. Choocagueti amitacojigüirica irapiguemisanteriteni irooqueate iramitamajajiaquero, itampishitacaqueritari Aapani Irioshi. Pinquejejaquempa imaica cameetsanijite intsaromentajitaquemparinijite Aapani Irioshi, iriguentitarite agavejacaquempine Jesoquirishito. Iintsija acancanija antsaromentajiaquempari, iriguentitarite caavijica yagavejamajati. Ari oncoquempa.

Icantajiaqueriqueate irishinejiaquempaja yatsipeventajiacarigueti Quirishito

¹² Nopintsamajajiacaca, aato poajianaque intati patsipejiacagueti, aato picantajigüi: “¿Queroca ocotacani ocatita?” Aritarite onquejetaquempañi imaica cameetsanijite iramenajiaquempinijite Aapani Irioshi arimajaca piquemisantamajataquero.

¹³ Coramani yatsipevaetaca Quirishito. Imaica pishinejigüempaja, piquejejiacaritarite iriatimpa patsipejiacagueti cameetsanijite pishinetimentajiaquempañijite oncoramanitapojajigüeti iramenajitaqueriqueate irimajirontamajataquempa.

¹⁴ Pishinejiaquempaquate irivosantejajitaquempiguete iramenajiaquempiguete piquemisanqueri Quirishito. Ichocashirentajiaquempitarite Ishire Aapani Irioshi, iriguentiquea Oganejencari.

¹⁵ Inchiquiojitaja patsipeventajigarotsija pimetojantajiaqueguete, jero aisa pincoshijiaqueguete, aisa pantaguishejiaquerogueti otsipapae teeca oncameetsateji. Aisa inchiquiojia patsipeventajigarotsija piticaavaqueriguete taaca opaji irante.

¹⁶ Iroogueti patsipeventajiaquempa pinquemisantajiaqueriguete Quirishito, aatoja pipashiventajiga, manaqueate pintsarotentajiaquempari Aapani Irioshi pamenajiaqueguete iriguenti patsipeventajia Quirishito.

¹⁷ Aapocatarite impariantanaquemparoca Aapani Irioshi iramentajiaquemparica maasano, cotanquitsi iriquete parianacaro atsipejianquitsi irijanintajiacaca comeetsanijite iramenajitaquero arimaja iquemisantamajajiaque aricampa tee. Aritarite aquejienaca aatimpajia imaica atsipejiacaguete, iriompate irirajia teeca inquemisantajigueroji Quenquetsatsarentsi Oganejencatatsica itigarancaqueca Aapani Irioshi ¿quero incojiaquempani iriatimpajia? Arimaja irantsipemajajiaquempa.

¹⁸ Irantsipejiavetaquempaquate quemisantajiatatsica, cotanquitsi Aapani Irioshi irajaiavajeri. Irirampani covaequishetatsica teeca inquemisanteriji Aapani Irioshi, ¿quero incojiaquempani iriatimpajia?

¹⁹ Irootaquequate noncantantajiaquempica iriogueti nintanquitsi Aapani Irioshi patsipeventajiaquemparo inintaguetica iriatimpa, arimpaquate pantajianaquerora comeetsaguetatsica. Iriotaquetarite peacaajiacaji, irooqueate comeetsataquequate pinquenquetsatacaajiaqueri pincantajiaqueriqueate: “Nonintaque pamena-comajataquena, notsataquetarite pinetsanatero maasano picantaqueca.” Aatotarite yamatavijiguimpi Aapani Irioshi.

5

Peerero icamantajiaqueriguete quempoguijajiguirica quemisantajiatatsica

¹ Imaica nonintaque nontsatacaajiaquempi aviatimpajia quempoguijajiguirica quemisantajiatatsica capiocapiniatsica ontaniqui, naroguentitari aisa quempoguijajiguirica quemisantajiatatsica. Naroguentitarite amenamajataquerica Quirishito yatsipetacaguete. Oncoramanitapojajeguete incoraquetajateguete ironigaampojempa yoganejencavaeca, ariqueate intsipatanajena naatimpa aisa, nonquejevetanaquempari.

² Imaica irootaquequate noncantantajiaquempica ocativa: Pinquempoguijamajajiaquerija papiguemisanterijiateni, inintacajiaquempitarite Aapani Irioshi pinquempoguijajiaqueri. Pintsatacaajiaqueriqueate, aatoja piperajiga. Inchiquiojita pinintajianaque aviatimpajia pintsatacaajiaqueri, aatoqueate icantajiguimpi itsipa, aisa aatoja iro pitsatacaashitanti paaqueniji imentaquipae, manaquea pinintamajajigue pamitacojiaqueri.

³ Aatoja picatsimatsajiguiri pinquempoguijajiaqueriguete, manaqueate comeetsaqueate pinchoocajiaque comeetsanijite iroguijatocjianaquempinijite iriatimpajia.

⁴ Pinquejiaquempaguete imaica, oncoramanitapojajeguete incoraquetajeguete Jesoquirishito quempoguijajiajica maasano aatimpajia, irajaijanajempi intsipajianaquem-piqueate jenoqui inquitequi, incavintsajamajajiaquempiqueate pincoguitempani pinchoocamajajiaquequate comeetsa pinquejiaquempariqueate iriatimpa.

⁵ Imaica aviatimpajia quemisantajiatatsica pinquemisantamajajiaquerija quempoguijajiguimpica, aisa maasano pinquemisantavacaajiaquempaja, aato pinintajigui panaantajiaque. Aritarite itioncacojiquerogueti ocanti: “Aapani Irioshi ipigajiacari irirajia aventacojiatsica, cotanquitsi incavintsajamajajiaqueriqueate irirajia teeca iraventacojiguempaji.”

⁶ Irootaquequeate nocantantajiaquempica pimpincatsamajajiaquerijate Aapani Irioshi agavejamajatatsica. Oncoramanitapojaquegueti aapojempagueti irinintanaquegueti incovejencatacaajiaquempi, incovejencatacaajiaquempiqueate.

⁷ Taaca opajitapae piquenquejajiguica aatoja pishoshoguiteventajigaro, manaqueate pincantajiaqueriqueate Aapani Irioshi incavintsajajiaquempiqueate, igantagatarite iquenquejajiaquempi tee impeacojiguempiji.

⁸ Pinquenquejamajiaque cameetsa, pagamajavaquemparija imajirote ampatsini catsimajiaquempica. Iquejetacariquea chaonari icantigueti morororo, iquenague-tanaque yamenaguetanaque irishecaquempaca.

⁹ Cotanquitsiqueate pintampishitashijiaquerija aatoqueate piquemisantajiguiri. Picancaniqueate pinquemisantamajianaqueri Amajirote, aatoja povashiantajiguiri piquemisantajiaquerigueti, pitsajiaquetarite ariqueate iquejejiaca papiguemisantarijateni guinteniniatsica osamanipaequitica yatsipejiacaroqueate taaca opajitapae.

¹⁰ Ariqueate pinquejejaquempagueti imaica pantsipejaquempagueti, iriraquea Aapani Irioshi iramitacojaquempiqueate aatonijite povashiantajiguiri piquemisantajiaquegueti, aisa intampishitacajiaquempi jero aisa inquemisantacaamajiaquempiqueate. Ariqueate osamanijencaquegueti pinquejejaquempa imaica, ariqueate intsipajianaquempi jenoqui inquitequi pincoquempaniquea pinchoocajia poje ontaniqui, pinquejejaquempariqueate iriatimpa icovejencatigueti, irootaquetari inintacaajiaquempi Aapani Irioshi, aisa icavintsajamajiaquempiqueate piquemisantajiaqueritarite Jesoquirishito.

¹¹ Iintsija acancaniquea antsarotentajiaquempari, iriguentitarite caavijica yagavejamajati, incoguitempani irimajirontamajaguitempani. Ari oncoquempa.

¹² Chooa acaniqui notsipatacari Shirivano. Iriatimpa iriguenti papiguemisan-tariteni quemisantamajatarica Quirishito. Iriotaquequeate notsipatashitacaca notion-cajiaquempigueti capichaji notsavetanquerigueti Aapani Irioshi quero icota icavintsa-jajiaquempigueti, aisa notampishitacajiaquempiqueate cameetsanijite arimpanijite pinquemisantamajianaqueri. Aato povashiantajiajiro piquemisantajiaqueca.

¹³ Iirajiaqueate apiguemisanitarijateni guinteniniatsica Vavironiaqui* inintajiaque pinquemacojiaqueri iquenquejajiajimpi. Iriraqueate Aapani Irioshi inintacajiaqueri iriatimpajia inquemisantajiajeri inquejejaquempiqueate aviatimpajia. Ariqueate iquejetaca aisa notsatacaane Maricoshi nopeaqueca nirijanite, iriatimpa inintaque pinquemacojiaqueri iquenquejajiajimpi.

¹⁴ Netsana pinintavorotavacaavaquempa,† pimpintsatavacajiaquempa. Namanacoventajiaquempi piguintenijiaquempanijite cameetsa maasano aviatimpajia quemisantajiguirica Quirishito. Ari oncoquempa.

* **5:13 Vavironia.** Iconoagarantajiaa pariacaroca quemisantajiaquerica Quirishito iquenquetsatacoquerogueti Iroma, teequea tampatica incanteroji ovajiro, mana yomanaquero, iquempetacaacaro Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Arica ichooaque Peerero Iromaqui itioncaquerogueti ocatica paperi. † **5:14 Netsana pinintavorotavacaavaquempa.** Yamejiaca coramani inintavorotavacaajivaca yamenavacaajiacagueti, ari iquejejiaca tsarotentajigarica Quirishito coramani.

MAVITETAPOJATSICA ITIONCAQUECA PEERERO

Antsatantaquemparoca

Ocatica iroguenti antsatantaquemparoca mavitetapojatsica itioncaqueca Peerero. Chooca quenquejajianquitsica itioncaciaqueneri joriojia tsarotentajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1 Pe. 1.1). Cotanquitsi itsipajia iquenquejajiaque itioncaciaqueneri maasano quemisantajiaquerica Jesoshi. Peerero irio jorio, irio itigarancane Jesoshi. Irocashi itioncacotaqueri irira Peerero otsipaequi paperiqui (Ya. 1.12-5.42; 8.14-25; 9.32-12.19; 15.7-11). Iquenquejajitaque itioncaquero ocatica paperi irooca ajagantsiniqui 64, cotanquitsi tee intsajiteji quero ichooaqueuni itioncaqueroguete. Chooca quenquejajianquitsica itioncaquero ichooaqueguete guinteninintsiqui pajitatsica Vavironia, itsipajia iquenquejajiaque arica ichooaque Peerero Iromaqui itioncaqueroguete.

Itioncaciaqueneri quemisantajiaquerica Jesoshi iragamajajiaquempari amataajiat-sica, aatoniji yamatavijajiguiritsi intsatacaajiaqueriguete teeca iroomajateji, aisa aatoniji yovashiantajianajiro iquemisantajiaqueguete (3.17). Icamantajiaqueri quero incojiaquempani quemisantajiaquerica Jesoshi (1.1-15). Itsavetacotajiro coramanitica icantashitatiimojiacariguete Jesoshi, aisa iquenquejacaajiaqueri icantajiaqueca tsavetantajiat-sicani coramanitica (1.16-21). Icantajiaqueri icantajiavetacaca amataajiat-sica (cap. 2), aisa iquenquetsatacotaquero incoraquetajateguete Jesoquirishito acaniqui quepatsiqui (cap. 3).

¹ Naroguenti Shimo Peerero tioncaciaquempiroca oca. Naroguenti irajaanire aisa itigarancane Jesoquirishito. Imaica nontioncaciaquempi maasano aviatimpajia quejajiaquenaca naatimpajia aventajigarica Jesoquirishito Arioshite Aajiajavajica aatoniji apega. Cameetsavaetaque paventajiacariguete. Tampatica yoaguetaquero maasano, irootaque yagavejacaantajiaquem-pica paventajigari.

² Namanacoventajiaquem-piqueate pintsatimentamajajiaquerinijite Aapani Irioshi aisa Amajirote Jesoshi cameetsanijite arimpanijite incavintsajamajajiaquem-pi, aisa inchoocatacaajiaquem-piqueate cameetsa aatonijite pishoshoguiteventajigaro taaca opajitapae.

Icantajiaqueriqueate quero incojiaquempani inquemisantamajajiaqueriguete Jesoquirishito

³ Irira Aapani Irioshi inintacajaiacaji anconoajiaquempari, aisa anquejejiaquem-pari ancomajamajiaquem-pa. Imaica atsajiaqueritarite yagavejacaantajiacajica anquemisantamajajiaqueriniji, aisa antajiaqueronijite maasano inintaguetica.

⁴ Inetsanataqueroqueate icantacajica, yagavejacaajiacaji antajiaquequeate cameetsaguetatsica aatonijite aquejejijaaritsi teeca inquemisantajigueji antaguishejiguiroca teeca oncameetsateji, manaqueate anquejemajajiaquempari iriatimpa.

⁵ Imaica piquemisantajiaqueri, irootaquequeate nocantantajiaquem-pica nonintaque pincomajamajajiaquem-paja. Ariqueate pincomajamajajianaquem-paguete irooqueate pisavicaventajiaque pintsamajajianaqueroqueate inintaguetica Aapani Irioshi.

⁶ Pintsamajajianaqueroquete ariqueate pintampishitashijianaquero maasano teeca oncameetsateji. Pintampishitashijianaqueroquete ariqueate pantsiperejacojianaquem-pa. Pantsiperejacojiaquem-paguete ariqueate pimpincatsajianaqueri Aapani Irioshi pishineventajiaquem-paroqueate pantajiaquero inintaguetica iriatimpa.

⁷ Pimpincatsamajajiaquerigueti ariqueate pimpintsajiguempari maasano papiguemisantarijateni. Pimpintsajiaquemparigueti papiguemisantariteni, ariqueate pincavintsajajigueri aisa maasano caquinte.

⁸ Pinquejajiaquempagueti imaica arimpaqueate pintsamajajianaqueri Amajirote Jesoquirishito pinquejajianaquempariqueate iriatimpa, ariqueate aato piquemisanta-mampeajiga intati.

⁹ Iriiraqueate teeca inquejetempaji imaica iquejevetacari caarica amenamajatatsi, iquejevetacariquea shamponcajari teenicate intsamajateriji Amajirote, aisa ipeacocaró icavintsajaquerigueti Aapani Irioshi yaajirigueti ishetajinirigueti maasano iguempevaere.

¹⁰ Cotanquitsi aviatimpajia, napiguemisantarijateni, aatoqueate piquejajigari iriatimpajia mana picancani pantajiaquero nocantajiaquempica imaica cameetsanijite pintsamajajianaquenijite arimaja inintacajaiaquempi Aapani Irioshi pinquemisanta-jiaqueri aisa irashintamajajiaquempi. Pinquejajiaquempagueti imaica aato povashiantajajiro piquemisantajiguigueti.

¹¹ Coajicaqueate poajianaquegueti jenoqui inquitequi ichoocatigueti Amajirote Jesoquirishito Meshiantatsica cameetsaqueate irajaiavajempi pinconoajiaquempariqueate ontaniqui igantagagueti irimajirontamajataquempaquate.

Icantajiaqueriqueate arimpa inquenquejajianaqueroja itsatacaajiaquerica

¹² Pitsajiaqueroqueate notsatacaajiaquempica, aisa piquemisantamajajiaquero-queate, iroomajacatari; cotanquitsi irosatiquea nonquenquejacaajiajempiro.

¹³ Otampaticataquequea nonquenquejacaapinijiajempiro choocatirajanagueti acaniqui notsinoqui, quejecaroca noitsaarevanco,

¹⁴ notsaquetarite quempejitacotapoji savincaguiteri nometojantaquempaca nojocapanajantero notsino, itsatacaaquenarotari Amajirote Jesoquirishito.

¹⁵ Nonquejetaquempaquate imaica cameetsanijite pintsamajajiaquenijite aatonijite pipeacojajaro nometojanajegueti.

Cameetsavaequequeate inquemisantamajajiaqueri tsavetantamajatirica Quirishito

¹⁶ Oraqueate notsavetantajiguirigueti Amajirote Jesoquirishito nocantajiaquempigueti incoraquetajegueti incovejencamajatapojaje teequeate oratica naashijiguemparoji intati, namenamajajiaqueritarite coramani icantashitatiimojiaquenagueti ontaniqui otsempiqui icovejencavaequequeate.

¹⁷ Icovejencatacaqueritari Aapani Irioshi, yonigaantacaroquea iroganejencare iquenquetsajencajitanaquegueti jenoqui oganejencaguitetacagueti, icanti: "Iricatica irio Irijani, nopintsatacaca, noshineventamajatacari."

¹⁸ Noquemajiaqueroquea naatimpajia iquenquetsajencajitanaquegueti inquitequi itsipajiaquenagueti Amajirote ontaniqui otsempiqui.

¹⁹ Aisa atsajiaque arimaja icantamajajiaque tsavetantajiguironica icanqueca Aapani Irioshi coramani. Imaica cameetsataque pinquenquejajiaqueroja maasano itioncajiaqueca cameetsanijite pintsamajajientajiaqueronijite, manatarite oquejetacari tsivorentsi itsivojitirigueti pitsecariqui cameetsanijite onconijaguitetimenquenijite. Pinquenquejajianaqueroquea arejevaetantanaquempaca oratica savincaguiteri incoraquetantajempaca iriratica quejetacarica irira shigompiri amenaqueca osavincaguite-tamanaquegueti, ariqueate iroguiconijataquempiro pishirequi.

²⁰ Coramani itioncacojiquero Iguenquetsatsarequi Aapani Irioshi icantajiaquerica tsavetantiririca. Imaica nonintaque pintsajiaquequeate tee inchoocateji agavejanquitsineca inchiquiojita incantaque iriatimpa taaca opajita ocantacotaque.

²¹ Teenicate inquenquejashijiaquemparo intati irirajia tsavetantiririca. Manatarite iquemisantamajajiaqueri Aapani Irioshi ariqueate itsatacajiaqueri Ishire Aapani Irioshi quero incantajigue.

2

Tsatacaantantajiatsica amataajiatsica

¹ Cotanquitsiqueate coramani ichoocagarantajiaquequeate aisa tsavetantajiatsica amatavijajiaquerica ishiraerijia. Ariqueate onquejetanaquempani imaica inchoocagarantajianaquequeate tsatacaantantajiatsica amatavijantajiananquitsineca. Iromanacojianaqueriqueate Amajirote metojaventajiacajica, aisa intsatacaantantajiaque teeca iroomajaca Quenquetsatsarentsimajaca, incomitacaajiaquempani quemisantajia-avetemparinca, cotanquitsiqueate taampinaqueate interoncajitaqueri irisatiqueate quejetacaantajianquitsine.

² Oraqueate icancanigueti intsatacaantantajiaque inquemisantajiaqueriqueate oshequini caquinte, ariqueate inquejejianaquempani irantaguishejianaquequeate taaca opajitapae teeca oncameetsateji, irooqueate onquenapojaquempa intsojencantajitanaquemparoca Quenquetsatsarentsimajaca tsavetantaquerica Quirishito.

³ Iirajiaqueate amataajianquitsineca irinintavintsajiaquequeate imentaquipae intsatacaajiaquempiqueate taaca opajitapae inquenquetsatashijianaquempaqueate intati, cotanquitsi Aapani Irioshi jac icantacotsitacari coramani. Interoncajiaque-riqueate coajica, aato ipeacotaro.

⁴ Arimpate coramani irirajia irashivantijitete Aapani Irioshi antaguishejiaqueroca teeca oncameetsateji teequeate irajiajeriji, ipishoncajiaqueri ontaniqui isaviji yashitacojiaqueri opitsecaquegueti. Imaica icancaniqueate inchoocajiaque oraniqui irosati incantimentantajiaquemparica coajica.

⁵ Ariqueate iquejetaca igonorojiani Noeni antaguishejiaqueroca teeca oncameetsateji. Teequeate irajiajeriji, manaqueate itejaqueneri inirojenca incani anaacojianaqueriqueate maasano, ariqueate iteroncajianaca yojocajiacaqueate. Iriguentivaniqueate yaajjavaji Noeni jerijia aisa ijitanejia vegarajianquitsica 7. Iiraqueate Noeni iriotaque tsavetantimojiavetacarica igonorojia, icamantajiavetacariqueate inco-majamajiaquempame.

⁶ Aisa coramani iguinteniavetacaguete oshequini caquinte Soromaqui aisa Gomoraqui, oshequiamajatiguinimaja tsovironaquipae. Cotanquitsi iriatimpajia yantaguishejianaqueroqueate taaca opajitapae teeca oncameetsateji. Irootaquequeate icatsimatantajiacarica Aapani Irioshi yoguivariashijiaqueriqueate paamari yapevoquijajiaqueriqueate maasano, iteroncamajiaqueroqueate maasano tsovironaquipae teequeate querica choocatanajatsineca. Ariqueate iquejetaquero imaica cameetsanijite intsatimentajiaquenijite maasano antaguishejiatsica taaca opajitapae teeca oncameetsateji iriguenti ogomarojiaque incatsimajiaqueriguete oncoramanitapojajeguete interoncajiaqueriguete.

⁷⁻⁸ Ariqueate ichoocaqueni oraniqui apaniro caquinte icantajitica Iroteni, cameetsaqueate ichoocaqueni. Igantagaqueate yamenapinjiaqueri guinteniatsica oraniqui yantaguishejiaqueroguete taaca opajitapae teeca oncameetsateji, aisa iquemajiaqueri inijaguishejiaqueguete ishimampoancacaqueate oshequi, aisa ishoshoguitevaetaca. Irootaquequeate yaantavajarica Aapani Irioshi itigarancajiri ontaniqui aatonijite itaatsi iriatimpa.

⁹ Aritarite itsataque Amajirote quero incoquempari irajiajateri quemisantamajianquitsica aatoniji agavejajigui taaca opajita coraquetashijiaquerineca, aisa itsaque quero incantomajiaqueri maasano teeca inquemisantajigueriji, ariqueate aavaepojempa iramenacotantajiaquemparica irantsipetacaamajiaquempani.

¹⁰ Irioquea incatsimamajiaque irirajia guijatacojiguiroca inintaguishejiguica. Iriatimpajia iroguenti isavicaventajiaque yantaguishejiaquero taaca opajitapae teeca oncameetsateji. Teequeate impincatsajigueriji Amajirote, aisa inijashinacari irashivantijitete Aapani Irioshi teequeate impincatsajigueriji.

¹¹ Irirampani ashivantijite caaviji yanaajiaqueri nijashinatacarica yagavejavaevecaquea, cotanquitsi teequeate impigatimajiguempariji incantajiaqueri Amajirote irantsipetacajaiacquempari.

¹² Imaica noncantajiaquempi irirajiaqueate amataajiatsica teequeate intsajigueji quejejiacaqueate tomirishipaequitica isavicaventajiguiro taaca opajitapae inintajiaqueca. Iroguenti ichoocatashijiaque irajitaqueriqueate irimetojajitaqueriqueate. Iriatimpajia mana inijashijajaro taaca opajitapae teeca intsajigueroji. Irantsipetacajiquempariqueate interoncajitaqueriqueate quejejiacaqueate tomirishipaequitica.

¹³ Irantsipejiaquempaquatee iroorijite yatsipetacaantajiaa iriatimpajia. Icanani isavicaventajiguiro taaca opajita ishineventajiaa. Ooshiatsi apashiventacaqueate pitsipajiacarigueti pishecajiacagueti aisa ishinejiacagueti yamatavijantajiaquegueti.

¹⁴ Teequeate iramenashitemparoji manquigarentsi querocaca yamenajiaqueca. Igantagaqueate yantaguisquetaquero taaca opajitapae teeca oncameetsateji, teequeate irovashianteroji. Yagavejantajiacarica teesaconaca intampishitashijigueroji teeca oncameetsateji, iquempaveatacaajiacari. Ari canca iriatimpajia ineveguecaro ajaararontsipae, itsajiguirotari quero incojiaquempani irajaarantajiaquempagueti, cotanquitsi incatsimatimentajiaqueriqueate Aapani Irioshi interoncajiaqueri.

¹⁵ Yovashiantajianaquerotarite tampaticavoquitanquitsica, iquenashijianaca. Manaqueate iquejejiacari Varaameni irijanite Veori, inintavintsavetacaqueate irajaaranquempame yantaqueroqueate teeca oncameetsateji iraantaquemparomequeate.

¹⁶ Cotanquitsi coajicaqueate irio aashino cantomajaquerica, icantimentaqueri yantaqueca teeca oncameetsateji. Iriovetaca canaanquitsica teeca intsavetempaji inquenquetsate, cotanquitsi iquempetanacari caquinte iquenquetsatanaque icantomajaqueri tsavetantavetacaroca icanquerica Aapani Irioshi, iticaavaqueri aatoniji iquejetanajari shoncacotanquitsica.

¹⁷ Iriatimpajia mana iquejejiacaro ochaquirejigueti motojavetatsica. Aisa mana iquejejiacaro oseetigueti yamenajitirogueti arica ontejapojaque incani, cotanquitsi yaanajiro tampija, tee ontejeji. Aritarite iquejejiaca iriatimpajia itsatacaantajiaveca cotanquitsi mana yamatavijantajiaque intati. Coajica incatsimatimentajiaqueri Aapani Irioshi impishoncajiaqueri opitsecamajaquegueti, icancaniqueate irantsipejiaquempa.

¹⁸ Oshequi isemejigui, aisa iquenquetsaguishetashijiaa. Yantaguishejiaque taaca opajitapae teeca oncameetsateji ariqueate yovashiantacaajivajiri iriaqueraca comajjiananquitsica quemisantavecaroca Quenquetsatsarentsimajaca.

¹⁹ Icantajiaqueri: “Imeshiajiaquempitarite Aapani Irioshi imaicaqueate cameetsaqueate pantajiaquero taaca pinintaque. Aatoqueate icatsimatimentajiguimpuro.” Icantajiavecaqueate imaica, cotanquitsi iriatimpajia teequeate iragavejajigueji irantajiaquequeate taaca inintaque, iroguenti yantaguisquetaque teeca oncameetsateji teroncacajaiacquemparineca coajica. Pitsajiaquetarite teequeate inchoocateji agavejanquitsineca inchiquiojita irovashiantajero iriatimpa taaca opajitapae agavejamajaquerica.

²⁰ Coramani yantaguishejiaquero teeca oncameetsateji. Ariqueate itsajiaquerigueti Amajirote Jesoquirishito Meshiantatsica yovashiantajianaquero. Cotanquitsi imaica inquejetanajempagueti iroaqueragueti tequeratagueti intsajigueriji arimpaqueate irijajianaqueri, arimpaqueate irogaajianaquempani.

²¹ Aatomeja itsajiguirome Quenquetsatsarentsimajaca tsavetantirica Quirishito. Itsajiavetacarotarite cotanquitsi yovashiantajianajiro, irootaquequeate arimaja irantsipemajajiaquempa. Aisa ipiashijianajaro yantaguishejiguica arimpaqueate ijajiguiri.

²² Icantajitarite imaica: “Iriaqueate shiishi icamaranquigueti, yoguipiajiro ishecatavajaro.” Aisa icantajiti: “Pincajaterigueti chancho irisati piashitanajemparone inti-

garitajemparo sampovatsa.” Ariqueate iquejetaca quemisantajiavetatsica piashijianajarooca yantaguishejiguica.

3

Incoraquetajeguetei Amajirote

¹⁻² Napiguemisantarijateni nopintsamajajiaca, coramaniqui notioncajiaguempi nonquenquejacaumentajiaquempironijite iquenquetsatacojiaqueca tsavetantajiguirinica Aapani Irioshi, jero aisa notsavetantajiaqueca naatimpajia itigarancanejia Jesoshi, nocamantajiaquempiguetei maasano icantajiaquenaca Amajirote Meshiantatsica. Imaica notionquitajiajimpiqueate aisa nonquenquejacaamajajiaquempiro pinquenquejacojiaquenijite cameetsaguetatsica.

³ Nonintaquetarite iroqueti pinquenquejamajajiaque quero oncotanaquempani oncoramanitapojajeguetei pajiniguetei aapojempa savincaguiteri vegaratapojaatsineca, inchoocajianaquetarite savicaventajianaqueroneca irantaguishejiaquero teeca oncameetsateji. Irishirontimentajianaquempiqueate incantajianaquequeate:

⁴ “¿Querocampate icoraqueti imaica Quirishito? Arimpate icantajitini incoraqueetaje. Manaqueate imetojaguetanaji avaesatiniteni, cotanquitsi tequeratampate incoraqueeteji imaica. Jac arimpate coramani iroaqueraguetei ipeacaacaro quepatsi irosati imaica choocatanatsi.”

⁵ Teenicate irinintajigue inquenquejajiajeroji coramani ipeacaacaro Aapani Irioshi inquitepae aisa quepatsi, ipeacaantaguetacaroquea iguenquetsatsare. Oraqueate quepatsi osotoajatapojaque quantijaniqui, manaqueate ovogoretacocarocaro quantijani.

⁶ Irooquea aisa oja anaanaquero maasano quepatsi coramani, iteroncantajiacaca maasano choocantaguetaroca, yojocajajiaca.

⁷ Cotanquitsi imaica mana icanque: “Nontsotetavaquemparota quepatsi jero aisa inquite aatota noteronquitaro imaica choocantajiacaroca.” Cotanquitsi oraqueate coajica incatsimatimentajiaqueriguetei maasano teeca inquemisantajigueti ariqueate intaaguetaquero maasano.

⁸ Imaica, nopintsajiacaca, aato pipeacotaroc ocativa. Iriaqueate Amajirote tee inquejeji aiatimpajia: 1,000 ocarati ajagantsi iriatimpa yamenaquero oquejetimotacari apajencatiro savincaguiteri; ari oquejetaca aparocaro savincaguiteri ariqueate oquejetimotacari 1,000 ajagantsi.

⁹ Cotanquitsi imaica chooca cantajianquitsica: “Icantaveca Amajirote, ‘Noncoraqueetaje.’ Imaica tequerata incoraqueetajeji manaquea ipeanaca ontaniqui. Imaica aato icoraquetaji.” Cotanquitsi naatimpa noncantajiaquempi arimajaqueate incoraqueetaje, tee impeguempaji intati. Iroguenti inintaque incantashitajiaianaquem-pata teeca inquemisantajigueriji irovashiantajianaquerota yantaguishejiguica teeca oncameetsateji inquemisantajiajerita, teenicate irinintenate impeguempa apaniro. Irotaquequeate imaica pamenajiaque tequerata incoraqueetantempaji, cotanquitsi incoraqueetajequeate.

¹⁰ Oraqueate incoraqueetajateguetei Amajirote mana irimapocapojajempa inquejetapojempari aitsitantatsica imapocantiguetei yaitsitantiguetei. Ariqueate ompojimatanaque jenoqui inquitequi togn, ariquea ompeaquempa inquite. Intaaguetanaquem-pa catsirincaiteri, taai, jeri aisa impoquiropae, maasano interoncamajatanaque-mpa. Ariquea onquejetanaquem-pa aisa quepatsi ontaaquempa, ontsipatanaquempa maasano taaca opajitapae choocantaguetaroca, maasano ariqueate onteroncama-jatanaquempa.

Aapani Irioshi impeacaajempa otsipa quepatsi aisa inquite

¹¹ Iroorijite atsajiaque onteroncaguetanaquempa maasano, ¿querocampa pincojiaquempani imaica? Iroosacanicate imaica aviatimpajia pincomajamajajiaquempa pinquemisantamajajigueriqueate Aapani Irioshi.

¹² Poguijajavajero aapojempagueti savincaguiteri intaantaquemparooca Aapani Irioshi inquite, ariqueate avejancaguetanaquempa maasano choocatantaguetaroca. Pisavicaventamajajiaqueroja maasano inintaguetica iriatimpa cameetsanijite taampinanijite irinetsanaguetaquero taampina.

¹³ Aatimpajia aguijajiaquerotarite iroaquerari inquite aisa iroaquerari quepatsi impeacaajempaca Aapani Irioshi coajica. Iroorijite icanque coramani impeacaajempacoajica otsipa oganejencamajataquempaquate, aatoqueate ichoocataji antaguishetajeroneca teeca oncameetsateji, manaqueate oganejencaguitetaquempa maasano.

¹⁴ Imaica aviatimpajia nopintsajiacaca, poguijajiaqueritarite incoraquetajegueti irinetsanataquero icanqueca. Irootaquequeate noncantantajiaquempica imaica aatotagueti icoraqueti iintsija pincomajamajatempa, aato pantajiguero teeca oncameetsateji, iramenajiaquempinijite Aapani Irioshi piguintenimajajiguempa cameetsa.

¹⁵ Pamenajigue imaica tequerata incoraquetaje Amajirote, manatarite inintaque inquemisantajiaquerita itsipapae caquinte cameetsanijite iraimentajavajerinijite. Iri-
raqueate apiguemisantariteni Paavoro apintsajiacaca itioncaciaquempi iriatimpa aisa, icantajiaquempiqueate quejetaroca nocantajiaquempica imaica. Iriguentitarite tsatacaqueri Aapani Irioshi, irootaquequeate icantantajiaquempica.

¹⁶ Ariqueate iquejetiro iriatimpa imaica itioncaguetigueti itsavetantirogueti ocapae. Oconoagarancaqueate itioncaguetaquequea manamajaguetanquitsica teequeate intsajitavaqueroji. Iriraquea teeca intsamajatero Iguenquetsatsare Aapani Irioshi jerijia teemajaca inquemisantamajajiguroji mana yogajiaquero intati icanqueca, iquejetacaajiacaro yogajiaquerogueti otsipapae Itioncacaantaqueca Aapani Irioshi. Inchiquiojitarite inquejetacaantajiaquempa iriatimpajia.

Ivegaraquerogueti icantajiaquerica

¹⁷ Imaica aviatimpajia nopintsajiacaca, pitsajiaquerotarite ocativa nocantajiaquempica, inchiquiojia yamatavijajiguimpitsija pigatsatantatsica, yovashiantacaajiguimpitsija piquemisantamajajiguica.

¹⁸ Mana arimpaquate pinquimoshirentanaque icavintsajajiaquempigueti Amajirote Jesoquirishito Meshiantatsica, aisa pintsamajajianaquerija. Jameja ashineventajiguempari imaica, ariqueate acancaniqueate ashineventajiaquempari. Ari oncoquempa.

IROQUETICA ITIONCAQUECA JOANCA

Antsatantaquemparoca

Ocatica iroguenti antsatantaquemparoca iroquetica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguite pajitatsica Santiago, iquit-sajiaque. Irocashi itioncacotaqueri irira Joanca paperiqui Yantajiguica 3.1-4.22. Iquenquejajitaque itioncaquero ocatica paperi ichoocaquegueti Epesoqui, atsajiaquetari iriguenti quempoguijajiguirica quemisantajiatsica Epesoquitica. Iquenquejajitaque arica itioncajiagueneri quemisantajiatsica quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarensi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncacotaqueri acaniqui caquinteja tsatacaantajavetacaroca teeca iroomateji, icantajavetaca, “Jesoshi teequea irio irijanite Aapani Irioshi”. Irootaque itioncantajiacanarica quemisantajiatsica cameetsaniji intsajiaque arimaja Jesoshi iriguenti Irijanite Aapani Irioshi, cameetsaniji irishinevaejiaquempa iquemisantajiaquerigueti Jesoshi, aisa intsajiaqueniji maasano aventajiacarica arimaja ipeacotsijajari iguempvaereja, incoguitempani intsipajiaquempari jenoqui inquitequi (1.1-4; 2.18-3.3; 4.1-6; 5.1-15). Itsatacaajiaqueri Joanca jero anaamajatanquitsica: ampintsamajajiaquempari Aapani Irioshi aisa ampintsajiaquempari apitsaromentarijateni aisa maasano caquinteja (2.9-17; 3.11-24; 4.7-21). Itsatacaajiaqueri aisa quero incojiaquempanti quemisantajiatsica arigueti inquempevaetaquempa (1.5-2.8; 3.4-10; 5.16-21).

Quirishito iriguenti Anijacaantantatsica

¹ Imaica nontioncajiaguempanti nontsavetanqueri igantagaca choocatanquitsica coramani iroaqueragueti tequeratagueti onchoocatimateji, noquemajiaqueritarite ariqueate namenajiaqueri aisa nopamijiaqueriqueate. Iriguentitarite Quenquetsatsarensi Anijacaantantatsica.

² Iriratica Anijagantsi, yonigaantaca, namenajiaqueri notsavetacotantajiacaricaqueate, iriguentitarite anijacaajiacajineca ancoguitempaninijite anchoocajiaque Aapaniqui Irioshiqui. Manaqueate ichoocavetaca Aapaniqui cotanquitsi ariqueate icoraquequiti yonigaajiaquena.

³ Iriotaque notsavetacojiaque iriraquea namenamajajiaqueca aisa noquemamajajiaqueca. Nocamantantajiaquempica cameetsanijite pintsipashirentimentajiaquenani-jite pinquejejiaquenani-jite naatimpa notsipashirentajiacarigueti Aapani Irioshi jeri aisa Irijanite, irira Jesoquirishito.

⁴ Notioncajiaguempanti cameetsanijite pishinemajajianaquempanijite.

Aapani Irioshi iriguenti Tsirencarimajaca

⁵ Iroguenti nocamantajiaquempica itsatacaajiaquenaca Jesoquirishito icanquegueti irira Aapani Irioshi iriguenti Tsirencari, teequeate impitsecacoteji, teenicate inquempevaetimatempaji, irootaque icantantajitacarica Tsirencari.

⁶ Ancantajiguegueti atsipamajajajari Aapani Irioshi cotanquitsiqueate agantagati-rajagueti aquempevaejiga manaqueate amataajiaa intati, teenicate antajigueroji cameetsaguetatsica, quejecaqueate manaca apitsecacojiaque intati.

⁷ Cotanquitsiqueate ancomajamajajiaquempagueti quejetaca aquenanaque tsirenca-guiteriqui, anquempejiaquemparigueti Aapani Irioshi icomajamajatagueti, ariqueate atsipashirentavacaajiaa, ishejiajirotarite maasano aguempevaerejia, ishetantajajiro iriraja Jesoshi Irijanite.

⁸ Ancantajiguegueti: “Tee nonquempevaetempaji”, aroguentiqueate amatavijajatsi, aisa tequerata antsamajateroji iroomajatatsica.

⁹ Cotanquitsiqueate ancantajiaquerigueti Aapani Irioshi antajiaquerogueti teeca oncameetsateji, iriatimpa impeacojiacajiro, irishetajajiroqueate maasano, icancanitarite inetsanatiro icanqueca, teenicate iramatavijanteji icameetsamajatarite.

¹⁰ Oraqueate ancantajiguegueti: “Tee nonquempevaetempaji”, quejetacaqueate manaca acantajiaque Aapani Irioshi iriguenti tsojenti, teequeate anquemisantamajajigueroji icamantavetacajica.

2

¹ Napiguemisantarijateni, aviatimpajia quejetaquempi irijanijia, iroguenti notion-quimentajiaquempi aatoniji piquempevaejiaa. Cotanquitsi antajiaquerogueti teeca oncameetsateji chooca quenquetsatacoventacajica quenquetsatacaquerica Aapani Irioshi. Irioquea Jesoquirishito teeca inquempevaetimatempaji.

² Apanirotarite iriatimpa metojaventajiacajica cameetsanijite irishetajajironijite Aapani Irioshi aguempevaerejia aatonijite iquenquejacaajajiro coajica. Cotanquitsi teequeate apanirotarite irimetojavertero ashijia, imetojaverteroqueate irashijia maasano caquinteguetsatsica.

Anetsanajiaqueroja icantajiacajica Aapani Irioshi

³ Oraqueate anetsanajiaquerogueti icantajiacajica Aapani Irioshi, iroqueate atsa-tantajiacaca arimaja atsaqueri.

⁴ Choocagueti cantatsica: “Notsaqueri”, cotanquitsi aatogueti inetsanatiro icantajiacajica, iriguentiquea tsojenti, teequeate intsateroji iroomajaca.

⁵ Arigueti anetsanamajajiaquero Iguenquetsatsare, arimaja aroguenti pintsamajajigarica, iroqueate atsatantajiacaca arimaja atsipamajajiacari.

⁶ Ancantajiaquegueti atsipamajajiacari aquemisantajiaqueri, iintsija anquejejiaquempariqueate Jesoquirishito iriatimpa inetsanamajiaquerogueti maasano icanquerica Aapani Irioshi.

⁷ Napiguemisantariteni, ocativa oca notioncaciaquempica teequeate iro iroaqueraro quenquetsatsarentsi, iroguentiquea paesatotica piquemajiaqueca coramani iroaqueragueti piquemisanqueri Quirishito.

⁸ Cotanquitsi quejetaca iro iroaqueraro. Amenaquerigueti Quirishito atsaque iroomajaca icantajiacajica, aisa iramenajitaquempigueti intsajitaque iroomajaca. Coramanitarite quejevaetaca apitsecacojiaque, cotanquitsi imaica manaqueate at-sirencaguitetacotanaque intati.

⁹ Choocagueti cantashitatsica: “Tsirencaguitetacotanaquena”, cotanquitsiqueate igantagatirajagueti isemacari irapicaquintete, manaqueate igantagatiraja ipitsecacoti.

¹⁰ Iriraqueate pintsamajatarica irapicaquintete manaqueate itsirencaguitetacotanaque, teenicate onchoocatantajemparijiqueate taaca opajitapae onquenapojaquempaca inquempevaetanquempaca.

¹¹ Cotanquitsi iriraqueate semacarica irapicaquintete quejetaca manaca ipitsecacotaque intati, irotaquequea teeca intsatantempaji querocampate incoquempani, oshamponcajatacaaqueritarite pitsecari.

Iintsija ovashiantamajajianaquero maasano teeca oncameetsateji

¹² Irijanijia* notioncantajiaquempica ishejiaquempitarite Aapani Irioshi piguempaveereja, aatoqueate iquenquejacaajimpro, piquemisantajiaqueritarite Jesoquirishito.

¹³ Irijanintajianquitsica, notioncajiaquempiqueate pitsajiaqueritari iriquetica choocatatsica coramani tequerataguete onchoocatimagueteji. Notioncantajiaquempica aviatimpajia iriaqueraca quenquevarijiananquitsica, pagavejajiaqueritarite ampatsini. Notioncantajiaquempica aviatimpajia napiguemisantarijiate quejejiaca nirijanijiate, pitsajiaqueritarite Aapani Irioshi.

¹⁴ Notioncantajiaquempica irijanintajiansica pitsajiaqueritarite iriquetica choocatatsica coramani tequerataguete onchoocatimaguetejiqueate. Notioncantajiaquempica aviatimpajia iriaqueraca quenquevarijiananquitsica pitampishitashijiaquero tarite maasano, aisa Iguenquetsatsare Aapani Irioshi ochoocaguitaquempi, jero aisa pagavejajiaqueri ampatsini.

¹⁵ Aatoqueate pinintamajajigui pantajiguero yantapinijiguica quepatsiquitica teeca intsariventajiguempariji Aapani Irioshi, aisa aatoqueate pinintamajajiguiro choocaguetatsica acaniqui quepatsiqui. Quericaca nintamajatiroca quejecaroca imaica, tee impintsatempariji Aapani Irioshi.

¹⁶ Teenicate irishineventemparoji Aapani Irioshi ishineventacaca antiroca teeca oncameetsateji. Iriatimpajia manatarite iquenquejajiaquero taaca opajitapae inintamajajiguica iriatimpajia, aisa inintajiaquequeate irashintajiaquemparo maasano yamenajiaqueca, jero aisa yaventacojiga yashintajigaroguete.

¹⁷ Oraqueate quepatsi onteroncaguetanajempatarite, aisa onteroncaguetanaquempa maasano teeca oncameetsateji ishineventaca caquinte, cotanquitsi iriraqueate antamajajiguiroca inintaguetica Aapani Irioshi incoguitempaniqueate inchoocaguiteni.

Catsimajiguirica Quirishito

¹⁸ Irijanijia, imaica pajini aguempa incoraquetantajempaca Quirishito. Aviatimpajia piquemacojiaqueri incoraqueque catsimatirica, cotanquitsi naatimpa nocantajiaquempica chooca imaica yoshequiaque catsimajiaquerica. Irootaquequeate antsatantajiaquempaca pajini aguempa incoraquetantajempaca Quirishito.

¹⁹ Iriatimpajia manaqueate iconoajavetacaji, cotanquitsi teequeate inquempemajajigaji aatimpajia, teenicate inquemisantajigueriji Quirishito. Arimequeate inquempemajajiacajime aatomequeate itsinampirejajiacajime, igantagamequeate intsipajiacajime, cotanquitsi itsinampirejajianacaji. Oquejetantacaca imaica cameetsanijite antsatimentajiaqueriniji tee inquejetaji aatimpajia iquemisantajiguijueji.

²⁰ Cotanquitsi aviguentiquea itigarancajiaquempi Aapani Irioshi Ishire inchoocashirentajiaquempi, pitsatantajiacaroca Quenquetsatsarentsimajaca maasano aviatimpajia.

²¹ Teequea mana nontioncajiguempiji namenajiaquempi tee pintsajigueriji. Iroguentiqueate notioncantajiaquempica namenajiaquempitarite pitsamajajiaquero. Aisa pitsajigui iriraquea cantamajatatsica teequeate iramataguempaji.

²² ¿Queri tsojegatsica? Iriguenti cantatsica Jesoshi tee irio Quirishito Meshiantatsica. Iriguentisacanicate catsimataquerica Quirishito, teenicate inquemisanteriji iriatimpa aisa Iriri, mana icanque teequeate inchoocajiguijueji.

²³ Quericaca tsojencaquerica Irijanite Irioshi tee intsateriji, aisa tee intsateriji Aapani Irioshi, cotanquitsi iriraquea cantamajatatsica: “Jesoshi iriguenti Irijanite Aapani Irioshi”, iriotaque tsamajatiirica, aisa itsamajiaqueri Aapani Irioshi.

* **2:12** Iquenquevarivaetanaquguete irira Joanca icantiri “irijani” maasano quemisantajiaquerica Amajirote Jesoquirishito.

²⁴ Pincoguitempanija pinquenquejajiaquero iroquetica piquemajiaque aatonijite pipeacojigaro. Picancaniguete pinquenquejajiaquero pintsipamajajiaquempariquea Aapani Irioshi aisa Irijanite.

²⁵ Icantajiacajitarite ancoguitempani anchoocajiaque iriatimpaqui.

²⁶ Imaica notioncacojiaqueri nintajavetanquitsica iramatavijajiaquempime.

²⁷ Cotanquitsi aviatimpajia ichoocashirentajiaquempi Ishire Aapani Irioshi itigaran-cajiaquempica Jesoshi, tee pincoguimentajempa intsatacaajiajempi caquinte, maasan-otarite itsatacaajiaquempi Ishire Aapani Irioshi. Iriatimpaqueate icantamajataque teequeate iramataguempaji, irootaquequeate imaica pincoguitempani pintsipamaja-jiaquempari Quirishito pinetsanamajajiaquero itsatacaajiaquempica Ishire Aapani Irioshi.

²⁸ Imaicaquea, irijanijia, pintsipamajajiguempari Quirishito cameetsanijite pishineventimentajiavaquemparinijite incoraquetajeguete. Pintsipamajajianaque-mpariguete aatoqueate apashiventacaavajari coajica.

²⁹ Pitsamajajiaqueriquea Jesoquirishito tee inquempevaetempaji, iriotarite coma-jamatatsica, iroosacanicate pintsajiaquequeate aisa maasano comajamajajatsica iriguenti ivoashirentica Quirishito.

3

Maasano comajamajajatsica iriguentijia irijanijiate Aapani Irioshi

¹ ¡Pamenajigueroja! Caaviji ipintsamajajiacaji Aapani Irioshi ipeacaantajiacajicaqueate irijanijiate. Arimaja aroguentijia irijanijiate. Jeroqueate teeca intsatantajiacajica itsipajia quepatsiquitica, teequea intsajigueriji Aapani Irioshi.

² Napiguemisantarijiate ni nopintsajiacaca, imaica aroguentijia irijanijiate Aapani Irioshi. Teequeate antsajigueji querocaca ancojianaquempani coajica amenajiaque-riguete Jesoquirishito, iroguenti atsajiaque incoraquetajeguete anquejejaquempari iriatimpa, amenamajajiaqueritarite quero icota.

³ Maasano oguijajavajirica incoraquetajeguete yovashiantajiaquerotari covaeguish-erentsi yantajavetacaca igantaga icomajamajajica, iquejejiacari iriatimpa tee in-quempevaetempaji.

⁴ Cotanquitsi iriraquea quempevaetatsica tee irinetsanatero icantica Aapani Irioshi, iroguentitarite quempevaerentsi teeguete anetsanateroji icantica.

⁵ Imaica atsajiaquequeate irooqueate icoraquetashitaquiti Jesoquirishito irishetaja-jiroqueate aguempaveerija. Iriatimpa teenicate inquempevaetimatempaji.

⁶ Maasano quisho oaquerica Quirishito, tee incovaeguishetanajempaji, cotanquitsi irira covaeguishetanajatsica tee irameneriji, tee intsateriji.

⁷ Irijanijia, inchiquiojia yamatavijajitimpitsi. Irirajia antiroca cameetsa iriguen-tiqueate cameetsatatsica, iquempetacari icameetsatiguete Jesoshi.

⁸ Cotanquitsi irira antapinitiroca quempevaerentsi iriguenti ashintari ampatsini. Irira ampatsini igantagatarite iquempevaetaca coramani iroaqueraguete ipigatsatacari Aapani Irioshi, irooqueate icoraquetashitaquiti Irijanite Aapani Irioshi irovashianta-caantaqueronijite yantavetacaca ampatsini aatonijite iquemisantajitajiri.

⁹ Irirajia irijanintacaca Aapani Irioshi teequeate irantajanajeji teeca oncameetsateji, ichoocashirentaqueritarite Ishire Aapani Irioshi. Ariqueate quero incotaquempa iran-taguishejajeguete, iriguentitari Aapani Irioshi irijanintacarica.

¹⁰ Jero itsatantajitacarica queri irijanijiate Aapani Irioshi, aisa queri yashintajiacaca ampatsini. Irira teeca iranteroji cameetsari aisa irira teeca impintsatempariji irapi-caquintete teequeate irio ashintemparine Aapani Irioshi.

Ampintsatavacaajiaquempa

¹¹ Imaica mana noncantajiaquempi piquemajiaqueca iroaqueragueti icantajique: “Pimpintsatavacaajiguempa.”

¹² Aato piquejigari Cainini yashintacarigueti ampatsini, irootaquequeate imetojantacarica iriguentijeguite. ¿Taa imetojimentaqueri? Mana yamenaqueri yantaquero cameetsari, iriatimpa iroguenti yantaque teeca oncameetsateji, irootaquequeate imetojantacarica.

¹³ Napiguemisantarijateni, aato poajianaque intati irisemajiaquempigueti quepat-siquitica.

¹⁴ Atsajiaquequea, coramani anajiaque metojagantsiqui, cotanquitsiquea imaica anajiaji anijagantsiqui. Jeroquea atsasantajiacaroca: apintsamajiacaritari apiguemisantarijateni. Cotanquitsi maasano teeca impintsatantempaji icancani inajiaque metojagantsiqui.

¹⁵ Maasano semajigarica irapicaquintete mana iquejejiacari metojantatsica. Aviatimpajia pitsajiaque irira metojantatsica teequeate irimeshiguempajiqueate ishirequi, teequeate iranijacagueriji ishirequi Aapani Irioshi.

¹⁶ Jero atsasantajiacaca quero ancojiaquempiani ampintsamajatantajiaquempagueti: irira Jesoquirishito caaviji ipintsamajatacaji imetojaventantajiacajica, ariquitee anquejejiaquempa aatimpajia aato atsaroacagaro ametojaventajiaquerigueti apiguemisantarijateni.

¹⁷ Querica ashintaguetanquitsica cotanquitsi aatogueti icavintsajiri irapiguemisan-tariteni coguitejimotacarica, ¿arimpate ipintsatacari Aapani Irioshi? ¡Teequeate!

¹⁸ Irijanijia, aato acantashijigaro intati ancantajiaque: “Nopintsatavacaajia.” Oraqueate arimajagueti apintsatavacaajia anigaantajiaqueroqueate.

¹⁹ Oraqueate ampintsatavacaajiaquempagueti irooqueate antsasantajiaquemparoca arimaja anetsanajiaquero Quenquetsatsarentsimajaca. Anquejetaquempagueti aato-quea atsaroajigui anquenquetsatacaajiaquerigueti Aapani Irioshi.

²⁰ Amenajiaquempaguetequeate chooca aguempevaerejia iriompate Aapani Irioshi caaviji yamenaquero, itsaquerotarite maasano.

²¹ Cotanquitsi, nopintsajiacaca, antsaqueguetequeate teequeate onchoocateji antaqueca, aatoqueate atsarogui anquenquetsatacaajiaquerigueti Aapani Irioshi.

²² Iriatimpa irojocajiacajiro maasano amanajiaquerica anetsanajiaqueroqueti ican-cajica aisa antajiaqueroqueti maasano inintaguetica.

²³ Jeroquea igantacaantane: aventajiaquempari Irijanite Jesoquirishito, aisa amp-intsatavacaajiaquempa anetsanajiaqueroquea icantajiacajica iriatimpa coramani.

²⁴ Quericaca netsanamajatiroca icantaguetica Aapani Irioshi itsipamajatacari, aisa iriatimpaquea ichoocashirentaqueri. Atsamajiaque ichoocashirentajiacaji, itigaran-cajiacajiritarite Ishire.

4

Pintsajigueri maasano tsatacaajiaquempica

¹ Napiguemisantarijateni nopintsajiacaca, aato piquemisantajiguiri intati maasano cantajiat-sica: “Iriguenti choocashirentaquena Ishire Aapani Irioshi.” Iroquetitaja pamenaque irioca choocashirentaqueri. Itsitacaguitejanacarotarite amataajiat-sica.

² Jero pintsasantajiaquemparica ichoocashirentaqueca Ishire Aapani Irioshi: maasano cantamajatanquitsica, “Irira Jesoquirishito icoraquetapojaque icaquinte-tanaque itsinotanaque” iriotaque ichoocashirentaqueca Ishire Aapani Irioshi.

³ Cotanquitsi maasano teeca inquejigueroji imaica teequeate irio ashintajiguem-parine Aapani Irioshi, iriguenti ashintajigari ampatsini catsimataquerica Quirishito. Piquemacojiaqueritarite incoraquetaque, imaicaquea imaica jac coraquetaque.

⁴ Irijanijia, aviatimpajia iriguenti ashintajiguimpi Aapani Irioshi aisa ichoocashirentajiaquempi Ishire, irootaquequeate pitampishitashitantajiacarica amataajiatsica querocampate incojiaquempini iramatavijajiaquempigueti, iroorijite Ishire Aapani Irioshi choocashirentajiaquempica yanaaqueri ashintarica itsipajia quepatsiquitica.

⁵ Iriatimpajia tee inquemisantajigueriji Aapani Irioshi, irootaquequeate mana iquenquetsatacotantajiacaroca intati inintaguetica caquinte, ariqueate itsipajia teeca intsaroventempariji Aapani Irioshi iquemisantajiavaqueri.

⁶ Aatimpajia iriguenti ashintajiacaji Aapani Irioshi. Iira tsamajajiguirica iquemisantajiacaji, cotanquitsi irira teeca irashintempariji Aapani Irioshi tee inquemisantajiacaji. Irootaquequeate antsatantajiaquemparica queri quenquetsatiroca iroomajatatsica aisa queri amataatsica.

Aapani Irioshi iriguenti pintsamajatantatsica

⁷ Napiguemisantarijiate ni nopintsajiacaca, jame ampintsatavacaajiguempa, aritarite iquejetaca Aapani Irioshi ipintsamajatanta. Maasano pintsatantatsica iriguenti irijanite Aapani Irioshi aisa itsamajajiguiri.

⁸ Cotanquitsi irirajiaqueate teeca impintsatavacaajiguempaji teequeate intsajigueriji. Iira Aapani Irioshi iriguentitarite pintsamajatantatsica.

⁹ Iriatimpa itigarancaqueri Irijanite apatirotica acaniqui quepatsiqui irimetojventajiacaji iranijacaajiajinijite, irootaquequeate atsatantajiacaca arimaja ipintsamajajiacaji.

¹⁰ Jero antsatantaquempaca quero icotani pintsamajatantatsica: aatimpajia teequeate ampintsamajajiguempariji Aapani Irioshi, iriguentiqueate pintsamajatantatsica, ipintsamajajiacajitari itigarancantacarica Irijanite imetojventajiacaji irishetajajironijite aguempevaerejia aatonijite iquenquejacagajiro Aapani Irioshi coajica.

¹¹ Nopintsajiacaca, pitsajiaquequea quero icota Aapani Irioshi ipintsajiacajigueti, aritarite anquejejaquempa aatimpajia aisa ampintsatavacaajiaquempa.

¹² Teequeate irinejajiteriji Aapani Irioshi, cotanquitsi apintsatavacaajiacagueti ichoocashirentajiacaji, ariqueate iragavejacaajiacaji ampintsamajatantajianaquempaniji.

¹³ Itigarancajiacajiritarite Ishire atsatantajiacaca itsipamajajiacaji. Ariqueate aquejejiaca aatimpajia atsipamajajiacari.

¹⁴ Iriatimpa itigarancaqueri Irijanite irajajateri maasano caquinteguetatsica. Naatimpajia namenajiaqueriqueate, irootaquequeate notsavetacotantajiacarica.

¹⁵ Aapani Irioshi ichoocashirentajiaqueri maasano cantamajajiatsica Jesoshi iriguenti Irijanite Aapani Irioshi. Ariqueate iquejejiaca iriatimpajia ichoocatimojiaqueri.

¹⁶ Ariqueate amenamajataque atsajiaque ipintsamajajiacaji Aapani Irioshi. Iriatimpa iriguenti pintsamajatantatsica. Maasano pintsatantatsica ichoocatimojiaqueri Aapani Irioshi. Ariqueate iquejetaca iriatimpa ichoocashirentajiaqueri iriatimpajia.

¹⁷ Onquejetaquempagueti arimpaqueate ajajigueri ampintsamajatantajiapojempa aatonijite atsaroajigui oncoramanitapojajegueti incantimentajiaquerigueti Aapani Irioshi maasano, iroorijite achoocajiavetacaqueate acaniqui quepatsiqui, cotanquitsi jac aquejejianacari Jesoquirishito.

¹⁸ Iira pintsatantatsica tee intsarogueji. Aritarite ampintsamajatantaquempagueti querocampate antsaroacaguempaca. Arigueti atsaroanaque atsaroacagaro incatsimatimentacajirogueti Aapani Irioshi antaqueca teeca oncameetsateji. Irootaquequea atsatantacaca irira tsaroanquitsica teequea impintsamajatantempaji.

¹⁹ Aatimpajia apintsajiacari Aapani Irioshi, iriquetitarite pintsajiacaji aatimpajia.

²⁰ Iriraqueate cantavetatsica: “Nopintsatacari Aapani Irioshi”, cotanquitsi isemacarigueti irapicaquintete, iriguenti tsojenti. Aatogueti ipintsatari irapicaquintete yamenavetacaca, aato yagaveji ipintsatari Aapani Irioshi teeca inconijatimoteriji.

²¹ Icantajiacajitarite iriatimpa: quericaca pintsamajatarica Aapani Irioshi impintsataquempariqueate aisa irapiguemisantariteni.

5

Maasano irijanijiate Aapani Irioshi yagavejajiaque intampishitashijiaquero teeca oncameetsateji

¹ Irijanintajiacari Aapani Irioshi maasano cantajiatatsica Jesoshi iriguenti Quirishito Meshiantatsica. Quericaca pintsamajacari Aapani Irioshi ipintsamajajiacari aisa maasano irijanijiate Aapani Irioshi.

² Oraqueate apintsajiacarigueti Aapani Irioshi, aisa anetsanajiaquerogueti ican-taqueca, atsajiaque apintsamajajiacari irijanijiate.

³ Apintsajiacarigueti Aapani Irioshi anetsanajiaquero maasano icanqueca, teenicate omanempaji anquemisanquero icancajica.

⁴ Maasanotarite ivoashirentica Aapani Irioshi yagavejajiaque intampishitashijiaquero maasano teeca oncameetsateji choocaguetatsica acaniqui quepatsiqui, iriguentitarite agavejacaajiacajine Quirishito aventajiaquemparigueti.

⁵ ¿Quericampate agavejanquitsineca intampishitashitaquero choocaguetatsica acaniqui quepatsiqui? Iriguentiqueate cantatsica Jesoshi iriguenti Irijanite Aapani Irioshi.

⁶ Iriotarite Jesoquirishito coraquetaquitatsica acaniqui quepatsiqui iviñacajajiqueri ojaaqui, ariqueate imetojajivetacari imocorojajiqueri osotoajatanaque iriraja. Teequeate apaniro iriviñacajajiteriji ojaaqui, aisa imocorojajiqueri osotoajatanaquequea iriraja. Iriguentitarite cantajiacaji Ishire Aapani Irioshi. Iriatimpa teequeate iramatavijanteji.

⁷ Choocatarite 3 tsatacaacajica:*

⁸ chooca Ishire Aapani Irioshi, chooca aisa oja iviñacajatacaantacagueti, jero aisa iriraja imetojaventajiacajigueti. Irica 3 ari iquejetavacaaca icantacotaqueri Quirishito.

⁹ Arimpate aquemisantajiguiro icamantacajica caquinte, iriompate Aapani Irioshi caaviji yanaajiaqueri maasano, arimaja anquemisantamajataquero icamantacajica iriatimpa, itsavetanqueritarite Irijanite.

¹⁰ Querica quemisantamajatarica Irijanite Aapani Irioshi itsaque ishirequi iroomaja icamantacajica, cotanquitsi irira teeca inquemisanteriji Aapani Irioshi quejevaeca manaca icanque Aapani Irioshi iriguenti tsojenti, teenicate inquemisanteriji itsavetan-querigueti Irijanite.

¹¹ Jero icanqueca itsavetanquerigueti: Aapani Irioshi yojocajiacaji anijagantsi coguitatsineca, oratica anijagantsi ochoocaqueri Irijanite.

¹² Iriraquea ichoocaqueca Irijanite Aapani Irioshi, ochoocaqueri anijagantsi; iriraquea caarica ichoocati Irijanite Aapani Irioshi, tee onchoocateriji anijagantsi.

Icamantajianajiriqueate

* 5:7 Yoguipitsocantajitacarogueti coramani ocativa paperi iguenquetsatsarequi Iromaquitica (Latín), yogavijitaquero capichaji teeca ontioncavetempaji iroaqueragueti. Jero ocanqueca gavitanquitsica: “Chooa 3 tsavetacotantquitsica inquitequi: Aapani, Quenquetsatsarensi, jeri aisa Ishire. Irica trestanquitsica, aparo inaque.” Yogavijitaquero aisa capichaji otsapa 8, itioncajitaque: “Ari oquejetaca quepatsiqui, chooca 3 tsavetacotantquitsica.” Irootaquequea itioncantajitacaroca oca iguenquetsatsarequi quimajareri paperiqui icantajitica **La Santa Biblia** versión “Reina Valera”.

¹³ Notioncajiaquempi maasano aviatimpajia quemisantajiguirica Irijanite Aapani Irioshi cameetsanijite pintsatimentajiaquenijite yanijacaajiajimpi pishirequi pincoguitempani pinchoocajiaque.

¹⁴ Aatimpajia tee antsaroajigueji amanajiguirigueti Aapani Irioshi, atsajiaquetarite amanajiaquerigueti taaca opajita inintaqueca irojocajiacaji, iquemajiacajiqueate.

¹⁵ Atsajiaque iquemajiacaji amanajiguirigueti, aisa atsajiaque irojocajiacajiro taaca amanajiaqueri.

¹⁶ Quericaca amenaquerineca irapiguemisanteriteni impeacaguemparogueti coguisherentsi caarica imetojashirentimentajitiri, cameetsataque iramanacoventaqueriquea, ariquea iranijashirentacaajeri Aapani Irioshi. Iriguentijia nocantacotaque peacaajigaroca coguisherentsi caarica imetojashirentimentajitiri. Choocaquea coguisherentsi irimetojashirentimentajiteri. Teequea iroguenti noncanteji iramanacovente.

¹⁷ Maasano ipeacaaguishejitaca iroguenti coguisherentsi, cotanquitsi chooca coguisherentsi caarica imetojashirentimentajitiri.

¹⁸ Atsajiaquetarite iriraqueate irijanincaca Aapani Irioshi teequeate iran-taguishedetanajero teeca oncameetsateji, yamijiacajitarite Irijanite Aapani Irioshi ariqueate tee iragavejajiajaji ampatsini inquempevaetacaajiajaji.

¹⁹ Atsajiaque aisa Iriguenti ashintajiacaji Aapani Irioshi, cotanquitsi maasano teeca inquemisantajigueriji Aapani Irioshi iriguenti ashintari ampatsini, irootaquequeate yagavejantajiacarica.

²⁰ Oraqueate aisa atsajiaque icoraquequiti Irijanite Aapani Irioshi itsatacaajiacaji atsatantajiacarica Iriomajatatsica. Imaica atsipamajiacari Iriomajatatsica, atsipamajiacaritari Irijanite Jesoquirishito. Iriotaque Irioshimajaca. Iriotaque aisa anijacaajiacajica ancoguitempaniniji anchoocajiaque iriatimpaqui.

²¹ Imaica, irijanijia, inchiquiojia pishineventajigaritsi irioshivetatsica. Ari onco-queempa.

MAVITETAPOJATSICA ITIONCAQUECA JOANCA

Antsatantaquemparoca

Ocatica iroguenti antsatantaquemparoca mavitetapojatsica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequerataguete incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatica paperi ichoocaquegueti Epesoqui, atsajiaquetari iriguenti quempoguijajiguirica quemisantajiatsica Epesoquitica. Iquenquejajitaque oratica manquigarentsi quemisantatsica aisa irijanijiate itioncaciaqueneca ochoocaque quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequerataguete intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaqueriguete Jesoquirishito, aisa tequerataguete intionqueroji otsipa pajitatsica *Yonigaajiguequerica Joanca*.

Joanca itioncaciaqueneri quemisantajiaquerica Jesoshi cameetsaniji impintsamajiaquempari Aapani Irioshi aisa impintsajiaquempari irapitsaroveritarijateni aisa maasano caquinteja. Itsatacaajiaqueri aisa quero incojiaquerini nintajianquitsica iramatavijiaqueri quemisantajiatsica.

Icamantajiaqueriguete ampintsatavacaajiguempa

¹ Imaica, manquigarentsi, nontioncaquempi paperi pashi aviatimpa icoguaqueca Aapani Irioshi. Naatimpa naroguenti quempoguijajiguirica quemisantajiatsica, irootaquequeate nonintantacaca nontioncaquempi aviatimpa jerijia aisa pirijanijiate. Nopintsamajiaquempi, cotanquitsi tee apaniro naatimpa pintsajiguempine, ipintsajiaquempiqueate aisa maasano tsajiaqueroca Quenquetsatsarentsimajaca.

² Nopintsamajiaquempi, atsamajiaquerotarite Quenquetsatsarentsimajaca, oncoguitempani onchoocatimotacaji.

³ Iiraquea Aapani Irioshi aisa Irijanite Jesoquirishito incavintsajiacaji, impintsatacojiacaji, inchoocatacaajiacaji cameetsa, atsamajiaquerotaritari iroomajatatsica aisa apintsatavacaajiacaja.

⁴ Noshinevaetaca namenajiaqueri pirijanijiate iconoagarantajiacaja inetsanamajiaquero Quenquetsatsarentsimajaca, iquejetacaamajiacaro icamantajiacajica Aapani Irioshi.

⁵ Imaica, manquigarentsi, noncamantaquempi iintsija ampintsatavacaajiguempa maasano aatimpajia. Aritarite ocatica notioncaquempica tee irooquea otsipa iroaquerari quenquetsatsarentsi, iroguenti icantaqueca Aapani Irioshi itsatacaajitacajica iroaqueraguete aquemisantajiaqueriguete.

⁶ Ampintsatavacaajiaquempaguete aatimpajia mana anetsanajiaquero maasano icanqueca Aapani Irioshi, piquemaquetari iroaqueraguete icanti: “Pimpintsatavacaajiguempa.”

⁷ Iquenaguetaquequea quepatsipaequi oshequi amataajiatsica cantajiatsica tee incaquintetapoje Jesoquirishito, tee intsinotapoje. Maasano quejetarica imaica iriguenti amataatsica aisa iriguente catsimatirica Quirishito.

⁸ Inchiquiojitaja pamatavijacaantajigatsi ariquea povashiantajianajero pimpeacojajemparo maasano notsatacaajiaquempica. Picancani pinetsanamajianaquero

Quenquetsatsarentsimajaca cameetsanijite incavintsajimentajiaquempinijite Aapani Irioshi coajica ontaniqui jenoqui inquitequi iroguishinejamajiaquempiqueate.

⁹ Imaica noncamantajiaquempi aato itsipatari Aapani Irioshi irira cantatiguiroca itsatacaantaqueca Quirishito, cotanquitsi iriraquea netsanatiroca quisho oaqueroca irioquea intsipamajataquempa Aapani Irioshi jeri aisa Irijanite.

¹⁰ Quericaca coraquetanquitsine intsatacaajiaquetaquempi otsipa teeca onquejetem-paroji itsatacaantaqueca Quirishito aato poguisavicajiaquaqueri pitsovironaquitequi, aisa aato pishineventajiavacari.

¹¹ Irira shineventajiaquaquemparineca mana iquejetacari iriatimpa, yantaquero teeca oncameetsateji yamatavijantaquequeate.

Ivegaratanajirogueti itioncaqueca

¹² Nonintavetacaqueate noncamantamajiaquempime maasano, cotanquitsi tee noninteji nontioncajiaquempi paperiqui, noquenquejaquetarite noanaque oraniqui aviatimpajiaqui inchiquiojita nonquenquetsatacaajiaquitempi cameetsanijite ashine-majiaquempa maasano.

¹³ Ariqueate ichoocajiaque acaniqui irijanijiate piguetyote icoguiaqueca Aapani Irioshi onquemisantamajataqueri. Iriatimpajia inintajiaque pinquemacojiajeri iquen-quejajiajimpi. Ari oncoquempa.

OTSIPATAPOJACACA ITIONCAQUECA JOANCA

Antsatantaquemparoca

Ocatica iroguenti antsatantaquemparoca otsipatapojatsica itioncaqueca Joanca. Iriorio poneanquitsica quepatsiqui icantajitica Garirea, irio itigarancane Jesoshi. Tequerataguete incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejaitaque itioncaquero ocatica paperi ichoocaquegueti Epesoqui, atsajiaquetari iriguenti quempoguijajiguirica quemisantajiatsica Epesoquitica. Iquenquejaitaque irira Gayo itioncaqueneca iguintenitaca quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequerataguete intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaqueriguete Jesoquirishito, aisa tequerataguete intionqueroji otsipa pajitatsica *Yonigaajiguequerica Joanca*.

Joanca itioncaciaqueneri Gayo cameetsaniji incantajiaqueri iriatimpa aisa Irimitio ishinevaetaca yamenajiaqueriguete icomajamajajiaca, cotanquitsi tee irishineventemparoji yantaqueca Tioterepeshi.

Joanca itioncaqueneri Gayo

¹ Imaica, nopintsatacaca Gayo, nonintaque nontioncaquempi paperi. Naatimpa naroguenti quempoguijajiguirica quemisantajiatsica. Arimaja nopintsamajaquempi.

Gayo icavintsajiaqueriguete maasano quemisantajiatsica

² Napiguemisanariteni nopintsatacaca, namanacoventaquempi cameetsanijite pincoguitempaninijite pinchoocataque cameetsa, aatoniji pojoquijita, onquejetaquempa pichoocaqueguete cameetsa pishirequi pishinevaetaca.

³ Oraqueate icoraquejiaqueguete apiguemisanaritariateni icamantapojanaquea picomajamajatanaca pinetsanamajatanaguero Quenquetsatsarentsimajaca. Noshinevaetanacaqueate noquemacotaquempiguete.

⁴ Caavijitarite oguishinejamajataquena noquemacojiaqueriguete nirijanijiate* inet-sanamajajiaquero Quenquetsatsarentsimajaca.

⁵ Nopintsatacaca, cameetsavaequequeate picavintsajajianaqueriguete maasano quemisantajiatsica, irira pigonorogia aisa itsipapae teeca pinejavetempariji.

⁶ Iiraqueate coraquejianquitsica acaniqui icamantajiaqueri quemisantajiatsica icapiocajiacaguete icantajiaqueri pipintsamajajiacari. Imaica nonintaque picancani pinquejetajempa imaica iroajianaqueguete oraniqui, coajica iroajianajeguete pojocajiaqueneri maasano icoguitejajiacaca cameetsanijite irishineventaquempiniji Aapani Irioshi.

⁷ Irooquea yoantanacaca yoantanacarotari ivajiro Jesoquirishito, cotanquitsiquea irirajia teeca intsariventempariji Aapani Irioshi teequea iramitacojigueriji, tecatsi irojocajigueneriji.

⁸ Aroguentijiaqueate jocajiaquenerine maasano taaca inintajiaque cameetsanijite amitacojiaqueri itsavetantajiaqueriguete Quenquetsatsarentsimajaca.

* **1:4** Iquenquevarivaetanaqueguete irira Joanca icantiri “irijani” maasano quemisantajiaquerica Amajirote Jesoquirishito.

⁹ Notioncajiavetacanari quemisantajiatsica capiocapiniatsica oraniqui, cotanquitsi iriraqueate Tioterepeshi mana yanaimanatanaquena intati tee inquemisantenaji naatimpajia.

¹⁰ Imaicaquea imaica noncoraquequitegueti pincapiocajiaquempagueti noncamantamajiaquempi maasano aviatimpajia quero icocani iriatimpa, inijashiquenatarite intati. Cotanquitsi tee apaniro onchoocateji ocatia. Oraqueate yoajianaquegueti apiguemisantarijiateni tee irajiaquaqueriji aisa icatsimatimentajiaqueri quericaca nintavetanquitsica irajiaquaqueri, ariquea icantimentajiaqueri inconoajiajemparimequeate capiocajianquitsica.

¹¹ Imaica, napiguemisantariteni, aato piquejetari antiroca teeca oncameetsateji. Iriguenti pinquejejaquempa comajamajajatsica. Irira comajamajajatsica iriguenti ashintari Aapani Irioshi, cotanquitsi irira antajiguiroca teeca oncameetsateji tee intsateriji Aapani Irioshi.

¹² Maasano icamantacojiguiiri Irimitio, yamenajiaqueritarite inetsanamajatiro Quenquetsatsarentsimajaca. Ariqueate noquejejiaca naatimpajia nocamantacojiaqueri. Aviatimpa pitsataque tee namataajiguempaji.

¹³ Nonintavetacaqueate noncamantamajiaquempime maasano, cotanquitsi tee noninteji nontioncaquempi paperiqui.

¹⁴ Noninquetarite nonejaquitempi ariqueate anquenquetsatavacaajiaquempa.

¹⁵ Noninque pinchooacque cameetsa. Ariqueate ichoocajiaque acaniqui atsipavijijiacaca, inintajiaque incamantajiaquempiqueate iquenquejajiaquempi. Naatimpa nonintaque inchiqiojita pincamantajiaqueri maasano atsipavijijiacaca apaniropae choocana noquenquejajiaqueri.

ITIONCAQUECA JORASHI

Antsatantaquemparoca

Ocatica iroguenti antsatantaquemparoca itioncaqueca Jorashi itioncaciaquenerigueti quemisantajiaquerica Jesoshi (otsapa 1-3). Tee intsajiteji queri itioncaciaqueneca aisa tee intsajiteji quero ichoocaqueni Jorashi itioncaquerogueti. Iriraqea Jorashi irio jorio iriguentijeguite Jesoshi. Iquenquejaitaque itioncaquero ocatica paperi ajagantsiniqui irooca 66, irooca otsipaqui ajagantsini arejevaetacaro ajagantsini 90.

Jorashi itioncaciaqueneri quemisantajiaquerica Jesoshi iragamajiaquempari amataajiatsica, aatoniji yamatavijajiguiritsi intsatacaajiaquerigueti teeca iroomajateji, aisa aatoniji yovashiantajanajiro iquemisantajiaquegueti (4-16). Icamantajiaqueri quero incojiaquempani quemisantajiaquerica Jesoshi (17-23). Iteroncaquerogueti itioncaqueca ishineventacariquea Aapani Irioshi, icanqueri: “¡Arioteesaa!”, iriotaquetari aajiavajica maasano aatimpajia aventajiacarica Jesoquirishito metojaventajiacajica (24-25).

Itioncaciaqueneri icajemajiaqueca Aapani Irioshi

¹ Imaica nontioncaciaquempani paperi aviatimpajia icajemajiaqueca Aapani Irioshi. Naatimpa naroguenti Jorashi iriguentijeguite Santiago,* iriguenti nintacaquena Jesoquirishito nosavicaventaqueneri inintaguetica iriatimpa. Notioncantaquempani aviatimpajia ipintsamajiacaca Aapani Irioshi, iquempani icajemajiaqueca Jesoquirishito.

² Namanacoventajiaquempani incavintsajiaquempanijite Aapani Irioshi, inchoocatacaimentajiaquempanijite cameetsa, aisa impintsamajianaquempanijite.

Tsatacaantantajiatsica amataajiatsica

³ Napiguemisantarijiate ni nopintsamajiacaca, nonintavetacaqueate nontioncaquempanimequeate nonquenquejacaajiaquempanimequeate quero icojiacajini Jesoquirishito imeshiajiacajigueti, cotanquitsi noquenquejaque caaviji picoguinta nontioncaciaquempani noncantajiaquempanimequeate pintampishitashijiaqueri itsipapae teeca inquemisantamajajigueti aatonijite yamatavijajigueti, jero aisa noncantajiaquempani pintsamajiaquero maasano itsatacaajiacajica Quirishito, aatoja picantashitatigaro. Teenicate onchoocateji otsipa quenquetsatsarentsi tsavetacoquerineca quero icota Aapani Irioshi imeshiantigueti.

⁴ Irirajiaqueate amataajiatsica tee inquemisantajigueriji Aapani Irioshi, mana ipeamampeajica quemisantajiaqueate cameetsanijite iramatavijimentajiaquempanijite, ariqueate iconoagarantajiacajica icajiaquequeate picapiocapinijiacagueti iconoajiaquempani. Icantajiaque icavintsajiacajitarite Aapani Irioshi imeshiajiacajica cameetsaqueate antajiaquero taaca anintajiaque, aato icatsimatimentajiro. Aisa imanintajiaqueri Amajirote Jesoquirishito irira apaniroca ashintamajiacajica. Irootaqueate itioncacotantajiacarica paesatoniqui ocanti incatsimatimentajiaqueri Aapani Irioshi iroajianaque camorecariqui.

⁵ Pitsajiavetacaroqueate maasano ocatica, cotanquitsi nonintaque nonquenquejacaajiaquempani ishiraerijia. Pameneri iriatimpajia ichoocajiavetacagueti Ejepitoqui icavintsajiaqueri Aapani Irioshi yaajianaqueri otsipaqui quepatsi, cotanquitsi coajica iteroncaciaqueri maasano teeca inquemisantajigueriji.

* **1:1 Santiago.** Iguenquetsatsarequi guiriego ipajita **Iakobos.** Iconoagarantaca quimajarereri yoguipitsocaque-rogueti ivajiro ipajitiri **Santiago,** itsipa ipajitiri **Jacobo.** Mavite oponeca iguenquetsatsarequi evereo, ipajitiri **Yaakob.**

⁶ Ari iquejejiaca irashivantijitete Aapani Irioshi caavijica icameetsaveta, ipeajiave-cariqueate Aapani Irioshi amitacotirica, cotanquitsi coajica yovashiantajianaquero iguintenijiavetacaguete. Ariquea Aapani Irioshi yashitacojiaqueri opitsecaquegueti, yoishotacotaqueri cavorejatsariqui caarica teroncatsi igantagaqueate irosati aavaetan-tanaquempaca oratica savincaguiteri anaanquitsineca incantimentantaquemparica maasano.

⁷ Ariqueate iquejejiaca aisa irirajia guinteniniavetatsica Soromaqui aisa Gomoraqui jerijia quempejiguetanquitsica iquempevaejiaca. Yoashitantajiaquequeate, aisa it-sanirojiaquequeate manaqueate arimpa ijamajajianaque, irootaquequeate yoguivari-antacanicarica Aapani Irioshi paamari iteroncaciaqueriqueate cameetsanijite amenajia-queero anquenquejimentajiaqueronijite camorecari aato otsivaqui antsaroantajiaque-mpaca ancomajamajatantajiaquempaca.

⁸ Ariqueate iquejejiaca aisa irirajia amataajiatsica iquenquejaguishejiaque taaca opajitapae, teequeate incomajajiguempaji mana icovaeguishequero itsino. Imanintajia-queriqueate Amajirote teequeate impincatsajigueriji, aisa inijashinajiacari maasano oganejencaguetatsica inquitequitica.

⁹ Arimpate coramani irashivantite Aapani Irioshi icantajitica Migueri, arivetaca iriguenti imajirote maasano irashivantijitete Aapani Irioshi, teequeate irioqueate quejeterone imaica. Pameneri coramani imetojaquegueti Moishishini iriatimpa Migueri manaquea iquenquetsatacaavaqueri imajirote ampatsini. Iriraqueate ima-jirote ampatsini manaqueate inintavetaca iranaquerome itsino, iriraqueate Migueri teequeate irininteji, cotanquitsi teequeate incantimateriji incatsimaqueri mana ican-queri: "Inchiquiojita incantomajaquempi Aapani Irioshi."

¹⁰ Cotanquitsi irirajia amataajiatsica mana inijashinajiacaro teeca intsajigueji. Aisa mana iquejejiacarari tomirishipaequitica savicaventiroca taaca opajitapae inintaguetica, irootaquequeate interoncantajianaquempaca.

¹¹ Maasanotarite irantsipejiaquempa iriatimpajia. Iquejemajajiacaritarite Caini imetojaqueriguete iriguentijeguite, aisa mana iquejejiacarari Varaameni ishinevencari imenta-quipae. Pameneri iriatimpajia ishineventajiacariguete imentaquipae yantaguisheji-quequeate taaca opajitapae teeca oncameetsateji. Aisa caaviji ipigatantajiga, iqueje-tacarari Coreni ipigatsatacariguete Moishishini, ariqueate icatsimatimentaqueri Aapani Irioshi imetojaqueri. Ariqueate inquejejiacquempa iriatimpajia aisa interoncajitaqueri.

¹² Iconoajiaquempi pitsipatavacajiacaguete pishecajiaca piquenquejajiaqueriguete Amajirote imetojaventajiacajiguete, cotanquitsi tee impashiventempaji manatarite ish-ecatapitsajiacarari igonorojia irisati quenquejacotajatsi, irootaquequeate iriguenti she-camajajianquitsi iquemamajajiaqueate tee inquenquejajigueriji teeca onchoocate irishecajiacquempaca. Mana inijashijiaca intati, caaviji yamatavijantajigui quejeji-aqueate oseetiguete; ijijitaqueroji ari ontejapojaque incani, cotanquitsiqueate yaana-jiro choviga, tee ontejeji. Aisa mana iquejejiacarari panquirentsi ishecamaajitaca, yoguijajitavaqueroqueate oitsoquitajeta inchiquioji irishecajitavajemparo, cotan-quitsi aavetapojaguete oitsoquitiguete tee oitsoquitajeji. Ariqueate ichaquijiquero, aisa iponquitirejajitaquero, ometojamajatanaque.

¹³ Aisa mana iquejejiacarari quentija ovorevovreaetiguete, ariqueate opishoncaquero oshimore otsapijaqui, yamenajitaqueroqueate quepatsishimoretaquequeate. Ari ique-jejiaca iriatimpajia, yantaguishejiaque impashiventacaaquempameca. Mana aisa ique-jejiaca impoquiro teeca igantaga inquishoteji. Irira taquijajiaatsica querocampa in-cojiaquempapani impampiatantajianaquemparica queroca iquenajianaque. Irootaque-queate icantantacaca Aapani Irioshi maasano quejejiacarari iriatimpajia iroajianaque opitsecaqueguete, igantagaqueate incantacotaque manquimanquimanqui.

¹⁴ Iriguentijia itsavetacojiaqueca Enoconi coramani. Irira Enoconi irio sietetapojat-

sica itsavetacojitaquerigueti ichoviquijianaqueca Araini,† iquenquetsatacotaqueri amataajiatsica icanti: “Incoraquepojaque Amajirote coajica intsipajiaquempari irashivan-tijitete iroshequiamajatatiguenimaja.

¹⁵ Incampojaque quericaca antatsica cameetsari aisa quericaca antatsica teeca oncameetsateji, ariqueate incatsimatimentajiaqueri maasano antaguishejiguiroca teeca oncameetsateji nijashinajigarica iriatimpa.”

¹⁶ Iriatimpajia iroguenti isavicaventajiaque inijashitantajiaica, aisa inintamampeaguevetaroqueate taaca opajitapae, jero aisa isavicaventajiaquero taaca opajitapae inintaguishejiaqueca. Yaventacojiaca jero aisa ishinetamampeajiacari igonorojia cameetsanijite irojoquimentajiaquerinijite taaca inintajiaque.

¹⁷ Cotanquitsi imaica aviatimpajia napiguemisantarijiateni nopintsamajajiaica, pinquenquejajiguero maasano icantajiaquempica itigarancanejia Amajirote Jesoquirishito, aato pipeacotaro.

¹⁸ Icamantajiaquempitarite icantajigui: “Oraqueate pajinigueti aapojempa savinca-guiteri vegaratapajaatsineca inchoocajiaque shirontimentantajiananquitsineca savicaventajianaqueroneca taaca opajitapae inintaguisheguetaqueca iriatimpajia.”

¹⁹ Iriiraqueate quejejaqueroica imaica yamatavijajiaqueri oshequini quemisantajia-atsica ipigatsatavacaantajianacaca, teeca inquemavacaantajiguempaji. Iriratica shirontimentantajiaatsica mana ishineventajiacaro intati inintaguetica iriatimpa, teequea inchoocashirenteriji Ishire Aapani Irioshi.

Itampishitacajiaqueri quemisantajiaatsica

²⁰ Cotanquitsi aviatimpajia napiguemisantarijiateni, nonintaque picancanija pisavicaventajiaqueroja Quenquetsatsarentsi Oganejencatatsica cameetsanijite arimpaque-ate pinquemisantamajatanakeri Jesoquirishito. Pincantajiaqueri Ishire Aapani Irioshi intsatacaajiaquempi pamanajiaquerigueti Aapani Irioshi.

²¹ Arimpaqueate pincomajajianaquempa cameetsanijite incavintsajimentamajajiaquempinijite Aapani Irioshi. Poguijajiaqueri Amajirote Jesoquirishito incoraque-tajeguete incavintsajajiapojempi intsipajiaquempi jenoqui inquitequi picancaniquea pinchoocajiaqueni iriatimpaqui.

²² Pimpintsatacojiguempari irirajia teeca intampishishirentajigueji quenquejacoji-avetacaroca iroomajatatsica: “Caaricampa.”‡

²³ Itsipapae mana pintsatacaajiaqueri inquemisantamajajiaqueri Aapani Irioshi quejevaecaqueate manaca paajivajiri intati pajinica intajiaquempa camorecariqui. Pincavintsajajiaqueri, cotanquitsi inchiquiojia ipajencajianaquempirotsija iguempempevaerejia. Aatoja pishineventsijigari yantajiaqueca iriatimpajia.

²⁴⁻²⁵ Chooca apaniro Irioshimajaca meshiajiaquerineca quemisantajiaquerica Amajirote Jesoquirishito. Iriotaquequeate agavejanquitsineca intampishitacajiaquempai aatonijite piquempempevaejiaja. Irajaianaquempi intsipajianaquempi iriatimpaqui, iramenajiaquempi cameetsaqueate pichoocataque quejevaeca teenica pinquempevaetimatempaji. Oraqueate ontaniqui ichoocaqueguete iriatimpa pincoguitempani pishinevaejiaquempa. Jameja acancani antsarotentajiaquempai, yoganejencamajataari. Iriguentitarite Amajirote aisa caaviji yagavejamajati, jero aisa yaaguitejaquero maasano. Igantagaqueate iquejetaca coramani, ariqueate iquejetaca imaica, ariqueate igantagaqueate inquejetaquempa coajica, igantagaqueate incoguitempani. Ari oncoquempa.

† **1:14 irio sietetapojatsica itsavetacojitaqueriguete ichoviquijianaqueca Araini.** Pamenero Jen. 5.1-24 itsavetacojitaqueriguete. Cotanquitsi ocatica icanqueca Enoconi, tee intioncajerorji Jeneshishiqui, oponeaca ot-sipaqui paperi icantajitica **Itioncane Enoco.** ‡ **1:22** Oconoaca otsipa paperipae iroquetinica ocanti ocaniqui: “Pintsatacaajiaqueri irirajia teeca intampishishirentajigueji iramenamajiaqueroniji iroomajaca.”

YONIGAAJIGUEQUERICA JOANCA

Antsatantaquemparoca

Ocativa iroguenti antsatantaquemparoca itioncaqueca Joanca paperiqui pajitatsica *Yonigaajiguequerica Joanca*. Irio jorio poneanquitsica quepatsiqui icantajitica Garirea, irio itigarancane Jesoshi. Tequerataguete incajemeriji Jesoshi, itsipatacari iriguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iriguenti quempoguijajiguirica quemisantajiatsica Epesoquitica. Yamenaguero Joanca ocativa yonigaajiguequerica ichoocaquegueti ovogorequi pajitatsica Patimoshi (1.9). Chooca quenquejanquitsica itioncaquero ichoocaquegueti ontaniqui. Itsipajia iquenquejajiaque itioncaquero ichoocaquegueti Epesoqui irooca otsipaequi guinteninintsi yoguipaqui jajitaqueriguete isotoanaqueroguete ovogore Patimoshi. Itioncaciaqueneri quemisantajiatsica Ashiaquitica capiocapinijiatsica guinteninintsipaequi carajianquitsica 7 (1.4). Tee intsajiteji quero ajagantsini itioncaquero ocativa paperi, cotanquitsi chooca quenquejajianquitsica itioncaquero arica ajagantsini 94, irooca otsipa ajagantsini arejevaetaro ajagantsini 98. Itioncaquero ocativa paperi iteroncaciaqueroguete maasano otsipapae paperipae choocajianquitsica ocaniqui paperiqui icantajitica *Tsavetacoquerica Jesoquirishito*.

Joanca itioncacotaquero acaniqui yonigaantaguequerica Jesoquirishito cameetsaniji intsajiaquenijite quemisantajiaquerica quero oncoguetanaquempani oncoramanitapojajeguete, irooshipojajitarite aapojajempa (1.1). Jesoshi icanqueri Joanca intioncaciaqueneri irashivantijitete tsaromentajiacarica capiocajianquitsica guinteninintsipaequi carajianquitsica 7 (cap. 2–3). Coajica itioncaque intampishitacaajiaqueriniji quemisantajiatsica atsipeventajiacarica Jesoquirishito iquemisantajiaqueriguete intsajiaqueniji quero oncoguetanaquempani onteroncanaquempaguete quepatsi, iragavejaqueriguete Jesoshi imajirote ampatsini, aisa omparianajempa iroaqueraro quepatsi.

Yonigaantaguequeca Jesoquirishito

¹ Ocativaqueca tioncanquitsica ocaniqui iroguenti icanquerica Aapani Irioshi Jesoquirishito ironigaajiaqueri irajaanirejia cameetsaniji intsajiaquenijite quero oncoguetanaquempani oncoramanitapojajeguete, irooshipojajitarite aapojajempa. Iriatimpa itigarancanquitsitari irashivantite incamantaqueriqueate irajaanire pajitatsica Joanca.

² Irira Joanca icantamajataquero maasano yamenaguetaqueca, itsavetacotaquero iguenquetsatsare Aapani Irioshi, aisa yonigaquerica Jesoquirishito.

³ Iriaquea Aapani Irioshi irishinetacaavaequempariquea quericaca apatsajavantaqueroneca ocativa paperi. Ariqueate inquempetacaajiaquempani aisa maasano quemisantajiaqueroneca irampatsajavantajiqueroguete ariguete irinetsanamajatavaqueroquea, irooshipojajitarite aapojajempa itsavetacotsitacaca ocaniqui.

Joanca itioncaciaqueneriquea capiocapinijiatsica Ashiaqui

⁴ Naroguenti Joanca tioncaquero oca. Nontioncaciaquempiquea maasano aviatimpajia tsaromentajiatatsica Ashiaquitica* capiocapinijiatsica guinteninintsipaequi carajiatatsica 7.† Noninque incavintsajamajiaquempani irira Choocaguitatsica, icoguitaniquea ichoocaguitini coramani, ari incantacoguitempani inchoocaguiteni. Noninque inchoocatacaajiaquempani cameetsa aatonijite taaca opajita pishoshoguitetimentajiajatsi.

* **1:4 Ashia.** Iroguenti *provincia* ochocantantajiacaca guinteninintsipae. † **1:4 guinteninintsipaequi carajiatatsica 7.** Pamenero 1.11 itioncaqueroguete ovajiropae guinteninintsipae ichoocajiaqueguete itioncaqueneca.

Ariquea noninque inquempetaquempaquea irirajia 7 jeocajianquitsica‡ choocatimojiaquerica imajirontamentoqui isavicancaca, incavintsajajiaquempi inchoocatacaajiaquempiquea cameetsa.

⁵ Noninque inquempetaquempaquea Jesoquirishito iriatimpa incavintsajamajajiaquempi inchoocatacaajiaquempi cameetsa. Iriotaquequea tsavetacotantirica Aapani Irioshi tampaticamajatiroca, teequea iramataguempaji. Imetojavetacaquea, cotanquitsi irio jivaqueri maasano tancorejajiananquitsineca, aisa iriguenti Majirontamajatsica anaajiaquerica maasano majirontaguetatsica quepatsipaequitica. Caaviji ipintsamajajiacaji imeshiajiacaji ishetsitajajiro agovaeguisherejia, manaqueate iquivantajajiro iriraja.

⁶ Ipeacaajiacaji majirontajatsica aisa ipeacaajiacaji saserorotejia cameetsaniji asavicaventajiaqueroniji maasano inintaguetica Aapani Irioshi, Iriri iriatimpa. Caaviji yoganejencamajata, yagavejamajati, imajirontamajata, ariquea incoguitempani inquejetaquempa, cameetsavaetaquequea irishineventaguitemparinija maasano. Ari oncoquempa.

⁷ ¡Pameneja, coraquetapojishiatsi Quirishito, iquenantapojacaroquea mararo!

Iramenajivajeriquea maasano,

inquejetsijianaquempaquea satajacaantajivecarica iramenajivajeri iriatimpajia aisa.☆

Maasano caquinteguetatsica guintenijianquitsica quepatsipaequi iramenajivajerigueti irirajianaquempaquea oshimampoiancacaavaetanaquempari.

Jeeje, ari oncoquempani imaica.

⁸ Jeroquea icanqueca Amajirote Irioshi: “Naroguenti *Alfa* aisa naroguenti *Omega*, § naroguenti pariacaroca jivatanquitsica nochoocatini coramani, aisa naroguenti carapojatsica.” Iriguenti choocatatsica, icoguitani ichoocati aisa incoguitempani inchoocaguiteni. Iriguenti Agavejamajatsica.

Joanca yamenajiri Jesoquirishito

⁹ Naatimpa naroguenti Joanca papitsaroveritarite, aquejetavacaajiacca atsipeventajiacari Jesoquirishito, amajirontajiacari aisa atsipetacojiaca maasanopae. Coramani yaajitanaquenaquea yojocajiquitana ovogorequi pajitatsica Patimoshi yamenajiquenaguete notsavetantavaequeroqueate Iguenquetsatsare Aapani Irioshi, notsavetacqueriqueate Jesoquirishito.

¹⁰ Iroompaquea arejetapojaguete isavincaguiterte Amajirote,* yagavejacaashirentaquenaquea Ishire Aapani Irioshi, noquemitsitaroquea notaquiqui iquenquetsajencajique inirojencamajaca quempejencavaeca tivorentsi.

¹¹ Icantajiti: “Naroguenti *Alfa* aisa naroguenti *Omega*, naroguenti pariacaroca jivatanquitsica nochoocatini coramani, aisa naroguenti carapojatsica.† Pintioncacoguetavaqueroja paperiqui maasanopae pamenaguetavaqueca pintigarancacaantajiaqueneriquea tsaromentajatsica capiocapiniatsica guinteninintsiqui caratatsica 7 Ashiaqui, opajitaquea: Epeso, Eshimirina, Peregamo, Tiatira, Saririshi, Pirarerepia, aisa Iraorisea.”

‡ **1:4 jeocajianquitsica.** Irioca ocantacotaque ijeocarijitete Aapani Irioshi. Cotanquitsi itsipa iquenquejanaque irioca ocantacotaque Ishire Aapani Irioshi cotanquitsi isietetashitaca, aparo inaque. Pameneroja aco, apapacoro onaque cotanquitsi ocarati 5 achapaquipae, ocincotashitaca. ☆ **1:7** Sac. 12.10; Jn. 19.34, 37. Pamenero aisa Sar. 22.16; Is. 53.5.

§ **1:8 Alfa aisa Omega.** Oratica *alfa* iroguenti ojivatantanacaca *abecedario* irashi guiriego. Oratica *omega* iroguenti carapojatsica. *

1:10 isavincaguiterte Amajirote. Oraquea icantajitiro “isavincaguiterte Amajirote” maasano tominco, iroguentitari itancorejantanajaca, irootaquequea icapiocantajiacaca tsaromentajiacarica coramani. † **1:11** Choocaguetaque otsipapae paperi iroquetinica teeca intioncajeritiroji ocantiqui quejetaca tioncanquitsica otsapaqui 8: “Naroguenti *Alfa* aisa naroguenti *Omega*, naroguenti pariacaroca jivatanquitsica nochoocatini coramani, aisa naroguenti carapojatsica.”

¹² Iroompa nopitsocavetanaca nonejeri quenquetsatacaaquenaca. Namenitsitariquea 7 tsivorentsi jerenquijerenquiatacotatsica, ipeacaajitaca cavorejari ooro.

¹³ Iniganquitsitaroqueea 7 tsivorentsi aparo quejevetarica irijanite caquinte. Ontiaseavaeca iitsaare arejevaeca yovegaraguitipojacagueti, yaguiatacari ineguiqui ichompimashite ipeacaajitaca ooro.

¹⁴ Oraqueea iguitoqui iquitamaromaevaeque quempeni ovejamae irooca sharaca. Oraqueea iroquija quempetaca omorequigueti paamari.

¹⁵ Oraqueea iguitiqui otsirencavaeque ocanca quempetaca itajaitirogueti cavorejatatsica voronquise. Oraqueate iquenquetsaquegueti iririjencavaeque icanca quempetaca ampenejatagueti ojaaquiniqui amarigueti.

¹⁶ Oraqueate itincamijempequiqui yajiricajiaqueri 7 impoquiropae. Osototsantsamenivaeeque ivagantequi itsaampitsantsamenirite mavite otsaampinampitaque. Oraqueate ivoroqui itsirencajatantavaetiquea icanca quempetaca catsirincaiteri itampaticatigueti.

¹⁷ Irooqueea namenaquitiguiri notejimotanaqueriquea quempetaca arinica nometojaquenica. Cotanquitsiquea iriatimpa ipamitsitantanaroqueea itincamijempequi icanquena: “Aatoqueea pitsaroguitsi. Naroguentitari jivatatsica, naroguenti aisa carapojatsica.

¹⁸ Naroguenti Anijamajatatsica, nometojaveca coramani iroompaqueea nopochatanaji, noncoguitempaniquea nonchoocaguiteni aatoqueea nometojajitsi. Naroguenti ajiricaqueroca oyavine metojagantsi aisa oyavine Areshi.‡

¹⁹ Nocantantaquempeca pintioncacoguetavaqueroja pinejaguetavaqueca incajaranqui, pinejaguetavaqueca imaica aisa maasanopae nonigaaguetaquempeca coajica.

²⁰ Imaica noncamanquempeca taaca opaji icantacoque irira 7 impoquiropae pinejaqueca najiricajiaqueca notincamijempequiqui, aisa 7 tsivorentsi jerenquijerenquiatacotatsica ipeacaajitaca ooro. Iiraqueea 7 impoquiropae iriguenti icantacojiaque 7 ashivantijite§ tsipajiacarica tsaroventajianaca capiocapinijsica guinteninintsipaequi carajatsica 7. Oraqueea 7 tsivorentsi jerenquijerenquiatacotatsica iriguenti ocantacojiaque tsaroventajianaca capiocapinijsica oraniqui.

2

Itioncajiaqueneri tsaroventajatsica guintenijatsica Epesoqui

¹ “Imaica pintionqueneri irashivantite* tsaroventajianaca guintenijatsica Epesoqui, pincante:

Iiraqueea ajiricajiaquerica 7 impoquiropae itincamijempequiqui, anijitimoguerica 7 tsivorentsi jerenquijerenquiatacotatsica ipeacaajitaca cavorejari ooro icanti:

² Notsamajaque maasanopae pantajiaqueca, pipanquenapanquenaicaro patsipeventajiacaroea, teequea povashianteroji. Teequea pishineventajiguempariji peacaaguishejigaroca covaeguisherentsi. Notsaque icoraquetimojiavequempeca cantajavetapojimpica: ‘Naroguenti itigarancaneja Jesoshi’, cotanquitsiquea

‡ **1:18** Icanquegueti Jesoshi: *Naroguenti ajiricaqueroca oyavine metojagantsi aisa oyavine Areshi*, irooqueea ocanque iriguenti cantatsica quero iroaroaitanaque maasano metojajianquitsica, iriguentitari agavejamajaqueroca metojagantsi. Oraqueea *Areshi* iroguenti ichoocajiaquegueti metojatsica tequeratagueti impishoncajiteriji camorecariqui. Irira guiriego icanquero *hades*, iguenquetsatsarequi evereo icanquero *sheol*. § **1:20** *ashivantijite*. Iguenquetsatsarequi guiriego otioncaca *aggeloi*, ocanque ‘camantajatsica’, irio itigarancajitica incamanteri itsipa. Chooa mavite ocantacotaque. (1) Irootaque icanquerica ashivanti, iriotaquetari itigarancaqueca Aapani Irioshi camantajiaquerineca caquinte. (2) Chooa otsipa ocantacoqueca: irira caquinte camanquerineca itsipapae. * **2:1** *irashivantite*. Pamenero otsapa 1.20 ovegaravanapojacagueti ocamantacotaquerigueti ashivanti.

oraquea itsatacaajiavequempigueti manaquea pitsatsijiavaqueri teequea inquempjiguempariji itsatacaantajiguica notigarancanemajaca, ariqueate tee pinquemisantajigueriji, pamenajiavaqueritarite manaquea yamataajiaca intati.

³ Arimajaca patsipetacojiaca patsipeventajiaquenaquea teequea pimperatanaque-mparaji.

⁴ Cotanquitsiquea chooca aparo noncantomajimentajiaquempica, irootaquequea ocatica: Teequea pinquempejiajempaji iroaqueragueti pipintsamajajiaquenagueti.

⁵ Iintsija pinquenquejajiajeroja quero picojiavetacani cameetsaniji pincantashitatijaianaquempianiji pinquempejianajempauea iroaqueragueti pipintsamajajiaquenagueti. Aatogueti picantashitajiajatsi noncoraquetashijiaquempiquea naacotsitanaquempiri pitsivore jerenquijerenquiatacotatsica, aato ochoocataji ochoocaquegueti imaica.

⁶ Cotanquitsiquea noshinevaeca namenaquequea pisemacaro ipeacaaguishejiacaca nicoraitajia,† piquempjiaquenaqueate naatimpa nosemacaro.

⁷ Choocagueti guempitatanquitsica iintsija inquemeja icantajiaquerica Ishire Aapani Irioshi tsaromentajatsica. Quericaca tampishitashijiaqueroneca maasanopae coraquetashijiaquerineca nojocaqueneri irishecaquemparoquea osovena inchato anijacaantantatsica choocatatsica jenoqui ivaraisotequi Aapani Irioshi.‡

Itioncajiaqueneriquea tsaromentajatsica guintenijatsica Eshimirinaqui

⁸ “Imaica pintionqueneri irashivantite tsaromentajanaca guintenijatsica Eshimirinaqui, pincante:

Irraquea metojavetanquitsica coramani iroompaquea ipochatanaji iriguenti jivatatsica, aisa iriguenti carapojatsica. Imaica icanti:

⁹ Notsamajaque patsipeventamajaquenaquea, aisa teetarite taaca opaji pashintimatempaji, cotanquitsiquea caaviji incavintsajamajajiaquempi Aapani Irioshi. Notsaque icantaguishtacovaequempiquea cantajatsica: ‘Naroguenti joriojia’, cotanquitsiquea caari, iriguentijiatari igapiocane Satanashi.

¹⁰ Aatojate pitsaroacaajigaro pantsipejiaquempaca. Irraquea ampatsini irisantanatacotacaantajiaquempi cameetsaniji namenajiaquempinijite arimajaca pitsaromentamajajiaquenaquea. Pantsipevaetaquempatarite 10 savincaguiteri, cotanquitsiquea arimpaqueate pintsaromentamajatanaqueaja, aatoquea povashiantajiguirotsijate piquemisantajiaquenagueti arejevaetanajempauea pimetojantanajempaca, iroompaquea nontancoretancoretajempi oncoguitempaquea noganijaquempi, onquejevetaquempa nojocajiaquempi amatsaerontsi anijacaantantatsica.

¹¹ Choocagueti guempitatanquitsica iintsija inquemeja icantajiaquerica Ishire Aapani Irioshi tsaromentajatsica. Quericaca tampishitashijiaqueroneca maasanopae coraquetashijiaquerineca aatoquea yatsipetimatajarotsi icantajitica ‘mavitetapojatsineca metojagantsi’.§

Itioncajiaqueneriquea tsaromentajatsica guintenijatsica Peregamoqui

¹² “Imaica pintionqueneri irashivantite tsaromentajanaca guintenijatsica Peregamoqui, pincante:

† **2:6 nicoraitajia.** Teequea intsamajajitajeriji irirajia icantajitica “nicoraitajia”. Iquenquejajitaque irioca guijatacojiguiroca itsatacaantica Nicoraashini. Arica iquejejiacari guijatacojiguiroca itsatacaantica Varaameni. (Pamenero 2.14.) ‡ **2:7 ivaraisotequi Aapani Irioshi.** Oraquea **paraiso** iroguenti oganejencajencatapoacagueti ichoocatigueti Aapani Irioshi. Irirajia tsaromentajigarica incoguitempanti inchoocaguiteni ontaniqui, aatoquea imetojajitsi. § **2:11 mavitetapojatsineca metojagantsi.** Irirajia atsipejiaquemparoneca icantajitica “mavitetapojatsineca metojagantsi” irantsipeguitempanti camorecariqui. Pamenero aisa 20.6, 14; 21.8.

Irraquea ashincaroa itsaampitsantsamenirite mavite otsaampinampitaque icanti:

¹³ Notsaquequea quero piguintenijiaca, manaquea pichoocajiaque oraniqui imajirontacaguete Satanashi, piguintenitimojiacari majirontajiacarica, cotanquitsi name-najiaquempi picancaniquea quisho poajiaquena poguijatacomajajianaquena. Teequea povashiantajigueroji paventashirentaquena irosati imetojajivecariguete Antipashini oraniqui piguinteniqui isavicaventavaequenaguete itsavetacotantavaeguitanani.

¹⁴ Cotanquitsiquea choocatiraja aparopae noncantomajimentajiaquempica, name-naquetarite piconoagarantajiaa teequea pimpishoncajigueroji itsatacaantica Varaa-meni. Irraquea Varaa-meni iriotaquequea cantaquericca Varacani coramani inco-vaeguishedacaajiaquempariquea ishiraerijia, jero ishecatacaantantajiacarica iteshi viratsipae ijitorejacaantajiaquenerica irojocajiquenerica ipeashigueta-caca irioshiv-ijitashijiacaca intati. Aisa icantajiaqueriquea cameetsavaeque incantatsajiaquero-quea manquigarentsijia.✧

¹⁵ Aisa piconoagarantajiaa teequea pinintajigueti pimpishoncajigueroji itsatacaantamampeajiacaca nicoraitajia.*

¹⁶ Irootaquequea nocantantajiaquempica pincantashitatiejianajempajate. Aatoguete picantashitatiejiga noncoraquetaquitequeate noncatsimajiaqueteri quempejiguiroca imaica, nashimirintantajiaquempariquea notsaampitsantsamenirite novagantequitica.

¹⁷ Choocaguete guempitatanquitsica iintsija inquemeja icantajiaquerica Ishire Aapani Irioshi tsarotentajatsica. Quericaca tampishitashijiaqueroneca maasanopae coraquetashijiaquerineca nojocaqueneri irishecaquemparoquea manaa caarica in-ejajiti. Aisa nojoquitenempariquea quitamaropiri mapi tioncanquitsica iroaqueraro ivajiro teeca intsajiteroji, iriguenti tsataquerone iriratica ashinquemparoneca.✧

Itioncajiaqueneri tsarotentajatsica guintenijatsica Tiati-raqui

¹⁸ “Imaica pintionqueneri irashivantite tsarotentajanaca guintenijatsica Tiati-raqui, pincante:

Irraquea Irijanite Aapani Irioshi choocatanquitsica iroquija quempecaroca omorequiguete paamari, aisa iguiti tsirencavaetanquitsica quempecaroca yamecantajitaroguete cavorejatatsica voronquise icanti:

¹⁹ Notsamajaqueroquea maasanopae pantajiaqueca. Notsaque pipintsatantajianaca, aisa paventajiaquenaquea pitsarotentajiaquena. Aisa notsaque picavintsa-javaequeriquea papitsarotentarijiate manaquea patsipeventamajatanaquenaqueate teequea pimpeacojiguenaji. Pantajiaqueca imaica anaavaetanaqueroquea pantajiaqueca iroaqueraguete.

²⁰ Cotanquitsiquea ochoocaque aparo noncantomajimentajiaquempica, name-naquequeate teequea pincantimateroji oratica manquigarentsi Jesavere cantamampeatsica: ‘Naroguenti tsavetantiroca icanquenaca Aapani Irioshi’, cotanquitsiquea manaquea amatavijajiaqueri naajanirejia ocantajiaqueri incantatsajiaqueroquea manquigarentsijia, aisa ocantajiaqueri cameetsavaeque irishecacajiaquempari iteshi viratsipae ijitorejajiguetinirica irojocajiquenerica ipejaiguete irioshivijitashijiguetacaca intati.

²¹ Noguijaveguitaroni oncantashitatiejianajempame ompishoncanajeromequea maasanopae opeacaaguishevaetacaca, cotanquitsiquea teequea oninteji.

²² Imaicaquea nojoquijitacaquemparoquea antsipevaequempa-quea querocampate oncotajempani. Irraquea tsipatsipaitacaroca icovaeguishejiacaguete ari-quea

✧ 2:14 Nm. 25.1-3. * 2:15 *nicoraitajia*. Pamenero 2.6. ✧ 2:17 Eeq. 16.14-15, 33-34; Jn. 6.48-50.

nonquejetacaajiaquempari iriatimpajia aisa. Aatogueti ipishoncajianajirotsi ipeacaaguishejiacaca, nantsipetacaajiaquempariquea.

²³ Aisa nometojitsitaqueroquea irijanijiate[†] cameetsaniji intsajiaqueniji maasano tsaromentajatsica querocagueti inchoocajiavequempa naatimpa naroguenti amenashirentajiguiri. Notsamajaqueroquea maasanopae iquenquejajiguica. Noncavintsajantajiaquemparica maasano comajamajajatsica, aisa noncatsimajiaqueriquea maasano peacaaguishecaroca covaeguisherentsi.

²⁴ Cotanquitsiquea piconoagarantajiacca aviatimpajia Tiatiraquitica teequea pinquemisantajigueroji otsatacaajiaquerica amatavimatavivaequeca, aisa teequea pimpeacaaguishetemparoji maasano ipeacaaguishejiacaca oraquea icantajitica 'isenacaguishemajataqueca Satanashi'. Aato nocantajiguimpi aviatimpajia.

²⁵ Cotanquitsiquea pincoquempanija pinquempejiaquempa imaica pintsaromentajiaquenajate arejevaetapojajempa noncoraquetantajempaca.

²⁶ Quericagueti tampishitashijiaqueroneca maasanopae coraquetashijiaquerineca, aisa incomajamajaquempagueti irinetsanamajaqueroquea maasanopae nonintaguetica arejevaetapojempagueti onteroncantapojempaca, nompeacaquempari imajirojiate maasano caquinteguetatsica guintenijatsica quepatsiqui.

²⁷ Querocagueti icoquenani naatimpa Aapani ipeacaquenagueti Majirontamajatsica, ariqueate nonquempetacaquempari iriatimpa. Irimajirontantaquempari imajirontajiguiri ipeacaajitaca cavorejari quishomajatsica,[‡] iragavejaqueriquea maasano teeca inquemisantajiguiri; interoncajiaqueriquea inquempetacaquemparoquea iporocajitirogueti chomo.

²⁸ Aisa nojocaqueneri shigompiri conijatatsica pitsecaguitetirajagueti.[☆]

²⁹ Choocagueti guempitatanquitsica iintsija inquemeja icantajiaquerica Ishire Aapani Irioshi tsaromentajatsica.

3

Itioncajiaqueneriquea tsaromentajatsica guintenijatsica Saririshiqui

¹ "Imaica pintionqueneri irashivantite tsaromentajianaca guintenijatsica Saririshiqui, pincante:

Iriaquea tigarancaquerica* irirajia 7 jeocajianquitsica[†] irashi Aapani Irioshi, aisa irirajia 7 impoquiropae icanti: Notsamajaqueroquea maasanopae pantajiguica. Notsaque yamenajivetaquempiquea aviatimpajia tsaromentamajajatsica icantacotantajivequempica 'Anijashireri', cotanquitsiquea naatimpa namenajiaquempi teequea pintsaromentamajajiguenaji, quempeca jac metojajiaquempi.

² Iintsishiatsi pintinajanaqueshiatsi, pintampishitashivaetavaqueroshiatsi tequeratatiraja pimpishoncamajateroji pitsaromentajiaquenagueti aatonijite pipeacojiana-jarotsi maasanopae. Namenaquetarite teequea pinetsanamajateroji inintaguetica Aapani Irioshi.

³ Iintsijate pinquenquejajajeroja Noguenuetsatsare piquemajavecaca, pinquemisantamajaterojate, pincantashitatieajianaquempaja. Aatogueti pitinajatsi

[†] **2:23 Irijanijiate.** Icanquegueti "irijanijiate Jesavere", iriguentiquea icantacojiaque maasano guijatacojiaqueroca otsatacaantaqueca Jesavere. [‡] **2:27 Irimajirontantaquempari imajirontajiguiri ipeacaajitaca cavorejari quishomajatsica.** Irooquea oncanque intampishitashimajaqueroquea irimajironquempagueti. Pamenero Sar. 2.9. [☆] **2:28** Pamenero 2 P. 1.19; Yonig. 22.16. ^{*} **3:1 Iriaquea tigarancaquerica.** Irio Jesoshi tigarancaquerica irirajia jeocanquitsica aisa impoquiropae. [†] **3:1 jeocajianquitsica.** Pamenero otsapa 1.4 ovegavanapojacagueti ocamantacotaquerigueti jeocajianquitsica.

noncoraquetashijiaquitempi noncomirejacaapojempi nonquempetapojajempari yait-sitantigueti aitsitantatsica, aatotarite pitsajiguitsi querocaca noncoraquetantajempaca.

⁴ Cotanquitsiquea ichoocagarantaque aparopae conoaconoaiquempica Saririshiqui icocani icomajamajajiac, quejetacaquea tee incantaitejigueroji iitsaare. Oncoramanitapojajeguete iriatimpajia inquitsaajiaquemparoquea quitamaror-imajaca quitsaarentsi, ariqueate noncoquempani nontsipatsipaitanaquempari, icomajamajacatarite itsaromentamajaquenaqueate.

⁵ Taacaguete tampishitashijiaqueroneca maasanopae coraquetashijiaquerineca inquejejaquempariquea iriatimpajia, incoquempani inquitsaauquemparoquea quitamarocantari quitsaarentsi. Aatoquea noshetsitajiri ivajiro itioncacojigueriguete jenoqui paperiqui itioncacotantajiguecaroca ivajiroopae maasanopae incoquempanica inchoocaguiteni, manaquea nonquenquetsatacoventaqueri noncanqueriquea Aapani aisa irashivantijite: Naroguenti ashincari.

⁶ Choocaguete guempitatanquitsica iintsija inquemeja icantajiaquerica Ishire Aapani Irioshi tsaromentajatsica.

Itioncaciaqueneriquea tsaromentajatsica guintenijatsica Pirarerepiaqui

⁷ “Imaica pintionqueneri irashivantite tsaromentajianaca guintenijatsica Pirarerepiaqui, pincante:

Jeroquea icanqueca iriraquea teeca incovaeguishedimatempaji, iriotari Iriomajaca, iriguenti ashincaro iyavine Majirontatsica Taavini. Taaca opajitapae intanarejaque iriatimpa aatoquea yagavejajiti irashijitajero, aisa taaca opajitapae irashitaque aatoquea yagavejajiti intanarejajitajero. Iriatimpa icanti:

⁸ Notsamajaqueroquea maasanopae cameetsaguetatsica pipeacaajiacaca. Pameneroja, jero sotomorontsi notanarejaquempica, aatoquea yagavejajiti irashitajero. Notsaquempiquea teequea pintampishijiavetempaji, cotanquitsiquea piquemisantajiaqueroquea Noguenquetsatsare pinetsanataquero, aisa teequea pimpashiventacaa-jiguenaji, tee pincantacotenaji: ‘Tee notsateriji.’

⁹ Choocaquea oraniqui igapiocane Satanashi. Iriatimpajia iriguentijia tsojenti, icantajiaquetarite: ‘Naroguentijia joriojia’, cotanquitsiquea teequea irio joriojia. Jeroquea oncoramanitapojajeguete namajiaqueriquea picapiocapinijiacaguete noguerotacaitsitepariquea pichoocajiaqueguete aviatimpajia cameetsaniji intsajianaquenijite arimajaca nopintsamajajiaquempi.

¹⁰ Patsipetacojiaca pinetsanamajajianaqueroquea nocantajiaquempica. Irootaquequea nonquempoguijacotantajiaquempica aatonijite patsipemajajiat si oncoramanitapojajeguete irantsipejiaquempaguete maasanopae guintenijatsica quepatsiqui iramentajitaquempari arimajaca itsaromentajiaquenaqueate.

¹¹ Irooshipoji noncoraquepojaje. Quisho poguero piquemisantaqueca aatonijiyovashiantacajitimpirotsi, oquejetacotimpitsi iraitsijitaquempiro pamatsaero irojo-caquempimeca Aapani Irioshi.

¹² Taacaguete tampishitashiguequeroneca maasanopae coraquetashijiaquerineca incoquempani inchoocaguiteni itemporotequi Aapani Irioshi, inquejevetaquemparo omapipoate choocaguitatsica, aatoquea yogajaatsi osamani. Nontioncaquero ivajiro Aapani Irioshi ivancaqui aisa ovajiro iroaqueraro Jerosare, iroguenti guinteninintsi irashimajaca Aapani Irioshi. Iroatimpa manaquea onquenapoje inquitequi Irioshiqui oncoraquetaquequea ocantiqui isaviji. Aisa nonquejetsitemparoquea iroaqueratajatsineca novajiro nontionquitemparoquea ivancaqui.

¹³ Choocaguete guempitatanquitsica iintsija inquemeja icantajiaquerica Ishire Aapani Irioshi tsaromentajatsica.

Itioncaciaqueneriquea tsaromentajatsica guintenijatsica Iraoriseaqui

14 “Imaica pintionqueneri irashivantite tsaromentajianaca guintenijiatsica Iraoriseaqui, pincante:

Jero icanqueca iriraquea icantajitica ‘Amen’,‡ icocanitari itampaticamajaqueroquea maasanopae, teequea iramataguempaji. Iriotaquequea pariacaroca maasano ipeacaantantacaca Aapani Irioshi. Imaica icanti:

15 Notsamajaqueroquea maasanopae pipeacaajiacaca teequea povashiantamajatenaji pitsaromentavequenaguete, cotanquitsiquea aisa tee pintsaromentamajatenaji. Nonintaveca pintsaromentamajataquename. Teeguete pininteji, aato pitsaromentana.

16 Imaicaquea piquempetaqueroguete, irootapoji nompishonquempi, irooriji tee pintsaromentamajatenaji aisa tee povashiantamajatenaji. Manatari intati noncamarancuempai.

17 Aviatimpajia picantajivecaqueate: ‘Naroguenti ajaarantajiatasica, nocapioacavaequero nashintaguecaca, teequea noncoguitejacotimatempaji’, cotanquitsiquea teequea pamenimajiguempaji aviguentijia shimampojarari, ishimampojarancacajitacaca, aviguentijia coguitejacovaetatsica. Aisa manatari pishamponcajashirentavaeque, manaquea cajaratsinoshirentavaequempi.

18 Irootaquequea noncantantajiaquempica povegaratsitenaro nashincaca naatimpa, naatimpaquea nojocajiaquempironijite ooromajaca itajaiqueca paamariqui osaancorencantamajatanacaca, pajaarantamajatementanaquempaniji. Aisa povegaratenajate naatimpa nojocajiaquempiroquea quitamaromorenari quitsaarentsi pinquitsaajiaquempaca aatonijite pipashiventacajaajarotsi pigajaratsinore. Aisa povegaratenajate naatimpa, nojocajiaquempiroquea aavintajarontsi paavintajatacaantantajiajempaca cameetsaniji pamentamentanajeniji.

19 Iiraquea nopintsamajajiacaca noncantomajajiaqueri cameetsaniji intsaromentamajatanaquecaca. Noncantantajiaquempica pishimampojarancajiguempaja pamentajiaqueguete picovaeguishejiaca, pincantashitajianajempajate pincoquempani pintsaromentamajatanaquecaca.

20 Pameneja. Nociatipojaca sotomorontsiqui notinquiapojaquero nocajemacotapojimpi. Quericaquea quemavaquenanequea iroompaquea intanarejacotsitenaqueate, nonquijanaquequea nontsipatapojempari noshecajiaquempa.

21 Taacaguete tampishitashijiaqueroneca maasanopae coraquetashijiaquerineca nontsipatsipaitanaquempari jenoqui noguisavisaviitaqueriquea irisempijajiaquena nomajirontamentoqui. Inquempemajajiaquenaqueate naatimpa notampishitashigueteiroguete maasanopae, jero iriraquea Aapani yoguisavicantaquecaca nosenampijantacarica imajirontamentoqui.

22 Choocaguete guempitatanquitsica iintsija inquemeja icantajiaquerica Ishire Aapani Irioshi tsaromentajiatasica.”

4

Ishineventamajajicari Aapani Irioshi inquitequi

1 Iroompaquea namenavetaja namenitsitaroquea ashitacorontsi tanarejamoroca inquitequi. Noquemitsitariquea aisa quenquetsatacaaquecaca incajaranquitica iririjencavaequequea icanca quempejencavaeca tivorentsi, icanquena: “Caacate ocaniqui jenoqui nonigaaguequempiroqueate queroca oncoguetanaquempani oncoramani-tapojaguetei.”

‡ 3:14 *Amen*. “Amen” ocanque “arimaja” aisa “ari oncoquempa”. Acaniqui iroguenti otsipa ivajiro Quirishito, ocanque “Iriomajaca”, itampaticamajaquerotari maasano icanqueca.

² Irooqnea iteroncaquerogueti iquenquetsatacaquenagueti, iriraqnea Ishire Aapani Irioshi yaashirentavaetanaquenaqueate inquitegui. Namenitsitaroqueate imajirontamento isavicantacaca Majirontatsica ariquea ochoocaque oraniqui, ichoocaque savi-cantacaroca.

³ Iriatimpa itsirencavaeque icanca quempevaeca mapi tsirencapiri pajitatsica jaa-shipe aisa otsipa mapi quityoncapiri pajitatsica coronarina. Chooqa anquirivogaac-aroqa isavicantacaca, manaqnea oquejevecari yogue tsirencavaeque quempevaeca otsirenquigueti janapiri pajitatsica esemerarera.

⁴ Aisa namenaguequeroqnea otsipapae 24 majirontamentontsipae. Manaqnea an-quitsaetacocaroeqnea isavicantacaca Majirontatsica. Isavisaviitantacaroqnea 24 irama-jiroreja quitamarocantavaequeqnea iitsaare. Yamatsaejiaqueri amatsaerontsi ipea-caantantajitarica ooro.

⁵ Oraqnea imajirontamento isavicantantacaca Majirontatsica otimemecantapini-caroeqnea caretí ocontapinique timemec timemec, aisa ocontavaetaquiti serororon serororon tsijec tsijec. Aisa ochoocaque osamimicaguetaque 7 tsivorentsi, ocontaco-queri irirajia 7 jeocajianquitsica* irashi Aapani Irioshi.

⁶ Ariquea ochoocaque aisa oraniqui quempevecaroca incajare saancorencajavaeque, quempetaca potirinaqui, otampaticatacotacaro majirontamentontsi.

Oraqnea isavicantacaca Majirontatsica yanquitsaetacojiacaró 4 anijaripae, yoqui-jaquijaavaeca iroquijapae ochoocaguetaque ineguiqui aisa itaquiqui.

⁷ Aparo manaqnea iquempetacari león.† Iriraqnea itsipa manaqnea iquempetacari caapironcaari iriaqueraca quimogantirenajaniquitanquitsica. Iriraqnea trestapojat-sica caquinteavorovaetaque. Iriraqnea itsipatapojatsica manaqnea iquempetacari shi-rompito icantashivanquigueti iraregueti.

⁸ Irirajia 4 anijaripae maasano ochoocaguetaque 6 ishivanquipae, ocaravaetaque-qnea iroquija yoquijaquijaatsinovaeca maasanopae aisa itapinashivanquipaequi. Icantacoguitani savincaguitariqui aisa pitsecariqui teeqnea incarajigueji icantajiaque: “¡Iriomajaca, Iriomajaca, Iriomajaca Nomajirote Aapani Irioshi Agavejamajatatsica! Icoguitaniquea ichoocaguitini coramani, chooca imaica, ari incoguitempani inchooca-guiteni.”

⁹ Ari iquempepinijiaca ishineventajiacari irira savicanquitsica imajirontamentoqui, icoguitanitari ichoocatini coramani aisa incoguitempani inchoocaguiteni. Ican-queriquea: “Arioteesaa, poganejencamajataca.”

¹⁰ Ariquea icantajiaquegueti imaica, irirajiaqnea 24 iramajiroreja ariqueate icohicoitanaca iguerogueroventajianacari savicapinitatsica imajirontamentoqui itsaroventajianacari, iriguentitari Majirontamajatatsica choocaguitatsica, incogu-itempani inchoocaguiteni. Yamatsaerejitsitaro iramatsaerojia yojoquijijiaqueneri icaraguititapojaquegueti, icantajiguiri:

¹¹ “Nomajirote Aapani Irioshi, caaviji poganejencamajataca, ocameetsatantacaca noshineventajiaquempi, ochoocaquetarite poganejencare, Pirioshimajati, aisa caaviji pagavejamajati. Aviguentitarite peacaaguetaclaro maasanopae choocaguetaatsica, Aviguentiquea nintanquitsi pipeacaantantaguecarica, irootaqueqnea ichoocatantajia-caca.”

5

Paperi ampinaicanquitsica aisa Ovejaniqui

* 4:5 *jeocajianquitsica*. Pamenero otsapa 1.4 ovegaravanapojacagueti ocamantacotaquerigueti jeocajianquitsica. † 4:7 Irira *león* iquejevecari casecari. Pamenero itsavetacojiquerigueti león isavivanaqui otsapaqui 5.5 aisa 10.3.

¹ Ariqueate nameniroquea paperi ampinaicanquitsica otioncaca mavisotate. Iri-
raquea savicanquitsica imajirontamentoqui manaquea yajirincaro itincamijempe-
quiqui. Ochooque 7 ovinchajacore otsinetacotantacaca iseyotacotantajicaroca aa-
tonijite yampinaicarejajitirotsi.

² Iroompaquea nameniri irashivantite Aapani Irioshi caaviji yagavejamajati.
Icajemaquequea iririjencani icanti: “¿Queri caavijica yanaaque yoganejencavaeca
intsinecarejacoguequeronijite ovinchajacoseyote paperi irampinaicarejaqueroniji?”

³ Cotanquitsiquea teequea inchoocateji agavejanquitsineca intsinecarejacotaque-
roquea irampinaicarejaqueroquea iramenavanquero. Teequea iragavejajiguempaji
choocajitsica inquitequi aisa quepatsipaequitica iriguentijia aisa choocajianquit-
sica isavipatsaqui.

⁴ Niraitsitanacaquea niraaguitani namenaquegueti teequea inchoocatimateji aparo
cameetsamajatatsica cameetsaniji iragavejaqueroniji irampinaicarejaqueroquea ira-
menavanqueroquea.

⁵ Cotanquitsiquea iquenquetsatacanaquena aparo iramajirore icanti: “Aatotarite
piragatsi. Pamenerija iriratica León* ichoviquitanaqueca Joraani, aisa iriguenti
ichoviquitanaqueca Taavini. Yanaajiaqueriquea maasano. Iriguentiquea agavejama-
jatatsica. Iriatimpa iragavejaque intsinecarejacoguequeroqueate 7 ovinchajacoseyote
irampinaicarejaqueroquea.”

⁶ Iroompaquea nameniri Ovejajaniqui icatiaca oniganquirequi majirontamen-
tontsiqui yanquitsaetacari irirajia 4 anijaripae aisa iramajiroreja Majirontatsica. Coni-
javaequequea isatajajitaquerigueti imetojajivecarigueti. Ochooque ocarataque 7
ivaa, oraquea iroquiya 7. Oraquea 7 iroquiya iroguenti ocantacoque irirajia 7 jeocajian-
quitsica† irashi Aapani Irioshi itigarancajiaqueca intsitacaguitejavaetanaqueroqueate
quepatsi.

⁷ Ariqueate iriraquea Ovejajaniqui yoanaque yaitsitaroquea paperi yajiricaqueca
Majirontatsica itincamijempequiqui isavicaquegueti imajirontamentoqui.

⁸ Irooquea yajiricaquitiguiro ariqueea iquempejianaca irirajia 4 anijaripae aisa iri-
rajia 24 iramajiroreja Majirontatsica igueroventajianacari Ovejajaniqui. Aparopae
yajirijiriitaque itencatsajitica icantajitica aarepa aisa taso ipeacaajitaca cavorejari ooro
tseraiquivaeca casancapaneri itajaitica. Oraquea casancapaneri iroguenti oncanta-
coque icantajiaqueca tsariventajiacarica Aapani Irioshi iramanajiaquerigueti.

⁹ Yamashajiaquequea iroaqueraro amashairentsi icantajiaque:

“Caaviji poganejencamajataca pagavejantacaca pajirincaro ca paperi,
aisa pintsinecarejacotantaquemparoca ovinchajacoseyote iseyotacotantajicaroca.

Imetojajitaquempitari ochovivincajatanaque piriraja,
irootaquequea pivegaratantajiacari caquinteja pimeshijiaqueca irashintajiajem-
parinijite Aapani Irioshi.

Pimeshiagarantajiaqueriquea maasanopae caquinteguetatsica, gonorontava-
caaguetatsica, cantashitatiaguetatsica iguenquetsatsareja, aisa guintenigueta-
sica quepatsipaequi.

¹⁰ Pipeacajaiacari majirontaguetatsica, aisa pipeacajaiacari saseroroteja cameetsaniji
irantaqueneriniji Aapani Irioshi.
Iriguentijia majirontanquitsine quepatsiqui.”

* **5:5 León.** Iri **león** iquejevecari casecari, cotanquitsi ichooaque otsipaqui guinteninintsi, quejecaroca Africaqui
aisa Ishiraeriqui. Yanaaqueri itsipapae tomirishiquitica icovejencatigueti, irootaque icantantajitacarica covejen-
camajatatsica imajirote tomirishipaequitica. † **5:6 jeocajianquitsica.** Pamenero otsapa 1.4 ovegaravanapo-
jacagueti ocamantacotaquerigueti jeocajianquitsica.

¹¹ Iroompaquea namenajigui irashivantijitete Aapani Irioshi itirorencajianaca icaramirincavaeque jmm ontaniqui, yanquitsaecari irirajia anijaripae aisa iramajirorejia Majirontatsica. Noquemajiaqueri iquenquetsajiaquegueti.

¹² Iririjencavaeque icantajiaque:

“Caaviji yoganejencamajataca irira Ovejajaniqui imetojajivecaca, ocameetsatantacaca ochoocaque iragavejane, ochoocaque maasano yashintavaetacaca,

ochoocaque itsamajare, itampishire, iroganejencare,

itsaromentajitari, ishineventajitari icantajitiri: ‘¡Caaviji poganejencamajataca!’ ”

¹³ Iroompaquea noquemajiaqueri maasano choocajatsica inquitequi, quepatsiqui, isavipatsaqui, inirojaniqui quantijani, maasano icantajiaque:

“Jaameja ashineventajiaquempari savicanquitsica imajirontamentoqui aisa Ovejajaniqui,

ancantajiaqueri iriguentijia caaviji yoganejencamajataca, aisa yagavejamajati.

Ancoguitempanijate anquempetaquempauea imaica.”

¹⁴ Iriraquea 4 anijaripae icantajiaque: “¡Ari ancoquempanijate!” Iroompaquea iriraquea 24 iramajirorejia Majirontatsica Anijaguitatsica iguerogueroverentacari itsaromentajanacari.

6

Itsinecarejacotaqueroquea paperi ampinaicanquitsica

¹ Iroompaquea nameniri Ovejajaniqui itsinecarejaquero aparo ovinchajacore iseyotacotantajivecaroca paperi ampinaicanquitsica, aisa noquemiriquea aparo anijari iririjencavaeque icanca quempejencavaeca careti, icanti: “¡Caacatejate!”*

² Namenitanaca iriguentimpa quitavaireri quitamarori. Iriraquea shiacotantacarica yajiricaque iveane. Ariquea yojocajiqueneri amatsaerontsi iramatsaetaquempauea. Teequea inchoocatomateji agavejaquerineca. Iroompaquea yoanaque irashimirintaquempaueate iragavejantaquequea.

³ Ariquea iquempetsitajaro Ovejajaniqui otsipa ovinchajacore iseyotacotantajivecaroca, itsinecarejaquero mavitetapojatsica, iroompaquea noquemiriquea itsipa anijari icanque: “¡Caacatejate!”

⁴ Ariquea isotoapojaque itsipa quitavaireri, iquityoncavaeque icanca. Iriraquea shiacotantacarica manaquea icantajiaqueri iroanaquequea quepatsiqui irooqueate ompampiatantanaquemparoquea incatsimatavacaantajiaquempaca maasano, irime-tojavacaajiaquempaueate. Ariqueate yojocajiqueneri catsantsameniri tsampitsantsameniri.

⁵ Iroompaquea iquempetsitajaro Ovejajaniqui otsipa ovinchajacoseyote, itsinecarejaquero trestapojatsica, ariquea noquemiriquea iquenquetsatanaque trestapojatsica anijari icanque: “¡Caacatejate!” Namenitanaca iriguentimpa quitavaireri quisaatsantsavaeque icanca. Iriraquea shiacotantacarica yajiricaquero itsatantajitaroca otenare.

⁶ Noquemiquea iquenquetsajencajitanaque ichoocajiaquegueti irirajia 4 anijaripae icantajiaque: “Apatacoro shovao tirigoitsoqui ovegaravaeca aparo tenario,† ariquea oquejetaca trestaco shovao sevaraitsoqui, ovegaravaeca aparo tenario. Iriraquea ashiti aisa vinoja, shooshoh pipomatsatirotsishiatsi.”

* **6:1** Oconoaca paperi iroquetinica iguenquetsatsarequi guiriego otioncaca acaniqui: “¡Caacatejate pamenejate!” Otsipapae mana otioncaca: “¡Caacatejate!” Ari oquejetaca otsapaqui 3, 5, 7 otioncacaguete: “¡Caacatejate!” † **6:6 tenario.** Iriraquea tenario iriguenti imentaqui yaancaca ishiaoquegueti icantacoguitani apajencaro savincaguiteri. Tee onchoocamajatajeji isheca, irotaquequea ovegaravaetantacaca choocatajatsica.

⁷ Ariqueate iquempetsitajaro Ovejajaniqui otsipa ovinchajacoseyote, itsinecarejaquero cuatrotapojatsica, ariqueate noquemiriquea iquenquetsatanaque cuatrotapojatsica anijari icanque: “¡Caacatejate!”

⁸ Namenitanaca iriguentimpa quitavaireri quiteshivaari icanca. Iriraquea shiacotantacarica ipajita Metojagantsi. Yoguijatapojiri itsipa pajitatsica Areshi.‡ Yagavejacaajiqueri irimetojajiaqueri oshequini quepatsipaequitica incaratacaavaequeri 1/4. Inconoagarantajiaquempaquea irimetojantajiquempari tsaampitsantsameniriqui, itsipapae manaquea ometojagarantajianaqueriquea itase, itsipapae manaquea ometojagarantajianaqueriquea irojoquijire, itsipapae irioqueate metojagarantajiaquerine tomirishipaequitica catsimaguetsatsica.

⁹ Iroompaquea iquempetsitajaro Ovejajaniqui otsipa ovinchajacoseyote iseyotacotantajivecaroca, itsinecarejaquero cincotapojatsica, ariquea namenaqueroquea aretare. Oraqueate otapinaqui namenajiaqueri ishirepae imetojimentajitaqueca Iguenquetsatsare Aapani Irioshi aisa itsavetantajiaquerigueti.

¹⁰ Iriatimpajia icajemajianaque icantajiaque: “Intsiquetiroshia Majirontamajatsica Comajarimajaca Iriomajatatsica, ¿queroshiatsi oncaravaeteni pompetacovaetajenani pincatsimajiajeri guintenijiatsica quepatsiqui metojajiavequenaca?”

¹¹ Iriatimpa yojocajiaqueneri quitamarocantari quitsaarentsi, iroompaquea icantajiguiri: “Poguijacojiguempataja, choocatarite papiaajanirentsiijiate papitsariventarijiate quempejiaquempineca aviatimpajia, irimetojimentajiaqueriquea intsavetacotantajiaquenagueti. Oraquea inquempetacajitajemparigueti iriatimpajia, ariquea nompetacotsijiguempiqueate.”

¹² Ariqueate namenaqueri Ovejajaniqui iquempetsitajaro otsipa ovinchajacoseyote, itsinecarejaquero seistapojatsica, ariquea ocotanaca omoguecamajatatiguinimaja. Ariquea icotanaca catsirincaiteri icamaramentatanaque iquempetanacaroquea quitsaarentsi ipeacaajitaca caaveramae camaramaevaetatsica. Iriraquea taai iquityoncamentatanaque iquempetanacaroquea irajantsi.

¹³ Iriraqueate impoquiropae inquitequitica yasacaraaguetanacaquea quepatsiqui iquempetanacaroquea osacoroguitigueti iguera irooshivetapojacagueti agaguijem-pame onincacogueti rogueti inirojenca choviga.

¹⁴ Oraquea inquite jac opeaca oquempetanacaroquea yampinaicajitirogueti paperi. Oraquea maasano otsempipae aisa ovogorepae ogaaguetanaca.

¹⁵ Ariquea ishiashiaitanaca maasano majirontaguetatsica, jeri aisa imajirojiate coaretajia, aisa jivajivaitatsica, ashintavaejiatsica, agavejavaetatsica, yashintajitaca, jeri aisa teeca irashintajitempariji. Ishiashiaitanacaquea maasano caquinteja, yaventaivanacaroquea omoroguetacagueti quepatsi aisa imperitamoropaequi aisa mapichonquiinapae otsempipaequi.

¹⁶ Iquenquetsajianaque icantajiguiri otsempipae aisa mapipae: “¡Poaviotacotenashiatsi pintsititacojiaquenaquea aatoniji yamenajiajanatsi Majirontamajatsica savicanquitsica imajirontamentoqui, aisa aatoniji icatsimacatsimaitana Ovejajaniqui!”

¹⁷ Arejetapojacatarite savincaguiteri incatsimatantajiaquequeate. ¿Quericampate agavejanquitsineca intampishitashivaetavaquero?”

7

Iseyovancatsitantajitari ivajiroqui Aapani Irioshi 144,000 ichoviquijianaqueca Ishiraerini

‡ **6:8 Areshi.** Oraquea Areshi iroguenti ichoocajiaquegueti metojatsica tequerataguete impishoncajiteriji camorecariqui. Irira guiriego icanquero **hades**, iquenquetsatsarequi evereo icanquero **sheol**.

¹ Iroompaquea namenajiaqueri 4 irashivantijitete Aapani Irioshi aparopae icati-aguetacaquea ocaratapojigueti quepatsi osotoajencaguetigueti chovigapae. Yojocaa-jencatavaqueroquea aatoniji ochovigajencatajitsi quepatsiqui, aisa inirojaniqui quentijani, irooca aisa inchatopaequi.

² Ariquea nameniri itsipa irashivantite Aapani Irioshi iquenapojaque isotoguigueti catsirincateri yajiricapojaqueroquea iseyone* Aapani Irioshi anijatsica. Iriatimpa icajemacojiapojaqueri irirajia 4 irashivantijitete Aapani Irioshi yagavejacaajiqueca incantashitatiaguishveaquereroquea quepatsi aisa inirojani quentijani, icantajiguiri:

³ “Aatotashiatsi queroca picojiguirotsi quepatsi, aisa inirojanipae quentijani, aisa inchatopae, tequeratanica aseyoterinica irajaanirejia Aapani Irioshi ivancapaequi.”

⁴ Iroompaquea noquemiquea iquenquetsatacojiaqueriquea ichoviquiguetaqueca Ishiraerini seyojianquitsica ivancapaequi, icarajiaquequea 144,000 ichoviquiguetaqueca maasano irijanijiate Ishiraerini. Itsajiqueri iquempetacaajicari imaica:

⁵ Iiraquea ichoviquijiani Joraani icarajiaque 12,000.

Iiraquea irashijia Iroveneni icarajiaque 12,000.

Iiraquea irashijia Gareneni icarajiaque 12,000.

⁶ Iiraquea irashijia Ashereni icarajiaque 12,000.

Iiraquea irashijia Nepetarini icarajiaque 12,000.

Iiraquea irashijia Manaseshini icarajiaque 12,000.

⁷ Iiraquea irashijia Shimeoneni icarajiaque 12,000.

Iiraquea irashijia Irevini icarajiaque 12,000.

Iiraquea irashijia Isacareneni icarajiaque 12,000.

⁸ Iiraquea irashijia Savorooneni icarajiaque 12,000.

Iiraquea irashijia Joseni icarajiaque 12,000.

Iiraquea irashijia Vejamineni icarajiaque 12,000.

Quitsaajanquitsica quitamarocantari quitsaarentsi

⁹ Iroompaquea namenavetanaca namenitsitari itsipapae caquinteja icaramirincajiaque jmm. Iquenaquenaivaepoji osamanipaequi maasano quepatsipaequi, iconoagarantajiaca maasano gonorontavacaaguetatsica, maasanopae caquintequetatsica, ocantashitatiaguetacaquea iguenquetsatsarepae. Maasanomaja quenquetsatsarentsi-pae chooca quenquetsatantacaroca. Iriatimpajia icatintiitimojiacari Ovejajaniqui aisa Aapani Irioshi savicanquitsica imajirontamentoqui. ¡Itiorencaventajianacari icaramirincavaeque jmm! Teequeate iragavejajitajeriji intsaajitajeriji. Ijamirincavaeque quitsaajiaca quitamarocantari quitsaarentsi ajirijirijiaquequea tsorenashi.

¹⁰ Ijamirincavaeque icajemajiaque icantajiaque:

“¡Iriguenti aavajajica Arioshite savicanquitsica imajirontamentoqui, aisa Ovejajaniqui!”

¹¹ Maasano irashivantijitete Aapani Irioshi icatintiitacaquea yanquitsaetacotsitacari imajirontamento, aisa iramajirorejia, jeri aisa 4 anijaripae. Maasano iriatimpajia itigueroanaca irosati yarejevaequita ivancaqui isavi, itsaromentajiacari Aapani Irioshi,

¹² icantajiaque:

“¡Arimajaguitatsi!

Ancoquempani ashineventaguitemparini Arioshite, ancantaguiteriniquea: Caaviji Pirioshimajati.

Aviguenti caaviji pitsamajati.

* **7:2 iseyone Aapani Irioshi.** Iroguentiquea itioncacotantajicaroca ivajiro Aapani Irioshi aisa ivajiro Ovejajaniqui ivancapaequi yashintajiacaca. Pamenero 14.1 aisa 9.4.

Incantajiaquempi maasano, ‘¡Arioteesaa! Caaviji picavintsajantamajatanti’, aisa
intsaromentanaquempi.

Aviguenti caaviji pagavejamajati, aisa aviguenti caaviji pitampishimajati.

¡Oncoguitempaniquea onquempetaquempaquee imaica!

¡Arimajaguitatsi!”

¹³ Ariqueate icanquena aparo iramajirore Aapani Irioshi: “¿Taa ipaji irirajia quitsaa-
jianquitsica quitamarocantari quitsaarentsi? ¿Queroquee iquenaquenaipojini?”

¹⁴ Naatimpa nocantiri: “Avirompate, nomajirote, pitsaquero aviatimpa.”

Iriatimpa icantana: “Iriguentijia sotoampojaroca omajirojencare atsipevaetagantsi,
iroguenti yajacantajitacaroquee iitsaare iriraja Ovejajaniqui, oquitamarocantanta-
nacaca.

¹⁵ Irootaqueuea icatintiitimotantacarica Aapani Irioshi isavicaquegueti imajironta-
mentoquei,

incoquempaniquea irantajigueneriquea oraniqui itemporotequi savincaguitერიqui
aisa pitsecariqui.

Iriaquea savicanquitsica imajirontamentoqui irinetsanatsitenempari intinerenquit-
sitenempariquea iitsaarevanco.†

¹⁶ Aatoquee yatsipevaetajarotsi itase,

aatoquee imirejiajitsi,

aatoquee icatsirincatajiritsi catsirincaiteri,

aatoquee yatsipejiajarotsi catsirincaguiteri.

¹⁷ Incoguitempani inquempetajiaquempa imaica iroorijite inquempoguijajiaqueriquea
Ovejajaniqui choocantacaroca oniganquirequi imajirontamentoqui Aapani
Irioshi.

Iramenajiaqueri inquempetacaajiaquempari iquempoguijajitiriguetei oveja, iraaiana-
queri omotojatiguetei oja anijacaantantatsica.

Iriaquea Aapani Irioshi irisheoquijajeneriquea maasano ijaquija, aatoquee
ijaquitajitsi.”

8

Sietetapojatsica ovinchajacoseyote paperi

¹ Ariquee irooquee iquempetsitajaroquee Ovejajaniqui itsinecarejaquero sietetapo-
jatsica ovinchajacoseyote otsinetacotantacaca paperi, ariquee icohicoitanaca imajere-
janaque maasano inquitequitica yarejetacovaetapojaca niganqui hora.

² Iroompaquea namenajiaqueri 7 irashivantijitete Aapani Irioshi icatintiitimoji-
acariquea iriatimpa, aparopae yojocajiqueneriquea tivorentsi.

³ Iroompaquea icoraquetapojaque itsipa irashivantite Aapani Irioshi, yamaque yo-
guijaantajitaroca casancajencaro ipeacaajitaca ooro, icatiimotapojacaroquee aretare
ipeacaajitaca aisa ooro. Yojocajiqueneri oshequi casancajencaro intaashiquerica Aa-
pani Irioshi onconoajencatanaquemparoquea icantajiaqueca igomajamajare yamana-
jiguiriguetei. Itaantsitaroquea aretarequi tampaticatacotaquerooca imajirontamento
Aapani Irioshi.

⁴ Oraquee ovoga casancajencaro yajiricacotaqueca ashivanti ojajencavogavaeque-
quee ocantajencavaetanaca ichoocaqueguetei Aapani Irioshi, oconoajencatanacaro-
quee icantajiaqueca igomajamajare yamanajiguiriguetei.

⁵ Ariqueate iriraquee irashivantite Aapani Irioshi yaanaque paamarimenqui
choocatanquitsica aretarequi yoguijaaqueroquee yoguijaantajitaroca casancajencaro
yajiricaqueca. Irooquee itseraiquitaquitiguiro ipishoncaquitiro quepatsiqui,

† 7:15 *intinerenquitsitenempariquea iitsaarevanco.* Irooquee oncanque incoquempani intsipatsipaitaquem-
pari inquempoguijimenqueriniji aatonijite taaca oahoitiritsi.

ariqueate ocotanaca careti ocantavaetaquiti tsijec tsijec, serororo serororo, otsantsajencatsarenaetaque, aisa omoguecaguetanacaquea.

Itivojiqueroquea tivorentsipae

⁶ Iriaquea 7 irashivantijitete Aapani Irioshi ajiricajianquitsica itivorepae inetsanajianaca intivojianaquequea.

⁷ Iroompaquea ijivatanaque aparo ashivanti itivotaque, ariqueate ocotanaca oparianaque incojariqui quepatsiqui otsipatanacaro paamari oconoapojaro irajantsi. Otaagarantsitaroquee quepatsi irootapoji oncaratacaquerome niganqui, ocaratacaquerotari 1/3. Otaagarantsitaroquee inchatopae ocaratacaaquero 1/3, aisa maasanopae etsocoreshipae cataroshipae apevoquijamajaquero.

⁸ Ariqueate itivotaque ashivanti mavitetapojanquitsica, ipishoncajajiqueroquea inirojaniqui quantijani taaca opaji quempetacaquea inirotsempi, osamimicatsantsajencavaetanaquequea. Ariqueate ocotanaca inirojani quantijani opeagarantanacaquea irajantsi irootapoji oncaratacaquerome niganqui.

⁹ Imetojagarantajianaque guintenitantajiacaroca ocaratacaavaequeri 1/3. Otsitijaa-garantaguetanaquequea inirotsantsanapae quenajarontsipae ocaratacaaquero 1/3.

¹⁰ Iroompaquea itivotaque ashivanti trestapojanquitsica, ariqueate ocotanaca yomposanaca caramenquivaetanquitsica impoquiro, iquenavaetapoji inquitequi imorecatsantsajencavaetanaquequea, yomposapojaca ojaaquipaequi aisa osotoajaguetiguetei oja, yoaviojatapojaro ocaratacaaquero 1/3 ojaaquipae.

¹¹ Iriaquea impoquiro ipajitaca Quepishiri, iquepishijaagarantaguetapojajiroquea ojaaquipaequi ocaratacaaquero 1/3. Imetojantajiacaca icaramirincajiaque caquinteja imirajiacaroguetei quepishijatanquitsica oja.

¹² Ariqueate itivotaque ashivanti cuatrotapojanquitsica, ipitsecanampitanaque catsirincaiteri, irootapojatsi impitsecanaque niganqui, teequea irivoreamajatajempaji. Ariquea iquempetaca taai ipitsecanampitanaque iriatimpa, irootapojatsi impitsecanaque niganqui, teequea inquitasemajatajeji. Aisa impoquiropae ipitsecagaran-tanaque icaravaeque 1/3. Osavincaguitevetamanaca icononcavetanajatiga opitsequit-sitanaja. Teequea inquitaseteji taai, tee inquitamiriaquiteji impoquiropae. Pajini onianquittete iquitasepoji irira taai, iriaquea impoquiropae iquitamiriaquitapoji.

¹³ Namenitsita iriguentimpa shirompito caramantaneivaeque icanca yaranaque iseontavaetanacaquea jenoqui icajemanaquequea icanque: “¡000, 000, 000, imaicanishiatsi irantsipevaetemanishiatsi maasano guintenijiatsica quepatsiqui intivojianaqueguetei itsipa tres irashivantijitete Aapani Irioshi tequerataca intivoteji!”

9

¹ Iroompaquea itivotsita ashivanti cincotapojatsica, nameniri itsipa impoquiro iquenavaepoji inquitequi yomposapojaro quepatsi. Yojocajiqueneri yavi iriyavirejanquem-paroca oamorovaetanquitsica jmm isaviji ovenaroncapojacaguetei.

² Iroompaquea irooquee iyavirejacotaquitiguiro ariquea ocotanaca ocaravogavae-tanaquequea paamarivoga ooshiatsi oquisaaajencatacaanaqueriquea catsirincaiteri opitsecajencavaetanaquequea.

³ Iroompaquea nameniri quejevecarica tsinari iquenaquenaitantapojacaro paa-marivogajenca iporocajencavaetanaque itsitacaguitejavaetanacaroquee quepatsi. Yagavejacaajiguequeriquea iroantaqueguetei inquempetaquempariquea yoantiguetei os-eroticon.

⁴ Icantimentajitaqueri aato yantaguetiro cataroshipae quepatsiquitica, inchatoshim-popae, maasano tsoroaguetanquitsica. Iriguentiquea irantsipetacaajiaquempa caquin-teguetatsica teeca iriseyotantemparoji ivajiro Aapani Irioshi ivancaqui.

⁵ Cotanquitsiquea icantimentajitaqueri irimetojajigueri, manaquea irantsipetacaa-
jiaquempari 5 taai. Oraquea iroaquerigueti incatsivaequeriquea quempetaca yoan-
tigueti oseroticona.

⁶ Irirajia caquinteja intsataitavetempa iroguijacoveguitempani irimetojitempame,
cotanquitsiquea aatoquea imetojajiguetsi. Irinintamajajiavequempaqueea irimetoja-
janaqueme, cotanquitsiquea aato imetojitsi.

⁷ Iriraquea tsinari quejevaeca quitavaireri inetsanajiguirigueti irooshitegueti
iroaroaitanaque irashimirintaquempagueti. Yamatsaejiaca iguitojiaqui quempetaca
amatsaerontsi ipeacaajitaca ooro. Oraquea ivoro quempetaca ivoro caquinte.

⁸ Ochoocaque imae ontiavenaavaeca oquempetacaroquea omae manquigarentsi.
Oraqueate iraji quempetacaqueate iraji casecari.

⁹ Isavoneguitaca quishori quejecaroca yero. Oraqueate yarajiaquegueti opoji-
mavaeque ivanqui quempevaeca opojimavaetigueti itigaritacotantajigueta-caca ishia-
caacarogueti quitavaireri yoayoaitigueti irashimirintavacaajiguempagueti coaretajia.

¹⁰ Ochoocaguetaque igojapae ochoocatantacaca itseji quempeca itseji oseroticona.
Oraquea itseji irootaque irantsipetacaantajiaquemparica caquinte 5 taai.

¹¹ Chooa imajirojiate, ashivantiniro inavetaca, iriotaquequeea imajirojiate maasano
choocajianquitsica oamoroavetanaquegueti isaviji. Manaquea ipajica iguenquetsat-
sarequi evereo Avaroni, oraquea iguenquetsatsarequi guiriegojia ipajica Aporioni.*

¹² Jac teroncanaca iroquetica atsipevaetagantsi icantacotsitacaca “¡Ooo!”, cotanquit-
siquea choocatiraja mavitetiraja icantacotsitacaca “¡Ooo!”

¹³ Iroompaqueea itivotaque ashivanti seistapojatsica, noquemiroqueea iguenquet-
sajencajitanaque osotoajencatantapojacaro ovaapae aretare choocatatsica Aapaniqui
Irioshiqui ipeacaajitaca ooro.

¹⁴ Icantajitiri ashivanti seistatsica ajiricaqueroca tivorentsi: “Poanaque pishiticareja-
cojiaquiteri irira 4 ashivantijite shiticacojianquitsica ontaniqui ojaaquiniqui pajitatsica
Eoperateshi.”

¹⁵ Irooquea iquemavaquegueti yoanaquequeea ishiticarejacojiaqueri cameetsanijite
interoncagarantajiaquiteriniji caquinteja quepatsipaequitica incaratacaavaequeri
1/3, iriguentijiatari inintacaajiaqueca Aapani Irioshi interoncagarantajiaqueri. Iri-
atimpa itsatsivaetanitari coramani queroca aantapojempaca. Itsaque queroca aja-
gantsini, querica taai, queroca savincaguiteri, aisa querocagueteri incarateni catsirincai-
teri.

¹⁶ Iroompaqueea noquemiriquea itsajitiri coaretajia shiacojiaquerica iguitavairerite,
maasano icaramirincavaeque 200,000,000.

¹⁷ Irirajia quitavaireri aisa shiacotantajiacarica nonejaqueca quejetaca
noguimaanequi, ari iquejejiaca imaica: Maasano isavoneguijiacaros quishori,
ocantashitatiaguecaqueate oquityoncataquequeea quejetaca paamari, otsipaquei
oquisaaque, otsipaquei oquiteritaque quejetaca asopiri. Oraquea iguito quitavaireri
quempevaeca iguito casecari. Osotoavagantetapojiri omorecare paamari aisa
ovogajenca, oconoapojaro asopiri.

¹⁸ Imetojagarantajianaquequeea caquinteja ocaratacaavaequeri 1/3, ometojajiana-
queriquea maasanopae sotoajencatanquitsica ivagantequi quitavaireri: omorecare
paamari, paamarivoga aisa asopiri.

¹⁹ Oraquea yagavejantajiacaca quitavaireri teequea aparos onchoocateji ivagantequi,
ochoocatsitaquea aisa igojaqui, oquempevecari camaarini, iroguenti ityantya yoanta-
jigarica caquinteja yatsipetacaantajigarica.

²⁰ Cotanquitsiquea iriraquea choocatajatsica tequerataca irimetojajigueji teequea
incantashitajiaiguempaji impishoncajigueroji ipeacaaguishejiacaca. Arimpaqueate

* **9:11 Avaroni** aisa **Aporioni**. Mavite oncanque Jararejantaguetatsica.

itsaromentavaetanacari ampatsinipae aisa itsipapae ipeaguetica irioshivijitashitacaca ipeacaajitaca ooro, perata, voronquise, mapi aisa inchato—irirapae teeca iramenimajigueji aisa teeca inquemajigueji, aisa teeca iranijajigueji.

²¹ Iroompaquea aisa teequeate impishoncajigueroji imetojantajiguigueti, imatsitantajiguigueti, icantatsatantajiguigueti, aisa yaitsitantajiguigueti.

10

Ashivanti ajiricaqueroca paperijaniqui ampinaicanquitsica

¹ Iroompaquea namenitsitariquea itsipa ashivanti tampishivaetatsica, iquenapoji inquitequi, yaguijitaipojaquequea. Anquirivogaacotacariquea mararo, ari ichooaqueri yogue iguitoqui. Oraquea ivoro oquempevetacari catsirincaiteri. Oraquea iguitiqui quempevetaca catsantsamorecari.

² Iroguenti yajiricaque paperijaniqui ampinaicarejaca. Oraqueate iguiti itincamijempequiquitica icatiantacaroquea inirojani quentijani. Irooquea ishinampijempequiquitica manaquea icatiantacaroquea quepatsi.

³ Iroompaquea icajemitsimajatanaca iririjencani icanca, iquempejencavecari león* icajemigueti. Irooquea icajemaquitigui ariquea ocojencatanaca oseroroncaguetanaquequea caretiguetaanaquequea 7 careti, opojimajencavaetanacaquea inirojencavaetanaca ocanca.

⁴ Iroomequea nontioncacotavaqueromequeate ocantajiaqueca careti, cotanquitsiquea noquemiriquea iquenquetsatacaajitaquenaquea inquitequi icantajitana: “Aatoja pitioncacotirotsi ocantajiaqueca oratica 7 caretipae, aisa aatoquea querica pican-titsi.”

⁵ Iroompaquea iriraquea irashivantite Aapani Irioshi namenaqueca incajaranqui catiancaroca inirojani quentijani aisa quepatsi icantajempequitanaqueroquea itincamijempequi inquitequi,

⁶ icantiquea: “Iriraquea icanca ichoocati peacaaguetacaroca inquite aisa quepatsi aisa maasano choocatantaguecaroca ipeacaacaro aisa inirojani quentijani aisa choocatantaguetaroca. Iriatimpa yamenaquenaquea iroomajaca noncanquem-pica. Imaica noncantajiaquempi aapojaca, aato yoguijavaji.

⁷ Ariquea irooshipojigueti intivotanaquequea irashivantite Aapani Irioshi sietetapojatsica, iriraquea Aapani Irioshi ironigaantaqueroquea yomanacoguetacaca, irinet-sanamajaqueroquea icantajiaquerica coramani irajaanirejia tsavetantajiatsica.”

⁸ Ariqueate iquejetsijitajanaquea aisa iquenquetsatacaajitajana inquitequi icantajitana: “Poanaqueja paavaquero ampinaicarejanquitsica paperi yajiricaqueca irashivantite Aapani Irioshi, irinta catiantacaroca inirojani quentijani aisa quepatsi.”

⁹ Ariquea naatimpa noashitanaqueri ashivanti, namanapojaquequea paperijaniqui ampinaicarejanquitsica. Icantaquenaquea: “Jero, paguero, pishecatemparo. Oraquea arejetapojemparogueti pitsicotoqui onquepishicanaquempi, cotanquitsiquea oraquea pivagantequi ompochatanaque quempeca ipochajatigueti earotoja.”

¹⁰ Iroompaquea naitsitaro paperijaniqui iracoqui ashivanti noshecatsitaro. Namenitsitaroquea arimajacatarite icantamajaque. Oraquea novagantequi pocha ocanca quempeca ipochajatigueti earotoja, cotanquitsiquea irooquea noniavecarioquea arejetapojacarogueti notsicotoqui oquepishicanaquena.

¹¹ Ariqueate icantajitana: “Imaica pinquejetacaajemparojate aisa pincamantantaje, iriguenti pintsavetacotsivaequempari caramirincavaetanquitsica caquinteguetatsica guintenijiatsica quepatsipaequi cantashitatiaguetanquitsica iguenquetsatsarepae,

* **10:3** Iriraquea **león** iririjeguimajataque inaque, iquejevecari casecari iririjegui. Cotanquitsi icajemigueti yam-penejencavaetanaca icanca, antsarocaaanaquempari anquemaquerigueti. Ontaniqui otsipaqi guinteninintsi ichooaquegueti icantajiqueru iriguenti imajirote tomirishipaequitica.

iriguentijia aisa imajirojiate, pincanquequea quero incojiaquerini Aapani Irioshi onco-ramanitapojajegueti.”

11

Mavite tsavetacotantajiaquerica Aapani Irioshi

¹ Ariquea yojocajiquenaroquea savoroquiji igomarotantajitaca icantajitana: “Poanaque pigomaroquiteroja iteemporote Aapani Irioshi, pinquejetsitemparoquea aretare. Aisa pintsajiaqueriquea queroca icaramirincajiaqueni choocajianquitsica oraniqui tsaromentajiacarica Aapani Irioshi.

² Oraquea otsoviaguitetapojaquegueti sotsiquitica aatoquea pigomarotirotsi, irooquea icantacaajiquerica itsipapae caquinteguetatsica inchoocatantapojempaca. Iriatimpajia manaquea irantanavintsajiaquero oratica guinteninintsi yashincaca Aapani Irioshi,* iragavejajiaqueroquea incantacoguitempani irarejevaetanaquem-paroquea 42 taai.

³ Naatimpa nontigarancaque mavite tsavetantajiaquenanea, nagavejajiaqueri intsavetantajiaquenaqueate incantacoguitempani arejevaetanaquemparoquea 1,260 savincaguiteri,† manaquea inquitsaajiaquempaquea jiriquiquijiporoquiro.”‡

⁴ Iriguentijia ocantacotaque mavite inchato orivo§ aisa mavite tsivorentsi jerenquijerenquiatacotatsica yojoquijiqueca ichoocaquegueti Imajirojiate maasano quepatsiquitica.

⁵ Quericaca catsimavequemparineca irinintajiavequempaquea irantsipetacaavaequempari, ariqueate incoquempani osotoamorecavaetanaquequea ivagantequi ontsiatsiavaetavaqueri ometojajiaqueri. Ariqueate inquempejiaqueri imaica maasano quepatsipaequitica nintavetanquitsineca irantsipetacaquemparime.

⁶ Iriatimpajia incanquegueti: “Aatoquea oteji incani”, aato oteji. Iroompaquea ariquea onquempetaquempa arejevaequempa interoncanajerogueti intsavetantavaequetu. Aisa iragavejajiaque impeacaajianaquemparoquea oja irajantsi. Aisa iragavejajiaque incantashitajencatashijiaqueriquea guintenijiatsica quepatsiqui, irantsipetacaajiaquempari. Ariquea iriatimpa querocaca ininqueca irampijitajero, ari irampijitajero.

⁷ Cotanquitsiquea interoncajianaquerogueti intsavetantajiaquegueti, incoraque-tapojequa covejencavetatsica sotoapojatsineca omoroqui oagantavaetanquitsica isaviji, incatsimajiapojakeri iragavejajiaqueri irimetojajiaqueriquea.

⁸ Oraquea itsino manaquea irojoquijitantajiaquemparoquea quenavoquirontsi oraniqui guinteninintsiqui anaanquitsica, ariqueate oraniqui yompajacojiqueriquea Amajirote coramani. Oraquea ishiacaantarogueti oratica guinteninintsi icantajiqueroquea Soroma aisa Ejepito.

⁹ Oncarate 3 savincaguiteri intariavaequempaquea oraniqui, aisa otsipa niganqui savincaguiteri, iramenajiaqueriquea caquinteguetatsica, incaramirincavaeque caquinteja cantashitatiaguetanquitsica iguenquetsatsarepae, majirontaguetacarica majirontajiatatsica. Iramenajiaqueriquea metojianquitsica cotanquitsiquea incantimentsitaquempari aatonijite iquitatiritisi.

¹⁰ Maasanoquea guintenijiatsica quepatsiqui iramenajiaqueri metojajiaque, ariqueate irishinevaejianaquempacea iraagarantsitemparoquea yashintaguecaca

* **11:2 oratica guinteninintsi yashincaca Aapani Irioshi.** Iroguenti Jerosare. Pamenero Is. 63.18; Iran. 8.13; Irc. 21.24. † **11:3 1,260 savincaguiteri** ocarataque 42 taai. Ocarataque aisa 3 ajagantsini aisa otsipa niganqui ajagantsi. ‡ **11:3 inquitsaajiaquempaquea jiriquiquijiporoquiro.** Oraticaquea jiriquiquijiporoquiro iroguenti cajenimagori yametaca coramani inquitsaatempaca shimampojancanquitsineca. Manaquea ocanque iraticaca mavite tsavetantatsica incantajiaqueriquea maasano: “Pishimampojancacoventemparo pigovaeguishere.”

§ **11:4 inchato orivo.** Oraquea orivoitsoqui iroguenti yaantajitacaroca oreji itaantajitacaca tsivorentsiqui.

irojocagarantavacaajianaquempa, irooriji iramenajiaqueriquea metojaque iririjia mavite tsavetantatsica atsipetacaajiicarica maasano guintenijatsica quepatsiqui.

¹¹ Cotanquitsiquea avisanaquegueti 3 savincaguiteri aisa niganqui savincaguiteri, ariquea oquijajencajiapojajiri iranijajencare Aapani Irioshi, ariquea icatiajianaja. Maasano amenajiaquerica itsaroamajajianaquequea.

¹² Iroompaquea iquemajiaque icajemacojitaqueriquea inquitequi icantajitaqueri iririjencani: “¡Caacateshiatsi acaniqui jenoqui!” Iroompaquea yoantajianajaro mararo jenoqui inquitequi, yamenamenaitavajiri maasano catsimajiaquerica.

¹³ Ariqueate ocotanaca omoguecamajatanaca quepatsi, osoveaguetanacaquea oshequi tsovironaquipae guinteninintsiqui ichoocavecaguete ocaravaeque 1/10,* imetojajiaque 7,000 caquinte. Irieraquea choocatajatsica itsaroajianaque, ariquea icantajiaque: “¡Caaviji Irioshimajati Aapani Irioshi choocatatsica inquitequi!”

¹⁴ Imaica jac teroncanaca mavitetanquitsica atsipevaetagantsi icantacotsitacaca “¡Ooo!”, cotanquitsiquea taampina arejetapojempa otsipatapojacaca.

Tivorentsi sietetapojatsica

¹⁵ Iroompaquea itivotaque irashivantite Aapani Irioshi sietetapojatsica, ariquea iquenquetsajencajitanaquequea inquitequi inirojencavaeque, icantajiti:

“Querocaguete imajirontajivetacaguete quepatsiqui, imaicaquea irimajirontajempa Amajirote aisa Iguirishitote.

Incoguitempani irimajirontaguitempani, aatoquea isanticoguitejacovaetitsi.”

¹⁶ Iroompaquea namenajiaqueri irirajia 24 iramajiroreja Aapani Irioshi savisaviitanquitsica oraniqui imajirontamentoqui, ariqueate icojianaca itigueroaventajianacari yarejevaequita ivancaqui isaviji itsaromentajianacari,

¹⁷ icantajiguiri:

“Nomajirote Irioshimajaca Agavejamajatatsica, noshineventajiaquempi nocantajiaquempi, ‘Arioteesaa.’

Choocataquempiquea imaica, picocaniquea pichoocati coramani, pincoguitempani pinchoocaguiteni.

Imaicaquea jac pagavejamajaqueroquea maasanopae, peamajaquempi Imajiromajajiate maasano.

¹⁸ Icatsimajiavetacaquea quepatsipaequitica,

cotanquitsiquea imaica aapojaca savincaguiteri pincatsimacatsimatantajiaquemparica iriatimpajia.

Pincantsijiaqueri aisa covaeguishejiatsica metojajiavetanquitsica irantsipetimentajiaquempari ipeacaaguishejiacaca.

Irieraquea paajanirejia tsavetacojiguimpica manaquea pishinetacaajiaquempariquea.

Ariquea pinguempetacaajiaquempari aisa maasano pigomajamajarejia aventaventajiguimpica tsaromentamajaquempica,

irioca caavijica yanaantavaeque, irioca teeca iranaanteji.

Aisa aapojaca pinteroncantajiaquemparica maasano covaemajataqueroquea quepatsi.”

¹⁹ Iroompaquea namenitaro otanarejanaca itemporote Aapani Irioshi inquitequitica, ontaniquiquea intsompogui oconijavaetanaque inchacotanaqui ashi paaquito.† Ariqueate ocotanaca ocantavaetaquiti careti tsijec tsijec, otsantsajencatsarenavaetanaque, serororo serororo, omoguecaguetanaquequea, aisa incojariquiguitevae-tanaquequea.

* **11:13 osoveaguetanacaquea oshequi tsovironaquipae guinteninintsiqui ocaravaeque 1/10.** On-canque onchoocaquegueti 1,000 tsovironaquipae, soveananquitsineca 100. † **11:19 inchacotanaqui ashi paaquito.** Iroguenti ochoocatantacaca mavite mapicota itioncantacaroca Aapani Irioshi paaquito yojocaquenerica Moishishini irashi maasano igonororo.

12

Manquigarentsi aisa casantonqueniniro

¹ Iroompaquea oconijavaetanaquequea inquitequi antsatantaquemparoca quero oncoguetanaquempani oncoramanitapojagueti. Namenitaro manquigarentsi* oquit-saatacocari catsirincaiteri. Iriiraquea taai ocatiitari, aisa amatsaetacocari 12 impo-quiroyite.

² Iroatimpa otsaraquitaquequea agatsaraquijavaetanaja, jero ocajemavaequequea ocantaguetanajiroquea.

³ Ariqueate iconijavaetanaque aisa inquitequi itsipa. Namenitsitariquea casantonqueniniro iquityoncavaequequea icanca iririjeguini. Ochoocaque 7 iguito, oraquea ivaaguetaca 10. Aparopae iguito amatsaejiaca, maasano iramatsaeropae ocarataque 7.

⁴ Ipotecapetajishitanaqueroquea ivetajishi yasacaraagarantsigueteriquea impoquiropae, icaramirincavaetaque 1/3 itacoroitsijigari quepatsiqui. Iriatimpa icoraquepojaque icatiimotapojacaro manquigarentsi irooshipoji ovoacote irishecatsitavaquemparoquea irijanite.

⁵ Ariqueate ovoacoque, iriguenti shiramparijaniqui, iriotaquequea peanquitsineca imajirojiatemajaca maasano caquinteguetatsica, irimajirontantaquemparoi-
imajirontaquejire ipeacaajitaca cavorejari quishomajatatsica,† iragavejaqueriquea maasano teeca inquemisantajigueriji. Iroompaquea nameni inoshiquitsijitari yaajitanaqueri jenoqui isavicaquegueti Aapani Irioshi imajirontamentoqui.

⁶ Oraqueate manquigarentsi oshianacaquea oanaquequea oquitamampororoitapo-
jaquegueti ipeacaacanaroquea Aapani Irioshi onchoocatantaquempacac irojocajitaque-
neroquea oshecaquempacac arejetacovaetapojempa 1,260 savincaguiteri.

⁷ Iroompaquea ochoocaque ashimirintagantsi inquitequi. Iriiraquea Migueri itsipaji-
acari irashivantijitete yashimirintsitapojacari casantonqueniniro. Iriiraquea casanton-
queniniro itsipajiacariquea irashivantinirojitete, yashimirintsivetavacari,

⁸ cotanquitsiquea teequea iragavejaqueriji. Yaitsitari yoguisotoitsijigari, irootaquequea teeca inchoocatantajempaji inquitequi.

⁹ Ipishonquitsijigari quepatsiqui. Iriiraquea casantonqueniniro iriotaquequea ca-
maarini coramaniquitica, ariqueea icocani yamatavimatavivaequeriquea maasano
caquinteguetatsica. Ipajitsitaquea ampatsini aisa Satanashi. Manaqueea ipishonquit-
sijitari quepatsiqui, itsipatacaantsijitari irashivantinirojitete.

¹⁰ Iroompaquea noquemitsitaquea iquenquetsajenajitanaquequea inquitequi iniro-
jencavaequequea ocanca, icanque:

“Imaica jac yaantavajiquea Arioshite.

Imaicaqueea yamenajiqueroquea yagavejamajatiquea iriatimpa, ipeamajatacaqueea

Imajirotemajaca maasano.

Ariqueea iquejetaca Iguirishitote yagavejamajatiquea.

Iroorijite ipishoncajitaqueri isaviji irira ampatsini.

Iriooquea catiimopinivetarica Arioshite savincaguiteriqui aisa pitsecariqui,
itsavetacotapinivetacari apitsaroventarijiate inintaveca inquejetacaantajiaquerime.

¹¹ Cotanquitsiquea iriatimpajia manaqueea yagavejantsijigari iriraja Ovejajaniqui.

Iroguenti aisa yagavejantsijigari Iguenquetsatsare Irioshimajaca itsavetantajiaqueca,
teequea intsaroacaajiguemparonica irimetojajiaquegueti,
manaqueea ipajiacaroquea imetojane.

¹² Irootaquequea pishinetantajianaquempacac aviatimpajia inquitequitica,

* **12:1** Oraticaquea *manquigarentsi* iriguenti oquejeca joriojia. Iriiraquea ovoaqueca iriguenti iquejeca Jesoquirishito. † **12:5** *irimajirontantaquemparoi imajirontaquejire ipeacaajitaca cavorejari quishomajatsica*. Irooqueea oncanque intampishitashimajaqueroquea irimajironquempagueti.

maasano guintenijiatsica inquitequi!
 Aviatimpajiampani guintenijiatsica quepatsiqui irooca inirojaniqui quentijani, jooshi-
 atsi pantsipevaetempashiatsi!
 yaguijitashitapojimpitarite ampatsini.
 Icatsimamajatatiguinimaja,
 iroorijite yamenaque irooshipojitari incatsimajiqueriquea iriatimpa.”

¹³ Iiraquea casantonqueniniro yamenaquegueti ipishoncajiqueriquea quepatsiqui, ipatimatsitanacaroquea manquigarentsi vojairica shiramparijaniqui.

¹⁴ Cotanquitsiquea iroatimpa iviquitajitanaro mavite ovanqui inirovanqui quempevaeca ivanqui shirompitomantaneji cameetsaniji arapitsatimentanaqueriniji ontaniqui onchoocaquegueti oquitamampororoitapojaquegueti, iquempoguijajiqueroquea oraniqui 3 ajagantsini aisa otsipa niganqui ajagantsite.

¹⁵ Oraquea casantonqueniniro ariqueate icotanaca yoguisotojaatsitaroqueea ivagantequi apanatojaavaetanaca anaqueromequeea manquigarentsi.

¹⁶ Cotanquitsiquea amitacotavaquero quepatsi, omorotanacaquea oquijaatantanacaca oja sotojaatanquitsica ivagantequi casantonqueniniro.

¹⁷⁻¹⁸ Ariqueate icotanaca casantonqueniniro icatsimamajatanaqueroqueea manquigarentsi yoayoaitashitantajanacarica irashimirintajiaquempari itsipajia ochoviquijiaqueca, irirajia netsanamajatiroca icantacaantaqueca Aapani Irioshi aisa tsavetantajiguirica Jesoshi netsanamajatiroca itsatacaantaguetica.

13

Mavite covejencavetatsica

¹ Ariquea nocatiaca impanequiqui ocaratsapijataquegueti inirojani quentijani. Iroompaqueea nameniri isotoajatanaque aparo covejencavetatsica, ochoocaque 7 iguitopae, oraticaquea ivaapae 10, yamatsaetacoguetaca ivaahui maasanopae, ocarajiaque 10 iramatsaeropae. Aparopae iguito ochoocaque otioncaca ipajigueca iriatimpa, iquejemanatacariquea Aapani Irioshi.

² Iriatimpa quempeca casecari, oraquea iguitipae quempevaeca iguiti vaavaiconata. Oraqueea ivagante quempeca ivagante león.* Iroompaqueea iriraqueea casantonqueniniro yagavejacaqueri irira covejencavetatsica iragavejamajaqueniji iragavejajiaqueriquea maasano quepatsipaequitica irimajirontapojempa imajirontamentoqui casantonqueniniro.

³ Iroompaqueea apaguitotiro iguito conijavaeque icaraguinajivetacariguete quejetaca irimetojajitaquerime, cotanquitsiquea yogueshijitajiri. Oraqueea yogueshijitajiriguete, ariqueate icohicoitanaca maasano quepatsiquitica yamenamenaitanaquequeea intati, yoguijatacojianaqueri.

⁴ Ariquea itsaromentajanacarica casantonqueniniro, yamenajiaqueritari iriguenti agavejacaaguequeri covejencavetatsica. Iroompaqueea ariquea iquempetacaajanacarica covejencavetatsica itsaromentajanacarica iriatimpa, icantajigui: “Tecatsi quempetemparine iricatica. Tee inchoocateji agavejanquitsineca irashimirintaquempari.”

⁵ Ariquea yagavejacaajitaqueri covejencavetatsica inquenquetsataque iraventacovaequempaquea incantaguishetacovaequeriquea Aapani Irioshi, aisa yagavejacaajitaqueri irimajirontaquempaquea incaratacoguiteni 42 taai.

⁶ Ariquea icantaguishetacovaequeri Aapani Irioshi, iquejetsitariquea ivajiro, Itaverenacorote, aisa maasano guintenijiatsica inquitequi.

⁷ Iroompaqueea yagavejacaajitaqueri irashimirintajiaquempari tsaromentajiacarica Aapani Irioshi, iragavejajiaqueri. Ariquea yagavejacaajitaqueri impeantaquempaca

* **13:2** Pamenero itsavetacojiqueriguete **león** isavivanaqui otsapaqui 5.5 aisa 10.3, iro tsatacaaquempirone.

imajirojiate maasanomajaca caquinteguetatsica, maasano gonorontavacaaguetatsica, maasano cantashitatiaguetatsica iguenquetsatsarejia, maasano quepatsipaequitica.

⁸ Maasano intsaromentajiaquempariquea irira covejencavetatsica—maasano quepat-siquitica teeca intioncacotantemparoji ivajiro ivaperitequi Ovejajaniqui metojaventajiacajica. Coramanitari tequerataguete impeacaajitemparo quepatsi, icanquequea Aapani Irioshi irimetojaventajiacaji, ariquea itioncacojiguetaqueroquea ivajiropae maasano icocanica iranijaguiteni iriatimpaqui.

⁹ Choocaguete guempitatanquitsica iintsija inquemejate.

¹⁰ Quericaa ontampaticatanaqueca irajaitanaqueri irisantanatacojitaqueri, ariqueate irisantanatacotsijitempariquea.

Ariquea inquempetaquempaquea aisa quericaa ontampaticatanaqueca irimetojantajitaquempari tsaampitsantsameni-ro, irimetojitsitantajitempariquea.

Irootaquequea oncameetsatantanaquempaca incoquempani irantsipetacojiaquem-paquea tsaromentajigarica Aapani Irioshi intsaromentamajatanaquempariquea.

¹¹ Iroompaquea namenitsitariquea itsipa covejencavetatsica isotoapojaque quepat-siqui, ochoocaque mavite ivaa quempevaeca ivaa ovejajaniqui, cotanquitsiquea oraquea iquenquetsaqueguete manaquea iquempetacari iquenquetsatiguete casanton- queniniro.

¹² Choocaquea iragavejane quejetaca iragavejane iriquetica covejencavetatsica yagavejavaequeguete, cotanquitsiquea iquemisantaqueri inetsanataqueroquea inin-taguetica iriatimpa. Icantajiaqueri maasano guintenijatsica quepatsiqui intsaromentajiaquempari iriquetica covejencavetatsica peanajatsica icaraguinajivetacariguete que-jetaca irimetojajitaquerime.

¹³ Aisa yonigaantaguequeroquea oacaantantatsica intati. Yasacaraavaequeroquea morecatsantsajencaro quepatsiqui, oquenajencavaetapojaque inquitetapojaqueguete, yamenajiaqueriquea maasano caquinteja.

¹⁴ Yantaguetaque quempeguetacaroca ocativa inintacaaquerica itsipa covejen-cavetatsica peanajatsica icaraguinatantajivetacariguete tsaampitsantsameni-ro, yanijanaque. Irootaquequeate yamatavitantavaetacarica maasano guintenijatsica quepat-siqui, aisa icantajiaqueri impeacaavantorijiaquempari iriquetica covejencavetatsica.

¹⁵ Ariquea yagavejacaajitaqueri yaajencatacaqueri ivaantorite iquenquetsatanta-najaca aisa yagavejantacaca irimetojacaantsijiguempari maasano teeca intsaromentajiguempari ivaantorite.

¹⁶ Aisa icantajiaqueri maasano irisantoncajitaqueriquea iracoqui itincamijempe- quiquitica irooca ivancaqui, maasano caavijica yanaantavaeti aisa teeca iranaanta-jigueti, maasano ashintavaejiatsica aisa teeca irashintavetempaji, maasano yashinta-jitaca aisa teeca irashintajitempariji.

¹⁷ Iroompaquea quericaa teeca irisantoncaticotemparoji ivajiro covejencavetatsica irooca inomerote iracoqui itincamijempequiquitica irooca ivancaqui, aatoquea ya-gavejitsi iroovegarataje aisa aato yojocantajitsi.

¹⁸ Imaica cameetsa pinquenquejamajateroja pintsatimentavaqueroniji noncaman-taquempica imaica. Quericaa tsamajatatsica iintsija intsatavaqueroquea inomerote covejencavetatsica, irootaquequea inomerote caquinte, iroguenti 666.

14

Yamashaijaquequeate 144,000

¹ Iroompaquea namenvetaja namenitsitariquea Ovejajaniqui icatiantsempitantac- aro Shionetsempi, itsipajiacari 144,000 caquinteja itioncacojitaqueca ivancaqui ivajiro Ovejajaniqui aisa ivajiro Iriri.

²Noquemitsitaroquee ampenejencavaetanaca oquenajencavaetapojaque inquitequi quempejencavaeca otaranquigueti ojaaquipaequi, aisa quempejencavaeca careti. Aisa manaquea oquempejencavaecaro ocarajencavaetigueti itencatsajiguirogueti aarepae caramirincajianquitsica.

³Irirajia 144,000 manaquea ichoocajiaque oraniqui imajirontamentoqui Aapani Irioshi, aisa ichoocajiaquegueti irirajia 4 anijaripae aisa iramajiroreja Aapani Irioshi. Yamashajiaqueroquee amashairentsi iroaqueratica. Tee inchoocatimateji tsajiaqueroneca oratica amashairentsi, iriguenti tsajiaqueroquee irirajia 144,000 quenajiapojatsica quepatsiqui ivegaratacotanontajiajica Ovejajaniqui.*

⁴Iricaticajia iriguentijia teeca incovaeguishtantemparoji manquigarentsi, icomajaguitanitari. Irosati yoguijaguijaitanaqueri Ovejajaniqui querocaguete iquenanaqueni. Iriguentijia ipariajiacaca Aapani Irioshi ivegaratacotanontajiajica intsariventamajataquempariniji iriatimpa aisa Ovejajaniqui.

⁵Teequee intojeavagantetimatempaji. Yameniqueriquea Aapani Irioshi shemajataja taaca opaji covaeguishejiavecarica.

Itsavetantaqueca 3 irashivantijitete Aapani Irioshi

⁶Iroompaquee nameniri itsipa irashivantite Aapani Irioshi yaranaquequee inquitequi niganqui itsavetantavaetanaqueroquee Quenquetsatsarentsi Oganejencatatsica choocaguitatsica. Itsavetantimojiaqueri maasano caquinteguetatsica guintenijiatsica quepatsipaequi, gonorontavacaaguetatsica, cantashitatiaguetatsica iguenquetsatsarejia, majirontaguetacarica majirontajiatsica.

⁷Irirajencavaequequee icanca icantajigui: “Imaica pintsaroacaamajaquemparija Aapani Irioshi pincantajiaqueri: ‘¡Caaviji pagavejamajati!’, aapojacatarite incantantajiaquempica quero incojitaquerini maasano caquinteja apaniropae, maasano teeca inquemisantajigueriji irantsipetimentajiaquemparoquea ipeacaaguishejiacaca. Pintsarotentajiaquempariquea, iriguentiquea peacaaguetacaroquea inquite, quepatsi, inirojani quentijani aisa osotoajaguetiguete ojaaquipae.”

⁸Iroompaquee yoguijatsipojacari itsipa irashivantite Aapani Irioshi icanque: “¡Soveaca! Soveaca Vavironia oratica guinteninintsi anaantavetanquitsica, teroncajiaca guintenitantavetaroca irooriji opeacojianaqueri igovaeguishe, ariquea ipajencajianaqueri quepatsipaequitica. Oquempetacaquee irishinquitacaajitaquemparinica inquempevaetacaantajitaquemparica.”

⁹Iroompaquee iquempetsitanaca trestapojatsica irashivantite Aapani Irioshi yoguijatsipojacari, irirajencavaequequee icanca icanque: “Quericaca tsarotentajiaquemparineca covejencavetatsica aisa ivaantorite ipeacaajitaca, aisa irisantoncatacojitaquempariguete ivajiro ivancaqui irooca iracoqui,

¹⁰iriojiatari incatsimajiaque Aapani Irioshi. Aatoquee capichajaniqui icatsimatiritsi, irantsipetacaavaequempariquea intsiaquempaquee camorecariqui onconoquemparoquea asopiri. Iramenamenaiqueri ashivantijite comajashirentanquitsica, ariquea irameneri aisa Ovejajaniqui.

¹¹Oraquee ovogataquempaguete irantsipevaetantajiaquempacaca oncoquempani ompoasecantajencavaequempaquee aatoquee osajaencatimatitsi. Aatoquee imagorejimajigui savincaguiteriqui aisa pitsecariqui, incoguitempaniquea irantsipeguitempaniquea tsarotentajiacarica covejencavetatsica aisa ivaantorite ipeacaajitaca, ariquea inquejejaquempa irantsipevaeguitempani maasano isantoncatacojitaqueca ivajiro covejencavetatsica.”

¹²¡Irootarite inintantajitacaca incoguitempani irantsipetacojiaquempaquee yashintajiacaca Aapani Irioshi, iriguentijia teeca irovashiantimateroji inetsanamajiaqueroquee icantaguetica, aisa coanatsi itsarotentamajatanacariquee Jesoshi!

* 14:3 Pamenero Ev. 9.12.

¹³ Noquemitsitaroqueea opojimajencavaepojaca inquitequi icantajiquena: “Pintioncacoteroja noncanquempica: ‘Aapani Irioshi irishinetacaavaequempariquea metojajianquitsineca imaica tsaromentajiacarica Amajirote.’ ”

Icanquequeea Ishire Aapani Irioshi: “Arimajaguitatsi, irimagorejajiaque yantavaetigueti, ontsipataquempari yantaguetaqueca cameetsari.”

Icapiocacotavaquerogeti tirigoitsoqui aisa ovaitsoqui quepatsipaequitica

¹⁴ Iroompaqueea namenitsitaro mararo oquitamarovaeque ocanca. Ichoocaque savicantacaroca iquempetacari irijanite caquinte. Yamatsaetacari iramatsaero ipeacaajitaca ooro. Yajiricatsicontetaqueroqueea tsaampitsicontero icantajitica hoz. ✧

¹⁵ Isotoanaque teemporoqui itsipa irashivantite Aapani Irioshi, icajemacotaqueri savicanquitsica mararoqui, iririjencavaequequeea icanca icantajigui: “Jac osampatanaquequeea tirigoitsoqui quepatsipaequitica. Imaica iintsija pintotacotantaquitemparojate.”

¹⁶ Iroompaqueea iriraqueea savicanquitsica mararoqui yogarajacoguetaquitiroqueea yaavaquero icapiocacotavaquero maasanopae quepatsipaequi.

¹⁷ Ariqueate isotoapojaquequeea itsipa ashivanti, isotoampojarooqueea teemporo inquitequitica. Ariqueea iquempetaca iriatimpa yajiricatsicontetaqueroqueea hoz tsaampitsicontero.

¹⁸ Iroompaqueea isotoanaquequeea itsipa ashivanti choocatanquitsica aretarequi. Iriatimpa iriguenti quempoguijiroca paamari. Icajemacoqueri ajiricaquerooca hoz tsaampitsicontero, iririjencavaequequeea icanca, icanque: “Iintsija pintotacotantaquitemparojate oratica ovaitsoqui quepatsipaequitica, sampajencatanaquequeea.”

¹⁹ Ariqueea iquempetacaacarooqueea imaica ashivanti, yogarajatsicontetantagueuitarooqueea ovaitsoqui quepatsipaequitica, icapioquitaguetarooqueea maasanopae. Iroompaqueea yaanaqueroqueea ontaniqui osamani ocaraguepojaquegueti tsovironaquipae ochoocaquegueti ipeacaashitantajicaroca yaajatantajitaroca otsironeja. Iroatimpa manaqueea ocantacoqueri incatsimamajajiaqueri Aapani Irioshi maasano teeca intsaromentajiguempariji interoncamajajiaqueri.

²⁰ Ariqueate yagaticamirijaquijiqueroqueea ovaitsoqui, ariqueate ocotanaca osotoajatanaque irajantsi otserajatanacarooqueea yoguijaatantajitaroca oshirancajavaetanacaqueea isaviji, ariquea ocantajavaetanaca jmm arejejavaecarooqueea 1,600 estadiopae.* Osaanajavaetanaquequeea arejejavaecarooqueea ivagantequi quitavaireri.

15

7 irashivantijitete Aapani Irioshi atsipetacaantantajianquitsineca

¹ Namenitsitarooqueea inquitequi otsipa iquempetacaacaro aisa antsatantaquemparoca quero oncoguetanaquempani oncoramanitapojajegueti. ¡Ooshiatsi name-nanaquequeea intati! Namenajiaqueri 7 irashivantijitete Aapani Irioshi atsipetacaantantajianquitsineca, irioqueea amacojiaqueroneca atsipetagantsipae caratapojatsineca, irootarite onteroncantapojempaca igatsimaca Aapani Irioshi.

² Nameniquea aisa quejevetaroca incajare, saancorencajavaequequeea ocanca quempetaca potirinaqui, oconoamorecajacarooqueea paamarimoreca. Ariqueea oraniqui icatintiitaca maasano anaquerica covejencavetatsica aisa ivaantorite ipeacaavaantorijitaca, teetarite intsaromentajiguempariji aisa teequeea intioncacojiteroji onomerote ivajiro ivancaqui irooca iracoqui. Icaramirincavaeque yajiricajiaque iraarepate yojocajiaquenerica Aapani Irioshi.

✧ 14:14 Iran. 7.13. * 14:20 Oraqueea 1,600 estadiopae ovegarataca 300 quiromeeteropae, irooqueea quempetacaro arigueti anijivaete 7 savincaguiterpae, irooca 8. Aparo **estadio** ocaravaeque oquejevecaro 185 meeteropae.

³ Yamashaijaqueroquea iramashaireni Moishishini irajaanire Aapani Irioshi, iroguenti aisa iramashaire Ovejajaniqui, ocanque:

“Nomajirote Aapani Irioshi Agavejamajatatsica, oganejencavaetaca pantaguetaqueca, oacaavaetanaquenaquea intati.

Pitampaticamajataqueroquea maasanopae, iroomajaquea.

Aviguenti Imajirojiate maasano caquinteguetatsica.

⁴ Nomajirote, ¿arimpate inchooaque caarica tsaroacaguimpi? Aato ichoocati.

¿Arimpate inchooaque caarica shineventimpi? Aato ichoocati.

Apaniroquea aviatimpa picoguitani poganejencamajataca, teequea pincovaeguishetimatempaji.

Incoraquecoraqueitashiquempitarite maasano caquinteja intigueroaventajiaquem-piquea intsaromentajiaquempi.

Conijavaetaquetari pitampaticamajaqueroquea maasanopae.”

⁵ Iroompaquea nameniquea otanarejanaca teemporo inquitequi. Iroguenti oquem-petacaro otaverenacorote Paaquito.*

⁶ Isotosotoitantojaroquea irirajia 7 irashivantijitete Aapani Irioshi atsipetacaantantajanquitsineca. Ijamirincajiaque quitsaajiaca quitamarocantari quitsaarentsi saancamagori, tsirencavaeque. Yaguiatacari ineguiqui ichompimashite ipeacaajitaca ooro.

⁷ Ariquea namenitsitariquea aparó anijari, yojocajiavaqueneri ashivantijite 7 taso ipeacaajitaca ooro tseraiquijencavaequeate igatsimaca Aapani Irioshi icoguitani ichoocati.

⁸ Oraquea iroganejencare aisa iragavejane Aapani Irioshi osotoajencavaeque-quea oquempajencavaecaro paamarivoga inirovogajencavaetiguete otsitacajencavae-caroquea intompoguiqui itemporotequi, aritarite ichoocaque iriatimpa. Aato-quea ichoocatitsi quijanquitsineca oraniqui arejevaetanajempataja interoncajianero-taja irashivantijitete Aapani Irioshi carajianquitsica 7 irisocajiaqueroqueti oratica 7 atsipetagantsi yajiricacojiaqueca irantsipetacaantajiaquemparica caquinte.

16

Siete tasopae tseraiquijencavaeca igatsimaca Aapani Irioshi

¹ Iroompaquea noquemiquea iquenquetsajencajitanaquequea irirajencavaeque icanca osotoajencapajaqueroquea teemporo icantajiaqueri 7 irashivantijitete Aapani Irioshi: “Pijateja poapoaitanaqueja pisocajiaquiteroja quepatsiqui igatsimaca Aapani Irioshi oratica tasoquitica carajianquitsica 7.”

² Ariquea yoanaque aparó ashivanti isocaquitiro quepatsiqui yajiricacojiaqueca itasonequi, ariquiteate icojianaca yavejancajianaca maasano caquinteja itioncacojiaqueca ivancaqui ivajiro covejencavetatsica, iriguentijia tigueroaventajiacarica ivaantorite ipeacaavaantorijitaca iquempetacaamajajivecari iriatimpa. Irirajia avejancajianquitsica ooquea yatsipejiacaroquea ogatsica.

³ Iroompaquea irira ashivanti mavitetapojatsica yaacotapanajantiroquea itasone, isocaquitiro inirojaniqui quentijani. Ariquea oquempetanacaro irirajia metojanquitsica. Imetojajianaquequea maasano choocajianquitsica inirojaniqui quentijani iteroncajianacaqueate.

⁴ Ariquiteate irira ashivanti trestapojatsica yaacotapanajantiroquea itasone, isocaquitiro ojaaquipaequi aisa maasanopae osotoajaguetiguete nijatenipae. Ariquiteate ocotanaca opeaguetacaqueate irajantsipae.

* **15:5 oquempetacaro otaverenacorote Paaquito.** Oratica Taverenacoro iroguenti quitsaarentsivanco ochooatantacaca mavicotate mapicota itioncantacaca Aapani Irioshi yojocaquenerica Moishishini.

¹⁷ Iroompaquea irira ashivanti sietetapojatsica yaacotapanajantiroquea itasone iso-caquitiro otampijaguitetaquegueti. Noquemiquea iquenquetsajitanaque inirojencani oanca oquenajencavaetapojaque imajirontamentoqui Aapani Irioshi teemporoqui, icantajiti: “¡Jac teroncipojaca!”

¹⁸ Ariquea ocotanaca otimemecapinique careti ocantapinique timemec timemec, aisa ocantavaetaquiti serororon serororon tsijec tsijec, omoguecavaetanaquequea quepatsi anaavaetanaqueroquea maasanopae moguecaripae omoguecaguetigueti coramaniqui iroaqueragueti icaquintetacaajiqueriquea caquinte arejevaeca imaica.

¹⁹ Ariquea ocotanaca otsecaguetanaquequea oratica guinteninintsi anaajencavaeve-tatsica, otsecaguetanaque oquijipejitanaca 3, aisa maasanopae tsovironaquipae choocaguetatsica quepatsipaequi osoveaguetanaca, ootari teroncaguetacaquea. Iquenquejaqueroquea Aapani Irioshi icovaeguishejiacagueti Vavironiaquitica, icatsimajiaqueriquea yatsipetacaajivaecari, quejevaeca yojocacotsitanariquea tseraja igatsimareja.

²⁰ Maasanopaequea ovogorepae opeagueca, aisa otsempipae teequea irinejajita-jeroji.

²¹ Aisa asacaraatsentseinavaetapojaca incojariquitsentseina oquenapoji jenoqui in-quitequi otenavaequequea oanca, apatsentseinaropae otenataque 40 quiro. Irieraquea caquinteja arimpaqueate icantaguishejianaquequea Aapani Irioshi yamenajiaque-gueti ipeacaimovetacarica yasacaraaquegueti incojariquitsentseina, yatsipemajata-catari.

17

Joanca yamenaquero Vavironia quejetaca iroguenti manquigarentsi cantatsatanta-majatantatsica

¹ Ariqueate icoraquetashiquenaquea aparo ashivanti carajianquitsica 7 ajiricajian-quitsica itasonepae, icantapojaquena: “Caacate namenacaaguequempiroquea quero incojiqueroni incatsimajiquerogueti cantatsatantamajatantatsica savicantaguetaroca otsipajatopaequi oshequipaequi.

² Irieraquea majirontajatsica quepatsipaequitica yoayoaitashipinijiaqueroquea icantatsajiaqueroquea, iroatimpa ocantatsatacaajivacari. Aisa iriaraquea guintenijsica quepatsiqui icovaeguishemajajiacaquea ocovaeguishtacaajivacari.”

³ Iroompaquea yaashirentavaetanaquenaquea ashivanti oquitamampororoitapo-jaquegueti. Ariquea oraniqui namenapojiro manquigarentsi osavicantacari quityon-cari covejencavetatsica. Oraquea itsinoqui maasanotseentena otiontioguishevaetaca vajirontsipae iquejemanatacotantacarica Aapani Irioshi. Ocaravaeque 7 iguitopae, oraquea ivaapae ocaratsitaquea 10.

⁴ Oraqueate manquigarentsi oquitsaaca oitsaare camachoncamorenari aisa quityon-camorenari. Oashigueta oropae, cameetsapiguetaatsica, aisa peererapae. Ajiricaque oshovaote ipeacaajitaca ooro, tseraiquivaeca taaca opajita covaequisherentsipae aisa ogantatsareja.

⁵ Oraquea ovancaqui ochooague otioncacocaqueate ovajiro, cotanquitsiquea tee-quea intsajiteroji taaca opaji ocantacoqueca, ocanquequea:

“Vavironia anaajencavaetatsica,

iniro cantatsatantajatsica,

aisa iroguenti guivorocajencaguetaqueroca covaequisherentsimajaca quepatsiquit-ica.”

⁶ Iroompaquea namenitsitaroquea oshinquitacaró iriraja igomajamajare Aapani Irioshi ometojacaantajiaqueca, iriotari tsavetantajiaquerica Jesoshi.

Ariquea namenaquitiguiro oacaavaetanaquena intati.

⁷ Cotanquitsiquea iriraquea ashivanti icanquena: “¿Queroquea ocoani poantantana-
nacaca intati? Imaicaquea noguisotoguempirojate ocantacoguetaqueca ocatica man-
quigarentsi jeeri aisa covejencavetatsica quijanaquerochoocatanquitsica 7 iguitopae
aisa 10 ivaapae.

⁸ Iriratica covejencavetatsica pinejaqueca, coramani ichoocaveca, imaica tee in-
choocatajeji, cotanquitsiquea incoraquetapanajante inquenantapojemparo omoro oa-
gantavaetanquitsica isaviji, ariquea interoncajiqueri. Coramani iroaqueragueti
ipeacaacarogueti Aapani Irioshi quepatsi ocancani itioncacojiqueroquea ivaperite-
qui ivajiropae maasano coguitatsineca inchoocajiaque. Iriraquea guintenijiatsica
quepatsiqui teeca intioncacojiguempaji ivajiropae mana iroaroaitanaque intati ira-
menajiaquerigueti iriratica covejencavetatsica, iroorijite ichoocavetaca coramani, tee
inchoocatajeji imaica, cotanquitsi inchoocataje.

⁹ “Quericaca tsatanquitsica inquemavaqueroja noncanqueca imaica. Oraquea 7
iguitopae iroguenti ocantacoque 7 otsempi osavicantacaca oratica manquigarentsi.

¹⁰ Aisa iriguenti ocantacoque 7 majirontajiatsica. Imajirontavetaca 5, metojajiaque.
Aparo imajirontaca imaica. Iriraquea itsipa tequerata incoraquetejeji. Oraquea inco-
raquevetapojempagueti taampina irimajirontavetapanajantempa.

¹¹ Iriraquea covejencavetatsica choocavetatsica cotanquitsiquea teequea inchoocata-
jeji imaica, iriotari majirontajatsineca oochotapojatsineca. Ichocaveca coramani,
cotanquitsiquea iroompaquea imetojaque, jero ocantacotantacarica apaguitotiro igu-
ito carajatsica 7. Oncoramanitapojajegueti incoraquepanajante impeapanajantem-
paquea majirontatsica, ariquea interoncajiqueri.

¹² “Oraquea 10 ivaapae pamenaguetaqueca imaica iriguentijia ocantacoque 10 pea-
jianquitsineca majirontajiatsica. Tequerata irimajirontajiguempaji. Ariquea incantaji-
queri impeajiaquempaquea majirontajiatsica intsipatsipaitaquempari covejencavetatsica,
cotanquitsiquea aatoquea osamani imajirontajiga.

¹³ Irirajia 10 majirontajiatsica inquemavacaajiaquempa iroguijaguijaitanaqueri cov-
ejencavetatsica irinetsanajiaqueroquea taaca opaji inintaguetaqueca iriatimpa, im-
patampishicajaqueri irimajironquempaniji.

¹⁴ Iroompaquea iriatimpa incapiocajiaqueriquea maasano intsipatsipaitashiquem-
pariquea irashimirintsijavetempari Ovejaniqui, cotanquitsiquea iriguenti agave-
jantanquitsine Ovejaniqui, iriguentitarite Anaantaguetatsica anaaguetaquerica
maasano anaantaguevetatsica, iriguenti Majirontatsica anaaguequerica maasano
majirontajiatsica. Iriraquea intsipatsipaiquempaca iriguentijia icajemajiaqueca
Aapani Irioshi icoguijiaqueca quisho oahoiquerineca.”

¹⁵ Iroompaquea icanquena ashivanti: “Oraquea otsipajatopae pamenaguetaqueca
osavicantaguetacaca cantatsatantatsica iriguentijia ocantacojiaque maasano caquin-
teguetatsica caramirincajatsica guintenijiatsica quepatsipaequi cantashitatiaguetan-
quitsica iguenquetsatsarepae.

¹⁶ Iriraquea covejencavetatsica intsipatsipaiquempari irirajia majirontajiatsica
ocantacojiaqueca 10 ivaapae, irisemasemaitanaquemparo cantatsatantatsica,
incatsimajianaquero irisapocatsinojiaquero cajaratsinoni oncanquempani. Aisa
irishecajiaquempaquea oteshi, iroompaquea intajiaquero.

¹⁷ Iriotarite cotacaacaro Aapani Irioshi iquemavacaantantajiacaca iroguijaguijai-
queriquea covejencavetatsica impatampishicajaqueri irimajironquempaniji, arejevae-
taquempa onetsanamajaquempa icanqueca Aapani Irioshi.

¹⁸ Oraquea manquigarentsi pinejaqueca imaica manaquea ocantacoque oratica
guinteninintsi anaajencavaetanquitsica agavejajiaquerica maasano majirontajiatsica
quepatsipaequitica.”

18

Interoncajitaquerigueti Vavironiaquitica

¹ Iroompaquea nameniriquea itsipa ashivanti yaguijitapojaque iquenapojaque inquitequi. Yagavejavaeque, yoganejencavaetaca, itsirencaguitejavaetanaqueroquea maasanopae quepatsi.

² Ariquea irijencavaetanaque icajemanaquequea icanque:
 “¡Soveaca! ¡Soveaca Vavironia oratica guinteninintsi anaantavaevetatsica!
 Iriguenti guintenitantanajaro ampatsinijia,
 iriguenti choocatantajiacaro taaca ipajitapae ampatsiniguetsica,
 iriguentijia aisa maasano araguetatsica teeca incameetsagueteji aisa joratantaguetatsica.

³ Iroorijite maasano guintenijatsica quepatsipaequi yoayoaitashijianaqueriquea guintenijavetanquitsica Vavironiaqui,
 ariqueea yaajencatsijiaqueriquea icovaeguishetacaajiavacari, quejetaca imiritsipojacaro oguepishijarote cantatsatantatsica.

Aisa maasano majirontajatsica ishineventajivecari itsipatsipaivecari icovaeguishejiacagueteji covaeguisherentsipae.

Ariqueea iquempejiaca jocantavaetatsica iriatimpajia iquenaquenaivaetapojaque osamanipaequi yamapinijiguiroqueate taaca opajitapae irajaararo oraniqui Vavironiaqui yojocantantapinijiaqueroquea yaantajiacaroquea imentaquipae, caavijitari ishineventajiacaro Vavironiaquitica irajaarantajiaquempaquea.”

⁴ Iroompaquea noquemiquea iquenquetsajencajitanaque oquenajencavaetapoji inquitequi, icantajiti:

“Pisotoanaqueroshiatsi, aviatimpajia nashintajiacaca,
 aatonijite paajencatsijiguirotsi ogovaeguisherejia,
 aatonijite notsipatacaantajiguimpiro nantsipetacaavaequemparoguetei.

⁵ Otigariseavaejiaquero ogovaeguisherejia arejevaetanaca inquitequi.

Ogantaga iquenquejacotiro Aapani Irioshi oveacaaguisherejia.

⁶ Querocaguetei ocojiaquerini itsipajia ariquiteate pinquempetacaquemparoi iroatimpa, cotanquitsiquea caaviji pogaaqueroquea.*

Atsipetacaantajiacatarite, imaica ariquiteate pinquempetacaquemparoquea iroatimpa,

caaviji pogaaqueroquea pantsipetacaquemparoquea,
 quempetaca inconoajatashijitaqueroguetei quepishijamajatanquitsica iroguipiajatashimajatanajitaquemparoi manquigarentsi oshovaotequi.

⁷ Osemesemeitaque ocantacoguitani, aisa ocantacoguitani osavicaventaqueroquea maasanopae onintaguishequeca iroatimpa.

Imaicaquea poguipiashitantajemparoja iroatimpa, panaacaavaetajero antsipevaetajempaquea oshimampojancaguitempani.

Aventacoca oquenquetsashirentaque ocantaque:

‘Manaquea nosavicaque quejequena majirontatsica.

Teequea nonquempetemparoji metojacoro coguitejacovaetatsica,
 aatotarite noshimampojancavaeta.’

⁸ Irootarite onteroncantapanajantempaca taampina Vavironia,
 apajencaro savincaguiteri ontiatiavaetanaquemparoqueate atsipetagantsipae: metojagantsi, shimampojancagantsi, tasettsijenca.

* **18:6** Tee onconigamajateji queri iquenquetsatacaaqueca acaniqui. Arica imaica ipitsocashitanacari majirontajiat-sica itsavetacotaqueca incajaranqui capitoroqui 17 otsapaqui 16, iquenquetsatacaqueri iriatimpajia semajiacaroca Vavironia iquejetacaacaca manquigarentsi. Imaica icanque irantsipetacaajiaquemparoi choocatantajiacaroca.

Iroompaquea irampevoquijajitaquero Vavironia apevoquianisano.
Yagavejamajatitarite Aapani Irioshi Majirontamajatatsica cantomajaquero.”

⁹ Irirajiaquea maasano majirontajatsica quepatsiquitica shineventajiavecaroca Vavironia tsipatsipaivecarica guinteninitantajavetaroca ipeacaaguishejiavaecagueti covaeguisherentsi iriraacojiaqueroquea incajemajianaquequea iramenajiaqueroqueti ampevoquijanaquempagueti oncatipogajencatanaquempaquea.

¹⁰ Omintsaromintsarovaetanaqueri iramenajiaqueroqueti atsipetsipevaetaca, incaticatiivaetanaque ontaniqui, incantajigue:

“¡Ooo! ¡Ooshiatsi, aviatimpajia guinteniguintenitantaroca Vavironia anaajencavaevetatsica tampishivaevetatsica!

Aapojacagueti icantomajajitimpigueti apajaniquiro hora iteroncajitaquempi.”

¹¹ Ariqueate inquempajiaquempaquea aisa jocantantajatsica quepatsipaquitica iriraajianaquempa iriraacojiaqueroquea incajemavaejianaquequea iramenajiaqueroqueti quericampate vegarajiajeroneca irajaararopae.

¹² Quericampate vegarajiajerineca ooro, perata, cameetsapiripae, peerera, aramaroncari quitsaarentsipae ipeacaajitaca quitamaromorenaro irino, irooca aisa carenimorenaro sera, aisa otsipapae quitsaarentsipae camachoncamorenari aisa quityoncamorenari, irooca aisa poncajaguetatsica inchato, irooca aisa taaca opajitapae ipeacaajitaca itsiconte erepaante aisa cameetsaripae inchato, cavorejari quishoguetatsica quejecaroca voronquise aisa yero, aisa mapi icantajitica maremorero.

¹³ Quericampate vegarajiajeroneca casancapaneri canera aisa otsipapae casancapaneri iconoantajiguetaroca ishecajigueta, casancapaneripae itajaitica, mira, poncajencajaripae, vinoja, oreji orivo, shipetapaneri tirigovane aisa tirigoqui. Quericampate vegarajiajerineca caapironcaari, oveja, quitavaireri, aisa itigaritacotantajitaca itigartanaqueca quitavaireri. Quericampate vegarajiajerineca iromperaperaitaca irashintajiaquempaca, yojocantajavetaritari irapicaquintete.

¹⁴ Incantajiaqueri Vavironiaquitica:

“¡Teetarite onchoocatajeji maasanopae pishineventamajajiacaca, jac oteroncaguetanaca maasanopae cameetsaripae pashintajiacaca aisa taaca opajitapae vegaramajatatsica pishineventajiacaca, imaica aatonica pinejajiro aviatimpajia!”

¹⁵ Irirajiaquea jocantantajatsica ashintaguetanquitsica imentaquitsitepae yaantajiacaroca irajaararo yojocantajiaqueroqueti Vavironiaqui intsaroajianaquequea iramenajiaqueroqueti irantsipejiaquempaca, incaticatiivaetanaque ontaniqui. Iriraacojiaqueroquea Vavironia incajemajianaquequea,

¹⁶ incantajigue:

“¡Ooo! ¡Ooshiatsi, guinteninintsi anaajencavaevetatsica!

Yamenajiqueroquea iroaqueragueti quempetaca manquigarentsi onetsanatacotagueti oquitsaatarogueti shipetamorenaro quitsaarentsi camachoncamorenaro aisa quityoncamorenaro ipeacaajitaca irino.

Oshequiavaetanaquequea ocantashitatiaguetanacaquea yavitajigueta aisa inenquequijigueta oconoaca iriguenti ipeacaantajigueta ooro, otsipapae manaquea ipeacaantajigueta cameetsapiripae aisa peerera.

¹⁷ ¡Taampinashiatsi ojatacopanajanti, imaica jac apajaniquiro hora oteroncaguetanaca maasanopae ajaarantavaevetacaca!”

Ariquea inquempajiaquempa maasano taquiajiguiroca quenajarontsi inirotsantsanapae, iriguentijia tetantajigaroca, iriguentijia marinerojia amijiguirica taquiajiguiroca, iriguentijia aisa maasano antavaejiatatsica inirojaniqui quentijani jmm, incaticatiivaetapojaque ontaniqui.

18 Iramenajiavaqueroguete ovogajencavaetanaquempaguete oratica guinteninintsi, incajemajianaque incantajigue: “¡Querocampate onchoocatajени otsipa quempetajem-paroneca iroatimpa anaajencavaetajequeate!”

19 Ariqueate incojianaquempa iroajianaquemparoquea quepatsivane iguitoqui iri-raacojiaqueroquea incajemajianaque incantajigue:

“¡Ooo! ¡Ooshiatsi, guinteninintsi anaajencavaevetatsica!

Irootaquequea choocatacaajiavecarica imentaquitsitepae ashintajiatsica iguenajaro, ivegaraventajiqueroquea taaca opajitapae ishineventajiguetaaca.

¡Taampinashiatsi ojatacopanajanti, imaica jac apajaniquiro hora teroncajiaca maasano guintenitantajigaroca!”

20 Cotanquitsiquea imaica pishinejianaquempaja aviatimpajia inquitequitica.

Pishinejianaquempaja aviatimpajia igomajamajare Aapani Irioshi,

aisa aviatimpajia itigarancanejia Jesoshi, aviguentijia aisa tsavetantajiatsica,

pamenajiaqueriquea iteroncajiakeriquea Aapani Irioshi maasanojia Vavironiaquitica, aviguentijiaquea yompejiaca.

21 Iroompaquea nameniriquea ashivanti agavejavaetatsica yaaqueroquea mapi quejevaeca inirotsentseina shimentapiri itononcantajitaca, ipishoncajataqueroquea iniro-janiqui quentijani, iquenquetsatanaque icanque:

“Ariquea inquempetacaajitaquemparoquea Vavironia oratica guinteninintsi anaajencavaevetatsica,

quejени nopishoncajataqueroaguete mapi, ariquea ompejaencaquempa, aato yamenajitajirotsi.

22 Aatoquea iquemajitajirotsi yampenejencatacaajitajaro aarepa pivogoniqui, Vavironia,

aisa aatoquea isoncajitaji, aatoquea icovijitaji, aatoquea itivojitaji.

Aisa aatoquea ichoocatomatajitsi antavaetajatsineca aviatimpaqui,

aisa aatoquea iquemimajitajirotsi itononcantajitaca.

23 Aatoquea itsivojitajiritsi tsivorentsi aviatimpaqui.

Aisa aatoquea iquemimajitajiritsi aviatimpaqui iriaqueraca manquigatanquitsica aisa imanquigare.

Iroorijite yanaajencajavetaca quepatsipaequi jocantantajiatsica guintenitantajiavequempica.

Pamatavimatavivaequeriquea maasano quepatsipaequitica pimatsitantiguete.

24 Oraniquitarite imetojacaantajitaqueri tsavetantajiatsica aisa itsipajia igomajamajarejia Aapani Irioshi imetojajitaqueca,

aisa maasano itsipajia imetojajitaqueca quepatsipaequi.”

19

Itsaromentajiacari Aapani Irioshi inquitequi

1 Iroompaquea noquemiquea icajemajianaquequea inquitequi icaramirincavaeque jmm, icantajigui:

“¡Antsaromentemparija Yave!*

Iriguenti aavacaji Arioshite Majirontamajatatsica, ochoocataquetari iroganejencare aisa iragavejane.

2 Teequea inchoocateji incatsimatashiquempaca, tampatica yoaquero maasanopae, jero icatsimatantacaroca caavijica ocantatsatanti

* 19:1 Ocanqueguete ocániqui ¡Antsaromentemparija Yave!, iguenquetsatsarequi evereo icanquero ¡Aleluya! Oraquea Yave iroguenti ivajiro Aapani Irioshi. Iguenquetsatsarequi evereojia iriraqueate Aapani Irioshi ipajita YHWH (Yahweh). Ancanquequea Yave. Yoguiptsocajitaqueroaguete quimajareritsaqui iconoagarantaca icanqueriquea Jehová, itsipajia icanqueri Yavé.

jocajencajiaquenerica otsanirore maasano quepatsipaequitica.

Aisa icatsimatimenqueroquea yompetacojiacari irajaanirejia ometojacaantajiaqueca.”

³ Icantsijianajaquea aisa:

“¡Antsaroventemparija Yave!

Iroatimpa oncoquempani ompoasecantaguitempani, aatoquea osajaencatacotimatitsi.”

⁴ Iiraquea 24 iramajirorejia aisa 4 anijaripae itigueroaventajiacari Aapani Irioshi savicanquitsica imajirontamentoqui, itsaroventajiacari icantajigui:

“¡Arimajaguitatsi! ¡Antsaroventemparija Yave!”

⁵ Iroompaquea noquemiquea iquenquetsajencajitanaquequea oquenajencatantapojacaroquea imajirontamentoqui Aapani Irioshi icantajiti:

“¡Pintsaroventajiguemparija Aapani Irioshi,

maasano aviatimpajia irajaanirejia, aviatimpajia pincatsajiguirica,

maasanomajaca: anaantajianquitsica aisa teeca panaanteji!”

⁶ Iroompaquea noquemiquea quempejencavaeca icajemamirincatigueti caquinteja, aisa quempetaca opojimajencajatagueti omporocajatagueti ojaaquiniqui, aisa quempetaca otampishijencatigueti careti ocanquitigueti tsijec tsijec, icantajigui:

“¡Antsaroventemparija Yave!

¡Imajirontamajatacatarite Amajirote Aapani Irioshi Agavejamajatatsica!

⁷ Jaameja ashinevaejiaquempa, ashineventamajajiaquempari

ancantajiaqueri: ‘Aviguenti caaviji poganejencamajataca’,

arejetapojacatarite savincaguiteri iraanquemparoca Ovejajaniqui inintane,

iroatimpaquea netsanataconi.

⁸ Icavintsajajiquero yojocajiquenero oquitsaacaca

ogameetsamorenareni irino saancamorenavaeque tsirencamorenari.”

Oraquea irino ocantacoque icomajamajajiacagueti igomajamajarejia Aapani Irioshi.

⁹ Iroompaquea icanquena ashivanti: “Pintioncacotavaqueroja ocatica: ‘Irishineta-caavaejitaquempariquea maasano icajemajitaqueca irishecajiaquempa irogavisajitaquenerigueti Ovejajaniqui iraaquerogueti inintane.’ ” Aisa icanquena: “Ocaticaquea pitioncavaqueca imaica iroguenti iroomajaca, iroguentiquea Iguenquetsatsare Aapani Irioshi.”

¹⁰ Notigueroaventavetanacari ashivanti nontsaroventaquemparimequea, cotanquitsiquea iriatimpa icanquena: “Aatoquea piquejetirotsi imaica, naroguentitari papi-aajanirentsiteni, aritarite noquempetajimpitarite aviatimpa aisa papitsaroventarijiteni tsavetantajiguirica Jesoshi aisa netsanamajatiroca itsatacaantaguetic. ¡Iriompani pintsaroventempa Aapani Irioshi! Iroorijite itsavetantica Jesoshi, irootaquequea tsatacaashirentaguetiquerica tsavetantajiatatsica.”

Shiacotantacarica quitamarori quitavaireri

¹¹ Iroompaquea nameniroquea inquite tanarejaca, conijani quitavaireri quitamarori. Iiraquea shiacotantacarica manaquea icantajiqueri Netsanamajatiroca Iguenquetsatsare, aisa icantajiqueri Iriomajaca, itampaticamajatirotari maasano ican-tomajantigueti aisa yashimirintagueti.

¹² Oraquea iroquija quempetaca paamarimoreca. Oraqueate iguitoqui ochooque oshequiavaequequea iramatsaero. Aisa tioncavaeca ivajiro teeca intsajiteroji, iriguentiquea tsataquero.

¹³ Oraquea iquitsaacaca yajavicajiqueca irajantsiqui. Oraquea ivajiro iroguenti Iguenquetsatsare Aapani Irioshi.

¹⁴ Yoguijajiapojaqueri igoaretajiate choocajiatsica inquitequi. Iquejetavacaajiaca quitsaajiaca aramaroncari quitsaarentsi ipeacaantajitaroca irino, quitamaromorenavaetaque saancamorenavaeque. Ishiashiaitacotantajiacari quitavaireripae quitamarori.

¹⁵ Oraquea ivagantequi iriatimpa osotoatsantsamenivaegue itsaampitsantsamenirite yamecamajajitaqueca iragavejantajiaquemparica maasano quepatsipaequitica. Impeamajataquempaqueate Majirontamajatatsica irimajirontantaquemparo imajirontaquijire ipeacaajitaca cavorejari quishomajatatsica,[†] iragavejaqueriquea maasano teeca inquemisantajigueriji. Incatsimajiavaequeriquea irantsipetacaajiaquempari inquempetacaajiaquempariquea agaticamirijaquitiroca ovaitsogui. Iriguentitarite catsimajiaquerine Aapani Irioshi Agavejamajatatsica.

¹⁶ Oraquea iitsaarequi aisa ivoriqui ochoocaque otioncaca ocanque:

“Majirontamajatatsica anaaguequerica maasanopae majirontajatsica, Anaamajatatsica anaaguequerica maasano anaaguevetanquitsica.”

¹⁷ Iroompaquea nameniriquea itsipa ashivanti catiaca catsirincaiteriqui icajemacoji-aqueriquea maasano arajianquitsica quempeguevetarica sheetyaoni, iririjencavaeque icanca icanque: “¡Caacateshia pincapiocajiaquempa pishecajiaquempa irojocajiaquem-pica Aapani Irioshi!

¹⁸ ¡Pishecajiaquemparoquea iteshi majirontajatsica aisa jivajivaitirica igoaretajiate, aisa itsipajia tampishiri, aisa iteshi quitavaireripae aisa shiacotantajiacarica! ¡Pishecajiaquempariquea maasano, irioca yashintajitaca irioca teeca irashintajitempariji! ¡Pishecajiaquempariquea anaaguevetanquitsica aisa teeca iranaajencavaeteji!”

¹⁹ Iroompa namenitsitari covejencavetatsica, aisa imajirojiate quepatsiquitica itsipajiacari igoaretajiate, iroguentiquea icapioquimentajiacarica irashimirintajiaquempari shiacotantacarica quitavaireri aisa igoaretajiate.

²⁰ Iriiraquea covejencavetatsica yaajiqueru iconoacaantajicari tsavetantatsica amataavaetatsica nigaimotaquerica oacaantantatsica intati. Oraquea oacaantantatsica intati irootaquequea yamatavimatavivaetantacarica maasano itioncacojiqueca ivajiro covejencavetatsica, aisa maasano tsaromentajiacarica ivaantorite ipeacaajitaca iquem-petacaamajavetajari iriatimpa. Mavitequea ipishoncajiqueru anijatseentenatiraja osamimicatsantsamorecavaequegueti asopiri, quempeni incajaremorecari.

²¹ Iroompaquea iriraquea shiacotantacarica quitavaireri mana imetojantacari itsipajia itsaampitsantsamenirite sotoatsantsamenitanquitsica ivagantequi. Maasanoquea araguetatsica shecaguetarica iteshipae yomporoguijaventajiacari ishecajiacari, iquemamajajianaca.

20

Iyavitacojiqueru Satanashi 1,000 ajagantsini

¹ Iroompaquea nameniri itsipa irashivantite Aapani Irioshi iquenapojaque inquitequi yaguijitapojaque, yajiricaquero iniropetana cavorejatsari aisa yavi iriyavirejantaquemparo oomoro oagantavaetanquitsica isaviji.

² Ariquea yaapojaqueriquea casantonqueninero yoishotapojaqueru incoramanitacovaetanaquequea 1,000 ajagantsini. Iriotaquequea camaarini coramanitica, iriotaque ampatsini pajitatsica Satanashi.[☆]

[†] 19:15 *Irimajirontantaquemparo imajirontaquijire ipeacaajitaca cavorejari quishomajatatsica.* Irooquea ocanque intampishitashimajaqueroquea irimajironquempagueti. [☆] 20:2 Jen. 3.1, 13.

³ Iroompaquea ipishonquitsitari omoroqui oagantavaetananquitsica isaviji, yashita-cotsitari iyavitacotsitari. Ivinchajacoseyotsitari aatoniji isotoaji iramatavimata-vivaetajeri quepatsipaequitica arejevaetaquemparo anaavaetanajeguete 1,000 ajagantsini. Oncoramanitapojajeguete intanarejacotsijivetajempariquea, cotanquitsiquea capichaji inchoocavetapanajantempa.

⁴ Ariquea namenitsitaro majirontamentontsipae, isavisaviitantacaro irirajia ipeacaajitacaca jivajivaitatsica icantajitaqueca irinetsanajiaqueriquea maasano. Aisa namenajiaqueroquea ishirejia ijitorejimentajiguequeca itsavetantajiaqueriguete Jesoshi, aisa itsavetantajiaqueroguete Iguenquetsatsare Aapani Irioshi. Iriatimpajia teequea intsaroventajiguempariji covejencavetatsica aisa ivaantorite ipeacaajitaca iquempeta-caamajatajaca iriatimpa, aisa teequea irisantoncatacotsitempariji ivajiro covejencavetatsica ivancaqui aisa iracoqui. Ariquea namenajiaqueri itancoretancoreitanaji it-sipatsipaitanajari Quirishito ipeajiaqueate majirontajiatatsica arejevaetanaquempa aapojajempaguete 1,000 ajagantsini.

⁵ Itsipajia metojajivetanquitsica tequerataquea intancoretancoreitajeji, iriatimpajia manaquea intancoretancoreitanaje anaanajempaguete ocativa 1,000 ajagantsini. Ocativa-quea nocanquempica imaica iroguenti icantajitica “iroquetica intancoretancoreitananajempaca”.

⁶ Iriraquea Aapani Irioshi irishinetacaavaequempariquea irirajia tancorejantajanajemparoneca oratica icantajitica “iroquetica intancoretancoreitantanajempaca”, iriguentijiaquea comajamajajiatatsica. Aatotarite agavejajajiri “mavitetapojatsineca metojagantsi”, manaquea impeajiaquempa quea isaserrotejiate Aapani Irioshi aisa isaserrotejiate Quirishito. Aisa intsipatsipaitajempari impeacaajiaquempari majirontajiatatsica irimajirontajiaquempa 1,000 ajagantsini.

Intsijaiqueriquea Satanashi

⁷ Oraquea anaanaavaetanajeguete 1,000 ajagantsini irisantanatacorejajitajeriquea Satanashi.

⁸ Iroavaetanaquequea intsitacaguetejavaetanaquemparoquea quepatsi iramatavimata-vivaetanaqueriquea maasano caquinteguetatsica incapiocajiaqueriniji irashimir-intajiaquempariji. Iramatavijaqueri Gogue aisa Magogue incapiocantajiaquemparica igoaretajiate, intirorencavaetanaquempa quea incaramirincajiaque jmm inquempavaetanaquemparoquea impanequi ocaratsapijajatapojaqueguete inirojani quentijani.

⁹ Iquenaquenaivaetapojaque quepatsipaequi itsitacaguetejavaetanacaroquea, yanquitsaetacovaetapojacari tsaroventajiacarica Aapani Irioshi aisa oratica guintenininti ipintsamajataca, cotanquitsiquea yasacaraashijitaqueri paamari oquenapojaquequea inquitequi otsijiaqueri apevoquijavaetaqueriquea.

¹⁰ Iriraquea ampatsini amatavimata-vivaetaquerica ipishoncajitaqueriquea osamim-icatsantsamorecavaequetuete asopiri quempeni incajaremorecari ichooaqueguete covejencavetatsica aisa tsavetantatsica amataatsica. Incoguitempaniquea irantsipe-guitempani savincaguiteriqui aisa pitsecariqui, aatoquea ivejencarejacovaetajatsi.

Ontaniqui oguitamaroreni majirontamentontsi qui iramenacotsijiacajiro antajiaqueca

¹¹ Iroompaquea nameniroquea iniroshitaponcarovaeca majirontamentontsi oguitamaroreni. Ariquea ichooaque savicantacaroca. Oraquea quepatsi aisa inquite ariquate ocotanaca opeimocari, teequea irinejimajitajeroji.

¹² Ariquea namenajiaqueriquea metojajianquitsica, caavijica yanaajencavaeti aisa teeca iranaajencavaeteji, icatintiitimojiacarocaro majirontamentontsi. Nameniroquea ampinaicarejaguetacaquea paperipae itioncacotantajicaroca ipeacaaguetacaca maasano caquinteja. Iroompaquea ampinaicarejaca otsipa paperi itioncacotantaguecaroca ivajiro-pae maasano coguitatsineca inchoocaguiteni. Iriraquea

savicanquitsica imajirontamentoqui icanque queroquea incojitaquerini aparopae caquinte, iroguentiquea yoguijatacotaque itioncacotantajicaca paperiqui.

¹³ Ariqueate iquempetacaajiacari maasano metojajiatsica choocajiatsica inirojani quentijaniqui, icajemajiaqueri yoguisotosotoajaitaqueriquea, iriguentijia aisa maasano metojajianquitsica choocavaetanquitsica Areshiqui* icajemajiaqueriquea icapiocajiaqueriquea, ariqueea icanque quero incohincoiquerini aparopae, yoguijatacotanaqueroquea tioncanquitsica ipeacaajiacaca caquinteja tequeratagueti irimetojeji.

¹⁴ Oraquea Metojagantsi aisa Areshi ipishoncajiquero incajaremorecariqui. Oraticaquea incajaremorecari iroguentiquea icantajitica “mavitetapojatsineca metojagantsi”.†

¹⁵ Ariqueate iquempetacaajitacariqueea aisa maasano teeca intioncacotempaji paperiqui itioncacotantajitacarica ivajiropae maasano coguitatsineca inchoocaguiteni. Maasano teeca intioncacotempaji ipishoncajitaqueri incajaremorecariqui.

21

Iroaqueraro inquite aisa quepatsi

¹ Iroompaquea namenaguequeroquea iroaqueraro inquite aisa iroaqueraro quepatsi. Oraquea iroquetinica inquite aisa iroquetinica quepatsi jac opeagueca. Ariqueea oquempetaca inirojani quentijani iroatimpa jac opeagueca.

² Naatimpa nameniroquea aguijitacotapojaque iroaqueraro Jerosare caavijica oganejencamajataca yashintacaca Aapani Irioshi, oquenapojaque inquitequi iriatimpaqui. Netsanatacovaecaqueea ocanca quempevaeca onetsanatacovaetagueti manquigarentsi irooshipojaquegueti irimanquigatemparo nintiroca.

³ Iroompaquea noquemiquea iquenquetsajencajiquequeea oquenajencavaetantapojacaro majirontamentontsi. Carajencajeguiniquea ocanca icantajitaque: “¡Pameneroja! Imaicaqueea oratica Itaverenacorote Aapani Irioshi ochoocatimojiaqueri caquinteja, iriatimpa iriguintenitimojiaquempari, impeamajatajeri igaquintejiate incoquempani inconoavaequempari. Iriatimpajia impeamajatsitempari Irioshimajate.

⁴ Iriraquea Aapani Irioshi irisheoquijiajeneriquea maasano ijaquija, aatoqueea ijaquitajitsi. Aatoqueea imetojajiajitsi, aato irajaijaatsi, aatoqueea icajemajiajitsi, aisa aatoqueea icatsijiajitsi, maasanotari coramaniquitica jac anaaguetanaca.”

⁵ Ariqueate iriraquea savicanquitsica majirontamentontsiqui icanque: “¡Pameneja, niroaqueratacaaguetajeroqueea maasanopae!” Aisa icanque: “Pintioncacotavaqueroja maasanopae nocantaguequeca, iroguentitari iroomajaca, teequeea namataguempaji.”

⁶ Iroompaquea icanquena: “Imaicaqueea agataca. Naroguenti *Alfa* aisa naroguenti *Omega*,* nocoguitanitarite nochoocaguitini, aisa aatoqueea nosanticoguitejacovaetajitsi. Quericaca miretanquitsineca nojocaqueneriquea irimiraqueroqueea motojaaro anijacaantantatsica. Aatoqueea ivegaraventirotsi, manaqueea nojocashiquenempari intati.

⁷ Quericaca tampishitashijiaqueroneca maasanopae coraquetashijiaqueringe noncavintsajaqueriquea nojocaqueneri maasano oraticapae, irashintajemparoquea. Impeamajatsitena Irioshimajate, naatimpaqueea nirijanitsitempari.

⁸ Cotanquitsiquea maasano tsarontijia intsiajiaquempaquea osamimicatsantsamorecavaequetu asopiri, quempeni incajaremorecari. Ariqueea iquempejiaca teeca

* **20:13 Areshiqui.** (Pamenero 1.18; 6.8.) Oraquea Areshi iroguenti ichoocajiaquegueti metojatsica tequeratagueti impishoncajiteriji camorecariqui. Irira guiriego icanquero *hades*, iguenuetsatsarequi evereo icanquero *sheol*.

† **20:14 mavitetapojatsineca metojagantsi.** Pamenero 2.11; 20.6; 21.8. * **21:6 Alfa aisa Omega.** Oratica *alfa* iroguenti pariapojaroca *abecedario* irashi guiriego. Oratica *omega* iroguenti carapojiroca.

intsarotentajiguenaji, iriguentijiaca coguishemajajiatsica, iriguentijiaca metojantajiatsica, iriguentijia cantatsatantajiatsica, iriguentijia matsinti aisa itsipajia aventajiacaroca iragavejanepae ampatsinipae, iriguentijiaca peajiaquerica itsipa irioshivijitashicaca, iriguentijiaca aisa maasano tsojenti. Oraqueate intsiajaquempagueti osamimicatsantsamorecavaequegueti iroguentiquea icantajitica ‘mavitetapojatsineca metojagantsi’.”

Iroaqueraro Jerosare

⁹ Iroompaquea icoraquetashiquenaquea aparo ashivanti tsipajiacarica incajaranqui itsipajia ashivantijite socajiaqueroca oratica 7 atsipetagantsi carapojatsica yajiricacojiaqueca yatsipetacaantajiacarica quepatsipaequitica, icantapojanaquea: “Caacateja nonigaaquempiroquea inintane Ovejajaniqui irimanquigaquempaca.”

¹⁰ Ariquea yaashirentavaetanaquenaqueate inirotsempivaetatsica agasataavaetanquitsica. Yonigaaguequenaroqueate Jerosare, oratica guinteninintsi caavijica oganejencamajataca yashintacaca Aapani Irioshi, oquenapojaque inquitequi ichoocatigueti Aapani Irioshi aguijita cotapojaque.

¹¹ Cantavaequequea tsiren otsirenquitsitaroquea iroganejencare Aapani Irioshi, quempevaeca mapi vegaravaetatsica, quempetacaró jaashipe, saancorencapiri.

¹² Anquitsaetacaroquea iniropticavaequequea tantontsi ocaravaequequea jenoqui, osotomorosotomoroataca ocaravaeque 12, aisa ichoocataque 12 ashivanti quempoguijaqueroca osotomoropae. Aisa aparopae ashitacoropaequi chooca itioncacojiqueroquea aparo ivajiropae irijanijiate Ishiraeri, ariqueate icarajiaque iriatimpajia aisa 12.

¹³ Oraquea tantontsi chooca 3 osotomoropae tampaticataqueroca isotoguigueti catsirincateri. Oraquea iquijigueti ochoocaque 3. Ariqueate oquempetaca ocatoncopojaquegueti ochoocaque 3, aisa oquirincapojaquegueti ochoocaque 3.

¹⁴ Oraquea isaviji otantotacagueti ochoocaque 12 mapi oquishomajatantacaca. Aparopae ochoocaque itioncacojiqueroquea aparo ivajiropae itigarancane Ovejajaniqui, ariqueate icarajiaque iriatimpajia aisa 12.

¹⁵ Irieraquea ashivanti quenquetsatacaquenaca yajiricaquero cavorejaquijiri igomarotantajitaca ipeacaajitaca ooro, irigomarotantaquemparoca Jerosare, aisa osotomoropae aisa otantopae.

¹⁶ Oraquea Jerosare ochoocaquequea 4 omerequipae oquejetsantsatavacaaca. Igomarotaqueroquea ocaravaeque 12,000 estadiopae† ogatsantsacapae aisa ojenoquivaequegueti, ariquea oquempetavacaaca.

¹⁷ Iroompaquea igomaroqueroquea ocarapiricaque otantotacagueti ocaravaeque 144 catsantsaconaquirentsi.‡ Oraquea igomarotantajitaca igomarotantacaca ashivanti, iroguentiquea igatsantsaconaquire caquinte.

¹⁸ Oraquea otantotsaequitacaca iroguenti ipeacaajitaca mapi jaashipepi. Oraquea Jerosare saancorencavaeque oanca cantavaequequea tsiren, iriguentiquea igotantquitsi ooromajaca teeca inconoantajitempariji otsipa cavorejatatsica.

¹⁹ Oraquea mapipae isaviquitica oquishomajatantacaca otanto iroguenti cameetsapiripae vegaramajatatsica pajiguetsatsica jaashipepi, sapiro, aagata, aisa esemerarera;

²⁰ aisa oonise, coronarina, quirisoorito, veriro, topashio, quirisoperasa, jashinto aisa amatishita. Ariquea ocaravaeque 12.

† 21:16 Oraquea **12,000 estadiopae** ovegaratataca 2,200 quiromeeteropae, irooquea quempetacaró arigueti anijivaete 55 savincaguiteripae. Aparó **estadio** ocaravaeque oquejevecaró 185 meeteropae. ‡ 21:17 **144 catsantsaconaquirentsi**. Iroguenti oquejetsantsavecaró 65 meeteropae.

²¹ Oraquea 12 osotomoropae iroguentivaeque peerera, § aparopae iroguenti ipeacaantajitaro aparo peerera. Oraquea quenavoquirontsi iquenaquenaitantamajatacaca iriguentini ooromajaca teeca inconoantajitempariji otsipa cavorejatatsica, saancorerejavaequequea ocanca quejevaeca potirinaqui.

²² Tee nonejeroji teemporo ontaniqui guinteninintsiqui, iroguentitari iguinteni Amajirote Aapani Irioshi Agavejamajatatsica itsipatacari Ovejajaniqui, iriguentijiatari quempetajaroca teemporo.

²³ Irraquea catsirincaiteri teequea irinintajitajeriji irivoreacotantajequeate. Ariquea iquempetaca taai teequea irinintajitajeriji inquitasetacotantajequeate, iroguentitarite savincaguitetacaavaequeroquea iroganejencare Aapani Irioshi, ari iquejetaca aisa Ovejajaniqui iriguentitarite otsivore.

²⁴ Maasano caquinteguetatsica iranijinijitantanaquemparo otsirencare. Aisa incoraquecoraqueiquequea maasano majirontajiatsica quepatsipaequitica iramajencatapojajenero iroganejencare, irishineventavaetapojajempari Aapani Irioshi.

²⁵ Aatoquea yashijitajirotsi osotomoropae, aatonica inejajitajiro pitsecari, oncoguitempani osavincaguiteguiteni.

²⁶ Incoraquecoraqueiquequea maasano caquinteguetatsica quepatsipaequitica iramajencatapojajenero iroganejencare, irishineventavaetapojajempari Aapani Irioshi.

²⁷ Aatoquea oquijajencatimatitsi oraniqui covaeguisherentsipae. Aatotarite iquijitsi antaguishetatsica teeca oncameetsateji aisa tsojeajiatsica, iriguentitarite choocajijat-sine tioncacotanquitsica ivajirojia ivaperitequi Ovejajaniqui itioncacotantajiguecaroca ivajirojia maasano coguitatsineca inchoocaguiteni.

22

¹ Ariqueate yonigaaquenaroquea ojaaqi saancorencajarimajaca anijacaantantatsica osotoajatantapojacaro imajirontamento Aapani Irioshi aisa Ovejajaniqui,

² oniganquirejavoquijaatanaquero quenavoquirontsi iquenaquenaitantamajatacaca. Oraquea omavitetsapijaatapojaquegueti ochooaque ocatintiitaca inchato anijacaantantatsica. Aparopae taai opishivoroquijacovaetantanacaroquea osovena ocantashitatiagueaquea. Oraquea ovanapae iroguenti iroveantajianajempaca maasano caquinteguetatsica.

³ Aatoquea ochoocatimatajitsi incantomajacotimentajiquerica, aritari onchooaque oraniqui imajirontamento Aapani Irioshi aisa Ovejajaniqui. Irirajia irajaanirejia incoguitempani irisavicaventaguiteterini.

⁴ Iramenavorojiapojajeri, aisa intioncacotsijitempari ivajiro Aapani Irioshi ivanca-paequi.

⁵ Aatoquea ochoocataji pitsecari. Irraquea choocajiatsica oraniqui aatoquea icoguitejacojiaja intsivojiajjeri, aisa aatoquea inintajitajiritsi catsirincaiteri intsirencaguitetacotantajequeate, incoguitempanitari intsirencaguitejacotantaguiteni Amajirote Aapani Irioshi. Iriatimpajia impejaiaquempaquea majirontajiatsica incoguitempani irimajirontajiaquitempani.

Irooshipojishiatsi incoraqueatajate Jesoquirishito

⁶ Iroompaquea icanquena [ashivanti]: “Maasanopae ocativa pitioncaqueca imaica iroguenti iroomajaca, teetari amatavitanteji. Irraquea Amajirote Aapani Irioshi quenquetsashirentacaajiguirica tsavetantajiatsica itigarancaqueri irashivantite ironigaaguequeneriquea irajaanirejia querocaca oncoguetanaquempanti, irooshipojishiatsi aapojempa.” [Icanquetari Jesoshi:]

§ **21:21 peerera.** Chooca quantijaqui quejevatarica chopiro. Onquijaquerigueti capichaji impanequi, aseraqueri, ari intritapiniquero cameetsaniji oncarenitanaque. Oncoramanitapojajegueti ompeanaquempa icantajitica peerera, quitasaancorerecavaeque, impeacaquemparo nenquetsiqui.

⁷ “¡Arimajaguitatsi noncoraquetaje taampina! ¡Irishinetacaavaejiquempariquea guijataco-majaqueroca maasanopae itsavetacotsijitacaca ocatica paperiqui!”

⁸ Naatimpa Joanca, naroguenti nejaguetaqueroca aisa quemaguequeroca maasanopae ocaticapae. Irooquee noquemaguequerogueti, aisa nonejaguetaguerogueti notigueroaventavetanacariquea ashivanti onigaaguequenaroca nontsarovenquemparime.

⁹ Icantsitana: “Aato piquejetirotsi imaica, naroguentitari papiaajanirentsiteni, noquejetajimpiquea aviatimpa aisa papitsarorentarijiateni tsavetantajiaqueroca icanquea Aapani Irioshi, noquejetajari aisa maasano quemisantajiguiroca tioncanquitsica ocaniqui paperiqui. ¡Iriompani pintsaromentpa Aapani Irioshi!”

¹⁰ Aisa icanquena: “Aatoja pivinchajacoseyotiotsi* pitioncacotaqueca paperiqui, irooshipojaquetari aapojaquempa onetsanamajatanaquempaqueea.

¹¹ Iriaquea peacaaguishetaroca covaeguisherentsipae iintsija incoguitempani inquempetanaquempa imaica. Iriaquea coguishemajatatsica iintsija incoguitempani incoguishemajatanaquempa. Ariquee inquempetaquempaqueea peacaatsica cameetsaripae, iintsija incoguitempani inquempetanaquempa imaica. Aisa iriraquea comajamajatatsica iintsija incoguitempani incomajamajatanaquempaqueea.”

¹² “Arimajaguitatsi noncoraquetaje taampina, novegarapojajeneri maasano caquinteja querocaca yantaguetaqueca apaniropae.

¹³ Naroguenti *Alfa* aisa naroguenti *Omega*, † naroguenti jivatatsica aisa naroguenti carapojatsica, nocoguitanitarite nochoocaguitini, aisa aatoquee nosanticoguitejacov-aetajitsi.

¹⁴ “Irishinetacaavaejitaquempariquea ajaquiroca iitsaare, irishinetsijitempari irishecajiaquemparoquea osovena inchato anijacaantantatsica, aisa inquijaquijaitantapojajemparo osotomoro guinteninintsi.

¹⁵ Cotanquitsiquea incoguitempani inchoocajiaque sotsiqui maasano coguishemajatatsica, matsinti, cantatsatantajiatatsica, metojantajiatatsica, tsaromentajiavetarica irioshivijirentsi, aisa maasano shineventajigaroca yamatavitantajigui.

¹⁶ “Naroguenti Jesoshi, notigarancaqueriquea nashivantite incamanquempiquea maasanopae pitioncacotaqueca cameetsaniji paacaantajiaqueneriniji tsaromentajiatatsica capiocapinijiatatsica tsovironaquipaequi. Naroguenti ichoviquitanaqueca Taavini, aisa naroguenti shigompiri tsirencamenquitatsica pitsecaguitetirajagueti.”

¹⁷ Iriaquea Ishire Aapani Irioshi aisa inintane Ovejajaniqui icantajigui: “¡Caacate!” Ariquee inquempetanaquempa quemajiaqueroneca incantajigui: “¡Caacate!” Iriaquea mirejiatsica incoraquecoraqueiteja; irira nintajianquitsica, iintsija irimirajiguemparo oja anijacaantantatsica, aatoquee ivegaratirotsi, manaquee irojocashijiquenempari intati.

¹⁸ Maasanoquee quemajiaqueroneca maasanopae ocatica itsavetacotsijitacaca ocaniqui paperiqui noncantajiaqueri: Quericagueti gavitashitajemparoneca tioncanquitsica ocaniqui, iriraquee Aapani Irioshi irogavitacaantavaetajempari atsipetagantsipae itsavetacotsijitacaca ocatica paperiqui.

¹⁹ Aisa quericagueti jocagaranqueroneca tioncancotanquitsica ocaniqui paperiqui, iriraquee Aapani Irioshi iraapitsatsitempari osovena inchato anijacaantantatsica irishecacuempameca, aisa aatoquee inejajirotsi guinteninintsi yashincaca Aapani Irioshi tioncacoguetanquitsica ocaniqui.

²⁰ Iriaquea oguisotoamajaqueroca maasanopae ocatica icanque: “Jeeje, noncoraquetaje taampina.”

Arimajaguitatsi. ¡Caacateshiatsi, Nomajirote Jesoshi!

* **22:10** Ocanquegueti *Aatoja pivinchajacoseyotiotsi*, iroguenti oncanque “Aatoja pomanirotsi”. † **22:13** *Alfa aisa Omega*. Oratica *alfa* iroguenti pariapojaroca *abecedario* irashi guiriego. Oratica *omega* iroguenti carapojiroca.

²¹ Irireaquea Amajirote Jesoshi incavintsajamajaquempiquea maasano aviatimpajia. Ariquea oncoquempani.